




God-are Jögoru l'oho

Omie New Testament



Contents

FRT	1
MATTHEW	3
MARK	58
LUKE	93
JOHN	152
ACTS	193
ROMANS	249
1 CORINTHIANS	275
2 CORINTHIANS	300
GALATIANS	316
EPHESIANS	327
PHILIPPIANS	336
COLOSSIANS	342
1 THESSALONIANS	348
2 THESSALONIANS	353
1 TIMOTHY	356
2 TIMOTHY	363
TITUS	368
PHILEMON	371
HEBREWS	373
JAMES	393
1 PETER	400
2 PETER	407
1 JOHN	412
2 JOHN	418
3 JOHN	419
JUDE	420
REVELATION	422

God-are Jögoru I'oho
The New Testament in the Omie language of Papua New Guinea
Nupela Testamen long tokples Omie long Niugini

copyright © 1991 Wycliffe Bible Translators, Inc.

Language: Ömie (Omie)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

ISBN 978-1-5313-0040-1

PDF generated on 20 Sep 2016 from source files dated 20 Sep 2016

a68769b4-6180-5825-a17e-676d8f6a7efa

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is “*filled with the knowledge of the glory of the LORD, as the waters cover the sea.*” (Habakkuk 2:14)

God-are Jögoru I'oho
The New Testament in the Omie language of Papua New Guinea
Nupela Testamen long tokples Omie long Niugini

God-are Jögoru I'oho

The New Testament in the Omie language of Papua New Guinea
[aom]

Translation by Wycliffe Bible Translators

© 1991 Wycliffe Bible Translators, Inc.

Print publication, 1991 by Bible League International

Web version
© 2013, Wycliffe Bible Translators, Inc.
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).
<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- Attribution. You must attribute the work to *Wycliffe Bible Translators* (but not in any way that suggests that they endorse you or your use of the work).
- Noncommercial. You may not use this work for commercial purposes.
- No Derivative Works. You may not alter, transform, or build upon this work.
- In addition, you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem yu ken givim kopi long narepela manmeri. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. Yu mas givim nating. Na tu, yu no ken senisim Tok.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken askim mipela.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, plis askim mipela.

God-are Jögoru I'oho

MATTHEW

Iesuare hijo miono'o jiobe rovade jöhoje.

¹ Aveho Iesu Keriso-are hijo miono'o jiobe rovade jöhoje. Iesu hu David-are uje jiadeje. David hu Abraham-are uje jiadeje.

² Abraham hu Isaac-are vavue jiadeje. Isaac hu Jacob-are vavue jiadeje. Jacob hu Judah-are o Judah-are ö ömo'ömo jabesi vavue jiadeje. ³ Judah hu Perez o Zerah-mesi vavue jiadeje. Jabesi vëmoho Tamar jiadeje. Röhu Perez hu Hezron-are vavue jiadeje. Hezron hu Ram-are vavue jiadeje. ⁴ Ram hu Amminadab-are vavue jiadeje. Amminadab hu Nahshon-are vavue jiadeje. Nahshon hu Salmon-are vavue jiadeje. ⁵ Salmon hu Boaz-are vavue jiadeje. Boaz-are vëmoho Rahab jiadeje. Röhu Boaz hu Obed-are vavue jiadeje. Obed-are vëmoho Ruth jiadeje. Röhu Obed hu Jesse-are vavue jiadeje. ⁶ Jesse hu a böröme David-are vavue jiadeje.

David hu Solomon-are vavue jiadeje. Solomon-are vëmoho Uriah-are dorue jiadeje. ⁷ Röhu Solomon hu Rehoboam-are vavue jiadeje. Rehoboam hu Abijah-are vavue jiadeje. Abijah hu Asa-are vavue jiadeje. ⁸ Asa hu Jehoshaphat-are vavue jiadeje. Jehoshaphat hu Joram-are vavue jiadeje. Joram hu Uziah-are vavue jiadeje. ⁹ Uziah hu Jotham-are vavue jiadeje. Jotham hu Ahaz-are vavue jiadeje. Ahaz hu Hezekiah-are vavue jiadeje. ¹⁰ Hezekiah hu Manasseh-are vavue jiadeje. Manasseh hu Amon-are vavue jiadeje. Amon hu Josiah-are vavue jiadeje. ¹¹ Josiah hu Jechoniah-are o hesi ö ömo'ömo jabesi vavue jiadeje. Evare majare Babylon rajohuro muorovo'i rueromo Israel rajoho tövëvoromo ujuoho va'oromo Babylon rëmارةje.

¹² Tövëvo ujuoho va'oromo Babylon rëmارةje maja hesi ijore evare Jechoniah hu Shealtiel-are vavue jiadeje. Shealtiel hu Zerubbabel-are vavue jiadeje. ¹³ Zerubbabel hu Abiud-are vavue jiadeje. Abiud hu Eliakim-are vavue jiadeje. Eliakim hu Azor-are vavue jiadeje. ¹⁴ Azor hu Zadok-are vavue jiadeje. Zadok hu Achim-are vavue jiadeje. Achim hu Eliud-are vavue jiadeje. ¹⁵ Eliud hu Eleazar-are vavue jiadeje. Eleazar hu Matthan-are vavue jiadeje. Matthan hu Jacob-are vavue jiadeje. ¹⁶ Jacob hu Joseph-are vavue jiadeje. Joseph hu Mary-are barue jiadeje. Mary hu Iesuare vëme jiadeje. Iesuare jöho uvarueje: Böröme namiromo ajamuaje aho höjo.

¹⁷ Iesuare hijo miono'o höho jöhoje. Abraham bëhoho jioromo hesi ujo ömo'ömo jiobe ro David-arire ë vituoho jioromo bëhohu'o ujuho'aho'obëhe 14 jiadeje. O David bëhoho jioromo hesi ujo ömo'ömo jiobe ro Israel rajo tövëvoromo Babylon ujuoho va'are majare ë vituoho jioromo bëhohu'o ujuho'aho'obëhe 14 jiadeje. O Israel rajo tövëvoromo ujuoho va'are majare jioromo ujo ömo'ömo jiobe ruejuvo böröme namiromo ajamuaje a rahade majare ë vituoho jioromo ujuho'aho'obëhe 14 jiadeje.

Iesu rahade jöhoje.

¹⁸ Röhu Iesu Keriso rahadoho aviëhije. Hesi vëme Mary'o Joseph'o masurovo'iröhëro uarovoromo arijareje. Bogo masurovoromo gemuoroho arijë'e Mary-ro gavadeje God-are Aru'ahohuro uje bojamijë'ëro hu dë'e jiamu. ¹⁹ Hesi aemo'aeme Joseph-ro gavade hu dë'e jiamu gagorovo jögoru ejaje aëro jië'ëro Mary nugö'ö'i uehorovadeje. Röhu Mary a nunire javoji bojami'iröhohoho bijönimamu uvadeje: Iae na saginiëri ëhi ë'ejöjo. ²⁰ Èhi uehorovajuvo nia'ovoro gavadeje Badare aneraëro rueromo uavavamu: David-are hije Joseph jae hu Mary masu'iranohe nadi juhuonivonëjo. Èhesi bëhoho bogo aho ujuho bojami'i hesi God-are Aru'ahëro bojiamu dë'iraiejë'e höjo. ²¹ Harihoho rahego hesi ihoho Iesu jumuvonëjo rabëni huro hesi aribövi jabesi sisëho mu'uvëhoromo maro rëmo'ië'e jiaje.

²² Röhu ë mue aho'o rovade hesi bëhoho ehuro Badahu hesi jö majëhijaje a uavamu jajivadëhi ëhi jioröhego. ²³ Jajivoromo ëhi uvadeje: Aboridohuro dë'iraeromo harihe

raho'a'ajëjo. Raho'iramu aëro hesi ihoho Emmanuel jumuvu'aruëjo. Emmanuel ë iho hesi bëhoho God-hu no'o jiaje jöhoje.

²⁴ Amo Joseph-ro niavë'ëro ri'öromo Badare anera hesi jöho ejahoromo hesi magonahoho masuvadeje. ²⁵ Masuromo röhu bogo hu'oho gemuoroho niavadeje u'emuharihoho rahago niavu'iröhëro. Amo harihoho rahamu Iesu jumuvadeje.

2

Sa'a gö rajo ariböviehu Iesu rajahi'i rovare jöhoje.

¹ Iae Iesu Bethlehem amore Judea sa'are ë rahadeje Herod sa'a a böröme jiadevare. Rahamu iae jiji adaho'amarue a masijohuro aruhe sa'a göre jioromo rovaroho ro Jerusalem amore suorovareje. ² Suorovoromo uëvareje: Jew rajo jemesi sa'a a böröme jioröhego rahade aharihoho dinö'e höjo. No aruhe sa'a göre raromoromo gavare hesi jijoho rojomamu garomo hu rajahi'i rovare höjo. ³ Èjöhohero Herod sa'a a börömohuro dë sisërëromo uehore gö gö baejadeje Jerusalem amo rajo a ioro'iorohu'o. ⁴ Uehore gö gö baeromo huro Jew rajo priest masijohu'o jabesi jögoru öri röjëhijarue ariböviohu'o uëvamu gemuoro gagovoruomadeje. Gagovamu uëvadeje: Böröme namiromo ajëmi'iröhe aho hu dinö'e raho'a'ajëjo. ⁵ Uavareje: Bethlehem amore Judea sa'are ë raho'a'ajëjo. Mami'e jö God-aro baeromo majëhinövade ahuro ëhi jajivoromo uvë'e höjo:

⁶ Bethlehem ja Judea sa'are javajoho

Judea sa'are a masijo jabesi nuniroho jasi ihoho bogo bise'ohojio'a'ajëjo.

Jasirire jioromo a böröme rue'a'ajëjo.

Rueromo nasi aribövie Israel rajoho muebejëvo'ajëjo.

⁷ Èhi majahijamu hegorovo Herod-ro ë sa'a gö rajo a masijohuro ruejöro saginiëri jöe nugö'öromo uëvadeje: Èjijoho maja raburo aevoromo rojomamu gavarije höjo. Nadi ruëroho numëroho ue'i majaho ma-gemu uevego na hejöjo. ⁸ Majaho uavamu henugoromo uëvadeje: Rue Bethlehem amoro va'irarijoho aharihoho avoho nahobe jijijhorëjo. Birohogoro rueromo dinö'e jiajoho uerego na he'iröjo na'o ë va'oromo hu rajahi'irode. ⁹ Èhi uëvamu hegoro va'areje. Örire va'ihö gavareje mami'e ruhe sa'a göre gavare jije gemuoho jabesi nuninö urimo va'amu. Jijohuro urimo va'adoho va'o aharihuhu hijajire ë hesi simano bure namijadeje. ¹⁰ Namijamu ganugoromo bogo bise'o vadu'oho nimorohareje. ¹¹ Nimorohoromo ë osare rumo va'oromo gavareje aharihoho hesi vëme Mary'o ë hijamu. Garomo sa'are ague aho raromoromo hu rajahijareje. Rajahiromo inömo inömo jiovoromo suvuore bamahareje. Gold o ridi'e inöme niö'i göho frankincense göho myrrh ëhi i'imamareje.

¹² I'imamë'ëro nia'ovonö'e hejare God-ro uëvamu: Bogave Herod-are öriroho vuonorö'ö va'irarijë uëvamu hegorovo vuonorö'öromo öri gönö jabesi sa'are va'areje.

Joseph-hu Mary'o Iesu'o hu'iraejëvoromo ju'ebiromo Egypt sa'are va'are jöhoje.

¹³ Va'amu Joseph-ro nia'ovoro gavadeje Badare aneraëro rovamu. Aneraëro rueromo uavavamu: Ri'ö aharihohu'o hesi vëmohu'o hu'iraejëvoromo ju'ebiromo Egypt sa'aro va'ëjo. Va'o ëhuro jionëjo hujeji naru uavego rue'irane ë hesi bëhoho Herod-ro aharihoho ano'i naho'ië'e jiaje. ¹⁴ Èhi uavamu hegorovo Joseph-ro ri'öromo jabumë hu'iraejëvoromo vahi'e ë amoho vuonugoi Egypt va'adeje. ¹⁵ Egypt va'oromo ë hijuvo hejade uavavamu: Herod guomë'e hö uavamu hegoro rovadeje. Èmue aho'o rovade hesi bëhoho urimë'i Badahu uavamu hesi jö majëhinövade aehu jajivadëhi ëhi jioröhego. Badahu uavade jöho hesi surire jajivoromo ëhi uvë'eje: Nasi Harihoho uvamu Egypt jioromo rovë'e höjo.

Asisö'o inino bijuëmare jöhoje.

¹⁶ Èhi ë'areje röhu ë hesi urimoho Herod-ro gavade sa'a gö rajo masijoho bogo vejö'ohorueruomamu gagorovo uvadeje: Sareremijare höromo dë vörönimo avohadeje. Dë vörönimamu hesi aribövioho jöe bojëmiromo uëvadeje: Bethlehem-nö va'oromo asisö'o ininoho aho'o bijuëmorëjo. Magonahoho nadi vadune niö'i iosiramë'oho nadi a'i asisö'o ioro'ioroho aho'o bijuëmo barërëjo. Mami'e sa'a gö rajohuro jije rojomamu gavare

majaho uavamu hej'ëro ëhuni vadune niõ'i bogo iosiramijë'e asisõ'oho bijuëmorohego uëvadeje. Uëvamu iae va'oromo bijuëmoruomadeje. ¹⁷ Bijuëmamu ëhuro mami'e jö God-aro baeromo majëhinövade ae Jeremiah-hu uëvadëhi ëhi jiadeje. ¹⁸ Jeremiah-ro ëhi uëvadeje:

No hejaruëjo Ramah amore uvavo'ego.

Hara'uoromo nivavo'ego.

Rachel-ro hesi ujo ömo'ömohuni nivavajëjo.

Hesi ujoho barëjahë'ëro aehu sanuamaruoho bogo ejajëjo.

Iesumëhu Egypt jioromo vuonorõ'ö rovare jöhoje.

¹⁹ Herod guomamu Joseph-ro Egypt hiromo nia'ovo'iraeromo gavadeje Badare aneraëro rueromo ²⁰ uavamu: Ri'öromo aharihohu'o hesi vëmohu'o hu'irae ömëvoromo Israel sa'aro vuonorõ'ö va'ëjo aharihu ano'i uehorovare aribövioho mami'e vuovë'e jiaje. ²¹ Ëhi majahijamu hegorovo Joseph-ro ri'öromo aharihohu'o vëmohu'o hu'irae ömëvoromo Israel sa'are vuonorõ'ö rovadeje.

²² Rueromo hejade uvavamu: Archelaus-ro hesi vavue Herod-are sionoho baeromo bövie namiromo Judea sa'aho muebejaje hö uvamu hegorovo juhuonivoromo ë sa'aroho bogo hijadeje. A'i nia'ovo'iraeromo hejade God-arire jöe rueromo majahijamu hegorovo Galilee sa'are va'adeje. ²³ Galilee sa'are va'oromo amo ihe Nazareth ë hijadeje. Nazareth hijade hesi bëhoho urimë'i jö God-aro baeromo majëhinövare ariböviohuro God-are surire jajivarëhi ëhi jiorõhego. Jajivoromo ëhi uvareje: Aëro hesi jöho atoromo uvo'a'aruëjo: Hu Nazareth raje ae höjo.

3

Bapataeto vaejaje ae John-hu ëhi ë'ade jöhoje.

¹ Ëhi'amu John a bapataeto vaejëvaje ahuro Judea sa'a a rumo'ere Jordan jovo riröre hiromo jöho majëhinövadeje. ² Majëhiromo uënövadeje: Uehoro sisëho vuonugo'i uehoro mae baehëjo. Jemë iae ga'ië'aruëjo God-ro böröme namiromo muebejëvego. Ëhi majëhinövadeje. ³ Ëaho John hesi jöho God-ro mami'e uavamu hesi jö baeromo majëhinövade ae Isaiah-ro God-are surire jajivoromo ëhi uvë'eje:

Aëro a rumo'e sa'are hiromo ma-darugo'o uvo'a'ajëjo:

Badahu rueröhe öroho avohorego hu maro rue'irajo.

Hesi öroho ahorirëro vajivorego hu maro juvo'irajo.

John-hu ë'iröhe jöho mami'e ëhi jajivoromo uvë'eje.

⁴ Ëhi jajivoromo uvë'ëro ë aho John-ro camel mi uehu avoho'amë'e niögu sisëho ruohoromo mi sinehu avohë'e götaho dë'ahore ba'amonövadeje. O hesi ioho hu guajuguajue vuome ëhi ibe juvonövadeje. ⁵ Ëhi'ego Jerusalem amo rajoho Judea sa'a ioro'iorore raromarue aribövioho Jordan jovo bëhinö dinö'e dinö'e raromarue aribövioho ëho jaburo rueruomonövadeje. ⁶ Rueromo jabesi sisëho huruoho'ego John-ro Jordan jovore bapataeto vaejëvonövadeje.

⁷ Ëhi'oromo John-ro gavade Pharisee ariböviohu'o Sadducee ariböviohu'o aho'obëhe huro bapataeto vaejëvojöro rueruomamu gëgorovo uëvadeje: Sigobu aboji harihu'e jëvanovajëjo. Jemë raro uëvade höjo: God-are vöröhehu rue'iröhire jioromo huruomomomo manö va'irarijoho eni jëvo'ajëjo. ⁸ Bogajo. Ijehu bajo mae raejajëhi ëhi mu mae vaerego no garomo uvo'irarëjo: Iae jemë uehoro sisëho vuonugo'i uehoro mae baejë'e jëvajëjo. ⁹ Röhu nadi uvorëjo: Abraham nosi bëhohuro jië'ëro ëhu'ëro no mae javuajëjo. Naro jemë uëvajëjo: Jemë Abraham-are ujo ömo'ömo jëvajoho ëho ma-bise'e höjo. God-ro nimo'ibejajo ave munëho ujuohoromo avohëvego araeromo Abraham-are ujo ömo'ömoho jio'amo'ibejajo. Ëhuni nadi nimorohë'ioho ëhioho atorëjo. ¹⁰ Röhu tonëro ijoho bëhi'o huo'õ'ië'ajëjo. Di ijohuro bajoho bogo ma raejë'e jiego huo'öromo vëniro huo'ie'ajëjo. ¹¹ Naro jovëremu bapataeto vaejëvaje höjo aëro garuomorohego jemë öri sisëho vuonugo'i aevoromo öri mare jijihë'e jëvego. Röhu ae gö nasi ijönö rue'ie'ajëjo.

Huro na iosiremiromo börömo hojo. Naehu hesi mu bise'o vaejahoromo höru sino ujuohahoromo hesi ijore va'ibejodoho o mu bise'o bise'e rabe vaejaho'ibejodoho röhu na ma-bise'e jevajëjo. Êahuro God-are Aru'ahohuro o vënëro bapataeto vaejëvo'ajëjo. ¹²Hesi ijo garanoho övore hojo. Ijo garanoho övore jië'ëro ioho tvoromo döro hijiohijiovoromo mevoromo i maho gagovoromo hesi iruno'e osare ë avoho bahi'i subueho sinoho ravemu ravaje vënire huoa'ajëjo.

John-hu Iesu bapataeto vaejade jöhoje.

¹³Ëhi'amu Iesuro Galilee sa'are jioromo abuejadoho abo Jordan jovore höröjajedeje John-ro hu bapataeto vaejëro. ¹⁴Rovamu gagorovo John-ro nijio'iraeromo uavadeje: O-ajo. Jero na bapataeto vaejevo'ibejanëjo iae mae jio'ibejajo. Röhu jero rabëni nasi öriroho rovane hojo naro ja bapataeto vaejavojëro. ¹⁵Ëhi uavamu hegorovo Iesuro uavadeje: Bogajo. Avevejö'e naehu uavajëhi ëhi ë'ëjo. Ëhi ë'ë'oho êhuro God-hu nimaje muoho vae'ejarëjo. God-hu nimaje mu noehu vae barëjë'oho iae mae hojo. Iae mae höjamu hegorovo John-ro ejahadeje.

¹⁶Bapataeto vaejamu gagorovo Iesuro jovore jioromo rojo ionire namijadeje. Namijamu ö'idöho arorovadeje. Arorovamu Iesuro gavadeje God-are Aru'ahe guaho va'ënohuro ruvebiromo hesirire gerejamu. ¹⁷Ëhi'amu ae aho'obëhe hejareje ö'idöre uvavamu: Ave aho nasi Harihu mabëhe hojo. Na hu garomo êhuro nasi dë vövöbajo'oho nimorohevajëjo.

4

Iesuhu mu sisë vaejëro Satan-hu bijioho gavade jöhoje.

¹Iae Satan-ro Iesuare dëre bijioho garöhego God-are Aru'ahëro uavamu Iesuro a rumo'e sa'a göre ajiomadeje. ²Ajioromomo ioho bogo ijë'e majae vahie ma-hibe va'amu majae aho'obëhe 40 barëjajedeje. Majae aho'obëhe 40 barëjamu vadunëro hömadeje. ³Hömamumu dëre bijahuaje ahuro rueromo uavadeje: Ja God-are Harihe javë'oho ave munëho uëvego irae'amajo. ⁴Irae'amajumu ruehuro uavadeje: Röhu God-are jöho jajivoromo ëhi uvë'e hojo: Aehu iemu uehorovë'oho bogo maho raromo'aruëjo. A'i God-hu jöe aho'ö jövajohuro êhuro mae raromo'aruëjo.

⁵Ëhi'amu Satan-ro Iesu hu'irae baeromo God-are amo ihe Jerusalem ajioromomo ajio ruhe God-are osa börömo hesi dëre ba'ojio ë nugamu namijadeje. ⁶Namijamu Satan-ro uavadeje: Ja God-are Harihe javë'oho jörö'örovëjo. Êhesi bëhoho God-are surire jöho ëhi uvë'e hojo: God-ro hesi aneraho uë'iramu ja muebejavo'aruëjo. O hesi surire jö göho ëhi uvë'e hojo: Aneraho jaburo övore ma'enagonövo'aruëjo jasi hörure munëro bibejavojëni. Êhuni jörö'örovëjo. ⁷Jörö'örovëjamu uavadeje: Röhu ave God-are surire jöhu'o ëhi uvë'e hojo: Nadi ri'öromo Bada jasi God hesi dëho ëma bijiohoromo uanëjo: God jero ëhi ëhi ë'ëjo.

⁸Ëhi uavamu Satan-ro Iesu hu'irae baeromo dahuro ëgobövire ajiomadeje. Ajioromomo a masijehu dinö'e dinö'e raromoromo muebe'amarue öri ari'oho sa'ae inömo inöme bövie bise'e ma-mabëhe jië'ego aehu muebe'amaruoho êho röjahi barëjajedeje. ⁹Röjahiromo uavadeje: Êbövioho bise'oho aho'o jasi örire bojami'ejöjo. Jaehu ague ahoromo na rajehijë'oho iae na bojami'ejöjo. ¹⁰Bojami'ejöjamu ruehuro uavadeje: Satan va'ëjo. God-are surire jöho uvë'e hojo: Bada jasi God gemu rajahiromo hesi muohemu gemu vaejahonëjo.

¹¹Ëhi uavamu Satan-ro va'adeje. Va'amu aneraëro rueromo Iesu ajamijareje.

Iesuhu Galilee sa'are hiromo aevoromo hesi mu vaejade jöhoje.

¹²Ëhi'amu Iesuro hejade uavavamu: John bapataeto vaejavuaje aho aëro gudu-amo bava'oromo savoji gagore ba'amë'e höjamu hegorovo Galilee sa'are ajiomadeje. ¹³Ajioromomo Nazareth amore hiromo êho vuonugo'i abueromo Capernaum amore hijajedeje. Capernaum amoho jovo e'u riröreje Zebulun rajo Naphtali rajo jabesi öri ari'ere. ¹⁴Iesuhu ë sa'are hijade hesi bëhoho God-hu uavamu hesi jö baeromo majëhinövade ae Isaiiah-hu jajivadëhi ëhi jioröhego. Isaiiah-ro God-are surire jajivoromo ëhi uvadeje:

¹⁵ Zebulun rajo Naphtali rajo jabesi sa'aho jovo börömore va'arue öroho Jordan ioro'ioro göre sa'aho ë sa'are Jew rajoho bogo a'i sa'a ioro'ioro rajehu ë Galilee sa'are raromaruoho ¹⁶ ë aribövioho ramoramom'ere raromarue höjo. U'emu aji mabêhe iae garuom'ajëjo. Jaruvoho ramoramom'ero vuovo öriro jijiharue höjo. U'emu ajoho rueromo jabesi örire ajivëvo'ajëjo. Iesuhu ëhi ë'iröhego God-are surire jö jajivadëhi Iesuro ëhi Galilee sa'are hiromo ajoho barovadeje.

¹⁷ Iesuro ajoho barueromo aevoromo jöho majëhiromo uënövadeje: Uehoro sisëho vuonugo'i uehoro mae baehëjo. Jemë iae ga'ie'arujëjo God-ro böröme namiromo muebejëvego.

Iesuhu uëvamu visu suovarue ae 4 jabuhu aevoromo hesi ijore ijore jijihare jöhoje.

¹⁸ Èhi'oromo iae Iesuro Galilee e'u riröre juvadeje. Juvo'i gavadeje Simon hesi iho göho Peter'o Andrew'o ö'o ö'o visue suovarue aëro jëvë'ëro viöho jovore ba'amamu. ¹⁹ Viöho jovore ba'amamu gëgorovo uëvadeje: Nasi ijoro ijoro ruehëjo naro röjëhijego jemëro bogo visuoho gagovo'i a'i ae magonahe gagovëvego nasinö jioruom'iröhe höjo. ²⁰ Èhi uëvamu hejë'i jaburo viöho ëhi vuonugo'i aevoromo hesi ijore ijore jirehonövareje.

²¹ Èhi'amu Iesuro va'i gavadeje ae gö ö'o ö'o James'o John'o Zebedee-are harihe niö'i boat gagore jabesi vavuohu'o gemuore arijamu. Ariromo jabesi viöho sigohijamu gëgorovo uvëvadeje: Ruehëjo. ²² Ruehëjamu hejë'i jaburo boat-ohu'o jabesi vavuohu'o ë vuonugo'i aevoromo Iesure ijore ijore jirehonövareje.

Iesuhu hesi jö majëhibe a ajëmibe juvade jöhoje.

²³ Èhi'amu Iesuro God rajahijarue osare osare God-are jö bëhoho röjëhibe God-hu böröme namiromo ae muebejëvo'iröhe jö maho majëhibe guomo guome gö gö baejë'e aribövioho avohëvobe ëhi'obe Galilee sa'ae bövioho juvo barëjadeje. ²⁴ Èhi'obe juvamu huhu ëhi ë'ade jöho hebe va'adoho Syria sa'are raromarue aribövioho jabu'o ë jöho hebe va'oruomadeje. Hebe va'oromo aëro guomo guome gö gö vi'ehe gö gö baejë'e aribövioho Satan-are ariböviehu dëre abue'amë'e aribövioho simano sisërëjë'e aribövioho övo höru vuovëhë'e aribövioho ëhi jië'e aribövioho ujuohoromo jabesi sa'are jioromo ruenövareje. Ujuoho rue'ego Iesuro ajëmi'ego marëjëvonövadeje. ²⁵ Ae aho'obëhe ave Galilee sa'are jioromo aruhe Amo 10 Jio'amaje Sa'are jioromo arue Jerusalem amo börömore Judea sa'a ioro'iorore jioromo aruhe Jordan jovo ioni gönö jioromo ë ro tagavoromo Iesu rihromonövareje.

5

Iesuhu dahorure hiromo a jö majëhijadohoje.

¹ Rihromamu Iesuro gavade ae aho'obëhe tagavoromo raromamu gagoro dahorure ajiomadeje. Ajiomoromo sa'are hijadeje. Hijamu hesi ijore ijore jijiharue ariböviohuro rovamü gëgorovo ² aevoromo jöho röjëhiromo uëvadeje:

Huë mae jioruomaje aribövi jabesi jöhoje.

³ Ae rahu uvë'oho: No bogo eni javuë'ëro hesi God-ro ajamuijaje hö uvë'oho huë mae jioruomaje höjo God-ro muebejëvego hesi aharire mae rarom'ië'ëro.

⁴ Huë vavaeni baejarue aribövioho huë mae jioruomaje höjo God-ro huë sanue bojëmi'ie'ego.

⁵ Ma-taemo raromarue aribövioho huë mae jioruomaje höjo God-hu uëvade bövioho bise'oho bae'ie'ëro.

⁶ God-are mu maemu ga'i nimo avoharue aribövioho huë mae jioruomaje höjo God-ro mu maho nugö'öjëhego jabesi dë vövöbajo'oho mae jëvo'ie'ego.

⁷ Ae göëni vavaenimarue aribövioho huë mae jioruomaje höjo

God-ro jabesi jöeni vavaenimo'ie'ego.

⁸ Dë vövöbajo'o ma-maemu jiaruoho huë mae jioruomaje höjo God ga'ie'ëro.

⁹ Muorovo öri tugoho'i huë baerovarue öri jiovarue aribövioho huë mae jioruomaje höjo God-ro uvo'ie'ëgo: Jabumë nasi aboji harihu'e hö uvo'ie'ëgo.

¹⁰ Mu mae vaejego aehu ma-jabu gemu i'u bojëmego baejaruoho huë mae jioruomaje höjo God-ro muebejëvego hesi aharire mae raromo'ie'ëro.

¹¹ Jëmëhu na uehorovevamu aehu sivëgoromo mu sisë vaejëvoromo ae sarerëmiromo jemesi jö sisë gö gö ëma atë'oho huë mae jëvaje höjo. ¹² Dë sasohoromo nimoro avohorëjo ë hesi bëhoho God-hu suvuoro jemëni ö'idöre bamëhajoho böröme jië'e jiaje. Urimo jö God-aro baeromo majëhinövare aribövi jabesi örire jabu'o aëro ëhi gemuoho sisë vaejëvonövare höjo.

Sö'o iro'o jabesi uhu jöhoje.

¹³ Söehu rumorovego i marëjajëhi jemëro sa'are aribövioho ëhi ajëmego mae jioruomaje höjo. Jëmëhu ëhi sönö'e ajëmiarujoho sö hesi rihu barëjë'oho diehi'oromo röhu maho avohojëni sisëgo ruruhö'öjarue höjo. Ruruhö'öromo ë döre jijiharue höjo.

¹⁴ O irehu ajivego gavaruëhi jemë sa'are aribövioho ëhi ajivëvo'irarijoho jëvajejo. Ame hojire jië'oho bogo gurihiroho jëvo'i ma-va'orahoro jëvo'ajëjo. ¹⁵ O iro buno'iraejë'iroho hevö gagoroho bogo gurihi'i ma-va'orahoro bamo'anuëjo ae aho'obëhe ë osare raro-maruoho ajivëvo'iröhego. ¹⁶ Ehesi bëhoho jemëro jemesi aji muoho ma-va'orahoro vaejogo aëro ë garomo jemesi Vavue ö'idöre hijajoho rajahiruomoi'irajo.

Moses o jö God-aro baeromo majëhinövare a ioro'ioro ë aribövi jabesi jögoru Iesuhu ejego marë barë'iröhohuni ëhuni rovade jöhoje.

¹⁷ Röhu jö göho nadi uvorëjo: Naehu rovode hesi bëhoho Moses-hu bojamuade jögorohu'o jö God-aro baeromo majahuinövare a ioro'ioro jabesi jöhu'o Iesu naehu mu'u'irodoho höjo. Na bogo ëhunioho rovode höjo. A'i ë aribövieuu jajivare jöe aho'o naehu ejego marë barë'iröhohuni ëhuni rovode höjo. ¹⁸ Ave jöho na jö mae uë'ie'ajëjo. Ö'idö'o sa'a'o biririvoromo jiobe va'iröhoho Moses-are jögoroho bogo iaroho bisemu vadu'oho sisërë'i jöe aho'obëhe ë hesi muoho marë barë'ajëjo. ¹⁹ E'huni ae rahu Moses-are jögoru masijohu'o inino mahu'o ahë'oho o ae göehu ahöröhego röjëhijë'oho ëhi jië'e a hesi ihoho God-are öri ari'eroho bogojoi'ajëjo. A'i ae rahu Moses-are jögoru ejë'oho o ae göehu eröhego röjëhijë'oho ëhi jië'e a hesi ihoho God-are öri ari'ere böröme jio'a'ajëjo. ²⁰ E'huni naro jemë uëvajejo: God-are jögoru öri röjëhijarue ariböviohu'o Pharisee ariböviohu'o jaburo Moses-are jöho ma'ënarue höjo. Röhu jemëhu ë aribövi bogo iosirëmiromo God-hu nimaje mu bogo uhohu'o vaejë'oho God-are öri ari'eroho bogo mae bogo va'a'arujëjo.

Bogo dë vörönimo'iröhe jöhoje.

²¹ Jemë hejarije höjo uvavamu: Aëro a mamioho ëhi uëvare höjo: Nadi aho anonëjo. Jaehu a anë'oho aëro ja guduamavoromo court-ro baejavo va'a'aruëjo. Ehi uvamu hejarije höjo. ²² Röhu naro uëvajejo: Ae rahu jaehu ae gö hesi örire dë vörönimë'oho aëro guduamavoromo court-ro baejavo va'o hesi höjo. O ae rahu jaehu jasi aemo'aemo sivoromo uavë'oho: Ja uehore bogojie'e ae javajë uavë'oho aëro guduamavoromo council masijo jabesi nunire baejavo va'o hesi höjo. O ae rahu jaehu ae gö agoromo uavë'oho: Ja simano bogojie'e ae javajë uavë'oho ehuro ja vëni örire va'o hesi javajëjo. ²³ E'huni jasi suvuoro God-are maratuore bamaho'i ë namiromo uehorovoromo uvë'oho: O nasi aemo'aemohuro nasi jö sisëho uehorovaje hö uvë'oho ²⁴ suvuoro maratu nuninö ehuro bamo nugo'irögoru urimo va'oromo jasi aemo'aemohu'o sanuamivoromo evare ijönö vuonorö'ö rueromo God-are öroro suvuoro bamahonëjo.

²⁵ Aehu jasi jö sisë hesirire jië'ëro ja baejavoromo court-re va'ie'iroho jemë niö'iro örire va'arujevaro jero ma-burëro sanu'e jöho majahinëjo. Sanu'e jö bogo majahijë'oho huro

court gavaje a hesi övore bojami'ajëjo. Bojami'iramu court gavaje ahuro police bojami'iramu savoji gagore ba'amavo'iramu ë hi'a'anuëjo. ²⁶ Ëhi ma-hiemu hijuvo bojami'irane monioho aho'obëhe bojami barë'anuëjo. lae na mae uëvajëjo.

Bogo goho'amo'iröhe jöhoje.

²⁷ Jemë hejarije höjo uvavamu: Urimo ëhi uëvare höjo: Nadi goho'amonëjo. ²⁸ Ëhi uvamu hejarije höjo. Röhu naro uëvajëjo: Ae rahu magonaho garomo goho'amo'ië'ohuro ëhuro hesi simanore goho'amë'e höjo. ²⁹ Ëhuni jasi övo manörire nunehu mu sisë garomo ëhuro God uehorovanue mu vuonugo'ië'iroho nunoho jahoromo bu'önëjo. Inöme gemu boremi'öjë'oho ma-jianovo'i jasi sine aho'o vënire va'ë'oho ëho sisë höjo. ³⁰ Jasi övo manöhuro mu sisë vaeromo God uehorovanue mu vuonugo'ië'iroho tarioromo bu'önëjo. Inöme gemu boremi'öjë'oho ma-jianovo'i jasi sine aho'o vënire va'ë'oho ëho sisë höjo.

Bogo vaboro nugö'ö'iröhe jöhoje.

³¹ Röhu ave jöhu'o uövuë'e höjo: Vaboro nugö'ö'ië'iroho suroro jajivoromo vaboroho bojamiromu evaro nugö'önëjo. Ëhi uövuë'e höjo. ³² Röhu naro uëvajëjo: Vaboroho bogo ma-juvë'e baruehu ëma nugö'öjë'oho ëho huro magonaho hesi örire mu sisë vaejaje höjo. Ëhu'ëro ë magonahohuro ae gö masuvë'oho bogo maho masu'i ëho goho'amarue muoho vae'a'ajëjo. O ae göehu nugö'öjade magonaho masuvë'oho goho'amarue muoho vae'a'ajëjo.

God-are öri ari'o itho o inömo itho bogo uvoromo darugo'e jö jövo'iröhe jöhoje.

³³ Jemë hejarije höjo uvavamu: Aëro a mamioho ëhi uëvare höjo: Darugo'e jö jövoromo mu vae'i mae uavë'oho nadi ahonëjo. A'i diehi vae'i uavanëhi ëhi Badare nunoro vaenëjo. Ëhi uvamu hejarije höjo. ³⁴ Röhu naro uëvajëjo: Mu vae'i mae uavë'oho nadi darugo'e jöho jövo'i ma-ahorirëro uanëjo. Nadi ö'idö ihoho uvoromo darugo'oho jövonëjo God hu börröme jioromo ë hijaje jiaje. ³⁵ Nadi ave sa'a ihoho uvoromo darugo'oho jövonëjo God-ro hesi höroho ë bamoromo hijaje jiaje. Jerusalem amo ihoho nadi uvoromo darugo'oho jövonëjo börröme namijaje a hesi ame jiaje. ³⁶ Jasi simano ihoho nadi uvoromo darugo'oho jövonëjo. Simano si'öre gemu namijöro uvë'oho o simano ue rövë'e gemu namijöro uvë'oho ja bogo mae bogo eni javo'ajëjo. ³⁷ Ëhuni nadi simano ihoho uvo'irögoro ae ma-uërejo: lae na ë'ejöjo. O bogo ë'ejöjo. Jöe ruëre numëre ëma jövä'oho ëho hesi Satan-are jöho höjo.

I'u bogo mana bojami'iröhe jöhoje.

³⁸ Jemë hejarije höjo uvavamu: Urimo ëhi uëvare höjo: Ae göehu gö hesi nune gemu bijioho hisivë'oho mana nune gemu bijioho hisivahonëjo. Ae göehu gö hesi ane gemu bu'uvë'oho mana ane gemu bu'uvahonëjo. ³⁹ Röhu naro uëvajëjo: Aehu sisë vaejavë'oho nadi nijio'iraerovonëjo. A'iro aehu a'isabi övo manörire anagë'iroho huotorovego a'isabi gönöhu'o anago'irajo. ⁴⁰ Aehu jasi niögu bae'i court-re baejavo va'ië'iroho jasi döre ba'amanue niöghu'o bojamego bae'irajo. ⁴¹ Rome muorovo'e aehu uavë'oho: Maburëro ri'öromo nasi inömohe baejago va'oromo ëhuro bamë uavë'oho jero huë baeromo ajamiromo bamojoro uavade röhohe iosiramiromo va'o numori'o bamahonëjo. ⁴² Aehu jasi örire böviëni bise'ëni ëninamë'oho bojaminëjo. Ma-jahuri bae'i nimë'oho nadi nijio'iraenëjo.

Nu huodaguarue aribövi huë baejëvo'iröhe jöhoje.

⁴³ Jemë hejarije höjo uvavamu: Urimo ëhi uëvare höjo: Jasi ae gemuho huë baenëjo. Ja'o muorovaje aho nue huodivonëjo. ⁴⁴ Röhu naro uëvajëjo: Jemë'o muorovarue aribövioho huë baejëvorëjo. Jemë mu sisë vaejëvarue ariböviohuni God-are öroro ëninamirëjo. ⁴⁵ Jemëhu ëhi ë'ë'oho Vavue ö'idöre hijaje hesi aboji harihu'o mae jëvo'ajëjo. Ëhesi bëhohe Vavuehu maja ëni nugö'öjajoho bogo a mahuni gemu nugö'ö'i a mahu'o a sisëhu'o aho'o jabuni röromo nugö'öjaje höjo. ⁴⁶ O jemë huë baejëvarue aganohemu huë baejëvë'oho rabëni uvorëjo: Ëhuni God-ro suorovo mabëhe bojamui'ajëjo. Jemë'o uehorovorëjo. Vajiohu'e tax baerumaje aribövioho jabu'o ëhi jabesi aganoho huë baejëvarue höjo.

⁴⁷ O jemēhu jemesi ō mueno'emu rajēhijē'oho rabēni nimorohoromo uvorējo: No ae aho'obēhe iosirēmiromo mu ma-mabēhe vaejē'e javuajējo. Jemē'o uehorovorējo. God-are jō bogo hejē'e aribōvīoho jabu'o iae ēhi gemuoho ē'oromo jabesi ō mueno'ohemu rajēhijarue hōjo. ⁴⁸ Ēhi jiē'e jiaje jemesi Vavue ō'idōre hijajehu mu bōvi bise'o ma-mae vaejājēhi jemē'o ēhi avoho vaerējo.

6

Bogo aehu gōjōro suvuoro bojēmi'irōhe jōhoje.

¹ God uehorovarue mu vaejē'iroho gavē'iajo. Nadi a nuniroho ē muoho vaerego ēhuro aēro jemē gē'irarējo. A nunire vaejē'oho jemesi Vavue ō'idōre hijajohuro suvuoroho bogo mana bojēmi'ajējo.

² Ēhi jiē'e jiaje mae sisē bogojiē'e a huē baeromo suvuoro bojēmi'ie'iroho nadi sine-muoho nimorohoromo hēgōe huanovoromo uvorējo: Suvuoro'e ae jevajoho ro gehējo. Hesi dōhemu mae jio'amaje aribōvi jabesi mue hōjo. Ēho jaburo God rajahijarue osare raromoromo o ōrire jijihoromo ēhi a nunire nimorohē'i suvuoroho i'imēmarue hōjo aēro jabumē rajēhijōro. Rōhu aveho na jō mae uēvajējo. Jabesi iho dōre jiajoho ēho jabu jabesi manaho mami'e ma-ioro'ioremu bae barējē'e hōjo. ³ A'i jemēhu huē baeromo a ajēmijē'iroho ōvo maehu ae ajēmijē'oho nadi adoho huruoho majahi'i ⁴ jasi ma-saginiēri aho ajēminējo. Ma-saginiēri ajēmijē'oho Vavue jaehu saginiēri vaejēgo gavajohuro jasi manaho iae bojami'ajējo.

Diehi pari vae'irōhe jōhoje.

⁵ O jemēhu God-are ōrire jō atē'iroho ma-dōhemu mae jioruomaje aribōvīehu vae-jaruēhioho nadi ēhioho vaerējo. Jabumēro God rajahijarue osare o ōri duvahore rira-voromo parie vae'i nimoruomaje hōjo aēro gējōro. Rōhu aveho na jō mae uēvajējo. Jabesi iho dōre jiajoho ēho jabu jabesi manaho mami'e ma-ioro'ioremu bae barējē'e hōjo. ⁶ A'i jemēhu God-are ōrire jō atē'iroho jero jasi sivue osaro va'oromo ojoho tugohoromo parie vaejēgo jasi Vavue gurīhiro hijajohuro he'irajo. Ēhi'oromo pari vaejē'oho jasi Vavue jaehu saginiēri vaejēgo gavajohuro jasi manaho iae bojami'ajējo.

⁷ O pari vaejē'oho nadi ruēroho numēroho ma-atobe va'orējo. Hesi God-are jō bogo hejē'e aribōvīohuro uvoruomaje hōjo: Nani noehu jō ēgobōvi jaguromo majēhijē'oho ēhuro aru'aho masijohuro avoho he'a'aruējo. ⁸ Jabuhu pari vaejaruēhioho nadi ēhioho ē'orējo. Bogo pari vaejarue majare jemesi Vavuohuro jemesi huē vavaenoho huro urimo gavaje hōjo. ⁹ Ēhuni jemēro jōho nadi ēhioho jagu'irōgoro a'i aviēhi jiē'e jōho majahiromo parie vaerējo. Uarējo:

Nosi apajo. Ō'idōre hijanuoho jero ae aho'obēhe nosi dē vōvōbajo'oho avohahuego noro ja gemu mae uehorovavo'irarējo.

¹⁰ Jero bōrōme namiromo aho'obēhe muebejavuego no jasi aharire gemu raromo'irarējo.

Jasi aharire gemu raromoromo jaehu nimanuoho ruhe ō'idōre mae ejaharuēhi ave sa'arohuro ēhi ejaho'irarējo.

¹¹ Nosi ioho jaruvo i'imamuijēgo no ue'ahego da'uaguajo.

¹² Nosi sisēho uehorovoromo vuonugonējo.

Ae gōehu no sisē vaejavuego noehu uehorovoromo vuonugaruēhi jero ēhi ajamuinējo.

¹³ Nadi vōrō'eroho ramuego rireromavuo'i

a'i ajamuinego A Sisēho bogo ruahō'ōjavuo'irajo.

¹⁴ Ēhesi bēhoho jemēhu a jabesi sisē uehorovoromo vuonugē'oho ēhuro jemesi Vavue ō'idōre hijajohuro jemesi sisēhu'o uehorovoromo vuonugo'ajējo. ¹⁵ O a jabesi sisē bogo uehorovoromo vuonugē'oho jemesi Vavuohuro jemesi sisēhu'o bogo uehorovoromo vuonugo'ajējo.

Bogo aehu gōjōro God uehorovo'i i vuonugo'irōhe jōhoje.

¹⁶ O jemēhu God uehorovo'i i vuonugē'iroho dōēremu mae jiē'e aribōviehu nu ano'e sisērērovaruēhioho nadi ēhioho ē'orējo. Ēhesi bēhoho dōēremu mae jiē'e aribōviehu i vuonugē'oho jabesi nu ano'oho ijumorovarue hōjo aēro gējōro jabuhu i bogo ijaruoho. Rōhu aveho na jō mae uēvajējo. Jabesi iho dōre jiajoho ēho jabu jabesi manaho mami'e ma-ioro'iolemu bae barējē'e hōjo. ¹⁷ O jaehu i vuonugē'oho jasi sine bōvie bise'e avohorovoromo ninugu'e jōvēro simanoro otehoromo nu ano'oho u'orovonējo. ¹⁸ Ēhi ē'ē'oho aho bogo ga'a'aruējo ja ioho vuonugē'e javo'iramu ga'i jasi Vavue gurihiro hijajohuro huro sivue ja ga'a'ajējo. Jasi Vavue jaehu saginiēri vaejego gavajohuro jasi manaho iae bojami'ajējo.

Ave sa'are bogo a'i ō'idōre inōmo babaenemi'irōhe jōhoje.

¹⁹ Rōhu ave sa'aroho nadi inōmoho aho'obēhe jemesi sinēnioho avohoromo babaenemirējo. Sa'aroho inōmoho dē'irae'amaje hōjo. Majo majēro tarivo'amaje hōjo. Vajiohu'e aribōviēro osaho dadovoromo ujuoharue hōjo. A'i ō'idōro avoho babaenemirējo. Ō'idōroho inōmoho bogo dē'irae'amaje hōjo. Majo majoho bogo tarivo'amaje hōjo. Vajiohu'e aribōvioho bogo osaho dadovoromo ujuoharue hōjo. ²⁰ Inōmo inōmoho nadi jemesi sinēnioho gemu bahi'i God-are ōroro bojamego huro hesi ōri ari'ere bahi nugēho'irajo. Ēhi jiē'oho majo majoho bogo tarivo'amo'ajējo. Bogo dē'irae'amo'ajējo. O vajiohu'e aehu ojo dadovoromo inōmo ujuoho'irōhoho bogojio'ajējo. ²¹ Jasi mae sisē din'ō'e jiajire jasi dē vōvōbajo'oho ē gemu jio'a'ajējo.

Sino haho'o hesi iroho nuni jiaje uhu jōhoje.

²² Jasi sino hesi iroho nunoho hōjo. Jasi nuni mae jiē'oho ēhuro aji maro hi'a'anujō. ²³ O jasi nuni sisē jiē'oho ēhuro ja ramoramoro hi'a'anujō. Ēhesi bēhoho naro uēromo ē'ajējo: Jasi uehoro ramoramovavē'ohuro ēhuro ramoramo maro hi'a'anujō.

Monie iruno'e niōgu suhi'e ē hesi jōhoje.

²⁴ Ae niō'i bōrōmoho gemuoho jēvajēromo jabesi mu gemuore havoromo vaejē'oho bogo eni javo'ajējo. Ja gōho nue huodivo'i gōho rajahi'anujō. O gōho mae uehorovo'i gōho bijōnimo'anujō. Ēhesi bēhoho God'o moni'o niō'i bōrōmoho gemuoho jēvajēromo gemuore havoromo ma vaejē'oho bogo eni jēvo'ajējo.

²⁵ Ēhuni uēvajējo: Nadi uvorējo: I jovo'o rabe ue'ahoromo bogo vuovo'i birivoromo raromo'ejarējo. O uho niōgu'o rabēro sino haho'oho riogivo'ejarēromo nurunurumorējo. Ēhesi bēhoho ioho ma-bise'e jio'i jemēhu birivoromo raromarujoho ēho bōrōmoho hōjo. Uho niōgu'oho ma-bise'e jio'i sino haho'o jēvajoho ēho bōrōmoho hōjo. ²⁶ Rōhu ugehu dōre va'aruoho uehorovohējo. Noehu ē'aruēhioho ugoho bogo ēhioho iruno'oho bivo'i o bogo gagovo'i o bogo ujuohoromo osaroho ro avoho bahijarue hōjo. Bogo ēhioho ē'oruo-maje hōjo rōhu jemesi Vavue ō'idōre hijajohuro ugoho mio'amaje hōjo. Rōhu jabumē ma-bise'e jio'amo'i jemē masijo mae jēvajējo. Ēhuni hu jemē'o avo'avoho muebejēvo'ajējo. ²⁷ O jemēhu uvē'oho: No diehi'oromo ave sa'aroho majae ēgo'o raromo'ejarē uvoromo nurunurumē'oho na ēhuro jemesi vuovo'irarije majaho iosiramiro mo ruēhi ma-bisemu gō'o raromobe va'orējo. Bogajo.

²⁸ O niōgēnioho rabēni nurunurumarue hōjo. Bēhoho bogohōjo. Je'ore resu resuehu diehi'oromo ri'amaruoho ēhu'o uehorovohējo. Aehu mu vaeromo niōgu avoharuēhioho resu resuoho bogo ēhioho ē'arue hōjo. ²⁹ Bogo ēhioho ē'arue hōjo rōhu ave resu resuohuro ma-mabēhe kavuego garomo nosi dēho vuēvavuaje hōjo. Naro jemē uēvajējo: A bōrōme Solomon niōgu ma-mabēhe io'amonōvadoho ēho ma-jianovo'i ave resu resuohuro ēhi mamabēhe mae kavuo'amaje hōjo. ³⁰ Jaruvēhi resu resuoho rijego nērēhi ēhi aēro jahoromo vēniro huo'amarue hōjo. Rōhu ēhi jiē'e resu resuoho God-ro muebejego marēromo kavuo'amaje hōjo. Resu resuoho ma-bise'e jio'amo'i jemē masijo mae jēvajējo. Ēhuni uvorējo: Hu no'o avo'avoho muebejavuoromo uhe niōge i'imamui'ajējo. Nurunurumarujoho God bogo ma uehorovarue aribōvie jēvajējo. ³¹ Ēhuni nadi uvorējo: No i rabe jovo rabe i'ejarējo. O niōgu rabe io'amo'ejarēromo nurunurumorējo. ³² God-are jō bogo hejē'e

raromarue ariböviohuro ie jove bövie bise'e ëhuremu uehorovoruomaje höjo. Röhu jemëro nadi ëhiho ë'orëjo. Jemesi Vavue ö'idöre hijajohuro iae mae garomo uvajëjo: Jemë iëro jovëro rabëro ëhuro biririvoromo raromarujëjo. ³³ Ëhuni nadi ëhemuoho uehorovo'i a'i God-hu börröme namiromomo muebejëvaje muoho noehu vaejëro huhu nimaje muoho ëho nunoro bamorëjo. Ëhi ë'ë'oho God-ro jemesi aru'ahoho muebejëvoromo röhu ie jove niöge givae bövie bise'e ëhu'o romoromoro bojëmi'ajëjo. ³⁴ Ëhuni nëröhunioho nadi nurunurumorëjo. Nëri evare ë maja hesi muoho uehorovo'arujëjo. Majae gemu hesi huë vavaene jaruvo majae gemu uehorovarujoho höjo. Ëhuni nëri hesiroho nadi nurunurumorëjo.

7

Bogo döro bamorovoromo a jabesi sisë mevo'iröhe jöhoje.

¹ Röhu nadi döroho bamorovoromo a jabesi sisëho mevorëjo. Jabesi sisë bogo mevä'oho God'o jemesi sisëho bogo mevo'ajëjo. ² Jemë diehi jië'e uehoroho baeromo meväho'ajëjo. I'u'e mae bojamë'ohuro ëhuro i'u'e mae bae'a'arujëjo. O bisemu bojamë'oho bisemu bae'a'arujëjo. ³ Ja diehi'oromo ijo ugobajo'e biseharihehu isiare nunire namijajoho ga'i ijo börrömehu jasi nunire namijavajoho bogo gavanuëjo. ⁴ Jasi nunire ijo börrömehu tugohavë'oho ëhu'oho ja rabëni jasi aemo'aemoho uanëjo: Ë'ego na jasi nunire ijo ine namijavajoho jahahöjo. ⁵ Sareri ae javajëjo. Jasi nunire ijo börrömehu tugohavajoho jero urimo jahonëjo. Jahonugoromo evare avoho garomo ijo ino harihoho isiare nuniroho jahaho'anuëjo.

⁶ Röhu God-are inömo maho nadi öho mëmi'i jemesi nieniaho nadi mahu nuniroho ruruhö'örëjo. Ëhi ë'ë'oho jaburo önu bijö'ëro vaenugoromo evare huotorovoromo jemë umijëvo'ajëjo.

Biririvoromo God ua ga'iröhe jöhoje.

⁷ Röhu biririvoromo God ua garëjo. Biririvoromo ua gavë'oho ujuoho'arujëjo. Biririv-oromo nahorëjo. Nahë'oho birohoh'arujëjo. Ojoho ano'anovorëjo. Ano'anovë'oho God-ro jiovëho'ajëjo. ⁸ Ae rahu ua gavë'oho ujuohuromo'ajëjo. Nahë'oho birohuruomo'ajëjo. Ano'anovë'oho ojoho jiovëho'ajëjo. ⁹ Nasi jö hejarujoho ae gö vavu ömo'ömo'e jëvajëjo. Jemesi harihehu uëvë'iroho: Ie bojemego na ijö uëvamu hejë'oho na jemë sareramiromomo munë bojamirëjo. ¹⁰ O uëvë'iroho jovo mie bojemego na ijö uëvamu hejë'oho na jemë sareramiromomo sigobu sisëho bojamirëjo. Bogajo. Jemë i mae i'imami'arujëjo. ¹¹ Jemë sisë aribövie jëvajëjo röhu jemesi aboji harihu'o avoho suvuorëmi'irarije öroho iae gavaruje höjo. Jemë sisë jëvo'i ö'idöre hijaje jemesi Vavuho mae jiaje jemëro biririvoromo uvorëjo: Hu mäero jië'ëro ae rahu ua gavë'oho suvuoro mabëhe bojamuinövo'ajëjo.

¹² Ëhi jië'e jiaje jemë ae göehu diehi vaejëvojöro nëgë'oho jemë'o ëhi jië'e muoho ae gö jabesi öroro vaejëvorëjo. Ëhi jië'e mu vaejë'ohuro ëhuro Moses-are surire jögorohu'o jö God-aro baeromo majëhinövare surire jöhu'o ë jö hesi bëhoho ejëho'arujëjo.

Ojo harihure rumo va'iröhe hesi jöhoje.

¹³ Röhu ojo harihoro rumo va'orëjo. Vëni'ere va'arue ojoho öroho börrömëro jië'ëro ëhu'ëro ae aho'obëhe ë va'oruomaje höjo. ¹⁴ A'i maro raromoröhe ojoho öroho biseharihe jië'ëro hesi ae ma-gemuëro gemuëro birohoro mo ë va'arue höjo.

Jö majahuijarue ae gö jabesi mure garomo uvo'ejo: Sareri jöe majahuijaruëjo. Ëhesi jöhoje.

¹⁵ Gavë'i raromorëjo. Aëro rueromo God-are jöho huotohuotovoromo majëhijego ejëhojööni uëvajëjo. Jabumë ma-döhemu sheep va'ëne jio'amo'i uhoho vörö'e mioho va'ëne jio'amajëjo. ¹⁶ Jabesi mure garomo uvo'a'arujëjo: Ëaribövioho God-are jö sareri'e majahuijarue aribövioho jioruomajëjo. Rihu'e grape bajo uro'ie'iroho ë ö'iremu uro'i bibë'e ijo sisëroho bogo uro'a'anuëjo. O meso böso uro'ie'iroho mesoremu uro'i bibë'e resu sisëroho bogo uro'a'anuëjo. ¹⁷ O ijo mahuro bajo mae rae'i ijo sisëhuro bajo sisë rae'amaje höjo. ¹⁸ Ijo maho bajo sisëho bogo rae'i ijo sisëho bajo maho bogo raejaje höjo.

¹⁹ Ije aho'obêhe bajo bogo ma raejê'oho huo'öromo väniro ruruhö'öjarue höjo. ²⁰ Êhu'ëro jîê'ëro jabesi mure garomo uvo'a'arujêjo: Êho jaburo bogo rae avohê'ëro God-are jôho bogo avoho majahujarue höjo.

Bogo Bada ma-döëremu uvarue a'i Vavuehu nimaje mu vaejarue ariböviehu God-are öri ari'ere va'iröhe jôhoje.

²¹ Aehu na uevaruoho: Bada Bada uevaruoho ioro'iorohuremu God-are öri ari'eroho va'oruomo'ajêjo. Ioro'ioroho bogajo. A'i ae rahu nasi Vavue ö'idöre hijaje aehu nimajoho ê'ê'ohuro ë ariböviohuremu êho va'oruomo'ajêjo. ²² Êmajaho rue'iramu ae aho'obêhe ueruomo'ajêjo: Bada Badajo. Noro jasi ihore God-are jôho majêhiromo Satan-are sisê aribövioho a dêroho rarov'öjêvoromo mu masijoho aho'obêhe vae'amare höjo. ²³ Vae'amare hõ'iramu evare naro uê'ejôjo: Na jemê bogo gëvode höjo. Bogo mae bogajo. Jemê mu sisê vaejarue aribövie jêvaje êhuni rori'o va'ohêjo.

Simano ma'e ahu'o simano sisê'e ahu'o javu vaejare uhu jôhoje.

²⁴ Röhu naehu jövaje jö ae rahu ejehajoho êhi jîê'e a hesi jôho naro uhu'e majêhi'îê'ajêjo. Simano ma'e ae gemuëro javuoho munê'e sa'are vaejade höjo. ²⁵ Vaejê'ëro êni bõrömëro jovo bõrömëro buru bõrömëro rueromo ë javuoho anade höjo. Anamu bogo buevade höjo munê'e sa'aro vaejê'ëro. Nasi jö ejehaje aho ë simano ma'e aho va'ëne höjo. ²⁶ A'i naehu jövaje jö ae rahu heromo bogo ejehajoho êhi jîê'e a hesi jôho na majêhi'îê'ajêjo. Simano sisê'e ae gemuëro javuoho nie'ure vaejade höjo. ²⁷ Vaejê'ëro êni bõrömëro jovo bõrömëro buru bõrömëro rueromo ë javuoho anamu buevade höjo. Buevoromo sa'are nemoromo garahörö'e baejade höjo. Ahia mino'êjo.

²⁸ Êjôho Iesuro majêhi barêjamu ë tagavare ariböviohuro heromo tiöromo uvoruo-madeje: Hesi jôho darugo'e jö ma-mabêhe javavajêjo. ²⁹ Êhi uvoruomade hesi bêhoho jabesi jögoru öri røjêhijarue ariböviehu røjêhijarêhioho hu bogo êhioho majêhi'a a'i hesi birire baejê'ëro jôho majêhijadeje.

8

Iesuhu sino jomo'e a ajamade jôhoje.

¹ Iae Iesuro dahorure abuejadeje. Abuejamu gagorovo ae aho'obêhe hu rihioromoruo-madeje. ² Rihioromoromo sino jomo'e ae gemuëro hu bihoromoro ague aho hiromo uavadeje: Bada ja nasi sino avoheho'irano ho ja eni javajêjo. Êhuni jasi nimoromo ajemijê'ohuro iae ajemi'anuejêjo. ³ Ajemi'anuejamu Iesuro övoho nugö'öromo sinoho rêhahoromo uavadeje: Iae na negajêjo ajami'iro. Marêjêjo. Marêjê uavamu gavê'i jomoho rireromoromo hesi sinore sisê sisêho barêjadeje. ⁴ Sisê sisêho barêjamu gagorovo Iesuro uavadeje: Aveho hejêjo. Nadi aho uênêjo. A'i ma-va'irano ho jasi sinoho priest røjahijego ga'irajo. Êhi'oromo Moses-hu uövua de êhi jîê'e suvuoroho God-are öroro bojamego aëro garomo uvo'irarêjo: Jasi sinore sisêho barêjê'ëro iae mae javajêjo.

Iesuhu Rome rajo hesi mu vaejaje a avohade jôhoje.

⁵ Êhi'onugoromo Iesuro va'o Capernaum amore höröjadeje. Höröjamu Rome raje muorovo simano vaejaje ahuro rueromo uavadeje: ⁶ Bada nasi mu vaejahaje aho guomo guome jioromo vi'êhe sisê maro baeromo bogo vuodovê'e ma-röhoremu raromajêjo. Na ja ajaminêjo o bogajo. ⁷ Bogajamu uavadeje: Iae na ja'o ö'oromo hesi sinoho ajami'ejôjo. ⁸ Ajami'ejôjamu rue simano vaejaje ahuro uavadeje: Bada iae mae höjo röhu na ae ma-bise'e jevoromo sisê jevê'e jaehu nasi osare ö'ê'oho bogo maehu höjo. A'i ma-jö'ëro jöe jövego nasi mu vaejahaje aho marê'irajo. ⁹ Ma-jö jövego mu rovaje hesi öroho iae na gavê'e jevajêjo. Êhesi bêhoho na nasi a masijo jabesi aharire jevê'ëro jabesi jôho ejêhoromo muoho vae'i muorovo aribövioho nasi aharire jêvê'ëro nasi jôho ejêhoromo muoho vaejarue höjo. Naehu muorovo ae gö uavê'oho: Va'ê uavê'iroho iae hu va'aje höjo. O muorovo ae gö uavê'oho: Rovê uavê'iroho iae hu rovaje höjo. O nasi mu ajemaje a uavê'oho: Mue êhi êhi vaejê uavê'iroho iae hu êhi vaejaje höjo. Êhu'ëro jö jövego

mu rovaje hesi bëhoho iae na gavë'e jevavëjo. Èhuni uavavëjo: Ma-jö'ëro jöe jövego marëvajo. ¹⁰ Èhi uavamu Iesuro heromo tiöjajede. Tiöromu hu rihimare aribövioho uëvadeje: Hu mabëhe uehorovevade höjo. Èhi jië'e aho na bogo birohë'e jevavëjo. Nosi Israel rajoho jabu'o bogo èhioho mae uehorovevaruëjo. Iae na mae jövavëjo. ¹¹ Èhuni uëvavëjo: Sa'a ioro'ioro raje ae aho'obëhe maja rojomajire beva'ajire jioromu God-are öri ari'ere va'oromo Abraham Isaac Jacob jabu'o gemuore raromoro ie ue'ahoruomo'ajëjo. ¹² A'i Israel raje God-are öri ari'ere va'o raromo'iröhe röho jiëhajoho God-ro Israel rajo a ioro'ioroho babu'öjëvo'iramu èho bogo va'i rori'o ramoramoro va'aruëjo. Èdirö'ore ae aho'obëhe nierusuburu'e bamoromo ane ja'ihö vuogigimoruomo'ajëjo. ¹³ Èhi uëngoromo Iesuro è simano vaejaje aho uavadeje: Va'onëjo. Diehi jio'iröhego jaehu mae uehorovanëhi iae èhi jiaho'ajëjo. Èhi uavamu gavë'i evare hesi aho marëvadeje.

Iesuhu ae aho'obëhe jabesi sino ajëmade jöhoje.

¹⁴ Èhi'onugoromo Iesuro Peter-are osare va'adeje. Va'oromo gavadeje Peter-are jure magonahoho sine vörö'irae'ego röhhore raromamu. ¹⁵ Raromamu gagorovo Iesuro magonahoho hesi övoho rëhahamu vöröho u'uhadeje. Vöröho u'uhamu hegorovo magonahohuro ri'öromu Iesuni iruno'e avohahadeje.

¹⁶ Èhi'amu majae beva'amu gavë'i Satan-are a sisëhu dëre abue'amë'e aribövioho aho'o aëro sö rovareje. Sö rovamu gagoro Iesuro jöe jövoromo ajëmiromu Satan-are aribövioho rarovö'öjëvadeje. O guomo guomo'e aribövioho aho'o jabesi sinoho avohëvamu marëjvadeje. ¹⁷ Èhi a ajëmade hesi bëhoho mami'e jö God-aro baeromo majëhinövade ae Isaiaharo jajivoromo uvadeje:

Nosi guomo guomo hesi i'uocho huro nigemahuë'e höjo.

Nosi vi'ehoho rori'o bava'ë'e höjo.

A ioro'ioruhu Iesuare ijore ijore jijihö'ia'amugo Iesuhu jö majëhjijade jöhoje.

¹⁸ Èhi'oromo Iesuro gavade ae aho'o hesi bëhire ruë numë tagavamu gëgorovo hesi ijorajo ömo'ömhöho uëvadeje: Ruerego no e'u ioni gönö va'irarëjo. ¹⁹ Èhi uëvamu Jew rajo jögoru öri röjëhjijaje ae gemuëro rueromu Iesu uavadeje: Tisa ja dinö'e dinö'e va'ë'iroho na jasi ijore ijore juvonövo'ejöjo. ²⁰ Juvonövo'ejöjamu Iesuro è aho uavadeje: Jero nasi ijore ijore juvo'i uevanuëjo röhu je'o majehu sa'a gagore röho avohoromo mare raromaruoho iae jiajëjo. O je'o ugehu iju vaeromo mare raromaruoho iae jiajëjo. A'i God-are A Ma naehu niavaje hijaje osaho bogojevavëjo. Nadi uvonëjo: Nörö'o hibe juvë'oho mae hibe juvo'ejöromo nasiriroho ruenëjo. ²¹ Èhi'amu Iesuare ijore ijore juvaje ae göëro ri'öromu Iesu uavadeje: Bada uevego na nimo vuonorö'ö va'oromo nasi vavuoho guavo'iröjo. Guavoromo hujeji evare jasi ijore ijore juvo'iröjo. ²² Juvo'iröjamu Iesuro uavadeje: O-ajo. Jero nasi ijoro ijoro juvëjo. Vuonugego vuovo örire jijiharue ariböviohuro jabesi aribövioho guavo'amo'irarëjo.

Iesuhu uavamu jovo börömhö ruhosöjijade jöhoje.

²³ Èhi'oromo Iesuro boat gagore ajio hijamu hesi ijorajo ömo'ömhöhu hu'o ajio gemuore raromoro va'areje. ²⁴ Va'ihö gavareje e'u döre buru börömhöho rueromu jovoho hasa'ego boat gagoho abo rarovamu. Abo rarovo'i röhu Iesu niavë'e jiadeje. ²⁵ Iesu niavë'e jiamu gagorovo va'o ioromo uavareje: Bada ajamuëjo. Vuovavuo'ie'ajëjo. ²⁶ Vuovavuo'ie'ajëjamu uëvadeje: Jemë rabëni juhuonivarujëjo. Jemë God bogo ma uehorovarue aribövie jëvavëjo. Èhi uëngoromo ri'öromu burohu'o jovohu'o uëvadeje: Vuonugohëjo. Vuonugohëjamu jovoho u'uhoromo ma-jörume ruhijadeje. ²⁷ Ma-jörume ruhijamu gavë'i rueho jaburo uarovareje: Ave aho diehi jië'e ae höjo. Huhu uëvë'oho bogo aëremuoho ejaho'i burohu'o jovohu'o jabu'o hesi jöho ejaharue höjo.

Aru'aho sisë ae niö'i jabesi dëroho Iesuhu rarovö'öjëvade jöhoje.

²⁸ Èhi'onugoromo Iesumëro va'aroho va'o e'u ioni gönö Gadarene rajo jabesi sa'are va'o baboro bejareje. Baboro bejamu gavë'i ae niö'iro guavo'amarue juju gagore arije'ëro rueromu Iesu birohareje. Röhu è ae niö'ioho Satan-are a sisëro dëre abueruomë'ëro

jië'ëro vörö ma'e jëvadeje. Èhuni ae aho'obëhe juhuonivareje ë örire jijih'o'iröhoho. ²⁹ Èhi jië'e vöröho jëvë'ëro birohrómo ma-darugo'o uvareje: God-are Harihoho ja rabëni sihusihuaguo'i rovane hõjo. Noehu i'u bae'iröhe majaho bogo rovë'e na ja ëma öri'ahoro huë sisëho vi'ehoho bojamui'i rovane hõjo. O diehi'avuo'i rovane hõjo. ³⁰ Rovane höromo gavare aruhëre mahe aho'obëhe gemuoro ie ue'ahamu gagorovo ³¹ Iesu uvareje: Ja rarovö'öjavuogorovo uövuego no suorovo va'oromo aruhe mahu jabesi dëre va'o abuejarëjo. ³² Abuejarëjamu uëvadeje: Èhuro va'ohëjo. Va'ohë uëvamu hejë'i ë ae niö'i jabesi dëre jioromo suorovo va'oromo ruhe mahu jabesi dëre abueruomadeje. Abueruomamu ë mahohuro aho'obëhe baradore va'o rireromoromo e'ure siö ruruhö'ö va'oromo jove ue'ahoromo vuovadeje.

³³ Vuovamu gavë'i mahu muebejarue ariböviohuro huruomoromo amore va'oromo ae uëvareje: Aru'aho sisëhu dëre jëvade aho ëhi marëjëvhohijajo. O mue gö gö ëhi ëhi ruehijajo. ³⁴ Èhi majëhijamu ae aho'obëhe heromo Iesu biroho'i rueruomadeje. Rueromo garomo uavareje: Ave sa'aho vuonugo'i va'ëjo.

9

Övo hörü'e vuovahë'e a Iesuhu ajamade jöhoje.

¹ Èhi'amu Iesuro boat gagore ajiomoromo jovo döre va'adoho va'o hesi amore ravo'a-madeje. ² Amore ravo'amamu gagorovo övo hörü'e vuovahë'ëro hesi maratuore raro-maje aho aëro giojimo barovareje. Barovamu gagorovo Iesuro gavade jaburo hu mae uehorovamu gëgorovo övo hörü'e vuovahë'e aho uavadeje: Harihohajo. Ma-biririvëjo. Jasi sisëho uehorovoromo vuonugoromo mu'u barëjahë'e hõjo. ³ Mu'u barëjahë'e hõjamu hegorovo jögoru öri röjëhjarue a ioro'iorohuro uehorovoromo uvareje: Asë'ëjo. Ave ahuro God-are ihoho ijumajëjo. ⁴ Èhi uvamu Iesuro gëromo uvadeje: Jabumë ëhi uehorovaruëromo uëvadeje: Jemë rabëni uehoro sisëho baejarujëjo. ⁵ Jemë'o uehorovohëjo. Nani ja ae ëma ua'a'anuëjo: Jasi sisëho uehorovoromo vuonugahë'e hö ua'a'anuëjo. Ja ëhi ua'ibejanëjo aho nunoho bogo ga'ibejarëjo ja mae o sarere jövä'e javego. Röhu ja bogo ëma ua'a'anuëjo: Ri'öromo nami juvëjo hesi guomo guomoho bogo barëjago ja javojagojööni. ⁶ Röhu ë bogo ëma jövo'ibejane jöho iae na jövo'ejöjo huro ejehoromo ri'ö nami juvego jemëro ë muoho garomo èhuro ga'irarijago God-are A Maho naro sa'are hijajire evare sisë mu'uvaje darugoho baejë'e jevego. Èhi uëngoromo röhu övo hörü'e vuovahë'e aho uavadeje: Ri'öromo raromanue maratuoho banigojiomoromo baeromo jasirëro va'ëjo. ⁷ Va'ëjamu iae ri'öromo hesirëro va'adeje. ⁸ Va'amu gavë'i ë ariböviohuro juhuonivoromo uvoruomadeje: God-ro ma-ae uavamu mu börröme ë'ade höromo God rajahiruomadeje.

Iesuhu uavamu Matthew-hu aevoromo hesi ijore ijore juvade jöhoje.

⁹ Èhi'amu Iesuro va'adeje. Va'i gavade tax baejaje ae hesi ihoho Matthew hesi mu vaejaje osare hijamu gagorovo uavadeje: Rueromo nasi ijoro ijoro juvonövonëjo. Juvonövonëjamu hegorovo ri'öromo aevoromo hesi ijore ijore juvonövadeje.

¹⁰ Èhi'amu Iesumëro Matthew-are osare ie ue'ahamu evare tax baejarue ae aho'o sisë aribövie aho'o ëho jaburo rueromo Iesu'o hesi ijorajo ömo'ömohu'o gemuoro ioho ue'ahareje. ¹¹ Ie ue'ahamu gëgorovo Pharisee ariböviohuro Iesuare ijorajoho uëvareje: Asë'ëjo. Jemesi börrömoho rabëni tax baejarue ariböviohu'o sisë a ioro'iorohu'o gemuoro hiromo ioho ijajëjo. Èhi jië'oho sisë hõjo. ¹² Èhi jië'oho sisë hö uvavamu Iesuro hu'o hegorovo ë Pharisee ariböviohu'u'u'e uëvadeje: Jemëhu nasi aribövi ëhi uëvarujoho röhu guomo guomo'e ariböviohuremu doctor gavare hõjo mae jëvë'e ariböviohu bogajo. ¹³ Va'oromo ave jö hesi bëhoho nahoromo birohrëjo. God-ro uvajëjo: Na negajëjo a huë bae'irarije muoho vaejoro mi suvuoroho bogajo. Naro sisë ariböviohu nasinö jëvojoro uë'i rovode hõjo ma-döemu mae jëvë'e ariböviohu bogajo.

Bëhoho rabëni Iesuare ariböviehu i bogo vuonugare jöhoje.

¹⁴ Èhi'amu John-are ijore ijore jijiharue ariböviohuro rueromo Iesu uavareje: No'o Pharisee ariböviohu'o God uehorovo'i ie vuonugarue hõjo. Noro ëhi ë'arue hõjo röhu

jasi aribövioho rabëni bogo ëhioho ioho vuonugarue hõjo. ¹⁵ Rabëni bogo ëhioho ioho vuonugarue hõjamu hegoroovo Iesuro uëvadeje: Nasi ijore ijore jijiharue ariböviehu i bogo vuonugarue hesi bëhoho naro uhu'e uë'ië'ajëjo. Na jemëro uvarujëjo: I'o masurõhe a hesi sörõre rueromo aemo'aemëro huë vavaene baeruomo'ajëjo. Bogo ëhioho ë'i iae ie ue'ahoruomo'ajëjo. Röhu majae ijönö i'o masurõhe aho aëro guduamo bava'iramu evare ioho vuonugo'aruëjo. Avevejö'oho naro jabu'o hijj'ego jabu ioho bogo vuonugo'aruëjo.

Jew rajehu gororovo'irõhe jögoru mamiohu'o Iesuhu barovade mu i'ohu'o bogo gemuore havo'irõhe jõhoje.

¹⁶ Ëhi uënuGOROMO Iesuro uhu jöe gö'o majëhiromo uëvadeje: Niögu i'ohu'o mamiohu'o bogo havo'anuëjo. Bogo havoromo niögu mami dadovadiroho niögu i'o hesi vituoho baeromo niögu mami hesi gagoroho bamoromo sigohi'anuëjo i'ohuro duduhiorovoromo ruho barovego bõrõme dadorovojõëni. ¹⁷ O wine jovo mi sino gagore bigu'ië'iroho jovo i'ohu'o mi sino mamiohu'o bogo gemuoroho havoromo jovo i'oho mi sino mamiroho bigu'anuëjo. Ëhi ë'i'bejanëjo jovohuro gatovoromo ögohuro bibivoromo mi sinoho mamiëro jjië'ëro tögõmoromo dadorovego jovoho rova'i'bejajo. A'i jovo i'oho mi sino i'o hesi gagoremu bigu'anuëjo. Bigu'iramu jovoho mi sinoho mae jio'amo'ajëjo.

Iesuhu magonahe niö'i Jairus-are abojohu'o magonahe gö'o ajëmade jõhoje.

¹⁸ Iesuro ëhi uëvamu gavë'i Jew rajo a bõrõme gemuëro rovadeje. Rueromo ague aho hiromo Iesu uavadeje: Nasi aboje avevejö'e guomajëjo. Jero rueromo jasi övohohesi sinoro bamego i'ovajo. ¹⁹ I'ovajamu hegoroovo Iesuro ri'öromohu'o hesi ijorajo ömo'ömo'ohu'o ë a hesi ijore va'areje.

²⁰⁻²¹ Örire va'amu gavë'i magonahe gemuëro jabu'o va'adeje. Ëmagonahoho man-aero garorovade guomo guomoho bogo barë'i vadune aho'obëhe 12 baejë'ëro jjië'ëro uehorovoromo uvadeje: Na Iesu ma-niögohuremu rehë'ohuro ëhuro marëjevo'ajëromole suare dejonö rueromo niögu viture rehadeje. ²² Rehëmu hegoroovo Iesuro huotorovoromo magonahoho garomo uavadeje: Abojëjo. Nadi juhuonivo'i biririvëjo. Jero na mae uehorovevamu ëhuro ja marëjavë'e hõjo. Marëjavë'e hõ uavamu gavë'i marëjadeje.

²³ Marëjamu gagorovo Iesuro va'oromo ë a bõrõmo hesi osare va'oromo gavade virikö vavaeni'e huosiharue aribövioho ë raromo'i ae aho'obëhe darugo'o nierusuburu'e bamamu gëgorovo ²⁴ uëvadeje: Ae aho'o va'ohëjo. Magonaho harihoho bogo guomo'i man-iajavajëjo. Ma-niavajëjamu hegoro rueho jaburo Iesu sivoromo ijo'ijahareje. ²⁵ Ijo'ijahamuhuro ae aho'obëhe rarovö'öjëvonugoromo magonaho hesi osare va'oromo övohobaejamu i'ovoromo ri'öjadeje. ²⁶ Ëhi ë'ade jõho ë sa'aho aho'obëhe rumorovobe va'adeje.

Ae niö'i nuni tugorohëvadoho Iesuhu ajëmamumu marëjëvade jõhoje.

²⁷ Ëhi'amu Iesuro ë amoho vuonugo'i örire juvo va'adeje. Örire juvo va'amu gagorovonuni sisë'e ae niö'iro rihioromoromo uvobe va'areje: David-are ujoho bõrõme javaje jerononi vavaenimëjo. ²⁸ Ëhi uvobe va'amu Iesuro osare va'adeje. Osare va'amu rue ae niö'iohuro rovareje. Rovamu gëgorovo Iesuro uëvadeje: Na jemë mae uehorovoromo uvarujëjo: Nörö ajamui'irõhoho eni hõjo. Eni hõjamu uavareje: Bada io'ajo. ²⁹ Io'ajamu Iesuro nunoho rehëhoromo uëvadeje: Ëhi jjië'oho jemëhu uehorovarujëhi iae ëhi jjiëho'ajëjo. ³⁰ Ëhi uëvamu gëgorovo nunoho marëjëvamu mae uherihareje. Mae uherihamu gagorovo Iesuro darugo'o majëhiromo uëvadeje: Bogave aho uë'irarijëjo. ³¹ Ëhi uëvamu hegoroovo ë ae niö'iohuro hõ'öromo va'oromo Iesuare jõho bogo ejaho'i Iesuhu jabumë ajëmijade jõho majëhibe sa'ae bövioho jirehareje.

Iesuhu bitaro tövë'e a ajamade jõhoje.

³² Ëae niö'ioho jaburo ë osare jioromo hõ'öjamu gavë'i aëro ae gemu hu'irae baeromorovareje. Ëaho aru'aho sisë dëre jjië'ëro jörumo'e jiadeje. ³³ Jörumo'e jiamu Iesuro ë aru'ahosisëho rarovö'öjamu aho aevoromo jöe jövadeje. Jöe jövamu hegoroovo ae aho'obëhe tiöromo uarovareje: Asë'e ëhi jjië'e muoho Israel sa'arohoho bogo gavë'e javuajëjo. ³⁴ Ëhi

uarovamu Pharisee ariböviohuro uëvareje: Sisë a börömhuro vöröho bojamijego ëhuro a dëre aru'aho sisëho rarovö'o'amaje höjo.

Iesuhu ae aho'obëhe jabesi jöëni vavaenimade jöhoje.

³⁵ Ëhi'amu Iesuro God rajahjarue osare osare God-are jö bëhoho røjëhibe God-hu böröme namiromo muebejëvo'iröhe jö maho majëhibe guomo guome gö gö baejë'e aribövioho avohëvobe ëhi'obe amo masijore ininore juvo barëjadeje. ³⁶ Juvoromo ganövade ae aho'obëhe tagavoromo huë vavaene baeromo sisë'i raromo'ego gëgorovo uvonövadeje: Ëaribövioho vëmu vavu rumo'e ö mahu'ëro raromanovaruë uvoromo jabesi jöëni vavaenimonövadeje. ³⁷ Jabesi jöëni vavaenimamu hesi ijorajo öm'ömhoho uhu'e uëvadeje: Ae aho'obëhe nasinö sö rue'iröhoho ëho mure iruno'e gagovo'iröhoho va'ëne höjo. Mure gagovo'iröhe iruno'oho bövi mae jio'i gagovarue aribövioho no ma-gemu gemu javuajëjo. ³⁸ Ëhuni mu Arijö'oho ëninamiromo uarego huro ae gö'o rëmö'öjogo mure rueromo ajamuiromo iruno'oho gagovo'irarëjo.

10

Iesuare apostle 12 jabesi jöhoje.

¹ Ëhi'amu Iesuro hesi ijoraje 12-ho uëvadeje: Ruehëromoro rovamu daruge bojëmiromo uëvadeje: Satan-are ariböviehu a jabesi dëre jio'amamu gëvë'oho rarovö'öjëvego suorovoromo va'irarëjo. Guomo guome gö gö baejë'e o sino haho'e u'uh'o'amë'e jiamu gëvë'oho avohëvego marëjëvo'irajo. ² Röhu hesi apostle aribövio 12 jabesi ihoho aviëhije. Urimo Simon hesi iho göho Peter'o hesi öho Andrew'o ëhi jëvadeje. Göho James'o John'o ö'o ö'o Zebedee-are harihoho jëvadeje. ³ Göho Philip'o Bartholomew'o jëvadeje. Göho Thomas'o tax baenövade ae Matthew'o jëvadeje. Göho James Alphaeus-are harihoho'o Thaddaeus'o jëvadeje. ⁴ Göho Simon hu Jew rajehu jabesi mueberovo'i nimade aho jiadeje. Göho Judas Iscariot jiadeje. Judas Iscariot hu ijönö Iesuni hirümiromo a jabesi övore bojëmi'iröhe aho jiadeje. Iesuare apostle 12 jabesi ihoho ëhi jio'amadeje.

Apostle 12 jabuhu va'oromo mu vaeröhego Iesuhu rëmö'öjade jöhoje.

⁵ Ëaribövio 12-ho jaburo mue vaebe jijihoröhego Iesuro rëmö'öromo uëvadeje: Va'irarijoho sa'a ioro'ioro rajo jabesirohoro Samaria sa'a rajo jabesi amoroho nadi va'orëjo. ⁶ A'i Israel rajo jabesiriremu va'orëjo jabumë sheep-ëro öre sidövanovoromo ëma jijiharue jiaje. ⁷ Va'oromo uëbe jijihorëjo: lae ga'ië'arujëjo God-ro böröme namiromo muebejëvego. ⁸ Ëhi uëbe guomo guomo'e aribövioho ajëmibe vuovë'e aribövioho i'ovëvobe sino jomo'e aribövioho avohëvobe Satan-are ariböviehu a dëre jio'amë'oho rarovö'öjëvobe ëhi'obe jijihorëjo. A ajëmi'irarije darugo God-arire baejarijoho bogo manaho bojamarije höjo. Ëhuni manaho nadi bae'i aho ma-ajëmibe jijihorëjo. ⁹ Gold ijo bajoho ajivë'e ijo bajoho rövë'e ijo bajoho göta esöroho nadi aegoromo ujuoho jijihorëjo. ¹⁰ A ëninëmiromo ujuohoromo aego'irarije esöho nadi ujuohoromo jijihorëjo. Niögoho nadi göho ujuoho'i magemu ruohoromo jijihorëjo. Höru guduoho nadi io'amoromo ijahoho nadi ujuohoromo jijihorëjo. Ëhi jië'e inömo inömhoho nadi ujuoho jijihorëjo ë hesi bëhoho ae rahu mu vaeromo i mana baejë'oho iae mae jië'e jiaje.

¹¹ Va'irarijoho amo masijore o ininore suorovë'oho va'oromo a ma-maho nahorëjo. Nahoromo birohogorovo ë a hesi osaro raromonövorëjo ijönö ë amore jioromo va'ië'e jëvaje. ¹² Röhu osare rumo va'ë'iroho jejëmiromo uënövorëjo: Huë mae baerëjo. ¹³ Huë mae baerëjamu hegorovo ë osare raromarue ariböviehu uëvë'oho: Iae mae hë uëvë'oho iae huë mae baerumo'ajëjo. O bijönimë'oho uërëjo: God-are huë ma jö uëvodoho vuonugajëjo. Ëhu'ëro bogo bae'a'arujëjo. ¹⁴ O di osahu di amehu jemesi örire nu huodëgoromo jö bogo ejëhë'oho uvorëjo: Jabesi muoho bövioho bise'oho sa'aho tohotohoho sisë höromo jabesi tohotohe jemesi hörure jiajoho riremo va'orëjo. ¹⁵ Ave jöho na jö mae uëvajëjo: God-hu i'u bojëmi'iröhe maja rovë'iroho Sodom o Gomorrah amo rajo jabuhu i'u baeröhoho majianovo'i a'i jemesi jö bogo eruomaje aribövioho jaburo i'u börömo maho baerumo'ajëjo.

Aehu Iesuare aribövi huë sisë bojëmi'iröhe jö Iesuhu jövadohoje.

¹⁶ Aveho hehëjo. Naro rëmö'öjogo jemë vaevë'e sheep harihunö'e vörö'e miehu jioruomajire va'ie'arujëjo. Èhuni va'oromo sigobehu a gagoro ma-burëro ju'lebiromo va'ajëhi ëhi gavë'i jijihorëjo. O ugo ma-maehu hesi iemu iromo ma-taemo hijajëhi ëhi taemo raromobe va'orëjo. ¹⁷ Ae gëvë'iajo. Jaburo guduamo ujuohëvo va'oromo jögoru muebejarue aribövi jabesi övore bojëmi'aruëjo. Jabuhu God rajahijarue osa göro göro hisuebijëvo'aruëjo. ¹⁸ Gavana o sa'are a masijo gö gö jabesi nunire rëmö'iramu nasi jöëni ë riravoromo nasi jöho jabesi örire sa'a gö rajo jabesi örire majëhi'arujëjo. ¹⁹ Röhu jabuhu guduamo ujuohëvo va'amu a masijo jabesi nunire riravë'oho nadi uvorëjo: Na diehi jöho majëhi'ejöjo. O rabu jöe majëhi'ejöromo nurunurumorëjo. Rabëni hesi bëhoho jö majëhi'irarije majoghe rue'iramu evare majare God-ro ajëmiromo jöho røjëhi'iramu majëhi'arujëjo. ²⁰ Bogo jemëhu jöho majëhi'irögoro a'i jemesi Vavu hesi Aru'ahohuro jöho simanore bojëmi'iramu jemëro jöho majëhi'arujëjo.

²¹ Röhu öhuro öho ae gö jabesi örire bojëminövo'aruëjo muo'amojöro. Vavuohuro aboji harihu'oho ëhi gemuoho ë'a'aruëjo. Aboji harihu'ohuro ri'öromo ae uë'iramu vëmu vavu'oho muo'amo'aruëjo. ²² Röhu jemëhu na uehorovevarujohuni ae aho'obëhe jaburo jemesi örire nue huodëgoruomo'ajëjo. Röhu ae rahu biririvoromo mae uehorovevobe va'ojuvo maja barë'iröhe maja rovë'iroho God-ro baejëvoromo manö bamëvo'ajëjo. ²³ Jemë amo göre raromamu aehu sisë vaejëvë'oho huruomoromo amo göro va'onövorëjo. Aveho na jö mae uëvajëjo. Jemë Israel sa'are amo göre göroho bogo va'o barëjë'e God-are A Maho na ö'ejöjo.

²⁴ Jö hejaruje aribövioho jö røjëhijaje aho na bogo iosiremiromo masijoho jëvajëjo. O mu vaejeharuje aribövioho mu simano vaejaje aho na bogo iosiremiromo döroho jëvajëjo. ²⁵ Èhuni jö røjëhijaje aho ae göehu huë vavaene bojemego naehu baejajëhi nasi jö hejaruje ariböviehu ëhi baej'oho iae mae höjo. O mu simano vaejaje aho ae göehu huë vavaene bojemego naehu baejajëhi nasi mu vaejeharuje ariböviehu ëhi baej'oho iae mae höjo. Èhesi bëhoho agano muebejëvaje aho na aehu uevaroho: Ja Beelzebul a sisë jabesi börome javajë uevarohuni èhuni ëhi jië'e ariböviohuro jemë nasi agane jëvë'ego jö sisë bëhi mae uëruomo'ajëjo.

²⁶ Jö sisëho ëhi uëruomo'ajëjo röhu nadi juhuonëmirëjo. Mue rabe gurihiro jiajoho aho'obëhe va'orahoro jio'a'ajëjo. Rabe rabe subivëhajoho aho'obëhe ma-samaro jio'a'ajëjo. ²⁷ Èhi jië'e jiaje naehu jöe rabe vahi'e saginiëri majëhijajoho ijönö maja'e ë jöho ma-va'orahoro majëhirëjo. O saginiëri hia'ire majëhijego hejarujoho ëho amo riroro majëhirëjo. ²⁸ Röhu nadi uvorëjo: Èariböviohuro anagu'o'ajëromo juhuonëmiromo jabesi jöho uehorovorëjo. Jemesi sinohemu muo'amë'oho eni jëvo'i jemesi aru'aho muo'amë'oho bogo eni jioruomë'e jiaje èhuni jabumë nadi juhuonëmi'i God juhuonamiromo hesi jöho uehorovorëjo. Huhu jemesi aru'ahohu'o sinohu'o vëni'e öri ari'ere babu'öjëvoromo ijumëvo'iröroho hu eni jiajëjo. Èaho juhuonamiromo hesi jöho uehorovorëjo. ²⁹ A'i aho bövioho bise'oho nadi juhuonëmirëjo. Èhesi bëhoho God-ro uvajëjo: Jemë iae masije jëvajëromo avo'avoho muebejëvaje höjo. Monie ma-bisemu bu'öromo ugo inine niö'i imo'arujëjo. Röhu jemesi Vavuho bogo uvaje höjo: Ugoho ininego bogo muebe'ejöjo. Bogo ëhioho uvo'i ugoho muebe'amë'ego ugoho bogo gemu vadu'oho ëma vuovoromo ö'idöroho jioromo sa'aroho rireromo rovarue höjo. Vavuohuro gëvego rireromo rovarue höjo. ³⁰ A'i jemë God-ro jemesi bövie bise'e aho'o muebejëhoromo röhu jemesi simano uoho ëhu'o adahëhoromo avo'avoho muebejëhaje höjo. ³¹ Èhuni nadi juhuonivorëjo uge aho'obëhe jio'amajoho ëho ma-jianovo'i ae gemu gemu jemë masije jëvë'e jiaje.

Noehu Iesuare jö a nunire huruoho majëhi'iröhe jö Iesuhu jövadohoje.

³² Ae rahu a nunire uvë'oho: Na Iesuare ae jëvajë uvë'oho naro nasi Vavue ö'idöre hijaje hesi nunire uvo'ejöjo: Èho nasi ae magonahe höjo. ³³ O ae rahu a nunire uvë'oho: Na bogo Iesuare aehu jëvajë uvë'oho naro nasi Vavue ö'idöre hijaje hesi nunire uvo'ejöjo: Èho bogo nasi aehu magonahehu höjo.

Iesuhu rovë'ëro êhu'ëro ae adovoromo göehu jõe gö göehu jõe gö uehorovarue jöhoje.

³⁴Nadi uvorëjo: Nöröhu rovade hesi bëhoho ajamuego sa'ae aho'obëhe iro muorovo'oho vuonugo'i ma-huë baerovoromo gemuoro raromo'iröhego rovade höjo. Na bogo êhuniho rovode höjo. A'i naehu rovode hesi bëhoho naro nasi jöho majëhijego aëro heromo jõe gö gö uehorovoromo muorovo'iröhego rovode höjo. ³⁵Naehu rovode hesi bëhoho nasi jöhuni harihohuro vavuoho nue huodivo'i abojohuro vëmoho nue huodivo'i ajohuro ajoho nue huodivo'iröhego êhuni rovode höjo. ³⁶A nu huodëgarue aribövioho jabesi agane gemuoho jioruomo'ajëjo.

³⁷Ae rahu ja vavu o vëmu nuninö bamo'i na dejonö bamevë'oho nasi a ma jio'iranoho bogo eni javo'ajëjo. O ae rahu harihu o aboji nuninö bamo'i na dejonö bamevë'oho nasi a ma jio'iranoho bogo eni javo'ajëjo. ³⁸Ae rahu ja bogo uvë'oho: Iesuarë jöeni vi'ehe huë vavaene javoje rabe baeromo guomevë'oho iae hesi hõ uvoromo bogo korosi hesi i'u banigojiojanovoromo nasi ijore ijore juvë'oho nasi ae jio'iranoho ja bogo eni javo'ajëjo. ³⁹Ja jasi sinohuni uehorovoromo biririvoromo ave sa'are hi'i êhему uehorovë'oho ijönöho guomo öriro va'a'anuëjo. O ja nasi jöeni guomë'oho ijönöho maro hi'a'anuëjo.

Mu ma vaejarue hesi mana bae'iröhe jöhoje.

⁴⁰Jemëhu nasi jö majëhibe va'ë'iroho ae rahu jemë rajëhiromo baejëvë'oho êhuro na'o rajehiromo baejevoruomaje höjo. O ae rahu na rajehiromo baejëvë'oho êhuro remö'ö-jamu rovode ahu'o rajahiruomaje höjo. ⁴¹Ae rahu uvë'oho: Êaho jö God-aro baeromo majahujaje ae höromo rajahiroomo baejë'oho êhuro jö God-aro baeromo majëhiruomaje ariböviehu suvuoro ujuoharue êhi jië'e suvuoro God-are örire ujuohoruomo'ajëjo. O ae rahu uvë'oho: Êaho ma-mae höromo rajahiroomo baejë'oho êhi jië'e a maehu suvuoro ujuoharuëhi êhi ujuohoruomo'ajëjo. ⁴²Ave jöho na jö mae uë'ie'ajëjo. Ave nasi ijorajoho ae ma-bise'ehu ö'amu aehu garomo uvë'oho: Êaho Iesuarë ijore ijore juvaje ae höromo ma-bisemu ajamiromo enatuore jovo baguso bojamijë'oho ë aribövioho jaburo iae manaho ujuohoruomo'ajëjo.

11

Bapataeto vaejaje ae John-hu ae rëmö'öjamu rueromo Iesu jö ua gavare jöhoje.

¹Iesuro hesi aribövie 12 jabesi örire jöho majëhinugoromo va'adoho ë bëhire jio'amaje amore amore jöho majëhibe bëhoho röjëhibe juvadeje.

²Iae John bapataeto vaejaje ahuro savoji gagore hiromo hejade uavamu: Kerisoro muoho êhi vaejaje hõ uavamu hegorovo hesi ijorajoho rëmö'öromo uëvadeje: Va'oromo êhi êhi Iesu ua garëjo. ³Ua garëjamu va'oromo Iesu uavareje: No uvaruëjo: God-ro a böröme nugö'ö'iramu nosi örire rue'a'ajëjo. Na ja ë aho javajëjo. O na no muebe'earëjo ae göëro rueröhego. ⁴Êhi uavamu hegorovo Iesuro uëvadeje: Va'oromo diehi hejarujoho gavarujoho John majahirego he'irajo. ⁵Uarëjo: Nöröro ae nuni sisë'oho ajëmijego mae uheriharue höjo. Höru sisë'oho ajëmijego mae jijiharue höjo. Jomo'e aho ajëmijego marëjëvoromo jabesirire sisë sisëho barëjêhaje höjo. Hia'i sisë'oho ajëmijego hia'e dadovoromo jõe hejarue höjo. Vuovë'e aho ajëmijego i'ovarue höjo. Bogo eni jië'e aribövioho ajëmiromo majëhijego God-are jö maho hejarue höjo. John êhi majahirëjo. ⁶Röhu John o ae rahu biririvoromo nasi örire mae uehorovevë'oho ë ahuro maho hi'a'ajëjo.

⁷Maho hi'a'ajëjamu hegorovo vuonorö'ö va'areje. Va'amu gavë'i Iesuro ë hesi bëhire gagovare aribövioho John-are jöho majëhiromo uëvadeje: Urimë'ioho jemë rabe ga'irö-goro John-hu a rumo'e sa'are hijajiroho êho va'onövarije höjo. Ijo rudu burehu huosihego arue anume va'aje êhi uehorovaje aho na John êhi jië'e ae jiamu ga'i va'arije höjo. Bogajo. ⁸O diehi jië'e aho ga'i va'arije höjo. Na John niögu mabëhe sanu'e io'amë'e ae jiamu ga'i va'arije höjo. Röhu êhi jië'e niögu ma io'amarue aribövioho bogo a rumo'e sa'aroho raromo'i a masijehu raromarue osaremu raromarue höjo. ⁹Êhi jië'oho jemë rabëni a rumo'e sa'aroho va'arije höjo. Na John jö God-aro baeromo majëhijaje ae jiamu ga'i va'arije höjo. Io'ajo. John iae hu êhi jië'e ae höjo. Röhu aveho hehëjo. Jö God-aro baeromo

majëhinövare a ioro'ioroho iosirëmiromo John hu börömoho höjo. ¹⁰Iae ë a hesi jöho God-are surire ëhi jajivoromo uvë'e höjo:

Ave aho God nasi jö bajuvaje aho höjo.

Ja va'ie'iroho naro hu urimo nugö'ö'iramu va'oromo ae uë'a'ajëjo jaehu va'irane öroho iogorahoröhego.

¹¹ Ave jöho na jö mae uë'ie'ajëjo. Ave sa'are raromobe rovere aho ae gemu vadu'oho John bogo iosiramiromo börömoho jië'e höjo. A'i God-hu böröme namiromo muebejëvego hesi aharire raromarue a inino mahuro John iosiramiromo döroho jioruomajëjo.

¹² Urimo John bapataeto vaejavuaje aehu a jö majëhijadevare evare aëro aevoromo daruge aho'o bojamiromo biririvoromo öroho jiovobe rueruomé'e höjo ëhuro God-ro böröme namiromo muebejëvego hesi aharire jëvoröhego. Jaruvoho ëhi gemuoho ë'oruomaje höjo.

¹³ Aveo'ioho Moses jögoru bojëmade ahuro God-hu böröme namiromo ae muebejëvo'iröhe jöho majëhijamu jö God-aro baeromo majëhibe rovere ariböviohuro ëhi gemuoho ë'obe rovaroho röhu ijo tugoho'ioho John-ro ë jöho majëhijade höjo. ¹⁴ Röhu urimo majëhiromo uënövare höjo: God-hu böröme namiromo muebejëvego ga'irarije ë hesi urimo ae gö rue'a'ajëjo. Ëahuro Elijah-hu vaenövade mue gemuoho barue'ajëjo. Jöho ëhi majëhinövare höjo. Röhu jemë mae uehorovo'i nëgë'oho uvorëjo: Elijah-are mu barueröhego uövare aho iae John höjo. ¹⁵ Ae rahu ja God-are jö hejanue ae javë'oho bëhoho nahoromo birohonëjo.

¹⁶ Röhu jaruvore raromaruje aribövi jemesi jöho uhu'e majëhi'ie'ajëjo. Amo ririre raromarue jö bijönimoruomaje asisö'oho jëvanovajëjo. Amo ririre raromoromo asisö'o ioro'iorohuro ioro'ioroho uvëvoruomajëjo: ¹⁷ Noehu aninivoromo jemëni virikö huosi-hëharoho jemëro bijönimoromo bogo ejahuoromo javavarije höjo. Noehu aninivoromo huë vavaeni'e jö iaroho jemëro bijönimoromo bogo ejahuoromo nierusuburu'e bamarije höjo. ¹⁸ Ëhesi bëhoho John-ro rueromo God uehorovoromo ma-hi'i ioho jovoho bogo inövade höjo. Ëhi'onövadoho jemëro ë jö bijönimarue asisö'oho va'ëne bijönëgamu John-are jöho bogo ejaho'i sisë'i uehorovoromo uvonövariye höjo: Aru'aho sisë dëre jië'ëro ëhu'ëro ioho jovoho bogo ijaje höjo. ¹⁹ O God-are A Maho naro rueromo ioho jovoho ma-ijaje höjo. Ëhi ë'ajoho jemëro ëhu'o bijönimoromo uvaruje höjo: Nörö gahëjo. Ioho mahunö'e iromo vörö'e jovemu ijaje höjo. Hu vajiohu'e tax baejarue ahu'o a sisë ioro'iorohu'ö ëho jabesi aemo'aeme höjo. Jemëro John-are muohu'o nasi muohu'o bijönimaruje höjo röhu no God-are uehoro maho baejë'ëro muoho vaejarue höjo. Ëmuoho aëro garomo uvoruomo'ajëjo: God-are uehoroho iae mae höjo. Ëhu'ëro muoho vaejare höjo.

Ame göehu göehu Iesu bogo ma uehorovare jö Iesuhu jövadohoje.

²⁰ Ëhi uënuogoromo ame gö gö birëgadeje ë hesi bëhoho urimë'i huhu a ajëmiromo darugo'e mu masijo vaebe ë amore amore juvamu jabuhu bogo huotorovoromo hu mae uehorovarohuni. Birëgoromo uëvadeje: ²¹ Chorazin'o Bethsaida'o amo rajohumë vaevë'oho jemë sisëro revo hesi jëvajëjo. Naro darugo'e muoho jemesi amore vaejago garomo röhu nasi jöho bijönimaruje höjo. Naehu darugo'e mu jemesi amore vaejodoho Tyre amore o Sidon amore vaejago ga'ibejarëjo mami gö'e jabesi sisëni huë vavaene baeromo niögu sisë io'amoromo uonëro buerovoromo uehoro sisëho vuonugo'i uehoro mae baeruumo'ibejajo. ²² God-hu i'u bojëmi'iröhe maja rovë'iroho Tyre o Sidon rajo jabuhu i'u bae'iröhoho ma-jianovo'i jemëro i'u börömo maho bae'a'arujëjo. Ëhuremu uehorovorëjo. ²³ Röhu Capernaum amo rajohumë jemëro jemesi sivue uehorovoromo uvaruje höjo: Nosi ihoho ö'idöre ajiomu'ajëjo. Bogo ëhioho jio'i sa'aro be'a'ajëjo. Ëhesi bëhoho naro darugo'e muoho jemesi amore vaejago garomo röhu nasi jöho bijönimaruje höjo. Naehu darugo'e mu jemesi amore vaejodoho Sodom amore vaejago ga'ibejarëjo mu sisëho vuonugo'ibejarëjo ëhuro jabesi amoho bogo sisëri'i jaruvoho ëhi mae jio'ibejajo. ²⁴ God-hu i'u bojëmi'iröhe maja rovë'iroho Sodom rajo jabuhu i'u baeröhoho ma-jianovo'i jemëro i'u börömo maho bae'a'arujëjo. Ëhuremu uehorovorëjo.

Iesuaro va'oromo nuho'iröhe jöhoje.

²⁵ Iesuro ëhi uëngoromo evare God uavadeje: Apo ja ö'idörohu'o sa'arohu'o muebejanue ae javajëjo. Naro jasi örire huë mae uavajëjo. Rabëni hesi bëhoho jero gavane nuni aji'e a masijohuro uvoruomamu: Nosi simanoho mae javuoromo bövie bise'e ga barëjë'e javuajë uvamu gëgorovo jero jasi jöho jabesi örire subivëhë'e javajëjo. A'i gavane bogo gavë'e ariböviohuro bogo döroho bamorovo'i jöho he'i nëgamu gëgorovo jero jasi jö bëhoho röjëhijë'e javajëjo. ²⁶ Apo iae mae höjo. Jero jasi nimoromo ë'ane höjo.

²⁷ God ëhi uanugoromo ë aribövioho uëvadeje: Nasi Vavuohuro jöe aho'o bojemijë'e höjo muebe'irodego. Vavuohuro gemuëro Harihoho na avoho gevaje höjo. Harihoho naremuëremu Vavuoho avoho gavaje höjo. O Harihu naehu di aribövi röjëhi'i negë'ohuro ëhuro ë ariböviohuremu röjëhijego jabu'o Vavuoho gavarue höjo.

²⁸ Röhu jemë ae rahu sivohoromo i'u'e mu vaejamu u'uvëvë'oho ruerego naro jemesi dë vövöbajo'oho sasohëho'iröjo. ²⁹ Na sanu'e mae jevë'e jiaje ëhuni nasi muoho banigojiomoromo nasi jöho henövorëjo. Èhi ë'ë'oho jemesi dë vövöbajo'oho ma-mabëhe sasohëvo'ajëjo. ³⁰ Rabëni hesi bëhoho nasi muoho i'uoho bogojio'i sase höjo.

12

Jew rajehu nuharue maja hesi jöhoje.

¹ Èhi'oromo Jew rajo jabesi nuho majaho rovamu gagorovo Iesumëro mure jijihareje. Jijihoromo hesi ijorajo ömo'ömohuro hómëvamu ioho babovoromo ue'ahobe va'areje. ² Babovoromo ue'ahobe va'amu gagorovo Pharisee ariböviero Iesu uavareje: Asë'e jaruvohoho nuho majae höjo. Jasi ijorajo ömo'ömehu i avoharuoho ëho nuho maja hesi jögoroho aharuëjo. ³ Aharuëjamu Iesuro uëvadeje: David nosi a böröme jionövade höjo. Röhu hu'o hesi ariböviohu'o jabumë hómëvamu hegorovo huhu ë'ade jö God-are surire adaharijoho ëho diehi'oromo bogo avoho uehorovarujëjo. ⁴ David-ro God-are osa mare va'ade höjo. Va'oromo God-are nunire bahijare ioho hu'o hesi ariböviohu'o ue'ahare höjo. Èioho bogo David'o hesi ariböviohu'o ue'aho'iröhoho jio'i hesi ma-priest-ëremu ue'aho'iröhe ie jiade höjo. Röhu jabuhu ue'aharohuro ëhuro jögoroho ahare höjo. Röhu ë hesi jöho bogojiaje höjo. ⁵ Ave jöhu'o Moses-hu jögoru surire jajivadoho jemë diehi'oromo bogo avoho adaharije höjo. Nuho maja rovë'iroho priest ariböviohuro God-are osa börömo hesi muoho vaeromo ëhuro nuho maja hesi jögoroho ahoruomaje höjo. Röhu God-are osa börömo hesi muoho vaejaruëro jië'ëro ëhu'ëro jöho bogojiajëjo. ⁶ Naro jemë uëvajëjo: Mu i'ëro aviae rueromo God-are osa börömo hesi muoho iosiramijë'e höjo. Èhuni nasi ariböviohuo i babovoromo ue'aharuoho jöho bogohöjo. ⁷ God-are surire jöho jajivoromo uvë'e höjo: God-ro uvajëjo: Na negajëjo a huë bae'irarije muoho vaejöro mi suvuoroho bogajo. Èjjo hesi bëhoho avoho he'ibejarijëjo ave övo uno'e aribövioho bogo uë'ibejarijëjo: Mu sisë ë'l'ë'e jëvajëjo. ⁸ God-are A Maho naro nuho maja hesi jögoroho muebejaje höjo.

Övo guomahë'e a Iesuhu ajamade jöhoje.

⁹ Iesuro ëhi uëngoromo va'adeje. Va'oromo Jew rajehu God rajahjarue osare rumo va'adeje. ¹⁰ Amo ë osare övo hitahi guomahë'e aho ë hijë'e jiadeje. Hijamu gagorovo aëro ë raromë'ëro uehorovoromo uvareje: È'ego noro Iesuarue jö sisëho nahoromo jögoru muebejarue aribövioho majëhijarëromu Iesu uavareje: Nuho majare a jabesi sino ajëmijë'oho na ëhuro no nosi jögoroho aharuë höjo o bogajo. ¹¹ O bogajamu Iesuro uhu'e uëvadeje: Jemë ae gemu sheep gemu javë'oho röhu nuho majare guare beva'ë'oho na ja ajamiromu io bamonëjo o bogajo. Io'ajo. Nuho majaroho iae io bamo'anujëjo. ¹² Röhu sheep-oho ma-jianovo'i aho börömo mae höjo. Èhuni nuho majare a ajëmijë'oho iae mae höjo. ¹³ Iesuro ëhi uëngoromo ë övo guomahë'e aho uavadeje: Jasi övoho nugö'öjëjo. Èhi uavamu hegorovo övoho nugö'öjamu marëromu övo gö jiajëhi ëhi jiadeje. ¹⁴ Mae jiamu gagorovo Pharisee ariböviohuro va'oromo Iesu anoröhe jöho mevoruomadeje.

Iesu hu God-are mu vaejaje a mae jiaje jöhoje.

¹⁵ Iesu anoröhe jöho mevaruë uvamu hegorovo Iesuro ë amore jioromo va'adeje. Va'amu gagorovo ae aho'obêhe hu rihiomareje. Rihiomamu huro guomo guomo'e aribövioho aho'o ajëmamu mae jëvadeje. ¹⁶ Mae jëvo'ego uënövadeje: Nae hu jemë ajëmijode jöho bogave aho uë'irarijëjo. ¹⁷ Ëhi uënövade jö hesi bëhoho jö God-aro baeromo majëhinövade ae Isaiiah-hu jajivadëhi ëhi jioröhego. Isaiiah-ro God-are surire jajivoromo ëhi uvadeje:

¹⁸ Nae hu baejé'ëro mu vaejaje aho gahëjo.

Nasi dë vövöbajo'e aho'o uehorovego dë mae jevaje aho aviae höjo.

Naro nasi Aru'ahoho hesirire bamaho'ejöjo.

Bamaho'iramu ae aho'obêhe dinö'e dinö'e raromaruoho huro nasi mu ma hesi jöho majëhi'ajëjo.

¹⁹ Hu bogo giagiavoromo darugo'oho uvo'a'ajëjo.

Aho hesi huëho amo ririroho bogo he'a'aruëjo.

²⁰ Ijo adehu aho bu'öjanovo'ië'iroho hu bogo ahö'ö'ajëjo.

Irehu duorohanovo'ië'iroho bogo duoha'a'ajëjo.

Ëhi ë'obe va'ojuvo hujeji evare hesi mu mahuro ruahö'öjëvoromo dö maro jio'a'ajëjo.

²¹ Ëhi jio'iramu ae aho'obêhe dinö'e dinö'e raromaruohuro hu uehorovoromo uvoruomo'a-jëjo: Iae huro gemuëro ajamui'ajëjo.

Iesuhu Satan-are aribövi a dëre jio'amamu rarovö'öjëvadoho hu bogo Satan-are darugoho baeromo ëhioho ë'adeje. Ëhesi jöhoje.

²² Ëhi'amu aëro ae gemu hu'irae baeromo rovaraje. Ëaho Satan-are a sisëro dëre abo hijv'ëro ëhu'ëro nune tugohahoromo bitare tövah'ë'adeje. Ëaho hu'irae baeromo rovamu gagorovo Iesuro a sisë dëre jiajoho rarovö'öjamu bitaroho nunoho mae jioromo jöe jövoromo uherihadeje. ²³ Ëhi ajamamu gagorovo ae aho'obêhe jiodudu'iraeromo uarovareje: Ave aho na hu a böröme David-are uje no ajamui'iröhe aho höjo. O rahu höjo. ²⁴ Ëhi atoruumamu hegorovo Pharisee ariböviohuro uëruomadeje: O bogo ëhi jii'ë a maho jioromo ë'aje höjo. A'i Beelzebul aru'aho sisë jabesi börömo huro vöröho bojamego ëhuro a dëre aru'aho sisëho rarovö'ö'amaje höjo. ²⁵ Ëhi uëruomamu Iesuro gëromo uvadeje: Ëariböviohuro nasi jöho ëhi uehorovaruëromo uhu'e uëvadeje: Sa'ae gemuehu adovoromo jabesi arijo'arije muorovë'oho barërovo'ajëjo. Ame gemuehu o agane gemuehu adovoromo jabesi arijo'arije muorovë'oho bogo biririvo'i barërovo'ajëjo.

²⁶ Ëhuni Satan-ro ri'öromo hesi aribövi a jabesi dëre jio'amajoho rarovö'öjëvo'ibejajo ëhuro hesi ariböviohu'o muorovo'ibejajo hesi darugoho muoho uehoroho diehi'oromo biririvoromo nami'ibejajo. ²⁷ Röhu jemëro uvarujëjo: Sisë a börömo huro nörö vöröho bojamego hesi sisë aribövioho rarovö'ö'amaje höjo. Ëhi jii'ë'oho na jemesi ariböviohuro sisë a börömo hesi vöröho baeromo rarovö'ö'amarue höjo. O diehi'oromo ë'arue höjo. Jaburo uë'a'aruëjo: Sarerivarujëjo. Aho bogo sisë a börömo hesi vöröho baeromo ëhioho ë'arue höjo. ²⁸ A'i naro God-are Aru'aho hesi darugoho baeromo rarovö'amaje höjo. Ëhuni uvorëjo: God-ro aevoromo böröme namiromo nosi örire muebejavuajëro jii'ëro ëhu'ëro ë'ajëjo.

²⁹ Röhu aehu darugo'e a hesi osare rumo va'oromo hesi mae sisë ujuohaho va'ië'iroho bogo ëma ujuohaho va'irögoro urimo darugo'e aho guduamoromo tövonugoromo evare hesi inömo inömo ujuohaho va'a'ajëjo. Naro Satan ëhi ruahö'öjaje höjo.

³⁰ Ae rahu bogo nasi a jii'ë'oho ëho huro arua anumiae nugö'ö'amaje höjo. ³¹ Ëhuni uëvajëjo: Aehu mu sisë vaejé'oho God-are iho ijumarue jö sisë atë'oho aho'o God-ro uehorovoromo vuonugëho'ajëjo. A'i God-are Aru'aho hesi iho ijumë'oho ëhi jii'ë jö sisëho God bogo uehorovoromo vuonugo'ajëjo. ³² God-are A Ma nasi jö sisë'i atë'oho God-ro uehorovoromo vuonugo'ajëjo. A'i God-are Aru'aho hesi jö sisë'i atë'oho ëho God bogo uehorovoromo vuonugo'ajëjo jaruvo majahu'o maja ijohu'o.

Aho jö jövajire heromo uvarueje: Ëa hesi dë vövöbajo'oho mae höjo ë aho sisë höjo. Ëhesi uhu jöhoje.

³³ Ijo bajo mae uro'li nagë'oho ijo ma hesi bajoho uro'a'anuejo. O ijo sisë javë'oho bajo sisë uro'a'anuejo. Ijoho bajoro garomo uvo'a'anuejo: Eijoho mae höjo ëho sisë höjo. ³⁴ Sigobu aboji harihu'e jëvanovajëjo. Ijo sisë va'ëne jëvë'oho jemë diehi'oromo ijo bajo manö'e raeromo jö mae atorëjo. Bogo eni jëvajëjo. Uehoro maehu o uehoro sisëhu dë vövöbajore rarovëvajoho ëhi jië'e jöho jö'ëro atarue höjo. ³⁵ A maho uehoro maëremu jëvë'ëro jö maemu atarue höjo. A sisëho uehoro sisëremu jëvë'ëro jö sisëmu atarue höjo.

³⁶ Naro jemë üevajëjo: Jö sisë rabe rabe ëma atë'oho mevëvo gëröhe majaho rue'iramu God-ro uë'a'ajëjo: Ejöho rabëni atarije hö uë'iramu mana ua'a'arujëjo. ³⁷ Ae gemu gemu jasi jöre garomo ua'a'ajëjo: Ja a mae javajëjo. O jasi jöre garomo ua'a'ajëjo: Ja a sisë javajëjo.

Ariböviehu Iesu bogo ma uehorovoromo huhu darugo'e mu vaejoro dinamare jöhoje.

³⁸ Ehi jövamu hegorovo Jew rajo jögoru öri röjehijarue ae gö gö o Pharisee ae gö gö ëho jaburo ri'öromomo uavareje: Tisa no nagujajëjo ga'li jero darugo'e muoho vaejoro ehuro uvo'iröhëro: Ja daruge God-aro baeromo muoho vaejanue höjo. ³⁹ Vaejanue höjamu üevadeje: Sareri'e aribövi sisë jëvajëjo. Magonahehu hesi baru vuonugo'li ma-juvajëhi jemëro ëhi God vuonugo'li mue gö gö uehorovarue höjo. Jemë rabëni darugo'e muoho ga'li nimarujëjo. Na ëhi jië'e muoho bogo vae'li a'li jö God-aro baeromo majëhinövade ae Jonah-hu God-are mu böromomo röjehijade ëhi jië'e muohuremu röjehi'ejöjo. Mue gö gö bogajo. ⁴⁰ Jonah-are mu böromomo hesi bëhoho jovo mi böromohuro Jonah nimu'öjamu abueromo hesi dëre hijade höjo. Hiromomo majae niö'li gemu vahie niö'li gemu hesi uhure ëgubijiohamu höröjade höjo. Höröromomo rovadëhi God-are A Maho nara sa'a gagore abo hiromomo majae niö'li gemu vahie niö'li gemu hesi uhure höröromomo rue'ejöjo. ⁴¹ Nineveh amo rajohuro ave jaruvore raromarue ariböviohu'o gemu mae ri'öromomo God-are nunire riravoruomö'ajëjo. Riravo'iramu God-ro jabesi mu maho garomo jemesi mu sisëho garomo jemë uë'a'ajëjo: Nineveh amo rajehu vaejare ëhi jië'e mu maho bogo vaejë'ego ehuni na üevajëjo: Jemë sisë'e aribövie jëvaje sisëro va'ohëjo. Ehesi bëhoho ë Nineveh amo rajohuro mu sisë vaeruomë'ëro hejare Jonah-ro God-are jöe majëhijamu hegorovo jabesi uehoro sisëho vuonugo'li uehoro mae baejare höjo. Jonah ma-bise'o jioromo jö majëhijadoho Nineveh amo rajohuro hesi jöho ejahare höjo. A'li naehu hu iosiramiromomo böromomo jioromomo jö majëhijajoho jemë bogo ejeharue höjo. Ehu'ëro jië'ëro mevo gëröhe majaho rue'iramu jemë sisë'rëjëvo'ajëjo. ⁴² O ëho majaho rue'iramu arue sa'a göre böromomo vaenövade magonahohuro ave jaruvore raromarue ariböviohu'o gemu mae ri'öromomo God-are nunire nami'a'ajëjo. Nami'iramu God-ro sa'a gö rajo magonaho hesi mu maho garomo jemesi mu sisëho garomo jemë uë'a'ajëjo: Etagonahahehu vaejade ëhi jië'e mu maho bogo vaejë'ego ehuni na üevajëjo: Jemë sisë'e aribövie jëvaje sisëro va'ohëjo. Ehesi bëhoho ë sa'are böromomo vaenövade magonahohuro hesi sa'aho vuonugo'li öri ëgoböviro rovide höjo a böromomo Solomon-hu nuni aji'e jö jövajoho he'iro. Solomon-hu ae ma-bisemu böromomo jioromomo jö majëhijajoho ë magonahohuro he'li nimade höjo. A'li naehu Solomon iosiramiromomo böromomo mae jioromomo jö majëhijajoho he'irarijoho jemë bijönëgajëjo. Ehu'ëro jië'ëro mevo gëröhe majaho rue'iramu jemë sisë'rëjëvo'ajëjo.

Satan-are a sisëhu a hesi dëre vuonorö'ö abueromomo ijumahade uhu jö Iesuhu jövadohoje.

⁴³ Röhu Satan-are mu ajamijaje aru'aho sisëhuro ae gemu hesi dëre hi'a'ajëjo. Hiromomo hörö va'a'ajëjo. Va'oromomo jovo rumo'e sa'are va'oromomo hi'iröhe röhohe nahobe juvojuvo bogo birohogorovo ⁴⁴ uvo'a'ajëjo: Na vuonorö'ö va'oromomo hijode sionore röho maho ë hi'ejöjo. Ehi uvonugoromomo vuonorö'ö va'oromomo urimomo hijade a hesi dëre abueromomo ga'a'ajëjo dë vövöbajö'oho gagemu jio'li bibivoromomo iogorë'e ma-mabëhe osa va'ëne jio'iramu. ⁴⁵ Ehi jio'iramu gagorovo va'oromomo Satan-are aru'aho sisë aho'obëhe söromomo rue'a'ajëjo. Eurimore ro hijade aru'ahoho a sisë höjo. Ijore huhu sö rovide ariböviohuro hu iosiramiromomo jabumë sisë bëhi mae jioruomajëjo. Ehu'ëro urimomo sisë'li hijade aho ijönöho sisë bëhe hi'a'ajëjo. Jaruvore raromarue aribövi sisëho jemë ëhi sisë'rëjëvo'ajëjo.

Iesuare vëmu ömo'öme o ö ömo'öme rahumë jëvaje jöhoje.

⁴⁶ Ĕhi jövamu evare hesi vëmohu'o ö ömo'ömo'hu'o jaburo Iesu'o jöe ato'i nëgamu rueromo amonö riravareje. ⁴⁷ [Riravamu ae gemuëro ri'öromo Iesu uavadeje: Hë-ajo. Jasi vëmohu'o ö ömo'ömo'hu'o ja'o jöe ato'i nimoromo amonö riravarujëjo.] ⁴⁸ Riravarujëjamu Iesuro uavadeje: Ja uehorovanuoho nasi vëmoho nasi ö ömo'ömo'ho di aribövioho jioruomajëjo. ⁴⁹ Ĕhi uanugoromo hesi ijore ijore jijiharue aribövioho övëro röjëhijadeje ae aho'obëhe jaburo gëjïro. Hesi aribövioho röjëhiromo ae aho'obëhe uëvadeje: Aruëroho nasi vëmohu'o ö ömo'ömo'hu'o jëvavëjo. ⁵⁰ Ae rahu nasi Vavue ö'idöre hijaje aehu nimajëhi ëhi ë'l'oho ëhuro ë aribövioho nasi öe ma'ine vëme jioruomajëjo.

13

Aehu i ujo sa'a mare sa'a sisëre riremado uhu jöhoje.

¹ Ĕmajae gemuore Iesuro osare jioromo va'oromo nume jovo e'u riröre abuejadeje. Abueromo God-are jö bëhoho röjëhi'i sa'aro hijadeje. ² Hijamu ae aho'obëhe ro tagavamu Iesu jovore boat gagore va'o hi'i ae aho'obëhe jovo riröre riravareje. ³ Riravamu Iesuro uhu jöe majëhiromo ëhuro jöe aho'obëhe röjëhijadeje.

Röjëhiromo uëvadeje: Iae ae gemuëro i uje ujuohoromo mure riremoli va'ade höjo. ⁴ Riremobe va'amu ujo ioro'ioroho örire rireromade höjo. Rireromamu gavë'i ugëro ro i barëjare höjo. ⁵ Ujo ioro'ioroho munë uhunö jïë'e sa'are rireromade höjo. Rireromoromo ma-burëro ri'amade höjo sa'aho munë döro ma-bisemu jïë'ëro. ⁶ Riromo dirumoho bogo ma io'amë'ëro majaëro rojomoromo anamu sahori'amade höjo. ⁷ Ujo ioro'ioroho bibë'e resu resu'e sa'are rireromade höjo. Rireromë'ëro bibë'e resuohuro riromo ujo maho baba'amade höjo. ⁸ Ujo ioro'ioroho sa'a mare rireromade höjo. Rireromoromo riromo bajoho rae'amade höjo. Uje gemu gemu röhu ioro'ioroho baje 100 rae'amo'i ioro'ioroho 60 rae'amo'i ioro'ioroho 30 rae'amade höjo. ⁹ Ae rahu ja God-are jö hejanue ae javë'oho bëhoho nahoromo birohonëjo.

Iesuhu rabëni uhu'e majëhinövade ë hesi jöhoje.

¹⁰ Ĕhi'amu Iesuarë ijorajo ömo'ömo'huro rueromo Iesu uavareje: Ja ae aho'obëhe jö majëhijë'iroho ja rabëni uhu'oho majëhijanue höjo. ¹¹ Rabëni uhu'oho majëhijanue höjamu uëvadeje: God-ro böröme namiromo aho'obëhe muebejaje jöho urimoho subivëhade höjo. Ĕsubivëhade jöho huro hesi suvuore jemë bojëmijë'e höjo jemëremu he'i a ioro'ioroho bogo heruomoröhego. ¹² Ĕhesi bëhoho aji'e jö javë'oho God-ro gö'o bojami'iramu baeromo bövi mae javo'ajëjo. O bogojavë'oho bisemu baejanoho God-ro ë uehoroho mu'uvaha'ajëjo. ¹³ Ĕhuni naehu uhu jöemu ë aribövi majëhijaje hesi bëhoho jabu gavaruoho bogo avoho gavarue höjo. Hejaruoho bogo avoho heromo simanoroho baejarue höjo. ¹⁴ Jabumë ëhi jïë'e aribövie jioruomajëjo. Jabesi jöho mami'e jö God-aro baeromo majëhinövade ae Isaiiah-ro jajivoromo ëhi uvë'e höjo:

Jemë hemu he'a'arujëjo
röhu bëhoho bogo avoho he'a'arujëjo.
Jemë gaemu ga'a'arujëjo
röhu bëhoho bogo avoho ga'a'arujëjo.

¹⁵ Ĕaribövi jabesi dë vövöbajo'oho i'uhëgaje höjo.

Hia'oho tugohëhë'e höjo.
Nunoho sigohijëhë'e höjo.
Bogo ëhioho jëvo'ibejajo nunëro ga'ibejarëjo.
Hia'ëro he'ibejarëjo.
Dë vövöbajo'oho sasohoromo jöho bae'ibejarëjo
ëhuro jabumë huotorovoromo rue'ibejarëjo
naro avohëvego mae jëvo'ibejajo.

¹⁶ Isaiiah-hu jajivadëhi aribövi ioro'ioroho ëhi jioruomaje höjo. A'i jemë huë mae baejë'e jëvavëjo. Rabëni jemë nunëro garomo avoho gavaruje höjo. Hia'ëro heromo avoho hejaruje höjo. ¹⁷ Ave jöho na jö mae uë'ië'ajëjo. Jemë gavaruje muoho o hejaruje jöho

urim'eli jö God-aro baeromo majëhinövare ariböviohu'o a ma ioro'iorohu'o aho'obëhe jaburo nimoruomade höjo garomo he'iro. Röhu bogo garomo bogo heruomade höjo.

I ujo sa'are riremadi uhu jö Iesuho huruoho majëhijadohoje.

¹⁸ Röhu aehu i ujo riremadi uhu jö hesi bëhoho hehëjo. ¹⁹ God-hu bëröme namiromo muebejëvaje jöho ae rahu hia'ëremu heromo bogo avoho hejamu gavë'oho a sisë bërö-mohuro rovaje höjo. Rueromo gavaje God-are jöho i ujo va'ëne jabesi dëre jiego garomo baeniëhiromo rori'o bu'öjaje höjo. Ujo örيره rireromamu ugehu i barëjare jö hesi bëhoho ëhi höjo. ²⁰ O i ujehu munë uhunö jië'e sa'are rireromomoro riromo sahori'amade jö hesi bëhoho aëro God-are jöho heromo ma-burëro nimorohoromo jöho ejaharue höjo. ²¹ Ejahoromo jöho ma-döëremu baejë'ëro ëhu'ëro majae ma-bunemu mae uehorovoromo garöhe God-are jö uehorovaruohuni aehu sisë vaejëvamu gavë'oho o huë vavaene rovamu gavë'oho ma-burëro vuonugarue höjo. ²² O ujehu bib'ë'e resu gemuore rireromadi jö hesi bëhoho aëro God-are jöho hejarue höjo. Heromo ave sa'a hesi muohuni nurunurumomoro o sarerivoromo uvarue höjo: Inöme bövie bise'e masije höromo jabesi nuninö bamarue höjo. Bamoromo sa'arohemu uehorovaruohuro ëhuro God-are jö jabesi dëre jiajoho taemego jabumë bogo rae avoharue höjo. ²³ O ujehu sa'a mare rireromomoro baje 100 o 60 o 30 rae'amade jö hesi bëhoho aëro God-are jöho heromo avoho hejarue höjo. Avoho heromo rae avoharue höjo. Ioro'iorohuro ioro'ioroho iosirëmiromo mu ma-mabëhe vaejarue höjo.

Resu sisëhu iruno'o ma hesi gemuore ri'amade uhu jöhoje.

²⁴ Iae Iesuro uhu jöe gö'o majëhijadeje. Majëhiromo uëvadeje: Ae gemuehu ujo ma riremoro ë'adëhi God-ro bëröme namiromo hesi öri ari'oho ëhi muebejaje höjo. Ae gemuëro mure va'oromo iruno'e ujo maho riremobe va'ade höjo. ²⁵ Ëhi ë'ë'ëro ae aho'obëhe momorö'öj'e jiamu gagoro mu arijo'ohu'o muorovaje ae gemuëro mure rovade höjo. Rueromo i va'ëne resu sisëho i ujo riremadi ë riremonugoromo va'ade höjo. ²⁶ Ëhi ë'ë'ëro iruno'oho riromo baje raejamu gavë'i resu sisëhu'o riromo rae'amade höjo. ²⁷ Resu sisëhu'o rae'amamu gagorovo mu arijo'o hesi mu vaejarue ariböviohuro rueromo uavare höjo: Asë'e ja ujo mae jasi mure riremadi höjo. Diehi'oromo resu sisëhu'o rijade höjo. ²⁸ Uëvade höjo: Na'o muorovaje ahuro ë'ade höjo. Ë'ade höjamu uavare höjo: Ëhi jië'oho na ja nagajëjo no va'oromo resu sisëho ravojöro. ²⁹ Uëvade höjo: Bogajo. Jemëro resue ravo'ihöromo iruno'ohu'o ravo'amojöeni bogo ëhioho ë'a'arujëjo. ³⁰ Ëhuni iruno'ohu'o resuohu'o nugego ëhi gemu mae ri'irajo gagovo'iröhe majaho rue'iröhe höjo. Ëmajaho rue'iramu iruno'e gagovarue aribövioho naro uë'ejöjo: Urimo resuoho ravoromo huhoho'amorëjo vëniro huo'irarije. Amo evaro iruno'oho gagovoromo ujuoho va'oromo nasi iruno'o osaro bahirëjo.

Ijo hisue mustard-hu ëgovaje uhu jöhoje.

³¹ Röhu uhu jöe gö'o majëhiromo uëvadeje: Ijo hisu ihe mustard ujehu bërömoriro mo ëgovajëhi God-ro bëröme namiromo ae gö'o gö'o ëhi gagovoromo muebejëvobe va'a'ajëjo. Ae gemuëro mustard ijo hisu uje gemu baeromo hesi mure öjade höjo. ³² Röhu bajo ioro'ioroho ma-jianovo'amo'i a'i ë mustard ujoho biseharihe höjo. Ëhi höjo röhu riromo ëgovoromo ijo hisu ioro'ioroho iosirami'amoromo ijo va'ëne jiaje höjo. Ijo va'ëne jiego ugëro rueruomomoro ë ijo hesi adore ijue vae'amarue höjo.

I dë huaje osehu ire rumorovade uhu jöhoje.

³³ Ëhi majëhinugoromo uhu jöe gö'o majëhiromo uëvadeje: God-hu bëröme namiromo muebejëvaje öroho aviëhi höjo. I dë huaje osehu ire rumorovajëhi God-hu bëröme namiromo muebejëvaje muohuro sa'ae aho'o ëhi rumorovobe va'aje höjo. Magonahe gemuëro ie aho'obëhe gagovoromo i dë huaje osoho i gemuore bamoromo iohu'o buarohade höjo. Buarohamu ë ioho aho'obëhe rumorovo barëjade höjo.

³⁴ Ëjöho aho'obëhe Iesuro uhu'e majëhijamu rue gagovare ariböviohuro hejareje. Jöe aho'o ma-uhu'e gemu majëhinövadeje. ³⁵ Ëhi uhu'e majëhijade jö hesi bëhoho urimo jö

God-aro baeromo majëhinövade ae gemuëro Iesuhu vae'iröhe mu jöho God-are surire jajivoromo uvadeje:

Naro uhu'e majëhinövo'ejöjo.

Ö'idö sa'a bamadevare evare aevoromo subivëhobe rovade jöho na jövonövo'ejöjo.

Resu sisë hesi uhu jö Iesuhu huruoho majëhijade jöhoje.

³⁶ Èhi'onugoromo gagovarue aribövioho rëmo'li osare va'adeje. Osare va'amu gagorovo hesi ijorajo ömo'ömohuro rueromo uavareje: I va'ëne resu sisëhu i mure ri'amade jöho huruoho majahuijago no hejarëjo. ³⁷ Hejarëjamu uëvadeje: Ujo ma riremadi a hesi jö bëhoho uëromu ë'ode höjo: God-are A Maho nörö höjo. ³⁸ I mu hesi jö bëhoho uëromu ë'ode höjo: Sa'ae aho'obëhe dinö'e dinö'e jiobe va'ajëjo. I ujo hesi jö bëhoho naru uëromu ë'ode höjo: God-hu muebejëvego hesi aharire raromarue aribövie jioruomajëjo. I va'ëne resu sisë hesi jö bëhoho naru uëromu ë'ode höjo: A sisë bërömo hesi aribövie jioruomajëjo. ³⁹ Mu arijo'o nu huodivoromo resu sisë hesi ujo riremadi a hesi jö bëhoho naru uëromu ë'ode höjo: Satan höjo. I gagovo'iröhe maja hesi jö bëhoho naru uëromu ë'ode höjo: Ave sa'a bövi bise'o barë'iröhe majaho höjo. I gagovo'iröhe aribövi jabesi jö bëhoho naru uëromu ë'ode höjo: Anera aribövioho jioruomajëjo. ⁴⁰ Resu sisë gagovoromo vëniro huaruëhi sa'a bövi bise'o barë'iröhe majaho rue'iramu ëhi jio'a'ajëjo. ⁴¹ Èho majaho rue'iramu evare God-are A Maho naru nasi anera aribövioho rëmo'ö'iramu jabumëro rueroomo'ajëjo. Rueruomoromo mu sisë rëjëhijarue o God-are jö aharue aribövi God-hu muebejëvajoho mevoromo ⁴² vëni bërömehu ravajire ruruhö'öruomo'ajëjo. Èdirö'ore ae aho'obëhe nierusuburu'e bamoromo ane ja'iho vuogigimoruomo'ajëjo. ⁴³ Èhi ë'iramu evare mu mae vaëjarue ariböviohuro jabesi Vavuehu muebejaje öri ari'ere raromoromo majaehu bamoromo ajivajëhi ëhi ajivoruomo'ajëjo. Ae rahu ja God-are jö hejanue ae javë'oho bëhoho nahoromo birohönëjo.

Gurihijë'e inömo mabëhe o nienia mabëhe ë inömo jabesi uhu jöhoje.

⁴⁴ Röhu God-hu bëröme namiromu muebejëvaje jö göho uhu'e uë'ië'ajëjo. Ae gemuehu gurihi nugë'e inömo mabëhi birohoro e huremu gemu uehorovadëhi God-hu bëröme namiromu muebejëvaje jö ehuremu ëhi uehorovo'irarije jöho höjo. Ae gemuëro ae gö hesi mure juvo'li gavade höjo inömo ma-mabëhe gagovoromo gurihi nugë'e jiamu. Gurihi nugë'e jiamu gagorovo huro ujuohoromo röhu maho gurihiromo duhade höjo. Duhonugoromo ë inömhuremu uehorovoromo nimorohë'li va'oromo hesi maho sisëho aho'o imo'amo barënuogoromo ijo bajo bövi mae baeromo vuonorö'ö va'oromo gurihi nugë'e inömo hobe bae'li ë muoho imade höjo.

⁴⁵ O aehu nienia mabëhe ehemu uehorovadëhi God-hu bëröme namiromu muebejëvaje jö ehemu ëhi uehorovo'irarije jöho uhu'e uë'ië'ajëjo. Nienia imo'amaje ae gemuëro nienia mabëhe imo'amo'li nahobe juvade höjo. ⁴⁶ Nahujuvo nieniae gemu ma-mabëhoho birohade höjo. Birohonugoromo ë nieniahuremu uehorovoromo va'oromo hesi maho sisëho imo'amo barënuogoromo ijo bajo bövi mae baeromo vuonorö'ö va'oromo ë nieniaho gemu imade höjo.

Viö uhu jöhoje.

⁴⁷ Röhu God-hu bëröme namiromu muebejëvaje jö göho uhu'e uë'ië'ajëjo. Aëro viö bëröme jovo e'ure ba'amare höjo. Ba'amamu jovo maje ihe gö gö viöre aegade höjo. ⁴⁸ Aëgoromo irijiomamugo evare jovo riröre bava'oromo raromare höjo. Raromoromo jovo majo maho suovoromo hevöre io'amo'li sisëho ruruhö'öjare höjo. ⁴⁹ Èjö hesi bëhoho ave sa'a hesi majaho barë'iramu ëhi jio'a'ajëjo. Aneraëro rueroomoromo a maho ëhi rëmo'li a sisëho mevoromo ujuohoromo ⁵⁰ vëni bërömehu ravajire ë ruruhö'ö'aruëjo. Èdirö'ore ae aho'obëhe nierusuburu'e bamoromo ane ja'iho vuogigimoruomo'ajëjo. Èhi jio'a'ajëjo.

Jö mae göho mamie göho i'e ë hesi jöhoje.

⁵¹ Röhu naehu majëhijode jöho aho'o na jemë he barëjarije höjambu uavareje: Io'ajo. ⁵² Io'ajamu Iesuro uëvadeje: Èhu'ëro God-are jögoru mami öri röjëhijaje ae rahu God-hu böröme namiromo muebejëvaje jö i'ohu'o èhu'o hejë'oho inömo mamiohu'o i'ohu'o hesi osare jiaje aho va'ëne jianovajëjo. Èhi jië'e aehu inömo mamiohu'o i'ohu'o bahijaje osare jio'amajoho va'orahoro ujuoho rueromo röjëhijajëhi èhi jië'e ariböviohuro God-are jö mamiohu'o i'ohu'o ae röjëhiruomoma'ajëjo.

Iesuare amo rajehu Iesu bijönimoruomade jöhoje.

⁵³ Èhi jië'e uhu jöho majëhinugoromo Iesuro va'adeje. ⁵⁴ Va'oromo hesi amëro rovadeje. Rueromo hiromo God rajahijarue osare rumo va'oromo God-are jö bëhoho röjëhijadeje. Röjëhijamu hegorovo tiöjëvadeje. Tiöromo uvoruomadeje: Diehi'oromo simano maho baeromo darugo'e mu masijoho vaejaje höjo. ⁵⁵ Hu sarerivajëjo. Ma-ijo muemu vaejaje a hesi harihe höjo. Hesi vëmoho Mary höjo. Hesi ö ömo'ömoho James Joseph Simon Judas èhi jio'amajëjo. ⁵⁶ Hesi ma'ino ömo'ömoho aho'o no'o gemu mae raromarue höjo. Èhi jië'oho diehi'oromo aviëhi jië'e muoho baejade höjo. ⁵⁷ Èhi uvoromo nue huodivareje. Nue huodivamu gëgorovo Iesuro uëvadeje: Jö God-aro baeromo majëhijarue aribövioho dinö'e dinö'e va'ë'iroho aëro no mae uehorovavuarue höjo. A'i nosi sa'a raje agane gemuoho jemëremu bogo èhioho uehorovavuarue höjo. ⁵⁸ Èhi uëngoromo darugo'e muoho magemu gemu ë vaejadeje amo rajoho bogo ma uehorovaruego.

14

John bapataeto vaejaje a guomade jöhoje.

¹ Èhi'amu Iesuhu mu börömo vaejaje jöho sa'a a böröme Herod-ro hejadeje. ² Herod-ro jöho heromo hesi mu vaejarue aribövioho uëvadeje: Èaho John bapataeto vaenövade aho höjo. Hu guomoromo ri'öj'e höjo. Guomoromo ri'öj'ëro èhu'ëro darugo böröme baeromo mu masijoho vaejaje höjo.

³⁻⁴ Röhu ë jö hesi bëhoho urimë'i Herod-ro hesi öe Philip-are vabore hesi ihoho Herodias gohoniahijadeje. Gohoniahijamu John-ro ri'öromo ua'i hijadeje: Èmagonaho baejanoho èho bogo maehu höjo. Èhi ua'i hijamu Herod-ro ë magonaho hesi jöëni ae uëvamu John guduamoromo tövoromo savoji gagore ba'amareje. ⁵ Èhi'amu Herod-ro John ano'i nimoromo röhu uvadeje: Ae aho'obëhe uvoruomaje höjo: John hu jö God-aro baeromo majahuijaje ae hö uvarue höjo. Èhi uvoromo ë aribövioho juhuonëmiromo bogo anadeje.

⁶ Èhi'ojuvo Herod rahade majaho rovadeje. Herod rahade majaho rovamu Herodias-are abojohuro ae aho'obëhe jabesi nunire rueromo javavadeje. Javavamu Herod-ro garomo vuëvadeje. ⁷ Vuëvoromo magonahoho uavadeje: Ja rabe rabe nagë'oho iae na bojami'ejöjo. God-ro ge'ego na mae uavajëjo. ⁸ Èhi uavamu abojohuro va'o vëmehu nimade jöho heromo rueromo Herod uavadeje: Bapataeto vaejaje ae John-are sönöho tarioromo simanoho hevöro bamoromo avehuro baro bojemëjo. ⁹ Èhi uavamu hegorovo rue a börömhuro huë vavaene baejadeje. Huë vavaene baejade höjo röhu urimo darugo'e jöho ë aribövi jabesi nuniro ë magonahoho mae uavë'ëro èhu'ëro jöe bojëmiromo uëvadeje: Magonahehu nimajoho baro bojami'hëjo. ¹⁰ Bojamihëromo ae rëmö'öjamu savoji gagore va'oromo John-are sönöho tarioromo ¹¹ simanoho hevöre bamonugoromo barueromo abojoho bojami'areje. Bojamamu huro bava'o vëmoho bojamadeje. ¹² Èhi'amugo John-are ijore ijore jijiharue ariböviohuro rueromo sinoho bava'oromo guavareje. Guavonugoromo va'oromo Iesu majahijareje.

Iesuhu ae aho'obëhe 5,000 da'uojëhade jöhoje.

¹³ John bapataeto vaejëvaje a guomade jöho majëhijamu hegorovo Iesuro va'oromo boat-re ajio hiromo a rumo'e sa'are va'i va'adeje hu'o hesi ariböviohu'o sivue raromoröhëni. Èva'aje jöho hegoro ae aho'obëhe jabesi amore amore jioromo va'oromo Iesuhu va'ajire sa'a hörëro ë va'oruomadeje. ¹⁴ Va'oruomamu Iesuro jovo döre boat-re va'adoho sa'are

rueromo ravo'amoromo gavade ae aho'obêhe tagav'e'le jiamu gëgorovo jabesi jöëni vavaenimoromo jabesi aribövïe guomo guomo'oho ajëmijadeje.

¹⁵ Èhi'ojuvo majae garobo'e bamamugo hesi ijorajo ömo'ömhuro rueromo uavareje: Aveho a rumo'e sa'ae höjjo. O majae mami'e barëj'e höjjo. Èhuni aribövïoho rëmö'öjogo amo göro göro va'oromo ie imo'amo'irarëjjo. ¹⁶ Ie imo'irarëjamu Iesuro uëvadeje: Jabumë rabëni va'ojöräjo. Jemëro iruno'oho da'uojëhirëjjo. ¹⁷ Da'uojëhirëjamu uavareje: Iae mae höjjo röhu aviae no ie övo gö mine visue niö'i èhemu javuajëjjo. ¹⁸ Èhemu javuajëjamu uëvadeje: Baro bojemihëjjo. ¹⁹ Èhi uënujoromo huro aribövïoho uëvadeje: Garasioro raromohëjjo. Raromohëromomo ie övo gö mine visue niö'i ujuoho rovaroho èho huro ujuohoromo ö'idöho sioroho garomo God huë mae uavadeje. Huë mae uanujoromo ioho ato'atovoromo hesi ijorajo ömo'ömo'oho i'imëmamu ujuohoromo ae aho'obêhe suvorëmijareje. ²⁰ Suvuorëmijamu ae aho'obêhe è ioho visuoho ue'ahamu da'uëgadeje. Da'uëgamu gagorovo ijorajoho jaburo vitu vituohogovoromo aegamu esöe aho'obêhe 12 irijiom'amadeje. ²¹ Èhi'areje. Ama'e aho'obêhe 5,000 rabu'e iohu'o visuohu'o ue'ahoruomadeje. Röhu magonahe asisö'e jabu'o ue'ahareje.

Iesuhu e'u döre hörehu va'ade jöhoje.

²² Èhi'amu Iesuro hesi ijorajo ömo'ömo'oho uëvadeje: Boat-oro ajjo raromoromo e'u ioni gönö urimo va'öhego na a ioro'ioroho rëmö'öjjo. ²³ Èhi uëromomo ae aho'obêhe rëmö'önujoromo parie vae'i hesi sivue dahorure ajiomadeje. Ajiomoromo hesi sivue hijamu vahiromadeje. ²⁴ Vahiromamu nume ijorajoho jaburo öri ègobövïro jovo döre va'oruo-mamu evare burëro jabesi nuninö rueromo jovoho hasaromo boat-ohu'o babu'öjëvobe va'adeje. ²⁵ Èhi'ojuvo sisonuvo'ia'amu Iesuro jovo döre hörëro rovadeje. ²⁶ Jovo döre rovamu gagorovo ijorajoho jaburo jiodudu'iraeromo uvareje: Aru'ahëro rovajëromomo juhuonivoromo jö'e dadovareje. ²⁷ Jö'e dadovamu hejë'i Iesuro uëvadeje: Nadi juhuonivo'i biririvohëjjo. Na jevajëjjo. ²⁸ Na jevajëjamu Peter-ro uavadeje: Bada ja javë'oho uevego na jovo döre ö'öjjo. ²⁹ Ö'öjamu Iesuro uavadeje: Rovëjjo. Rovëjamu hegorovo Peter-ro boat-re jioromo jovo döre abueromo Iesu biroho'i hörëro jovo döre va'adeje. ³⁰ Va'ihö gavade bure rovamu gagorovo juhuonivadeje. Juhuonivoromo jovo gagore abue'ia'amu gavë'i uvadeje: Bada ajemëjjo. ³¹ Ajemëjamu hejë'i Iesuro övoho nugö'öromomo Peter ma'enoromo uavadeje: Mae uehorovevo avoho'ibejanëjjo. Ja rabëni uehoro niö'ioho baejane höjjo. ³² Èhi uanujoromo jaburo niö'iro boat gagore ajiomamu gavë'i buroho barëjadeje. ³³ Buroho barëjamu gagorovo boat-re raromare aribövïohuro Iesu rajahiromomo uavareje: Iae mae-ëjjo. Ja God-are Harihe javajëjjo.

³⁴ Èhi'onujoromo e'u ioni gönö rueromo Gennesaret sa'are ravo'amareje. ³⁵ Ravo'amamu gagorovo è sa'a rajohuro Iesu garomo uvoruomadeje: Iae Iesu hö uvoromo è sa'ae bövioho jöe nugö'öjamu guomo guomo'e ae aho'obêhe ujuoho rueruomadeje. ³⁶ Ujuoho rueromo èninamiromomo uanövareje: Guomo guomo'e aribövïoho uëvego ja niögu vituohuremu rëhego èhuro guomo guomoho barë'amajo. Èhi ua'ego ae rahu rëhë'oho marë'amonövadeje.

15

Pharisee aribövïehu God-are jö bogo avoho uehorovo'i jabesi a mami jö börröme hö uehorovare jöhoje.

¹ Èhi'amu Pharisee aribövïohu'o Jew rajo jögoru öri röjëhjarue aribövïohu'o èho jaburo Jerusalem jioromo rovareje. Rueromo Iesu uavareje: ² Jasi ijorajo ömo'ömo'oho nosi a mamiehu bojëmibe rovare jögoroho ahoruomaje höjjo. Nosi a mamiehu è'arëhioho jasi aribövïoho jovoho övoho bogo èhioho otehodivorovë'le ioho ma-ue'aharue höjjo. Rabëni èhioho è'arue höjjo. ³ Èhi uavamu hegorovo Iesuro uëvadeje: Röhu jemë rabëni jemesi a mami jabesi muohuremu uehorovoromo èhuro God-are jögoroho aharuje höjjo. ⁴ Èhesi bëhoho God-ro uëvade höjjo: Jasi vëmu vavu'oho mae uehorovëvonëjjo. O jöe gö'ö uëvade höjjo: Ae rahu jö sisë jövoromo vëmu o vavu hesi iho ijumahë'oho anego guomo'irajo.

⁵Röhu jemëro ë jöho ahoromo ae röjëhiromo uëvaruje höjo: Jaehu jasi vëmu vavu'o God-are nunire uëvë'oho: Nasi maho sisëho ujuohoromo jemë ajëmi'ibejodoho röhu aveho na God-are ihoro bamë'e jevajë uëvë'oho ⁶nadi röhu maho huotorovoromo vavuoho ajaminëjo. Ajamijë'oho sisë höjo. Vavu ajamijë'oho sisë hö uëvarujohuro ëhuro vëmu vavu'o mae uehorovëvo'irarijeho God-hu bojëmade jöho jemëro aharuje höjo jemesi a mami jöho e'irovo. ⁷Sareri sareri'e aribövie jëvájëjo. Jö God-aro baeromo majëhijade ae Isaiah-ro jemëhu ë'irarije jöho jajivoromo ëhi uvë'e höjo:

⁸Ave ariböviohuro ma-jö'ëremu God na rajehi'i

dë vövöbajo'oho bogo nasi gemuoroho jio'i rori'o jioruomajëjo.

⁹Jabumë ajabesi jögoroho ae röjëhiromo uëruomaje höjo: Ëho God-are jöe jiaje ejahuorëjo. Ma-a jabesi jögoroho ëhi röjëhiromo ëhuro ma-döhemu God na rajehiruomaje höjo. Ëjemesi jö Isaiah-hu jajivadoho iae mae höjo.

Bogo i ijaruohuro a'i uehoro sisë baejaruohuro ëhuro God-are nunire sisërëjavuaje jöhoje.

¹⁰Iesuro ëhi uënguroromo ae aho'obëhe uëvadeje: Ro gemuoro gagovohëromoro ro gagovamu uëvadeje: Ave uhu jö uë'ië'ajoho avoho heromo bëhoho baerëjo. ¹¹Rabe jö'ore va'ë'oho bogo ëhuro aho sisërë'amo'i a'i rabe jö'ore jioromo suorovë'ohuro ëhuro aho sisërë'amaje höjo.

¹²Iesuro ëhi jövamu hejë'ëro hesi ijorajoho jaburo rueromo uavareje: Jaehu ë jö majëhijamu Pharisee ariböviehu heromo huë sisë baeruomadoho na ja uehorovanuëjo. ¹³Na ja uehorovanuëjamu Iesuro uëvadeje: Nasi Vavue ö'idöre hijaje a hesi aribövioho mure i maehu rijajoho va'ëne jioruomajëjo. Ëmure hesi ëma ri'amaje resu resuho nasi Vavuohuro jaho'amoromo ruruhö'ö'ajëjo. ¹⁴Ëhuni ë resu resu va'ëne Pharisee aribövioho ëhi vuonugorëjo. Jaburo nuni sisë'e ariböviohuro öroho röjëhijanovarue höjo. Nuni sisë'e a göehu nuni sisë'e a gö öri röjahijë'oho jabumë niö'li guare bejëvo va'a'ajëjo. ¹⁵Bejëvo va'a'ajëjamu Peter-ro Iesu uavadeje: Röhu jö'ore va'aje o jö'ore jioromo suorovaje uhu jö hesi bëhoho huruoho majahuijeho no hejarëjo. ¹⁶Hejarëjamu Iesuro uëvadeje: Na jaruvoho ëhi jemë'o uehoroho bogojëvájëjo. ¹⁷Jemë rabëni bogo garomo uvarujëjo: Rabe jö'ore va'ë'oho dëre abueromo dëre jioromo suorovoromo bogo aho ijumëvë'e ma-gua gagore va'aje höjo. ¹⁸A'i jö'ore jioromo suorovaje jöhuro dë vövöbajo'ere jioromo rojomoromo jö'ore suorovaje höjo. Suorovoromo ëhuro aho God-are nuniroho sisërë'amaje höjo. ¹⁹Ëhesi bëhoho uehoro sisëhuro dë vövöbajo'ere jioromo rojomego ëhuro ae muo'amoruomaje höjo. Goho'amoruomaje höjo. Öero jijihanovuomaje höjo. Vajiohëro ujuohoruomaje höjo. Ae sarerëmiruomaje höjo. Ae gö jabesi ihoho ijumuoruomaje höjo. ²⁰Ëhi jië'e mu sisë vaejë'ohuro ëhuro aho God-are nunire sisërë'amaje höjo. A'i övo bogo eguë'e i ijë'oho bogo ëhuro aho God-are nuniroho sisërë'amaje höjo.

Israel rajo bogo a'i sa'a gö rajo magonahehu Iesu mae uehorovade jöhoje.

²¹Ëhi'oromo Iesuro ë sa'aho nugo va'adeje. Va'adoho va'o Tyre amo Sidon amo jiajinö sa'are ë rovadeje. ²²Rovamu iae Canaan sa'a rajo magonahëro ë sa'are hijë'ëro rueromo Iesu uavadeje: Bada ja a böröme David-are ujoho javaje nani vavaenimoromo ajeminëjo. Satan-are a sisëro nasi aboji hesi dë gagore abuejë'e höjo. Abuejë'ëro magonahoho sisë'i hijajëjo. ²³Sisë'i hijajëjamu Iesuro bogo jöho uavadeje. Bogo jöho uavamu hesi ijorajo ömo'ömhuro rueromo uavareje: Magonahoho uavego va'ajo. Hu ma-darugo'o uvobe nosi ijore ijore rovajëjo. ²⁴Rovajëjamu Iesuro uëvadeje: God-ro sa'are remö'ö'jade höjo naro rueromo bogo sa'a gö rajoho ajëmi'i a'i Israel raje sheep va'ëne subirö'ö'amë'ohemu ajëmi'irodego. ²⁵Ëhi uëvamu ë sa'a gö rajo magonahohuro ro Iesuarë bëhire ague aho hiromu uavadeje: Bada ajemijëjo. ²⁶Ajemijëjamu Iesuro uehorovoromo uvadeje: Vëmu vavu'ehu jabesi aboji harihu'o urimo ajëmijaruëhi naro nasi sa'a rajohemu ëhi urimo ajëmi'i rovode höjo. Ëhi uvoromo ë sa'a gö rajo magonahoho uhu'e uavadeje: O-ajo. Noehu aboji harihu'o jabesi i ujuohoromo ö harihu mio'amë'oho ëho bogo maehu höjo. ²⁷Bogo maehu höjamu hegorovo magonahohuro uehorovoromo uvadeje: Iae na bisemu ioniro sa'a gö raje jevo'ego ëhuni bogo ajëmi'i jöho jövájëjo. Röhu noehu bogo rarovego öehu

i ugobajo'o ue'aharuēhi nani Iesuro na'o ēhi ejehoromo nasi abojoho ajami'ajējo. Ēhi uvoromo mana uhu'e uavadeje: Bada iae mae-ējo rōhu jabesi ōhuro vavu jabesi maratuore jioromo rireromē'e i ugobajo'oho ue'aharuē hōjo. ²⁸ Ue'aharuē hōjamu Iesuro uavadeje: Asē'e naro ajamijōro uehoro ma-mabēhe barovane hōjo. Ēhuni jaehu nimanuēhi ēhi ē'ejōjo. Ēhi ē'ejōjamu gavē'i abojoho marējahadeje.

Iesuhu ae aho'obēhe jabesi sino avohēhade jōhoje.

²⁹ Ēhi'amu Iesuro va'adeje. Va'adoho va'o Galilee jovo rirōre va'oromo dahorure ajiomoromo sa'aro hijadeje. ³⁰ Hijamu ae aho'obēhe maho jaburo hōru sisē'e aho nuni sisē'e aho ōvo hōru tōvēhē'e aho bitaro tōvēhē'e aho guomo guomo'e a ioro'ioroho aho'obēhe ēhi ujuoho rueruomadeje. Ujuoho rueromo Iesuhu hijajire sa'are bahiruomadeje. Bahijamu huro avohēvamū mae jēvadeje. ³¹ Mae jēvamū ae aho'obēhe garuomadeje bitaro tōvēhē'e aribōvioho mae jioromo jōe atamu ōvo hōru'e tōvēhē'oho mae jēvamū hōru sisē'e aribōvioho mae jioromo jijihamu nuni sisē'e aribōvioho mae jioromo uherihamu. Ēhi'amu gēgorovo jabumē ae aho'obēhe tiōjēvadeje. Tiōromō God Israel rajo muebejēvaje a hesi ihoho dōro bamoruomadeje.

Iesuhu ae aho'obēhe 4,000 i da'uojēhade jōhoje.

³² Ēhi'amu Iesuro hesi ijorajo ōmō'ōmoho uēvadeje: Ruehē uēromō rovamu uēvadeje: Ave aribōviohuni vavaenegajējo. Jabumē na'o raromobe rovaromo majae niō'i gemu barējē'ero ēhu'ero i ue'ahō'irōhoho bogohōjo. Ma-dē gagēromō rēmō'ōjē'oho na bi-jōnegajējo va'ego ōrire nune ōrijēvojōēni. ³³ Ēhi uēvamū rue ijorajoho jaburo uavareje: Iae ēhi hōjo rōhu aveho ma-sa'aemu jiē'e ōri ari'ero ae aho'obēhe rovē'e hōjo. Ēhi jiē'oho no dinō'e ioho birohōromō da'uojēhi'ejarējo. ³⁴ Da'uojēhi'ejarējamū uēvadeje: Ioho dimino'e jēvajējo. Dimino'e jēvajējamū uavareje: Ioho ōvo gō mine ōvo gōre niō'i visu ininoho ma-gemu gemu javuajējo. ³⁵ Ēhi uavamū hegorovo Iesuro ae aho'obēhe uēvadeje: Sa'aro raromohējo. ³⁶ Raromohēromō ie ōvo gō mine ōvo gōre niō'i ujuoho rovarohu'o visuohu'o ujuohoromō God huē mae uanugoromō ato'atovoromō hesi ijorajo ōmō'ōmoho i'imēmamū ae aho'obēhe suvuorēmijareje. ³⁷ Suvuorēmijamū ae aho'obēhe ue'ahamū da'uēgadeje. Da'uēgamū gagorovo ijorajoho jaburo vitu vituoho gagovoromō esōe ōvo gō mine ōvo gōre niō'i aegamū irijiomō'amadeje. ³⁸ Ama'e aho'obēhe 4,000 jaburo ē ioho visuoho ue'ahoromadeje. Rōhu magonahe asisō'e jabu'o ue'ahareje.

³⁹ Ēhi'amu Iesuro ē aribōvioho rēmō'ōnugoromō boat-re ajio hiromō Magadan sa'are va'adeje.

16

Pharisee aribōviohu'o Sadducee aribōviohu'o jabuhu Iesu bogo ma uehorovoromō huhu darugo'e mu vaejōro dinamare jōhoje.

¹ Iae Pharisee aribōviohu'o Sadducee aribōviohu'o ēho jaburo rovarēje. Rueromō Iesu guaro beva'ōjōro nimoromō uavareje: God-are darugoho baeromō bogo gavarue muoho rōjahujego no gavarējo huro ja ajamego muoho vaejanue javego o bogo. ² Ēhi uavamū huro uēvadeje: Jeniromoromō ō'idōho kavuego uvaruje hōjo: Ō'idō kavuajoho vamae jio'iro ē'ajējo. ³ O sue'oho uvaruje hōjo: Ō'idō kavuoromō ramoramovajoho jaruvoho ēni buru'e rue hesi hōjo. Jemēro ō'idōho uherihoromō kavuego garomō uvaruje hōjo: Ēhesi bēhoho iae ēhi jio'iē'ajējo. Rōhu ave jaruvore rovaje muoho garomō ē hesi bēhoho bogo avoho garomō uvarujējo: Iae God-are mu bōrōmoho rovajējo. ⁴ Sareri'e aribōvi sisē jēvajējo. Magonahēhu hesi baru vuonugo'i ma-juvajēhi jemēro ēhi God vuonugo'i mue gō gō uehorovaruje hōjo. Jemē rabēni darugo'e muoho ga'i nimarujējo. Na ēhi jiē'e muoho bogo vae'i a'i Jonah-hu God-are mu bōrōmō rōjēhijade ēhi jiē'e muohuremū rōjēhi'ejōjo. Mue gō gō bogajo. Ēhi uēnugoromō rēmō va'adeje.

Pharisee aribōvi o Sadducee aribōvi jabesi i dē huaje oso hesi uhu jōhoje.

⁵ Ĕhi'amu Iesumëro e'lu döre va'oromo ioni gönö rovareje. Rueromo ijorajoho jaburo gavareje rumonëgamu iruno'oho bogo ujuohë'e jëvamu. ⁶ Ĕhi'amu Iesuro uhu'e uëvadeje: Jemë gavë'iajo. Pharisee aribövi o Sadducee aribövi jabesi i dë huo'amaje osuhuro jemesirire rumorovo'ajëjo. ⁷ Rumorovo'ajëjamu rueho jaburo ë jöho mevoromo uarovareje: Noro ie bogo ujuoho rovë'ëro ëhuni jövajëjo. ⁸ Ĕhi uarovamu Iesuro gëromo uvadeje: Jemë rabëni ëhi jjië'e jöho ataruëromo uëvadeje: Mae uehorovevo avoho'ibejarijëjo. Jemë rabëni i bogojavuaje jöho atarujëjo. ⁹ Jemë rabëni avevejö'ohu'o bogo gavaruajëjo. Naehu ie övo gö mine ujuohoromo ae aho'obëhe 5,000 i'imëmodoho ë i vitu vitu aegamu esöe dimino'e irijio'mo'amadoho jemë ëhu'o rabëni bogo uehorovarujëjo. ¹⁰ O naehu ie aho'obëhe övo gö mine övo göre niö'i ujuohoromo ae aho'obëhe 4,000 i'imëmodoho ë i vitu vitu aegamu esöe dimino'e irijio'mo'amadoho jemë rabëni bogo ëhu'o uehorovarujëjo. ¹¹ Jemë rabëni uvarujëjo: Ie bogojavuo'ego nö'röro i jöe uehorovoromo majahuijajëjo. Bogo ë jöho uëromo ë'ode höjo. Röhu gavë'iajo. Pharisee aribövi o Sadducee aribövi jabesi i dë huo'amaje osuhuro jemesirire rumorovo'ajëjo. ¹² Rumorovo'ajëjamu hegorovo ijorajoho jaburo uhu jö hesi bëhoho avoho uehorovoromo uvareje: O Iesu bogo i dë huo'amaje oso jöho majahuiromu uövuade höjo: Gavë'iajo. A'i Pharisee aribövi o Sadducee aribövi jabesi jö sisëhuro nosiro rumorovojöëni ë jöho uhu'e majahuiromu uövuade höjo: Gavë'iajo.

Iesu hu ëhi jjië'e ae jiaje jö Peter-hu jövade jöhoje.

¹³ Iae Iesuro ajiomadoho Caesarea Philippi amo bëhinö sa'are rovadeje. Rueromo huro hesi ijorajo ömo'ömo uëvadeje: God-are A Maho na rahuo jevaje jöho ae aho'obëhe diehi atoruomaje höjo. ¹⁴ Diehi atoruomaje höjamu uavareje: A ioro'iorohuro uvoruomaje höjo: Ja John bapataeto vaejavuonövane ahuro rovë'e javajëjo. A ioro'iorohuro uvoruomaje höjo: Ja Elijah-ro rovë'e javajëjo. A ioro'iorohuro uvoruomaje höjo: Ja Jeremiah-ro o jö God-aro baeromo ae majëhinövane ae göëro rovë'e javajëjo. ¹⁵ Ĕhi uavamu hegorovo Iesuro uëvadeje: Röhu jemë nasi jöho diehi ataruje höjo. ¹⁶ Diehi ataruje höjamu Simon Peter-ro ri'öromo uavadeje: Ja bö'röme namiromo ajamuijanue aho javajëjo. God hiemu hijaje a hesi Harihe javajëjo. ¹⁷ Hesi Harihe javajëjamu Iesuro Peter uavadeje: John-are harihoho Simon ja huë mabëhe baejë'e javajëjo. Bogo ma-aehu ë jöho röjahijamu jövo'irögoro nasi Vavue ö'idöre hijajohuro röjahijë'ëro jövanuëjo. ¹⁸ Röhu na ave jöho ua'ië'ajëjo: Ja Peter javajëjo. Peter hesi bëhoho munë javajëjo. Röhu ave munëho bamo'ejöjo nasi ekaresiae aho'obëhe ë hesi dore gagovëvego bibivoromo riravo'irarijego. Nasi ekaresiae aho'obëhe ëhi riravo'iramu vuovo hesi vöröho bogo ruahö'öjëvoromo ijumëvo'ajëjo. ¹⁹ Röhu narö Peter jasi örire darugoho bojami'ejöjo jero ojoho jiovëhego äero God-are öri ari'ere ë va'oruomoröhego. Ja sa'are hiromu öri tugohë'oho jero ma-mae tugoho'iramu God'o ö'idöre hiromu avoho tugoho'ajëjo. O sa'are hiromu öri jiovë'oho jero ma-mae jiovo'iramu God'o ö'idöre hiromu avoho jiovo'ajëjo. ²⁰ Ĕhi uaromo hesi ijorajoho aho'obëhe darugo'o uëvadeje: Nadi aho huruoho majëhiromu uërëjo: Nö'rö bö'röme namiromo a ajëmijaje aho höjo.

Iesuhu huë vavaeni baeromo guomoröhe jö jövadohoje.

²¹ Ĕhi'onugoromo evare majare Iesuro aevoromo hesi ijorajo ömo'ömo röjëhiromu uëvadeje: God-ro ëhi bamë'ëro ëhu'ëro na Jerusalem ajiomo'ejöjo. Ajiomo'iramu a duvaho ariböviohuro priest masijohuro Jew rajo jögoru öri röjëhijarue ariböviohuro ëho jaburo vi'ehe huë vavaene bövie bise'e bojemi'aruëjo. Ĕhi ë'oromo ae gö jabesi övore bojëmi'iramu anego'iramu guomoromo majae niö'i gemu hesi uhure ri'ö'ejöjo. ²² Ĕhi uëvamu hegorovo Peter-ro Iesu rori'o hu'irae bava'oromo uavadeje: Bada bogajo. Ĕhi jjië'e huë vavaenoho bogo mae bogo bae'a'anuëjo. ²³ Ĕhi uavamu hegorovo Iesuro huotorovoromo Peter uavadeje: Satan rori'o va'ëjo. Jero nasi muoho ahanuëjo. God-hu uehorovajëhioho ja bogo ëhioho uehorovo'i ma-aehu uehorovaruëhi jero ëhi uehorovoromo ëhuni ë jöho jövanuëjo.

²⁴ Ĕhi uanugoromo hesi ijorajo ömo'ömo uëvadeje: Ae rahuarö nasi ijore ijore juvo'i nimë'oho jasi sinehu nimajoho nadi uehorovo'i uvonëjo: Iesuarë jöëni vi'ehe

huë vavaene javoje rabe baeromo guomevë'oho iae hesi hö uvoromo korosi hesi i'uoho banigojomanovoromo nasi ijoro ijoro juvonövonëjo. ²⁵ Ja jasi sinohuni uehorovoromo biririvoromo ave sa'are hi'i ëhemu uehorovë'oho ijondho guomo öriro va'a'anuëjo. O ja nasi jöeni guomë'oho ijondho maro hi'a'anuëjo. ²⁶ Jaehu are jove sa'ae mae sisë aho'obëhe bae baerë'i röhu jasi arijo'arije ijumorovë'oho na ja ëhuro mae javo'ajëjo. Bogajo. Arijo'arije ijumorovë'oho diehi röhu maho avohorovo'iramu mae javo'ajëjo. Öre bogohöjo. ²⁷ Röhu God-are A Maho naro nasi Vavu hesi ajohu'o nasi anera ömo'ömo'ohu'o gemu mae vuonorö'ö rue'ejöjo. Rueromo evare ae gemu gemu diehi jïë'e mu vaejarije manaho ëhi bojëmibe va'ejöjo. ²⁸ Ave jöho na jö mae uë'ië'ajëjo. Jemë a ioro'iore ave riravarujoho bogo vuovë'e raromoromo ge'a'arujëjo God-are A Maho naro böröme namiromomo muebejëvo'i rue'iramu.

17

Iesuare nu ano'ehu ajivoromo gorosovade jöhoje.

¹ Ëhi uëngoromo majae aho'obëhe övo gö mine övo göre gemu barëjamu Iesuro Peter James o James-are öe John ëhi söromo dahoru ëgobövire ajiomoromo jabesi sivue raromareje. ² Raromoromo ë ijorajoho jaburo gavareje Iesuare sino haho'e gorosovoromo hesi nu ano'oho majaeu bamajëhi ëhi jio'i hesi niögoho ajivo avohamu. ³ Ëhi ga'i gavareje Moses'o Elijah'o ëma jëvoromo jabu'o Iesu'o jöe atoruomamu. ⁴ Jöe atamu gëgorovo Peter-ro Iesu uavadeje: Bada no ave raromaruoho iae mae höjo. Ja nagë'oho naro javue niö'i gemu vae'amo'ejöjo jani gemu Moses-ni gemu Elijah-ni gemu. ⁵ Ëhi jövamu gavë'i ajivë'e suehuro rueromo aegëhadeje. Aegëhamu hejareje sue uhure uvavamu: Ave aho nasi Harihu mabëhe höjo. Na hu garomo nimorohevajëjo. Huhu jövaje jöho avoho herëjo. ⁶ Ëhi uvavamu hejë'i ë ijorajoho jaburo sisë maro juhuonivoromo sa'are rireromoromo nu ano'oho sa'are amoromo momorö'öjareje. ⁷ Sa'are momorö'öjamu Iesuro rueromo jabumë rëhëvoromo uëvadeje: Nadi juhuonivo'i ri'öhëjo. ⁸ Ri'öhëjamu hegorovo ri'ö uheriho'i gavareje ae gö bogojio'i Iesu gemu namijamu.

⁹ Ëhi'onugoromo dahorure ruvebijë'i Iesuro uëvadeje: Jemëhu gavarijoho nadi aho majëhirëjo. U'emu God-are A Maho naro guomoromo ri'öjogo evaro majëhirëjo. ¹⁰ Ëhi uëvamu rueho jaburo uavareje: Jew rajo nosi jögoru öri röjahuijarue ariböviohuro uövuuarue höjo: God-are a börömo'oho bogo ëma rue'i a'i urimo Elijah God-aro va'adoho iae vuonorö'ö rue'a'ajëjo. Rue'iramu God-are a börömo'oho ijore rue'a'ajëjo. Jögoru öri röjahuijarue aribövioho rabëni ë jöho majahuijarue höjo. ¹¹ Rabëni majahuijarue höjamu Iesuro uëvadeje: Io'ajo. Elijah-hu urimo rueromo bövi bise'o avoho'amo'iröhe jöho iae mae-ëjo. ¹² Röhu ave jöho naro jemë uhu'e uë'ië'ajëjo. Hehëjo. Elijah iae mami'e rovade höjo. Rovamu aëro hu bogo ma ga'irögoro jabuhu diehi nimarëhi ëhi hesi örire sisë vaeruomade höjo. Jabuhu hu sisë vaejarëhi God-are A Maho na'o ëhi sisë vaejvoruomajëjo. ¹³ Ëhi majëhijamu hegorovo evare Elijah uëvaje hesi bëhoho uehorovoromo uvareje: John bapataeto vaejavuonövade a hesi jöho majahuiromomo ë'ajëjo.

Iesuhu Satan-are a sisë aharihu hesi dëre jiamu rarovö'öjade jöhoje.

¹⁴ Dahorure ruvebinugoromo ae aho'obëhe raromaruire ë rovareje. Rovamu gavë'i ae gemuëro rueromo ague aho hiro mo ¹⁵ Iesu uavadeje: Bada nasi harihohuni vavaenimoromo ajamijëjo. Hesi simanoho sisërëromomo sisë'i sisë'i hi juvaje höjo. Sisë'i sisë'i hiro mo vënire jovore ëma ravorovaje höjo. ¹⁶ Ëhuni jasi ijorajo jabesi örire barovode höjo. Barovamu ajami'iröhoho bogo eni jëvade höjo. ¹⁷ Bogo eni jëvade höjamu Iesuro uëvadeje: Asë'e ave jaruvore raromaruje aribövioho jemë bogo ma uehorovo'i jöe gö gö ëma uehorovaruje aribövie jëvavëjo. Na majae dimino'e jemë'oho hibe va'ejöjo. Majae dimino'e jemesi mu sisëho garomo ma-nunëro ga taemobe va'ejöjo. Jemesi mu sisëhuro na u'uvevavajëjo. Ëaharihoho avehuro barovego na gavöjo. ¹⁸ Barovamu gagorovo Iesuro Satan-are a sisëho birevamu aharihu hesi dëre jioromo hörö va'adeje. Hörö va'amu gavë'i aharihoho mae jiadeje.

¹⁹ Ĕhi'amu Iesuare ijorajoho jaburemu rueromo Iesu uavareje: Diehi'oromo noehu aru'aho sisē rarovō'ōjarocho bogo eni javuade hōjo. ²⁰ Bogo eni javuade hōjamu Iesuro uēvadeje: Jemēro bogo ma uehorovē'ēro ēhu'ēro bogo eni jēvadeje hōjo. Rōhu ave jōho na jō mae uē'iē'ajējo. Mustard bajoho inino mae jio'amajējo. Mustard baje gemu ma-bise'o jiajēhi ēhi uehoro mae ma-bisemu baeromo God mae uehorovē'oho ave dahorehu bōviehu bise'ehu jemesi mu ahanovajoho uavē'oho: Rori'o va'ē uavē'oho iae rori'o va'a'ajējo. Ĕhi jiē'e mu bōvi bise'o vaejē'oho eni jēvo'ajējo. ²¹ [Amo ē aharihu hesi dēre jiade ēhi jiē'e a sisē ae gō hesi dēre jiajoho rarovō'ō'iē'iroho i ue'aharujoho vuonugo'i God-are ōrīre uehore aho'o bojamiromi enīnamijē'ohuro ēhuro rarovō'ō'amo'arujējo. Ōri gōho bogo'e hōjo.]

Iesuhu guomorōhe jō rōhu maho majēhijade jōhoje.

²² Ĕhi'oromo Iesuare ijorajoho jaburo Galilee sa'are ē ro gemuoro gagovareje. Gagovamu gavē'i Iesuro uēvadeje: God-ro ēhi bamē'ēro hesi A Maho na a jabesi ōvore va'oromo ²³ anego'iramu guomo'ejōjo. Guomoromo majae niō'i gemu hesi uhure ri'ō'ejōjo. Ĕhi majēhijamu heromo huē vavaene bōrōme baeruomadeje.

Iesumēhu God-are amo bōrōmo hesi tax bojami'irōhe jōhoje.

²⁴ Ĕhi ē'ē'ero Iesu'o hesi ijorajo ōmo'ōmohu'o ēho jaburo Capernaum amore rovarēje. Rovamu God-are amo bōrōmo hesi mu nigemo'irōhe tax moni baejarue aribōviohuro rueromo Peter uavareje: Na jasi a bōrōmoho God-are amo bōrōmo hesi tax-oho bojamiijaje hōjo. ²⁵ Bojamiijaje hōjamu Peter-ro uēvadeje: Io'ajo. Io'a uēnugoromo osare va'amu gavē'i Iesuro urimo jōho jōvoromo Peter uavadeje: Simon ja diehi uvanūjo. Sa'ae dinō'e dinō'e raromoromo masijo vaejaruoho tax ihe gō gō ujuoho'iē'iroho rahumesi ōrīre uēvego i'imēmarue hōjo. Na jabesi ae gemuoho jabesi ōrīre o ae gō jabesi ōrīre uēvarue hōjo. ²⁶ Uēvarue hōjamu Peter-ro uavadeje: Ae gō jabesi ōrīre uēvarue hōjo tax monie bojēmijōro. Ĕhi uavamu Iesuro Peter uavadeje: Ĕhu'ēro jiē'ēro jabesi agane gemuoho tax-oho bogo vaejarue hōjo. ²⁷ No God-are agane javuajējo rōhu no hesi osa hesi tax-oho bogo bojēmi'ibejarējo tax baejarue aribōvioho huē sisē bae'ibejarējo. Ĕhuni iae bojēmi'ejarējo. Rōhu jovo e'uoro va'oromo anuge ba'amoromo aevo'i jiomō'irane visuoho baeromo jō'oho tarivahonējo. Tarivahoromo ga'a'anuējo tax hesi ijo bajoho jō'ore jio'iramu. Ĕho bava'oromo tax-oho jasirohu'o nasirohu'o bojēminējo. jōhoje.

18

Di aehu a ioro'ioro iosirēmiromo bōrōme jiaje

¹ Ĕhi'amu evare Iesuare ijorajoho jaburo rueromo uavareje: God-hu bōrōme namiromo muebejavuajoho di ahuro a ioro'ioroho iosiramuiromo bōrōmoho javuajējo. ² Bōrōmoho javuajējamu hegorovo Iesuro aharihocho uvamu rovadeje. Rovamu jabesi nunire hu'irae barueromo ³ uēvadeje: Ave jōho na jō mae uē'iē'ajējo. Jemē jemesi iho bōrōme jiojōro uehorovarujoho vuonugoromo huotorovoromo asisō'onō'e ma-taemo raromorējo. Jemē bogo ēhi ē'ē'oho God-hu muebejaje ōri ari'erocho bogo va'o hesi jēvājējo. ⁴ Ae rahu dōre bamorovaruoho vuonugo'i ave aharihocho va'ēne ma-taemo raromē'oho ē aribōviohuro God-hu bōrōme namiromo muebejēvaje a ioro'ioroho iosirēmiromo jabumē masijo mae jioruomajējo. ⁵ Ae rahu aviēhi jiē'e asisō'oho gemu nasi ihore rajahiromo baejē'oho ēhuro na'o rajehiromo baejevuruomaje hōjo.

God uehorovarue mu ijumēharue aribōvi jabesi jōhoje.

⁶ Ae gōero asisō'onō'e jōrume hiromo nasi ōrīre mae uehorovevo'ajējo. Ĕhi'o'iramu ae gōero ē aho mu sisē rōjahiromo ēhuro na uehorovevaje muoho ijumaho'ajējo. Ijumaromomo ēhuro hu i'u sisēho bae'a'ajējo. Mu sisē bogo rōjahijajevare evare ē mu sisē rōjahijaje a hesi sōnō'ahore aēro i'u'e munē hitahiohuro tōvoromo sō jovore ba'amego e'u ēgobōvire beva'oromo jove iromo guomo'ibejajo ēho ma-jianovo'ibejajo. A'i ē mu sisē rōjahi'irōhe ē hesi i'uocho bōrōmo bēhe bae'a'ajējo. ⁷ Sa'are aribōvioho aho'o vaevē'e

jiuruomajėjo gōehu gō bijioho gavego sisē vaerōhe muoho jiē'ego. Ēhi jiē'e muoho iae rue'a'ajėjo. Rōhu ae rahu ē mu barovē'oho vaevē'oho sisērē'ajėjo.

⁸Jasi ōvehu o hōrehu mu sisē vaeromo God uehorovanue mu vuonugo'iē'iroho ōvoho o hōroho tarioromo bu'ōnējo. Ja ōve o hōre gemu javamu ijonō va'oromo mare hijē'oho ēhuro mae javo'ajėjo. A'i ōve niō'i o hōre niō'i javamu ijonō God-hu ramō'ōjamu ravemu ravaje vēnire va'ē'oho ēhuro sisē bēhe javo'ajėjo. ⁹O jasi nunehu mu sisē vaeromo God uehorovanue mu vuonugo'iē'iroho nunoho jahoromo bu'ōnējo. Ja nune gemu javamu ijonō va'oromo mare hijē'oho ēhuro mae javo'ajėjo. A'i nune niō'i javamu God-hu ramō'ōjamu vēni sisēre va'ē'oho ēhuro sisē bēhe javo'ajėjo.

Sheep subirō'ōjamu nahoromo birohade uhu jōhoje.

¹⁰Rōhu gavē'i raromorėjo. Asisō'o va'ēne ma-taemo raromarue aribōvioho bogave nue huodēgo'irarijėjo. Rabēni hesi bēhoho jabumē muebejēvarue aneraho jaburo ō'idōre raromoromo nasi Vavue ō'idōre hijaje a hesi nuniro raromemu raromarue hōjo. ¹¹[God-are A Ma naehu rovode hesi bēhoho subirō'ō'amē'e aribōvioho sō rueromo maro nugo'amo'irodēni rovode hōjo.]

¹²Rōhu ave uhu jō majēhi'iē'ajoho jemē diehi uehorovarujėjo. Ae gemu sheep aho'obēhe 100 jio'i gemu sidōvoromo ēma juvē'oho arijo'ohuro sheep ioro'ioroho 99 dahorure nugo'amo'i va'oromo subirō'ōjade sheep-oho nahobe juvo'a'ajėjo. Na mae-ējo. ¹³Nahobe juvoromo birohē'oho evare sheep ioro'iore 99 mae raromare jabesi jōēnioho ma-bisemu nimoroho'i a'i ē subirō'ōjade sheep gemu'ohunioho nimoroho avoho'ajėjo. Iae na mae uēvajėjo. ¹⁴Ēuhu jō hesi bēhoho asisō'o va'ēne jōrume raromarue aribōvioho rōhu gemu sisēre va'ē'oho jemesi Vavue ō'idōre hijajohuro ēhi jiē'oho bijōnimaje hōjo.

Ekaresia ae gōehu mu sisē vaejavuego noehu diehi ē'irōhe jōhoje.

¹⁵Ja'o hu'o God uehorovaruje ōehu ri'ōromo jasi ōrire sisē vaejavē'oho jasi sivue va'oromo jemē niō'iro ariromo hesi sisēho avoho majahijego hu he'irajo. Heromo huhu ejahē'ohuro ēhuro jasi ōho jasiro barue'anuėjo. ¹⁶O bogo ejahē'oho va'oromo ae gō'o gemu o niō'i hu'iraejēvoromo ō hesi ōroro vuonorō'ō va'onējo. Ēhesi bēhoho God-are surire jōho ēhi uvē'e hōjo: Ae rahu ae gō hesi sisē a masijo jabesi nunire majēhijē'iroho ae niō'i o niō'i gemu gavare o hejare jō sisē gemuohuremu majēhijē'oho aēro heromo uvo'a'aruėjo: Iae mae-ējo. Ēhi jiē'e mu sisēho vaejade hōjo. Ēhuni ae gō'o gemu o niō'i hu'iraejēvoromo ō hesi ōroro va'oromo hesi jō sisēho mevego jabu'o heromo ja ajami'irarėjo. ¹⁷O jabesi jōhu'o bogo ejēhē'oho va'oromo ekaresiaho ē a hesi sisēho huruoho majēhinējo. O huhu ekaresia jabesi jō ēhu'o bogo ejēhamu gavē'iroho uvonējo: Hu a gō va'ēne o vajiohu'e tax gagovaje aho va'ēne hōromo nadi gavanovonējo.

¹⁸Ave jōho na jō mae uē'iē'ajėjo. Jemē sa'are raromoromo ōri tugohē'oho jemēro ma-mae tugoho'iramu God'o ō'idōre hiromo avoho tugoho'ajėjo. O sa'are raromoromo ōri avoho jiovē'oho jemēro ma-mae jiovo'iramu God'o ō'idōre hiromo avoho jiovo'ajėjo.

¹⁹Rōhu ave jōhu'o uē'iē'ajėjo. Jemē ae niō'i sa'are ariromo jōe gemuoro uehorovoromo ēninamijē'oho nasi Vavue ō'idōre hijajohuro ejēhoromo jemēhu ēninamijarijēhi iae ēhi vaejēho'ajėjo ²⁰rabēni ae niō'i o niō'i gemu nasi ihore gemuore gagovē'oho naro ē dirō'ore jemē'o jevajēro jiē'ero.

Ae gōehu ae gō hesi sisē bogo uehorovoromo vuonugade ē hesi uhu jōhoje.

²¹Ēhi'amu Peter-ro rueromo Iesu uavadeje: Bada nasi ōehu nasi ōrire mu sisē vae'i hijē'iroho na majae dimino'e uehorovoromo vuonugo'i hi'ejōjo. Na na vae 7 uehorovoromo vuonugo'i hi'ejōjo. ²²Ēhi uavamu hegorovo Iesuro uavadeje: Na uavajėjo: Bogo vae 7 ēhemu a'i vae majae uehorovoromo vuonugo'i hi'a'anuėjo.

²³Ēhesi uhu jōho na ua'iē'ajėjo. Sa'a a bōrōmo hesi mu vaejharue aribōvi jabuhu moni bojami'irōhe suri suri ē sa'a a bōrōmehu adahoromo ē'adēhi God-ro bōrōme namiromo hesi ōri ari'oho ēhi muebejaje hōjo. ²⁴Iae sa'a a bōrōme gemuēro hijade hōjo. Hiromo hesi mu muebejharue jabesi suri surioho aevoromo adaho'amade hōjo. Adaho'amamu ae gemuehu a bōrōmo hesi ōrire 7 million kina bojami'irōhoho hu'irae barovare hōjo.

²⁵ Barovamu a börömohuro gavade ë aho moni bojami'iröhoho bogo eni jiamu gagorovo hesi aribövioho uëvade höjo: Èhuni ave aho hesi vaborohu'o aboji harihu'ohu'o maho sisëho aho'obëhe èhu'o jemëro ae gö imëvoromo monioho mana baeromo nasi òroro bojemirëjo. Èhi jië'oho ë mu vaejaje aehu na mana bojemego bae'ibejodëhi ë monioho naro bae'ejöjo. ²⁶Èhi majëhijamu hegorovo ë ahuro ague aho hiromu ëninamiromu uavade höjo: Ma-biririvoromo hiromu muebejevonëjo. Iae na aho'o bojami barë'ejöjo. ²⁷Èhi jõvamu hegorovo rue a börömohuro huni vavaenimoromo uavade höjo: Iae mae-ëjo. Nadi ijoho bojeminëjo. Iae barë'ajëjo. Va'onëjo.

²⁸Èhi uavamu iae va'ade höjo. Va'ihö gavade ae gemu hu'o mue vaeromo a börömo hesi mu muebejahajoho jiamu gagorovo guduamade höjo 12 kina hesi òrire bojami'iröhëro jië'ëro. Guduamoromo huë husuovahoromo uavade höjo: Nasi monioho bojemiëjo.

²⁹Bojemijëjamu ague aho hiromu ëninamiromu uavade höjo: Ma-biririvoromo hiromu muebejevonëjo. Iae na bojami'ejöjo. ³⁰Bojami'ejöjamu bogo ejahade höjo. Bogo ejaho'i guduamo bava'oromo savoji gagore ba'amade höjo hu ë hibe va'ojuvo ë monioho hesi òrire bojami'iröhëgo. ³¹Èhi'amu gagorovo a börömo hesi mu muebejahuë a ioro'iorohuro garomo dë vörönëgoromo sisë maro vavaenëgade höjo. Vavaenëgamu va'oromo a börömoho huruoho majahiromu uavare höjo: Èhi èhi ë'ë'e höjo. ³²Èhi èhi ë'ë'e höjamu rue a börömohuro jöe nugö'öjamu ë mu muebejahaje ahuro rovade höjo. Rovamu a börömohuro uavade höjo: Nasi mu vaejanue aho sareri a sisë bëhe javajëjo. Jero uevë'ëro èhuni jaehu moni bojami'iranoho na uehorovoromo vuonugo barëjode höjo. ³³Naehu jani vavaenimodëhi ja rabëni jasi a göhunioho bogo èhioho vavaenimane höjo. ³⁴Èhi uanugoromo ë arijo'ohuro dë vörönimamu ae uëvamu hegoro mu vaejaje aho guduamo bava'oromo savoji gagore ba'amare höjo ë hibe va'ojuvo monie aho'obëhe bojami barë'iröhëgo.

³⁵Jöho èhi jië'ëro jemë ae gemu gemu jemesi a ioro'ioro jabesi sisë bogo uohu'o uehorovoromo vuonugë'oho nasi Vavue ö'idöre hijajohuro ë börömehu ë'adëhi jemesi òrire èhi ë'a'ajëjo.

19

Vaboro'ö baru'ö gemuohu jëvaje jöhoje.

¹Iesuro ë jöho majëhinugoromo Galilee sa'are jioromo va'adeje. Va'oromo Jordan beromo ioni göre Judea sa'are rovadeje. ²Rovamu ae aho'obëhe mae rihioromoruumamu huro guomo guomo'e aribövioho avohëvamu mae jëvadeje.

³Èhi'amu gagorovo Pharisee ariböviohuro rueromo Iesu guaro beva'ojöro uavareje: Vaboro nugö'ö'amo'iröhe jõgoru hesi jöho no he'i naguajëjo. Baruehu rabëni rabëni bijönimoromo vaboro nugö'öj'ë'oho na mae o sisë höjo. ⁴Mae o sisë höjamu Iesuro uëvadeje: Röhu jemë ave jö adaharijoho rabëni bogo avoho uehorovarujëjo. God-are surire èhi uvë'e höjo: Bövi bise'ö bamade ahuro aevoromo ahu'o magonahohu'o bamëvade höjo. ⁵Bamëvoromo uëvade höjo: Èhu'ëro jië'ëro aëro vëmu vavu'oho rëmö'ö'i vaborohu'o gemu mae hi'a'ajëjo. Vaborohu'o hi'iramu jabumë niö'i jëvadoho röhu gemu jio'a'ajëjo. Èhi uvë'e höjo. ⁶Èhu'ëro jië'ëro ë ahu'o magonahohu'o bogo hahagu hahagu jio'i ma-gemu jëvo'ajëjo. God-hu mami'e gemuore havoromo muohadoho jemë ma-ae jëvaje nadi tarivorëjo. ⁷Nadi tarivorëjamu uavareje: Vaboro nugö'ö'iröhoho sisë hö uövuanuoho röhu èhi jië'oho Moses-ro rabëni ave jõgoroho bojamuade höjo: Vaboro nugö'ö'i nagë'oho nugö'ö'irane jöho suroro jajivoromo vaboroho bojamiromu evaro nugö'önëjo. ⁸Nugö'önëjamu Iesuro uëvadeje: Jemë hial'i biriri'e aribövie jëvobe rovë'ëgo èhuni baruehu vaboro nugö'ö'amo'irarije ë hesi öroho Moses bogo tugohade höjo. Röhu ni'i'ivadiroho èhi jië'e muoho bogojiade höjo. ⁹Röhu ave jöho na ue'ië'ajëjo. Vaboroho bogo ma-juvë'e baruehu ëma nugö'öromu magonahe gö masuvë'oho èho bogo maho masu'i goho'amarue muoho vae'a'ajëjo.

¹⁰ Ĕhi majĕhijamu hegorovo hesi iĵorajoho jaburo Iesu uavareje: Ja uŕvuanuoho: Baruehu vaboro masuvĕ'oho nadi ĕma nugŕ'ŕ'amorĕ uŕvuanuĕjo rŕhu ĕhi ĵiĕ'oho aehu magonaho masuvĕ'oho bogo maho ĵianovajĕjo. ¹¹ Ĕhi uavamu Iesuro uĕvadeje: Magonaho bogo masu'i ma-raromĕ'oho ae aho'obĕhe ĕhi ĕ'ĕ'oho bogo eni ĵioruom'o'ajĕjo. God-hu darugo bojĕmamu baerumĕ'oho ĕ aribŕviahuremu ĕhi ĕ'ĕ'oho eni ĵioruom'o'i a ioro'ioroho bogo eni ĵioruom'o'ajĕjo. ¹² Ĕhesi bĕhoho ae gŕero gŕero bĕhe gŕ gŕ uehorovoromo magonahoho bogo masu'i ĕma raromarue hŕjo. A ioro'ioroho rahare majare sinoho ĕhi ĵĕvĕ'ĕro magonahoho bogo masu'i ĕma raromarue hŕjo. A ioro'ioroho sinoho tarivĕhĕ'ĕro magonahoho bogo masu'i ĕma raromarue hŕjo. A ioro'iorohuro God-hu bŕrŕme namiromo muebeĵĕvaje hesi muoho uehorovoromo magonahoho bogo masu'i ĕma raromarue hŕjo. Ae rahu ĕhi ĵiĕ'e mu vae'irarije darugo baeĵĕ'oho ĕhi vaerĕjo.

Iesuhu hesi ŕvo asisŕ'o inino jabesi sinore bamĕhade jŕhoje.

¹³ Ĕhi'amu gagorovo aĕro asisŕ'oho sŕ ujuoho rueruomadeje Iesuro ŕve jabesi sinore bamĕhoromo God uavego ajĕmi'irŕhego. Ujuoho rovamu gĕgorovo Iesuale iĵorajo ŕmo'ŕmohuro birĕgareje. ¹⁴ Birĕgamu hegorovo Iesuro hesi iĵorajoho uĕvadeje: Nadi ahĕvo'i uĕhego rueruomajo. Ĕhi ĵiĕ'e asisŕ'o va'ĕne ĵŕume raromĕ'e aribŕvioho God-ro bŕrŕme namiromo muebeĵĕvego hesi aharire raromoruomaje hŕjo. ¹⁵ Ĕhi uĕvĕ'ĕro ŕvoho jabesi simanore bamĕhonugoromo va'adeje.

Bŕvi bise'o marohĕ'e a hesi jŕhoje.

¹⁶ Ĕhi'amu iae a i'e gemuĕro rueromo Iesu uavadeje: Tisa na diehi ĵiĕ'e mu maho vaeromo ĕhuro ioro'ioemuoho maroho hi'ĕjŕjo. ¹⁷ Maroho hi'ĕjŕjamu uavadeje: Mu ma vae'irane jŕho ja rabĕni nasi ŕriroho ue gevanuĕjo. God gemu a maho hŕjo. Rŕhu mare hi'i nagĕ'oho hesi ĵŕgoroho ejahonŕvonĕjo. ¹⁸ Ejahonŕvonĕjamu uavadeje: Diehi ĵiĕ'e ĵŕgoroho uevanuĕjo. Uevanuĕjamu Iesuro uavadeje: Nadi aho anonĕjo. Nadi goho'amonĕjo. Nadi vajiohoho baenĕjo. Nadi sareri'e jŕho aho majĕhinĕjo. ¹⁹ Jasi vĕmoho vavuoho mae uehorovĕnonĕjo. Jasi ariĵo'arije rajahirovanuĕhi jasi ae gemuho ĕhi rajahinĕjo. ²⁰ Rajahinĕjamu uavadeje: Ĕjŕho iae na e barĕĵĕ'e jevajĕjo. Ĕhi ĕ'ĕ'e jevajĕjo rŕhu mu gŕho rabe vae'ĕjŕjo ĕhuro maro hi'irodoho eni jevo'irŕhe. ²¹ Ĕhi uavamu Iesuro uavadeje: Maro hi'iranĕro ma-mae javojŕo nagĕ'oho va'oromo jasi bŕvioho bise'oho imo'amoromo monioho baeromo inŕmo bogo eni ĵiĕ'e aribŕvioho suvuorĕminĕjo. Ĕhi ĕ'ĕ'oho bŕvie bise'e maho maho ĵanioho ŕ'idŕre ĵiaho'ajĕjo. Ĕhi'oromo rueromo nasi iĵoro iĵoro ĵuvonŕvonĕjo. ²² Ĕhi uavamu hegorovo ruĕhuro hesi uehorovoromo uvadeje: Na bŕvie bise'e bŕrŕmo mae jevĕ'ĕro suvuorĕmi'irodoho na bogo eni jevajĕromo vavaenimoromo va'adeje.

²³ Va'amu gagorovo Iesuro iĵorajo ŕmo'ŕmoho uĕvadeje: Ave jŕho na jŕ mae uĕ'iĕ'ajĕjo. Bŕvi bise'o marohĕ'e aehu God-hu muebeĵaje ŕri ari'ere va'ĕ'oho ĕhi ĵiĕ'oho anoj'i'e mae ĵio'a'ajĕjo. ²⁴ Rŕhu avehu'o uĕvajĕjo. Mi bŕrŕmo anugo gagore nugŕ'ŕjĕ'oho ja bogo eni javo'ajĕjo. Rŕhu ĕhi ĕ'ĕ'oho samae ĵianovo'i bŕvi bise'o marohĕ'e aribŕviehu God-hu muebeĵaje ŕri ari'ere va'irŕohoho ĕho anoj'i'e mae hŕjo. ²⁵ Anoj'i'e mae hŕjumu heromo tiŕtiŕvoromo uavareje: Ĕhi ĵiĕ'oho no diehi'oromo maroho va'ĕjarĕjo. No ae aho'obĕhe bogo eni javuajĕjo. ²⁶ Bogo eni javuajĕjamu Iesuro ĕrimĕhoromo uĕvadeje: Io'ajo. Jemĕ aĕro ĵĕvĕ'ĕro bogo eni ĵevajĕjo. A'i God-hu mue aho'obĕhe vaeĵĕ'oho hu eni hŕjo.

²⁷ Ĕhi uĕvamu hegorovo Peter-ro ri'ŕoromo Iesu uavadeje: Aveho gavĕjo. Noro bŕvie bise'e nosiroho vuonugo'i jasi ijore ijore ĵĵihĕ'e javuajĕjo. Ĕhuni no manaho rabe bae'ĕjarĕjo. ²⁸ Rabe bae'ĕjarĕjamu Iesuro uĕvadeje: Ave jŕho na jŕ mae uĕ'iĕ'ajĕjo. Maja i'ohu rue'iramu God-are A Maho naru nasi i'ohu dŕ maro ĵio'iramu nasi rŕho mare hiromo nasi aribŕvioho muebeĵĕvo'ĕjŕjo. Muebeĵĕvo'iramu evarĕ nasi iĵoraje 12-ho jemĕro na'o gemu mae arĕto gŕo gŕo raromoromo Israel rajo nosi agane gŕ gŕ 12 jabesi muoho mevo ga'a'arujĕjo. ²⁹ O ae rahu javue ŕe ma'ine vavue vĕme aboji harihu'e o sa'ae nasi i'ohu hesi ĵŕĕni vuonugo'amo'i va'ĕ'oho ĕhi ĵiĕ'e aribŕviohuro bŕvi mae baeromo iĵonŕ

ma-ioro'ioiremu maro raromo'arujėjo. ³⁰Ēhi hōjo rōhu a ioro'ioire aho'o nuninō jiaruoho dejonō jioruomo'i a ioro'ioire dejonō jiaruoho nuninō jioruomo'ajėjo.

20

Aribōvihu grape ō'i bajo mure va'oromo mu vaejamu mu arijo'ehu mana diehi bojēmade uhu jō Iesuhu majēhjadohoje.

¹Sa'a arijo'e aehu hesi mu hesi ōri muebejadēhi ō'idōre hijaje A Bōrōmohuro hesi ōri ari'oho ēhi muebejaje hōjo. Sa'a arijo'e ae gemuēro sue'o va'ade hōjo ae baejogo jaburo hesi grape ō'i bajo mure va'oromo mue vaejahoromo manaho baeruomōrōhego. ²Va'o ae birohēvoromo uēvade hōjo: Muoho vaejehorego noehu a bojēmijaruēhi ēhi jiē'e ajivē'e ijo baje gemu majae gemu hesi muohuni bojēmi'irōjo. Bojēmi'irōjamu uavare hōjo: Iae mae hōjo. Iae mae hōjamu rue mu arijo'ohuro hesi mure rēmō'ōjade hōjo. ³Ēhi ē'ē'ēro majae 9 o'clock jiamu gavē'i vuonorō'ō va'oromo gavade hōjo a ioro'ioroho mu rumo'e market-re ēma riravamu gēgorovo ⁴uēvade hōjo: Jemē'o nasi muoro va'o mue vaerėjo. Suvuoro mae dimino'e jiajēhi na ēhi bojēmi'ejōjo. ⁵Bojēmi'ejōjamu muro va'are hōjo. Ēhi'amu maja ririrohu'o maja huotorovadevarohu'o huro market-re vuonorō'ō va'oromo ae gō gō jōe gemuoho uē'i hijade hōjo. ⁶Ēhi ē'ē'ēro majae beva'ia'amu gavē'i market-re va'oromo gavade a ioro'ioroho riravamu gēgorovo uēvade hōjo: Majae bōvioho jemē rabēni muoho bogo ē'ē'e ēma riravemu riravarujėjo. ⁷Uavare hōjo: Aho moni muoho bogo bojamuijē'ero ēhuni ma-riravarujėjo. Uēvade hōjo: Jemē'o nasi muoro va'oromo mue vaejehorėjo.

⁸Ēhi ē'ē'ēro majae barējamu gagorovo mu arijo'ohuro hesi mu muebejahaje aho uavade hōjo: Mu aribōvioho uēvego rue'irarėjo. Rovego suvuorocho bojēmibe va'onējo. Ijonō ro aevoromo mu vaejare aribōvioho urimo manaho bojēmiromō evaro va'o urimo majae gōre gōre mu vaebe rovere aribōvioho bojēmibe va'oromo ijo tugoho'ioho urimo ro mu aevoromo vaejare aribōvioho bojēminėjo. ⁹Ēhi'amu majae beva'ia'amu ro mu vaejare aribōviohuro ajivē'e ijo baje gemu gemu baeruomade hōjo. ¹⁰Ēhi baeruomamu gavē'i urimo ro mu vaejare aribōviohuro uvare hōjo: No gō'o dōre bae'ejarē uvare hōjo rōhu jabu'o ajivē'e ijo bajoho ēhi gemuoho baeruomade hōjo. ¹¹Ēhi gemuoho baeruomoromo mu arijo'oho birevoromo ¹²uaruomade hōjo: Ijo tugohoi ro mu vaejare aribōviohuro majae ma-bisemu mue vae'i noro sisonuvamu muoho aevoromo majae nijo'e huē vavaeni'e muoho vaebe va'ojuvo hujeji jenirōmamu vuonugare hōjo. Rōhu jero jabumē bojēmijanēhi no'o ēhi gemuoho bojamuijanuėjo. ¹³Bojamuijanuėjamu rue mu arijo'ohuro ae gemu uavade hōjo: Isiajo. Na bogo sisē'ioho vaejavode hōjo. Ja'o uehorovėjo. Na mami'e uavode hōjo: Ajivē'e ijo baje gemu bojamui'ejōjamu hegoro jero uevane hōjo: Iae mae hōjo. ¹⁴Ēhuni jasi suvuorocho baeromo va'ėjo. Nasi nimoromo naehu ja bojamijodēhi ave ijo tugohoi ro mu vaejehade aho suvuore ēhi gemuoho bojamijajėjo. ¹⁵Nasi moniēro jiē'ēro naehu baeromo rabe rabe negajoho ē'ē'ohō ēho na mae hōjo o sisē hōjo. Na suvuoro'e huē baejē'e ae jevajėjo rōhu jero rabēni ēho uehorovoromo aho nue huodēganuėjo. Ēhi uavade hōjo. ¹⁶Rōhu uhu jō bēhoho ēhi hōjo. Dejonō jiaruoho nuninō jioruomo'i nuninō jiaruoho dejonō jioruomo'ajėjo.

Iesuhu guomorōhe jō urimo vae niō'i majēhjadoho ijonō rōhu maho majēhjade jōhoje.

¹⁷Iae Iesuro Jerusalem amo bōrōmore ajiomoi va'adeje. Ōrire va'oromo huro hesi ijoraje 12-ho rori'o sō va'oromo ōrire uēbe va'adeje: ¹⁸Aveho hehėjo. No Jerusalem amore va'aruėjo. Va'o ē raromoromo God-ro hesi ēhi bamē'ēro hesi A Maho naro priest masijo jabetesi ōvore Jew rajo jōgoru ōri rōjēhijarue a jabetesi ōvore va'iramu baejevo'aruėjo. Baejevoromo nasi jōho mevo garomo uvorūomo'ajėjo: Nōrō sisē'e aego guomo'a'ajėjo. ¹⁹Guomo'a'ajēromo na baejevoromo sa'a gōre jioromo rovere aribōvi jabetesi ōvore bojēmi'iramu baejevoromo sivegoromo hisuebijevoromo korosire anego'iramu guomevo'ajėjo. Guomoromo majae niō'i gemu hesi uhure ri'ō'ejōjo.

James'o John'o jabuhu masije rirarovo'irōhego jabetesi vēmehu Iesu ua gavade jōhoje.

²⁰ Ĕhi'amu iae Zebedee-are harihe niö'li James'o John'o jabesi vëmohuro jabumë hu'iraejëvoromo rovadeje. Rueromo ague aho hiromo Iesu uavadeje: Na ja ajamuinëjo o bogajo. ²¹ O bogajamu hegorovo Iesuro uavadeje: Ja diehi nagajëjo. Diehi nagajëjamu uavadeje: Na negajëjo jaehu bööröme namiromomo muebejavuë'iroho jero uëvego ave nasi harihu niö'iohuro ö'o jasi bëhire masije rirarovoromo göhuro jasi övo manö göhuro jasi övo adonö ëhi ari'iröhego. ²² Ĕhi uavamu hegorovo Iesuro ö'o ö'lo uëveadeje: Iae ëhi höjo röhu jemëhu ue gevaruje jö hesi bëhoho jemë bogo gavë'e ëma uevarujëjo. Na gavajëjo ajuo'e jovo sisëro ajue-manovo hesi jio'ego. Ĕhi jië'e huë vavaeni bae'irarijoho na jemë'o eni jëvajëjo. Eni jëvajëjamu uavareje: Iae no eni javuajëjo. ²³ Ĕhi uavamu Iesuro uëveadeje: Iae mae höjo. Na ajuem'iröhe jovo sisëhuro jemë'o ajuem'ajëjo. Röhu nasi bëhire övo manö o övo adonö ari'irarije jö uë'irodoho ëho bogo nasirehu höjo. Nasi Vavuehu a rahumëni uvoromo nugade röhoho ë aho jaburemu nasi bëhioro ari'a'aruëjo.

²⁴ Ĕhi'amu Iesuare ijorajo ioro'iore 10-ho jaburo hejare uvavamu: Ö'o ö'lo Iesuare bëhire bööröme rirarovo'li uvare höjamu hegorovo jabesi örire dë vörönimoruomadeje. ²⁵ Dë vörönimoruomamu gëgorovo Iesuro hesi ijorajoho aho'obëhe uëveadeje: Ruehëromomo rovamu uëveadeje: Iae jemë'o gavarujëjo. Sa'a ioro'ioro rajo jabesi a masijoho jaburo jabesi aribövioho ruahö'öjëvoromo jabumëremu masije riravarue höjo. O jabesi bëhire riravaruhuro ëhi taemëvoromo jöe bojëmijarue höjo. ²⁶ Sa'a ioro'ioro rajohuro ëhi ë'arue höjo. Röhu jemë nadi ëhioho döroho bamorovorëjo. A'i jemesi ae gemu rahu bööröme nami'li nimë'oho ë aho a ioro'ioro jemë ajëminövo'iröhe ae jio'a'ajëjo. ²⁷ O jemesi ae gemu rahu nunire jio'li nimë'oho hu a ioro'ioro jemesi mu vaejëhonövo'iröhe ae jio'a'ajëjo. ²⁸ God-are A Ma naehu a ajëmi'li rovodëhi ëhi ë'orëjo. Naehu rovode hesi bëhoho bogo aëro na ajem'irarijeho rue'li a'li naro ae ajëmiromomo nasi arijo'arije bojamirovoromo guomorovoromo ëhuro ae aho'obëhe sisëhu tövëvajoho jiovo rëmö'ö'irodëni ëhuni rovode höjo.

Iesuhu Jericho amo vuonugoromo va'i nuni sisë'e ae niö'li ajëmade jöhoje.

²⁹ Ĕhi'oromo Iesumëro Jericho amoho nugo'li va'amu ae aho'obëhe rihimoruomadeje. ³⁰ Röhu nuni sisë'e ae niö'li öri ionire arijë'e jiareje. Ariromomo hejare uvavamu: Iesuro rova'ajë uvamu hegorovo ma-darugo'o uvareje: [Bada] David-are ujoho bööröme javaje noni vavaenimëjo. ³¹ Vavaenimëjamu hegorovo ae aho'obëhe jaburo birëgoromo uëveareje: Jöe vuonugohëjo. Jöe vuonugohëjamu hejë'li röhu maho darugo ma'o uvareje: Bada David-are ujoho bööröme javaje noni vavaenimëjo. ³² Vavaenimëjamu Iesuro va'adoho vuonugo'li ë namiromomo uëveadeje: Avehuro ruehëromomo rovamu uëveadeje: Naro diehi ajëmijöro nëgajëjo. ³³ Nëgajëjamu uavareje: Bada ajamuego no nune dadovoromo uheriharëjo. ³⁴ Uheriharëjamu Iesuro jabumëni vavaenimoromo nunoho rëhëhadeje. Rëhëhamu ma-burëro uherihoromo hesi ijore va'areje.

21

Iesuhu Jerusalem mabëhe rovade jöhoje.

¹ Iae Iesumëro va'lo Jerusalem bëhire va'oromo Olives Dahorure Bethphage amo'ere ajio suorovareje. Suorovoromo Iesuro ijorajoho niö'li rëmö'öromomo ² uëveadeje: Arue jemesi nunörire amohuro va'ohëjo. Va'lo hörö'li ga'a'arujëjo donkey-oho harihohu'o benugë'e jio'iramu. Benugë'e jiego jiovoromo hu'iraejëvo ruerëjo. ³ O aehu jö uëve'iroho uarëjo: Badaro ave mioho nimo'ego ëhuni hu'iraejëvo va'aruëre. Ĕhi ua'iramu iae ma-burëro uë'a'ajëjo: Ĕhi ë'ohëjo.

⁴ Röhu ëhi ë'iröhe mu hesi bëhoho God-are surire jö jajivarëhi ëhi jioröhego. Jö God-aro baeromo majëhinövade ahuo uëveadeje:

⁵ Jemëro Zion amo rajoho ëhi uërëjo:

Gahëjo. Jemesi böörömhuro jemesi örire rovajëjo.

Hu sanu'e aëro jië'ëro donkey döre hiromo rovajëjo.

Donkey hesi harihure hiromo rovajëjo.

⁶ Amo Iesuro hesi iJORAJOHO rĕmō'ōJAMU va'oromo Iesuhu uĕvādĕhi ĕhi ĕ'areje. ⁷ Ĕhi'oromo ĕ donkey niō'ioHO vĕmohu'o harihohu'o hu'iraejĕvo rueromo niōgohO jabesi deJore ruahO'amo bahijamu gAgorovo Iesuro ĕ aJio hijadeje. ⁸ Hijamu ae aho'obĕhe a ioro'iorohuro niōgohO ōrĭre ahahobe va'i a ioro'iorohuro iJO rude tarivo'amoromo aha-hobe va'areje. ⁹ Iesuarĕ nunĭnō va'oruomadohu'o deJONō rueruomadohu'o ma-darugo'o uvoruomadeje:

Ave aho David-are uJohO bŏrŏme vaeromo rovajohO mabĕhĕjŏ.

Ave aho Badare ihore rovajohO mabĕhĕjŏ.

God mabĕhĕjŏ.

¹⁰ Ĕhi'amU Iesuro Jerusalem amore hŏrŏjAMU gavĕ'i amo raje ae magonahe aho'obĕhe tiŏtiŏvoromo uĕvareje: Ĕho rahuo hŏjŏ. ¹¹ Rahuo hŏjAMU Iesu'o rueruomade aribŏvĭohuro uĕvareje: Ĕaho Galilee sa'are Nazareth amore hiromO jŏ God-aro baeromo majahuijaje aho hŏjŏ.

Iesuhu God-are amo bŏrŏmore va'oromo ĕ'ade jŏhoje.

¹² Ĕhi'amU Iesuro God-are amo bŏrŏmore va'adeje. Va'i gavade aĕro bŏvie bise'e imo'amamu rarovŏ'ŏjĕvadeje. Rarovŏ'ŏjĕvoromo gavade aĕro sa'a gŏre gŏre jioromo rovare aribŏvi jabesi iJO bAJOHU ujuohO'i amo bŏrŏmo hesi iJO bAJOHU i'imĕmamu gĕgorovo jabesi mu maratuohO huotovŏ'ŏjĕhoromo ugo imo'amarue aribŏvi jabesi arĕtohu'o huotovŏ'ŏjĕhadeje. ¹³ Huotovŏ'ŏromO uĕvadeje: God-are surire jajivoromo uvĕ'e hŏjŏ: God nasi osaho aĕro uvoruomO'ajĕjŏ: Ĕho God-are ōrĭre jŏ atO'irĕhe osaho hŏjŏ. Ĕhi uvĕ'e hŏjŏ rŏhu jemĕro mu sisĕ ĕ'ĕ'ĕro ĕhuro ave osaho vajiohu'e aribŏvĭeHU gurĭhirovarue juju gagoHO va'ĕne hŏjŏ.

¹⁴ Ĕhi uĕvAMU nuni sisĕ'e hŏru sisĕ'e aribŏvĭohO God-are amo bŏrŏmore rueruomAMU Iesuro avohĕvadeje. ¹⁵ AvohĕvAMU gAgorovo priest masĭjohu'o jŏgoru ōri rŏjĕhĭjarue aribŏvĭohu'o ĕho jaburo gavare Iesuro ĕhi jiĕ'e mu masĭjohO vae'amAMU hejare asisŏ'ĕro uvo'i ariJAMU: Ave aho David-are uJohO bŏrŏme vaeromo rovajohO mabĕhĕ uvoruomAMU hegorovo dĕ vŏrŏnimoruomadeje. ¹⁶ Dĕ vŏrŏnimoruomOROMU Iesu uĕvareje: Arue asisŏ'ĕhu jŏ sisĕ uvoruomAJOHU na ja hejanuĕjŏ o bogajo. O bogajAMU hegorovo Iesuro uĕvadeje: Ito'ajo. Iae na hejajĕjŏ. God-are jŏho surire jajivoromo uvĕ'e hŏjŏ: God jero asisŏ'ohu'o asisŏ'o inino mahu'o avohĕvĕ'ego jasi ihohO mabĕhe uvoruomAJE hŏjŏ. Ĕsurire jŏho rabĕni bogo avoho gavarije hŏjŏ. ¹⁷ Ĕhi uĕnugoromo Iesuro ĕ rĕmoromo Jerusalem amore jioromo va'oromo Bethany amore hŏrŏromO vahie gemu ĕ hijadeje.

MeseHU bAJO bogo raejŏro Iesuhu uavade jŏhoje.

¹⁸ Hijĕ'ĕro sisonuVAMU gAgorovo Iesuro Jerusalem amo bŏrŏmore vuonorŏ'ŏ va'i va'adeje. Ōrĭre va'AMU hŏmadeje. ¹⁹ HŏmAMU va'ihŏ gavade mesohO ōri ionire namĭjAMU gAgorovo bĕhire va'oromo gavadeje bAJOHU bogojio'i ma-hano rudu'emu jĭAMU. Ma-hano rudu'emu jĭAMU gAgorovo mesohO uavadeje: IjohO nadi bAJOHU raenĕjŏ. Ĕhi uavAMU gAgorovo mesohO ma-burĕro sahorĭjadeje. ²⁰ SahorĭjAMU gAgorovo Iesuarĕ iJORAJOHU jaburo tiŏromO uavareje: Diehi'ego mesohO ma-burĕro sahorĭjajĕjŏ. ²¹ SahorĭjajĕjAMU Iesuro uĕvadeje: Ave jŏho na jŏ mae uĕ'iĕ'ajĕjŏ. Jemĕ bogo uehore niŏ'i bae'irŏgorO God gemu mae uehorovĕ'ohO naehu meso avohode ĕhi jiĕ'e mu vaejĕ'ohO eni jĕvo'ajĕjŏ. Rŏhu bogo ĕhemuohO vae'i ave dahoru uavĕ'ohO: Ri'ŏromO va'o jovo bŏrŏmoro bu'ŏrovonĕ uavĕ'ohO iae ĕhi jio'a'ajĕjŏ. ²² O rabe rabe God ua gavĕ'ohO mae uehorovoromo uvĕ'ohO: God-ro ajemĭ'ajĕ uvĕ'ohuro ĕhuro iae bae'a'arujĕjŏ.

Jew rAJO a masĭjehU Iesu bogo ma uehorovoromo darugohO dinŏ'e baejane hŏ uavare jŏhoje.

²³ Ĕhi uĕnugoromo Iesuro God-are amo bŏrŏmore ajiomadeje. Ajiomoromo God-are jŏ bĕhohO ae rŏjĕhĭjadeje. RŏjĕhĭjAMU priest masĭjohu'o a duvaho ōmo'ŏmohu'o ĕho jaburo rueromo uavareje: Jaehu God-are amo bŏrŏmore hiromO mue gŏ gŏ vaejanuohO diehi jiĕ'e daruge javoromo o raro darugohO bojamĭjĕ'ĕro ĕhi jiĕ'e muohO vaejanue hŏjŏ.

²⁴ Vaejanue hŏjAMU Iesuro uĕvadeje: Nasi darugo hesi jŏ ue gevarujohO na'o jemĕ jŏe gemu

uë gë'i'ë'ajëjo. Jemëhu mana uevë'oho naro jemë uë'ejöjo: Na ëhi jië'e darugohuro muoho vaejaje höjo. ²⁵ John-hu bapataeto vaejavuonövadoho ë darugoho dinó'e baejade höjo. Na God-ro o ma-aëro darugoho bojamijë'ëro ëhioho ë'onövade höjo. È'onövade höjamu rue a masijohuro Iesu diehi mana ua'iröhe jöho jabeti mevoromo uarovareje: Noehu uavë'oho God-ro John darugoho bojamijade hö uavë'oho Iesuro uó'a'ajëjo: Èhi jië'oho jemë rabëni John bogo ma uehorovarije höjo. ²⁶ O noehu Iesu ua'iröhoho: Ma-aëro John uavamü ë'ade hö ua'iröhoho röhu ae aho'obëhe juhuonëmiromo bogo ëhioho ua'ëjarëjo ë hesi bëhoho jaburo uvoruomë'ëro: John hu jö God-aro baeromo majahuinövade ae hö uvoruomë'ëro. ²⁷ Èhi uarovoromo Iesu uavareje: Jaehu uó gövuanue jö hesi bëhoho no dadivauajëjo. Dadivauajëjamu hegorovo Iesuro uëvadeje: Èhi jië'oho jemëhu uevariye jöho na'o bogo uë'ejöjo: Na ëhi jië'e darugohuro muoho vaejaje höjo.

Harihu niö'thu diehi ë'are uhu jö Iesuhu jövadohoje.

²⁸ Röhu ave uhu jö heromo diehi uehorovarujoho majehirego na he'iröjo. Iae ae gemu hu harihe niö'i jëvade höjo. Harihe niö'i jëvë'ëro vavuuhuro va'oromo murioho uavade höjo: Jue'i jaruvo grape ö'i bajo muoro va'oromo mue vaejehonëjo. ²⁹ Vaejehonëjamu muriohuro ri'öromo uavade höjo: Na bijönegajëjo. Bijönegajë uanugoromo röhu ijönö avoho uehorovoromo mue vaejaho'i va'ade höjo. ³⁰ Èhi'amü vavuuhuro va'oromo ijorajoho jöe gemuho majahiromo uavade höjo: Muoro va'oromo mue vaejehonëjo. Vaejehonëjamu ijorajohuro uavade höjo: Apo iae na va'ejö uaromo röhu bogo va'ade höjo. ³¹ Èhi jië'oho di ahuro vavuehu nimadëhioho vaejade höjo. Vaejade höjamu uëvareje: Muriohurajo. Muriohurajamu Iesuro uëvadeje: Ave jöho na jö mae uë'ië'ajëjo. Vajiohu'e tax baejarue ariböviohu'o ö'nö'e jijiharue magonahohu'o ëho jaburo jemë iosirëmiromo urimo God-are aharire va'oromo raromego huro jabumë muebejëvaje höjo. ³² Rabëni hesi bëhoho John-ro jemesirire rovade höjo öri maho röjëhijego ga'iraririego. Rovamu jemëro hu bogo ma uehorovo'irögoro vajiohu'e tax baejarue ariböviohu'o ö'nö'e jijiharue magonahohu'o ëho jaburo hu mae uehorovoruomade höjo. Mae uehorovamu jemëro ëho garomo röhu bogo avoho uehorovoromo huotorovoromo John ma uehorovarije höjo.

Mu aribövieuha a börömo hesi ö'i bajo mu mueberomo sisë ë'are uhu jö Iesuhu jövadohoje.

³³ Röhu uhu jöe gö'lo majëhi'ië'ajoho hehëjo. Iae sa'a arijo'e ae gemüero mure grape ö'oho bivo'amade höjo. Bivoromo ë muoho buore iromo rova'o rojomoromo ö'i bajo sa'ijovoröhe guaho umoromo mu javue döro vaejade höjo hesi mu ahuro ajio ë hiromo muoho atovoröhego. Èhi avohoromo gavade eni jiamu gagorovo ae uëvade höjo: Na va'ejöjo. Jemëro nasi muoho muebejehorëjo. Mueberomo ö'i bajoho raeromo mavego nasiroho bahi'i ioro'ioroho jemesi ujuohorëjo. Èhi uënuogoromo ri'öromo va'o sa'a göro ë hijade höjo. ³⁴ Sa'a göro va'oromo hijuvo gavade ö'i bajo urarue majaho dunovamu gagorovo hesi mu vaejarue aribövioho uëvade höjo: Va'iraririjoho mu muebejarue aribövioho uërego nasi ö'i bajoho i'imëmego ujuoheho ruerëjo. ³⁵ Ujuoheho ruerëjamu hegorovo va'are höjo. Va'oromo suorovamu gëgorovo mu muebejarue ariböviohuro guduamëvare höjo. Guduamëvoromo göho hisuebi'i göho ano bamo'i göho munëro vajamijamu guomade höjo. ³⁶ Èhi'amugo mu arijo'ohuro mu vaejarue ae gö'lo rëmö'öjade höjo mure va'oröhego. Urimo mu vaejarue ae gemu mu rëmö'öjë'ëro röhu evaroho ae aho'obëhe rëmö'öjade höjo. Rëmö'öjamu va'oromo mure suorovamu gëgorovo mu muebejarue ariböviohuro urimo rueruomamu ë'arëhi ëhi sisë vaejëvare höjo. ³⁷ Sisë vaejëvamü ijo tugoho'i mu arijo'ohuro uvade höjo: Arue mu muebejarue ariböviohuro nasi harihoho garomo uvo'a'aruëjo: Nöruare harihe hö uvoromo ëhuni mae uehorovo'aruëjo. Èhi uvoromo nugö'öjamu mure va'ade höjo. ³⁸ Va'o höröjamu garomo uarovare höjo: Arue rovaje ahuro hesi vavu hesi sionoho bae hesi höjo. Èhuni ë'ëgo ano bamoromo hesi sa'aho nosi baejarëjo. ³⁹ Èhi uarovoromo ë aho mure jiamu guduamoromo rori'o bijimo bu'öromo anamu guomade höjo. Èhi'are höjo.

⁴⁰ Èhi jië'oho mu arijo'ohuro mure rovë'iroho mu muebejarue aribövi jabeti öriroho diehi'ëvo'ajëjo. ⁴¹ Diehi'ëvo'ajëjamu uavareje: Sisë jioruomö'ëgo ijumëvo barëromo

muoho a maho bojëmi'ajëjo jaburo mueberöhego. Mueberomo majae eni jiego ö'i bajoho uroromo hesiroho i'imamiröhego. ⁴²Ëhi uëvamu hegorovo Iesuro uëvadeje: Ave uhu jöho God-are surire jajivoromo uë'e höjo:

Munë javue vae'irögoro munë gemu bijönimoromo vuonugare höjo.

Vuonugaroho jaruvoho ë munëhuro javuvoho nigemo'ego bibivoromo mae namijajëjo.

Hesi Bada God-ro ëhi ë'ade höjo.

Ëho noro garomo uvarue höjo: God-ro mu mabëhe ë'ë'e höjo.

Ëjö God-are surire jajivamu adaharijoho jemë diehi'oromo ë hesi bëhoho bogo avoho baejarije höjo.

⁴³Ëhu'ëro jië'ëro naro jemë uëvajëjo: Jemëhu God-are aharire raromoromo hesi mu muebebe rovarije muoho God-ro baeniëhiromo ae gö bojëmi'iramu jaburo hesi aharire raromoromo ë muoho mueberomo rae avoho'aruëjo. ⁴⁴[Röhu aehu ë munë döre bejë'oho ahoro ahoro bae'a'ajëjo. O ë munëhu a döre berovë'oho aho sa'ijovo barë'ajëjo.]

⁴⁵Iesuro uhu jöe gö gö ëhi jövamu hegorovo priest masijohu'o Pharisee ariböviohu'o ëho jaburo garomo uvarueje: Nosi jöe jövajëromo ⁴⁶guduamo bava'ië'oromo uvarueje: Ae aho'obëhe uvoruomaje höjo: Iesu hu jö God-aro baeromo majahuijaje ae hö uvoruomaje hö uvoromo jabumë juhuonëmiromo vuonugareje.

22

Sörö bamamu aehu juahamare uhu jöhoje.

¹Iae Iesuro röhu maho uhu jöe gö gö ae majëhijadeje. ²Majëhiromo uëvadeje: God-hu böröme namiromo muebejëvaje öroho aviëhi höjo. Sa'a a böröme gemüero söröe baejade höjo hesi harihohuro masuromo iröhego. ³Ëhi ë'ë'ëro hesi mu vaejharue aribövioho uëvade höjo: Va'irarijoho rueröhego naehu mami'e uëvode aribövioho uërego rue'irarëjo. Rue'irarëjamu uëvamu bijönimoruomade höjo. ⁴Bijönimamu hegorovo sa'a a börömhuro mu vaejharue a ioro'ioroho uëvade höjo: Söröre rueröhego uëvodoho ëhi uërëjo: Jöe hehëjo. Nasi söröho eni jië'e höjo. Nasi mi masije ma-mabëhe naehu ma-je mio'amaje sanuovë'e mioho bijuëmoromo buvomoromo bahijë'e jevajëjo. Bövie bise'e eni avohë'e jevajëjo. Ëhuni rovego no ë söröho i'irarëjo. Ëhi uërëjo. ⁵Ëhi uëvamu jöho bava'oromo majëhijamu ë ariböviohuro bogo ejëhë'e öre gö öre gö va'are höjo. Göëro hesi mure va'ade höjo. Göëro hesi moni muro va'ade höjo. ⁶Ioro'iorohuro ë anu rovere aribövioho guduamëvoromo mu sisë vaejëvoromo muo'amare höjo. ⁷Ëhi'amu ë sa'a a börömhuro dë vörönimade höjo. Dë vörönimamu muorovo aribövioho rëmö'öjamu jaburo ë anëgare aho muo'amoromo jabesi amoho buë'öjëhare höjo. ⁸Bue'öjamu gagorovo a börömhuro hesi mu vaejharue aho uëvade höjo: Söröho eni jië'e höjo. Röhu rueromo sörö ihë uëvamu juahemijare ariböviehu rueromo sörö ijë'oho sisë höjo. ⁹Ëhuni öri masijoro va'irarijoho va'oromo ae rahu rahu birohëvë'oho uëvego söröro rue'irarëjo. ¹⁰Rue'irarëjamu hegorovo rue mu ariböviohuro örire va'oromo a sisëhu'o a mahu'o birohëvoromo aho'o sö ujuoho rovere höjo. Rueruomamu sörö osaho rarovade höjo.

¹¹Rarovamu a börömhuro ë aribövioho gë'i osare rovade höjo. Rue'i gavade höjo ae gemu masuvarue sörö i'i io'amarue niögoho bogo ba'amë'e ma-hijamu. ¹²Ma-hijamu gagorovo uavade höjo: Isiajo. Masuvarue niögoho bogo ba'amë'e ja diehi'oromo ave osaroho rovane höjo. Osaroho rovane höjamu ruehuro jörumoraejade höjo. ¹³Jörumoraejamu rue a börömhuro ri'öromo mu aribövioho uëvade höjo: Övo höru'oho tövo'amoromo babu'öhego amonö ramoramore va'o hijajo. Ëdirö'ore ae aho'obëhe nierusuburu'e bamoromo ane ja'iho vuogigimoruomo'ajëjo. ¹⁴Ëhesi bëhoho God-ro ae aho'obëhe ruejöro uëvaje höjo. Röhu ae ma-gemu gemu hesinö jëvojöro baejëvaje höjo.

Iesuhu guaro berovojöro aehu tax jö ua gavarohoje.

¹⁵Ëhi'amu iae Pharisee ariböviohuro va'oromo jöe atoromo uarovareje: Ë'ego no Iesu sareramego hu guaro berovoi'irajo. ¹⁶Ëhi atonugoromo jabesi ijore ijore jijiharue a

ioro'iorohu'o Herod-are aribövi ioro'iorohu'o rëmö'öjamu va'oromo Iesu sarerisareri-amiromo uavareje: Tisajo. Iae no gavarue höjo ja a mae javë'ëro God-are mu örohemu røjahuijego. O aho bogo juhuonëmijego. Èhesi bëhoho jero no göromo ae böröme o bise'e javuajëromo jöe gö gö bogo røjahuijanue höjo. ¹⁷ Èhuni ave jöho ja diehi uehorovanuoho majahuijego no hejarëjo. Rome a börömhuro nosi sa'aho muebejego noro hu tax bojamijarue höjo. Noehu èhi ë'aruoho na èhuro nosi jögoroaho aharue höjo o bogajo. ¹⁸ Bogajamu Iesuro gëromo uvadeje: Jabumë sisë vaejevo'i ue gevaruëromo uëvadeje: Sareri aribövie jëvajëjo. Jemë rabëni na bijioho gevarujëjo. ¹⁹ Tax a bojëmijarue ijo bajoho røjehihago na gavöjo. Gavöjamu ijo bajoho barovareje. ²⁰ Barovamu garomo uëvadeje: Aveho rahuare nu ano'ohu'o ihohu'o jajivë'e höjo. ²¹ Jajivë'e höjamu uavareje: Rome a börömo hesi höjo. Rome a börömo hesi höjamu uëvadeje: Èhuni Rome a börömo hesiroho èho hesi öroro bojami'i God-aroho èho God-are öroro bojaminövorëjo. ²² Èhi uëvamu hegorovo tiöjëvamu Iesu ë nugo'i va'oruomadeje.

Iesuhu guaro berovöjoro vuovë'e ariböviehu ri'öruomoröhe jö Sadducee ariböviehu hu ua gavarohöje.

²³ Va'amü gagorovo majae gemuore Jew rajo a masijo ioro'iorohuro rovareje. Jabumë Sadducee jö uehorovarue aribövie jiruomadeje. Sadducee ariböviohuro uehorovoromo uvoruomajeje: A vuovë'oho ijönöho bogo ri'ö'amo'i ma-ioro'iore gemu vuovo'ajëjo. Èhi uvoruomaje ariböviohuro rueromo Iesu guaro berovöjoro sarerisareriamiromo uavareje: ²⁴ Tisa Moses-ro jögore jajivoromo uövuë'e höjo: Aboji harihu'o rumo'e vuovego diehi ë'iröhe öroho aviëhi höjo. Aehu vaboro masuromo vaboroho aboji harihu'oho bogo vaejë'e baruehu guomo'i vaboro nugë'oho hesi öhuro vuojiroho masuromo èhuro guomade ö hesi ihoro ujoho vaejaho'ajëjo. Moses-are jögorohe èhi höjo. ²⁵ Èhi jië'ëro iae ae aho'obëhe 7 ma-ö ömo'ömëremu nosirire raromare höjo. Raromoromo muriohuro magonahoho masuvade höjo. Masuromo vaboroho aboji harihu'oho bogo vaejë'e baruoho guomade höjo. Guomamu hesi vaboroho dorue hijamu gagorovo ö göhuro vuojiroho masuvade höjo. ²⁶ Masuromo guomade höjo. Ö ömo'ömo ioro'ioroho èhi gemuoho ë'obe rovere höjo. Ö ömo'öme 7 jabuhu ë magonahe gemuoho masube rovaroho ë magonahoho aboji harihu'oho bogo vaejë'e aho ma-vuovëvobe rovide höjo. ²⁷ Vuovobe ruejuvo barëjamu ijo tugoho'ioho ë magonahoho hu'o guomade höjo. Èhi'are höjo. ²⁸ Èhi ë'arohuni èhuni ave jöho no ua ga'ie'aruëjo. Jero uvanue höjo: Vuovoromo ri'ö'ejarëjo. Èhuni vuovë'e ariböviehu ri'öruomoröhe majaroho ae 7 höjo röhu ë magonahoho di ahu'o hi'a'ajëjo. Barue aho'obëhe masuvë'ego èhuni uvaruëjo.

²⁹ Èhi uavamu hegorovo Iesuro uëvadeje: Bogajo. God-are surire jöhu'o huhu mu vaeröhe darugohu'o jemë bogo avoho gavarujëro sisë'i uehorovoromo ue gevarujëjo. ³⁰ Èhesi bëhoho vuovë'ëro ri'öruomo'iröhe maja rovë'iroho vaboroho baruoho bogo masurovo'i aneraehu ö'idöre ma-raromaruëhi èhi raromo'aruëjo. Èhuni ë magonahuhu di ahu'o hi'iröhe jö ue gevarujoho bëhi rumo'e höjo. ³¹ Èjöhö jemëro uvaruje höjo: Vuovë'e ariböviehu ri'ö'iröhe jöho sareri jöe höjo. Èho bogo sareri jöehu jio'i jö mae höjo. Èhesi bëhoho vuovoromo ri'ö'iröhe jöho God-ro jemëni jövamu hesi surire jajivoromo uvë'e höjo: ³² Na Abraham Isaac Jacob èhi muebejëvaje ae jevajëjo. Jemë rabëni ë jö hesi bëhoho bogo avoho baejarije höjo. God-hu Abraham Isaac Jacob muebejëvaje jö hesi bëhoho jabumë vuovoromo bogo ioro'ioemuoho barë'i va'o raromego muebejëvaje höjo. God bogo vuovoromo ioro'ioemu barëjë'e aribövioho muebejëvo'ibejajo. A'i hu vuovoromo va'o raromare aribövioho iae muebejëvaje höjo. ³³ Iesuro Sadducee aribövioho èhi uëvamu ae aho'obëhe heromo jöe barëjëvadeje.

God-hu bojamuade jöho diho börömo jiajoho aehu Iesu ua gavadohoje.

³⁴ Èhi'amü Pharisee ariböviohuro hejare uvavamu: Iesuro jö mae jövamu èhuro Sadducee aribövioho jö mana majahi'iröhoho bogohö uvavamu hegoro gagovorovareje. ³⁵ Gagovorovonugoromo Jew rajo jögoro öri røjehijaje ae gemuëro Iesuare dëho bijioho ga'irögoro ri'öromo uavadeje: ³⁶ Tisajo. God-hu bojamuijade jögore aho'o jio'amajoho di

jõho bõrõmoho hõjo. ³⁷ Bõrõmoho hõjamu uavadeje: Jasi dë vövõbajo'e aru'ahе uehore aho'obëhe Bada jasi God ma-hu gemu bojaminëjo. ³⁸ Èho jõ bõrõmo bõrõmoho jië'ego èho nuniroho hõjo. ³⁹ O è jõ hesi bëhirohu'o iae gemuoho hõjo. Jaehu jasi arijo'arije rajahirovanuëhi jasi ae gemuoho èhi rajahinëjo. ⁴⁰ Dë vövõbajo'e aho'o God bojami'irane jõhu'o jasi ae gemuoho rajahi'irane jõhu'o bëhoho jëvavëjo. God-are surire jõ Moses'o jõ God-aro baeromo majëhinõvare a ioro'iorohu'o jajivo'amaroho èho ado sirino'oho jio'amajëjo.

Bõrõme namiromo ajamuaje a hesi jõ Iesuhu røjëhi'i uë gëvadohoje.

⁴¹ Iae Pharisee aribõviohuro gagovoruomamu gavë'i Iesuro uëvadeje: ⁴² Bõrõme namiromo ajëmi'irõhe a hesi jõho jemë diehi uehorovarujëjo. Hu rahuare ujoho hõjo. Uavareje: Hu David-are ujoho hõjo. ⁴³ David-are ujoho hõjamu uëvadeje: Èhi jië'oho God-are Aru'ahoho rabëni uavamu David-ro bõrõme namiromo ajëmi'irõhe aho Bada uavade hõjo. ⁴⁴ Èhesi jõho David-ro God-are surire jajivoromo uvë'e hõjo: God Badaro nasi Bada uavade hõjo:

Nasi õvo manõ rojo hijego

ja'o muorovarue aribõvioho naro ruahõ'õjëvego

hõrëro vijuvo taemo'amo'irane hõjo.

⁴⁵ Èhesi bëhoho bõrõme namiromo ajëmi'irõhe a hesi jõho David-ro jajivoromo uvë'e hõjo: Bada hõjo. Bada hõ uvë'e jiaje èhuni nadi uvorëjo: Bõrõme namiromo ajamui'irõhe aho ma-David-are uje hõjo. ⁴⁶ Èhi uëvamu aehu Iesu mana ua'irõhoho bogo eni jëvadeje. Bogo eni jëvamu ijonõ jõe gõ ga ga'ie'aroho juhuonivoromo vuonugareje.

23

Pharisee aribõviohu'o Jew rajo jõgoru õri røjëhijarue aribõviohu'o èho jabuhu sareri'e mu vaejaruëhi aehu bogo èhi è'irõhego Iesuhu jõvadohoje.

¹ Èhi'amu Iesuro hesi ijorajo õmo'õmohu'o a ioro'iorohu'o aho'obëhe uëvadeje: ² Jew rajo jõgoru õri røjëhijarue aribõviohu'o Pharisee aribõviohu'o èho jaburo Moses-are sionoho baej'e hõjo. ³ Moses-are sionoho baej'e jëvaje èhuni mu jõ rabe rabe uëvë'oho ejëhoromo èhi vaenõvorëjo. A'i jabuhu õmaruëhioho nadi èhioho õmorëjo. Rabëni hesi bëhoho jõ majëhijaruëhioho muoho bogo èhioho vaejarue hõjo. ⁴ Aehu i'u'e inõmo ujuoho va'oruomojõro buahore bahijëhoromo tõvëhoromo va'ego bogo ajëmiromo õvo namehu vitu banigojionëharuëhi è Pharisee aribõviohu'o jõgoru õri røjëhijarue aribõviohu'o jaburo èhi è'arue hõjo. I'u'e muoho aho'o ae bojëmiromo bogo mae bogo ajëmi'i manunëremu gëvarue hõjo. ⁵ Jabu mu rabe rabe vaej'õho aëro gëjõro ma-dõhemu vaeruo-maje hõjo. Èhesi bëhoho jabumëro nimoruomaje hõjo aëro gëromu uvoruomorõhego: Jabumëremu God mabëhe uehorovoruomaje hõjo. Aëro èhi uvoruomorõhego nëgego God-are jõ'e suri surioho maua gagore bahiromo õvo ahore varijore muoho taemoruomaje hõjo va'orahoro jio'amego aëro garuomojõro. O God-are õrìre jõ ato'i io'amarue niõgure õ'i ègobõvie be io'amoruomaje hõjo va'orahoro jio'amego aëro garuomojõro. ⁶ O sõrõ i'i va'ë'oho o God rajahijarue osare va'ë'oho a masijehu raromaruire è va'o raromo'i nimarue hõjo. ⁷ O imo'amaruire va'ë'oho nimarue hõjo ae aho'obëhe uvoruomorõhego: Jabumë a masijëro jijihajëromu rajëhiromu jejëmiruomorõhego. O nimarue hõjo aëro jejëmiromo uërõhego: Tisajo. ⁸ Rõhu ae gõehu jemë dõre bamëvoromo uëvë'oho: Tisa uëvë'oho èhi jië'oho sisë hõjo rabëni hesi bëhoho jemë õ õmo'õmëremu jëvo'i jemesi Tisaho na gemu jevë'ego. ⁹ O ave sa'are raromarue aribõvioho nadi dõroho bamëvoromo uërëjo: Apajo. Èhesi bëhoho ae gemu õ'idõre hijajoho èho iae jemesi Vavu Bõrõmoho hõjo. Èhuni èhi jië'e jõho nadi uërëjo. ¹⁰ O ae gõehu jemë dõre bamëvoromo uëvë'oho: Simano vaejanue aho javajë uëvë'oho èhi jië'oho sisë hõjo. Èhesi bëhoho jemesi Simano Vaejaje Aho ma-gemu jevavëjo bõrõme namiromo ajëmijaje ahuro jevë'ëro. ¹¹ A'i a masije jemesirire jioruomajoho èhi jië'e aribõvioho mu ajëmi'irõhe aribõvie jioruomajajëjo. ¹² Ae rahu sivu

uehorovoromo dõre bamorovë'ohõ hesi ihohõ abue'a'ajëjo. O ae rahu ba'obuerovë'ohõ hesi ihohõ dõro ajiomõ'ajëjo.

Pharisee aribõviohu'o Jew rajo jõgoru õri rõjëhijarue aribõviohu'o sisëre va'irõhe jõ Iesuhu jõvadohoje.

¹³ Vaevë'e jõgoru õri rõjëhijarue aribõviohu'o Pharisee aribõviohu'o jemë ma-dõëremu muohõ õmarujëro sisërejëvo'ajëjo. Ëhesi bëhohõ God-hu bõrõme namiromõ muebejëvego hesi aharire raromoruomõ'irõhe õroho tugohëharue hõjo aëro ë va'o raromõjõëni. Jemë God-are ahariroho bogo va'o raromõ'i nimaruje hõjo. O ae gõehu God-are aharire va'o raromõ'ia'amu gëvë'ohõ ahëvaruje hõjo.

¹⁴ [Vaevë'e jõgoru õri rõjëhijarue aribõviohu'o Pharisee aribõviohu'o jemë ma-dõëremu muohõ õmarujëro sisërejëvo'ajëjo. Ëhesi bëhohõ magonaho doru jabesi bõvioho bise'ohõ ëma ujuohëharue hõjo. Ëma ujuohëhoromõ sarerivoromõ pari ëgõbõvie jaguvaruje hõjo aëro gëromõ uvojõro: Mu mae vaejaruëjo. Ëhi jië'e sarerie'le muohõ vaejarujego ëhuni God-ro i'u bõrõmõ mae bojëmi'ajëjo.]

¹⁵ Vaevë'e jõgoru õri rõjëhijarue aribõviohu'o Pharisee aribõviohu'o jemë ma-dõëremu muohõ õmarujëro sisërejëvo'ajëjo. Ëhesi bëhohõ jemëro jovo gõre gõre sa'a gõre gõre ae dinëmibe va'arujë hõjo ma-ae gemuëro hesi muohõ vuonugo'i Jew rajo muohõ baerõhego. Ae dinëmibe va'oromõ gavaruje aho jemesi jõho ejëhoromõ Jew rajo mu baejamu gavë'ohõ jemëro ë aho mu sisë rõjahijego mae hõromõ vaeromõ jemëhu sisë ë'oromõ vëni'le õrيره va'arujõho ë ahuro jemë iosirëmiromõ sisë bõrõmõ bëhe ë'oromõ vëni'le õrيره va'o hesi hõjo.

¹⁶ Vaevë'e nuni ramoramovë'e aribõvi jemëhu ae gõ õri rõjëhi'ie'arujõho sisërejëvo'ajëjo. Ëhesi bëhohõ jemëro ae ëma majëhiromõ uëvaruje hõjo: Ae rahu darugo'e jõ uvo'ië'ohõ God-are osa bõrõmõ hesi iho uvoromõ ae uëvë'ohõ: Na mue ëhi ëhi ë'ejõ uëromõ rõhu mu bogo vaejë'ohõ iae hesi hõjo. A'i God-are osa bõrõmore jio'amaje gold hesi iho uvoromõ ae uëvë'ohõ: Na mue ëhi ëhi ë'ejõ uëvë'ohõ iae ë muohõ vae'a'anuëjo. Bogo sarerivo'anuëjo. ¹⁷ Nune ramoramovoromõ simane sisë'i uehorovë'e aribõvie jëvajëjo. Ëhi majëhijarue hesi bëhohõ nani jemëro uvaruje hõjo: God-are osa bõrõmõ hesi ihohõ bise'e jio'i God-are osa bõrõmore jio'amaje gold-ho iho bõrõme hõjo. Rõhu ë gold-ho bogo God-are osa bõrõmorohõ jio'amo'ibejajo bogo God-are gold maho jio'amo'ibejajo. A'i ë gold-ho God-are osa bõrõmore jio'amë'ëro ëhu'ëro ëho gold maho hõjo. Gold-huro bogo God-are osa bõrõmohõ iosiramiromõ iho bõrõmohõ jio'i God-are osa bõrõmõ hesi ihohuro gold ihohõ iosiramiromõ bõvioho jiaje hõjo. ¹⁸ O jemëro jõë gõ ëma majëhiromõ uëvaruje hõjo: Ae rahu darugo'e jõ uvo'ië'ohõ God-are maratu hesi iho uvoromõ ae uëvë'ohõ: Na mue ëhi ëhi ë'ejõ uëromõ rõhu mu bogo vaejë'ohõ iae hesi hõjo. A'i God-are maratu dõre bahijahare suvuoro hesi iho uvoromõ ae uëvë'ohõ: Na mue ëhi ëhi ë'ejõ uëvë'ohõ iae ë muohõ vae'a'anuëjo. Bogo sarerivo'anuëjo. ¹⁹ Nuni ramoramõ'e aribõvie jëvajëjo. Nani jemëro uvaruje hõjo: God-are maratu hesi ihohõ bise'e jio'i God-are maratuore jio'amaje suvuorohõ iho bõrõme hõjo. Rõhu ë suvuorohõ bogo God-are maratuorohõ jio'amo'ibejajo bogo God-hu ujuohõ'irõhe suvuoro maho jio'amo'ibejajo. A'i ë suvuorohõ God-are maratuore jio'amë'ëro ëhu'ëro ëho suvuoro maho hõjo. Suvuorohuro bogo God-are maratuohõ iosiramiromõ iho bõvioho jio'i God-are maratu hesi ihohuro suvuoro ihohõ iosiramiromõ bõvioho jiaje hõjo. ²⁰ Aehu darugo'e jõ ato'ië'irohõ God-are maratu hesi iho darugo'o majëhijë'ohõ ë hesi bëhohõ bogo maratu hesi ihohemu uvo'i maratuore jio'amaje suvuoro hesi ihohu'o uvoromõ ë'arue hõjo. ²¹ O ae rahu God-are osa bõrõmõ hesi iho darugo'o majëhijë'ohõ ë hesi bëhohõ bogo osa hesi ihohemu uvo'i osare hijaje A hesi ihohu'o uvoromõ ë'arue hõjo. ²² O ae rahu õ'idõ hesi iho darugo'o majëhijë'ohõ ë hesi bëhohõ õ'idõre jiaje God-are rõho hesi ihohu'o ë hijaje a hesi ihohu'o uvoromõ ë'arue hõjo. Ëhuro darugo'o majëhijarue hõjo.

²³ Vaevë'e jõgoru õri rõjëhijarue aribõviohu'o Pharisee aribõviohu'o ma-dõëremu muohõ õmarujëro sisërejëvo'ajëjo. Jemëro jemesi i jõgoru e avohoromõ i'o buarohoromõ

ijarue rihu'e oso harihu harihue gö gö garue gö gö mevoromo 10 10 bahibe va'oromo gemu gemu God suvuore bojamijaruje höjo. Èhi jiè'e jögoru ininoho ejaho avoharuje höjo. Èhi jiè'oho iae mae höjo. Nadi vuonugorëjo. Röhu èho ma-jianovo'i jö ioro'ioroho masijo jiajoho èho bogo uehorovaruje höjo. A ma-mae vaejëvo'irarije muoho a huë baejëvo'irarije muoho ahorire vaejëvo'irarije muoho èho rumonimaruje höjo. Nadi rumonimo'ibejarijëjo. ²⁴ Majo majo biseharihehu jemesi jovore beva'è'oho io bu'öromo jovoho i'i majo böörömo böörömo bogo avoho gavè'e ma-nimu'öjaruje höjo. Jö masijoho bogo uehorovo'i ma-jö ininohemu uehorovaruje höjo. Èhuro nunoho ramoramovëvego öroho sisè'i röjëhijaruje aribövie jëvájëjo.

²⁵ Vaevè'e jögoru öri röjëhijaruje ariböviohu'o Pharisee ariböviohu'o ma-döëremu muoho ömarujëro sisërëjëvo'ajëjo. Jemë hevöe enatue dönöhemu u'o'amaruje höjo. Gagonöho ae gö jabesi ie jove vajiohëro ujuohoromo aegè'l'ëro irijio'mo'amè'e höjo. Èhu'ëro dönöho aje jio'i gagonöho va'inumi'e jio'amajëjo. Jemesi mu sisèho èhi jianovajëjo. ²⁶ Pharisee jemë ae gemu gemu nuni ramoramoe ae jëvájëjo. Urimo ae gö jabesi iohu'o jovohu'o vajiohehu ujuohoromo hevöre bahiromo enatuore oteharujoho vuonugorego hevö o enatu gagoroho va'inumoho bogojio'irajo. Èhi è'è'oho jemesi hevöhu'o enatuohu'o döhu'o uhohu'o ma-mae jio'amo'ajëjo.

²⁷ Vaevè'e jögoru öri röjëhijaruje ariböviohu'o Pharisee ariböviohu'o jemë ma-döëremu muoho ömarujëro sisërëjëvo'ajëjo. Jemesi jöho uhu'e uè'iè'ajëjo. Vuovè'e sino bahi'amarue munèho aëro ajivè'e osëro buejaho'amarue höjo nu ano'e mae jio'amoröhëgo. Buejaho'amëgo dönöho ajivè'e mabèhe jio'amo'i gagonöho vuovè'e a jabesi ijo'ahohu'o sagohohu'o èhuremu jio'amajëjo. Jemë èhi jiè'e jëvanovajëjo. ²⁸ Döhëmu mae jëvego aëro gëromo uvoruomaje höjo: Jemë a mae jëvájëjo. A'i jemesi uhoho sareri sareri'e mu sisëmu vëjaruje jëvájëjo.

²⁹ Vaevè'e jögoru öri röjëhijaruje ariböviohu'o Pharisee ariböviohu'o ma-döëremu muoho ömarujëro sisërëjëvo'ajëjo. Jö God-aro baeromo majëhinövare aribövi jabesi sino guavo'amare huoho avoho'amaruje höjo. Mu mae vaejare a mami jabesi huoho avohoromo muebejaruje höjo. ³⁰ Avohoromo mueberomo jemë uvaruje höjo: Nosi hijo miono'ehu raromare majaroho evaroho no'ö javuo'ibejajo no jabumë bogo ajëmiromo God-are jö majëhijaruje ariböviohuo muo'amo'ibejarëjo. ³¹ Iae mae-ëjo. Èhi atarujoho èho jemëro huruoho majahuiromo uöromo è'arujëjo: God-are jö majëhinövare a muo'amare aribövi jabesi ujo ömo'ömëro javuè'ëro jabesi öre gemuore jijiharue aribövie javuajëjo. ³² Jemë èhi jiè'e aribövie jëvè'e jiaje èhuni jemesi hijo miono'ehu mu sisè aevoromo vaebe rovarëhi jemesi nimarujoho jemë'o èhi jiè'e muoho vaebe jijihorëjo. Na è hesi jöho bogo uè'ejöjo. ³³ Sigobe jëvo'amajëjo. Sigobu aboji harihu'e jëvo'amajëjo. Èhi jiè'e mu vaejë'oho diehi'oromo vënöho garaedivorëjo. ³⁴ Èhuni aveho hehëjo. Jö God-aro baeromo majëhinövö'iröhe ariböviohuo simano ma'e ariböviohuo jö röjëhinövö'iröhe ariböviohuo lesu naro rëmö'ö'iramu ö'oruomo'ajëjo. Ö'iramu jemëro ioro'ioroho muo'amo'arujëjo. O korosire ano taemo'amo'arujëjo. Ioro'ioroho God rajahijaruje osare osare hisue-bi'amo'arujëjo. O amo göre jio'iramu amo göre siho ujuoho va'onövö'arujëjo. ³⁵ Èhi è'iramu èhuni ma-maemu jiè'e aribövi aehu muo'amobe rovare è hesi i'uhöho jemesi örire rue'a'ajëjo. Aevo'ioho aëro Abel a mae anoromo a ma ioro'ioroho muo'amobe ruejuvo ro ijo tugohö'ioho jemesi hijo miono'ohuro Barachiah-are harihe Zechariah anare höjo. God-are osa böörömo numëhi jio'i God-are suvuoro bahjarue maratuoho ruhëhi jiamu Zechariah è ririre anare höjo. ³⁶ Ave jöho na jö mae uè'iè'ajëjo. God-are aribövi èhi muo'amobe rovare è hesi i'uhöho aho'obèhe ave jaruvore raromaruje ariböviohuo jemëni rue'a'ajëjo.

Iesuhu Jerusalem amo rajëni vavaenimade jöhoje.

³⁷ Vaevè'e Jerusalem amo rajohumë jemëro jö God-aro baeromo majëhijaruje ariböviohuo muo'amaruje höjo. God-hu jemëni rëmö'ö'ajë ariböviohuo munëro vajëmijaruje höjo. Kököröko vëmehu harihu vivoju uhure nugo'amoromo diehehu aegëharuëhi naro jemë

ēhi gagovēvoromo gemuore rēmo'li nimo'li hijode hōjo rōhu jemēro bijōnimarije hōjo.
³⁸ Ēhuni ave jōho hehējo. God-ro jemesi amoho vuonugego jemesi sivue jēvo'iē'ajējo.
³⁹ Naro jemē'o hiro mo va'iramu jemē nasi nu ano'o ho bogo ga'a'arujējo hujeji na vuonorō'ō
 rue'iramu evare avoho geromo nasi jōho majēhiromo uvo'a'arujējo: Badare ihore rova-
 johō mabēhējo. Ēhuremu uehorovorējo.

24

Aehu God-are amo bōrōmo dadovoruomo'irōhe jō Iesuhu jōvadohoje.

¹ Ēhi uēnugoromo Iesuro God-are amo bōrōmore jioromo va'amu gavē'li hesi ijo-
 rajo ōmo'ōmohuro ro bihororomo God-are amo hesi javue gō gō rōjahi'amareje.
² Rōjahi'amamu Iesuro uēvadeje: Ave ōri ari'o ho aho'o jemē iae gavaruujējo. Rōhu aveho
 na jō mae uē'iē'ajējo. Ave munē javuoho aho'obēhe aēro dadovoruomo'iramu munēho
 ahoromo sa'aro ruvebi barē nahonahovo'ajējo.

Huē vavaeni bōrōmo ruerōhe jō Iesuhu majēhijadohoje.

³ Ēhi ē'lē'ero Iesuro Olives Dahore ajiō hijadeje. Hijamu hesi ijorajoho jaburo sivue
 ajiō hu'o raromoromo uavareje: Ave jōho majahuego no hejarējo. God-are javu masijehū
 rireromo'irōhego uōvuano ho ēho divare jio'a'ajējo. O no mu rabe garomo uvo'ejarējo:
 Jero rue'iē'anujējo. Rovego ave sa'aho bōvioho bise'o ho barē'iē'ajējo.

⁴ Barē'iē'ajējamu hegorovo Iesuro uēvadeje: Gavē'iajo. Aēro sarerēmi'iramū guaro
 rireromēvo va'a'ajējo. ⁵ Ae aho'obēhe rueromo sarerēmiromo uē'a'aruējo: Nōruare ihoro
 rovajējo. God-hu uevē'ero bōrōme namiromo ajēm'i'irode aho na jevajējo. Ēhi uēromo
 ae aho'obēhe sarerēmi'iramū uvo'a'aruējo: Mae-ēromo guaro rireromo'ajējo. ⁶ Rōhu
 he'a'arujējo muorovo jōe ruenōvo muorovonōvo'iramū he'a'arujējo. Ēhi hejē'o ho bogave
 gemu juhuonivo'irarijējo. Ōre gō bogojīē'ero ēhi jīē'e mu sisēho iae jio'a'ajējo. Rōhu
 sa'aho bōvioho bise'o ho evaroho bogo barē'li hesi majae gōro jio'a'ajējo. ⁷ Sa'ae gōero
 gōhu'o muorovonōvo a masijo ioro'iorohuro ioro'iorohu'o muorovonōvo'aruējo. Sa'ae
 gō gō iruno'e bogojio'ajējo. Sa'ae dinō'e dinō'e jiajoho hijohijiovo'amo'ajējo. ⁸ Ēhi jīē'e
 huē vavaenoho rue'iramū mu sisēho bogo burēroho barē'li magonahēhu aevoromo raho'li
 hara'uajēhi ēhi aho aevoromo huē vavaene bōrōmoho baebe va'oruomo'ajējo.

⁹ Ēhi'o'iramū evare aēro jemē guduamo ujuohēvo va'o a masijo jabesi ōvore bo-
 jēm'i'aruējo jaburo huē vavaene bojēm'i'irōhego. O muo'amēvo'aruējo. Sa'ae dinō'e dinō'e
 raromarue aribōvioho aho'obēhe jaburo uvoruomo'ajējo: Jemēro na uehorovevaruje
 hō uvoromo nue huodēgoruomo'ajējo. ¹⁰ Ēhi'o'iramū evare ae aho'obēhe nasi ōrire
 mae uehorovevaruoho vuonugo'li mue gō gō uehorovoruomo'ajējo. Aemo'aemohuro
 aemo'aemoho sarerisareriēmiromo ae gō jabesi ōvore bojēm'i'aruējo sisē vaejēvorōhego.
 Gōero gōho nue huodivorovoruomo'ajējo. ¹¹ Ae gōero gōero ri'ōromo ae sarerēmiromo
 uē'a'aruējo: Na jō God-aro baeromo majēhijaje ae jevajē uē'iramū ae aho'obēhe heromo
 mae hōromo guaro rireromo'aruējo. ¹² Mu sisē aho'o rumorovobe va'iramū gagorovo ae
 aho'obēhe gōehu gō huē baerovarue muoho vuonugo'iramū sisērē'ajējo. ¹³ Ēhi ē'oruo-
 mo'ajējo rōhu ae rahu biririvoromo mae uehorovevobe va'ojuvo maja barē'irōhe maja
 rovē'iroho God-ro baejēvoromo manō bamēvo'ajējo. ¹⁴ Rōhu God-hu bōrōme namiromo
 muebejēvaje jō maho aēro sa'ae dinō'e dinō'e majēhibe va'oruomo'ajējo ae aho'obēhe
 sama'e heruomorōhego. Jōho sa'ae aho'obēhe majēhi barē'iramū evare sa'a bōvi bise'o
 barē'irōhe majaho rue'a'ajējo.

Mu sisē bēhe ruerōhe jōhoje.

¹⁵ Rōhu Daniel jō God-aro baeromo majēhinōvade ahuro mami'e God-are surire jajivo-
 romo uōvuade hōjo: God-are osa ijumaje sisēhuro God-are osa maremu nami'a'ajējo.
 Daniel-hu jajivadēhi ēhi ga'a'arujējo ē sisēho God-are osare nami'iramū. Iesuro ēhi
 majēhijadeje. Ējō Iesuhu majēhijadoho adahoromo avo'avoho gare. ¹⁶ Amo Iesuro jō vi-
 tuoho majēhiromo uēvadeje: Sisēhuro God-are osare namijego gagorovo ave Judea sa'are
 raromaruje aribōvioharo huruomoromo dahoru'ero iojiorōne. ¹⁷ Ae rahu javu dōnō

haradare raromë'oho nadi abueromo osare inömo ho va' o ujuoho'i ma-huruomoromo va'orëne. ¹⁸ O mure raromë'oho nadi vuonorö'ö va' o niögoho ujuoho'i ma-huruomoromo va'orëne. ¹⁹ Röhu ë huë vavaeni rue'iröhe majaroho dë'e magonahohu' o aboji harihu' o inino jio'amë'e magonahohu' o jabumë vaevë'oho diehi huruomoruomo'ajëjo. ²⁰ Röhu God ua garëjo huro ajëmego ëhuro niohijo majaroho o nuho majaroho bogo huruomo'irarije hõjo. ²¹ Rabëni hesi bëho ho evare majaroho huë vavaene bogo bise' o vadu'oho rue'a'ajëjo. Èhi jië'e huë vavaenoho urimo God-hu sa'a bövi bise' o bamadevaroho bogojioe ruejuvo ro jaruvo majahu' o èhi jië'e huë vavaenoho bogohõjo. O ijonõhu' o bogojio'i ë majaho gemu bõrõmo ho jio'a'ajëjo. ²² Èhuë vavaeni maja ëgobövi jiajoho God bogo tarioromo bunemuoho bamo'ibejajo aho bogo birivoromo raromo'ibejajo. A'i God-ro hesi baejvade aribövioho uehorovëvoro mo ë majaho tarioromo bunemu bamo'ajëjo.

²³ Èhi jiamu ae göehu uëvë'oho: Aveho ro gahëjo. O arueho va' o gahëjo. God-hu uavë'ëro bõrõme namiromo ajamui'iröhe aho aviae o aruae hõ uëvë'oho nadi maho uehorovërojo. ²⁴ Èhesi bëho ho rabëniajo. Ae aho'obëhe rueromo sarerëmiromo uëbe va'a'aruëjo: God-hu uevë'ëro bõrõme namiromo ajëmi'irode aho jevajëjo o jö God-aro baeromo majëhijaje ae jevajëjo. Sarerëmiromo èhi majëhi'aruëjo. Majëhiromo bogo gavarue mu masijo masijoho vaenövo'aruëjo eni jëvego God-hu söjëvade ariböviohu' o sarerëmego rireromo'irõhego. ²⁵ Röhu hehëjo. Ijonõ jioröhe jõho ë urimo majëhijë'e jevajëjo.

²⁶ Èhu'e jiaje aehu uëvë'oho: Èhuro va' o garëjo. Aruae je'ore hijajë uëvë'oho nadi va' o garëjo. O uëvë'oho: Hu gurihoromo osaro hijajë uëvë'oho nadi maho uehorovërojo. ²⁷ A'i baderehu aruhe baderivoromo ajivo va' o anume bu'õjogo gavarujëhi God-are A Maho naro èhi ma-va'orahoro rue'iramu ge'a'aruëjo. ²⁸ Sagohe dinö'e jiajire ë ugoho gagovoruomo'ajëjo.

God-are A Maehu rueröhe jõhoje.

²⁹ Röhu ë huë vavaeni majaho barë'iramu evare maja nunoho ramoramovoromo manaeroho duorohoromo jijoho sisërë'amoromo ö'idöre inömo ho aho' o arua anumiäe va' o amo'ajëjo. ³⁰ Èhi' o'iramu evare God-are A Ma nasi ajohuro ö'idöre ajivo'iramu ga'a'aruëjo. Èho garomo sa'are aribövioho aho'obëhe nierusuburu'e bamoromo ga'a'aruëjo God-are A Maho naro darugo' o aji' o bõrõmo mae baeromo ö'idöre suere ruvebi'iramu. ³¹ Ruvebiromo hëgõho ma-darugo' o huo'iramu nasi aneraho rëmö'ö'ejõjo. Rëmö'ö'iramu ro God-hu söjëvade aribövioho gagovëvo'aruëjo. Arua anumiae sa'ae dinö'e dinö'e maja rojomajire beva'ajire jioruomajoho gagovëvo'aruëjo.

Mesehu gumutivego Jew rajo jabesi vama maja dunovaje uhu jõhoje.

³² Röhu meso hesi uhu jõho heromo bëho ho avoho uehorovërojo. Gavaruje mesoho gumutivoromo rahego garomo evare jemë uvaruje hõjo: Jew rajo nosi vama majaho iae dunovajëjo. ³³ Èhesi bëho ho jemë ga'irarije naehu uëvodëhi mue gö gö rovamu gavë'iroho uvorëjo: Èmajaho iae rovajëjo. ³⁴ Ave jõho na jö mae uë'ië'ajëjo. Ave jaruvore rarumaruje aribövioho jemë bogo vuovo barëjë'iro evare naehu uëvaje muoho aho'obëhe rue'a'ajëjo. ³⁵ Ö'idöe sa'ae bövie bise'e barë'i nasi jõho gemu bogo barë'ajëjo.

Iesuhu vuonorö'ö rueröhe maja no bogo gavarue jõhoje.

³⁶ Röhu ë majaho divare jio'irõhoho aho bogo gavarujëjo. Ö'idöre raromarue anerahu' o Harihoho na' o bogo ga'i hesi Vavuohuro gemuëro gavajëjo. ³⁷ Röhu God-are A Ma naehu a nunire rue'ië'iroho a mami ae Noah-hu hijade majare jiadëhi èhi gemuoho jio'a'ajëjo. ³⁸ Jovo bõrõmo bëhe rojomoromo öri ari'e aho' o bae'iröhe majaho dunovamu evare aëro ie jove ue'ahobe masurovobe èhi jië'e muohemu uehorovobe va'ojuvo evare Noah-mëro boat bõrõmore rumo va'are hõjo. ³⁹ Rumo va'amu gavë'i a ioro'iorohuro uvoruomade hõjo: No mae raromaruëjamu evare jovo bõrõmohuro rojomoromo jabumë aho' o bae-niagëgo barë nahonahovade hõjo. God-are A Ma naehu rue'ië'iroho èhi jië'e muoho jio'a'ajëjo. ⁴⁰ Èmajaho rue'iramu evare ae niö'iro mure ariromo muoho vae'iramu gavë'i aneraëro göho bae'i göho ë vuonug'o'aruëjo. ⁴¹ Magonahe niö'iro gemuoro ariromo ioho

sa'ijovoromo avoho'iramu aneraero göho bae'i göho ë vuonuguaruëjo. ⁴²Ëhi ë'iröhohuni ëhuni gavë'iajo. Jemesi Bada naehu rue'irode majaho jemë'o bogo gavarujëjo. ⁴³Ave uhu jöhu'o avo'avoho uehorovohëjo. Vajiohu'e aehu vahi'e divare rueröhe majaho osa arijo'oho bogo gavade höjo. Ga'ibejajo gavë'i hiromo vajiohu'e a hesi öroho tugohahego osaho bogo dadovoromo inómoho ujuoho'ibejajo. ⁴⁴Osa arijo'ohuro gavë'i hi'ibejajo mae jio'ibejajo. Jemë'o gavë'i raromorëjo. Jemë bogo uehorovë'e raromaruje majare evare God-are A Maho naro rue'ejëjo.

A börömo hesi mu aehu avoho o sisë'i mueberöhe jöhoje.

⁴⁵Aehu hesi a börömo hesi muohemu uehorovë'i simano mae uehorovoromo mu vaejaje ëhi jië'e aho uehorovohëjo. Ëa hesi a börömohuro hu uavë'e höjo. Na va'ie'ajëjo. Jero nasi mu vaejarue a ioro'ioroho muebejëvonëjo. Muebejëvoromo majae eni jiego jabesi iruno'oho i'imëminövonëjo. I'imëminövonë uanugoromo va'ë'e höjo. ⁴⁶Va'o hijuvo röhu ijönö vuonorö'ö rueromo garöhe ë ahuro hesi muoho avoho vaejaho'iramu gagorovo huë mabëhe bojami'ajëjo. ⁴⁷Huë mabëhe bojamiromo ua'ajëjo: Ja mu mae vaejanohuni ëhuni na mu börömoro bamavo'ejëjo. Jero nasi sa'ae inömo inöme bövie bise'e aho'o muebejehonëjo. Mu avo'avoho muebejë'oho iae hu ëhi ua'a'ajëjo. ⁴⁸A'i ë mu vaejahaje aho sisë jië'ohuro ëhuro uehorovoromo uvo'a'ajëjo: Nasi börömoho örisanuovajëromo ⁴⁹ri'öromo mu vaejarue aribövi ioro'ioroho muo'amoromo vörö'e jovo sisë ue'ahoruomaje ariböviohu'o gemuere hiromo ioho jovoho i'a'ajëjo. ⁵⁰Ëhi'oromo bogo gavë'e uehorovë'e hi'iramu evare hesi börömoho ma-majioho rue'a'ajëjo. ⁵¹Rueromo sino haho'oho sisë maro ijumahoromo nugö'ö'iramu sisëro va'oromo sareri sareri'e ariböviohu'o hi'a'ajëjo. Ëdirö'ore ae aho'obëhe nierusuburu'e bamoromo ane ja'ihö vuogigimoruomo'ajëjo.

25

Aborido ioro'iorehu sisë'i uehorovo'i ioro'iorehu avo'avoho uehorovare uhu jö Iesuhu jövadohoje.

¹Nasi majaho rovego God-hu böröme namiromo a diehi muebejëvo'iröhe jöho naro uhu'e majëhi'ie'ajëjo. Iae magonaho aboride aho'obëhe övo gö mine övo gö mine raromoruomade höjo. Raromoromo iroho gae ujuohoromo i'o masuvade aho biroho'i va'oruomade höjo. ²Röhu aboride övo gö mine simano sisë'i uehorovarue aborido ömo'öme jioruomo'i aboride övo gö mine ëho simano mae uehorovarue aboride jioruomade höjo. ³Simano sisë'i uehorovarue aboridoho jaburo irore biguröhe jovoho bogo ujuoho'i irohemu ujuoho va'irögoro ⁴simano mae uehorovarue aboridoho jaburo irore biguröhe huonore jovohu'o irohu'o ëhi ujuohoromo va'oruomade höjo. ⁵Ëaboridoho övo gö mine övo gö mine jaburo va'oromo muebejuvo gavare i'o masuvade aho bogo vejö'oho rovamu gagorovo nunëhëgamu hegorovo momorö'öruomade höjo.

⁶Momorö'öjuvo vahi riri'e aëro ma-darugo'o uvare höjo: Nosi aho rovajëjo. Ruehego va'oromo biroharejo. ⁷Ruehego va'oromo biroharejamu hegorovo aborido ömo'ömhuro ri'öruomoromo jabesi iroho avohu'amare höjo. ⁸Avohoromo simano sisë'i uehorovarue aboridoho jaburo simano mae uehorovarue aboridoho uëvare höjo: Jemesi jovoho gö bojamuihëjo. Nosi iroho duorohahu'amajëjo. ⁹Duorohajëjamu uëvare höjo: Bogajo. Jemë'o no'o biguvego barëjëni bogo bojëmi'ejarejo. Ëhuni va'oromo jemesi gö imohëjo. ¹⁰Imohëjamu ë aboridoho jaburo jove imo'i va'oruomade höjo. Va'oruomamu i'o masuvade ahuro rovide höjo. Rovamu iro ma avohare aboridoho jaburo ë ahu'o gemu mae osanö va'oruomade höjo masurovare söroho i'iröhëni. Osanö va'oruomamu ojoho tugohare höjo.

¹¹Ojoho tugohamu magonaho ioro'iorohuro ijore rueruomade höjo. Rueruomoromo i'o masuvade ahuni uvare höjo: Asë'e asë'e oje jiovahuego no ö'arëjo. ¹²Ö'arëjamu ruehuro uëvade höjo: Na jemë bogo gëvaje höjo. Iae na mae uëvajëjo. Ëhi'are höjo. ¹³Ëhuni gavë'iajo na divare majare rue'irodoho jemë bogo gavë'e jëvaje.

Ae niö'i gemu jabesi a börömo hesi moni ujuohoromo diehi ë'are ë hesi uhu jö Iesuhu jövadohoje.

¹⁴ Rõhu God-hu börõme namiromo muebejevõ'irõhe õri hesi uhu jõ göho aviëhi höjo. Ae gemuëro õre gö va'irõgoro hesi mu vaejharue aribõvioho uëvamu rovere höjo. Rovamu uëvade höjo: Na va'ejõjo. Jemëro nasi sa'aho bövioho bise'oho avoho muebejehorëjo. ¹⁵ Avoho muebejehorëromo mu aribõviehu mu börõme o bise'e vae'irõhoho eni jëvamu garomo ëhi hesi monioho börõme o bise'e ëhi ae gemu gemu bojamibe va'ade höjo jaburo ëho baeromo hesi muoho vaejahorõhego. A göho 5,000 kina bojami'i a göho 2,000 kina bojami'i a göho 1,000 kina ëhi bojamijade höjo. Ëhi i'imëminugoromo va'ade höjo. ¹⁶ Va'amu gavë'i 5,000 kina baejade ahuro ujuoho va'oromo mue vaeromo ëhuro 5,000 kina gö'o dõre baejade höjo. ¹⁷ 2,000 baejade aho hu'o mue vaeromo 2,000 kina gö'o dõre baejade höjo. ¹⁸ Ëhi'o'irõgoro 1,000 kina baejade ahuro va'oromo guae umoromo hesi a börõmo hesi ijo bajoho ë gurihhi bahijade höjo.

¹⁹ Ëhi'oromo raromobe va'ujuvo majae ëgobõvie barëjamu jabesi a börõmohuro vuonorõ'õ rovide höjo. Rueromo uëvade höjo: Ruehego na gëvõjo nasi ijo bajoho diehi muebejeh'e jëvego. ²⁰ Ëhi uëvamu 5,000 kina baejade ahuro 5,000 kina gö'o dõre baejadoho ëhu'o barueromo bojamiromo uavade höjo: Bada jero 5,000 kina bojemijane höjo. Aveho gavëjo. Naro mue vaeromo 5,000 kina gö'o dõre baejah'e jevajëjo. ²¹ Baejah'e jevajëjamu hesi a börõmohuro uavade höjo: Mabëhëjo. Ja mue vaejehanue a ma-mae javajëjo. Naehu ijo baje ma-bisemu bojamamu avoho muebejehanohuni ëhuni naro bövi mae bojami'ejõjo muebejeho'iranego. Rovego gemuoro nimoroho'irarëjo. ²² Gemuoro nimoroho'irarëjamu 2,000 kina baejade ahuro rueromo uavade höjo: Bada jero 2,000 kina bojemijane höjo. Aveho gavëjo. Naro mue vaeromo 2,000 kina gö'o dõre baejah'e jevajëjo. ²³ Baejah'e jevajëjamu hesi a börõmohuro uavade höjo: Mabëhëjo. Ja mue vaejehanue a ma-mae javajëjo. Naehu ijo baje ma-bisemu bojamamu avoho muebejehanohuni ëhuni naro bövi mae bojami'ejõjo muebejeho'iranego. Rovego gemuoro nimoroho'irarëjo.

²⁴ Gemuoro nimoroho'irarëjamu 1,000 kina baejade ahuro rovide höjo. Rueromo uavade höjo: Bada na mae garomo uvode höjo: Ja vörõ'e aëro javë'ëro ae göehu ba'amaroho bivaroho ja ma-ijanue höjo. ²⁵ Ëhi javë'e aego ëhuni naro ja juhuonamiromo jasi 1,000 kina bava'oromo sa'a gagore gurihhi bamode höjo. Aveho gavëjo. Jasi ijo bajoho aviae höjo. ²⁶ Aviae höjamu rue a börõmohuro ri'õromo uavade höjo: Sarerri mu bijõni'e a sisë bëhe javajëjo. Jero uvane höjo: Ae göehu ba'amaroho bivaroho nõrõro ma-ijaje höjo. Jero ëhi uvane höjo. Na mae-ëjo. ²⁷ Ëhuni ja nasi ijo bajoho baeromo avoho bahijarue aribõvi jabesi õvore bamo'ibejanëjo. Ëhi ë'ibejanëjo na rueromo nasiroho baeromo gö'o dõre bamaroho ëhu'o bae'ibejõjo. ²⁸ Ëhuni jemëro 1,000 kina ë ia hesiroho baeniahiromo 10,000 kina baej'e aho bojamihëjo. ²⁹ Ëhesi bëhoho mu vae'irane suvuore javë'oho God-ro gö'o bojami'iramu baeromo bövi mae javo'ajëjo. O bogojavë'oho bisemu baejanoho God-ro baeniahi'ajëjo. ³⁰ Rõhu ë mu bogo vaejaje aho guduamuromo babu'õhego amonõ ramoramore va'o hijajo. Ëdirõ'ore ae aho'obëhe nierusuburo'e bamoromo ane ja'ihho vuogigimoruomo'ajëjo. Ëhi uëvade höjo.

Maja viture a ma a sisë mevavuo'irõhe jõ Iesuhu jövadohoje.

³¹ Rõhu jõ göho God-are A Maho naro anerae aho'obëhe jabu'o gemu mae nasi aji'o rovë'iroho evare nasi aji'e rõho mare ajio hi'ejõjo. ³² Hi'iramu sa'ae dinõ'e dinõ'e raromare aribõvioho jaburo rueromo nasi nunire gagovoruomo'ajëjo. Gagovoruomo'iramu sheep muebejaje aehu sheep o goat adovoromo hahagu hahagu nugo'amaruëhi naro ë aribõvioho ëhi adovëvoromo hahagu hahagu rëmo'ejõjo. ³³ Hahagu hahagu rëmoromo sheep ma va'ënoho nasi õvo manõ rëmo'i goat sisë va'ënoho nasi õvo adonõ rëmo'ejõjo. ³⁴ Rëmonugoromo a börõmoho naro õvo manõ riravarue aribõvioho uë'ejõjo: Nasi Vavuohuro jemesi õrire huë mabëhe bojëmijë'e jiaje jemesi rõhoho ro baehëjo. Ërõhoho urimo sa'a bövi bise'o bamadevare huro avoho nugëhobe rovë'e höjo jemëro ë hesi aharire raromo'irarijego. ³⁵ Rabëni hesi bëhoho urimo na hõmevamu jemëro ie i'imemijarije höjo. Na huë girihevamu jemëro jovoho bojemijarije höjo. Naro ame göro jioromo õ'amu gegorovo uevarije höjo: Nosí osaro ro hijëjo. ³⁶ Niõgu rumo'e jevamu niõgoho

i'imemamu io'amode hōjo. Guomo guome baejevamu jemëro muebejevारीje hōjo. Savoji gagore hijamu jemëro rueromo gevarije hōjo. ³⁷ Gevarije hō'iramu rue aribōvi mahuro ueruom'ajëjo: Bada iae ēhi hōjo rōhu no divare gavare hōjo ja hōmavamu ioho i'imamare hōjo. Divare gavare hōjo ja huē girihavamu jovoho bojamare hōjo. ³⁸ Divare gavare hōjo ja ame gōro jioromo rovamu uavare hōjo: Nosi osaro ro hijëjo. Divare gavare hōjo niōgu rumo'e javamu niōgoho i'imamare hōjo. ³⁹ Divare gavare hōjo ja guomo guome baejevamu o savoji gagore hijamu no ò'oromo gavare hōjo. ⁴⁰ Ēhi ue'iramu a bōrōmoho naro uē'ejōjo: Aveho na jō mae uēvajëjo. Nasi ōe iho ma-bise'o jiē'oho mae avoharijohuro ēhuro na'o mae avohevarije hōjo.

⁴¹ Ēhi uēnugoromo huotorovoromo nasi ōvo adonō riravarue aribōvioho uē'ejōjo: I'ue bae'ie'e aribōvie jēvave rori'o va'ohējo. Ravemu ravaje vēni'e ōri ari'oro va'ohējo. Ēvėnoho God-ro Satan'o hesi anera ōmo'ōmohu'o ēho jabuni avohēh'e hōjo. ⁴² Rabēni hesi bēhoho na hōmevadoho jemē ioho bogo i'imemijarije hōjo. Huē girihevadoho jemē jovoho bogo bojemijarije hōjo. ⁴³ Ame gōro jioromo ō'odoho jemē bogo uevarije hōjo: Nosi osaro ro hijëjo. Niōgu rumo'e jevadoho jemē niōgoho bogo i'imemarije hōjo. Guomo guomo baejevadoho o savoji gagore hijodoho jemē bogo ro muebejevारीje hōjo. ⁴⁴ Bogo ro muebejevारीje hō'iramu rue aribōviohuro ueruom'ajëjo: Bada iae ēhi hōjo rōhu no divare gavare hōjo ja hōmavamu o huē girihavamu o ame gōro jioromo rovamu o niōgu rumo'e javamu o guomo guome baejevamu o savoji gagore hijamu garomo bogo ajami'i ma-nunēremu gavare hōjo. ⁴⁵ Ma-nunēremu gavare hō'iramu naro uē'ejōjo: Nasi ōe iho ma-bise'o jiē'oho bogo ma avoharijohuro ēhuro na'o bogo ma avohevarije hōjo. ⁴⁶ Ēhi uē'iramu ē aribōvioho sisēro va'oromo ma-ioro'io remu i'ue baeruom'ajëjo. A'i aribōvi mahuro maro va'oromo ma-ioro'io remu raromoruom'ajëjo.

26

Iesu ano'i mevare jōhoje.

¹ Ējōho majēhi barēnugoromo Iesuro hesi ijorajo ōmo'ōmoho uēvadeje: ² Iae jemē'o gavarujëjo majae niō'i hesi uhure evare God-hu Vōrō Tugohade Sōrō majaho rue'a'ajëjo. Rue'iramu aëro God-are A Maho na guduamevoromo a masijo jabesi ōvore bojēmi'aruëjo korosire ano taemevorōhego.

³ Iesuro ēhi jōvo'irōgoro rōhu evare priest masijohu'o Jew rajo a duvaho ōmo'ōmohu'o ēho jaburo priest bōrōmo ihe Caiphas-are osa bōrōmore ē ro gagovareje. ⁴ Gagovoromo jōe mevoromo uarovareje: No diehi'oromo Iesu saginiēri guduamoromo ano'ejarëjo. ⁵ Sōrō majaroho bogo guduamo'ejarëjo aëro gōromo no'o muorovoruumojōēni.

Magonahehu ridi'e oso Iesuare simanore otehade jōhoje.

⁶ Ēhi'amu Iesuro Bethany amore rueromo sino jomo'e ae Simon-are osare ro hiromo ie ijadeje. ⁷ Ie ijamu gagorovo magonahe gemuēro munē huono mabēhe baeromo rovadeje. Ēhuono gagore ridi'e osoho jiadeje. Huonore oso imarue hesi manaho bōvi mae jiadeje. Magonahuro ē osoho barueromo Iesuare simanore otehadeje. ⁸ Simanore otehamu gagorovo Iesuare ijorajoho jaburo dē vōrōnēgamu uarovareje: Osoho rabēni ēma oteho'ōjajëjo. ⁹ Ae gō jabesi ōrire imo'ibejarëjo manaho bōvi mae bae'ibejarëjo. Ēmanaho baeromo bōvi bise'o rumo'e aribōvioho suvuorēmi'ibejarëjo. Ēhi jiē'oho iae mae jio'ibejajo. Rōhu ēma oteho'ōjade hōjo. ¹⁰ Ēhi atamu hegorovo Iesuro gēromo uvadeje: Ēhi jiē'e jōho ataruēromo uēvadeje: Jemē rabēni magonahoho huē vavaenoho bojamijaruujëjo. Mu mabēhe nasi ōrire vaejev'e hōjo. ¹¹ Bōvi bise'o rumo'e aribōviohuro jemē'o raromobe jijih'o'aruëjo mae vaejēvojōro. A'i naro jemē'oho bogo hibe juvo'ejōjo ēhi avohevojōro. ¹² Ēmagonahehu oso nasi sinore bamehade hesi bēhoho nasi sinoho avohehade hōjo ēhuro aëro hure mae bamevorōhego. ¹³ Ave jōho na jō mae uē'iē'ajëjo. Sa'ae dinō'e dinō'e aehu nasi jō ma majēhibe jijih'e'iroho ē magonahehu ē'ade jōhu'o majēhibe jijih'o'aruëjo aëro hu mae uehorovoruumorōhego.

Judas-hu Iesuni Jew rajo a masijo hiruēmade jōhoje.

¹⁴ Ĕhi'amu Iesuare ijoraje 12 rōhu gemu hesi ihe Judas Iscariot-ro va'oromo priest masijoho uēvadeje: ¹⁵ Naehu Iesu jemesi ōvore bojēmijē'oho jemē ijo baje dimino'e bojemirējo. Bojemirējamu rueho jaburo ajivē'e ijo bajoho adahoromo 30 bojamijareje. ¹⁶ Bojamijamu evare Judas-ro aevoromo ōre nahadeje Iesu jabesi ōvore bojēmi'irōhēro.

God-hu Vōrō Tugohade Sōrō Iesumēhu ijare jōhoje.

¹⁷ I Dē Huaje Oso Rumo'e I ibe va'irōhe majaho aevoromo rovamu gagorovo Iesuare ijorajoho jaburo rueromo Iesu uavareje: Ja nagajoho no dinō'e va'oromo God-hu Vōrō Tugohade Sōrōho avohaho'ejarējo. ¹⁸ Ĕhi uavamu uēvadeje: Jerusalem amo bōrōmohuro va'oromo ē a hesi osaro va'oromo uarējo: No rōjahuijaje ahuro uvajējo: Nasi majaho dunovajējo. Ĕhuni naro jasi osare ō'oromo God-hu Vōrō Tugohade Sōrōho nasi ijorajoho jabu'o gemu mae i'ejōjo. Ĕhi uarējo. ¹⁹ Ĕhi uarējamu rue ijorajoho jaburo Iesuhu uēvadēhi Ĕhi ē'oromo sōrōho avohareje.

²⁰ Ĕhi'amu vahiromadeje. Vahiromamu gagorovo Iesuro hesi ijoraje 12-ho jabu'o gemuere hijadeje ē ioho i'irovo. ²¹ Hiromo ioho ijē'i uēvadeje: Ave jōho na jō mae uē'iē'ajējo. Jemē ae gemuēro na bijōnegarue aribōvi jabesi ōvore bojēmi'anuejo. ²² Bojēmi'anuejamu hegorovo uehore gō gō bōrōme baeromo ae gemuēro gemuēro uavareje: Na bogo Ĕhioho ē'ejōjo. Na na mae uavajējo. ²³ Mae uavajējamu hegorovo uēvadeje: Naehu i hevōre ba'amo'ego hu'o gemuore ba'amaje ahuro ē mu sisēho vae'a'ajējo. ²⁴ God-are surire jajivarēhi hesi A Maho na Ĕhi guomevo'ajējo. Rōhu na bijōnegarue aribōvi jabesi ōvore bojēmi'irōhe aho vae'v'ōho sisērē'ajējo. Ĕaho bogo raho'ibejajo Ĕhuro mae jio'ibejajo. ²⁵ Mae jio'ibejajamu Judas Iesu bijōnimarue a jabesi ōvore bojēmi'irōhe ahuro uavadeje: Na bogo Ĕhioho ē'ejōjo. Na mae-ējo. Na mae-ējamu uavadeje: Jero jasi jōvanuējo.

Sino'o kō'o aevoromo ijare jōhoje.

²⁶ Ĕhi'amu ioho ue'ahoromo Iesuro ioho baeromo God mae uanugoromo ato'atovoromo hesi aribōvioho suvuorēmiromo uēvadeje: Baeromo ihējo. Aveho nasi sine hōjo. ²⁷ Ĕhi'onugoromo enatuore jovoho baeromo God mae uanugoromo bojēmiromo uēvadeje: Jemē ae aho'obēhe enatuore jovoho baeromo ihējo. ²⁸ Aveho nasi kōe hōjo. Ae aho'o jemesi jōēni kōho rovevoromo guomevo'ajējo Ĕhuro sisēho mu'uvēhorōhego. Guomevo'iramū Ĕhuro God-hu muebejēvo'irōhe jōgoroho marē'ajējo. ²⁹ Rōhu aveho hehējo. Na ijoho ō'i bajo jovoho bogo i'ejōjo hujeji Ĕho majaho rovego evare jemē'o na'o nasi Vavuehu muebejaje ōri ari'ere raromoromo ō'i bajo jovo i'oho ue'ahorōhēni. ³⁰ Ĕhi uēnugoromo God rajahjarue jōho ionugoromo suorovo va'oromo Olives Dahorure iojiomareje.

Peter-hu Iesu gavaje jō a subivēhorōhe jō Iesuhu majahijadohoje.

³¹ Iojomoromo Iesuro hesi aribōvioho uēvadeje: Jaruvo vahire ae aho'obēhe nasi ōrire mae uehorovevarujoho vuonugo'i remo va'a'arujējo. Ĕhesi bēhoho God-are surire jōho jajivoromo uvē'e hōjo: Sheep muebe'amaje aho God naro ano'ejōjo. Ano'iramū huhu muebe'amade sheep-oho jaburo arua anumiae va'o'amo'ajējo. God-are jō jiajēhi Ĕhi remo va'a'arujējo. ³² Remo va'iramū guomoromo ri'ōnugoromo naro urimo Galilee va'ejōjo. Jemē ijore ō'a'arujējo. ³³ Ĕhi uēvamu Peter-ro ri'ōromo uavadeje: Nani a ioro'ioroho jasi ōrire uehorovaruoho vuonugo'i ramo va'a'arujējo rōhu na bogo Ĕhioho ē'ejōjo. ³⁴ Bogo Ĕhioho ē'ejōjamu Iesuro Peter uavadeje: Ĕhi uevanuējo rōhu ave jōho na jō mae ua'iē'ajējo. Jaruvo vahire kōkōrōkoho bogo urimoho uvē'e jero urimo vae niō'i gemu ae uē'a'anuējo: Na Iesu bogo gavaje hōjo. ³⁵ Ĕhi uē'a'anuējamu hegorovo Peter-ro uavadeje: O na bogo Ĕhioho ē'ejōjo. Aehu anegamu ja'o gemuore guomo'iē'iroho na bogo Ĕhioho majēhi'ejōjo. Bogo majēhi'ejōjamu ijorajo ioro'ioroho aho'o jabu'o Ĕhi gemuoho Iesu uaruomadeje.

Iesuhu Gethsemane sa'are hiromo God-are ōrire Ĕninamijade jōhoje.

³⁶ Ĕhi'amu Iesuro ōri ari'o ihe Gethsemane hesi aribōviohu'o rovadeje. Rueromo uēvadeje: Avehuro raromohego na aruēre va'oromo God-are ōrire jōe jōvōjo. ³⁷ Ĕhi uēnugoromo Peter'o Zebedee-are harihoho niō'i jabu'o sō ujuohe va'oromo huē vavaene

böröme baeromo nurunurumadeje. ³⁸ Nurunurumoromo uévadeje: Na sisë maro huë vavaene baejevajëjo. Èhuro guomevo hesi hõjo. Èhuni nadi momorõ'õ'i ma-nune jioromo avoho mueberovë'e raromohëjo. ³⁹ Èhi uëngoromo rori'o va'oromo sa'are behumoromo nu ano'oho sa'are amoromo God èninamiromo uavadeje: Apo jasi õrire õre gö javë'oho i'ue huë vavaene nasi õrire rovajoho ahego na bogo bae'irõjo. Rõhu naehu nimajoho nadi è'i jaehu nimanuëhi èhi è'onëjo.

⁴⁰ Èhi èninaminugoromo vuonorõ'õ rueromo gavade hesi ae niõ'i gemu momorõ'õjumu gëgorovo Peter uavadeje: Majae ma-bunemu nune jioromo na'o gemuoro mueberovë'e raromo'irarijoho jemë diehi'oromo bogo eni jëvajëjo. ⁴¹ Nune jioromo mueberomo èninamihego God-ro ajëmego Satan-ro bogo dinëmego èhuro bogo bejëvo'irajo. Jemesi aru'ahoho mu mae vae'i nimo'i jemesi sino haho'oho u'uhë'e hõjo.

⁴² Èhi uëngoromo rõhu maho va'oromo èninamiromo uavadeje: Apo õre gö bogojavo'i i'uehu huë vavaenehu nasirire ruejõro nimë'oho iae èhi è'onëjo. ⁴³ Èhi uanugoromo vuonorõ'õ rueromo gavade jabumë nunëhimo'amo'ego momorõ'õjumu gëgorovo ⁴⁴ rëmõ'i vuonorõ'õ va'oromo urimë'i vae niõ'i èninamijade jõe gemuoho rõhu maho èninamijadeje. ⁴⁵ Èninaminugoromo rueromo hesi aribõvioho uévadeje: Jemë diehi'oromo nuhoromo ma-momorõ'õemu momorõ'õjarujëjo. Gahëjo. Majaho mami'e rovë'e hõjo. Aëro God-are A Maho na bijõnegarue aribõvi jabesi õvore bojëmi'ie'ajëjo. ⁴⁶ Ri'õromo go va'ohego va'arëjo. Gahëjo. Na bijõnegarue a bojëmi'irõhe aho rovajëjo.

Iesu guduamare jõhoje.

⁴⁷ Èhi uëvamu gavë'i Judas rovadeje. Iesuare ijoraje aho'obëhe 12 rõhu Judas hu'o jabesi ae gemuoho jiadeje. Judas rovamu ae aho'obëhe mae siravae kepatae ujuohoromo hu'o rueruomadeje priest masijohu'o Jew rajo a duvaho õmo'õmohu'o èho jaburo rëmõ'õj'ëro jje'ëro. ⁴⁸ Rõhu è hesi urimo è sareri'e aho Judas-ro è aribõvioho uévadeje: Ga'irarije naro di aho dudõhamu gavë'oho uvorëjo: Iae Iesu hõromo guduamorëjo. ⁴⁹ Judas-ro èhi uëvë'ëro huro rueromo ma-burëro ro Iesu uavadeje: Bada vaevë'ëromo dudõhadeje. ⁵⁰ Dudõhamu uavadeje: Isi jasi nimanue muoho vaejëjo. Èhi uavamu aëro rueromo Iesu guduamareje. ⁵¹ Guduamamu gagorovo ae gemu Iesuare bëhire namijadohuro hesi kaejõho jijõromo priest börömo hesi nu maejaje aho anoromo hia'oho tariõ'õjahadeje. ⁵² Tariõ'õjahamu gagorovo Iesuro uavadeje: Jasi kaejõho sionoro vuonorõ'õ ba'amëjo. Ae rahu kaejõehu o bijehu bunehu muorovë'oho kaejõhuro bijohuro bunohuro muo'amëvo'iramumu vuovëvo'ajëjo. ⁵³ O jaehu a ananue hesi bëhoho nani jero uvanuëjo: Nõrõhu hesi Vavu ua gavë'oho bogo ajamiromo anerae aho'obëhe mae gemuore jioruomajoho rëmõ'õ'iramumu ruerumoromo na ajemi'aruëromo èhuni aho ananuëjo. ⁵⁴ Rõhu naro hu ua ga'ibejõjo God-are surire jajivarëhi muoho bogo èhioho jio'ibejajo. Èhuni ajemi'irõhe jõho Vavuho bogo ua ga'ejõjo.

⁵⁵ Iesuro èhi uanugoromo è rueruomade aribõvioho uévadeje: Aveho na bogo vajio-hu'e anano'e aehu jevajëjo. Jemë rabëni siravaho kepataho ujuohoromo guduamevo'i rovarujëjo. Mami'e majae aho'o naehu God-are amo börömore hirono God-are jõ hesi õri a røjëhinõvodoho jemë evaroho bogo guduamevarije hõjo. ⁵⁶ Rõhu avevejõ'e vaejaruje mue aho'o hesi bëhoho urimo jõ God-aro baeromo majëhinõvare aribõviohuro God-are surire jajivoromo uvare hõjo: Èhi jje'e muoho jio'a'ajëjo. Jabuhu jajivarëhi èhi jiorõhego èhuni ave muoho rovë'e hõjo. Èhi uëvamu hesi ijoraje aho'obëhe hu nugo'i huruomoromo va'areje.

Iesu Jew rajo a masijo jabesi nunire namijade jõhoje.

⁵⁷ Èhi'amu gagorovo Iesu hu'irae rueromo priest böröme Caiaphas-are osare rovareje. Rueromo gavareje jõgoru õri røjëhijarue aribõviohu'o a duvaho õmo'õmohu'o è gemuoro gagovë'e jiamu. ⁵⁸ Iesu priest börömo hesi osare barovamu Peter-ro arue riribõvire Iesu rihioromoromo priest börömo hesi osare rovadeje. Rueromo osare rumo va'oromo abo osa ririre ruë numë javue vae'i riroho ma-va'oraho nugarire è va'oromo priest hesi mu vaeruomaje aribõviohu'o gemuore hijadeje diehi'aruoho garõhëni. ⁵⁹ Èhi'amu priest

masijohu'o a masijo ioro'iorohu'o ae nahareje sarerivoromo ěma huruoho majěhiromo uěrōhego: Iesuro ěhi jiě'e mu sisěho vaejumu gavare hōjego heromo Iesu anego guomorōhego. ⁶⁰Nahoromo bogo birohareje. Ae gōěro gōěro rueromo Iesuare jō sarerivoromo majěhijaroho bogo eni jioěe va'ujuvo huějei ae niō'iro rueromo ⁶¹jōe gemuoho majěhiromo uěvareje: ěiahuro uvavohijajo: God-are amo bōrōmo dadovoromo majae niō'i gemu hesi uhure rōhu maho vae barě'irodoho na eni jevājějo. ějō sisěho uōvuamu hejare hōjo.

⁶²ěhi majěhijamu hegorovo priest bōrōmohuro ri'ōromo Iesu uavadeje: Na ja jō mana uō'iranoěo bogojavājějo. Aehu jasi jō sisě majahuijaruoho na ěho mae o sarere hōjo. ⁶³Mae o sarere hōjumu Iesuro jōrume namijadeje. Jōrume namijamu priest bōrōmohuro uavadeje: God birivoromo hijaje a hesi nunoro ave jōho ma-maemu uevego na hejōjo. Bōrōme namiromo ajamuijanue aho na ja javājějo. Na ja God-are Harihe javājějo. ⁶⁴Javājějumu uavadeje: Jaehu uevanuěhi iae ěhi jevājějo. Rōhu naro jemě ae aho'oběhe ave jōho uěvājějo. U'emu jeměro ge'a'arujějo God-are A Maho darugo eni jiě'e A hesi ōvo manō hi'iramumu. Ō'idōre jio'amaje suehu'o gemu mae ruvebi'iramumu. ⁶⁵ěhi uavamu hegorovo rue priest bōrōmohuro hesi niōgoho dadovoromo uěvadeje: Huro God-are ihoho ijumājějo. A gōho raběni rueromo hesi jōho huruoho majahuijōrajo. Iae no eni heĵě'e javuājějo. God-are iho ijumajoho jemě iae hejarujějo. ⁶⁶ěhuni jemě diehi uehorovarujějo. Diehi uehorovarujějumu uavareje: Jō sareri'e aego ano'iramumu guomo'a'ajějo.

⁶⁷ěhi uanugoromo Iesuare nu ano'ere saběro ōdivoromo ōvo mugō mugōěro anoruumadeje. O ōvo hitahiěro anoromo ⁶⁸sivoromo uavareje: Jero uvanuějo: Na bōrōme namiromo ajěmaje aho jevājějo. ěhi jiě'e javaje jōho God-aro baeromo huruoho majahuiromo anagade a hesi ihoho uōvuego no hejarějo.

Peter-hu Iesu gavaje jō a subivěhade jōhoje

⁶⁹ěhi'amu Peter-ro amonō aehu raromaruire ě hijadeje. Hijamu gagorovo mu ajamijaje magonahe gemuěro rueromo uavadeje: Ja'o Galilee sa'a rajo ae Iesu'o gemu mae javade hōjo. ⁷⁰Javade hōjumu Peter-ro ae aho'oběhe jabesi nunire magonahoho sareramiroromo uavadeje: Jaehu jōvanue jōho na dadivevo avohājějo. ⁷¹ěhi uanugoromo aribōvioho ě rěmo'i ojo běhire va'adeje. Va'amu magonaho gōěro Peter garomo hesi běhire riravarue aribōvioho uěvadeje: Ave iaho Nazareth amo rajo ae Iesu'o gemu mae jiade hōjo. ⁷²Jiade hōjumu heĵě'i Peter-ro rōhu maho sareramadeje. Sareramiroromo uavadeje: God-are nuniro na mae uavājějo. ěaho na bogo gavaje hōjo. ⁷³ěhi uavadoho ririvanovamu běhire riravarohuro ro Peter uavareje: Iae mae-ějo Iesuare aribōvi jabesi ae gemuoho javājějo. Jasi huěre heromo ěhuni uavaruějo. ⁷⁴Uavaruějumu Peter-ro uěvadeje: Na jemě sarerěmijě'oho i'ue baejōěni ěhuni na jō mae uěvājějo. ěaho na bogo gavaje hōjo. ⁷⁵Bogo gavaje hōjumu gavě'i kōkōrōkoho uvadeje. Uvavamu hegorovo Peter-ro uehorovoromo uvadeje: O mami'e Iesuro uevade hōjo: Kōkōrōkoho bogo urimoho uvě'e jero urimo vae niō'i gemu ae uě'a'anuějo: Na Iesu bogo gavaje hōjo. ěhi uehorovoromo amonō hōrō va'oromo sisě maro nivadeje.

27

Pilate-are nunire namijōro Iesu bava'are jōhoje.

¹Iae sisonuvo'ia'amu gagorovo priest masijohu'o Jew rajo a duvaho ōmo'ōmohu'o ě aribōvioho aho'oběhe jaburo gagovoromo jōe mevoromo uarovareje: No ěhi ěhi ě'ějarějo Iesu guomorōhego. ²ěhi mevoromo eni jiamu gagorovo Iesu tōvoromo bava'oromo gavana Pilate-are ōvore bamareje.

Judas-hu hesi arijo'arěje anorovade jōhoje.

³ěhi'amu Iesuni hiruěmiromo a jabesi ōvore bojěmade aho Judas-ro gavade Iesuare jōho court-roho beĵě'e jiamu gagorovo uvadeje: Na mae ě'ajě'i sisě ě'ě'e jevājějo. Sisě ě'ě'e jevajě uvonugoromo ajivě'e ijo baje aho'oběhe 30 ujuohadoho vuonorō'ō ujuoho va'oromo priest masijohu'o a duvahohu'o bojěmi'iě'adeje. ⁴Bojěmi'iě'oromo uěvadeje: Naro mu

sisë ë'l'ë jevajëjo. Naro a mahuni jemë hiruëmiromu hu jemesi övore bojëmijë'e jevajëjo anego guomoröhego. Ëhi uëvamu uavareje: Ëho bogo nosi muehu höjo. Jero jasi ganëjo. ⁵ Ëhi uavamu hejë'l'i ijo bajoho God-are osare bu'önugoromo jabumë rëmo va'oromo ö'ëro sönöre benugoromo vioruhirovoromo guomadeje.

⁶ Ëhi'amu priest masijohuro ijo bajoho ujuohoromo uarovareje: Ave ijo bajoho guomoröhe a hesi manaho höjo. Ëhuni God-ni moni bahijaruire ë bahijë'oho sisë höjo. ⁷ Jöho mevonugoromo eni jiamu gagorovo ijo bajoho ujuohoromo sa'aho imareje sa'a ioro'iorore jioromo rovare aribövioho vuovëvego ë guavo'amoröhëni sa'a ihoho Rama Avoho'amaje A Hesi Sa'aho jië'ëro. ⁸ A guomoröhe manaho baeromo ë sa'aho imë'ëro ëhuni ë sa'aho Kö Rovade Sa'aho jumuvároho jaruvoho hesi ihoho ëhije.

⁹ Röhu jö God-aro baeromo majëhinövade ae Jeremiah-hu Iesuare mana ujuohoromo sa'a imoruomoröhego urimo uëvadëhi ëhi ë'areje. Amo Jeremiah-ro uëvadeje: Jabumë ajivë'e ijo bajoho aho'obëhe 30 ujuohare höjo Israel rajohuro monie ëmino'e hu imoröhëni uvë'ëro. ¹⁰ Ijo bajoho ujuohoromo Badahu na uëvadëhi ëhi rama avoho'amaje a hesi sa'ahuni bu'öruomade höjo. Jeremiah-ro ëhi uëvadeje.

Pilate-hu jöe gö gö Iesu ua hejade jöhoje.

¹¹ Amo Iesuro gavanare nunire namijamu gavanaro uavadeje: Na ja Jew rajo jabesi a börömoho javajëjo. Javajëjamu Iesuro uavadeje: Ëjöho jero jasi jövanuëjo. ¹² Jövanuëjamu priest masijohu'o a duvahohu'o ëho jaburo Iesuare jö sisëho gavana huruoho majahijareje. Majahijamu Iesu bogo mana uavadeje. ¹³ Bogo mana uavamu Pilate-ro Iesu uavadeje: Rueho jabuhu jasi jö sisë aho'obëhe majehijaruoho na ja hejanuëjo o bogajo. ¹⁴ Bogajamu Iesuro jöho bogo mana majahijadeje. Bogo majahijamu rue a börömohuro tiö avohadeje.

Iesu anego guomojoro Pilate-hu uëvade jöhoje.

¹⁵ Röhu God-hu Vörö Tugohade Sörö maja rovë'iroho savoji gagore raromarue aribövioho di aho jiovo nugö'öjoro aehu uvoruomë'oho Pilate-ro ë aho jiovo nugö'önövadeje. ¹⁶ Röhu ae gemu hesi jö sisë ae aho'obëhe hemu hejaruoho ë aho savoji gagore hijadeje. Hesi ihoho Iesu Barabbas jiadeje. ¹⁷⁻¹⁸ Röhu Pilate-ro gëromo uvadeje: Iesuare ihoho bövie jië'ego ë ariböviohuro dë vörönëgamu nasi övore bojëmijare höjo. Bojëmijare hö uvoromo gavade ae aho'obëhe gagovorovë'e jiamu gëgorovo uëvadeje: Jemë nëgajoho na di aho jiovoromo bojëmi'ejöjo. Na na Iesu Barabbas jiovo nugö'ö'ejöjo. O na na Iesu göho Keriso hö uvarujoho jiovo nugö'ö'ejöjo. ¹⁹ Ëhi uënugoromo röhu Pilate-ro court-re hiromo jöho hejamu evare hesi vaborohuro jöe nugö'öromo uavadeje: Ëaho sisë rumo'e ae jiaje ëhuni hesi öriroho nadi bövioho bise'oho ë'onëjo. Jaruvo vahi'e naro niavoromo Iesu nia'ovoro garomo huë vavaene börömo bëhe baejode höjo.

²⁰ Jöho ëhi rovamu gavë'l'i Jew rajo priest masijohu'o a duvahohu'o ëho jaburo ae aho'obëhe biririvoromo dinëmiromu uëvareje: Jemëro uvohëjo: Barabbas jiovo nugö'ö'i Iesu anohëjo. ²¹ Ëhi uëvamu Pilate-ro ae aho'obëhe uëvadeje: Ëae niö'ioho jemë nëgajoho na di aho jiovoromo bojëmi'ejöjo. Uavareje: Barabbas-ajo. ²² Barabbas-ajamu uëvadeje: Ëhi jië'oho Iesu Keriso na diehi'ö'ejöjo. Ae aho'obëhe uvoruomadeje: Korosioro anego guomajo. ²³ Guomajamu uëvadeje: Rabëniajo. Diehi jië'e mu sisë vaejë'e höjo. Vaejë'e höjamu ae aho'obëhe ma-darugo ma'e uvo'i arijareje: Korosioro anego guomajo. ²⁴ Ëhi uvamu hegorovo Pilate-ro gavade hu jö jövajoho bogo eni jio'i aribövioho muorovo'ia'amu gëgorovo vuonugo'i jovoho baejadeje. Jovoho baeromo ae aho'obëhe jabesi nunire övoho eguadeje. Övoho eguoromo uëvadeje: Na övo uno'e ae jevajëjo. Ëia hesi kö rumo'e jevajëjo. Jemesi garëjo. ²⁵ Jew raje ae aho'obëhe uvoruomadeje: Iae mae-ëjo. Nosi övore nosi ujo jabesi övore ë ia hesi köho javuobe va'a'ajëjo. ²⁶ Köho javuobe va'a'ajëjamu Pilate-ro ejëhoromo Barabbas jiovo nugö'öjadeje. Barabbas jiovo nugö'ö'i Iesu hisuebijoro ae uënugoromo uëvadeje: Ave aho bava'oromo korosioro anohego guomajo.

Muorovo ariböviehu Iesu sivare jöhoje.

²⁷ Guomajamu rue gavanare muorovo ariböviohuro hesi osa börömore Iesu bava'oromo muorovo a ioro'iorohu'o gagovoromo Iesu ruë numë numareje. ²⁸ Numonugoromo hesi niögoho jijövaho'i a masijehu kavuë'e niögu ëgo io'amoromo mu vaejarue ëhi jië'e niögoho ba'amahareje. ²⁹ Ba'amahoromo a masijehu bosö didi'arue ëhi jië'e bosöho Iesuare simanore didi'ahareje. Röhu bogo inömo maho baeromo bosöho avohaho'i bibë'e ijo hisuoho ujuohoromo huoromo simanore ba'amahareje. Ba'amahonugoromo a masijehu inömo ma-mabëhe ma'eno raromaruëhi jië'e inömo ho övore bamahareje. Röhu bogo inömo maho bamaho'i ma-ijahemu övore bamahareje. Bamahoromo hesi nuninö ro ague aho raromoromo sivoromo uavareje: Jew rajo jabesi börömo ho vaevë'e hijanuëjo. ³⁰ Hijanuëromomo sabëro ödivoromo ijahoho baeniahiromomo hesi simanore anareje. ³¹ Ëhi sivoromomoro niögu ëgoho jijövaho'i hesi niögu maho io'amahoromo hu'irae bava'areje korosire ano taemo'i.

Iesu korosire ano taemare jöhoje.

³² Bava'oromo örire va'ihö gavare Cyrene amo raje ae gemu hesi ihe Simon rovamu gagorovo övëro bijimö'öromomo uavareje: Ave a hesi korosioho baeromo va'ëjo. ³³ Baeromo va'ëjamu ejëhoromo baeromo jabumë aho'o va'aroho ajiomoromo sa'a ihe Golgotha nosi huëhu huotovë'oho simano gijo va'ëne sa'are ë ajio suovareje. ³⁴ Suorovonugoromo wine jovohu'o ajuo'e jovohu'o buaroharoho Iesu bojamiareje hesi vi'ehoho bisemu u'uhoröhego. Bojamijamu i garomo juahëmadeje.

³⁵ Juahëmamu korosire ano taemareje. Ano taemoromo hesi niögoho adovoromo ajajovoromo ujuohareje. ³⁶⁻³⁷ Röhu Iesuare jö sisë jajivaroho hesi simano namore korosire ano taemareje. Jajivoromo ëhi uvë'e jiadeje: Ave aho Iesu Jew rajo jabesi a börömo ho höjo. Ëhi'onugoromo sa'are raromoromo hu muebejareje. ³⁸ Ëhi'o'irögoro röhu aëro anano'e vajiohu'e ae niö'i jabu'o korosire ano taemëvoromo göho ruëhi Iesuare övo manö göho viëhi övo adonö ëhi amëvareje.

³⁹ Ëhi'amu aëro rova'ë'i uvene hijihijiovoromo sivoromo ⁴⁰ uvoruomonövadeje: Asë'e sareri ae javajëjo. Jero uvane höjo: Naro God-are osa börömo ho dadovoromo majae niö'i gemu hesi uhure röhu maho vae barë'ejöjo. Ëhi uvë'e javaje ëhuni ja God-are Harihe javë'oho jasi arijo'arije ajamirovoromo korosire javajoho ruvebijego bogo guomavajo. ⁴¹ Jabuhu sivarëhi priest masijoho jögoru öri röjëhijarue aribövioho a duvaho ömo'ömo ho ëho jabu'o ëhi sivoromo uarovareje: ⁴² Ëahuro uövuade höjo: Naro a ioro'ioroho ajëmege marëjëvaje höjo. Ëhi uövuade höjo röhu hesi sino ajamirovë'oho hu bogo eni höjo. Huro uövuade höjo: Israel rajo jemesi börömo ho na jevajëjo. Ëhuni nadi'ego hu korosire jioromo ruvebijego no garomo mae uehorovarëjo. ⁴³ Röhu ave jöhu'o huro uövuade höjo: God-ro na muebejevaje höjo. Hu uvaje höjo: Na God-are Harihe jevajëjo. Ëhuni nadi'ego no ga'irarëjo God iaho nimoromo ajamijego o bogo ajamijego. ⁴⁴ Ëhi uarovamu gavë'i hesi bëhire vajiohu'e ae niö'i korosi'o amëvare aho jabu'o ëhi sivoromo jöe gemuho uavareje.

Iesu guomade jöhoje.

⁴⁵ Ëhi'amu majae ririre öri ari'e aho'o ramoramovadeje. Ramoramovobe va'ojuvo majae huotorovamu ajivadeje. ⁴⁶ Majae huotorovoromo ajivamu Iesuro Jew rajo jabesi jöëro madarugo'o uvadeje: Eliajo. Eliajo. Lema sabaktaniajo. Nosi jöehu huotovë'oho God nasi Böviohajo. God nasi Böviohajo. Ja rabëni remo va'ane höjo. ⁴⁷ Remo va'ane höjamu bëhire riravare a ioro'iorohuro Elia uvavamu hegorovo uarovareje: Eliaj-ni uvajëjo. ⁴⁸ Ëhi uarovoromo ae gemuëro ma-burëro tutuvo va'oromo u'uhë'e inömo ho barueromo nioga'i'e wine jovore ba'amoromo rumorovamu ioromo ijaho viture bijiohoromo Iesu bojami'ie'adeje. ⁴⁹ Bojami'ia'amu a ioro'iorohuro uarovareje: Nadi'ego no ga'irarëjo Eliaj-ro hu ajami'i rovego o bogo rovego. ⁵⁰ Ëhi uarovamu Iesuro röhu maho jö'e dadovoromo guomadeje.

⁵¹ Guomamu God-are osa börömo ojo göho gagonö jiajoho niögöhu tugoharoho aro-rovo ruvebijadeje. Sa'aho hijihijiovamu munëho arorovo'amadeje. ⁵² Arorovo'amamu huoho tögömoromo jiorovo'amamu God-are aribövie vuovëvade ioro'ioroho aho'obëhe

i'ovo'amadeje. ⁵³ I'ovoromo suorovoromo Iesu ri'øjamu evare va'oromo God-are osa börömo jiaje amore va'o ae aho'obêhe jabesi nunire rueruomamu garuomadeje.

⁵⁴ Röhu Iesu guomamu gagorovo muorovo simano vaejaje ahu'o ë hesi ariböviohu'o riravoromo Iesu muebejarohuro gavare sa'aho hijiohijiovoromo mue gö gö jiamu garomo sisë maro juhuonivoromo uvareje: Iae mae-ëjo. Ave aho iae God-are Harihe jiade höjo. ⁵⁵ Èhi'amu magonahe aho'obêhe arue riribövire riravoromo Iesu diehi'aruoho garuomadeje. Urimoho ë magonahoho jaburo Galilee jioromo Iesu ajamibe hesi ijore ijore rovareje. ⁵⁶ Mary Magdalene o Mary göho James o Joseph jabesi vëmoho o Zebedee-are harihu jabesi vëmoho o magonaho ioro'ioroho ëhi jioruomadeje.

Iesuare sino munë gagore bamare jöhoje.

⁵⁷ Iae majae garobole bamamu bövie bisele eni jië'e ae gemu hesi ihe Joseph-ro rovadeje. Hesi amoho Arimathea jio'i hu'o Iesuare ijoraje jiadeje. ⁵⁸ Èhi jië'ëro huro va'oromo Pilate uavadeje: Uevego na Iesuare sinoho bae'iröjo. Bae'iröjamu Pilate-ro ae uëvadeje: Va'o sinoho ave aho babojamego bava'irajo. ⁵⁹ Babojamamu Joseph-ro baeromo niögu i'ohuro numadeje. ⁶⁰ Numoromo Joseph guomego hesi sino bamo'iröhëgo uvadire Iesuare sinoho ë bamadeje munë gage i'e ubuvë'ëro jië'ëro. Bamoromo munë börömoho höhö baruerimo ojoho tugohonugoromo va'adeje. ⁶¹ Èhi'amu Mary Magdalene'o Mary göhu'o Iesu bamarire ë nunoho bamoromo ëhi arijareje.

Iesu bamarire atovare jöhoje.

⁶² Èmajaho Friday jiadeje. Friday jiamu momorö'öjë'ëro sisonuvamugo Jew rajo priest masijohu'o Pharisee ömo'ömohu'o rueromo Pilate'o gagovoruomadeje. ⁶³ Gagovoromo Pilate uavareje: Gavanajo. Iesu hu sareri sareri'e ae jiade höjo. No uehorovoromo uvaruëjo: Mami'e hu bogo guomë'e hijadevare evare sareramuiromu uövuade höjo: Guomoromo majae niö'i gemu hesi uhure i'ovoromo ri'ö'ejöjo. ⁶⁴ Èhuni ae uëvego huoho tugohoromo majae niö'i gemu ëhi atovo'irarëjo. Èhesi bëhoho no juhuoninaguajëjo Iesuare ijore ijore jijiharue ariböviohuro hure va'oromo hesi sinoho vajiohöro baeromo ae aho'o sarerëmiromu uëjöëni: Iaho guomoromo ri'öjë'e höjo. Èhi jië'e sareri'e jö atë'oho ëhuro urimo Iesu mae uövuajëromu aribövioho ma-bisemu sisërërovaroho avevejö'oho ri'öjade jöho mae höromo börömo bëhe sisërërovo avoho'aruëjo. Èhuni huoho avoho tugohojöro naguajëjo. ⁶⁵ Tugohojöro naguajëjamu Pilate-ro uëvadeje: Muorovo aribövioho ujuoho va'ego atovo'irarëjo. Huoho diehi tugoho'i uehorovarujëhi ëhi tugoho garëjo. ⁶⁶ Èhi uëvamu va'oromo tugohoromo sivaëro badihi taemareje. Taemoromo muorovo aho ë nugo'amareje huoho atovoröhëgo.

28

Iesu ri'øjade jöhoje.

¹ Iae Jew rajo nuho majaho barëjamu nëröho hura börömoho sisonuvo'ië'adeje. Sisonuvo'ia'amu Mary Magdalene'o Mary göhu'o jaburo niö'iro Iesu bamaroho ga'i va'areje. ² Va'amu sa'aho hijiohijiovadeje. Èhesi bëhoho Badare anerae gemuëro ö'idöre jioromo ruvebiromu Iesu bamoromo ojo tugohare munëho höhö bava'adeje. Bava'oromo ë munë döre hijadeje. ³ Amo anera hesi nu ano'oho baderivoromo ajivajëhi ëhi jiadeje. Hesi niögohu ajivoromo sa buso va'ëne jiadeje. ⁴ Èhi jiamu gagorovo muorovo aribövie munë muebejarohuro ëho garomo juhuonivoromo butubutumoromo sa'are rireromoromo vuovë'e ahuro momorö'öjanovadeje.

⁵ Èhi'amu magonahoho jaburo rovamu gagorovo anerahuro uëvadeje: Nadi juhuonivo-hëjo. Na gavajoho jemë korosire anamu guomade a hesi sinoho naharujëjo. ⁶ Hu aveho bogohöjo. Guomoromo ri'öröhëni uëvadëhi ëhi ë'ë'e höjo. Ro hesi sinehu raromade sionoho gahëjo. ⁷ Garomo ma-burëro va'oromo hesi ijorajo ömo'ömohu uërëjo: Iesu guomoromo ri'öjë'e höre. Huro urimo Galilee sa'are va'iramu jemëro ijore ö'oromo

ga'a'arujëre. Ave naehu uëvaje jôho uehorovorëjo. ⁸Ëhi uëvamu hegorovo juhuonivë'i sisë maro nïmorohoromo hure jïoromo tutuvoromo Iesuare ijorajoho jôho majëhi'i va'areje.

⁹Va'amu gavë'i Iesuro birohëvadeje. Birohëvoromo uëvadeje: Vaevë'e jëvajëjo. Vaevë'e jëvajëjamu rueromo hesi hôroho guduamoromo rajahijareje. ¹⁰Rajahijamu uëvadeje: Nadi juhuonivohëjo. Va'oromo nasi ö ömo'ömo ho uërëjo: Galilee sa'aro va'orëjo. Iae na ë ge'a'arujëjo. Ëhi uërëjo.

Iesuare sino atovare aribövïehu priest jô majëhijamu priest jabuhu nijïo'iraejëvade jôhoje.

¹¹Ëhi uëvamu va'areje. Magonahoho jaburo va'irôgoro muorovo a ioro'ïoro Iesuare sino muebejarohuro amo bôrömore vuonorö'ö va'areje. Va'oromo priest masijoho uëvareje: No hu muebejaroho ëhi ëhi jiade höjo. ¹²Ëhi majëhijamu hegorovo priest masijohuro uëvareje: Jew rajo a duvahohumë ro gagovohëjo. Gagovohëjamu gagovorovoromo jôho mevoromo avohonugoromo ijo bajo bôröme muorovo aribövïoho suvuorëmiromo ¹³uëvareje: Jemëro ae majëhiromo uënövorëjo: Vahi'e noro momorö'ö'i bogo gavamu Iesuare ijore ijore jijiharue aribövïohuro sinoho vajiohëro bava'ë'ëro ëhu'ëro Iesuare huoho gagemu höjo. ¹⁴O momorö'öjarije jö gavanahu hejë'oho noro hu sanuami'ejarejo. Sanuami'ïramu hu huë vavaenoho jemesi öriroho bogo bojëmi'ajëjo. ¹⁵Ëhi uëvamu hegorovo rue muorovo aribövïohuro ijo bajoho ujuohoromo Jew rajo a masijehu ae majëhiröhego uëvarëhi ëhi majëhibe jijihonövareje. Ëhi majëhibe jijihonöv'ëro ëhu'ëro Jew raje ae aho'obëhe ë jôho atarueje.

Iesuhu hesi aribövïi jebesï nunire rovade jôhoje.

¹⁶Iae Iesuare ijoraje 11-ho jaburo Galilee sa'are va'oromo Iesuhu birohëvo'iröhëni uëvade dahorure ë iojiomareje. ¹⁷Iojiomoromo hu garomo rajahijareje. Röhu ijorajo ioro'ïorohuro uvareje: Na aveho Iesu höjo o ae gö höjo. ¹⁸Ëhi'amu Iesuro bëhire rueromo uëvadeje: God-ro nasi örire daruge bojëmijë'e höjo mue aho'obëhe ö'idöre o sa'are jïo'amajoho naro muebe'amo'ïrodego. ¹⁹Ëhuni sa'ae dinö'e dinö'e va'oromo ae aho'obëhe ajëmibe jijihorego jabu'o nasi ijore ijore jijihö'ïrarëjo. Ëhi ajëmiromo Vavu hesi ihoro Harihu nasi ihoro God-are Aru'aho hesi ihoro bapataeto vaejëvobe jijihorëjo. ²⁰Bapataeto vaejëvoromo naehu mu rabe rabe bojëmodoho ëho rjöhëbe jijihorego jaburo nasi jôho ejeho'ïrarëjo. Ëhi ë'ïramu naro jemë'o gemu mae juvemu juvobe va'ïramu sa'ae bövie bise'e barë'ajëjo.

MARK

Bapataeto vaejaje ae John-hu jö majëhinövade jöhoje.

¹ God-are Harihe Iesu Kerisohu mu mae barovade jöho na jajivo'ië'e. Èmu ma aevadoho ëhi jiadeje. ² Mami gö'e hu bogo rovadevare evare jö God-aro baeromo majëhinövade ae Isaiah-ro ë mu maehu sa'are rueröhe jöho God-are surire jajivadeje. God-hu Keriso-are örire jövade jöho jajivoromo uvë'eje:

Ave aho God nasi jö bajuvaje aho höjo.

Ja va'ie'iroho naro hu urimo nugö'ö'iramu va'oromo ae uë'a'ajëjo jaehu va'irane öroho iogoro'iröhego.

³ Aëro a rumo'e sa'are hiromo ma-darugo'o uvo'a'ajëjo:

Badahu rueröhe öroho avohorego hu maro rue'irajo.

Hesi öroho ahorirëro vajivorego hu maro juvo'irajo.

⁴ Èhi ë'iröhego Isaiah-hu jajivadëhi iae ëhi John-ro ijönö rueromo a rumo'e sa'are ro hijadeje. Hiromo aribövioho rueruomo'ego bapataeto vaejëvoromo jöe majëhinövadeje. Majëhiromo uënövadeje: Uehoro sisëho vuonugo'i uehoro mae baeromo bapataeto vaehego God-ro jemesi sisëho uehorovoromo vuonugëhajo. ⁵ Èhi'ego Jerusalem amo rajoho aho'obëhe o Judea sa'a ioro'iorore raromarue aribövioho aho'obëhe ëho jaburo rueruomonövadeje. Rueromo jabesi sisëho huruoho'ego John-ro Jordan jovore bapataeto vaejëvonövadeje.

⁶ Röhu John niöge camel mi uehu avohë'e niögu sisëho ruohoromo mi sinehu avohë'e götaho dë'ahore ba'amoromo juvonövadeje. O hesi ioho hu guajuguaue vuome ëhi ibe juvonövadeje. ⁷ Röhu hu jöho ëhi uënövadeje: Ae gö nasi ijönö rue'ie'ajëjo. Huro na iosiremiromo börömoho höjo. Naehu hesi mu bise'o vaejahoromo uruho'amoromo höru sino jiovaho'ibejodoho o mu bise'o bise'e rabe vaejaho'ibejodoho röhu na ma-bise'e jevajëjo. ⁸ Na ma-jovëremu bapataeto vaejëvë'e jevajëjo. A'i ë ahuro God-are Aru'ahohuro bapataeto vaejëvo'ie'ajëjo.

Iesu bapataeto vaejamu Satan-hu dinamijade jöhoje.

⁹ John-ro ëhi jië'e muoho vaejamu Iesuro Galilee sa'are Nazareth amore jioromo rovadeje. Rueromo uavamu John-ro ë Jordan jovore bapataeto vaejadeje. ¹⁰ Bapataeto vaejamu gagorovo Iesuro jovore jioromo rojo ionire nami'i gavadeje ö'idöho arorovo'ego God-are Aru'ahë guaho va'ënohuro hesirire ruvebijamu. ¹¹ Ruvebijamu gavë'i ae aho'obëhe hejareje ö'idöre uvavamu: Ja nasi Harihu mabëhe javajëjo. Na ja garomo ehuro nasi dë vövöbajo'oho nimorohevajëjo.

¹² Èhi uvamu gavë'i God-are Aru'ahohuro darugo'e jöho Iesure dë vövöbajo'ere bojamamu huro ri'öromo a rumo'e sa'a göre ajiomadeje. ¹³ Ajiomamu huro God-are jöho ahojoro Satan-ro hesi dëho bijioho ga'i hijadeje. Bijioho ga'i hijamu je'o mi sisë jioruomajinö ë hijadeje röhu aneraëro ajamareje. Èhi'obe va'adoho majae 40 barëjadeje.

Iesuhu uëvamu visu suovarue ae 4 jabuhu aevoromo hesi ijore ijore jijihare jöhoje.

¹⁴ Èhi'amu aëro John guduamo bava'oromo savoji gagore ba'amareje. Savoji gagore ba'amamu evare Iesuro Galilee sa'are ajiomoromo God-are jö maho majëhinövadeje.

¹⁵ Majëhiromo uënövadeje: God-are maja börömoho rovë'e höjo. Jemë iae ga'ie'arujëjo God-ro böröme namiromo muebejëvego. Èhuni uehoro sisëho vuonugo'i God-are jö maho mae uehorovohëjo.

¹⁶ Èhi'oromo iae Galilee e'u riröre juvadeje. Juvo'i gavadeje Simon'o Andrew'o ö'o ö'o visue suovarue aëro jëvë'ëro viöho jovore ba'amamu. ¹⁷ Viöho jovore ba'amamu gëgorovo uëvadeje: Nasi ijoro ijoro ruhëjo naro röjëhijego jemëro bogo visuoho gagovo'i a'i ae magonahe gagovëvego nasinö jioruomö'iröhe höjo. ¹⁸ Èhi uëvamu hejë'i jaburo viöho ëhi vuonugo'i aevoromo hesi ijore ijore jirehonövareje.

¹⁹ Ĕhi'amu Iesuro ma-bisemu va'anovo'i gavadeje Zebedee-are harihe niö'i James'o John'o ö'o ö'o jabesi boat gagore arijamu. Ariromo jabesi viöho sigohijamu gëvë'i ²⁰ uvëvadeje: Ruehëjo. Ruehëjamu hegorovo jaburo jabesi vavue Zebedee hesi mu vaejarue ariböviohu'o gemu mae boat-re hijajoho vuonugo'i aevoromo Iesuare ijore ijore jirehonöväreje.

Satan-are aru'aho sisë ae gemu hesi dëre jiamu Iesuhu rarovö'öjade jöhoje.

²¹ Ĕhi'oromo Iesumëro rue Capernaum amore va'areje. Va'oromo God-are nuho majaho rovamu Iesuro God rajahijarue osare va'oromo God-are jö bëhoho røjëhijadeje. ²² Røjëhijamu heromo tiöromo uvoruomadeje: Hesi jöho darugo'e jö ma-mabëhe javavajëjo. Ĕhi uvoruomade hesi bëhoho Jew rajo jögoru öri røjëhijarue ariböviehu røjëhijarëhiohu hu bogo ëhiohu majëhi'i a'i hesi birire baejë'ëro jöho majëhijadeje.

²³ Jabumëro ëhi uvoruomamu röhu evare majare Satan-are a sisëhu dëre abuejë'e aho ë osare hijë'ëro ma-darugo'o uvadeje: ²⁴ Iesu Nazareth rajoho ja rabëni sihusihuaguo'i rované höjo. Na ja ijumavuo'ie'anuejo. Na iae ja gavajëjo. Na iae ja gavajëjo. Ja God-aro jioromo rovë'e a ma-maemu jië'e ae javajëjo. ²⁵ Ĕhi uavamu hejë'i uavadeje: Jöho vuonugo'i höröjëjo. ²⁶ Höröjëjamu hejë'i uhure a sisëhuro ë a hesi simanoho huotovahamu bijöbijövoromo övo'o hör'u'o ajiomadeje. Övo'o hör'u'o ajiomamu a sisëhuro jö'e dadovoromo höröromomo va'adeje. ²⁷ Höröromomo va'amu ë ariböviohu aho'o tiöjëvadeje. Tiöromo berohoromo uarovareje: Aveho mu rabe höjo. No bogo hejarue jöho jövajëjo. Ĕiaho daruge baejë'ëro ëhu'ëro huhu jö bojëmijë'oho aru'aho sisëho jabu'o ejaharue höjo. ²⁸ Ĕhi'amu Iesuhu vaejaje mu hesi jöho ë Galilee sa'are raromaruoho aho'o hebe va'areje.

Iesuhu guomo guomo'e ae aho'obëhe ajëmade jöhoje.

²⁹ Ĕhi'amu Iesumëro God rajahijarue osare ë jioromo va'areje. Va'oromo Iesuro James'o John'o gemu mae va'oromo Simon'o Andrew'o arijarue osare rovareje. ³⁰ Röhu Simon-are jure magonaho hesi sino haho'oho vörö'iraejamu röhore raromë'e jadeje. Raromamu Iesuro osare rovamu gavë'i ë ariböviohuro uavareje: Ave magonahoho guomo guome baejë'e höjo. ³¹ Baejë'e höjamu hegorovo Iesuro rueromo övore ma'enoromo banigojomadeje. Banigojomamu sino haho'ere vörö'iraejadoho u'uhadeje. Vöröho u'uhamu hegorovo magonahohuro ri'öromo iruno'e avohëhadeje.

³² Avohëhë'ëro majae beva'amu gagorovo aëro guomo guomo baejë'e ariböviohu aho'o Satan-are a sisëhu dëre abue'amë'e ariböviohu aho'o ëhi ujuoho rueruomadeje. ³³ Amo raje ae aho'obëhe rueromo Simon-are ojanore gagovoruomadeje. ³⁴ Gagovamu Iesuro guomo guome gö gö baejë'e ae aho'o jabesi sinoho avohëhoromo aru'aho sisëho aho'o a jabesi dëroho rarovö'öjëvonövadeje. Rarovö'öjëvoromo ë aru'aho sisëho uënövadeje: Jöe nugohëjo. Nadi nasi jöho huruohohëjo. Iesuhu ëhi jië'e jö jövade hesi bëhoho ë aru'aho sisëho jaburo gavë'ego hu ëhi jië'e ae jiamu garuomë'ego ëhuni jövadeje.

Iesuhu Galilee sa'are jö majëhibe juvade jöhoje.

³⁵ Ĕhi ë'ë'ëro sisonuvo'i titimamugo Iesuro ri'öromo va'o a rumo'e sa'are hiromomo ë parie vaejadeje. ³⁶ Parie vaejamu Simon-mëro Iesu nahobe rovareje. ³⁷ Nahobe rueromomo bihoromomo uavareje: Ae aho'obëhe ja nahavaruejo. ³⁸ Nahavaruejamu Iesuro uëvadeje: Ruehego no amo göre göre va'arëjo naro God-are jöho amo ioro'iorohu'o majëhi'irode höjo. Ĕhesi bëhoho na ëhi ë'irodëro rovode höjo. ³⁹ Ĕhi uëngoromomo va'oromo God-are jöho Jew rajehu God rajahijarue osare va'areje majëhibe Satan-are aru'aho sisëho a jabesi dëroho rarovö'öjëvobe ëhi'obe Galilee sa'ae böviohu juvo barëjadeje.

Iesuhu sino jomo'e a ajamade jöhoje.

⁴⁰ Ĕhi'amu iae sino jomo'e ae gemuëro rueromomo ague aho hiromomo ëninamiromomo uavadeje: Ja nasi sino avoheho'iranoho ja eni javajëjo. Ĕhuni jasi nimoromomo ajemijë'ohuro iae ajemi'anuejo. ⁴¹ Ajemi'anuejamu Iesuro huni vavaenimoromomo övoho nugö'öromomo sinoho rehahoromomo uavadeje: Iae na negajëjo ajami'iro. Marëjëjo. ⁴² Marëjëjamu gavë'i jomoho rireromomomo hesi sinore sisë sisëho barëjadeje. ⁴³ Barëjamu gavë'i Iesuro hu

nugö'oromo darugo'e jöho uavadeje: ⁴⁴ Aveho hejêjo. Nadi aho uênêjo. A'i ma-va'iranoho jasi sinoho priest röjahego ga'irajo. Êhi'ego Moses-hu uövuade êhi jiê'e suvuoroho God-are öroro bojamego aëro garomo uvo'irarêjo: Jasi sinore sisêho barêjê'ëro iae mae javajêjo. ⁴⁵ Êhi uavamü rue ahuro Iesuare jöho bogo ejaho'i va'oromo Iesuhu ajamade jöho ae majêhibe juvadeje. Ae majêhibe juvamu ae aho'obêhe hebe va'amu Iesuro urimo ê'onövadêhi amore amore ma-va'orahoro juvo'iê'oromo gavade ae aho'o hu ga'i tagavamü gëgorovo vuonugo'i a rumo'e sa'are va'o hijadeje. Hi'ego ae aho'obêhe dinö'e dinö'e jioromo hu ga'i ruenövareje.

2

Övo höru'e vuovahê'e a Iesuhu ajamade jöhoje.

¹ Êhi'amu iae majae gemu niö'i barêjamü gagoro Iesuro Capernaum amore vuonorö'ö rovadeje. Rovamu ae aho'obêhe hejare uvamu: Iesu hesi osare hijajê uvamu hegorovo ² rueromo ê gagovoruomadeje. Gagovoruomamu röhe aho'obêhe osaho ojanoho rarovo barêjadeje. Rarovo barêjamü huro God-are jöho majêhijadeje. ³ Majêhijamü evare ae êhi niö'i êhi niö'i jaburo övo höru'e vuovahê'e aho maratuore giojimo barue'i a ioro'iorohuro ma-namijêho rovareje. ⁴ Rueromo Iesuare bêhire rue'iê'oromo gavare ae aho'obêhe tagavoromo röhohe rarovê'e jiamü gagorovo javu dönö ba'ojiomoromo Iesuare simano namonö dadovareje. Dadovoromo maratuohu'o êhi nume osare ba'amareje. ⁵ Ba'amamu Iesuro gavade i'e rovere ariböviohuro hu mae uehorovoruomamu gëgorovo övo höru'e vuovahê'e aho uavadeje: Harihêjo. Jasi sisêho uehorovoromo vuonugoromo mu'u barêjahê'e höjo. ⁶ Mu'u barêjahê'e höjamü hegorovo Jew rajo jögoru öri röjêhijarue a ioro'iorohuro ê raromoromo jabesi simanëro uehorovoromo uvoruomadeje: ⁷ Asê'ëjo. Ave aho rabëni êhi jiê'e jöho jövajêjo. Êhi jiê'oho huro God-are ihoho ijumajêjo. Hu ma-ae höjo. Röhu huro ê aho uavajêjo: Naro jasi sisêho uehorovoromo vuonugoromo mu'u barêjahê'e jevajêjo. Êhi jiê'e muoho hesi God-ro gemuëro vaejare höjo. Ma-aho bogajo. ⁸ Êhi uehorovomu Iesuro hesi dê vövöbajo'ëro gëromo uvadeje: Jabumê êhi uehorovaruëromo uëvadeje: Jemê rabëni uehore gö gö baejarujêjo. ⁹ Jemê'o uehorovohêjo. Ave övo höru'e vuovahê'e aho nani ja êma ua'a'anuêjo: Jasi sisêho uehorovoromo vuonugahê'e hö ua'a'anuêjo. Ja êhi ua'ibejanêjo aho nunoho bogo ga'ibejarêjo ja mae o sarere jövê'e javego. Röhu ja bogo êma ua'a'anuêjo: Ri'öromo jasi maratuoho banigojioromo nami juvêjo hesi guomo guomoho bogo barêjêjo ja javojagojöhëni. ¹⁰ Röhu ê bogo êma jövo'ibejane jöho iae na jövo'ejöjo huro ejehoromo ri'ö nami juvego jemêro ê muoho garomo êhuro ga'irarijêgo God-are A Maho naro sa'are hijajire evare sisê mu'uvaje darugoho êhu'o baejê'e jevego. Êhi uënuigoromo röhu övo höru'e vuovahê'e aho uavadeje: ¹¹ Naro ja uavajêjo: Ri'öromo raromanue maratuoho banigojioromo baeromo jasi osahuro va'êjo. ¹² Va'ëjamü hejê'i ruehuro ri'öromo maratuoho ma-burëro banigojioromo baeromo ae aho'obêhe jabesi nunire höröromo amonö va'adeje. Höröromo va'amu gagorovo ê ariböviohuro aho'obêhe tiö'i God rajahiromo uarovareje: Asê'ëjo. Êhi jiê'e mu börömohe urimoho no bogo gavare höjo.

Levi-hu Iesuare ijore ijore juvoröhego Iesuhu uavade jöhoje.

¹³ Êhi'amu iae Iesuro amore jioromo va'oromo röhu maho Galilee jovo e'u riröre va'adeje. Va'amu ae aho'obêhe ijore va'oromo hesi bêhire gagovoruomadeje. Gagovamü gagorovo jöho röjêhijadeje. ¹⁴ Röjêhi barënuigoromo va'adeje. Va'i gavade tax baejaje ae hesi ihoho Levi Alphaeus-are harihohe hesi mu vaejaje osare hijamü gagorovo uavadeje: Rueromo nasi ijoro ijoro juvonövonêjo. Juvonövonêjamü hegorovo ri'öromo aevoromo Iesuare ijore ijore juvonövadeje.

¹⁵ Êhi'amu Iesumëro Levi-are osare ie ue'ahamü evare tax baejarue ae aho'o sisê aribövie aho'o urimo Iesuare ijore ijore jijihonövê'ëro jiê'ëro êhu'ëro êho jaburo rueromo Iesu'o hesi ijorajo ömo'ömo'u'o gemuoro ioho ue'ahareje. ¹⁶ Ie ue'ahamü gëgorovo Pharisee aribövie Jew rajo jögoru öri röjêhijarue ariböviohuro gavare Iesuro sisê ariböviohu'o tax

baejarue ariböviohu'o ëho jabu'o gemu mae ie ijamu gatorovo hesi ijorajo ömo'ömo ho uëvareje: Asë'ëjo. Hu rabëni tax baejarue ariböviohu'o sisë a ioro'ioro hu'o gemuoro ho hiromo ioho ijajëjo. Èhi jië'oho sisë höjo. ¹⁷Èhi jië'oho sisë hö uvavamu hegoro vo Iesuro hu'o heromo ë Pharisee ariböviohu' uhu'e uëvadeje: Jemëhu nasi aribövi ëhi uëvarujoho rõhu guomo guomo'e ariböviohu' remu doctor gavarue höjo mae jëvë'e ariböviohu' bogajo. Èhesi bëhoho naro sisë ariböviohu' nasinö jëvojöro uë'i rovode höjo ma-döemu mae jëvë'e ariböviohu' bogajo.

Bëhoho rabëni Iesuare ariböviehu i bogo vuonugare jöhoje.

¹⁸Èhi'amu iae John-are ijore ijore jijiharue ariböviohu'o Pharisee ariböviohu'o ëho jaburo God uehorovo'i ioho vuonugareje. Ioho vuonugamu aëro rueromo Iesu uavareje: John-are jö o Pharisee jabesi jö hejarue ë ariböviohu' jaburo ioho vuonugarue höjo. Rõhu jasi ariböviohu' rabëni bogo ëhioho ioho vuonugarue höjo. ¹⁹Rabëni bogo ëhioho ioho vuonugarue höjamu hegoro vo Iesuro uëvadeje: Nasi ijore ijore jijiharue ariböviehu i bogo vuonugarue hesi bëhoho naro uhu'e uë'ië'ajëjo. Na jemëro uvarujëjo: I'ö masu'iröhe a hesi söröre rueromo aemo'aemëro ioho vuonugo'aruëjo. Bogo ëhioho jio'i a'i i'ö masuröhe aehu jabu'o hijajevare evare ioho ue'aho'aruëjo. ²⁰Rõhu majae ionö i'ö masuröhe aho aëro guduamo bava'iramu evare ioho vuonugo'aruëjo. Avejë'öho naro jabu'o hijë'ego jabu ioho bogo vuonugo'aruëjo.

Jew rajehu gororovo'iröhe jögoru mamiohu'o Iesuhu barovade mu i'ohu'o bogo gemuore havo'iröhe jöhoje.

²¹Èhi uënugoro mo Iesuro uhu jöe gö'o majëhiromo uëvadeje: Niögu i'ohu'o mamiohu'o bogo havo'anuëjo. Bogo havoromo niögu mami dadovadiroho niögu i'ö hesi vituoho baeromo niögu mami hesi gatoroho bamoromo sigohi'anuëjo i'ohuro duduhiorovoromo mamioho ruho barovego dadovego gagoho böviraëjëni. ²²O wine jovo mi sino gagore bigu'ie'iroho jovo i'ohu'o mi sino mamiohu'o bogo gemuoro ho havoromo jovo i'ohu'o mi sino mamiroho bigu'anuëjo. Èhi ë'ibejanëjo jovohuro gatovoromo ögohuro bibivoromo mi sinoho mamiëro jië'ëro tögömoromo ioro'io remu dadorovego jovoho rova'ö barë'ibejajo. A'i jovo i'ohu'o mi sino i'ö hesi gagoremu bigu'anuëjo.

Jew rajehu nuharue maja hesi jöhoje.

²³Iae Jew rajo nuho majaho rovamu gatorovo Iesumëro mure jijihareje. Jijihoro mo hesi ijorajo ömo'ömo hu'o ioho babovoromo ue'ahobe va'areje. ²⁴Babovoromo ue'ahobe va'amu Pharisee aribövieho Iesu uavareje: Asë'e jaruvoho nuho majae höjo. Jasi ijorajo ömo'ömehu i avoharuoho ëho nuho maja hesi jögoroho aharuëjo. Jabumë rabëni ëhi jië'oho ë'aruëjo. ²⁵Èhi uëvamu Iesuro uëvadeje: David nosi a bööröme jionövade höjo. Rõhu hu'o hesi ariböviohu'o ie bogojëvoromo hömëvamu huhu ë'ade jö God-are surire adaharijoho ëho diehi'oromo bogo avoho uehorovarujëjo. ²⁶Abiathar priest bööröme jiadevare evare David-ro God-are osa mare va'ade höjo. Va'oromo God-are nunire bahijare ioho ujuohoro mo vituoho i'i vituoho hesi ariböviohu' i'imëmamü ue'ahare höjo. Èhi jië'e ioho bogo aho ue'aho'i hesi ma-priest-ëremu ue'aho'iröhe ie höjo. Rõhu jabuhu ue'aharohuro ëhuro jögoroho ahare höjo. Rõhu ë hesi jöho bogojade höjo. ²⁷Èhi uënugoro mo uëvadeje: God-ro nuho majaho bamë'e höjo ae ajamui'iröhëro. Bogo aho bamavuade höjo nuho maja hesi jöho e'iröhego. ²⁸Èhu'ëro God-are A Maho naro nuho maja hesi jögoroho ëhu'o muebejaje höjo.

3

Övo guomahë'e a Iesuhu ajamade jöhoje.

¹Èhi'amu iae Iesuro God rajahijarue osare rumo va'adeje. Amo ë osare övo hitahi guomahë'e aho hijë'e jadeje. ²Hijamu gatorovo aëro ë raromë'ëro Iesuare jö sisëho nahoromo uvareje: Iesuhu ë a hesi övo avohëhë'öho noro a masijoho huruoho majëhiromo uë'ëjarëjo: Iesuro a ajamaje muoho vaeromo nuho maja hesi jögoroho ahade

höjo. Ëhi uvoromo jabumëro ma-hu gemu ërimahareje ga'iro nuho majare huro ë a hesi övoho avohahego o bogo. ³Ërimahamu Iesuro övo guomahë'e aho uavadeje: Ave a nunoro rovëjambu rovadeje. ⁴Rovamu hu bijönimoromo ërimaharuoho uëvadeje: Nosi jögoroho diehi höjo. Nuho majaroho na ae mae vaejëvo'ëjarëjo o sisë vaejëvo'ëjarëjo. I'ovëvo'ëjarëjo o muo'amoe'ëjarëjo. Ëhi uëvamu rue ariböviohuro ma-jörumoraëjareje. ⁵Jörumoraëjambu Iesuro uvadeje: Ëaribövioho hia'i biriri'e aribövie jiorumajë uvoromo huë vavaeni böröme baeromo dë vörönimamu uherihoromo ë aribövioho gëvadeje. Gënuogoromo övo guomahë'e aho uavadeje: Jasi övoho nugö'öjëjo. Ëhi uavamu hegorovo övoho nugö'öjambu marëjadeje. ⁶Marëjambu gagorovo rue Pharisee ariböviohuro suorovo va'oromo sa'are a böröme Herod nimarue ariböviohu'o gemu mae gagovoromo Iesu anoröhe jöho mevoruomadeje.

Ae aho'obëhe e'u riröre raromare jöhoje.

⁷Ëhi'amu Iesuro hesi ijorajo ömo'ömohu'o gemu mae ë amore jioromo va'oromo Galilee e'u riröre abuejadeje. Abuejambu ae aho'obëhe mae Galilee sa'are jioromo hesi ijore rueruomadeje. ⁸Rueruomamu rue Jerusalem amore Judea sa'a ioro'iorore jioromo arue Idumea sa'are jioromo ruhe Jordan jovo ioro'ioro gönö jioromo nume Tyre amo'o Sidon amo'o jiajinö ë ae aho'obëhe jioromo Iesuhu mu masijo vaejaje jöho hegorovo hesi örire rueruomadeje. ⁹Rueruomamu gëgorovo Iesuro uvadeje: Ae aho'obëhe jioruomë'ëro nani jabumëro na tatijimevoruomö'ajë uvoromo hesi ijorajo ömo'ömohu'o uëvadeje: Boat harihe avohehego na ë hi'iröjo. ¹⁰Röhu Iesuro hu tatijiomoröhe jö uehorovade jasi bëhoho huro ae aho'obëhe avohëvamu mae jio'amë'ëgo guomo guomo'e aho aho'obëhe göëro gö bijimö'öbe iosiramirovobe rue'ië'areje hu rëhego mae jëvoröhego. ¹¹O Satan-are aru'aho sisë a jabesi dëre raromaroho ëho jabuhu Iesu gavë'iroho hesi nuninö behumorovo'amoromo ma-darugo'o uvonövareje: Ja God-are Harihe javajëjo. ¹²God-are Harihe javajë'ëgo Iesuro ë aru'aho sisëho uënvadeje: Jöe nugohëjo. Na rahu jëvajoho bogave aho huruoho majëhi'irarijêjo.

Iesuhu hesi ijoraje aho'o 12 baejëvade jöhoje.

¹³Ëhi'onugoromo iae Iesuro dahorure ajiomoromo hesi baejëvo'i nimade aribövioho uëvadeje: Ruehëjo. Ruehëjambu rovareje. ¹⁴Rovamu ae aho'obëhe 12 baejëvadeje hu'o gemu mae raromo jijihö'iröhego. O rëmö'öjêgo hesi jöho ae majëhibe jijihö'iröhego. ¹⁵O Satan-are ariböviohu a dëre jioruomajoho uëvego suorovoromo va'oruomoröhego. ¹⁶Röhu baejëvade aribövi jabesi ihoho ëhi jëvadeje. Simon baejadeje. Röhu Iesuro iho göho Peter jumuvadeje. ¹⁷Röhu Zebedee-are harihe niö'i James'o John'o ö'o ö'o baejëvadeje. Röhu Iesuro jabumë niö'i ihe Boanerges jumëgadeje. Jabesi jöho Boanerges iho bëhoho nosi jöho vajerehu anajëhi ëhi jëvë'e ae jëve. ¹⁸Röhu Andrew Philip Bartholomew Matthew Thomas o Alphaeus-are harihe James o Thaddaeus o Simon ëhi baejëvadeje. Röhu Simon hu Jew rajehu jabesi mueberovo'i nimade aho jiadeje. ¹⁹O Judas Iscariot hu'o baejadeje. Judas Iscariot hu ijönö Iesuni hiruëmimoro a jabesi övore bojëmi'iröhe aho jiadeje.

Iesuhu Satan-are aribövi a dëre jio'amamu rarovö'öjëvadoho hu bogo Satan-are darugoho baeromo ëhihoho ë'adeje. Ëhesi jöhoje.

²⁰Ëhi'onugoromo Iesu va'oromo hesi osare hijadeje. Hijambu ae aho'obëhe mae röhu maho hu ga'i ro gagovamu ëhuro Iesu'o hesi ijorajo ömo'ömohu'o i ue'aho'iröhoho bogo eni jëvadeje. ²¹Bogo eni jëvamu hesi aganohuro ëho heromo uvareje: Nani Iesuale simanoho sisërëjahë'e höromo hu guduamoromo hu'irae bava'i rovareje.

²²Ëhi'amu Jew rajo jögoru öri röjëhjarue ariböviohuro urimo Jerusalem jioromo rovë'ëro atoromo uvonövareje: Iesu hu Beelzebul aru'aho sisë dëre jiajëjo. Sisë a börömohuro vöröho bojamijêgo ëhuro a dëre aru'aho sisëho rarovö'ö'amaje höjo. ²³Rarovö'ö'amaje höjambu hegorovo Iesuro uëvadeje: Ruehego na jöe majëhijöjo. Majëhijöjambu rovamu uhu'e uëvadeje: Diehi'oromo Satan-ro hesi aru'aho sisëho rarovö'öjëvojöro uvarujëjo. ²⁴Sa'ae gemuehu adovoromo jabesi arijo'arije muorovë'oho ë sa'aho bogo

biririvo'li barërovo'ajëjo. ²⁵ O agane gemuehu adovoromo jabesi arijo'arije muorovë'o'ho ë aganoho bogo biririvo'li barërovo'ajëjo. ²⁶ Èhuni Satan-ro ri'öromomo hesi ariböviohu'o muorovo'ibejajo hesi darugoho uehoroho muoho bogo biririvo'li barë'ibejajo.

²⁷ Röhu aehu darugo'e a hesi osare rumo va'oromo hesi mae sisë ujuohaho va'ië'iroho bogo ëma ujuohaho va'irögoro urimo darugo'e aho guduamoromo tövonugoromo evare hesi inömo inömo ujuohaho va'a'ajëjo. Naro Satan ëhi ruahö'öjaje höjo.

²⁸ Ave jöho na jö mae uë'ië'ajëjo. Aehu mu sisë vaejë'o'ho God-are iho ijumarue jö sisë atë'o'ho aho'o God-ro uehorovoromo vuonugëho'ajëjo. ²⁹ A'i God-are Aru'aho hesi iho ijumë'o'ho ëhi jië'e jö sisëho God bogo mae bogo uehorovoromo vuonugo'i ë mu sisë vaejë'o'ho ë hesi i'uoho ma-ioro'ioere gemu baeruomoma'ajëjo. ³⁰ Iesuhu ëhi uëvade hesi bëhoho ë ariböviohuoro atoromo uvareje: Aru'aho sisëro Iesuare dëre abuejë'e höjo.

Iesuare vëmu ömo'öme ö ömo'öme rahumë jëvaje jöhoje.

³¹ Èhi'amu iae Iesuare vëmohu'o ö ömo'ömohu'o rovareje. Rueromo amonö riravoromo Iesuro ruejoro jöe nugö'öjareje. ³² Jöe nugö'öjamu Iesu ririre hi'li ae aho'obëhe ruë numë raromomo rova'o rojomë'ëro uvareje: Hë-ajo. Jasi vëmohu'o ö ömo'ömohu'o ja ga'li nimoromo amonö ro riravarüejo. ³³ Riravarüejamu uëvadeje: Jemë uehorovarujoho nasi vëmoho ö ömo'ömoho di aribövioho jioruomajëjo. ³⁴ Èhi uëngoromo uherihoromo ruë numë raromomo rova'o rojomarue aribövioho gëromomo uëvadeje: Aveho gahëjo. Aruëroho nasi vëmohu'o ö ömo'ömohu'o jëvajëjo. ³⁵ Ae rahu God-hu nimaje mu vaejë'o'ho ëhuro ë aribövioho nasi öe ma'ine vëme jioruomajëjo.

4

Aehu i ujo sa'a mare sa'a sisëre riremado uhu jöhoje.

¹ Èhi'amu iae Iesuro röhu maho e'lu riröre va'o hiromomo jöho röjëhijadeje. Röjëhijamu ae aho'obëhe ro tagavamu Iesuro jovore boat gagore va'o hi'li ae aho'obëhe jovo riröre raromareje. ² Jovo riröre raromamu Iesuro uhu jöe majëhiromomo ëhuro jöe aho'obëhe röjëhijadeje. Röjëhiromomo uëvadeje: ³ Jöe hehëjo. Iae ae gemuëro i uje ujuohoromo mure riremoli va'ade höjo. ⁴ Riremobe va'amu ujo ioro'ioroho örire rireromado höjo. Rireromamu gavë'i ugëro ro i barëjare höjo. ⁵ Ujo ioro'ioroho munë uhunö jië'e sa'are rireromado höjo. Rireromomomo ma-burëro ri'amado höjo sa'aho munë döro ma-bisemu jië'ëro. ⁶ Riromomo dirumoho bogo ma io'amë'ëro majaëro rojomomomo anamu sahori'amado höjo. ⁷ Ujo ioro'ioroho bibë'e resu resu'e sa'are rireromado höjo. Rireromë'ëro bibë'e resuohuro riromomo ujo maho baba'amado höjo. Baba'amamu maho bogo rae'amado höjo. ⁸ Ujo ioro'ioroho sa'a mare rireromado höjo. Rireromomomo riromomo ëgovoromo bajoho rae'amado höjo. Uje gemu gemu röhu ioro'ioroho baje 30 rae'amoli ioro'ioroho 60 rae'amoli ioro'ioroho 100 rae'amado höjo. ⁹ Èhi uëngoromo uëvadeje: Ae rahu ja God-are jö hejanue ae javë'o'ho bëhoho nahoromomo birohönëjo.

Iesuhu rabëni uhu'e majëhinövade ë hesi jöhoje.

¹⁰ Èhi uëvamu ijönöho ae aho'obëhe bogojio'li Iesuro hesi ariböviohu'o gemu mae hijadeje. Hijamu hesi ijorajo 12-hu'o hesi bëhire raromaruë aribövi ioro'iorohu'o ëho jaburo uhu jö hesi bëhoho ua gavareje. ¹¹ Ua gavamu Iesuro uëvadeje: God-ro böröme namiromomo aho'obëhe muebejaje jöho urimoho subivëhade höjo. Èsubivëhade jöho huro hesi suvuore jemë bojëmijë'e höjo jemëremu he'irarijego. Èhu'ëro jemëro jö bëhoho he'li a ioro'ioro jabesi öriroho ma-uhu jöemu rovaje höjo. ¹² Jabuni ma-uhu jöemu rovaje hesi bëhoho ë jöho God-are surire jajivoromomo ëhi uvë'e höjo:

God-ro nimado höjo ë ariböviohuoro muoho ma-gaemu ga'li bogo avoho garuomoröhego. O jöho ma-hemu he'li bogo avoho heröhego.

Garomomo he'ibejarëjo jabumë huotorovoromomo God-arinö va'ego ëhuro hu jabesi sisëho uehorovoromomo vuonugo'ibejajo.

I ujo sa'are riremado uhu jö Iesuhu huruoho majëhijade jöhoje.

¹³ Ĕhi uēnugoromo uēvadeje: Rōhu naehu majēhijode uhu jōho jemē diehi'oromo bēhoho bogo hejarujējo. Bogo hejarujoho diehi'oromo uhu jō ioro'ioro hesi bēhohu'o avoho herējo. ¹⁴ Aehu mure ruruhō'ōjade i ujo hesi bēhoho ēho God-are jō a majēhijajoho uēromo ē'ode hōjo. ¹⁵ Ujo ōrire rireromamu ugehu i barējare jō hesi bēhoho aehu God-are jō hejama gavē'oho Satan-ro ma-burēro rovaje hōjo. Rueromo gavaje God-are jōho i ujonō'e jabesi dēre jiego garomo baeniēhiromo rori'o bu'ōjaje hōjo. ¹⁶ O i ujehu munē uhunō jī'e sa'are rireromoromo riromo sahorī'amade jō hesi bēhoho aēro God-are jōho hejarue hōjo. Heromo ma-burēro nimorohoromo jōho ejaharue hōjo. ¹⁷ Ejahoromo jōho ma-dōēremu baejē'ēro majae ma-bunemu mae uehorovoromo garōhe God-are jō uehorovaruohuni aehu sisē vaejēvamu gavē'oho o huē vavaene rovamu gavē'oho ma-burēro vunugarue hōjo. ¹⁸ O ujehu bibē'e resu gemuore rireromade jō hesi bēhoho aēro God-are jōho heruomaje hōjo. ¹⁹ Heromo ave sa'a hesi muohuni nurunuromoromo o sarerivoromo inōme bōrōmo mae ujuoho'i o bōvie bise'e ujuoho'i nimoromo ēhemo uehorovoromo ēho jabesi nuninō bamarue hōjo. Bamoromo sa'arohemu uehorovaruohuro ēhuro God-are jō jabesi dēre jiajoho taemego jabumē bogo rae avoharue hōjo. ²⁰ O ujehu sa'a mare rireromoromo baje 30 o 60 o 100 rae'amade jō hesi bēhoho aēro God-are jōho heromo ejahoromo rae avohoruomaje hōjo ioro'iorohuro ioro'ioroho iosirēmiromo mu ma-mabēhe vaejarue hōjo.

Iro bueromo va'orahore bahjarue uhu jōhoje.

²¹ Rōhu uhu jōe gō'o majēhi'iē'ajējo. Jemē'o uehorovohējo. Iro buno'iraeromo osare barovarue hesi bēhoho bogo hevō gagoroho o maratu ahariroho gurīhi bamo'i va'orahoro bamo'iro ēhuni barovarue hōjo. ²² Ĕho naro uēromo ē'ajējo: Nasi jōe rabe rabe gurīhiro jiaje naehu jōvaje hesi bēhoho ma-va'orahoro jiorōhego jōvājējo. O rabe rabe subivēhaje naehu uēvaje hesi bēhoho ma-samaro jiorōhego uēvājējo. ²³ Ae rahu ja God-are jō hejanue ae javē'oho bēhoho nahoromo birohonējo.

²⁴ Ĕhi uēnugoromo uēvadeje: Nasi jō hejarujoho avo'avoho uehorovonōvorējo. Uehore ma-bisemu bamē'oho ēhuro aji'e jōho ma-bisemu bae'a'arujējo. O bōrōmo bamē'ohuro ēhuro bōrōme bae'a'arujējo. Rōhu gō'o dōre bōrōmo bēhe bae'a'arujējo. ²⁵ Aji'e jō javē'oho God-ro gō'o bojami'iramu bae'a'anujējo. O bogojavē'oho bisemu baejanoho God-ro ē uehoroho mu'uvaho'ajējo.

I ujehu sa'are jioromo hesi ēma gurīhiro rijaje uhu jōhoje.

²⁶ Rōhu Iesuro uhu jōe gō'o majēhiromo uēvadeje: I ujehu riromo raejajēhi God-ro bōrōme namiromo hesi ōri ari'oho bōvioho bise'oho ēhi muebejēvaje hōjo. Ĕjōho naro majēhi'iē'ajējo. Mu arijo'ohuro nani ujohe sa'are suovo ruruhō'ōbe va'a'ajējo. ²⁷ Va'oromo vahiro'iramu niavoromo sisonuvo'iramu ri'ōnōvo'ajējo. Ĕhi'obe va'iramu ē majae gemuore ujo suovo ruruhō'ōjadohuro rēdijiomoromo ri'amo'ajējo. Ĕhi'o'iramu mu arijo'ohuro ēho garomo dadivoromo uvo'a'ajējo: Diehi'oromo ē'ajējo. ²⁸ Ĕhi uvo'a'ajējo rōhu hesi sa'aēro rihuoho bojamego i ujohe riromo inovoromo maho raejaje hōjo. ²⁹ Maho raeromo mavego evare arijo'ohuro ma-burēro tarivoromo gagovoromo avoho bahijaje hōjo ē hesi bēhoho ē gagovarue majaho rovē'ego.

Ijo hisue mustard-hu ēgovaje uhu jōhoje.

³⁰ Rōhu Iesuro jōe gō'o majēhiromo uēvadeje: God-hu bōrōme namiromo muebejēvaje ōroho naro uhu'e bu'ōromo jemē'o na'o uehorovo'ejarejo. ³¹ Ijo hisu ihe mustard ujehu bōrōmoriromo ēgovajēhi God-ro bōrōme namiromo ae gō'o gō'o ēhi gagovoromo muebejēvobe va'a'ajējo. Mustard uje gemu sa'are ōjē'iroho bajo ioro'ioro dinō'e dinō'e jio'amajoho ēho ma-jianovo'amo'i a'i ē mustard ujohe biseharihe hōjo. ³² Ĕhi hōjo rōhu riromo ēgovoromo ijo hisu ioro'ioroho iosiramī'amoromo ēho bōrōmoho hōjo. Bōrōmoriromo adoho ēgovo'amego ugēro rueromo gavarue sanu mae jiegorovo ijuoho ē vae'amarue hōjo. Ĕhi uēvadeje.

³³ Ĕhi jiĕ'e uhu jŕho aho'obĕhe Iesuro uĕromo ĕhuro hesi jŕho majĕhinŕvadeje. Jabumĕ diehi jiĕ'e jŕ bae'irŕhoho eni jĕvĕ'oho ĕhi jiĕ'e jŕhuremu majĕhinŕvadeje. ³⁴ Jŕho bogo mae bogo samaroho majĕhi'i ma-uhu'e gemu majĕhinŕvadeje. Majĕhiromo rŕhu hu'o hesi aribŕvihu'o jabesi sivue raromĕ'iroho jŕho aho'o huruoho majĕhinŕvadeje.

Iesuhu uavamu jovo bŕrŕmehu ruhosŕjade jŕhoje.

³⁵ Iesuro boat-re hiromo ĕhi jiĕ'e uhu jŕho majĕhinugoromo vŕ'ŕromamu gagorovo hesi aribŕvioho uĕvadeje: Ruehego no aruhe e'u ioni gŕnŕ va'arĕjo. ³⁶ Va'arĕjamu hegorovo ĕ Iesuale aribŕviohuro ae aho'obĕhe ĕ rĕmo'i Iesuhu hijaje boat-re iojioromo hu boat-re baeromo va'areje. Bava'amu boat ioro'ioroho ĕhu'o gemu mae va'oruomadeje. ³⁷ Va'amu buru bŕrŕme e'ure rovadeje. Bure rovamu jovohuro hasaromo boat-re ro nemoromo ruahoromo abueromo irijioromo diruvĕvo'ie'adeje. ³⁸ Diruvĕvo'ia'amu gavĕ'i ijorajoho jaburo gavare Iesu mami'e boat dejonŕ va'o raromoromo simano dŕvaejaruohuro simane dŕvaeromo niavĕ'e jiamu gagorovo ioromo uavareje: Tisa no vuovavuo'ie'ajĕjo. Na ja nosi jŕĕnioho bogo uehorovanuĕjo. ³⁹ Uehorovanuĕjamu Iesuro ri'ŕromo burohu'o hasajaje jovohu'o uĕvadeje: Vuonugohĕjo. Vuonugohĕjamu buroho ahŕ'ŕ'i jovoho u'uhoromo ma-jŕrume ruhijadeje. ⁴⁰ Ma-jŕrume ruhijamu gagorovo hesi aribŕvioho uĕvadeje: Jemĕ rabĕni juhuonivarujĕjo. Urimĕ'i jemĕ bogo ma uehorovevobe rovarijoho na jemĕ jaruvohu'o ĕhi gemuoho ĕ'arujĕjo. ⁴¹ Ĕhi gemuoho ĕ'arujĕjamu sisĕ maro juhuonivoromo uarovareje: Ave aho diehi jiĕ'e ae hŕjo. Huhu uĕvĕ'oho bogo aĕremuoho ejaho'i burohu'o jovohu'o jahu'o hesi jŕho ejaharue hŕjo.

5

Satan-are a sisĕ aho'obĕhe ae gemu hesirire jioruomamu Iesuhu rarovŕ'ŕ'amade jŕhoje.

¹ Ĕhi'onugoromo jahu'o Iesu'o va'aroho va'o e'u ioni gŕnŕ Gerasene rajo jabesi sa'are va'o baboro bejareje. ² Baboro bejamu gagorovo ae gemuĕro guavo'amarue juju gagore jioromo rueromo Iesu birohadeje. Ĕa hesi dĕre Satan-are a sisĕro abueruomamu simane huotorovĕ'e jiadeje. ³ Simane huotorovĕ'ĕro guavo'amarue juju gago jio'amajire ĕ hinŕvadeje. Hi'ego aĕro vajaĕro ŕ'ĕro rabĕro tŕvo'ie'oromo gavare bogo eni jĕvamu vuonugareje. ⁴ Urimoroho aĕro vajaĕro ŕvore hŕrure tŕvo'ego ŕvore ŕ'oho ruho tariv-oromo hŕrure vajaho ano ahŕ'ŕnŕvadeje. Ĕhi'oromo vŕrŕ'irae'ego aehu guduamoromo hu'irae ro rŕhore nugo'irŕhoho bogo eni jĕvonŕvadeje. ⁵ Majae vahie jŕ'e dadovĕ'i munĕro anorovĕ'i guavaruire hinŕvo dahorure ajio hinŕvadeje.

⁶ Ĕhi'onŕvĕ'ĕro ĕ ahuro rori'o ŕri ĕgobŕviro namiromo Iesu garomo tutuvo rueromo hesi bĕhire ague aho hiromo ⁷ ma-darugo'o uvadeje: Iesu ja God dŕ mare hijaje a hesi Harihe javajĕjo. Ja rabĕni sihusihuego'i rovane hŕjo. Na God-are nuniro uavajĕjo: Nadi huĕ sisĕho vi'ehoho bojemĕjo. ⁸ Vi'ehoho nadi bojemijĕ uvade hesi bĕhoho urimĕ'i Iesuro hu uavadeje: Aru'aho sisĕho jero ĕ a hesi dĕre hijanuoho vuonugo'i va'ĕjo. Ĕhi uavĕ'ego ĕhuni uvadeje. ⁹ Ĕhi uvamu hegorovo Iesuro uavadeje: Jasi ihoho rahuo hŕjo. Rahuo hŕjamu uavadeje: Nasi ihoho Siriehu Bimuvanovĕ'oho jevajĕjo. Ĕhesi bĕhoho no aru'ahĕ aho'obĕhe dĕre javuĕ'ego ĕhuni ĕhi jumegĕ'e hŕjo. ¹⁰ Ĕhi uaromo Iesu ua'i hijadeje: Aru'ahoho nadi uĕvego jabumĕ ave sa'are jioromo va'irarĕjo.

¹¹ Rŕhu mahe aho'obĕhe aruhe dāhoru ahore gemuoro gagovoromo ie ue'ahamu gagorovo ¹² dĕre sisĕ aribŕviohuro Iesu uavareje: Uŕvuego no suorovo va'oromo aruhe mahu jabesi dĕre va'o abuejarĕjo. ¹³ Abuejarĕjamu uĕvadeje: Ĕhuro va'ohĕ uĕvamu hejĕ'i ĕ sisĕ aribŕviohuro ĕ a hesi dĕre jioromo suorovo va'oromo ruhe mahu jabesi dĕre abueruomadeje. Abueruomamu ĕ mahohuro va'o baradore rireromoromo e'ure siŕ ruruhŕ'ŕ va'oromo jove ue'ahoromo vuovadeje. Mahe aho'obĕhe 2,000 rabu'e ĕhi vuovo'amadeje.

¹⁴ Vuovamu gavĕ'i mahu muebe'amarue aribŕviohuro huruomoromo amo bŕrŕmore amo ininore jŕho majĕhibe va'areje. Jŕho majĕhijamu hejĕ'i ae aho'obĕhe rueruomadeje ga'iro diehi jiego. ¹⁵ Iesuro rueromo gavareje aru'aho sisĕhu dĕre jioromo suorovo

va'oruomade aho simanoho mae jio'ego niöge ba'amë'e hijamu. Urimoho ganövareje aru'aho sisë Siriehu Bimuvanovë'ohuro hesi dëre jioruomë'e ëhi hi'ego röhu evare majare gavareje ma-mae hijamu. Ëhi gagorovo juhuonivoruomadeje. ¹⁶Juhuonivamu Iesu mu vaejamu gavare ariböviohuro uëvareje: Sisë ariböviehu dëre abue'amade ahu'o mahohu'o ëhi jii'e muoho bihoruomohijajo. ¹⁷Ëhi majëhijamu ae aho'obëhe heromo Iesu uavareje: Ave sa'aho vuonugo'i va'ëjo.

¹⁸Vuonugo'i va'ëjamu Iesuro boat-re ajiomoromo sionëro vuonorö'o va'ië'adeje. Va'i-a'amu gavë'i aru'aho sisë hesirire jioromo suorovo va'oruomade ahuro Iesu uavadeje: Na ö'oromo ja'o hi'i negajëjo. ¹⁹Negajëjamu Iesuro uavadeje: Bogo rue'a'anuëjo. Sionëro jasi amëro va'oromo jasi aganoho uënëjo: Badaro huë baejevoromo ëhi mabëhe ajemijamu rovode höjo. ²⁰Ëhi uavamu hegorovo rue ahuro va'oromo hesi sa'a ihoho Ame 10 Jio'amaje Sa'aho ë sa'are majëhibe juvoromo uënövadeje: Iesuro ëhi mabëhe ajemamu rovode höjo. Ëhi majëhijamu hegorovo ae aho'obëhe jöe barëjövadeje.

Iesuhu magonahe niö'i Jairus-are abojohu'o magonahe gö'o ajëmade jöhoje.

²¹Ëhi'amu Iesuro boat-re va'oromo anume e'u ioni gönö va'o ravo'amadeje. Ravo'amoromo e'u riröre namijamu ae aho'obëhe ruë numë gagovo rova'oromo ëhi riravareje. ²²Riravamu iae ae gemu hesi ihe Jairus-ro rovadeje. Jairus hu Jew rajehu God rajahjarue osa muebejaje ae jiadeje. Rueromo Iesu garomo hesi höru bëhire ague aho hiromo ²³dinamiromo uavadeje: Bësu guomo'ië'ajëjo. Rueromo jasi övoho hesi sinoro bamego i'ovoromo hijajo. ²⁴Hijajamu hegorovo Iesuro hu'o gemu mae va'adeje. Va'amu ae aho'obëhe tatijiomobe hu'o gemu mae ëhi va'oruomadeje.

²⁵Va'oruomamu iae magonahe gemuëro jabu'o va'adeje. Ëmagonahoho manaero garorovade guomo guomoho bogo barë'i ëhi jiemu jiobe va'adoho vadune aho'o 12 barëjövadeje. ²⁶Doctor aho'obëhe gëromo ëhuro vi'ehe sisë maro baenövadeje. Vi'ehe baeromo hesi ijo baje bu'ö barë'i röhu bogo marë'i sisërebe va'onövadeje. ²⁷⁻²⁸Sisërebe va'amu ë magonahohuro hejade uvoruomamu: Iesuro ae magonahe mabëhe ajamuijaje hö uvamu hejë'ëro uehorovoromo uvadeje: Na Iesu ma-niögohuremu rëhë'ohuro ëhuro marëjevo'ajëromo ae aho'obëhe va'aruire ë va'oromo Iesure dejonö rueromo niögoho rëhadeje. ²⁹Niögoho rëhamu gavë'i magonahoho kö rovadoho ijoho bogo rovadeje. Ijoho bogo rovamu magonahohuro herovadeje mae jiavamu. ³⁰Mae jiavamu Iesuro hejade a ajëmaje daruge gö hesirire jioromo va'ë'e jiavamu evare ma-burëro huotorovoromo ae aho'obëhe uëvadeje: Ja rahuaro nasi niögoho rëhane höjo. ³¹Rëhane höjamu hegorovo hesi ijorajoho jaburo uavareje: Ja'o iae gavanuëjo ae aho'obëhëro ja tatijiomavo'ego. Ëhi jii'oho ja rabëni uövuanuëjo: Ja rahuaro na rëhevane höjo. ³²Ëhi uëvamu Iesuro arua anumia ueherihadeje ga'i di ahuro o di magonahohuro hu rëhë'e jiego. ³³Uherihoromo gëvamu rue magonahohuro iae mae garomo uvadeje: Huro na ajemade hö uvoromo juhuonivoromo butubutumoromo röhu ma-birivoromo rueromo Iesure höru bëhire ague aho hiromo diehi ë'ade jöho sama'e huruoho majahi barëjadeje. ³⁴Majahi barëjamu Iesuro uavadeje: Abojëjo. Jero na mae uehorovevamu ëhuro ja marëjavë'e höjo. Vaevë'e va'onëjo. Jasi guomo guomoho barëjavë'e jiaje ijönö mae jionëjo.

³⁵Iesuro ëhi uavamu gavë'i ae göëro göëro Jairus-are osare jioromo rueromo Jairus uavareje: Jasi abojoho mami'e guomë'e höjo. Ëhu'oho rabëni ja tisaho u'uoho bojamijanuëjo. ³⁶U'uoho bojamijanuëjamu hegorovo Iesuro he bogo hejanovë'e Jairus uavadeje: Nadi juhuonivo'i God mae uehorovonëjo. ³⁷Ëhi uanugoromo Peter James o James-are öe John ëho jaburo hu'o va'öjoro uë'i a ioro'ioroho nijio'iraëjövadeje. ³⁸Nijio'iraëjövönugoromo jaburo va'oromo Jairus-are osare rovareje. Rueromo Iesuro gavadeje ae aho'obëhe gagovorovë'ëro garahörö'e baeromo ma-darugo'o nierusuburu'e bamoruomamu. ³⁹Ëhi'amu gagorovo osare va'oromo uëvadeje: Jemë rabëni garahörö'e baeromo nierusuburu'e bamarujëjo. Ëmagonaho harihoho bogo guomo'i ma-niavajëjo. ⁴⁰Ma-niavajëjamu hegorovo rueho jaburo Iesu sivoromo ijo'ijahareje. Ijo'ijahamu gagorovo Iesuro ë aribövioho aho'obëhe amonö rarovö'öjëvonugoromo magonaho harihu

hesi vëmu vavu'ohu'o hu'o rovare ae niö'i gemu jabu'o ëhi sÿjÿgoromo magonaho harihehu raromaje osare va'adeje. ⁴¹ Osare va'oromo magonaho hesi övore ma'enoromo hesi jÿëro uavadeje: Tarita kumajo. Èjÿho huotovë'oho ëho uaromo ë'adeje: Bësu naro ja uavajëjo: Ri'öjÿjo. ⁴² Ri'öjÿjamu hejÿ'i rue magonahohuro ma-burëro ri'öromu nami juvadeje hesi vadunoho aho'obëhe 12 jië'ëro. Juvamu gavë'i ae aho'obëhe hu garomo tiöjÿvadeje. ⁴³ Tiöjÿvamu gagorovo Iesuro ma-darugo'o uëvadeje: Naehu vaejode muoho nadi aho huruohorëjo. Èhi uëngoromo uëvadeje: Magonahoho ie bojamego ijajo.

6

Iesuale amo rajehu Iesu bijÿnimoruomade jÿhoje.

¹ Èhi'onugoromo Iesuro va'adeje. Va'oromo hesi amëro rue'i hesi ijorajoho jaburo hu'o gemu mae ravareje. ² Rueruomoromo Jew rajo jabesi nuho majaho rovamu Iesuro God rajahijarue osare va'oromo God-are jÿ bëhoho rÿjÿhijadeje. Rÿjÿhijamu ae aho'obëhe heromo tiöjÿareje. Tiöromu uvoruomadeje: Èiahuro jÿho dinö'e hejÿ'ëro jÿvajëjo. Hu diehi'oromo ëhi jië'e simano maho baejade hÿjo. Darugo'e mu masijoho diehi'oromo vaejaje hÿjo. ³ Hu sarerivajëjo. Ma-ijo muemu vaejaje ae hÿjo. Hu Mary-are harihe hÿjo. Hu James-are Joses-are Judas-are Simon-are öe hÿjo. Hesi ma'ino ömo'ömohe aviae no'o gemu mae raromarue hÿjo. Èhi uvoruomoromo nue huodivareje. ⁴ Nue huodivamu gëgorovo Iesuro uëvadeje: Jÿ God-aro baeromo majÿhijarue aribövioho dinö'e va'ë'iroho aëro no mae uehorovavuarue hÿjo. A'i nosi sa'a rajoho aganoho osae gemuore raromaruoho jemëremu bogo ëhioho uehorovavuaruje hÿjo. ⁵ Èhi uëromu hu darugo'e mu vae'iröhoho bogo eni jiadeje. Huro guomo guomo'e ae ma-gemu gemu jabesi sinore hesi övoho bamëhoromo sinoho avohëvamu marëjÿvadeje. Èhemu ë'adeje. ⁶ Röhu hesi amo rajehu hu bogo ma uehorovarohuni ëhuni tiöjÿadeje.

Iesuale ijoraje 12 jabuhu va'oromo mu vaeröhego Iesuhu rëmö'öjÿade jÿhoje.

Èhi'onugoromo va'adeje. Va'oromo amore amore jÿho rÿjÿhibe juvadeje. ⁷ Rÿjÿhibe juvoromo hesi ijoraje 12-ho uëvadeje: Ruehëromu rovamu uëvadeje: Naro jemë rëmö'ö'ie'ajëjo jemëro nasi jÿho ae majÿhibe jijih'o'irarijÿgo. Jemë ae niö'i niö'i ame göro göro va'orëjo. Jemëhu mu vae'irarijÿohuni nasi darugoho bojëmijajëjo ëhuro jemëro Satan-are a sisë gö gö a dëre jio'amë'oho rarovö'ö'irarijÿgo. ⁸ Röhu va'ie'iroho maguduodemu ujuohorëjo. Ioho esöho ijo bajoho bövioho bise'oho bogavëjo. ⁹ O hörü guduoho io'amoromo niöge ma-gemu gemu io'amo'i nadi niö'i niö'ioho io'amorëjo. ¹⁰ Èhi uëngoromo uëvadeje: Amo göre göre va'oromo aehu di osare raromöjÿro uëvamu va'oromë'oho ëhuremu raromonövorëjo ijonö ë amore jioromo va'ie'le jëvaje. ¹¹ O di amore ariböviehu jemesi örire nu huodëgoromo jÿ bogo ejÿhë'oho amoho nugo va'irögoru jabesi sa'a hesi tohotohe jemesi hörü hitahire jiajoho sa'aro riremö va'ego ë amo rajohuro garomo uvo'irarëjo: No sisë ë'ë'e javuajëjo.

¹² Èhi majÿhijamu hegorovo ijorajo ömo'ömohehu va'oromo jöe majÿhibe jijihoromo uënövareje: Uehoro sisëho vuonugo'i uehoro mae baerëjo. ¹³ Èhi jië'e jÿho majÿhibe Satan-are aribövi sisë aho'obëhe jabesi dëre jëvajohe rarovö'öbe ose guomo guomo'e a jabesi sinore otehoromo sinoho avohëvobe ëhi jië'e mu masijoho vaebe jijihareje.

John bapataeto vaejaje a guomade jÿhoje.

¹⁴ Èhi jië'e mu masijoho vaebe jijihamu sa'a a böröme Herod-ro ë jÿho hejadeje rabëni Iesuhu ë'aje jÿho ae aho'obëhe dinö'e dinö'e vaerovë'ëro jië'ëro. A ioro'iorohuro uvoruomadeje: Èaho John bapataeto vaenövade ahuro guomoromo ri'öjÿ'e hÿjo. Èhu'ëro darugo böröme baeromo mu masijoho vaejaje hÿjo. ¹⁵ A ioro'iorohuro uvoruomadeje: Iesu hu mami'e hijade ae Elijah-ro rovë'ëro ë'ajëjo. A ioro'iorohuro uvoruomadeje: Jÿ God-aro baeromo majÿhinövare aribövi ioro'ioro jiarëhi hu ëhi jië'e aëro jië'ëro ë'ajëjo.

¹⁶ Ae göëro göëro Iesuale jÿho gö gö atavamu hegoro Herod-ro ae uëvadeje: Èaho hu John hÿjo. Urimo naro hesi sönöho tarijahode hÿjo röhu hu guomoromo ri'öjÿ'ëro hijajëjo. ¹⁷⁻¹⁸ Röhu ë jÿ hesi bëhoho urimë'i Herod-ro hesi öe Philip-are vabore hesi

ihoho Herodias gohoniahijadeje. Gohoniahijamu John-ro ri'öromomo ua'i hijadeje: Jasi vuojiri baejanoho êho bogo maehu hôjo. Êhi ua'i hijamu Herod-ro ë magonaho hesi jöëni ae uëvamu John guduamoromo tövoromo savoji gagore ba'amareje. ¹⁹ Êhi'amu ë magonahohuro John nue huodivoromo ano'i nimadeje. Êhi nimoromo röhu Herod-ro magonahoho ahamu ano'ïë'adoho vuonugadeje. ²⁰ Herod-hu magonaho ahade hesi bëhoho huro uvadeje: John hu a ma-mabêhe hô uvoromo êhuni John juhuonamiromo avoho mueberomomagonahoho ahadeje. Magonahoho ahoromo va'oromo henövadeje John-ro God-are jöe majahi'ego. Jöe majahi'ego Herod-ro nurunurumo'ego hesi jöho he'li nimonövadeje.

²¹ Êhi'oromo John anojöëni magonahoho ahobe ruejuvo Herod rahade majaho rovamu evare magonahuhu vae'i nimade majaho rovadeje. Êhesi bëhoho Herod-ro söröe baeromo hu ajamiromo ë sa'a muebejarue aribövioho muorovo mu muebejarue aribövioho a masijö ioro'ioere Galilee sa'are raromaruoho ë a masijoho uëvadeje: Ruehego na söröe bojëmi'iröjo. Bojëmi'iröjõmu rueruomadeje. ²² Rueruomamu ë magonaho hesi abojohuro rueromom javavadeje. Javavamu gagorovo Herod'o hesi örire rueruomade ariböviohu'o ë magonahoho garomom vuëvorovorouomadeje. Vuëvorovoromom Herod-ro magonahoho uavadeje: Ja rabe rabe nimë'oho uevego bojami'iröjo. ²³ Naehu muebejaje öri ari'o nimë'oho iae êhu'o ririre tarioromom vituoho bojami'ejöjo. God-ro ge'ego na mae uavajëjo. ²⁴ Êhi uavamu ë magonahohuro va'oromom vëmohom uavadeje: Na rabe bae'ejöjo. Rabe bae'ejöjõmu rue vëmohuro uavadeje: Uanëjo bapataeto vaejaje ae John-are sönöho tarioromom simanohom barom bojemëjo. ²⁵ Êhi uavamu hejë'i rue abojohuro ma-burërom vuonorö'ö rueromom a börömohom uavadeje: Na negajohom avevejö'e ae uëvego bapataeto vaejaje ae John-are sönöho tarioromom simanohom hevö döre bamoromom barom bojemarëjo. ²⁶ Êhi uavamu hegoromom rue a börömohuro huë vavaene böröme baejadeje. Iae hu huë vavaene baejadeje röhu urimom darugo'e jöho ë aribövijabesimuniro ë magonahohom mae uavë'ërom êhu'ërom huotorovoromom nijio'iraeröhohom hu bijönimadeje. ²⁷ Bijönimamom evare ae gemom ma-burërom nugö'öromom uavadeje: Va'oromom John-are sönöho tarioromom simanohom baruenëjo. Baruenëjõmu savojim gagore va'oromom sönöho tarioromom simanohom ²⁸ hevörom bamonugoromom barueromom abojohom bojamadeje. Bojamamom huro bava'om vëmohom bojamadeje. ²⁹ Êhi'amu John-are ijore ijore jijiharue ariböviohuro ë jöho heromom rueromom sinohom bava'oromom munë gagore bamareje.

Iesuhu ae aho'obêhe 5,000 da'uojêhade jöhoje.

³⁰ Iesuare apostle ömömohuro mu masijevae bëje jijihë'ërom vuonorö'ö rueromom Iesum uavareje: Nom muohom êhim êhim vaeromom jöho êhim êhim majëhiromom rovare hôjo. Êhim jïë'ë jöho jabumërom Iesum majahim barëjareje. ³¹ Majëhim barëjõmu gagoromom rueruomom gavade ae aho'obêhe rovë'i va'ë'i rovë'i va'ë'ërom hu'om hesim ariböviohu'o i ue'ahom iröhe om bövi bise'om vae'iröhe majahom bogojõmu gagoromom uëvadeje: Ruehegom nom a rumom'e sa'are nosim sivue va'om raromoromom jemërom êhuro ma-bisemom nuhorëjo. ³² Êhim uënuogoromom jaburo boat-re ajio raromoromom a rumom'e sa'are jabisim sivue va'om va'areje.

³³ Va'om va'umom ae aho'obêhe gavare jabumë va'umom iae mae gëromom uvoruomadeje: Êariböviohomo Iesumërom boat-re va'aruë uvoromom amo göre göre jioromom sa'a hörërom ma-burërom va'oromom Iesum'om hesim ariböviohu'o boat-re va'aruohom iosirëmiromom jaburo jovom ionim gönö urimom rueruomadeje. ³⁴ Urimom rovamom Iesumom ijönö rom höröromom ravom'amoromom gavade ae aho'obêhe tagavë'e jiamom gëgoromom uehorovoromom uvadeje: Vaevë'ëjo. Êariböviohomo vëmu vavum'om rumom'e ö mahu'ërom raromanovaruë uvoromom jabisim jöënim vavaenimadeje. Jabisim jöënim vavaenimamom evare jöe aho'obêhe röjëhijadeje. ³⁵ Jöe aho'obêhe röjëhijõmu majae bevai'iamom gagoromom hesim ijorajom ömömohuro rueromom uavareje: Avehom rumom'e sa'ae hôjo. Om majae mamim'e barëjë'ë hôjo. ³⁶ Êhuni ave ariböviohomo rëmö'öjögom ave bëhire amom masijore ininore va'oromom ie imom'amo'irarëjo ue'ahoröhe. ³⁷ Ue'ahoröhe höjõmu uëvadeje: Bogajom. Jemërom irunom'ohom da'uojëhirëjo. Da'uojëhirëjõmu uavareje: Asë'ëjo. Dinö'e iohom baeromom da'uojëhijörom uvanuëjo. Na jam uvoromom ë'anuëjo:

No 200 kina javuë'ëro noro ëho bava'oromo bu'ö barëromo ioho imo'amoromo ujuoho rueromo ëhuro da'uojëhi'ëjarë uvoromo o diehi uvoromo jövanuëjo. ³⁸ Jövanuëjamu uëvadeje: Ioho dimino'e jëvajëjo. Va'oromo gahëjo. Va'oromo gahëjamu va'oromo adaho garomo vuonorö'ö rueromo uavareje: No ie aho'obëhe övo gö mine o visue niö'i ëhi javuajëjo.

³⁹ Ëhi uëvamu hegorovo ruehuro ae aho'obëhe uëvadeje: Va'oromo hahagu hahagu gagovoromo ëhi garasihuro raromobe va'ohëjo. ⁴⁰ Va'ohëjamu rue ariböviohuro va'oromo ë 50 50 o 100 100 hahagu hahagu gagovoromo ëhi garasi rövé'e mabëhire raromobe va'areje. ⁴¹ Raromobe va'amamu gagorovo ie övo gö mine visue niö'i ujuoho rovaroho ëho Iesuro ujuohoromo ö'idöho sioroho garomo God huë mae uavadeje. Huë mae uanugoromo ioho ato'atovoromo hesi ijorajo ömo'ömohe i'imëmijadeje ae aho'obëhe suvuorëmijöro. Ëhi'oromo visue niö'i taritarivoromo i'imëmijadeje jaburo ëhu'o suvuorëmijöro. ⁴² Ëhi'amamu ae aho'obëhe ë ioho visuoho ue'ahamu da'uëgadeje. ⁴³ Da'uëgamu gagorovo ijorajoho jaburo i vitu vituoho visu vitu vituoho aegamu esöe aho'obëhe 12 irijiomamadeje. ⁴⁴ Ëhi'areje. Iesuro ie övo gö mine visue niö'i ujuohoromo suvuorëmijamu ama'e aho'obëhe 5,000 ë ioho ue'ahoruomadeje.

Iesuhu e'u döre hörehu va'ade jöhoje.

⁴⁵ Ëhi'amamu gavë'i Iesuro ijorajo ömo'ömohe uëvadeje: Boat-oro ajio raromoromo e'u ioni gönö Bethsaida amoro urimo va'ohëgo na a ioro'ioroho rëmö'öjjo. ⁴⁶ Ëhi uëvamu hegorovo hesi ijorajoho jaburo boat-re iojioromomo va'oruomamu Iesuro parie va'e'i dahorunö ajiomadeje. ⁴⁷ Ajiomoromo parie vaejamu vahioromadeje. Vahioromamu name ijorajoho jaburo öri ëgoböviro jovo döre va'oruomo'i Iesuro ruhe sa'are hesi sivue hijadeje. ⁴⁸ Hi'i gavadeje burëro jabesi nuninö rue'ego ijorajoho jaburo jovoho sisë'i sisë'i huo'öbe va'oruomamu. Ëhi'ojuvo sisonuvo'ië'adeje. Sisonuvo'ia'amamu Iesuro abueromo jovo döre hörëro va'adeje. Va'oromo jabumë iosirëmi'ie'adeje. ⁴⁹⁻⁵⁰ Iosirëmi'ia'amamu ijorajoho jaburo gavareje hu jovo döre juvamu gagorovo uvareje: Aru'ahëro juvajëromo jiodudu'iraeromo jö'e dadovareje. Jö'e dadovamu hejë'i uëvadeje: Nadi juhuonivo'i biririvohëjo. Na jevajëjo. ⁵¹ Na jevajë uënuogoromo boat gagore ajiomoromo jabu'o gemu mae hijamu buroho barëjadeje. Buroho barëjamu ë aribövioho dadivëvadeje. ⁵² Ëhesi bëhoho Iesuhu mami'e i da'uojëhade hesi bëhoho bogo avoho baejareje jabesi uehoroho bogo eni jië'ëro.

Iesuhu Gennesaret sa'are hiromo guomo guomo aribövi ajëmade jöhoje.

⁵³ Ëhi'amamu e'u ioni gönö rueromo Gennesaret sa'are ravo'amoromo boat-oho ijo bunore be nugareje. ⁵⁴ Röhu ravo'amamu gavë'i evare ae aho'obëhe Iesu garomo uvoruomadeje: Iae Iesu hö uvoromo ⁵⁵ ë sa'ae böromoho ma-burëro jijihoromo aveoromo guomo guomo'e aribövioho giojimo ujuoho rueromo henövare uvavo'ego: Iesu ë dirö'ore hijajë'ego ë va'onövareje. ⁵⁶ Iesuhu amo masijore ininore o dinö'e dinö'e rovë'iroho guomo guomo'e aribövioho giojimo ujuohoromo aehu gagovarue öri ari'ere ë ro bahinövareje. Bahinugoromo Iesu ëninamiromo uanövareje: Guomo guomo'e aribövioho uëvego ja niögu vituohuremu rëhego ëhuro guomo guomoho barë'amajo. Ëhi ua'ego ae rahu niögu rëhë'oho ëhuro marë'amonövadeje.

7

Pharisee ariböviehu God-are jö bogo avoho uehorovo'i jabesi a mami jö börröme hö uehorovare jöhoje.

¹ Iae Pharisee ariböviohuro Jew rajo jögoru öri röjëhijarue ariböviohuro urimo Jerusalem jioromo rovë'ëro jië'ëro Iesu jiajire ro gagovoromuomadeje. ² Gagovoromo gavareje Iesuare ijorajo ömo'ömohe Pharisee rajo jabesi jögoroho ahoromo jovoho övoho bogo otehdivorovoromo sisëho u'ovë'e ioho ma-ue'ahamu.

³ Ëhesi bëhoho Pharisee ariböviohu'o Jew rajo a ioro'iorohu'o ioho bogo ëma ue'aharueje. A'i urimo Jew rajo a mamiehu jö bojëmibe rovarëhi ëhi'oromo jövëro övoho otehdivorovoromo uvoruomajeje: Nosi sinore sisëho u'ovahuë'ëro God-are nunire

mae javuajëromo evare ioho ue'aharueje. ⁴ O i imo'amarue öri ari're jioromo ujuoho rové'iroho uvoruomajeje: Sisë höromo jovëro otehodivoromo u'o'amoromo uvoruomajeje: Avevejö'oho ë ioho iae mae u'ovë'e höromo evare ue'aharueje. Ëhi'oromo a mami aribövïehu bojëmibe rovere jögoroho aho'obëhe jabumëro ejëhoromo enatue ramae gö gö [i ijarue rõhe] ëhi u'o'amoromo uvoruomajeje: Ëinömo inömo hesi sisëho u'o barë'ego God nimorohajëjo. Ëhi'arueje.

⁵ Ëhi'aruëro jië'ëro ë Pharisee aribövïohu'o Jew rajo jögoru öri rõjëhijarue aribövïohu'o ri'öromo Iesu uavareje: Jasi ijorajo ömo'ömo a mamiëhu bojëmibe rovere jöho bogo eromo jovoho övoho bogo otehodivorovë'e ioho ma-ue'aharue höjo. Rabëni ëhioho ë'arue höjo. ⁶ Ëhi uavamu hegorofo Iesuro uëvadeje: Sareri sareri'e aribövïe jëvavajëjo. Jö God-aro baeromo majëhijade ae Isaiiah-ro jemëhu ë'irarije jöho jajivoromo ëhi uvë'e höjo:

Ave aribövïohuro ma-jö'ëremu God na rajehi'i

dë vövöbajö'oho bogo nasi gemuoroho jio'i ma-rori'o jioruomajëjo.

⁷ Jabumë a jabesi jögoroho ae rõjëhiromo uëruomaje höjo: Ëho God-are jöe jiaje ejahuorëjo. Ma-a jabesi jögoroho ëhi rõjëhiromo ëhuro ma-döhëmu God na rajehiruomaje höjo. Ëjemesi jö Isaiiah-hu jajivadoho iae mae höjo. ⁸ God-hu bojëmade jögoroho jemëro vuonugo'i aehu bojëmibe rovere jögorohëmu ma'ënarujë höjo.

⁹ Ëhi uënuoromo uëvadeje: Sareri'e uehoroho baeromo ëhuro God-hu bojëmade jöho aharujë höjo jemëhu a bojëmijarujë jögoroho ma'ëno'irarijëro. ¹⁰ Ëhesi bëhoho Moses-ro uëvade höjo: Jasi vëmu vavu'oho mae uehorovëvonëjo. O jöe gö'ö uëvade höjo: Ae rahu jö sisë jövoromo vëmu o vavu hesi iho ijumahë'oho anego guomo'irajo. ¹¹ Röhu jemëro ë jöho ahoromo ae rõjëhiromo uëvarujë höjo: Jaehu jasi vëmu vavu'o God-are nunire uëvë'oho: Nasi maho sisëho ujuohoromo ajëmi'ibejodoho rõhu aveho na God-are ihoro bamë'e jëvavë uëvë'oho ¹² nadi rõhu maho huotorovoromo jasi vëmu vavu'oho ajëminëjo. Ajëmi'ë'oho sisë höjo. Ëhi uëvarujë höjo. ¹³ Vëmu vavu'o ajëmi'ë'oho sisë hö uëvarujohuro ëhuro vëmu vavu'o mae uehorovëvo'irarijëgo God-hu bojëmade jöho jemëro aharujë höjo jemesi a mami jöho e'irovo. Ëhi jië'e mu sisëho aho'obëhe rõjëhijarujë höjo.

Bogo i ijaruohuro a'i uehoro sisë bæjaruohuro ëhuro God-are nunire sisë'ëjavuajë jöhoje.

¹⁴ Iesuro ëhi uënuoromo ae aho'obëhe rõhu maho uëvadeje: Ro gemuoro gagovohëromu ro gagovamu uëvadeje: Naehu ave uhu jö uë'ië'ajohu jemë ae aho'obëhe avoho heromu bëhoho baerëjo. ¹⁵ Rabe rori'o jiajehu jö'ore va'ë'oho bogo ëhuro aho sisë'rë'amo'i a'i rabe dë vövöbajö'ere jioromo suorovë'ohuro ëhuro aho sisë'rë'amajë höjo. ¹⁶ [Ae rahu ja God-are jö hejanue ae javë'oho bëhoho nahoromo birohonëjo.]

¹⁷ Ëhi majëhinugoromo Iesuro ae aho'obëhe rëmo'i osare va'adeje. Osare va'amü hesi ijorajoho jaburo uavareje: Uhu jö majahuijane hesi bëhoho huruohëgo no hejarëjo. ¹⁸ Hejarëjamu Iesuro uëvadeje: Ëhi jië'oho na jemë'ö uehoroho bogojëvavajëjo. Jemë rabëni bogo garomo uvarujëjo: Rabe rori'o jiajehu jö'ore va'ë'oho bogo ëhuro aho sisë'rë'amajë höjo. ¹⁹ Ëhesi bëhoho rabe jö'ore va'ë'oho vövöbajö'erohu bogo abue'i dëre abuejajë höjo. Dëre abueromo dëre jioromo suorovoromo bogo aho ijumëvë'e ma-gua gagore va'ajë höjo. Ëhu'ëro aho God-are nuniroho bogo sisë'rë'amajë höjo. Iesuhu ëhi jövadoho huro uöromu ë'adeje: Jaruvohu ie aho'ö ma-ue'ahë'oho God-ro uvajë höjo: Iae mae höjo. ²⁰ Röhu Iesuro hesi jö vituohu majëhiromo uëvadeje: I ue'ahë'ohuro bogo ëhuro aho sisë'rë'amo'i a'i dë vövöbajö'ere jioromo rojomoromo suorovë'ohuro ëhuro aho God-are nuniroho sisë'rë'amajë höjo. ²¹ Uehoro sisë'huro dë vövöbajö'ere jioromo rojomego ëhuro öëro jijihanovuomajë höjo. Vajiohëro ujuohoruomajë höjo. Ae muo'amoruomajë höjo. ²² Gohu'amoruomajë höjo. A jabesiroho ujuohoniëhi'i ganiganimoruomajë höjo. Mu sisë rabe rabe vaeruomajë höjo. Ae gö sarerëmiruomajë höjo. A nunire javoj'i'e muoho vaeruomajë höjo. A jabesi mu mahuni dë vöronëgajë höjo. A jabesi ihoho ijumoruomajë höjo. Sivue uehorovoromo jabesi ihoho döro bamoruomajë höjo. Simane sisë'i uehorovuomajë höjo. ²³ Ëhi jië'e uehoro sisë aho'obëhe dë vövöbajö'ere jioromo rojomoromo suorovajohuro ëhuro aho God-are nunire sisë'rë'amajë höjo.

Israel rajo bogo a'i sa'a gö rajo magonahehu Iesu mae uehorovade jöhoje.

²⁴ Ëhi'onugoromo Iesuro ri'öromo ë Jew rajo jabesi sa'aho vuonugo'i va'adoho va'o sa'a göre Tyre amo Sidon amo jiajinö sa'are ë rovadeje. Ruenugoromo osare va'oromo uëvadeje: Naehu ave rovodoho nadi huruohorëjo. Ëhi uëvadeje röhu hesi ihoho ë sa'aroho böromëro jië'ëro hu rovadoho bogo a subivëho varijënoho jiadeje. ²⁵ Ëhu'ëro jië'ëro magonahe gemuëro ma-burëro hejadeje uvavamu: Iesu rovë'e höjo. Ëmagonahoho aboje gemu bise'e jiadeje. Satan-are a sisëro ë aboji hesi dëre abueromo simanoho huotovahë'e jiadeje. Hesi abojoho ëhi jië'ëro ë magonahohuro hejade uvavamu: Iesu rovë'e hö uvavamu hegorovo rueromo Iesuare höru bëhire ague aho hijadeje. ²⁶ Röhu ë magonahoho hu bogo Jew rajo magonahehu jioromo bogo Jew rajo jöehu jövaje magonahehu jio'i a'i hesi sa'a böromëro Syria jio'i hesi sa'a bise'oho Phoenicia jiadeje. Hu bogo Jew rajoho jië'e Iesu ëninamiromo uavadeje: Ajemiromo a sisë nasi aboji hesirire jiajoho rarovö'öjogo va'irajo. ²⁷ Rarovö'öjogo va'irajamu Iesuro uehorovoromo uavadeje: Vëmu vavu'ehu jabesi aboji harihu'o urimo ajëmijaruëhi naro nasi sa'a rajohemu ëhi urimo ajëmi'i rovode höjo. Ëhi uvoromo ë sa'a gö rajo magonahoho uhu'e uavadeje: O-ajo. Nadi'ego urimo aboji harihu'oho ie da'uojëhi'iröjo. Ëhesi bëhoho noehu aboji harihu'o jabesi i ujuohoromo ö harihu mio'amë'oho ëho bogo maehu höjo. ²⁸ Bogo maehu höjamu hegorovo rue magonahohuro uehorovoromo uavadeje: Iae na bisemu ioniro sa'a gö raje jevu'ego ëhuni bogo ajemi'i jöho jövajëjo. Röhu noehu bogo rarovego öehu i u gobajo'o ue'aharuëhi nani Iesuro na'o ëhi ejehoromo nasi abojoho ajami'ajëjo. Ëhi uvoromo mana uhu'e uavadeje: Bada iae mae-ëjo röhu i maratu aharire raromarue öho jabumëro aboji harihu'o jabesi i u gobajo'oho iae ue'aharue höjo. ²⁹ Ue'aharue höjamu Iesuro uavadeje: Iae mae uevanuëjo. Ëhuni va'onëjo. A sisëho jasi aboji hesi dëre jioromo iae mami'e höröromo va'ë'e höjo. ³⁰ Ëhi uëvamu hegorovo rue magonahohuro vuonorö'öromo hesi osare va'oromo gavadeje a sisëho mami'e hörö va'i abojoho rõhore raromamu.

Ae gemu hesi hia'e tugohoromo bitare tövë'e jiamu Iesuhu ajamade jöhoje.

³¹ Ëhi'amu Iesuro Tyre amonö jioromo va'oromo Sidon amonö rova'adoho va'o sa'a ihe Ame 10 Jio'amaje Sa'are ë va'oromo nume Galilee e'ure ruvebijadeje. ³² Ruvebijamu gagorovo aëro ae gemu hu'irae baeromo rovareje. Ëa hesi hia'oho tugohë'e o jöho a'o'a'ohë'e jövë'e ae jiadeje. Ëaho hu'irae baeromo rueromo Iesu ëninamiromo uavareje: Jasi övoho hesi sinoro bamego hu mae jiajo. ³³ Ëhi uavamu Iesuro hu'irae baeromo ae aho'obëhe riravaruire jioromo va'oromo jabesi sivue rirarovoromo hesi övo namoho niö'i ë a hesi hia'i gagore rëmö'öjadeje. Rëmö'öromo jijönugoromo sabëro öromo ë a hesi bitaroho rëhahadeje. ³⁴ Bitaroho rëhahonugoromo ö'idöho sioroho garomo ë ahuni hara'uoromo hesi jöëro uavadeje: Epatajo. Ëhesi bëhoho huotovë'oho: Hia'e dadovo'amëjo. ³⁵ Ëhi uavamu gavë'i ë a hesi hia'oho dadovaho'i bitaroho marëromo jöho avoho jövadeje. ³⁶ Jöho avoho jövamu Iesuro ae aho'obëhe uëvadeje: Naehu mu vaejodoho nadi aho majëhirëjo. Iesuhu nijio'iraejëvo'i hijadoho bogo ejahoruomo'i ae ëma majëhibe va'areje. ³⁷ Röhu ae aho'obëhe Iesuare muoho garomo tiöruomadeje. Tiöromo uvoruomadeje: Mue bövie bise'e ma-mabëhe vaejë'e höjo. Mu masije gö gö vaeromo röhu hia'i tugohë'e bitaro tövë'e aribövioho jabu'o avohëvego marë'amoromo jöe heromo jöe atarue höjo.

8

Iesuhu ae aho'obëhe 4,000 i da'uojëhade jöhoje.

¹ Ëhi'amu ae aho'obëhe röhu maho gagovë'ëro ie bogojëvadeje. Ie bogojëvamu gagorovo Iesuro hesi ijorajo ömo'ömohe uëvadeje: Ruehë uëromo rovamu uëvadeje: ² Ave ariböviohuni vavaenegajëjo. Jabumë na'o raromobe rovaroho majae niö'i gemu barëjë'ëro ëhu'ëro i ue'ahoi'iröhoho bogohöjo. ³ Naehu ma-dë gagëremu rëmö'öjamu jabesirëro va'ë'oho nune öri'amobe va'oruomo'ajëjo jabumë ae gö gö öre ëgoro rueruomë'ëro jië'ëro. ⁴ Ëhi uëvamu rue ijorajoho jaburo uavareje: Röhu diehi'oromo ë aribövioho ioho

da'uojëhi'ejarëjo. Aveho a rumo'e sa'ae höjo. ⁵ A rumo'e sa'ae höjamu uëvadeje: Ioho dimino'e jëvájëjo. Dimino'e jëvájëjamu uavareje: Ie övo gö mine övo göre niö'i javuajëjo.

⁶ Èhi uavamu hegorovo Iesuro ae aho'obëhe uëvadeje: Sa'aro raromohëjo. Raromohëromo ie övo gö mine övo göre niö'i ujuoho rovároho èho Iesuro ujuohoromo God huë mae uaromo ato'atovoromo hesi ijorajo ömo'ömoho i'imëmijadeje jaburo suvuorëmijöro. I'imëmamu ujuohoromo ae aho'obëhe suvuorëmijareje. ⁷ Èhi'o'i visu inine ma-gemu gemu Iesure ijorajo jabesirire jiadeje. Jëvamu Iesuro ujuohoromo God huë mae uanugoromo hesi aribövioho uëvadeje: Ave visuohu'o suvuorëmime va'ohëjo. ⁸ Èhi è'è'ëro ae aho'obëhe è ioho ue'ahamu da'uëgadeje. Da'uëgamu gagorovo ijorajoho jaburo i vitu vituoho gagovoromo esöe övo gö mine övo göre niö'i aegamu irijiom'o'amadeje. Èhi'areje. ⁹ Röhu è i visu ue'ahare aribövioho aho'obëhe 4,000 rabu'e jiadeje. Ue'ahoromo Iesuro rëm'ö'ojamu va'oruomadeje. ¹⁰ Va'amu gavë'i Iesuro hesi ijorajo ömo'ömohu'o gemu mae boat-re ajiomoromo Dalmanutha sa'are va'adeje.

Pharisee ariböviehu Iesu bogo ma uehorovoromo huhu darugo'e mu vaejoro dinamare jöhoje.

¹¹ Èhi'amu iae Pharisee ariböviohuro rueromo Iesu jö aho'ahamijareje. Jö aho'ahamiro mo Iesu bijioho ga'i nimarere ga'i hu guaro beva'ego. Èhi nioromo Iesu uavareje: God-are darugoho baeromo bogo gavarue muoho röjahuijego no gavarëjo huro ja ajamego muoho vaejanue javego o bogo. ¹² Èhi uëvamu hegorovo dë vövöbaj'o uhure sisë maro vavaenioromo hara'uoromo uëvadeje: Ave jaruvore raromaruje aribövioho jemë rabëni bogo gavarue muoho ga'i nimarujëjo. Na God-are ae jevego ga'i nadi èhioho uehëjo. Ave jöho na jö mae majëhi'ie'ajëjo. Ave jaruvore raromaruje aribövioho èhi jië'e darugo'e muoho bogo mae bogo ga'arujëjo. ¹³ Èhi uëngoromo rëm'ö'ö'i Iesumëro va'oromo boat-re iojioromo jovo e'u ioni gönö va'i va'areje.

Pharisee aribövi o Herod-are aribövi jabesi i dë huaje oso hesi uhu jöhoje.

¹⁴ Va'oromo hesi ijorajoho jaburo rumonëgamu iruno'oho bogo gö'oho ujuohë'e jiareje. Ioho ma-bisemu urimo jiadohemu èhuremu boat-re jëvadeje. ¹⁵ Ie ma-bisemu jëvamu Iesuro uhu'e uëvadeje: Jemëro gavë'iajo. Pharisee aribövi jabesi o Herod-are i dë huo'amaje osuhuro jemesirire rumorovo'ajëjo. ¹⁶ Rumorovo'ajëjamu rueho jaburo è jöho mevoromo uarovareje: No ie bogojavuo'ego èhuni jövajëjo. ¹⁷ Èhi uarovamu Iesuro gëromo uvadeje: Jabumë è jöho ataruëromo uëvadeje: Jemë rabëni i bogojavua je jöho atarujëjo. Jemë rabëni avevejö'ohu'o bogo gavarujëjo. O rabëni bogo uehorovarujëjo. Na mu ma hesi uehoroho bogojëv'ëro èhu'ëro bogo gavarujëjo. ¹⁸ Jemë nuni'e hia'ie jëvájëjo. Röhu rabëni bogo garomo bogo hejarujëjo. Jemë rabëni ave jö hesi bëhoho bogo uehorovarujëjo. ¹⁹ Naehu ie övo gö mine ujuohoromo ato'atovoromo ae aho'obëhe 5,000 i'imëmodoho jemë è i vitu vituoho aegamu esöe dimino'e irijiom'o'amade höjo. Uëvareje: Esöe aho'obëhe 12 irijiom'o'amade höjo. ²⁰ Èhi uavamu uëvadeje: O naehu ie övo gö mine övo göre niö'i ato'atovoromo ae aho'obëhe 4,000 i'imëmodoho jemë è i vitu vituoho aegamu esöe dimino'e irijiom'o'amade höjo. Uavareje: Esöe aho'obëhe övo gö mine övo göre niö'i èhi irijiom'o'amade höjo. ²¹ Irijiom'o'amade höjamu uëvadeje: Urimo nasi mu bëhi bogo gavarijoho jaruvohu'o jemë rabëni bogo avoho gevaruje höjo na diehi jië'e ae jevajoho.

Iesuhu nuni sisë'e a ajamamu öri ari'o ma-bisemu ma'e ma'e garomo röhu maho ajamamu avoho ga barëjade jöhoje.

²² Èhi'onugoromo Iesu'o hesi ijorajo ömo'ömohu'o èho jaburo Bethsaida amore rovareje. Rovamu aëro nuni sisë'e ae gemu hu'irae baeromo rovareje. Barueromo Iesu èninamiromo uavareje: Ave iaho rëhego nunoho marëjajo. ²³ Marëjajamu Iesuro nuni sisë'e a hesi övore ma'enoromo amore jioromo hu'irae baeromo va'adeje. Hu'irae baeromo va'oromo è a hesi nunoho sabëro ödivoromo övoho nunire bamëvoromo uavadeje: Na ja uherihoromo bövioho bise'oho gavanuëjo. ²⁴ Gavanuëjamu ruehuro nigerohoromo garomo uavadeje: Na sisë'i gavajëjo ae jijihö'i röhu jabesi nu ano'oho ijo va'ëne jio'amo'ego. ²⁵ Èhi uëvamu ruehuro övoho nunire röhu maho bamëvadeje. Bamëvamu röhu maho uherihoromo

avoho garomo bövie bise'e aho'o ma-mae ga'amadeje. ²⁶ Ma-mae ga'amamu uavadeje: Nadi arue amoho vuonorö'ö va'i o öre gö öre göho va'i ma-ahorirëro jasi osaëro va'ëjo.

Iesu hu ëhi jjië'e ae jiaje jö Peter-hu jövade jöhoje.

²⁷ Ëhi ë'ë'ëro Iesu'o hesi ijorajo ömo'ömo'u'o va'areje. Va'oromo Caesarea Philippi amo börömo jiajinö amore amore suorovo'i iojionareje. Örire iojionë'i Iesuro uëvadeje: Na rahuo jevaje jöho ae aho'obëhe diehi atoruomaje höjo. ²⁸ Diehi atoruomaje höjamu uavareje: A ioro'iorohuro uvoruomaje höjo: Ja John bapataeto vaejavuonöväne ahuro rovë'e javajëjo. A ioro'iorohuro uvoruomaje höjo: Ja Elijah-ro rovë'e javajëjo. A ioro'iorohuro uvoruomaje höjo: Mami gö'e jö God-aro baeromo majëhinövarijohuro röhu jero gemuëro rovë'e javajëjo. ²⁹ Ëhi uavamu hegorovo Iesuro uëvadeje: Röhu jemë nasi jöho diehi ataruje höjo. Diehi ataruje höjamu Peter-ro ri'öromo uavadeje: Ja böröme namiromo ajamuijanue aho javajëjo. ³⁰ Javajëjamu uëvadeje: Ëjöhö nadi aho huruho majëhirëjo.

Iesuhu huë vavaeni baeromo guomoröhe jö jövadohoje.

³¹ Ëhi'onugoromo Iesuro aevoromo hesi ijorajo ömo'ömo'u'o röjëhiromu uëvadeje: God-ro ëhi bamë'ëro ëhu'ëro hesi A Maho naro vi'ehe huë vavaene bövie bise'e bae'ëjjo. Jew rajo a duvahö ömo'ömo'u'o priest masijoho jögoru öri röjëhijarue aribövioho ëho jaburo na bijönegoruomajëjo. Bijönegoruomajëjo aëro anegoi'ramu guomevo'ajëjo. Guomoromo majae niö'i gemu hesi uhure i'ovoromo ri'ö'ëjjo. ³² Ëjöhö Iesuro bogo subivëho'i ma-sama'e röjëhijadeje. Röjëhijamu Peter-ro Iesu rori'o hu'irae bava'oromo uavadeje: Ëhi jjië'e jöho nadi jövëjo. ³³ Nadi jövëjamu Iesuro huotorovoromo hesi ijorajo ömo'ömo'u'o gëromu Peter uavadeje: Satan rori'o va'ëjo. God-hu uehorovajëhioho ja bogo ëhioho uehorovo'i ma-aehu uehorovaruëhi jero ëhi uehorovoromo ëhuni ë jöhö jövanuëjo.

³⁴ Ëhi uënuigoromo Iesuro hesi ijorajo ömo'ömo'u'o a ioro'ioroho aho'obëhe ëhu'o uëvadeje: Ruehë uëromu rovamu uëvadeje: Ae rahuaru nasi ijore ijore jijihö'i nimë'o'ho jasi sinehu nimajoho nadi uehorovo'i uvonëjo: Iesuare jöëni vi'ehe huë vavaene javoje rabe baeromo guomevë'o'ho iae hesi hö uvoromo korosi hesi i'uo'ho banigojiomanovoromo nasi ijoro ijoro juvonövonëjo. ³⁵ Ja jasi sinohuni uehorovoromo biririvoromo ave sa'are hi'i ëhemu uehorovë'o'ho ijönöho guomo öriro va'a'anuëjo. O ja nasi jöëni o nasi jö ma hesi jöëni guomë'o'ho ijönöho maro hi'a'anuëjo. ³⁶ Jaehu are jove sa'ae mae sisë aho'obëhe bae barë'i röhu jasi arijo'arije ijumorovë'o'ho na ja ëhuro mae javo'ajëjo. Bogajo. ³⁷ Arijo'arije ijumorovë'o'ho diehi röhu maho avohorovo'iramu mae javo'ajëjo. Öre bogohöjo. ³⁸ Ëhesi bëhoho ave jaruvore raromarue aribövioho sisë ariböviëro jioruomë'ëro bogo God gemu uehorovo'i mue gö gö uehorovoruomaje höjo. Jabumë ae rahu nasi jöëni o naehu majëhijaje jö hesi jöhuni javojëgë'o'ho u'emu God-are A Maho naro maemu jjië'e anera ömo'ömo'u'o nasi Vavu hesi ajohu'o rue'iramu evare nani javojimoruomade ariböviohuni javojego'ajëjo.

9

¹ Ëhi uënuigoromo uëvadeje: Ave jöhö na jö mae uë'ië'ajëjo. Jemë a ioro'iore ave riravarujoho bogo vuovë'e raromoromo ga'a'arujëjo God-hu böröme namiromo hesi darugehu muebejaje ajoho rue'iramu.

Iesuare nu ano'ehu ajivoromo gorosovade jöhoje.

² Ëhi'oromo majae aho'obëhe övo gö mine övo göre gemu barëjamu Iesuro Peter James John ëhi söromo dahoru ëgobövire ajiomoromo jabesi sivue hahagu raromareje. Raromoromo ë ijorajoho jaburo gavareje Iesuare sino haho'e gorosovoromo ³ niögohö ajivo avohamu. Sa'are raromarue aribövioho noro niöge u'o'ibejo bogo ëhioho ajivo'ibejo. Iesuare niögohuro ëhi ajivamu gavareje. ⁴ Ëhi ga'i gavareje a mami ae niö'i Elijah'o Moses'o ëma jëvoromo jahu'o Iesu'o jöe atoruomamu. ⁵ Jöe atamu gëgorovo Peter-ro Iesu uavadeje: Tisa no ave raromaruoho iae mae höjo. Uövuego no javu harihe niö'i gemu vae'amarëjo jani gemu Moses-ni gemu Elijah-ni gemu. ⁶ Peter-hu ëhi uavade hesi bëhoho

Peter James John ëho jaburo sisë maro juhuonirovël'ëro jö ma diehi jövo'iröhoho Peter dadivamu ëhuni ëhi jövadeje. ⁷Ëhi jövoromo Iesuare ijorajoho jaburo gavare suehuro Iesumë aegëhamu gagorovo hejareje sue uhure uvavamu: Ave aho nasi Harihu mabëhe höjo. Huhu jövaje jöho avoho herëjo. ⁸Ëhi uvamu hejël'i Iesuare ijorajoho jaburo ruaroho numiaroho uheriho'i gavareje Moses'o Elijah'o bogojëvo'i Iesuro gemuëro ë jabesi bëhire namijamu.

⁹Ëhi'oromo dahorure ruvebijël'i Iesuro uëvadeje: Jemëhu gavarijoho nadi aho huruoho majëhirëjo. U'emu God-are A Maho naro guomoromo ri'öjogo evaro majëhirëjo. ¹⁰Ëhi uëvamu rue ijorajoho jaburo iae ejahoromo Iesu gorosovamu gavare jöho subivëhobe va'areje. Röhu jabesi sivue atoromo uarovareje: Guomoromo ri'ö'iröhëro uövuaje jö hesi bëhoho rabe höjo.

John bapataeto vaejaje aehu rovadoho ëho Elijah-hu rovanovade jöhoje.

¹¹Ëhi uarovoromo jabumëro Iesu uavareje: Jew rajo nosi jögoru öri röjahuijarue ariböviohuro uövuare höjo: God-are a börömohe bogo ëma rue'i hu rue'ie'iroho a mami ae Elijah God-arire va'adohuro vuonorö'ö rue'a'ajëjo. Rue'iramu God-are a börömohe ijore rue'a'ajëjo. Jögoru öri röjahuijarue aribövioho rabëni ë jöho majahuijarue höjo. ¹²Rabëni majahuijarue höjamu Iesuro uëvadeje: Io'ajo. Elijah-hu urimo rueromo bövi bise'o avoho'amo'iröhe jöho iae mae-ëjo. Röhu ave jöhu'o God-are surire jajivoromo uvë'e höjo: Aëro God-are A Maho nörö nue huodivoromo sisë vae'iramu vi'ehe huë vavaene bövie bise'e bae'a'ajëjo. Ëhi jajivë'e höjo. Ëjöho bogo ëma jajivo'i iae mae jajivare höjo. ¹³Röhu naro ave jöho jemë uhu'e uë'ie'ajëjo. Hehëjo. Elijah iae mami'e öre avoho'i rovide höjo. Rovamu jaburo diehi nimarëhi ëhi hesi örire sisë vaeruomade höjo. Ëhi ë'iröhe jöhu'o God-are surire jajivë'e höjo.

Iesuhu Satan-are a sisë aharihu hesi dëre jiamu rarovö'öjade jöhoje.

¹⁴Ëhi uënuigoromo Iesu Peter James John ëho jaburo dahorure ruvebijareje. Ruvebiromo Iesuare ijorajo ioro'ioro jabesirire rue'i gavareje ae aho'obëhe jabesi bëhire gagovoromo riravo rova'o rojomo'i Jew rajo jögoru öri röjëhijarue ariböviohuro Iesuare aribövi jabesi jöho aho'ahëmijamu. ¹⁵Ëhi jië'ëro ae aho'obëhe gavare Iesu rovamu gagorovo tiöjëvadeje. Tiöjëvamu Iesu ma-burëro bihoromo jeamiruomadeje. ¹⁶Jeamijamu Iesuro uëvadeje: Jemë rabu jöe nasi ariböviohu'oho atarujëjo. ¹⁷Atarujëjamu ae gemuëro uavadeje: Tisa na nasi harihoho jasi örire barovode höjo. Ëhesi bëhoho Satan-are ae gemuëro hesi dëre abo hiromo hesi bitaroho tövahë'e höjo. Ëhi jië'e aru'ahoho hesirire höjo. ¹⁸Hesirire jië'ëro nasi harihu hesi simano huotovahë'iroho ijumahego jue'i sa'are behumorovaje höjo. Behumorovoromo jö'onö obohu tatogo'e rueromo ane vuogigimoromo biriri'övaje höjo. Ëhi'ajego naro jasi ijorajo ömo'ömoho uëvode höjo: Aru'aho sisëhu rarovö'öhego va'ajo. Ëhi uëvamu rarovö'ö'i ë'ö gavaroho bogo eni jëvade höjo. ¹⁹Bogo eni jëvade höjamu Iesuro uëvadeje: Asë'e ave jaruvore rarumaruje aribövioho jemë bogo ma uehorovaruje aribövie jëvajëjo. Na majae dimino'e jemë'oho hibe va'ejöjo. Majae dimino'e jemesi mu sisëho garomo ma-nunëro ga taemobe va'ejöjo. Jemesi uehoro sisëhuro na u'uvevajëjo. Ëaharihoho barovego na gavöjo. ²⁰Na gavöjamu rueho jaburo aharihoho hu'irae rovareje. Rovamu uhure a sisëhuro Iesu garomo ma-burëro dë vövöbajo'oho ijumahamu simane sisëreromo bijöbijövoromo övo'o höru'o ajiomoromo sa'are behumorovoromo jö'onö obohu tatogo'e rueromo ubiri'ubirivadeje. ²¹Ubiri'ubirivamu gagorovo Iesuro vavuoho uavadeje: Divare aevoromo simanoho sisërëbe rovade höjo. Sisërëbe rovade höjamu uavadeje: Asisö'o jiadevare evare aevoromo ëhi jiobe rovade höjo. ²²Röhu uhure a sisëhuro majae aho'obëhe ijumo avoho'i nimego simane huotovahego vënire jovore ëma ravorovaje höjo. Röhu ja eni javë'oho nosi jöëni vavaenimoromo ajamuijëjo. O bogo eni javego ëhuro vuonugëjo. Vuonugëjamu Iesuro uavadeje: ²³Ja rabëni uvanuëjo: Nani nörö bogo eni höjo. Ae rahu God mae uehorovë'oho God-hu ëhi jië'e ariböviohuni bövi bise'o vae'iröhoho eni höjo. ²⁴Eni höjamu rue vavuohuro ma-darugo'o uvadeje: Iae na ma-bisemu mae uehorovajëjo. Ajemego na mae uehorovo avohöjo.

²⁵ Ĕhi uavamu heromo Iesuro gavade rue ariböviohuro aho'obêhe tutubijiohoromo ruê numê hu baba'amo'i rueruomamu gëgorovo uhure a sisêho birevoromo uavadeje: Aru'aho sisê a jabisirire abueromo bitaro tövêhoromo hia'li tugohêhanuoho naro ja uavajêjo: Hôrôromo va'êjo. Ijoho bogave gemu vuonorö'ö abue'iranêjo. ²⁶ Ĕhi uavamu hegorovo rue uhure a sisêhuro jö'e dadovoromo aharihu hesi simanoho huotovahamu bijöbjövöromo sisê maro övo'o hörü'o ajiomadeje. Sisê maro övo'o hörü'o ajiomamu uhure a sisêhuro hörôromo va'amü aharihoho guomo barêjê'e sinoho va'êne raromadeje. Ĕhi raromamu ae aho'obêhe uvoruomadeje: Ĕiaho mami'e guomê'e hõjo. ²⁷ Guomê'e hõjamu Iesuro aharihoho övore ma'enoromo nigemamu ri'öjadeje.

²⁸ Ĕhi'amü Iesuro va'o osare hijamu hesi ijorajoho jaburemu hu'o raromoromo uavareje: Diehi'oromo noehu aru'aho sisê rarovö'öjaroho bogo eni javuade hõjo. ²⁹ Bogo eni javuade hõjamu Iesuro uêvadeje: Ĕaharihu hesi dère jiade êhi jiê'e a sisê ae gö hesi dère jiajoho rarovö'ö'ie'iroho God-are örire êninamijê'ohuro êhuro rarovö'ö'amo'arujêjo. Öri göho bogo'e hõjo.

Iesuhu guomoröhe jö röhu maho majêhijade jöhoje.

³⁰ Ĕhi'onugoromo Iesu'o hesi ariböviohu'o ê sa'aho vuonugo'li va'areje. Va'oromo Galilee sa'are ma-saginiéri jijihoruomadeje aëro Iesu gajöëni. ³¹ Ĕhesi bêhoho huro hesi aribövioho röjêhibe juvoromo uênövadeje: God-ro êhi bamê'ëro hesi A Maho na a jabesi övore va'oromo anego'iramü guomo'ejjõjo. Guomoromo majae niö'i gemu hesi uhure ri'ö'ejjõjo. ³² Jõho êhi röjêhamu bêhoho bogo he'irögoru juhuoninêgamu bogo ua gavareje.

Di aehu a ioro'ioro iosirêmiromo böröme jiaje jöhoje.

³³ Ĕhi'oromo Iesumëro Capernaum amore rovareje. Rueromo osare va'o raromoromo Iesuro hesi aribövioho uêvadeje: Jemê rabu jöe öriroho atobe rovareje hõjo. ³⁴ Atobe rovareje hõjamu jörumoraearajeje ê hesi bêhoho örire rueromo atoromo uarovê'ëro: Iesuare ijorajo ömo'ömocho di aho börömocho javuajêjo. Ĕhi uarovobe rovê'ëro jörumoraearajeje. ³⁵ Jörumoraearjamu Iesuro sa'aro hiromo hesi aribövi 12-ho jaburo ruejõro uvêvamu rovareje. Rovamu uêvadeje: Ae rahu a ioro'ioro iosirêmiromo nunire nami'li uehorovê'oho uvonêjo: Na a ioro'ioro jabesi dejonö namijajëromo jabesi muoho vaejêhonövönêjo. ³⁶ Ĕhi uênugoromo Iesuro va'o aharihoho viêhi jabesi nunire baro gurasijjimo namiromo uêvadeje: ³⁷ Ae rahu aviêhi jiê'e asisö'oho gemu nasi ihore rajahiromo baejê'oho êhuro na'ö rajehiromo baejevorumaje hõjo. O ae rahu na rajehiromo baejevê'oho êhuro bogo na gemu rajehi'li remö'öjamu rovode ahu'o rajahiruomaje hõjo.

Ae rahu jemê'o bogo iro muorovo'e vaejê'oho jemê'o gemuore jiaje hesi jö Iesuhu jövdohoje.

³⁸ Ĕhi uêvamu John-ro ri'öromo uavadeje: Tisa no gavare hõjo ae gemuëro jasi ihoho uvoromo aru'aho sisê a jabesi dêroho rarovö'öjêvamu. Rarovö'öjêvamu garomo röhu gavare hu bogo no'ö juvaje aho jiamu gagorovo uavareje: Vuonugêjo. ³⁹ Vuonugêjamu Iesuro uêvadeje: Nadi êhi jiê'oho ê'orêjo. Ae rahu nasi iho uvoromo darugo'e mu vaejê'oho bogo burêroho huotorovoromo nasi jö sisêho aho majêhi varijênoho hõjo. ⁴⁰ Ae rahu nosi örire bogo bijönimê'oho ê aribövioho nosi aemo'aeme jioruomajêjo. ⁴¹ Röhu ave jõho na jö mae uê'ie'ajêjo. Ae rahu jemê gëromo uvê'oho: Jemê Keriso-are aribövie jêvajëromo ma-bisemu ajêmiromo enatuore jovo bojêmjê'oho jabu iae manaho ujuohoruomo'ajêjo.

God uehorovarue mu ijumêharue aribövi jabesi jöhoje.

⁴² Ae göëro asisö'onö'e jörume hiromo nasi örire mae uehorovevo'ajêjo. Ĕhi'o'iramü ae göëro ê aho mu sisê röjahiromo êhuro na mae uehorovevaje muoho ijumaho'ajêjo. Ijumahoromo i'u sisêho bae'a'ajêjo. Mu sisê bogo röjahijajevare evare ê mu sisê röjahijaje a hesi sönö'ahore aëro i'u'e munê hitahiohuro tövoromo sö jovore ba'amego e'ure beva'oromo guomo'ibejajo êho ma-jianovo'ibejajo. A'li ê mu sisê röjahi'iröhe ê hesi i'uocho börömo bêhe bae'a'ajêjo. ⁴³ O jasi övehu mu sisê vaeromo God uehorovanue mu vuonugo'ie'iroho övoho tariö'önêjo. Ja öve gemu javamu ijönö va'oromo mare hijê'oho êhuro mae javo'ajêjo. A'li öve niö'li javamu ijönö God-hu ramö'öjamu ravemu ravaje vênire

va'el'oho ehuro sisē behe javo'ajējo. ⁴⁴ [Ēdirō'ore huiniuhuro bogo vuovo'i a sine ma-ue'ahemu ue'ahego vēnoho bogo duorohego ē dirō'ore aho vi'ehoho ma-baemu baejarue hōjo.] ⁴⁵ O jasi hōrehu mu sisē vaeromo God uehorovanue mu vuonugo'iē'iroho hōroho tariō'ōnējo. Ja hōre gemu javamu ijōnō va'oromo mare hijē'oho ehuro ja mae javo'ajējo. A'i hōre niō'i javamu ijōnō God-hu ramō'ojamu vēnire va'el'oho ehuro ja sisē behe javo'ajējo. ⁴⁶ [Ēdirō'ore huiniuhuro bogo vuovo'i a sine ma-ue'ahemu ue'ahego vēnoho bogo duorohego ē dirō'ore aho vi'ehoho ma-baemu baejarue hōjo.] ⁴⁷ O jasi nunehu mu sisē vaeromo God uehorovanue mu vuonugo'iē'iroho nunoho jahonējo. Ja nune gemu javamu ijōnō va'oromo God-are aharire hijē'oho ehuro mae javo'ajējo. A'i nune niō'i javamu God-hu ramō'ojamu vēnire va'el'oho ehuro ja sisē behe javo'ajējo. ⁴⁸ Ēdirō'ore huiniuhuro bogo vuovo'i a sine ma-ue'ahemu ue'ahego vēnoho bogo duorohego ē aho vi'ehoho ma-baemu baejarue hōjo.

⁴⁹ Sōēro ioho hu'ihego ehuro ioho bogo sisērē'i mae jiaje hōjo. Sōehu i hu'ihego i bogo sisērē'i mae jiajēhi ēhi ae aho'obēhe jemē vēnēro ravēvanovoromo vi'ehe bae'a'arujējo ehuro jemesi dē vōvōbajo'oho bogo sisērējēho'i ma-mae jēvorōhego. ⁵⁰ Sōho rihu'e mabēhe hōjo. Rōhu sō hesi rihu barējē'oho rōhu bogo maho avoho hesi hōjo. Ēhuni nasi rihu'e jōho ma'eno'i nadi boremi'ōrējo. Nadi boremi'ō'i nadi iro muorovo'oho vae'i ma-huē baerovorējo.

10

Vaboro'o baru'o gemuoho jēvaje jōhoje.

¹ Iesuro jōho ēhi majēhinugoromo ē sa'aho vuonugo'i va'adeje. Va'adoho va'o Judea sa'are va'oromo Jordan beromo ioni gōre ajiomadeje. Ajiomamu gagorovo ae aho'obēhe hesi ōrire rōhu maho ro gagovareje. Gagovamu hūro urimo ē'ajēhi ēhi God-are jōe rōjēhijadeje.

² Rōjēhijamu Pharisee aribōviohuro rueromo Iesu guaro beva'ojōro uaruomadeje: Vaboro nugō'ō'amo'irōhe jōgoru hesi jōho no he'i naguajējo. Aehu vaboro nugō'ōjē'oho ēhi jiē'oho na mae o sisē hōjo. ³ Na mae o sisē hōjamu Iesuro uēvadeje: Rōhu Moses-hu jajivoromo bojēmade jōgoroho diehi hōjo. ⁴ Diehi hōjamu uavareje: Moses-ro jajiv-oromo uōvū'e hōjo: Nugō'ō'i nagē'oho nugō'ō'irane jōho suroro jajivoromo vaboroho bojamiromo evaro nugō'ōnējo. ⁵ Ēhi uavamu uēvadeje: Iae ēhi hōjo rōhu jemē hia'i biriri'e aribōvie jēvobe rovē'ego ēhuni Moses-ro ē jōgoroho jemēni jajivēhade hōjo. ⁶ Rōhu aevo'i God-hu bōvi bise'lo bamade majaroho bogo ēhioho jio'i ē hesi jōho God-are surire ēhi uvē'e hōjo: God-ro aevoromo ahu'o magonahohu'o bamēvade hōjo. ⁷ Ēhu'ēro jiē'ēro aēro vēmu vavu'oho rēmō'ō'i vaborohu'o gemu mae hi'a'ajējo. ⁸ Vaborohu'o hi'iramu jabumē niō'i jēvadoho rōhu gemu jio'a'ajējo. Ēhi uvē'e hōjo. Ēhu'ēro jiē'ēro ē ahu'o magonahohu'o bogo hahagu hahagu jio'i ma-gemu jēvo'ajējo. ⁹ God-hu mami'e gemuore havoromo muohadoho jemē ma-ae jēvaje nadi tarivorējo.

¹⁰ Ēhi uēnugoromo hu'o hesi ijorajo ōmo'ōmohu'o vuonorō'ō va'o osare raromoromo ijorajoho jaburo Iesu uavareje: Vaboro nugō'ō'amarue jōho rōhu maho majahuijego no hejarējo. ¹¹ Hejarējamu Iesuro uēvadeje: Baruehu vaboro nugō'ō'i gō masuvē'oho ēho goho'amarue muoho vae'a'ajējo. Ēhuro vaboro maho ijumo'ajējo. ¹² O vaborehu baru nugō'ō'i gō masuvē'oho ēho bogo maho masu'i goho'amarue muoho vae'a'ajējo. Ēhi uēvadeje.

Iesuhu hesi ōvo asisō'o inino jabesi sinore bamēhade jōhoje.

¹³ Ēhi uēvē'ēro aēro asisō'oho sō ujuoho rueruomadeje Iesuro ōve jabesi sinore bamēhō-jōro. Ujuoho rovamu gēgorovo Iesuare ijorajo ōmo'ōmohuro birēgoromo uēvareje: Asisō'oho nadi aveho sō ruehējo. ¹⁴ Ēhi birēgamu hegoro Iesuro dē vōrōnimamu hesi aribōvioho uēvadeje: Nadi ahēvo'i uēhego rueruomajo. Ēhi jiē'e asisō'o va'ēne jōrume raromē'e aribōvioho God-ro bōrōme namiromo muebejēvego hesi ahariremu raromoruomaje hōjo. ¹⁵ Ave jōho na jō mae uē'ie'ajējo. Asisō'o ininehu bogo sivu uehorovo'i God-hu

muebejavuajoho mae hö uvaruëhi ae rahu bogo ëhi uvë'oho ë God-are ahariroho bogo va'o raromo'aruëjo. ¹⁶ Ëhi uënuigoromo ë asisö'oho huohudë'amoromo övoho jabetesi simanore bamëhoromo uëvadeje: God-ro huë mae bojëmi'ajëjo.

Bövi bise'o marohë'e a hesi jöhoje.

¹⁷ Ëhi ë'ë'ëro Iesuro ri'öromo örire va'adeje. Va'amü ae gemüero tutuvo rueromo hesi bëhire ague aho hiromö uavadeje: Tisa ja a mae javajëjo. Na diehi'oromo ioro'ioerumuoho maroho hi'ejöjo. ¹⁸ Maroho hi'ejöjamu uavadeje: Jero na uevanuëjo: Ja a mae javajëjo. Iae mae höjo röhu hesi God gemu a maho höjo. ¹⁹ Röhu mae hi'iranëro ue gevanuoho ja God-are jögoroho iae gavanue höjo. Nadi aho anonëjo. Nadi goho'amonëjo. Nadi vajiohoho baenëjo. Nadi sarerile jöho aho majëhinëjo. Nadi sareri sarerioho ë'oromo vajiohu muoho vaenëjo. Jasi vëmoho vavuoho mae uehorovëvonëjo. Mae hi'irane öroho ëhi höjo. ²⁰ Öroho ëhi höjamu uavadeje: Tisa iae mae-ëjo röhu na asisö'o'ere aevoromo jö ebe rovodoho jaruvohu'o ëhi gemuoho ë'aje höjo. ²¹ Ëhi uavamu hegorovo Iesuro hu garomo hesi örire dë vövöbajö'e aho'o uehorovoromo uavadeje: Iae ëhi höjo röhu müe gemu bogo vaej'ëro javë'ëro ëhu'ëro ja bogo eni javajëjo müe hiemu hi'iranoho. Va'oromo jasi inömohe bövioho bise'oho imo'amoromo monioho baeromo inömo bogo eni jië'e aribövioho suvuorëminëjo. Ëhi ë'ë'oho bövie bise'e maho maho janioho ö'idöre jiaho'ajëjo. Ëhi'oromo rueromo nasi ijoro ijoro juvonövonëjo. ²² Ëhi uavamu hegorovo rühuro hesi uehorovoromo uvadeje: Na bövie bise'e börömo mae jev'ëro suvuorëmi'irodoho na bogo eni jevajëromö vavaenimoromo nu ano'e sisëëromö va'adeje.

²³ Va'amü gagorovo Iesuro uherihoromo hesi ijorajo ömo'ömohe gëromö uëvadeje: Bövi bise'o marohë'e ariböviohu God-hu müebejaje öri ari'ere va'ë'oho anoji'e mae jio'a'ajëjo. ²⁴ Ëhi uëvamu rue ijorajoho jahu jöe barëjëvadeje. Jöe barëjëvamu Iesuro röhu maho uëvadeje: Aganomë God-hu müebejaje aji'e öri ari'ere va'iröhoho anoji'e mae höjo. ²⁵ Mi börömo anugo gagore nug'ö'jë'oho ja bogo eni javo'ajëjo. Röhu ëhi ë'ë'oho samae jianovo'i a'i bövi bise'o marohë'e ariböviohu God-hu müebejaje öri ari'ere va'iröhoho ëho anoji'e mae höjo. ²⁶ Ëhi jövamu heromö tiötiövoromö uavareje: Ëhi jië'oho no diehi'oromo maromö va'ëjarëjo. No ae aho'obëhe bogo eni javuajëjo. ²⁷ Bogo eni javajëjamu Iesuro ërimëhoromö uëvadeje: Io'ajo. Jemë aëro jëvë'ëro bogo eni jëvajëjo. A'i God-hu öri avohëhë'oho hu eni höjo hu müe aho'obëhe vaej'ë'oho eni jiajëro jië'ëro.

²⁸ Ëhi uëvamu hegorovo Peter-ro ri'öromo Iesu uavadeje: Aveho gavëjo. Noro bövie bise'e nosiroho vuonugo'i jasi ijore ijore jijihë'e javuajëjo. ²⁹ Jijihë'e javuajëjamu Iesuro uëvadeje: Ëho iae mae höjo. Aveho na jö mae uë'ie'ajëjo. Ae rahu javue öe ma'ine vëme javue aboji harihu'e o sa'ae vuonugo'i nasi jöëni va'oromö nasi jö ma a majëhijë'oho ³⁰ ëhi jië'e aribövioho jemë jemesi bövioho bise'oho ëho ma-bise'e vuonugarije höjo röhu avevejö'e ave sa'are bövi mae bae'a'arujëjo. Javue aho'o ö ömo'öme aho'o ma'ino ömo'öme aho'o vëmu ömo'öme aho'o aboji harihu'e aho'o sa'ae aho'o bae'a'arujëjo. Ëhi bae'a'arujëjo röhu aëro nasi jöëni huë vavaenohu'o bojëmi'iramu bae'a'arujëjo. Röhu majae ijönö jemë ma-ioro'ioeromu maro raromö'arujëjo. ³¹ Ëhi höjo röhu a ioro'ioere aho'o nuninö jiaruoho dejönö jio'i a ioro'ioere dejönö jiaruoho nuninö jioruomö'ajëjo.

Iesuhu guomoröhe jö urimö vae niö'i majëhijadoho ijönö röhu maho majëhijade jöhoje.

³² Ëhi ë'ë'ëro Iesu'o hu'o va'arue ariböviohu'o ëho jaburo Jerusalem amö börömore ajiomö'i örire va'areje. Iesuro urimö va'i hesi ijorajo ömo'ömohe uehorö böröme baebë hesi ijore va'i a ioro'ioroho aho'obëhe jaburo jabetesi ijore juhuonivobe va'oruomadeje. Va'oromö Iesuro hesi ijoraje 12-ho röhu maho rori'o sö va'oromö aehu hesi örire diehi jië'e mü vae'iröhe jöho majëhiromö uëvadeje: ³³ Aveho hehëjo. No Jerusalem amore ajiomaruëjo. Ajio ë raromoromö God-ro hesi ëhi bamë'ëro hesi A Maho naro priest masijo jabetesi övore Jew rajo jögoru öri röjëhijarue a jabetesi övore va'iramu baejevo'aruëjo. Baejevoromö nasi jöho mevo garomö uvoruomö'ajëjo: Nörö sisë'e aego guomö'a'ajëjo.

Guomo'a'ajëromo na baejevoromo sa'a göre jioromo rovere aribövi jabesi övore bo-jëmi'iramu baejevoromo ³⁴ sivegoromo sabëro ödegoromo hisuebijevoromo anego'iramu guomevo'ajëjo. Guomoromo majae niö'i gemu hesi uhure ri'ö'ejöjo.

James'o John'o masije rirarovo'i Iesu ua gavare jöhoje.

³⁵ Èhi uëvë'ëro iae Zebedee-are harihe niö'i James'o John'o rueromo Iesu uavareje: Tisa no naguajëjo noehu rabu jö ua ga'ie'aruëhi jero ëhi ë'iranego. ³⁶ Èhi uavamu uëvadeje: Naro rabe ë'ëhojoro uevarujëjo. ³⁷ Rabe ë'ëhojoro uevarujëjamu uavareje: No naguajëjo jaehu jasi aj'e öri ari'ere hijë'i'iroho jero uövuego no ö'o jasi bëhire masije rirarovoromo noro göëro jasi övo manö göëro jasi övo adonö ëhi ari'iröhëro. ³⁸ Èhi uavamu uëvadeje: lae ëhi höjo röhu jemëhu ue gevaruje jö hesi bëhoho jemë bogo gavë'e ëma uevarujëjo. Na gavajëjo ajuo'e jovo sisëhu ajuevanovo'iröhoho jioromo nasi örire jovëro rovanovo hesi jio'ego. Èhi jië'e huë vavaeni bae'irarijoho na jemë'o eni jëvajëjo. ³⁹ Eni jëvajëjamu uavareje: lae no eni javuajëjo. Èhi uavamu Iesuro uëvadeje: lae mae höjo. Na ajuem'i'iröhe jovo sisëhuro jemë'o ajüemi'ajëjo. O nani rueröhe jovohuro jemëni rue'a'ajëjo. ⁴⁰ Röhu nasi bëhire övo manö o övo adonö ari'irarije jö uë'irodoho ëho bogo nasirehu höjo. Hesi God-hu a rahumëni uvoromo nugade röhoho ë aho jaburemu nasi bëhiroho ari'a'aruëjo.

⁴¹ Èhi'amu Iesuare ijorajo ioro'ioroho 10 jaburo hejareje uvavamu: James'o John'o Iesuare bëhire böröme rirarovo'i uvare höjamu hegorovo jabesi örire dë vörönimoruomadeje. ⁴² Dë vörönimoruomamu gagorovo Iesuro hesi ijorajoho aho'obëhe uëvadeje: Ruehëromo rovamu uëvadeje: lae jemë'o gavarujëjo. Sa'a ioro'ioro rajëro uvoruomaje höjo: Èa masijohuro no muebejavuarue höjo. Èhi höjo röhu ë a masijoho jaburo jabesi aribövioho ruahö'öjëvoromo jabumëremu masije riravarue höjo. O jabesi bëhire riravaruohuro ëhi taemëvoromo jöe bojëmijarue höjo. ⁴³ Sa'a ioro'ioro rajohuro ëhi ë'arue höjo. Röhu jemë'o nadi ëhioho döroho bamorovorëjo. A'i jemesi ae gemu rahu bövie nami'i nimë'oho hu a ioro'ioro jemë ajëminövo'iröhe ae jio'a'ajëjo. ⁴⁴ O jemesi ae gemu rahu nunire jio'i nimë'oho hu a ioro'ioro jemesi mu vaejëhonövo'iröhe ae jio'a'ajëjo. ⁴⁵ Èhesi bëhoho God-are A Maho na'o ae ajëmi'i ëhuni rovode höjo. Naehu rovode hesi bëhoho bogo aëro na ajemi'irarijogo rue'i a'i narö ae ajëmiromo nasi arijo'arije bojamirovoromo guomorovoromo ëhuro ae aho'obëhe sisëhu tövëvajoho jiovo rëmö'ö'irodëni ëhuni rovode höjo.

Iesuhu Jericho amo vuonugoromo va'i nuni sisë'e a ajamade jöhoje.

⁴⁶ Èhi'oromo Iesumëro va'aroho va'o Jericho amore suovorareje. Suorovë'ëro Iesu'o hesi ijorajo ömo'ö'mohu'o a ioro'iorohu'o aho'obëhe ëho jaburo Jericho amoho nugoromo va'i ë'areje. Röhu Timaeus-are harihe Bartimaeus öri ionire hijë'e jiadeje. Hu nuni sisë'e aëro jië'ëro hiromo maëni sisëni ëninëminövadeje. ⁴⁷ Èahuro öri ionire hiromo hejade uvoruomamu: Rova'aje aho Nazareth amo raje Iesu hö uvamu hegorovo ma-darugo'o uvo'i hijadeje: David-are ujoho böröme javaje Iesu jero nani vavaenimëjo. ⁴⁸ Vavaenimëjamu hegorovo ae aho'obëhe jaburo birevoromo uavareje: Jöe vuonugëjo. Jöe vuonugëjamu hejë'i röhu maho darugo ma'o uvo'i hijadeje: Hë David-are ujoho nani vavaenimëjo. ⁴⁹ Èhi uvo'i hijamu hegorovo Iesuro va'adoho vuonugo'i ë namiromo uëvadeje: Uvohego rovajo. Rovajamu rueho jaburo ë nuni sisë'e aho uavareje: lae mae höjo. Ri'öromo rovëjo. Arue ahuro uvajëjo jero ruejoro. ⁵⁰ Èhi uavamu hejë'i ruehuro döre ba'amade niögohö jaho bu'öromo ma-burëro ri'öromo Iesuaro va'adeje. ⁵¹ Va'amu Iesuro uavadeje: Naro diehi ajamijoro nagajëjo. Nagajëjamu rue nuni sisë'e ahuro uavadeje: Bada ajemego na nune dadovoromo uherihöjo. ⁵² Uherihöjamu Iesuro uavadeje: lae mae höjo. Va'ëjo. Jero God mae uehorovamu ëhuro marëjavë'e höjo. Èhi uavamu gavë'i ma-burëro uherihadeje. Uherihoromo Iesuare ijore örire va'adeje.

¹Iae Iesumëro va'lo Jerusalem bëhire va'oromo Olives Dahorure iojioromomo Bethphage amo o Bethany amo jiajinö ë rovareje. Rueromo Iesuro hesi ijorajoho niö'i rëmö'oromo ²uëvadeje: Arue jemesi nuninörire amohuro va'ohëjo. Va'lo hörö'i ga'arujëjo donkey harihe bise'ego aehu döre bogo hiromo va'aruoho benugë'e jio'iramu. Benugë'e jiego jiovoromo hu'irae ruerëjo. ³O aehu uëvë'oho: Jemë rabëni jiovarujë uëvë'oho uërëjo: Badaro ave mioho nimo'ego ëhuni jiovaruëre. Huro mu nimadoho vaeromo iae ma-burëro sionëro nugö'ö'ajëre.

⁴Ëhi uëvamu va'oromo gavareje donkey harihoho öri börömore javue gemu nami'ego ë ojanore benugë'e jiamu. Benugë'e jiamu gagorovo jiovarëje. ⁵Jiovamu gëgorovo ë bëhire riravare aribövioho jaburo uëvareje: Jemë rabëni donkey harihoho jiovarujëjo. ⁶Rabëni jiovarujëjumu Iesuhu uëvadëhi ëhi majëhijareje. Ëhi majëhijamu ruoho jaburo uëvareje: Iae mae höjo. Bava'ohëjo. ⁷Bava'ohëjumu hu'irae barueromo jabesi niögoho mi dejore ruaho'amo bahijamu Iesuro ë ajio hijadeje. ⁸Hiromo va'amu gavë'i ae aho'obëhe a ioro'iorohuro niögoho örire ahahobe va'i a ioro'iorohuro mure ijo rude tarivë'ëro ahahobe va'areje. ⁹Va'oromo Iesuarë nuninö va'oruomadohu'lo dejonö rueruomadohu'lo ma-darugo'lo uvoruomadeje:

God mabëhëjo.

Ave aho Badare ihore rovajoho mabëhëjo.

¹⁰Nosi hije David-are sionoho baeromo böröme namiromo muebejavuo'ie'ajëjo.

No naguajëjo ë muoho mae tutuvoröhego.

God mabëhëjo.

¹¹Ëhi rajahibe rovë'i Iesu'lo Jerusalem rovareje. Iesuro Jerusalem ruenugoromo God-are amo börömore va'adeje. God-are amo börömore va'oromo bövioho bise'oho gabe juvonugoromo gavade mami'e vö'öromamu gagorovo huro hesi ijoraje 12-ho jabu'lo gemu mae Bethany amore sionëro va'adeje.

Mesehu bajo bogo raejoro Iesuhu uavade jöhoje.

¹²Bethany amore va'ë'ëro nërö ri'öromo ë jioromo vuonorö'ö rovareje. Örire rueromo Iesuro hejade hömamu hejë'i ¹³rue'i gavadeje arue riribövire mesoho hano'e namijamu. Mesoho namijamu gagorovo ë bëhire va'adeje ga'i bösoho raejë'e jiego o bogo. Va'oromo gavadeje bajoho bogojio'i ma-hano rudu'emu jiamu hesi raejaje majaho bogo rovë'ëro jii'ëro. ¹⁴Hano rudu'emu jiamu gagorovo mesoho uavadeje: Ijonöho nadi bajoho raenego aho ue'aho'irarëjo. Ëhi uavamu hesi ijorajoho jaburo hejareje.

Iesuhu God-are amo börömore va'oromo ë'ade jöhoje.

¹⁵Ëhi'oromo Iesumëro örëro ajiomoromo Jerusalem ajio suorovareje. Suorovoromo Iesuro God-are amo börömore va'adeje. Va'i gavade aëro bövie bise'e imo'amamu gëgorovo rarovö'öjëvadeje. Rarovö'öjëvoromo gavade aëro sa'a göre göre jioromo rovare aribövi jabesi ijo bajoho ujuoho'i amo börömo hesi ijo bajoho i'imëmamu gëgorovo jabesi mu maratuho huotovö'öjëhoromo ugo imo'amarue aribövi jabesi arëtohu'lo huotovö'öjëhadeje. ¹⁶Huotovö'öromo ae aho'obëhe ahëvadeje jabuhu inömo inömo ujuohoromo God-are amo ririre ördrovaruoho vuonugojöro. ¹⁷Ëhi uënugoromo God-are jö hesi öroho ae röjëhiromo uëvadeje: God-are surire jajivoromo uvë'e höjo: God nasi osaho aëro uvoruomo'ajëjo: Ëosa hesi bëhoho sa'ae dinö'e dinö'e raromarue ariböviehu ro God-are örire jö atarue osaho höjo. Ëhi uvë'e höjo röhu jemëro mu sisë ë'ë'ëro ëhuro ave osaho vajiohu'e ariböviehu gurihivarue juu gagoho va'ëne höjo.

¹⁸Ëhi uëvamu priest masijohu'lo Jew rajo jögoru öri röjëhijarue ariböviohu'lo ëho jaburo ë jöho heromo gavare ae aho'obëhe Iesuhu röjëhijaje jöho heromo tiöruomamu gëgorovo uvareje: Nani ae aho'obëhe no ramuo'i Iesu gemu uehorovo'aruëromo juhuonivareje. Juhuonivoromo öre nahareje Iesu anego guomoröhego.

¹⁹Ëhi'amu vö'öromamu gagorovo Iesu'lo hesi ariböviohu'lo Jerusalem jioromo va'areje.

Iesuhu meso hesi uhu jö huruoho majëhijade jöhoje.

²⁰ Va'ël'ëro sisonuvamu Iesu'o hesi ariböviohu'o örire vuonorö'ö rue'li gavareje mesoho mami'e sahori barëjë'e jiamu. ²¹ Sahori barëjë'e jiamu gagorovo Peter-ro Iesuhu urimo jövade jöho uehorovoromo uavadeje: Bada arueho gavëjo. Jaehu sahorijöro uavane mesoho iae sahorijë'e höjo.

²² Sahorijë'e höjamu Iesuro uëvadeje: God mae uehorovorëjo. ²³ Ave jöho na jö mae uë'ië'ajëjo. Jemë bogo uehore niö'i bae'irögoro God gemu mae uehorovoromo uvë'oho: Na uvajëhi iae ëhi jio'a'ajë uvoromo ave dahoru uavë'oho: Ri'öromo va'o jovo börömore bu'örovonë uavë'oho jemëhu uvarije muoho God-ro vaejëho'ajëjo. ²⁴ Èhuni na uëvajëjo: Rabe rabe God ua gavë'oho mae uehorovoromo uvorëjo: Iae mae-ëjo. God-ro iae bojemi'iramu bae'ejöjo. Èhi uvë'ohuro èhuro iae bae'a'arujëjo.

²⁵ O jemë döre riravoromo God-are örire ëninami'irögoro röhu ae göëni dë vörönëgë'oho ë a hesi sisëho uehorovoromo vuonugorëjo. Èhi ë'ë'oho èhuro jemesi Vavue ö'idöre hijaje ahuro jemesi sisëhu'o uehorovoromo vuonugo'ajëjo. ²⁶ [O jemëhu jabesi sisë bogo uehorovoromo vuonugë'oho jemesi Vavue ö'idöre hijaje aho hu'o jemesi sisëho bogo uehorovoromo vuonugo'ajëjo.]

Jew rajo a masijehu Iesu bogo ma uehorovoromo darugoho din'ö'e baejane hö uavare jöhoje.

²⁷ Èhi majëhinugoromo Iesu'o hesi ariböviohu'o Jerusalem röhu maho rovareje. Jerusalem rueromo Iesuro God-are amo börömore va'oromo ë juvadeje. Juvamu gagorovo priest masijohuro Jew rajo jögoru öri röjëhijarue ariböviohuo a duvaho ömo'ömhuro rueromo ²⁸ Iesu uavareje: Jaehu God-are amo börömore hiromo mue gö gö vaejanuoho diehi jië'e daruge javoromo o raro darugoho bojämijë'ëro èhi jië'e muoho vaejanue höjo.

²⁹ Vaejanue höjamu Iesuro uëvadeje: Nasi darugo hesi jö ue gevarujoho na'o jemë jöe gemu uë gë'ië'ajëjo. Jemëhu mana uevë'oho naro jemë uë'ejöjo: Na èhi jië'e darugohuro muoho vaejaje höjo. ³⁰ John-hu bapataeto vaejavuonövadoho na God-ro o ma-aëro darugoho bojämijë'ëro èhioho ë'onövade höjo. Uehego na hejöjo.

³¹ Hejöjamu rue a masijohuro Iesu diehi mana ua'iröhe jöho jabesi mevoromo uarovareje: Noehu uavë'oho: God-ro John darugoho bojamade hö uavë'oho Iesuro uö'a'ajëjo: Èhi jië'oho jemë rabëni John bogo ma uehorovarije höjo. ³² O noehu Iesu ua'iröhoho: Ma-aëro John uavamu ë'ade hö ua'iröhoho röhu ë jöho bogo ua'ejarëjo. Èhi uarovare hesi bëhoho ae aho'obëhe uvoruomadeje: John hu jö God-aro baeromo majahuinövade ae höjo. Èhi uvoruomamu ë a masijehu ae aho'o jabesi jö aho'i jö gö Iesu ua'iröhoho juhuonivareje. Juhuonivo'i èhuni Iesu ua'iröhoho: Ma-aëro John uavamu ë'ade hö ua'iröhoho bijönimareje. ³³ Bijönimoromo Iesu uavareje: Jaehu uö gövuanue jö hesi bëhoho no dadivavujëjo. Dadivavujëjamu hegorovo Iesuro uëvadeje: Èhi jië'oho jemëhu uevarije jöho na'o bogo uë'ejöjo: Na èhi jië'e darugohuro muoho vaejaje höjo.

12

Mu ariböviehu a börömo hesi ö'i bajo mu mueberomo sisë ë'are uhu jöhoje.

¹ Iesuro èhi uëngoromo ë Jew rajo aribövi jabesi jö sisëho uhu'e majëhiromo uëvadeje: Iae ae gemuëro mure grape ö'oho bivo'amade höjo. Bivoromo ë muoho buore iromo rova'o rojomoromo ö'i bajo sa'ijovoröhe guaho umoromo mu javue döro vaejade höjo hesi mu ahuro ajio ë hiromo muoho atovoröhego. Muoho èhi avohoromo gavade eni jiamu gagorovo ae uëvade höjo: Na va'ejöjo. Jemëro nasi muoho muebejehorëjo. Mueberomo ö'i bajoho raeromo mavego nasiroho bahi'li ioro'ioroho jemesi ujuohorëjo. Èhi uëngoromo ri'öromo va'o sa'a göro ë hijade höjo. ² Sa'a göro va'oromo hijuvo gavade ö'i bajo urarue majaho rovamu gagorovo mu vaejharue aho gemu uavade höjo: Va'iranoho mu muebejarue aribövioho uënego ö'i baje gö i'imamego ujuoheho ruenëjo. Ujuoheho ruenëjamu ruehuro va'ade höjo. ³ Va'o mure höröjamu gavë'i rue mu muebejarue ariböviohuo ë aho guduamoromo anoromo sihö'öjamu sionëro övemu rovade höjo. ⁴ Övemu rovamu gagorovo rue a börömhuro mu vaejharue ae gö'o nugö'öjamu mure va'ade höjo. Va'o höröjamu gavë'i rue mu muebejarue ariböviohuo ë aho simanore

anoromo hesi örire mu sisë vaejare höjo. ⁵ Ëhi'amu mu arijo'ohuro mu vaejharue ae gö'o nugö'øjamu mure va'ade höjo. Va'oromo höröjamu gavé'i mu muebejarue ariböviohuro ë aho anamu guomade höjo. Anamu guomamugo mu arijo'ohuro hesi mu vaejharue ae gö gö nugö'öbe rovade höjo. Nugö'ö'ego va'o mure hörö'ego ioro'ioroho ijahëro hisuebi'amo'i ioro'ioroho muo'amo barënövare höjo. ⁶ Ëhi'ojuvo hu'oho ae gemu jiade höjo. Ëaho hesi harihu mabëhoho jiade höjo. Ijo tugoho'i mu arijo'ohuro uehorovoromo uvade höjo: Arue mu muebejarue ariböviohuro hu garomo uvo'a'aruëjo: Nöruare harihe hö uvoromo ëhuni mae uehorovo'aruëjo. Ëhi uvoromo nugö'øjamu mure va'ade höjo. ⁷ Va'o höröjamu gavé'i ë mu muebejarue ariböviohuro uarovare höjo: Arue rovaje ahuro hesi vavu hesi sionoho bae hesi höjo. Ëhuni ë'ego ano bamarëjo ëhuro ave muoho noro baeröhe höjo. ⁸ Ëhi uarovonugoromo ë aho guduamoromo anoromo guomamu muro jiamu baeromo rori'o bu'öruomade höjo. Ëhi'are höjo.

⁹ Ëhi jië'oho mu arijo'ohuro diehi ë'a'ajëjo. Huro rueromo mu muebejarue aribövioho i'ue bojëmiromo muo'amo'i ë muoho ae gö bojëmi'ajëjo jaburo mueberöhego. ¹⁰⁻¹¹ Röhu ave uhu jöho God-are surire jajivoromo uvé'e höjo:

Munë javue vae'irögoro munë gemu bijönimoromo vuonugare höjo.

Vuonugaroho jaruvoho ë munëhuro javuoho nigemo'ego bibivoromo mae namijajëjo. Hesi Bada God-ro ëhi ë'ade höjo.

Ëho noro garomo uvarue höjo: God-ro mu mabëhe ë'ë'e höjo.

Ëjö God-are surire jajivamu adaharijoho jemë diehi'oromo ë hesi bëhoho bogo avoho baearije höjo.

¹² Ëhi uëvamu hegorovo rue Jew rajo a masijohuro garomo uvareje: Iesuro a masijoho no biraguoromo ëhuni uhu jöho jövajëjo. Jövajë uvoromo Iesu guduamo bava'ië'oromo ae aho'obëhe juhuonëmiromo vuonugo va'areje.

Iesuhu guaro berovöjoro aehu tax jö ua gavarohoje.

¹³ Ëhi'amu aëro Pharisee aribövioho o Herod-are aribövioho rëmö'øjareje va'oromo Iesu sareramego huro jöe sisé'i jövoromo guaro berovoröhego. ¹⁴ Rëmö'øjamu va'oromo Iesu sarerisareriamiromo uavareje: Tisajo. Iae no gavarue höjo ja a mae javego. O aho bogo juhuonëmijego. Ëhesi bëhoho jero no göromo ae böröme o bise'e javuajëromo jöe gö gö bogo röjahui'i God gemu uehorovoromo hesi örohemu mae röjahuijanue höjo. Ëhuni no jö harihe ua ga'të'aruëjo tax jöho. Rome a börömhuro nosi sa'aho muebejago noro hu tax bojami'jarue höjo. Noehu ëhi ë'aruoho na ëhuro Jew rajo nosi jögoroho aharue höjo o bogajo. Na no bojami'jarëjo o bogajo. ¹⁵ Bogajamu Iesuro gëromo uvadeje: Arue ariböviohuro nasi örire ma-döemu mae ue ge'i a'i jabesi uhoho na ijumevo'i nimoromo majehijaruëromo uëvadeje: Jemë rabëni nasi dëho bijioho gevarujëjo ga'i na bejevego. Ajivë'e ijo baje gemu baruehego na gavöjo. ¹⁶ Gavöjamu barovareje. Barovamu garomo uëvadeje: Aveho rahuare nu ano'ohu'o ihohu'o jajivë'e höjo. Jajivë'e höjamu uavareje: Rome a böröme hesi höjo. ¹⁷ Rome a böröme hesi höjamu Iesuro uëvadeje: Ëhuni Rome a böröme hesiroho ëho hesi öroro bojami'i God-aroho ëho God-are öroro bojaminövörëjo. Ëhi uëvamu heromo jöe barëjvadeje.

Iesuhu guaro berovöjoro vuovë'e ariböviehu ri'öruomo'iröhe jö Sadducee ariböviehu hu ua gavarohoje.

¹⁸ Ëhi'amu iae Jew rajo a masijo ioro'iorohuro rovareje. Jabumë Sadducee jö uehorovarue aribövie jioruomadeje. Sadducee ariböviohuro uehorovoromo uvoruomajeje: A vuovë'oho ijönöho bogo ri'ö'amo'i ma-ioro'iore gemu vuovo'ajëjo. Ëhi uvoruomaje ariböviohuro rueromo Iesu guaro berovöjoro sarerisareriamiromo uavareje: ¹⁹ Tisajo. Moses-ro jögore jajivoromo uövuë'e höjo: Aboji harihu'oho rumo'e a vuovego diehi ë'iröhe öroho aviëhi höjo. Aehu vaboro masuromo vaboroho aboji harihu'oho bogo vaejë'e baruehu guomo'i vaboro nugë'oho hesi öhuro vuojiroho masuromo ëhuro guomade ö hesi ihoro ujoho vaejaho'ajëjo. Moses-are jögoroho ëhi höjo. ²⁰ Ëhi jië'ëro iae ma-ö ömo'ömëremu ae aho'o 7 raromare höjo. Raromoromo muriohuro magonahoho

masuvade hõjo. Masuromo vaboroho aboji harihu'oho bogo vaej'e baruoho guomade hõjo. ²¹ Guomamu hesi vaboroho dorue hijamu ö göhuro vuojiroho masuvade hõjo. Masuromo vaboroho aboji harihu'oho bogo vaej'e baruoho guomade hõjo. Guomamu hesi vaboroho rõhu maho dorue hijamu gagorovo ö göhuro vuojiroho masuvade hõjo. Masuromo guomade hõjo. ²² Ö ömo'ömo ioro'iorohu'o ëhi gemuoho ë'obe rovare hõjo. Ö ömo'öme 7 jabuhu ë magonahe gemuoho masube rovaroho ë magonahoho aboji harihu'oho bogo vaej'e aho ma-vuovëvobe rovade hõjo. Vuovobe ruejuvo barëjamu ijo tugoho'ioho ë magonahoho hu'o guomade hõjo. Èhi'are hõjo. ²³ Èhi ë'arohuni ëhuni ave jõho no ua ga'ie'aruëjo. Jero uvanue hõjo: Vuovoromo ri'õ'ejärëjo. Èhuni vuovë'e ariböviehu ri'õruomorõhe majaroho ë magonahoho di ahu'o hi'a'ajëjo. Barue aho'o 7 masuvë'ego uavaruëjo.

²⁴ Èhi uavamu hegorovo Iesuro uëvadeje: Bogajo. God-are surire jõhu'o huhu mu vaerõhe darugohu'o jemë bogo avoho gavarujëro sisë'i uehorovoromo ue gevarujëjo.

²⁵ Èhesi bëhoho vuovë'ëro ri'õruomo'irõhe maja rovë'iroho vaboroho baruoho bogo masurovo'i aneraehu ö'idõre ma-raromaruëhi ëhi raromo'aruëjo. Èhuni ë magonahehu di ahu'o hi'irõhe jö ue gevarujoho bëhi rumo'e hõjo. ²⁶ Èjõho jemëro uvaruje hõjo: Vuovë'e ariböviehu ri'õ'irõhe jõho sareri jõe hõjo. Èho bogo sareri jõehu jio'i jö mae hõjo. Èhesi bëhoho vuovoromo ri'õ'irõhe jõho Moses-ro God-are surire iae jajivë'e hõjo. Ijo hisu vënehu ravade jö jajivadevare evare God-hu jövade jõho jajivoromo ave jõhu'o uvë'e hõjo: God na Abraham Isaac Jacob ëhi muebejëvaje ae jevajëjo. Jemë rabëni ë jö hesi bëhoho bogo avoho baejarije hõjo. ²⁷ God-hu Abraham Isaac Jacob muebejëvaje jö hesi bëhoho jabumë vuovoromo bogo ioro'ioemuoho barë'i va'o raromego God-ro muebejëvaje hõjo. God bogo vuovoromo ioro'ioemu barëj'e aribövioho muebejëvo'ibejajo. A'i hu vuovoromo va'o raromarue aribövioho iae muebejëvaje hõjo. Èhuni ae vuovoromo ioro'ioemu barëjaje hõ uvarujoho ëho sarerivarujëjo.

God-hu bojamuade jõho diho bõrõmoho jiajoho aehu Iesu ua gavadohoje.

²⁸ Èhi uëvamu Jew rajo jõgoru õri røjëhijarue ae gemuëro rueromo hejade Iesu'o Sadducee ariböviohu'o jö aho'ahamirovamu hejë'i rõhu gavade Iesuro jö mae mana majëhijamu gagorovo Iesu uavadeje: Na ave jõho ua ga'ie'ajëjo. God-hu bojamuade jõgore aho'o jio'amajoho di jõhuro jö ioro'ioroho iosirami'amoromo nuniroho hõjo.

²⁹ Nuniroho hõjamu Iesuro uavadeje: Nunire jö bõrõmoho aveho hõjo: Israel ariböviohumë ave jõho hehëjo. Bada nosi God hu gemu bõrõmoho hõjo. ³⁰ Jasi dë vövõbajo'e aru'ahë uehore daruge aho'obëhe Bada jasi God ma-hu gemu bojaminëjo. ³¹ Èjõho nuniroho hõjo. Rõhu ë jö hesi bëhiroho aveho hõjo. Jaehu jasi arijo'arije rajahirovanuëhi jasi ae gemuoho ëhi rajahinëjo. Jõgoru ioro'ioroho ë jö niõ'ioho bogo iosirëmiromo masijoho jio'amo'i ë jö niõ'ioho bõrõmo maho jëvajëjo.

³² Bõrõmo maho jëvajëjamu hegorovo rue jõgoru õri røjëhijaje ahuro Iesu uavadeje: Tisa ja jö mae jövanuëjo. Jaehu uevanuoho: God ma-gemu jio'i god gö gö bogohõjo. ³³ Noehu dë vövõbajo'e uehore daruge aho'obëhe ma-hu gemu bojamiromo rõhu nosi arijo'arije rajahirovanuëhi nosi ae gemuoho ëhi rajahijë'oho ëho ma-mabëhe hõjo. O mi vënire bueromo God-are õrire bojamijë'oho o suvuore gö gö hu bojamijë'oho ëho ma-jianovajëjo.

³⁴ Ma-jianovajëjamu hegorovo Iesuro gavade rue aho simano mae uehorovoromo jõvamu gagorovo uavadeje: Jaehu God-are aharire va'o hijego huhu muebejavo'irõhoho ja bogo rori'oho javo'i iae bëhiro javajëjo. Èhi uavamu hegorovo ae aho'obëhe jõe gö gö ua ga'ie'aroho juhuonivoromo vuonugareje.

Bõrõme namiromo ajamuaje a hesi jö Iesuhu røjëhi'i uë gëvadohoje.

³⁵ Vuonugamu Iesuro God-are osa bõrõmore hiromo jõgoroho røjëhijadeje. Røjëhiromo uëvadeje: Aveho hehëjo. Bõrõme namiromo ajëmi'irõhe a hesi jõho jövo'ie'ajëjo. Jew rajo jõgoru õri røjëhijarue ariböviohuro uvoruomaje hõjo: Bõrõme namiromo ajamui'irõhe aho ma-David-are uje jio'a'ajëjo. Rabëni ëhioho uvoruomaje hõjo. ³⁶ God-are Aru'ahohuro jõho David-are simanore bojamamu jajivoromo uvë'e hõjo:

Bada God-ro nasi Bada uavade hōjo:
 Nasi övo manö rojo hijego
 ja'o muorovarue aribövioho naro ruahö'öjēvego
 hörëro vijuvo taemo'amo'irane hōjo.

³⁷ Ĕhesi bëhoho bōrōme namiromo ajëmi'irōhe a hesi jōho David-ro jajivoromo uvē'e hōjo: Bada hōjo. Bada hō uvadoho ëhu'oho rabëni uvoruomaje hōjo: Bōrōme namiromo ajamui'irōhe aho ma-David-are uje hōjo. Ĕhi uëvamu ae aho'obëhe huhu majëhijaje jōho heromo nimorohoruomadeje.

Jew rajo jōgoru öri rōjëhijarue ariböviehu sareri'e mu vaejaruëhi aehu bogo ëhi ë'irōhego Iesuhu jōvadohoje.

³⁸ Ĕhi'amu Iesuro jōho rōjëhijuvo röhu uëvadeje: Jemëro Jew rajo jōgoru öri rōjëhijarue aribövioho gë avohorëjo. Ĕhesi bëhoho ë aribövioho jaburo jabesi sinohemu uehorovoromo niögu ëgobövie hör'u'o utahë'oho io'amoromo jijiharue ëhi jië'e muoho nimarue hōjo aëro gëromo rajëhijōro. O imo'amaruire va'ë'oho jaburo nimarue hōjo aëro uvoruomorōhego: Jabumë a masijëro jijihajëromo rajëhiromo jejëmiruomorōhego. ³⁹ O God rajahijarue osare va'ë'oho o sörö i'i va'ë'oho a masijehu raromaruire ë va'oraromo'i nimarue hōjo. ⁴⁰ Raromo'i nimoromo magonaho doru jabesi bövioho bise'oho ëma ujuohëharue hōjo. Ujuohoromo sarerivoromo pari ëgobövie jaguvarue hōjo aëro gëromo uvojo: Mu mae vaejaruëjo. Ĕhi jië'e sareri'e muoho vaejaruego ëhuni God-ro i'u bōrōmo mae bojëmi'ajëjo.

Bövi bise'o rumo'e magonaho doruehu God-ni suvuoro ba'amade jōhoje.

⁴¹ Ĕhi uëngoromo Iesuro God-are suvuoro bahijarue bëhire ë va'o hijadeje. Hiromo uheriho'i gavadeje ae aho'obëhe ijo bajoho ë io'amamu. Bövi bise'o marohë'e mae jië'e aribövie aho'obëhe jaburo rueromo ijo baje bōrōme ba'amoromo va'onövareje. ⁴² Ĕhi'amu magonaho dorue gemuëro rueromo rövë'e ijo baje niö'i ba'amëvadeje. Al'i ë monioho ma-bise'e jadeje. ⁴³ Ba'amëvamu Iesuro ëho garomo hesi ijorajo ömo'ömohuro ruejōro uvëvadeje. Rovamu uëvadeje: Ĕbövi bise'o marohë'e jië'e ariböviohuro ijo baje aho'io'amo'i arue bogo eni jië'e magonahohuro rövë'e ijo bajoho niö'i ba'amade hōjo. Röhu God-ro ëhi uvajëjo: God-are suvuoro io'amare a ioro'iorohuro bisemu bisemu io'amo'i ë bogo eni jië'e magonaho doruohuro bövi mae ba'amade hōjo. Na mae uëvajëjo. ⁴⁴ God-hu ëhi uehorovaje hesi bëhoho ë a ioro'iorohuro inömo marohë'e maëro jië'ëro mavituohemu bojami'i ë magonahohuro inömo rumo'ëro jië'ëro hesi i i'ibejade monioho aho'io'amo'i bojami barëjë'e hōjo.

13

Aehu God-are amo bōrōmo dadovoruomo'irōhe jö Iesuhu majëhijadohoje.

¹ Ĕhi'onugoromo Iesuro God-are amo bōrōmore jioromo va'amu gavë'i hesi ijorajo ömo'öme röhu ae gemuëro Iesu uavadeje: Tisa aruëroho gavëjo. God-are javu masijo vae'amarohu'o javu masijo hesi munëhu'o ma-mabëhe jio'amajëjo. ² Ĕhi uavamu uavadeje: Ave munë javu masijoho na jemë gavarujëjo. Ĕjavuoho aho'obëhe aëro dadovoruomo'iramu munëho ahoromo sa'aro ruvebi barë nahonahovo'ajëjo.

Huë vavaeni bōrōmo ruerōhe jö Iesuhu majëhijadohoje.

³ Ĕhi uëngoromo Iesuro va'oromo Olives Dahorure ajio hiromo gavadeje God-are amo bōrōmoho anume jiamu. God-are amo bōrōmoho anume jiamu Peter James John Andrew ëho jaburo sivue ajio Iesu'o raromoromo uavareje: ⁴ Ave jōho majahuego hejarëjo. God-are javu masijehu rireromo'irōhego uövuanoho ëho divare jio'a'ajëjo. O no mu rabe garomo uvo'ëjarëjo: Ĕhi jië'e muoho aho'obëhe rue'ie'ajëjo.

⁵ Rue'ie'ajëjamu uëvadeje: Gavë'iajo. Aëro sarerëmi'iramu guaro rireromëvo va'a'ajëjo.

⁶ Ae aho'obëhe rueromo sarerëmiromo uë'a'aruëjo: Nōruare ihoro rovajëjo. God-hu uevë'ëro bōrōme namiromo ajëmi'irode aho na jevajëjo. Ĕhi uëromo ae aho'obëhe

sarerëmi'iramu uvo'a'aruëjo; Mae-ëromu guaro rireromo'ajëjo. ⁷ O he'iririje muorovo jö ruenövo muorovonövamu hejë'oho nadi juhuonivorëjo. Öre gö bogojjë'ëro ëhi jjë'e mu sisëho iae jio'a'ajëjo. Röhu sa'aho bövioho bise'oho evaroho bogo barë'i ëho hesi majae göro jio'a'ajëjo. ⁸ Sa'ae göëro göhu'o muorovonövo a masijo ioro'iorohuro ioro'iorohu'o muorovonövo'aruëjo. Sa'ae dinö'e dinö'e jiajoho hijiohijiovo'amo'ajëjo. Sa'ae gö gö iruno'e bogojio'ajëjo. Ëhi jjë'e huë vavaenoho rue'iramu mu sisëho bogo burëroho barë'i a'i magonahehu aevoromo raho'i hara'uajëhi ëhi aho aevoromo huë vavaene böromoho baebe va'oruomo'ajëjo.

⁹ Röhu gavë'i raromorëjo. Aëro guduamo ujuohëvo va'oromo jögoru muebejarue aribövi jabesi övore bojëmi'aruëjo. God rajahijarue osa göro göro ë hisuebijëvo'aruëjo. Gavana o sa'are a masijo gö gö jabesi nunire rëmo'iramu nasi jöëni ë riravo'aruëjo nasi jöho huruoho majëhi'i. ¹⁰ Röhu God-are jö maho aëro sa'ae dinö'e dinö'e majëhibe va'o barë'ajëjo. Ëmuoho urimoho jio hesi höjo. Bövi bise'o barë'iröhe majaho ë hesi ijönö jio'a'ajëjo. ¹¹ Röhu jabuhu guduamo ujuohëvo va'amu a masijo jabesi nunire riravë'oho nadi uvorëjo: Na rabu jöë majëhi'ejöromu nurunurumorëjo. Nadi ëhioho ë'i a'i a masijo jabesi nunire riravo'iririje maja rovamu evare God-hu rabu jö jemesi simanore bojëmë'oho ë jöho majëhirëjo. Ëhesi bëhoho bogo jemëhu jöho majëhi'irögoro a'i God-are Aru'ahohuro jöho simanore bojëmi'iramu jemë ë jöho majëhi'aruëjo. ¹² Röhu öhuro öho ae gö jabesi örire bojëminövo'aruëjo muo'amojoro. Vavuohuro aboji harihu'oho ëhi gemuoho ë'a'aruëjo. Aboji harihu'ohuro ri'öromu ae uë'iramu vëmu vavu'oho muo'amo'aruëjo. ¹³ O jemëhu na uehorovevarujohuni ae aho'obëhe jaburo jemesi örire nue huodëgoruomo'ajëjo. Röhu ae rahu biririvoromo mae uehorovevobe va'ojuvo maja barë'iröhe maja rové'iroho God-ro baejëvoromo manö bamëvo'ajëjo.

Mu sisë bëhe rueröhe jöhoje.

¹⁴ Röhu jemë ga'a'aruëjo God-are osa ijumaje sisëhuro maehu jiaje röhöre ëma nami'iramu. Ëjö Iesuhu majëhijadoho adahoromo avo'avoho gare. Amo Iesuro jö vituoho majëhiromo uëvadeje: Sisëhuro maehu jiajire ëma namijamu gavë'oho ave Judea sa'are raromaruje aribövioharo huruomoromo dahoru'ero iojioromöne. ¹⁵ Ae rahu javu dönö haradare raromë'oho abueromo osare inömocho nadi va'o ujuoho'i ma-huruomoromo va'orëne. ¹⁶ O mure raromë'oho nadi vuonorö'ö va'o niögöho ujuoho'i ma-huruomoromo va'orëne. ¹⁷ Röhu ë huë vavaeni rue'iröhe majaroho dë'e magonahohu'o aboji harihu'o inino jio'amë'e magonahohu'o jabumë vaevë'oho diehi huruomoruomo'ajëjo. ¹⁸ Röhu God ua garëjo huro ajëmego ëhuro aho nichijo majaroho bogo huruomol'iröhe höjo. ¹⁹ Rabëni hesi bëhoho evare majaroho huë vavaene bogo bise'o vadu'oho rue'a'ajëjo. Ëhi jjë'e huë vavaenoho urimo God-hu sa'a bövi bise'o bamadevaroho bogojioje ruejuvo ro jaruvo majahu'o ëhi jjë'e huë vavaenoho bogohöjo. O ijönöhu'o bogojio'i ë majaho gemu böromoho jio'a'ajëjo. ²⁰ Ëhuë vavaeni maja ëgobövi jiajoho God bogo tarioromo bunemuoho bamo'ibejajo aho bogo biririvoromo raromo'ibejajo. A'i God-ro hesi baejëvade aribövioho uehorövoromo ë majaho tarioromo bunemu buemü uvë'e höjo.

²¹ Ëhi jiamu ae göehu uëvë'oho: Aveho ro gahëjo. O arueho va'o gahëjo. God-hu uavë'ëro böromë namiromo ajamui'iröhe aho aviae o aruae hö uëvë'oho nadi maho uehorovorëjo.

²² Ëhesi bëhoho rabëniajo. Ae aho'obëhe rueromo sarerëmiromo uëbe va'a'aruëjo: God-hu uevë'ëro böromë namiromo ajëmi'irode aho jevajëjo o jö God-aro baeromo majëhijaje ae jevajëjo. Sarerëmiromo ëhi majëhiromo bogo gavarue mu masijoho vaenövo'aruëjo eni jëvejo God-hu söjëvade aribövioho sarerëmege rireromo'iröhego. ²³ Röhu jemëro avoho mueborovorëjo. Ijönö jioröhe jöho na urimo majëhijë'e jevajëjo. Ëhuni sareri'e jöho nadi maho uehorovorëjo.

God-are A Maehu rueröhe jöhoje.

²⁴ Röhu ë huë vavaeni majaho barë'iramu evare maja nunoho ramoramovoromo manaeroho duorohoromo ²⁵ jijoho sisërë'amoromo ö'idöre inömocho aho'o arua anumiae va'o'amo'ajëjo. ²⁶ Ëhi'o'iramu sa'are raromaruje ariböviohuro ae aho'obëhe

ga'a'aruëjo God-are A Maho naro darugo'o aji'o börömo mae baeromo suere ruvebi'iramu. ²⁷ Ruvebiromu nasi aneraho rëmö'ö'iramu ro God-hu söjëvade aribövioho gagovëvo'aruëjo. Arua anumiae sa'ae dinö'e dinö'e maja rojomajire beva'ajire jioruomajoho gagovëvo'aruëjo.

Mesihu gumutivego Jew rajo jabesi vama maja dunovaje uhu jöhoje.

²⁸ Röhu meso hesi uhu jöho heromo bëhoho avoho uehorovorëjo. Gavaruje mesoho gumutivoromo rahego garomo evare jemë uvaruje höjo: Jew rajo nosi vama majaho iae dunovajëjo. ²⁹ Èhesi bëhoho jemë ga'irarije naehu uëvodëhi mue gö gö rovamu gavë'iroho uvorëjo: Èmajaho iae rovajëjo. ³⁰ Ave jöho na jö mae uë'ië'ajëjo. Ave jaruvore raromaruje aribövioho jemë bogo vuovo barëjë'iro evare naehu uëvaje mue aho'obëhe rue'a'ajëjo. ³¹ Ö'idöe sa'ae bövie bise'e barë'i nasi jöho gemu bogo barë'ajëjo.

Iesuhu vuonorö'ö rueröhe maja no bogo gavarue jöhoje.

³² Röhu ë majaho divare jio'iröhoho aho bogo gavarujëjo. Ö'idöre raromarue anerahu'o Harihoho na'o bogo ga'i hesi Vavuohuro gemuëro gavajëjo. ³³ Avoho mueberovorëjo. Gavë'iajo. Jemë'o ë majaho bogo gavarujëjo. ³⁴ Èhesi jöho uhu'e majëhi'ië'ajëjo avoho he'irarijego. Ae gemuëro öre gö va'ië'ajëjo. Amore jioromo va'ië'iroho hesi mu vaejharue aribövioho ae gö gö mue gö gö bojëmibe va'a'ajëjo jaburo simane vaeromo ë muoho muebejaho'iröhego. Bojëmibe va'oromo hesi osa ojo muebejaje aho ua'a'ajëjo: Ojoho avo'avoho muebenëjo. Osa arijo'ohuro ëhi ë'a'ajëjo. ³⁵ Èhesi bëhoho na ë osa arijo'oho va'ëne jevajëjo. Na divare vuonorö'ö rue'irodoho jemë bogo gavarujëjo. Nani vö'ö'e o vahi riri'e o sisonuvo'i titimo'iramu o sisonuvo'iramu rue'ejöjo. Jemë bogo gavarujëjo. Èhuni muoho avo'avoho mueberëjo. ³⁶ O bogo nuni jioromo mu avoho muebejë'oho nani na ma-majioho rue'i ga'ejöjo jemë momorö'ö uro'amë'e jëvo'iramu. ³⁷ Na jemë uëvajëhi ae aho'obëhe ëhi gemuoho uëvajëjo: Nune jioromo muoho avo'avoho mueberëjo.

14

Jew rajo a masijehu Iesu ano'i jö mevare jöhoje.

¹ Iae God-hu Vörö Tugohade Sörö o I Dë Huaje Oso Rumu'e Sörö jiamëhi i'iröhoho jio'i röhu jaruvëhi priest masijohu'o Jew rajo jögoru öri røjëhijarue ariböviohu'o ëho jaburo öre nahareje Iesu saginiëri guduamoromo ano'iröhëro. ² Öre nahoromo uarovareje: Sörö majaroho bogo guduamo'ejarëjo aëro göromo no'o muorovojöëni.

Magonahe gemuehu ridi'e jovehu Iesuarue simanore otehodivade jöhoje.

³ Èhi'amu Iesuro Bethany amore rueromo sino jomo'e ae Simon-are osare ro hiromu ie ijadeje. Ie ijamu gagorovo magonahe gemuëro munë huono mabëhe baeromo rovadeje. Èhuono gagore ridi'e osoho jië'e jiadeje. Osoho bogo jovo'oho buaröhë'e ma-oso maemu jiadeje. Oso ihoho nard jiadeje. Röhu hesi manaho bogo bise'o vadu'oho jiadeje. Magonahohuro ë munë gagore jiaje osoho barueromo munëho hahovoromo Iesuarue simanore otehadëje. ⁴ Simanore otehamu gagorovo ae göëro göëro dë vörönëgamu jö sisë atoromo uarovareje: Èmagonahoho rabëni osoho ëma otehö'öjajëjo. ⁵ Aro imo'ibejarëjo 300 kina iosiramijë'e manaho bövi mae bae'ibejarëjo. Èmanaho baeromo bövi bise'o rumu'e aribövioho suvuorëmi'ibejarëjo. Èhi jië'oho iae mae jio'ibejajo. Röhu huro ëma otehö'öjade höjo. Èhi uarovoromo magonahoho birevareje.

⁶ Birevamu hegorovo Iesuro uëvadeje: Èmagonaho birevarujoho vuonugohëjo. Jemë rabëni magonahoho huë vavaenoho bojamijarujëjo. Huro na mabëhe avohevë'e höjo. ⁷ Bövi bise'o rumu'e ariböviohuro jemë'o raromobe jijihö'aruëjo. Jemesi nimoromo jabumë ajëmijë'oho iae jemë eni jëvaje höjo. A'i naro jemë'oho bogo hibe juvo'ejöjo. Ijonö ëhi avohevo'irarijoho bogo eni jëvo'ajëjo. ⁸ Èmagonahohuro rabe eni jiadoho ëho nasi örire mae avohevade höjo. Mae avohevoromo oso nasi sinore otehadë hesi bëhoho nasi sinoho avohehadë höjo ëhuro nasi sinoho mae jevego aëro hure bamevoruomoröhego.

⁹ Ave jöho na jö mae ue'i'è'ajëjo. Sa'ae dinö'e dinö'e aehu nasi jö ma majëhibe jijihë'i'iroho ë magonahehu ë'ade jöhu'o majëhibe jijihö'aruëjo aëro hu mae uehorovoruumoröhego.

Judas-hu Iesuni Jew rajo a masijo hiruëmade jöhoje.

¹⁰ Èhi'amu Iesuare ijoraje 12 röhu gemuëro Judas Iscariot-ro va'oromo priest masijoho uëvadeje: Jemë nëgë'oho na Iesu jemesi övore bojëmi'ejöjo. ¹¹ Bojëmi'ejöjamu hegorovo nimorohoromo uavareje: Iae mae höjo. Èhi jïë'oho no ijo baje mana bojami'ëjarëjo. Èhi uavamu hegorovo Judas-ro öre nahadeje Iesu jabesi övore bojëmi'iröhëro.

God-hu Vörö Tugohade Sörö Iesumëhu ijare jöhoje.

¹² I Dë Huaje Oso Rumo'e I ibe va'iröhe majaho aevoromo rovadeje. Aevoromo rovaje majaho rue'ego Jew rajëro sheep harihoho muo'amonövareje God-hu Vörö Tugohade Söröho i'iro. Amo ë majaho rovamu gagorovo Iesuare ijorajoho jaburo Iesu uavareje: Ja nagajoho no dinö'e va'oromo söröho avohaho'ëjarëjo.

¹³ Avoho'ëjarëjamu Iesuro hesi ijorajoho niö'i uëvadeje: Jerusalem amo börömoromo va'orëjo. Va'i ga'a'arujëjo aëro jovo'e ramaho simanëro baeromo ro birohëvo'iramu. ¹⁴ Ro birohëvego va'oromo ga'irarije hu di osare rumo va'ego gagorovo jemë'o ë osaro va'oromo osa arijo'oho uarëjo: Tisahuro uvade höjo: Osaho dinö'e höjo naehu nasi ijorajoho jabu'o gemu mae sörö i'irodoho. Èhi uarëjo. ¹⁵ Èhi ua'iramu osa arijo'ohuro jemë hu'iraejëvoromo vuahure ajiomoromo döre osa börömoromo röjëhi'a'ajëjo. Röjëhi'iramu ga'a'arujëjo maratue bövie bise'e eni avohoromo bahijë'e jio'iramu. Èhi jiamu gavë'i'iroho ë dirö'oro söröho avohorëjo jemë'o no'o ë i'iröhe.

¹⁶ Èhi uëvamu rue ae niö'iohuro ri'öromomo Jerusalem va'areje. Va'oromo gavare Iesuhu uëvadhëi bövioho bise'oho ëhi jiamu gagorovo söröho avohareje.

¹⁷ Èhi'amu vahiromadeje. Vahiromamu gagorovo Iesuro hesi ijoraje 12-ho jabu'o gemu mae rovadeje. ¹⁸ Rueromomo ioho ijë'i Iesuro uëvadeje: Ave jöho na jö mae ue'i'è'ajëjo. Jemë ae gemuëro na bijönegarue aribövi jabesi övore bojëmi'anuejo. Èaho ja aviae na'o ie ijanuëjo. ¹⁹ Ie ijanuëjamu hegorovo jaburo uehore gö gö baeromo ae gemuëro gemuëro uavareje: Na bogo ëhioho ë'ejöjo. Na na mae uavajëjo. ²⁰ Mae uavajëjamu hegorovo uëvadeje: Ae aho'obëhe 12 röhu gemu naehu i hevöre ba'amo'ego hu'o gemuore ba'amaje ahuro ë mu sisëho vae'a'ajëjo. ²¹ God-are surire jajivarëhi hesi A Maho na ëhi guomevo'ajëjo. Röhu na bijönegarue aribövi jabesi övore bojëmi'iröhe aho vaevë'oho sisë'ë'ajëjo. Èaho bogo raho'ibejajo ëhuro mae jio'ibejajo.

Sino'o kö'o aevoromomo ijare jöhoje.

²² Èhi uënuigoromomo ioho ue'ahoromomo Iesuro ioho baeromomo God mae uanugoromomo ato'atovoromomo hesi aribövioho suvuorëmiromomo uëvadeje: Baehëjo. Aveho nasi sine höjo. ²³ Èhi'onugoromomo enatuore jovoho baeromomo God mae uanugoromomo bojëmadeje. Bojëmamumu ae aho'obëhe ë jovoho ibe rova'areje. ²⁴ Ibe rova'amu Iesuro uëvadeje: Aveho nasi köe höjo. Ae aho'o jemesi jöëni köho rovevoromomo guomevo'ajëjo. Guomevo'iramu ëhuro God-hu jemë muebejëvo'iröhe jögoroho marë'ajëjo. ²⁵ Röhu ave jöho na jö mae ue'i'è'ajëjo. Na ijoho ö'i' bajo jovoho bogo i'ejöjo hujeji ëho majaho rovego evare na God-hu muebejaje öri ari'ere hiromomo ö'i' bajo jovo i'oho i'irodëni. ²⁶ Èhi uënuigoromomo God rajahijarue jöho ioruumoromomo suorovo va'oromomo Olives Dahorure iojiomareje.

Peter-hu Iesu gavaje jö a subivëhoröhe jö Iesuhu majahijadohoje.

²⁷ Olives Dahorure iojiomoromomo Iesuro hesi aribövioho uëvadeje: Jemë ae aho'obëhe nasi örire mae uehorovevarujoho vuonugo'i remo va'a'arujëjo. Èhesi bëhoho God-are surire jöho jajivoromomo uvë'e höjo: Sheep muebe'amaje aho God naro ano'ejöjo. Ano'iramu huhu muebe'amade sheep-oho jaburo arua anumiae va'o'amo'ajëjo. God-are jö jiajëhi ëhi remo va'a'arujëjo. ²⁸ Remo va'iramumu guomoromomo ri'önugoromomo naru urimo Galilee va'ejöjo. Jemë ijore ö'a'arujëjo. ²⁹ Èhi uëvamu Peter-ro ri'öromomo uavadeje: Nani a ioro'ioroho jasi örire uehorovaruoho vuonugo'i ramo va'a'aruëjo röhu na bogo ëhioho ë'ejöjo. ³⁰ Bogo ëhioho ë'ejöjamu Iesuro Peter uavadeje: Èhi uevanuëjo röhu ave jöho

na jö mae ua'ie'ajëjo. Jaruvo vahire kökörökoho bogo urimoho vae niö'i uv'e jero urimo vae niö'i gemu ae ue'a'anuëjo: Na Iesu bogo gavaje höjo. ³¹ Èhi ue'a'anuëjamu hegorovo Peter-ro ma-darugo'o uavadeje: O na bogo èhioho è'ejöjo. Aehu anegamu ja'o gemuore guomo'ie'iroho na bogo èhioho majëhi'ejöjo. Bogo majëhi'ejöjamu Iesuare aribövi ioro'ioroho aho'o jabu'o èhi gemuoho Iesu uaruomadeje.

Iesuhu Gethsemane sa'are hiromo God-are örire èninamijade jöhoje.

³² Èhi uanugoromo Iesu'o hesi ariböviohu'o va'oromo öri ari'o ihe Gethsemane rovareje. Rueromo Iesuro uëvadeje: Avehuro raromhego na aruëre va'oromo God-are örire jöe jövöjo. ³³ Èhi uënugoromo Peter James John èhi sö ujuoho va'oromo hesi dë vövöbajo'o uhure huë vavaene aho'o rovamu sisë maro nurunurumadeje. ³⁴ Nurunurumoromo uëvadeje: Na sisë maro huë vavaene baejevajëjo. Èhuro guomevo hesi höjo. Èhuni nadi momorö'ö'i ma-nune jioromo na'o gemuoro avoho mueberov'e raromohëjo.

³⁵ Èhi uënugoromo rori'o ègo'o va'oromo sa'are behumoromo God èninamijadeje èhuro eni jiego vi'ehoho bogo bae'iröhëni. ³⁶ Èninamiromo uavadeje: Apo mue aho'o vae'iranoho ja eni javajëjo. Èhuni i'ue huë vavaene nasi örire rovajoho ahego na bogo bae'iröjo. Röhu naehu nimajoho nadi è'i jaehu nimanuëhi èhi è'onëjo.

³⁷ Èhi èninaminugoromo vuonorö'ö rueromo gavade hesi ae niö'i gemu momorö'öjamu gëgorovo Peter uavadeje: Simon-ajo. Rabëni niavanuëjo. Majae ma-bunemu nune jioromo mueberov'e hi'iranoho ja diehi'oromo bogo eni javajëjo. ³⁸ Jemëro nune jioromo mueberomo èninamihego God-ro ajëmego Satan-ro bogo dinëmego èhuro bogo bejëvo'irajo. Jemesi aru'ahoho mu mae vae'i nimo'i jemesi sino haho'oho u'uhë'e höjo.

³⁹ Èhi uënugoromo röhu maho va'oromo urimo èninamiromo uavade jöe gemuoho èninamijadeje. ⁴⁰ Èninaminugoromo vuonorö'ö rueromo gavadeje jabumë nunëhi-mo'amo'ego momorö'öjamu. Rueho jaburo momorö'öjë'ëro ri'öromo Iesuare örire jö mana ua'iröhoho dadivëvadeje.

⁴¹ Dadivëvamu Iesuro urimë'i vae niö'i va'oromo èninamijadoho röhu maho va'oromo èninamijadeje. Èninaminugoromo rueromo uëvadeje: Jemë diehi'oromo ma-momorö'öemu momorö'öjarujëjo. Iae mino'ëjo. Iae barëjajëjo. Majaho mami'e rov'e höjo. Aëro God-are A Maho na bijönegarue aribövi jabesi övore bojëmi'ie'ajëjo.

⁴² Ri'öromo go va'öhego va'arëjo. Gahëjo. Na bijönegarue aribövi jabesi övore bojëmi'iröhe aho rovajëjo.

Iesu guduamare jöhoje.

⁴³ Èhi uëvamu gavë'i Judas rovadeje. Iesuare ijoraje aho'obëhe 12 röhu Judas hu'o jabesi ae gemuoho jiadeje. Judas rovamu ae aho'obëhe siravae keptaae ujuohoromo hu'o rueruomadeje priest masijohu'o Jew rajo jögoru öri röjëhijarue ariböviohu'o a duvaho ioro'iorohu'o èho jaburo rëmö'öjë'ëro. ⁴⁴ Röhu urimë'i è sarer'ie aho Judas-ro è aribövioho uëvadeje: Ga'irarije naro di aho dudöhamu gavë'oho uvorëjo: Iae Iesu höromo guduamoromo hu'iraeromo avoho muebebe va'orëjo.

⁴⁵ Judas-ro èhi uëvë'ëro huro rueromo ma-burëro ro Iesu jejamiromo Bada uavë'i dudöhadeje. ⁴⁶ Dudöhamu gavë'i è ariböviohuo Iesu guduamareje. ⁴⁷ Guduamamu ae gemu Iesuare bëhire namijaduhuro hesi kaejöho jijöromo priest bërömo hesi mu vaejaje aho anoromo hia'oho tariö'öjahadeje.

⁴⁸ Èhi'amu Iesuro è rueruomade aribövioho uëvadeje: Aveho na bogo vajiohu'e anano'e aehu jevajëjo. Jemë rabëni siravaho keptataho ujuohoromo guduamevo'i rovarujëjo.

⁴⁹ Mami'e majae aho'o naehu God-are amo bërömore hiromo God-are jö hesi öri a röjëhinövodoho jemë evaroho bogo guduamevarije höjo. Röhu jemëhu vaejaruje muoho è hesi jö God-are surire jajivarëhi muoho èhi jioröhego èhuni ave muoho rovë'e höjo. ⁵⁰ Èhi uëvamu hesi ijoraje aho'obëhe hu nugo'i huruomoromo va'areje.

⁵¹ Va'amu a i'e gemuëro niöge hane gemu ruohë'e Iesuare ijore va'adeje. Iesuare ijore va'amu aëro guduamo'ia'amu ⁵² niögohu jaho bu'önugoromo dë'ahobatëremu ju'ebiro mo va'adeje.

Iesu Jew rajo a masijo jabesi nunire namijade jöhoje.

⁵³ Ĕhi'amu Iesu hul'irae rueromo priest börömo hesi osare rovareje. Ĕosare priest masijoho a duvaho ömo'ömoho jögoru öri röjehijarue aribövioho ě aribövioho aho'obēhe jaburo ě gemuoro gagovareje. ⁵⁴ Iesu priest börömo hesi osare barovamu Peter-ro arue riribövire Iesu rihioromoromo priest börömo hesi osare rovadeje. Rueromo osare rumo va'oromo abo osa ririre ruĕ numĕ javue vae'i riroho ma-va'oraho nugarire ě va'oromo priest hesi mu vaeruomaje ariböviohu'o gemuore hiromo vĕnoho jurovadeje. ⁵⁵ Ĕhi'amu priest masijohu'o a masijo ioro'iorohu'o ae nahareje jaburo huruoho majĕhi-romo uĕröhego: Iesuro ĕhi jiĕ'e mu sisĕho vaejamu gavare höjego heromo Iesu anego guomoröhego. Nahareje röhu jö sisĕho bogo birohareje. ⁵⁶ Ae aho'o sarerĕmiromo Iesuare jö sisĕho majĕhiromo ae göĕro göĕro jöe gö gö majĕhijareje.

⁵⁷ Ae göĕro göĕro jöe gö gö majĕhijuvo a ioro'iorĕro ri'öromo sarerĕmiromo Iesuare jö sisĕho huruoho majĕhiromo uĕvareje: ⁵⁸ Ĕahuro ĕhi uvavohijajo: Ave God-are javu börömo naro dadovo'ejöjo. Dadovoromo majae niö'i gemu hesi uhure javu i'oho vae'ejöjo. Urimore javuoho aĕro övĕro vaejare höjo. A'i ijore javuoho ĕho bogo övehu vaejĕ'oho jio'a'ajĕjo. Ĕhi uvade höjo. ⁵⁹ Jöho ĕhi majĕhijareje röhu jabu'o jöe bogo gemuoho majĕhi'i ae göĕro göĕro jöe gö gö majĕhijareje.

⁶⁰ Jöe gö gö majĕhijamu hegorovo priest börömhuro ri'öromo ae aho'obēhe jabesi nuninö va'o namiromo Iesu uavadeje: Na ja jö mana uö'iranoho bogojavajĕjo. Aehu jasi jö sisĕ majahuijaruoho na ĕho mae o sarere höjo. ⁶¹ Mae o sarere höjamu Iesuro jöho bogo mana ua'i ma-jörume namijadeje. Jörume namijamu priest börömhuro röhu maho jöe gö bu'öromo bijioho garomo uavadeje: Böröme namiromo ajamuijanue aho na ja javajĕjo. Na ja noehu rajahijarue A hesi Harihoho javajĕjo. ⁶² Javajĕjamu uavadeje: Iae na ě aho jevajĕjo. Röhu u'emu jemĕro ge'a'arujĕjo God-are A Maho naro darugo eni jiĕ'e A hesi övo manö hi'iramu. Ö'idöre jio'amaje suehu'o gemu mae ruvebi'iramu. ⁶³ Ĕhi uavamu hegorovo rue priest börömhuro hesi niögoho dadovoromo uĕvadeje: Iae eni jiĕ'e höjo. A göho rabĕni rueromo hesi jöho huruoho majahuijöräjo. Iae no eni hejĕ'e javuajĕjo. ⁶⁴ God-are iho ijumajoho jemĕ'o iae hejarujĕjo. Ĕhuni jemĕ diehi uehorovarujĕjo. Diehi uehorovarujĕjamu uavareje: Jö sareri'e aego ano'iramu guomo'a'ajĕjo.

⁶⁵ Ĕhi uanugoromo a ioro'iorĕro ri'öromo Iesu sabĕro ödivoromo nunoho tugohahoromo övo mugö mugöĕro anareje. Anoromo sivoromo uavareje: Na jö God-aro baeromo majĕhijaje ae javajĕ uövuane javaje ĕhuni anagare aribövi jabesi ihoho huruoho majahuijego hejarĕjo. Ĕhi uavamu Iesu atovarue ariböviohuro Iesu baeromo sisĕ maro ano'i arijareje.

Peter-hu Iesu gavaje jö a subivĕhade jöhoje.

⁶⁶ Ĕhi'amu Peter-ro anume aehu raromaruire ě hijadeje. Hijamu priest börömo mu ajamijarue magonahoho röhu gemuĕro rovadeje. ⁶⁷ Rueromo gavade Peter hiromo vĕne jurovamu gagorovo ĕrimahoromo uavadeje: Ja'o Nazareth amo rajo ae Iesu'o gemu mae javade höjo. ⁶⁸ Javade höjamu Peter-ro magonahoho sareramiromo uavadeje: Jaehu jövanue jö hesi bĕhoho na bogo garomo bogo hejajĕjo. Ĕhi uanugoromo ojonö va'o namijadeje. [Namijamu kököröke uavadeje.]

⁶⁹ Amo Peter-ro ĕhi namijamu gagorovo priest börömo mu ajamijaje magonahuro Peter garomo hesi bĕhire riravarue aribövioho uĕvadeje: Ĕaho Iesuare aribövi jabesi ae gemuoho höjo. ⁷⁰ Iesuare aribövi jabesi ae gemuoho höjamu Peter-ro röhu maho sareramiromo uavadeje: Na bogajo.

Ĕhi uvadoho ririvanovamu bĕhire riravarohe jaburo Peter uavareje: Iae mae-ĕjo. Iesuare aribövi jabesi ae gemuoho javajĕjo. Ja'o hu'o Galilee sa'a raje jĕvĕ'ego ĕhuni uavaruĕjo. ⁷¹ Uavaruĕjamu Peter-ro uĕvadeje: Na jemĕ sarerĕmijĕ'oho i'ue baejĕni ĕhuni na jö mae uĕvajĕjo. Jemĕhu uevaruje aho na bogo gavaje höjo. ⁷² Bogo gavaje höjamu gavĕ'i kököröko urimo vae gemu uvadoho röhu maho uvadeje. Uvamu hegoro Peter-ro uehorovoromo uvadeje: O mami'e Iesuro uevade höjo: Kökörökoho bogo urimoho

vae niö'i uv'e jero urimo vae niö'i gemu ae uë'a'anuëjo: Na Iesu bogo gavaje höjo. Ëhi uehorovoromo sisë maro nivadeje.

15

Iesu Pilate-are nunire namijade jöhoje.

¹ Iae sisonuvo'ia'amu gagorovo priest masijohuro a duvaho ömo'ömhuro Jew rajo jögoru öri röjehjarue ariböviohuro jö mevarue a masijo ioro'iorohuro ëho jaburo gemuore gagovoromo jöe mevoromo uvoruomadeje: No Iesuare örire ëhi ëhi ë'ejarejo. Ëhi mevoromo eni jiamu gagorovo Iesu tövoromo bava'oromo Pilate-are övore bamareje.

² Bamamu Pilate-ro Iesu uavadeje: Na ja Jew rajo jabesi a börömoho javajëjo. Javajëjamu Iesuro uavadeje: Ëjöho jero jasi jövanuëjo.

³ Ëhi uavamu priest masijohuro Pilate sareramiromo Iesuare jö sisëho aho'obëhe huruoho majahijareje. ⁴ Majahijamu Pilate-ro Iesu röhu maho jöe ua garomo uavadeje: Jasi jö sisë aho'obëhe majehijaruoho ja hejanuëjo. Na ja jö mana majëhi'iranooho bogojavajëjo.

⁵ Bogojavajëjamu Iesu jöho bogo mana majëhamu Pilate-ro uvadeje: Diehi'oromo jöho bogo jövajëromo tiöjadeje.

Iesu anego guomajöro Pilate-hu uëvade jöhoje.

⁶ Röhu God-hu Vörö Tughade Sörö maja rovë'iroho savoji gagore raromarue aribövioho di aho jiovo nugö'öjoro aehu uvoruomë'oho Pilate-ro ë aho jiovo nugö'önö-vadeje. ⁷ Röhu ae gemu hesi ihe Barabbas savoji gagore hijadeje. Urimë'i sa'are a masijohu'o muorovare majaho jiamu ae aho'o sa'are a masijohu'o muorovoromo ae muo'amareje. Ae muo'amë'ëro savoji gagore raromareje. Röhu ae gemu Barabbas jiadeje. ⁸ Barabbas savoji gagore hijamu amonö gagovoromo riravare aribövioho ae aho'obëhe jaburo rueromo Pilate uavareje: Savoji gagore raromaruoho noehu uavego jiovo nugö'öjahuanuëhi ëhi ë'onëjo. ⁹⁻¹⁰ Ëhi ë'onëjamu Pilate-ro gëromo uvadeje: Iesuare ihoho bövie jië'ego priest masijohuro dë vörönëgamu nasi övore bojemijare hö uvoromo uëvadeje: Na jemë nëgajëjo naro Jew rajo jemesi a börömoho jiovo nugö'öjoro.

¹¹ Ëhi uëvamu priest masijohuro ae aho'obëhe biririvoromo dinëmijamu hegorovo jaburo uvoruomadeje: Iesu vuonugö'i Barabbas jiovo nugö'öjëjo. ¹² Ëhi uvoruomamu hegorovo Pilate-ro uëvadeje: Ëhi jië'oho jemëhu uvarujoho: Jew rajo nosi a böröme hö uvaruje ë aho na diehi'o'ejöjo. ¹³ Diehi'o'ejöjamu uvoruomadeje: Korosioro anego guomajo. ¹⁴ Guomajamu Pilate-ro uëvadeje: Rabëniajo. Diehi jië'e mu sisë vaejë'e höjo. Vaejë'e höjamu ma-darugo ma'e uvo'i arijareje: Korosioro anego guomajo. ¹⁵ Guomajamu hegorovo Pilate-ro ë aribövioho aho'obëhe sanuëmi'i nimamu Barabbas jiovo nugö'öjadeje. Barabbas jiovo nugö'ö'i Iesu hisuebijöro uëngoromo uëvadeje: Ave aho bava'oromo korosioro anohego guomajo.

Muorovo ariböviehu Iesu sivare jöhoje.

¹⁶ Ëhi uëvamu rue muorovo ariböviohuro Iesu hu'irae bava'oromo gavanare osa börömore va'areje. Osa börömo hesi ihoho praetorium uvonövereje. Va'oromo jabesi muorovo ariböviohuni jöe nugö'öromo uëvareje: Jemë aho'o avehuoro gagovohëjamugo ro gagovareje. ¹⁷ Gagovoromo Iesu sivo'irögoro sa'are a masijehu kavuë'e niögu ëgo io'amoromo mu vaejarue ëhi jië'e niögoho Iesu ba'amahareje. Ba'amahoromo a masijehu bosö didi'arue ëhi jië'e bosöho Iesuare simanore didi'ahareje. Röhu bogo inömo maho baeromo bosöho avohaho'i bibë'e ijo hisuoho ujuohoromo huoromo simanore ba'amahareje. ¹⁸ Ëhi'onugoromo sivoromo jëjamiromo uavareje: Jew rajo jabesi börömoho vaevë'e hijanuëjo. ¹⁹ Vaevë'e hijanuëromo ijahëro simanore anoromo sabëro ödivoromo ëma sarere ague aho raromoromo rajahijareje. ²⁰ Ëhi sivoruomoromo niögu ëgoho jijövaho'i hesi niögu maho io'amahoromo osare jioromo hu'irae bava'areje korosire ano taemo'i.

Iesu korosire ano taemare jöhoje.

²¹ Bava'oromo örire va'lhö gavareje ae gemu hesi ihe Simon muro jië'ëro rovamu. Röhu Simon hu Cyrene sa'a rajo ae jiadeje. Hu Alexander'o Rufus'o jabesi vavue jiadeje. Amo Simon-ro örire rovamu gagorovo muorovo ariböviohuro hu garomo övëro bijimö'öromo uavareje: Ave a hesi korosioho baeromo va'ëjo. ²² Baeromo va'ëjamu ejëhoromo baeromo jabumë aho'o va'aroho ajiomoromo sa'a ihe Golgotha nosi huëhu huotovë'oho simano gijo va'ëne sa'are ë ajio suorovareje. ²³ Suorovonugoromo wine jovohu'o myrrh osohu'o buaroharoho Iesu bojamareje hesi vi'ehoho bisemu u'uhoröhego. Bojamamu juahëmadeje. ²⁴ Juahëmamu korosire ano taemareje. Ano taemoromo hesi niögohu adovoromo ajajovareje ga'i di aho di niögohu bae hesi jiego. Ajajovonugoromo niögohu ujuohareje. ²⁵ Röhu Iesu korosire ano taemare majaho 9 o'clock sisonu'e jiadeje. ²⁶ O Iesuare jö sisëho jajivoromo ëhi uvë'e jiareje: Ave aho Jew rajo jabesi a börömo ho höjo. ²⁷ Röhu aëro anano'e vajiohu'e ae niö'i jabu'o korosire ano taemëvoromo göho ruëhi Iesuare övo manö göho viëhi övo adonö ëhi amëvareje. ²⁸ [Amëvamu Iesu ë a sisë niö'i jabesi ririre korosire iromadeje. A sisë jabesi ririre iromadohuro ëhuro ëhi ë'iröhego God-are surire jö aehu jajivadëhi iae ëhi jiadeje. God-are surire jöho jajivoromo uvë'eje: Aëro uvoruomë'e höjo: Hu jö ahoruomaje ariböviohu'o gemuore höjo.]

²⁹ Èhi'amu aëro rova'ë'i uvene hijiohijivoromo sivoromo uvoruomonövadeje: Asë'e sarerì ae javajëjo. Jero uvane höjo: Naro God-are osa börömo ho dadovoromo majae niö'i gemu hesi uhure röhu maho vae barë'ejöjo. ³⁰ Èhi uvë'e javaje ëhuni jasi sinoho ajamirovoromo korosire javajoho ruvebijëjo. Sivoromo ëhi uvoruomadeje.

³¹ Jabuhu sivarëhi priest masijohu'o jögoru öri röjëhijarue ariböviohu'o ëhi sivoromo uarovareje: Èahuro uövuade höjo: Naro a ioro'ioroho ajëmego marëjëvaje höjo. Èhi uövuade höjo röhu hesi sino ajamirovë'oho hu bogo eni höjo. ³² Huro uövuade höjo: Böröme namiromo jemë ajëmaje aho na jevajëjo. Israel rajo jemesi börömo ho na jevajëjo. Èhuni nadi'ego hu korosire jioromo ruvebijëgo no garomo hu mae uehorovarëjo. Èhi uarovamu ë ae niö'i hesi bëhire korosi'o amëvare aho jabu'o Iesu sivareje.

Iesu guomade jöhoje.

³³ Èhi'amu maja ririre öri ari'e aho'o ramoramovadeje. Ramoramovobe va'ojuvo majae huotorovamu gavë'i ajivadeje. ³⁴ Majae huotorovoromo ajivamu gavë'i Iesuro Jew rajo jabesi jöëro ma-darugo'o uvadeje: Eloiajo. Eloiajo. Lema sabaktaniajo. Nosi jöehu huotovë'oho God nasi Böviohajo. God nasi Böviohajo. Ja rabëni remo va'ane höjo.

³⁵ Remo va'ane höjamu bëhire riravare a ioro'iorohuro hejare uvavamu: Eloia uvamu heromo uarovareje: Èho hehëjo. Elijah-ni uvajëjo. ³⁶ Èhi uarovoromo ae gemuëro tutuvo va'oromo u'uhë'e inömoho barueromo nioga'i'e wine jovore ba'amoromo rumorovamu ioromo ijaho viture bijiohoromo Iesu bojami'ie'adeje. Bojami'ie'oromo aribövioho uëvadeje: Nadi'ego no gavarëjo Elijah-ro God-arire jioromo ro Iesu juvo baruvebijëgo o bogo.

³⁷ Èhi uëvamu Iesuro jö'e dadovoromo guomadeje.

³⁸ Guomamu gavë'i God-are osa börömo ojo göho gagonö jiajoho niögëhu tugoharoho arorovo ruvebijadeje. ³⁹ Èhi'amu muorovo simano vaejaje ahuro Iesuare nuninö namiromo gavade Iesu ëhi'oromo guomamu gagorovo uvadeje: Iae mae-ëjo. Ave aho God-are Harihe jiade höjo.

⁴⁰ Èhi'amu magonaho ömo'ömhuro arue riribövire riravoromo Iesu diehi'aruoho garuomadeje. Mary Magdalene o Mary göho James a i'o o Joses jabesi vëmoho o Salome o magonaho ioro'ioroho ëhi jioruomadeje. ⁴¹ Urimë'i Iesu Galilee sa'are hijadevare evare ë magonaho ömo'ömhuro bövie bise'e ajamibe hesi ijore ijore jijihonövareje. Èhi ë'ë'ëro ë magonahohu'o magonaho ioro'iorohu'o aho'obëhe Jerusalem amore hu'o gemu mae rovë'ëro ë riravoromo garuomadeje.

Iesuare sino munë gagore bamare jöhoje.

⁴² Röhu ë majaho bövi bise'o avohu'amarue majae jiadeje nëröho nuhoromo God rajahi'iröhëro. Èmajaho garobo'e bamadeje. ⁴³ Nuho majae rue'ia'amu majae garobo'e

bamamu gagorovo Arimathea amo raje ae gemu hesi ihe Joseph-ro va'adeje. Hu Jew rajo jabesi a duvahëro jië'ëro Jew rajo a masijo ioro'iorohu'o hiromo jöe mevonövadeje. Jöe mevo'ego ae aho'obëhe hesi örire mae uehorovonövareje. Röhu ae göehu göehu ë'aruëhi hu'o ëhi muebejë'e hijadeje God-ro ro böröme namiromo aho'obëhe muebejëvoröhego. Joseph ëhi jië'e ae jiadeje. Ëhi jië'e aëro jië'ëro huro biririvoromo va'oromo Pilate uavadeje: Uevego na Iesuare sinoho bae'iröjo. ⁴⁴ Iesuare sinoho bae'iröjamu Pilate-ro tiöromo uvadeje: Iesu diehi'oromo ma-burëroho guomade höjo. Ëhi uvoromo jöe nugö'öjamu Iesu muebejade muorovo ahuro rovadeje. Rovamu Pilate-ro uavadeje: Na Iesu mami'e guomë'e höjo. ⁴⁵ Guomë'e höjamu ruehuro uavadeje: Iae guomë'e höjamu hegorovo Joseph uavadeje: Jaehu Iesuare sino baejë'oho iae mae höjo. ⁴⁶ Iae mae höjamu Joseph-ro va'oromo niögu mabëhe imoromo guomë'e sinoho baruvebiromo niöghuro numadeje. Niöghuro numoromo munë ubuvarire ë bamadeje. Bamoromo munë höhö barueromo ojoho tugohadeje. ⁴⁷ Ëhi'amu Mary Magdalene'o Joses-are vëmoho Mary'o jaburo niö'iro ariromo gavareje Iesu ë dirö'ore bamamu.

16

Iesuhu ri'öjade jöhoje.

¹ Iae Jew rajo jabesi nuho majaho barëjadeje. Jew rajo jabesi nuho majaho barëjamu Mary Magdalene o Mary göho James-are vëmoho o Salome ëho jaburo va'oromo ridi'e osoho imareje va'oromo Iesuare sinore otehoröhëro. ² Imë'ëro hura börömore sue'o majae rojomamu gagorovo ri'öromo Iesuare sino bamarire va'areje. ³ Va'ë'i uarovareje: Raro ojo tugohare munëho rori'o höhö baejahuo va'a'ajëjo. ⁴ Ëhi uarovoromo avoho ga'i gavareje mami'e rori'o bava'ë'e jiamu. Röhu ë munëho böröme jiadeje. ⁵ Bava'ë'e jiamu gagoro va'o munë gagore rumo va'oromo gavareje rue jabesi övo manö a i'e ajivë'e niögu ba'amë'oho ë hijamu. Hijamu gagorovo jiodudu'iraejareje.

⁶ Jiodudu'iraejamu gagorovo ruehuro uëvadeje: Nadi jiodudu'iraejëjo. Nazareth rajo ae Iesu korosire anamu guomade a hesi sinoho jemë naharujëjo. Hu aveho bogohöjo. Guomoromo ri'öjë'e höjo. Hesi sino bamare sionoho gahëjo. ⁷ Garomo va'oromo Peter'o Iesuare ijorajo ioro'iorohu'o uërëjo: Iesuro urimo Galilee va'iramu mami'e uëvadire jemë ë ijore va'oromo ga'a'arujë uërëjo.

⁸ Ëhi uëvamu ë magonaho ömo'ömhuro jiodudu'iraeromo butubutumoromo munë gagore jioromo suovoromo huruomoromo va'areje. Va'oromo juhuonivo'i ë jöho aho bogo majëhijareje.

Iesuhu Mary Magdalene-are nunire rovade jöhoje.

⁹ [Iae hura börömore sisonuvo'ia'amu Iesu guomadoho ri'öjadeje. Ri'öromo aevo'ioho Mary Magdalene-are nunire rovadeje. Röhu urimo bogo guomade majare Iesuro ë magonaho hesi dëre jio'amaje aru'aho sisë 7 rarovo'amadeje. ¹⁰ Ëmagonaho hesi nunire rovamu gagorovo ë magonahohuro va'oromo gavade Iesuare aribövioho huë vavaene baeromo nivoruomamu gëgorovo uëvadeje: Iesu ri'öjë'ëro hijamu gavode höjo. ¹¹ Hijamu gavode höjamu heromo bogo ma uehorovareje.

Iesuhu hesi ijoraje niö'i jabesi nunire rovade jöhoje.

¹² Bogo ma uehorovamu Iesuro Mary Magdalene-are nunire rovamu ijönö ae niö'iro amore jioromo va'i gavareje Iesu nu ano'e gorosövë'e rovamu. ¹³ Rovamu gagorovo jaburo niö'iro vuonorö'ö rueromo Iesuare aribövi ioro'ioroho Iesu gavare jöho majëhijamu bogo ma uehorovareje.

Iesuhu hesi ijoraje 11 jabesi nunire rovade jöhoje.

¹⁴ Bogo ma uehorovoromo Iesuare ijoraje 11-ho jaburo ie ue'ahamu evare ijo tugoho'i Iesu jabesi nuniroho rovadeje. Rueromo uehorovoromo uvadeje: Ave nasi ariböviohuro hejare ae göëro göëro uëvamu: Nörö ri'öjë'e jiamu noro gavare hö uëvamu heromo bogo ma uehorovare hö uvoromo birëgadeje. Birëgoromo uëvadeje: Jemë rabu hia'i birire

ë'oromo naehu ri'øjode jôho bogo ma uehorovarije hôjo. ¹⁵Ëhi birëgonugoromo uëvadeje: Sa'ae dinö'e dinö'e va'oromo nasi jö maho ae aho'obêhe majêhi barërëjo. ¹⁶Ae rahu mae uehorovoromo bapataeto vaejë'oho God-ro baejëvoromo manö bamëvo'ajëjo. Ae rahu bogo ma uehorovë'oho God-ro uë'a'ajëjo: Jemë sisë jëvaje öri sisënö va'ohëjo. ¹⁷O ae rahu mae uehorovë'oho aviëhi jië'e bogo gavarue mu masijoho vaeruomo'ajëjo aëro êho garomo uvoruomoröhego: Iae mae-ëjo. Jemë jö mae atarujëjo. Nasi ihoho uvoromo Satan-are sisë aribövi a dëre jëvajoho rarovö'öruomo'ajëjo. Bogo hejarue jöëro atoruomo'ajëjo. ¹⁸Vörö'e sigobu banigojioëmë'oho o oso sisë'e jovo ue'ahë'oho bogo sisërëjëvo'ajëjo. O guomo guomo'e aribövi jabesi sinore övo bamëhë'oho marëjëvo'ajëjo.

God-hu Iesu ajamamu ö'idöre ajiomade jôhoje.

¹⁹Bada Iesuro êhi jië'e jôho majëhiromo God-ro hu ajamamu huro ö'idöre ajiomoromo God-are övo manö hijadeje. ²⁰God-are övo manö hijamu hesi ariböviohuro va'oromo jôho majëhibe dinö'e dinö'e jijihonövareje. Majëhibe jijiho'ego Badaro jabu'o bimumoromo muoho ajëmi'ego bogo gavarue darugo'e muoho vaenövareje aëro êho garomo jabesi jôho mae uehorovo'iröhego. Êhi'areje. Ahia mino'e.]

LUKE

Luke-hu jajivade jö hesi bēhohoje.

^{1,2} O asē'e Theophilus naro ave jōho jasi ōrire jajivo'iē'e gane. Mu bōrōme nosirire rovē'eje. Ēmu aevadire aēro nunēro gabe rovē'ēro ē jōho ae majahuinōvareje. Majahuijamu ae aho'obēhe heromo ē jō gō gōho gemuoro gagovoromo jajivo gavareje. ³ Ēhuni ē muoho aho'o diehi diehi vaejaroho he avoho'i uē gēbe rovē'ēro naro jani avoho ahorirēro jajivo'amo'i uehorovodeje ⁴ ēhuro jero adahoromo mami'e hejane jōho mae uehorovo'iranego.

Bapataeto vaejaje ae John rahorōhego aneraehu majahijade jōhoje.

⁵ Iae Herod-hu Judea sa'a muebejadevare priest gemu ē hijadeje. Priest hesi ihoho Zechariah jiadeje. Abijah-are ujore priest ōmo'ōmoho Zechariah hu'o ae gemuoho jiadeje. Hesi vaboro hesi ihoho Elizabeth jiadeje. Elizabeth hu aevo'i jiade priest Aaron-are uje jiadeje. ⁶ Vaboro'o baru'o jaburo niō'iro Badahu bojēmade jōgoroho bövioho bise'oho aho'o avoho ejahoromo hesi nunire ma-mabēhe arijareje. ⁷ Jabumē aboji harihu'o rumo'e jēvadeje Elizabeth dē tiojē'e magonahēro jiē'ēro. Rōhu mami'e mavojirajēvē'e jiadeje. Jabumē ēhi jiē'e a magonaho'e jēvadeje.

⁸ Ēhi jēvē'ēro Zechariah'o hu'o gemu mae priest mu vaejarue aribōviohu'o jabesi mu majaho rovamu evare Zechariah-ro priest muoho God-are nunire vaejadeje. ⁹ Muoho vaejumu Jew rajo priest-ehu vaejaruēhi jabumēro priest ihoho jajivo'amoromo gemuore buarohoromo gemu iareje ga'i di ahuro di muoho bae hesi jiejo. Ihoho ioromo gavareje Badare osa bōrōmore rumo va'oromo ridi'e oso God-ni vēnehu buerōhe muoho Zechariah-ro baejē'e jiamu. Zechariah-ro ē muoho baenugoromo ose bue'i Badare osa bōrōmore va'irōgoro ¹⁰ a ioro'iorohuro aho'o amonō raromoromo God-are ōrire jōe atoromadaje. ¹¹ God-are ōrire jōe atamu gavē'i Zechariah-ro osa bōrōmore muoho vae'i gavadeje Badare anerae gemu nume oso buejarue maratu ōvo manō ro namijamu. ¹² Anerahu ro namijamu gagorovo jiodudu'iraeromo juhuonivadeje. ¹³ Juhuonivamu gagorovo anerahuro uavadeje: Zechariah nadi juhuonivējo. Jaehu God ēninamijanoho hu iae ejahē'e hōjo. Ejahē'ēro huro jasi vabore Elizabeth ajami'iramu huro jani harihoho raho'a'ajējo. Rahē'iroho hesi ihoho John jumuvonējo. ¹⁴ Jero sisē maro nimoroho'iramu ae aho'obēhe jabu'o uvo'a'aruējo: Mabēhe rahade hō uvoromo nimoroho'aruējo. ¹⁵ Hu Badare nunire a bōrōme jio'a'ajējo. Wine jove vōrō'e jove gō gō bogo i'a'ajējo. Hu hesi vēmu hesi dēre jio'irōhire aevoromo God-are Aru'ohohuro hesi dē vōvōbajo'ere simanore rarovo'ajējo. ¹⁶ Rarovo'iramu Israel raje ae aho'obēhe jabesi dē vōvōbajo'oho huotovēho'iramu jabumēro Bada jabesi God-are ōrire avoho uehorovoromo'ajējo. ¹⁷ Huro Elijah-are ōre daruge gemuoho baeromo ēhuro Badare jōho baeromo urimo va'a'ajējo. Va'oromo aribōvi jabesi dē vōvōbajo'oho huotovēho'iramu vavu ōmo'ōmohuro aboji harihu'oho huē baejēvo'aruējo. Jō bijōnimarue aribōviohuro mu mae vaejarue aribōvi jabesi jō maho ejēhoruromo'ajējo. Ēhi ajēm'i'iramu evare aribōvioho avoho raromoromo'ajējo Bada maro ruerōhego.

¹⁸ Anerahuro ēhi majahijamu hegorovo Zechariah-ro uavadeje: Nasi vaboroho raho'a'ajē uevanuoho rōhu na mavoje jevoromo nasi vaborohu'o mavoje hōjo. Ēhi jiē'oho na diehi'oromo uvo'ejōjo: Ja jō mae uevanuējo. ¹⁹ Uevanuējamu anerahuro uavadeje: Na Gabrieljevajējo. Na God-are nuninō namijaje hōjo. Huro na remō'ōjade hōjo naro ja'o jōe jōvoromo jaehu hejanue jō mabēhoho majahi'irodego. ²⁰ Ēhuni hejējo. Jaehu nasi jō bogo ma uehorovanuohuni ēhuni ja jō jōvanuoho bitaroho tōvavo'iramu jōrume hibe va'ojuvo naehu uvadēhi ēhi jio'iramu evare jōho jōvo'anuējo. Amo ē jōho bogo sareroho jio'i hesi majaho rue'iramu iae jio'a'ajējo.

²¹ Ēhi'amu ae aho'obēhe Zechariah mueberomo uvoruomadeje: Hu rabe ē'oromo osa bōrōmoroho hiromo ōrisanuovajējo. ²² Ōrisanuovajējamu Zechariah-ro amonō hörō

rueromo jôho bogo majêhi varijênoho jiadeje. Jôho bogo majêhi varijênoho jiamu gagorovo rue ariböviohuro garomo uvoruomadeje: Hu God-are osa bôrömore hijadevare God-ro røjahamu nia'ovo'iraeromo mu bôröme gav'ëro êhu'ëro jôho bogo majahui varijênoho hõjo. Rõhu hu töv'ëro jië'ëro jôho bogo majêhi'i ma-övëremu majêhijadeje.

²³ Êhi ë'ë'ëro God-are osare mu majaho barëjamu Zechariah-ro hesi amëro vuonorö'ö va'adeje. ²⁴⁻²⁵ Va'amumu hesi vabore Elizabeth-ro dë'iraeromo uvadeje: Dë tioromo hirono ae aho'obëhe jabesi nunire javoji baebe rovodoho aviavejõ'e Badaro huë baejevorumo ajemamu javojoho barëjevë'e hõjo. Êhi uvoromo osaremu hijamu manaere övo gö mine barëjadeje.

Iesu rahoröhe jôhoje.

²⁶ Elizabeth dë'iraeromo manaere 5 barëromo rõhu manaere 6-ho jiamu gav'ëi God-ro anerae Gabriel nug'öjiamu Galilee sa'are Nazareth amore rovadeje ²⁷ aboride gemu jõe majahi'iröhëni. Êaborido hesi ihoho Mary jiadeje. Hu o a juvije gemu jabu niö'ihu masurovo'iröhe jôho ae aho'obëhe jabesi nunire majêhijareje. A juvijo hesi ihoho Joseph jiadeje. Joseph hu Israel sa'are bôrömo vaenövade ae David-are uje jiadeje. ²⁸ Amo anerahuro rueromo Mary uvadeje: Vaevë'e javajëjo. God-hu huë baejavaje magonahe javajëjo. Badaro ja'o juvaje hõjo. ²⁹ Ja'o juvaje hõjamu hegorovo Mary-ro sisë maro nurunurumorumo uehorovoromo uvadeje: Bëhoho rabëni êhi jië'e huë baej'ë'e jôho majehiromo jejemijajëjo. ³⁰ Êhi uvamu anerahuro uvadeje: Mary God-ro jasi örire huë baejav'ë'e jiaje nadi juhuonivo'i ³¹ aveho gavëjo. Jero dë'iraeromo harihe rahoromo Iesu jumuvö'anuëjo. ³² Hu bôröme jio'a'ajëjo. Huro ave ihoho bae'a'ajëjo Dö Mare Hijaje A hesi Harihe ë ihoho bae'a'ajëjo. Bada God-ro ë aho ua'a'ajëjo: Jasi hije David-are sionoho baeromo bôröme namiromo Israel rajoho muebejëvonëjo. ³³ Muebejëvonë ua'iramu huro Jacob-are ujo ömo'ömo ma-ioro'ioeromu muebejëvonövo'ajëjo. Bogo vuonugo'i êhi muebejëvobe va'a'ajëjo.

³⁴ Muebejëvobe va'a'ajëjamu Mary-ro aneraho uvadeje: Iae jö mae-ëjo. Rõhu aho bogo maseg'ë'e na ëma hijajëjo. Êhi jië'oho diehi'oromo na dë'iraejevo'ajëjo.

³⁵ Dë'iraejevo'ajëjamu anerahuro uvadeje: God-are Aru'ahohuro ruahö'öjavo'ajëjo. Dö mare hijaje A hesi darugohuro aegaho'ajëjo. Êhuni raho'irane a ma hesi jôho God-ro uë'a'ajëjo: Hu nasi Harihe hõjo. ³⁶ Rõhu aveho gavëjo. Jasi agane Elizabeth mavoje hõjo rõhu hu'o harihe raho'irögoro ë'ajëjo. Ae aho'obëhe garomo uvoruomade hõjo: Hu dë tjoj'ë'e magonahe hõjo. Rõhu hu dë'iraejadoho manaere 5 barë'i aveho 6-ho hõjo. ³⁷ Rahade hesi bëhoho mue bövie bise'e va'e'iröhoho God hu eni jiajëjo.

³⁸ Eni jiajëjamu Mary-ro uvadeje: Iae mae hõjo. Na Badare mu vaejaje magonahe jevajëjo. Êhuni jaehu uevanue êhi jië'e muehu nasi örire rovë'oho iae mae hõjo. Êhi uvamu anerahuro hu nugo'i va'adeje.

Mary-hu Elizabeth ga'i ajiomade jôhoje.

³⁹ Va'amumu gagorovo Mary-ro ri'öromo dahorunörire Judea sa'are ë ma-burëro ajiomorumo amore höröjadeje. ⁴⁰ Hörönugoromo Zechariah-are osare va'oromo Elizabeth jejemijadeje. ⁴¹ Jejemijamu hej'ë'i Elizabeth-ro hejadeje hesi dëre aharihoho tiö-javamu. Tiö'ego God-are Aru'ahohuro hesi dë vövöbajo'ere sino haho'ere aho'obëhe rumorovavamu hegorovo ⁴² Mary-ni ma-darugo'o uvadeje: Ja huë mae baej'ë'e javajëjo. Magonaho ioro'ioroho iosirëmjij'ë'e javajëjo. Jaehu raho'iranoho huë mae jiajëjo. ⁴³ Aveho na diehi'oromo huë mae baejevë'e hõjo nasi Bôrömo hesi vëmehu nasi örire rovanoho. ⁴⁴ Êhesi bëhoho jero jejemijamu hej'ë'i hejode hõjo nasi dëre aharihohuro nimorohorumo tiö-javamu. ⁴⁵ Ja huë mae javajëjo Badahu uvadëhi êhi jio'a'ajë uvanohuro.

Mary-hu jö ioromo God rajahijade jôhoje.

⁴⁶ Êhi uvamu hegorovo Mary-ro uvadeje:

Naro nasi dë vövöbajo'o uhure Bada mabëhe uvajëjo.

⁴⁷ God na ajemaje aho uehorovoromo na nimorohevajëjo.

⁴⁸ Na hesi mu magonahe ma-bise'e jevajëjo röhu huro nasi örire uehorovev'e höjo. Aviavejö'e aevoromo ae aho'obëhe uvonövo'aruëjo: Nörö huë mae baejë'e höjo.

⁴⁹ Darugo ma'e Ahuro mu böröme vaejehë'e höjo. Hesi ihoho gemu maemu höjo.

⁵⁰ Hu mae uehorovarue aribövi jabesi jöëni vavaenimaje höjo.

Jabesi a ujo ömo'ömhuni hesi vavaenoho ëhi jiemu jiohe va'a'ajëjo.

⁵¹ Hesi darugo'e mu maho röjëhiromo

a masije javuajë uvarue aribövioho rarov'öjëvamu huruomë'e höjo.

⁵² Huro darugo'e a masijo jabesi ihoho sa'aro ba'obue'i

iho rumo'e aribövioho banigojioëmëv'e höjo.

⁵³ Vadunehu vuovë'e aribövioho iruno'o mahuro da'uojëhi'i

bövi bise'o marohë'e aribövioho rëmö'öjamu ma-övenu va'oruomë'e höjo.

⁵⁴⁻⁵⁵ Huro hesi mu aribövie Israel raje no ajamuijë'e höjo.

Nosi hijo miono'o uëvadëhi huro ëhi Abraham'o hesi ujo ömo'ömohu'o nosi jöëni vavaenimemu vavaenimobe rovë'e höjo.

⁵⁶ Ëhi jövonugoromo Mary-ro Elizabeth'o hiromo manaere niö'i gemu barëjamu hesi amëro vuonorö'ö abuejadeje.

Bapataeto vaejaje ae John rahade jöhoje.

⁵⁷ Iae Elizabeth-are majaho rovamu harihoho rahadeje. ⁵⁸ Rahamu hesi amo rajohu'o aganohu'o hejare uëvavamu: Badaro huë baeromo Elizabeth mabëhe ajamijade hö uëvavamu hegorofo jahu'o nimorohuomadeje.

⁵⁹ Nimorohoromo rahadoho hurae gemu barëjamu gagorovo rueruomadeje garöhëni jabesi Jew rajo muoho vaeromo aharihu hesi sinoho tariojahego. Rueromo ihoho hesi vavu hesi ihe Zechariah ë ihe gemuoho jumuvo'ie'areje. ⁶⁰ Jumuvo'ia'amu gagorovo vëmohuro uëvadeje: Bogajo. Hesi ihoho John ua'ejarëjo. ⁶¹ John ua'ejarëjamu uavareje: Iae mae höjo röhu jasi aganoho ëhi jië'e ihoho bogohöjo. ⁶² Bogohö uanugoromo vavuoho övëremu ua gavareje: Harihu hesi ihoho rahuo jio'a'ajëjo. ⁶³ Rahuo jio'a'ajëjamu vavuhuro övëremu uëvadeje: Ijo ha'osoho barovego na jajivöjo. Ijo ha'osoho baro bojamamu jajivoromo uëvadeje: Hesi ihoho John höjo. Hesi ihoho John hö uëvamu gagorovo rue aribövioho gövögövövereje. ⁶⁴ Ëhi'amu evare Zechariah-are jö'oho bitaroho marëjamu God rajahijadeje. ⁶⁵ Rajahijamu gagorovo rue amo rajohuro ae aho'obëhe juhuonivoruomadeje. Juhuonivoromo ë mu böröme hesi jöho aho'o Judea dahorunörire sa'a börömore ë vaerovemu vaerovoruomadeje. ⁶⁶ Vaerovemu vaerovoromo ë jöho sisë maro uehorovoruomadeje. Uehorovoromo gavare Badaro aharihoho mae ajamamu gagoro uvareje: Ëaharihoho hu diehi jië'e a mabëhe jio hesi höjo.

Zechariah-hu jö God-aro baeromo majëhijade jöhoje.

⁶⁷ Iae aharihu hesi vavue Zechariah-ro hejade God-are Aru'ahoho hesi dë vövöbajo'ere sino haho'ere rumorovoromo uehore bojamamu hegorofo ave jöho majëhiromo uëvadeje:

⁶⁸ Bada God Israel rajo muebejavuajë aho hu mabëhe höjo.

Huro uehoro ma-mae baeromo hesi aribövioho ajamui'i rovë'e höjo.

Rueromo sisë'i raromaro maro bamavuë'e höjo.

⁶⁹ Huro darugo'e aho God-are mu vaenövade ae David-are ujoho bojamuijë'e höjo no baejavuoromo maro ramuo'iröhëgo.

⁷⁰ Huro ëhi ë'iröhëro mami gö'e hesi jö baejare aribövi maho ëhi huruoho'ego jabumëro ë jöho ae majëhinövare höjo.

⁷¹ Huro no'o muorovarue aribövioho ruahö'öjëvoromo no baejavuoromo maro ramuo'iröhëro

no nu huodaguarue aribövi jabesi övore javuego baeniëhiromo maro bamavuo'iröhëro ëhi uvade höjo.

⁷² Huro muebejavuobe va'iröhe jöho uehorovoromo nosi hijo miono'oho huë baejëvo'i uvade höjo.

⁷³ Huro nosi hije Abraham darugo'e jöho majahiromo uavade höjo

⁷⁴⁻⁷⁵ ajamuiromo no'o muorovarue aribövi jabesi övore javuego baeniëhi'iröhëro.

Baeniëhijego noro bogo juhuonivo'i ma-ioro'ioremu hesi nuniro raromoromo

hu gemu uehorovoromo ae mae vaejëvoromo hesi muoho vaenövo'iröhëgo.

⁷⁶ Röhu jue'iajo. Dö mare hijaje Aho God-ro ave jöho majahiromo ua'a'ajëjo:

Ja jö God nasiro baeromo a majëhijanue ae javajëjo.

Jero Badare jöho baeromo urimo va'a'anuëjo huhu rueröhe öroho avohahego maro rueröhego.

⁷⁷ Jero jöe majëhijego God-are ariböviohuro heromo uvoruomoröhëgo: God-ro nosi sisëho uehorovoromo vuonugoromo no baejavuoromo maro ramuaje hö uvoröhëgo.

⁷⁸⁻⁷⁹ Èhesi bëhoho God-ro noni vavaanimajohuro majaëro ö'idöre rojomanovoromo

ramoramore vuovo örire jijiharue aribövioho no ajivavuo'ajëjo.

Ajivavuoromo huë mae bae'iröhe öroho röjahui'a'ajëjo.

⁸⁰ Zechariah-ro ëhi jövë'ëro John-ro böviraebe hesi aru'ahoho dë vövöbajo'oho biririvobe va'adeje. Biririvobe va'oromo a rumo'e sa'are va'o hijadeje u'emu Israel rajo jabesi nunire muoho ma-va'orahoro vaeröhëni.

2

Iesu rahade jöhoje.

¹ Èhi'amu evare Rome a böröme sa'ae aho'obëhe muebejaje a ihe Caesar Augustus-ro jöe nugö'öjadeje. Jöe nugö'öromo uëvadeje: Nasi aribövie sa'ae dinö'e dinö'e raromarujoho jemëro va'oromo jemesi ihoho census aribövioho bojëmirego jajivëho'irarëjo. ² Röhu evare majaho ëho iho aevoromo jajivo'amare majaho jiadeje. Evare majaroho Quirinius-ro bövie vaeromo Syria sa'aho muebenövadeje. ³ Amo ë jöho rovamu gagorovo ae gemu gemu amo göre göre va'o raromaroho jabesi amo mare vuonorö'ö rueruomadeje jabesi ihoho uëvego jajivojöro.

⁴ Rueruomamu Joseph-ro hu'o Galilee sa'are Nazareth amore hiromo vuonugoromo hu David-are ujëro jjië'ëro David-hu aevö'i hijade amore Bethlehem ë rovadeje. ⁵ Rue'i Mary hu'irae rovadeje jabesi ihohu'o jajivëhojöro rabëni Mary huro masuröhe magonahego. Röhu hu dë'e jiadeje. ⁶ Bethlehem rueromo arijamu magonahehu rahoröhe majaho rovadeje. ⁷ Majaho rovamu gavare aehu nuharue osaho rarovamu gagorovo mi nugö'amare osare va'o harihu murioho rahoromo niögëro nomoromo mi jabesi i bahijarue röhare ë bamareje.

Aneraehu jö barovamu sheep muebejarue ariböviehu hejare jöhoje.

⁸ Èhi'amu gavë'i iae dirö'e gemuore aëro vahi'e sheep mure raromoromo sheep-oho muebe'amareje. ⁹ Sheep-oho muebe'i gavare Badare anerahu ro nami'ego Badare ajohuro ajivëvamu gagorovo sisë maro juhuonivareje. ¹⁰ Juhuonivamu gagorovo anerahuo uëvadeje: Nadi juhuonivohëjo. Naehu rovaje hesi bëhoho na jö mae baeromo rova-jëjo jemë'o jemesi a ioro'iorohu'o aho'obëhe heromo böröme bëhe nimoroho'irarijego. ¹¹ Aruëre David-hu hinövade amore jemë baejëvoromo mare bamëvo'iröhe aho jaruvo rahë'e höjo. God-hu uavë'ëro böröme namiromo ajëmi'iröhe aho höjo. Hu Bada höjo. ¹² Röhu jemëro va'oromo ga'irarije aharihoho niögëro numë'e mi jabesi i bahijarue röhare raromamu gavë'iroho uvorëjo: Nörö jö mae uövuade höjo.

¹³ Jö mae uövuade hö uëvamu gavë'i anerae aho'obëhe ö'idöre jioromo ma-majioho ruvebiruomoromo urimore rovade anerahu'o gemu mae riravoromo God rajahiromo uvoruomadeje:

¹⁴ Dö mare hijaje aho God hu mabëhe höjo.

Sa'are raromarue aribövioho huhu huë baejëvajo maro raromoruomo'ajëjo.

¹⁵ Aneraho jaburo ëhi uvoruomoromo ö'idöre vuonorö'ö iojioamamu gagorovo nume sheep muebejarue ariböviohuro uarovareje: Rovego Bethlehem va'oromo Badahu uövuade muoho gavarëjo. ¹⁶ Èhi uarovonugoromo ma-burëro rueromo nahoromo

gavareje Mary'o Joseph'o ari'irögoro aharihoho miehu i ijarue röhore raromamu. ¹⁷ Ëhi ganugoromo aharihu hesi jö aneraehu uëvamu hejaroho Mary'o Joseph'o majëhijareje. ¹⁸ Majëhijamu hegorovo ae aho'obëhe tiöjvadeje. ¹⁹ Tiöjëvamu Mary-ro jöho avoho heromo hesi simanore bamoromo uehorovemu uehorovadeje. ²⁰ Ëhi'amu rue sheep muebejarue ariböviohuro aneraehu uëvadëhi Ëhi jiamu gavë'ëro o jöho Ëhi hejë'ëro God rajahibe mae uabe jabesirëro sionëro va'areje.

Iesu jumuvare jöhoje.

²¹ Iesu rahadoho hurae gemu barëjamugo Iesuare örire Jew rajo muoho vaeromo sinoho tariö'öjahoromo urimo Mary bogo ma'enorohë'e ma-hijadevare aneraehu iho uavadëhi Ëhi Iesu jumuvareje.

Iesu osa börömore bava'oromo God-are örire bojamare jöhoje.

²² Mary-ro aharihoho rahoromo hijuvo gavade Moses-hu bojëmade mu vaeromo jabesi sisë u'oröhe majaho rovamu gagorovo huro Joseph-mu niö'iro aharihe Iesu baeromo Jerusalem amore ajiomareje aharihoho Bada bojami'iröhëni. ²³ Ëmu hesi jöho God-are surire jajivoromo uvë'eje: Harihu murioho aho'obëhe God-are öroro i'imamego hesiremu jio'amo'irajo. Amo Mary'o Joseph'o aharihoho bava'areje Ëhi jië'e muoho vaeröhëni. ²⁴ O jö göho Badare surire jajivoromo Ëhi uvë'eje: Ihititore niö'i o guaho harihe niö'i Ëhi jië'e ugohe priest bojëmego God-ni vënëro muejëvo'irajo. Ëmuohu'o vae'iröhëni jabumë aharihoho bava'areje.

²⁵ Röhu ae gemu Jerusalem amore hijë'e jiadeje. Hesi ihoho Simeon jiadeje. Hu ae mae vaejëvoromo God-are muoho gemu uehorovaje aëro jii'ëro muebenövadeje God-ro Israel rajoho ajëmiromo jabesi huë vavaenoho tugohëhoröhego. Röhu God-are Aru'ahohuro hu'o juvonövadeje. Hu Ëhi jië'e ae jiadeje. ²⁶ Simeon hu Ëhi jië'e ae jiamu God-are Aru'ahohuro röjahiromo uavadeje: Ja bogo avevejö'oho guomo'i Badahu uavë'ëro böröme namiromo ajëmi'iröhe aho rue'iramu ganugoromo evare guomo'a'anuëjo. ²⁷ Ëhi uavë'ëro ijono God-are Aru'ahohuro uehore bojamamu Simeon-ro God-are osa börömore rovadeje. Rovamu evare Iesuare vëmu vavu'ohuro aharihoho God-are osa börömore barovareje Jew rajo jögoru jiaje Ëhi jië'e muoho vae'iro. ²⁸ Barovamu gagorovo Simeon-ro aharihoho övëro huohudëromo God rajahiromo uavadeje:

²⁹ Bada jaruvo jero jasi nimoromo uevego na muoho vuonugo'i huë mae ö'iröjo jaehu uevanëhi Ëhi jië'e jiaje.

³⁰ No maro bamavuo'iröhe aho nasi nunëro gavë'e jevajëjo.

³¹ Æaehu vaeröhe muoho jero avohane höjo sa'ae aho'o garöhego.

³² Avohane hesi bëhoho huro ajoho barovego Ëhuro jasi jö bogo hejë'e aribövioho jasi öroho ga'i jasi aribövie Israel rajo nosi ihoho döro jioröhego.

³³ Simeon-ro Ëhi jövamu hegorovo Iesuare vëmohu'o vavuohu'o tiöjvadeje.

³⁴ Tiöjëvamu God-ro jabumë huë mae bojëmi'iröhego Simeon-ro God uanugoromo Iesuare vëme Mary uavadeje: Aveho hejëjo. Ave aharihoho God-ro bamade höjo huro muoho vaejego Ëhuro Israel rajo a ioro'ioroho sa'are rireromëvo'i ioro'ioroho döro ri'öröhego. God-ro bamade höjo huro hesi jöho barueröhego. Huro hesi jöho barue'iramu aëro ahoruomo'ajëjo. ³⁵ Ahoromo Ëhuro ae aho'obëhe jabuhu diehi diehi uehorovaruoho va'orahoro jio'iramu ga'ëjarëjo. Ëhi'o'iramu jero jasi dë vövöbajo'o uhure huë vavaene börömoho bae'a'anuëjo.

³⁶ Simeon-ro Mary Ëhi uavadeje. Röhu magonaho mavoje gemu ë hijë'e jiadeje. Hesi ihoho Anna jiadeje. Hu jö God-aro baeromo majëhijaje magonahe jiadeje. Phanuel-are aboje jiadeje. Asher-are uje gemuoho jiadeje. Röhu hesi vadunoho aho'obëhe mae jiadeje. Urimë'i barue masuromo baru'o hijadoho vadune aho'obëhe 7 barëjamu ³⁷ baru guomamu doru hijadoho rahade vadunoho aho'obëhe 84 jiadeje. Ëhu'ëro mavoji mae jiadeje. Röhu huro ë God-are osa börömoremu va'oromo majae vahie jene ioho vuonugo'i God gemu uehorovoromo hesi örire jöe jövoromo rajahinövadeje. ³⁸ Amo Mary'o Joseph'o God-are

osa börömore arijamu ë magonahohuro jabesirire rovadeje. Rueromo aharihoho garomo God huë mae uavadeje. Huë mae uaromo va'oromo ganövade di ariböviohuro God-ro Jerusalem amo rajoho maro bamëvoröhego muebejarue ë aribövioho gëromo aharihu hesi jöho majëhinövadeje.

Iesu Nazareth amore vuonorö'ö barovare jöhoje.

³⁹ Ëhi'amu Mary'o Joseph'o Badare surire jiaje ëhi jjië'e muoho vae barënuogoromo Galilee sa'are vuonorö'ö rueromo ro jabesi amore Nazareth ë arijareje. ⁴⁰ Arijamu aharihoho böviraebe biririvobe va'adeje. Hu uehoro mabëhe hesi simanore jiadeje. God-ro hesi örire huë bae avohobe va'adeje.

A harihe Iesuhu God-are osare hiromo ë'ade jöhoje.

⁴¹ Ëhi jjië'ero God-hu Vörö Tugohade Maja Börömocho rue'ego vadune göro göro Iesuare vëmu vavu'ohuro Jerusalem ajiomoromo ë hesi söroho inövareje. ⁴² Ëhi'obe rovaroho Iesu vadune aho'obëhe 12 baejamu gagoro Iesuare vëmu vavu'ohuro ëhi gemuoho ë'oromo Jerusalem amore ajiomareje. ⁴³ Ajiomoromo söro majaho barëjamu vuonorö'öromo sionëro jabesi amëro rue'ie'areje. Röhu jabesi harihe Iesuro ë Jerusalem hijadeje. Hijamu vëmu vavu'oho dadivëvadeje. ⁴⁴ Dadivëvamu uehorovoromo uvareje: Evaho Iesu nosi a ioro'iorohu'o gemu mae rovajëromo rovaroho majae gemu barëjadeje. Majae gemu barëjamu agano ioro'ioirehu örire rovaruire Iesu nahobe jirehojuvo ⁴⁵ gavare Iesu bogojiamu gagorovo öri ahore vuonorö'öromo Jerusalem naho va'areje. ⁴⁶ Nahojuvo jiamëhi va'i gavareje Iesu God-are amo börömore hiromo God-are jö öri röjëhjarue aribövi jabesi jöho hejë'i hu'o mana uë gëvamu. ⁴⁷ Hejareje huro ëhi'ego ae aho'obëhe tiöromo uvoruomamu: Rabu simano ma-mabëhe baejë'ero jöho mana bu'öjajëjo. ⁴⁸ Ëhi'amu vëmu vavu'ohuro Iesu garomo tiöromo vëmohuro uavadeje: Jue'i ja rabëni nosi öriroho ëhioho ë'ane höjo. No jasi vavuohumu niö'iro nurunurumë'i nahavobe rovere höjo. ⁴⁹ Rovare höjamu Iesuro uëvadeje: Jemë rabëni na nahevobe rovarije höjo. Jemë rabëni bogo uvarije höjo: Nörö hesi Vavuohuro nimo'ego hesi osare hijajëjo. ⁵⁰ Ëhi uëvamu hegorovo vëmu vavu'oho Iesuhu uëvaje jö hesi bëhoho dadivëvadeje.

⁵¹ Dadivëvamu Iesuro vëmu vavu'ohu'o sionëro vuonorö'ö rovadoho jabesi amore Nazareth ë hiromo jabesi jöho ejëhë'e hinövadeje. Hijamu vëmohuro gavade hejade jöho hesi simanore bamoromo uehorovemu uehorovonövadeje. ⁵² Ëhi'amu Iesuro simano mae jiobe daje böviraebe va'adeje. God o ae aho'obëhe jaburo hesi örire huë bae avohobe va'areje.

3

Bapataeto vaejaje ae John-hu jö majëhinövade jöhoje.

¹ Iae Tiberius Caesar-hu Rome amore bövie namiromo hesi sa'ae dinö'e dinö'e aevoromo muebejavuadoho vadune aho'obëhe 14 barë'i 15-ho jiadeje. Röhu Pontius Pilate-ro Judea sa'aho muebe'i Herod-ro Galilee sa'aho muebe'i Herod-are murie Philip-ro Iturea sa'ahu'o Trachonitis sa'ahu'o muebejëvo'i Lysanias-ro Abilene sa'aho muebejadeje. ² Annas'o Caiaphas'o jabumë niö'i Jew rajo jabesi priest böröme jëvadeje. Ësa'are a masijo'o priest masijo'o ëhi jio'amade majare evare Zechariah-are harihe John-ro a rumo'e sa'are hijamu God-are jöhuro dëre abuejadeje. ³ Abuejamu hegorovo jöho majëhibe juvoromo Jordan jvonöröre öri ari'oho juvo barëjadeje. Juvo barëromo majëhiromo uënövadeje: Uehoro sisëho vuonugo'i uehoro mae baeromo bapataeto vaehego God-ro jemesi sisëho uehorovoromo vuonugëhajo.

⁴ John-hu ëhi ë'irhe jöho urimë'i jö God-aro baeromo majëhinövade ae Isaiah-ro surire jajivoromo uvadeje:

Aëro a rumo'e sa'are hiromo ma-darugo'o uvo'a'ajëjo:

Badahu rueröhe öroho avohorego hu maro rue'irajo.

Hesi öroho ahorirëro vajivorego hu maro juvo'irajo.

⁵ Guoröte aho'obëhe hu'o'amo'iramu rojomo'amo'ajëjo.

Dahoru egohu'o bunohu'o aho'obêhe aho'amo'iramu ahorire jio va'a'ajêjo.

Tagu tagu'e ôroho vajivo'iramu ahorirêro jio'amo'ajêjo.

Abue ajiomê'e ôroho avoho'iramu ahorirêro jio va'a'ajêjo.

⁶ Èhi'o'iramu ae aho'obêhe garuomo'ajêjo God-hu baejêvoromo mare bamêvajoho.

⁷ Èhi jajivê'ëro jiê'ëro iae John-ro gavade ae aho'obêhe mae huro bapataeto vaejêvojôro rueruomamu gëgorovo uêvadeje: Sigobu aboji harihu'e jêvanovajêjo. Jemê raro uêvade hõjo: God-are vôrôehu rue'irôhire jioromo huruomoro manô va'irarijoho eni jêvo'a-jêjo. Bogajo. ⁸ Ijehu bajo mae raejajêhi êhi mu mae vaerego no garomo uvo'irarêjo: Iae jemê uehoro sisêho vuonugo'i uehoro mae baejê'e jêvajêjo. Rôhu nadi uvorêjo: Abraham nosi bêhohuro jiê'ëro êhu'ëro no mae javuajêjo. Naro jemê uêvajêjo: Jemê Abraham-are ujo ômo'ômo jêvajoho êho ma-bise'e hõjo. God-ro nimo'ibejajo ave munêho ujuohoromo avohêvego araeromo Abraham-are ujo ômo'ômoho jio'amo'ibejajo. Èhuni nadi nimorohê'ioho êhioho atorêjo. ⁹ Rôhu tonêro ijoho bêhi'o huo'ô'iê'ajêjo. Di ijohuro bajoho bogo ma raejê'e jïego huo'ôromo vêniro huo'îê'ajêjo. ¹⁰ Èhi jiê'e jôho majêhi'ego aêro uanôvareje: Èhi jiê'oho no diehi jiê'e muoho vae'ejarêjo. ¹¹ Vae'ejarê'ego John-ro uênôvadeje: Ae rahu niôge niô'i jêvê'oho gô baeromo niôgu rumo'e aho bojaminêjo. O ie jêvê'oho i rumo'e aho gô bojaminêjo. ¹² Èhi uê'ego tax baejarue aribôvioho jabu'o bapataeto vae'i ruenôvareje. Rueromo uanôvareje: Tisa no diehi jiê'e muoho vae'ejarêjo. ¹³ Vae'ejarê'ego John-ro uênôvadeje: Tax baejê'iroho sa'are a masijehu uêvaruêhi êmino'e bae'i nadi gô'oho dôroho jemesi êma baerêjo. ¹⁴ Èhi uê'ego muorovo aribôvioho jabu'o uanôvareje: Jabesi muoho êhi hõjo rôhu nomê diehi jiê'e muoho vae'ejarêjo. Vae'ejarêjamu uêvadeje: Jemêro va'oromo nadi ae gô jabesi monioho baeniêhirêjo o nadi sarerêmiromomo uêrêjo: Jemê mu sisê vaejê'e jêvaje monie mana bojamuihêjo. Nadi êhi jiê'e muoho vaeromo monioho ujuoho'i ma-uvorêjo: No suvuoro baejaruoho iae eni hõjo.

¹⁵ Èhi majêhijamu hegorovo ae aho'obêhe dê vövôbajo'ere uvoruomadeje: Nani mu bôrômêro rovajêjo. O nani John hu God-hu uavê'ëro bôrôme namiromomo ajamui'irôhe ahuro jõe majahuijajêjo. ¹⁶ Èhi uvoruomamu gagorovo John-ro uêvadeje: Naro jovêremu bapataeto vaejêvaje hõjo. Rôhu ae gô nasi ijonô rue'îê'ajêjo. Huro na iosiremiromomo bôrô-moho hõjo. Nae hu hesi mu bise'o vaejahoromo hõru sino jiovaho'ibejodoho o mu bise'o bise'e rabe vaejaho'ibejodoho rôhu na ma-bise'e jêvajêjo. Naro ma-jovêremu bapataeto vaejêvaje hõjo. Èahuro God-are Aru'ahohuro o vênêro bapataeto vaejêvo'ajêjo. ¹⁷ Hesi ijo garanoho ôvore hõjo. Ijo garanoho ôvore jiê'ëro ioho tevoromo dôro hijiohijiovoromo mevoromo i maho gagovoromo hesi iruno'e osare ê avoho bahi'i subueho sinoho ravemu ravaje vênire huo'a'ajêjo. ¹⁸ Èhi jiê'e jôho o jõe gô gô John-ro majêhiromomo êhuro jabesi simanoho huotovêho ganôvadeje. Èhi'oromo God-are jô maho majêhinôvadeje.

John savoji gagore ba'amare jôhoje.

¹⁹ Èhi'amu gagorovo iae ê sa'a muebejaje a bôrôme Herod-ro hesi muri hesi vabore Herodias gohoniahirromo mu sisê gô gô vaejamu gagorovo John-ro ri'ôromomo birevadeje. ²⁰ Birevamu Herod-ro mu sisê aho'obêhe vaejê'ëro rôhu ave mu sisêhu'o vaejadeje. Huro ae uêvamu John guduamo bava'oromo savoji gagore ba'amareje.

John-hu Iesu bapataeto vaejade jôhoje.

²¹ Rôhu ê hesi urimo John-hu a bapataeto vaejêvade majare huro ae aho'obêhe bapataeto vaejêvonugoromo Iesu'o bapataeto vaejadeje. Bapataeto vaejamu Iesuro God-are ôrire jõe jôvamu gavê'i ô'idôho arorovadeje. ²² Arorovamu God-are Aru'ahohuro sino haho'e jioromo guaho va'ênohuro Iesuaro ruvebijamu gavê'i ae aho'obêhe hejareje ô'idôre uvavamu: Ja nasi Harihu mabêhe javajêjo. Naro ja garomo êhuro nasi dê vövôbajo'oho nimorohevajêjo.

Iesuare hijo miono'o jabesi iho jajivobe va'ade jôhoje.

²³ Rôhu Iesuhu mu aevade majaho hu vadune aho'obêhe 30 rabu'e jiadeje. Ae aho'obêhe uvoruomadeje: Iesu hu Joseph-are harihe hõjo. Rôhu Joseph hu Heli-are harihe jiadeje.

²⁴Heli hu Matthat-are harihe jiadeje. Matthat hu Levi-are harihe jiadeje. Levi hu Melchi-are harihe jiadeje. Melchi hu Jannai-are harihe jiadeje. Jannai hu Joseph-are harihe jiadeje. ²⁵Joseph hu Mattathias-are harihe jiadeje. Mattathias hu Amos-are harihe jiadeje. Amos hu Nahum-are harihe jiadeje. Nahum hu Esli-are harihe jiadeje. Esli hu Naggai-are harihe jiadeje. ²⁶Naggai hu Maath-are harihe jiadeje. Maath hu Mattathias-are harihe jiadeje. Mattathias hu Semein-are harihe jiadeje. Semein hu Josech-are harihe jiadeje. Josech hu Joda-are harihe jiadeje. ²⁷Joda hu Joanan-are harihe jiadeje. Joanan hu Rhesa-are harihe jiadeje. Rhesa hu Zerubbabel-are harihe jiadeje. Zerubbabel hu Shealtiel-are harihe jiadeje. Shealtiel hu Neri-are harihe jiadeje. ²⁸Neri hu Melchi-are harihe jiadeje. Melchi hu Addi-are harihe jiadeje. Addi hu Cosam-are harihe jiadeje. Cosam hu Elmadam-are harihe jiadeje. Elmadam hu Er-are harihe jiadeje. ²⁹Er hu Joshua-are harihe jiadeje. Joshua hu Eliezer-are harihe jiadeje. Eliezer hu Jorim-are harihe jiadeje. Jorim hu Matthat-are harihe jiadeje. Matthat hu Levi-are harihe jiadeje. ³⁰Levi hu Simeon-are harihe jiadeje. Simeon hu Judah-are harihe jiadeje. Judah hu Joseph-are harihe jiadeje. Joseph hu Jonam-are harihe jiadeje. Jonam hu Eliakim-are harihe jiadeje. ³¹Eliakim hu Melea-are harihe jiadeje. Melea hu Menna-are harihe jiadeje. Menna hu Mattatha-are harihe jiadeje. Mattatha hu Nathan-are harihe jiadeje. Nathan hu David-are harihe jiadeje. ³²David hu Jesse-are harihe jiadeje. Jesse hu Obed-are harihe jiadeje. Obed hu Boaz-are harihe jiadeje. Boaz hu Shelah-are harihe jiadeje. Shelah hu Nahshon-are harihe jiadeje. ³³Nahshon hu Amminadab-are harihe jiadeje. Amminadab hu Admin-are harihe jiadeje. Admin hu Arni-are harihe jiadeje. Arni hu Hezron-are harihe jiadeje. Hezron hu Perez-are harihe jiadeje. Perez hu Judah-are harihe jiadeje. ³⁴Judah hu Jacob-are harihe jiadeje. Jacob hu Isaac-are harihe jiadeje. Isaac hu Abraham-are harihe jiadeje. Abraham hu Terah-are harihe jiadeje. Terah hu Nahor-are harihe jiadeje. ³⁵Nahor hu Serug-are harihe jiadeje. Serug hu Reu-are harihe jiadeje. Reu hu Peleg-are harihe jiadeje. Peleg hu Eber-are harihe jiadeje. Eber hu Shelah-are harihe jiadeje. ³⁶Shelah hu Cainan-are harihe jiadeje. Cainan hu Arphaxad-are harihe jiadeje. Arphaxad hu Shem-are harihe jiadeje. Shem hu Noah-are harihe jiadeje. Noah hu Lamech-are harihe jiadeje. ³⁷Lamech hu Methuselah-are harihe jiadeje. Methuselah hu Enoch-are harihe jiadeje. Enoch hu Jared-are harihe jiadeje. Jared hu Mahalaleel-are harihe jiadeje. Mahalaleel hu Cainan-are harihe jiadeje. ³⁸Cainan hu Enos-are harihe jiadeje. Enos hu Seth-are harihe jiadeje. Seth hu Adam-are harihe jiadeje. Adam hu God-are harihe jiadeje.

4

Iesuhu mu sisë vaejõro Satan-hu bijioho gavade jõhoje.

¹Iae Iesuro hejade God-are Aru'ahohuro hesi dë vövõbajo'ere sino haho'ere rumor-ovavamu hegorovo Jordan jovoho vuonugo'irõgoro God-are Aru'ahuhu uavajire a rumo'e sa'a göre ë va'o juvadeje. ²A rumo'e sa'are juvamu gagorovo Iesuro God-are jõho ahõjõro Satan-ro hesi dëho bijioho gabe va'adoho majae aho'o 40 barëjadeje. Bijioho ga'i hijamu evare majaroho Iesuro ioho bogo ijë'e ma-hibe va'oromo ë majaho barëjamu vadunëro hõmadeje.

³Vadunëro hõmamu Satan-ro ril'õromo uavadeje: Ja God-are Harihe javë'oho ave munëho uavego iraejajo. ⁴Iraejajamu rühuro uavadeje: Röhu God-are jõho jajivoromo ëhi uvë'e hõjo: Aehu iemu uehorovë'oho bogo maho raromo'aruëjo.

⁵Ëhi uavamu Satan-ro Iesu hu'irae ba'ojiomoromo a masijehu dinö'e dinö'e raro-moromo muebe'amarue õri ari'oho ëho ma-burëro røjahi barëjadeje. ⁶Røjahiromo uavadeje: Ëõri ari'oho aho'obëhe naro bojami barë'ejõjo jero mueberomo ë bövi bise'o maho ujuoho'iranego. Ëhesi bëhoho ë õri ari'oho naro baejë'ëro jevë'ëro ae rahu bojëmi'i negë'oho iae bojëmaje hõjo. ⁷Ëhuni jaehu uvene aho røjehijë'oho aho'obëhe jasi jio'amo'ajëjo. ⁸Jasi jio'amo'ajëjamu Iesuro uavadeje: Röhu God-are surire jõho ëhi uvë'e hõjo: Bada jasi God gemu rajahiromo hesi muohemu gemu vaejahonëjo.

⁹ Ĕhi uavamu Satan-ro Iesu Jerusalem hu'irae baeromo ajiomadoho ruhe God-are osa bōrōmo hesi dōre ba'ojio Ĕ nugamu namijadeje. Namijamu Satan-ro uavadeje: Ja God-are Harihe javē'oho avehuro nami'i jōrō'ōrovējo. ¹⁰ Ĕhesi bēhoho God-are surire jōho Ĕhi uvē'e hōjo: God-ro hesi aneraho uē'iramu ja avoho muebejavo'aruējo. ¹¹ O hesi surire jō gōho Ĕhi uvē'e hōjo: Aneraho jaburo ōvore ma'enagonōvo'aruējo jasi hōrure munēro bibejavojōēni. Ĕhuni jōrō'ōrovējo. ¹² Jōrō'ōrovējamu uavadeje: Rōhu God-are jōho Ĕhi uvē'e hōjo: Nadi ri'ōromo Bada jasi God hesi dēho Ĕma bijiohoromo uanējo: God jero Ĕhi Ĕhi Ĕ'ējo. ¹³ Ĕhi uavamu Iesuro mue gō gō aho'o vaejōro Satan-ro hesi dēho bijioho ganugoromo vuonugo va'adeje majae eni jiego vuonorō'ō ruerōhēro.

Iesuhu Galilee sa'are hiromo aevoromo mu vaejade jōhoje.

¹⁴ Va'amu iae Iesuro God-are Aru'aho hesi darugoho baeromo vuonorō'ōromo Galilee sa'are va'adeje. Va'amu huhu rovade jōho Ĕ sa'aho aho'obēhe heruomadeje. ¹⁵ Iesuro Jew rajehu God rajahijarue osare osare jōe rōjēhibe juvamu ae aho'obēhe uvoruomadeje: Hu a mae hōjo.

Iesuare ame Nazareth rajehu Iesu bijōnimoruomade jōhoje.

¹⁶ Ĕhi'amu Iesuro jōe rōjēhibe juvoromo urimē'i asisō'olare hiromo bōviraejade amore Nazareth Ĕ rovadeje. Rueromo nuho majae rovamu amo gōre gōre va'oromo Ĕ'ajēhi Ĕhi huro God rajahijarue osare va'adeje. Va'oromo God-are surire jōho adaho'i ri'ō namijadeje. ¹⁷ Namijamu jō God-aro baeromo majēhinōvade ae Isaiah-hu jajivade jō'e suroho ae gōēro bojamijadeje. Bojamamu Iesuro baeromo jiovō'ōromo ave jajivade jōho nahoromo bihoromo adahoromo ¹⁸ uvadeje:

Badare Aru'ahohuro nasi simanore rumorovevajējo Badaro hesi Aru'ahoho nasirire bamē'ero jiē'ero.

Huhu bamade hesi bēhoho naro hesi jō maho baeromo bogo eni jiē'e aribōvioho majēhi'irodego bamade hōjo.

Huro na remō'ōjade hōjo naro va'oromo tōvēvē'e aribōvioho uē'irodego: Jiovo rēmō'ō'irode majaho rovē'e hōjo.

Nuni tugorohēvē'e aribōvioho uē'irodego: Nuni dadovēho'irode majaho rovē'e hōjo.

Remō'ōjade hōjo sisēhu ruahō'ōjēvē'e aribōvioho naro manō bamēvo'irodego.

¹⁹ Naro ae uē'irodego: Badahu ajēmi'irōhe majaho iae rovē'e hōjo.

²⁰ Ĕjōho adahonugoromo Iesuro suroho huhoho taemoromo osa muebejaje aho sionēro bojamiromo jō bēhoho rōjēhi'i sa'aro hijadeje. Hijamu gagorovo Ĕ osare raromare aribōviohuro ae aho'obēhe he'i Iesu gemu Ĕrimahareje. ²¹ Ĕrimahamu uēvadeje: God-are jō adahamu hejarije Ĕ hesi muoho aviavejō'e rovē'e hōjo. ²² Iesuro Ĕhi jiē'e jōho jōvamu hegorovo ae aho'obēhe uvoruomadeje: Hu jō mae jōvajēromo hesi huē ma jōho heromo tiōjēvadeje. Tiōjēvamū uvoruomadeje: Ĕiaho bogo a bōrōmehu jio'i hu Joseph-are harihe hōjo. ²³ Ĕhi uvoruomamu Iesuro uēvadeje: Ave uhu jō atarujoho jemēro Ĕhi ue'a'arujējo: Oso muebejanue aho jero jasi ajamirovego mae javajo. Ĕhesi bēhoho jemēro ueromo Ĕ'arujējo: Arue Capernaum amore mu vaejane Ĕ hesi jō hejaroho Ĕhi jiē'e muoho ave jasi amoro vaejago na gavarējo. ²⁴ Rōhu ave jōho na jō mae uē'iē'ajējo. Jō God-aro baeromo majēhijarue aribōvioho nosi sa'a rajohuro bogo ma uehorovavuarue hōjo. Bogo mae bogajo. ²⁵ Rōhu aveho na jō mae uē'iē'ajējo. Elijah-hu hijade majaroho ave Israel sa'are magonaho dorue aho'obēhe jio'amade hōjo. Evare majare Ĕni bogo mae bogo rovadoho vadune niō'i gemu rōhu dōre manaere 6 Ĕhi barējē'ero Ĕhu'ero sa'ae aho'obēhe majae Ĕgobōvie vadune raromare hōjo. Vadune raromamu evare ²⁶ magonaho dorue aho'obēhe ave Israel sa'are raromaroho God-ro Elijah hesi sa'a rajo magonaho doruoho bogo gemu vadu'e ajamijōro jabumēnioho nugō'ō'i sa'ae gō Sidon amonōrrire sa'are Zarephath amore hijade magonaho doruohuni gemu nugō'ōjade hōjo ajami'irōhego. ²⁷ O jō God-aro baeromo majēhinōvade ae Elisha-hu hijade majaroho ave Israel sa'are sino jomo'e ae aho'obēhe jio'amade hōjo. Rōhu Elisha-ro Israel raromarue jomo'e aribōvi bogo ae gemu vadu'e jabesi sinoho avohēho'i Syria rajemu gemu a ihe Naaman hesi sinoho avohahade hōjo.

²⁸ Ēhi majēhijamu hegorovo ē God rajahijarue osare raromarue aribōviohuro heromo sisē maro dē vōrōnimoruomadeje. ²⁹ Dē vōrōnēgamu ri'ōromo Iesu amore jiamu guduamo baeromo amo'e dahoru bōnure iojioromomo dahoru vōsōre suorovareje barado dōre riravo'i baba'amo'irovo. ³⁰ Ēhi'o'i ē'oruomamu gēgorovo Iesuro jabesī ririre jioromo rēmō'ōromo va'adeje.

Aru'aho sisē ae gemu hesi dēre jiamu Iesuhu rarovō'ōjade jōhoje.

³¹ Va'oromo Iesuro abuejadoho abo Galilee sa'are Capernaum amore hōrōjadeje. Hōrōromo Jew rajo jabesi nuho majaho rovamu God rajahijarue osare va'oromo jōho rōjēhijadeje. ³² Jōho rōjēhijamu heromo tiōromo uvoruomadeje: Hesi jōho darugo'e ma-mabēhe javavajējo. Ēhi uvoruomade hesi bēhoho hesi birire baejē'ēro hu jōho majēhijadeje. ³³ Amo ē osare Satan-are a sisēhu dēre abuejē'e aho hijē'e jiadeje. Hijē'ēro ma-darugo'o uvadeje: ³⁴ Hē-ajo. Iesu Nazareth rajoho ja rabēni sihusihuaguo'i rovine hōjo. Na ja ijumavuo'i ē'anuējo. Na iae ja gavajējo. Ja God-aro jioromo rov'e a ma-maemu jiē'e ae javajējo. ³⁵ Ēhi uavamu hejē'i Iesuro uvadeje: Jōho vuonugo'i hōrōjējo. Hōrōjējamu hejē'i uhure a sisēhuro ē a hesi simanoho huotovahamu ē aribōvi jabesi nunire sa'are behumorovadeje. Sa'are behumorovamu uhure a sisēhuro ē a hesi sino haho'o'oho bogo ijumaho'i ma-hōrōromo va'adeje. ³⁶ Hōrōromo va'amū gagorovo ae aho'obēhe garomo tiōjēvamū uarovareje: Aveho rabu'e jōho hōjo. Darugo'e jōho jōvego a sisēhuro ma-burēro ejahoromo suorovo va'oruomaje hōjo. ³⁷ Ēhi'amū Iesuhu vaejaje mu hesi jōho ē sa'aho aho'obēhe he barējareje.

Iesuhu ae aho'obēhe jabesi sino avohēhade jōhoje.

³⁸ Rōhu a sisēho dēre jioromo hōrō va'amū Iesuro God rajahijarue osare jioromo va'adeje. Va'oromo Simon-are osare va'adeje. Rōhu Simon-are jure magonaho hesi sino haho'o'oho vōrō'irae avohē'e jiadeje. Vōrō'iraejamū Iesu uavareje: Na ja magonahoho ajaminējo. ³⁹ Ajaminējamū hegorovo Iesuro va'oromo bēhire ruaho'amo namiromo uavadeje: Vōrō'iraejanuoho u'uhējo. U'uhējamū sino haho'ere vōrō'iraejadoho u'uhadeje. U'uhamū hejē'i ri'ōromo iruno'e avohēhoromo i'imēmadeje.

⁴⁰ I'imēmamū majae beva'amū gagorovo ae rahu hesi ae guomo guome gō gō jiē'o'oho ujuoho rovamu Iesuro hesi ōvoho ae aho'obēhe jabesi sinore bamēho'ego marē'amonō-vadeje. ⁴¹ Marē'amo'ego aru'aho sisē ae aho'obēhe jabesi dēre raromarohuro suorovo va'onōvareje. Suorovo va'iē'iroho ma-darugo'o uvonōvareje: Ja God-are Harihe javajē'ego heromo uēnōvadeje: Jōe nugohējo. Nadi nasi jōho huruohohējo. Iesuhu ēhi jiē'e jō jōvade hesi bēhoho ē aru'aho sisēho jaburo garomo uvareje: Hu bōrōme namiromo ae ajēmaje aho hōjo.

Iesuhu Judea sa'are jō majēhibe juvade jōhoje.

⁴² Ēhi ē'ē'ēro sisonuvamugo Iesuro ri'ōromo va'oromo a rumo'e sa'are ē hijadeje. Hijamū ae aho'obēhe hu nahobe rovareje. Nahobe rueromo gavare ē hijamū gagorovo nijio'iraeromo uavareje: Nadi va'i rueromo no'o hijējo. ⁴³ No'o hijējamū hegorovo uēvadeje: Iae mae uevarujējo rōhu God-hu bōrōme namiromo muebejēvaje jōho ē jōho amo ioro'iorohu'o majēhibe va'ejōjo ē hesi bēhoho God-ro ēhuni rēmō'ōjamū rovē'ēro. ⁴⁴ Ēhi'onugoromo Judea sa'are God rajahijarue osare osare jōho majēhibe juvadeje.

5

Iesuare ijore ijore jijihorōhego Iesuhu aevoromo a uēvade jōhoje.

¹ Iae Iesuro Gennesaret e'u rirōre namijadeje. Namijamū ae aho'obēhe God-are jōho he'i tagavoromo bijimō'ōrovobe rueruomadeje. ² Rovamū Iesuro namiromo gavadeje boat niō'i e'u rirōre raromēvo'i visu suovarue aribōvioho rori'o raromomo viōho u'ovamū. ³ Ēhi ganugoromo boat gemu Simon-are boat-re ajio hiromū Simon uavadeje: Ave rirōre jioromū biduohō'ōjegeri rori'o va'ajo. Rori'o va'a uanugoromū gavade eni jiamū gagorovo boat-re ēhi hiromū jōho rōjēhijamū rue sa'are raromare aribōviohuro heruomadeje.

⁴ Heruomamu Iesuro hesi jöho jövobe va'ojuvo barëjumu Simon uavadeje: Ave jasi boat-oho baeromo e'u umahë'inö huo'öbe va'oromo ja'o jasi ariböviohu'o viöho ba'amorëjo ëhuro visue aho'o suovo'irarije höjo. ⁵ Suovo'irarije höjumu Simon-ro uavadeje: Tisa ëho iae mae höjo röhu no vahi bövie visu suovo'i ë'o gabe rovaroho gavare höjo bogo eni javuamu. Röhu jero uë'ego ëhuni viöho ba'amoejööjo. ⁶ Ëhi unanugoromo viöho ba'amoromo visue aho'obëhe suovamu viöho dadorovo'ië'adeje. ⁷ Dadorovo'ia'amu gagorovo Peter-mëro jabesi a ioro'iore boat göre arijaruoho övëro uëvareje: Ro ajamui-hëjo. Ro ajamuihëjumu rueho jaburo rueromo ajëmiromomo visue aho'obëhe suovoromo ë boat niö'ire bahijamu irijiomoromo diruvëvo varijëne jiadeje. ⁸ Ëhi'amu gagorovo Simon Peter-ro Iesuare bëhire ague aho hiromo uavadeje: Bada na remo va'ëjo. Na a sisë jevajëjo. ⁹ Peter-mëro visue aho'obëhe mae suovoromoromo tiöjëvë'ëro jii'ëro ëhu'ëro ëhi uavadeje. ¹⁰ Peter-më tiöjëvo'i James'o John'o jabu'o tiöjëvadeje. Röhu James'o John'o jabumë Zebedee-are harihe jëvadeje. Jabumë Simon'o gemu mae muoho vaenövareje. Amo tiöjëvumu Iesuro Simon uavadeje: Nadi juhuonivonëjo. Aviavejöö'e aavoromo ja bogo visuoho gagovo'i ae magonahe gagovëvo'iramu nasinö jioruomoa'ajëjo. ¹¹ Ëhi jövamugo boat-re rueromo ravo'amoromo boat-oho jagu ömëvo va'o nie'uahore ötöjëvareje. Ötöjëvonugoromo jabesi muoho bövioho bise'oho vuonugo'i aavoromo Iesuare ijore ijore jijihonövareje.

Iesuhu sino jomo'e a ajamade jöhoje.

¹² Iae Iesuro amore hijadeje. Hijamu ae gemu sino haho'e jomemu jii'ohuro rueromo Iesu garomo ague aho hiromo ëninamiromomo uavadeje: Bada ja nasi sino avohëho'iranoho ja eni javajëjo. Ëhuni jasi nimoromo ajemijë'ohuro iae ajemi'anuejööjo. ¹³ Ajemi'anuejööjumu Iesuro övoho nugö'öromomo sinoho rëhahoromo uavadeje: Iae na negajëjo ajami'iro. Marëjëjo. Marëjëjumu gavë'i jomoho rireromoromo hesi sinore sisë sisëho barëjadeje. ¹⁴ Sisëho barëjumu gagorovo Iesuro uavadeje: Naehu ëhi ë'odoho nadi aho huruoho majëhinëjo. A'i ma-val'oromo jasi sinoho priest röjahijego ga'irajo. Ëhi'oromo Moses-hu uövuade ëhi jii'e suvuoroho God-are öroro bojamego aëro garomo uvo'irarëjo: Jasi sinore sisëho barëjë'ëro iae mae javajëjo. ¹⁵ Bogo aho huruoho majëhi'iröhego uavadeje röhu ë huhu vaejade mu jöho börrömo mae rumorovamu ae gö gö hebe va'oruomadeje. Hebe va'oruomë'ëro ae aho'obëhe rueromo gagovoruumadeje hesi jöho heruomoi' huro jabesi sino haho'oho ajëmëgo marëjëvo'iröhego. ¹⁶ Ro gagovoruumamu gëgorovo Iesuro a rumo'e sa'are va'o hiromo God-are örire jöe jövadeje.

Övo höru'e vuovahë'e a Iesuhu ajamade jöhoje.

¹⁷ Ëhi'oromo iae Iesuro aribövioho jöho röjëhijumu Pharisee ariböviohu'o Jew rajo jögoru öri röjëhijarue ariböviohu'o ëho jaburo hesi bëhire raromoruomadeje. Urimë'i ë aribövioho ioro'iorohuro ë Galilee sa'are amo göre göre jioromo ioro'iorohuro arue Jerusalem amore Judea sa'are amo ioro'iorore jioromo rueruomë'ëro ë raromoruomadeje. Raromamu Iesuro jöho röjëhiromomo Badare darugoho baëjë'ëro guomo guomo'e a jabesi sino avohëho'iröhoho eni jiadeje. ¹⁸ Sino avohëho'iröhoho eni jiamu iae aëro övo höru'e vuovahë'e aho maraturoho giojimo barovareje. Barueromo osanö bava'oromo Iesuare bëhire bamo'iröhe öroho nahareje. ¹⁹ Öroho nahoromo gavare ae aho'obëhe tagavoromo ojanoho urahë'e jiamu gagorovo ba'ojiomoromo javuoho dönö dadovö'öromomo maratuu-hu'o nume osare riravarue aribövi jabesi ririre Iesuare bëhire ë ba'amareje. ²⁰ Ba'amamu gagorovo Iesuro gavade i'e rovere ariböviohuo hu mae uehorovoruumamu gëgorovo övo höru'e vuovahë'e aho uavadeje: Isajajo. Jasi sisëho uehorovoromo vuonugoromo mu'u barëjahë'e höjo. ²¹ Mu'u barëjahë'e höjumu hegorovo jögoru öri röjëhijarue ariböviohu'o Pharisee ariböviohu'o uarovareje: Asë'ëjo. Sareri ae höjo. Huro God sivoromo ëhi jii'e jöho jövajëjo. Hu ma-ae höjo. Röhu huro ë aho uavajëjo: Naro jasi sisëho uehorovoromo vuonugoromo mu'u barëjahë'e jevajëjo. Ëhi jii'e muoho hesi God-ro gemuëro vaejaje höjo. Ma-aho bogajo. ²² Ëhi atamu gagorovo Iesuro uëvadeje: Jemë rabëni uehore gö gö bæjarujëjo. ²³ Jemë'o uehorovohëjo. Nani ja ae ëma ua'a'anuejööjo: Jasi sisëho uehorovoromo

vuonugahë'e hö ua'a'anuëjo. Ja ëhi ua'ibejanëjo aho nunoho bogo ga'ibejarëjo ja mae o sarere jövä'e javego. Röhu ja bogo ëma ua'a'anuëjo: Ri'öromomo nami juväjo hesi guomo guomoho bogo barëjago ja javojagöjöhëni. ²⁴ Röhu ë bogo ëma jövä'ibejane jöho iae na jövä'ejöjo huro ejehoromo ri'ö nami juvego jemëro ë muoho garomo ëhuro ga'irarijago God-are A Maho naro sa'are hijajire evare sisë mu'uvaje darugoho ëhu'o baejë'e jevego. Ëhi uënuogoromo röhu övo höru'e vuovahë'e aho uavadeje: Naro ja uavajëjo: Jero ri'öromomo raromanue maratuoho banigojiomoromo baeromo jasirëro va'ëjo. ²⁵ Va'ëjamu hejë'i ruehuro ae aho'obëhe jabesi nunire ri'öromomo maratuoho banigojiomoromo baeromo God rajahibe hesirëro va'adeje. ²⁶ Va'amu gagorovo ë aribövioho aho'obëhe tiöjëvamu juhuonivoromo God rajahiromo uarovareje: Asë'ëjo. No bogo gavarue muoho jaruvo gavë'e javuajëjo.

Levi-hu Iesuare ijore ijore juväröhego Iesuhu uavade jöhoje.

²⁷ Ëhi'amu gagorovo Iesuro ri'öromomo va'adeje. Va'i gavade tax baejaje ae hesi ihoho Levi hesi mu vaejaje osare hijamu gagorovo uavadeje: Rueromo nasi ijoro ijoro juvonövonëjo. ²⁸ Juvonövonëjamu hegorovo hesi muoho aho'o vuonugo'i ri'öromomo aevoromo Iesuare ijore ijore juvonövadeje.

²⁹ Ëhi'oromo Levi-ro Iesu rajahi'i sörö böröme hesi osare bamoromo Iesu'o a ioro'ioro-hu'o aho'obëhe uëvadeje: Rueromo söröe ihëjo. Ihëjamu hegorovo tax baejarue ae aho'obëhe ëhi jië'e a ioro'iore aho'obëhe ëho jaburo ro gemuoro raromoromo ie ue'a-hareje. ³⁰ Ie ue'ahamu gëgorovo Jew rajo jögoru öri röjëhijarue Pharisee ariböviohu'o Pharisee aribövi ioro'ioro-hu'o ëho jaburo dë vörönëgamu Iesuare aribövioho uëvareje: Jemë rabëni tax baejarue ariböviohu'o sisë a ioro'ioro-hu'o gemuoro ioho jovoho ue'aharujëjo. Ëhi jië'oho sisë höjo. ³¹ Sisë höjamu hegorovo Iesuro uhu'e uëvadeje: Röhu guomo guomo'e ariböviohuremu doctor gavarue höjo mae jëvä'e aribövioho bogajo. ³² Ëhesi bëhoho naro sisë aribövioho sisë vaejaruoho vuonugojöro uë'i rovode höjo ma-döemu mae jëvä'e aribövioho bogajo.

Bëhoho rabëni Iesuare ariböviehu i bogo vuonugare jöhoje.

³³ Iae aëro Iesu uavareje: John-are jö hejarue ariböviohuro majae aho'obëhe God uehorovo'i ioho vuonugoromo hesi örire jöe ato'i arijarue höjo. O Pharisee jabesi jö hejarue aribövioho jabu'o ëhi jië'e muoho vae'i arijarue höjo. Jabumëhu ëhi ë'aruoho iae mae höjo. Röhu jasi aribövioho ioho bogo vuonugo'i ma-iemu jovemu ue'aharue höjo. Rabëni ëhioho ë'arue höjo. ³⁴ Rabëni ëhioho ë'arue höjamu hegorovo Iesuro uhu'e uëvadeje: I'o masuröhe a hesi söröre aemo'aemehu rueromo i i'të'iroho jemë tugohëvo'irarijoho na eni jëvajëjo o bogajo. Bogajo. ³⁵ Röhu majae ijönö i'o masuröhe aho aëro guduamo bava'iramu evare majare ioho vuonugo'aruëjo. Avevejö'oho naro jabu'o hijë'ego jabu ioho bogo vuonugo'aruëjo.

Jew rajehu gororovo'iröhe jögoru mamiohu'o Iesuhu barovade mu i'ohu'o bogo gemuore havo'iröhe jöhoje.

³⁶ Ëhi uënuogoromo Iesuro uhu jöe gö'o majëhiromo uëvadeje: Niögu i'ohu'o mamiohu'o bogo havo'anuëjo. Bogo havoromo dadovadiroho niögu i'oho baeromo bisemu tariö'öromomo niögu mami hesi gagoroho bamoromo sigohi'anuëjo. Ëhi ë'ibejanëjo niögu i'oho tariö'öjë'ëro ëhuro sisërë'ibejajo. O niögu mamioho ëho nu ano'e gö jio'i i'oho nu ano'e gö jioromo ëhuro niögu mamiohu'o sisërë'ibejajo. ³⁷ O wine jovo mi sino gagore bigu'ië'iroho jovo i'ohu'o mi sino mamiohu'o bogo gemuoro havoromo jovo i'oho mi sino mamiroho bigu'anuëjo. Ëhi ë'ibejanëjo jovohuro gatovoromo ögohuro bibivoromo mi sinoho mamiëro jië'ëro tögömoromo ioro'iohemu dadorovego jovoho rova'ibejajo. ³⁸ A'i jovo i'oho mi sino i'o hesi gagoremu bigu'anuëjo. ³⁹ Röhu jovo mami ue'ahë'oho aëro uvarue höjo: Mamioho mae höromo ëhuni i'oho bijönimarue höjo. Ëjew rajehu Iesuare mu i'o bijönimarue jöho Iesuro uhu'e ëhi majëhijadeje.

6

Jew rajehu nuharue maja hesi jōhoje.

¹Iae Jew rajo jabesi nuho majaho rovamu gagorovo Iesumero mure jijihareje. Jijihoromo hesi ijorajo ōmo'ōmohuro ioho babovoromo övëro uhiromu ue'ahobe va'oruomadeje. ²Ioho övëro uhiromu ue'ahobe va'amu gëgorovo Pharisee ariböviero uëvareje: Jaruvoho nuho majae hōjo. I avoharujoho ëho nuho maja hesi jōgoroho aharujëjo. Rabëni ëhi jië'oho ë'arujëjo. ³Ë'arujëjamu Iesuro uëvadeje: David nosi a bōröme jionövade hōjo. Röhu hu'o hesi ariböviohu'o hōmëvamu hegorovo huhu ë'ade jō God-are surire adaharijoho ëho diehi'oromo bogo avoho uehorovarujëjo. ⁴David-ro God-are osare va'oromo God-are nunire bahijare ioho ujuohoromo vituoho i'i vituoho hesi aribövioho i'imëmamu ue'ahare hōjo. Ëhi jië'e ioho aho bogo ue'aho'i hesi ma-priest-ëremu ue'aho'iröhe ie hōjo. Röhu jabuhu ue'aharohuro ëhuro jōgoroho ahare hōjo. Röhu ë hesi jōho bogojiade hōjo. ⁵Ëhi uëngoromo uëvadeje: God-are A Maho naro nuho maja hesi jōgoroho muebejaje hōjo.

Övo guomahë'e a Iesuhu ajamade jōhoje.

⁶Ëhi uëvë'ëro Jew rajo jabesi nuho majae gö'o rovadeje. Nuho majae gö'o rovamu Iesuro God rajahjarue osare va'oromo hesi jōho rōjëhijadeje. Amo ë osare övo manörire övo hitahi guomahë'e aho hijë'e jiadeje. ⁷Jew rajo jōgoru öri rōjëhijarue ariböviohu'o Pharisee ariböviohu'o ëho jaburo Iesure jō sisëho nahoromo uvareje: Iesuhu guomo guomo'e aribövi jabesi sino avohëhë'oho noro a masijoho huruoho majëhiromu ue'ëjarëjo: Iesuro a ajëmaje muoho vaeromo nuho maja hesi jōgoroho ahade hōjo. Ëhi uvoromo jabumëro ma-hu gemu ërimahareje ga'iro nuho majare hu guomo guomo'e aribövi jabesi sinoho avohëhego o bogo. ⁸Ërimahamu Iesuro gëromu uvadeje: Jabumë ëhi ëhi uehorovarüë uvoromo övo guomahë'e aho uvadeje: Ro ave nosi riroro namijëjo. Namijëjamu ro jabesi ririre namijadeje. ⁹Namijamu hu bijönimoromo ërimaharuoho Iesuro uëvadeje: Na ave jōho uë gë'ië'ajëjo. Nosi nuho maja hesi jōgoroho diehi hōjo. Nuho majaroho na ae mae vaejëvo'ëjarëjo o sisë vaejëvo'ëjarëjo. I'ovëvo'ëjarëjo o muo'amo'ëjarëjo. ¹⁰Ëhi uëngoromo uherihoromo ë aribövioho aho'obëhe gëngoromo övo guomahë'e aho uvadeje: Jasi övoho nugö'öjëjo. Ëhi uavamu hegorovo övoho nugö'öjamu marëjadeje. ¹¹Marëjamu rue ariböviohuro gavare Iesuro ë aho ajami'ego marëjamu gagorovo dë vörönëgo avohadeje. Dë vörönëgamu jöe atoromo uarovareje: No Iesure öriroho diehi'o'ëjarëjo.

Iesuhu hesi apostle 12 baejëvade jōhoje.

¹²Ëhi'o'irögoro Iesuro God-are örire jöe jövo'iro dahorure ajiomadeje. Ajio hiromu vahi bövie God-are örire jöe jövobe va'ojuvo ëhi sisonuvadeje. ¹³Sisonuvamu gagorovo hesi ijore ijore jijiharue ariböviohuro ruejōro uvëvadeje. Uvëvoromo rovamu ae aho'obëhe 12 hesi baejëvadeje. Baejëvoromo uëvadeje: Jemë nasi apostle jëvavëjo. ¹⁴Iesuro Simon baejadeje. Baeromo iho göho Peter jumuvadeje. O Peter-are öho Andrew baejadeje. O göho James John Philip Bartholomew ¹⁵Matthew Thomas o James Alphaeus-are harihe o Simon aehu uvaruoho Jew rajehu jabesi mueberovo'i nimaje aho ¹⁶o Judas James-are harihoho o göho Judas Iscariot ë aribövioho baejëvadeje. Judas Iscariot Iesuni hiruëmiromo a jabesi övore bojëmi'iröhe aho jiadeje.

Iesuhu a jabesi sino avohëhade jōhoje.

¹⁷Ëaribövioho baejëvonugoromo Iesuro jabu'o gemu mae abueromo enure ë namijadeje. Namijamu hesi aribövie aho'obëhe mae o a ioro'iorohu'o arue Jerusalem amore jioromo Judea sa'a ioro'iorore jioromo nume Tyre amo Sidon amo jiajinö sō jovo bëhire sa'are jioromo ae aho'obëhe mae ë ro riravareje ¹⁸Iesure jōho heruomo'i huro ajëmego jabesi sino haho'oho marëjëvo'iröhego. Ro riravamu a sisëhu dëre abuejëvë'ëro i'u baejarue aribövioho Iesuro ajëmamu marëjëvadeje. ¹⁹Marëjëvamu ae aho'obëhe gavare Iesure darugohuro rueromo guomo guomo'e ae aho'obëhe ajëmamu gagorovo Iesu rëho'i ë'o gavareje ëhuro guomo guomoho barëjëvo'iröhego.

Huë mae baeröhe ariböviohu'o huë vavaene baeröhe aribövi jabesi jöhoje.

²⁰ Èhi'amu lesuro hesi ijarajo ömo'ömo ho gëromo uëvadeje:

Bövi bise'o rumo'e aribövioho jemë huë mae jëvajëjo

God-ro muebejëvego hesi aharire mae raromo'ië'ëro.

²¹ Avevejö'e hömëvaje aribövioho jemë huë mae jëvajëjo

maja ijönöho eni da'uëgo'ië'ëro.

Avevejö'e nierusuburu'e bamaruje aribövioho jemë huë mae jëvajëjo

maja ijönöho nimoroho'ië'ëro.

²² Jemëhu God-are A Maho na uehorovevamu aehu gëromo bijönëgoromo nu huodëgoromo sivëgoromo jemesi iho ho sisë höromo vuonugëhë'o ho huë mae jëvaje höjo.

²³ Jabuhu èhi sisë vaejëvë'iroho jemëro hirohiromoromo nimoroho avohorëjo God-hu suvuoro jemëni ö'idöre bamëhajoho böörme jië'e jiaje. Èaribövi jabesi hijo miono'ohuro jö God-aro baeromo majëhinövare aribövi jabesi örire èhi gemuoho sisë vaejëvonövare höjo.

²⁴ A'i bövi bise'o marohë'e mae jëvë'e aribövioho vaevë'e jëvajëjo.

Jemesi bövi bise'o maho ujuoho barëjë'ëro ijönöho bogo ujuoho hesi jëvajëjo.

²⁵ Avevejö'e da'uëgë'e aribövioho vaevë'e jëvajëjo.

Maja viture vadunëro vuovëvo hesi höjo.

Avevejö'e nimoroharuje aribövioho vaevë'e jëvajëjo.

Maja viture huë vavaene baejë'i nierusuburu'e bae hesi jëvajëjo.

²⁶ Ae aho'obëhe jemesi jö ma-mabëhe atë'oho vaevë'e jëvajëjo. Èaribövi jabesi hijo miono'ohuro God-are jö huotohuotovoro majëhinövare aribövi jabesi örire èhi gemuoho mae atonövare höjo.

Nu huodaguarue aribövi jabesi örire noehu huë baejëvo'iröhe jöhoje.

²⁷ Röhu jemë nasi jö hejaruje ariböviohumë ave jöho majëhi'ië'ajëjo. Jemë'o muorovarue aribövioho huë baejëvorëjo. Jemë nu huodëgarue aribövioho mae vaejëvorëjo. ²⁸ Jö sisë uëvarue aribövioho jö mae uë'rëjo. Sisë vaejëvarue ariböviohuni God-are öroro èninamirëjo. ²⁹ Aehu a'isabi gönö anagë'iroho hunuorovego a'isabi gönöhu'o anago'irajo. Aehu niögu gö baeniahijë'oho nadi nijio'iraejogo niögu göhu'o bae'irajo. ³⁰ Aehu jasi örire böviëni bise'ëni èninamijë'oho bojaminëjo. Aehu jasi mae sisë baejahë'oho nadi uanëjo: Sionëro bojëmëjo. ³¹ Jemë ae göehu diehi vaejëvojöro nëgë'oho jemë'o èhi jië'e muoho ae gö jabesi öroro vaejëvorëjo.

³² O jemë huë baejëvarue aganohe mu huë baejëvë'oho rabëni uvorëjo: God-are nunire mabëhe javuajëjo. Sisë ariböviohuro jabu'o huë baejëvarue aganohe mana huë baejëvarue höjo. ³³ O jemë mae vaejëvarue ariböviohemu mae vaejëvë'oho rabëni uvorëjo: God-are nunire mabëhe javuajëjo. Sisë ariböviohuro jabu'o èhi gemuoho ë'arue höjo. ³⁴ O uvë'oho: Èhi gemuoho vuonorö'ö bae'ejöromo èhuni bövi bise'o ma-jahuri ae gö bojëmijë'oho rabëni uvorëjo: God-are nunire mabëhe javuajëjo. Sisë ariböviohuro jabu'o uvoruomaje höjo: Èhi gemuoho vuonorö'ö bae'ejöromo èhuni bövioho bise'oho ma-jahuri ae gö bojëmijarue höjo. ³⁵ A'i jemë nu huodëgarue aribövioho huë baejëvorëjo. Mae vaejëvorëjo. Nadi uvorëjo: Mana bojemi'aruë uvë'i jemesi bövioho bise'oho ma-bojëmirejo. Èhi ë'ë'oho God-ro jemë suvuoro böörme bojëmi'ajëjo. Èhuro God-hu dö mare hijaje a hesi aboji harihu'o mae jëvo'ajëjo. Èhesi bëhoho God-ro gëvaje a sisë jioruomoi' bogo mana mabëhe uavë'e suvuore ëma baejarue aribövie jëvego gëgorovo huro ëma huë baejëvoromo ajëmijaje höjo. Huhu ë'aje èhi jië'e mu vaejë'oho jemë hesi aboji harihu'o mae jëvo'ajëjo. ³⁶ Èhuni jemesi Vuvuehu jemëni vavaenimajëhi èhi ae göëni vavaenimorëjo.

Bogo döro bamorovoromo a jabesi sisë mevo'iröhe jöhoje.

³⁷ Nadi döroho bamorovoromo a jabesi sisëho mevorëjo. Jabesi sisë bogo mevë'oho God jemesi sisëhu'o bogo mevo'ajëjo. Nadi a jabesi sisëhunioho i'uoho bojëmirejo. I'u bogo bojëmijë'oho God jemë'o i'uoho bogo bojëmi'ajëjo. A'i ae gö jabesi sisëho uehorovoromo vuonugorëjo. Èhi ë'ë'oho God-ro jemesi sisëhu'o uehorovoromo vuonugorëjo. ³⁸ Ae

suvuorëmirëjo. Jemë ëhi ë'ë'oho God-ro jemë'o suvuorëmi'ajëjo. Börömo mae suvuorëmiromo jemëro övoho avoho'iramu sö'rö va'ëne ë bamëho'iramu övo duvahoho rarovoromo oteroho'a'ajëjo. Bogo bise'o vadu'oho suvuorëmi'ajëjo. Jemë dimino'e bojëmë'ohuro ëhuro ë bojëmarije mino'e ëhi bae'a'arujëjo. Iesuro ëhi jövadeje.

³⁹ Röhu Iesuro röjëhi'iro ave uhu jöho uëvadeje: Nuni sisë'e a göhuro nuni sisë'e a göho diehi öroho röjahibe va'a'ajëjo. Bogajo. Röjahijë'oho jabumë niö'i guare bejëvo va'a'ajëjo. ⁴⁰ Jö hejaruje aribövioho jö röjëhijaje aho na bogo iosiremiromo jö maho bae'a'arujëjo. Jöho he barë'iramu evare jö röjëhijaje aho va'ëne jëvo'ajëjo.

⁴¹ Röhu ja diehi'oromo ijo ugobajo'e biseharihehu isiare nunire namijajoho ga'i ijo börömehu jasi nunire namijavajoho bogo gavanuëjo. ⁴² Ijo börömehu jasi nunire namijavajoho bogo gavë'oho ëhu'oho ja rabëni jasi aemo'aemoho uanëjo: Isi ë'ego na jasi nunire ijo ine namijavajoho jahahöjo. Sareri ae javajëjo. Jasi nunire ijo börömehu tugohavajoho jero urimo jahonëjo. Jahonugoromo evare avoho garomo ijo ino harilhoho isiare nuniroho jahaho'anuëjo.

Aho mu vaejajire garomo uvarueje: Hu mae o sisë höjo. Èhesi uhu jöhoje.

⁴³ Ijo maho bajo sisëho bogo rae'i ijo sisëho bajo maho bogo raejaje höjo. ⁴⁴ Ijoho bajoro garomo uvo'a'anuëjo: Eijoho mae höjo ëho sisë höjo. Meso böso uro'ie'iroho mesoremu uro'i bibë'e ijo sisëroho bogo uro'a'anuëjo. Rihu'e grape bajo uro'ie'iroho ë ö'iremu uro'i bibë'e resu sisëroho bogo uro'a'anuëjo. Ijo sisëhuro bajo sisëho rae'amaje höjo. Ijo mahuro bajo maho rae'amaje höjo. ⁴⁵ Èhesi bëhoho a maho ijo maehu bajo mae raejajëhi ëhi jëvaje höjo. A maho uehoro maëremu jabesi dë vövöbajo'ere jëvë'ero mu maemu vaeruomaje höjo. A sisëho uehoro sisëremu jabesi dë vövöbajo'ere jëvë'ero mu sisëmu vaeruomaje höjo. Aëro diehi jië'e uehorehu jabesi dë vövöbajo'ere irijiomëvajoho jabesi jö'ero atarue höjo.

Simano ma'e ahu'o simano sisë'e ahu'o javu vaejare uhu jöhoje.

⁴⁶ Jemëro uevaruje höjo: Bada ja no mu bojamuijanue aho javajëjo. Èhi jië'oho jemë rabëni naehu bojëmaje muoho bogo vaejaruje höjo. ⁴⁷ Röhu ae rahu nasi örire rueromo nasi jö heromo ejehajoho ëhi jië'e a hesi jöho naro uhu'e majëhi'ejöjo. ⁴⁸ Ae gemuëro javue vae'ie'ade höjo. Javue vae'irögoro ëgobövie umo abuejuvo munë'e sa'aho birohogoro öboho ë ruhoromo javuoho vaejade höjo bibivoröhego. Javuoho vae barëromo hijamu jovo börömëro ruomoromo ë javuoho anade höjo. Anamu javuoho mae vaejë'ero jië'ero bogo orivo'i ma-bibivoromo namijade höjo. Nasi jö ejehaje aho ë bibivë'e javu vaejade aho va'ëne höjo. ⁴⁹ A'i ae rahu nasi jö heromo bogo ejehajoho ëhi jië'e a hesi jöho naro uhu'e majëhi'ejöjo. Ae gemuëro javue vae'ie'ade höjo. Röhu sa'aho bogo umo abueromo öboho ruho'i ma-sa'a döre vaejade höjo. Vaejë'ero ë javuoho jövëro ro anamu dadorovo barë nahonahovade höjo.

7

Rome raje muorovo simano vaejaje a hesi mu vaejaje a guomo'ia'amu Iesuhu ajamade jöhoje.

¹ Iesuro hesi jöho ae aho'obëhe majëhinugoromo va'adoho va'o Capernaum amore hijadeje. ² Röhu Rome raje muorovo simano vaejaje ae gemuëro ë hijë'e jiadeje. Hu bogo Jew rajehu jio'i sa'a gö raje jiadeje. Hesi muemu vaejahaje ahuro hu'o hijadeje. Hijamu rue simano vaejaje ahuro ë iaho mae uehorovo avohadeje. Mae uehorovo avohamu rue aho guomo guomo böröme baejë'ero guomo'ie'adeje. ³ Guomo'ia'amu gagorovo rue simano vaejaje ahuro Iesuhu a ajëmaje jöho hegoro Jew rajo a duvaho ioro'ioroho uëvadeje: Va'oromo Iesu urego rueromo nasi mu vaejahaje a hesi sinoho avohahego marë'irajo. ⁴ Èhi uëvamu hegorovo va'areje. Va'oromo Iesu ëninamiromo uavareje: Èaho ajaminëjo. Hu a maego jaehu ajamijë'oho iae mae höjo. ⁵ Hu sa'a gö raje höjo röhu huro ave sa'a rajoho no uehorovavuae höjo. Uehorovavujëro jië'ero huro ajamuromo ae uëvade höjo noehu God rajahjarue osaho vaejahuoröhego.

⁶ Ĕhi uavamu Iesuro ri'ōromo jabu'o va'adeje. Va'oromo ě simano vaejaje a hesi osa bĕhire rovam u gavĕ'i rue simano vaejaje ahuro hesi aho uĕvadeje: Va'oromo Iesu birohoro uarĕjo: Badajo. Nadi nasiriroho rueromo u'uoho baejĕjo. Na ae ma-bise'e jevoromo sisĕ jĕvĕ'e jaehu nasi osare rovĕ'oho bogo maehu hĕjo. ⁷ Ĕhuni na uehorovoromo uvode hĕjo: Na ō'irodoho rĕhu na bogo maehu jevajĕjo. Ĕhuni nadi rue'i ma-jĕ'ĕro jĕe jĕvego nasi mu vaejehaje aho marĕ'irajo. ⁸ Ma-jĕ jĕvego mu rovaje hesi ōroho iae na gavĕ'e jevajĕjo. Ĕhesi bĕhoho na nasi a masijo jabesi aharire jĕvĕ'ĕro jabesi jĕho ejĕhoromo muoho vae'i muorovo aribĕvioho nasi aharire jĕvĕ'ĕro nasi jĕho ejĕhoromo muoho vaejarue hĕjo. Naehu muorovo ae gĕ uavĕ'oho: Va'ĕ uavĕ'iroho iae hu va'aje hĕjo. O muorovo ae gĕ uavĕ'oho: Rovĕ uavĕ'iroho iae hu rovaje hĕjo. O nasi mu ajemaje a uavĕ'oho: Mue ĕhi ĕhi vaejehĕ uavĕ'iroho iae hu ĕhi vaejaje hĕjo. Ĕhu'ĕro jĕ jĕvego mu rovaje hesi bĕhoho iae na gavĕ'e jevajĕjo. Ĕhuni uavajĕjo: Ma-jĕ'ĕro jĕe jĕvego marĕ'irajo. Ĕjĕho baeromo Iesu majahirego he'irajo. ⁹ He'irajamu simano vaejaje a hesi aribĕviohuro ě jĕho bava'oromo Iesu majahijareje. Majahijamu Iesuro heromo tiĕjadeje. Tiĕromu huotorovoromo hu rihiomare aribĕvioho uĕvadeje: Hu mabĕhe uehorovevade hĕjo. Ĕhi jiĕ'e aho na bogo birohĕ'e jevajĕjo. Nosi Israel rajoho jabu'o bogo ĕhioho mae uehorovevaruĕjo. Iae na mae jĕvajĕjo. ¹⁰ Ĕhi uĕvamu hegorovo rue aribĕviohuro vuonorĕ'ō rueromo simano vaejaje a hesi osare ro gavareje hesi mu vaejahaje aho mami'e marĕjĕ'e jiamu.

Magonaho doru hesi harihu guomo raromamu Iesuhu ajamamu i'ovade jĕhoje.

¹¹ Ĕhi'ō'irĕgoro iae Iesuro Nain amore va'i va'adeje. Va'amu Iesuare ijorajo ōmo'ō-mohu'o a ioro'iorohu'o ae aho'obĕhe mae hu'o va'oruomadeje. ¹² Va'oromo amo rejo ojo bĕhire hĕrĕ'ia'amu suorovo'ia'amu evare aĕro guomĕ'e a hesi sinoho amore jioromo guavo'i gĕojimo baeromo rovareje. Rĕhu vaevĕ'oho guomĕ'e aho magonaho doru hesi harihu gemu'oho jiadeje. Amo raje ae aho'obĕhe ě magonahohu'o rueruomadeje. ¹³ Rueruomamu Badaro magonahoho ganugoromo huni vavaenimamu uavadeje: Nadi nivonĕjo. ¹⁴ Nadi nivonĕromu rueromo sino bamare maratuoho rĕhadeje. Rĕhamu gĕojimo barovare aribĕviohuro ĕhi riravareje. Riravamu gagorovo Iesuro a juvijoho uvadeje: Jue'iajo. Naro ja uavajĕjo: Guomanoho ri'ĕjĕjo. ¹⁵ Ri'ĕjĕjamu dĕro ri'ĕ hioromo aevoromo jĕe jĕvadeje. Jĕe jĕvamu gagorovo Iesuro harihoho vĕmu hesi ōvore bamadeje. ¹⁶ Ĕhi'amu gavĕ'i ae aho'obĕhe juhuonivoromo God rajahiromo uvoruomadeje: Asĕ'e jĕ God-aro baeromo majahuijaje a bĕrĕmohuro nosi ōrire rovĕ'e hĕ uvoromo God-ro hesi aribĕvi nosi jĕĕni vavaenimĕ'e hĕ uvoruomadeje. ¹⁷ Ĕhi'amu gagorovo ae aho'obĕhe Judea sa'ahu'o sa'a ioro'iore bĕhirohu'o Iesuare jĕho ĕhi vaerovemu vaerovobe va'areje.

Bapataeto vaejaje ae John-hu ae rĕmĕ'ĕjamu rueromo Iesu jĕ ua gavare jĕhoje.

¹⁸ Iesuhu ĕhi jiĕ'e mu vaejade jĕho John-are ijore ijore jijiharue aribĕviohuro John majahijareje. ¹⁹ Ĕhi majahijamu hegorovo John-ro hesi aribĕvioho niĕ'iro ruejĕro uĕvamu rovareje. Rovamu uĕvadeje: Va'oromo Iesu ua garĕjo: No uvaruĕjo: God-ro ae nugĕ'ō'iramu nosi ōrire rue'a'ajĕjo. Na ja ě aho javajĕjo. O na no muebe'ejarĕjo ae gĕĕro ruerĕhego. ²⁰ Ĕhi uĕvamu hegorovo va'oromo Iesu uavareje: John bapataeto vaejavuaje ahuro uĕvuamu rovare hĕjo. Huro uĕvuade hĕjo: Iesu uarĕjo: No uvaruĕjo: God-ro a bĕrĕme nugĕ'ō'iramu nosi ōrire rue'a'ajĕjo. Na ja ě aho javajĕjo. O na no muebe'ejarĕjo ae gĕĕro ruerĕhego. ²¹ Ĕhi uavamu hegoro evare Iesuro guomo guome gĕ gĕ juhuonini'oho aho'o aru'aho sisĕ'oho aho'o avoho'amadeje. Nuni tugorohĕ'e aribĕvioho aho'o jabesi nunoho dadovĕhadeje. ²² Ĕhi'oromo John-are ae niĕ'ioho uĕvadeje: Va'oromo diehi gavarijoho hejarijoho John majahirego he'irajo. Uarĕjo: Nĕrĕro ae nuni sisĕ'oho ajĕmijego mae uheriharue hĕjo. Hĕru sisĕ'oho ajĕmijego mae jijiharue hĕjo. Jomo'e aho ajĕmijego marĕjĕvoromo jabesirire sisĕ sisĕho barĕjĕhaje hĕjo. Hia'i sisĕ'oho ajĕmijego hia'e dadovoromo jĕe hejarue hĕjo. Vuovĕ'e aho ajĕmijego i'ovarue hĕjo. Bogo eni jiĕ'e aribĕvioho ajĕmiromo majĕhijego God-are jĕ maho hejarue hĕjo. Va'oromo John ĕhi

majahirëjo. ²³ Röhu John o ae rahu biririvoromo nasi örire mae uehorovevë'oho ë ahuro maho hi'a'ajëjo.

²⁴ Maho hi'a'ajëjamu John-are ae niö'iohuro vuonorö'öromo va'areje. Va'amu gavë'i Iesuro ë hesi bëhire gagovare aribövioho John-are jöho majëhiromo uëvadeje: Urimë'ioho jemë rabe ga'irögoro John-hu a rumo'e sa'are hijajiroho ëho va'onövarije höjo. Ijo rudu burehu huosihëgo arue anume va'aje ëhi uehorovaje aho na John ëhi jië'e ae jiamu jemë ga'i va'arije höjo. Bogajo. ²⁵ O diehi jië'e ae ga'i va'arije höjo. Na niögu mabëhe sanu'e io'amë'e ae jiego ga'i va'arije höjo. Röhu ëhi jië'e niögu ma io'amoromo bövi bise'o marohë'e ma baeromo raromarue aribövioho bogo a rumo'e sa'aroho raromo'i a masijehu raromarue osaremu raromarue höjo. ²⁶ Röhu diehi jië'e ae ga'i va'arije höjo. Na John jö God-aro baeromo majëhijaje ae jiamu ga'i va'arije höjo. Io'ajo. John iae hu ëhi jië'e ae höjo. Röhu aveho hehëjo. Jö God-aro baeromo majëhinövore a ioro'ioroho iosirëmiromo John hu böromoho höjo. ²⁷ Iae ë a hesi jöho God-are surire jajivoromo ëhi uvë'e höjo: Ave aho God nasi jö bajuvaje aho höjo.

Ja va'ië'iroho naro hu urimo nugö'ö'iramu va'oromo ae uë'a'ajëjo jaehu va'irane öroho iogorahoröhego.

Ëhi jajivë'e höjo. ²⁸ Ave jöho na jö mae uë'ië'ajëjo. Ave sa'are raromarue aho ae gemu vadu'oho John bogo iosiramiroromo böromoho jië'e höjo. A'i God-hu börome namiroromo muebejëvego hesi aharire raromarue a inino mahuro John iosiramiroromo döroho jioruomajëjo.

²⁹ Iesuro ëhi majëhijamu tax baejarue ariböviohu'o a ioro'iorohu'o aho'obëhe ë jöho heromo uvoruomadeje: God hu mae höjo. Rabëni John-hu bapataeto vaeröhe jöho jaburo ejahë'ëro. ³⁰ A'i Pharisee ömo'ömo'hu'o Jew rajo jögoru öri röjëhijarue a ömo'ömo'hu'o ë jöho heromo jabuhu ë'ojöro God-hu nimaje muoho juahovareje rabëni John-hu bapataeto vaeröhe jöho jaburo bijönimë'ëro.

³¹ Röhu Iesuro hesi jö vituoho majëhiromo uëvadeje: Ave jaruvore raromaruje aribövi jemesi jöho uhu'e majëhi'ië'ajëjo. ³² Amo ririre raromoromo jö bijönimoruumaje asisö'oho jëvanovajëjo. Amo ririre raromoromo asisö'oho ioro'iorohuro ioro'ioroho uvëvoruumajëjo: Noehu aninivoromo jemëni virikö huosihëharoho jemëro bijönimoromo bogo ejahuoromo javavarije höjo. Noehu aninivoromo huë vavaeni'e jö iaroho jemëro bijönimoromo bogo ejahuoromo nierusuburu'e bamarije höjo. ³³ Èhesi bëhoho bapataeto vaejavuaje ae John-ro rueromo God uehorovoromo ma-hi'i'ioho wine jovoho bogo inövade höjo. Èhi'onövadoho jemëro ë jö bijönimarue asisö'oho va'ëne bijönëgamu John-are jöho bogo ejaho'i sisë'i uehorovoromo uvonövarije höjo: Aru'aho sisë dëre jië'ëro ëhu'ëro ioho jovoho bogo ijaje höjo. ³⁴ O God-are A Maho naro rueromo ioho jovoho ma-ijaje höjo. Èhi ë'ajoho jemëro ëhu'o bijönimoromo uvaruje höjo: Nörö gahëjo. Ioho mahunö'e iromo vörö'e jovemu ijaje höjo. Hu vajiohu'e tax baejarue ahu'o a sisë ioro'iorohu'o ëho jabesi aemo'aeme höjo. ³⁵ Jemëro John-are muohu'o nasi muohu'o bijönimaruje höjo röhu no God-are uehoro maho baejë'ëro muoho vaejarue höjo. Èmu nimarue aribövioho aho'o jaburo garomo uvoruomo'ajëjo: God-are uehoroho iae mae höjo. Èhu'ëro muoho vaejare höjo.

Iesuhu Pharisee ae gemu Simon-are osare hiromo ë'ade jöhoje.

³⁶ Èhi'amu Pharisee ae gemuëro Iesu uavadeje: Nasi osaro rovego no ie ijarëjo. Ie ijarëjamu ë a hesi osare va'oromo ie i'i sa'aro hijadeje. ³⁷ Röhu sisë magonahe gemuëro ë amore hijadeje. Hiromo hejade uvavamu: Iesuro Pharisee a hesi osare hiromo ie ijajë uvavamu hegorovo ridi'e ose munë huono mabëhiroho baeromo rovadeje. ³⁸ Barueromo Iesure dejonö höru bëhire hiromo nivoromo hesi nuni jovohuro Iesure hörure aho'amodivamu buejatoromo simano uohuro uhijatoromo höroho dudöhahoromo ridi'e jovohuro otehadadeje.

³⁹ Èhi'amu gagorovo ë Pharisee ae Iesu uavamu rueromo i ijade ahuro uehorovoromo uvadeje: Ave aho jö God-aro baeromo majahuijaje ae jio'ibejajo hu ga'ibejajo magonahehu

ma'enajoho rahuo jio'i o diehi jiē'e mue vaebe juvaje magonahe jiego ahego ehuro mae jio'ibejajo. Ehesi bēhoho hu magonaho sisē hōjo. Rōhu Iesuhu ē magonaho bogo avoho gavajoho ehuro hu bogo jō God-aro baeromo majahuijaje aehu hōjo. ⁴⁰ Ehi uehorovamu gagorovo Iesuro Simon ē Pharisee a hesi ihoho Simon uavadeje: Simon na jō harihe majahi'ie'ajējo. Majahi'ie'ajējamu Simon-ro uavadeje: Tisa iae mae hōjo. Majehego hejōjo. ⁴¹ Hejōjamu Iesuro uhu'e uavadeje: Iae ae niō'iehu ae gemu hesi ōrire moni mana sionehu bojami'irōhoho jēvade hōjo. Gōhuro 500 kina gōhuro 50 kina ē a hesi ōrire bojami'irōhoho jiade hōjo. ⁴² Rōhu bogo eni jēvade hōjo. Bogo eni jēvamu gagorovo moni bae'irōhe ahuro ē ae niō'iehu moni bojami'irōhoho uehorovoromo vuonugēhade hōjo. Ehi jiē'oho ē ae niō'ioho di ahuro ē moni bae'irōhe a hesi ōriroho bōrōme rajahi'i di ahuro ma-bisemu rajahi'ajējo. ⁴³ Rajahi'ajējamu Simon-ro uavadeje: Na uehorovoromo uvajējo: Moni bōrōme bojami'irōhe ahuro ē moni bae'irōhe aho bōrōme rajahi'ajējo ē hesi bēhoho huro moni bōrōmo mae uehorovoromo vuonugahē'ego. Rajahi'ajējamu Iesuro uavadeje: Ja mae uevanuējo.

⁴⁴ Ehi uaromo huotorovoromo magonahoho gavē'i Simon uavadeje: Ave magonahoho gavējo. Naro jasi osare rovode hōjo rōhu ja bogo rajehiromo jovoho bojemiJane hōjo nasi hōroho u'ojōro. A'i ave magonahohuro rajehiromo hesi nuni jovohuro nasi hōrure aho'amodegamu ehuro u'ovehade hōjo. U'ovehoromo hesi simano uohuro uhjehade hōjo. ⁴⁵ Ja bogo rajehiromo dudōhevē'e javajējo. A'i ē magonahohuro naehu jasirire rovodevare evare aevoromo rajehiromo nasi hōroho dudōhobe rovē'e hōjo. ⁴⁶ Ja bogo rajehiromo ninugu'e jovoho nasi simanoroho oteheho'i ē magonahohuro rajehi avohoromo ridi'e jovo mabēhohuro nasi hōrure otehehade hōjo. ⁴⁷ Eħuni uavajējo: Eħagonahohuro na rajehi avohē'ero ehul'ero hesi sisē aho'obēhe jiadoho uehorovoromo vuonugē'e hōjo. A'i sisē ma-bisemu uehorovoromo vuonugēhē'oho ehi jiē'e aribōvioho ma-bisemu rajehi'aruējo. ⁴⁸ Ehi uanugoromo magonahoho uavadeje: Jasi sisēho uehorovoromo vuonugahē'e hōjo. ⁴⁹ Vuonugahē'e hōjamu Iesu'o raromoromo i ue'aharue aribōviohuro jabesi uehorovoromo uvareje: Eħo hu diehi jiē'e aēro jiē'ero huro God-are muoho baeromo ae magonahe jabesi sisēho uehorovoromo vuonugēhaje hōjo. Hu ehi jiē'e muohu'o vaejaje hōjo. ⁵⁰ Ehi uvamu Iesuro magonahoho uavadeje: Jero nasi ōrire mae uehorovevamu God-ro ja baejavoromo maro ramē'e hōjo. Vaevē'e va'onējo.

8

Magonaho gōhu gōhu Iesu'o gemu mae jijihoromo Iesu ajaminōvare jōhoje.

¹ Ehi ē'ē'ero Iesuro va'adeje. Va'oromo God-hu bōrōme namiromo muebejavuaje jō maho baeromo ae majēhibe amo masijore ininore ē va'adeje. Rōhu hesi ijoraje 12-ho jabu'o ² magonaho ōmo'ōmohu'o ehi Iesu'o gemu mae va'areje. Eħagonahoho ioro'ioroho urimo aru'aho sisēhu dēre abuejēvo'i ioro'ioroho guomo guomo baejēvadoho Iesuro ajēmijamu marējēvadeje. Eħagonaho jabesi ihoho gōho Mary aehu uvaruoho Mary Magdalene jiadeje. Iesuro ē magonaho hesi dēre jio'amaje aru'aho sisē 7 rarovo'amadeje. ³ O magonaho gō hesi ihoho Joanna jiadeje. Joanna hu Chuza-are vabore jiadeje. Chuza hu a bōrōme Herod-are bōvi bise'o muebejahaje ae jiadeje. Rōhu magonaho gō hesi ihoho Susanna jiadeje. Eħagonaho ōmo'ōmohu'o magonaho ioro'iorohu'o aho'obēhe jaburo jabesi bōvi bise'o jēvadohuro ehuro Iesumē rabe rabe bogo eni jēvajoho ajēmibe va'onōvareje.

Aehu i ujo sa'a mare sa'a sisēre riremāde uhu jōhoje.

⁴ Ehi'amu iae ae aho'obēhe amo gōre gōre jioromo gagovamu sa'aho rarovadeje. Rarovamu gagorovo Iesuro uhu'e majēhiromo uēvadeje:

⁵ Iae ae gemuēro hesi i uje ujuohoromo mure riremō'i va'ade hōjo. Riremobe va'amu ujo ioro'ioroho ōrire rireromade hōjo. Rireromamu gagorovo aēro taemotaemovamu ugēro ro i barējare hōjo. ⁶ Ujo ioro'ioroho munē uhunō jiē'e sa'are rireromade hōjo. Rireromonugoromo rijamu saħori'amade hōjo sa'aho jovo rumō'ero jiē'ero. ⁷ Ujo ioro'ioroho bibē'e

resu resu'e sa'are rireromade hōjo. Rireromē'ēro ujo ma hesi gemuoro riromo baba'amade hōjo. ⁸Ujo ioro'ioroho sa'a mare rireromade hōjo. Rireromoromo riromo maho aho'obēhe 100 100 ēhi rae'amade hōjo. Uhu'e ēhi uēnugoromo ma-darugo'o uēvadeje: Ae rahu ja God-are jō hejanue ae javē'oho bēhoho nahoromo birohonējo.

Iesuhu rabēni uhu'e majēhinōvade ē hesi jōhoje.

⁹Ēhi'amu Iesuare ijorajo ōmo'ōmohuro uhu jō hesi bēhoho he'i ua gavareje. ¹⁰Ua gavamu Iesuro uēvadeje: God-ro bōrōme namiromo aho'obēhe muebejaje jōho urimoho subivēhade hōjo. Ēsubivēhade jōho huro hesi suvuore jemē bojēmijē'e hōjo jemēremu he'irarijego. Ēhu'ēro jemēro jō bēhoho he'i a'i a ioro'ioro jabesi ōriroho ma-uhu jōemu rovaje hōjo ēhuro nunēremu ga'i bēhoho bogo avoho ga'i hia'ēremu he'i bēhoho bogo avoho heruomorohego.

I ujo sa'are riremāde uhu jō Iesuhu huruoho majēhijade jōhoje.

¹¹Rōhu ē uhu jō hesi bēhoho aviēhi hōjo. I ujo hesi bēhoho God-are jōe hōjo. ¹²Ujehu ōrire rireromamu ugehu i barējare jō hesi bēhoho aehu God-are jō hejamu gavē'oho Satan-ro rueromo jōho baeniēhiromo rori'o bu'ōjaje hōjo ēhuro jabumē bogo ma uehorovoromo maroho va'oruomorohego. ¹³O i ujehu munē uhunō jiē'e sa'are rireromoromo riromo satori'amade jō hesi bēhoho aēro God-are jōho heromo nimorohoromo jōho ejaharue hōjo. Ejahoromo jōho ma-dōēremu baejē'ēro majae ma-bunemu mae uehorovoromo Satan-ro dinēmego evare vuonugarue hōjo. ¹⁴Ujehu bibē'e resu resu gemuore rireromade jō hesi bēhoho aēro God-are jōho hejarue hōjo. Heromo rōhu jabesi muohuni nurunurumoromo monie bōvie bise'e uehorovoromo ave sa'a hesirohemu nimoronimorohoromo ēhi jiē'e muohemu uehorovaruohuro God-are jō jabesi dēre jiajoho taemego jabumē bogo rae avoharue hōjo. ¹⁵Ujehu sa'a mare rireromade hesi bēhoho aēro jabesi dē vōvōbajo'oho maēro jiē'ēro God-are jōho heromo ejahoromo ma'eno titimoromo biririvobe va'o ijonō rae avohoruomaje hōjo.

Iro bueromo va'orahore bahijarue uhu jōhoje.

¹⁶Rōhu iro buno'iraejē'iroho bogo hevō gagoroho o maratu ahariroho gurih'i ma-va'orahoro bamo'anuējo ae osare rovē'oho ajivēvorōhego. ¹⁷Nasi jō bēhoho rabe rabe gurihiro jiajoho aho'obēhe ma-va'orahoro jio'a'ajējo. O rabe rabe subivēhajoho aho'obēhe ma-samaro jio'a'ajējo.

¹⁸Ēhuni naehu jōvaje jōho avo'avoho herējo. Aji'e jō javē'oho God-ro gō'bo jomai'iramu bae'a'anuējo. O bogojavē'oho ma-dōēremu baejanoho God-ro ē uehoroho mu'uvaha'ajējo.

Iesuare vēmu ōmo'ōme o ō ōmo'ōme rahumē jēvaje jōhoje.

¹⁹Ēhi uēvamu iae Iesuare vēmohu'o ō ōmo'ōmohu'o jaburo rovareje. Rueromo gavareje ae aho'obēhe tagavoromo ōroho rarovē'ēro hu jiajiroho bogo rue varijēnoho jēvamu. ²⁰Bogo rue varijēnoho jēvamu gagorovo aēro Iesu uavareje: Jasi vēmohu'o ō ōmo'ōmohu'o ja ga'i nimoromo amonō riravaruējo. ²¹Riravaruējamu Iesuro ē aribōvioho uhu'e uēvadeje: Iae hejajējo. Rōhu ae magonahe rahu God-are jō heromo ejahē'oho ēhuro ē aribōvioho nasi vēmē ō ōmo'ōme jioruomajējo.

Iesuhu uavamu jovo bōrōmehu ruhosōjade jōhoje.

²²Ēhi ē'l'ēro iae Iesuro hesi ijorajoho jahu'o gemu mae boat-re ajio hijadeje. Hiromo uēvadeje: Ruehego no e'u ioni gōnō va'arējo. Va'arēromo ri'ōromo va'areje. ²³Ri'ōromo va'aroho va'oromo Iesuro niavadeje. Niavamu gavē'i buru bōrōmēro e'ure rovadeje. Bure rovamu jovēro hasaromo boat gagore abueromo irijiomoromo diruvēvo'iē'adeje. ²⁴Diruvēvo'ia'amu gavē'i Iesuare ijorajoho jaburo va'o Iesu ioromo uavareje: Asē'e Tisa vuovavuo'ie'ajējo. Vuovavuo'ie'ajējamu ri'ōromo burohu'o hasajaje jovohu'o uēvadeje: Vuonugohējo. Vuonugohējamu buru rovodoho barē'i jovoho u'uhadeje. ²⁵U'uhamu gagorovo Iesuro hesi aribōvioho uēvadeje: Jemē rabēni bogo ma uehorovevaruējo. Ēhi'amu rueho jaburo tiōromo juhuonivoromo uarovareje: Ave aho diehi jiē'e ae hōjo. Huhu uēv'oho bogo aēremuoho ejaho'i burohu'o jovohu'o jahu'o hesi jōho ejaharue hōjo.

Satan-are a sisë aho'obêhe ae gemu hesirire jioruomamu Iesuhu rarovö'ö'amade jôhoje.

²⁶ Ëhi'amu Iesumëro e'u döre va'adoho va'o Gergesa sa'are va'o baboro bejareje. Galilee sa'aho nume e'u ioni gönö jio'i Gergesa sa'aho ruhe ioni gönö jiadeje. ²⁷ Gergesa sa'are va'o baboro bejamu gagorovo amo raje ae gemuëro rueromo Iesu birohadeje. Ëaho aru'aho sisë aho'obêhëro dëre abue'amamu simane huotorovë'e jiadeje. Niögu rumo'e ma-dë'ahobatëremu majae ëgobövie hibe rovë'e jiadeje. Osaroho bogo hi'i guavo'amarue munë gagoremu hinövadeje. ²⁸ Hijë'ëro rueromo Iesu garomo jö'e dadovoromo Iesuare hörü bëhire ague aho hiromu ma-darugo'o uvadeje: Iesu ja God dö mare hijaje a hesi Harihe javajëjo. Ja rabëni sihusihuego'i rovane hõjo. Vuonugevëjo. Nadi huë sisëho vi'ehoho bojemëjo. ²⁹ Vi'ehoho nadi bojemijë uvade hesi bëhoho urimë'i aru'aho sisëhuro höröjoro Iesuro uavë'ego ëhuni uvadeje. Röhu urimoho ë aru'aho sisëhuro hu baenövadeje. Bae'ego aëro hu avoho mueberomo hesi övoho höröho tövaho'amonövareje. Tövaho'amo'ego ö'oho tarivo ruruhö'öromu aru'aho sisëhuro hesi uhure jii'ëro ua'ego a rumo'e sa'are va'onövadeje. ³⁰ Ëhi ë'onövë'ëro Iesuro uavadeje: Jasi ihoho rahuo hõjo. Rahuo hõjamu uavadeje: Nasi ihoho Siriehu Bimuvanovë'oho jevajëjo. Huhu ëhi uvade hesi bëhoho a sisë aho'obêhe siri va'ëne hesi dëre abue'amë'ëro jii'ëro ëhi uvadeje. ³¹ Ëhi'amu ë dë uhure sisë ariböviohuro Iesu ëninamiromu uaruomadeje: Nadi uönego no sisëroho revo'irarëjo.

³² Röhu mahe aho'obêhe aruhëre dahoru ahore gemuoro ie ue'ahamu gagorovo dëre sisë ariböviohuro Iesu uaruomadeje: Uövüego no suorovo va'oromo aruhe mahu jabesi dëre va'o abuejarëjo. Abuejarëjamu uëvadeje: Ëhuro va'ohëjo. ³³ Ëhuro va'ohë uëvamu hejë'i rue sisë ariböviohuro ë a hesi dëre jioromo suorovo va'oromo ruhe mahu jabesi dëre abueruomadeje. Abueruomamu ë mahohuro va'o baradore rireromoromo e'ure siö ruruhö'ö va'oromo jove ue'ahoromo vuovadeje.

³⁴ Vuovamu gavë'i mahu muebe'amarue ariböviohuro huruomoroamo amo bërömore amo ininore jöho majëhibe va'areje. ³⁵ Jöho majëhijamu hejë'i ae aho'obêhe rueruomadeje ga'iro diehi jiego. Iesuaro rueromo gavareje aru'aho sisëhu dëre jioromo suorovo va'oruomade aho simanoho mae jio'ego niöge ba'amë'e Iesuare hörü bëhire hijamu. Ëhi gagorovo juhuonivoruomadeje. ³⁶ Juhuonivamu Iesuhu mu vaejamu gavare ariböviohuro uëvareje: Sisë ariböviehu dëre abue'amade aho Iesuro ëhi ajami'ego marëhijajo. ³⁷ Marëhijajamu Gergesa sa'a rajoho jaburo heromo sisë maro juhuonivë'ëro Iesu uavareje: Nosi sa'aho vuonugo'i va'ëjo. Vuonugo'i va'ëjamu Iesuro boat-re ajiomoromo sionëro vuonorö'ö va'ie'adeje. ³⁸ Va'ia'amu aru'aho sisëhu dëre jioromo suorovo va'oruomade ahuro Iesu uavadeje: Na ö'o ja'o hi'i negajëjo. Negajëjamu Iesuro nijio'iraeromo sionëro nugö'öromu ³⁹ uavadeje: Bogo rue'a'anuëjo. Sionëro jasi amoro va'oromo uënëjo: God-ro ëhi mabêhe ajemijamu rovode hõjo. Ëhi uavamu rue ahuro va'oromo amo bërömhoho jöe majëhibe juvo barëjadeje. Majëhiromu uëvadeje: Iesuro ëhi mabêhe ajemijamu rovode hõjo.

Iesuhu magonahe niö'i Jairus-are abojohu'o magonahe gö'o ajëmade jôhoje.

⁴⁰ Ëhi'amu Iesuro boat-re vuonorö'ö rueromo ve e'u ioni gönö rovadeje. Rovamu ae aho'obêhe hu muebejë'ëro gavare rovamu gagorovo nimorohoromo rajahiruomadeje. ⁴¹⁻⁴² Rajahiruomamu iae ae gemu hesi ihe Jairus-ro rovadeje. Jairus hu God rajahiruarue osa muebejaje ae jiadeje. Röhu hu aboje ihevae gemu jiadeje. Abojoho vadune aho'obêhe 12 rabu'e jiadeje. Amo guomo'ie'adeje. Guomo'ia'amu gagorovo Jairus-ro rueromo Iesuare hörü bëhire ague aho hiromu dinamiromu uavadeje: Nasi osaro rueromo nasi abojoho ajamëjo. Ajamijëjamu hegorovo Iesuro hu'o va'adeje. Va'amu ae aho'obêhe hu'o gemuore ëhi tatijiomobe va'areje.

⁴³ Tatijiomobe va'amu gagorovo iae magonahe gemuëro jabu'o va'adeje. Ëmagonahoho manaero garorovade guomo guomoho boga barë'i ëhi jiemu jioje va'adoho vadune aho'o 12 barëjë'e jiadeje. [Hesi ijo baje doctor jabesi örire bu'ö barëjadeje.] Röhu ajami'iröhoho bogo eni jëvë'ëro ëhi jiemu jiadeje. ⁴⁴ Ëhi jiemu jii'ëro ë magonahohuro Iesuare dejonö rovadeje. Rueromo niögu vituoho rëhamu gavë'i kö rovadoho ijoho

bogo rovadeje. ⁴⁵ Ijoho bogo rovamu Iesuro ae uëvadeje: Ja rahuaro rëhevane hõjo. Rëhevane hõjamu hegorovo ae aho'obêhe uavareje: No bogo rëhavê'e javuajêjo. Rëhavê'e javuajêromo Peter-ro uavadeje: Tisa ja rabêni êhioho uõvuanuêjo. Ae aho'obêhe jasi bêhire jijihoromo tatijiomavaruêjo. ⁴⁶ Tatijiomavaruêjamu uëvadeje: Iae aëro rëhevade hõjo. Na hejajoho nasi darugoho ae ajêmi'i gõ va'ê'e jivavajêjo. ⁴⁷ Va'ê'e jivavajêjamu ê magonahohuro garomo uvadeje: Naehu Iesu niõgure rêhodoho bogo subivo varijênoho jevajê uvoromo juhuonivadeje. Juhuonivoromo butubutumobe rueromo Iesuare hôru bêhire ague aho hijadeje. Ague aho hiromo ae aho'obêhe jabesi nunire Iesu uavadeje: Na êhi marêjevojôro negamu êhuni rëhavode hõjo. Rëhavamu êhuro ma-burêro marêjevade hõjo. ⁴⁸ Êhi uavamu hegorovo Iesuro uvadeje: Abojêjo. Jero na mae uehorovevamu êhuro marêjavê'e hõjo. Vaevê'e va'onêjo.

⁴⁹ Iesuro êhi uavamu gavê'i ae gõëro Jairus-are osare jioromo rueromo uvadeje: Jasi abojoho mami'e guomê'e hõjo. Êhuni mino'e tisaho u'uoho bojamêjo. ⁵⁰ Mino'e u'uoho bojamêjamu Iesuro mu'õjahiromo Jairus uavadeje: Nadi juhuonivo'i mae uehorovonêjo. Êhi jiê'ohuro jasi abojoho i'ovo'ajêjo. ⁵¹ I'ovo'ajê uanugoromo Iesuro Jairus-are osare va'oromo Peter John James magonaho harihu hesi vëmu vavu'oho êho jaburo hu'o va'ojôro uê'i a ioro'ioroho nijjo'iraejêvadeje. ⁵² Nijjo'iraejêvonugoromo osare va'oromo gavade ae aho'obêhe magonaho hesi jôeni nierusuburu'e bamoromo jabesi mu'amorovamu gëgorovo Iesuro uëvadeje: Nadi nierusuburu'e bamohêjo. Êmagonaho harihoho bogo guomo'i ma-niavajêjo. ⁵³ Ma-niavajêjamu hegorovo rueho jaburo garomo uvareje: Magonahoho iae mae guomê'e hôromo Iesu sivoromo ijo'ijahareje. ⁵⁴ Ijo'ijahamu Iesuro va'oromo magonaho hesi õvore ma'enoromo ma-darugo'o uvadeje: Bësu ri'õjêjo. ⁵⁵ Ri'õjêjamu magonaho hesi aru'ahohuro vuonorõ'õ rovamu hejê'i ma-burêro ri'õjadeje. Ri'õjamu gagorovo Iesuro uëvadeje: Ie bojamego ijajo. ⁵⁶ Êhi'amu vëmu vavu'oho tiõjêvadeje. Tiõjêvamu Iesuro uëvadeje: Naehu vaejode muoho nadi aho uêrêjo.

9

Iesuare ijoraje 12 jabuhu va'oromo mu vaerõhego Iesuhu rêmõ'õjade jõhoje.

¹ Iae Iesuro hesi ijoraje 12-ho uëvadeje: Ro gemuoro gagovohêjo. Gagovohêromo rovamu uëvadeje: Jemêhu mu vae'irarijohuni nasi darugoho bojêmijajêjo êhuro jemêro Satan-are a sisê a dëre jio'amê'oho rarovõ'õ'amoromo guomo guomo'e aribõvioho ajêminõvo'irarijêjo. ² Êjõho darugoho bojêmijê'e jevaje êhuni va'oromo God-hu bõrõme namiromo muebejêvaje jõho majêhibe guomo guomo'e aribõvioho ajêmime jijihorêjo. ³ Êhi uëromo uëvadeje: Va'iê'iroho bõvioho bise'oho nadi ujuohorêjo. Ha'itoho esõho iruno'oho ijo bajoho nadi ujuohorêjo. Niõgoho nadi gõho ujuoho'i ma-gemu ruohoromo jijihorêjo. ⁴ Amo gõre gõre va'oromo aehu di osare raromojôro uëvamu va'o raromê'oho êhuremu raromoromo va'onõvorêjo. ⁵ O di amore aribõviehu jemesi õrire nu huodêgê'oho amoho nugo va'irõgoro jabesi sa'a hesi tohotohe jemesi hôru hitahire jiajoho sa'aro riremõ va'ego ê amo rajohuro garomo uvo'irarêjo: No sisê ê'ê'e javuajêjo. ⁶ Êhi majêhijamu hegorovo Iesuare ijorajoho jaburo ri'õromo va'areje. Va'oromo jõ maho majêhibe guomo guomo'e aribõvi jabesi sinoho ajêmime ame aho'o jijihareje.

Herod-hu Iesuare jõ heromo dadivade jõhoje.

⁷ Iae Galilee sa'are a bõrõme Herod-ro hejade uvoruomamu: Iesumêro êhi jiê'e mu masije vae'amê'e hõ uvavamu hegorovo Iesuare jõho uehorovoromo uvadeje: Diehi'oromo ê'ajêjo. Êhesi bêhoho hu hejadeje a ioro'iorohuro uvoruomamu: Iesu hu John bapataeto vaenõvade ahuro guomoromo ri'õjê'e hõjo. Êhu'ëro êhi jiê'e muoho vae'amaje hõjo. ⁸ O a ioro'iorohuro uvoruomamu: Iesu hu mami'e hijade ae Elijah-ro rovê'ëro ê'ajêjo. O a ioro'iorohuro uvoruomamu: Mami gõ'e jõ God-aro baeromo majêhinõvare aribõvioho rõhu gemuëro i'ovoromo ri'õjê'ëro ê'ajêjo. ⁹ Ae gõëro gõëro jõe gõ gõ êhi atavamu hegoro Herod-ro dadivamu uvadeje: Nani ê aho bogo John-hu hõjo. Mami'e na John-are sõnõho

tariojahode hōjo. Rōhu ē mu masijo vae'lego aehu garomo ato'lego na hejajoho ē iaho rahuo hōjo. Ēhi uvoromo Iesu ga'i nimadeje.

Iesuhu ae aho'obēhe 5,000 da'uojuhade jōhoje.

¹⁰ Ēhi'amu apostle ōmo'ōmohuro vuonor'ō rueromo Iesu uavareje: No ēhi ēhi ē'oromo rovere hōjo. Rovare hōjamu Iesuro sōjēvoromo Bethsaida amore jabesi sivue raromo'i va'areje. ¹¹ Bethsaida jabesi sivue raromo'i va'i va'amu ae aho'obēhe ē jōho heromo rueruomadeje. Rueromo bihoruomamu gēgorovo Iesuro uēvadeje: Iae mae rovē'e jēvajē uēnugoromo God-hu bōrōme namiromo muebejavuajē jōho majēhiromo guomo guomo'e aribōvioho ajēmijadeje.

¹² Ēhi'ojuvo majae garobo'e bamamugo hesi ijoraje 12-ho jaburo rueromo uavareje: Aveho a rumo'e sa'ae hōjo. Ēhuni ave aribōvioho rēmō'ōjēgo ave bēhire amo masijore amo ininore va'oromo ie nahoromo ue'ahoromo momorō'ō'irarējo. ¹³ Momorō'ō'irarējamu uēvadeje: Bogajo. Jemēro iruno'o'ho da'uojēhirējo. Da'uojēhirējamu uavareje: Iae mae hōjo rōhu no ie ōvo gō mine visue niō'i ēhemu javuo'i gō bogojavuajējo. O na ja uōromo ē'anuējo noro va'oromo ave aribōviohuni ie imo'amojōro. Ae aho'obēhe jīē'ero no bogo eni javuajējo. ¹⁴ Ēhi uavare hesi bēhoho ama'e aho'obēhe 5,000 rabu'e ē raromē'lego ēhuni uavareje. Ēhi uavamu Iesuro hesi ijorajo ōmo'ōmoho uēvadeje: Uēvego 50 50 rabu'e hahagu hahagu gagovoromo ēhi raromobe va'arējo. ¹⁵ Raromobe va'arējamu rue ijorajoho jaburo uēvamu ae aho'obēhe ēhi raromobe va'oruomadeje. ¹⁶ Ēhi raromobe va'amu gagorovo ie ōvo gō mine visue niō'i ujuoho rovaroho ēho Iesuro ujuohoromo ō'idōho sioroho garomo God huē mae uavadeje. Huē mae uanugoromo ioho ato'atovoromo hesi ijorajo ōmo'ōmoho i'imēmijamu suvuorēmijareje. ¹⁷ Suvuorēmijamu ae aho'obēhe ue'ahamu da'uēgadeje. Da'uēgamu gagorovo ijorajoho jaburo vitu vituoho gagovoromo esōe aho'obēhe 12 aego'amareje.

Iesu hu ēhi jīē'e ae jīaje jōho Peter-hu jōvade jōhoje.

¹⁸ Ēhi'amu Iesuro huro hesi sivue parie vaejamu evare hesi ijorajoho jaburo hu'o raromareje. Raromamu gagorovo uēvadeje: Na rahuojevaje jōho ae aho'obēhe diehi atoruumaje hōjo. ¹⁹ Diehi atoruumaje hōjamu uavareje: A ioro'iorohuro uvoruomaje hōjo: Ja John bapataeto vaejavuonōvane ahuro rovē'e javajējo. A ioro'iorohuro uvoruomaje hōjo: Ja Elijah-ro rovē'e javajējo. A ioro'iorohuro uvoruomaje hōjo: Mami gō'e jō God-aro baeromo majēhinōvarije aribōvioho rōhu jero gemuēro i'ovoromo rovē'e javajējo. ²⁰ Ēhi uavamu Iesuro uēvadeje: Rōhu jemē nasi jōho diehi atarue hōjo. Diehi atarue hōjamu Peter-ro ri'ōromo uavadeje: Ja God-hu uavē'ero bōrōme namiromo ajamuijanue aho javajējo.

Iesuhu huē vavaeni baeromo guomorōhe jō jōvadohoje.

²¹ Javajējamu Iesuro jōho darugo'o majēhiromo uēvadeje: Ējōho nadi aho huruoho majēhirējo. ²² Ēhi uēnugoromo uēvadeje: God-ro ēhi bamē'ero ēhu'ero hesi A Maho naro vi'ehe huē vavaene bōvie bise'e bae'ejōjo. Jew rajo a duvaho ōmo'ōmoho priest masijoho Jew rajo jōgoru ōri rōjēhijarue aribōvioho ēho jaburo na bijōnegoruomo'ajējo. Bijōnegoruomo'iramu aēro anego'iramu guomevo'ajējo. Guomoromo majae niō'i gemu hesi uhure i'ovoromo ri'ō'ejōjo.

²³ Iesuro hesi ijorajoho ēhi majēhinugoromo ae aho'obēhe uēvadeje: Ae rahuaro nasi ijore ijore juvo'i nimē'oho jasi sinehu nimajoho nadi uehorovo'i vae majae uvonējo: Iesuare jōēni vi'ehe huē vavaene javoje rabe baeromo guomev'oho iae hesi hō uvoromo korosi hesi i'uoho banigojiomanovoromo nasi ijoro ijoro juvonōvonējo. ²⁴ Ja jasi sinohuni uehorovoromo biririvoromo ave sa'are hi'i ēhemu uehorovē'oho ijonōho guomo ōriro va'a'anuējo. O ja nasi jōēni guomē'oho ijonōho maro hi'a'anuējo. ²⁵ Jaehu are jove sa'ae mae sisē aho'obēhe bae barē'i rōhu arijo'arije ijumorovē'oho o sisērōrovē'oho na ja ēhuro mae javo'ajējo. Bogajo. ²⁶ Ēhesi bēhoho ae rahu nasi jōēni o naehu majēhijaje jō hesi jōhuni javojēg'oho u'emu God-are A Maho naro nasi ajohu'o nasi Vavu hesi ajohu'o

anera maemu jië'e jabesi ajohu'o rue'iramu evare nani javojimoruomade ariböviohuni javojego'ajëjo. ²⁷ Röhu ave jöho na jö mae uë'ie'ajëjo. Jemë a ioro'ioere ave riravarujoho bogo vuovë'e raromoromo God-hu böröme namiromo muebejaje ajoho ga'a'arujëjo.

Iesuare nu ano'ehu ajivoromo gorosovade jöhoje.

²⁸ Èhi uëngoromo hurae gemu barëjamu Iesuro Peter John James ëhi söromo God-are örire jöe jövo'li dahorure ajiomadeje. ²⁹ Ajiomoromo God-are örire jöe jövamu Iesuare nu ano'oho gorosovoromo ma-mabëhe jio'li hesi niögoho majaehu bamajëhi ëhi ajivo avohadeje. ³⁰⁻³¹ Ajivo avohamu gavë'li iae urimë'li arinövare ae niö'li Moses'o Elijah'o ma-majioho aji mare rirarovoromo jabu'o Iesu'o jöe atareje. Atoromo God-hu nimaje mu Iesuhu vaeromo Jerusalem guomoröhe jöho atareje. ³² Atoruomamu Peter-mëro nunëhëgamu momorö'ö uro'amareje. Momorö'ö uro'amë'ëro ri'ö'li gavareje Iesu aji'ere nami'ego ë ae niö'ioho jabu'o ë rirarovamu. ³³ Rirarovoromo Moses'o Elijah'o Iesu nugo va'ia'amu gavë'li Peter-ro Iesu uavadeje: Tisa no ave raromaruoho iae mae höjo. Uövuego no javu harihe niö'li gemu vae'amarëjo jani gemu Moses-ni gemu Elijah-ni gemu. Peter-ro bëhoho bogo avoho uehorovë'e ë jöho ëma jövadeje. ³⁴ Jövamu gavë'li suëro rueromo aegëhadeje. Aegëhamu Peter-mëro gavare Iesu Moses Elijah suëro numëvamu gagorovo juhuonivareje. ³⁵ Juhuonivë'li hejareje sue uhure uvavamu: Ave aho nasi Harihe naehu bæjode aho höjo. Huhu jövaje jöho avoho herëjo. ³⁶ Èhi uvavamu hejë'li gavareje Iesu hesi sivue namijamu. Èhi gavë'ëro Peter-mëro rabe rabe gavaroho subivëhoromo aho bogo majëhijareje u'emu majëhi'iröhëro.

Iesuhu Satan-are a sisë aharihu hesi dëre jiamu rarovö'öjade jöhoje.

³⁷ Èhi ë'ë'ëro sisonuvamu gatorovo Iesu o hesi ae niö'li gemu dahorure abuejareje. Abuejamu gavë'li ae aho'obëhe rueromo Iesu bihoruomadeje. ³⁸ Ae aho'obëhe ro bihororomo röhu ae gemuëro ma-darugo'o uvadeje: Tisa huë bæjevoromo nasi harihoho ro gavëjo. Na aboji harihu'e bogojevo'li avehuremu gemu jevajëjo. ³⁹ Röhu Satan-are a sisëro hesi dëre abueromo ijumahego aharihoho simane sisërëromo ma-majioho jö'e dadovoromo bijöbijövoromo övo'o höru'o ajiomoromo jö'onö obohu tatogo'e rovaje höjo. Obohu tatogo'e rovego a sisëhuro bogo burëroho hörö va'li sino haho'oho ijumahujuvo u'uhego evare höröromo va'aje höjo. ⁴⁰ Èhi ë'li hijë'ego naro jasi ijorajo ömo'ömoho uëvode höjo: Aru'aho sisëho rarovö'öhego va'ajo. Èhi uëvamu rarovö'ö'li ë'lo gavaroho bogo eni jëvade höjo. ⁴¹ Bogo eni jëvade höjamu Iesuro uëvadeje: Asë'e ave jaruvore raromaruje aribövioho jemë bogo ma uehorovö'li jöe gö gö ëma uehorovaruje aribövie jëvajëjo. Na majae dimino'e jemë'oho hiromo jemesi mu sisëho garomo ma-nunëro ga taemobe va'ëjjo. Jemesi uehoro sisëhuro na u'uvevajëjo. Jasi harihoho avehuro barovego na gavöjo. ⁴² Gavöjamu ë harihoho rovamu gavë'li Satan-are a sisë dëre hijaduhuro dë vövöbajo'oho ijumahamu simane sisërëromo sa'are darugo'o behumorovoromo bijöbijövoromo övo'o höru'o ajiomadeje. Övo'o höru'o ajiomamu gagorovo Iesuro aru'aho sisëho rarovö'öjamu marëjadeje. Marëjamu Iesuro aharihoho baeromo vavuoho sionëro bojamijadeje. ⁴³ Bojamamu ae aho'obëhe God-are darugo börömo garomo jöe barëjëvadeje.

Iesuhu guomoröhe jö röhu maho majëhijade jöhoje.

Ae aho'obëhe Iesuare mu masijoho aho'o uehorovoromo jöe barëjëvamu gavë'li Iesuro hesi ijorajo ömo'ömoho majëhiromo uëvadeje: ⁴⁴ Ave jöhuremu avoho hejëjo. God-ro ëhi bamë'ëro hesi A Maho na a jabesi övore va'iramu bæjevoruomajëjo. ⁴⁵ Èhi uëvamu hejareje röhu jö bëhoho dadivëvadeje. Subivëhë'ëro bëhoho bogo gavareje. O ua ga'iröhoho juhuonivareje.

Di aehu a ioro'ioere iosirëmiromo böröme jiaje jöhoje.

⁴⁶ Èhi'onogoromo ë ijorajoho jaburo jö aho'ahamirovoromo uarovareje: Iesuare ijorajo ömo'ömoho di aho börömo jö javuajëjo. ⁴⁷ Börömo javuajëjamu Iesuro jabesi uehoroho garomo aharihe gemu baro hesi bëhire nugamu namijadeje. ⁴⁸ Namijamu hesi ijorajo ömo'ömoho uëvadeje: Ae rahu aviëhi jië'e aharihoho nasi ihore rajahiromo bæjë'oho

ëhuro na'o rajehiromo baejevorumajaje höjo. O ae rahu na rajehiromo baejevë'oho ëhuro remö'øjamu rovode ahu'o rajahiruomajaje höjo. Èhesi bëhoho jemesirire di aho bise'o jiajoho God-hu gavajoho ëhi jië'e aho börömoho höjo.

Ae rahu jemë'o bogo iro muorovo'e vaej'oho jemë'o gemuore jiaje a hesi jö Iesuhu jövadohoje.

⁴⁹ Èhi uëvamu John-ro ri'öromomajaje: Tisa no gavare höjo ae gemuëro jasi ihoho uvoromo aru'aho sisë a jabesi dëroho rarovö'øjëvamu. Rarovö'øjëvamu garomo röhu gavare hu bogo no'o juvaje aho jiamu gagorovo uavare höjo: Vuonugëjo. ⁵⁰ Vuonugëjamu Iesuro uavadeje: Nadi ëhi jië'oho ë'orëjo. Ae rahu jemesi örire bogo bijönimë'oho ë aribövioho jemesi aemo'aeme jioruomajëjo.

Iesuhu Samaria sa'are amore ro hi'ia'amu amo rajehu hesi öri ahare jöhoje.

⁵¹ God-hu Iesu uavego ö'idöre ajiomö'iröhe majaho dunovamu gagorovo Iesuro uehore gemu baeromo uvadeje: Iae na Jerusalem ajiomö'ie'ajëjo. ⁵² Èhi uvoromo ae rëmö'öromomajaje: Jemëro urimo va'irarijoho Samaria sa'are amo göhuro va'oromomajaje amo rajoho uënëjo: Nörö ö'a'ajëjo. Ö'a'ajëjamu hegoro rueho jaburo va'oromomajaje amore suorovareje bövie bise'e Iesuni avohahoröhëro. ⁵³ Suorovamumajaje amore ariböviohuro uvoromomajaje: Jerusalem amoho sisë jië'e Iesuro ë amore va'i rovajëromomajaje ëhuni Iesuhu jabesi amore hi'iröhoho ahoruomajaje. ⁵⁴ Ahoruumamumajaje gagorovo Iesure ijoraje James'o John'o jaburo Iesu uavareje: Tisajo. Na ja nagajëjo noro uavego vënëro ö'idöre jioromomajaje ruvebiromomajaje amo rajoho ravëvojöro. ⁵⁵ Èhi uavamumajaje hegorovo Iesuro huotorovoromomajaje James'o John'o uvadeje: Bogave ëhioho uvo'irarijëjo. ⁵⁶ Èhi uëngoromomajaje ame göro va'areje.

A ioro'iorehu Iesure ijore ijore jijihö'ia'amu Iesuhu majëhijade jöhoje.

⁵⁷ Örire va'oruomomajaje ae gemuëro Iesu uavadeje: Ja dinö'e dinö'e va'ë'iroho na jasi ijore ijore juvonövo'ejöjo. ⁵⁸ Juvonövo'ejöjamumajaje Iesuro uavadeje: Jero nasi ijore ijore juvo'i uevanuëjo röhu je'ö majehumajaje sa'agagore röho avohoromomajaje mare raromaruoho iae jiajëjo. Je'ö ueghu iju vaeromomajaje mare raromaruoho iae jiajëjo. A'i God-are A Ma naehu niavaje hijaje osaho bogojevajëjo. Nadi uvonëjo: Nörö'ö hibe juvë'oho mae hibe juvo'ejöromomajaje nasiriroho ruenëjo. ⁵⁹ Èhi ë'ë'ëro Iesuro ae gö uvadeje: Rueromomajaje nasi ijoro ijoro juvëjo. Juvëjamumajaje ruehuro uvadeje: Iae mae höjo röhu uevego na nimo vuonorö'ö va'oromomajaje nasi vavuoho guavoromomajaje hujeji evare jasi ijore ijoro juvo'iröjo. ⁶⁰ Juvo'iröjamumajaje Iesuro uvadeje: O-ajo. Vuonugego vuovo örire jijiharue ariböviohuro jabesi aribövioho guavo'amö'irarëjo. A'i jero va'oromomajaje God-hu böröme namiromomajaje muebejëvaje jöho majëhibe juvonövonëjo. ⁶¹ Èhi uavamumajaje ae göëro Iesu uavadeje: Bada iae na jasi ijore ijore juvonövo'ejöjo. Röhu uevego na urimomajaje va'oromomajaje nasi aganohomajaje jejëmiromomajaje rueromomajaje evare jasi ijore ijoro juvo'iröjo. ⁶² Juvo'iröjamumajaje Iesuro uhu'e uvadeje: Röhu aehu aevoromomajaje mu ravoromomajaje vuonorö'ö uherihobe ravobe va'ë'oho hu muoho bogo avo'avohomajaje ravaje höjo. Èhesi bëhoho ja uehoro niö'i baejë'oho ëhuro God-are aji'e öri ari'ö hesi mu vae'iranohomajaje bogo eni javo'ajëjo.

10

Ae aho'obëhe 72 jabuhu va'oromomajaje mu vaejöro Iesuhu rëmö'ö'irögöro jö majëhijade jöhoje.

¹ Èhi ë'ë'ëro Badaro ae gö aho'obëhe 72 baejëvoromomajaje rëmö'öromomajaje uëvadeje: Naehumajaje juvo'irode ë amoromajaje amoromajaje ëhuro jemëro ae niö'i niö'i urimomajaje va'orëjo. ² Èhi uëngoromomajaje uhu'e uëvadeje: Ae aho'obëhe nasinö sö rue'iröhohomajaje ëho mure iruno'e gagovo'iröhohomajaje va'ëne höjo. Mure gagovo'iröhohomajaje iruno'ohomajaje bövi mae jio'i gagovarumajaje aribövioho no magemumajaje gemu javuajëjo. Èhuni mu Arijo'ohomajaje ëninamiromomajaje uarego huro ae gö'ö rëmö'öjogomajaje mure rueromomajaje ajamuiromomajaje iruno'ohomajaje gagovo'irarëjo. ³ Jemëromajaje va'orëjo. Röhu gavë'iajo. Naro rëmö'öjogomajaje jemë vaevë'e sheep harihunö'e vörö'e miehu jioruomajaje va'ie'arujëjo. ⁴ Monioho esöho hörumajaje sinohomajaje nadi ujuoho va'orëjo. Örirohohomajaje nadi ae gö gö jabesi örirohohomajaje jejëmime va'oromomajaje örisanuhomajaje ë'orëjo. ⁵ Jemë ae gö jabesi osare va'ie'irohohomajaje urimomajaje jejëmiromomajaje uënövorëjo: Ave osare aribövioho huë mae baerëjo. ⁶ Huë mae baerë'iramumajaje

God-are huë ma bae'i nimaje aho ë osare hijë'oho iae huë mae bae'a'ajëjo. O God-are huë ma baeröhoho bijönimoruomë'oho uërëjo: God-are huë ma jö uëvodoho vuonugajëjo. Èhu'ëro bogo bae'a'arujëjo. ⁷Nadi osa göroho göroho momorö'öbe va'i ma-osae gemuoro raromoromo ie jove rabe i'imëmijë'oho ëho ue'ahorëjo. Jemëhu jabesi iruno'o o jovo ue'ahë'oho iae mae höjo rabëni jemë jabesi mue vae'ie'ëro. Èhesi bëhoho ae rahu mu vaeromo mana baejë'oho iae mae höjo. ⁸Jemë di amore va'o suorovamu jabuhu huë baejëvamu gavë'ohuro ie rabe rabe i'imëmë'oho ëho ue'ahorëjo. ⁹Guomo guomo'e aribövie ë amore raromë'oho ajëmirëjo. Amo rajoho jöe majëhiromo uërëjo: Avevejö'oho God-ro böröme namiromo jemë muebejëvo'ie'ajëjo. ¹⁰O jemë di amore va'o suorovamu jabuhu jemë bijönëgë'oho amoho nugo va'irögoro amoro jijihoromo jöe majëhiromo uërëjo: ¹¹Noro jemesi bövioho bise'oho rirem'öromo jemesi amore sa'a hesi tohotohehu nasi hörure aegadoho no va'i èhu'o riremo va'ëjarëjo èhuro jemë garomo uvo'irarijeho: No sisë aribövie javuajëjo. Röhu ave jöhu'o avo'avohoho uehorovohëre. God-ro böröme namiromo aevoromo jemë mabëhe muebejëvo'ie'oromo vuonugë'e höre. Ame gö gö jemesi jö bijönimë'oho èhi majëhinövorëjo. ¹²Naro jemë uëvajëjo: God-hu i'u bojëmi'iröhe maja rovë'iroho Sodom amo rajo jabuhu i'u baeröhoho ëho ma-jianovo'i a'i jemesi jö bogo eruomaje aribövioho jaburo i'u börömo maho baeruomo'ajëjo.

Ame göehu göehu Iesu bogo ma uehorovare jö Iesuhu jövadohoje.

¹³Chorazin'o Bethsaida'o amo rajohumë vaevë'oho sisëro revo hesi jëvajëjo. Naro darugo'e muoho jemesi amore vaejeho garomo röhu nasi jöho bijönimaruje höjo. Naehu darugo'e mu jemesi amore vaejodoho Tyre amore o Sidon amore vaejeho ga'ibejarëjo mami'e jabesi sisëni huë vavaene baeromo niögu sisë io'amoromo uonëro buerovoromo raromoromo uehoro sisëho vuonugo'i uehoro mae baeruomo'ibejajo. ¹⁴God-hu i'u bojëmi'iröhe maja rovë'iroho Tyre o Sidon rajo jabuhu i'u baeröhoho ma-jianovo'i jemëro i'u börömo maho bae'a'arujëjo. ¹⁵Röhu Capernaum amo rajohumë jemëro jemesi sivue uehorovoromo uvaruje höjo: Nosi ihoho ö'idöre ajiomo'ajëjo. Bogo èhiho jio'i sa'aro be'a'ajëjo.

¹⁶Röhu nasi ariböviohumë ae rahu jemesi jö ejëhë'oho nasi jöhu'o ejeharue höjo. O ae rahu jemë juahëmijë'oho na'o juahemijarue höjo. Ae rahu na juahemijë'oho remö'öjamu rovode ahu'o juahamijarue höjo. Hesi ae 72-ho èhi uëngoromo rëmö'öjamu va'areje.

Ae aho'obëhe 72 jabuhu Iesuare mu vaenugoromo vuonorö'ö rovare jöhoje.

¹⁷Va'ë'ëro ë ae aho'obëhe 72-ho jaburo nimorohë'i vuonorö'ö rueromo Iesu uavareje: Bada mue aho'obëhe mabëhe vaebe jijihë'ëro rovaruëjo. No jasi ihore uëvamu Satan-are sisë ariböviohuro ejahuoromo suorovo va'oruomade höjo. Èhi jië'e muoho èhu'o gavë'e javuajëjo. ¹⁸Gavë'e javuajëjamu Iesuro uëvadeje: Satan-are ariböviehu jemë ejëhare hesi bëhoho naro gavode höjo Satan-are vöröe barëromo baderehu baderivajëhi Satan èhi ö'idöre jioromo berovamu. ¹⁹Iae nasi mu vae'irarije darugoho bojëmijë'ëro èhuro jemëro vörö'e sigobohu'o niani'öhu'o hörëro taemo'amoromo Satan-are vöröho aho'obëhe ruahö'ö'amo'arujëjo. Èhi è'iramu bövioho bise'oho jemë bogo ijumëvo'ajëjo. ²⁰Iae èhi höjo. Röhu Satan-are ariböviehu jemesi jö ejëharuho ma-jianovë'e ijaie nadi uehorovo'i a'i jemesi ihe ö'idöre jajivë'e jiajoho èho uehorovoromo nimorohorëjo.

Iesuhu nimorohade jöhoje.

²¹Èhi uëromo evare majare Iesuro God-are Aru'aho hesi huë maho baeromo nimoroho avohadeje. Nimorohoromo God uavadeje: Apo ja ö'idörohu'o sa'arohu'o muebejanue ae javajëjo. Naro jasi örire huë mae uavajëjo. Rabëni hesi bëhoho jero gavane nuni aj'i'e a masijohuro uvoruomamu: Nosi simanoho mae javuoromo bövie bise'e ga barëjë'e javuajë uvamu gëgorovo jero jasi jöho jabesi örire subivëhë'e javajëjo. A'i gavane bogo gavë'e ariböviohuro bogo döroho bamorovo'i jöho he'i nëgamu gëgorovo jero jasi jö bëhoho röjëhijë'e javajëjo. Apo iae mae höjo. Jero jasi nimoromo è'ane höjo.

²²God èhi uanugoromo ë aribövioho uëvadeje: Nasi Vavuohuro jöe aho'o bojëmijë'e höjo muebe'irodego. Vavuohuro gemuëro Harihoho na avoho gevaje höjo. Harihoho

naremuëremu Vavuoho avoho gavaje höjo. O Harihu naehu di aribövi röjèhi'i negè'ohuro èhuro è ariböviohuremu röjèhijego jabu'o Vavuoho gavarue höjo.

²³ Èhi uëvè'ëro Iesu'o hesi ijarajoho jabu'o jabesi sivue raromoromo Iesuro hunuorovoromo uëvadeje: Jemè mu maho gavarujëro jëvè'ëro èhu'ëro jemè mae jëvájëjo. ²⁴ Ave jöho na jö mae uè'ie'ajëjo. Jemèhu gavaruje muoho o hejaruje jöho urimè'i jö God-aro baeromo majèhinövare ariböviohu'o sa'are a masijohu'o aho'obèhe jaburo nimoruomade höjo garomo he'iro. Röhu bogo garomo heruomade höjo. Röhu God-ro jemè ajëmij'ëro èho gavaruje höjo. Èhu'ëro jemè huè mae baejè'e jëvájëjo.

Sa'a gö rajehu sa'a gö rajo ajamade uhu jöhoje.

²⁵ Èhi'amu gagorovo Jew rajo jögoru öri röjèhijaje ae gemuëro Iesure dèho bijioho ga'irögoru ri'öromo uavadeje: Tisajo. Na diehi'oromo ioro'ioemuoho maroho hi'ejöjo. ²⁶ Maroho hi'ejöjamu Iesuro uavadeje: God-are surire jöho diehi jajivè'e höjo. Ja uehorovanuoho bëho diehi höjo. ²⁷ Bèhoho diehi höjamu ruehuro uavadeje: Jasi dè vövöbajö'e aru'ahe daruge uehore aho'obèhe Bada jasi God ma-hu gemu bojaminëjo. O jö göho jaehu jasi arijo'arje rajahirovanuèhi jasi ae gemuoho èhi rajahinëjo. ²⁸ Rajahinëjamu Iesuro uavadeje: Ja jö mae jövanuëjo. Èhi è'è'oho èhuro ja maro hi'a'anuëjo.

²⁹ Hi'a'anuëjamu rue röjèhijaje ahuro hesi ihoho mae jiojoro nimamu Iesu uavadeje: Röhu nasi ae gemuoho rahumè höjo. ³⁰ Rahumè höjamu Iesuro uhu'e uavadeje: Iae Jew raje ae gemuëro Jerusalem jioromo Jericho amore abue'ie'ade höjo. Örire abueromo nume vajiohu'e aribövi jabesi övoro va'ade höjo. Övoro va'amu guduamoromo niögoho maho sisèhe vajiohëro ujuohahoromo sa'ijosa'ijovoromo gavare guomo'ia'amu gagorovo nugo va'are höjo. ³¹ Va'amu gagorovo priest-ëro ijonö örire ruvebijade höjo. Ruvebi'i gavade aho raromamu gagorovo iosiramiromo öri ioni gönö va'ade höjo. ³² Èhi'amu Levi raje God-are mu ajamaje ahuro èhi gemuoho è'ade höjo. Ruvebiromo bëhire va'oromo aho èrimahonugoromo öri ioni gönö va'oromo iosirami va'ade höjo. ³³ Va'amu gagorovo sa'a gö raje ae gemuëro örire ruvebijade höjo. Hu Samaria sa'a raje jemèhu nu huodëgaruje sa'a raje ae gemuëro ruvebijade höjo. Èho rajëro ruvebiromo Jew rajoho birohade höjo. Birohoromo gavade raromamu gagorovo huni vavaenimade höjo. ³⁴ Vavaenimamu va'o garomo nemo'amade sagohore ninugu'e osohu'o wine jovo osohu'o otehahoromo muohaho'amade höjo. Muohahonugoromo banigojiomoromo hesi mi dejore bamonugoromo hu'lirae ba'obuejadoho abo öri jijihoromo momorö'öjarue osare rovade höjo. Rueromo hiromo aho avoho ajamijade höjo. ³⁵ Ajamiromo diroharëro sisonuvamu gagorovo Samaria rajohuro ajivè'e ijo baje niö'i jabesi uhure aho'o jiè'oho baeromo osa muebejaje aho bojamiromo uavade höjo: Na va'ajëjo. Jero ave aho avoho muebenëjo. Monie gö'o bu'öjè'oho vuonorö'ö rueromo naro jaehu bu'öjane è hesi manaho bojami'ejöjo. Èhi'ade höjo. ³⁶ Röhu ja diehi uehorovanuëjo. ÈJew rajohuro vajiohu'e aribövi jabesi övore va'oromo sisè birohade höjo. Sisè birohamu ae niö'i gemu ro hu gavare höjo. Göho priest-ëro göho God-are mu ajamijaje ahuro göho nu huodëgaruje sa'a gö rajohuro èhi ro gavare höjo. Röhu di aho hesi ae gemuoho jiade höjo. ³⁷ Ae gemuoho jiade höjamu jögoru öri röjèhijaje ahuro uavadeje: Huè baeromo ajamijade aho hu hesi ae gemuoho jiade höjo. Èhi uavamu Iesuro uavadeje: Jero va'oromo èhi jiè'e muoho vaenövonëjo.

Iesuhu Martha'o Mary'o gè'i va'ade jöhoje.

³⁸ Èhi uëngoromo iae Iesu'o hesi ijarajoho jabu'o va'aroho va'o amore suorovareje. Suorovamu magonahe gemu hesi ihe Martha-ro Iesu uavadeje: Nasi osaro ro hijëjo.

³⁹ Hijëjamu Iesuro osare va'o hijadeje. Hijamu Martha-are öe Mary-ro ro Badare hörü bëhire hiromo huhu jö röjèhijajoho hejadeje. ⁴⁰ Hiromo jöho hejamu gagorovo Martha-ro Iesuni bövie bise'e avohoromo bogo eni jiamu nurunurumoromo Iesu uavadeje: Bada nasi öho na remö'öjè'ëro nasi sivue mue vaeajëjo. Na ja nasi jöënioho bogo uehorovanuëjo. Uavego ro ajemajo. ⁴¹ Ajemajamu Badaro uavadeje: Asè'e Martha-ajo. Jero mue aho'obèhe uehorovo'ego èhuro nurunuruagajëjo. ⁴² Röhu ja mue gemu bogo baejè'e javajëjo. A'i Mary-ro mu maho baejè'e höjo. Èmuoho no bogo aho'ëjarëjo.

11

Noehu pari vae'irohe öri Iesuhu röjêhijade jôhoje.

¹ Iae Iesuro hiromo God-are örire jöe jövadeje. Jöe jövoromo barëjamu gagorovo hesi ijorajoho gemuëro uavadeje: Bada God-are örire jö ato'irohego John-hu hesi ijorajo ömo'ömo röjêhijadêhi jero no'o êhi ê hesi öroho röjahuijêjo.

² Röjahuijêjamu hegorovo Iesuro uëvadeje: Jemêhu God-are örire jö atê'iroho êhi uarêjo: Apo ae aho'obêhe nosi dê vövöbajo'oho avohahuego ja gemu mae uehorovavo'irarêjo.

Jero böröme namiromo aho'obêhe muebejavuego no jasi aharire gemu raromo'irarêjo.

³ Vae majae ioho bojamuibe va'ego ue'ahego da'uaguo'irajo.

⁴ Nosi sisêho uehorovoromo vuonugahuêjo no a jabesi sisêho uehorovoromo vuonugêharue jiaje. Nadi vörö'eroho ramuö'öjogo rireromavuo'irajo.

⁵ Êhi uênugoromo Iesuro hesi ijorajo ömo'ömo uhu'e uëvadeje: Nani jemê ae gemuëro vahi riri'e aemo'aemo hesi osare va'oromo ua'a'anuejo: Isiajo. Ie gö bojemêjo.

⁶ Nasi aemo'aeme gö örire juvê'ëro nasi osare ro hijajêjo. Röhu i bojami'irodoho bogojevajêjo. ⁷ Bogojevajê'iramu nani jasi aemo'aemohuro osare raromoromo ua'a'ajêjo: Nadi nunêhoho iegêjo. Mami'e oje tugohoromo asisö'o'o na'o momorö'öjê'ëro na bogo ri'öromo ajami'ejêjo. ⁸ Nani êhi ua'a'ajêjo. Röhu naro jemê uëvajêjo: Nani hu bogo uehorovoromo uvo'a'ajêjo: Nasi aemo'aemego ri'öromo ajami'ejö uvoromo ajami'i röhu heröhe jero biririvoromo ua ga'i hi'iramu evare hu ri'öromo ja rabe rabe nimanuoho bojami'ajêjo.

⁹ Êhuni na jemê uëvajêjo: Biririvoromo God ua garêjo. Biririvoromo ua gavê'oho ujuoho'arujêjo. Biririvoromo nahorêjo. Nahê'oho biroho'arujêjo. Ojoho ano'anovorêjo. Ano'anovê'oho God-ro jiovêho'ajêjo. ¹⁰ Ae rahu ua gavê'oho ujuohoruomo'ajêjo. Nahê'oho birohuruomo'ajêjo. Ano'anovê'oho ojoho jiovêho'ajêjo. ¹¹ Nasi jö hejarujoho ae gö vavu ömo'ömo'e jëvajêjo. Jemesi harihehu uëvê'iroho: Jovo mie bojemego na ijö uëvamu hejê'oho na jemê sareramiro mo sigobu sisêho bojamirêjo. ¹² O uëvê'iroho: Ugo une bojemego na ijö uëvamu hejê'iroho na jemê sareramiro mo ögusuru une bojamirêjo. Bogajo. Jemê i mae i'limali'arujêjo. ¹³ Jemê sisê aribövie jëvajêjo röhu jemesi aboji harihu'ö avoho suvuorëmi'irarije öroho iae gavaruje höjo. Jemê sisê jëvo'i ö'idöre hijaje jemesi Vavuoho mae jiaje jemëro uvorêjo: Hu mäëro jiê'ëro ae rahu ua gavê'oho nosi Vavuohuro hesi Aru'ahoho iae mabêhe suvuoramui'ajêjo.

Iesuhu Satan-are aribövi a dëre jio'amamu rarovö'öjêvadoho hu bogo Satan-are darugoho baeromo êhioho ê'adeje. Êhesi jôhoje.

¹⁴ Ae gemu aru'aho sisê dëre jiê'ëro bitare tövoromo jöe bogo jövê'e hijadeje. Hijamu Iesuro aru'aho sisêho rarovö'öjadeje. Rarovö'öjamu ê aho aevoromo jöe jövadeje. Jöe jövamu gagorovo ae aho'obêhe töjêvadeje. ¹⁵ Tiöjêvamu a ioro'iorohuro uarovareje: Beelzebul sisê a börömhuro vöröho bojamijego êhuro Iesuro a dëre aru'aho sisêho rarovö'ö'amaje höjo. ¹⁶ A ioro'iorohuro nimareje Iesuro darugoho ga'i diehi jiê'e jiego. Êhi nimoromo uavareje: Bogo gavarue darugo'e muoho röjahuijêgo no gavarêjo God-ro ja ajamego o bogo ajamego. ¹⁷ Êhi uavamu Iesuro jabesi sareri sarerioho gëromo uëvadeje: Sa'ae gemuehu adovoromo jabesi arijo'arije muorovê'oho barërovo'ajêjo. O agane gemuehu adovoromo jabesi arijo'arije muorovê'oho sisêrërovo'ajêjo. ¹⁸ Êhuni Satan-ro ri'öromo hesi ariböviohu'ö muorovo'ibejajo hesi darugoho uehoroho muoho diehi'oromo biririvoromo nami'ibejajo. Jemëro uvarujêjo: Sisê a börömhuro nörö vöröho bojamego hesi sisê ariböviohu rarovö'ö'ajêjo höjo. ¹⁹ Êhi jiê'oho na jemesi ariböviohu sisê a börömo hesi vöröho baeromo rarovö'ö'amarue höjo. O diehi'oromo ê'arue höjo. Jaburo uê'a'arujêjo: Sarerivarujêjo. Aho bogo sisê a börömo hesi vöröho baeromo êhioho ê'arue

höjo. ²⁰ A'i naro God-are darugoho baeromo raro'v'ama'je höjo. Ëhuni uvorëjo: God-ro aevoromo böröme namiromosi örire muebejavuajëro jji'ë'ero ëhu'ëro ë'ajëjo.

²¹ Biriri'e aehu bije tone bahiromosi javuoho avoho muebej'ë'oho hesi inömo inömo'ho ma-jiemu jio'a'ajëjo. ²² O ae göehu rueromosi javu arijo'o hesi biriri iosiramijë'oho javu arijo'ohuro uvo'a'ajëjo: Bije tone eni javajëromosi hi'iramu ruehuro osare rueromosi arijo'oho guduamoromosi ruahoromosi bijohosi tonohosi ujuohoniahiromosi inömo inöme aho'o ujuoho va'a'ajëjo. Vajiohehu ujuohadoho ae suvuorëmi'ajëjo. Naro Satan ëhi ruahö'öjajë höjo.

²³ Ae rahu bogo nasi a jji'ë'oho ëho huro na'o muorovajë höjo. O na bogo ajemiromosi nasi aribövi gagovë'oho ëho huro arua anumia'e nugö'ö'amajë höjo.

Satan-are a sisëhu a hesi dëre vuonorö'ö abueromosi ijumahade uhu jö Iesuhu jövadohoje.

²⁴ Röhu Satan-are mu ajamajë aru'aho sisëhuro ae gemu hesi dëre hi'a'ajëjo. Hiromosi hörö va'a'ajëjo. Va'oromosi jovo rumo'e sa'are va'oromosi hi'iröhe röho'ho nahobe juvojuvo bogo birohogorovosi uvo'a'ajëjo: Na vuonorö'ö va'oromosi hijode sionore röhu mahosi ë hi'ejöjo. ²⁵ Ëhi uvonugoromosi vuonorö'ö va'oromosi urimosi hijade a hesi dëre abueromosi ga'a'ajëjo dë vövöbajö'ohosi bibivoromosi iogorë'e ma-mabëhe osasi va'ëne jio'iramu. ²⁶ Ëhi jio'iramu gagorovosi va'oromosi Satan-are aru'aho sisë aho'obëhe söromosi rue'a'ajëjo. Ëurimore ro hijade aru'ahohosi a sisë höjo. Ijore huhu sö rovadë ariböviohuro hu iosiramimomosi jabumë sisë bëhi mae jioruomajëjo. Ëhu'ëro urimosi sisë'i hijade aho'ijonöho sisë bëhe hi'a'ajëjo.

Huë mae raro'v'ama'je hesi jöhoje.

²⁷ Iesuro ëhi uëvamu hejë'i magonahe gemu'ero ae aho'obëhe jabesisi ririre jji'ë'ero Iesuro ma-darugo'o uavadeje: Ja rahavoromosi amu bojamijade magonahohuro marohosi hijajë höjo. ²⁸ Marohosi hijajë höjamu uavadeje: Ëho ma-jianovosi a'i ae rahu God-are jö heromosi ejahë'oho ë ariböviohuro ma-marohosi raromarue höjo.

Ariböviehu Iesu bogo ma uehorovoromosi huhu darugo'e mu vaejoro dinamare jöhoje.

²⁹ Iae ae aho'obëhe Iesuro bëhire ro tagavoruomadeje. Tagavoruomamasi gëgorovosi Iesuro uëvadeje: Ave jaruvore raromarujë aribövioho sisë aribövie jëvajëjo. Jemëro darugo'e muohosi ga'i uevarujë höjosi ga'i God-ro na ajemegosi muohosi vaejajë jevego o bogo. Na ëhi jji'e muohosi bogo vae'i a'i Jonah-hu God-are mu börömosi röjëhijadëhi ëhi jji'e muohuremu röjëhi'ejöjo. Mue gö gö bogajosi. ³⁰ Nineveh amosi rajehumasi mae uehorovoröhegosi Jonah-hu mu röjëhijadëhi God-are A Mahosi naro ëhi jji'e muohemusi röjëhi'ejöjosi ave jaruvore raromarujë ariböviohuro mae uehorovevo'irarijegos.

³¹ God-hu mevoromosi gërohe majahosi rue'iramu arue sa'a göre börömosi vaenövade magonahohuro ave jaruvore raromarujë ariböviohu'o gemu mae ri'öromosi God-are nunire namia'ajëjo. Nami'iramu God-ro ë sa'a gö rajosi magonahosi hesi mu mahosi garomosi jemesi mu sisëho garomosi jemë uë'a'ajëjo: Ëmagonahehu vaejade ëhi jji'e mu mahosi bogo vaej'ëgo ëhuni na uëvajëjo: Jemë sisë'e aribövie jëvajë sisëro va'ohëjo. Ëhesi bëhohosi ë sa'are börömosi vaenövade magonahohuro hesi sa'ahosi vuonugosi öri ëgöböviro rovadë höjosi a börömosi Solomon-hu nunisi aji'e jö jövajohosi he'iro. Solomon-hu ae ma-bisemosi börömosi jioromosi jö majëhijajohosi ë magonahohuro he'i nimade höjo. A'i naehusi Solomon iosiramimomosi börömosi mae jioromosi jö majëhijajohosi he'irarijohosi jemë bijönëgajëjo. Ëhu'ëro jji'ë'ero mevo gërohe majahosi rue'iramu jemë sisë'rëjëvo'ajëjo. ³² O ëho majahosi rue'iramu ë sa'ae gö aribövie Nineveh amosi rajohuro ave jaruvore raromarujë ariböviohu'o gemu mae ri'öromosi God-are nunire riravoruomajëjo. Riravo'iramu God-ro jabesisi mu mahosi garomosi jemesi mu sisëho garomosi jemë uë'a'ajëjo: Nineveh amosi rajehumasi vaejare ëhi jji'e mu mahosi bogo vaej'ëgo ëhuni na uëvajëjo: Jemë sisë'e aribövie jëvajë sisëro va'ohëjo. Ëhesi bëhohosi ë Nineveh amosi rajohuro mu sisë vaeruomë'ëro hejare Jonah-ro God-are jö majëhijamusi hegorovosi jabesisi uehorosi sisëho vuonugosi i uehorosi mae baejare höjosi. Jonah ma-bisë'o jioromosi jö majëhijadoho Nineveh amosi rajohuro hesi jöho ejahare höjosi. A'i naehusi hu

iosiramiromo börömo jioromo jö majëhijajoho jemë bogo ejeharuje höjo. Èhu'ëro jië'ëro mevo gërohe majaho rue'iramu jemë sisërëjêvo'ajëjo.

Sino haho'o hesi iroho nuni jiaje uhu jö Iesuhu jövadohoje.

³³ Iro buno'iraejê'iroho bogo sa'a gagoroho hevö gagoroho gurih'i ma-va'orahoro bamo'anuëjo ae ë osare rovë'oho ajivëvoröhego. ³⁴ Jasi sino hesi iroho nunoho höjo. Jasi nuni mae jië'oho ëhuro aji maro hi'a'anuëjo. O jasi nuni sisë jië'oho ëhuro ja ramoramoro hi'a'anuëjo. Èhesi bëhoho naro uëromo ë'ajëjo: Jasi uehoro mae jië'ohuro God-are aji'e jöho baeromo aji maro hi'a'anuëjo. O uehoro sisë jië'ohuro nunoho ramoramovavo'iramu ramoramoro hi'a'anuëjo. ³⁵ Avo'avoho mueberovonëjo. Nani jasi uehoro sisëremu jioromo ramoramov'eremu javajëjo. ³⁶ Röhu jasi nuni mae jiego ajire hijanuëhi ramoramoho bogojio'i ma-aje gemu jië'oho ëhuro aje aho'obëhe jasirire rueromo ja ajivavo barë'ajëjo. Irehu ajivavajëhi ëhi ajivavo'ajëjo.

Pharisee ariböviohu'o Jew rajo jögoru öri röjêhijarue ariböviohu'o Iesuhu birëgade jöhoje.

³⁷ Iesuro jöho majëhiromo barëjamu gavë'i Pharisee ae gemuëro uavadeje: Nasi osaro rovego no i harihe gemuoro ijarëjo. Ijarëjamu Iesuro va'oromo osare va'o hijadeje ie i'irovo. ³⁸ Hijamu rue Pharisee ahuro gavade Iesuro a mami muoho bogo vaeromo övoho bogo eguë'e ioho ëma ijamu gagorovo tiöromo uehorovoromo uvadeje: Iesu diehi'oromo övoho bogo eguë'e ioho ëma ijajëjo. Èhi jië'e muoho God hu bijönimaje höjo. ³⁹ God bijönimaje höjamu Badaro uavadeje: Övo eguo jö uvanuoho aveho hejëjo. Èhi jië'e muoho ëho ma-döemu höjo. Pharisee aribövioho jemëro döre muohemu vaeromo hevöho enatuoho u'o'amoromo uvaruje höjo: God iae ëhuni nimorohajëjo. Röhu jemesi uhoho vajiohu'e mu o mu sisë gö gö uehorovarujohuro ëhuro jemesi dë vövöbajo'oho irijiomëhë'e höjo. ⁴⁰ Simano sisërëjê'e aribövie jëvavëjo. Nani jemë uvarujëjo: Nunehu ga'amarue inömohe mu God-ro avoho'amo'i nosi dë vövöbajo'oho bogo avohade höromo ëhuni öve hevöe enatue ëhi jië'e inömo hesi va'inumohemu uehorovo'i dë vövöbajo'o hesi sisëho bogo uehorovaruje höjo. ⁴¹ Röhu ae huë bæjëvoromo jemesi enatu gagore jovoho hevö gagore ioho ae suvuorëminövörëjo. Èhi ë'ë'ohuro uvo'a'arujëjo: Inöme bövie bise'e ma-mae gemu jio'amajëjo.

⁴² Pharisee ariböviohumë vaevë'oho jemë sisërëjêvo'ajëjo. Jemëro jemesi i jögoru e avohoromo i'o buarohoromo ijarue rihu'e oso harihu harihue gö gö garue gö gö mevoromo 10 10 bahibe va'oromo gemu gemu God suvuore bojamijaruje höjo. Èhi jië'e jögoru ininoho ejaho avoharuje höjo. Èhi jië'oho iae mae höjo. Nadi vuonugorëjo. Röhu a mu ma-maemu vaëjêvo'irarije muohu'o God-are örire dë vövöbajo'ere uehorovo'irarije muohu'o rumonimaruje höjo. Nadi rumonimo'ibearijëjo.

⁴³ Pharisee ariböviohumë vaevë'oho sisërëjêvo'ajëjo. God rajahijarue osare va'ë'iroho jemëro jemesi sinohemu uehorovoromo ëhuni a masijehu raromaruire ë va'o raromo'i nimaruje höjo. O imo'amaruire va'ë'iroho jemë nimaruje höjo ae aho'obëhe uvoruo-moröhego: Jemë a masijëro jijiharujëromo rajëhiromo jejëmiruomorohego.

⁴⁴ Vaevë'oho sisërëjêvo'ajëjo. Jemë ma-döhuremu mae jëvo'i uhoho sisë jëvavëjo. A guavoromo hure guodo sibiri'e bogo ruhë'oho jëvanovajëjo. Aëro sagohe sa'a uhure jiaje jöho bogo uehorovë'e ëma uvarue höjo: Ma-sa'a maemu höromo hu döre ë jijiharue höjo. Èhesi bëhoho ae göëro uvarue höjo: Jemë maemu jëvavëjo. Röhu uhoho ëhi sisë bëhe jëvavëjo.

⁴⁵ Iesuro ëhi majëhijamu hegorovo Jew rajo jabesi jögoru öri röjêhijarue ae gemuëro ri'öromo uavadeje: Tisa jaehu ëhi jië'e jö jövanuoho ëho ja bogo Pharisee aribövio-hemuoho agëvo'i jögoru öri röjêhijarue aribövioho aho'obëhe no'o agavuanuëjo.

⁴⁶ Agavuanuëjamu Iesuro uëvadeje: Iae mae uvanuëjo. Jögoru öri röjêhijaruje aribövio-humë vaevë'oho jemë'o sisërëjêvo'ajëjo. Aehu i'u'e inömo ujuoho va'oruomojöro buahore bahijëhoromo va'ego bogo ajëmiromo övo name gemu vadu'ehu vitu banigojioëmëharuëhi jemëro ëhi ë'aruje höjo. Jemëro i'u'e muoho aho'o ae bojëmiromo bogo mae bogo ajëmi'i ma-nunëremu gëvaruje höjo.

⁴⁷ Vaevë'oho sisërëjêvo'ajêjo. Jö God-aro baeromo majëhinövare aribövioho jemesi hijo miono'ohuro muo'amare höjo. Muo'amë'ëro jemëro ëma uvaruje höjo: No God-are aribövioho uehorovëvaruëromo jabesi sino guavo'amare huoho avoho'amaruje höjo. ⁴⁸Röhu jabesi hu avoharujoho ëho uöromo ë'aruje höjo: Jö God-aro baeromo majëhinövare aribövioho hijo hijo miono'ehu muo'amaroho iae mae höjo. Naehu uëvaje hesi bëhoho jemesi hijo miono'ehu muo'amaroho jemëro jabesi sionoho avoho'amaruje höjo. ⁴⁹Jemëhu a ano'irarije uehore ëhi jëvë'ëro God-are simano ma'e jöho ëhi uvë'e höjo: Jö nasiro baeromo majëhi'iröhe ariböviohu'o nasi apostle ariböviohu'o ëhi naro rëmö'ö'iramu a jabesi örيره va'a'aruëjo. Va'iramu aëro a ioro'ioroho muo'amo'i ioro'ioroho huë vavaene bojëmi'aruëjo. Ehi uvë'e höjo. ⁵⁰Ëhu'ëro jië'ëro God-hu sa'a bamadevare evare aveoromo jemesi hijo miono'ehu jö God-aro baeromo majëhinövare aribövi muo'amobe rovere ë hesi i'uoho ave jaruvore raromaruje aribövioho jemëni rue'a'ajêjo. ⁵¹Aevo'ioho aëro Abel anoromo God-are aribövi ioro'ioroho ëhi muo'amobe ruejuvo ro ijo tugoho'ioho Zechariah anare höjo. God-are suvuoro bahjarue maratuoho ruhëhi jio'i God-are osa bërömo numëhi jiamu Zechariah ë ririre anare höjo. Ave jöho na jö mae uë'ië'ajêjo. God-are aribövi ëhi muo'amobe rovere ë hesi i'uoho ave jaruvore raromaruje aribövioho jemëni rue'a'ajêjo.

⁵²Jögoru öri röjëhijaruje ariböviohumë vaevë'oho sisërëjêvo'ajêjo. God-are mu ma hesi jöho jemëro bogo röjëhi'i aëro heruomöjööni jemëro ë hesi ojo jiovaruoho gurihi bamë'e jëvájêjo. Jemë ë mu ma hesi jöho bogo baejaruje höjo. O ae göehu bae'ia'amu gëvë'oho ahëvaruje höjo.

⁵³Iesuro ëhi majëhinugoromo va'adeje. Va'amu gavë'i Jew rajo jögoru öri röjëhijaruje ariböviohu'o Pharisee ariböviohu'o ëho jaburo Iesu'o va'oromo aveoromo hu nue huodivoromo dinamiromo jöe gö gö ua ga'i arijareje. ⁵⁴Jöe gö gö ua ga'i ariromo mu'öjahareje he'i hu guaro berovoromo jöe sisë'i jövego.

12

Noehu bogo ma-döhemu mu mae vae'iröhe jöhoje.

¹Iae ae aho'obëhe mae ro tagavoromo tatijiomorovoromo hörëro bijöëro vaerovamu hesi ijorajoho jaburo urimo hejëro Iesuro ëhi majëhiromo uëvadeje: Jemëro gavë'iajo. Pharisee aribövi jabesi i dë huaje osohuro jemesirire rumorovo'ajêjo. Jabuhu sareri'e mu vaejarue ëhi jië'e muohuro jemesirire rumorovöjööni uëvájêjo. ²Jaruvoho Pharisee ariböviohuro jabesi mu sisëho gurihjarue höjo. Röhu mue rabe gurihro jiajoho aho'obëhe va'orahoro jio'a'ajêjo. Rabe rabe saginiëri vaejaruoho aho'obëhe ma-samaro jio'a'ajêjo. ³Ëhu'ëro jië'ëro jemëhu jöe rabe vahi'e saginiëri atë'oho ijönö maja'e ë jöho ma-va'orahoro heruomö'ajêjo. O osa gagore raromoromo saginiëri hia'ire majëhijë'oho aëro amo ririre ë jöho ma-darugo'o majëhiruomö'ajêjo.

Noehu bogo a juhuonëmi'i God juhuonami'iröhe jö Iesuhu jövadohoje.

⁴Röhu nasi ariböviohumë naro ave jöho jemesi örيره majëhi'ie'ajêjo. Nadi uvorëjo: Eäriböviohuro anaguö'ajëromo juhuonëmiromo jabesi jöho uehorovorëjo. Jemesi sino haho'o muo'amë'öho eni jëvájêjo. Röhu sino haho'o muo'amonugoromo ijönö mu sisë gö jemesi örيره vaejëvë'öho bogo eni jioruomo hesi höjo. Ehuhi nadi ë aribövioho juhuonëmirëjo. ⁵A'i juhuonami'irarije aho naro uë'ië'ajêjo. God juhuonamiromo hesi jöho uehorovorëjo. Ehesi bëhoho God-hu jemesi aru'aho baejêhego vuovëvego evare ijönö vëni'e öri ari'ere ujuoho ruruhö'öjêvo'iröhoho hu eni jiajêjo. Iae mae-ëjo. Jemë ë aho gemu juhuonamirëjo.

⁶A'i aho bövioho bise'öho nadi juhuonëmirëjo. Ehesi bëhoho God-ro uvajêjo: Jemë iae masije jëvájëromo avo'avoho muebejëvaje höjo. Monie ma-bisemu bu'öromo ugo inine övo gö mine imo'arujêjo. Röhu God bogo uvaje höjo: Ugoho ininego bogo muebe'amö'e-jöjo. Bogo ehioho uvo'i iae hu avo'avoho muebe'amaje höjo. ⁷A'i jemë God-ro jemesi bövie bise'e aho'o muebejëhoromo röhu jemesi simano uoho ëhu'o adahëhoromo avo'avoho

muebejëhaje hõjo. Ëhuni nadi juhuonivorëjo uge aho'obëhe jio'amajoho ëho ma-jianovo'i ae gemu gemu jemë masije jëvë'e jiaje.

Keriso-are jö a nunire huruoho majëhi'iröhe jöhoje.

⁸ Röhu ave jöho naro uëväjëjo. Ae rahu a nunire uvë'oho: Na Iesuare ae jevajë uvë'oho God-are A Maho naro God-are anera jabesi nunire uvo'ejöjo: Ëho nasi ae magonahe hõjo. ⁹ O ae rahu a nunire uvë'oho: Na bogo Iesuare aehu jevajë uvë'oho naro God-are anera jabesi nunire uvo'ejöjo: Ëho bogo nasi aehu magonahehu hõjo.

¹⁰ O ae rahu God-are A Ma nasi jö sisë'i atë'oho God-ro uehorovoromo vuonugo'ajëjo. A'i ae rahu God-are Aru'aho hesi jö sisë'i atë'oho ëho God bogo uehorovoromo vuonugo'ajëjo.

¹¹ O jemë nasi mu vaejumu gavë'oho aëro uvo'a'aruëjo: Iesuare mu vaejarujoho ëho mu sisë vaejaruje höromo jemë guduamëvoromo God rajahijarue osare mu vaejarue a masijo jabesi nunire o gavana jabesi o sa'are a masijo gö gö jabesi nunire rëmoruomo'ajëjo court vaejëvojöro. Ërëmë'iroho nadi uvorëjo: No diehi nosi jöho majëhi'ejarëjo. O rabu jöe majëhi'ejarëromo nurunurumorëjo. ¹² Ëhesi bëhoho jemëhu jö majëhi'irarije majaho rue'iramu evare majare God-are Aru'ahohuro röjëhi'iramu garomo uvo'a'arujëjo: Iae no ëhi ëhi majëhi'ejarëromo ëhuni nadi nurunurumorëjo.

Bövi bise'o marohë'e aehu sisë'i uehorovade jöhoje.

¹³ Iae ae aho'obëhe jiareje röhu ae gemuëro ri'öromo Iesu uavadeje: Tisa nasi öho uavego nosi vavuehu guomo'i nuguahudoho na gö bojemi'irajo. ¹⁴ Gö bojemi'irajumu Iesuro uavadeje: Raro uvade hõjo naro jemesi muoho gavëhoromo jemesi inömo inömo maho sisëho mevonövo'irodego. Ëho bogo nasi muehu hõjo. ¹⁵ Ëhi uanugoromo ae aho'obëhe uëvadeje: Jemëro gavë'i avo'avohoho mueberovorëjo. Jemesi sinohemu uehorovoromo bövie bise'e bae'i ëma nëgojööni uëväjëjo. Ja sa'ae jove inömo inöme rabe rabe bövi mae baejë'oho bogo ëhuro maroho hi'a'anujëjo.

¹⁶ Ëhi uënuogoromo ave uhu jöho röjëhiromo uëvadeje: Iae bövi bise'o marohë'e ae gemuëro hijade hõjo. Hijamu hesi sa'aroho iruno'oho ma-mabëhe ri'amade hõjo. ¹⁷ Ma-mabëhe ri'amamu gagorovo huro hesi simanore uehorovoromo uvade hõjo: Nasi iruno'oho böromo böromë jevajëjo. Ëhu'ëro nasi iruno'o avoho bahi'irode röho bogo eni jio'amajëjo bise'ëro jië'ëro. Ëhi jië'oho na diehi'o'ejöjo. ¹⁸ O iae na ëhi ë'ejöjo. Nasi i bahijaje osaho bise'e jio'amë'ëro naro dadovo'amo'i javu masijo masije vae'amo'ejöjo nasi iruno'e nasi bövie bise'e ë maro bahi'irodëni. ¹⁹ Vaenugoromo naro nasi uvo'ejöjo: Na eni jevë'e ae jevajëjo. Iruno'oho inömo inömo bövi mae avoho bahijë'ëro vadune aho'obëhe eni jevobe va'a'ajëjo. Ëhuni na nuhoromo ma-hijë'i ie jove iromo nimoronimorohonövo'e-jöjo. ²⁰ Nimorohonövo'ejöjamu God-ro uavade hõjo: Ja simano sisë'i uehorovanue ae javajëjo. Jaruvo vahi'e naro jasi aru'ahoho baejaho'iramu guomo'a'anujëjo. Guomo'iramu jaehu bahijane iruno'oho bövioho bise'oho raro bae'a'ajëjo. God-ro ëhi uvade hõjo. ²¹ Ëaehu ë'ade mu hesi bëhoho ëhi hõjo. Ae rahu hesi sinohemu uehorovoromo bövi bise'o marohë'e mae bahiromo uvë'oho: Ëhuro na eni jevajë uvamu röhu God-hu uvë'oho: Bogo ëhioho jio'i hu bogo eni jië'e hõ uvë'oho ëhuro ë ahu'o hesi muohu'o be'a'ajëjo.

Bogo nurunurumo'i God mae uehorovo'iröhe jöhoje.

²² Ëhi uënuogoromo Iesuro hesi ijorajo ömo'ömo uëvadeje: Inömemu uehorovë'oho bëhi rumo'e jië'e jiaje ëhuni nadi uvorëjo: No i rabe ue'ahoromo bogo vuovo'i biririv-oromo raromo'ejarëjo. Uho niögu'o rabëro sino haho'oho riogivo'ejarëromo nurunurumorëjo. ²³ Ëhesi bëhoho ioho bise'e jio'i jemëhu biririvoromo raromarujoho ëho böromoho hõjo. Uho niögu'oho bise'e jio'i sino haho'o jëvajoho ëho böromoho hõjo. ²⁴ Magugoho uehorovohëjo. Noehu ë'aruëhioho magugoho bogo ëhioho iruno'oho bivarue hõjo o gagovarue hõjo. I bahijarue osaho bogojëvajëjo. Röhu God-ro ë ugoho mio'amaje hõjo. Röhu jabumë ma-bise'e jio'amo'i jemë masijo mae jëvajëjo. Ëhuni hu jemë'o avo'avohoho muebejëvo'ajëjo. ²⁵ O jemëhu uvë'oho: No diehi'oromo ave sa'aroho majae ëgo'o raromo'ejarë uvoromo nurunurumë'oho na ëhuro jemesi vuovo'irarije majaho iosiramiro

ruēhi ma-bisemu gö'o raromobe va'orējo. Bogajo. ²⁶ Ajamirovoromo bogo vuovo'i majae ēgo'o raromē'oho ēho mu bise'e hōjo. Rōhu nurunurum'ohuro ēgo'o raromo'irarijoho jemē bogo eni jēvajējo. Ēhu'oho rabēni mu gōēni gōēnioho nurunurumaruje hōjo. Bēhe bogohōjo. ²⁷ O je'ore resu resuehu diehi'oromo ri'amaruoho ēhu'o uehorovohējo. Aehu mu vaeromo niōgu avoharuēhioho resu resuoho bogo ēhioho ē'arue hōjo. Bogo ēhioho ē'arue hōjo rōhu ave resu resuoho ma-mabēhe kavuego garomo nosi dēho vuēvavuaje hōjo. Naro jemē uēvajējo: A bōrōme Solomon niōgu ma-mabēhe io'amonōvadoho ēho ma-jianovo'i ave resu resuoho ma-mabēhe mae kavuo'amaje hōjo. ²⁸ Jaruvēhi resu resuoho sa'are rijego nērēhi ēhi aēro jahoromo vēniro huo'amarue hōjo. Rōhu ēhi jiē'e resu resuoho God-ro muebejego marēromo kavuo'amaje hōjo. Resu resuoho ma-bise'e jio'amo'i jemē masijo mae jēvajējo. Ēhuni uvorējo: Hu no'o avo'avoho muebejavuoromo uhe niōge i'imamui'ajējo. Nurunurumarujoho God bogo ma uehorovaruje aribōvie jēvajējo. ²⁹ Rōhu jemēro nadi uvorējo: No i rabe jovo rabe i'ejarēromo nurunurumorējo. ³⁰ God-are jō bogo hejē'e raromarue aribōviohuro ie jove bōvie bise'e ēhuremu uehorovoruomaje hōjo. Rōhu jemēro nadi ēhioho ē'orējo. Jemesi Vavuohuro iae mae garomo uvajējo: Jemē iēro jovēro rabēro ēhuro biririvoromo raromarujējo. ³¹ Ēhuni nadi ēhemuoho uehorovo'i a'i God-hu bōrōme namiromomo muebejēvaje muoho ēho uehorovorējo. Ēhi ē'ē'oho God-ro jemesi aru'ahoho muebejēvoromo rōhu ie jove niōge ēhu'o romoromoro bojēmi'ajējo.

Ō'idōre mabēhe ujuoho'irōhe suvuoro hesi jōhoje.

³² Jemē bogo ae aho'o jēvo'i God-are ō mahu'e ma-gemu gemu jēvajējo. Rōhu nadi juhuonivorējo. Jemesi Vavuohuro iae nimajējo hesi aji'e ōri ari'e ē hesi huē maho bojēmi'irōhēni. ³³ Rōhu jemesi bōvioho bise'oho imo'amoromo monioho baeromo bogo eni jiē'e aribōvioho suvuorēmirējo. Ēhi ē'ē'oho jemesi bōvioho bise'oho ō'idōre bahi'arujējo. Ēhuro bogo sisērējēho'i vajiohu'e aho bogo bēhiroho va'oromo ujuohēho'i majo majoho bogo tarivēho'i a'i jemesi bōvioho bise'oho marohē'e mae jiemu jiēho'ajējo. ³⁴ Jemesi mae sisē din'ē jiajire jemesi dē vōvōbajo'oho ē gemu jio'a'ajējo.

Nosi a bōrōme Kerisohu ruerōhego noehu muebe'irōhe jōhoje.

³⁵ Rōhu jō gōho ave muohu'o vaenōvorējo. Jemēro avohorovoromo uho niōgu'e vaeromo iroho bueromo avoho raromorējo. ³⁶ Avoho raromoromo mu ajamijarue aribōviehu jabesi bōrōmehu rovego ajami'i muebejaruēhi ēhi avoho raromoromo mueberējo. Ēhesi bēhoho mu ajamarue aribōvi jabesi bōrōmohuro aehu masu'irōhe sōrōre va'ē'ero vuonorō'ō rueromo ojore ano'anovo'iramu ruelo jaburo heromo ojoho ma-burēro jiovah'aruējo. ³⁷ Ma-burēro jiovah'iramu jabesi a bōrōmohuro garōhe jabumē nune jioruomoromo eni jēvamu gēv'ē'oho huē mabēhe bojēmi'ajējo. Huē mabēhe bojēmiromomo hesi niōgoho avoho ruahoromo jaburo sa'are raromōjōro uēnugoromo ioho jovoho i'imēmi'ajējo. ³⁸ Ēa bōrōmehu bogo burēro rue'i vahi riri'e o vahi riri duvahoho iosiramiroomo ēhi ruēhi rueromo gērōhe jabumē eni jēvamu gēv'ē'oho huē mabēhe bojēmi'iramu baerumo'ajējo. ³⁹ Ave uhu jōhu'o avo'avoho uehorovohējo. Vajiohu'e aehu ruerōhe majaho osa arijo'oho bogo gavade hōjo. Ga'ibejajo vajiohu'e a hesi ōroho tugohahego osaho bogo dadovoromo inōmoho ujuoh'o'ibejajo. ⁴⁰ Osa arijo'ohuro gavē'i hi'ibejajo mae jio'ibejajo. Jemē'o gavē'i raromorējo. Jemē bogo uehorovē'e raromaruje majare evare God-are A Maho naro rue'ejōjo.

A bōrōmo hesi mu aehu avoho o sisē'i mueberōhe jōhoje.

⁴¹ Ēhi uēvamu hegorovo Peter-ro Iesu uavadeje: Bada na ja jasi ijorajoho noremuēremu rōjahui'i o ae aho'obēhe rōjahui'i ē uhu jōho majahuijanuējo. ⁴² Majahuijanuējamu Badaro uēvadeje: Naehu ē jō majēhijaje hesi bēhoho aehu hesi a bōrōmo hesi muohemu uehorovē'i simano mae uehorovoromo mu vaejajēhi jemēro ēhi muoho vaenōvo'irarijego uēvajējo. Ēhi jiē'e mu muebejaje a hesi a bōrōmohuro ua'a'ajējo: Na va'iē'ajējo. Jero nasi mu vaejarue a ioro'ioroho muebejēvonējo. Muebejēvoromo majae eni jiego jabesi iruno'oho i'imēminōvonējo. I'imēminōvonē uanugoromo va'a'ajējo. ⁴³ Va'o hijuvo rōhu

ijonö vuonorö'ö rueromo garöhe ë ahuro hesi muoho avoho vaejaho'iramu gagorovo huë mabêhe bojami'ajëjo. ⁴⁴Huë mabêhe bojamiromo ua'a'ajëjo: Ja mu mae vaejanohuni ëhuni na mu bôrömore bamavo'ejëjo. Jero bövie vaeromo nasi sa'ae inömo inöme bövie bise'e aho'o muebejehonëjo. Mu avo'avoho muebejë'oho iae hu ëhi ua'a'ajëjo. ⁴⁵A'i ë mu vaejahaje aho sisë jië'ohuro ëhuro uehorovoromo uvo'a'ajëjo: Nasi bôrömo bogo burëroho rue'i örisanuovajëromo ri'öromo mu vaejarue aho magonahoho muo'amoromo ie jove iromo ëhuro simane sisërë'ajëjo. ⁴⁶Ëhi'oromo bogo gavë'e uehorovë'e hi'iramu evare hesi bôrömo ma-majioho rue'a'ajëjo. Rueromo sino haho'oho sisë maro ijumahoromo nugö'ö'iramu sisëro va'oromo jö aho'aho'e ariböviohu'o hi'a'ajëjo.

⁴⁷A bôrömehu nimajoho mu vaejahaje aehu heromo röhu jö bogo ejahoromo bövi bise'o bogo avoho'amë'oho ëhuro hesi a bôrömo rueromo sisë maro ano'ajëjo. ⁴⁸O a bôrömehu nimajoho mu vaejahaje aehu bogo hejë'e mu sisë vaejë'ëro mana anoröhe bëhi jië'oho iae ma-bisemu ano'ajëjo. Röhu mu vae'irarije simano ma-mabêhemu o suvuoro gö gö bövi mae God-hu jemesi örire bojëmijë'oho huro uvo'a'ajëjo: Na bôröme bojëmijë'ëro ëhuro mu bôröme vaeruoma'ajëjo. O bogo vaeruomë'oho ëho sisë höjo.

Iesuhu rovë'ëro ëhu'ëro ae adovoromo göehu jöe gö göehu jöe gö uehorovarue jöhoje.

⁴⁹Naehu rovode hesi bëhoho sa'ae aho'obêhe vëninö'e ravëvo'i rovode höjo mu sisëho barë'i aho'obêhe ma-maemu jioröhego. Ëmuoho mami'e vae barë'ibejajo iae mae jevo'ibejajo. ⁵⁰Röhu ë hesi urimo na vi'ehe huë vavaene bae'irodoho ëho nasi örire jovëro rovanovo hesi höjo. Ëho bapataeto vaejevanovo'ajëjo. Ëhuni naehu nurunuru bôrömo baejajoho hujeji ë huë vavaenoho baegorovo evare mae hi'ejëjo. ⁵¹Nani jemëro uehorovoromo uvarujëjo: Nöröhu rovade hesi bëhoho nöröro ajamuego sa'ae aho'obêhe iro muorovo'oho vuonugo'i ma-huë baerovoromo gemuoro raromo'iröhego rovade höjo. Jemëro ëhi uvarujëjo röhu na bogo ëhunioho rovode höjo. Bogo mae bogajo. A'i naehu rovode hesi bëhoho naro nasi jöho majëhijego aëro heromo adovoromo ae göëro jöe gö uehorovo'i ae göëro jöe gö uehorovo'irarijago rovode höjo. ⁵²Ëhesi bëhoho nani agane gemuoho ae aho'obêhe övo gö mine osae gemuore huë mae raromoromo röhu a ioro'iorohuro avevejö'e aevoromo nasi muoho nimo'i ioro'iorohuro bogo nimoromo ae niö'i gemu aburo jöe gö uehorovo'i ae niö'iro jöe gö uehorovoromo ëhuro huë sisë baeromo bogo gemuoroho avoho raromo'aruëjo. ⁵³Vavuohuro uehore gö baeromo harihoho nue huodivo'i harihohuro uehore gö baeromo vavuoho nue huodivo'ajëjo. Vëmohuro uehore gö baeromo abojoho nue huodivo'i abojohuro uehore gö baeromo vëmoho nue huodivo'ajëjo. Ajohuro uehore gö baeromo ajoho nue huodivo'i ajohuro uehore gö baeromo ajoho nue huodivo'ajëjo. Ëhi jiobe va'a'ajëjo.

Iesuhu mu masijo vaejade majae ë hesi bëhoho ariböviohu bogo avoho gavare jöhoje.

⁵⁴Ëhi uëngoromo Iesuro ae aho'obêhe uëvadeje: Jemëro gavaruje anumëhi sue rojomego uvaruje höjo: Iae ënëro rue'ie'ajëjo. Rue'ie'ajëjago evare ënoho rovaje höjo. ⁵⁵O jemëro gavaruje aruëhi bure rovego uvaruje höjo: Birebire bôröme jio'ie'ajëjago iae ëhi birebire bôröme jiaje höjo. ⁵⁶Jemë sareri sareri'e ae jëvajëjo. Jemëro sa'aho ö'idöho uherihoromo sue bure rabe rabe garomo uvaruje höjo: Ëhesi bëhoho iae ëhi jio'ie'ajëjo. Röhu ave jaruvore rovaje muoho garomo ë hesi bëhoho bogo avoho garomo uvarujëjo: Iae God-are mu bôrömo rovajëjo. Diehi'oromo bogo avoho gavarujëjo.

Aehu nosi jö sisë majahujjago noehu ma-burëro ahorire vae'iröhe jöhoje.

⁵⁷Röhu jemë rabëni bogo avoho mevoromo gavaruje höjo di muoho mae jiego. ⁵⁸Ae göehu jasi jö sisë hesirire jië'ëro ja baejavoromo court-re va'ie'iroho jemë niö'iro örire va'arujevaro jero hu'o jöho mevoromo ahorire vae ganëjo. Bogo ahorire vaejë'oho huro guduamavoromo court gavaje a hesi övore bojami'ajëjo. Bojami'iramu court gavaje ahuro police bojami'iramu savoji gagore ba'amavo'iramu ë hi'a'anuëjo. ⁵⁹Ëhi hiemu hijuvo moni bojami'irano aho'obêhe bojami barë nahonahovo'anuëjo. Iae na mae uavajëjo.

13

Uehoro sisë bogo vuonugë'oho sisërëjëvo'iröhe jöhoje.

¹ Ëhi uëvamu gavë'i ë raromarohuro Iesu uavareje: Galilee sa'a raje ae göëro God-ni mie bahi'irögoro muo'amare höjo. Muo'amoromo köe otenhamu gavë'i Pilate-are muorovo ariböviohuro ro ë aribövioho muo'amamu ëhuro jabesi köhu'o God-are mi köhu'o gemuore buarohë'e höjo. ² Buarohë'e höjamu hegorovo Iesuro uëvadeje: Na jemëro uvarujëjo: ËGalilee rajohuro Galilee rajo ioro'ioroho iosirëmiromo sisë bëhe jioruomë'ëro ëhu'ëro ëhi jïë'e huë vavaenoho baeromo vuovade höjo. ³ Hesi bëhoho bogo ëhioho höjo. Bogo mae bogajo. A'i jemëhu uehoro sisë bogo vuonugo'i God mae uehorovë'oho jabumë vuovëvadëhi ae aho'obëhe jemë'o ëhi i'uocho mana baeromo vuovëvo'ajëjo. ⁴ O Jerusalem raje ae aho'obëhe 18 vuovëvade jöho uehorovohëjo. Jerusalem amore Siloam jovo bëhire javu ëgöböviohuro ahoromo ae aho'obëhe 18 jabesi döre ruvebiromo taemo'amade höjo. Na jemëro uvarujëjo: Taemo'amade Jerusalem amo rajohuro Jerusalem amo rajo ioro'ioroho iosirëmiromo sisë bëhi mae jioruomë'ëro ëhu'ëro ëhi jïë'e huë vavaenoho baeromo vuovade höjo. ⁵ Bogo mae bogajo. A'i jemëhu uehoro sisë bogo vuonugo'i God mae uehorovë'oho jabumë vuovëvadëhi ae aho'obëhe jemë'o ëhi jïë'e i'uocho mana baeromo vuovëvo'ajëjo.

⁶ Ëhi uënuogoromo ave uhu jöho majëhiromo uëvadeje: Ae gemu hesi ö'i bajo mure mesoho ri'öjë'e jiade höjo. Ri'öjë'e jiamugo rueromo böse nahoromo gavade höjo bogojiamu. ⁷ Bogojiamu gagorovo mu arijo'ohuro mu ajamijaje aho uavade höjo: Aveho gavëjo. Na aviae rueromo böse nahoromo ga'i hijode höjo mesoho bajoho bogo raejë'e jiamu ga'i hijodoho vadune aho'obëhe niö'i gemu barëjë'e höjo. Ëhi jïë'e jiaje mesoho uejëjo. Rabëni ëma nugo'iramu sa'a rihuoho barë'ajëjo. ⁸ Ëhi uavamu hegorovo mu ajamaje ahuro uavade höjo: Iae mae höjo röhu vuonugego vadune gemu gö'o namijego naro bëhire vo'onöe umo rova'oromo mi dëho ë bahijego ëhuro rihue bae'iröhe höjo. ⁹ Rihu baebe va'oromo vadune gemu barëjamu bajoraëjë'iroho ëho iae mae jio'a'ajëjo. O bogo raejë'oho uevego na mesoho ue'iröjo.

Magonahe gemu hesi dejo gurorovë'e nuho majare Iesuhu ajamade jöhoje.

¹⁰ Iae Jew rajo jabesi nuho majae jiamu gagorovo Iesuro God rajahijarue osare hiromo jöho röjëhijadeje. ¹¹ Röhu ë osare magonahe gemu hijë'e jiadeje. Satan-are a sisë hesi dëre abuejë'ëro ëhu'ëro hesi sino haho'o sisërëjadoho vadune aho'obëhe 18 barëjadeje. Sisërëromo hesi dejoho gurorovë'ëro ahorire nami'iröhoho bogo eni jiadeje. ¹² Ëhi jiamu gagorovo Iesuro magonahoho garomo uvamu rovadeje. Rovamu uavadeje: Ma'ino ja marëjavë'e höjo. ¹³ Marëjavë'e hö uaromo övoho sinore bamahamu gavë'i ahorire namiromo God huë mae uavadeje. ¹⁴ Ëhi'amu God rajahijarue osa muebejaje ahuro gavade nuho majare Iesuro magonahoho ëhi ajamamu gagorovo dë vörönimadeje. Dë vörönimamu ae aho'obëhe uëvadeje: Mu vaejarue majaho majae aho'o övo gö mine övo göre gemu ëhi höjo. Ëmajaro rovego hu jemesi sinoho ajëmi'irajo. Nosi nuho majaroho nadi ruerego hu ajëmi'irajo. ¹⁵ Ëhi uëvamu hegorovo Badaro ë osa muebejaje aho uavadeje: Jemë sareri sareri'e aribövie jëvajëjo. Nuho maja jïë'iroho jemë ae aho'obëhe nue vaeromo jemesi ö mahu'oho jiovo'amoromo jovore só ujuoho va'aruje höjo jove ue'ahojöro. Na mae-ëjo. ¹⁶ Jemëro jemesi ö mahu'oho nuho majare ëhi ajamijaruje höjo. Röhu ave magonahoho bogo ö mahu'ehu jio'i hu Abraham-are ujëro jïë'ëro ëhu'ëro God-ro huë baejaje magonahe höjo. Röhu Satan-hu hu tövahadoho vadune aho'obëhe 18 barëjajëjo. Ëhi jïë'oho naro rabëni nuho majaroho bogo ajamego bogo marëjöräjo. ¹⁷ Ëhi uëvamu hegorovo Iesu bijönimoruomade aribövioho aho'obëhe javoje böröme bae'i a ioro'iorohuro aho'obëhe uvuromadeje: Iesuro mu mabëhe aho'obëhe vaejaje hö uvoromo nimorohoruomadeje.

Jjo hisue mustard-hu ëgovade uhu jöhoje.

¹⁸ Ĕhi'amu Iesuro jöe gö majëhiromom uëvadeje: God-hu börröme namiromom muebejëvaje öroho naro uhu'e bu'öromom jemë'o na'o uehorovo'ëjarëjo. ¹⁹ Ijo hisu ihe mustard ujehu riroromog ëgavoromom börröme rijajëhi God-ro börröme namiromom ae gö'o gö'o ëhi gagavoromom muebejëvobe va'a'ajëjo. Ae gemuëromom mustard ijo hisu uje gemu baeromom hesi mure öjade höjo. Öjamu riroromom ijo va'ëne ëgavoromom börrömorijade höjo. Börrömorijamug ugëromom hesi adore ijue vae'amare höjo.

I dë huaje osehu ire rumorovade uhu jöhoje.

²⁰ Ĕhi uënuçoromom jö göho majëhiromom uëvadeje: God-hu börröme namiromom muebejëvaje öri ë hesi uhu jö göho naro majëhi'ie'ajëjo. ²¹ I dë huaje osehu ire rumorovajëhi God-hu börröme namiromom muebejëvaje muohuro sa'ae aho'o ëhi rumorovobe va'aje höjo. Magonahe gemuëromom ie aho'obëhe gagavoromom i dë huaje osoho i gemuore bamoromom iohu'o buarohade höjo. Buarohamug ë ioho aho'obëhe rumorovomom barëjade höjo.

Ojo harihure va'iröhe ë hesi uhu jöhoje.

²² Ĕhi'onuçoromom Iesuro Jerusalem va'iröhëni amom masijore amom ininore jöho röjëhibe va'adeje. ²³ Va'amu ae gemuëromom uavadeje: Bada naehug jö ua ga'ie'ajohom hejëjo. Na ae magemug gemu ëhemug vuovoromom sisërohom bogom va'i God-are öri ari'erohom va'oromom marohom raromom'ëjarëjo. O diehi jio'a'ajëjo. Diehi jio'a'ajëjamug Iesuro ae aho'obëhe uëvadeje: ²⁴ Sivothemug sivoçoromom ojo harihoromom rumom va'om garëjomog ëhuro ijonö God-are öri ari'ere va'irarije. Naro jemë uëvajëjo: Ae aho'obëhe rumom va'ie'irohom bogom eni jëvo'ajëjo.

²⁵ Röhu jemë ojo harihure bogom rumom va'ë'ohom majae ijonö ë osa arijo'ohuromom ri'öromom ojohom tugohom titimom'ajëjo. Ojohom tugohom titimom'iramug jemëromom amonö riravoromom aevoromom ojohom ano'anovoromom osa arijo'ohom uae'arujëjo: Bada oje jiovahuegom ö'arëjomog. Ö'arë'iramug huro uë'a'ajëjomog: Jemë a rabëromom rueruomomom ojohom jiovehöjomog uvarujëjomog. Ojohom na bogom jiovehö'ejöjomog. ²⁶ Ojohom na bogom jiovehö'ejö'iramug jemëromom uae'arujëjomog: Röhu nomom ie jove ja'om gemu mae inövaromog höjomog. Nosimom amorohomom jero jöhom röjahuinövane höjomog. ²⁷ Röjahuinövane hö'iramug rue osam arijo'ohuromom uë'a'ajëjomog: Jemë a rabëromom rueruomomom ojohom jiovehöjomog uvarujëjomog. Jemë mu sisë vaejarujem ariböviejem vajejomom rori'om va'ohëjomog. ²⁸ Va'ohë'iramug jemëromom ga'a'arujëjomog jemesimom hijomom mionom'om Abraham Isaac Jacob om jö God-are baeromomom majëhinövare ae aho'obëhe God-are öri ari'ere ë raromom'om jemë babu'öjëvom'iramug gagoromom nierusuburum'om bamoromom ane ja'ihom vuogigimom'arujëjomog. ²⁹ Röhu majam rojomajire beva'ajire aruam anumiamog jioromom ae aho'o God-are öri ari'ere va'oromomom ie ue'ahoruomom'ajëjomog. ³⁰ Ue'ahom'iramug am iorom'iore dejonö jiaruohomom nuninö jioruomom'om am iorom'iore nuninö jiaruohomom dejonö jioruomom'ajëjomog. Èhuremug uehorovorëjomog.

Iesuhu Jerusalem amom rajëni vavaenimade jöhoje.

³¹ Iesuro ëhi uëvamug gavë'om Pharisee am göërom rueruomomomom uavarejomog: Ri'öromom öromog öromog va'ëjomog. Ave sa'a muebejajem ae Herod-ro anagom'ie'ajëjomog. ³² Anagom'ie'ajëjamug heçoromom Iesuro uëvadejemog: Herod hug sarerim'om mu vaejajem ö sisëhom va'ënemog ae höjomog. Va'oromom hug uarëjomog: Ave jöhom hejëjomog. Nörrö hiromom Satan-are aru'ahom sisë aribövijabesimom dërom jio'amajohom rarov'öjëvobemog am jabesimom sinohom avohëvobemog va'ojuvomog evare nasimom muohomom barë'ajëjomog. Èhimog uarëjomog. ³³ Röhu iamog na ave sa'ahom vuonuçoromom örirerom juvobemog hibe va'ojuvomog evare Jerusalem hörö'ejöjomog nasimom muohomog ëhimog jii'ëromog. Èhesimom bëhohom jö God-are baeromomom majëhijaruemog ae aho'obëhe ë amoremom muo'amamug vuovëvobemog rovë'om höjomog. Èhunimog na'om ë amoremog va'iramug anegom'iramug guomom'ejöjomog.

³⁴ Vaevë'om Jerusalem amom rajohumë jemëromom jö God-are baeromomomom majëhijaruemog ariböviohom muo'amarujemog höjomog. God-hug jemënimom rëmö'öjajem ariböviohom munërom vaje'mijarujemog höjomog. Kökörökö vëmehug harihug vivojom uhurom nugu'amoromomomom diehehug aegëharuëhimog naram jemë ëhimog gagovëvoromom gemuore rëmom'om nimom'om hijodemog höjomog röhumog jemëromom bijönimarijemog höjomog. ³⁵ Èhunimog ave jöhom hehëjomog. God-ro jemesimom amohom vuonugegom jemesimom sivuemog jëvom'ie'ajëjomog. Naram jemë'om hiromom va'iramug jemë nasimom nu ano'ohom bogom ga'a'arujëjomog hujejimog na vuonorö'ö rue'iramug evare avohom geromom uae'arujëjomog: Bada God-are ihoremog rovanuohomom mabëhemog rovanuëjomog. Èhuremug uehorovorëjomog.

14

Övo hörü'e huë'e a Iesuhu nuho majare ajamade jöhoje.

¹Iae Jew rajo jabesi nuho majaho rovamu Iesuro Pharisee a böröme gemu hesi osare ie i'i va'adeje. Osare va'amu gagorovo Pharisee ariböviohuro ë raromoromo Iesu ga'i muebejareje hu mu sisë o rabe ë'lego. ²Röhu ë osare ae gemu hijë'e jiadeje. Hesi övo hörü'e aho'obëhe huo'amë'e jiadeje. ³Huo'amë'e jiamu gagorovo Iesuro ri'öromo Jew rajo jögoru öri röjëhijarue ariböviohu'o Pharisee ariböviohu'o uëvadeje: Nuho majare a jabesi sino ajëmijë'oho na ëhuro no nosi jögoroho aharue höjo o bogajo. ⁴Bogajamu rueho jaburo jörumoraejareje. Jörumoraejamu Iesuro aho baeromo sinoho avohahoromo nugö'öjamu va'adeje. ⁵Va'amu gavë'i Iesuro uëvadeje: Nuho majare jemesi harihoho o mioho jovo'e guare beva'ibejajo na jemë burëro io barojomo'ibejarijëjo o bogajo. Iae jemë ëhi ë'ibejarijëjo. ⁶Ëhi ë'ibejarijëjamu jö mana uaröhoho bogojëvadeje.

Nosi arijo'arije ba'obuero'viröhe jöhu'o inömo rumo'e aribövi ajëmi'iröhe jöhu'o ë jöho niö'i jëve.

⁷Jöë bogojëvamu Iesuro gavade ë ruenugade ariböviohuro röho ma-mahemu baeromo raroramamu gëgorovo uhu'e uëvadeje: ⁸Aehu ja uavë'oho: Rueromo masuröhe sörö inë uavë'iroho nadi jasi sivuoho uehorovoromo va'o a masijo raromaruero hinëjo. Ja ëhi ë'ë'oho nani ae gö jasi iho iosiramijë'ohuro söröre rue'a'ajëjo sörö arijo'ohuro mami'e uavë'ëro. ⁹Rovë'oho ja'o a börömohu'o ruejörö uëvade ahuro rueromo ja ua'a'ajëjo: Röhe bojamego hu ë hijajo. Ëhi uavë'oho ja javoje baeromo rori'o va'o hi'a'anuëjo. ¹⁰A'i aehu ja sörö ro ijörö uavë'iroho va'oromo ma-rori'o hinëjo. Ëhi ë'ë'oho ro ijörö uavade ahuro rueromo ua'a'ajëjo: Isio döro ajio hijëjo. Ajio hi'iramu gagorovo sörö ue'aharue ariböviohuro uehorovavoromo uvo'a'aruëjo: Ja a böröme javajëjo. ¹¹Ëhesi bëhoho ae rahu hesi sivue uehorovoromo döre bamorovë'oho hesi ihoho abue'a'ajëjo. O ae rahu ba'obuero'vë'oho hesi ihoho döro ajiom'a'ajëjo.

¹²Ëruenugade ariböviohuo Iesuro ëhi uënuGOROMO huotorovoromo ro i ijörö uavade aho uavadeje: Jaehu i harihu maja'e o jeni'e bamo'ië'iroho nadi jasi aemo'aemoho ö mueno'oho bövi bise'o marohë'e mae jië'e bëhire raromarue ariböviohuo nadi ëhi jië'e ariböviohemuoho uëvego ro ioho ue'aho'irarëjo. Uëvë'oho jabumëro ijönö mana bojami'iramu jasi suvuoroho bae barë'anuëjo. ¹³A'i jaehu i bamo'ië'iroho bövi bise'o bogo eni jië'e ariböviohuo övo hörü sisë'e o nuni sisë'e ariböviohuo ëhi jië'e ariböviohuo uëvego rue'irarëjo. ¹⁴Ëhi ë'ë'oho ë ariböviehu mana bojami'iröhoho bogo eni jëvë'ëro ja huë mabëhe bae'a'anuëjo. Hujëji mu mae vaejarue ariböviohuo vuovë'ëro i'ovoromo ri'öruomo'iramu evare God-ro jasi manaho bojami'ajëjo.

Sörö bamamu aehu juahamare uhu jöhoje.

¹⁵Ëhi uavamu hegoro'ovo Iesu'o raromoromo i iruomade ae gemuëro Iesu uavadeje: Ariböviehu ri'öromo God-are öri ari'ere va'o raromoromo i ue'aho'iröhoho no huë mae bae'ëjarëjo. ¹⁶Huë mae bae'ëjarëjamu Iesuro uhu'e uavadeje: Iae ae gemuëro sörö böröme baeromo ae aho'obëhe uëvade höjo: Rueromo söröe i'a'aruëjo. ¹⁷Ëhi ë'ë'ëro sörö majaho rovamu hesi mu vaejahaje aho nugö'öjamu sörö anue va'oromo ae uëbe juvoromo uëvade höjo: Söröho eni jiajëjo. Evaro ruehëjo. ¹⁸Ëhi uëvamu hegoro'ovo ae aho'obëhe mae juahamare höjo. Ae göëro ri'öromo uavade höjo: O asë'ëjo. Na ö'ibejodoho röhu na sa'ae i'e imë'ëro ë va'oromo ga'ëjöjo. ¹⁹Ae göëro uavade höjo: O asë'ëjo. Na ö'ibejodoho röhu na mu vaejaje mioho aho'obëhe 10 imë'ëro ëhuni ë va'oromo ga'i'ë'ajëjo gë'i mae ë'oruomego. ²⁰Ae göëro uavade höjo: Na magonahe masuvë'e jëvë'ëro ëhuni bogo ö'ëjöjo. ²¹Ëhi'amu rue ahuro vuonorö'ö rueromo hesi a börömohu'o uavade höjo: Ëhi ëhi uevare höjo. Ëhi uevare höjamu rue osa arijo'ohuro vörö'iraeromo hesi aho uavade höjo: Maburëro va'iranoho amo'e öri masijoho ininoho aho'obëhe juvo barënjöjo. Juvo barëromomo bogo eni jië'e ariböviohuo sino sisë'rëjë'e ariböviohuo nuni sisë'e ariböviohuo hörü sisë'e ariböviohuo ëhi jië'e ariböviohuo ujuoho ruenëjo. ²²Ëhi uavamu ejahoromo ëhi ë'ë'ëro jiajë'ëro rueromo hesi börömohu'o uavade höjo: Ja uevanëhi iae na ëhi ë'ë'e jëvajëjo. Röhu röhe iae

jiäjėjo. ²³Röhe iae jiajėjamu rue bōrōmohuro uavade hōjo: Mu ōroro je'o ōroro va'iranoho dinēmiromo uēvego ae aho'obēhe rueruomo'irajo ēhuro nasi osaho irijio'irōhe hōjo. ²⁴Na jemē ae aho'obēhe uēvajėjo: Na urimo uēvamu juahemijare aribōvioho nasi i sōrō'oho bogo i'a'aruėjo. Bogo mae bogajo.

Bēhoho uehorovo avohoromo evare Iesuare ijore ijore jijih'o'irōhe jōhoje.

²⁵Iae ae magonahe aho'obēhe siri va'ēne Iesu'o gemu mae ōrire jijihoruomonōvadeje. Jijihujuvo Iesuro huotorovoromo uēvadeje: ²⁶Jemēhu nasiro rovē'oho jemesi vēmu vavu'e vabore aboji harihu'e ōe ma'ine nadi ē aribōvioho nuninōho bamo'i na dejonōho remorėjo. Rōhu avehu'o gemuoho hōjo. Jemēhu ave sa'are raromo'irarijoho nadi ēho nuninōho bamo'i na dejonōho remorėjo. Jemēhu bōvie bise'e gōemu gōemu nuninō bamē'oho nasi ijore ijoroho bogo jijih'o'aruėjo. ²⁷O ae rahu ja bogo uvē'oho: Iesuare jōēni vi'ehe huē vavaene javoje rabe baeromo guomevē'oho iae hesi hō uvoromo bogo korosi hesi i'u banigojomanovoromo nasi ijore ijore juvē'oho ja bogo nasi ijarajoho javo'ajėjo.

²⁸Nasi ijore ijore jijih'o'iē'iroho ēho mu bōrōme jiaje nadi ēma jijih'o'i urimo uehorovo avohoromo evaro nasi ijore ijoroho jijihorėjo. Ēhesi bēhoho ae rahu ja javu ēgob-ōvi vae'iē'iroho bogo ēma vae'i urimo sa'aro hiromo javu vae'irane monioho adaho ga'a'anuėjo ga'i vae barē'irane monioho eni jiego o bogo. ²⁹Ja bogo adaho gavē'oho ēhuro nani sa'ahemu vaeromo ga'a'anuėjo monioho barē'iramu vituoho vuonugo'anuėjo. Vuonugo'iramu ae aho'obēhe ēho garomo ja sivagoromo uvoromo'ajėjo: ³⁰Ēsareri'e aho javu ēgobōvie vae'iē'oromo bogo eni jiamu vituoho vuonugade hōjo.

³¹O uhu jō gōho bēhe gemuoho hōjo. Sa'are a bōrōmo gōehu sa'a a bōrōmo gōhu'o muorovo'iē'iroho hu bogo ēma muorovo'i urimo sa'aro hiromo uehorovoromo uvo'a'ajėjo: Rue a bōrōmo gōhuro muorovo ae aho'obēhe 20,000 ae aho'obēhe mae sō ujuoho rovajėjo. Na muorovo ae aho'obēhe 10,000 ma-vemino'e ēhemu jevajėjo. Naehu hu'o muorovē'oho na na eni jevo'ajėjo o bogo eni jevo'ajėjo. ³²Ēhi uvonugoromo uvē'oho: Bogo eni jevo hesi hō uvē'oho muorovo'i rovaje a bōrōmoho bogo bēhiroho rovē'e evare ve hijaje a bōrōmo gōhuo hesi aho rēmō'ō'iramu va'oromo rue rovaje a bōrōmo gōho sanuamiromo jō mae majahiromo ua'a'aruėjo: No diehi'oromo muorovoho tugohoromo avoho raromo'ejarėjo. ³³Ēhu jō hesi bēhoho jemēhu jemesi sa'ae inōmo inōme bōvie bise'e uehorovarujoho bogo vuonugē'oho bogo nasi ijarajo ōmo'ōmoho jēvo'ajėjo.

Rihu rumo'e sō hesi uhu jōhoje.

³⁴Nasi ijore ijore jijiharujoho jemē sō va'ēne jēvajėjo. Sōho rihu'e mabēhe hōjo. Rōhu sō hesi rihu barējē'oho rōhu bogo maho avoho hesi hōjo. ³⁵Ēhu'ēro ē hesi muoho bogohōjo. Bogo muroho ruruhō'ōjeho muoho rihuvo'i bogo mi dēhu'o buarohoromo bahijego muoho marē'i a'i ēhi jiē'e sōho ma-ruruhō'ōjarue hōjo. Ae rahu ja God-are jō hejanue ae javē'oho bēhoho nahoromo birohonėjo.

15

Sheep subirō'ōjamu nahoromo birohade uhu jōhoje.

¹Iae vajiohu'e tax baejarue aribōviohu'o sisē aribōvi ioro'iorohu'o ēho jaburo Iesuare jōho he'i rueruomadeje. ²Rovamu gagorovo Pharisee aribōviohu'o Jew rajo jōgoru ōri rōjēhijarue aribōviohu'o uarovareje: Ēsareri'e ahuro sisē aribōvioho rajēhiromo jabu'o gemuoro ie ijaje hōjo. ³Ijaje hōjamu Iesuro uhu'e uēvadeje:

⁴Jemē ae gemu sheep aho'obēhe 100 javo'i gemu subirō'ōjē'oho ja diehi'onėjo. Ja sheep ioro'iore mure raramaruoho ēhi nugo'amo'i va'oromo ē sheep gemu'oho nahobe juvojuvo hujeji vae gōro biroho'anuėjo. ⁵Birohonugoromo nimorohē'i babuariromo amēro rue'a'anuėjo. ⁶Rueromo jasi amo rajoho aganoho uē'a'anuėjo: Nasi sheep subirō'ōjadoho iae birohē'e jevajėjo. Ēhuni ruehego no gemuoro nimoroharėjo. ⁷Ēhesi bēhoho naro uē'iē'ajėjo. Ō'idōre raromarue aribōviohuro gavarue ae gemu ōri sisēre juvajoho vuonugo'i huotorovoromo ōri mare juvamu gavē'oho nimoroho avoharue hōjo.

O gavuarue ae aho'obēhe jabesi sivue uehorovoromo uvamu: No mae javuē'ero ēhu'ero mu sisē vuonugo'irōhoho bogojavuaĵē uvamu gēv'oho bogo ēhioho nimoroharue hōjo.

Subirō'ōĵē'e ijo bajo nahoromo birohade uhu jōhoje.

⁸ O uhu jō gōho hehējo. Magonahe gemu ajivē'e ijo baje aho'obēhe 10 ĵiajoho gemu subirō'ōĵē'oho hu diehi ē'a'ajējo. Iroho buenugoromo ari sisuoho bibivē'i ma-avoho nahobe juvoromo hujeji vae gōro biroho'ajējo. ⁹ Birohonugoromo hesi amo rajoho aganoho uē'a'ajējo: Subirō'ōjade ijo bajoho birohē'e jevaje ēhuni ruehego no gemuoro nimoroharējo. ¹⁰ Ēhesi bēhoho na uē'iē'ajējo. God-are anerahuro gavuarue ae gemu ōri sisēre juvajoho vuonugo'i huotorovoromo ōri mare juvamu gavē'oho nimoroharue hōjo.

Ijorajo subirō'ōromo vuonorō'ō rovamugo vavuehu hu rajahi'i muriehu bijōnimade jōhoje.

¹¹ Ēhi uēnugoromo Iesuro uhu jōe gō'o majēhiromomo uēvadeje: Iae ae gemu harihe niō'i jēvade hōjo. ¹² Harihe niō'i jēv'ēro ijorajohuro ri'ōromo vavuoho uavade hōjo: Apo ja guomavego naehu ujuoho'irodego uevane bōvioho bise'oho avevejō'e bojemējo. Bojemijējamu rue vavuohuro hesi bōvioho bise'oho adovoromo harihu gōho ioni gōho bojami'i harihu gōho ioni gōho bojamijade hōjo. ¹³ Bojamamu majae ma-gemu niō'i barējamu rue ijorajohuro huhu ujuohadoho imo'amo barēromo monioho baeromo va'ade hōjo. Va'adoho va'ojuvo ōri ēgobōviro sa'a gōro va'oromo nimoronimorohē'i hiromomo hesi maho sisēho ma-bu'ōnōvade hōjo. ¹⁴ Ēhi bu'ōbe va'amu hesi bōvioho bise'oho barējahade hōjo. Barējahamu ē sa'are iruno'oho aho'o barēromo ē sa'are aribōvioho vadunēro vuovamu ē aho huē vavaene bōrōme baejē'e hijade hōjo. ¹⁵ Ēhi hiromomo va'oromo ē sa'aho raje ae gemu uavade hōjo: Ja mue javē'oho uevego na ē jasiro mue vaejōjo. Mue vaejōjamu ruehuro uavade hōjo: Mahu muohuro va'oromo mahe mio'amonējo. ¹⁶ Mahe mio'amonējamu ē Jew rajehu sisē hō uvarue muoho baeromo va'oromo mahoho mueberomo hōmamu uvade hōjo: Raro mahu ioho babojemego na ijego da'uego'irajo. Ēhi uvade hōjo rōhu a vadu'oho ioho bogo bojamarue hōjo. ¹⁷ Bogo bojamaru hiromomo ijonō avoho uehorovoromo uvade hōjo: O apare mu aribōvioho ie aho'obēhe jēv'ēro i barē'irōhoho bogo eni jēvajējo. Na aviaē harihoho jevajējo rōhu vadunēro guomevo'iē'ajējo. ¹⁸ Ēhuni naro ri'ōromo aparō va'oromo ua'ejōjo: Apo naehu God-are ōrire jasi ōrire huē vavaeni bojēmodoho ēho naro mu sisē vaejē'e jevajējo. ¹⁹ Na a sisē jēv'ēgo ēhuni ja bogo na harihoho uē'a'anuējo. A'i jasi muoro bamevego na muoho vaejahoromo manaho bae'irōjo. ²⁰ Ēijorajohuro ēhi uvonugoromo ri'ōromo hesi vavuehu hijajire va'i va'ade hōjo.

Va'i va'amu vavuohuro gavade hōjo arue riribōvire hesi harihoho rovamū. Ganugoromo vavaenimoromo tutuvo va'oromo guduamoromo dudōhade hōjo. ²¹ Dudōhamu rue harihohuro uavade hōjo: Apo naehu God-are ōrire jasi ōrire huē vavaeni bojēmodoho ēho naro mu sisē vaejē'e jevajējo. Na a sisē jēv'ēgo ēhuni ja bogo na harihoho uē'a'anuējo. ²² Ēhi uvamu hejē'i rue vavuohuro harihoho bogo ejaho'i hesi mu vaejeharue aribōvioho uēvade hōjo: Ma-burēro va'oromo niōgu maho jaegoho hōru guduoho ēhi jue'ini ujuohaho rueromo sinoro ōvo gaenoro hōroro io'amahohējo. ²³ Jemēhu ma-je i muoharue sanuovē'e mioho baro anohego no i sōrō'e iromomo nimoronimoroharējo. ²⁴ Urimoho naro uvade hōjo: Nani nasi harihoho guomē'e hōjo. Nani diehi ē'l'ē'e hōjo. Avejē'ōho na gavajoho hu iae hijajējo. Urimoho ōri ari'e gōro subirō'ōjade hōjo. Avejē'ōho iae birohē'e jevajējo. Ēhuni ē'ego no nimoroharējo. Ēhi uēv'ēro sōrō'e iromomo nimoro bamare hōjo.

²⁵ Ēhi'amu gavē'i iae muriohuro muro hijade hōjo. Muro hiromomo amo bēhire rue'i hejade hōjo javavo'ego jajoho hēgōho rovvamu. ²⁶ Jajoho hēgōho rovvamu hegorovo mu vaejarue ae gemuēro ruejōro uaromo rovvamu uavade hōjo: Rabēni ē'aruējo. ²⁷ Rabēni ē'aruējamu ruehuro uavade hōjo: Jasi ijorajohuro rovvamu jasi vavuohuro gavade hesi harihoho raboho raboho bogo ē'l'ē'e hesi ōrire ma-mae rovvamu gagoro ma-je i muoharue sanuovē'e mioho huni anahade hōjo. ²⁸ Anade hōjamu rue muriohuro dē vōrōnimamu osare va'irōhoho bijōnimade hōjo. Bijōnimamu vavuohuro amonō hōrō rueromo uavade hōjo: Nadi juahovo'i osaēro rueromo ioho ma-ijējo. ²⁹ Ijējamu rue muriohuro uavade hōjo:

Aveho hejĵejo. Jasi jöho na bogo gemu vadu'oho ahalo'i vadune vadune na jasi muohemu vaejahobe rovĕ'e jevajĵejo. Iae ĕhi höjo röhu mi mae o mi sisĕ ĕhu'o bogo bojemijane höjo ĕhuro naehu nasi aemo'aemohu'o iromo nimoroho'irodoho. Bogo mae bogajo. ³⁰ Nasi öriroho bogo bojemi'i jasi harihoho magonaho sisĕho ga'amoromo ĕhuro jasi maho sisĕho i barĕjĕ'ĕro rovamu gavĕ'i jero sanuovĕ'e mi mabĕhoho anoromo hesi örire bojamane höjo. ³¹ Bojamane höjumu rue vavuohuro uavade höjo: Jue'i ja majae ĕhi na'o gemu mae hijanue höjo. Nasi sa'ae are inömo inöme ie bövie bise'e aho'o ma-jasiremu höjo. ³² Ĕhi höjo röhu urimoho naro uvode höjo: Nani jasi ijorajoho guomĕ'e höjo. Nani diehi ĕ'ĕ'e höjo. Avevejö'oho na gavajoho hu iae hijajĵejo. Urimoho öri ari'e göro subirö'öjade höjo. Avevejö'oho iae birohĕ'e jevajĵejo. Ĕhuni noehu huĕ mae baeromo nimoronimorohĕ'oho iae mae höjo.

16

Ae gemuehu hesi a börömo hesi mu sisĕ'i muebejahoromo röhu uehoro mae birohade uhu jöhoje.

¹ Iae Iesuro hesi ijorajo ömo'ömo uhu'e uĕvadeje: Iae moni marohĕ'e jiĕ'e ahu'o hesi mu muebejahaje ahu'o jaburo niö'iro arijare höjo. Ariromo eni jiĕ'e ahuro hejade höjo uavamu: Jasi mu vaejahaje ahuro jasi inömo inömo ma-bu'öjahaje höjo. ² Ma-bu'öjahaje höjumu hegorovo ĕ iahuni uvoromo rovamu uavade höjo: Jaehu ĕ'anoaho na hejĕ'e jevajĵejo. Nasi mu muebejanuoho vuonugo'anuĵejo. Ĕhuni nasi mu suri surioho ujuoho ro memego na gavöjo ja nasi mu diehi muebejanoho. ³ Ĕhi uavamu rue mu muebejaje ahuro uehorovoromo uvade höjo: Nasi a börömhuro uevajĵejo naro muoho vuonugojöro. Ĕhuni na diehi'o'ejöjo. Sa'a umoromo o ĕhi jiĕ'e i'u'e mu gö vae'irodoho darugoho bogo eni jevajĵejo. Ae gö jabesi örire ĕninĕmi'irodoho na javojegajĵejo. ⁴ O iae na uehorovajĵejo. Na ae ajĕmiromo ĕhi ĕ'ejöjo ĕhuro nasi börömhuro remö'öjego na va'ego jabumĕ ae göero göero ueruomoröhego: Nasi osaro rovĵejo.

⁵ Ĕhi uvonugoromo ae rahu rahu inömo inöme rabe rabe hesi a börömo bojami'iröho-huni jöe nugö'öromo uĕvade höjo ae gemu gemu ruejoro. Urimore ahuro rovamu mu vaejaje ahuro uavade höjo: Nasi a börömo hesi örire mana bojami'iranoho dimino'e javajĵejo. ⁶ Dimino'e javajĵejamu uavade höjo: Jovo'e rama masije aho'obĕhe 100 bojami'irodoho jevajĵejo. Bojami'irodoho jevajĵejamu uavade höjo: Ja dimino'e bojami'irane jöho jiĕ'e jiaje ave suroho baejĵejo. Baeromo ma-burĕro sa'aro hiromo ramae 100 bojami'irane jöho mu'u'i ba'obueromo ramae aho'obĕhe 50 bojami'iranoho jajivĵejo. ⁷ Ĕhi ĕ'ĕ'ero ae göero rovamu mu vaejaje ahuro uavade höjo: Ja'o bojami'iranoho dimino'e javajĵejo. Dimino'e javajĵejamu uavade höjo: I esöe aho'obĕhe 100 bojami'irodoho jevajĵejo. Jevajĵejamu uavade höjo: Ja bojami'irane jöho jiĕ'e jiaje ave suroho baeromo esöe 100 bojami'irane jöho mu'u'i ba'obueromo esöe aho'obĕhe 80 bojami'iranoho jajivĵejo. Ĕhi'obe va'ade höjo. ⁸ Ĕhi ĕ'ade jöho hejĕ'ĕro a börömhuro hesi mu sisĕ'i muebejaje aho uavade höjo: Ja uehoro mabĕhe mae rovavamu ĕho'ĕane höjo. Ĕhi rajahijade hesi bĕhoho ave sa'a hesi muohemu uehorovarue ariböviohuro uehoro mabĕhe birohoro jabeti muoho vaeruomaje höjo. A'i God-are aji'e mu uehorovarue ariböviohuro simane sisĕ'i sisĕ'i uehorovoromo muoho vaeruomaje höjo.

⁹ Ĕhesi bĕhoho na uĕ'ejöjo. Jemĕro ave sa'a hesi monioho baeromo ĕhuro mu mae vaeromo jemesi agane baejĕvorĵejo. Ĕhi ĕ'ĕ'oho ĕhuro vuovĕvo'iramu moni hesi bĕhoho barĕ'iramu God-ro uĕ'a'ajĵejo: Nasi amoro rueromo ma-ioro'io remu raromohĵejo. ¹⁰ Ae rahu mu inino avoho muebejĕ'ohuro mu masijohu'o avoho mueberuomo'ajĵejo. Ae rahu mu inino sisĕ'i muebejĕ'ohuro mu masijohu'o sisĕ'i mueberuomo'ajĵejo. ¹¹ Ĕhuni jemĕ ave sa'a hesi inömo sisĕ'i muebejĕ'oho God rabĕni ö'idö hesi inömo maho bojemi'ajĵejo jemĕro muebejoro. ¹² O jemĕhu ae gö hesi bövi bise'o bogo avoho muebejahĕ'oho God rabĕni bövioho bise'oho i'imĕmi'ajĵejo jemesi ujuohojöro.

¹³ Ae niö'i börömo ho gemuho jëvajeromo jabesi mu gemuore havoromo vaejë'oho bogo eni javo'ajëjo. Ja göho nue huodivo'i göho rajahi'anuejo. O göho mae uehorovo'i göho bijönimo'anuejo. Èhesi bëhoho God'o moni'o niö'i börömo ho gemuho jëvajeromo gemuore havoromo mu vaejë'oho bogo eni javo'ajëjo.

Iesuhu jö masije gö gö majëhijade jöhoje.

¹⁴ Iesuro èhi uëvamu hejë'i Pharisee ariböviohuo moniemu uehorovoruumë'ëro Iesu sivareje. ¹⁵ Sivamu hegoro vo Iesuro uëvadeje: Jemë ma-döëremu mu maho vaejaruje höjo aëro jemë gëromo uvojöro: Èaribövioho mu mae vaeruumaje aribövie jioruumajëjo. Röhu jemesi dë vövöbajo'oho diehi jiajoho God iae gë barëjaje höjo. Huhu jemesi dë vövöbajo'oho gëvë'oho aehu gëvaruëhioho hu bogo èhioho gëvaje höjo. Èhesi bëhoho aehu sarerivoromo uvarujoho: Mabëhe hö uvarujoho God-hu gavajoho sisë bëhe höjo.

¹⁶ Urimë'i Moses-hu surire jajivade jögorohu'o jö God-aro baeromo majëhinövere a ioro'oro jabesi surire jöhu'o aehu hebe rovaroho evare John rovade höjo. John rovamu evare God-hu böröme namiromo ae aho'obëhe muebejëvaje ë hesi huë ma jöho aevoromo rovë'e höjo. Aevoromo rovë'ëgo ae aho'obëhe daruge aho'o bojamivoromo birivoromo öroho jiovoruomaje höjo èhuro God-ro muebejëvego hesi aharinö jëvoröhego. ¹⁷ Èhi jië'e mu i'oho rovë'e höjo röhu God-hu urimo bojëmade jögoroho bogo barë hesi höjo. Ö'idö'o sa'a'o sisërëjë'oho èho samae höjo. A'i God-are jögoroho gö bogo bisemu vadu'oho sisërë hesi höjo.

¹⁸ Röhu jö göhajo. Baruehu vaboro nugö'ö'i gö masuvë'oho èho bogo masuvë'e muoho jio'i goho'amarue muoho höjo. O aehu nugö'öjë'e magonaho masuvë'oho bogo hesi vaboro maho masu'i èho goho'amarue muoho höjo.

Inömo ma'e ahu'o Lazarus'o jabu niö'ihu ë'are jö Iesuhu jövadohoje.

¹⁹ Iae ae gemuëro hijade höjo. Hesi inömo inöme are sa'ae bövie mae jiade höjo. Niöge sanuovë'e kavuë'e mabëhe io'amonövade höjo. Iruno'e aho'obëhe sörnö'e iromo nimoronimorohonövade höjo. Majae aho'o èhi gemu èhi'obe rovade höjo. ²⁰ Èhi'ëgo inömo'e a hesi ojanore bövi bise'o bogojjë'e ahuro ë raromonövade höjo. A ihoho Lazarus jiade höjo. Lazarus-are sino haho'oho ma-sagohemu jië'e jiade höjo. ²¹ Sagohemu jio'ëgo Lazarus-ro nimonövade höjo eni jië'e a hesi i vitu vituho i'irovo èhuro da'uomajöro. Röhu vaevë'oho öero rueruomoro hesi sagohoho sëhahonövere höjo. ²² Èhi'öjuvo iae ë bövi bise'o bogojjë'e aho guomade höjo. Guomamu aneraëro hesi aru'ahoho bava'amu nosi bëhe Abraham-are guruto mare avoho hijade höjo. Hijamu ë eni jië'e ahu'o guomade höjo. Guomamu guavare höjo. ²³ Guavamu vuovarue ariböviehu raromaruire va'o hijade höjo. Hiromo vi'ehi sisë bëhe baejë'ëro nunëro ga avoho'i gavade höjo Abraham arue riribövire hi'i Lazarus Abraham-are guruto mare hijamu. ²⁴ Èhi gëngoromo ma-darugo'o uvade höjo: Saso Abraham-ajo. Nani vavaenimoromo Lazarus nugö'öjgo huro hesi övo namoho jovore ba'amoromo rueromo nasi bitaroho rëhoromo sanuoveho'irajo. Na vëniro jevë'ëro sisë maro vi'ehëgavajëjo. ²⁵ Vi'ehëgajëjamu Abraham-ro ri'öromo uavade höjo: Sasajo. Aveho uehorovëjo. Sa'are hijë'i ja huë ma-mabëhe birohane höjo. Lazarus hu hijë'i ma-huë sisëmu birohade höjo. Röhu jaruvoho Lazarus-ro sanue baeromo hijajëjo. Jero vi'ehi böröme baeromo hijanuëjo. ²⁶ Röhu jö göho èhu'o hejëjo. No aviae javu'u'i jemë aruae jëvajëjo. Röhu ririre hahe guoröte jië'ëro èhuro ave jioromo jemesirire ö'ë'oho bogo eni jio'i jemesirire jioromo ave rovë'oho bogo eni jiajëjo. ²⁷ Bogo eni jiajëjamu uavade höjo: Saso èhi jië'oho huë baejevoromo Lazarus nugö'öjgo huro nasi aganehu raromaruire va'ajo. ²⁸ Na öe aho'obëhe övo gö mine jevë'e jiaje uavego Lazarus-ro va'oromo nasi ö ömo'ömo ho jögore majëhi'irajo èhuro ave vörö'eroho bogo rueruomoröhe höjo. ²⁹ Èhi uavamu Abraham-ro uvade höjo: Röhu jasi ö ömo'ömo ho Moses-are surire jöho mami'e gavare höjo. Jö God-aro baeromo majëhinövere a ioro'oro jabesi surire jöhu'la gavare höjo. Èhumi nadi'ëgo jabumëro jabesi jöho ejëho'irarëjo. ³⁰ Ejëho'irarëjamu uavade höjo: Saso Abraham iae èhi höjo. Röhu surire jöho bogo eruomo'ajëjo. A'i vuovoromo ave ro raromajire aehu ë jioromo ri'ö va'oromo jö majëhijamu hejë'iroho iae jabu

huotorovoromo mae uehorovo'aruëjo. ³¹ Mae uehorovo'aruëjamu Abraham-ro uavade höjo: Bogo ëhioho jio'a'ajëjo. Jasi ö ömo'ömohe Moses-are surire jöho bogo ejaharue höjo. Jö God-aro baeromo majëhinövre a ioro'ioro jabesi surire jöho bogo ejëharue höjo. Jabesi jöho bogo ejëhobe rovë'ëro he'iröhe ae gö guomoromo ri'öromo jö majëhijamu hejë'oho hesi jöhu'o bogo ma uehorovo'aruëjo.

17

Mu sisë hesi jöhoje.

¹ Ëhi'oromo Iesuro hesi ijorajo ömo'ömohe uëvadeje: Göehu gö bijioho gavego sisë vaeröhe muoho iae ruenövo'ajëjo. Iae ëhi jio'a'ajëjo röhu ae rahu ë mu barovë'oho vaevë'oho sisërë'ajëjo. ² Asisö'onö'e jörume raromarue ae gemu mu sisë röjahijamu bejë'oho mu sisë bogo röjahijaveare ë mu sisë röjahijaje a hesi sönö'ahore aëro i'u'e munë hitahiohuro tövoromo sö jovore ba'amego e'ure beva'oromo guomo'ibejajo ëho majjanovo'ibejajo. A'i ë mu sisë röjahi'iröhe ë hesi i'uoho böromö bëhe bae'a'ajëjo. ³ Ëhuni avo'avoho mueberovorëjo.

Jasi öehu jasi örire sisë vaejavë'oho ahonëjo. Ahamu huhu huotorovoromo uehoro mae baejë'oho ëhuro jero hesi sisëho uehorovoromo vuonugonëjo. ⁴ O majae gemu röhu mu sisë gö'o gö'o vae 7 vaejavo'i hiromo röhu vae 7 ro ua'i hijë'oho: Iae naro mu sisëho vaejë'ëro jevë'ëro vuonugolejü ua'i hijë'oho jero uehorovoromo vuonugaho'i hinëjo.

God mae uehorovoromo ëhuro mu masijo vaeröhe jöhoje.

⁵ Ëhi uëvamu Iesuar apostle ömo'ömohe ri'öromo Bada uavareje: Iae no jasi darugoho ma-bisemu mae uehorovarue höjo. Röhu jero ajamuego no mae uehorovo avoho'irarëjo. ⁶ Mae uehorovo avoho'irarëjamu huro uhu'e uëvadeje: Mustard bajoho inino mae jio'amajëjo. Mustard baje gemu ma-bise'o jiajëhi ëhi uehoro mae ma-bisemu baeromo God mae uehorovo'ibejarijëjo ave namijaje ijo böromöho ua'ibejarijëjo: Jasi jahorovëjo. Jahorovoromo va'oromo sö jovohuro jasi ba'amorovë ua'ibejarijëjo ë ijohuro jemë ejëho'ibejajo. Mae uehorovo'ibejarijëjo ëhi jië'e muoho vae'ibejarijëjo.

A böromö hesi mu vaejarue uhu jöhoje.

⁷ Röhu jö göho jemë nasi jö hejaruje aribövioho nani ja ae gemu jasi muemu vaejaje ae javajëjo. Nani huro jasi muro hiromo sa'aho avohaho'ajëjo o ö mahu'oho muebejaho'ajëjo. Mu vaeromo rovë'oho na ja hu uanëjo: Ro hiromo ie ijëjo. Ja bogo ëhi jië'e jöho ua'i ⁸ a'i ua'a'anuëjo: Nasi ioho avohehoromo jasi niögoho avoho ruohoromo ro ioho jovoho i'imemego na i'iröjo. Na ijego evaro ja'o inëjo. ⁹ Jaehu mu jö ëhi bojamamu hu ejahoromo mu vaejë'oho na ja uanëjo: Mabëhe huë baejevoromo ajemijane höjo. Bogo ëhioho ua'a'anuëjo hu jasi muemu vaejajego. ¹⁰ Ëhu jö hesi bëhoho jemë God-are muemu vaejaruje aribövie jëvajëjo. God-hu jemë bojëmaje mu jemë vae barëjë'iroho uvorëjo: No mu aribövi sisë sisë javaujëjo. Ëho nosi muego ë'are höjo.

Iesuhu ae 10 ajëmamü ae gemuehu God huë mae uavade jöhoje.

¹¹ Iae Iesuro Jerusalem amore va'ë'i va'ë'i Galilee sa'a vituohu'o Samaria sa'a vituohu'o birorohadinö ëhunö va'adeje. ¹² Va'oromo ë dirö'ore amore hörö'ia'amu gavë'i sino jomo'e ae aho'obëhe 10 rueromo rori'o rivavareje. ¹³ Rivavoromo ma-darugo'o uvoruomadeje: Iesujajo. Badajajo. Noni vavaenimoromo ajamuijëjo. ¹⁴ Ajamuijëjamu Iesuro gëromo uëvadeje: De va'irarijoho arue priest ömo'ömohe röjëhirego jabumëro morijëgo gë'irarëjo. Morijëgo gë'irarëjamu örire va'amu gavë'i marëjëvadeje. ¹⁵ Marëjëvamü gagorovo ae gemuëro vuonorö'öromo ma-darugo'o God mabëhe uabe rovadeje. ¹⁶ Rueromo Iesuaru hörü bëhire ague aho hiromo rajahijadeje. Röhu ë aho bogo Jew rajehu jio'i Samaria raje jjadeje. ¹⁷ Rovamu gagorovo Iesuro uavadeje: Jomo'e ae aho'obëhe 10 marëjëvade höjo. Na mae-ëjo. Röhu a ioro'iore 9-ho diehi'oromo bogo rovare höjo. ¹⁸ Diehi'oromo nosi Jew rajoho bogo rueruomö'i ave sa'a gö rajohuremu God mae ua'i vuonorö'ö rovade höjo. ¹⁹ Ëhi

uanugoromo ë Samaria rajoho uavadeje: Ri'ö val'ëjo. Jero God mae uehorovamu ëhuro marëjavë'e höjo.

God-hu aevoromo hesi aji ma röjahuïromo böröme namiromomo muebejavuo'iröhe jöhoje.

²⁰ Ëhi'amu Pharisee a ioro'iorëro ri'öromomo Iesu uavareje: God divare aevoromo böröme namiromomo muebejavuo'iramu no hesi ahariremu raromo'ëjarëjo. Raromo'ëjarëjamu lesuro uëvadeje: God-hu böröme namiromomo aho'obëhe muebejëvajocho vörö'e muoho jemesi nunoho bogo garomo uvo'a'arujëjo; God-ro aevoromo muebejavuo'ëgo no hesi ahariremu raromaruëjo. ²¹ O ja bogo aho uë'a'anuëjo; Aveho gahëjo. God-ro ave dirö'oremu böröme namiromomo muebejavuajëjo. O arueho gahëjo. God-ro ë dirö'oremu böröme namiromomo muebejëvajëjo. Bogo ëhioho uë'a'anuëjo ë hesi bëhoho God-ro jemesirire böröme namiromomo muebejëvajëro jië'ëro.

²² Ëhi uënuogoromo hesi ijorajo ömo'ömocho uëvadeje: Majae ijönö jemëro God-are A Maho ge'i nimo avohoromo uvo'a'arujëjo; Majae ëgobövïe bogo gavë'ëro nörö majae mabïsemu ga'ïbejarëjo mae javuo'ïbejajo. Röhu bogo ge'a'arujëjo. ²³ Bogo ge'ïramu aëro jemë sarerëmiromomo uë'a'aruëjo; Gahëjo. Nörö aruae höjo. O nörö avïae höjo. Ëhi uëvë'öho nadi ëjëhoromo ge'i jahu'öho va'orëjo. ²⁴ Ëhesi bëhoho naehu rue'ïrode majaho rue'ïramu na bogo dirö'e gemuoroho ro hi'i a'i baderehu ö'idöre baderivoromo ö'idöe aho'o ajivo barëjego ae aho'obëhe ga barëjaruëhi God-are A Maho naro ëhi rue'ïramu ge'a'arujëjo. ²⁵ Iae ëhi jio'a'ajëjo röhu urimoho na vi'ehe huë vavaene bövie bise'e bae'ëjjo. Ave jaruvore raromaruë aribövïohuro na bijënegoruumo'ajëjo.

²⁶ Röhu God-are A Ma naehu a nunire rue'ïë'ïroho a mami ae Noah-hu hijade majare jiadëhi ëhi gemuoho jio'a'ajëjo. ²⁷ Noah hijadevare evare aëro ie jove ue'ahobe masurovobe ëhi jië'e muohemu uehorovobe va'öjuvo evare Noah-mëro boat börömore rumo va'amu gavë'i jovo börömëro rojomoromo a ioro'ioroho baeniagëgamu vuovo barë nahonahovade höjo. ²⁸ O a mami ae Lot-hu hijade majare jiadëhi God-are A Ma naehu a nunire rue'ïë'ïroho ëhi gemuoho jio'a'ajëjo. Lot hijade majare evare ae aho'obëhe ie jove ue'ahobe bövie bise'e imobe i'ö mu'e vaebe javue vaebe ëhi jië'e muohemu uehorovobe va'öjuvo ²⁹ evare Lot-ro Sodom amore jïromomo mae va'amu gavë'i vënëro girosijiomë'e munëhuro rireromomo ruvebiromomo a ioro'ioroho bïjuëmamu vuovo barë nahonahovade höjo. ³⁰ God-are A Ma naehu rue'ïë'ïroho aëro ëhi gemuoho ë'obe va'öjuvo evare ë majaho ma-majioho rue'a'ajëjo.

³¹ Ëmaja rovë'öho ae rahu javu dönö haradare raromoli jabesi inömo inömo osanö jië'öho nadi inömocho ujuo'öhi abo osaroho rumo va'i o mure raromë'öho jahu'ö nadi inömocho ujuo'öhi uehorovoromomo vuonorö'ö rue'ï ma-huruomomo'ïrarëjo. ³² Lot-are vaborehu hesi inömo uehorovoromomo vuonorö'ö'ïa'amu i'uehu hesi örire rovade jöho avoho uehorovorëjo. ³³ Ae rahu hesi sinohuni uehorovoromomo biririvoromomo ave sa'are hi'i ëhemu uehorovë'öho vuovo öriro va'a'ajëjo. O ae rahu hesi sinëni bogo uehorovo'i nasi jöhuremu uehorovoromomo ma-guomorovë'öho ë ahuro maro hiemu hi'a'ajëjo. ³⁴ Röhu na avehu'ö uëvajëjo. Naehu rue'ïrode vahire evare ae niö'ïro röhe gemuore diroho'aruëjo. Diroho'ïramu God-ro göho bae'i göho ë vuonugo'ajëjo. ³⁵ Magonahe niö'ïro gemuoro ariromomo ioho sa'ïjovoromomo avoho'ïramu God-ro göho bae'i göho ë vuonugo'ajëjo. ³⁶ [Ae niö'ïro mure ari'ïramu God-ro göho bae'i göho ë vuonugo'ajëjo.] ³⁷ Ëhi uëvamu rue ijorajo ömo'ömocho uavareje: Bada ja di öri ari'ere vuonorö'ö ruenëjo. Ruenëjamu uhu'e uëvadeje: Sagohe dinö'e jïajire ë ügoho gagovoruumo'ajëjo.

18

Magonahe doruehu jö mevaje a hesi örire biririvoromomo ëninamijamu ajamade uhu jöhoje.

¹ Iae Iesuro uhu jöë gö majëhijadeje aëro heromomo uvoröhego: No bogo t'uhö'ï biririvoromomo parie vae'ï ari'ëjarëjo. ² Majëhiromomo uëvadeje: Iae ae gemuëro hijade höjo. Hu jö heromomo mevaje a böröme jïade höjo. Hu God bogo ma uehorovoromomo a jabesi örirohu'ö bogo ma uehorovonövade höjo. ³ Hu bogo mae uehorovë'e ae jio'ï röhu magonaho doruëro

ë ame gemuore hijade höjo. Hiromo ë jö mevaje a hesi örire rueromo ua'i hinövade höjo: Ajemego sisë vaejevaje aho iosirami'iröjo. ⁴ Ëhi ua'ego bogo ejahonövade höjo. Ëhi'o'i arijuvo ë jö mevaje ahuro hesi uehorovoromo uvade höjo: Na God bogo uehorovoromo a jabetesi örirohu'o bogo uehorovaje höjo ⁵ röhu ave magonaho doruohuro dinemi'i hi'ego na bijönego'ego ëhuni na hesi öroho avohaho'ejöjo huro ro ue'i hijege na he'i hijege u'uvevojöeni. ⁶ Badaro ë uhu jöho ëhi majëhinugoromo jö bëhoho uëvadeje: Ëjö mevaje a sisëhu diehi jövadoho uehorovoröjo. ⁷ A'i God-ro diehi ë'a'ajëjo. Hesi aribövi maehu vahie sisone jene hesi örire ëninami'i arijaruoho na hu jabetesi mu öroho bogo avohëho'ajëjo. Na hu majae ëgobövie örisanuovo'i bogo burëroho ajëmi'ajëjo. ⁸ Iae hu ma-burëro ajëmi'ajëjo. Röhu God-are A Ma naehu sa'are rovë'iroho na na ga'ejöjo aëro birivoromo God mae uehorovo'iramu o bogo.

Ae döemu mae jiajohu'o a sisë'o pari vaejare uhu jöhoje.

⁹ Iae Iesuro gëvadeje ae gö jabetesi sivue uehorovoromo uvamu: Noremuëremu maho javuajëromu a ioro'ioro jabetesi jöho bogo uehorovoromu gëgorovo jabetesi örire ave uhu jöho majëhiromo uëvadeje: ¹⁰ Iae ae niö'iro God-are osa börömore parie vae'i ajiomare höjo. Göho Pharisee ae jiade höjo. Göho vajiohu'e tax baejaje ae jiade höjo. ¹¹ Ajiomoromo Pharisee ahuro va'oromo namiromo parie vaeromo ëhi uavade höjo: God-ajo. Na jasi örire huë mae uavajëjo rabëni a ioro'ioroho jabu anano'e vajiohu'e goho'amarue mu vaeruomajëhi naehu bogo ëhi ë'ajohuni. O aruëre tax baejaje ae jiajëhi na bogo ëhi jevajohuni. ¹² A'i hurae gemu gemu hesi uhure majae niö'i jasi jöëni na ioho bogo ijaje höjo. Inöme rabe ujuohë'o ho ⁹ nasi bahi'i gemu jani bamahobe va'aje höjo. ¹³ Ëhi ua'irögororo rue tax baejaje ahuro rori'o namiromo javojimamu nunoho bogo ö'idöho sioroho'i vineboho övëro ano'anovoromo God uavade höjo: Na a sisë jevaje nani vavaenimëjo. Ëhi'are höjo. ¹⁴ Naro jemë uëvajëjo: Tax baejaje aho God-ro hesi sisëho uehorovoromo vuonugamu God-are nurire mae namijë'ëro hesi osare vuonor'ö abuejade höjo. A'i rue Pharisee aho bogo ëhioho maho abuejade höjo. Ëhesi bëhoho ae rahu hesi sivu uehorovoromo döre bamorovë'o ho hesi ihoho abue'a'ajëjo. O ae rahu ba'obuerovë'o ho hesi ihoho döro ajiomu'ajëjo.

Iesuhu hesi övo asisö'o inino jabetesi sinore bamëhade jöhoje.

¹⁵ Ëhi uëvamu aëro asisö'o ininoho ëhu'o sö ujuoho rueruomadeje Iesuro öve jabetesi sinore bamëhøjöro. Ujuoho rovamu gëgorovo Iesure ijorajo ömo'ömhuro birëgareje. ¹⁶ Birëgamu hegoro Iesuro asisö'o ho ujuoho ruejöro uvoromo hesi ijorajoho uëvadeje: Nadi ahëvo'i uëhego rueruomajo. Ëhi jië'e asisö'o va'ëne jörume raromë'e aribövioho God-ro böröme namiromo muebejëvego hesi ahariremu raromoruomaje höjo. ¹⁷ Ave jöho na jö mae uë'ië'ajëjo. Asisö'o ininehu bogo sivu uehorovo'i God-hu muebejavuajoho mae hö uvaruëhi ae rahu bogo ëhi uvë'o ho God-are ahariroho bogo va'o raromu'aruëjo.

Bövi bise'o marohë'e a hesi jöhoje.

¹⁸ Ëhi'amu iae Jew rajo a böröme gemuëro ri'öromo Iesu uavadeje: Tisa ja a mae javajëjo. Na diehi'oromo ma-ioro'ioremuoho maroho hi'ejöjo. ¹⁹ Maroho hi'ejöjamu uavadeje: Jero na uevanuëjo: Ja a mae javajëjo. Iae mae höjo röhu hesi God gemu a maho höjo. ²⁰ Röhu mae hi'iranëro ue gevanuoho ja God-are jögoroho iae gavanue höjo. Nadi goho'amonëjo. Nadi aho anonëjo. Nadi vajioho baenëjo. Nadi sareri'e jöho aho majëhinëjo. Jasi vëmoho vavuoho mae uehorovëvonëjo. Mae hi'irane öroho ëhi höjo. ²¹ Öroho ëhi höjamu uavadeje: Iae mae-ëjo röhu na asisö'ere aevoromo jö ebe rovodoho jaruvohu'o ëhi gemuoho ë'aje höjo. ²² Ëhi gemuoho ë'aje höjamu hegoro Iesuro uavadeje: Iae mae ë'anue höjo röhu mue gemu bogo vaejë'e javajëjo. Jasi bövioho bise'o ho imo'amoromo monioho baeromo inömo bogo eni jië'e aribövioho suvuorëminëjo. Ëhi ë'ë'o ho bövie bise'e maho maho janioho ö'idöre jiaho'ajëjo. Ëhi'oromo rueromo nasi ijoro ijoro juvonövonëjo. ²³ Ëhi uavamu hegoro ruehuo hesi uehorovoromo uvadeje: Na

bövie bise'e börömo mae jevë'ëro suvuorëmi'irodoho na bogo eni jevajëromo huë vavaene böröme baejadeje.

²⁴ Huë vavaene baejamu Iesuro hu garomo a ioro'ioroho uëvadeje: Bövi bise'o marohë'e mae jië'e ariböviehu God-hu muebejaje öri ari'ere va'ë'oho anoji'e mae höjo. ²⁵ Mi börömo anugo gagore nugö'öjë'oho ja bogo eni javo'ajëjo. Röhu ëhi ë'ë'oho samae jianovo'i a'i bövi bise'o marohë'e ariböviehu God-hu muebejaje öri ari'ere va'iröhoho ëho anoji'e mae höjo. ²⁶ Ëhi jövamu heromo uavareje: Ëhi jië'oho no diehi'oromo maroho va'ejarëjo. No ae aho'obëhe bogo eni javuajëjo. ²⁷ Bogo eni javuajëjamu Iesuro uëvadeje: Iae ëhi höjo röhu jemë ma-aëro jëvë'ëro mu vaejë'oho bogo eni jëvajoho ëho God hu eni jiajëjo.

²⁸ Ëhi uëvamu Peter-ro ri'öromo Iesu uavadeje: Aveho gavëjo. Noro bövie bise'e nosiromo vuonugo'i jasi ijore ijore jijihë'e javuajëjo. ²⁹ Jijihë'e javuajëjamu Iesuro uavadeje: Ëho iae mae höjo. Aveho na jö mae uë'ië'ajëjo. Ae rahu God-hu muebejëvo'iröhe mu uehorovoromo ëhuni javue vabore ö ömo'öme vëmu vavu'e aboji harihu'e vuonugo'amë'oho ³⁰ ëhi jië'e aribövioho jemë jemesi bövioho bise'oho ëho ma-bise'e vuonugarije höjo röhu avevejö'e ave sa'are bövi mae bae'a'arujëjo. O majae ijönö jemë ma-ioro'iolemu maro raromo'arujëjo.

Iesuhu guomoröhe jö urimo vae niö'i majëhijadoho ijönö röhu maho majëhijade jöhoje.

³¹ Iae Iesuro hesi ijoraje 12-ho rori'o sö va'oromo uëvadeje: Aveho hehëjo. No Jerusalem amore ajiomaruëjo. Ajio raromo'iramu evare urimo jö God-aro baeromo majëhinövare ariböviehu jö jajivo'amarëhi ëhi jië'e muoho Jerusalem rajëro God-are A Ma nasi örire vaejevo'aruëjo. ³² God-ro hesi ëhi bamë'ëro naro sa'a göre jioromo rovere aribövi jabesi övore va'ejöjo. Va'iramu jaburo baejevoromo sivegoromo ijumevoromo sabëro ödegoromo ³³ hisuebijevoromo anego'iramu guomevo'ajëjo. Guomoromo majae niö'i gemu hesi uhure ri'ö'ejöjo. ³⁴ Ëhi uëvamu hegorovo hesi ijorajoho jabu bogo mae bogo hejareje. Bëhoho subivëhë'ëro hesi jöho bogo avoho baejareje.

Iesuhu Jericho amore rueromo nuni sisë'e ae ajamade jöhoje.

³⁵ Ëhi'amu iae Iesuro va'adoho va'o Jericho amore hörö'iro ë'adeje. Röhu nuni sisë'e ae gemuëro ë öri ionire hiromo maëni sisëni ae ëninëmijadeje. ³⁶ Ae ëninëmiromo hejade ae aho'obëhe mae rova'avamu hejë'i ae uëvadeje: Jabumë rabë'i rova'aruëjo. ³⁷ Rabë'i rova'aruëjamu aëro uavareje: Iesu Nazareth rajohuro rova'ego ëhuni ë'aruëjo. ³⁸ Ëhi uavamu hegorovo nuni sisë'e ahuro ma-darugo'o uvadeje: David-are ujoho böröme javaje Iesu jero nani vavaenimëjo. ³⁹ Vavaenimëjamu hegorovo rue urimo va'are ariböviohuro birevoromo uavareje: Jöe vuonugëjo. Jöe vuonugëjamu hejë'i ma-darugo ma'o uvo'i hijadeje: Hë David-are ujoho nani vavaenimëjo. ⁴⁰ Ëhi uvo'i hijamu Iesuro va'adoho vuonugo'i ë namiromo uëvadeje: Nuni sisë'e aho hu'irae baruehëromo barovamu nuni sisë'e aho uavadeje: ⁴¹ Naro diehi ajamijöro nagajëjo. Nagajëjamu uavadeje: Bada ajemego na nune dadovoromo uherihöjo. ⁴² Uherihöjamu Iesuro uavadeje: De nune dadovoromo uherihëjo. Jero God mae uehorovamu ëhuro marëjavë'e höjo. ⁴³ Ëhi uavamu ma-burëro uherihadeje. Uherihoromo God huë mae uabe Iesuare ijore ijore va'adeje. Va'amu ae aho'obëhe garomo God rajahiruomadeje.

19

Zacchaeus-hu Iesu ga'i nimamu ëhi ë'ade jöhoje.

¹ Ëhi'amu Iesuro Jericho amore rovë'ëro amo ririre rova'adeje. ² Röhu ë amore ae gemu hijë'e jiajadeje. Hesi ihoho Zacchaeus jiajadeje. Hu tax baejaje a böröme jiajadeje. Hesi bövioho bise'oho marohë'e mae jiajadeje. ³ Amo Iesuro rueromo va'ia'amugo Zacchaeus-ro Iesu ga'i sivohoromo röhu ae aho'obëhe tagavoromo urahë'ëro bunosirivamu bogo avoho gavadeje. ⁴ Bogo gagorovo uvadeje: Iesuro ë örire va'a'ajë uvoromo urimo tutuvo va'oromo öri bëhire ijo duvahore ajio hijadeje Iesu rovego niomo'amo ga'iro. ⁵ Ajio hijamu Iesuro hu jiaji'ere ruegoro namiromo sioroho garomo uavadeje: Zacchaeus-ajo. Ma-burëro ruvebijego va'arëjo jaruvoho na jasi osare hi'ië'e jevaje. ⁶ Ëhi uavamu

hejĕ'li Zacchaeus-ro nimorohoromo ma-burĕro abueromo Iesu hu'irae baeromo hesi osare va'oromo rajahijadeje. ⁷ Rajahijamu ae aho'obĕhe gavare Iesuro Zacchaeus-are osare va'amu gagorovo bijĕnimoromo uarovareje: Asĕ'e Zacchaeus a sisĕ hĕjo. Iesu rabĕni ĕhi jĕ'e a hesi osaroho niavo'li va'ajĕjo. ⁸ Ĕhi uarovamu Zacchaeus-ro ri'ĕromomo Bada uavadeje: Bada aveho hejĕjo. Nasi bĕvioho bise'oho ririre tarioromo vituoho bae'li vituoho bogo eni jĕ'e aribĕvioho suvuorĕmi'ejĕjo. Naehu a rahuaru inĕmo sarerĕmiromomo vajiohehu ujuohodoho iae na ĕhi niĕ'li ĕhi niĕ'li ĕhi mana vuonorĕ'ĕ bojĕmibe va'ejĕjo. ⁹ Bojĕmibe va'ejĕjumu hegorovo Iesuro ae aho'obĕhe uĕvadeje: Jaruvo ave osare raromarue aribĕvi jabesi sisĕho uehorovoromo vuonugĕhĕ'ĕro mae jĕvajĕjo. Ĕhesi bĕhoho Zacchaeus hu'o Abraham-are ujĕro jĕ'ĕro ĕhu'ĕro God-hu huĕ baejaje ae hĕjo. ¹⁰ Zacchaeus va'ĕne ĕhi subirĕ'ĕ'amĕ'e aribĕvi ioro'ioroho naho'amoromo sĕ rueromo maro nugo'amoirodĕni ĕhuni God-are A Maho na rovode hĕjo.

A bĕrĕme gemuehu hesi mu aribĕvi ijo bajo bojĕmiromomo avoho muebejehorĕ uĕvade uhu jĕhoje.

¹¹ Ĕhi uĕvamu ae aho'obĕhe hejareje. Heromo uvareje: Iesu Jerusalem hĕrĕ'li dunovajĕjo. Hĕrĕ'li'ramu gavĕ'li no aevoromo ga'ejarejo God-ro bĕrĕme namiromomo no muebejavuo'iramu. Ĕhi uvoruomamu gĕgorovo Iesuro hesi jĕho uhu'e majĕhiromomo uĕvadeje: ¹² Iae a bĕrĕme gemuĕro hijade hĕjo. Hiromomo ĕre ĕgobĕviro sa'a gĕro va'ie'ade hĕjo hesi sa'a mueberĕhe darugoho baeromo vuonorĕ'ĕ rue'irĕhĕni. ¹³ Va'irĕgoromo hesi mu vaejahirue ae aho'obĕhe 10 jaburo ruejĕro uvĕvoromo rueruomamu ae gemu gemu 20 kina 20 kina ĕhi bojĕmibe va'ade hĕjo. Bojĕmibe va'oromo uĕvade hĕjo: Ave monioho baeromo muoho ma-vaemu vaeromo monie gĕ'o dĕro baejehorego evare na vuonorĕ'ĕ rueromo bae'irĕjo. ¹⁴ Ĕhi uĕvĕ'ĕro va'amu gagorovo ĕ a bĕrĕmoho hesi sa'a rajohuro hesi huodivĕ'ĕro ae gĕ rĕmĕ'ĕjumu a bĕrĕmo hesi ijore va'are hĕjo. Va'oromo ĕ sa'a gĕre suvorovoromo a masijoho uĕvare hĕjo: Ĕaehu bĕrĕme namiromomo nosi sa'a muebejavuo'irĕhoho no bijĕnaguajĕjo.

¹⁵ Ĕhi'amu ĕ ahuro hesi sa'a mueberĕhe darugoho baeromo vuonorĕ'ĕ rovade hĕjo. Rueromo jĕe nugĕ'ĕromomo hesi moni bojĕmade mu aribĕvioho uĕvade hĕjo: Ruehego na gĕvĕjo monioho dimine dimine gĕ'o dĕroho baejehĕ'e jĕvego. ¹⁶ Ĕhi uĕvamu ae gemuĕro urimo rueromo uavade hĕjo: Jaehu 20 kina bojĕmijanohuro ĕhuro na mue vaeromo gĕ'o dĕre 200 kina baejahĕ'e jevajĕjo. ¹⁷ Baejahĕ'e jevajĕjumu ruéhuro uavade hĕjo: Mabĕhĕjo. Ja mu mae vaejanue ae javajĕjo. Ja mu bise'oho mabĕhe muebejehobe rovanohuni ĕhuni naro darugoho bojami'ejĕjo jero ame aho'o 10 muebejeho'iranego. ¹⁸ Ĕhi uavamu gavĕ'li mu vaejaje a gĕhuro rueromo uavade hĕjo: Jaehu 20 kina bojĕmanohuro ĕhuro na mue vaeromo gĕ'o dĕre 100 kina baejahĕ'e jevajĕjo. ¹⁹ Baejahĕ'e jevajĕjumu ruéhuro uavade hĕjo: Jero ame 5 muebenĕjo. ²⁰ Muebenĕjumu gavĕ'li mu vaejaje a gĕhuro rueromo uavade hĕjo: Jasi 20 kinaho aviae hĕjo. Niĕgĕro numoromo avoho bamahĕ'e jevajĕjo. ²¹ Ĕhesi bĕhoho naro ja juhuonamijode hĕjo ja vĕrĕ'e ae javĕ'ego. Ae gĕehu ba'amaroho bivaroho ja ma-ijanue hĕjo. ²² Ĕhi uavamu hesi bĕrĕmohuro uavade hĕjo: Ja mu sisĕ vaejanue ae javajĕjo. Jaehu jasi jĕ'ehu jĕvanue jĕe gemuoho ĕho naro baeromo vuonorĕ'ĕ ja mana majahi'ie'ajĕjo jero heromo uvo'iranego: Ojo'e na sisĕ ĕ'aje ae jevajĕjo. Jero uvane hĕjo: Nĕro vĕrĕ'e aĕro jĕ'ĕro ae gĕehu ba'amaroho bivaroho ma-ijaje hĕjo. ²³ Ĕhi uvanoĕro rĕhu ja rabĕni nasi ijo bajoho bogo baeromo avoho bahijarie aribĕvi jabesi ĕvoroho bamane hĕjo na rueromo nasiroho baeromo gĕ'o dĕre bamaroho ĕhu'o bae'irode. ²⁴ Ĕhi uanugoromo ĕ bĕhire riravarue aribĕvioho uĕvade hĕjo: Ĕia hesi 20 kina baeniahiromomo 200 kina baejade aho bojamiĕjo. ²⁵ Bojamiĕjumu rue aribĕviohuro uavare hĕjo: Iae mae hĕjo rĕhu mami'e iae hu 200 kina baejade hĕjo. ²⁶ Baejade hĕjumu ruéhuro uĕvade hĕjo: Na aveho uĕvajĕjo. Mu vae'irane suvuore javĕ'oho God-ro gĕ'o bojami'iramu bae'a'anuĕjo. O bogojavĕ'oho bisemu baejanoho God-ro baeniahi'ajĕjo.

²⁷ Rĕhu na nu huodegarue aribĕvi jabesi jĕho uĕ'ie'ajĕjo. Naro bĕrĕme namiromomo muebejĕvo'ia'amu bijĕnimare jĕjaje ĕhuni guduamo ujuoho rueromo nasi nunoro muo'amego vuovajo.

Iesuhu Jerusalem mabêhe rovade jôhoje.

²⁸ Ĕaribövioho ĕhi uĕnugoromo Iesuro urimo Jerusalem hŏrŏ'i ajiomamu gavĕ'i ĕ aribŏvihuro ijore rihromareje. ²⁹ Ĕhi'oromo Iesuro Olives Dahorure Bethphage amo o Bethany amo jiajinŏ ĕ ajio hŏrŏjadeje. Hŏrŏnugoromo hesi ijorajoho niŏ'i rĕmŏ'ŏromo ³⁰ uĕvadeje: Arue jemesi nuninŏrire amohuro va'ohĕjo. Va'o hŏrŏ'i ga'a'arujĕjo donkey harihe bise'ego aehu dŏre bogo hiromo va'aruoho benugĕ'le jio'iramu. Benugĕ'le jiego jiovoromo hu'irae ruerĕjo. ³¹ O aehu uĕvĕ'oho: Jemĕ rabĕni jiovarujĕ uĕvĕ'oho uĕrĕjo: Badaro ave mioho nimo'ego ĕhuni jiovaruĕre. ³² Ĕhi uĕvamu va'oromo gavareje Iesuhu uĕvadĕhi ĕhi jiamu. ³³ Ĕhi jiamu gagorovo jaburo donkey harihoho jiovamu gavĕ'i ĕ mi arijo'oho jaburo gĕromo uĕvareje: Jemĕ rabĕni donkey harihoho jiovarujĕjo. ³⁴ Rabĕni jiovarujĕjumu rueho jaburo uĕvareje: Badaro ave mioho nimo'ego jiovarujĕjo. ³⁵ Ĕhi uĕromo jiovoromo hu'irae barueromo jabesi niŏgoho mi dejore ruaho'amo bahiromo Iesu ma'enamum ajio dŏre hijadeje. ³⁶ Hiromo va'amu gavĕ'i ae aho'obĕhe niŏgoho ŏrire ahahobe va'areje. ³⁷ Ahobe va'amu Iesuro ĕ va'oromo Olives Dahorure ajiomoromo hojire hŏrŏromo Jerusalem hŏrŏ'i abue'ie'adeje. Abue'ia'amu Iesuare aribŏvie aho'obĕhe Iesuro mu masije aho'o vaejamu garuomĕ'ĕro ma-darugo'o God mae uabe nimorohobe abueruomadeje.

³⁸ Abuejĕ'i uvoruomadeje:

Ave aho a bŏrŏmehu Badare ihore rovajoho mabĕhĕjo.

Ő'idŏre aribŏvioho huĕ maro raromaruĕjo.

Aje aho'o God-aremu hŏjo.

³⁹ Ae aho'obĕhe hu'o gemuore va'oruomadeje rŏhu Pharisee a ioro'iorohuro Iesu uavareje: Tisa jasi aribŏvioho uĕvego ja rajahijaruoho vuonugarĕjo. ⁴⁰ Vuonugarĕjumu Iesuro uĕvadeje: Bogajo. Na aveho uĕvajĕjo. Nasi aribŏviehu rajehijaruoho vuonugo'ibejarĕjo ĕ munĕho jaburo aĕro ĕ' anovoromo nasi ŏrire rajehiruomoromo ma-darugo'o uvoruomo'ibejajo.

Iesuhu Jerusalem amo rajĕni nivade jŏhoje.

⁴¹ Ĕhi uĕnugoromo Iesuro va'adoho Jerusalem amo bĕhi mare va'adoho va'o amoho garomo vavaenimoromo ⁴² nivĕ'i uvadeje: Vaevĕ'oho jemĕ jaruvo ga'ibejarijĕjo jemĕ diehi ĕ'oromo ma-mae raromo'irarije ŏroho ĕhi jiego ga'ibejarijĕjo mae jĕvo'ibejajo. Rŏhu jaruvo ga'ibejarijoho tugohĕ'ĕro bogohŏjo. ⁴³ Majae ijoho rue'iramu jemĕ'o muorovarue aribŏvihuro rueromo sa'ae babaenemi rova'oromo tugohoromo ruĕ numĕ numĕvo barĕ'aruĕjo. ⁴⁴ Numĕvoromo jemĕ ujuoho sa'are behumĕvo'amo'aruĕjo jemĕ'o jemesi asisŏ'ohu'o. Munĕ javu vaeromo babaenemibe ajiomaroho jaburo dadovo'iramu ahoromo sa'aro ruvebi barĕ nahonahovo'ajĕjo. Rabĕni hesi bĕhoho God-ro jemĕ ajĕmi'i rovamu jemĕro ĕho bogo uehorovĕ'ego ĕhunijajo.

Iesuhu God-are amo bŏrŏmore va'oromo diehi ĕ'ade jŏhoje.

⁴⁵ Iesuro nivĕ'i ĕhi uvoromo God-are amo bŏrŏmore ajiomoromo bŏvie bise'le imo'amarue aribŏvioho osare jĕvamu rarovŏ'ŏjĕvadeje. ⁴⁶ Rarovŏ'ŏjĕvoromo uĕvadeje: God-are surire jŏho ĕhi uvĕ'le sŏje: God nasi osaho nasi ŏrire jŏ ato'irarije osae hŏjo. Ĕhi uvĕ'le hŏjo rŏhu jemĕro mu sisĕ ĕ'ĕ'ĕro ĕhuro ave osaho vajiohu'e aribŏviehu gurihiovarue juju gagoho va'ĕne hŏjo.

⁴⁷ Ĕhi ĕ'ĕ'ĕro Iesuro majae ĕhi God-are osare hiromo jŏho rŏjĕhinŏvadeje. Rŏjĕhijamu priest masijohu'o Jew rajo jŏgoru ŏri rŏjĕhijarue aribŏviohu'o Iesu ano'irŏhe ŏroho naho'i amo rajo a masijoho jabu'o ĕhi ĕ'areje. ⁴⁸ Őroho nahoromo gavare ae aho'obĕhe Iesuare jŏhuremu he'i hia'le avohamu gĕgorovo uvareje: No Iesu anĕ'oho ĕ aribŏvioho jaburo diehi'avuo'aruĕjo. Ĕhi jiĕ'ĕro Iesu anorŏhe ŏroho bogo birohareje.

20

Jew rajo a masijehu Iesu bogo ma uehorovoromo darugoho dinŏ'e baejane hŏ uavare jŏhoje.

¹ Ĕhi'amu Iesuro God-are amo bŏrŏmore hiromo ae magonahe hesi jŏ maho majĕhiromo hesi ŏroho rŏjĕhijadeje. Rŏjĕhijamu gavĕ'i Jew rajo priest masijohu'o jabesi jŏgoru ŏri

röjehijarue ariböviohu'o ëho jaburo a duvaho ömo'ömoihu'o gemu mae rueruomadeje. ²Rueromo Iesu uavareje: Ave jöho uövuego no he'irarëjo. Jaehu God-are amo börömore hiromo mue gö gö vaejanuoho diehi jië'e daruge javoromo o raro darugoho bojamijë'ëro ëhi jië'e muoho vaejanue höjo. ³Vaejanue höjamu Iesuro uëvadeje: Nasi darugo hesi jö ue gevarujoho na'o jemë jöe gemu uë ge'ië'ajëjo. ⁴John-hu bapataeto vaejavuonövadoho na God-ro o ma-aëro darugoho bojamijë'ëro ëhioho ë'onövade höjo. ⁵Ë'onövade höjamu rue a masijohuro Iesu diehi mana ua'iröhe jöho jabesi mevoromo uarovareje: Noehu uavë'oho: God-ro John darugoho bojamade hö uavë'oho Iesuro uö'a'ajëjo: Ëhi jië'oho jemë rabëni John bogo ma uehorovarije höjo. ⁶O noehu Iesu uavë'oho: Ma-aëro John uvavamu ë'ade hö uvavamu hejë'oho ae aho'obëhe munëro vajamui'aruëjo ë hesi bëhoho jaburo uvoruomë'ëro: John hu jö God-aro baeromo majahuonövade ae hö uvoruomë'ëro. ⁷Ëhi uarovoromo Iesu uavareje: No dadivavujëjo John darugoho dinö'e baeromo muoho vaejade höjo. ⁸Vaejade höjamu Iesuro uëvadeje: Ëhi jië'oho jemëhu uevariye jöho na'o bogo uë'ejöjo: Ëhi jië'e darugohuro na muoho vaejaje höjo.

Mu ariböviehu a börömo hesi ö'i bajo mu mueberomo sisë ë'are uhu jöhoje.

⁹Iesuro ëhi uënuogoromo ë Jew rajo aribövi jabesi jö sisëho uhu'e majëhiromo ae aho'obëhe uëvadeje: Iae ae gemuëro mure grape ö'oho bivo'amade höjo. Bivonugoromo ae uëvade höjo: Na va'ejöjo. Jemëro nasi muoho muebejehorëjo. Mueberomo ö'i bajoho raeromo mavego nasiroho bahi'i ioro'ioroho jemesi ujuohorëjo. Ëhi uënuogoromo ri'öromo sa'a göro va'oromo majae ëgobövie ë hijade höjo. ¹⁰Hijuvo gavade ö'i bajo urarue majaho rovamu mu vaejharue aho gemu uavade höjo: Va'iranoho mu muebejarue ariböviohu uënego ö'i baje gö i'imamego ujuoheho ruenëjo. Ujuoheho ruenëjamu ruehuro va'ade höjo. Va'o mure höröjamu gavë'i rue mu muebejarue ariböviohuro ë aho anoromo sihö'öjamu sionëro övemu rovade höjo. ¹¹Övemu rovamu gagorovo mu arijo'ohuro mu vaejahaje a göho nugö'öjamu mure va'ade höjo. Va'o höröjamu gavë'i rue mu muebejarue ariböviohuro ë aho anoromo hesi örire mu sisë vaeromo sihö'öjamu sionëro övemu rovade höjo. ¹²Rovamu gagorovo mu arijo'ohuro mu vaejahaje a göho nugö'öjamu mure va'ade höjo. Va'amü gavë'i mu muebejarue ariböviohuro ë aho anojuvo gavare hesi sino haho'oho ma-köëremu rumorovoromo rövamü rori'ö babu'öjare höjo. ¹³Ëhi'amü gagorovo mu arijo'ohuro uehorovoromo uvade höjo: Ëhi jië'oho na diehi'oromo ö'i bajoho ujuohorëjöjo. Iae na nasi harihu mabëhoho nugö'ö'ejöjo. Nugö'ö'iramü va'iramü rue ariböviohuro hu garomo uvoruom'ajëjo: Nöruare harihe hö uvoromo ëhuni nani hu mae uehorovoromu'ajëjo. ¹⁴Ëhi uvoromo hesi harihoho nugö'öjamu mure va'ade höjo. Va'o höröjamu gavë'i rue mu muebejarue ariböviohuro uarovare höjo: Arue rovaje ahuro hesi vavu hesi sionoho bae hesi höjo. Ëhuni ë'ego ano bamarëjo ëhuro ave muoho noro baeröhe höjo. ¹⁵Ëhi uarovoromo ë aho guduamoromo mure jiamü rori'ö bijimo bu'öromo anamu guomade höjo. Ëhi'are höjo.

Ëhi jië'oho mu arijo'ohuro ë mu muebejarue ariböviohu diehi'ëvo'ajëjo. ¹⁶Huro rueromo i'ue bojëmiromo muo'amo'i ë muoho ae gö bojëmi'ajëjo jaburo mueberöhego. Ae gö bojëmi'ajëjamu hegorovo ae aho'obëhe bëhoho uehorovoromo uvareje: Mu muebejare ariböviehu sisë ë'oromo i'u baejarëhi nosi a masijo ëhi jëvoröhoho no bijönaguajëromu Iesu uavareje: Asë'e ëhi jië'oho mu sisë höjo. ¹⁷Mu sisë höjamu hegoro Iesuro jabumë ërimëhoromo uëvadeje: Jemesi a masijehu ëhi jië'e mu sisë vaeromo i'u baeröhoho jemë bijönëgajëjo röhu ave uhu jö God-are surire jajivadoho bëhe gemuoho höjo:

Munë javue vae'irögho munë gemu bijönimoromo vuonugare höjo.

Vuonugaroho jaruvoho ë munëhuro javuoho nigemo'ëgo bibivoromo mae namijajëjo.

Ëhi jajivë'e höjo. ¹⁸Röhu aehu ë munë döre bejë'oho ahoro ahoro bae'a'ajëjo. O ë munëhu a döre berovë'oho aho sa'ijovo barë'ajëjo.

Iesuhu guaro berovojöro aehu tax jö ua gavarohoje.

¹⁹ Ēhi uēvamu hegorovo rue Jew rajo jōgoru rōjēhijarue aribōviohu'o priest masijohu'o ēho jaburo garomo uvareje: Iesuro a masijoho no biraguoromo ēhuni uhu jōho jōvājējo. Jōvājē uvoromo evare Iesu guduamo bava'iē'oromo ae aho'obēhe juhuonēmiromo vuonugareje. ²⁰ Vuonugonugoromo Iesu garomo muebejuvo majae eni jiamu gagorovo ae uēvareje: Va'irarijoho Iesu sareramijego huro uvo'irajo: Jemē a mae jēvājējo. Ēhi'oromo hesi ōroro jōe ua gavego huro jōe sisē'i jōvoromo guaro berovo'irajo. Berovego evare no guduamo bava'oromo gavanare ōvore bojami'irōhe hōjo. ²¹ Ēhi uēvamu hegorovo jaburo va'oromo Iesu sarerisareriamiromo uvareje: Tisajo. Iae no gavarue hōjo ja jō maemu jōvoromo mu maemu rōjahuijego. Jero no gōromo ma-gemu uehorovavuoromo God-are ōrohemo mae rōjahuijanue hōjo. ²² Ēhuni jō harihe ua ga'iē'aruējo tax jōho. Rome a bōrōmohuro nosi sa'aho muebejogo noro hu tax bojamijarue hōjo. Noehu ēhi ē'aruoho na ēhuro nosi jōgoroho aharue hōjo o bogajo. ²³ Bogajamu Iesuro gēromo uvadeje: Naehu io'a o boga uēv'oho ijumevo'i nimarūēromo uēvadeje: ²⁴ Ijo bajē gemu rōjehihiogo na gavōjo. Rōjahijamu uēvadeje: Rahuare nu ano'ohu'o ihohu'o jajivē'e hōjo. Jajivē'e hōjamu uvareje: Rome a bōrōmo hesi hōjo. ²⁵ Rome a bōrōmo hesi hōjamu Iesuro uēvadeje: Ēhuni Rome a bōrōmo hesiroho ēho hesi ōroro bojami'i God-aroho ēho God-are ōroro bojaminōvorējo. ²⁶ Ēhi uēvamu hegorovo rue Iesuarue jō sisē nahare aribōviohuro uvareje: Noro uvare hōjo: Noro Iesu bijioho ga'iramu huro tax jōho sisē'i jōvoromo a nuniro be'a'ajē uvaroho rōhu hu bogo bejade hōjo. Ēhi uvoromo jōe barējēvamu jōrumoraejareje.

Iesuhu guaro berovojōro vuovē'e aribōviehu ri'ōruomo'irōhe jō Sadducee aribōviehu hu ua gavarohoje.

²⁷ Jōrumoraejamu iae Jew rajo a masijo ioro'iorohuro rovareje. Jabumē Sadducee jō uehorovarue aribōvie jioruomadeje. Sadducee aribōviohuro uehorovoromo uvoruomajeje: A vuovē'oho ijonōho bogo ri'ō'amo'i ma-ioro'iore gemu vuovo'ajējo. ²⁸ Ēhi uvoruomaje aribōviohuro rueromo Iesu guaro berovojōro sarerisareriamiromo uvareje: Tisajo. Moses-ro jōgore jajivoromo uōvuē'e hōjo: Aboji harihu'o rumo'e a vuovego diehi ē'irōhe ōroho aviēhi hōjo. Aehu vaboro masuromo vaboroho aboji harihu'oho bogo vaejē'e baruehu guomo'i vaboro nugē'oho hesi ōhuro vuojiroho masuromo ēhuro guomade ō hesi ihoro ujoho vaejaho'ajējo. Moses-are jōgoroho ēhi hōjo. ²⁹ Ēhi jiiē'ero iae ma-ō ōmo'ōmēremu ae aho'o 7 raromare hōjo. Raromoromo muriohuro magonahoho masuvade hōjo. Masuromo vaboroho aboji harihu'oho bogo vaejē'e baruoho guomade hōjo. ³⁰ Guomamu hesi vaboroho dorue hijamu gagorovo ō gōhuro vuojiroho masuvade hōjo. ³¹ Masuromo guomade hōjo. Guomamu hesi vaboroho rōhu maho dorue hijamu gagorovo ō gōhuro vuojiroho masuvade hōjo. Masuromo guomade hōjo. Ō ōmo'ōmo ioro'iorohu'o ēhi gemuoho ē'obe rovere hōjo. Ō ōmo'ōme 7 jabuhu ē magonahe gemuoho masube rovaroho magonahoho aboji harihu'oho bogo vaejē'e aho ma-vuovēvobe rovide hōjo. ³² Vuovobe ruejuvo barējamu ijo tugoho'ioho ē magonahoho hu'o guomade hōjo. Ēhi'are hōjo. ³³ Ēhi ē'arohuni ēhuni ave jōho no ua ga'iē'aruējo. Jero uvanue hōjo: Vuovoromo ri'ō'earējo. Ēhuni vuovē'e aribōviehu ri'ōruomorōhe majaroho ē magonahoho di ahui'o hi'a'ajējo. Barue aho'o 7 masuvē'ego ēhuni uvaruējo.

³⁴ Uvaruējamu uēvadeje: Bogajo. Ave sa'are raromarue aribōvioho masuovarue hōjo. ³⁵ A'i God-hu uvē'oho: Mae jēvē'ego vuovoromo ri'ōromo maja i'ore raromo'aruē uvē'oho ē aribōvioho evaroho bogo masurovo'aruējo ³⁶ bogo rōhu maho vuovēvo'iē'ero. Ēhesi bēhoho ēhi jiiē'e aribōvioho vuovoromo ri'ō'amē'ero jabumē God-are aboji harihu'e jēvoromo anera va'ēne jēvo'ajējo. ³⁷ Rōhu vuovē'e aribōviehu ri'ō'irōhoho ē jōho Moses-ro rōjēhijade hōjo. Ijo hisu vēnehu ravade jō jajivadevare evare surire jajivoromo uvē'e hōjo: Bada God-hu Abraham Isaac Jacob ēhi muebejēvaje ae hōjo. ³⁸ God-hu Abraham Isaac Jacob muebejēvaje jō hesi bēhoho jabumē vuovoromo bogo ioro'ioemuoho barē'i va'o raromego God-ro muebejēvaje hōjo. God bogo vuovoromo ioro'ioemu barējē'e aribōvioho muebejēvo'ibejajo. A'i hu vuovoromo va'o raromarue aribōvioho muebejēvaje

höjo. God gavaje höjo vuovë'e o bogo vuovë'e aribövioho bogo barë'i raromego muebe-jëvaje höjo. ³⁹ Èhi uëvamu hegorovo Jew rajo jögoru öri röjëhijarue aribövi ioro'iorohuro uavareje: Tisa ja mae uvanuëjo. ⁴⁰ O Iesu bijönimare ariböviohuro Iesuare dëre bijioho garöhe jöho ua ga'ie'aroho juhuonivoromo ioro'ioeremu vuonugareje.

Böröme namiromo ajamuaje a hesi jö Iesuhu röjëhi'i uë gëvadohoje.

⁴¹ Vuonugamu Iesuro uëvadeje: Aëro atoromo uvoruomaje höjo: Böröme namiromo ajamui'iröhe aho hu ma-David-are uje jio'a'ajëjo. Rabëni ëhioho uvoruomaje höjo.

⁴² David-ro Psalms jajivo'amare surire jajivoromo uvë'e höjo:

Bada God-ro nasi Bada uavade höjo: Nasi övo manö rojo hijego

⁴³ ja'o muorovarue aribövioho naro ruahö'öjëvego

hörëro vijuvo taemo'amo'irane höjo.

⁴⁴ Èhesi bëhoho böröme namiromo ajëmi'iröhe a hesi jöho David-ro jajivoromo uvë'e höjo: Bada höjo. Bada hö uvadoho ëhu'o ho rabëni uvoruomaje höjo: Böröme namiromo ajamui'iröhe aho ma-David-are uje höjo.

Jew rajo jögoru öri röjëhijarue ariböviehu sareri'e mu vaejaruëhi aehu bogo ëhi ë'iröhego Iesuhu jövadohoje.

⁴⁵ Ma-David-are uje höjamu rue Jew rajo jögoru öri röjëhijarue ariböviohuro jöho bogo mana uavareje. Bogo mana uavamu ae aho'obëhe riravoromo mu'öjahijamu gavë'i Iesuro hesi aribövioho uëvadeje: ⁴⁶ Jew rajo jögoru öri röjëhijarue aribövioho gë avohorëjo. Èhesi bëhoho ë aribövioho jaburo jabesi sinohemu uehorovoromo niögu ëgobövie höru'o utahë'o ho io'amoromo jijiharue ëhi jië'e muoho nimarue höjo aëro gëromo rajëhijöro. O imo'amaruire va'ë'o ho jaburo nimarue höjo aëro uvoruomoröhego: Jabumë a masijëro jijihajëromo rajëhiro mo jejëmiruomoröhego. O God rajahijarue osare va'ë'iroho o söro i'i va'ë'iroho a masijehu raromaruire ë va'o raromo'i nimarue höjo. ⁴⁷ Raromo'i nimoromo magonaho doru jabesi bövioho bise'o ho ëma ujuohëharue höjo. Ujuohoromo sarerivoromo pari ëgobövie jaguvarue höjo aëro gëromo uvojöro: Mu mae vaejaruëjo. Èhi jië'e sareri'e muoho vaejaruego ëhuni God-ro i'u börömo mae bojëmi'ajëjo. Èhuni avoho mueberovo'i nadi ëhi jië'e muoho vaerëjo.

21

Bövi bise'o rumo'e magonaho doruehu God-ni suvuro ba'amade jöhoje.

¹ Èhi uëngoromomo Iesuro avoho uheriho'i gavadeje bövi bise'o marohë'e mae jië'e aribövioho God-are amo börömore riravoromo God-are suvuro bahijaruire ë va'oromo jabesi suvuroho io'amamu. ² Io'amamu gëvë'i gavadeje bövi bise'o rumo'e magonaho dorue gemuëro rueromo rövë'e ijo baje niö'i ë gemuore ba'amëvamu. ³ Ba'amëvamu gagorovo Iesuro ae uëvadeje: Èbövi bise'o marohë'e jië'e ariböviohuro ijo baje aho'o io'amo'i arue bogo eni jië'e magonahohuro rövë'e ijo bajoho niö'i ba'amade höjo. Röhu God-ro ëhi uvajëjo: Èmagonaho hesi suvurohuro a ioro'ioro jabesi suvuroho iosir-ami'amoromo börömo mae höjo. Na mae uëvajëjo. ⁴ God-hu ëhi uehorovaje hesi bëhoho ë a ioro'iorohuro inömo marohë'e maëro jië'ëro ma-vituohemu bojami'i ë magonahohuro inömo rumo'ëro jië'ëro hesi i i'ibejade monioho bövioho bise'o ho aho'o bojami barëjë'e höjo.

Aehu God-are amo börömo dadovoruomo'iröhe jö Iesuhu majëhijadohoje.

⁵ Èhi'amu aëro God-are amo börömo hesi jöho atareje. Munë mabëhëro iromë'ëro God-ni suvuro nu ano'e mabëhe ë amore bahijë'ëro ëhu'ëro ë amo hesi nu ano'e mabëhe jiajoho ë hesi jöho atareje. Èhi atamu hegorovo Iesuro uëvadeje: ⁶ Jemë ave aho'o gavarujoho majae ijönö ë munë javuoho aho'obëhe aëro dadovoruomo'iramu munëho ahoromo sa'aro ruvebi barë nahonahovo'ajëjo.

Huë vavaeni börömo rueröhe jö Iesuhu majëhijadohoje.

⁷ Ĕhi uėvamu rue aribėviahuro uavareje: Tisa jaehu uėvuanue muoho ěho divare jio'a'ajėjo. O mu rabe garomo uvo'ejarėjo: Iae ě majaho rue'iė'ajėjo.

⁸ Rue'iė'ajėjamu lesuro uėvadeje: Gavė'iajo. Aėro sarerėmi'iramu jemė rireromėvo va'a'ajėjo. Ae aho'obėhe rueromo sarerėmiromo uė'a'aruėjo: Nėruare ihoro rovajėjo. God-hu uevė'ėro bėrėme namiromo ajėmi'irode aho na vejajėjo. O uė'a'aruėjo: Jemėhu muebejaruje majaho iae aviae rovajėjo. Ĕhi jiė'e jė uėvamu hejė'oho jabesi ijore ijorocho nadi jijihorėjo. ⁹ O he'irarije sa'ae gėehu sa'a gėhu'o muorovarue jėhu'o sa'a gemuehu arijo'arije muorovamirovarue jėhu'o hejė'oho nadi juhuonivorėjo. Ĕre gė bogojiė'ėro ěhi jiė'e mu sisėho iae urimo jio'a'ajėjo. Rėhu sa'aho bėvioho bise'oho evaroho bogo barė'i hesi majae gėro jio'a'ajėjo. ¹⁰ Ĕhi uėnugoromo rėhu ave jė bėrėmohu'o majėhi-romo uėvadeje: Sa'ae gėėro gėhu'o muorovonėvo a masijo ioro'iorohuro ioro'iorohu'o muorovonėvo'aruėjo. ¹¹ Sa'ae darugo'o hijiohijiovo'amo'ajėjo. Sa'ae gė gė iruno'e bogojioromo guomo guomo sisė rue'a'ajėjo. Bogo gavaruė vėrė'e mu masijoho đ'idėre jio'a'ajėjo.

¹² Rėhu ě mue aho'o ě hesi urimo aėro na bijėnegoromo jemė guduamėvoromo sisė vaejėvo'aruėjo. Ujuohėvo va'oromo God rajahjarue osae gėre gėre court vaejėvoromo savoji gagore io'amėvo'aruėjo. Gavana o sa'are a masijo gė gė jabesi nunire rėmo'iramu ě riravo'aruėjo. ¹³ Jabesi nunire riravo'iramu ěhuro jemėhu nasi jė huruoho majėhi'irarije őroho jiovėho'ajėjo. ¹⁴ Nasi jė majėhi'irarije őroho jiovėho'iė'aje jiaje ěhuni a masijo jabesi nunire riravo'irarije maja ě hesi urimo uehore gemu baeromo uvorėjo: Noehu jabesi nunire riravė'iroho no bogo uvo'ejarėjo: Diehi mana uė'ejarėromo nurunurumo'ejarėjo. ¹⁵ Ĕhesi bėhoho Iesu naro jemesi jė'e simane sasohėho'iramu jėho majėhi'aruėjo. Majėhi'iramu jemė nu huodėgarue aribėvioho jemesi jėho heromo rėhu ahėhoromo jė mana majėhi'irėhoho bogo eni jioruom'o'ajėjo. ¹⁶ Bogo a gėho gemu a'i jemesi vėmu vavu'ėro ő őmo'omėro aganėro aemo'aemėro jabu'o jemė guduamėvoromo ujuohėvo va'oromo a masijo jabesi ővore bojėmi'iramu baejėvoruom'o'ajėjo. Baejėvoromo a ioro'ioroho jemė muo'amėvo'iramu vuovėvo'ajėjo. ¹⁷ Jemėhu na uehorovevarujohuni ae aho'obėhe jaburo jemesi őrire nue huodėgoruom'o'ajėjo. ¹⁸ Rėhu jemesi aru'ahoho bogo ěhi ěhi'o'i mamabėhe jėvo'ajėjo. ¹⁹ Biririvė'ohuro ěhuro mae rarom'o'irarije őroho biroho'aruėjo.

Aehu rueromo Jerusalem dadovo'irėhe jė Iesuhu majėhijadohoje.

²⁰ Rėhu jemėro ga'irarije muorovo aribėviehu rueromo amo numamu gavė'iroho uvorėjo: Jerusalem ijumo barė'irėhe majaho iae rovajėjo. ²¹ Ĕhi uvoromo ave Judea sa'are raromaruje aribėvioharo huruomorocho dahoru'ero iojiorėne. O Jerusalem raromaruje aribėvioharo rori'o va'orėne. O mure je'ore raromaruje aribėvioharo nadi amo bėrėmoroho va'orėne. ²² Huruomo va'o jė uėvaje hesi bėhoho i'ue mana ave sa'are ruerėhego God-are surire jajivare jėho ě i'uoho aho'obėhe evare majare rue barė'ajėjo. ²³ Ĕhuė vavaeni rue'irėhe majaroho dė'e magonahohu'o aboji harihu'o inino jio'amė'e magonahohu'o jabumė vaevė'oho jėvo'ajėjo. God-ro ave aribėvi jabesi őrire dė vėrėni-moromo i'ue nugđ'đ'iramu huė vavaene sisė mae ave sa'are rue'a'ajėjo. ²⁴ Huė vavaene ave sa'are rue'iramu muorovo aribėviohuro bije bune baeromo sa'ae gėro jioromo rueromo jemesi a ioro'ioroho muo'amo'iramu vuovo'i a ioro'ioroho guduamoromo tėvo'amoromo sa'ae gėro gėro ujuoho va'oruom'o'ajėjo. O sa'a gėre gėre jioromo ruerėhe aribėviohuro Jerusalem ijumo barėromo ave sa'aho jabesi baeromo sisė'i muebejėvobe va'ojuvo hujeji God-hu bamade majaho rue'iramu evare jabesi vėrėho barė'ajėjo.

God-are A Mae Kerisohu sa'are ruerėhe jėhoje.

²⁵ Rėhu majare manaerore jijire mujėrure vėrė'e muoho jio'iramu aėro sioroho garuom'o'ajėjo. O sa'aroho sa'a gė gė rajėro he'irėhe sđ jėvoho ma-darugo'o hasajavo'iramu hegorovo uehorovoromo uvoruom'o'ajėjo: Rabėro ě'ajėromo juhuonivoromo huė vavaene bėrėme baeruom'o'ajėjo. ²⁶ Garėhe ő'idėre inėmoho aho'o arua anumiae va'iramu gagorovo nune őrijanovoromo dė vėvėbajo'e butubutumoromo uvoruom'o'ajėjo: Sa'aho diehi diehi jio'iė'ajėjo. ²⁷ Ĕhi uvoromo garuom'o'ajėjo God-are A Maho naro darugo'o

aji'lo böröme baeromo suere ruvebi'iramu. Ëhi jio'a'ajëjo. ²⁸ Rõhu ëhi jië'e mu aevoromo jië'iroho döro riravoromo sioroho garomo uvorëjo: God-ro nosi i'u'e muoho tugoho'i hesi sasohë'e muoho røjahu'i'rögoro ë'ajëjo.

Mesehu gumutivego Jew rajo jabesi vama maja dunovaje uhu jöhoje.

²⁹ Iesuro ëhi uëngoromo ave uhu jöho uëvadeje. Mesohu'o ijo ioro'iorohu'o uehorovohëjo. ³⁰ Gavaruje hane gumutivego garomo evare jemë uvaruje höjo: Jew rajo nosi vama majaho iae dunovajëjo. ³¹ Ëhesi bëhoho ga'irarije naehu uëvodëhi mue gö gö rovamü gavë'iroho uvo'a'arujëjo: No ga'ië'aruëjo God-ro böröme namiromö aho'obëhe muebejavuego.

³² Ave jöho na jö mae uë'ië'ajëjo. Ave jaruvore raromaruje aribövioho bogo vuovëvo barëjë'iro naehu uëvaje muoho aho'obëhe rue'a'ajëjo. ³³ Ö'idöe sa'ae bövie bise'e barë'i nasi jöho gemu bogo barë'ajëjo.

Avoho mueberovo'iröhe jöhoje.

³⁴ Rõhu gavë'i raromorëjo. Nadi nimoronimorohoromo iruno'emuohe uehorovoromo vörö'e jovemuoho ue'ahoromo simanoho sisërërovorëjo. O ave sa'a hesi muohemu nadi uehorovoromo nurunurumorëjo. Ëhi ë'lë'oho jemëhu bogo uehorovo'irarije majare evare nasi majahuro ma-majiohëvo'ajëjo. ³⁵ Ö'ehu mahu mi'e ma-majioho bæejajëhi majae höröjajire beva'ajire aëro ma-raromo jijihö'i ga'a'aruëjo nasi majaho ëhi ma-majioho rue'iramu. ³⁶ A'i jemëro nune jioromo muebenövörëjo. Mueberomo God uanövörëjo: Ëhuë vavaeni maja rovë'iroho jero ajamuego no mae biririvo'irarëjo ëhuro mae javuobe va'oromo jasi A Ma hesi nunire mae riravo'iröhe höjo.

³⁷ Iesuro ëhi majëhijadeje. Rõhu hesi muoho aviëhi jionövadeje. Sisonuvo'ego God-are amo börömore hiromö God-are jöho ae røjëhiromö vahiromö'ego va'oromo ajio Olives Dahorure ë hinövadeje. ³⁸ Ëhi ë'ego sisonu sisonu'e ae aho'obëhe rueromo God-are amo börömore gagovonövareje Iesuhu jövaje jöho he'iro.

22

Iesu anoröhe öri nahare jöhoje.

¹ Jew rajehu Dë Huaje Oso Rumö'e I Ue'aharue Söröho dunovadeje. Sörö hesi iho göho God-hu Vörö Tugohade Söröhoje. ² Amo sörö majaho dunovamu priest masijohu'o Jew rajo jögoru öri røjëharue ariböviohu'o ëho jaburo Jew rajo a ioro'ioroho juhuonëmiromö öre nahareje Iesu ma-saginiëri baeromo anego guomoröhego.

Judas-hu Iesuni Jew rajo a masijo hiruëmijade jöhoje.

³ Öre nahamu Judas hesi iho göho Iscariot-ro rovadeje. Iesuarë ijoraje ae aho'obëhe 12 rõhu Judas hu jabesi gemuoho jiadeje. Judas hu Iesuarë ijorajo jabesi gemuoho jiamu Satan-ro hesi dëre abueromo jöe bojamadeje. ⁴ Jöe bojamamu Judas-ro va'oromo priest a masijohu'o osa börömo muebejarue ariböviohu'o jöe jövadeje hu diehi'oromo Iesu ë aribövi jabesi övore bojëmego guduamo'iröhoho. ⁵ Jöe jövamu hegorovo rueho jaburo nimorohoromo Judas uavareje: Iae mae höjo. Ëhi jië'oho no monie mana bojami'ëjarëjo. ⁶ Bojami'ëjarëjamu Judas-ro uëvadeje: Ëhi jië'oho iae mae höjo. Iae mae hö uëromö va'oromo öre nahadeje ae aho'o bogojëvego evare Iesu a masijo jabesi övore bojëmi'iröhëro.

God-hu Vörö Tugohade Sörö Iesuhu i'iro bövi bise'o avohade jöhoje.

⁷ Ëhi'amu iae Oso Rumö'e I Ue'aharue Sörö majaho rovadeje. Rõhu ë maja rovë'iroho Jew rajëro sheep harihoho bijuëmarueje God-hu Vörö Tugohade Söröho i'iro. ⁸ Sörö majaho rovamü Iesuro Peter'o John'o nugö'öjëvoromo uëvadeje: Va'oromo söröho avohorego no ue'aho'irarëjo. ⁹ Ue'aho'irarëjamu uavareje: Ja nagajoho no dinö'e va'oromo söröho avoho'ëjarëjo. ¹⁰ Avoho'ëjarëjamu Iesuro uëvadeje: Aveho hehëjo. Jerusalem amo börömore va'orëjo. Va'i ga'a'arujëjo aëro jovo'e ramaho simanëro baeromo ro birohëvo'iramu. Ro birohëvego hesi ijoro ijoro va'orëjo. Va'oromo ga'irarije hu di osare rumö va'ego

gagorovo jemë'o ë osaro va'orëjo. ¹¹ Osaro va'oromo osa arijo'oho uarëjo: Tisahuro jani uvade höjo: Osaho din'ö'e höjo naehu nasi ijorajoho jabu'o gemu mae sö'rö i'irodoho. Ëhi uarëjo. ¹² Ëhi ua'iramu osa arijo'ohuro jemë hu'iraejëvo ajiomoromo dö're osa bö'römo hö röjëhi'a'ajëjo. Röjëhi'iramu ga'a'arujëjo maratue bö'vie bise'e eni avohoromo bahijë'e jio'iramu. Ëhi jiamu gavë'iroho ë dir'ö'oro sö'röho avohorëjo. ¹³ Ëhi uëvamu rueho jaburo va'areje. Va'oromo gavare Iesuhu uëvadëhi ëhi jiamu gagorovo sö'röho avohareje.

Sino'o kö'o aevoromo ijare jöhoje.

¹⁴ Ëhi ë'l'ë'ero sö'rö majaho rovamu Iesuro hesi apostle ömo'ö'mohu'o gemuore hijadeje ie i'irovo. ¹⁵ Hiromo uëvadeje: Na nego avohajëjo God-hu Vö'rö Tugohade ë hesi Ioho jemë'o i'irovo ijönö vi'ehe baeromo guomevoröhego. ¹⁶ Ëhesi bë'hoho na uë'l'ë'ajëjo. Na ijoho ë ioho bogo i'ejöjo. Hujeji God-ro a nunire bö'röme namiromo aho'obëhe muebejëvo'iramu sö'rö bë'hoho va'orahoro jio'iramu evare i'ejöjo. ¹⁷ Ëhi uënuqoromo enatuore jovoho baeromo God mae uaromo hesi aribövioho uëvadeje: Aveho jemë ae gemu gemu ba ibe gö'ero göho bojämibe va'orëjo. ¹⁸ Aveho hejëjo. Na ijoho ö'i bajo jovoho bogo i'ejöjo. Hujeji God-ro rueromo a nunire bö'röme namiromo aho'obëhe muebejëvo'iramu evare i'ejöjo. ¹⁹ Ëhi'onugoromo ioho baeromo God mae uanugoromo ato'atovoromo hesi aribövioho suvuorëmiromo uëvadeje: Aveho nasi sine höjo. [Na nasi sinoho God-are örire bojämirovo'l'ë'ajëjo jemë mae jëvoröhego. Aviëhi jï'e muoho vaenövorëjo ëhuro na uehorovevo'irarije höjo. ²⁰ Ëhi ë'l'ë'ero ioho ue'ahonugoromo enatuore jovoho baeromo ëhi jï'e mue gemuoho vaeromo hesi aribövioho uëvadeje: Ave enatuore jovo hesi bë'hoho iae nasi köho jemëni rovevo'ajëjo ëhuro God-hu muebejëvonövoröhe jögoru i'oho marë'iröhego.]

²¹ Iae ëhi höjo. Röhu gahëjo. Aehu na bijönegarue a jabesi övore bojëmi'iröhe ahuro na'o ie ijajëjo. ²² God-hu bamadëhi hesi A Maho na iae ëhi guomevo'ajëjo röhu na bijönegarue a jabesi övore bojëmi'iröhe aho vaev'ö'oho sisër'ajëjo. ²³ Ëhi uëvamu hesi ariböviohuro uarovareje: Di aho noro ëhi jï'e mu sisëho vae'ëjarëjo.

Di aehu a ioro'oro iosirëmiromo bö'römo jiaje jöhoje.

²⁴ Ëhi'oromo Iesuare ijorajo ömo'ö'mohuro jö aho'ahamirovoromo uarovareje: Di aho a nuniroho a bö'römo javuajëjo. ²⁵ Ëhi uarovamu Iesuro uëvadeje: Sa'a ioro'oro rajohuro jabesi sa'a rajoho ruahö'öjëvoromo jabumëremu masije riravarue höjo. Riravoromo röhu jabesi jumuvorovoromo jabesi sa'a rajoho uëvarue höjo: Uönövorëjo: Sa'a aribövi ajamujarue a masije jëvajëjo. ²⁶ Röhu jemë'o nadi ëhioho döroho bamorovorëjo. A'i ae rahu a bö'römo bö'römo jï'e'oho ë aho jero ijorajönö'e jionövonëjo. O ae rahu simano vaejë'oho ë aho jero ae gö ajëmi'irane ae jionövonëjo. ²⁷ Röhu jemë diehi uehorovarujëjo. Di aho bö'röme jio'i di aho bise'e höjo. Na hiromo i ijaje aho bö'römo höjo o ajëmiromo jabesi i ujuoho mëmijajoho bö'römo höjo. Hiromo i ijaje aho iae bö'römo höjo. O ajëmijaje aho ma-bise'e höjo. Na mae-ëjo. Röhu Iesu na ajëmiromo i ujuoho mëmijaje aho va'ëne jëvajëjo.

²⁸ Na i'ue bö'vie bise'e bae'ego jemëro birivoromo na'o jijihobe ruenövarije höjo. ²⁹ Nasi Vavuohuro darugoho bojëmijade höjo naro bö'röme namiromo nasi aribövioho muebejëvo'irodego. Huhu ë'adëhi naro ëhi jemesi örire daruge bojëmijajëjo masije riravo'irarijëgo. ³⁰ Naro bö'röme namiromo nasi aribövioho muebejëvo'iramu jemëro na'o raromoromo ioho jovoho ue'aho'arujëjo. Ioho ue'ahoromo jemë ae aho'obëhe 12 na'o gemu mae arëto göro raromoromo Israel rajo nosi agane gö gö 12 jabesi muoho mevo ga'a'arujëjo ga'i mae o sisë jiego.

Peter-hu Iesu gavaje jö a subivëho'iröhe jö Iesuhu majahijadohoje.

³¹ Röhu Simon-ajo. Ave jöho hejëjo. Satan-ro God ua gavë'e höjo jemë bæjëvoromo jemesi dëre bijëho'irohëni. Èhuni aehu i hijiohijiovoromo garuomaje diho mae jiego diho sisë jiego gavaruëhi Satan-ro ëhi jemesi dëre bijëho gë'a'ajëjo gë'i rahuo darugo'oho jio'i rahuo darugo rumo'oho jiego. Amo Satan-ro ëhi ua gavamu God-ro jemë hesi

övore bojëmijë'e höjo. ³² Èhi jie röhu Simon naro jani parie vaejë'e jevajëjo jero bogo uehorovevoromo vuonugo'iranego. Röhu ijonö Satan-hu jasi dë bijioho garomo barëjamu jaehu huotorovoromo nasi örire avoho uehorovevë'iroho jasi aganoho ajëmege biririvo'irarëjo. ³³ Biririvo'irarëjamu Peter-ro uavadeje: Bada iae èhi höjo röhu na ja'o gemu mae juvoromo ja'o savoji gagore va'ë'oho o ja'o guomevë'oho iae na eni jevajëjo. ³⁴ Eni jevajëjamu Iesuro uavadeje: Peter röhu nasi jöho hejëjo. Jaruvo vah'i'oho kökörökocho bogo uvë'e jero majae niö'i gemu ae uë'a'anuëjo: Na Iesu bogo gavaje höjo.

Iesuare ariböviehu monie esöe muorovo'iröhe kaejë ujuoho'iröhego Iesuhu majëhijadohoje.

³⁵ Iae Iesuro hesi ijorajo ömo'ömoho uëvadeje: Urimoho naro rëmö'öromo uëvode höjo: Monioho esöho bövioho bise'oho nadi ujuoho va'orëjo. O höru sinoho nadi io'amoromo va'orëjo. Röhu na jemë bövi bise'o nimarijoho eni baejarije höjo o bogajo. Bogajamu uavareje: Iae no eni baejare höjo. ³⁶ Eni baejare höjamu Iesuro uhu'e uëvadeje: Urimoho aëro ajëmamumu èhi baejarije höjo röhu avevejö'oho bogo èhioho jio'a'ajëjo. Èhuni monie o esöe jëvë'oho ujuohoromo va'orëjo. O muorovo'irarije kaejë ège bogojëvë'oho jemë döre io'amaruje niögohoho imo'amoromo monie mana ujuohoromo kaejë ègohoho imo'amorëjo. ³⁷ Èhesi bëhohoho hejëjo. God-ro èhi bamade höjo hesi surire jö jajivarëhi èhi jioröhego. God-are surire jajivoromo èhi uvë'e höjo: Aëro uvoruomë'e höjo: Hu jö ahoruomaje ariböviohu'o gemuore höjo. Nasi jöho èhi uvë'e höjo. God-are surire jö jajivarëhi iae èhi jio'irögoro ë'ajëjo. ³⁸ Èhi jio'irögoro ë'ajëjamu ijorajoho jaburo uavareje: Bada gavëjo. Aviae kaejë ège niö'i javuajëjo. Kaejë niö'i javuajëjamu uëvadeje: Èhi jië'e jöho iae mino'ëjo.

Iesuhu Gethsemane sa'are hiromo God-are örire èninamijade jöhoje.

³⁹ Èhi'oromo Iesuro ë osaho vuonugo'i Olives Dahorure mami'e va'onövadire röhu maho ë va'adeje. Va'amu hesi ijorajoho jaburo hu rihimareje. ⁴⁰ Rihimoromo va'o suorovoromo Iesuro uëvadeje: Èninamihego God-ro ajëmege Satan-ro bogo dinëmege èhuro bogo bejëvo'irajo. ⁴¹ Èhi uënugoromo rori'o va'adeje. Munë bu'öjogo va'o bejaje èmino'e va'oromo ague aho hiromo parie vaeromo uavadeje: ⁴² Apajo. Ja nagë'oho i'ue huë vavaene nasi örire rovajoho ahego na bogo bae'iröjo. Röhu naehu nimajoho nadi ë'i jaehu nimanuëhi èhi ë'onëjo. ⁴³ [Èhi'amu gavë'i anerae gemuëro ö'idöre jioromo rueromo Iesu ajamumu biririvadeje. ⁴⁴ Biririvoromo röhu huë vavaene bogo bise'o vadu'oho baeromo parioho ma'eno titimoromo vaemu vaejadeje. Parie vaemu vaejamu nu ano'lere jöho köe direjohijë'ehu sa'are ahajëhi èhi aho'amadeje.]

⁴⁵ Parie vaenugoromo döro ri'öjadeje. Ri'öromo vuonorö'ö va'oromo gavadeje ijorajoho jabumë huë vavaene böröme baejë'ëro momorö'öjamu. ⁴⁶ Momorö'öjamu gëgorovo uëvadeje: Jemë rabëni momorö'öjarujëjo. Ri'öromo èninamihëjo. Satan-ro dinëmi'iramu bejëvo'ajëjo.

Iesu guduamare jöhoje.

⁴⁷ Èhi uëvamu gavë'i ae aho'obëhe Judas-ro öroho röjëhiromo sö ujuohoromo rovamu rueruomadeje. Iesuare ijoraje aho'obëhe 12 röhu Judas hu'o jabesi ae gemuoho jiadeje. Judas-ro rueromo Iesu dudöho'i bëhire rovadeje. ⁴⁸ Dudöho'i rovamu Iesuro uavadeje: Judas-ajo. Na God-are A Maho jevajëjo. Ja diehi'oromo ma-döëremuoho rajehiromo dudöhevanuëjo arue ariböviohuro guduamo baejevo va'ojöro. ⁴⁹ Èhi uavamu Iesuare aribövie hesi bëhire riravaroho jaburo gavare a ioro'iorohuro mu sisë vae'ia'amu gëgorovo uavareje: Bada na no kaejë ègobövioho jijöromo muo'amo'ëjarëjo o diehi'oejarëjo. ⁵⁰ Èhi uaromo Iesuare ae gemuëro priest börömo hesi mu vaejaje aho anoromo övo manörire hia'oho tariö'öjahadeje. ⁵¹ Tariö'öjahamu Iesuro uavadeje: Èhi jië'e muoho vuonugëjo. Vuonugë'i ë anade a hesi hia'i sionoho rëhamu marëjadeje.

⁵² Marëjamu priest masijohuro God-are osa börömo atovarue ariböviohuro a duvahohuro Iesu guduamo bava'i rovë'ëro riravareje. Riravamu gagorovo Iesuro uëvadeje: Aveho na bogo vajiohu'e anano'e aehu jevajëjo. Jemë rabëni siravaho kepataho ujuohoromo

rovarujëjo. ⁵³ Mami'e majae aho'o naehu God-are amo börömore jemë'o hinövodoho jemë evaroho bogo guduamevarije höjo. Röhu jaruvoho jemesi majae höjo. Ramoramoe mu muebejaje a hesi vöröho rovë'e höjo.

Peter-hu Iesu gavaje jö a subivëhadohoje.

⁵⁴ Èhi uëvamu Iesu guduamo barueromo priest börömo hesi osare rovaraje. Priest hesi osare rue'irögoro Peter-ro arue riribövire Iesu rihimoromo ijore rovadeje. ⁵⁵ Osare rueromo gavade aehu raromaruire vëne huë'ëro ravo'ego ae uono bëhire raromamu. Ae uono bëhire raromamu gagorovo jabu'o gemu mae hijadeje. ⁵⁶ Hijamu gagorovo mu ajëmijarue magonahe gemuëro gavade Peter uono bëhire hi'ego nu ano'oho vënëro ajivë'e jiamu. Ajivë'e jiamu gavë'i Peter ërimahë'i ë aribövioho uëvadeje: Ave iaho hu'o Iesu'o gemu mae juvonövade ae höjo. ⁵⁷ Juvonövade ae höjamu Peter-ro uavadeje: Sarerivanuëjo. Na ë iaho bogo mae bogo gavaje höjo. ⁵⁸ Bogo gavaje höjamu majae mabunemu jioromo barëjamu ae göëro Peter garomo uavadeje: Ja'o Iesuare ae javajëjamu Peter-ro uavadeje: Sarerivanuëjo. Na bogojevajëjo. ⁵⁹ Bogojevajëjamu hour gemu rabu'e barëjamu ae göëro birivoromo ë aribövioho uëvadeje: Iae mae-ëjo. Iae na gavajëjo ave aho Iesu'o juvonövade ae höjo. Hu'o Galilee sa'a raje höjo. ⁶⁰ Èhi uëvamu Peter-ro uavadeje: Sarerivanuëjo. Ja jövanue jöho na dadivevo avohajëjo. Dadivevo avohajëjamu kökörökoho uvadeje. ⁶¹ Kökörökoho uvamu Badaro huotorovoromo Peter gavadeje. Gavamu gavë'i Peter-ro uehorovoromo uvadeje: O Badaro mami'e uevade höjo: Jaruvo bahire kökörökoho bogo urimoho uvë'e jero urimo vae niö'i gemu ae uë'a'anuëjo: Na Iesu bogo gavaje höjo. ⁶² Èhi uevade hö uvoromo Peter-ro amonö hörö va'oromo sisë maro nivadeje.

Aehu Iesu sivare jöhoje.

⁶³ Èhi'amu iae Iesu mueberuomaje ariböviohuro Iesu sivoromo sino haho'ere ano'anovareje. ⁶⁴ Ano'anovoromo nu ano'e niögëro tugohahoromo uavareje: Na jö God-aro baeromo majëhijaje ae jevajë uövuanue javaje ëhuni anagade a hesi ihoho huruoho majahuijago no hejarëjo. ⁶⁵ Èhi jië'e jö sisë gö gö aho'obëhe atoromo Iesu sivareje.

Iesu Jew rajo a masijo jabesi nunire namijade jöhoje.

⁶⁶ Èhi ë'l'ëro sisonuvamu Jew rajo a duvaho ömo'ömhuro priest masijohuro Jew rajo jögoru öri röjëhijarue ariböviohuro gagovorovoromo ae uëvareje: Iesu hu'irae barovego no court vaejarëjo. ⁶⁷ Barovamu rue a masijohuro Iesu uavareje: Na ja God-hu uavë'ëro böröme namiromo ajamui'irane aho javajëjo. Ja ë aho javë'oho uövuego no hejarëjo. Hejarëjamu Iesuro uëvadeje: Na uëvë'oho röhu jemë bogo ma uehorovo'arujëjo. ⁶⁸ O na jö uë gëvë'oho jemë bogo mana ue'a'arujëjo. ⁶⁹ Röhu majae dunovo'iramu evare God-are A Maho naro börömëro jevë'ëro ajiomoromo God darugo eni jijë'e A hesi övo manö ëhi hiemu hi'ejëjo. ⁷⁰ Hi'ejëjamu rue a masijohuro uavareje: Èhi jië'oho na ja God-are Harihe javajëjo. Uëvadeje: Iae mae-ëjo. Jemëro jemesi uevarujëjo: Ja ëhi javajëjo. ⁷¹ Èhi javajëjamu rue a masijohuro uavareje: Iesuro hesi jö'ëro hesi jö sisëho majahuijumu iae mami'e hejë'e javuajëjo. Èhuni rabëni ae gö uë'ejarejo: Gavarije o hejarije jöho majahuijago no hejarëjo. Court-oho iae barëjajëjo.

23

Iesu Pilate-are nunire namijade jöhoje.

¹ Èhi uarovonugoromo ë a masijo ömo'ömhuro ri'öromu Iesu hu'iraeromo Pilate-are nunire va'areje. ² Va'oromo Pilate-are nunire riravoromo Iesuare jö sisëho aevoromo huruoho majahijareje. Majahiromo uavareje: Iae no hejare höjo ë iaho sareri'e jöe majëhijavamu. Èhi majëhijë'ëro ëhu'ëro nosi sa'a rajohuro sa'are a masijo jemesi jöho bogo eruomo hesi höjo. No hejare höjo Iesuro uvavamu: Rome a börömoho tax-oho nadi ijoho bojamirëjo ë hesi bëhoho sa'are a börömoho na jevë'e jiaje. God-hu uevë'ëro böröme

namiromo ajëmi'irode aho Keriso na jevajëjo. ³Keriso jevajëjamu Pilate-ro Iesu uavadeje: Na ja Jew rajo jabesi a börömoho javajëjo. Börömoho javajëjamu Iesuro uavadeje: Èjòho jero jasi jòvanuëjo. ⁴Jòvanuëjamu Pilate-ro priest masijohu'o a ioro'iorohu'o uëvadeje: Ave aehu i'u baeròhe hesi sisèho bogo birohè'e jevajëjo. ⁵Èhi uëvamu hegorovo ae aho'obèhe biririvoromo uavareje: Èiahuro Galilee sa'are aevoromo jò sisè ae ròjëhiromo muorovojòro simane huotovèhobe Judea sa'aho aho'o juvoromo avehu'o rovè'e hòjo.

Iesu Herod-are nunire namijade jòhoje.

⁶Èhi uaruomamu hegorovo Pilate-ro uëvadeje: Na è iaho Galilee sa'a raje hòjo. ⁷Galilee sa'a raje hòjamu rue ariböviohuro uavareje: Io'ajo. Io'ajamu hegorovo Pilate-ro uehorovoromo uvadeje: Herod hu Galilee sa'a muebejaje ae hòjo. Ròhu hu aviae Jerusalem rovè'e hòjo. Rovè'e hò uvoromo Iesu nugö'òjamu aëro bava'areje Herod-ro court vaeròhego. ⁸Iesu bava'amu Herod-ro garomo uehorovoromo uvadeje: Na mami'e Iesuhu mu vae'amade jòho hejë'ëro ga'i nimobe rovè'e jevajëjo. Nani huro darugo'e muoho vaejeho'iramu na ga'ejò uvoromo Iesu garomo nimoroho avohadeje. ⁹Nimorohoromo jòe aho'obèhe Iesu ua gavadeje. Ua gavamu jòho bogo mana uavadeje. ¹⁰Bogo mana uavamu priest masijohu'o Jew rajo jògoru öri ròjëhijarie ariböviohu'o èho jaburo Herod-are nunire riravoromo Iesuare jò sisèho darugo'o huruoho majahijareje. ¹¹Majahijamu Herod-ro heromo hu'o hesi muorovo ariböviohu'o Iesu nue huodivoromo sisè vaeromo sivareje. Sivoromo Iesu niögu ègo mabèhëro ba'amahoromo nugö'òjamu sionëro Pilate-aro bava'areje. ¹²Bava'amu evare majae gemuore Herod'o Pilate'o urimo nu huodivorovaroho vuonugö'i huè baerovoromo ma-mae arijareje.

Iesu anego guomajòro Pilate-hu uëvade jòhoje.

¹³Iesu barueruomamu gëgorovo Jew rajo priest masijoho è sa'are a masijoho a ioro'ioroho èho jabumëni Pilate-ro uvadeje gagovoromo ramojòro. ¹⁴Gagovamu gëgorovo Pilate-ro uëvadeje: Èiaho jemëro barueromo uevarije hòjo: Huro sareri'e jòho majèhijë'ëro ae aho'obèhe sa'are masijo nosi jòho bogo e hesi jëvajëjo. Jemëro èhi uevamu hejode hòjo. Ròhu naro jemesi nunire namiromo Iesuare jòho morijovoromo gavode hòjo Iesuare jò sisèho uevarijoho bogojiamu. ¹⁵O Iesu mae jiajoho Herod-ro hu'o gavade hòjo. Èhi gagorovo sionëro nosi örire nugö'òjade hòjo. Èhuni aveho hehëjo. Hu mu sisè vaejë'ëro mana anego guomoròhe bèhoho bogohòjo. ¹⁶Èhuni naro ae uë'iramu hisuebiromo jiovo nugö'ò'iramu va'ajëjo. ¹⁷[Ròhu God-hu Vörö Tughade Sörö maja rovè'iroho savoji gagore rarumarue aho gemu Pilate-ro Jew rajo ariböviohuni jiovo nugö'òjëhonövadeje hu bojamare muoho èhi jië'ëro.] ¹⁸Muoho èhi jiamu ae aho'obèhe ma-gemu mae uvoruomadeje: Èiaho anëjo. Barabbas jiovaluëjo. ¹⁹Ròhu Barabbas savoji gagore hijade hesi bèhoho urimè'i a masijohu'o amo börömoro muorovare majaho jiamu hu'o muorovoromo ae anamu police ariböviohuro hu guduamo bava'oromo savoji gagore ba'amareje. ²⁰Ròhu Pilate-ro Iesu jiovo nugö'ò'i nimamu jòe gö'o majèhijadeje. ²¹Majèhijamu hejë'i ae aho'obèhe uvo'i arijareje: Korosioro anego guomajo. Korosioro anego guomajo. ²²Guomajamu Pilate-ro urimo vae niö'i ròhu maho uëvadeje: Rabëniajo. Diehi jië'e mu sisè vaejë'e hòjo. Na gavajoho mu sisè è'è'ëro mana anego guomoròhe bèhoho bogohòjo. Èhuni hisuebiromo jiovo nugö'ò'ejòjo. ²³Jiovo nugö'ò'ejòjamu ae aho'obèhe biririvoromo dinamiromo ma-darugo'o uvo'i arijareje: Korosioro anego guomajo. Èhi uvamu jabesinö marëjadeje. ²⁴Marëjamu jabuhu uvarèhi Pilate-ro jòho èhi majèhijadeje. ²⁵Urimo Barabbas-ro a sisè ioro'iorohu'o gemuoro bu'òromo sa'are a masijohu'o muorovoromo ae muo'amadeje. Èhi è'è'ëro savojire raromadeje. Èhi jië'e a sisè jiadeje ròhu Pilate-ro hejade Jew rajohuro Barabbas nimoromo uvo'i arijavamu hegorovo hesi mu aribövioho uëvadeje: Barabbas jiovo nugö'ò'i jaburo nimè'e jiarue Iesu anohëjo.

Iesu korosire ano taemare jòhoje.

²⁶Anohëjamu aëro Iesu court-re jioromo ano'i bava'areje. Bava'oromo örire va'i gavareje Cyrene amo raje ae gemu hesi ihe Simon muro jië'ëro Jerusalem rovamu. Rovamu

gagorovo öväro ma'enoromo korosioho hesi dejore bamoromo uavareje: Baeromo Iesuare ijoro va'ëjo. Va'ëjamu Simon-ro Iesuare korosioho bava'adeje.

²⁷ Bava'amu iae ae aho'obêhe Iesu rihimomareje. Rihimoromo magonaho ioro'ioro-huro muo'amorov'eli nierusuburu'e bamobe rovareje. ²⁸ Nierusuburu'e bamobe rovamu gagorovo Iesuro hunuorovoromo uévadeje: Jerusalem magonaho ömo'ömohumë nadi naniho vavaenimoromo nierusuburu'e bamo'i jemë'o jemesi aboji harihu'ohu'o uehorovoromo nivo'amirovorëjo. ²⁹ Huë vavaene bogo bise'o vadu'oho rue'iramu aëro uvoruomo'ajëjo: Dë tjojë'e magonahoho aboji harihu rumo'e raromarue magonahoho huë mae jëvajëjo. ³⁰ Èhi uvoromo juhuonivoromo uvoruomo'ajëjo: Dahoru masijoho ininoho jemëro ahoromo taemavuorëjo. Èhi uvoruomo'ajëjo. ³¹ Na ijo ma va'ëne jevajëjo röhu ije uejevanovaruëjo. A'i jemë ijo sahonö'e huo'öjëvoromo baradore siö'öjëvo'amo'aruëjo.

³² Iae mu sisë vaejare ae niö'ioho guduamo ömëvo va'areje Iesu'o gemu mae vuövëvoröhego. ³³ Va'aroho ajimoromo sa'a ihe Simano Gijo suorovareje. Suorovoromo Iesu baeromo korosire ano taemareje. Iesu ano taemo'i ë a sisëho niö'li jabu'o ano taemëvareje. Ano taemoromo ujuoho nigemo'amoromo Iesu ririre amo'i a sisë göho ruëhi Iesuare övo manö amo'i göho viëhi övo adonö amareje. ³⁴ Amamu Iesuro uavadeje: Apajo. Aehu nasi örire mu sisë vaejevaruoho uehorovoromo vuonugëjo. Jabumë ë mu hesi bëhoho dadibijiohajëjo.

Dadibijiohajëjamu rue muorovo ariböviohuro Iesuare niögöho adovoromo ajajovoromo ae gemu niöge gemu ëhi baebe rovareje. ³⁵ O ae aho'obêhe riravoromo ërimahareje. Èrimahamu a masijohuro sivoromo uarovareje: Èahuro uövuade höjo: Naro a ioro'ioroho ajëmego marëjëvaje höjo. Èhuni nadi'ego hu hesi arijo'arije ajamirovego hu mae jiajo. Huro uövuade höjo: God-hu uevë'ëro böröme namiromo ajëmi'irode aho na jevajëjo. God-hu nimoromo baejevade aho na jevajëjo. Èhuni nadi'ego hu hesi arijo'arije ajamirovajo. ³⁶ A masijohuro ëhi sivamu muorovo ariböviohuro jabu'o Iesu sivareje. Sivoromo rueromo nioga'i'e wine jovoho bojami'ie'areje. ³⁷ Bojami'ie'oromo uavareje: Jew rajo jabesi a börömo javë'oho èhuro jasi ajamirovego mae javajo. Sivoromo ëhi uavareje. ³⁸ Röhu Iesuare simano namore ijo viture jajivoromo uvë'e jiadeje: Ave aho Jew rajo jabesi a börömoho höjo.

³⁹ Iae korosire iromë'e a sisë göhuro Iesu sivoromo uavadeje: God-hu uavë'ëro böröme namiromo ajamui'irane aho ja javajëjo. Na mae-ëjo. Èhi jii'oho jasi arijo'arije ajamirovoromo no'o ajamuego mae javuajo. ⁴⁰ Èhi uavamu a sisë göhuro uavadeje: Nadi ëhi jii'e jöho jöjëjo. Ja'o i'ue gemuoho baejanuëjo. Èhi jii'oho ja diehi'oromo God bogo juhuonamijanuëjo. ⁴¹ No niö'iro mu sisë vaejë'ëro èhu'ëro iae mae no i'ue baeromo ë'aruëjo. A'i ë iaho mu sisëho bogo vaejë'e höjo. ⁴² Bogo vaejë'e hö'i Iesu uavadeje: Iesuajo. A muebejavu'irane darugo barueromo böröme namijë'iroho nasi öroro uehorovevonëjo. ⁴³ Uehorovevonëjamu Iesuro uavadeje: Aveho na jö mae uavajëjo. Jaruvoho ja'o na'o gemu mae Paradise-re ari'ëjarëjo.

Iesu guomade jöhoje.

⁴⁴ Iae majae ririre jiadeje. Majae ririre jiamu öri ari'e aho'o ramoramovadeje. Ramoramovobe va'ojuvo majae huotorovamu gavë'i ajivadeje. ⁴⁵ Ajivamu gavë'i God-are osa börömo ojo göho gagonö jiajoho niögöhu tugoharoho arorovadeje. ⁴⁶ Arorovamu gavë'i Iesuro God ma-darugo'o uavadeje: Apajo. Naro nasi aru'ahoho jasi övo döre nugajëjo. Nugajëromo evare nugo'amadeje. ⁴⁷ Nugo'amamu muorovo a börömëro gavade ëhi jii'e mue gö gö ë'amu gagorovo uvadeje: Iae mae-ëjo. Èaho iae a mae jiade höjo. Èhi uvamu èhuro God-are ihoho mae jiadeje. ⁴⁸ Ae aho'obêhe urimo ë mu börömo ga'i gagovarohuro gavare ëhi jii'e mue gö gö ë'amu gagorovo vuonorö'öromo vavaenimoromo vinebe anobe va'areje. ⁴⁹ Va'amu Iesuare ariböviohu'o Galilee sa'are jioromo Iesuare ijore ijore rovare magonaho ömo'ömohu'o èho jaburo rori'o riravoromo gavareje ëhi jii'e mue gö gö ë'amu.

Iesuare sino munë gagore bamare jöhoje.

⁵⁰ Ĕhi'amu ae gemu hesi ihe Joseph-ro iae hijadeje. Hu Arimathea amo raje jiadeje. Hu Jew rajo jabesi a duvahero ji'ero a masijo ioro'iorohu'o hiromo joe mevonovadeje. Hu a mabehe God-are johu avoho ejahaje ae jiadeje. ⁵¹ A maero ji'ero eh'ero a masijo ioro'iorohu'o hiromo hejade uvoruomamu: Ĕ'ego no Iesu ano'irarē uvoruomamu hegoroovo bogo ejehadeje. Bogo ejehoromo gavade jaburo Iesu anamu gēgorovo uvadeje: Ĕhi ji'oho sisē hōjo. Rōhu huro muebejē'e hijadeje God-ro bōrōme namiromo aho'obēhe muebejēvorōhego. Joseph ēhi ji'e ae jiadeje. ⁵² Ĕhi ji'e aēro ji'ero huro va'oromo Pilate uavadeje: Uevego na Iesuare sinoho bae'irōjo. ⁵³ Sinoho bae'irōjamu Pilate-ro ejahamu va'oromo sinoho baruvebiromo niōgu maero nomoromo munē ubuvarire ē bamadeje. Ĕmunē gagoho ae gō bogo bamē'e Iesu ē bamadeje. ⁵⁴ Ĕmajaho Friday ji'ero Jew rajehu nuharue majaho rue'iē'adeje.

⁵⁵ Joseph-hu Iesuare sino bava'oromo bamadevare evare Galilee sa'are jioromo Iesu'o gemuere rovare magonaho ōmo'ōmohuro Joseph-are ijore ruero mo ubuvarie munēho garomo gavareje Iesuare sinoho ē avoho bamamu. ⁵⁶ Iesuare sinoho ē avoho bamamu gagorovo vuonorō'ō va'oromo ridi'e ose gō gō avoho'amareje Iesuare sinore bahi'irōhēro. Avohoromo nuho majaho rovamu Jew rajo jōgoroho eromo ma-nuhareje.

24

Iesu ri'ōjade jōhoje.

¹ Nuhē'ero hura bōrōmore sue'o sue'o ē magonaho ōmo'ōmohuro ri'ōromo ridi'e oso avoharoho ujuohoromo Iesu bamarire ē vuonorō'ō va'areje. ² Iesu bamarire va'i gavareje munē gago tugohare munē bōrōmoho rori'o hōhō bava'ē'e jiamu. ³ Hōhō bava'ē'e jiamu gagorovo munē gagore rumo va'areje rōhu Bada Iesuare sinoho bogo birohareje. ⁴ Bogo birohogoro ē riravoromo uehore gō gō baejareje. Uehore gō gō baejamu gavē'i ae niō'iro ma-majioho rovareje jabesi niōgoho majaehu bamanovē'e ēhi ajivē'e niōgoho io'amē'ero. Rueromo ē magonaho jabesi bēhire rirarovareje. ⁵ Bēhire ro rirarovamu gēgorovo rue magonahoho jaburo juhuonēmiromo uruho'amo riravareje. Uruho'amo riravamu gavē'i rue ae niō'iohuro uēvareje: Jemē rabēni i'ovē'e aho guomē'e a sino bamaruiroho naharujējo. ⁶ Iesu aveho bogohōjo. Hu mami'e ri'ōjē'e hōjo. Ri'ōrōhe jō Galilee sa'are hiromo majēhijadoho uehorovohējo. ⁷ Huro jemē uēvade hōjo: Aēro God-are A Maho na baejevoromo a sisē jabesi ōvore bojēm'iramu baejevoromo korosire ano taemevoruomo'ajējo. Ano taemevo'iramu guomoromo majae niō'i gemu hesi uhure ri'ō'ejōjo. Nasi muoho God-ro ēhi bojēmē'e hōjo. Iesuro ēhi uēvamu hejarije hōjo. ⁸ Hejarije hōjamu rue magonahoho jaburo ē johu uehorovareje. ⁹ Uehorovoromo Iesu bamarire jioromo vuonorō'ō va'areje. Va'oromo rabe rabe gavare hejare johu majēhijamu Iesuare ijoraje 11-ho jabu'o Iesuare aribōvi ioro'iorohu'o ē johu heruomadeje. ¹⁰ Rōhu ē jō majēhijare magonaho jabesi ihoho Mary Magdalene o Joanna o James-are vēme Mary ēhi jēvadeje. Ĕmagonahohu'o magonaho ioro'iore jabu'o gemu mae jijiharohu'o ēho jaburo ē johu apostle aribōvioho majēhijareje. ¹¹ Majēhijamu hegoroovo rue apostle aribōviohuro uvareje: Ĕmagonahoho jaburo ē johu ēma ataruēromo bogo ma uehorovareje. ¹² Bogo ma uehorovoromo rōhu Peter-ro ri'ōromo sino bamarire tutuvoromo ē va'adeje. Va'oromo munē gagoho hohitohoromo gavadeje Iesu numare niōgohemu jio'amamu. Niōgohemu jiamu gagorovo uehorovoromo uvadeje: Aveho diehi'ade hō uvoromo hesirero vuonorō'ō va'adeje.

Emmaus amore va'i ōrire diehi ē'are jōhoje.

¹³ Va'ē'ero jeniromamu Iesuare ae niō'iro Emmaus amore va'irōgoro ōrire va'areje Jerusalem jioromo Emmaus va'irōhe ōri hesi vahuho 11 kilometre ji'ero. ¹⁴ Ōrire va'oromo mu rabe rabe jiade johu jōrovobe va'areje. ¹⁵ Johu jōrovoromo berohobe va'amu Iesuro birohēvoromo jabu'o gemu mae va'adeje. ¹⁶ Va'amu ē ae niō'i jabesi uehoroho tugohēhamu bogo avoho garomo uvareje: Ĕho Iesu hōjo. ¹⁷ Bogo avoho gavamu Iesuro

uëvadeje: Jemë diehi jië'e jôho jörovobe jireharujëjo. Jireharujëjamu rueho jaburo jireharoho vuonugo'i nu ano'e sisë'irëvoromo rirarovareje.

¹⁸ Rirarovoromo ae gemu hesi ihe Cleopas-ro uavadeje: Ae aho'obëhe Jerusalem raromaruohuro avevejö'e rabehu ë'adoho iae garuomo'i ja gemu diehi'avo'ego bogo gavanuëjo. ¹⁹ Bogo gavanuëjamu Iesuro uëvadeje: Diehi jië'e muohajo. Uavareje: Nazareth raje Iesuare örire vaejare jôho uavaruëjo. Iesu hu jö God-aro baeromo no majahuijaje ae jiade höjo. Ëhi jië'e aëro jië'ëro God-are nunire o ae aho'obëhe nosi nunire namiromo biriri'e muoho vaenövo biriri'e jôho jövonövade höjo. ²⁰ Iesu hu ëhi jië'e ae jiade höjo. Röhu nosi priest masijohu'o nosi a masijo ioro'iorohu'o ëho jaburo Rome aribövi jabesi övore bojëmijare höjo ëhuro ëho jaburo court vaeromo Iesu ano'iröhe jôho uëröhego. Rome aribövi jabesi övore bojëmamu ëhuro Iesu kosirire ano taemare höjo. ²¹ Röhu noro uehorovoromo uvare höjo: Ëaho nani God-ro nugö'öjade höjo rueromo no ajamuromo Israel rajo nosi i'u'e muoho ahavuo'i hesi sasohë'e muoho röjahuiröhego. No ëhi uehorovare höjo. Röhu jöe gö'o ë mu sisë vaeruomadoho majae niö'i barëjamu röhu aveho majae göho rovë'e höjo. ²² Iae ëhi höjo röhu no'o gemu mae Iesuare ijore ijore jijiharue magonahohuro ave jö börömo majahuijamu hegoro no tiöjavuade höjo. Jaburo jaruvo sue'o ri'öromo Iesu bamarire va'are höjo. ²³ Va'oromo gavare höjo Iesuare sinoho bogojiamu. Bogojiamu gagorovo vuonorö'ö rueromo uövuare höjo: No va'oromo nia'ovo'iraejanovoromo garomo hejare höjo aneraho jaburo uövuamu: Iesu bogo guomo'i i'ovë'e höjo. Magonahoho jaburo ëhi uövuamu hejare höjo. ²⁴ Jôho henugoromo nosi ae göëro göëro Iesu bamarire va'oromo gavare höjo magonahehu uövuadëhi ëhi jiamu. Röhu Iesu bogo gavare höjo.

²⁵ Iesu bogo gavare höjamu Iesuro ri'öromo ë ae niö'ioho uëvadeje: Asë'e jemë simane i'uhëgo'ego God-are jôho bogo ma-burëroho baejarujëjo. Ëhu'ëro jië'ëro jö God-aro baeromo majëhinövere a jabesi jôho bogo maho uehorovarujëjo. ²⁶ Jemë diehi'oromo ave jôho bogo uehorovarujëjo. God-ro bamade höjo böröme namiromo ajëmi'iröhe aho vi'ehi böröme baeromo guomöjoro röhu ijönö aji'ere ajio hiröhego. ²⁷ Ëhi uëngoromo Iesuro hesi jöe God-are surire jajivo'amadoho huruoho majëhi barëjadeje. Moses-hu jajivade jôho aeo'i majëhiromo jö God-aro baeromo majëhinövere a ioro'iohere jajivo'amade jôhu'o huruoho majëhijadeje. Majëhijamu rue ae niö'iohuro hebe va'areje.

²⁸ Hebe va'aroho va'i nimare amore hörö'ie'areje. Hörö'irögoro Iesu öre ëgo'o va'o hesi jiamu gagorovo ²⁹ rueho jaburo nijio'iraeromo uavareje: Nadi va'i no'o hijëjo. Majae mami'e barëjë'ëro vahiomavuo'ie'ajëjo. Vahiomavuo'ie'ajëjamu ejëhoromo jabu'o va'oromo osare hijadeje. ³⁰ Hiromo jabu'o ie i'irögoro sa'aro hiromo ie baeromo God mae uaromo ato'atovoromo i'imëmamu rueho jaburo baejareje. ³¹ Baeromo God-ro jabesi simanoho jiovëhamu evare Iesu avoho garomo uvareje: Ojo'e ë aho Iesu höjo. Iesu höromo ga'i gavareje Iesu ëma bogojio va'amau. ³² Va'amau gagorovo uarovareje: Ja'o uehorovëjo. Ëahuro no'o jöe jövoromo God-are suri bëhoho huruoho majahuibe örire rovamu heromo nosi dë vövöbajo'oho sasohavuoromo ri'öjavuo avohade höjo.

³³ Ëhi uarovoromo ma-burëro sionëro vuono bu'öromo Jerusalem amore va'areje. Jerusalem va'oromo gavare Iesuare ijoraje 11-hu'o jabesi a ioro'iorohu'o gagovoromo raromë'e jiamu. ³⁴ Raromë'ëro jaburo ë ae niö'ioho uëvareje: Bada iae ri'öjë'e höjo. Ri'öromo Simon-are örire rovamu huro gavade höjo. ³⁵ Gavade höjamu rue ae niö'iohuro uëvareje: Noro niö'iro örire jirehoromo ëhi ëhi gavare höjo. Ëhi uëromo uëvareje: Iesuro ie ato'atovoromo i'imiamu evare no avoho garomo uvare höjo: Iae Bada höjo.

Iesuhu hesi ijorajo jabesi nunire rovade jöhoje.

³⁶ Bada höjamu gavë'i Iesuro ro ma-majioho jabu'o gemu mae namijadeje. Namiromo uëvadeje: Aganomë vaevë'e raromarujëjo. ³⁷ Vaevë'e raromarujëjamu juhuonivoromo jiodudu'iraeromo uvareje: No aru'ahe gavaruëjo. ³⁸ Aru'ahe gavaruëjamu uëvadeje: Jemë rabëni juhuonivarujëjo. Rabëni uehore gö gö baejarujëjo. ³⁹ Ave nasi övoho höroho geromo uvorëjo: Nörö höjo. Ma'enegro heromo uvorëjo: Nörö bogo aru'ahemuoho jio'i

a mae hōjo. Aru'ahoho sine ijo'ahē bogohōjo. Rōhu jemē iae gevarujējo na sino'e ijo'aho'e jevo'ego. ⁴⁰ Ēhi uēnugoromo övohu'o hōrohu'o rōjēhijamu gavareje. ⁴¹ Garomo uehorovemu uehorovo'i arijareje. Uehorovoromo uvareje: Aveho mu ma-mabēhe jī'e nani noro sisē'i gavaruēromo bogo ma uehorovareje. Bogo ma uehorovamu gavē'i Iesuro uēvadeje: Na jemē ioho jēvajējo o bogojēvajējo. ⁴² Ēhi uēvamu visue vēnire buejē'oho babojamareje. ⁴³ Babojamamu Iesuro baeromo ae aho'obēhe jabesi nunire ijadeje.

⁴⁴ Iromo uēvadeje: Urimo naehu jemē'o hiromo majēhijamu hejarije jōho iae avevejō'e rōhu maho majēhi'irōgoro ē'ajējo. Na uēvode hōjo: Nasi jōho aho'obēhe Moses-hu jajivadoho jō God-aro baeromo majēhinōvare a ioro'iorehu jajivaroho Psalms jō jajivaroho nasi jōe aho'obēhe God-are surire jajivarēhi iae ēhi jio'a'ajējo. Öre gö bogohōjo. Ēhi uēvamu hejarije hōjo. ⁴⁵ Hejarije hō uēromo jabesi simanoho huotovēhamu God-are surire jō bēhoho avoho gavareje. ⁴⁶ Avoho gavamu huro uēvadeje: God-are surire jajivoromo ēhi uvē'e hōjo: God-ro bamē'ero bōrōme namiromo ajēmijaje aho nōrō vi'ehi bōrōme baeromo guomoromo majae niō'i gemu hesi uhure ri'ō'a'ajējo. ⁴⁷ Ri'ō'iramu aēro nōruare ihore jōe majēhiromo ae uē'a'aruējo: Ae aho'obēhe ōri sisēre jijiharujoho vuonugohējo. Mu sisēho vuonugo'i avoho uehorovoromo mu mae vaehego God-ro jemesi sisēho uehorovoromo vuonugajo. Ēhi jī'e jōho Jerusalem amore aevoromo majēhiromo maja rojomajire beva'ajire sa'are sa'are majēhibe jijihu'aruējo. God-are surire jōho ēhi uvē'e hōjo. ⁴⁸ Rōhu ēhi jī'e muoho jemē gavē'e jēvaje ēhuni ē jōho majēhibe jijihorējo. ⁴⁹ Rōhu aveho hehējo. Urimo nasi Vavuehu hesi Aru'aho suvuorēmi'i mae uēvadēhi naro ē Aru'aho suvuoroho jemēni nugō'ō'iramu bae'a'arujējo. Ēhuni ē hesi urimo jemēro va'oromo Jerusalem amohuremu raromorego hujeji God-are darugohuro ruvebiromo ruahō'ōjēvo'irōhe hōjo. God-are darugohuro ruvebiromo ruahō'ōjēvo'iramu evare va'oromo nasi muoho vae'a'arujējo.

Iesu ō'idōre ajiomade jōhoje.

⁵⁰ Ēhi uēnugoromo sō ujuohoromo Bethany amonō va'adeje. Va'oromo övoho nigemēvoromo uēvadeje: God-ro jemē huē mae bojēmi'ajējo. ⁵¹ God-ro jemē huē mae bojēmi'ajē uēromo God-ro uavamu jabumē ē rēmo'i huro ō'idōre ajiomadeje. ⁵² Ajiomamu gagorovo rue Iesuarē aribōviohuro hu rajahiromo bōrōme bēhe nimorohobe Jerusalem vuonorō'ō va'areje. ⁵³ Va'oromo raromoromo God-are osa bōrōmore va'oromo majae aho'ō God rajahinōvareje. Ahia mino'e.

JOHN

God-are Jö Jövaje Aehu God-arire jioromo sa'are rueromo mu ma barovade jöhoje.

¹Ni'i'ivade majarohe ae gemu hesi ihoho God-are Jö jumuvë'o'oho iae hijë'e jiadeje. Hu God'o gemu mae hi'i hu'o God jiadeje. ²Ni'i'ivadire ë aho God'o gemu mae hijë'e jiadeje. ³God-ro uavamu huro sa'ae bövie bise'e bamadeje. Bogo bamo'ibejo bövioho bise'o'oho bogo mae bogojio'ibejo. ⁴Darugoho aho'o hesirire gemu jioromo rovadeje. Rueromo ae aho'o ajoho bojamuadeje. ⁵Ëajohuro ramoramore ajivajeje. Ramoramoho ajoho bogo tugohë'eje.

⁶Ae gemu God-ro nugö'öjamu rovadeje. Hesi ihoho John jiadeje. ⁷Hu rovadeje aji hesi bëhi gavadoho huruoho majahui'iröhëro. Majahuijego ae aho'obëhe hesi jöho heromo mae uehorovo'iröhego. ⁸Hu bogo ajoho jiadeje. A'i huro aji hesi bëhoho majahui'i rovadeje. ⁹Ëajoho iae aji maho jiohijo. Evare majare ë aje ae aho'obëhe ajivavujohuro sa'are ruehijo.

¹⁰Amo God-are Jö jumuvade ahuro ave sa'are hijadeje. Urimë'i God-ro uavamu ave sa'aroho avoho'amadeje röhu ave sa'are ariböviohuro hu bogo avoho garuomadeje. ¹¹Hu hesiro rovadeje röhu hesi aribövi mahuro hu bijönimoruomadeje. ¹²Röhu hesi a ioro'ioro-huro hu nimoromo mae uehorovoruomadeje. Mae uehorovoruomamu ëhuni uëvadeje: Avevejö'e jemë God-are aboji harihu'e raejëvájëjo. ¹³God-are aboji harihu'e raejëvade hesi öroho bogo aehu nimoromo baejëvamu i'oroho rahëvo'i a'i God-ro baejëvë'ëro ëhuro hesi aboji harihu'e jëvadeje.

¹⁴Röhu God-are Jö jumuvë'e ahuro sino haho'e baeromo ro God-are jöho mae röjahui avohoromo huë baejavuo avohoromo no'o gemu mae hibe juvadeje. Hi juvamu no hesi ajoho gavareje ë ajoho hesi Vavu hesi Harihe hu gemu'ëro jië'ëro baejë'ëro.

¹⁵Ëhi'amu gagorovo John-ro ë a hesi jöho ae huruoho majëhijadeje. Majëhiromo ma-darugo'o uvadeje: Naehu uëvode aho aviaie höjo. Na mami'e uëvode höjo: Naro urimo rovë'e jevájëjo. Ae gemuëro nasi ijonö rue'ie'ajëjo. Ëhi höjo röhu ë ahuro na iosiremiromo hu börömoho höjo na bogo rahevadevare hu jiohe rovë'ëro jië'ëro. Ëhi uëvadeje.

¹⁶Iae hu huë baejavuo avohë'ëro ëhu'ëro huë mae no ae aho'obëhe bojamuromo döre döre bojamuibe rovë'eje. ¹⁷Mu vae'iröhe jögoroho God-ro uavamu Moses-ro bojamuadeje. A'i God-ro uavamu Iesu Kerisoro huë baejavuoromo God-are bëhoho maemu röjahui-jevájëjo. ¹⁸Aho God bogo mae bogo gavë'e javue. God Harihoho gemu Vavu hesi bëhi mare hijaje aëro jië'ëro huro God röjahuijë'eje.

John bapataeto vaejaje aehu a jö majëhijadohoje.

¹⁹Röhu Jerusalem raromarue Jew rajo a masijohuro priest ömo'ömohu'o priest ajëmi-jarue a ömo'ömohu'o uëvareje: Va'irarijoho John uarëjo: Ja rahuo javajëre. Ëhi uëvamu va'oromo ë jöho ua gavamu huro aviëhi jië'e jöho majëhijadeje. ²⁰Hu bogo jöho subivëho'i sama'e huruoho majëhiromo uëvadeje: Na bogo böröme namiromo ajëmi'irode aho jevájëjo. ²¹Uavareje: Ëhi jië'o'oho na ja Elijah javajëjo. Uëvadeje: Bogajo. Uavareje: No muebejaruëjo a börömohuro jöe God-aro barueromo majahui'iröhego. Na ja ë aho javajëjo. Uëvadeje: Bogajo. ²²Uavareje: Ëhi jië'o'oho ja rahuo javajëjo. Majahuijego no va'oromo ramuö'öjamu rovare aho majëhi'iröhe höjo. Jasi jöho ja diehi jövanue höjo. ²³Diehi jövanue höjamu John-ro uëvadeje:

Na a rumo'e sa'are hiromo aviëhi jië'e jöho ma-darugo'o majëhijaje ae jevájëjo.

Badahu rueröhe öroho ahorirëro vajivahorego hu maro rue'irajo.

Urimë'i jö God-aro baeromo majëhinövade ae Isaiah-ro ë jöho javivadeje. Ëho John-ro uëromomo ë'adeje: Isaiah-hu javivade jö hesi muoho iae na vaeromo ë'ajëjo.

²⁴Ëhi jövamu rueho jaburo Pharisee a masijohuro rëmö'öjamu rovë'ëro ²⁵uavareje: Ja bogo böröme namiromo ajamui'irane aho javajëjo bogo Elijah javajëjo bogo jö God-aro

baeromo majahuijanue a börömoho javajëjo rõhu ja diehi'oromo aho bapataeto vaejëvanue hõjo. ²⁶Vaejëvanue hõjamu John-ro uëvadeje: Naro jovëro bapataeto vaejëvaje hõjo. Rõhu jemëhu bogo gavaruje aho jemesi ririre namijajëjo. ²⁷Huro nasi ijönö rue'ie'ajëjo rõhu huro na iosiremiromo börömoho hõjo. Naehu hesi mu bise'o vaejahoromo hesi hõru sino jiovah'o'ibejodoho o mu bise'o bise'e rabe vaejaho'ibejodoho na ma-bise'e jevajëjo. John-ro ëhi uëvadeje. ²⁸John'o Jerusalem jioromo rovare ariböviohu'o jö ëhi vaerovaroho ëho Bethany jiadeje. Bethany amoho Jordan jovo ruhëhi jiadeje. Èsa'are Jordan jovore John-ro ae bapataeto vaejëvonövadeje.

Iesu God-are Sheep Harihu jiaje jõhoje.

²⁹Nërö John-ro gavade Iesu rovamu gagorovo ae uëvadeje: Arueho gahëjo. Sheep harihu muo'amamu God-hu mu sisë rori'o babu'õjadëhi ëhi ë ahuro sa'ae gö gö aho'obëhe nosi sisëho rori'o babu'õ'ajëjo. ³⁰Èa hesi jõho na mami'e majëhijode hõjo. Majëhiromo uëvode hõjo: Naro urimo rovë'e jevajëjo. Ae gemuëro nasi ijönö rue'ie'ajëjo. Èhi hõjo rõhu huro na iosiremiromo hu börömoho hõjo na bogo rahevadevare hu jiobe rovë'ëro jië'ëro. Èhi majëhijode hõjo. ³¹Mami'oho na hu bogo avoho gavode hõjo. Rõhu naehu rueromo jovehu bapataeto vaejëvode hesi bëhoho ëho naru hu rõjëhijego Israel ariböviohu jemëro ga'irarijego ëhuni ë'ode hõjo.

³²O ave jõho John-ro gavë'ëro huruoho majëhiromo uëvadeje: Naro gavode hõjo God-are Aru'ahe guaho va'ënohuro õ'idöre jioromo ë a hesi simano namore ruvebiromo gerejamu. ³³Mami'e na hu bogo gavode hõjo rõhu naehu jovehu bapataeto vaejëvojëro uevadohuro uevade hõjo: Ga'irane Aru'ahohuro ruvebiromo di a hesi simanore gerejamu gavë'oho uvonëjo: Èahuro God-are Aru'aho Mahuro ëhuro bapataeto vaejëvo'ajëjo. Vavuohuro ëhi uevamu hejë'ëro ijönö gavode hõjo Aru'ahoho ruvebiromo ë a hesi simanore gerejamu. ³⁴Èho nasi nunëro gavode hõjo. Gavë'ëro naru jemë uëvajëjo: Arue aho God-are Harihe hõjo.

Iesuhu aevoromo ae uëvamu hesi ijore ijore jijihare jõhoje.

³⁵Èhi uëvë'ëro nërö John-ro rõhu maho ë rueromo hesi ijorajoho niö'i jabu'o gemu mae namijadeje. ³⁶Nami'i gavade Iesu rova'amu gagorovo ijorajo niö'ioho uëvadeje: Arueho gahëjo. God-are Sheep Hariho iae jiajëjo. ³⁷Èhi uëvamu hegorovo rueho jaburo John nugo'i Iesuare ijore va'areje. ³⁸Iesuare ijore va'amu huro huotorovoromo gëvade ë ae niö'ioho hesi ijore rovamu gëgorovo uëvadeje: Jemë rabe naharujëjo. Rabe naharujëjamu jabesi huëro uavareje: Rabae ja dinö'e hijanue hõjo. Rõhu Rabae uavarocho ëho uaromo ë'areje: Rõjahuijanue a börömohajo. ³⁹Rabae ja dinö'e hijanue hõ uavamu hegorovo Iesuro uëvadeje: Rueromo gahëjo. Gahëjamu hegorovo majae garobo'e bamamu hu'o va'oromo hu hijaje osaho gavareje. Garomo hu'o arijuvo vahioromamu va'areje.

⁴⁰Ae niö'iohuro John-are jõho hejë'ëro Iesuare ijore rovare a gö hesi ihoho Andrew Simon Peter-are õho jiadeje. ⁴¹Andrew-ro ma-burëro hesi õho Simon naho va'oromo bihoromo uavadeje: Böröme namiromo ajamui'irõhe aho noro birohë'e javuajëjo. Böröme namiromo ajamui'irõhe aho Greece huëhu huotovë'oho Kerisoje. ⁴²Böröme namiromo ajamui'irõhe aho birohë'e javuajëromu Simon hu'irae baeromo Iesu ga'iro rovadeje. Rovamu Iesuro hu garomo uavadeje: Ja Simon John-are harihe javajëjo. Jasi ihoho Cephas jio'a'ajëjo. Hebrew huëhu Cephas huotovë'oho Greece huëho Peter-je. Èiho hesi bëhoho munëje.

Iesuhu Philip'o Nathanael'o uëvamu hesi ijore ijore jirehare jõhoje.

⁴³Èhi ë'ë'ëro nërö Iesuro uvadeje: Jaruvo na Galilee sa'are ajiomoe'ejõjo. Ajiomoe'ejõ uvonugoromo ajimadoho ajio Philip birohadeje. Philip bihoromomo uavadeje: Nasi ijoro ijoro rovëjo. ⁴⁴Rõhu Philip hu Bethsaida amo rajo ae jiadeje. Andrew'o Peter'o jabu'o ame gemuoho jëvadeje. ⁴⁵Èhi'amu Philip-ro Nathanael naho va'oromo bihoromo uavadeje: Urimë'i Moses-ro hesi jögoru surire uövuade hõjo: Ijönö a böröme rue'a'ajëjo. O jö God-aro baeromo majëhinövare ariböviohuro jöe gemuoho jajivoromo uönövare hõjo.

Ĕrueröhego jajivoruomade aho iae no birohë'e javuajëjo. Hesi ihoho Iesu höjo. Hu Joseph-are harihe höjo. Hesi amo ihoho Nazareth höjo. ⁴⁶Nazareth höjamu Nathanael-ro uavadeje: Asë'e a maho ëhi jië'e amoroho bogo rue hesi höjo. Bogo rue hesi höjamu Philip-ro uavadeje: Ja'o ro gavëjo.

⁴⁷Ĕhi'amu Iesuro gavade Nathanael rovamu gagorovo ae uëvadeje: Arueho gahëjo. Israel rajo a ma-maëro rovajëjo. Hesi uhuroho sareri'e jöho bogohöjo. ⁴⁸Ĕhi uavamu Nathanael-ro uavadeje: Ja diehi'oromo na gevanue höjo. Gevanue höjamu Iesuro uavadeje: Jaehu ruejoro Philip-hu uavade hesi urimo ja meso gurutore hijamu gavode höjo. ⁴⁹Gavode höjamu Nathanael-ro uavadeje: Tisa ja God-are Harihe javajëjo. Ja böröme namiromo Israel rajo muebejavuanue aho javajëjo. ⁵⁰Muebejavuanue aho javajëjamu Iesuro uavadeje: Na uavode höjo: Ja meso gurutore hijamu gavode höjo. Ĕmu harihu vaejode jöho uavamu hejë'ëro jero mae uehorovevanuëjo. Röhu u'emu mu masijo maho ga'amo'anuëjo. ⁵¹Ĕhi uanugoromo uëvadeje: Ave jöho na jö mae ue'ië'ajëjo. Jemë iae ga'a'aruëjo ö'idöho arorovo'i God-are A Ma naehu jiajire God-are anerahuro iojioromomo ruvebi'i ari'iramu.

2

Iesuhu Cana amore hiromo masurovare söro iromo bëhi'e mu börömo vaejade jöhoje.

¹Majae niö'i gemu hesi uhure iae masurovo'iröhe söroho Cana amore Galilee sa'are avohareje. Avohamu Iesuro vëmohuro ë hijadeje. ²Iesu'o hesi ijorajoho jabu'o sörore ruejoro uëvë'ëro ë ro raromareje. ³Raromoromo söro'e ariböviohuro wine jovoho ue'aho barënuogoromo vëmohuro Iesu uavadeje: Wine jovoho barëjë'e höjo. ⁴Barëjë'e höjamu uavadeje: Mamajo. Rabëni ajëmijoro uevanuëjo. Nasi maja börömo bogo rovë'e höjo. ⁵Bogo rovë'e höjamu hegorovo vëmohuro mu ajëmijarue aribövioho uëvadeje: Ĕaehu diehi uëvamu hejë'oho ëhi ë'orëjo.

⁶Röhu Jew rajëro God uehorovoromo jabesi sine inöme u'o'amarue jögoroho enövareje. Ĕhuni jovo hevöe munëhu ubuvoromo avoho'amaroho aho'obëhe övo gö mine övo göre gemu ë momorö'öjadeje. Jovo bövi mae 80 o 120 litre gemu gemu oteho'amo'ego iri-jiomo'amonövadeje. ⁷Ĕhi jië'e jië'ëro Iesuro mu aribövioho uëvadeje: Ĕmunë hevöro jovo maho oteho'amego iri-jiomo'amo'irajo. Ĕhi uëvamu iri-jiomo'amo barëjareje. ⁸Ĕhi'amu uëvadeje: Jove gö ë hevöro vuoromo ujuoho va'oromo söro muebejaje aho i'imamirëjo. I'imamirëjamu ujuoho va'oromo i'imamijareje. ⁹I'imamamu rue söro muebejaje ahuro i heromo hejadeje jovoho rihu'e jiamu ë jovo maho mami'e wine-rëjë'ëro jië'ëro. Röhu ë wine jovoho dinö'e jioromo ujuoho rovaroho bogo ga'i hesi jovo vuare mu ariböviohuro gavareje. Amo hejade rihu'e jiamu hegoro i'o masuvade aho uvamu rovadeje. ¹⁰Rovamu rue söro muebejaje ahuro uavadeje: Ae aho'obëhe wine jovo mabëhoho urimo bahijëharue höjo. Bahijëhonugoromo aëro jovo bövi mae ue'ahago ijönö jove ma-bisemu sisëho bahijëharue höjo. A'i jero wine jovo maho avoho runo'e bamane höjo aviavejë'e i'iröhohuni.

¹¹Iesuro Cana amore Galilee sa'are hiromo bëhi'e mu börömo aeo'v'i ëhi vaejadeje. Vaeromo ëhuro hesi aji maho röjëhijamu gagorovo hesi ijorajoho jaburo hu mae uehorovareje.

¹²Ĕhi'amu Iesu o hesi vëmoho o ö ömo'ömoho o ijorajo ömo'ömoho ëho jaburo Capernaum amore abuejareje. Abueromo ë raromaroho majae gemu niö'i rabu'e barëjadeje.

Iesuhu God-are amo börömore ajioromomo inömo imo'amarue aribövi rarovö'öjvade jöhoje.

¹³God-hu Vöro Tugohade Söro Jew rajehu ijarue majaho dunovadeje. Söro majaho dunovamu Iesuro Jerusalem ajiomadeje. ¹⁴Ajioromomo God-are amo börömore va'oromo gavadeje a ioro'ioroho cow-ho Sheep-oho guaho va'ëne ugoho ëhi imo'amo'i o a ioro'ioroho mu maratu bëhire raromoromo ijo bajoho ujuoho'i amo börömo hesi ijo bajoho mana i'imëmijamu. ¹⁵Ĕhi gënuogoromo ö'e ujuohoromo baduno'e ö'oho huadeje ëhuro hisuebi'amoröhëni. Huonugoromo ë aribövioho aho'obëhe God-are

amore jioruomamu hisuebijëvoromo rarovö'öjëvoromo sheep-ohu'o cow-hu'o rarovö'ö'a-madeje. Ijo bajo mu vaeruomaje aribövi jabesi mu maratuoho huotovö'öjëhamu ijo bajoho rireromoromo arua anumiae va'adeje. ¹⁶Guaho va'ëne ugo imoruomaje aribövioho uëvadeje: Ave inömo inömo rori'o ujuoho va'ohëjo. Nadi aveho imohëjo. Nasi Vavu hesi amoho bogo bövi bise'o imarue amoho höjo. ¹⁷Bogo bövi bise'o imarue amoho höjamu hegorovo Iesuare ijorajoho jaburo uehorovoromo uvareje: Huhu ë mu vaejaje hesi bëhoho God-are surire jajivoromo uvë'e höjo: Vavuoho jasi osa hesi mu nimajohuro ëhuro vëninö'e nasi dë vövöbajo'ere ravevajëjo.

¹⁸Röhu Jew rajo a masijohuro gavare Iesu ëhi'amu uavareje: Rabëni ëhioho ë'anuëjo. Bogo gavarue darugo'e muoho röjahuijego no garomo uvarëjo: God-ro uavë'ëro ë'anuëjo. ¹⁹Ë'anuëjamu Iesuro uëvadeje: Ave God-are amoho dadovorëjo. Dadovë'oho majae niö'i gemu hesi uhure naro röhu maho vae barë'iramu mae nami'a'ajëjo. Ëhi jië'e darugo'e muohemu röjëhi'ejëjo. ²⁰Röjëhi'ejëjamu Jew rajohuro uëvareje: Sarerivanuëjo. Ave amo vaebe rovaroho vadune aho'obëhe 46 barëjë'e höjo. Ëhuni dadovë'oho röhu ja diehi'oromo majae niö'i gemu hesi uhuroho vae barë'iramu maho nami'a'ajëjo.

²¹Jaburo uvareje: Nani God-are amo bërömo dadovo barëjego huro vae barë'i jövajëjo. Röhu bogo amo hesi jöho jövo'i hesi sino haho'ehu guomoromo röhu maho ri'öröhe jöho jövadeje. ²²Ëhu'ëro jië'ëro ijönö Iesuhu guomoromo ri'öjadevare evare hesi ijorajoho jaburo uehorovoromo uvareje: Iesuro mami'e uönövade höjo: God-are amoho naro avoho vae'iramu nami'a'ajëromomo evare Iesu ri'ö'iröhe jö God-are surire jajivare Iesuhu majëhijadoho ëho mae uehorovareje.

Iesuhu ae aho'obëhe gö barëjaje jöhoje.

²³God-hu Vörö Tugohade Sörö majare Iesuro Jerusalem amo bërömore hijamu evare ae aho'obëhe gavare hu mu masije vaejamu gagorovo hesi örire mae uehorovoromuomadeje. ²⁴Mae uehorovamu Iesuro uvadeje: Ëaribövioho ma-döëremu uehorovevaruëromomo jabesi öriroho bogo ma uehorovëvadeje ae aho'obëhe mami'e gëvë'ëro jië'ëro. ²⁵Iae hu ae aho'obëhe jabesi dë vövöbajo'oho gë barënvadeje. Ëhu'ëro ae gö jabesi jö Iesuare örire majahi'iröhe bëhoho bogojjadeje.

3

Iesuhu Nicodemus'o jö jövade jöhoje.

¹Iae Jew rajo a bëröme gemuëro hijadeje hesi ihoho Nicodemus. Hu Pharisee ae jjadeje. ²Vahie gemu huro Iesu ga'i va'adeje. Va'oromo Iesu uavadeje: Tisa no ja garomo uvarue höjo: God-hu ramö'öjamu röjahui'i rovane ae javajëjo. Rabëniajo. God a'oho bogo hi'ibejajo jaehu vaejanue ëhi jië'e mu masijo vaejë'oho bogo eni javuo'ibejajo. ³Bogo eni javuo'ibejajamu Iesuro uavadeje: Ave jöho na jö mae ua'ie'ajëjo. Ae mami'e rahadoho röhu maho bogo raho'amë'oho God-hu muebejaje öri ari'o garuomoröhoho bogo eni jioruomom'ajëjo. ⁴Bogo eni jioruomom'ajëjamu Nicodemus-ro uavadeje: Iae mae höjo röhu aho mavojiraejë'oho diehi'oromo röhu maho raho'amö'iröhoho eni jioruomom'ajëjo. Vëmu jabesi dëre vuonorö'ö rumo va'oromo suoronövë'oho bogo eni höjo. ⁵Bogo eni höjamu Iesuro uavadeje: Ave jöho na jö mae ua'ie'ajëjo. Jovohu'o God-are Aru'ahohu'o bogo ajëmijamu röhu maho rahë'oho God-are öri ari'ere va'iröhoho bogo eni jioruomom'ajëjo. ⁶Sino haho'o'e aëro sino haho'o'e harihoho baerumo'i a'i God-are Aru'ahohuro iae aru'aho'e harihoho avohom'ajaje höjo. ⁷Na uavode höjo: Jemë mami'e rahëvadoho röhu maho rahëvë'oho ëhuremu mae jëvo'ajë jöho hejanuoho nadi tiönëjo. ⁸Buroho dinö'e dinö'e va'i nimë'oho hesi ëma va'aje höjo. Ja he'a'anuëjo rovavo'iramu röhu bogo ga'a'anuëjo dinö'e jioromomo rovajoho o dinö'e va'ajoho. God-are Aru'ahuhu a rahu ajëmamu röhu maho rahë'oho jabesi öroho iae ëhi dadivavo'iramu bogo ga'a'anuëjo.

⁹Bogo ga'a'anuëjamu Nicodemus-ro uavadeje: Röhu ëhi jië'e muoho diehi jio'a'ajëjo. ¹⁰Diehi jio'a'ajëjamu Iesuro uavadeje: Ja Israel rajo röjahuijanue a bëröme javajëjo. Röhu ja diehi'oromo ëhi jië'e muoho bogo gavanue höjo. ¹¹Ave jöho na jö mae ua'ie'ajëjo.

Simane javuë'ëro ë jöho no atarue höjo. Nunehu gavë'e jöho huruoho majëhijarue höjo. Majëhijego jemëro bogo ejahuaruje höjo. ¹² Sa'a hesi mu jö majëhijodoho jemë bogo maho uehorovevaruje höjo. Èhuni ö'idö hesi mu jö majëhijë'oho jemë diehi'oromo mae uehorovevorëjo. ¹³ A ioro'ioroho bogo ö'idöroho ajio raromoruomade höjo. God-are A Maho ö'idöre jioromo ruvebijodoho naro gemuëro ëho hijode höjo. ¹⁴ Röhu urimë'i Moses-ro a rumo'e sa'are hiromu sigobu va'ëne inömo ma-mabëhe avohoromo ijore bamoromo a jabesi nunire banigojio made höjo aëro ëho garomo mae raromonövoröhego. Sigobu va'ëne inömo banigojio madehi God-ro bamë'ëro aëro ëhi hesi A Maho na a jabesi nunire banigojio mevo'aruëjo ¹⁵ ëhuro ae rahu na mae uehorovevë'oho i'e rahanovoromo ma-ioro'io remu maro raromo'iröhego.

¹⁶ Sa'ae dinö'e dinö'e God-ro dë vövöbajo'e aho'o uehorovavuadeje. Uehorovavuoromo hesi Harihu gemu'oho bojamuijadeje ëhuro ae rahu Harihu mae uehorovë'ohuro ëhuro bogo sisëroho va'i ma-ioro'io remu maro raromoröhego. ¹⁷ God-hu hesi Harihu sa'are nugö'öjade hesi bëhoho bogo nosi sisëho garomo sisëroho bamavuo'i a'i ajamuiromu maro ramuo'iröhego ëhuni nugö'öjadeje.

¹⁸ Ae rahu Harihu mae uehorovë'oho bogo sisëroho va'o hesije. O bogo ma uehorovë'oho mami'e sisënö bamë'eje ë hesi bëhoho hu God-are Harihu gemu'oho bogo ma uehorovë'ego. ¹⁹ A sisënö bamëvaje hesi öroho aviëhije. Ajohuro sa'are rovë'eje. Rovë'e jiamu aëro ajoho bijönimo'i ramoramoho nimoruomadeje mu sisëmu vaejaruëro jii'ëro. ²⁰ Ae rahu mu sisë vaejë'oho ajoho garomo bijönimoromo bogo bëhiroho rovajeje hesi mu sisëho va'orahoro jiojöhëni. ²¹ A'i ae rahu mu ma vaejë'ohuro aji bëhire rovajeje huhu God-are jö ejahoromo mu vaejajoho ëho samaro jioröhego.

John-hu Iesuare jö majëhijade jöhoje.

²² Èhi'amu Iesu'oho hesi ijorajo ömo'ömo'u'oho ëho jaburo Judea sa'are va'areje. Va'oromo huro jabu'oho hiromu ae bapataeto vaejëvonövadeje. ²³ Bapataeto vaejëvo'i John-ro Aenon sa'are Salim aho bëhire hiromu hu'oho bapataeto vaejëvonövadeje ë dirö'oho jove aho'obëhe jii'ëro. Bapataeto vae'ego ae aho'obëhe ë rueromo vaenövareje ²⁴ ë hesi bëhoho John bogo guduamoromo savoji gagoroho ba'amë'ëro ijönö ba'amo'iröhego.

²⁵ John-ro bapataeto ëhi vaejëvamu hesi ijorajo ömo'ömo'u'oho Jew rajo ae gö'o jö aho'ahamirovoromo uarovareje: Jovehu sisë u'o'iröhe öroho ëhi ëhi höjo. ²⁶ Jöho ëhi aho'ahamirovoromo John-are ijorajohuro va'oromo John uavareje: Tisa Jordan jovo ioro'iorore ja'o hijamu jaehu hesi jö majahuijanoho ë ahuro jasi muoho vajiohunö'e baeromo bapataeto vaejëvego jabu ae aho'obëhe hesirire va'oruomaje höjo. ²⁷ Va'oruomaje höjamu John-ro uëvadeje: Röhu aehu nosirire rueruomë'oho o muehu o rabehu rabehu rovë'oho bogo ëma rovego bae'i a'i God-ro bojamuijego baejarue höjo. ²⁸ Jemë mami'e hejarije höjo naro jemë uëvamu: Böröme namiromu ajëmi'irode aho bogo naehu jevajëjo. A'i God-ro na urimo remö'öjamu rovë'e jevajëjo ë ahuro ijore rueröhego. ²⁹ Èa hesi jöho uhunö'e majëhi'ie'ajëjo. I'o masuröhe aho huro gemuëro vaboroho bae'a'ajëjo. O ë a hesi aemo'aemohuro namiromu mu'öjamiromu heröhe masuröhe aho jöe jövavamu hejë'oho nimoro'ho'ajëjo. Nimoro'ho'iröhëhi jemëhu uevaruje a hesi mu jöho heromo na nimorohevo avohajëjo. ³⁰ God-ro ëhi nimo'ego ë a hesi ihoho ajio'mo'i nasi ihoho abuejajëjo.

Iesuho ö'idöre jioromo ruvebijë'ëro jö börömo majahuijaje jöhoje.

³¹ John-hu majëhijadëhi iae ëhije. Döre jioromo ruvebijade ahuro ae aho'obëhe iosiramuiromu börömo'hoje. Bogo döre jioromo ruvebi'i a'i ma-sa'are rahëvare aribövioho jabumë ma-sa'aremu raromarue aribövio'ëro jëvë'ëro sa'a hesi jöhemu majahuijarueje. O ö'idöre jioromo ruvebijade ahuro aho'obëhe iosiramuiromu hu börömo'hoje. ³² Börömo'ho jii'ëro garomo hejade jöho huro ae majëhijajeje. Majëhijego hesi jöho aho bogo ejaharueje. ³³ Röhu ae rahuro hesi jö ejahë'oho ëhuro uvarueje: Iae mae-ëjo God mae höjo. ³⁴ Èhesi bëhoho God-hu nugö'öjade ahuro God-are jöhuremu jövajeje. Rabëni hesi bëhoho God-ro hesi Aru'ahoho bojami avohego dë vövöbajo'e rarovahego jöho jövajeje.

³⁵ Vavuohuro Harihoho rajahijajeje. Rajahiromo bövie bise'e hesi övore bamë'eje. ³⁶ Ae rahu Harihu mae uehorovë'oho ma-ioro'ioremu maro hijajeje. O ae rahu Harihu bogo jahë'oho bogo maroho hi'i God-ro hesi örire dë vörönimemu vörönimajeje.

4

Iesuhu Samaria rajo magonahohu' jö jövadohoje.

¹ Iae Pharisee ariböviohuro hejareje aëro uvoruomamu: John rinëgoromo bapataeto vaejövobe rovaje aho ma-jianovo'i Iesuhu rinëgoromo bapataeto vaejövobe rovaje aho böromoho höjo. ² Èhi hejareje röhu Iesu bogo hesi övoho bapataeto vaejövobe a'i hesi ijorajoho jaburo ë'areje. ³ Amo Iesuro hejade uvavamu: Huhu ë'aje muohuro John hesiroho iosiramijë'e jöho Pharisee ariböviohuro hejë'e hö uvavamu hegorovo Judea sa'aho vuonugo'i vuonorö'öromo Galilee sa'are ajiomo'i va'adeje. ⁴ Galilee ajiomo'irögoro Samaria örrero va'adeje hesi muëro jii'ëro.

⁵ Va'oromo Samaria sa'are ajiomoromo amo ihe Sychar ë rovadeje. Röhu Sychar amo bëhire jiaje sa'aho urimë'i a mami ae Jacob-ro hesi harihoho Joseph bojamijadeje. Èsa'anö Iesu rovadeje. ⁶ Rueromo maja ririvanovë'iro öri ëgoböviro rovë'ero u'uvamu hegoro Jacob-mëhu jovëni umare gua bëhire hijadeje.

⁷⁻⁸ Hesi ijorajoho jabu ie imo'i amore va'ë'ero hesi sivue hijadeje. Hijamu iae Samaria sa'a rajo magonahe gemuëro jove vuo'i rovadeje. Rovamu gagorovo Iesuro uavadeje: Jove vuo bojemego na ijöjo. ⁹ Jove bojemego na ijöjamu rue magonahohuro uavadeje: Ja Jew raje javo'i na Samaria rajo magonahe jevajëjo. Èhu'oho rabëni jovo jöho ue gevanuëjo. Èmagonahehu ëhi uavade hesi bëhoho Jew rajohuro uvoruomajeje: Samaria rajo jabesi ano sabo'e hevöho enatuoho unoho ioho bogo i'ëjarëjo. Jew rajehu ëhi uvoromo ömaruëhi Iesu bogo ëhioho ömë'ëro ëhu'ëro magonahohuro uavadeje: Rabëni jovo jöho ue gevanuëjo. ¹⁰ Ue gevanuëjamu hegorovo Iesuro uavadeje: God-hu a bojëmijaje suvuoroho jero bogo gavanuëjo. O naehu jovo bojëmijöro ua gavaje aho jero bogo gevanuëjo. Ge'ibejanëjo ja ue ge'ibejanëjo naro a i'ovëvaje jovoho bojami'ibejöjo iromo maro hi'i-ranego. ¹¹ Bojami'ibejöjamu magonahohuro uavadeje: Iae mae höjo röhu jovo vuoromo bojemi'irane hevöho bogogavajëjo. Röhu jovo vuo'irane guaho ëgobövi mae jio abuejajëjo. Èhi jii'ë'oho ja diehi'oromo a i'ovëvaje jovoho vuo bojeminëjo. ¹² Nosi hije bövi mae Jacob-ro ave jovo vuarue guaho bojamuijade höjo. Hu'o hesi harihu ömo'ömo'hu'o ëho jaburo ave guare rueromo jovoho vuoromo ue'ahë'i jabesi mioho mio'amonövare höjo. Na jero Jacob iosiramiromo böromoho javajëromo ëhu'ëro jero a i'ovëvaje jovoho bojemi'i uevanuëjo. ¹³ Uevanuëjamu uavadeje: Ae rahu ave jovo ue'ahë'oho huë girihëvo'iramu röhu maho gö'o i'i nimonövo'arujëjo. ¹⁴ O naehu jovo mëmamu ue'ahë'oho huëho bogo girihëvo'i ioro'iore gemu ma-maemu jioruomö'ajëjo. Èhesi bëhoho naro jovoho bojëmi'iramu nasi jovo mahuro jabesi dë vövöbajo'ere jövëro bubujivanovo rojomëvo'iramu ma-ioro'iore gemu maro raromö'aruëjo. ¹⁵ Raromö'aruëjamu magonahohuro uavadeje: Mae jovo jöe jövajëromo uavadeje: Iae mae höjo. Èhi jii'ë' jovo'ho bojemego na ijöjo. Iromo ijönöho huëho bogo girihëvego aveho bogo rueromo jovoho vuo'irode höjo.

¹⁶ Bogo vuo'irode höjamu Iesuro uavadeje: Va'oromo jasi baruoho uaromo hu'irae baruenëjo. ¹⁷ Baruenëjamu rue magonahohuro uavadeje: Baru rumo'e jevajëjo. Baru rumo'e jevajëjamu uavadeje: Iae mae uevanuëjo: Baru rumo'e jevajëjo. ¹⁸ Urimo baru masu nugobe rovanoho aho'obëhe övo gö mine höjo. Avevejö'e garomo hijanuoho ëho bogo jasi baruoho höjo. Èhunij ja mae uevanuëjo. ¹⁹ Mae uevanuëjamu rue magonahohuro uavadeje: Iae na gavajoho ja jö God-aro baeromo majahuijanue ae javajëjo. ²⁰ Èhunij ave jöho uevego na hejëjo. Nosi Samaria hijo miono'o ömo'ömo'huero rue dahorure iojioromoro God rajahibe rovë'e höjo. Röhu Jew rajoho jemëro uvaruje höjo: Jerusalem amohuremu rojomoromo God rajahinövorëjo. Di öri ari'oho maho höjo. ²¹ Maho höjamu uavadeje: Röhu ave nasi jöho mae uehorovëjo. Majae ijönöho aho bogo rue dahoruroho o Jerusalem amoroho Vavuoho rajahiruomö'ajëjo. ²² Samaria rajoho jemëhu rajahijaruje bëhoho bogo

gavë'e ëma ë'aruje höjo. Röhu Jew rajo noehu rajahijaruoho noro avoho garomo ë'arue höjo. Rabëni hesi bëhoho God-hu a manö babamëvo'iröhe muoho Jew rajo nosirire aevë'ëro jië'ëro ëhu'ëro noro öroho avoho garomo God rajahijarue höjo. ²³ Majae gö rue'ie'ajëjo. Röhu mami'e rovanovë'e höjo. Evare majare aehu uhohu'o God rajahijë'o ho God-are Aru'ahoho baeromo Vavuoho avoho uehorovoromo ëhi rajahi'aruëjo. Vavuohuro iae nimajëjo ëhi jië'e ariböviohuro hu rajahinövoröhego. ²⁴ God hu aru'ahë höjo. Èhuni ae rahu God rajahijë'iroho hesi Aru'ahoho baeromo God avoho uehorovoromo rajahi'aruëjo. Öre gö bogohöjo. ²⁵ Bogohöjamu rue magonahohuro uavadeje: Iae na gavajëjo. Böröme namiromo ajamui'iröhe aho Keriso iae rue'a'ajëjo. Rueromo jöe aho'obëhe huruoho majahui barë'ajëjo. ²⁶ Majahui barë'ajëjamu Iesuro uavadeje: Jaehu uvanue aho iae na aviaë jëvajëjo ja'o jö jövajoho.

²⁷ Èhi uavamu gavë'i Iesuare ijorajoho jaburo vuonorö'ö rovareje. Rue'i gavare Iesuro magonah'o jöe jövamu gagorovo tiöjëvadeje. Tiöjëvamu röhu aho Iesu bogo uavareje: Ja rabe nagajëjo. O bogo uavareje: Ja rabëni hu'oho jöho jövanuëjo. ²⁸ Èhi'amu magonahohuro ri'öromo jovo'e hevöho ë nugo'i amëro va'adeje. Va'oromo ae uëvadeje: ²⁹ Rueromo ae gemu gahëjo. Naehu bövi bise'o ömode jöho huro majehijamu hejë'e jëvajëjo. Na ë aho böröme namiromo ajamui'iröhe aho höjo o rahuo höjo. ³⁰ Èhi uëvamu amoho vuonugo'i Iesu ga'i örire rueruomadeje.

³¹ Èmagonahohuro ëhi ë'irögoro Iesuare ijorajoho jaburo ioho imë'ëro uavareje: Tisa ie ijëjo. ³² Ijëjamu Iesuro uëvadeje: Iae nasi ie jiajëjo. Röhu jemë bogo gavarujëjo. ³³ Bogo gavarujëjamu rueho jaburo uarovareje: Na aëro ioho ba ro bojamiare höjo. O dinö'e baejade höjo. ³⁴ Èhi uarovamu Iesuro uëvadeje: Èho na bogo i jöho uë'iro a'i Vavuehu sa'are remö'öromo nimaje jöho naro ejahoromo huhu bojemade muoho vae barëjëgo ëhuro inö'e da'uegaje höjo.

³⁵ Jemë'o uehorovohëjo. Jemë atoromo ëhi uvaruje höjo: Manaere ëhi niö'i ëhi niö'i mueberomo iruno'oho mavo'iramu evare gagovo'ëjarëjo. Röhu aveho hehëjo. I'o mu'oho ruë numë uherihoromo gahëjo. Iruno'oho iae mavo'amë'e höjo gagovo'amo'iröhego. Èhi uëvade jö hesi bëhoho bogo iruno'o jöho jio'i a'i Samaria raje ae aho'obëhe magonahohuro uëvë'ëro Iesu ga'i örire rueruomade jöhoje. ³⁶ Röhu uhu jö hesi vituoho majëhiromo uëvadeje: Gagovarue ariböviohuro aviavejë'e jabesi suvuoroho ujuohoromo aribövioho iruno'o va'ëne gagovëvaruëjo jaburo ma-ioro'ioemu maro raromoröhego. Èhu'ëro iruno'e bamarue ariböviohu'o gagovarue ariböviohu'o ma-gemuoro nimorohuromo'a-jëjo. ³⁷ Röhu ave jöhu'o atoromo uvarue höjo: A ioro'iorohuro iruno'oho bamego a ioro'iorohuro gagovarue höjo. Èjöhö iae mae höjo. ³⁸ Naro jemë rëmö'öjode höjo i'u'e mu bogo vaejarijire ë va'oromo ma-gagovo'irarijëgo. Hesi a ioro'iorohuro i'u'e muoho ë vaejamu jemëro jabesi mu vituoho baejë'ëro ae ma-gagovëvo'ie'arujëjo nasinö jëvojöro.

³⁹ Èhi'amu Samaria sa'a rajo aribövie ë amore raromaruohuro hejare magonahoho uëvamu: Naehu bövi bise'o ömode jöho majehijamu hejë'e jëvajë uëvamu hegorovo ae aho'obëhe Iesu mae uehorovareje. ⁴⁰ Mae uehorovoromo rueromo Iesu uavareje: Ro nosi amoro no'o hijëjo. Hijëjamu Iesuro va'oromo majae niö'i jabu'o hijadeje.

⁴¹ Hijamu urimo ae aho'o magonaho hesi jöho heromo mae uehorovë'ëro hejare Iesuro jöe majëhijamu hegorovo ae gö gö aho'obëhe mae uehorovareje. ⁴² Mae uehorovoromo magonahoho uavareje: Urimöho jasi jöho heromo Iesu mae uehorovare höjo. Jaruvoho bogo ëhunioho mae uehorovo'i a'i nosi hia'ëro hejare Iesuro jöe majahuijamu hejë'ëro ëhu'ëro noro mae garomo uvarue höjo: Iae mae-ëjo. Èaho sa'ae dinö'e dinö'e raromarue aribövioho manö babamavuaje aho höjo.

Gavamen mu vaejaje a hesi harihu hesi sino Iesuhu ajamamu marëjade jöhoje.

⁴³ Èhi uavamu Iesuro ë amore hiromo majae niö'i barëjamu gagorovo va'adeje. Va'oromo Galilee sa'are ajiomadeje. ⁴⁴ Urimë'i Iesuro ae majëhiromo uëvadeje: Jö God-aro baeromo majëhijarue aribövioho ëhi jië'e aribövioho nosi sa'a rajohuro bogo masijoho höromo maho uehorovavuoruomaje höjo. ⁴⁵ Röhu va'oromo Galilee sa'are rovamu gagorovo ë sa'a

rajohuro hu rajahiruomadeje ë hesi bëhoho mami'e söröho i'i Jerusalem va'oromo gavare Iesuro darugo'e mu masijoho vaejambu gavë'ëro.

⁴⁶ Rajahijamu Iesuro Galilee sa'are hiromo röhu maho va'oromo Cana amore höröjadeje. Urimë'i huro ë amore hiromo jovo maho baeromo avohamu wine-rëjadeje. Ëamore röhu maho rovadeje. Röhu gavamen mu vaejaje aëro ë sa'ae gemuore hijë'e jiadeje. Sa'ae gemuore Capernaum amore hi'i hesi harihoho guomo guome baeromo hu'o hijadeje. ⁴⁷ Hijamu vavuohuro hejade uvavamu: Iesuro Judea jioromo Galilee ro hijajë uvamu hegorovo ajio Cana höröromo Iesu uavadeje: Nasi harihoho guomeho'ie'ajëjo. Ëhuni na'o ruvebiromo anume Capernaum amoro ajamego mae jio'irajo. ⁴⁸ Mae jio'irajamu Iesuro uavadeje: Na jemë nasi darugo'e mu masijoho garomo mae uehorovevo'i ëhuni na bogo maho uehorovevaruje höjo. ⁴⁹ Uehorovevaruje höjumu rue vavuohuro uavadeje: Iae ëhi höjo röhu ruvebiromo ajamijëjo. Jue'i guomo'ie'ajëjo. ⁵⁰ Guomo'ie'ajëjumu Iesuro uavadeje: Va'ëjo. Jasi harihoho iae i'ovoromo hi'ie'ajëjo. Hi'ie'ajëjumu hegorovo rue vavuohuro jöho mae uehorovoromo abuejadeje. ⁵¹ Abuejumu gagorovo hesi mu vaejamarue ariböviohuro rueromo örire birohoro uavareje: Jasi harihoho iae i'ovoromo hijajëjo. ⁵² Hijajëjumu uëvadeje: Maja raburo jue'i i'ovade höjo. I'ovade höjumu uavareje: Nëri jeni'e majae huotorovamu gavë'i evare hesi sino dajo'e vörö'iraejadoho u'uhade höjo. ⁵³ U'uhade höjumu rue vavuohuro uehorovoromo uvadeje: O majae ëhi gemuoho jiamu gavë'i Iesuro uevade höjo: Jasi harihoho iae i'ovoromo hi'ie'ajëromo hu'o hesi ö mueno'e aho'obëhe jabu'o mae uehorovareje.

⁵⁴ Röhu urimë'i Iesuro Judea sa'are jioromo Galilee rueromo evare bëhi'e mu börömo gö vaejadoho avevejö'e jö jövamu a börömo hesi harihu i'ovadoho ëho bëhi'e mu göho jiadeje.

5

Iesuhu jovo riröre va'oromo a hesi sino ajamamu marëjade jöhoje.

¹ Ëhi'amu Jew rajehu God uehorovoromo sörö ijarue majah gemu rovadeje. Sörö majaho rovamu Iesuro Jerusalem ajiomadeje. ² Röhu Jerusalem amo börömo oje gemu hesi ihoho Sheep Ojohoje. Ëjoje hesi bëhire jovo e'ue gemu ruhijë'eje. Ëjovo hesi ihoho Hebrew huëhu uvaruoho Bethzatha-je. Röhu ë jovo hesi ruhëhi numëhi ionire ionire ririre javu ëge övo gö mine jio'ame. Javuoho bogo iromë'e ma-döhemu vaeromo ëhi ma-gagemu nugo'amë'ejö ë raromonövoröhëni. ³ Ëjavuore guomo guomo'e ae aho'obëhe raromonövareje. Nuni sisë'e höru sisë'e övo höru'o tövë'e ëhi jië'e aribövioho ë raromoro [muebejareje jovoho avadu'avaduvoröhögo. ⁴ Ëhesi bëhoho Badare anerae gemuero majae gö gö ë jovore abueromo jovoho huotohuotovo'ego avadu'avaduvonö-vadeje. Avadu'avadu'ego guomo guomo'e aribövioho di aho urimo jovore abuejadoho marënvadeje.]

⁵ Iae ae gemuëro ë raromadeje. Guomo guomo maminö gö'e baeromo ëhi jiobe rovadoho vadune aho'obëhe 38 barëjë'e jiadeje. ⁶ Ëraromamu Iesuro hu gavadeje. Garomo uvadeje: Ëaho guomo guomo baejadoho majae ëgobövie barëjë'e höromo uavadeje: Na ja marëjavojöro nagajëjo. ⁷ Marëjavojöro nagajëjumu rue guomo guomo'e ahuro uavadeje: Na aemo'aeme bogojevë'ëro jovo avadu'avaduvë'iroho bogo baejavoromo jovoroho ba'amevarue höjo. O na jovore abue'ie'iroho ae göëro na iosiremiromo urimo abuejaje höjo. ⁸ Urimo abuejaje höjumu uavadeje: Ri'ö namiromo raromanue suhoho banigojiomoromo baeromo juvëjo. ⁹ Juvëjumu ë aho ma-burëro marëjadeje. Marëjumu hesi suhoho banigojiomoromo baeromo juvo va'adeje.

Ëhi ë'adeje röhu ë majaho Jew rajehu mu bogo vae'i nuharue majaho jiadeje. ¹⁰ Nuharue majaho jiamu gagorovo Jew rajo a masijohuro gavare ë ahuro suhoho bava'amu gagorovo uavareje: Jaruvo nosi nuho majae höjo. Ëhuni ja suhi baeromo juvanuoho ëho jero nosi jögoroho ahanuëjo. ¹¹ Ahanuëjumu uëvadeje: Röhu ajemamu marëjevade ahuro uevade höjo: Jasi suhoho banigojiomoromo baeromo juvë uevadohuni ëhuni baeromo

juvajëjo. ¹² Baeromo juvajëjamu uavareje: Raro ëhioho uavade hõjo. ¹³ Ëhi uavamu rõhu dadivamu bogo uëvadeje rabëni ae aho'obëhe jovo rirõre tagavamu Iesuro ajamiromo va'ë'ëro jië'ëro.

¹⁴ Ëhi ë'ë'ëro Iesuro God-are amo börõmore va'oromo ë aho bihororomo uavadeje: Hejëjo. Iae mami'e marëjavë'e jiaje ijoho nadi mu sisëho vaenëjo. Urimo huë vavaene ma-bisemu baejanoho rõhu ijonõho börõmo bëhe bae'a'anuejo. ¹⁵ Ëhi uavamu hegorovo rue ahuro va'oromo Jew rajo a masijoho uëvadeje: Ajemamu marëjevade aho Iesu hõjo. ¹⁶ Iesu hõ uëvamu hegorovo Jew rajo a masijohuro uvareje: Iesuro ë muoho nuho majaro õmade hõ uvoromo dë vörõnimoromo aevoromo Iesu huë vavaene bojami'i arijareje.

¹⁷ Huë vavaene bojami'i arijamu Iesuro uëvadeje: Nasi Vavuoho bogo nuho'i a'i ma-muemu vamu vaejogo na'o ëhi ë'aje hõjo. ¹⁸ Ëhi uëvamu hegorovo rue a masijohuro uvareje: Nuho maja hesi jõgoroho ahë'e hõjo. Rõhu gõho hu uvajëjo: God nasi Vavu mae hõjo. Ëhu'ëro hu uvoromo ë'ajëjo: Na God'o gemuoho jevajëjo. Ëhi uvoromo ëhuni jaburo uehore aho'o ma-gemu baeromo uvareje: Iaho ano'ëjarëjo.

God-are Harihehu God-are darugo baeromo mu vaejaje jõ Iesuhu jövadohoje.

¹⁹ Ëhi uvamu Iesuro jõe majëhiromo uëvadeje: Ave jõho na jõ mae uë'ië'ajëjo. God-are Harihu naehu nasi sivu mu vae'irodoho bogo eni jevajëjo. A'i Apohu vaejogo gavaje muohemu vaejaje hõjo. Apohu vaejajëhi Harihoho naro ëhi gemuoho vaejaje hõjo. ²⁰ Ëhesi bëhoho Aporo Harihoho na uehorovevoromo huhu mu bövi bise'o vaejajoho ëho rõjehijaje hõjo. Rõhu ë mu rõjehijajoho u'emu iosiramiromo masijo maho rõjehi'a'ajëjo naro vaejogo jemëro garomo tiõromo uvo'irarijego: Mabëhe ë'ajëjo. ²¹ Vavuehu vuovë'e aribõvi ajëmiijego i'ovaruëhi ëhi Harihoho na'o vuovë'e ae rahu ajëmi'i negë'oho ajëmego i'ovarue hõjo. ²² Vavuohuro aho bogo mevoromo gëvaje hõjo mae o sisë jio'amego a'i mevoromo mae o sisë jëvego gë'irode muoho Vavuohuro Harihu nasi õvore bamo barëjë'e hõjo naro ë muoho vae'irodego. ²³ Naro vaejogo ae aho'obëhe Vavu rajahijaruëhi Harihoho na'o ëhi rajehiruomorõhego. Ae rahu Harihoho bogo rajehijë'oho ëhuro Vavue remõ'õjadohu'o bogo rajahijarue hõjo.

²⁴ Ave jõho na jõ mae uë'ië'ajëjo. Ae rahu nasi jõ heromo sa'are remõ'õjade aho mae uehorovë'oho ma-ioro'ioeremu mae raromo'irõhe õrيره jijihoruomaje hõjo. Mae raromo'irõhe õrيره jijihobe va'õjuvo mevoromo gë'irode majaho rue'iramu God-are i'uocho bogo baeruomo'ajëjo vuovo õrيره jijiharoho mami'e vuonugo'i i'ovo õrيره jijiharuëro jië'ëro. ²⁵ Ave jõho na jõ mae uë'ië'ajëjo. Majaho rue'a'ajëjo. Rõhu mami'e rovanovë'e hõjo. Evare majare vuovëvë'e aribõvie gõëro gõëro he'a'aruëjo God-are Harihoho naro uvavo'iramu. Ae rahu Harihu naehu uvamu hejë'oho vuovo õrيره jijiharuoho vuonugo'i i'ovo õrيره jijiharuëjo. ²⁶ Vavuehu ae uëvego i'ovaruëhi huro na ajemijë'ëro Harihoho na'o ëhi uëvego i'ovarue hõjo. ²⁷ Vavuohuro ëhi ajemiromo rõhu jõho bojemijade hõjo naro ae mevēvoromo gë'irodego mae o sisë jëvego rabëni na hesi A Maho jevë'ego. ²⁸ Ëjõ hejarujoho nadi tiõrëjo. Majaho rue'iramu evare ae aho'obëhe hure raramaruohuro herõhe naro uvavo'iramu ²⁹ hegorovo hure jioromo suorovoruomo'ajëjo. Suorovoromo mu ma vaejare aribõviohuro ri'õromo ma-ioro'ioeremu maro raromo'irõgoro mu sisë vaejare aribõviohuro ri'õromo naro mevēvo gëromo i'ue mana bojëmi'iramu sisëro va'oruomo'ajëjo.

Rabe rabe garomo heromo ëhuni uvo'ëjo: Iesu mae hõjo. Ëhesi jõhoje.

³⁰ Naehu nasi sivu mu vae'irodoho bogo eni jevajëjo. Vavuehu uevego hejajëhi na ëhi mevēvoromo gëvaje hõjo ae mae o sisë jëvego. Bogo ëma mevēvo'i a'i mae mevēvoromo gëvaje hõjo rabëni hesi bëhoho nasi nimajoho bogo uehorovo'irõgoro a'i sa'are na remõ'õjade aehu nimajoho uehorovajëro jië'ëro. Iae ëhuni avoho mevēvoromo gëvaje hõjo.

³¹ Naro nasi sivue nasi jõho huruoho majëhijego he'ibejarijëjo nani aëro uvo'ibejarijëjo: Sarere hõjo. ³² Rõhu bogo nasi sivuoho jõvo'i ae gõ na õmego gevajohuro jõvo ajemiromo uëvaje hõjo: Nõrõ jõ mae jövaje hõjo. Iae na gavajoho ë aho hu jõ maemu jövaje

höjo nasi Vavuohuro jië'ëro. ³³ Mami'e jemëro jemesi ae rëmö'öjamu John-are örire va'are höjo. Va'oromo hejare höjo huro jö ma hesi jöho mae majëhijamu. ³⁴ Èhesi bëhoho nasi jöho majëhijade höjo. Na ëhi uëvaje hesi bëhoho bogo aëro nasi jöho ajemiromo majëhijëro nego'ego uëvajëjo. A'i ëhi uëvaje hesi bëhoho jemëro ejehoromo bogo sisëroho va'i maro va'irarijego ëhuni uëvajëjo. ³⁵ Röhu John-ro irehu höduvoromo ajivavujëhi huro ëhi ajivëvonövade höjo. Èhi'amu majae ma-bunemu nimarije höjo hesi ajire raromogoro nimoroho'irovo. ³⁶ John-hu nasi jö majëhijamu hejarijoho iae mae höjo röhu ëho ma-jianovo'i Vavuehu bojemego vae'amaje muoho ëho masijoho höjo. Èho garomo uvo'ibejarijëjo: Iae mae-ëjo. Vavuohuro nörö nugö'öjamu rovë'e höjo. ³⁷ Röhu Vavue na sa'are remö'öjade ahuro hu'o ajemiromo nasi jöho majëhijë'e höjo. Hesi huëho jemë bogo heromo nu ano'oho bogo gavë'e jëvajëjo. ³⁸ Hesi jöho jemesi dë vövöbajo'eroho bogo'e höjo rabëni huhu remö'öjamu rovode aho na bogo ma uehorovevarujëro jëvë'ëro. ³⁹ Röhu jemëro uehorovoromo uvaruje höjo: God-are surire jö adahë'oho noehu ma-ioro'ioeremu mae raromo'iröhe öroho biroho'ëjarëromo ë hesi öroho naho'irögoro suroho adaho avoharuje höjo. Röhu nasi jöho jemëhu adaharuje surire iae ë jajivë'e höjo. ⁴⁰ Nasi jöe ë surire jajivare höjo röhu jemëhu ë jö eromo nasirire rueromo ëhuro mae raromo'irarijoho bijönimaruje höjo.

⁴¹ Ma-aehu nasi iho döre bameho'irarijoho ëho na bogo uehorovoromo jövajëjo. ⁴² Röhu jemesi dëho iae na gëvajëjo. God-are öriroho jemesi dë vövöbajo'eroho bogo uehorovaruje höjo. ⁴³ Naro nasi Vavu hesi ihore rovode höjo. Röhu jemëro bogo ejeharuje höjo. Ae göehu hesi ëma rovë'oho ëma ejëho'arujëjo. ⁴⁴ Jemë nimarujëjo jemesi ariböviero jemesi ihoho döro bamëhojoro. A'i God gemu eni jië'e aehu jemesi iho döre bamëhoröhe ë hesi öroho bogo naho gavaruje höjo. Bogo naho gavë'oho jemë diehi'oromo na mae uehorovevorëjo. ⁴⁵ Röhu nadi uvorëjo: Nöröro hesi Vavu hesi örire nosi jö sisëho huruoho majahi'ajëjo. Na bogo ëhioho ë'ejöjo. A'iro Moses-ro jemesi jö sisëho huruoho majahi'ajëjo. Jemë uvaruje höjo: Moses-ro ajamui'iramu mae raromo'ëjarë uvaruje höjo röhu hesi jöho bogo ejaharuje höjo. Èhuni huro huruoho majahi'ajëjo. ⁴⁶ Èhesi bëhoho jemëro Moses-are jöho ejaho'ibejarijëjo nasi jöhu'o ejeho'ibejarijëjo. Huro nasi jöho jajivë'ego ëhuni uëvajëjo. ⁴⁷ Röhu huhu jajivo'amade jö bogo ejaharujoho jemë diehi'oromo nasi jöho ejehorëjo.

6

Iesuhu ae aho'obëhe 5,000 da'uojëhade jöhoje.

¹ Èhi'onugoromo Iesumëro boat-re ajio raromoromo Galilee e'u döre e'u hesi iho göho Tiberias e'u ioni göre ë va'areje. ² Va'amu ae aho'obëhe mae Iesuro darugo'e muoho vaeromo guomo guomo'e ae ajëmamu mami'e gavë'ëro Iesu ijore rihimoromuomadeje. ³ Amo Iesuro hesi ijorajo ömo'ömoho söjëvo ujuohoromo dahorure ajiomoromo jabu'o ë hijadeje. ⁴ Èmajaho God-hu Vörö Tugohade Majaho Jew rajo jabesi sörö majaho dunovadeje. ⁵ Evare majare Iesuro dahorure hiromo uheriho'i gavadeje ae aho'obëhe ijore rojomoruomamu. Rojomamu gëgorovo Philip uavadeje: No dinö'e ioho imoromo ë aribövioho aho'o da'uojëho'ëjarëjo. ⁶ Hu mami'e gavadeje rabe ë'iröhoho. Röhu huro Philip uavadeje he'i Philip-ro diehi uavego. ⁷ Amo ëhi ua gavamu Philip-ro uavadeje: Monie aho'obëhe 200 kina röhu döre gö'o bu'öromo ie imoromo i'imëmi'ibejarëjo ae aho'o jië'ëro ma-bisemu bisemu ue'ahoruomo'ibejajo. ⁸ Èhi uavamu Iesuare ijoraje ae gö hesi ihoho Andrew Simon Peter-are öhuro uavadeje: ⁹ Aharihe gemu iae höjo. Hu ie aho'obëhe 5 visue niö'i ëhi jiajëjo. Röhu ja'o uehorovëjo ëho bogo eni höjo ae aho'obëhe jië'ëro. ¹⁰ Èhi uavamu hegorovo Iesuro hesi aribövioho uëvadeje: Ae aho'obëhe uëvego sa'are rarumarëjo. Röhu ë dirö'oho ma-garasiemu jië'e jiadeje. Èhi'amu ae aho'obëhe 5,000 rabu'e ë raromareje. ¹¹ Raromamu Iesuro ë aharihehu ujuoho rovade ioho ujuohoromo God mae uaromo rarumarue aribövioho i'imëmadeje. Èhi'oromo visuohu'o ujuohoromo ëhi gemuoho ë'adeje. Èhi'amu ë ariböviohuro dimino'e i'i nimarëhi ëhi ue'ahareje. ¹² Ue'ahoromo da'uëgamu gagorovo Iesuro hesi ijorajo ömo'ömoho uëvadeje: I

vitu vituoho gagovorego bogo mae bogo mu'u'irajo. ¹³ Ēhi uëvamu ie aho'obêhe 5 ue'ahare ë hesi vitu vituoho gagovoromo esöe aho'obêhe 12 irijiomom'amareje.

¹⁴ Irijiomom'amamu Iesuhu bëhi'e mu bôrömo vaejadoho ae aho'obêhe garomo uarovareje: No muebejarue höjo jö God-aro baeromo majahuijaje a bôrömhuro sa'are rueröhego. Ēaho jiajêjo. ¹⁵ Ēhi uvoromo rueromo Iesu ëma guduamoromo ua'irögoro ë'areje: Jero nosi bôrömo hionêjo. Ēhi ë'ia'amu gëgorovo Iesuro va'adeje. Va'oromo dahorue vuonorö'ö ajiomoromo hesi sivue hijadeje.

Iesuhu e'u döre hörehu va'ade jöhoje.

¹⁶ Majae beva'ia'amu Iesuare ijorajo ömo'ömhuro e'u riröre abuejareje. ¹⁷ Abueromo boat-re ajio raromoromo Capernaum amore va'i jovo döre va'areje. Va'amu vahiromëvadeje. Röhu Iesu evaroho jabetesiroho bogo rov'e jiadeje. ¹⁸ Bogo rovamu gavareje buru bôrömo rue'ego jovoho hasajamu. ¹⁹ Jovoho hasajamu jovo döre huo'öbe va'aroho 5 o 6 kilometre ëmino'e va'aroho va'ihö gavare Iesuro jovo döre juvobe jabeti bëhire rovamu gagorovo juhuonivareje. ²⁰ Juhuonivamu uëvadeje: Najevajêjo. Nadi juhuonivo-hêjo. ²¹ Nadi juhuonivohëjamu hegoroovo jaburo nimareje Iesuro boat gagore rojomöjoro. Ēhi'oromo dinö'e va'i nimarire ë ma-burëro va'areje.

Ae aho'obêhe Iesu biroho'i nahoruomade jöhoje.

²² Iesu'o hesi ijorajo ömo'ömhuro'ö ëhi jovo ioni gönö va'i a'i i'ö visu'ö ue'ahare aribövie aho'obêhe mae jovo ioni gönö ëhi raromareje. Raromë'ëro nërö gavareje Iesu bogojiamu. Bogojiamu uvoruomadeje: Nëröho boat gemuëro ave jovo riröroho nami'i boat gö gö bogojiohijajo. Röhu Iesu ë boat-roho bogo va'i hesi ijorajohuremu va'oruomade höjo.

²³ Ēhi uvoromo gavareje boat gö gö Tiberias amore jioromo rueromo Bada Iesuhu Vavu mae uavamu i ue'aharinö ë ro riravamu. ²⁴ Boat gö gö ro riravamu gagorovo gavare Iesu'o hesi ijorajo ömo'ömhuro'ö bogojëvamu gëgorovo arue boat göre göre iojiomoromo Iesu naho'irögoro Capernaum amore va'oruomadeje.

Iesu i va'ëne jië'ëro i'ovavuo'iröhe jö Iesuhu jövadohoje.

²⁵ Va'aroho jovo ioni gönö va'ö baboro beromo Iesu birohoruomadeje. Birohoromo uaruomadeje: Tisa ja divare aveho rovane höjo. ²⁶ Divare aveho rovane höjamu hegoro uëvadeje: Ave jöho na jö mae uë'ië'ajêjo. Jemëhu na nahevaruje hesi bëhoho jemë bogo uehorovoromo uvarije höjo: Nöröro bëhi'e mu masijoho röjahuij'e hö uvoromo ëhuniöho nahevo'i a'i jemë ie aho'obêhe ue'ahamu da'uëgadöhuni ëhuni nahevarujêjo. ²⁷ Röhu muduroho'iröhe iëniöho nadi muoho vae'i a'i jiemu jioröhe iohuremu uehorovoromo muoho vaerego ëhuro ma-ioro'ioerumu maro rarom'irarije höjo. Ēioho God-are A Maho naru suvuorëmi'ejöjo rabëni God Vavuohuro a nuniro uevë'ego: Jasí muoho mae höjo.

²⁸ Ēhi uëvamu uaruomadeje: Ēhi jië'o ho no diehi jië'e muoho vaeromo ëhuro God-hu nimaje muoho vae'amo'ëjarêjo. ²⁹ Vae'ëjarëjamu uëvadeje: God-hu nimaje mu vae'irarijoho aviëhi höjo huhu sa'are remö'öjade aho na jemëhu mae uehorovevo'irarijoho. Iae ëhi ë'orêjo. ³⁰ Ēhi ë'orëjamu uaruomadeje: Röhu ja'ö ja mu rabe vaenêjo. Diehi jië'e darugo'e muoho ömo'iramu no garomo mae uehorovo'ëjarêjo ³¹ Iae urimë'i nosi hijo miono'ohuro darugo'e muoho iae gavare höjo. A rumo'e sa'are raromo jijiharevare evare bogo ijarue i mabëhi hesi ihe manna ue'ahoruomade höjo. God-are surire uvë'e höjo: Ö'idöre jioromo ruvebijade ioho huro i'imëmade höjo jaburo ue'ahoröhego. ³² Ēhi uavamu Iesuro uëvadeje: Iae jemë uevarujêjo: Ö'idöre jioromo ruvebijade ioho Moses-ro nosi hijo miono'oho i'imëmade höjo ue'ahoröhego. Röhu aveho na jö mae uëvajêjo. Ējö hesi bëhoho avoho uehorovoromo uvorêjo: Bogo Moses-hu mami'e bojëmade jöho jio'i a'i nöruare Vavuehu avevejö'e ö'idöre i ma bojamuijaje jöho höjo. ³³ God-hu bojëmade iohuro ö'idöre jioromo ruvebiromo birire bojëmego sa'ae dinö'e dinö'e i'ovoromo maro raromarue höjo.

³⁴ Maro raromarue höjamu uvareje: I ma hesi jöho jövajëromo uavareje: No naguajêjo jero majae ëhi ë ioho bojamuinövo'iranego. ³⁵ Ēhi uavamu uëvadeje: Röhu ë i hesi bëhoho na i'ovëvajohojevajêjo. Ae rahu nasinö rovë'öho ijoho bogo hömo'ajêjo. Mae

uehorovevë'oho ijoho bogo huêho giriho'a'ajëjo. ³⁶Rôhu na mami'e uêvode hôjo: Jemë na gevë'e jëvajëjo rôhu bogo ma uehorovevaruje hôjo. ³⁷Nasi Vavuehu ae rahu bojemi'ë'oho ê aribôviahuro nasi ôrire rueruomaje hôjo. Ae rahu nasi ôrire rovë'oho na bogo mae bogo uë'ejôjo: Rori'o va'ohëjo ³⁸rabëni naehu ô'idôre jioromo ruvebijode hesi bêhoho bogo nasi nimaje muoho ômo'i a'i sa'are na remô'ôjade aehu nimajohemu ômo'irodëni rovë'ëro. ³⁹Hu nimajëjo huhu bojemade aribôvioho na bogo ae gemu vadu'oho boremi'ô'i a'i muebejêvojuvo ijo tugoho'i majare naro ajëmego vuovoromo ri'ôruomorôhego. ⁴⁰Nasi Vavuohuro aveho nimaje hôjo ae rahu Harihu na geromo mae uehorovevë'oho ma-ioro'iolemu maro raromoruomorôhego. Êaribôvioho ijo tugoho'i majare naro i'ovëvo'iramuru jabumë ri'ôromo raromo'aruëjo.

⁴¹Rôhu Iesuhu ô'idôre jioromo inô'e rueromo a i'ovëvaje jôho êhi majëhijamu hegorovo Jew rajo aribôviahuro dê võrônëgamu jôe sisë'i atoromadeje. ⁴²Jôe sisë'i atoromo uarovareje: Ave iaho Joseph-are harihe hôjo. Hesi vëmu vavu'oho iae no gëvarue hôjo. Rôhu hu rabëni uvajëjo: Na ô'idôre jioromo ruvebijë'e jëvajëjo. ⁴³Êhi uarovamu uëvadeje: Nadi nasi jôho sisë'ioho atohëjo. ⁴⁴Aho bogo jabesë ëma rueromo na'oho raromô'i a'i nasi Vavue sa'are remô'ôjadohuro rinëgamu êhuro nasirire rueruomë'oho eni jëvaje hôjo. A ioro'ioroho bogajo. Rovë'oho naro ijo tugoho'i majare i'ovëvo'iramuru vuovoromo ri'ôruomo'ajëjo. ⁴⁵Jemesi hijo miono'ohuro a rumo'e sa'are raromo jijihoromo bogo ijarue i mabëhi hesi ihe manna inôvare hôjo. Inôvare hôjo rôhu vuovëvade hôjo. ⁵⁰A'i ô'idôre jioromo ruvebijaje ioho ae rahu ijë'oho êhuro bogo vuovëvo'ajëjo. ⁵¹Ô'idôre jioromo ruvebijë'ëro a i'ovëvaje ioho na jëvajëjo. Ae rahu ê i ijë'oho ma-ioro'iolemu maro raromô'arujëjo. Naehu bojëmi'irode ioho êho nasi sine hôjo. Êhesi bêhoho nasi sinoho bojamirovo'ejôjo sa'ae aho'obëhe vuovëvadoho i'ovoromo mae raromô'irarijêgo.

⁵²Êhi majëhijamu hegorovo Jew rajohuro dê võrônëgamu jô aho'ahamirovoromo uarovareje: Êaho diehi hesi sinoho bojami'iramuru i'ëjarëjo. ⁵³I'ëjarëjamu uëvadeje: Ave jôho na jô mae uë'ië'ajëjo. God-are A Ma nasi sinohu'ô kôhu'o bogo ijë'oho darugoho bogo bae'i vuovëvo'ajëjo. ⁵⁴Ae rahu nasi sino kô ijë'oho ma-ioro'iolemu maro raromarue hôjo. Raromojuvo ijo tugoho'i majare i'ovëvo'iramuru ri'ô'a'aruëjo. ⁵⁵Êhesi bêhoho nasi sinoho iae i mae jio'i nasi kôho iae jovo mae jië'ëro êhu'ëro ijë'oho mae raromô'aruëjo. ⁵⁶Ae rahu nasi sinohu'ô kôhu'o ijë'oho na'ô gemu mae jio'i na jabu'ô gemu mae jëvaje hôjo. ⁵⁷Vavue daruge eni jië'ëro hijajohuro na sa'are remô'ôjade hôjo. Remô'ôjë'ëro darugoho bojemi'ëgo na hijaje hôjo. Naehu hesi darugo baeromo hijajëhi ae rahu na ijëvë'oho nasi darugoho êhi baeromo raromô'aruëjo. ⁵⁸Êhu'ëro jië'ëro ô'idôre jioromo ruvebijade i hesi jôho na majëhijë'e jëvajëjo. Jemesi hijo miono'e jabesë i mabëhe ue'ahare hôjo rôhu vuovëvade hôjo. O naehu uëvaje ioho bogo êhioho jio'i ae rahu ijë'oho bogo vuovëvo'i ma-ioro'iolemu maro raromô'aruëjo. Ahia mino'ëjo. ⁵⁹Iesuhu Capernaum hiromo God rajahijarue osare jô rôjëhijadevare evare hu ê jôho majëhijadeje.

Iesuhu jôvaje jô baejë'oho êho darugo baejarue ê hesi jôhoje.

⁶⁰Êhi majëhijamu hegorovo Iesuale ijore ijore jijiharue a ioro'ioroho ae aho'obëhe uarovareje: Êhi jië'e jôho i'ua ma'e hôjo. Nomë diehi'oromo bae'ëjarëjo. ⁶¹Bae'ëjarëjamu Iesuru hesi simanore garomo uvadeje: Nasi ijore ijore jijiharue aribôviahuro nasi jôho bijônimoromo sisë'i ataruëromo uëvadeje: Naehu ô'idôre jioromo ruvebijode jô hejarijoho jemë diehi uehorovarujëjo. Na jemë nëgajëjo na'ô jijiharujoho vuonugo'i. ⁶²Rôhu jemë gevë'oho God-are A Ma naehu urimo hijodire sionëro ajiomamu gevë'oho jemë diehi uehorovorëjo. ⁶³Hesi God-are Aru'ahohuro darugoho bojëmi'iramuru i'ovoromo mae

raromo'arujëjo. Jemesi sino hesi biriroho baeromo arijo'arije ajamirovo'ie'iroho bogo eni jëvo'ajëjo. Röhu naehu jõvaje jö ejahë'ohuro èhuro Aru'aho daruge baeromo i'ovoromo mae raromo'arujëjo. ⁶⁴Röhu a ioro'ioroho jemëro bogo ma uehorovevaruje hõjo. Èhi uëvade hesi bëhoho mami'e huhu urimo ijorajo gagovëvade majare aevoromo gëromo uvobe rovadeje: Èaribövioho bogo ma uehorovevo'iröhoho hõjo. O ë aho a hiruëmiromo na baejorovo gëvade hesi ijoraje jövejë'iröhoho hõjo. Èhi gëromo uvobe rovë'ëro èhu'ëro uëvadeje: A ioro'ioroho jemëro bogo ma uehorovevaruje hõjo. ⁶⁵Röhu hesi jö viture uëvadeje: A ioro'ioroho jemëro bogo ma uehorovevaruje hõjo. Èhuni uëvode hõjo: Aho nasi öriroho bogo ëma rueruomaje hõjo bogo eni jëvë'ëro. Ma-Vavuehu uëvë'ohuremu rueruomaje hõjo.

⁶⁶Èhi uëvamu hegorovo Iesuare ijore ijore jijiharue aribövi ioro'ioroho ae aho'obëhe hu nugo va'oruomadeje ijönöho hu'oho bogo gemuoroh jijihoruomoröhëni. ⁶⁷Va'amu gëgorovo Iesuro gëvade hesi ijoraje 12-ho èhi raromamu gëgorovo uëvadeje: Röhu jemëjo. Na jemë'o na remo va'orëjo. ⁶⁸Remo va'orëjamu Simon Peter-ro uavadeje: Bada no rahuare örire va'ojöräjo. Jero jõho jõvego èhuro no darugoho baeromo ma-ioro'ioeromu maro raromarue hõjo. ⁶⁹Iae no garomo mae uehorovoromo uvarue hõjo: God-hu baejavade A Mahuremu ja javajëjo. ⁷⁰Ja javajëjamu Iesuro uëvadeje: Jemë'o uehorovohëjo. Naro jemë ae aho'obëhe 12 baejëvode hõjo. Röhu jemesirire ae gemu hu Satan hõjo. ⁷¹Èhi uëvadeje. Röhu Satan hõ uëvade hesi bëhoho Judas Simon Iscariot-are harihu hesi jõho uëromo è'ladeje. Iesuare ijoraje aho'obëhe 12 jio'amajoho Judas hu'o ë ae gemuoho jiadeje. Röhu huro ijönö ae hiruëmiromo Iesu jabesi övore bojëmadeje. Iae èhuni Iesuro Satan hõ uëvadeje.

7

Iesuare ö ma jabuhu hesi örire bogo ma uehorovare jõhoje.

¹Èhi'amu Iesuro garomo uvadeje: Jew rajohuro anego'i nimarüeromo Judea sa'aroho bogo hi'i Galilee sa'aremu hibe juvadeje. ²Galilee sa'are hibe juvamu Jew rajo jabesi sörö maja börömoho dunovadeje. Sörö hesi ihoho Amo Harihu Ma-Jahuri Vae'amë'e Söröhoje. ³Èsörö majaho dunovamu Iesuare ö maho jaburo ri'öromo Iesu uavareje: Ave amoho nugo'i Judea sa'ahuro va'oromo jasi mu masijoho røjëhijego jasi ijore ijore jijiharue aribövioho jaburo garuomoirajo. ⁴Ae aho'obëhe jabuhu nosi iho hejëro noehu nimë'oho bogo gurihiroho muoho vaejarue hõjo. Èhuni ja mu masije vaejanue javaje jero va'oromo ma-va'orahoro muoho vaenego ae aho'obëhe garuomoirajo. ⁵Èhi uavare hesi bëhoho jabumë Iesuare ö ömo'öme jëvadeje röhu hesi öriroho bogo ma uehorovë'ëro èhuni èhi uavareje. ⁶Èhi uavamu uëvadeje: Nasi majaho bogo rovë'e hõjo ijönö rue'iröhëro. Jemëhu söröro va'irarije majaho majae aho'obëhe hõjo. ⁷Sa'are mu sisëmu uehorovoruumaje aribövioho jemesi öriroho bogo nu huodëgo varijënoho hõjo bëhe bogojio'ego. A'i nasi örire iae nue huodegarue hõjo. Rabëni hesi bëhoho naro majëhiromo uëvaje hõjo: Jemë hu sisë vaejarue hõ uëvego èhuni nue huodegarue hõjo. ⁸Jemesi iojomoromo maja börömoho vaerëjo. Nasi majaho bogo rovë'ego söröroho bogo ajiomoejõjo. ⁹Èhi uëngoromo Galilee sa'are èhi hijadeje.

Iesuhu Jerusalem ajiomoromo Amo Harihu Ma-Jahuri Vae'amë'e Sörö garomo jö røjëhijade jõhoje.

¹⁰Hijamu hesi ö ömo'ömhuro iojomareje maja börömoho vaeröhëro. Iojomamu evare Iesuro hu'o ajiomadeje. Bogo va'orahoroho ajiomo'i ma-saginiëri ajiomadeje. ¹¹Saginiëri ajiomamu Jew rajo a masijohuro sörö ririre Iesu nahoromo uvoruomadeje: Èaho dinö'e hõjo. ¹²Èhi atoromo ae aho'obëhe gemuore gagovë'ëro göëro göho saginiëri majahirovoro Iesuare jõho uarovareje. Uarovoromo a ioro'iorohuro uvareje: Èaho a mae hõjo. A ioro'iorohuro uvareje: Bogajo. Huro ae aho'obëhe sareramuijaje hõjo. ¹³Èhi atoromo Jew a masijoho juhuonëmiromo aho bogo va'orahoroho Iesuare jõho ato'i ma-saginiëri atoruumadeje.

¹⁴ Ĕhi'amu Iesuro sörö maja hesi ririre God-are amo börömore ajiomoromo ae jöe majëhijadeje. ¹⁵ Jöe majëhijamu hegorovo Jew rajohuro tiöromomo uvareje: Ae gö hu bogo röjahijë'e höjo. Ĕhi jïë'oho hu diehi'oromo nuni aji'e jioromo jöho majahuijajëjo. ¹⁶ Jöho majahuijajëjamu Iesuro uëvadeje: Naehu röjëhaje jöho bogo naehu uehorovoromo röjëhi'i sa'are na remö'öjade ahuro bojemijë'ero röjëhijaje höjo. ¹⁷ Ae rahu God-hu nimaje mu vae'i nimë'oho ë ariböviohuro garomo uvoruomo'ajëjo: Nörö bogo hesi simanëremuoho jöho ëma röjahui'i a'i God-ro jöho bojamijego röjahuijaje höjo. ¹⁸ Ae rahu jabesi simanëremu jö majëhijë'oho jö majëhijarue hesi bëhoho jaburo nimoruomaje höjo jabesi ihoho döro jiojöro. O noehu naguë'oho ramuö'öjamu rovare a hesi iho döro jiojöro naguë'oho ëhi javuë'e aribövioho sareroho bogojavuo'i ma-maemu javuaje höjo. ¹⁹ Jemë'o uehorovohëjo Moses-ro God-are jögoroho jemë bojemijade höjo. Röhu jemë bogo ae gemu vadu'oho jögoroho ejaharuje höjo. Jemë rabëni ë jöho ahoromo anego'iro ë'arujëjo. ²⁰ Ĕhi uëvamu ae aho'obëhe uaruomadeje: Sarerivanuëjo. Sisëhuro baejavë'ero simane sisërëromomo jövanuëjo. Raro ja anago'ië'ego uvanuëjo. ²¹ Uvanuëjamu Iesuro uëvadeje: Naro mue gemu vaejamu jemë ae aho'obëhe tiöromomo uehore gö gö baejë'e jëvajëjo. ²² Röhu Moses-ro aharihu jabesi sino tarivëho'irarije muoho bojemijade höjo. Bogo huro aevoromo bojëmi'i a'i urimore jemesi a mamiohuro aevoromo bojemijare höjo. Bojëmijë'ero ëhu'ero jemëro nuho majaro mue vaeromo aharihu jabesi sinoho tarivëharuje höjo. ²³ Nuho majaro jemëro a sino tarivëharuje muoho vaejaruje höjo Moses-are jögoroho ahöjööni. A'i nuho majare naro a hesi sinoho avohahamu marë barëjade höjo. Ĕhi jïë'oho röhu jemë rabëni uvarujëjo: Nöröro nuho maja hesi jögoroho ahade höromomo nasi öriroho dëho vörönimarujëjo. ²⁴ Ĕhi'oromo jemë nasi muoho ma-döemu garomo mevoromo nasi öriroho dëho vörönëgajëjo. Nadi ëhioho ë'i nasi mu öroho ma-avoho garomo mevorëjo.

Ariböviohuro uarovareje: Na böröme namiromomo ajamui'iröhe aho Iesu höjo o bogajo. Ĕhi uarovare jöhoje.

²⁵ Ĕhi uëvamu gagorovo Jerusalem amo rajo a ioro'iorohuro uarovareje: Ĕaho nosi a masijehu ano'ië'arue aho höjo. Na mae-ëjo. ²⁶ Röhu gahëjo. Hu a nunire jöe jövajëjo röhu nosi a masijohuro hesi öriroho jöho bogo ua'i ma-nunëremu gavaruëjo. Na jabumë garomo uvaruëjo: Ĕaho böröme namiromomo ajamui'iröhe aho höromomo ëhioho ë'aruëjo. ²⁷ Röhu böröme namiromomo ajamui'iröhe aehu rovë'iroho hu di amore jioromo rueröhoho no dadivavuo'ajëjo. A'i ë aho di amore jioromo rovadoho iae no gavaruëjo. Ĕhuni hu bogo ë aho höjo.

²⁸ Ĕhi atamu Iesuro hejadeje. Heromo God-are amo börömore hiromomo jöho majëhiromomo ma-darugo'o uvadeje: Jemëro uvarujëjo: Noro nörö iae mae gavaruëjo. Di amore jioromo rovadoho ëhu'o gavaruëjo. Röhu jemë bogo avoho gevaruje höjo. Na bogo nasi ëma rue'i Vavuohuro remö'öjamu rovode höjo. Ĕaho hu mae höjo. Röhu jemë hu bogo gavaruje höjo. ²⁹ Naro hu gavaje höjo naro hu'o jiamu huro na remö'öjamu rovë'ero jevë'ero. ³⁰ Ĕhi uëvamu hegorovo guduamo'ië'oromo hesi majaho bogo rovë'e jiamu vuonugareje. ³¹ Vuonugamu a ioro'ioroho aho'obëhe Iesu mae uehorovareje. Mae uehorovoromo uarovareje: Böröme namiromomo ajamui'iröhe aehu rovë'iroho na huro ave aho iosiramirobomo bëhi'e mu masijoho vae'a'ajëjo. Bogajo. Ĕhuni nani hu ë rueröhe a böröromoho höjo.

Iesu guduamo'iröhego atovarue aribövi rëmö'öjamu rueruomade jöhoje.

³² Jö ëhi vaerovobe rovaruoho Pharisee ariböviohuro hejareje. Heromo jabu'o priest masijohu'o ëho jaburo jabuni atovarue aribövi ioro'ioroho rëmö'öjareje va'oromo Iesu guduamo barueröhëgo. ³³ Ĕhi'amu Iesuro ae uëvadeje: Majae ma-bunemu jemë'o hiromomo rëmö'öjamu rovode a hesirire vuonorö'ö va'ejöjo. ³⁴ Va'iramu jemëro na nahevoromomo bogo birohevo'arujëjo. Naehu hi'irodire jemëhu ë ö'irarijoho bogo eni jëvo'ajëjo. ³⁵ Ö'irarijoho bogo eni jëvo'ajë uëvamu Jew rajo a masijohuro uarovareje: Ĕaho dinö'e va'ego no bogo biroho'iröhego uövuajëjo. Na hu Jew rajehu sa'a göre va'o raromaruire ë va'oromo God rumo'e aribövioho jöe röjëhi'iröhëni uvajëjo o dinö'e va'i uvajëjo. ³⁶ Hu uvajëjo: Jemë na

nahevoromo bogo birohevo'arujėjo. O naehu hi'irodire jemėhu ò'irarijoho jemė bogo eni jėvo'ajėjo. Ĕhi jiė'e jėho hu diehi jėvoromo Ĕ'ajėjo.

A i'ovėvaje jovo hesi jė Iesuhu jėvadohoje.

³⁷ Ĕhi'amu sörö maja böröme jiobe ruejuvo ijo tugoho'i maja börömo maho rovadeje. Rovamu evare Iesuro döre ri'ò namiromo ma-darugo'o uvadeje: Jovo ue'aho'i nėgė'iroho nasi öröro rueromo irėjo. ³⁸ Ae rahu na mae uehorovevė'oho God-are surire jė jajivoromo uvarėhi Ĕhi jėvo'ajėjo. Ĕhesi bėhoho ae rahu mae uehorovevė'oho a i'ovėvaje jovohuro jemesi dė vövöbajo'ere jioromo rojomoromo suorovo va'iramu aho i'ovėvo'ajėjo. ³⁹ Ĕjovo jė hesi bėhoho God-are Aru'aho hesi jėho jėvoromo Ĕ'adeje Iesu mae uehorovarue ariböviohuro ijonö Ĕho bae'iröhego. Iesuhu Ĕhi jėvade majaroho Aru'ahoho bogo sa'aroho nugö'öjė'e jiadeje Ĕ hesi bėhoho Iesu ò'idöroho bogo ajiomoromo ajoho baejė'ero.

Iesuare jė ae göehu gö uehorovo'i ae göehu gö uehorovare jėhoje.

⁴⁰ Ĕhi jėvamu hegorovo a ioro'ioroho ae aho'obėhe uvareje: Ĕaho iae jė God-aro baeromo majahuijaje a börömo rueröhego muebejaruoho hōjo. ⁴¹ A ioro'iorohuro uvareje: Ĕaho böröme namiromo ajamui'iröhe aho hōjo. A ioro'iorohuro uvareje: Hu bogo Ĕ aho hōjo. Hu Galilee rajo ae hōjo. Röhu böröme namiromo ajamui'iröhe aho bogo Galilee sa'aroho jioromo rue'a'ajėjo. ⁴² A'i God-are surire jajivoromo uvė'e hōjo: Böröme namiromo ajamui'iröhe aho David-are ujoho jiė'ero David-hu hijade ame Bethlehem Ĕ raho'a'ajėjo. A'i Iesu Galilee rajėro jiė'ero Ĕhu'ero hu bogo Ĕ uehorovarue a börömo hōjo. ⁴³ Ĕhi atoromo ae aho'obėhe Iesuare jėho jėe gö gö uehorovareje. ⁴⁴ A ioro'iorohuro Iesu guduamo'i nimareje. Röhu aho hesi sinoroho övoho bogo bamareje.

Jew rajo a masijehu Iesu bogo ma uehorovare jėhoje.

⁴⁵ Ĕhi'amu Pharisee ömo'ömohuni priest masijohuni atovarue ariböviohuro mami'e Iesu guduamo barue'i va'ė'ero övemu vuonorö'ö rovamu gėgorovo jabesi masijohuro uėvareje: Jemė rabėni hu bogo guduamo barovarije hōjo. ⁴⁶ Barovarije hōjamu uėvareje: Urimė'i aehu bogo Ĕhi jiė'e jė ma jėvamu hejaroho Ĕ iahuro jė maho jėvamu hegoro Ĕhuni vuonugare hōjo. ⁴⁷ Vuonugare hōjamu Pharisee ariböviohuro uėvareje: Na hu jemė'o sarerėmiromo jaguvėvade hōjo. ⁴⁸ Jemė gavarujoho di a masijohuro o di Pharisee ahuro hesi öröroho maho uehorovė'e javuajėjo. Bogo'e hōjo. ⁴⁹ Hesi ma-raromo jijihoe vaejarue ariböviohuremu Iesu mae uehorovarue hōjo. Jabumė Moses-are jėgoroho bogo hejaruero jiė'ero Ĕhu'ero God-are i'uoho baeruomo hesi hōjo. ⁵⁰ Pharisee ömo'ömohuro Ĕhi uėnugoromo jabesi ae gemu Nicodemus-ro mami'e Iesu ga'i va'adohuro ri'öromo uėvadeje: ⁵¹ Ĕjėho bogo maehu hōjo. No aho bogo Ĕma uavarue hōjo: Sisėro va'ėjo. Nosi jėgoroho bogo Ĕhioho hōjo. Urimo huro hesi jė'ero jėho jėvego heromo huhu rabe rabe Ĕ'adoho heromo evare uavarue hōjo: Ja i'ue baejė'e javajėjo. ⁵²⁻⁵³ Ĕhi uėvamu sivoromo uavareje: Sareri ae javajėjo. Na ja Iesuare sa'ae gemuho Galilee rajėro javė'ero Ĕhuni ja hesi öroho avohanuėjo. Röhu ja'o God-are surire jėho avoho adahoromo ganėjo jė God-aro baeromo majahuijarue aehu Galilee sa'are jioromo rueröhe jėho bogojajoho.

8

Magonahehu a goho'amamu garomo Iesuare nunire bavare jėhoje.

¹ [Ĕhi'amu ae gemu gemu jabesi osaėro osaėro va'irėgoro Iesuro aruhe Olives Dahorure ajiomadeje. ² Ajiomoromo niavė'ero sue'o ri'öromo God-are amo börömore vuonorö'ö rovadeje. Rueromo gavade ae aho'obėhe hesi bėhire rueruomamu gėgorovo sa'aro hiromo aevoromo jėho rėjėhijadeje. ³ Jėho rėjėhijamu gagorovo Moses-are jėgoru öri rėjėhijarue ariböviohu'o Pharisee ömo'ömohu'o Ĕho jaburo masuvė'e magonahe gemu hu'irae baeromo rovareje mami'e Ĕ magonahuro ae gö'o niavamu aėro garomo gud-uamė'ero. Hu'irae barueromo ae aho'obėhe jabesi nunire nugareje. ⁴ Nunire nugoromo Iesu uavareje: Tisa ave magonahuro ae gö'o niavamu aėro gavare hōjo. ⁵ Röhu mami'e Moses-ro jėgoroho jajivoromo uėvuade hōjo Ĕhi jiė'e magonahoho munėro

vajami'iröhego. Röhu ja diehi uehorovanuëjo. ⁶ Ëhi uavare hesi bëhoho jabumë nimareje Iesuro jöe sisë'i jövego jöho jaburo court-re huruoho majëhi'iröhëro. Ëhuni ëhi uavareje. Ëhi uavamu hegoro vo Iesuro jöho bogo uëv'e ma-uruho'amoromo övo namëro sa'are jajivadeje. ⁷ Sa'are jajivamu jö ua ga'i arijaroho bogo mana uëv'e ma-sa'are jajivojuvo hujeji ijönö ririrohoromo uëvadeje: Jemë di aharo sisë rumo'e javego aevoromo munëro vajamijëjo. ⁸ Munëro vajamijëromo röhu maho uruho'amoromo sa'are jajivadeje. ⁹ Sa'are jajivamu huhu jövade jöho heromo ë ariböviohuro va'oruomadeje. Ama'i mavojoho jaburo aevoromo huruomoromo gemu gemu ri'ö va'öjuvo ijore a i'oho va'amu barëjadeje. Barëjamu Iesu hesi sivue jio'i magonahoho hesi nunire ë namijë'e jideje. ¹⁰ Namijë'e jiamu Iesuro ririrohoromo magonahoho uavadeje: Ma'ino aribövioho din'ö'e jioruomajëjo. Na jasi sisë mevoromo i'lu bojami'iröhe aho bogohöjo. ¹¹ Uavadeje: Bada ae bogohöjo. Ëhi uavamu uavadeje: Ëhi jii'öho na'o jasi jö sisëho bogo jövoromo i'uocho bojami'ejöjo. Va'oromo nadi ijoho ëhi jii'e muoho vaenëjo.]

Iesuhu sa'ae aho'obëhe ajivavuaje jö huhu jövadohoje.

¹² Ëhi'ë'ëro Iesuro röhu maho jöe majëhiromo uëvadeje: Na ajoho jev'ëro sa'ae din'ö'e din'ö'e ajivëvaje höjo. Ae rahu nasi ijore ijore jijihë'iroho bogo mae bogo ramoramoroho jijihö'i ajoho baeromo maro raromo'aruëjo. ¹³ Maro raromo'aruëjamu Pharisee ömo'ö-mohuro uavareje: Röhu jero jasi sivue jasi jöho majahuirromo uövuanuëjo: Nasi jöho mae höjo. Ëhi jii'öho no jasi jöho diehi maho uehorovo'ëjarëjo. Öre bogohöjo. ¹⁴ Öre bogohöjamu uëvadeje: Iae mae-ëjo. Iae na nasi sivue jöho majëhijajëjo. Röhu nasi jöho iae mae höjo. Rabëni hesi bëhoho na din'ö'e jioromo rovodoho o din'ö'e va'irodoho naro gavaje höjo. Jemë ëho bogo gavaruje höjo. ¹⁵ Jemëro ma-sa'a hesi uehore baeromo ae magonahe sisëro bahijaruje höjo. Na bogo aho sisëroho bahijaje höjo. ¹⁶ Röhu na sisëro bahi'i uehorovo'ibejöö sareri'e jöho bogo uehorovo'i ma-mae ë'ibejöö. Rabëni hesi bëhoho na bogo nasi sivuoho mevoromo jöho jövo'i na'o Vavue rem'ö'jadohu'o noro niö'iro mevoromo jöho majëhijaruje höjo. ¹⁷ Ëhesi jöho jemesi jögoru surire ave jöho jajivoromo uv'e höjo: Ae niö'iehu mu garomo ajamirovoromo jöe gemuoho majëhijamu gavë'oho uvorëjo: Jabesi jöho iae mae höjo. Ëhi jajiv'e höjo. ¹⁸ Naro nasi jöho majëhijego nasi Vavue sa'are rem'ö'jadohuro hu'o nasi jöe gemuoho majëhijaje höjo. Ëhuni nasi jöho iae mae höjo. ¹⁹ Mae höjamu uavareje: Röhu jasi Vavuoho din'ö'e höjo. Din'ö'e höjamu Iesuro uëvadeje: Jemë na'o nasi Vavuohu'o bogo gövuaruje höjo. Jemë na ge'ibejarijëjo nasi Vavuohu'o ga'ibejarijëjo.

²⁰ Iesuro God-are amo böromore hiromo God-ni suvuoro bahijaruje osare jö röjëhijadevare evare ë jöho majëhijadeje. Majëhijamu aho hu bogo guduamo bava'areje hesi majaho bogo rov'ëro jii'ëro.

Iesuro uëvadeje: Naehu va'irodire jemë'o ë ö'irarijoho bogo eni jëv'ajëjo. Ëhesi jöhoje.

²¹ Ëhi ë'ë'ëro iae Iesuro jöe gö Jew rajoho majëhiromo uëvadeje: Naro öre gö va'ejöjo. Va'iramu jemëro nahevo'aruëjo. Nahevo'iramu röhu mu sisë'e jëvoromo vuovëvo'ajëjo. Vuovëvo'iramu naehu va'irodire ë ö'irarijoho bogo eni jëvo'ajëjo. ²² Bogo eni jëvo'ajëjamu rue Jew rajohuro uarovareje: Huro uövuaëjo: Naehu va'irodire ë ö'irarijoho bogo eni jëvo'ajëjo. Hu diehi uöromo jövajëjo. Na hu anorovo'i jövajëjo. O diehi ë'iro jövajëjo. ²³ Diehi ë'iro jövajëjamu Iesuro uëvadeje: Jemë ave sa'are sisë'i raromaruje aribövio jëvo'i na aruhe döre jioromo ruvebijë'e jëv'ajëjo. Jemë ave sa'aho raje jëvo'i na bogo ave sa'a rajehu jëvo'i dö raje jëv'ajëjo. ²⁴ Ëhuni uëv'ajëjo: Jemë sisë'e jëvoromo vuovëvo'ajëjo. Jemë bogo ma uehorovevoromo uv'öho: Nöröhu uëvaje ë aho hö uv'öho sisë'e jëvoromo vuovëvo'ajëjo. ²⁵ Vuovëvo'ajëjamu uavareje: Ëhi jii'öho ja rahuo javajëjo. Ja rahuo javajëjamu uëvadeje: Na aevoromo uëbe rovode ë aho jëv'ajëjo. ²⁶ Jemesi mu sisë jöho aho'obëhe nasiriho jiajëjo jövo'irodoho. Röhu rem'ö'jadade aehu uevamu hejode jöho na ëhuremu jövaje höjo sa'are raromaruje aribövioho jemëro hejöö rabëni hesi bëhoho rem'ö'jadade aho jö maemu jövajëro jii'ëro.

²⁷ Ĕhi uėvamu jaburo bogo avoho uehorovoromo uvareje: Remō'ōjade hō uōvuaje aho Vavuoho hōjo. ²⁸ Bogo ĕhioho uvoruomamu Iesuro uėvadeje: God-are A Maho na banigojiomevoromo dōre nugevė'iroho evare jemė avoho garomo uvo'a'arujėjo: Nōrōhu uėvaje ĕ aho hōjo. Evare jemė garomo uvo'a'arujėjo: Na bogo nasi simanoho muoho vae'i Vavuehu rōjehijade jōhuremu jōvaje hōjo. ²⁹ Remō'ōjade ahuro bogo vuoroemiromo va'i na'o hijaje hōjo hu nimaje muoho naro majae ĕhi vaejajego. ³⁰ Ĕhi uėvamu hegoroovo ae aho'obėhe hesi ōrire mae uehorovareje.

Sisė hesi darugore raromaruoho Iesuhu jiovėho'i uvade jōhoje.

³¹ Jew rajo ioro'iorohuro Iesuare jōho mae uehorovamu gagorovo uėvadeje: Jemė nasi jō ejehonōvė'oho nasi ijorajo mae jėvo'ajėjo. ³² Ĕhi jėvo'iramu jō maho ga'a'arujėjo. Jō maho garomo ĕhuro ijonōho i'u'e mu hesi uhure jėvajoho barėjėvo'i ma-sasohė'e mu hesi aharire jėvo'ajėjo. ³³ Jėvo'ajėjamu uavareje: Iae ĕhi hōjo rōhu no Abraham-are ujo ōmo'ōmėro javuė'ėro avare i'u'e mu hesi uhuroho bogo raromobe rovė'e javuajėjo. Ĕhi jiė'oho ja diehi uōromo ĕ'anuėjo: I'u'e mue jėvajoho barėjėvo'ajėjo.

³⁴ Barėjėvo'ajėjamu Iesuro uėvadeje: Ave jōho na jō mae uė'iė'ajėjo. Ae rahu sisė vaejaruoho mu sisė hesi uhure jioruomajėjo. ³⁵ I'u'e mu vaemu vaejarue aribōviohuro aganohu'o ma-jahuri raromoi' harihu ōmo'ōmohuro aganohu'o ma-ioro'ioemu raromaruė hōjo. ³⁶ Jemė i'u'e mu hesi uhure jėvamu Harihu naehu tugohėhė'oho ĕhuro iae mu ma hesi aharire jėvo'ajėjo. ³⁷ Iae na garomo uvajėjo: Jemė Abraham-are a uje jėvajėjo. Rōhu nasi jōho bijōnėgo'ego ĕhuni anego'iė'arujėjo. ³⁸ Nasi Vavuehu rōjehijamu gavode jōho naro jōvaje hōjo. A'i jemėro jemesi vavuehu uėvamu hejarije jōho ejahoromo ōmaruje hōjo.

³⁹ Ōmaruje hōjamu uavareje: Rōhu nosi aevo'i jiade vavuoho Abraham jio'i no hesi ujo ōmo'ōmoho javuajėjo. Hesi ujoho javuajėjamu uėvadeje: Iae ĕhi jėvajėjo rōhu jemė Abraham-are ujo mae jėvo'ibejajo huhu mu ma vaejade ĕhi jiė'e mu maho vae'ibejarijėjo. ⁴⁰ God-hu uevamu hejode jō maho majėhibe rovode hōjo rōhu jaruoho jemėro na anego'iė'arujėjo. Abraham ĕhi jiė'e muoho bogo vaenōvade hōjo. ⁴¹ Jemesi vavuehu sisė'i ĕ'adėhi ĕhi ĕ'arujėjo. Ĕhi ĕ'arujėjamu uavareje: Asė'e no bogo ōbiehu javuo'i God gemu nosi Vavuoho hōjo. No hesi ujo mahuremu javuajėjo.

⁴² Ujo mahuremu javuajėjamu Iesuro uėvadeje: Jemė ĕhi uvarujėjo rōhu jemesi Vavuoho God jio'ibejajo nasi ōrire rajehi'ibejarijėjo. Rabėni hesi bėhoho na God jiajire jioromo rovodoho aviae jėvajėjo. Bogo nasi ma-rue'i God-ro na remō'ōjamu rovode hōjo. Rōhu jemėhu bogo rajehijarujohuni ĕhuni God bogo jemesi Vavuehu hōjo. ⁴³ Jemė rabėni nasi jō bėhoho bogo avoho hejarujėjo. Nasi jōho bijōnėgo'ego ĕhuni ĕ'arujėjo. ⁴⁴ Jemė jemesi vavu hesi agane gemuoho jėvajėjo. Rōhu jemesi vavuoho Satan hōjo. Jemesi vavuehu nimajėhi ĕhi ōmo'i nimaruje hōjo. Ni'i'ivadire Satan-ro aevoromo ae muo'amobe rovė'e hōjo. Hu ma-sareri'e jōemu uehorovajėro ĕhuni hu jō maho bogo ajamijaje hōjo. Hu sareri'e jō jōvė'iroho hesi muoho ĕhi jiė'ėro ĕhu'ėro hu ĕhi gemu muoho vaejaje hōjo rabėni sareri'e mu hesi bėhoho hu jiė'ėro sareri'e jōhemu uehorovajėro jiė'ėro. Jemė'oho ĕhi gemuoho jėvajėjo. ⁴⁵ Naehu jō ma jōvajoho ĕho bijōnimoromo jemė nasi jōho bogo ma uehorovaruje hōjo. ⁴⁶ Di aho ja nasi sisė garomo huruoho'iranoho eni javajėjo. Nasi sisėho bogojiė'ėro jemė huruoho'irarujoho bogo eni jėvajėjo. Naehu jō ma majėhijajoho jemė rabėni nasi ōriroho bogo maho uehorovevarujėjo. ⁴⁷ God-are aganoho hesi jōho hejarue hōjo. Rōhu jemė bogo God-are agane gemuoho jėvė'ėro ĕhu'ėro hesi jōho bogo hejaruje hōjo.

Iesuro uėvadeje: Abraham bogo rahadevaroho evaroho naro hibe rovode hōjo. Ĕjōho Iesuhu jōvadohoje.

⁴⁸ Ĕhi uėvamu Jew rajohuro Iesu birevoromo uavareje: Iae no mae uavare hōjo: Ja sareri'e Samaria rajo va'ėne javanovajėjo. Satan-are a sisėho jasi dėre jiajėjo. ⁴⁹ Jiajėjamu uėvadeje: Satan-are aho nasi dėroho bogohōjo. A'i naro nasi Vavu hesi ihoho banigojiomego dōro jiaje hōjo. Rōhu jemėro nasi ihoho sisė vaejeharujėjo sa'aro jiehojōro. ⁵⁰ Rōhu nasi ihehu dōro jiorōhoho ĕho bogo naehu uehorovo'i a'i A Gōhuro iae uehorovaje hōjo. Ĕho

uehorovoromo huro böröme namiromoma nasi jöho mae mevehaje höjo. ⁵¹ Ave jöho na jö mae ue'ië'ajëjo. Ae rahu nasi jö ejehë'oho ijonöho bogo mae bogo vuovëvo'ajëjo. ⁵² Bogo vuovëvo'ajëjamu rue Jew rajohuro uavareje: Avejê'oho iae no gavaruoho Satan-are a sisëho jasi dëre jiajëjo. Abraham'o jö God-aro baeroma majahuinöväre a masijohu'o mami'e vuovobe rovë'e höjo. Röhu jero uövuanuëjo: Ae rahu nasi jö ejehë'oho bogo mae bogo vuovëvo'ajëjo. ⁵³ Nosi aevo'i jiade vavuoho Abraham guomade höjo. Na jero uvanuëjo: Na Abraham iosiramijë'e a böröme jevajëjo. O jö God-aro baeroma majahuinövade aribövioho vuovobe rovë'e höjo. Diehi jië'e aharo nimoronimorohë'i jövanuëjo. ⁵⁴ Jövanuëjamu Iesuro uëvadeje: Naro nasi ihoho banigojiomoma'ibejêjo ëho bëhe bogojio'ibejajo. Röhu nasi Vavuohuro nasi ihoho banigojiomehego döro jiaje höjo. Ëaho jemëro uvaruje höjo: God nosi Börömoho höjo. ⁵⁵ Röhu jemë hu bogo gavë'e jëvajëjo. Naro iae hu gavaje höjo. Na ue'i'ibejêjo: Na hu bogo gavaje hö ue'i'ibejêjo jemë jö sareri'e ae jëvajëhi na ëhi jië'e ae jevo'ibejajo. Röhu iae naru hu garoma hesi jöho ejahaje höjo. ⁵⁶ Jemesi aevo'i jiade vavuoho Abraham-ro naehu hijode maja ga'iröhohuni ëhuni nimoroho avohade höjo. Nimorohë'ëro naehu hijode majaho iae hu gavamu dë sasohade höjo. ⁵⁷ Dë sasohade höjamu rue Jew rajoho jaburo uavareje: Sarerivanuëjo. Hu mami gö gö'e guomadoho ja vadune aho'obëhe 50-ho bogo baejë'e javajëjo. Ëhi jië'oho ja diehi'oroma Abraham gavane höjo. ⁵⁸ Gavane höjamu Iesuro uëvadeje: Ave jöho na jö mae ue'ië'ajëjo. Abraham bogo rahadevaroho na urimoho jevë'e jiade höjo. ⁵⁹ Ëhi jövamumu hejë'i vajami'irögoro munëho ujuohareje. Ujuohamu Iesuro gurihirovë'ëro God-are amo börömoho nugo'i va'adeje.

9

Iesuhu nuni ramoramovë'e a ajamamu marëjade jöhoje.

¹ Iae Iesuro juvo va'adeje. Va'ihö gavadeje nuni sisë'e ae gemu hijamu rahade majare aevoroma hesi nunoho sisë'rëjëvë'ëro jië'ëro. ² Ëaho ë hijamu gagorovo Iesuarë ijorajo ömo'ömohuro uavareje: Tisa rahuare sisëro ëhuro nuni sisë'oho rahade höjo. Na hesi sisëro o hesi vëmu vavu'o jabesi sisërajo. ³ Ëhi uavamumu uëvadeje: Bogo hesi sisëhuro o bogo hesi vëmu vavu'o jabesi sisëhuro ëhuro nunoho sisë'rëjade höjo. A'i sisë'rëjade hesi bëhoho jemë ga'irarijëgo God-ro hesi darugohuro diehi ajamego mae jiajoho iae ëhuni nuni sisë'oho jiade höjo. ⁴ Aji maja jiajevare evare sa'are remö'öjade aehu nimaje muoho no vaenövo'ëjarëjo. Vahiromavuo'ië'ajëjo. Evaroho aehu mu vae'iröhohoho bogo eni jio'a'ajëjo. ⁵ Na ave sa'are hijajevare evare na ajoho jevë'ëro sa'ae aho'obëhe ajivëvaje höjo.

⁶ Ëhi uënuigoroma sabëro sa'aho ödivoroma tevoroma övëro hatohatovoroma nuni sisë'e a hesi nunoho buejahadeje. ⁷ Buejahoroma uavadeje: Siloam jovo e'uoro va'oroma nu ano'oho eguëjo. Röhu Siloam nosi jöehu huotovë'oho nugö'öjade jöhoje. Nu ano'oho eguëjamu hegorovo rue nuni sisë'e ahuro va'oroma nu ano'oho eguoroma mae uherihoroma vuonorö'ö rovadeje.

⁸ Rovamu hesi amo rajohu'o a ioro'iorohu'o böviëni bise'ëni ëninëmi'ëgo ganövä'ëro jaburo uarovareje: Ave iaho urimë'i hiromoma noehu ajamijëro ëninamuinövade aho höjo. Na mae-ëjo. ⁹ Na mae-ëjamu a ioro'iorohuro uavareje: Io'ajjo. Iae ë aho höjo. A ioro'iorohuro uavareje: Bogajo. Ae gö ë iaho va'ëne höjo. Ëiaho va'ëne höjamu rue ahuro uëvadeje: Na bogo ae göehu jevo'i jemesi örire ëninëmijode aho jevajëjo. ¹⁰ Ëninëmijode aho jevajëjamu uavareje: Ëhi jië'oho diehi'amu jasi nunoho marëjahade höjo. ¹¹ Marëjahade höjamu uëvadeje: Ae gemu hesi ihe Iesu ë ahuro busasovë'e sa'aho hatohatovoroma nunoho buejhoroma uevade höjo: Siloam jovo e'uoro va'oroma nu ano'oho eguëjamu naru va'oroma eguoroma evare mae uherihode höjo. ¹² Mae uherihode höjamu uavareje: Röhu hu dinö'e höjo. Dinö'e höjamu uëvadeje: Hesi nani'ajjo.

¹³ Ëhi uëvamumu ë urimo nuni sisë'e jiade aho ë ariböviohuro hu'irae baeroma Pharisee aribövi jabesirire va'areje. ¹⁴ Röhu mami'e Iesuhu busasovë'e sa'a hatohatovoroma

ë ia hesi nuni dadovahade majaho Jew rajehu mu bogo vae'i ma-nuharue majaho jiadeje. ¹⁵ Ma-nuharue majare Iesuro nunoho dadovahê'ego Pharisee aribövioho jabu'o jõe gemuoho uavareje: Diehi'amu jasi nunoho marëjahade hõjo. Marëjahade hõjamu uëvadeje: Huro busasovê'e sa'aho hatohatovoromo nunire buejehamu naro va'oromo nu ano'oho egue'ëro êhu'ëro mae uherihaje hõjo. ¹⁶ Mae uherihaje hõjamu Pharisee aribövi ioro'iorohuro uvareje: O ê ahuro nunoho dadovahoromo êhuro nuho majaha hesi jögoroho ahade hõjo. Êhu'ëro ë aho bogo God-hu nugö'õjamu rové'e aho hõjo. Bogo God-hu nugö'õjamu rové'e aho hõjamu Pharisee a ioro'iorohuro uvareje: Iae êhi hõjo rõhu hu a sisê jio'ibejajo hu diehi'oromo êhi jiê'e mu masijoho vae'ibejajo. Êhi uarovoromo Pharisee ariböviohuro jõe gö gö uehorovo'amareje. ¹⁷ Jõe gö gö uehorovoromo urimo nuni sisê'e jiade aho rõhu maho jõe majahiromo uavareje: Jero uövuanuëjo: Huro nasi nunoho dadovehade hõjo. Êhi jiê'oho ja uehorovanuoho hu diehi jiê'e ae hõjo. Diehi jiê'e ae hõjamu uëvadeje: Hu jö God-aro baeromo majahuijaje ae hõjo.

¹⁸ Rõhu rue Jew rajohuro uvareje: Nani sareramuiromo uövuaruëjo: Aevo'i nuni sisê'e jiadoho avevejö'oho gavajëromomo ae uëvareje: Uëvego ave a hesi vëmu vavu'ohuro rue'irarëjo. ¹⁹ Jabumê rovamu uëvareje: Na ave aho jemesi harihe hõjo. Jemê uövuarije hõjo: No ave harihu baejare majare evare hu aevoromo nuni sisê'e jiade hõjo. Na mae o sarerëjo. Mae jiê'oho diehi'ê'ëro jaruvoho hu mae uherihajëjo. ²⁰ Mae uherihajëjamu rue vëmu vavu'ohuro uëvareje: No gavaruoho ave aho iae hu nosi harihe hõjo. No hu baejarevare evare aevoromo nuni sisê'e jiade hõjo. Êjõho iae no gavaruëjo. ²¹ Rõhu rahuhu diehi ajamamu nuni dadovadoho no bogo gavê'e javuajëjo. Jue'io ua garego huro hesi jö'ëro majëhi'irajo hu bövie jiaje. ²² Rõhu vëmu vavu'ehu ë jö uëvare hesi bëhoho jaburo ë Jew rajo masijoho juhuonëmijareje. Urimé'i ë a masijohuro jõe mevoromo ae aho'obêhe uëvareje: Ae rahu huruoho majahuiromomo uövüë'oho: Bөрөme namiromomo ajamuijaje aho Iesu hõ uövüë'oho êhi jiê'e aribövioho noro ahëvo'iramu ijönõho nosi osa bөрөmoroho bogo rueromo God rajahinõvo'aruëjo. Êjõho uehorovoromo vëmu vavu'ohuro juhuonëmijareje. ²³ Juhuonëmiromomo êhuni uëvareje: Êaho bövie jiaje êhuni jemëro hu ua garëjo.

²⁴ Hu ua garëjamu hegorovo rue a masijohuro jõe nugö'õjareje urimo nuni sisê'e jiade ahuro vuonorö'õ ruerõhego. Jõe nugö'õromomo rovamu Iesuarue jõho atoromo uavareje: God-are nunoro jõe ma-maemu jëvego no hejarëjo. No gavaruoho ë aho a sisê hõjo. ²⁵ A sisê hõjamu uëvadeje: Na'o bogo gavajëjo. Nani hu a sisê hõjo o bogajo. Rõhu jõe gemu iae na gavajëjo urimo nuni sisê'e jevadoho jaruvoho mae uherihevo'ego. ²⁶ Êhi uëvamu uavareje: Hu diehi'avade hõjo. Hu diehi nunoho dadovahade hõjo. ²⁷ Dadovahade hõjamu uëvadeje: Na mami'e uëvamu jemëro bogo ejeharije hõjo. Rabëni rõhu maho he'i nëgajëjo. Nani jemê'oho hesi ijore ijore jijihoi'ni nëgo'ego o rabëni ue ge'i arijarujëjo. ²⁸ Ue ge'i arijarujëjamu sivoromo uavareje: Ja ë ia hesi ijore ijore juvanue ae javajëjo. No bogajo. No Moses-are jögoru ijore ijore jijiharue aribövie javuajëjo. ²⁹ No iae garomo uvarue hõjo: God-ro Moses jõe bojamamu majahuijade hõjo. A'i ë a gö hesi bëhoho no bogo gavaruëjo. ³⁰ Bogo gavaruëjamu rue nuni sisê'e jiade ahuro uëvadeje: Asê'e jemê diehi'oromo hesi bëhoho bogo gavarujë hõjo. Iae huro nasi nunoho dadovehade hõjo rõhu jemê hu bogo gavarujë hõjo. ³¹ No gavaruoho God a sisê jabesi jõho bogo ejëhaje hõjo. O aehu God uehorovoromo huhu nimaje mu vaejê'oho êhi jiê'e aribövioho God-ro ejëhaje hõjo. ³² Ni'i'ivadire jioromo êhi ro avevejö'oho bogo hebe rové'e javuajëjo uvavamu: Vëmu dëre jioromo nuni sisê'e raharoho aëro nunoho dadovëhade hõjo. ³³ God bogo nugö'õjago rue'ibejajo êhi jiê'e darugo'e mu vaejajoho hu bogo mae bogo eni jio'ibejajo. ³⁴ Bogo eni jio'ibejajamu uavareje: Jasi vëmu hesi dëre jioromo mu sisëmu vaebe rové'e javajëjo. Êhi javajëjo rõhu ja diehi'oromo jögoroho bojamuijanuëjo. Êhi uanugoromo jabesi osa bөрөmoroho rarovö'õjamu va'adeje.

Ae gö dë vövöbajo'e ramoramovê'e raromarue jö Iesuhu jövadohoje.

³⁵ Ĕrarov'ojamu va'ade jŕho aĕro atamu Iesuro hejadeje. Heromo ĕ aho bihoromo uavadeje: Na ja God-are A Ma hesi ŕriroho mae uehorovanuĕjo. ³⁶ Mae uehorovanuĕjamu uavadeje: Rŕhu God-are A Maho rahuo hŕjo. Uevego na hesi ŕrire mae uehorovŕjo. ³⁷ Mae uehorovŕjamu Iesuro uavadeje: God-are A Maho jero mami'e gavane hŕjo. Rŕhu aviavejŕ'e ja'o jŕe jŕvajejo. Iae na jevajejo. ³⁸ Na jevajejamu uavadeje: Bada naro jasi ŕrire mae uehorovavajejo. Mae uehorovavajeŕomo aĕue aho hiromo rajahijadeje.

³⁹ Rajahijamu Iesuro uĕvadeje: Naro sa'are rovode hŕjo mae o sisĕ aribŕvie mevĕvo'irodĕni. Nuni ramoramo'e aribŕvioho nune dadovĕho'i ma-dŕhemu nuni ma'e aribŕvioho nune tugohĕho'irodĕni ĕhuni sa'are rovode hŕjo. ⁴⁰ Ĕhi uĕvamu Pharisee a ioro'iore bĕhire raromarohuro ĕ jŕho heromo uavareje: Na ja nosi jŕho jŕvoromo ĕ'anuĕjo. No bogo nuni ramoramo'e aribŕviehu javuajejo. ⁴¹ Javuajejamu Iesuro uĕvadeje: Jemĕ nuni ramoramo'e jĕvo'ibejajo jŕ sisĕho bogojĕvo'ibejajo. Rŕhu jemĕ ĕma uvaruje hŕjo: Iae no mae gavarue hŕjo. Ĕhuni jemesi sisĕho iae jĕvajejo.

10

Sheep-ehu raromarue amo hesi uhu jŕ Iesuhu jŕvadohoje.

¹ Iae Iesuro uhu'e uĕvadeje: Ave jŕho na jŕ mae uĕ'iĕ'ajĕjo. Ae rahu sheep jabesi amore va'iĕ'iroho bogo ojoroho va'i buoro iromaroho ruahoromo va'amu gavĕ'oho uvo'a'anuĕjo: Ĕhi jiĕ'e aho anano'e vajiohu'e ae hŕjo. ² O ae rahu ojore va'amu gavĕ'oho uvo'a'anuĕjo: Ĕho sheep muebe'amaje aho hŕjo. ³ Sheep muebe'amaje aho sheep amore va'ia'amu gavĕ'iroho ojo muebejaje ahuro ojoho jiovahego ĕ va'aje hŕjo. O sheep-ohuro hesi huĕho heruomaje hŕjo. Hejego hesi sheep gemu gemu hesi ihoho uvoromo sŕ ujuohoromo va'o amonŕ hŕrŕjaje hŕjo. ⁴ Sŕ ujuoho va'o barĕnugoromo evare jabesi nuninŕ va'ego sheep-ohuro ijore va'oruomaje hŕjo hesi huĕho heruomajĕro jiĕ'ĕro. ⁵ A ioro'ioro jabesi huĕho bogo hejaruĕro jiĕ'ĕro jabesi ijoroho bogo va'i huruomoromo va'oruomo'ajĕjo.

⁶ Ĕjŕho Iesuro uhu'e uĕvamu ĕ jŕ hesi bĕhoho bogo avoho hejareje.

Sheep muebe'amaje a maho hu Iesu jiaje jŕ Iesuhu jŕvadohoje.

⁷ Bogo avoho hejĕ'ĕro Iesuro uĕvadeje: Ave jŕhu'o na jŕ mae uĕ'iĕ'ajĕjo. Na sheep-ehu va'oruomaje ojoho va'ĕne jevajejo. ⁸ Urimo rueromade aribŕvioho anano'e vajiohu'e a va'ĕne jĕvobe rovadoho nasi sheep mahuro jabumĕ bogo ĕjĕhare hŕjo. ⁹ Na ojo va'ĕne jevajejo. Ae rahu nasirire ruaho rovĕ'oho maro jioruomo'ajĕjo. Maro jioromo ruaho rueromo osare jioromo ruaho va'oromo va'orahonŕ ioho bihoromo ue'aho'aruĕjo. Ĕhi gemu ĕ'onŕvo'aruĕjo. ¹⁰ Rŕhu anano'e vajiohu'e ahuro rueruomaje hŕjo vajiohĕro ujuohŕ'i bijuĕmo'i ijumo'amo'irovo. Naro rovode hŕjo nasi sheep ŕmo'ŕmohuro i'ovoromo maro raromorŕhego.

¹¹ Sheep muebe'amaje a maho na jevajejo. Sheep muebejaje a mahuro uvaje hŕjo: Naehu sheep jabesi jŕĕni nasi arijo'arije bojamirovoromo guomorovĕ'oho iae mae hŕjo. ¹² O ma-moniemu nimoromo ae gŕ hesi sheep muebejahaje aho ĕho bogo sheep jabesi vavuoho jio'i ma-muebe'amajĕro jiĕ'ĕro ga'irŕhe vŕrŕ'e mioho rovamu gavĕ'iroho sheep-oho rĕmŕŕŕomo ju'ebiromo va'aje hŕjo. Ju'ebiromo va'ego miohuro ro sheep-oho umi ujuoho va'ego sheep ioro'iorohuro huruomoromo arua anumiae va'aje hŕjo. ¹³ Amo a hesi sheep muebejahajohuro moniemu nimĕ'ĕro sheep-oho bogo huĕho baejĕvaje hŕjo. Ĕhu'ĕro huruomaje hŕjo. ¹⁴⁻¹⁵ A'i na sheep muebe'amaje a maho jevajejo. Vavuohuro na ge'i naehu Vavu gavajĕhi ĕhi naro nasi sheep-oho ga'amaje hŕjo. O nasi sheep-ohuro na geruomaje hŕjo. Ĕhi jiĕ'ĕro naehu sheep jabesi jŕĕni nasi arijo'arije bojamirovoromo guomorovĕ'oho iae mae hŕjo. ¹⁶ Rŕhu sheep ioro'ioroho iae jevajejo. Jabumĕ ave sheep amoroho bogo raromarue hŕjo. Bogo raromaruho jahu'o sŕjĕvo rue'ĕjŕjo. Rueromo jŕe majĕhi'iramu ĕjehonŕvo'aruĕjo. Ĕhu'ĕro jiĕ'ĕro sheep aho'obĕhe ma-gemuoro jio'i sheep muebejaje aho ma-gemu jevo'ajĕjo.

¹⁷ Vavuehu na rajehijaje hesi bĕhoho naro guomorovo'ejŕjo i'ovoromo rŕhu maho hi'irodĕni. ¹⁸ Aho bogo ma-anego'i nasi nimoromo bojamirovo'iramu anego'iramu

guomevo'ajëjo. Naehu bojamirovamu anegamu guomevë'oho iae mae hõjo. O ajamirovoromo i'ovoromo rõhu maho hijë'oho ëhu'o iae mae hõjo ëhi guomoromo rõhu maho ri'õ'irodoho nasi Vavuohuro uevamu hejë'ëro jevë'ëro.

¹⁹ Ëhi uëvamu hegorovo rue Jew rajohuro rõhu maho jõe gö gö uehorovareje. ²⁰ A ioro'ioroho aho'obëhe jaburo atoromo uarovareje: Satan-are a sisë gemuëro hesi dë vövöbajo'ere abuejë'ëro simane sisë'i uehorovoromo jövajëjo. Jemë rabëni hesi jõho hejarujëjo. ²¹ A ioro'iorohuro uarovareje: O huhu jö jövajoho bogo Satan-are a hesi dëroho abuejë'ëro jõho jövajëjo. Ëhesi bëhoho Satan-are a sisëhuro nuni sisë'e aho diehi ajamego mae jio'ibejajo. Bogajo. Ëhi atoruomadeje.

Jew rajo ariböviehu Iesuare õrيره bijõnimoruomade jõhoje.

²² Iae Jerusalem amore maja bõrõmoho rovadeje. Ëmaja bõrõmo hesi bëhoho Jew rajo õmo'õmohuro uehorovoromo uvonõvareje: Evare majare nosi a mamiohuro God-are amo bõrõmo hesi ojoho jiovoromo God-are õrيره ma-ioro'ioiremu bojamare hõjo hesi baerõhego. Ëmaja bõrõmoho runoni majae jië'iro evare rovadeje. ²³ Ëmaja bõrõmoho rovamuro Iesuro God-are amo bõrõmo hesi haradare juvadeje. Harada hesi ihoho Solomon-are Haradae jiadeje. ²⁴ Juvamu gagorovo Iesu ririre jio'i Jew rajohuro ruë numë riravo rova'oromo uavareje: Ja divare jö subivahuanooho vuonugo'iramuro ëhuro bogo dadivavuo'ajëjo. Ma-sama'e majahuijigo hejarëjo. Na ja bõrõme namiromu ajamui'irane aho javajëjo o bogajo. ²⁵ Ëhi uavamu Iesuro uëvadeje: Naro mami'e uëvode hõjo. Rõhu jemë bogo ma uehorovevaruje hõjo. Naro nasi Vavu hesi ihore mu masijoho vaejaje hõjo jemëro ë muoho garomo uvo'irarijigo: Iae mae-ëjo. Nõrõ iae a mae hõjo. ²⁶ Rõhu jemëhu na bogo ma uehorovevaruje hesi bëhoho jemë bogo nasi sheep-oho jëvajëjo. ²⁷ Nasi sheep-ohuro nasi huëho heromo ejehoruomego naru jabumë gëvaje hõjo. Gëvego jaburo nasi ijore ijore jijihoruomaje hõjo. ²⁸ Nasi ijore ijore jijihoruomego naru jabu ajëmege ma-ioro'ioiremu maro raromarue hõjo. Ëhu'ëro jië'ëro jabumë bogo mae bogo sisëroho va'oruomajëjo. O nasi õvo dõre raromaruoho aho bogo baenieh'i'aruëjo. ²⁹ Nasi Vavue jabumë baejëvoromo nasi õrيره bojemade ahuro aho'obëhe iosirëmij'e hõjo. Ëhuni Vavu hesi õvo dõre raromaruoho aho bogo baeniah'i'aruëjo. ³⁰ Na'o nasi Vavuohu'o no gemuoho javuajëjo.

³¹ Na'o nasi Vavuohu'o no gemuoho javuajëjamu hegorovo Jew rajohuro urimo munëhu vajami'ië'aroho rõhu maho munëho ujuohareje vajami'irovo. ³² Munëho ujuohamu gagorovo Iesuro uëvadeje: Vavuohuro na ajemamu mu mae aho'obëhe vae'amamu gavarije hõjo. Di mu vaejamu gavarijohuni munëho vajami'ië'aruëjo. ³³ Munëho vajami'ië'aruëjamu uavareje: Bogo mu ma hesi jõëniho munëho vajami'ië'aruëjo. A'i jero God-are ihoho ijumo'ego ëhuni ë'aruëjo. Ja ma-ae javajëjo. Rõhu jero uvanuëjo: Na God jiaje gemuoho jevajë uvanuohuro ëhuro God-are ihoho ijumanuëjo. ³⁴ Ijumanuëjamu Iesuro uëvadeje: Rõhu jemesi jõgoru surire jajivoromo ëhi uvë'e hõjo: God naru uëvajëjo: Jemë god õmo'õme jëvajëjo. ³⁵ Ëhi jajivë'e hõjo. God-are surire jõho ioro'ioiremu jiorõhe jõho hõjo. Ësurire jajivoromo uvë'e hõjo: God-are jö baejare aribövioho jabumë god õmo'õme jio'amajë uvë'e hõjo. ³⁶ Rõhu na bogo ma-God-are jõho bae'i a'i Vavuohuro na baejavoromo sa'are remõ'õjamu rovë'ëro uëvajëjo: Na God-are Harihe jevajëjo. Ëhi jië'oho jemë rabëni uevarujëjo: Jaehu uövuanuoho: Na God-are Harihe jevajë uövuanuohuro ëhuro God-are ihoho ijumanuëjo. Ëhi jië'oho bogo maehu hõjo. ³⁷ Rõhu nasi Vavuehu bojemade muoho na na vaejaje hõjo o bogo vaejaje hõjo. Bogo vaejaje jevamu gavë'oho nadi maho uehorovevorëjo. ³⁸ Rõhu Vavuehu bojemade muohuremu iae na vaejaje hõjo. Nani jemëro na bogo ma uehorovevo'aruëjo rõhu nasi muoho ëhuro garomo uvorëjo: Iae mae-ëjo. Vavuohuro ajamamu vaejade hõjo. Jemë ëhi uehorovë'oho ëhuro avoho ga barëromu uvo'a'aruëjo: Vavuohuro nasi dë vövöbajo'ere jio'i naru Vavu hesi dë vövöbajo'ere jiaje hõjo.

³⁹ Ëhi jövamu hegorovo rueho jaburo rõhu maho Iesu guduamo'ië'areje. Guduamo'i-
a'amu garaedëgoromo va'adeje.

⁴⁰ Va'adoho va'o Jordan jovocho beromo ioni gönö va'oromo John-hu aevoromo bapataeto vaejêvadire ë va'o hijadeje. ⁴¹ Va'o hijamu gagorovo ae aho'obêhe rueruomadeje. Rueromo uarovareje: John bogo darugo'e mu masijoho vaenövade höjo. Röhu ave a hesi jö John-hu majahujamu hejaroho ë jöho aho'obêhe iae mae uövüade höjo. ⁴² Èhi uarovoromo ae aho'obêhe Iesu ë öri ari'ere mae uehorovoruomadeje.

11

Lazarus guomade jöhoje.

¹ Iae guomo guomo'e ae gemu hesi ihoho Lazarus Bethany amore hijadeje. Röhu hesi ma'ine niö'i Mary'o Martha'o jabesi amoho gemuoho jiadeje. ² Röhu Mary hu majae ijönö hiromo Badare hörure ridi'e jovehu otehodivoromo simano uehu uhijaho'iröhe magonahoho jiadeje. Amo ë magonaho hesi ma'ine Lazarus-ro guomo guome baeromo hijadeje. ³ Hijamu Lazarus-are ma'ine niö'iro jöe nugö'öromo Iesu uavareje: Bada jaehu huë baejanue aho guomo guome baejê'e höjo. ⁴ Guomo guome baejê'e höjamu hegorovo Iesuro uêvadeje: Èguomo guomo baejade hesi bëhoho hu bogo ioro'ioemuoho guomo'irögoro God-are ihoho döro jioröhego. Hu guomo guome baejê'ëro ëhu'ëro God-ro ajemi'iramu hesi Harihe nasi ihohu'o dö maro jio'a'ajêjo. ⁵ Röhu Iesuro ö'o ö'o Martha'o Mary'o jabesi ma'ine Lazarus'o ëhi dë vövöbajo'e aho'o uehorovêvadeje. ⁶ Amo hejade uavamu: Lazarus guomo guome baejê'e hö uavamu heromo bogo Judea sa'aroho va'oromo Lazarus ga'irögoro ëhi hijamu majae niö'i barêjêvadeje.

⁷ Majae niö'i barêjêvamu gagorovo hesi ijorajo ömo'ömocho uêvadeje: Ruehego no Judea sa'are vuonorö'ö va'arêjo. ⁸ Va'arêjamu ijorajoho jaburo uavareje: Tisa iae mae höjo röhu avevejö'e Jew rajoho jaburo ja munëro vajami'ie'are höjo. Èhi jî'ëho ja rabëni ë sa'aroho vuonorö'ö va'ie'anuêjo. ⁹ Va'ie'anuêjamu Iesuro uêvadeje: Aveho aji majaromëro jî'ëro va'ejöjo. Jemë'o uehorovohêjo. Majae höröromo hour aho'obêhe 12 barêjêgo evare beva'aje höjo. Èhu'ëro ae rahu maja'e jijihê'oho ave sa'ae aho'o hesi ajire jijihoromo ëhuro bogo biberovarue höjo. ¹⁰ O vahi'e jijihê'oho ajoho bogojêvê'ëro ëhuro biberovarue höjo. ¹¹ Èhi uëromo ijönö uêvadeje: Nosi aemo'aemoho Lazarus niavê'e höjo. Èhuni na va'oromo io'ejöjo. ¹²⁻¹³ Io'ejöjamu hesi ijorajoho jaburo uvareje: Nani Iesuro uöromo ë'ajêjo: Lazarus ma-niavajê uövüajêromo uavareje: Bada hu niavê'oho iae marê'ajêjo. Röhu Iesu bogo ëhioho uë'i a'i uëromo ë'adeje: Lazarus hu guomê'e höjo. ¹⁴ Èhuni Iesuro huruoho majêhiromo uêvadeje: Lazarus guomê'e höjo. ¹⁵ Guomamu naehu bogo hu'o hijodohuni ëhuni jemesi jöëni nimorohajêjo ëhuro jemëro nasi muoho garomo mae uehorovo'irarijêgo. Röhu ruehego no hesirire va'arêjo. ¹⁶ Èhi uêvamu hegorovo Thomas hesi ihoho aehu uvaruoho Huodi'e Rahade Aho huro ijorajo ioro'ioroho uêvadeje: Go va'ohêgo no'o va'oromo Iesu'o gemu mae vuovo'irarêjo.

Iesuhu vuovê'e aribövi ajêmejo i'ovoromo ri'öromo mae raromarue jö Iesuhu jövadohoje.

¹⁷ Èhi'amu Iesuro va'oromo Bethany amore hörö'irögoro hejade uavavamu: Lazarus mami'e guomamu guavaroho majae ëhi niö'i ëhi niö'i barêjê'e höjo. ¹⁸ Röhu Bethany amoho Jerusalem bëhire jî'ëro 3 kilometre rabu'e jiadeje. ¹⁹ Èhu'ëro Jew raje ae aho'obêhe jaburo Jerusalem jioromo Bethany rovê'ëro ë raromareje Martha'o Mary'o jabesi ma'inoho guomê'ëro huë vavaeni baejaruoho sanuëmîröhëro.

²⁰ Èhi'amu Martha-ro hejade uavavamu: Iesu rovajêjamu hegorovo osare jioromo höröromo Iesu biroho'i rovadeje. Rue'irögoro Mary-ro ëhi osare hijadeje. ²¹ Hijamu Martha-ro rueromo Iesu bihoromo uavadeje: Bada ja ave hi'ibejanêjo nasi ma'inoho bogo guomo'ibejajo. ²² Nasi ma'inoho iae guomê'e höjo. Röhu jaruvohu'o God-hu diehi ajamijöro Iesu jaehu ua gavê'oho iae ajami'ajêjo. ²³ Ajami'ajêjamu Iesuro uavadeje: Jasi ma'inoho iae i'ovoromo ri'ö'a'ajêjo. ²⁴ Ri'ö'a'ajêjamu Martha-ro uavadeje: Iae na garomo uvajêjo: Ijo tugoho'i rueröhe majaho rue'iramu evare ae aho'obêhe i'ovoromo ri'öruomo'iramu hu'o ri'ö'a'ajêjo. ²⁵ Ri'ö'a'ajêjamu Iesuro uavadeje: Vuovoromo i'ovoromo ri'öromo mae raromo'irarije darugo hesi bëhoho najevajêjo. Èhu'ëro ae rahu nasi örire

mae uehorovev'ohuro daruge baeromo mae raromo'aruėjo. Nani vuovo'ajėjo rōhu iae i'ovēvo'ajėjo. ²⁶ Ae rahu i'ovoromo raromoromo nasi ōrire ma uehorovev'oho bogo sisēroho va'i mae raromemu raromo'aruėjo. Na ja ě jōho mae uehorovanuėjo. ²⁷ Mae uehorovanuėjamu uavadeje: Bada io'ajo. Iae na mae uehorovoromo uvajėjo: Bōrōme namiromo ajamui'irane aho God-are Harihoho ja javajėjo. Ave sa'are rue'iranego God-hu uōvuade aho ja javajėjo.

Iesuhu nivade jōhoje.

²⁸ Martha-ro Iesu ěhi uanugoromo va'adeje. Va'oromo osare va'o hesi ōho Mary saginiēri uavadeje: Tisae rov'ē hōjo. Rov'ēro uvajėjo jero ruejōro. ²⁹ Ruejōro uvajėjamu hej'ē'i ma-burēro ri'ōromo Iesu biroho'i va'adeje. ³⁰⁻³¹ Ma-burēro ri'ōromo Iesu biroho'i va'amu gagorovo Jew raje Mary'o osare raromoromo sanuamijarohuro uvareje: Nani Lazarus-are sino bamarire nivō'i va'ajēromo rihiomareje. Rihiomamu Iesuro amo maroho bogo rue'i Martha-hu birohadiē ě hij'ēro Mary-ro ě biroho'i rovadeje.

³² Rueromo Iesu garomo hesi bēhire ague aho hiromu uavadeje: Bada ja ave hi'ibejanėjo nasi ma'inoho bogo guomo'ibejajo. ³³ Ĕhi uaromo nivamu Jew raje hu'o gemu mae rovarohu'o nivoruomamu gēgorovo Iesuro hesi dē vōvōbajo'o uhure hara'uoromo vavaenimo avohadeje. ³⁴ Vavaenimoromo uēvadeje: Jemē sinoho dinō'e bamarije hōjo. Bamarije hōjamu uavareje: Bada rueromo gavėjo. ³⁵ Rueromo gavėjamu Iesuro nivadeje. ³⁶ Nivamu gagorovo rue Jew rajohuro uarovareje: Aroriaho gahėjo. Hu Lazarus-are ōrire hesi dē vōvōbajo'ere bogo bisemuoho uehorov'ēro ěhuni nivajėjo. ³⁷ Nivajēromo ae gōero gōero uvareje: Ĕhuro nuni sisē'e aho ajamamu marējade hōjo. Ĕhuni nani huro Lazarus mami'e ro ajami'ibejajo hu bogo guomo'ibejajo.

Iesuhu Lazarus ajamamu guomoromo i'ovoromo ri'ōjade jōhoje.

³⁸ Ĕhi uarovamu hegorovo Iesuro rōhu maho hara'uoromo vavaenimamu sino bamarire va'adeje. Va'oromo gavadeje juju gagoho munēro tugohē'e jiamu. ³⁹ Tugohē'e jiamu gagorovo uēvadeje: Munēho rori'o bava'ohėjo. Bava'ohėjamu guomē'e a hesi ma'ine Martha-ro uavadeje: Bada iae ěhi hōjo rōhu majae ěhi niō'i ěhi niō'i barējē'ero jīē'ero usihōvajėjo. ⁴⁰ Usihōvajėjamu Iesuro uavadeje: Iae ěhi hōjo rōhu na mami'e uavode hōjo: Jaehu mae uehorov'ē'oho God-are aji maho ga'a'anuėjo. Naehu uavode jōho na ja ěho uehorovanuėjo o bogajo. ⁴¹ Ĕhi uvamu hegorovo rueho jaburo munēho bava'areje. Bava'amu Iesuro sioroho garomo uavadeje: Apo naro jasi ōrire huē mae uavajėjo rabēni jero nasi jōho ejehē'ego. ⁴² Iae na garomo uvajėjo: Jero majae ěhi ejehanue hōjo. Rōhu naro ave jōho uavajėjo arue aribōvi jabesi jōēni ěhuro jaburo uvoruomorōhego: Iae mae-ėjo. God-ro nōrō nugō'ōjamu rovade hōjo. ⁴³ Ĕhi uanugoromo ma-darugo'o uvadeje: Lazarus va'orahonō hōrō rovėjo. ⁴⁴ Hōrō rovėjamu guomamu bamare ahuro i'ovoromo hesi ōvo hōru'oho nu ano'oho niōgēro muoho taemo'amē'e juju gagore jioromo hōrō rovadeje. Rovamu gagorovo Iesuro uēvadeje: Niōgoho jiovahohego va'ajo.

Jew rajo a masijehu Iesu ano'iro jō atare jōhoje.

⁴⁵ Ĕhi'amu Jew raje ae aho'obēhe Mary ga'i rovarohuro gavare Iesuro Lazarus ěhi ajami'ego i'ovoromo ri'ōjamu gagorovo hesi ōrire mae uehorovareje. ⁴⁶ A ioro'iorohuro bogo ma uehorovo'i va'oromo Pharisee aribōvioho huruoho majēhiromo uēvareje: Iesuro ěhi jīē'e muoho vaejade hōjo. ⁴⁷ Ĕhi majēhijamu hegorovo priest masijohu'o Pharisee ōmo'ōmohu'o ěho jaburo Jew rajo a masijo ioro'ioroho uēvareje: Gagovohego no jōe mevarėjo. Jōe mevarēromo gagovamu uēvareje: No ave a hesi ōriroho diehi'o'ejarėjo. Huro darugo'e mu masijoho aho'obēhe vaejaje hōjo. ⁴⁸ Ĕhi jīē'e mu masijoho vaemu vaejamu noehu bogo tugohē'oho ae aho'obēhe hesi ōrire mae uehorovoruomo'ajėjo. Mae uehorov'iramu gagorovo Rome aribōviohuro rueromo nosi amo bōrōmohu'o sa'ahu'o ijumavuo barē'ajėjo. ⁴⁹ Rōhu ae gemu hesi ihoho Caiaphas hu jabu'o jiadeje. Evare vaduniroho hu priest bōrōme namijē'e jiadeje. Ĕhuro ri'ōromo uēvadeje: Jemē ave muoho bogo avo'avoho gavaruėjo. ⁵⁰ Jemē diehi'oromo bogo uehorovaruėjo ae gemuehu

ae aho'obêhe noni guomë'oho êhuro jemë marëjêvo'ajêjo. Êhi jië'oho nosi sa'aho aho'obêhe bogo barëjavu'ajêjo. Caiaphas-ro êhi jövadeje. ⁵¹ Êjôho bogo hesi ëma jövo'irögororo evare vaduniroho hu priest börömëro jië'ëro ijönö jiorôhe jôho God-ro bojamamu majëhijadeje. Majëhijade jö hesi bëhi huruoho majëhijë'oho Iesu guomo'a'ajêjo Jew raje aho'obêhe ajëmi'iröhëro. ⁵² Röhu bogo Jew rajo jabesi jöëni êhemuoho guomo'i a'i guomoromo êhuro God-are aboji harihu'e aho'obêhe dinö'e dinö'e raroraruoho gemuoro gagovo'iröhego Caiaphas-ro jö bëhoho bogo uehorovë'e êhi ma-jövadeje. ⁵³ Iesu guomorôhe jôho êhi atoromo evare majare aevoromo ôroho nahoromo avohobe rovareje hu anoröhëro. ⁵⁴ Êhi'amu Iesuro Judea sa'are va'orahore juvadoho vuonugo'i va'adeje. Va'oromo a rumo'e sa'a hesi bëhire amo ihe Ephraim ë va'oromo hesi ijorajo ômo'ômohu'o gemu mae hijadeje.

⁵⁵ Hijamu Jew rajo jabesi maja börömoho dunovadeje. Maja börömo hesi ihoho God-hu Vörö Tugohade hesi Majaho jiadeje. Êmaja börömoho dunovamu ae aho'obêhe amo harihu harihure jioromo Jerusalem amo börömore iojio mareje Moses-are jögoroho eja-horomo jabesi sisëho avohorovo'i sörö majaho rovego avoho ue'ahoröhëni. ⁵⁶ Iojio moromo Iesu nahoromo God-are amo börömore gagovoromo uarovareje: Jemë diehi uehorovarujêjo. Na jemë uehorovarujoho Iesu sörö börömoroho rue'a'ajêjo o bogajo. Nani bogajo. ⁵⁷ Röhu mami'e priest masijohuro Pharisee ômo'ômohuro ae aho'obêhe jöe bojëmiromo uëvareje: Iesu dinö'e hijajoho ae rahu gavë'oho ro huruoho majahuirego no heromo va'oromo hu guduamo'irarêjo.

12

Magonaho göehu ridi'e oso baeromo Iesuare hörure otehodivade jôhoje.

¹ Ijönö majae aho'obêhe 6 barëjêgo God-hu Vörö Tugohade Sörö maja rue'iröhoho jiadeje. Rue'iröhoho jiamu evare Iesuro Bethany amore Lazarus-hu hijajire ë ajiomadeje. Lazarus guomamu Iesuhu ajamamu ri'öjade aho jiadeje. ² Amo Iesuro ë ajiomamu ariböviohuro i harihe avohoromo Iesu bojamijareje. Bojamiromo Martha-ro ajëmiromo ie i'imëmamu Lazarus-ro ie i'i Iesumë'o ro hijadeje. ³ Êhi ro raromamu Mary-ro ridi'e osoho bisemu bövie barovadeje. Osoho bogo jovo'oho buarohë'e ma-oso maemu jiadeje. Hesi manaho bogo bise'oho vadu'oho jiadeje. Êsoho Mary-ro barueromo Iesuare hörure dôre otehodivoromo simano uohuro höröho uhijahadeje. Uhijahamu ridohuro osae aho'obêhe rumorovo barëjadeje. ⁴ Rumorovo barëjamu Iesuare ijorajo ômo'ômohu ae gemu hesi ihe Judas Iscariot Iesuni hiruëmiromo a jabesi ôvore bojëmi'iröhe ahuro uëvadeje: ⁵ Ridi'e osoho rabëni bogo aroho imëvoromo 300 kina rabu'e baeromo bövi bise'o rumo'e aribövioho suvuorëmijare höjo. Êhi jië'oho iae mae jio'ibejajo. ⁶ Êhi uëvade hesi bëhoho Judas Iscariot-ro bövi bise'o rumo'e ariböviohuniho bogo uehorovoromo jövo'i a'i vajiohu'e aëro jië'ëro êhi jövadeje. Êhesi bëhoho huro Iesumesi moni'e esôho muebenövadeje. Muebejë'i gö vajiohëro baenövadeje. Vajiohëro baenövë'ëro êhu'ëro uëvadeje: Ridi'e osoho rabëni bogo aroho imëvoromo bövi bise'o rumo'e aribövioho suvuorëmijare höjo. ⁷ Bövi bise'o rumo'e aribövioho suvuorëmijare höjamu hegoro Iesuro uavadeje: Bogave magonahoho vavaenoho bojami'iranêjo. Huro nimade höjo osoho avoho mueberomo guomevego otehodegoro guavevo'iröhëni. ⁸ Bövi bise'o rumo'e aribövioho jemë'o giemu jioromo'i na bogo jemë'oho hiemu hi'ejêjo. Êhuni hu iae mae otehodegade höjo.

Jew rajo priest masijehu Lazarus ano'i jö atarohoje.

⁹ Êhi'amu Jew raje ae aho'obêhe hejare uvavamu: Iesuro Lazarus'o gemuore hijajë uvamu hegoro ruuëvuomadaje Iesu ga'irovo. Röhu bogo Iesu gemu ga'i rue'irögororo Lazarus'o ga'i rovareje Iesuro ajamamu i'ovë'ëro jië'ëro. ¹⁰ Lazarus ga'i rueruomaje jôho hegoro priest masijohuro jöe mevoromo uarovareje: Ê'ego Lazarus'o ano'irarêjo. ¹¹ Lazarus ano'i atare hesi bëhoho Jew raje ae aho'obêhe uvareje: Iesuro Lazarus mabêhe

ajamijade höromo priest masijo jabesi jöho vuonugo'i Iesu mae uehorovareje. Ĕhuni ano'i atareje.

Iesuhu Jerusalem mae rovamu gav'e'i aehu mab'ehe rajahiruomade jöhoje.

¹² Ĕhi'amu n'ero s'oro i'i rovare aribövioho aho'ob'ehe hejareje uvavamu: Iesu Jerusalem rojomaj'ejo. ¹³ Rojomaj'ejamu hegoroovo ijo rude ujuohoromo Iesu biroho'irögoro uvobe va'oromo uvoruomadeje:

God mab'eh'ejo.

Ave aho Badare ihore rovajoho mab'eh'ejo.

Israel rajo nosi b'örömo mab'eh'ejo.

¹⁴ Ĕhi uvoruomamu Iesuro donkey harihe baeromo hesi döre ajio hijadeje. Donkey döre hijego Jerusalem amo rajehu garuomo'iröhe jöho mami'e God-are surire jajivoromo uv'e'ej:

¹⁵ Zion rajom'e nadi juhuonivo'i arueho gah'ejo.

Jemesi b'örömo huro donkey harihu döre hiromo rovaj'ejo.

Ĕhi jajiv'e'ej. Röhu mami'e God-are surire jajivad'ehi Iesuro Ĕhi e'adeje. ¹⁶ Urimoho Iesuare ijorajo ömo'ömohuro e surire jö hesi b'öhoho bogo avoho uehorovareje. Röhu ijönö Iesuro döre ajiomoromo aje baeromo b'öröme namijamu evare e jöho uehorovoromo uvareje: Iae mae-ejo. Iesuare jö God-are surire jajivar'ehi no hesi örire Ĕhi vaejahare höjo.

¹⁷ Röhu ae aho'ob'ehe Iesu biroho'i rueruomade hesi b'öhoho urim'e'i Lazarus guomamu Iesuro huni uvamu i'ovoromo mun'e gagore jioromo hörö rovamu evare ae aho'ob'ehe Iesu'o raromoromo e muoho gavareje. Gav'e'ero e jöho maj'ehibe jijihareje. ¹⁸ Ĕb'ehi'e mu b'örömo hesi jöho maj'ehijamu hej'e'ero Ĕhuni ae aho'ob'ehe Iesu biroho'i rueruomadeje. ¹⁹ Iesu biroho'i rueruomamu g'egoroovo Pharisee ariböviohuro uarovareje: Jem'e'o gah'ejo. Ĕa hesi mu tugoh'e'oho bogo eni javuo hesi höjo. Iae ae aho'ob'ehe mae hu gemu uehorovoromo hesi ijore ijore jijihoruomaj'ejo.

Greece sa'a rajo a ioro'iorehu Iesu ga'i nimoruomade jöhoje.

²⁰ Ĕhi'amu ae aho'ob'ehe Jerusalem rojomamu Greece raje ae gö gö jabu'o rojomareje s'oro majaho rovego God rajahi'iröh'ero. ²¹ Rojomoromo Philip ga'i rovareje. Philip hu Galilee sa'a raje Bethsaida amo raje jiadeje. Jaburo Philip ga'i rueromo uavareje: No naguaj'ejo Iesu ga'irovo. ²² Ĕhi uvavamu hegoroovo Philip-ro va'oromo Andrew uanugoromo jaburo niö'iro va'oromo e jöho Iesu majahijareje. ²³ Majahijamu Iesuro u'evadeje: God-are A Ma nasi iho döre jioröhe majaho iae rov'e höjo. ²⁴ Ave naehu e'irode jöho uhu'e maj'ehi'ie'aj'ejo. Ĕhesi b'öhoho iae jö mae ma-gemuohemu höjo. I ujo gemu sa'are beruvebiromo sis'ere'aj'ejo. Sis'erej'e'ero ehu'ero tögömoromo e'govoromo baje aho'o rae'amo'aj'ejo. Bogo sis'ere'ibejajo Ĕhi ma-gemu jio'ibejajo. Sis'erej'e'ohuro ehuo bogo sivuoho jio'i aho'o jio'amo'aj'ejo. Na Ĕhi sis'erejevo'iramu ehuro ae aho'o gemuore jio'a'aj'ejo. ²⁵ Ae rahu jabesi sinohemu uehorov'e'oho ijumorovarue höjo. O ave sa'are raromoromo sinehu nimaje mu bogo uehorov'e'oho ehuro ioro'iore gemu raromo'aru'ejo. ²⁶ Ae rahu nasi mu vae'i nim'e'oho nasi ijore ijore jijih'aru'ejo. Na din'e hij'e'iroho nasi mu aribövioho jabu'o e raromonövo'aru'ejo. Ae rahu nasi mu vaejeh'e'oho nasi Vavuohuro jabesi ihoho döro bamo'aj'ejo.

Iesu guomoröhe jö huhu jövadohoje.

²⁷ Avej'ö'oho na d'e vövöbajo'ere vavaenegavaj'ejo. Ĕhuni na diehi ua'ejöjo. Na na ua'ejöjo: Apajo. Ave vavaeni maja rueröhoho tugohehego bogo bae'iröjo. Bogajo. Na bogo ehioho ua'ejöjo rab'eni na e vavaenoho bae'i rov'e'ero. ²⁸ Ĕhuni bogo tugoho jöho ua'irögoro a'i ua'ejöjo: Apo jasi aji'e muoho röj'ehijego a'ero garomo uvar'ejo: Jasi ihoho b'öröme höjo. Jasi ihoho b'öröme hö uanugoromo hejadeje ö'idöre uvavamu: Na mami'e nasi aji'e muoho röj'ehij'e'ejavaj'ejo. Röhu maho röj'ehi'ejöjo a'ero uvoruomoröhego: God nasi ihoho b'öröme höjo.

²⁹ Ĕhi uvavamu hegorovo ae aho'obēhe bēhire riravarohuro a ioro'iorohuro uvareje: Varurēro anavohijajo. A ioro'iorohuro uvareje: O aneraēro Iesu jōe majahiromo uvavohijajo. ³⁰ Ĕhi atoruomamu hegorovo Iesuro uēvadeje: Ĕjō uvavamu hejarijoho bogo nasi jōēnioho uvo'i jemesi jōēni uvade hōjo. ³¹ Jaruvoho ave sa'are mu sisē vaeruomaje aribōvioho God-ro mevēvo'irōgoro ē'ajējo. Jaruvoho ave sa'are mu sisē simano vaejaje aho God-ro ruahō'ō'irōgoro ē'ajējo. ³² Na sa'are jevajoho aehu banigojiomev'oho evare naro ae aho'obēhe rinēgo'iramu nasinō rueruomo'ajējo. ³³ Aehu hu banigojiomo'irōhe jō majēhijadoho huro uēromo ē'adeje: Aēro ēhi korosire banigojiomevo'iramu guomo'ejōjo. ³⁴ Ĕhi uēvamu hegoro rue aribōviohuro uaruomadeje: Guomo'irane jō uōvuanuoho rōhu no hej'e javuajējo nosi jōgoru surire adahoromo uōvuamu: Bōrōme namiromo ajamui'irōhe aho nosirire rovē'iroho hu bogo guomo'i ma-ioro'ioemu hi'a'ajējo. Ĕhi jiē'oho ja diehi uōromo ē'anuējo: Aēro God-are A Maho na banigojiomevo'aruējo. God-are A Maho ja diehi jiē'e aēro javē'ēro ja guomo'i uvanuējo. ³⁵ Guomo'i uvanuējamu hegorovo Iesuro uēvadeje: Ajoho naro majae ma-bunemu jemē'o hiromo ajivēvo'ejōjo. Jemē'o hiromo ajivēvego ajiro jijihorējo ēhuro bogo ramoramovēvo'irōhe hōjo. Ramoramore jijihē'oho ōroho sidōvēvo'ajējo. ³⁶ Ĕhi jiē'e jiaje aji naehu jemē'o hijajevaro evaro ajoho na mae uehorovevorējo. Mae uehorovev'oho aji'e aribōvie jēvo'ajējo.

Jew rajo aribōviehu Iesu bogo ma uehorovare jōhoje.

Ĕhi uēnugoromo va'adeje. Va'oromo gurihovoromo dirō'o gōro hijadeje jaburo gajōēni. Ĕhi'adeje. ³⁷ Urimo Iesuro Jew rajohu'o hiromo bēhi'e mu masije aho'obēhe jabesi nunire vaebe rovadeje. Rōhu jabumēro hesi ōriroho bogo maho uehorovareje. ³⁸ Ĕhesi bēhoho jō God-aro baeromo majēhinōvade ae Isaiah-hu maminō gō'e jajivadēhi ēhi jiorōhego ēhuni Iesu bijōnimareje. Isaiah-ro God-are surire jajivoromo uvadeje: Bada rahuro nosi jōho mae uehorov'e hōjo.

Badare darugo'e mu hesi bēhoho rahuro avoho gav'e hōjo.

Isaiah-ro ēhi jajivadeje ijōnō jiorōhego. Huhu jajivadēhi jaburo ēhi ē'oromo Iesu bogo ma uehorovareje. ³⁹ Iesu mae uehorovo'irōhoho bogo eni jēvadeje. Bogo eni jēvade hesi bēhoho Isaiah-ro ave jōhu'o surire uhunō'e jajivadeje. Jajivoromo uvadeje:

⁴⁰ God-ro uvajējo: Naro jabesi nunoho tugohēhoromo

uehoroho ijumēh'e jevajējo

ēhuro nunoho ramoramovēvoromo uehoroho bogojēvorōhego.

Uehoroho bogojēvego bogo huotorovoromo nasi ōriroho bogo rovego naro bogo i'ovēvego bogo mae jēvorōhego.

⁴¹ Isaiah-hu ēhi jajivade hesi bēhoho huro uehore God-aro baeromo Iesuhu baerōhe ajoho garomo huhu vaerōhe jōho jōvadeje. ⁴² Iae a ioro'ioroho Iesu bogo ma uehorovareje rōhu a ioro'ioroho aho'o Jew rajo a masijo ioro'iorohu'o iae hu mae uehorovareje. Mae uehorovoromo rōhu uvareje: Pharisee ōmo'ōmohuro uō'a'aruējo: Iesu mae uehorovarujohuni God rajahijarue osaroho nadi ijoroho ruerē uō'a'aruēromo ēhuni Pharisee juhuonēmiromo Iesu mae uehorovare jōho subivēhaje. ⁴³ Uvareje: God-hu no rajahui'irōhoho ēho ma-jianovo'i aehu no rajahuijaruoho iae mae hōjo.

Iesuhu majēhijade jō bijōnimē'ohuro sisēro va'irōhe jōhoje.

⁴⁴ Iae Iesuro ma-darugo'o uvadeje: Ae rahu na mae uehorovev'oho bogo nasi ōriroho gemu uehorovevo'i sa'are remō'ōjade ahu'o mae uehorovarue hōjo. ⁴⁵ Ae rahu na gevē'oho sa'are na remō'ōjade ahu'o gavarue hōjo. ⁴⁶ Naro sa'are rovē'ēro aho'o ajivēvaje hōjo ēhuro ae rahu na mae uehorovev'oho ē aribōvioho bogo ramoramoroho raromorōhego. ⁴⁷ O ae rahu nasi jō heromo bogo ejehe'oho na bogo jabesi jōho mevoromo sisēroho bamēvo'ejōjo. Sa'ae aho'o bogo sisēroho bamēvo'i maro bamēvo'i rovode hōjo. ⁴⁸ Rōhu na'o nasi jōhu'o bijōnimē'oho sisēre va'irōhe bēhoho iae jiajējo. Bēhoho ēho naehu majēhibe rovode jōho hōjo. Hujeji ijo tugoho'i majaho rue'iramu ē jōho bijōnimē'ēro ēhu'ēro sisēro va'a'aruējo. ⁴⁹ Rabēni hesi bēhoho naehu majēhibe rovode jōho bogo nasi ēma jōvo'i Vavue sa'are remō'ōjadohuro jōho bojemijade hōjo naro ēhuremu jōvo'irodego. ⁵⁰ Rōhu naro

garomo uvaje höjo: God-hu bojemijade jö aehu ejahë'ohuro êhuro ma-ioro'ioiremu maro raromarue höjo. Êhu'ëro jië'ëro naehu jövaje jöho Vavuehu uevadëhi iae êhi gemuoho höjo.

13

Iesuhu hesi ijorajo ömo'ömo jabesi höru hitahi u'ovêhade jöhoje.

¹Iae God-hu Vörö Tugohade Sörö majaho nërëhi jio hesi jiadeje. Nërëhi jio hesi jiamu Iesuro garomo uvadeje: Naehu sa'a nugo'i Vavu hesi örire va'irode majaho iae rovë'e höjo. Röhu hesi aribövi maho ave sa'are raromaruoho mami'e dë vövöbajo'e aho'o uehorovëvobe rovodoho bogo vuonugo'i uehorovëvobe va'adeje êhi ma-guomoröhego.

²Iae Satan-ro mami'e Simon Iscariot-are harihe Judas-are simanoho ijumahadeje huro Iesu bijönimarue a jabesi övore bojëmi'iröhego. Êhi jië'ëro Iesu'o hesi ijorajoho jabu'o raromoromo i harihe ue'ahareje. ³Ie ue'ahoromo Iesuro garomo uvadeje: Vavuohuro daruge aho'obêhe nasi övoro bamehë'e höjo. Na God-arire jioromo rovodoho hesi örire vuonorö'ö va'ejöjo. ⁴Hesi örire vuonorö'ö va'ejöromo Iesuro ie ijë'ëro ri'öromo döre niögoho jijöromo uhirovarue niögoho dë'ahore muohorovadeje. ⁵Muohorovoromo jovoho hevëre otehoromo aevoromo hesi ijorajo jabesi höroho eguehoromo muohorovade niögoho baeromo höroho uhijêhadeje. ⁶Êhi'obe va'oromo Simon Peter-hu hijajire rovadeje. Rovamu uvadeje: Bada na ja nasi hörohu'o eguehonëjo. ⁷Eguehonëjamu uvadeje: Naehu ömaje hesi bëhoho jaruvoho ja bogo gavanuëjo. U'emu ga'a'anuëjo. ⁸Ga'a'anuëjamu hegorovo Peter-ro uvadeje: Nasi höroho bogo egueho'anuëjo. Bogo mae bogajo. Bogajamu uvadeje: Naehu jasi höru bogo eguahë'oho ijono'ho ja bogo nasi ae gemuoho javo'ajëjo. ⁹Javo'ajëjamu hegorovo Simon Peter-ro uvadeje: Êhi jië'e jiaje nadi höremuoho egueho'i a'i övohu'o simanohu'o êhu'o eguehëjo. ¹⁰Eguehëjamu Iesuro uvadeje: Rabëni övoho simanoho eguahojörajö. Bëhoho bogohöjo. Ae rahu jabesi sino haho'o jovo eguoromo u'ö barëjë'oho röhu maho bogo eguoromo'i jabesi hörohemu eguonövo'aruëjo. Röhu jemesi sisëho mami'e u'ovêhë'ëro mae jëvavëjo. Mae jëvo'i sisëho jemesi ae gemu hesiriremu höjo. ¹¹Iesuhu êhi uëvade hesi bëhoho huro garomo uvadeje: Judas-ro na bijönegarue a jabesi övore bojëmi'ajëjo. Êhuni uëvadeje: Jemë mae jëvo'i sisëho jemesi ae gemu hesiriremu höjo.

¹²Êhi uëromo ijorajo jabesi höroho eguehonugoromo niögu jijö bamadoho röhu maho ba'amoromo va'o hesi röhore hinugoromo uëvadeje: Naehu jemesi örire ömode mu hesi bëhoho na jemë gavaruëjo o bogajo. ¹³Bëhoho iae na majëhi'ie'ajëjo. Jemëro uevaruje höjo: Tisajo o Badajo. Iae mae uevaruje höjo na êhi jevë'ego. ¹⁴Na jemesi Bada'o Tisa'o jevavëjo röhu na bogo uvode höjo: Böviëro jevë'ëro höroho bogo egueho'ejö uvo'i maguehëde höjo. Êhuni jemë'o nadi bövie javuajë uvo'i göëro göho huë baerovoromo höroho eguahorovorëjo. ¹⁵Êhesi bëhoho naro mu mae röjêhijë'e jevavëjo êhuro naehu jemë ajëmi'odëhi jemë'o êhi huë baerovoromo ajamirovo'irarijego. ¹⁶Ave jöho na jö mae uë'ie'ajëjo. Mu ariböviohuro o anue jijiharue ariböviohuro jabesi a börömo'ho bogo iosiramiromo masije rivaruarue höjo. ¹⁷Ëjöhö mae jio'ego jemë iae gavaruëjo. Êhuni nadi na iosiremiromo uvorëjo: No masijëro javuë'ëro aho bogo ajëmi'ejarë uvo'i majamirovorëjo. Êhi e'ë'oho huë mae jëvo'ajëjo.

¹⁸Huë mae jëvo'ajë uëvaje jöho êho bogo ae aho'obêhe jemesi jöho uëromo ë'ajëjo. Jemë diehi jië'e aribövie baejëvodoho iae na gëvaje höjo. Mami'e God-are surire jöho jajivoromo uvë'e höjo: Na'o gemu mae i ijajohuro huotorovoromo na'o muorovo'i nimade höjo. Êhi jioröhögo God-are surire jajivadëhi iae êhi jië'e mu sisëho jio'a'ajëjo God-are surire jöho bogo bejajëro jië'ëro. ¹⁹Ëmu sisëho bogo vejö'oho jio'i u'emu jio'a'ajëjo. Röhu aviavejö'e uëvavëjo jemëro ga'irarijego ë mu sisëho rovego garomo uvo'irarijego: Iae mae-ëjo. Nörö jiemu jiaje A Börömo'ho höjo. ²⁰Röhu ave jöho na jö mae uë'ie'ajëjo. Naehu rëmö'öjogo rovarue aribövioho ae rahuhu ë aribövi rajëhiromo baejëvë'oho êhuro na'o rajëhiromo

baejevorumaje hōjo. O ae rahu na rajehiromo baejev'ohō ēhuro remō'ōjamu rovode ahu'o rajahiruomaje hōjo.

Judas-hu Iesu bijōnimarue a jabesi ōvore bojēmi'irōhe jō Iesuhu jōvadohoje.

²¹ Ēhi uēromo hesi dē vōvōbajo'ere huē vavaene bōrōme baejadeje. Huē vavaene bōrōme baeromo ma-sama'e majēhiromo uēvadeje: Ave jōho na jō mae uē'iē'ajējo. Jemesirire jiaje ae gemuēro na bijōnēgarue aribōvi jabesi ōvore bojēmi'anuējo. ²² Ēhi uēvamu hegorovo hesi ijorajoho jaburo nuniro garoro garoro baeromo uvareje: Rahuare jōho uōromo ē'ajējo. ²³ Rōhu Iesuare ijoraje ae gemuēro Iesuare bēhi mare hijē'e jiadeje. Iesuro ē aho hesi dē vōvōbajo'e aho'o rajahinōvadeje. ²⁴ Ēaho Iesuare bēhire hijē'e jiamu Simon Petero ē a hesi ōrire uvenēro uavadeje: Ua gavējo: Rahuare jōho uōromo ē'anuējo. ²⁵ Uōromo ē'anuējamu ē ijorajohuro Iesu hia'iro saginiēri uavadeje: Bada ja rahuare jōe uōromo ē'anuējo. ²⁶ Uōromo ē'anuējamu Iesuro uavadeje: Naro ioho baeromo ijo bajo nēmarire ba'amoromo ioromo ae gemu bojami'ejōjo. Bojamijego garomo uvonējo: Iae ē ahuro ēhi sisē vaejevo'ajējo. Ēhi uanugoromo ie gemu baeromo ba'amoromo ioromo Simon Iscariot-are harihoho Judas bojamijadeje. ²⁷ Bojamamu Judas-ro baeromo ijamu gavē'i Satan-ro ē a hesi dē vōvōbajo'ere abuejadeje. Abuejamu Iesuro uavadeje: Jaehu vae'i ē'anue muoho ma-burēro va'oromo vaejējo. ²⁸ Vaejējamu hegorovo raromoromo i ijarue aribōviohuro bēhoho rabēni Iesuhu Judas ēhi uavajoho bogo avoho hejareje. ²⁹ Bogo avoho he'irōgoro a ioro'iorohuro uvareje: Judas-ro moni bahijaruoho muebejajego ēhuni nani Iesuro uaromo ē'ajējo: Va'oromo sōrōēni ie imahuējo. O va'oromo inōmo rumo'e aribōvioho monioho gō suvuorēmijējo. Ēhuni uaromo ē'ajējo. ³⁰ Rōhu Judas-ro Iesuhu bojamijade ioho baeromo ma-burēro hōrōromo ramoramore va'adeje.

Gōehu gō rajahirovo'irōhe jō i'ohoje.

³¹ Judas va'amū gagorovo Iesuro uēvadeje: Avevejō'ohō God-are A Ma nasi aji'e muoho rōjēhijē'e hōjo. God-ro daruge bojēmijē'ēro hesi aji'e muohu'o rōjēhijē'e jēvajējo. ³² Naro God-are ajoho ae rōjēhi'iramū evare God-ro hesi A Ma nasi ihoho banigōjomeho'ajējo. Hu ma-burēro iae ēhi ē'iē'ajējo. ³³ Nasi harihu ōmo'ōmohumē na jemē'ohō majae ma-bunemu hi'ejōjo. Hiromo va'iramū nahevo'arujējo. Rōhu Jew rajo masijo mami'e uēvodēhi jemē'o ēhi uē'iē'ajējo: Naehu va'irodire jemē ē ō'irarijoho bogo eni jēvajējo. ³⁴ Rōhu jōgoru i'e bojēmi'ie'ajējo. Gōēro gōho rajahirovorējo. Naehu jemē rajēhibe rovodēhi jemē'o ēhi gemuoho ē'orējo. ³⁵ Jemē rajahirov'ohō ēhuro ae aho'obēhe gēromo uvorūomo'ajējo: Jemē nōruare ijore ijore jijiharuje aribōvie jēvajējo.

Peter-hu Iesu gavajoho subivēho'irōhe jō Iesuhu jōvadohoje.

³⁶ Ēhi uēvamu Simon Peter-ro uavadeje: Bada rōhu ja dinō'e va'onējo. Dinō'e va'onējamu uavadeje: Naehu va'irodire avevejō'e ē ō'iranoho bogo eni javajējo. U'emu ō'a'anuējo. ³⁷ Ō'a'anuējamu hegorovo Peter-ro uavadeje: Bada rōhu avevejō'e naehu jasi ijore ō'ē'ohō rabēro bogo eni jēvajējo. Naehu ajamiromo jani guomev'ohō iae mae hōjo. ³⁸ Iae mae hōjamu Iesuro uavadeje: Peter jero uvanuējo: Naro nōrō ajamiromo guomorovo'ejōjo. Rōhu ave jōho na jō mae ua'iē'ajējo. Kōkōrōkoho bogo uvē'e jero majae niō'i gemu ae uē'a'anuējo: Na Iesu bogo gavaje hōjo.

14

Vavu hesirire va'arue ōroho Iesu jiaje jō Iesuhu jōvadohoje.

¹ Iae Iesuro hesi ijorajo ōmo'ōmoho uēvadeje: Nadi nurunurūmoromo uehore gō gō bae'i a'i God-are ōroho mae uehorovoromo nasi ōrohu'o ēhu'o mae uehorovorējo. ² Ēhesi bēhoho nasi Vavu hesi osare rōhoho aho'obēhe jio'amajējo. Ēhuni na ē va'oromo jemēhu raromo'irarije rōhoho avohēho'ejōjo. Naehu jōvaje jōho bogo maehu jio'ibejajo bogo uē'ibejōjo. ³ Va'oromo jemesi rōhoho avohēhonugoromo vuonorō'ō rueromo sōjēvoromo nasirēro va'ejōjo ēhuro naehu hijajire jemē'o ē raromo'irarijego. ⁴ Naehu va'oromo hi'irode ōroho jemē iae gavaruje hōjo. ⁵ Gavaruje hōjamu Thomas-ro uavadeje: Bada

jero ĕhi uövuanuĕjo röhu jaehu dinö'e va'o hi'iranoĥo no bogo gavaruĕjo. Ĕhi jiĕ'oho ja diehi'oromo uövuanuĕjo: Öroĥo iae gavaruĕje ĥöjo. ⁶Gavaruĕje ĥöjamu Iesuro uavadeje: Mare va'irarije öroĥo na jevajeĕjo. Jö ma ga'irarije öroĥo na jevajeĕjo. Darugo bae'irarije öroĥo na jevajeĕjo. Vavuohu'o gemu mae jĕvojöro nĕĕĕ'iroĥo öroĥo na gemu jevajeĕjo. ⁷Jemĕ na gevĕ'e jĕvĕ'ero nasi Vavuohu'o ga'a'arujĕjo. Jaruvohu aevoromo jemĕ Ĕ A hesi bëĥoho ueĥore baeromo gabe va'a'arujĕjo.

⁸Gabe va'a'arujĕjamu Philip-ro uavadeje: Vavuohu röjahuijego no gavarĕjo. Gavĕ'oho ĕhuro no mae javuo'ajĕjo. ⁹Mae javuo'ajĕjamu uavadeje: Philip na majae ĕĕobövĕe jemĕ'o ĥijĕ'e jevajeĕjo. Ĕhu'oho ja diehi'oromo bogo avoho gevanuĕjo. Ae rahu na gevĕ'oho nasi Vavuohu'o garuomaje ĥöjo. Ĕhu'oho ja diehi'oromo uevanuĕjo: Vavuohu röjahuijego no gavarĕjo. ¹⁰Ja diehi'oromo bogo ueĥorovoromo uvanuĕjo: Nöröro Vavu hesi dĕ vövöbajo'ere jio'i Vavuohuro nöruare dĕ vövöbajo'ere jiaĕjo. Naehu jemĕ uĕvaje jöĥo bogo nasi ĕma ueĥorovoromo uĕ'i a'i Vavue nasi dĕ vövöbajo'ere ĥijajohuro huro hesi muoĥo nasi dĕ vövöbajo'ere vaejego na vaejaje ĥöjo. ¹¹Na uĕvode ĥöjo: Naro Vavu hesi dĕ vövöbajo'ere jio'i Vavuohuro nasi dĕ vövöbajo'ere jiaĕjo. Ĕjöĥo heromo uvorĕjo: Iae mae-ĕjo. O jemĕ uvĕ'oho: Nöruare jöĥo bogo eni ĥö uvĕ'oho naehu vaejaje mu masijoho ueĥorovoromo uvorĕjo: Nöruare jöĥo mae ĥöjo. ¹²Ave jöĥo na jö mae uĕ'iĕ'ajĕjo. Ae rahu na mae ueĥorovevĕ'oho naehu vaejajĕhi jiĕ'e darugo'e muoĥo vae'a'arujĕjo. Röhu naehu vaejaje darugo'e muoĥo ma-jianovajoho u'emu jemĕro darugo'e mu masijo maho vae'a'arujĕjo rabĕni naru Vavu hesi örire va'iramu. ¹³O jemĕ rabe rabe Vavuohu nasi ihore ua gavĕ'oho naru ĕhi vaejĕho'ejöjo ĕhuro Harihu nasi muoĥo garomo uvo'irarijego: Vavuohu bööröme ĥöjo. ¹⁴No nöruare aribövĕe javuajĕ uvoromo rabe rabe ue gevĕ'oho iae na vaejĕho'ejöjo.

God-hu hesi Aru'aho mëmi'iröĥe jö Iesuhu jövodohoje.

¹⁵Jemĕ na rajĕĥijĕ'ohuro nasi jögoroho eĕĥo'arujĕjo. ¹⁶Eĕĥo'iramu naru Vavuohu ua'iramu Ajĕminövö'iröĥe A göĥo bojĕmi'ajĕjo huro rueromo jemĕ'o ma-ioro'ioremu hi'iröĥego. ¹⁷Ajĕminövö'iröĥe Aĥo iae jö maemu barovaje Aru'ahoho ĥöjo. Sa'arohemu ueĥorovarue aribövĕioĥuro ĕ Aru'ahoho bogo ueĥorovoromo simanoĥo bogo avoho gavaruĕro jiĕ'ero ĕhuni bae'iröĥoho bogo eni jĕvajeĕjo. A'i jemĕro hu avoho gavaruĕje ĥöjo. Avevejö'e hu jemĕ'o ĥijajoho u'emu jemĕsi dĕre abo ĥibe va'a'ajĕjo. Iae ĕhuni jemĕ gavaruĕje ĥöjo.

¹⁸Naru jemĕ rĕmo va'iramu jemĕ bogo sivuoho öbioĥo raromanovö'arujĕjo. A'iro na vuvonö'öromo jemĕsirire rue'ejöjo. ¹⁹Majae ma-bunemu barĕ'iramu sa'arohemu ueĥorovarue aribövĕioĥuro bogo geruomö'ajĕjo. Röhu jemĕro iae ge'a'arujĕjo. Na ĥiEMU ĥijajohuro ĕhuro jemĕ'o daruge baeromo raro'mö'arujĕjo. ²⁰Ĕĥo majaho rue'iramu jemĕ garomo uvo'a'arujĕjo: Nörö hesi Vavu hesi dĕ vövöbajo'ere jio'i no nöruare dĕ vövöbajo'ere javuo'i nöro nosi dĕ vövöbajo'ere jiaĕjo.

²¹Ae rahu nasi jögoru baeromo eĕĥĕ'oho ĕhi jiĕ'e aribövĕioĥuro rajĕĥiruomaje ĥöjo. Rajĕĥijĕ'oho nasi Vavuohuro jabumĕ rajĕĥi'ajĕjo. Rajĕĥi'iramu na'o ĕ aribövĕioĥo rajĕĥi-romo va'orahoro röjahirovö'ejöjo geruomoröĥego. ²²Ĕhi uĕvamu Judas-ro bogo Judas Iscariot a'i Judas göĥuro Iesu uavadeje: Bada ja diehi'oromo nosi örire gemu jasi ariĕjo'arije röjahirovö'i sa'arohemu ueĥorovarue aribövĕi jabĕsi öriroĥo bogo röjahirovö'iĕ'anuĕjo. ²³Bogo röjahirovö'iĕ'anuĕjamu uavadeje: Ae rahu na rajĕĥijĕ'oho ĕ aribövĕioĥuro nasi jöĥo eĕĥoruumö'ajĕjo. Eĕĥo'iramu nasi Vavuohuro jabumĕ rajĕĥiromo hu'o na'o ö'oromo jahu'o gemu mae ari'ĕjarĕjo. ²⁴O ae rahu bogo rajĕĥijĕ'oho nasi jöĥo bogo eĕĥoruumaje ĥöjo. Jemĕ ĥeĥaruĕje jöĥo bogo nasirehu jio'i a'i Vavuehu remö'öjamu rovöde a hesi jöĥo ĥöjo.

²⁵Na jemĕ'o ĥijĕ'i ĕ jöĥo majĕĥijĕ'e jevajeĕjo. ²⁶O Vavuohuro jemĕ Ajĕminövö'iröĥe Aĥo ĕ hesi bëĥoho Vavu hesi Aru'ahoho nasi ihore nugö'ö'iramu huro jemĕ bövĕioĥo bise'oho röĕĥiromo simanoĥo ĥuotovĕĥo'iramu naehu majĕĥijode jöĥo ueĥorovo barĕ'arujĕjo.

²⁷ Nasi huë maho jemesi örire bojëmijajëjo rëmo va'ie'ëro. Sa'arohemu uehorovarue ariböviehu huë ma bojëmiaruëhioho na bogo ëhioho bojëmi'ihohu'lo bojëmijajëjo. Nadi nurunurumoromo juhuonivorëjo. ²⁸ Mami'e jemë hejarije höjo naro uëvamu: Na va'ejöjo. Röhu na vuonorö'öromo jemesirire rue'ejöjo. Jemë na avoho rajehi'ibejarijëjo nasi Vavu hesirire va'irode jöho heromo nimoroho'ibejarijëjo Vavuehu na iosiremiromomo börömo jiajohuni. ²⁹ Avevejö'oho ë muoho bogo vaej'e röhu urimo na ma-majëhij'e jevajëjo ëhi'ego garomo evare mae uehorovo'irarijëjo. ³⁰ Röhu na bogo majae ëgo'oho jemë jöho majëhi'ejöjo ave sa'are Sisë A Börömohe rue'ego ëhunivo. Röhu hu bogo nasi bövioho jië'ëro hu jöho bogohöjo. ³¹ Röhu na nege sa'ae aho'o jaburo garomo uvuromoröhego: Nöröro Vavuoho iae rajahiromo Vavuehu jö bojamijadëhi nöröro ëhi ë'aje höjo. Ahia mino'ëjo. Ri'öhego no va'arëjo.

15

Iesu grape bajo rae'amaje ö'i mae jiaje uhu jö Iesuhu jövadohoje.

¹ Iae Iesuro hesi ijorajo ömo'ömohe jö viture uhu'e uëvadeje: Grape bajo rae avohaje ö'oho na jevajëjo. Ö'i muebejaje aho nasi Vavuoho höjo. ² Na'lo bimuvuruje aribövioho ëho ö'i ado sirino'oho jio'amajëjo. Ö'i muebejaje ahuro garöhe di adoho bajoho bogo rae'amamu gavë'oho duvahore tarivoromo ruruhö'öjaje höjo. O garöhe di adoho bajoho raejamu gavë'oho iogororomo sirino sirino harihu sahor'amë'oho tarivo ruruhö'ö'i mahemu nugaje höjo ëhuro ë adohuro bajoho rae avohoröhego. ³ Röhu naehu majëhijode jöho ejehë'ëro ëhuro jemë adonö'e mami'e iogorëv'e höjo. ⁴ Röhu jemë na'lo gemuore bimuvoromo raromarujohe ëhi raromorëjo. O naro jemë'lo gemuore bimuvoromo hijajohu ëhi hi'ejöjo. Jemëhu na'lo bogo gemuore bimuvoromo raromë'oho bogo rae avoho hesi jëvajëjo. Ö'i adehu aho najore bogo bimuvë'ëro sisërëromomo bajo bogo ma raejajëhi ëhi jëvo'ajëjo.

⁵ Ö'i bëhoho na jevo'i jemë ado sirino'oho jëvajëjo. Ae rahu na'lo gemuore bimuvoromo raromö'i naehu jemë'lo gemuore bimuvoromo hijë'ohuro rae avoho'arujëjo. O na'lo gemuore bogo bimuvë'oho i'lo mu'lo vaejë'oho bogo mae bogo eni jëvo'ajëjo. ⁶ Ae rahu na'lo bogo gemuore bimuvoromo raromë'oho ado suaromo ruruhö'öjago sisërëjajëhi ëhi jëvo'ajëjo. Ehi jië'e adoho gagovoromo vënire huego ravo'amaje höjo. ⁷ Röhu jemë na'lo gemuore bimuvoromo raromë'oho o nasi jö jemesi dë vövöbajore ere jië'oho ëhuro jemë rabe rabe God ua ga'i nëgë'oho uarëjo. Ua gavë'oho iae bae'a'arujëjo. ⁸ Jemë bajo rae avohë'ohuro ëhuro nasi Vavu hesi ihoho döro jiaje höjo. O bajo rae avohë'ohuro ëhuro nasi ijore ijore jijiharuje aribövi mae jëvo'ajëjo. ⁹ Iae Vavuehu na rajehijadëhi naro ëhi jemë rajëhijë'e jevajëjo. Naro ëhi rajëhijë'e jevaje ëhuni na'lo gemu mae ëhi raromorego na rajëhiemu rajëhinövo'iröjo. ¹⁰ Jemëhu nasi jögoru ejehë'oho ëhuro na'lo gemu mae raromö'iramu ëhuro na rajëhinövo'ejöjo. Naehu nasi Vavu hesi jögoru ejahë'ëro hu'lo hijëgo huhu rajehijajëhi jemëro ëhi na'lo raromö'iramu rajëhinövo'ejöjo.

¹¹ Naehu jö ëhi jövaje hesi bëhoho naehu nimorohajëhi jemë'lo na'lo gemu mae nimorohö'irarijëgo bogo bisemuoho nimorohö'i nimorohu avoho'irarijëgo. ¹² Ave jögorohu naro bojëmi'ie'ajëjo. Naehu jemë dë vövöbajore aho'lo uehorovëvajëhi jemëro göëro göho ëhi uehorovëvorëjo. ¹³ Göëhu gö dë vövöbajore ere uehorovëvarue mu börömohe aviëhi höjo nosi aganoho ajëmi'i vuovorovo'ëjarëjo. Mu ioro'iorohu ma-jianovajëjo. ¹⁴ Nasi jögoru ejehë'oho jemë nasi agane jëvaje höjo. ¹⁵ Urimoho na bogo aganoho uë'i a'i uënövode höjo: Nasi mu vaejaruje aribövie jëvajëjo. Ae gö jabesi mu vaejarue ariböviohuro jabesi masijehu vaejarue mu hesi bëhoho bogo garuomaje höjo. Ehuhi avevejö'oho na bogo nasi mu vaejaruje aribövioho uë'i a'i agane uëvajëjo ë hesi bëhoho nasi Vavuehu rabe rabe uëvamu hejode jöho naro röjëhijamu jemë gavë'ego. ¹⁶ Jemë na bogo baejevo'i a'i naro jemë baejövode höjo. Baejëvoromomo muro bamëvode höjo jemëro va'oromo ioro'ioeremu jioröhe bajoho rae avoho'irarijëgo. Ehi jië'e bajo rae avohë'oho ëhuro jemëhu Vavu hesi

örire rabe rabe nasi ihore ua gavë'oho iae huro bojëmi'ajëjo. ¹⁷Èhu'ëro jië'ëro ave jögoroho naro bojëmijajëjo. Göëro göho dë vövöbajo'e aho'o uehorovëvorëjo.

Sa'are mu sisë uehorovoruomaje ariböviehu Iesuarie aribövi nu huodaguo'iröhe jö Iesuhu jövadohoje.

¹⁸ Sa'arohemu uehorovarue ariböviehu jemë nu huodëgaruoho uvorëjo: Urimo ëhi jië'e ariböviohuro nörö nue huodivoruomade höjo. ¹⁹ Jemë'o sa'arohemu uehorovaruje aribövie jëvo'ibejajo ë ariböviohuro uvoruomo'ibejajo: Jemë nosi aribövie gemuoho jëvajeromo rajëhi'ibejarëjo. A'i jemë sa'arohemu uehorovarijoho naro baiejövode höjo nasinö jëvoröhego. Baiejëvë'ego jemë bogo jabu'oho havoromo ave sa'a hesirohemuoho uehorovaruje höjo. Èhuni ë ariböviohuro jemë nue huodëgarue höjo. ²⁰ Jemë'o uehorovohëjo. Naro mami'e uëvode höjo: Mu ariböviohuro jabesi a masijoho bogo iosirëmiromo masijoho riravarue höjo. Èjö hesi bëhoho jemesi börömoho na sisë vaejevë'ëro ëhu'ëro sa'ae aho'o jaburo mu vaejarue aribövioho jemë'o sisë vaejëvo'aruëjo. O nasi jö ejehë'oho jemesi jöhu'o ejëho'aruëjo. ²¹ Jemëro nasi ihoho baiejë'ego ëhuni ëho jaburo jemesi örire ëhi sisë vaejëvoruomo'ajëjo rabëni hesi bëhoho sa'are na remö'øjade aho jabumë bogo gavaruëro jië'ëro. ²² Na bogo sa'aroho rueromo jöho jabesi öriroho majëhi'ibejajo jabesi jö sisëho bogojio'ibejajo. Röhu nasi jöho majëhijamu hejare höjo. Hejë'ëro bogo uö'a'aruëjo: Noehu mu sisë vaejaroho bogo gavë'e ëma ë'are höjo. ²³ Na nu huodegë'oho nasi Vavuohu'o nue huodivoruomaje höjo. ²⁴ Ae göëhu bogo vaejarue ëhi jië'e darugo'e nu masijoho naro jabesi nunire vaenövode höjo. Jabesi nuniroho ëhi jië'e muoho bogo vae'ibejajo ëhuro jabesi jö sisëho bogojio'ibejajo. O avejë'oho jabumë nasi muoho iae gavare höjo röhu na'o nasi Vavuohu'o nue huodaguruomaje höjo. ²⁵ Jabuhu nu huodaguarue hesi bëhoho urimë'i jabesi jögoru surire javivoromo uvë'e höjo: Na sisëho bogo ömë'e jabumë ëma nue huodegare höjo. Röhu nue huodego'iröhe jö javivadëhi ëhi nue huodegarue höjo God-are jöho bogo bejajëro jië'ëro.

²⁶ Röhu jemë Ajëminövo'iröhe Aho jö maemu barovaje Aru'ahohuro jië'ëro Vavuohu'o gemu mae hijaje höjo. Èhi hijajëro jië'ëro naro nugö'ö'iramu Vavu hesirire jioromo jemesi örire ruvebi'ajëjo. Ruvebiromo nasi jöho huruoho majëhi'ajëjo. ²⁷ O jemë'o nasi jöho huruoho majëhi'arujëjo aeo'i na'o raromobe rovë'ëro jëvë'ëro.

16

¹ Èjöhö naro uëvajëjo jemë mae uehorovevarujoho vuonugojöëni. ² Jew rajehu God rajahjarue osare osare jemëhu gagovoromo God rajahjarujoho aëro ahëvoruomo'ajëjo. O majae ijönö aehu jemë muo'amëvë'iroho uvoruomo'ajëjo: Noehu Iesuarie aribövi muo'amaruoho ëho God-are mue vaejaruëjo. ³ Èhi jië'e huë vavaeni'e muoho jemesi örire vaejëvo'aruëjo ë hesi bëhoho Vavuohu'o na'o bogo gövuaruëro jië'ëro. ⁴ Röhu naro ë jöho uëvajëjo ëhuro naehu ëhi uëvode huë vavaeni majaho rovego jemëro uehorovoromo uvo'irarijego: Nöröro uövuade höjo: Èhi jië'e mu sisëho rue'a'ajëjo.

God-are Aru'ahuhu mu vaejaje jö Iesuhu jövadohoje.

Èhi jië'e jöho na bogo aeo'ioho uëvode hesi bëhoho na urimë'i jemë'o hibe juvoromo ëhuni bogo uëvode höjo. ⁵ Röhu avejë'ö'oho na jemë'oho bogo hi'i a'i na remö'øjamu sa'are rovode a hesi örire vuonorö'ö va'ie'ajëjo. Jemë bogo ae gemu vadu'oho uevarujëjo: Ja dinö'e va'ie'anuëjo. ⁶ Röhu na va'i uëvodohuni ëhuni jemë sisë maro vavaenimarujëjo. ⁷ Ave jöho na jö mae uë'ie'ajëjo. Na bogo va'ibejajo bisemu sisë jëvo'ibejajo. O na va'ë'ohuro ëhuro maho jëvo'ajëjo. Èhesi bëhoho na bogo va'ibejajo ëhuro God-are Aru'ahuhu Ajëminövo'iröhoho jemesi öriroho bogo rue'ibejajo. O va'ë'oho ëhuro naro Aru'ahoho jemëni nugö'ö'iramu rue'a'ajëjo. ⁸ Aru'ahohuro rueromo sama'e röjëhi'a'ajëjo ae aho'o ga'irarijego sa'arohemu uehorovarue aribövioho jaburo mu sisë hesi öroho mu ma hesi öroho sisë mevëho'iröhe hesi öroho bogo avoho uehorovoruomego. ⁹ Mu sisë hesi öri bogo avoho uehorovarue hesi bëhoho jabumë nasi öriroho bogo maho uehorovevoruomaje höjo. ¹⁰ Mu ma hesi öri bogo avoho uehorovarue hesi bëhoho naro

Vavu hesi örire maro va'iramu ijonöho bogo ge'a'arujëjo. ¹¹ Sisë mevëho'iröhe hesi öri bogo avoho uehorovarue hesi bëhoho ave sa'are Sisë A Börömo hesi muoho mami'e mevamu bejë'e höjo.

¹² Naehu jemë jöe aho'obëhe majëhi'irodoho avevejö'e simanore uehorovo'irarijoho jemë bogo eni jëvájëjo. ¹³ Iae ëhi höjo röhu jö mae barovaje Aru'ahohuro rovë'iroho huro mu ma hesi öroho röjëhi barë'ajëjo. Hu bogo hesi ëma uehorovoromo jöho jövo'i a'iro jöe rabe rabe hejë'oho ëho jövoromo röhu u'emu jioröhe mu jöho huruoho majëhi'ajëjo. ¹⁴ Naro jöe jövo'iramu Aru'ahohuro nasi jöho baeromo jemë huruoho majëhi'iramu ëhuro nasi ihoho döro jio'a'ajëjo. ¹⁵ Vavuehu jövaje jöho aho'o nasirohu'o gemuoho höjo. Iae ëhuni na uëvájëjo: Naro God-are jöe jövo'iramu Aru'ahohuro nasi jöho baeromo jemë majëhi'ajëjo.

Iesuare ariböviehu huë vavaeni baeromo barëjëgo huë mae bae'iröhe jö Iesuhu jövadohoje.

¹⁶ Majae ma-bunemu barë'iramu jemë na bogo ge'a'arujëjo. Bogo geromo röhu va'o majae ma-bunemu barë'iramu evare röhu maho ge'a'arujëjo. ¹⁷ Ge'a'arujëjumu hegorovo hesi ijorajo ioro'iorohuro uarovareje: Iesuro no uövuajëjo: Majae ma-bunemu barë'iramu bogo geromo röhu majae ma-bunemu barë'iramu ge'a'arujëjo. Hu diehi uöromo jövájëjo. O uövuajëjo: Na bogo ge'irarije hesi bëhoho na Vavu hesi örire va'ie'ajëjo. Èhu'o hu diehi uöromo ë'ajëjo. ¹⁸ Majae ma-bunemu uvaje jö bëhoho rabe höjo. Hu rabu jö jövajoho no dadivavuajëjo. ¹⁹ Èhi uarovamu Iesuro garomo uvadeje: Arue aribövioho ue ge'i nimarüeromo uëvadeje: Na uëvájëjo: Majae ma-bunemu barë'iramu bogo ge'a'arujëjo. Bogo geromo röhu va'o majae ma-bunemu barë'iramu röhu maho ge'a'arujëjo. Na jemë ë jö hesi bëhoho naho'i atarujëjo. ²⁰ Ave jöho na jö mae uë'ie'ajëjo. Jemë sisë maro nierusuburu'e bamo'arujëjo. A'i ave sa'arohemu uehorovarue ariböviohuro nimoroho avoho'aruëjo. Jemë huë vavaene bae'a'arujëjo röhu huë vavaeni bae'irarijoho barëromo dë mae jëvo'iramu nimoroho'arujëjo. ²¹ Magonahehu raho'ie'iroho hejaje höjo vi'ehi-mavego huë vavaene baejaje höjo. Huë vavaene baeromo harihohe rahanugoromo uvaje höjo: Iae harihohe mabëhe baejë'e jevajëromo nimorohaje höjo. Nimorohego ëhuro hesi vi'ehoho rumonimaje höjo. ²² Magonahehu huë vavaeni rumonimajëhi jemë'o huë vavaeni baejarujoho ëhi rumonimo'arujëjo. Avevejö'oho jemë nasi jöëni huë vavaene baejarujëjo. Huë vavaeni baejarujoho u'emu naro röhu maho ro gë'iramu nimoroho'arujëjo. Jemëhu nimoroho'irarijoho aho bogo ahëvo hesi höjo.

²³ Èmajaho rue'iramu jemë bogo nasi öriroho ue ge'a'arujëjo naro ajëmijöro. Röhu ave jöho na jö mae uë'ie'ajëjo. Jemë rabe nëgamu Vavuoho nasi ihore ua gavë'oho hu iae ajëmi'ajëjo. ²⁴ Urimoho nasi ihoroho bogo uabe rovarijoho röhu aevoromo nasi ihoro ua ganövorëjo. Èhi jië'oho jemë ua ga'irarijoho iae baeromo nimoroho avoho'arujëjo.

Sa'are mu sisë uehorovoruomaje aribövi jabesi mu sisë Iesuhu ruahö'öjëho'iröhe jö Iesuhu jövadohoje.

²⁵ Na uhu'e jöe gö gö jövoromo ëhuro nasi jöho majëhi'ajëjo. Röhu ijonö majaho rue'iramu evare uhu'oho bogo majëhi'i Vavu hesi jöho ma-sama'e majëhi'ejöjo. ²⁶ Èho majaho rue'iramu jemë Vavuoho nasi ihore ua ganövo'arujëjo huro ajëmi'iröhego. Ua ga'irarijoho na bogo uëvájëjo: Naro jemesi jöëni hu ua ga'ejöjo ²⁷ rabëni hesi bëhoho Vavuohuro iae hesi dë vövöbajö'e aho'o jemë uehorovëvajerö jie'ëro. Èhuni jemesi jöënioho na bogo ua ga'i jemesi ua ganövo'arujëjo. Vavuehu jemë uehorovëvaje hesi bëhoho jemëro na rajehiromo mae uehorovoromo uvaruje höjo: Nörö Vavu hesirire jioromo rovade höjo. ²⁸ Iae mae-ëjo. Iae na Vavu hesirire rovë'ëro ave sa'are hijajëjo. Hijajëro ave sa'aho nugo'i Vavu hesi örire vuonorö'ö va'ie'ajëjo.

²⁹ Va'ie'ajëjumu hesi ijorajoho jaburo uavareje: Asë'e avevejö'oho ja bogo uhu'oho jövo'i ma-sama'e jövanuëjo. ³⁰ Avevejö'oho no garomo uvaruëjo: Ja bövie bise'e ga barëjë'e javajëjo. Ja bogo ae gö uö gövuanue höjo: Jö rabe ue ge'i nëgajëjo. Uö gö'irane bëhoho bogohöjo jero mami'e gövuë'ëro. Èhuni no mae uehorovoromo uvaruëjo: Ja God-arire jioromo rovane höjo. ³¹ Rovane höjamu Iesuro uëvadeje: Na jemë jaruvoho mae

uehorovarujėjo. ³²Majae ijonoĥo majae ma-bunemu jio'iramu jemĕro na remö'ö barĕromo jemesi osare osare huruomo va'iramu sivue jevo'ajĕjo. Röĥu na bogo sivuoho jevo'i Vavuoho na'o jiaje ĥöjo. ³³Ējöĥo na majĕĥijajĕjo ĕhuro jemĕ heromo nasi ae gemuohuro jĕvĕ'ĕro juhuonoĥo bogojĕvo'i huĕ mae jevo'iröhego. Sa'are jiaje mu sisĕro jiĕ'ĕro ĕhuro sa'are raromoromo huĕ vavaene bae'a'arujĕjo. Ēĥi ĥöjo röĥu naro mu sisĕho ruahö'öjĕ'e jevaje ĕhuni biririvorĕjo.

17

God-hu Iesuare aribövi ajĕmiröhego Iesuhu ĕninamade jöĥoje.

¹Iesuro hesi aribövioĥo ĕĥi uĕnugoromo ö'idöre siorohoromo uavadeje: Apajo. Majaho rovĕ'e ĥöjo. Na jasi Hariĥe jevaje nasi ihoho döro banigojiomeĥonego naro jasi ihohu'o döro banigojiomaho'iröjo. ²Jero jöĥo bojĕmijane ĥöjo naro döro namiromo ae aĥo'obĕĥe muebejĕvo'irodego. Muebejĕvoromo ĕhuro jaehu bojĕmijane aribövioĥo naro darugoho bojĕmego jaburo ma-ioro'ioĕemu maro raromo'iröhego. ³Aehu ma-ioro'ioĕemu maro raromarue hesi bĕĥoho ĕĥo God ja gavarue ĥöjo ja gemu maho javego. O jaehu remö'öjamu ave sa'are rovode aĥo Iesu Keriso na gevarue ĥöjo. Ma-ioro'ioĕemu maro raromarue hesi bĕĥoho iae ĕĥi ĥöjo. ⁴Naro ave sa'are ĥiromo jaehu bojĕmane muoho vae barĕromo ĕhuro jasi ihoho döro banigojiomĕ'e jevajĕjo. ⁵Röĥu Apo avevejĕ'e na ja'o ĥijajoho jero nasi ihoho döro banigojiomeĥonĕjo. Urimo sa'a bövi bise'o bogo bamanevare evare naro ja'o ĥijamu nasi ihoho dö maro jiade ĥöjo. Ēĥi jiĕ'e iĥe gemuoho bojĕmego na bae'iröjo.

⁶Ave sa'a hesiroĥemu uehorovarue aribövioĥo God jero a ioro'ioroho baejĕvoromo nasi örire bojĕmamu baejĕvode ĥöjo. Baejĕvoromo ja dieĥi jiĕ'e ae javajoho naro röjĕĥijode ĥöjo. Jabumĕ jasinö jiaroho jero na bojĕmamu baejĕvode ĥöjo. Baejĕvamu jabumĕ jasi jöĥo ejahĕ'e ĥöjo. ⁷Ejahĕ'ĕro avevejĕ'oĥo jaburo garomo uvarue ĥöjo: Jaehu bojĕmijane jöĥo muoho bövioĥo bise'oĥo jasi örire jioromo rovĕ'e ĥöjo. ⁸Jabuhu ĕĥi uvarue hesi bĕĥoho jaehu röjĕĥijane jöĥo naro jabesi örire röjĕĥijĕ'e jevajĕjo. Röjĕĥijamu heromo baejare ĥöjo. Baejĕ'ĕro garomo uvarue ĥöjo: Iae mae-ĕjo. Nöro jasi örire jioromo rovade ĥöjo. Ēĥi uvoromo mae uehorovoromo uvarue ĥöjo: God jero nöro ave sa'are nugö'öjane ĥöjo.

⁹Na jabumĕni ĕninamijajĕjo. Na bogo uavajĕjo jero sa'arohemu uehorovarue aribövioĥo ajĕmi'i a'i jaehu bojĕmane aribövioĥo ajĕmi'iranego jasinö jĕvĕ'ĕro. ¹⁰Ae bövie bise'e na'o jiaruoho jasirohu'o jioruomajĕjo. O ae bövie bise'e ja'o jiaruoho nasirohu'o jioruomajĕjo. Nasi iĥo böromoho jabumĕro ae ma-va'orahoro röjĕĥijĕ'e ĥöjo. ¹¹Na jasirire ö'ie'ajĕjo. Ave sa'aroho bogo ĕgo'oĥo ĥi'i a'i jabumĕ ave sa'are ĕĥi raromonövo'aruĕjo. Sa'are raromo hesi jioruomĕ'e jiaje ĕhuni Apo maemu javajoho jero jasi darugohuro avoho muebejĕvonĕjo. Ēdarugoho jero na bojĕmane ĥöjo. Ēdarugo gemuohuro jabumĕ muebejĕvego ĕhuro ja'o na'o ma-gemu jiaruĕĥi jabu'o ĕĥi ma-gemu jioruomoröĥe ĥöjo. ¹²Naro jabu'o ĥijodevare jaehu bojĕmijane darugohuro ĕhuro avoho muebejĕvonövode ĥöjo rireromĕvojöĕni. Muebejĕvoromo nasi gurutore rĕmamu aĥo sisĕroĥo bogo va'ĕ'e ĥöjo. Sisĕro va'iröĥe aĥuremu sisĕro va'ĕ'e ĥöjo jasi surire jö jiajĕĥi ĕĥi jioröhego. ¹³Aviavejĕ'e naro jasi örire ö'ie'ajĕjo. Röĥu naro ave sa'are ĥiromo ave jöĥo jasi örire uavajĕjo ĕhuro naehu nimorohajĕĥi jabu'o ĕĥi nimoroho avoho'iröhego. ¹⁴Naro jasi jöĥo jabesi örire röjĕĥijamu baeruumĕ'e ĥöjo. Baeruumamu sa'arohemu uehorovarue aribövioĥuro jabesi örire nue huodĕgoruumĕ'e ĥöjo. Rabĕni hesi bĕĥoho naehu bogo sa'arohemu uehorovajĕĥioĥo ĕĥioĥo nasi aribövioĥo jabu'o bogo sa'arohemuoho uehorovaruego ĕhuni nue huodĕgĕ'e ĥöjo. ¹⁵Röĥu na bogo ĕninamiromo uavajĕjo: Sö va'ego ave sa'aroho bogo raromo'irarĕjo. A'i naro uavajĕjo: Avoho muebejĕvego A Sisĕho bogo baejĕvo'irajo. ¹⁶Naehu sa'arohemu bogo uehorovajĕĥioĥo ĕĥioĥo jabu'o sa'arohemuoho bogo uehorovarue ĥöjo. ¹⁷Jero jabumĕ baejĕvego jö mahemu ejahoromo ĕhuro jasi ariböviumu jio'amo'irajo. Jö mahemu uavaje ĕ hesi bĕĥoho aviĕĥi ĥöjo. Jaehu jövanue

jōho hōjo. ¹⁸ Jaehu na sa'are rēmō'ōjanēhi ēhi naro jabumē rēmō'ōjē'e jevajējo sa'are aribōviohu'o raromoromo mue vaerōhego. ¹⁹ Rēmō'ōjē'ero jabesi jōēni uehorovoromo naro nasi arijo'arije jasi ōrire bojamirovajējo naro jabumē ajēmijego ēhuro jabu'o jasi gemu jioruomorōhego.

²⁰ Na'o raromarue aribōvi jabesi jōēni ēhi ēninamijajējo. Bogo jabesi jōēnioho gemu uehorovo'i u'emu nasi jō majēhijego heromo na mae uehorovevo'irōhe aribōvi jabesi jōhu'o uehorovajējo. ²¹ Uehorovoromo ēninamijajējo ēhuro jabumē ae aho'obēhe magemu jiorōhego. Apajo. Na negajējo jaehu na'o bimuvo'i naehu ja'o bimuvajēhi jaburo ēhi no'o gemuoro bimuvorōhego. Bimuvego sa'arohemu uehorovarue aribōviohuro ēho garomo uvoruomorōhego: Iae mae-ējo. God-ro nōrō nugō'ōjamu sa'are rovide hōjo. ²² Jaehu nasi iho banigojioromoro aji bojemijanēhi naro ēhi jiē'e ajoho bojēmē'e jevajējo ēhuro ja'o na'o ma-gemu javuajēhi jabu'o ēhi ma-gemu jioruomorōhego. ²³ Naehu jabu'o bimuvo'i jaehu na'o bimuvanēhi ēhi jabu'o bimuvoromo ma-gemu jēvego sa'arohemu uehorovarue aribōviohuro ēho garomo uvoruomorōhego: God-ro nōrō nugō'ōjamu rovide hōjo. O God-hu nōrō rajahijadēhi huro hesi aribōviohu'o ēhi rajēhijaje hōjo.

²⁴ Apajo. Na negajējo jaehu bojemijane aribōviohuro nasinō ō'oromo na'o gemu mae raromoruomorōhego. Raromoromo nasi aji maho garuomorōhego. Ēajoho jero na bojemane hōjo rabēni mami gō'e sa'a bōvi bise'o bogo bamanevare evare jaehu na rajehinōvanohuni. ²⁵ O Apo ja mu maemu vaejanue ae javajējo. Sa'arohemu uehorovarue aribōvioho ja bogo gavaruē hōjo. A'i naro iae ja gavaje hōjo. O ave nasi aribōviohuro iae garomo uvoruomaje hōjo: Jero nōrō nugō'ōjamu rovide hōjo. ²⁶ Ja diehi jiē'e ae javajoho naro nasi aribōvioho rōjēhijē'e jevajējo. Iae na ēhi rōjēhinōvo'ejōjo ēhuro jaehu na rajehijanuēhi jaburo ēhi gōēro gōho rajahirovego naro jabu'o gemu mae juvo'irodēro.

18

Judas-hu Iesu bijōnimarue aribōvi ajēmiromo Iesu jabesi ōvore bojēmade jōhoje.

¹ Iesuro ēhi ēninaminugoromo hesi ijorajo ōmo'ōmohu'o gemu mae va'adeje. Va'oromo Kidron dodure abueromo iojioromoro aehu ijo bivare ōri ari'ere ē va'o raromareje. ² Rōhu Iesuni hiruēmade aho Judas ē ōri ari'oho iae gavadeje mami'e Iesuro hesi ijorajoho jabu'o ē ro hinōv'ē'ero. ³ Judas-ro ē ōri ari'oho gav'ē'ero ae sōjēvo ujuohoromo rovideje. Muorovo aribōvioho sōromo God-are amo bōrōmo atovarue aribōvie priest masijohu'o Pharisee ōmo'ōmohu'o jabuhu rēmō'ōjamu rovaroho sō ujuohoromo rovamu bijo buno'oho ujuohoromo iroho gae ujuohoromo rueruomadeje. ⁴ Rovamu gēgorovo diehi jiē'e muehu hesi ōrire rue'irōhoho Iesu iae ga barēromo ro birohēvoromo uēvadeje: Jemē rahuo naharujējo. ⁵ Rahuo naharujējamu uavareje: Iesu Nazareth rajoho naharuējo. Naharuējamu uēvadeje: Ēuvaruje aho iae na aviae jevajējo.

Rōhu Iesuni hiruēmade aho Judas jabu'o gemu mae namijadeje. ⁶ Jabu'o gemu mae namijamu gagorovo rueho jaburo hejare Iesuro uēvamu: Na jevajē uēvamu hegorovo dejonō va'oromo sa'are rireromareje. ⁷ Ēhi'amu Iesuro rōhu maho uēvadeje: Jemē rahuo naharujējo. Naharujējamu uavareje: Iesu Nazareth rajoho naharuējo. ⁸ Naharuējamu uēvadeje: Na mami'e uēvode hōjo: Iae na aviae jevajējo. Jemē na nahevogoro ave nasi aribōvioho rēmō'ōjego ma-va'arējo. ⁹ Ēhi uēvade hesi bēhoho mami'e Iesuro Vavuoho uavadeje: Jaehu bojemane aribōvioho naro bogo ae gemu vadu'oho nugō'ōjamu sisēroho va'ē'e hōjo. Hu Vavu uavadēhi hesi aribōvioho ēhi mae jio'amorōhego ēhuni guduamo'i rovere aribōvioho uēvadeje: Nasi aribōvioho rēmō'ōjego va'arējo. ¹⁰ Ēhi uēvamu Simon Peter-ro kaejōe gurihī bamē'ēro jiē'ēro jijōromo priest bōrōmo hesi mu vaejaje a ihe Malchus anoromo ōvo manōrire hia'oho tariō'ōjahadeje. ¹¹ Hia'oho tariō'ōjahamu Iesuro Peter uavadeje: Kaejōho sionoro ba'amējo. Naehu i'u baejōro Vavuehu uevajoho rabēni bogo baejōrajo.

Aehu Iesu Annas-are nunire bava'o nugare jōhoje.

¹² Ĕhi'amu gagorovo muorovo ariböviohu'o jabesi a börömo'u Jew rajo atovarue ariböviohu'o ĕho jaburo Iesu guduamoromo tövonugoromo ¹³ hu'irae baeromo urimo Annas ga'i rovareje. Annas hu Caiaphas-are vaboro hesi vavue jiadeje. Ĕvaduniroho Caiaphas hu priest böröme jiadeje. ¹⁴ Caiaphas-ro urimë'i Jew rajo a masijoho uĕvadeje: Ae gemuehu ae aho'obĕhe noni guomë'oho iae mae höjo. Ĕhi jövade a hesi juroho Annas ga'irögoro Iesu hu'irae bava'areje.

Peter-hu Iesu gavaje jö a subivĕhade jöhoje.

¹⁵ Hu'irae bava'amu Simon Peter'o ijoraje gö'o jaburo niö'iro Iesu rihiomareje. Rihioromoro priest börömo hesi amo rejo iromare ojore rovareje. Rueromo göhuro Iesuhu va'ajire ĕ va'adeje priest börömo ĕ aho mami'e gavajego. Huro ĕ va'i Peter-ro rejo ojore viĕhi amonö namijadeje. ¹⁶ Ojore viĕhi amonö namijamu Iesuare ijorajo göho priest börömehu gavaje ahuro sionĕro ojore rueromo ojo muebejaje magonahoho uanugoromo Peter ojore namijajoho osanö hu'irae bava'adeje. ¹⁷ Bava'amu ĕ ojo muebejaje magonahohuro Peter uavadeje: Na mae ja'o ĕ ia hesi ijoraje javajĕjo. Ijoraje javajĕjamu uavadeje: O na bogajo. ¹⁸ Ĕhi uanugoromo va'oromo gĕvade mu ariböviohu'o atovarue ariböviohu'o runonĕgamu vĕni muraege biho'amĕ'ĕro bĕhire riravoromo jurovoruomamu gĕgorovo va'oromo jabu'o gemu mae namiromo vĕnoho jurovadeje.

Iesu priest börömo hesi nunire namijamu jöe gö gö ua ga'i hijade jöhoje.

¹⁹ Ĕhi'amu priest böröme Annas-ro Iesu uavadeje: Jasi ijore ijore jijiharue aribövioho rahumĕ höjo. Ja diehi jiĕ'e jöho aho röjĕhianue höjo. Ĕjöhö majehijego hejĕjo. ²⁰ Majehijego hejĕjamu uavadeje: Na bogo gur'ihoromo jöho majĕhi'i ma-va'orahoro sama'e majĕhinövode höjo ae aho'obĕhe heruomoröhego. God rajahijarue osare osare o God-are amo börömore ĕ röjĕhibe juvonövode höjo Jew raje aho'obĕhe ĕ gagovarüĕro jiĕ'ĕro. ²¹ Ĕhu'ohö ja rabĕni nasi öriroho ue gevanuĕjo. Nasi jö heruomade aribövioho jabumĕ uĕ gĕnego majahiruomol'irajo. Naehu majĕhijode jöho jabumĕ iae gavarue höjo. ²² Ĕhi jövamu hejĕ'i evare atovarue ae gemu Iesuare bĕhire namijadohuro Iesu övo hitahiĕro anoromo uavadeje: Hĕ ja rabĕni priest börömo ĕhioho uavanuĕjo. ²³ Uavanuĕjamu hegorovo uavadeje: Naehu jö sisĕ majahamu hejanoho huruoho majahuego no ae aho'obĕhe hejarĕjo. O naehu jö mae majahamu hejanoho röhu rabĕni na aneganuĕjo.

²⁴ Ĕhi uavamu hegorovo Annas-ro Iesu tövare ö'ohö bogo jiovahĕ'e ĕhu'o ĕhi nugö'ö-jadeje va'oromo priest böröme Caiaphas-are nunire namiröhego.

Peter-hu Iesu gavaje jö röhu maho subivĕhade jöhoje.

²⁵ Ĕhi'amu Simon Peter-ro ĕhi namiromo vĕnoho jurovadeje. Jurovamu gagorovo aĕro uavareje: Na mae ja'o hesi ijoraje javajĕjo. Ijoraje javajĕjamu uĕvadeje: O na bogajo. ²⁶ Ĕhi uavamu priest börömo hesi mu vaejarue röhu ae gemu Peter-hu anoromo hia'i tariö'öjahade ĕ a hesi agane gemuohuro Peter uavadeje: Iae na gavode höjo ijo bivare öri ari'ere ja Iesu'o gemuore namijamu. Na mae-ĕjo. ²⁷ Ĕhi uavamu Peter-ro uavadeje: Bogajo. Bogajamu gavĕ'i evare kökörökoho uvadeje.

Iesu barovamu Pilate-are nunire namijade jöhoje.

²⁸ Ĕhi'amu Iesu Caiaphas-are nunire namijĕ'ĕro sisonuvamu aĕro hu hu'irae baeromo sa'a muebejaje a börömo hesi osare rovareje. Rueromo röhu uvareje: Osare va'ĕ'ohö no sisĕ baeromo God-hu Vörö Tugohade Söröho bogo avoho i'ĕjarĕ uvoromo bogo osaroho va'i ma-ojanore riravareje. ²⁹ Ojanore riravamu Pilate-ro hörö rueromo uĕvadeje: Ave ia hesi sisĕho rabe jiamu baeromo rovarije höjo. ³⁰ Baeromo rovarije höjamu uĕvareje: Ĕihö bogo mu sisĕ vaejaje aho jio'ibejajo no bogo barueromo jasi öriroho bojami'ibejarĕjo. ³¹ Bogo bojami'ibejarĕjamu Pilate-ro uĕvadeje: Jemĕro jemesi bava'oromo court vaeromo jemesi jögoroho atoromo hesi muoho mevo garĕjo mae o sisĕ jiego. Ĕhi uĕvamu Jew rajo masijohuro uavareje: Iae ĕhi höjo röhu aehu mu sisĕ vaejarohuni noehu uĕvego vuovoröhe darugoho nosi öriroho bogohöjo. ³² Uĕvego vuovoröhe darugoho nosi öriroho bogohö uavare hesi bĕhoho God-ro nimadeje Iesu korosire anego guomoröhe jöho Iesuhu

mami'e jövadëhi ëhi jioröhego. Èhuni uavareje: Èhi jië'e darugoho bogojavuajëjo. ³³ Bogojavuajëjamu Pilate-ro hesi osa börömore vuonorö'ö va'adeje. Va'oromo Iesuni uvoromo rovamu uavadeje: Na ja Jew rajo jabesi a börömocho javajëjo. ³⁴ Börömocho javajëjamu Iesuro uavadeje: Na jasi ëma uehorovoromo uevanuëjo. O na ae göëro nasi jöho uavë'ëro uevanuëjo. ³⁵ Uevanuëjamu Pilate-ro uavadeje: Asë'e na bogo Jew rajehu jevajëjo. Jasi sa'a rajohu'o jasi priest masijohu'o ëho jaburo baejavoromo ro nasi övore bojemare höjo. Ja diehi'amu baejavo rovere höjo. ³⁶ Rovare höjamu uavadeje: Ave sa'are masije riravarue aribövi jabesi muoho gö jio'i naehu börömo namijaje muoho gö höjo. Nasí muoho sa'are jiaje mue gemuoho jio'ibejajo nasi mu ariböviohuro muorovoromo ahëvo'ibejarëjo ëhuro Jew rajohuro bogo guduamevoröhego. Röhu bogo ëhioho höjo. Naehu börömo namijaje muoho bogo ave sa'are vaejarue mue gemuoho höjo. ³⁷ Èhi uavamu Pilate-ro uavadeje: Èhi jië'oho na ja böröme namiromo ae muebejvanue ae javajëjo. Javajëjamu Iesuro uavadeje: Naehu börömo namijajoho jero jasi jövanuëjo. Röhu na sa'are ruvebijamu rahevade hesi bëhoho jö mahuremu majëhi'irodëro ruvebijamu rahevade höjo. Ae rahu jö mahuremu nimaruocho nasi jöe ejarahue höjo. ³⁸ Ejarahue höjamu Pilate-ro uavadeje: Röhu jö ma hesi bëhoho diehi höjo.

Iesu anego guomoröhego Pilate-hu majëhijade jöhoje.

Jö ma hesi bëhoho diehi hö uaromo amonö röhu maho hörö va'oromo Jew rajoho uëvadeje: Ave aehu i'ua baeröhe hesi sisëho bogo birohë'e jevajëjo. ³⁹ Röhu ave söro majaho rovego evare naro savoji ojoho jiovoromo jemëni ae gemu nugö'öjöhego hu mae va'aje höjo jemesi muoho ëhi gemu jiove rovë'ego. Èhi jië'oho na jemë nëgajëjo naro Jew rajo jemesi börömocho jiovo nugö'öjöhego mae va'ojöro. ⁴⁰ Èhi uëvamü hegorocho jö'e dadovoromo uvoruomadeje: Bogo ë iahajo. A'i Barabbas-ajo. Èhi uvoruomadeje. Jaburo Barabbas jiovahego va'ojöro nimareje röhu hu vajiohu'e anano'e ae jiadeje.

19

¹ Iae Pilate-ro uëvamü muorovo ariböviohuro Iesu bava'oromo hisuebijareje. ² Hisuebiromo a masijehu bosö didi'arue ëhi jië'e bosöho Iesuare simanore didi'ahareje. Röhu bogo inömo maho baeromo bosöho avohaho'i bibë'e ijo hisuoho ujuoho huoromo simanore ba'amahareje. Ba'amahoromo a masijehu kavuë'e niögö ego io'amarue ëhi jië'e niögöho ba'amahoromo ³ ro sivoromo ua'i arijareje: Jew rajo a börömocho vaevë'e hijanuëjo. Èhi uaromo övo hitahiëro ano'i arijareje.

⁴ Èhi'amu gagorovo Pilate-ro osare jioromo röhu maho hörö rueromo ë gagovare aribövioho uëvadeje: Jöe hehëjo. Naro ë iaho hu'irae barue'ie'ajëjo jemëro garomo uvo'iririjego: I'u bojami'irode bëhoho na bogo birohë'e jevajëjo. ⁵ Èhi uëvamü gavë'i Iesuro bibë'e bosöho simanore didi'ë'e kavuë'e niögöho ba'amë'e hu'o höröjajede. Höröjamu gagorovo Pilate-ro uëvadeje: Gahëjo. Èiaho aviae höjo. ⁶ Iesu ganugoromo priest masijohuro God-are osa atovarue ariböviohuro uvoruomadeje: Korosioro anego guomajo. Korosioro anego guomajo. Guomajamu Pilate-ro uëvadeje: Jemëro jemesi bava'oromo korosioro anohego guomajo. I'u bojami'irode bëhoho na bogo birohë'e jevajëjo. ⁷ Bogo birohë'e jevajëjamu rue Jew rajohuro uaruomadeje: Röhu jögoru börömocho nosi örire jiajëjo. Èiahuo ë jöho ahoromo uövuade höjo: Na God-are Harihe jevajëjo. Èjögöru ahadohuni ëhuni guomo'a'ajëjo.

⁸ Èhi uavamü hegorocho Pilate-ro urimo juhuonivadoho ë jabesi jöho hegoro evare juhuonivo avohadeje. ⁹ Juhuonivo avohoromo Iesu hu'irae baeromo rue osa börömore vuonorö'ö va'oromo uavadeje: Ja dinö'e jioromo rovane höjo. Rovane höjamu Iesu bogo mana ua'i ma-jörumoraëjajedeje. ¹⁰ Jörumoraëjamu Pilate-ro uavadeje: Ja diehi'oromo jöho bogo mana majehijanuëjo. Aveho uehorovëjo. Na jiovo ramö'ö'irode darugoho korosire ano taemavo'irode darugoho iae na jevajëjo. ¹¹ Jevajëjamu uavadeje: Iae ëhi höjo röhu God darugoho bogo bojami'ibejajo nasi örire mae o sisë vae'irane darugoho bogojavo'ibejajo. A'i God-ro bojami'jë'ëro ëhu'ëro iae eni javajëjo. Èhi jië'ëro jasi övore

bojamamu ja baejevane a hesi jö sisëhuro jasiroho iosiramiromo bövi mae höjo. ¹² Ëhi uavamu hegoroovo Pilate-ro öre nahadeje Iesu jiovo nugö'ö'irovo. Jiovo nugö'ö'oi öre nahamu Jew rajohuro ma-darugo'o uvoruomadeje: Jaehu hu jiovo nugö'öj'öho ëho ja bogo Rome a böörömo nimanue aho javo'ajëjo. Ae rahu uvë'öho: Na bööröme namijaje ae javajë uvë'öho ë iahuro Rome a böörömo hesi muoho ahaje höjo. ¹³ Ahaje höjamu hegoro Pilate-ro va'lo Iesu hu'irae baeromo amonö ro hörönugoromo va'adoho munëhu ahare öri ari'ere Hebrew huëhu huotovë'öho Gabbatha ë va'oromo jö mevarue arëto böörömore hijadeje.

¹⁴ Röhu God-hu Vörö Tugohade Sörö iröhe majaho nërëhi jio'i röhu evaroho majae ririre jio'iro ë'adeje. Evare majare Pilate-ro arëto böörömore hiromo Jew rajoho uëvadeje: Jemesi a böörömo gahëjo. ¹⁵ Gahëjamu hej'ei rue ariböviohuro ma-darugo'o uvoruomadeje: Anëjo. Anëjo. Korosioro anego guomajo. Pilate-ro uëvadeje: Na na jemesi böörömo korosiroho ano'ejöjo. Ano'ejöjamu priest masijohuro uaruomadeje: Rome a böörömo ehemu nosi böörömo jiajëjo. Ae gö bogohöjo. ¹⁶ Ae gö bogohöjamu Pilate-ro ë aribövioho ejëhoromo muorovo a jabesi övore Iesu bojëmadeje jaburo bava'oromo korosire anego guomajöro. Bojëmamu Iesu baeruomadeje.

Iesu korosire ano taemare jöhoje.

¹⁷ Iesu baeruomamu huro korosioho banigojioromo dejore bamoromo baeromo va'adoho ajio ë'lo ihe Simano Gijo Va'ëne Ë'öho Hebrew huëhu huotovë'öho Golgotha ë ajio suorvareje. ¹⁸ Suorovonugoromo ë dirö'ore korosire ano taemareje. Röhu ae niö'i jabu'lo ano taemëvareje u'em ujuoho nigemo'amoromo Iesu ririre amo'i a göho ruëhi amo'i göho viëhi amo'iröhëro. ¹⁹ Ëhi'oi röhu urimo Pilate-ro Iesuare jöho jajivoromo ae bojëmijadeje bava'oromo Iesuare simano namore korosire ano taemego aëro garuomoröhego. Jöho jajivoromo ëhi uvë'e jiadeje: Iesu Nazareth raje Jew rajo jabesi a böörömo höjo. ²⁰ Ejöho Jew raje ae aho'obëhe adahoruomadeje Iesuhu korosire iromadoho amo böörömo bëhiro jië'ëro. Ejöho Hebrew jöëro Rome jöëro Greece jöëro jajivo'amë'e jiadeje. ²¹ Jajivë'e jiamu gagorovo Jew rajo priest masijohuro va'oromo Pilate uavareje: Nadi ëhioho jajivoromo uvo'ibejanëjo: Jew rajo jabesi a böörömo höjo. A'i jajivoromo uvonëjo: Ave iahuro hesi ëma uvade höjo: Na Jew rajo jabesi böörömo jevajëjo. ²² Böörömo jevajëjamu Pilate-ro uëvadeje: Bogajo. Na jajivodoho hesi ëhi jiemu jio'a'ajëjo.

²³ Ëhi'amu muorovo ariböviohuro Iesu korosire ano taemonugoromo hesi niögoho adovoromo muorovo ae ëhi niö'i ëhi niö'i jië'ëro gemu gemu ujuohareje. Röhu hesi niögu ëgobövioho ëhu'lo baejareje. Baeromo gavareje bogo niögu göho göho gemuoroho bimuvoromo sigohijë'e jio'i ma-bööröme gemu jiamu gagorovo ²⁴ uarovareje: E'ego no niögoho bogo arororomo gemu gemu bae'irögöro a'i ajajovoromo gavarejo raro baejego. Jabuhu ëhi ë'are hesi bëhoho mami'e God-are surire jajivoromo uvë'eje:

Nasi uho giva'öho adovoromo ujuohare höjo.

Nasi niögoho ajajovoromo ae gemuëro baejade höjo.

Surire jajivadëhi ë muorovo ariböviohuro ëhi ë'areje.

²⁵ Ëhi'amu Iesuare vëmoho o vëmu hesi öho o Mary Clopas-are vaboroho o Mary Magdalene ëho jaburo korosi bëhire riravareje. ²⁶ Riravamu gagorovo Iesuro gavadeje aruëre hesi vëmohu'lo hesi ijoraje huhu dë vövöbajo'e aho'lo rajahijajoho jabu niö'iro rirarovamu. Rirarovamu gëgorovo vëmoho uvadeje: Mamajo. Ave iahuro harihëro muebejavanovo'ajë ua'i ²⁷ ijorajoho uvadeje: Ave magonahoho vëmunö'e muebenëjo. Ëhi uavë'ëro rue ahuro magonahoho hu'irae bava'amu hesi osare hijadeje.

Iesu guomade jöhoje.

²⁸ Ëhi ë'ë'ëro Iesuro garomo uvadeje: God-hu nimade muoho mami'e barëjë'e höjo. Mami'e barëjë'e höromo diehi ë'iröhëgo God-are surire jö jajivadëhi ëhi ë'i nimamu uvadeje: Na jove i'i negajëjo. ²⁹ Jove i'i negajëjamu ramaho roriae jiadeje. Nioga'i'e wine jovëro ë ramaho irijiomë'e jiadeje. Ëhi jiamu aëro u'uhë'e inömo jovore

ba'amonugoromo rumorovamu ioromo ijaho viture bijiohonugoromo nigemoromo hireo bamahadeje. ³⁰ Bamahamu jovoho sunuohonugoromo uvadeje: Iae barējajējo. Ēhi uvoromo simanoho uruhoromo aru'ahoho nugō'ōnugoromo guomadeje.

Muorovo aehu Iesuare ionire bijihu bijiohade jōhoje.

³¹ Guomamu majaho Friday jiē'ēro Jew rajohuro uvareje: Nērōho nuho majae sōrō maja bōrōmoho jio'iē'ego ēhuni vuovē'e sinehu korosire nuho majare rae'amo'irōhoho no bijjōnaguajēromo iae va'areje. Va'oromo Pilate uavareje: Uēvego korosire rae'amaje aribōvioho aēro va'o hōroho aho'amēhego vuovēvo'irajo. Vuovēvego evare korosire ijajoho ujuoho ruvebi'irarējo. ³² Ruvebi'irarējamu Pilate-ro ejēhamu muorovo aribōviohuro va'oromo va'o Iesu'o gemu mae ano taemare a gō hesi hōrohu'o gō hesi hōrohu'o ahēhoromo ³³ Iesuaro va'oromo gavare mami'e guomē'e jiamu gagorovo hōroho bogo ahahareje. ³⁴ Bogo ahaho'irōgoro muorovo ae gemuēro bijohuro Iesuare ionire bijiohamu gavē'i kō'o jovo'o rovadeje. ³⁵ Kō'o jovo'o rovamu gavade ahuro majahuijē'eje jemēro heromo mae uehorovo'irarijego. Hesi jōho bogo sareri'ehu jio'i iae maeje. Huro mae garomo uvareje: Naehu majēhijode jōho iae mae hōjo. ³⁶ Rōhu Iesuare hōru bogo ahahare hesi bēhoho mami'e diehi ē'irōhego God-are surire jō jajivadēhi ēhi jiorōhego. Jōho jajivoromo ēhi uvē'eje: Hesi ijo'ahe gemu vadu'oho bogo ahō'ōjaho'aruējo. ³⁷ O Iesuare ionire bijiohade hesi bēhoho mami'e God-are surire jō gōho jajivoromo ēhi uvē'eje: Bijēro bijiohoromo ē aho nunēro garuomo'ajējo. Diehi ē'irōhego God-are surire jajivadēhi iae ēhi bijiohadeje.

Iesuare sino munē gagore bamare jōhoje.

³⁸ Ēhi'amu Joseph Arimathea amo rajohuro rovadeje. Joseph hu Iesuare ijore ijore juvaje ae jiadeje. Rōhu Jew rajo a masijoho juhuonēmiromo bogo huruoho majēhi'i ma-saginiēri Iesu uehorovobe juvadeje. Ēhuro rueromo Pilate uavadeje: Uevego na va'oromo Iesuare sinoho bava'irōjo. Bava'irōjamu Pilate-ro ejahamu Iesuare sinoho bae'i va'adeje. ³⁹ Rōhu Nicodemus-ro hu'o gemu mae va'adeje. Nicodemus hu urimē'i vahi'e Iesu ga'i rovade aho jiadeje. Hu'o hesi aribōviohu'o ridi'e osoho ujuohoromo Joseph'o va'areje. Ēsoho ridi'e ije niō'i jabesi siva buaroharoho ē hesi i'uocho 40 kilo rabu'e ēhi jiadeje. ⁴⁰ Ēsoho ujuoho va'oromo Iesuare sinoho baeromo Jew rajehu sino guavo'i ē'aruēhi Joseph'o Nicodemus'o ēhi niōgohu'o ridi'e osohu'o ujuohoromo ēhuro sinoho avohahoromo numareje. ⁴¹ Rōhu Iesu korosire anare ē hesi bēhoho mae jiadeje. Ēmure munē gage gemu bogo aho bamē'e ēna uno'e jiē'e jiadeje. ⁴² Uno'e jiē'ēro Iesuare sinoho numonugoromo uvareje: Nērōho Jew rajo nosi nuho majae jio'a'ajēromo munē gagoho bēhiro jiē'ēro ē dunemu bamareje.

20

Iesu i'ovoromo ri'ōjē'ēro hesi sino bamariroho bogojiade jōhoje.

¹ Iae hura bōrōmoho bogo ajivē'e i'o ma-sisonuvo'ia'amu Mary Magdalene-ro Iesu bamarire va'adeje. Va'i gavadeje ojo tugohare munēho rori'o bava'ē'e jiamu. ² Bava'ē'e jiamu gavē'i ē magonahohuro tutuvoromo va'adoho Simon Peter'o ijoraje Iesuhu dē vōvōbajo'e aho'o rajahinōvade ē ahu'o uēvadeje: Badare sinoho munē gagoroho bava'ē'e hōjo. Bava'oromo dinō'e bamaroho no dadivavuajējo. ³ Dadivavuajējamu gagorovo Peter'o Iesuare ijorajo gōhu'o ri'ōromo Iesu bamarire va'areje. ⁴ Jaburo niō'iro tutuvo va'oromo ijorajo gōhuro Peter iosiramiromo munē bēhire urimo rovadeje. ⁵ Urimo rueromo hohitohoromo sino numo'amare niōgoho ga'amadeje. Ga'i munē gagoroho bogo rumo va'adeje. ⁶ Bogo rumo va'amu Simon Peter-ro ijore rovadoho ro munē gagore va'adeje. Va'oromo gavadeje sino numo'amare niōgoho momorō'ō'i ⁷ Iesuare simano numare niōgoho hesi hahagu huhohē'e raromamu. ⁸ Ēhi gavamu gavē'i urimo rovade Iesuare ijorajo gōhuro hu'o rumo va'oromo nunēro garomo mae uehorovadeje. ⁹ Jaburo niō'iro Iesuhu guomoromo ri'ō'irōhe God-are surire jajivare jōho bogo uehorovareje. ¹⁰ Bogo uehorovē'ēro Iesuare ijoraje niō'iro sionēro jabesirēro va'areje.

Iesuhu Mary Magdalene-are nunire rovamu gavade jöhoje.

¹¹ Iesuare ijoraje niö'iro va'irögoro Mary-ro sino bamare ojo bähire namiromo nivadeje. Nivoromo hohitohoromo sino bamarire uherihadeje. ¹² Uheriho'i gavadeje anerae niö'i ajivë'e niögoho io'amë'e Iesuare sino bamare sionore göho simano bamarinö hi'i göho höru bamarinö hijamu. ¹³ Èhi gëvamu gagorovo rue aneraho jaburo uavareje: Ma'inoho ja rabëni nivanuëjo. Ja rabëni nivanuëjamu rue magonahohuro uëvadeje: Aëro nasi Badare sinoho bava'ë'e höjo. Bava'oromo dinö'e bamaroho na bogo gagoro ëhuni nivajëjo. ¹⁴ Èhuni nivajëromu huutorovo'i gavade Iesu namijamu gagorovo uvadeje: Nani hesi ae gö höjo. ¹⁵ Hesi ae gö höjamu Iesuro uavadeje: Ma'inoho ja rabëni nivanuëjo. Ja rahuo nahanuëjo. Ja rahuo nahanuëjamu magonahohuro uvadeje: Nani ave mu muebejaje aho höromu uavadeje: Jero sinoho bava'ë'e javego röjehego na va'o baejõjo. ¹⁶ Baejõjamu ruehuro uavadeje: Mary-ajo. Mary-ajamu magonahohuro huutorovoromo Hebrew jöëro uavadeje: Rabonia uavade hesi bëhoho uaromo ë'adeje: Tisajo. ¹⁷ Rabonia uavamu uavadeje: Nasi Vavu hesi öriroho bogo ajiomë'e jevaje ma'enganuoho vuonugëjo. Vuonugo'i va'oromo nasi ö ömo'ömoho uënjëjo: Nörö God-are örire ajiomö'ie'ajëjo. God hu nöruare Vavue jioromo jemesi Vavue höjo. Hu nöruare God jioromo jemesi God höjo. ¹⁸ Èhi uavamu Mary Magdalene-ro va'oromo Iesuare ijorajo ömo'ömoho uëvadeje: Na Bada gavë'e jevajëjo. Gavamu huro jöho ëhi ëhi majehade höjo.

Iesuhu hesi ijorajo jabesi nunire rovamu gavare jöhoje.

¹⁹ Evare majare hura börömore vahiromamu Iesuare ijorajo ömo'ömohuro Jew rajo a masijoho juhuonëmiromo osare gagovoromo ojoho tugoho titimë'ëro ë raromareje. Raromamu gavë'i Iesuro jabesi ririre ëma ro namiromo uëvadeje: Huë mae raromohëjo. ²⁰ Huë mae raromohë'i hesi övohu'o ionohu'o röjëhijadeje. Röjëhijamu gagorovo uvareje: lae Bada hö uvoromo nimorohareje. ²¹ Nimorohamu röhu maho uëvadeje: Huë mae raromohëjo. Nasi Vavuehu na remö'öjamu sa'are rovodëhi ëhi naro jemë rëmö'öjajëjo jemëro va'oromo nasi muoho vaebe jijihö'irarijago. ²² Èhi uëngoromo nu öge ahodëgoromo uëvadeje: God-are Aru'ahoho baerëjo. ²³ Jemëhu ae rahuare örire uavë'oho: God-ro jasi sisëho uehorovoromo vuonugajë uavë'oho God-ro ë a hesi sisëho uehorovoromo maioro'ioeremu vuonugo'ajëjo. O jemëhu ae rahuare örire uavë'oho: God-ro jasi sisëho majae ëhi uehorovaje hö uavë'oho God-ro ë a hesi sisëho majae ëhi uehorovo'ajëjo.

Iesuhu Thomas-are nunire rovamu gavade jöhoje.

²⁴ Èhi'amu ijoraje ae gemu bogojië'ëro rovajoho bogo gavadeje. Èjijorajo hesi ihoho Thomas aehu uvaruoho Huodi'e Rahade Ahoje. ²⁵ Thomas Iesu bogo gavë'ego Iesuare ijorajo ioro'iorohuro Thomas uavareje: No Bada gavë'e javuajëjo. Bada gavë'e javuajëjamu uëvadeje: Hesi övore vio'uehu ano taemo'amare sionoho naehu bogo garomo nasi övo namehu bogo rëhë'oho o hesi ionihore bijehu bijiohadire nasi övo bogo nugö'öjë'oho ëhuro bogo ma uehorovoromo bogo uvo'ejõjo: Iesu ri'öjë'e höjo.

²⁶ Röhu urimo Iesuhu jabesi nunire rovadoho hurae gemu barëjamu hesi ijorajoho jaburo röhu maho osare raromareje. Raromamu Thomas-ro jabu'o hijadeje. Ojoho tugoho titimoromo osare raromamu gavë'i Iesuro jabesi ririre ëma ro namiromo uëvadeje: Huë mae raromohëjo. ²⁷ Èhi uëngoromo Thomas uavadeje: Jasi övo namoho barueromo ave nasi övoho gavehëjo. Jasi övoho barueromo nasi ionihoro nugö'ö gavëjo. Èhi'oromo naehu ri'öjode jöho mae o sarere hö uvanuoho vuonugo'i ma-avoho uehorovonëjo. ²⁸ Avoho uehorovonëjamu Thomas-ro uavadeje: Nasi Bada nasi God ja javajëjo. ²⁹ Nasi God ja javajëjamu Iesuro uavadeje: Jero na gevë'ëro ëhu'ëro mae uehorovanuëjo. Röhu bogo gevë'e ëma mae uehorovë'oho ëhi jii'e aribövioho huë mae bae'a'aruëjo.

Ave surire jö jajivade hesi bëhoho ëhi jiaje jöhoje.

³⁰ Iae Iesuhu bëhi'e mu masije aho'o hesi ijore ijore jijiharue aribövi jabesi nunire vae'amadoho ave suriroho ë jöho bogo jajivo'amë'eje. ³¹ Èhi jie röhu naehu ave jö jajivobe rovode hesi bëhoho jemëro adahoromo uvo'irarijago: lae mae-ëjo. Iesu hu böröme

namiromo ajamuaje aho hōjo. Hu God-are Harihe hōjo. Ējōho uehorovoromo hesi darugoho baeromo ēhuro i'ovoromo maro raromoiririjego ēhuni jajiv'e jeve.

21

Iesuhu hesi ijarahje 7 jabesi nunire rovamu gavare jōhoje.

¹ Ēhi'amu ijonō rōhu maho Iesuro hesi ijarahje jabesi nunire rovadeje. Evare majaroho Tiberias e'u rirōre ē rovadeje. Rueromo huhu ē'ade jōho na jajivo'ie'e. ² Iae Simon Peter o Thomas aehu uvaruoho Huodi'e Rahade Aho o Nathanael Galilee sa'a raje Cana amo rajoho o Zebedee-are harihe niō'i o ijarahje gö'o niō'i ēho jaburo gemuore gagovoromo raromareje. ³ Raromoromo Simon Peter-ro ri'ōromo a ioro'ioroho uēvadeje: Na visu maje va'ie'ajējo. Va'ie'ajējamu jaburo uavareje: No'o ö'ie'aruējo. Ö'ie'aruēromo va'oromo boat gagore ajiomoromo jovo dōre va'oromo vahi bövie visuēni viōe jovore ba'amoromo io gabe jijihoromo visuoho bogo biroh'e gavareje sisonuvamu.

⁴ Sisonuvamu gavē'i gavare arue Iesu jovo rirōre namijamu gagorovo jaburo hu garomo uavareje: Nani hesi ae gö hōjo. ⁵ Hesi ae gö hōjamu Iesuro jabumē gēromo uvēvadeje: Aganomē na jemē visuoho suov'e jēvajējo. Suov'e jēvajējamu rueho jaburo uavareje: Visuoho no bogo suov'e javuajējo. ⁶ Bogo suov'e javuajējamu uvēvadeje: Boat-re viōho ioromo övo manō ba'amohējo visue suovo'irarije. Ēhi uēvamu viōho ba'amoromo gavareje visue aho'obēhe ro abuej'ēro viō barojomo'irōhoho bogo eni jēvamu. ⁷ Bogo eni jēvamu gagorovo Iesuhu dē vōvōbajo'e aho'o rajahijaje ijarahjoro Peter uavadeje: Iae Bada hōjo. Bada hōjamu hegorovo Peter-ro dōre ba'amaje niōgoho mami'e jijiv'ēro rōhu maho ba'amoromo avoho ruohoromo jovore jörö'ōromo Iesu biroh'o'i va'adeje. ⁸ Peter-ro jovore jörö'ōromo va'irōgoro ijarahje ioro'iorohuro boat gagore raromoromo viōre visuoho ioninō jagu baeromo rovareje jovo rirōho bogo ēgoho jio'i ma-90 metre rabu'e ēhi jii'ēro.

⁹ Rueromo sa'are ravo'amoromo gavareje vēni muraege biho'amē'ēro visuoho ē mue'i ioho ē bēhire momor'ōjamu. ¹⁰ Ēhi'amu Iesuro uēvadeje: Avevejō'e suovarije visuoho gö ujuoho riehējo. ¹¹ Ujuoho riehējamu Simon Peter-ro va'oromo boat-re ajiomoromo viōho sa'are jagu barovadeje. Rōhu viōre visu masijoho aho'obēhe 153 jii'ēro ēhuro irijiomē'e jiadeje. Visuoho aho'obēhe jiadeje rōhu viōho bogo dadorovadeje. ¹² Viōho barovamu Iesuro uēvadeje: Ro ie ihējo. Ro ie ihējamu rue ijarahje jabu bogo biririvoromo uavareje: Ja rahuo javajējo. Jabumē iae garomo uavareje: Iae hu Bada hōjo. ¹³ Ēhi'amu Iesuro rueromo ioho ujuoho i'imēmiromo visuohu'o ēhi gemuoho ē'adeje. ¹⁴ Urimē'i Iesuro guomoromo ri'ōnugoromo urimo vae niō'i hesi ijarahje jabesi nunire rovadoho evare majare rōhu maho jabesi nunire rueromo iohu'o visuohu'o ēhi suvuorēmijadeje.

Iesuhu Peter'o jō jōvade jōhoje.

¹⁵ Suvuorēmiromo ue'ahamu gagorovo Iesuro Simon Peter uavadeje: Simon John-are harihoho na jero ave aribōvioho iosirēmiromo na rajehi avohanue hōjo. Ēhi uavamu Peter-ro uavadeje: Bada io'ajo. Jero na gevanue hōjo naro ja rajahijego. Ēhi uavamu uavadeje: Ēhi jii'oho jero nasi sheep harihoho mio'amego jabesi aru'ahoho da'uomo'amo'irajo. ¹⁶ Da'uomo'amo'ira uanugoromo rōhu maho uavadeje: Simon John-are harihoho na jero na rajehijanue hōjo. Rajehijanue hōjamu Peter-ro uavadeje: Bada io'ajo. Jero na gevanue hōjo naro ja rajahijego. Ēhi uavamu Iesuro uavadeje: Ēhi jii'oho jero nasi sheep-oho muebejehonōvonējo. ¹⁷ Muebejehonē uaromo urimo vae niō'i uavadoho rōhu maho uavadeje: Simon John-are harihoho na jero na rajehijanue hōjo. Vae niō'i gemu ē jōe gemuoho ēhi ua'i hijamu hegorovo Peter vavaenimadeje. Vavaenimoromo uavadeje: Bada jero bövioho bise'oho gavanue hōjo. Jero na gevanue hōjo naro ja rajahijego. Ēhi uavamu Iesuro uavadeje: Ēhi jii'oho jero nasi sheep-oho mio'amego jabesi aru'ahoho da'uomo'amo'irajo. ¹⁸ Ave jōho na jō mae ua'ie'ajējo. Urimo ja a'io javadevare evare jasi arijo'ēro niōgoho ruoho titimoromo dinō'e juvo'i nagadire ēma juvonōvane hōjo. Rōhu ijonō ja mavojirae'irane majare evare jero jasi öve niō'i ahorire vae'iramu ae göēro jasi övoho muoho titimēvoromo ja ē dirō'ore va'ē'oho bijōnagajire ē baejavo va'ajējo.

¹⁹ Ĕhi uavade hesi bēhoho hu Peter rōjahiromo ē'adeje huro heromo uvorōhego: Aēro ēhi ēhi'oromo na anego'iramu guomevo'ajējo. Guomevo'iramu ēhuro God-are ihoho dōro jio'a'ajējo. Amo lesuro ē jōho uanugoromo Peter uavadeje: Nasi ijoro ijoro juvonōvonējo.

Iesuhu dē vōvōbajo'e aho'o rajahijaje ijorajo hesi jōhoje.

²⁰ Juvonōvonējamu Peter-ro huotorovo'i gavade Iesuhu dē vōvōbajo'e aho'o rajahijaje ijorajoho ijore rovamu. Urimē'i ē ahuro Iesuare bēhire ie iromo va'o hial'iro saginiēri uavadeje: Bada ja bijōnagarue a jabesi ōvore bojami'irōhe aho rahuo hōjo. Ĕhi ua gavade ae gemuohuro rovamu Peter-ro huotorovoromo gavadeje. ²¹ Garomo uavadeje: Bada ave iaho diehi jio'a'ajējo. ²² Diehi jio'a'ajējamu Iesuro uavadeje: Hesi jōho ēho bogo jasi muehu hōjo. Na negē'ohuro hu biririvoromo ēhi hiemu hi'iramu na vuonorō'ō rue'ejōjo ēho bogo jasi muoho hōjo. Jero nasi ijoro juvonōvonējo. ²³ Ĕhi jōvē'ēro Iesuhu Peter ēhi majahijade jōho Iesuare aribōvioho jaburo jabesi ēma vaerovemu vaerovoromo uvoruomadeje: Ĕjō hesi bēhoho ē iaho bogo guomo'i ma-hiemu hi'irōhe jōho hōjo. Ĕhi uvoruomadeje rōhu Iesuro Peter bogo uavadeje: Iaho bogo guomo'a'ajē ua'i a'i uavadeje: Na negē'ohuro hu biririvoromo ēhi hiemu hi'iramu na vuonorō'ō rue'ejōjo ēho bogo jasi muoho hōjo. Iesuro dē vōvōbajo'e aho'o rajahijaje ijorajo hesi jōho ēhi jōvadeje.

²⁴ Rōhu ē adaharije mu hesi jōho ē ijoraje gemuohuro garomo hejē'ēro no majahuijajeje. Rōhu ē jōho huro surire jajivē'eje. Noro garomo uvarueje: Hu iae jō mae majahuijaje hōjo.

²⁵ Rōhu ē mu jō jajivadoho Iesu bogo ē muohemuoho vae'i mue aho'obēhe vae'amadeje. Rōhu na uehorovoromo uve: Iesuhu vaejade muoho aho'obēhe aēro mue gemu gemu surire jajivo'amo va'o barē'ibejajo suri bahi'irōhe rōhoho sa'ae dinō'e dinō'e jio'amajoho nani bogo eni jio'ibejajo. Ahia mino'e.

ACTS

God-hu hesi Aru'aho mēmi'iröhēni mae uēvade jö Iesuhu jövade jöhoje.

¹²O asē'e Theophilus ave jöho naro jajivo'ie'e. Urimē'i Iesuhu mue rabe rabe vaejade jöho naro jajivo barējamu ja adahaneje. Huro muoho aevo'i vaenugoromo mue vaebe jöe röjēhibe ēhi'obe ruejuvo God-ro uavamu ö'idöre ajiomadeje. Urimore jöho na ēhi jajivodeje. Röhu Iesuro ö'idöre ajiomo'irögoro God-are Aru'aho hesi darugohuro jögoroho apostle ömo'ömohe bojēmijadeje jabumē mami'e hesi baejēv'ero. ³Guomoromo ri'öjē'ero majae aho'obēhe 40 hesi uhure jabesi nunire rueromo hesi arijo'arije röjahi-rovo'i hinövadeje. Röjahirovamu jaburo garomo uvareje: Iae hijajējo. Huro jabesi nunire rueromo God-hu böröme namiromo muebejavuaje ē hesi jöho majēhi'ego henövareje. ⁴Hejamu huro jabu'o hiromo uēvadeje: Naro mami'e uēvode höjo: Vavuohuro suvuoroho mēmi'ajējo. Ēhuni Jerusalem va'irarijoho nadi nugo va'i ē amoremu raromoromo ē suvuoroho mueberējo. ⁵Suvuoro hesi bēhoho ēhi höjo. Urimē'i John jovēro bapataeto vaejēvade höjo. Bogo majae ēgoho baebe va'ē'iro God-ro hesi Aru'ahoho mēmiromo ēhuro jovoho bogo a'i Aru'ahohuro bapataeto vaejēvo'ajējo.

Iesuhu ö'idöre ajiomade jöhoje.

⁶Ēhi'amu iae apostle ömo'ömhuro Iesu'o gemuore jioruomē'ero uavareje: Bada na ja avevejö'e ajamui'iramu Israel rajoho nomēro urimo ē'arēhi ēhi masije riravoromo sa'a ioro'ioroho muebejēvo'ejarējo o bogajo.

⁷O bogajamu uēvadeje: Ēhi jje'e muoho bövioho bise'oho divare majare jio'amoröhoho hesi Vavuohuro bamē'ero ēhu'ero bogo ga'a'arujējo. ⁸Iae ēhi höjo röhu God-are Aru'ahohuro jemesirire ruvebi'iramu darugoho bae'a'arujējo. Baenugoromo naehu diehi diehi ē'amu gavarije jöho ē jöho Jerusalem amore majēhibe Judea sa'ae bövioho majēhibe Samaria sa'ae bövioho majēhibe sa'ae gö gö majēhibe jijihö barē'arujējo. ⁹Ēhi uēvamu hegoro gavareje hu ö'idöre ajiomamu God-ro uavē'ero. Ajiomamu suēro riogivē'ero hu bogo gavareje.

¹⁰Röhu ajiomamu bogo gavē'e ö'idöho ēma ērimahamu gavē'i ae niö'i ajivē'e niögu io'amē'oho jaburo ma-majioho rueromo bēhire rirarovareje. ¹¹Rirarovoromo uēvareje: Asē'e Galilee rajomē jemē rabēni riravoromo ö'idöho ērimaharujējo. Ēaho Iesu jemesirire jioromo ö'idöre ajiomē'ero sionēro ruvebi'ajējo. Sue uhure ajiomamu gavarijēhi ēhi rue'a'ajējo.

Judas-are siono baeromo apostle jioröhe a baejare jöhoje.

¹²Ēhi majēhijamu hegorovo apostle ömo'ömhuro Olives Dahorure jioromo öri dunonö 1 kilometre rabu'e vuonorö'ö va'oromo abo Jerusalem va'o surovareje.

¹³Suorovonugoromo va'oromo urimo raromonövre döre osa gagore ē iojio mareje. Ēa-postle jabesi ihoho Peter John James Andrew Philip Thomas Bartholomew Matthew o Alphaeus-are harihe James o Simon. Röhu Simon hu Jew rajehu jabesi mueberovo'i nimade aho jiadeje. O apostle gö James-are harihe Judas jiadeje. Apostle jabesi ihoho ēhi jio'amadeje. ¹⁴Ēaribövioho aho'obēhe ē iojioromo Iesuare ö ömo'ömohe hesi veme Mary magonaho ioro'ioroho ē ariböviohu'o gemu mae raromoromo God-are örire jöe ato'i arinövareje.

¹⁵Ēhi'oromo majae vemino'e barējamu evare Iesu mae uehorovarue aribövioho 120 rabu'e ēho jaburo gemuore gagovorovē'ero Peter-ro ri'öromo uēvadeje: ¹⁶Ö mueno'ohumē Judas-hu ē'ade jöho God-are surire jajivarēhi öre gö bogojjē'ero iae ēhi jiade höjo. Urimē'i God-are Aru'ahohuro David uavamu Judas-hu majae ijönö vaeröhe jöho jajivade höjo. Judas hu aehu Iesu guduamojoro öri röjēhijade ae jiade höjo. ¹⁷Hu no'o gemu mae hi juvonövade höjo. Huro no'o bimuvoromo mue gemu vaeröhego ēhuni Iesuro hu baejade höjo.

¹⁸ Peter-ro ĕhi jövadeje röhu hesi jö bēhoho Judas-hu mu sisē vaeromo ujuohade ē jjo bajohuro ēhuro sa'aho imadeje. Imoromo ē sa'are beruvebiromo dēho tōgōmamu dē hōtōre suoro suoro baeromo guomadeje. ¹⁹Guomamu ē jōho Jerusalem raje ae aho'obēhe jaburo henugoromo ē sa'aho jabesi jōero Akeldama jumuvareje. Akeldama huotov'e'ē hesi bēhoho Kō Rov'e'ē Sa'ahoje.

²⁰ Amo Peter-ro Judas-are jō vituoho majēhiromo uēvadeje: David-ro Judas-are jōho Psalms surire jajivoromo uvē'ē hōjo:

Hesi amoho a rumo'e jiorōhe hōjo.

Nadi a gōho ēho hi'irajo.

O jō gōho uvē'ē hōjo: Ae gōero hesi sionoho baeromo mue bae'a'ajējo.

²¹⁻²² Ēhi uvē'ego na negajējo ae gemuēro Judas-are sionoho baeromo no'o gemu mae juvoromo Bada Iesu ri'ōjē'ero hijamu nunehu gavade jōho ae majēhinōvorōhego. Na negajējo Iesuhu no'o hibe juvo'ego John-hu bapataeto mu vaejamu aevo'i no'o hibe ruejuvo Iesu ō'idōre ajiomamu ĕhi hiemu hibe rovade ĕhi jiē'e ae jio'irōhego.

²³ Peter-ro ĕhi uēvamu hegorovo rueho jaburo ae niō'i jabesi ihoho uvareje Judas-are sionoho baerōhego. A gō hesi ihoho Joseph jiadeje. Ēa hesi iho gōho Barsabbas jio'i iho gōho Justus jiadeje. Hesi ihoho niō'i gemu jiadeje. O a gō hesi ihoho Matthias jiadeje. ²⁴Ēae niō'i jabesi ihoho uvonugoromo God-are ōrire ĕninamiromo uavareje: Bada ae aho'obēhe nosi dē vōvōbajo'oho jero gōvuanue hōjo. Ēhuni ae niō'i röhu di aho gemu nimanuoho jero rōjahuijego no bae'irarējo ²⁵ēhuro hu Judas-are sionoho baeromo apostle muoho vae'irōhe hōjo. Ēhesi bēhoho urimē'i Judas apostle jiē'ero röhu muoho vuonugo'i guomoromo hesi röho sisere va'ade hōjo. ²⁶God ĕhi uanugoromo munē inine ōmēvonugoromo ē ae niō'i jabesi ihoho ē munē jabesi dōre jajivoromo hevō gagore ba'amoromo hijiohijiovareje ga'iro di aho bae'irōhoho jiego. Hijiohijiovoromo gavareje bae'irōhe aho Matthias jiamu gagorovo uavareje huro Iesuare apostle 11-ho jabu'o gemuore juvonōvorōhego.

2

God-are Aru'ahēhu ruvebijade jōhoje.

¹ Ēhi'amu Pentecost majaho rovamu Keriso mae uehorovarue aribōviahuro aho'obēhe osae gemuore raromoruomadeje. ² Raromoromo ma-majioho hejareje buru bōrō-monō'e ō'idōre jioromo ruvebiromo jabuhu raromarue osaho aho'o huosihuosihavamu. ³ Huosihavamu hejē'i gavareje vēni hōdu va'ēne bitaroho rumorovoromo ae gemu gemu jabesi simano dōre jiorovamu. ⁴ Jiorovamu gagorovo God-are Aru'ahohuro ae aho'obēhe jabesi dē vōvōbajo'ere abueromo rarovadeje. Rarovoromo bitaroho ajēmijamu aevoromo huē gōero gōero jōe vaerovobe va'areje.

⁵ Röhu Jew rajo ae gōero gōero Jerusalem amore ē raromoruomadeje God mae uehorovaruēro jiē'ero sa'ae gōre gōre jioromo rueruomē'ero. ⁶ Jerusalem raromoromo hejare Iesuare aribōviahuro atavavamu hegorovo ae aho'obēhe gemuore rueromo gagovoroumadeje. Gagovoromo ae gemu gemu hejare jaburo jabesi huē gōero gōero vaerovavamu hegorovo hire gōrō'ōjēvadeje. ⁷ Hire gōrō'ōjēvamu ri'ōromo uvoruomadeje: Jabumē bogo nosi sa'ae gemuoho jio'i Galilee rajemu jioruomajējo. ⁸ Ēhi jiē'oho diehi'oromo nosi huē gōero gōero ato'ego no hejaruējo. ⁹ No Parthia sa'a raje javuajējo. Media raje Elam raje Mesopotamia raje Judea raje Cappadocia raje Pontus raje Asia raje ¹⁰ Phrygia raje Pamphylia raje Egypt raje javuajējo. Cyrene amo bēhire Libya sa'a raje javuajējo. Rome amo raje javuajējo. ¹¹ Rome amo rajo a ioro'ioroho Jew rajo ae javuajējo. A ioro'ioroho bogo Jew aehu javuo'i röhu Jew rajo jabesi muoho noro ijōnō baejē'e javuajējo. Crete sa'a raje javuajējo. Arabia sa'a raje javuajējo. No sa'ae gō gō ĕhi javuajējo. Röhu no ae aho'obēhe hebe rovaruējo God-hu mu masije gō gō ē'ade jōho ē aribōvioho jaburo ae gemu gemu nosi jōero atavavo'ego. ¹² Ēhi uvoromo ae aho'o tiōromo uehore gō gō baeromo uarovareje: Diehi'ego ēhioho ē'aruējo. ¹³ A ioro'ioroho bogo ēhioho uvo'i

a'i ma-sivëgoromo uarovareje: Ĕaribövioho rihu'e jovo sisë ue'aho avohë'ëro simane huotovëho'ego ë'aruëjo.

God-are Aru'ahëhu rovamu Peter-hu Iesuare jö majëhijade jöhoje.

¹⁴ Ĕhi'amu Peter-ro apostle ioro'iore 11-ho jahu'o gemu mae jië'ëro ri'öromo ae aho'obëhe ma-darugo'o uëvadeje: Jew raje Jerusalem raromarujohumë ae aho'obëhe naehu jö jövo'ië'ajoho avo'avoho hehëjo. ¹⁵ Jemëro uvarujëjo: Ave aribövioho simane sisërëjë'ëro ë'aruëjo. Bogo ëhioho höjo rabëni majae rojomanovego vörö'e jovocho aho bogo ue'ahoruomajëro jië'ëro. ¹⁶ Ĕhuni bogo ëhioho jio'i a'i ë mu hesi bëhoho urimë'i Joel-ro ave jöho God-aro baeromo jajivoromo uvade höjo:

¹⁷ God-ro uövuavohijajo: Ijo tugoho'i majaho rue'iramu naro ave muoho vae'ejöjo. Naro nasi Aru'ahoho jovonö'e otehëho'iramu ae magonahe aho'o rumorovo'ajëjo. Rumorovo'iramu jemesi ujo ömo'ömocho a'o magonaho'o nasi jöho huruoho'aruëjo. Jemesi a i'ohuro nasi muoho nia'ovoro ga'a'aruëjo.

Jemesi a mavojohuro momorö'öromo mue gemuoho ga'a'aruëjo.

¹⁸ Ĕho majaho rue'iramu nasi Aru'ahoho otehëho'iramu nasi mu vaejarue aho magonahoho jahu'o rumorovo'ajëjo.

Rumorovo'iramu nasi jöho huruoho'aruëjo.

¹⁹ Ö'idöre vörö'e muoho vae'ejöjo.

Sa'are darugo'e muoho ömo'ejöjo.

Sa'are ömo'iramu köemu jioromo vëne ravoromo u'e ajiomoa'ajëjo.

²⁰ Ö'idöre vae'iramu majaho ramoramovoromo manaeroho kö'e jio'a'ajëjo.

Badare aji'e maja börömo rueröhe ë hesi urimo ëho jio'a'ajëjo.

²¹ Evare ae rahu Badani uvë'oho maro jëvo'ajëjo.

²² Röhu Israel rajomë ave jöho hehëjo. Naro Nazareth raje Iesuare jöho majëhi'ie'ajëjo. God-ro Iesu ajamijamu bogo gavarue darugo'e muoho vae'amade höjo ëhuro jemëro tiöromo ma-sama'e uvo'irarijego: Iesu bogo ëma rue'i God-ro nugö'öjamu rovade höjo. Ĕmuoho jemesirire vaejë'ëro jemë'o iae gavaruje höjo. ²³ Ĕaho jemesi övore rovade höjo God-ro ëhi nimoromo uvë'ëro. Jemesi övore rovamu jemëro baeromo sisë aribövioho uëvamu korosire anare höjo. Jemesi sisë höjo. ²⁴ Röhu vavaene baeromo guomo raromoromo God-ro hesi vavaenoho avohahamu ri'öjade höjo bogo ioro'ioremu guomoröhe ahuro jië'ëro. ²⁵ Ĕhi ri'ö'iröhe jöho urimë'i David-ro God-are surire jajivoromo uvë'e höjo: Naro gavode höjo Badaro na'o gemu mae juvo'i hijamu.

Huro nasi bëhire juvo'ego na bogo juhuonivo'ejöjo.

²⁶ Ĕhuro dë vövöbajo'oho sasohevaje höjo. O bitarohuro nimorohë'i jöe jövaje höjo.

Iae nasi sino haho'oho guomo hesi höjo. Röhu na mae hiromo muebe'ejöjo hujeji God-ro ajemi'iröhego.

²⁷ Ĕhesi bëhoho guomevo'iramu vuovoromo raromaruoho God ja nasi aru'ahoho ëho bogo nugeho'iramu bogo ioro'ioremuoho ëho hi'a'ajëjo.

Na jasi aëro jevë'ëro ëhu'ëro jero ajemi'iramu nasi sinoho bogo sagohorijevo'ajëjo.

²⁸ Naehu hiemu hi'irode öroho jero röjehijë'e javajëjo.

Jero na'o gemu mae juvo'ego ëhuro na nimorohevo avoho'ajëjo.

Iesuhu ëhi ë'iröhe jöho David-ro jajivade höjo.

²⁹ Aganomë naro nosi hijo miono'e David-are jöho jemesi örire huruoho majëhi'iejöjo. David guomamu guavare höjo. Hu guavare huoho jaruvohu'o aviae jiajëjo. Ĕhuni hesi sinoho bogo sagohori'iröhe jöho hu bogo jövo'i Iesuare jöho jövade höjo. ³⁰ Ĕhesi bëhoho David-ro jö God-aro baeromo juvaje aëro jië'ëro ijönö jioröhe jöho gavade höjo. Ĕhu'ëro hu garomo uvade höjo: God-ro na jöe darugo ma'e majehiromo uevë'e höjo: God naro jasi uje gemu baeromo böröme bamo'ejöjo David jaehu öri ari'e muebejanuëhi ëhi ë'iröhego.

³¹ God-hu Keriso böröme bamoröhe jöho David-ro gavë'ëro ëhuni Kerisohu ri'öröhe jöho jajivoromo uvade höjo:

Vuovoromo raromaruoho God ja hesi aru'ahoho êho bogo nugahamu bogo ioro'ioere-muoho êho hijade hõjo.

Jero hu ajamamu hesi sinoho bogo sagohorijahade hõjo.

³² Rõhu ë aho Iesu God-ro ajamijamu ri'õromo rõhu maho hijade hõjo. Hijamu hesi aribõvioho aho'o no iae nunëro gav'e'e javuajëjo. ³³ Ri'õ hiromo God-ro bõrõme bamamu ajiomoromo hesi õvo manõ hijë'e hõjo. Hiromo Vavuehu uavadëhi êhi hesi Aru'ahoho bojamamu baeromo jovonõ'e otehahue'ëro jemë garomo hejaruje muoho nomëro vae-jaruëjo. ³⁴ Rõhu Iesuhu God-arire ajiomade jõho iae mae jio'ego røjëhi'ejõjo. Iesuhu ajiomadëhioho David God-ariroho bogo êhioho ajiomade hõjo. David hu bogo ajiomade hõjo rõhu God-are surire jajivoromo uõvuade hõjo:

Bada God-ro nasi Bada uvade hõjo:

Nasi õvo manõ rojo hijego

ja'o muorovarue aribõvioho ³⁵ naro ruahõ'õjëvego

hõrëro vijuvo taemo'amo'irane hõjo.

Bada Iesuhu ajio God-are õvo manõ hi'irõhe jõho David-ro êhi jajivade hõjo.

³⁶ Êhuni Israel aribõvioho aho'obëhe jemëro ave jõho avoho hehëjo. Jemëhu korosire anarije aho Iesu ë aho God-ro bõrõme bamë'ëro hu Bada hõjo. Bõrõme namiromo ajamujaje ae hõjo.

³⁷ Peter-ro êhi majëhijamu hegorovo ë aribõvioho jaburo juhuone bõrõme baeromo Peter'o apostle ioro'iorohu'o uëvareje: Ö õmo'õmoho no diehi ë'ëjarëjo.

³⁸ Diehi'o'ëjarëjamu Peter-ro uëvadeje: Jemë ae gemu gemu uehoro sisëho vuonugo'i uehoro mae baeromo Iesu Keriso-are ihoro bapataeto vaejego God-ro jemesi sisëho uehorovoromo vuonugo'irajo êhuro God-ro hesi Aru'ahoho suvuore mëmëgo bae'irarije hõjo. ³⁹ Êhesi bëhoho God-ro hesi Aru'ahoho jemë'o jemesi aboji harihu'ohu'o mëmi'i uvade hõjo. Ae dinõ'e dinõ'e raromoromo nosi Bada God-hu uvamu ejahë'oho hesi Aru'ahoho mëmi'i uvade hõjo.

⁴⁰ Peter-ro êhi uënuigoromo êhi jië'e jö göho aho'obëhe majëhiromo uëvadeje: Sisëho vuonugo'i avoho rarohego ave sisë aribõviehu i'lu bae'irõhoho jemë bogo êhioho bae'irarije hõjo. ⁴¹ Peter-ro êhi majëhamu hegorovo hesi jö ejahare aribõviohuro bapataeto vaeruomadeje. Vaejë'ëro êhu'ëro evare majare ae aho'obëhe 3,000 êhi aevoromo Iesuare aribõvi ioro'iorohu'o gemu mae jijihonõvareje. ⁴² Gemu mae jijihoromo apostle jabesi jõho heromo agane vaerovoromo gemuoro ie ue'ahoromo God-are õrire jöe atonõvareje. Êhi jië'e muohuremu uehorovonõvareje.

Iesuare aribõviehu gemuore raromo jijithoromo aviëhi jië'e mu vaejare jõhoje.

⁴³ Êhi'o'ego God-ro apostle-ho ajëmi'ego bogo gavarue darugo'e muoho vaenõvareje. Vae'ego ae aho'obëhe êho gagorovo tiõromo uvonõvareje: O mu mabëhe barueromo røjahuijaruëjo. ⁴⁴ Êhi'o'ego Iesu mae uehorovarue aho jaburo agane gemuoho va'ëne gemuoro raromo jijihoromo bövie bise'e bogo sivu sivuoho bae'i ma-gemuoro bahinõvareje. ⁴⁵ Jabesi sa'ae inõmo bövie bise'e imo'amoromo ijo baje ujuohoromo ae gö rabe rabe bogojie'oho suvuorëminõvareje. ⁴⁶ Majae êhi God-are amo bõrõmore gagovorovonõvareje. O osare osare gemuoro raromoromo nimorohë'i huë baerovë'i ie ue'ahonõvareje. ⁴⁷ Ue'ahoromo God rajahiromo a ioro'ioro jabesiro huë mae baenõvareje. Êhi'o'ego Badaro ae gö gö baejëvoromo maro bamëvoromo ekaresia gemuore bimuvëvonõvadeje.

3

Peter'o John'o hõru sisë'e a ajamamu marëjade jõhoje.

¹ Majae sanuovamu Jew rajehu pari vaejarue majare Peter'o John'o jaburo niõ'iro ruhe God-are amo bõrõmore hõrõ'i ajiomareje. ² Ajiomoromo amo bõrõmo hesi rejo ojo bëhire rovareje. Eõjo hesi iho jumubaroho Ojo Mabëheje. Rue'i gavareje ae gemu ë hijamu mami'e hõru sisë'e êhi rahë'e jië'ëro. Hõru sisë'ego majae êhi hesi aribõviohuro barueromo ojo

bēhire ē bamonōvareje. Ojo bēhire bamo'ego ae gō gō osa bōrōmore va'iē'iroho jaburo hu ijo baje bojamijōro ēninēminōvadeje. ³ Ēhi ē'ojuvo hiromō gavade Peter'o John'o jabu'o osare rova'ia'amu gēgorovo ēninēmadeje. ⁴ Ēninēmamu hegorovo rueho jaburo hu ērimahoromo Peter-ro uavadeje: No gōvuējo. ⁵ Gōvuējamu hegorovo rue ahuro uvadeje: Jaburo suvuore memi'i uevaruēromo gēvadeje. ⁶ Gēvamu Peter-ro uavadeje: Ijo baje bogojevajējo. Rōhu nasi ōrire jevajohuro ēhuro ajami'ejōjo. Naro Nazareth amo raje Iesu Keriso-are ihore ja uavajējo: Ri'ōromō juvējo. ⁷ Ri'ōromō juvēromo hesi ōvo manō ma'enoromo nigemadeje. Nigemamu gavē'i hejade hesi hōru hitahioho ōbinajoho mae jiavamu hegorovo ⁸ dōro majioho ri'ōromō namiromō hesi hōrēro juvadeje. Hesi hōrēro juvoromō tiōbe God rajahibe jabu'o gemu mae God-are osare va'adeje. ⁹ Ēhi'amu ae aho'obēhe garuomadeje huro God rajahibe juvamu gagorovo ¹⁰ gavare Ojo Mabēhi hesi bēhire hiromō ijo bajēni ēninēmaje aho jiamu garomō tiōjēvamu uvareje: Diehi'ōromō hōroho marējē'ēro juvajējo.

Peter-hu God-are osa bōrōmore namiromō Iesuare jō majēhijade jōhoje.

¹¹ Ēhi uvoromō gavare ē aho Peter'o John'o jabesi ōvoro jiorovoromō jabu'o ēhi juvamu God-are amo bōrōmō hesi harada ihe Solomon-are haradare ē juvamu garomō tiōjēvamu tutuvoromō ē gemu va'oromō gagovoromadeje ga'irovo. ¹² Gagovamu gēgorovo Peter-ro uēvadeje: Israel rajomē jemē ave aho garomō rabēni tiōjarujējo. Jemē rabēni John'o na'o ērimahuarujējo. Bogave uvo'irarijējo: No vōr'ē aēro javuē'ēro o mu maemu vaejaruēro ēhu'ēro noro ajami'ego marēromō juvajējo. Bogo ēhioho hōjo. ¹³ A'i hu marējade hesi bēhoho aviēhi hōjo. God-hu Abraham Isaac Jacob nosi hijo mion'o ioro'ioro muebe'amadhuro hesi mu vaejaje aho Iesuare ihoho dōro nigemahade hōjo. Ēaho jemēro guduaromomō a masijo jabesi ōvore bojēmijarije hōjo baeromō sisē vaerōhego. Bojēmiromō hejarije Pilate-ro uvavamu: Ē'ego naro Iesu jiovo nugō'ō'irō uvamu hegorovo jemēro Pilate-are nunire Iesu bijōnimarije hōjo. ¹⁴ Iesu hu God gemu uehorovoromō mu maemu vaenōvade hōjo rōhu jemēro hu bijōnimoromō Pilate uavarije hōjo huro a muo'amaje aho jemēni jiovo nugō'ōjēhego va'irōhego. ¹⁵ A muo'amaje aho jiovo nugō'ōjēhojōra ua'i a'io'vavuaje aho Iesu anojōro uavarije hōjo. Ēhi'amu guomoromō God-ro ajamamu ri'ōromō hijamu nosi nunēro gavē'ēro ē jōho majēhijarie hōjo. ¹⁶ Ēaho Iesu mae uehorovadhuro ēhuro hesi darugohuro ajamamu ave hōru sisē'e a jemē gavarujoho biriroho baejade hōjo. Ēaho Iesu mae uehorovamu ēhuro marējadhoho jemē ae aho'obēhe iae gavarujējo.

¹⁷ Aganomē iae ēhi hōjo rōhu na gavajoho jemē'o jemesi a masijohu'o bēhoho bogo avoho gavē'ēro Iesu anarije hōjo. ¹⁸ Rōhu jemēhu vaejarije mu sisē hesi bēhoho urimē'i God-ro jōho nugō'ōjamu jō hesiro baeromō majehinōvare aribōviohuro surire jajivoromō uōbe rueruomade hōjo: God-hu uavē'ēro bōrōme namiromō ajamui'irōhe aho vi'ehe baeromō guomo'a'ajējo. God-ro mami'e jō bamoromō uōvuadēhi ōroho ēhi avohamu Iesu guomade hōjo. ¹⁹ Ēhi jiē'e jiaje ēhuni ōri sisēre jijiharujoho vonugo'i God-are ōroro jijihago huro jemesi sisēho mu'uvēho'irajo. ²⁰ Ēhi ē'ē'oho Badaro jemesi aru'ahoho biririvēho'ajējo. Biririvēhoromō Iesu nugō'ō'iramu jemēni rue'a'ajējo. Iesu bōrōme namiromō ajēmi'irōhe aho ē aho God-ro jemesi jōēni baejade hōjo. ²¹ Baejē'ēro huro ō'idōre hijuvo hujeji God-ro sa'ae bōvie bise'e rōhu maho i'e avoho'iramu evare rue'a'ajējo. Ēhi jiē'e jōho mami gō'e nugō'ōjamu jō hesiro baeromō majehinōvare aribōvi mahuro surire jajivobe rovere hōjo. ²² Iesuare jōho Moses-ro God-are surire jajivoromō uōvuade hōjo: Jemesi a bōvie God-hu na remō'ōjamu rovodēhi huro jō hesiro baeromō majēhi'irōhe a gōhu'o ēhi nugō'ō'iramu rue'a'ajējo. Hu jemesi sa'a raje jio'a'ajējo. Jō rabe uēvē'oho ejahonōvorējo. ²³ Ae rahu hesi jō bogo ejahē'oho ē aribōvioho rori'o sō va'oromō ijumēvo'aruējo. Iesuare jōho ēhi jajivē'e hōjo. ²⁴ Ēhi jajivamu jō God-aro baeromō majehinōvare a ioro'ioroho Samuel-arire aevoromō hesi ijore rueromō jō majēhijare ae aho'obēhe ēho jaburo jaruvore mu rabeju rovale jōho majēhibe rovere hōjo. ²⁵ Rōhu jemē'o huē mae bae'irarijago ēhuni ē aribōviohuro jōho God-aro baeromō majēhiromō

uënövare hōjo: Huro mu mabēhe nugō'ō'iramu rue'a'ajējo. Jemē'o huē mae bae'irarijego ēhuni God-ro jemesi hijo miono'o'oho darugo'e jōgoroho bojēmiromomo uēvade hōjo: Iae naro muebejēvonōvo'ejōjo. Huro ēhi jiē'e jōgoroho Abraham bojamiromomo uavade hōjo: Naro jasi a ujoho mae avohēvo'iramu ēhuro sa'ae dinō'e dinō'e raromarue aribōviohu'o huē mae baeruomo'ajējo. ²⁶ Ēhi uavē'ero huro hesi mu vaejaje aho Iesu baeromo urimo jemesirire nugō'ōjade hōjo huro rueromomo jemē huē mae bojēmiromomo dē vōvōbajo'oho huotovēhego jemē ae aho'obēhe mu sisēho vuonugo'irarijego.

4

Peter'o John'o Jew rajo a masijo jabesi nunire rirarovare jōhoje.

¹² Peter'o John'o jaburo jōho ēhi majēhijamu hejē'i Jew rajo a masijohuro rueruomadeje. Priest ōmo'ōmohuro God-are amo bōrōmo atovarue jabesi a bōviohuro Sadducee ōmo'ōmohuro ēho jaburo hejare Peter'o John'o ae uēvamu: Iesu guomoromo ri'ōjē'ero ēhu'ero vuovarue ae aho'obēhe no'o ri'ō'ejare uēvamu hegorovo uvareje: Jō sisē ae majēhijaruēromomo dē vōrōnēgamu rovareje. ³ Rueromomo Peter'o John'o guduamo ōmēvo va'oromomo majae barējamu gagorovo savoji gagore ba'amēvareje hujeji nērō rueromomo jabesi nunire rirarovorōhego. ⁴ Amo ae aho'obēhe Peter'o John'o majēhijare jōho heromomo Iesu mae uehorovoruomadeje. Mae uehorovē'ero ēhu'ero Iesu mae uehorovarue aribōvioho aho'obēhe 5,000 rabu'e jiadeje.

⁵ Peter'o John'o savoji gagore ba'amēvamu momorō'ōjē'ero sisonuvamu gagorovo council a masijohuro a duvaho ōmo'ōmohuro jōgoru ōri rōjēhijarue aribōviohuro ēho jaburo Jerusalem rueromomo gemuore gagovoruomadeje. ⁶ Gagovoruomamu priest bōrōme Annas-ro Caiaphas-ro John-ro Alexander-ro priest bōrōmo hesi agano ioro'iorohuro ēho jaburo a masijo ioro'iorohu'o gemuoro gagovareje. ⁷ Gagovoromomo Peter'o John'o hu'iraejēvo ruejōro jōe nugō'ōjamu rueromomo jabesi nunire ē rirarovareje. Rirarovamu gēgorovo uēvareje: Jemē diehi'oromomo hōru sisē'e aho ajamijamu marējade hōjo. Diehi jiē'e vōrōho baeromomo rahuarue ihoro uvoromomo ē'arije hōjo.

⁸ Ēhi uēvamu God-are Aru'ahohuro Peter-are dē vōvōbajo'oho rarovamu ri'ōromomo uēvadeje: Jew rajo a masijohu'o a duvahohu'o nasi jōe hehējo. ⁹ Noehu hōru sisē'e a ajamamu marējade jōho evaho nani jemē he'i nēgamu ēhuni noro jemesi nunire rirarovojo'oro atē'ero uō gōvuaru'ejōjo. ¹⁰ Ēhi jiē'oho na negajējo jemē'o Israel a ioro'iorohu'o ae aho'obēhe jemēro ave jōho he'irarijego. Ave aho jemesi nunire marējē'e namijaje hesi bēhoho Nazareth raje Iesu Keriso hesi darugohuro ēhuro ajamamu marējē'e hōjo. Ēaho Iesu jemē korosire anamu gemuomomo God-ro i'ovamu ri'ōjade hōjo. ¹¹ Ēaho Iesuare jōho God-are surire uhunō'e jajivoromomo uōvuē'e hōjo:

Jemē munē javue vae'irōgoro munē gemu bijōnimoromomo vuonugarije hōjo.

Vuonugarijoho jaruvoho ē munēhuro javuoho nigemo'ego bibivoromomo mae namijajējo. Ēhi jajivē'e hōjo. ¹² Iesuro huro gemuēro ajamuijego i'uoho bogo bae'i marējavuajē hōjo. Ēhesi bēhoho God-ro Iesuare ihe gemu sa'ae dinō'e dinō'e bojamuijē'e hōjo aho bogo sisēroho va'i mae javuorōhego. Iho gōho bogohōjo.

¹³ Ēhi uēvamu hegorovo rue Jew rajo a masijoho jaburo gavare Peter'o John'o bogo nuni aji'e aho jēvo'i ēma uno'e ae jēvē'e bogo juhuonivo'i biririvoromomo jōho majēhijamu gagorovo tiōruomadeje. Tiōromomo evare garomomo uvareje: Ēaho jaburo niō'iro Iesu'o gemu mae jirehonōvē'ero ēhu'ero ē'aruējo. ¹⁴ Ēhi uvoromomo gavare hōru sisē'e aho mami'e marējē'ero Peter'o John'o jabesi gemuore namijamu gagorovo jabesi jō aho'irōhoho bogo eni jioruomadeje. ¹⁵ Bogo eni jioruomomomo aēro Peter'o John'o hu'iraejēvoromomo gagovarue osaho vuonugo'i rori'o va'ojōro uēnugoromomo jabesi sivue jōho mevoromomo uarovarēje: ¹⁶ Noro ave ae niō'ioho diehi'ēvo'ejarejo. Ēhesi bēhoho Jerusalem raromarue ae aho'obēhe hejare uvamu: Ēae niō'iohuro bogo gavarue mue gō vaejē'e hō uvamu hejē'ero ēhu'ero subivo'irōhoho bogo eni javuajējo. ¹⁷ Rōhu ae gōero gōero hebe va'ojōēni ē'ego no jōgore bojēmiromomo uē'irarējo: Bogave ijoho Iesuare ihoroho jōho majēhi'irarijējo.

¹⁸ Ēhi uarovoromo ae uēvamu Peter'o John'o osaēro hu'iraejēvo rovereje. Hu'iraejēvo rovamu uēvareje: Bogave gemu Iesuare ihoroho jōho majēhiromomo rōjēhi'irarijējo. ¹⁹ Ēhi uēvamu hegorovo rue ae niō'iohuro uēvareje: Jemēhu uōvuarujo nadi Iesuare ihoroho jōho majēhirē uōvuarujo iae no hejaruējo. Rōhu na no jemesi jōho ejēho'ejarējo o God-are jōho ejaho'ejarējo. Jemesi garējo God di muoho nimego. ²⁰ Iesuhu ē'amu noehu garomo hejare jōho diehi'oromo vuonugojōrajo. ²¹ Ēhi uēvamu rue Jew rajo a masijohuro Peter'o John'o i'u bojēmi'ibejaroho rōhu uvareje: Hōru sisē'e aho marējamu gavē'ēro ae aho'obēhe God rajahiruomajēromomo i'u bojēmi'irōhe ōroho bogo birohogoro vuonugo'i jōe gō'o darugo ma'e majēhiromomo jiovo rēmō'ōjēvamu va'areje. ²² Amo ae aho'o God rajahijare hesi bēhoho ē hōru sisē'e aehu hijade hesi vadunoho aho'o 40 ěmino'e iosiramiromomo ruēhi jiē'ēro bogo marē hesi jiadoho rōhu Peter'o John'o Iesuare daruge baeromo ajamamu marējadeje.

God-hu ajēmego bogo juhuonivē'e ma-birivoromo jō majēhi'irōhēro Iesuare aribōviehu ěninamare jōhoje.

²³ Iae jiovo rēmō'ōjēvamu va'oromo Peter'o John'o ma-burēro vuonorō'ō va'oromo jabesi aribōvioho uēvareje: Jew rajo priest masijohu'o a duvahohu'o jaburo no uōvuare hōjo: Iesuare ihoroho nadi ijoho jōho majēhirējo. ²⁴ Ēhi uēvamu hegorovo rue Iesuare ae aho'obēhe jaburo uehore gemu baeromo God uaruomadeje: O asē'e nosi A Bōrōmoho ō'idōe sa'ae jove bōvie bise'e jero bamavuane hōjo. ²⁵ Urime'i jero ave jōho bojamamu jasi Aru'ahohuro jasi mu vaejaje ae David nosi hije David-are simanore bojamamu huro jajivade hōjo. Jajivoromo uōvuē'e hōjo:

Sa'a ioro'ioro rajoho rabēni jōvēro gatovanovoruomade hōjo.

Sa'ae gōre gōre aribōvioho rabēni simano rumo'e muoho vae'i ōroho naho garuomade hōjo.

²⁶ Sa'ae dinō'e dinō'e raromarue a masijohuro muorovo'i avohorovare hōjo.

Sa'are simano vaejarue aribōviohuro gagovorovare hōjo

Bada God'o muorovo'i God-hu uavē'ēro bōrōme namiromomo ajamuaje ahu'o muorovo'i.

²⁷ David-hu ē jō jajivadēhi ēhi ave amore iae gagovoruomade hōjo Iesu'o muorovo'irovo. A masije niō'i Herod'o Pontius Pilate'o ēho jaburo sa'a ioro'ioro rajohu'o Israel rajohu'o gemuoro gagovare hōjo Iesu'o muorovo'irovo. Iesu jasi muohuremu vaejaje aho hōjo. Jero hu uavane hōjo huro bōrōme namiromomo ajamui'irōhego. Ēahu'o muorovo'i gagovoruomade hōjo. ²⁸ Ēmuoho vae'i gagovare hōjo. Rōhu urime'i ēhi jiē'e muoho jiorōhego God jero darugo'ēro javē'ēro jasi nimoromo ēhi bamane hōjo. ²⁹ Bada rōhu jaruvoho ē aribōviehu uōvuarohe Iesuare jō majēhijē'oho i'ue bae'a'arujē uōvuare jōho jero ēho heromo uehorovoromo no jasi mu vaejarue aho ajamuinego bogo juhuonivo'i birivoromomo jasi jōho ma-sama'e majēhinōvo'irarējo. ³⁰ Jasi muemu vaejaje ae Iesuare jōēni ri'ōromomo guomo guomo'e aribōvioho ajēmiromomo darugo'e mue gō gō vaejago aēro garomomo jōho ma uehorovo'irarējo. Ahia mino'ējo.

³¹ God-are ōrire ēhi atamu gagorovo jabuhu raromaruoho hijiohijiovamu God-are Aru'aho hesi darugohuro ae aho'obēhe jabesi dē vōvōbajo'oho rarovamu bogo juhuonivo'i birivoromomo God-are jōho atobe va'areje.

Iesuare aribōviehu huē baeromo ajamirovonōvare jōhoje.

³² Ēhi'amu iae Iesu uehorovarue aribōvioho aho'obēhe uehore gemu dē vōvōbajo'e gemu baeromo bogo uvonōvareje: Nasi hōromomo sivu sivue bahi'i a'i uvonōvareje: Ae aho'obēhe nosi hōromomo ma-gemuoro bahinōvareje. ³³ Apostle ōmo'ōmohuro darugo ma'o ae majēhiromomo uēnōvareje: Bada Iesu guomoromo ri'ōjē'ēro hijamu nosi nunēro gavē'e javuajējo. Ēhi'o'ego God-are huē mahuro ē aribōvioho aho'o ruahō'ōjēvonōvadeje. ³⁴ Ruahō'ōjēvo'ego Iesuare aribōvioho aho'obēhe i runo'e bōvie bise'e eni jēvonōvadeje. Ēhesi bēhoho ae rahu sa'ae o javue ma-jio'amē'oho imo'amoromomo monioho ujuohoromomo rueromomo ³⁵ apostle jabesi ōvore bahinōvareje. Bahi'ego apostle-ho jaburo ganōvare Iesuare ae gō gō rabe bogojiamu gavē'oho suvuorēminōvareje.

³⁶ Suvuorëmjijamu iae ae gemu hesi ihoho Joseph-ro mue gemuoho vaejadeje. Joseph-are iho göho apostle ömo'ömhuro Barnabas jumuvareje. Barnabas huotovë'e hesi bëhoho biriri bojëmaje ahoje. Hesi agano ihoho Levi raje jiadeje. Cyprus sa'are jioromo rovadeje. ³⁷ Rovë'ëro hiromo sa'ae gö imoromo monioho barueromo apostle jabesi övore bojëmajeje aie suvuorëmiröhego.

5

Ananias'o Sapphira'o sareri sareri'e jö majëhijare jöhoje.

¹ Èhi jië'e mu maho vaejumu röhu ae göëro mu sisëho vaejadeje. A hesi ihoho Ananias jio'i hesi vaboro ihoho Sapphira jiadeje. Ananias-ro mu sisëho vaeromo jabesi sa'aho gö imoromo ² subivëhoromo moni vitu hesi tario bamadoho vaborohuro iae gavadeje. Vituoho hesi tario bamo'i vituoho apostle ömo'ömhoho i'imëmiromo sarerëmiromo uëvadeje: Sa'a imode hesi ijo bajoho iae bojëmi barëjë'e jevajëjo. ³ Bojëmi barëjë'e jevajëjumu Peter-ro uavadeje: Ananias Satan-hu dinamijadoho ja rabëni ejahoromo hesi jöho baejane höjo. Nadi God-are Aru'ahoho sareramiro mo sa'a moni vituoho subivëhoromo tario bamoromo uö'ibejanëjo: Na sa'a hesi monioho iae bojëmi barëjë'e jevajëjo. ⁴ Sa'a bogo imane majaroho ëho jasi jiade höjo. Jero jasi ga'ibejanëjo imavego o bogo. O sa'a imanevare monioho aho'o jasi jiade höjo. Jero jasi ga'ibejanëjo ae bojëmavego o jasi ma'enavego. Röhu ja rabëni ëhioho ë'i uehorovane höjo. Èhi ë'anoho ja bogo ma-aemuoho sareramui'i God'o sareramijane höjo. ⁵ Jöho ëhi majahijamu hejë'i Ananias sa'are beromo guomadeje. Guomamu ae aho'obëhe ë jöho hegorovo sisë maro juhuonivareje. ⁶ Amo guomamu a i'o ömo'ömhuro rueromo sinoho niögëro numoromo bava'oromo guavareje.

⁷ Guavamu majae 3 hours rabu'e barëjumu gagorovo vaborohuro hesi baru guomade jöho bogo hejë'e ma-rovadeje. ⁸ Rovamu gagorovo Peter-ro uavadeje: Ave jöho uevego na hejëjo. Sa'aho imoromo na jemë monioho avemino'e baejarije höjo o gö'o döre baejarije höjo. Baejarije höjumu sareramiro mo uavadeje: Iae ëmino'e baejë'ëro jemesi örire bojëmi barëjë'e javuajëjo.

⁹ Bojëmi barëjë'e javuajëjumu hegorovo Peter-ro uavadeje: Ja'o jasi baruohu'o jemë rabëni uvarije höjo: Nani Badare Aru'ahohuro bogo göromo i'uoho bojamui'ajëromo ëma sareramuijarije höjo. Nadi ëhioho ë'ibejarijëjo. Aveho gavëjo. Aribövioho jasi baruoho guavë'ëro aruëre ojanore rovaruoho hejëjo. Jasi sinohu'o bava'oromo guavo'aruëjo.

¹⁰ Èhi uavamu gavë'i vaborohuro Peter-are bëhire ma-majioho beromo guomadeje. Guomamu rue a i'ohuro osare rueromo gavare vaboroho mami'e guomë'e jiamu gagorovo amonö bava'oromo hesi baru hesi bëhire guavareje. ¹¹ Èhi'amu ekaresiae aho'obëhe o a ioro'ioroho jabu'o ë jöho hegoro sisë maro juhuonivoruomadeje.

Apostle ömo'ömehu noehu bogo gavarue darugo'e mu vaenövere jöhoje.

¹² Èhi ë'ë'ëro iae God-ro ajëmi'ego apostle ömo'ömhuro bogo gavarue darugo'e muoho aho'obëhe vae'ego ae aho'obëhe ganövereje. Èhi'o'ego Iesuare ariböviohuro God-are amo börömore iojioromoro amo börömo hesi harada ihe Solomon-are haradare ë gemuoro gagovorovonövereje. ¹³ Gagovo'ego a ioro'ioroho jaburo Iesuare aribövioho mae uehorovëvo'i röhu juhuonivoromo bogo ëma gemuoroho va'o raromonövereje. ¹⁴ Bogo ëma gemuoroho raromo'i röhu ae magonahe gö'o gö'o aho'obëhe Bada mae uehorovoromo Iesuare ariböviohu'o aevoromo gemu mae raromo jijihonövereje. ¹⁵ Èhi jië'e mu masijoho rovë'ëgo aëro guomo guomo'e aribövioho örire ujuoho ruenugoromo momor'öjarue röho nu ano'e göre göre ë bahinövereje Peter rova'ego hesi övehu bogo ajëmijë'oho röhu hesi maja aru'ahohuro bamëvego marë'iröhego. ¹⁶ Èhi'o'ego ae aho'obëhe Jerusalem-nörire amo göre göre raromarue aribövioho jaburo guomo guomo'e ariböviohu'o aru'aho sisëhu simano sisë vaejëhë'e ariböviohu'o ujuoho rue'ego apostle ömo'ömhuro jabumë aho'obëhe ajëmiromo avohëvonövereje.

Jew rajo a masijehu Iesuare apostle aribövi sisë vaejëvare jöhoje.

¹⁷ Ĕhi'amu gagorovo iae Jew rajo priest bŕŕŕmohu'o hesi aemo'aeme Sadducee aribŕvŕiohu'o ĕho jaburo apostle jabesi mu maho garomo dĕ vŕŕŕnimareje. ¹⁸ Dĕ vŕŕŕnimoromo ri'ŕŕoromo apostle aribŕvŕioho guduumĕvoromo ujuoho va'oromo savoji gagore io'amamu sisĕ aribŕvŕiohu'o gemuore raromareje. ¹⁹ Savoji gagore raromamu vahŕromamu gagorovo Badahu nugŕŕŕjade anerahuro rueromo ojoho jiovĕhoromo apostle aribŕvŕioho sŕjĕve va'oromo amŕŕ hŕŕŕjadeje. Hŕŕŕŕoromo uĕvadeje: ²⁰ Va'irarijoho God-are amo bŕŕŕmoro riravoromo Iesu uehorovoromo mae raromo'irŕhe ŕri hesi jŕho majĕhŕirego ae aho'obĕhe he barĕ'irarĕjo. ²¹ He barĕ'irarĕjamu hegorovo va'oromo sisonuvamu gagorovo God-are amo bŕŕŕmore ajio riravoromo aevoromo Iesuare jŕho majĕhŕijareje.

Ĕhi'amu Jew rajo priest bŕŕŕmohu'o hesi aribŕvŕiohu'o ĕho jaburo rueromo Jew rajo a duvahoho aho'obĕhe jŕe nugŕŕŕoromo uĕvareje: Jew rajo a masijoho aho'obĕhe ro gemuoro gagovorego no jŕe mevo'irarĕjo. Mevo'irarĕromo jŕe nugŕŕŕoromo police-oho uĕvareje: Savoji gagore aribŕvŕioho sŕ ujuoho ruehĕjo. ²² Sŕ ujuoho ruehĕjamu hegorovo va'oromo gavare savoji gagoroho apostle aribŕvŕioho bogojĕvamu gagorovo vuonorŕŕŕ rueromo Jew rajo a masijoho uĕvareje: ²³ Noro va'oromo gavare hŕjo savoji gago hesi ojoho tugoho titimo'amĕ'ĕro muebejarue aribŕvŕioho ojore ojore atovoromo riravoruomamu gĕgorovo ojoho jiovoromo osare va'ihŕŕ gavare hŕjo Iesuare aribŕvŕioho bogojĕvamu. ²⁴ Ĕhi uĕvamu hegorovo God-are amo bŕŕŕmo atovaje police bŕvŕiohu'o priest masijohu'o uvareje: Diehi jiĕ'ĕro bogo'e hŕjo. ²⁵ Bogo'e hŕjamu ae gemuĕro rueromo uĕvadeje: Jŕe hehĕjo. Savoji gagore io'amarije aribŕvŕioho jaburo God-are amore riravoromo ae aho'obĕhe jŕe rŕjĕhŕjaruĕjo. ²⁶ Rŕjĕhŕjaruĕjamu hegorovo rue police bŕvŕiohu'o hesi bĕhire raromarue aribŕvŕiohu'o ĕho jaburo apostle ŕmo'ŕmoho sŕ ujuoho rue'i va'areje. Va'oromo uvareje: Noehu jabumĕ guduumĕvĕ'oho ae aho'obĕhe no gŕromo biŕŕŕnimoromo munĕro vajamui'aruĕromo juhuonivoromo apostle bogo guduumĕvĕ'e ma-sŕ ujuoho rovareje.

²⁷ Ujuoho rueromo Jew rajo a masijo jabesi nunire rĕmamu ĕ riravareje. Riravamu gagorovo priest bŕŕŕmohuro uĕvadeje: ²⁸ Noro darugo'e jŕho mami'e bojĕmiromomo jemĕ uĕvare hŕjo: Iesuare ihoroho bogave gemu aho jŕho rŕjĕhŕ'irarijĕjo. Rŕhu jemĕro jemesi jŕ sisĕho rŕjĕhŕ'i arijamu Jerusalem amo rajoho ae aho'obĕhe heruomĕ'e hŕjo. Ĕhi'oromo nimarujĕjo Iesu anamu guomade mu hesi i'uhoho noro bae'irŕhego.

²⁹ Ĕhi uĕvamu hegorovo Peter'lo apostle ioro'iorohu'o jaburo uĕvareje: Iae no hejaruĕjo rŕhu jemesi jŕho gŕ jio'i God-are jŕho gŕ jio'ego ĕhuni nomĕ God-are jŕho ejahole'jarĕjo a jŕho bogajo. ³⁰ God nosi hijo miono'o muebe'amonŕvade ahuro Iesu ajamamu guomoromo ri'ŕjĕjade hŕjo jemĕro hu ijore ano taemamu guomĕ'ĕro. ³¹ Ri'ŕjĕjamu God-ro hesi ihoho dŕro bamoromo uavade hŕjo: Rojo nasi ŕvo manŕ hijĕjo. Hiromomo ae aho'obĕhe jabesi bŕŕŕme namiromomo maro bamĕvo'irane aho jionĕjo. Ĕhi jioromo ŕroho jiovĕhego Israel rajoho jaburo uehoro sisĕho vuonugego God naro jabesi sisĕho dejonŕ bu'ŕjĕho'irode hŕjo. ³² God-ro ĕhi jiĕ'e muoho vaejamu nosi nunĕro gavĕ'ĕro ĕ hesi jŕho ae majĕhŕjarue hŕjo. Rŕhu bogo no gemu majĕhŕ'i God-are Aru'ahohu'o ajamuromomo ae majĕhŕijaje hŕjo. Ae rahu God-are jŕ ejahĕ'oho Aru'ahoho God-aro baejarue hŕjo. Amo hu'o ajamuromomo ae majĕhŕijaje hŕjo.

³³ Ĕhi uĕvamu hegorovo rue Jew rajo a masijohuro vŕŕŕ'iraeromomo apostle ŕmo'ŕmoho muo'amojŕo uvoruomadeje. ³⁴ Uvoruomamu jabesi ae gemuĕro jŕe jŕvo'i ri'ŕjĕjadeje. Ĕa hesi ihoho Gamaliel jiadeje. Hu Pharisee ae jiadeje. Hu Jew rajo jŕgoru ŕri rŕjĕhŕijaje ae jiamu ae aho'obĕhe hesi ŕrire mae uehorovoromuomadeje. Ĕaho Gamaliel-ro ri'ŕŕoromo a masijo ioro'ioroho uĕvadeje: Ĕaribŕvŕioho rori'lo sŕ va'ego na jŕ harihe majĕhŕijego evaro sionĕro sŕ ruerĕjo. ³⁵ Sŕ ruerĕjamu sŕ ujuoho va'amu evare uĕvadeje: Israel rajomĕ rue Iesuare aribŕvŕi muo'amo'i uvarujoho o jabesi ŕrire rabe rabe vae'i uehorovĕ'oho nadi nuni rumo'oho ma-vae'i uehorovo avohoromo vaerĕjo. ³⁶ Ĕhesi bĕhoho rabĕni ma-bisemu urimo ae gemu hesi ihoho Theudas-ro rovade hŕjo. Rueromomo ae uĕnŕvade hŕjo: Na a bŕŕŕme jevajĕjo. Ĕhi uĕ'ego ae aho'obĕhe 400 rabu'e hesi ijore ijore jŕijhonŕvare hŕjo.

Hesi ijore ijore jijihojuvo aëro Theudas anamu guomamu hesi aribövioho aho'obêhe arua anumiae va'oruomamu hesi muoho sisërë barëromo bogojiade höjo. ³⁷ Èhi è'è'ëro sa'are a jabesi iho baeruomade majare ae gö hesi ihe Judas Galilee sa'a rajohuro rovade höjo. Rueromo jõe majëhiromo jabesi simanoho huotovëhë'ëro ae aho'obêhe hesi ijore ijore jijihonöväre höjo. Jijihamu aëro Judas'o anamu guomamu è hesi aribövioho aho'obêhe arua anumiae va'ò barëjade höjo. ³⁸ Va'ò barëjë'ëgo èhuni naro ave jöho majëhiromo uëväjëjo: Èlesuare aribövioho ma-nunëremu gëromo vuororëmirëjo. Èhesi bëhoho rabëni jabuhu vae'i nimoruomaje muoho ma-a jabesi mu jiajoho Theudas'o Judas'o jabesi muehu sisërëjadëhi Iesuare aribövi jabesi muohu'o èhi sisërë'ajëjo. ³⁹ O God-hu bojëmade mu vae-jaruohuro jemë jabumë bogo iosirëmi varijënoho jëväjëjo. Iosirëmi'ie'ohu uvo'a'arujëjo: Nani no ae gö'o muorovuë'i ga'a'arujëjo God'o muorovëvo'iramu.

Jöho èhi majëhamu hegorovo è Jew rajo a masijohuro ejahoruomadeje. ⁴⁰ Ejahoromo ae uëvamü apostle aribövioho osaëro sö rovareje. Sö rovamu gagorovo hisuebijëvojöro uëromo apostle-ho uëvareje: Ijoho bogave Iesuare ihoroho jöho aho majëhi'irarijë uëngoromo jiovo rëmö'öjareje. ⁴¹ Rëmö'öjamu uvareje: God-ro no mae uehorovavuë'ëro èhuni hu uväjëjo: Noehu Iesuare jöëni i'u baejaruoho iae eni javuajëromo nimorohobe Jew rajo a masijehu jiaruire jioromo va'areje. ⁴² Va'è'ëro Iesuare jö mae majëhinövaroho bogo vuonugo'i majae èhi God-are amo börömore va'oromo jabesi osare osare va'oromo ae uënövareje: God-hu uavë'ëro böröme namiromo ajamuae aho iae Iesu höjo. Jöho èhi majëhiromo è hesi öroho röjëhinöväreje.

6

Ae aho'obêhe 7-hu ekaresia ajëmiromo moni mu muebejëhoröhego ekaresiaehu baejëväre jöhoje.

¹ Èhi'amu ae magonahe aho'o ro Iesuare aribövi gemuoro havobe va'amu börömoreajeje. Börömoreajamu Greece huëhu atarue Iesuare ariböviohuro dë vörönëgamu jõe atoromo uvareje: Ijo bajo magonaho doru majae èhi suvuorëmjiaruoho nosi Greece huëhu atarue magonahoho ijo bajoho bogo avoho baejarue höjo. ² Èhi atamu hegorovo apostle aho'o 12-ho jaburo Iesuare ae magonahe aho'obêhe gemuoro gagovojöro jõe nugö'öjareje. Jõe nugö'öjamu ro gemuoro gagovamu gagorovo uëvareje: Apostle nosi muoho God-are jö majëhijaruoho höjo. Noehu God-are jö majëhijaruoho bogo avoho ma'eno'i moni suvuorëmjiarue muohu'o vaejë'oho èho bogo maho höjo. ³ Aganomë bogo maho jjië'e jiaje èhuni ga'irarije di aho ae aho'obêhe uvarujoho: God-are Aru'ahohuro dë vövöbajo'ere rarovë'ëro jabumë simano mae uehorovarue aribövioho hö uvarujoho èhi jjië'e aho aho'obêhe 7 èmino'e jabesi ihoho uövuego noro è moni muro bamëvego jabumë èho muebe'irarëjo. ⁴ Èaribövioho 7 jaburo suvuorëmi'iröhe muoho muebe'iramu noro è muoho vuonugo'i God-are örire jõe atoromo hesi jöho majëhinövo'ëjarëjo. Èhuremu uehorovonövo'ëjarëjo.

⁵ Apostle-ho jaburo èhi majëhijamu hegorovo ae magonahe aho'obêhe uvareje: Jö mae höjo. Jö mae hö uvoromo ejëhoromo Stephen baejareje. Stephen Iesu mae uehorovo avohamu God-are Aru'ahëro rumorovë'e ae jiadeje. Stephen baeromo Philip Prochorus Nicanor Timon Parmenas Nicolaus èho jabu'o baejëvareje. Nicolaus mami'e Antioch amore jioromo rovadeje. Urimoh bogo Jew rajo jiadoho ijönö Jew rajo muoho baejadeje. ⁶ Èaribövioho 7 baejëvonugoromo sö ujuoho va'oromo apostle jabesi nunire rëmareje. Jabesi nunire rëmamü apostle-ho jaburo jabesi jöëni God-are örire jõe atoromo öve simanore bamëvareje è ijo bajo suvuorëmiröhe muoho vaeröhego.

⁷ Èhi è'è'ëro God-are jöho Jerusalem ame bövioho rumorovamu Iesuare ae magonahe Jerusalem raromaruoho ae aho'obêhe jiobe va'adeje. Ae aho'obêhe jiobe va'ojuvo Jew rajo priest ae aho'obêhe Iesuare jöho aevoromo ejahareje.

Jew rajo a masijehu uëvamü Stephen guduamare jöhoje.

⁸ Ĕhi'amu iae God-ro Stephen mabēhe ajamiromo darugoho bojami'ego ĕhuro bogo gavarue darugo'e mu masije gō gō ae aho'obēhe jabesi nunire vaenōvadeje. ⁹ Mu masijoho vaejumu Jew rajo a ioro'iorohuro ri'ōromo Stephen-are jōho aho'ahamijareje. Jō aho'ahamijare aribōvioho ioro'iorohuro Cyrene amore Alexandria amore jioromo rovĕ'ero Jerusalem raromoromo Jew rajehu God rajahijarue osae gemuore gagovoromo God rajahinōvareje. Ĕosa hesi ihoho Jiovo Rēmō'ōjĕ'e Aribōvi Jabesi Osaho jiadeje. O ioro'iorohuro Cilicia sa'are Asia sa'are jioromo rovĕ'ero raromareje. Ĕaribōvioho jabu'o Stephen-are jōho aho'ahamareje. ¹⁰ Aho'ahami'ego God-are Aru'ahohuro Stephen simano mae bojami'ego huhu jōvaje jō ahorōhoho bogo eni jĕvonōvadeje.

¹¹ Bogo eni jĕvamu gagorovo jabumĕro a ioro'ioroho ijo bajoho bojĕmiromo uĕvareje: Jemĕro ae aho'obēhe sarerĕmiromo uĕrĕjo: Noro hejare hōjo Stephen-ro Moses'o God'o jabesi jōho sisĕ'i jōvavamu. ¹² Ĕhi majĕhiromo Jew rajo a duvaho jabesi o jōgoru ōri rōjĕhi-jarue aribōvi jabesi o ae magonahe aho'obēhe jabesi dĕ vōvōbajo'oho huotovĕhamu dĕ vōrōnimoruomadeje. Dĕ vōrōnimoruomomoro rueromo Stephen guduamo bava'oromo Jew rajo a masijo jabesi nunire nugareje. ¹³ Jew rajo a masijo jabesi nunire nugoromo a ioro'ioroho sō rovareje jaburo ĕ a masijo jabesi nunire Stephen-are jōho sarerĕmirōhego. Sō rovamu ĕho jaburo Jew rajo a masijoho sarerĕmiromo uĕvareje: Ave iahuro God-are osa bōrōmoho sivoromo Moses-hu bojamuijade jōgorohu'o sivemu sivaje hōjo. ¹⁴ Ĕhesi bĕhoho noro hejare hōjo Stephen-ro uvamu: Nazareth rajoho Iesuro God-are osa bōrōmoho dadovoromo Moses-hu bojamuijade muoho aho'o tugohu'i mu i'e bojamui'ajĕjo. Stephen-ro ĕhi jiĕ'e jō sisĕho jōvamu hejare hōjo. ¹⁵ Sarerĕmiromo ĕhi majĕhijamu hegorovo rue Jew rajo a masijohuro Stephen gemu ĕrimahoromo gavareje hesi nu ano'oho anera jabesi nu ano'o va'ĕne jiamu.

7

Israel rajehu God-are jō bijōnimobe rovare jō Stephen-hu majĕhijadohoje.

¹ Anera jabesi nu ano'o va'ĕne jiamu gagorovo priest bōrōmohuro Stephen uavadeje: Jasi jō sisĕ uōvuaruoho ĕ jōho na ma jōe o sareri jōe hōjo.

² Mae o sareri jōe hōjamu hegorovo Stephen-ro uĕvadeje: A duvahohu'o agano ioro'iorohu'o naehu jō harihu majĕhi'iĕ'ajoho hehĕjo. Urimĕ'i God-ro nosi hije Abraham-are nunire rovade hōjo. U'emu Abraham-ro Haran sa'are va'irōhĕro ĕ hesi urimo Mesopotamia sa'are hijamu evare God aji'ere hijaje ahuro hesi ōrire rovade hōjo. ³ Rueromo uavade hōjo: Jasi aganoho sa'aho vuonugo'i naehu rōjahi'irode sa'ahuro ĕhuro va'onĕjo. ⁴ Ĕhi uavamu hegorovo Chaldea sa'aho vuonugo'i Haran sa'are va'oromo ĕ hijade hōjo. Hīromo hesi vavuoho guomamugo God-ro uavamu ave jemĕhu raromaruje sa'are ro hijade hōjo. ⁵ Rueromo hijamu evare majaroho God-ro sa'aho bogo gō bisemu vadu'oho bojamadĕ hōjo. Bogo bojami'i a'i mae majahiromo uavade hōjo: U'emu bojĕmi'ejōjo ja'o jasi ujohu'o ave sa'aho bae'irarijĕgo. Abraham harihu rumo'e jtĕ'e rōhu God-ro ĕhi jōvade hōjo. ⁶ Ĕhi uaromo uavade hōjo: Jasi ujo ōmo'ōmoho sa'ae gōro va'o raromoruomo'ajĕjo. Rarom'iramu ĕ sa'a rajohuro i'u'e mue huĕ vavaene bojĕmi'iramu jabesi darugoremu raromoromo huĕ vavaene baebe va'ojuvo vadune aho'obēhe 400 barĕ'ajĕjo. ⁷ Barĕ'iramu jemesi ujo ōmo'ōmehu vaejōro i'u'e mu bojĕmaje aribōvioho God naro gĕromo i'ue mana bojĕmi'ejōjo. I'ue bojĕmi'iramu evare jasi ujo ōmo'ōmohuro ri'ōromo ĕ sa'are jioromo ruerōhoho ro ave dir'ōore na rajehiruomo'ajĕjo. ⁸ Ĕhi mae uanugoromo uavade hōjo: Jasi a jabesi sinoho tarivo'amobe va'onōvorĕjo. Ĕhuro na uvo'irode hōjo: Nasi aribōvie jĕvājĕromo muebejĕvo'irode hōjo. Ja'o jasi ujo ōmo'ōmohu'o jemĕro ĕhi ĕ'onōvorĕjo. Ĕhi uavĕ'ero ijonō Abraham-ro harihoho Isaac baeromo hurae gemu barĕjamu gagorovo sinoho tariojahamu God-are harihuraejade hōjo. Ĕhi'amu ijonō Isaac-ro harihoho Jacob baeromo hesi sinoho ĕhi tariojahade hōjo. Ĕhi'amu ijonō Jacob-ro hesi harihe aho'obēhe 12 nosi hijo miono'o jabesi sinoho ĕhi tarivĕhobe rovade hōjo.

⁹ Ēhijo miono'ohuro masijoraeromo Joseph-are mu mahuni dē vörönēgamu hu ae gö imēvoromo mana baejare hōjo. Mana baejamu rue imare aribōviohuro Joseph baeromo Egypt sa'are abuejare hōjo. Abuejamu God-ro Joseph'o gemu mae juvade hōjo. ¹⁰ Joseph'o gemu mae juvoromo Joseph-ro vavaene bae'ego gagoro ajami'ego mae hinōvade hōjo. Mae hijamu God-ro hu ajamiromo huē mae uehoro mae bojami'ego mu mae vaenōvade hōjo. Mu mae vaejamu gagorovo Pharaoh Egypt sa'are simano vaejaje ahuro Joseph-are muoho garomo rajahiromo uavade hōjo: Nasi Egypt sa'aho o bövie bise'e avoho muebejehonējo. ¹¹ Ēhi uavamu muebebe va'ē'ero iruno'e bogojiego ēma raromarue majaho rovamū ae aho'obēhe nume Egypt sa'are ave Canaan sa'are raromaruohuro huē vavaeni dōro raromare hōjo. Raromoromo nosi hijo miono'ohuro ie nahoromo gavare hōjo bogojiamu. ¹² Ie bogojiamu gagorovo Jacob-ro hejade uvavamū: Nume Egypt sa'are iruno'e iae jiajējamu hegorovo hesi harihu ōmo'ōmoho uēvade hōjo: Egypt sa'aro abueromo iruno'e imoromo ujuoho ruerējo. Ruerējamu aevoromo Egypt abuejare hōjo. ¹³ Abuejē'ero vuonorō'ōromo Canaan sa'are rojomareje. Rojomē'ero rōhu maho Egypt abuejamu gagorovo Joseph-ro huruohoromo uēvade hōjo: Na jemesi ōe jevajējo. Ēhi uēvamū Egypt sa'are simano vaejaje ahuro Joseph-are agano jabesi jōho hejade hōjo. ¹⁴ Hejamu Joseph-ro jōe nugō'ōromo vavuoho uavade hōjo: Ja'o agano ioro'iorohu'o Egypt sa'aro ruerējo. Ēaganoho aho'obēhe 75 ėmino'e jiade hōjo. ¹⁵ Jōe nugō'ōjamu hegorovo Jacob'o hesi aganohu'o Egypt abueruomade hōjo. Abuejē'ero ē vuovēvade hōjo. ¹⁶ Vuovēvamū jabesi sinoho vuonorō'ō ujuoho rojomoromo Shechem amore ē guavare hōjo mami'e jabesi hije Abraham-ro Hamor rajo aribōvioho monie bojēmiromo ē sa'aho imē'ero.

¹⁷ Guavamū nosi hijo miono'e Egypt raromaruohuro ae aho'obēhe jioje ruejuvo God-hu mami'e hesi ujo ajēmi'i Abraham uavadēhi ēhi ajēmi'irōhe majaho dunovade hōjo. ¹⁸ Dunovamū gagorovo sa'are simano vaejaje ae gö Joseph bogo gavadohuro ri'ōromo Egypt sa'aho muebejade hōjo. ¹⁹ Egypt mueberomo nosi aribōvioho sarerēminōvade hōjo. Sarerēmiromo nosi hijo miono'oho sisē vaejēvoromo uēvade hōjo: Jemesi harihu ininoho amonō bahiromo ēhuro vuonugo'amego vuovēho'irajo. Uē'ego ēhi ē'onōvare hōjo. ²⁰ Ēhi'amū Moses rahade hōjo. Aharihu hesi nu ano'oho mabēhe jiade hōjo. Nu ano'oho mae jiamū hesi vēmū vavu'ohuro jabesi osare muohojuvo manaere niō'i gemu barējade hōjo. ²¹ Manaere niō'i gemu barējamū gagorovo amonō banugare hōjo. Banugamū gagorovo sa'are simano vaejaje a hesi abojohuro rue'i gavade Moses raromamū gagorovo baeromo va'o hesi muohade hōjo. Muohamū bōviraejade hōjo. ²² Bōviraejamū Egypt rajohuro jabesi mu mae jō mae bövie bise'e rōjahijamū bae barējade hōjo. Bae barējē'ero jō bōrōmo jōvoromo mu masijo vae'amaje ae jiade hōjo.

²³ Ēhi'ojuvo Moses vadune aho'obēhe 40 barējamū gagorovo huro uehorovoromo uvade hōjo: Jaruvoho na va'oromo nasi Israel rajo aribōvioho gē'ejōjo gē'i diehi raromego. ²⁴ Ēhi uvonugoromo va'i gavade Egypt raje ae gemuēro Israel raje ae gemu hesi ōrire nu sisē vaejamū gagorovo Israel rajoho ajamiromo Egypt rajoho i'ue mana bojamiromo ano bamade hōjo. ²⁵ Ano bamoromo uvade hōjo: Nani nasi aribōviohuro uehorovoromo uvarue hōjo: God-ro nōrō ua'iramū nōrōro no ajamui'iramū avare darugore raromaruoho vuonugo'i va'o mae rarome'ejarējo. Ēhi uvarue hō uvadoho bogo ēhioho jiade hōjo. ²⁶ Ēhi'ē'ero nērō Moses-ro gavade hōjo Israel raje niō'iro muororovamū. Muororovamū gēgorovo ahēvē'i uēvade hōjo: A niō'imē agane gemuoho jēvajējo. Rōhu jemē rabēni muorovarujējo. ²⁷ Ēhi uēvamū hegorovo mu sisē vaejaje ahuro ri'ōromo Moses ōvēro rori'o biduohō'ōromo uavade hōjo: Ja raro ua'ego bōrōme vaeromo nosi muoho garomo ahavuanuējo. ²⁸ Ja nēri Egypt rajo ananēhi na ja ēhi anego'iro ē'anuējo. ²⁹ Ēhi uavamū hejē'i Moses-ro Egypt sa'are jitoromo ju'ebiromo va'adoho va'o Midian sa'are ē hijade hōjo. Ēhiromo harihe niō'i ōmēvade hōjo.

³⁰ Harihe niō'i ōmēvoromo hijuvo vadune aho'obēhe 40 barējamū Moses-ro a rumo'e sa'are Sinai dahoru bēhire nami'i gavade hōjo ijo hisue vēnehu ravo'ego anerae gemu ririre hijamū. ³¹ Ēhijamū gagorovo tiōromo avoho ga'i bēhire va'ihō hejade hōjo Badaro

uavavamu: ³² Na jasi hijo miono'e Abraham Isaac Jacob muebejevave aho God jevajejo. God jevajejamu hegorovo Moses-ro avoho ga'ie'adoho juhuonivoromo butubutumoromo bogo avoho gavade hōjo. ³³ Bogo avoho gavamu Badaro uavade hōjo: Ave sa'aho nasi sa'ae jiaje na mae uehorovevoromo hōru guduoho jijōvōjo. ³⁴ Naro iae gēvode hōjo nasi aribōviohuro Egypt sa'are sisē'i raromamu gavē'i hejode hōjo jabumē hara'uavavamu. Ēhuni na ruvebijē'e jevajejo jabumē ajēmego sisē'i raromaruoho vuonugo'i mae raromōrōhego. Ēhi jiē'e jiaje ri'ōjego na ramō'ōjego Egypt sa'aro va'ējo. God-ro Moses-are ōrire ēhi uavade hōjo.

³⁵ Ēaho iae Moses hōjo. Urimē'i Israel rajo aribōviohuro ē ae gemuoho bijōnimoromo uaruomade hōjo: Ja raro ua'ego bōrōme vaeromo nosi muoho gavanuējo. Israel rajo aribōviohuro Moses ēhi bijōnimoruomamu God-ro hu baejade hōjo. God-ro hu baeromo mu bōrōmoho bojamade hōjo. Ēhesi bēhoho God-ro uavamu vēnehu ravade ijo hisu riirire hijade anerahuro Moses nugō'ōjamu Egypt sa'are abueromo a bōrōme namiromu Israel rajo aribōvioho vavaene jēvamu baejēvoromo maro bamēvade hōjo. Ēhi jiē'e mu bōrōmoho God-ro Moses bojamade hōjo. ³⁶ Ēae gemuoho Moses-ro Egypt sa'are hiromu bogo gavarue vōrō'e muoho vae'amoromo Israel rajoho Egypt sa'are jioromo sōjēvo va'adoho va'o jovo e'ure jovo ihe Kavūē'e Jovore darugo'e muoho vaeromo sōjēvo va'adoho va'o a rumo'e sa'are darugo'e muoho vae'amobe va'ojuvo vadune aho'obēhe 40 barējade hōjo. ³⁷ Ēae gemuoho Moses-ro Israel rajoho uēvade hōjo: God-hu na remō'ōjamu rovodēhi jō hesiro baeromo majēhi'irōhe a gōhu'o huro ēhi nugō'ō'iramu rue'a'ajējo. Hu jemesi sa'a raje jio'a'ajējo. Ēhi uēvade hōjo. ³⁸ Ēae gemuoho Moses Israel rajehu a rumo'e sa'are gagovoromo raromaruire hu'o ē gemuore hijade hōjo. Hu Sinai dahorure hiromu anera hesi jōho baeromo anumiae abo hijo miono'oho majēhinōvo numeho jabesi jōho aruhiae ajio aneraho majahinōvade hōjo. A i'ovēvo'irōhe jōho God-aro baejade hōjo nosi ōrire bojamui'irōhēro.

³⁹ Ēhi ē'amu nosi hijo miono'ohuro Moses-are jōho bogo ejahare hōjo. Bogo ejaho'irōgoro a'i Moses juahamiromu Egypt sa'are vuonorō'ō va'irōgoro ē'are hōjo. ⁴⁰ Va'irōgoro Aaron uaruomade hōjo: Inōmoho avoho'amego no ēho masije hō uvoromo jabesi ijore ijore jijihō'irarējo. A'i Moses sōjavuo rovade aho no bogo gavaruējo hu dinō'e hōjo. ⁴¹ Ēhi atonugoromo cow harihu nu ano'o va'ēne inōmoho avohoromo uvare hōjo: Ave inōmoho darugo'ego ma-hu gemu uehorovonōvo'ejarējo. Ēhi uvoromo mie muo'amoromo vēniro mueromo rajahiromu bahijahare hōjo. Jabumē ōvehu avohare inōmoho ēho uvare hōjo: Bōrōmoho hōromu hesi ihoro sōrōho ijare hōjo. ⁴² Ēhi'amu gagorovo God-ro jabesinō dejoho bu'ōromu uēvade hōjo: Jemēro jije mujōre ēho rajēhibe va'orējo. Jemēhu nēgajēhi ēhi ē'orējo. Ēhesi jōho jō God-aro baeromo majēhinōvare aribōvi jabesi surire jajivoromo uvē'e hōjo: God-ro uēvajējo: Israel rajomē mie muo'amoromo vēniro mueromo bahibe a rumo'e sa'are vadune aho'o 40 jijiharije hōjo. Na jemē na rajehi'i ē'arije hōjo. Bogajo. ⁴³ A'i ae gō jabesi god ihe Moloch ē hesi niōgu javuoho baeromo jijiharije hōjo. Ae gō jabesi god ihe Raphan hesi jiji nu ano'oho baeromo jijiharije hōjo. Ēinōmo sisēho jemesi ōvēro avoho'amarije hōjo uvene aho rōjahi'irarijēro. Ēhuni na jemē rēmō'ō'ejōjo ōre ēgoro va'oromo Babylon iosiramiromo rori'o va'o raromo'irarijego. God-are surire jōho ēhi jajivē'e hōjo.

⁴⁴ Nosi hijo miono'ehu a rumo'e sa'are raromo jijiharevare evare God-are niōgu javu bōrōmoho jabesi ōrire jiaje hōjo jaburo ēho garomo uvorōhego: God-ro no'o gemu mae javujave hō uvorōhego. Ējavu vaerōhe hesi ōroho God-ro rōjahijamu Moses-ro ēho garomo ae uēvamu ēhi vaejare hōjo. ⁴⁵ Vaejamu nosi hijo miono'ohuro baejare hōjo. Baejē'ero vuovēvamu jabesi ujoho jaburo baejare hōjo. Baeromo Joshua-are ijore va'oromo ave sa'are rueromo gavare hōjo urimore raromare aribōvioho God-ro bisihō'ōjēvamu gagorovo ave sa'aho baeromo javu bōrōmoho ē bamare hōjo. Bamamu javuoho ē jiobe ruejuvo David-ro bōrōme namiromu Israel muebejevade hōjo. ⁴⁶ Muebejēvoromo mu mae vaeromo God-ro hu mae uehorovamu uvade hōjo: Na negajējo javu maho vaejego Jacob

muebenövade aho God-ro ë hiröhego. ⁴⁷ Röhu hu bogo a'i Solomon-ro God-ni javu maho vaejahade höjo.

⁴⁸ Ëhi ë'ade höjo röhu God dö mare hijajëro aehu övehu vaejaharue osaroho bogo hijaje höjo. Osare bogo hijaje jöho jö God-aro baeromo majëhinövade ahuro jajivoromo uvë'e höjo:

⁴⁹ Badaro uvavohijajo: Na hijajoho ö'idöre höjo.

Höroho sa'are bamaje höjo.

Ëhi jië'oho diehi jië'e javue nanioho vaerëjo.

Nuho'irode osaho dinö'e avohorëjo.

⁵⁰ Jemë bogo eni jëvo'ajëjo naro nasi övëro ave inömocho aho'obëhe bamë'ëro jevë'ëro.

God-are surire ëhi jajivë'e höjo.

⁵¹ Sarei hia'i biriri'e aribövie jëvajëjo. Dë vövöbajo'oho gö gö uehorovarue aribövie jëvajëjo. Hia'e tugohë'e aribövie jëvajëjo. Jemesi hijo miono'ehu ë'onövarëhi ëhi ë'aruje höjo. God-are Aru'ahoho bijönimobe rovaruje höjo. ⁵² God-are jö majëhijarue aribövioho jemesi hijo miono'oho rabu'e aribövioho bogo sisë vaejëvare höjo. Mami gö'e God-ro ae rëmö'öjamu jaburo ae majëhiromo uëbe rovere höjo: God-are mu ma vaejaje aho rue'a'ajë uëvare höjo röhu jemesi hijo miono'ohuro muo'amare höjo. O avevejö'e jemëro God-are mu ma vaejaje aho a sisë jabesi övore bojëmamu anare höjo. Ëho jemesi sisë höjo. ⁵³ Jemesi jöëni aneraëro jö böromoho God-aro baeromo bojëmare höjo. Röhu jemëro bogo ejaharje höjo.

Stephen munëhu vajamirocho ano bamare jöhoje.

⁵⁴ Stephen-ro jöho ëhi majëhijamu hejë'i Jew rajo ariböviohuro hesi örire dë vörönëgamu vörö'iraeromo ane vuogigimoruomadeje. ⁵⁵ Ane vuogigimamu God-are Aru'ahohuro hesi darugohuro Stephen-are dë vövöbajo'ere rarovamu ö'idöre sioroho gavadeje God ajivo'ego Iesuro God-are övo manö namijamu. ⁵⁶ Iesu ë namijamu gagorovo uëvadeje: Arueho gahëjo. Na gavajëjo ö'idöho arorovo'ego God-are A Mahuro hesi övo manö nami'ego.

⁵⁷ Ëhi uëvamu hejë'i rueho jaburo jö'e dadovoromo hia'e övo hitahiëro tugohoromo ma-darugo'o tutuvo rueruomorocho Stephen ruë numë baba'amoromo riravareje.

⁵⁸ Riravoromo jagu bava'oromo rori'o nugoromo munëro vajamiruomadeje. Munëro vajami'irögoro urimo utaho'amojöëni niögoho jövo bahiruomadeje a i'e gemu Saul-ro muebëjehoröhego. ⁵⁹ Niögoho bahinugoromo munëro vajamemu vajamijamu Stephen-ro uvadeje: Bada Iesu nasi aru'ahoho baejehego jasi örire ö'iröjo. ⁶⁰ Ëhi unugoromo ague aho hiromo ma-darugo'o uvadeje: Bada ave aribövi jabesi sisëho uehorovoromo vuonugëhëjo. Ëhi uvoromo guomadeje.

8

¹ Stephen guomamu gagorovo Saul-ro uvadeje: Stephen anaroho iae mae höjo.

Saul-hu ekaresia sisë vaejëvobe juvade jöhoje.

Ëhi'amu evare majare aëro aevoromo ekaresiae Jerusalem raromaruoho mu sisë bëhe vaejëvonövareje. Vaejëvamu Iesuare aribövioho aho'obëhe Jerusalem jioromo huruomorocho adovoromo va'o Judea sa'are Samaria sa'are dirö'e göro göro raromobe va'areje. Apostle ömo'ömhuremu ëhi ë Jerusalem raromareje. ² Amo God uehorovarue a ioro'iorohuro Stephen-are jöëni darugo'o nierusuburu'e bamoromo hesi sinoho guavareje.

³ Guavamu Saul-ro ekaresiae aho'obëhe ijumëvo'i ë'onövadeje. Ijumëvo'irögoro osare osare va'oromo Iesuare aho magonahoho guduamo'amoromo ruho ujuoho rueromo savoji gagore io'amonövadeje.

Philip-hu Iesuare jö bava'oromo Samaria sa'a rajo majëhijade jöhoje.

⁴ Iae huruomorocho va'are ariböviohuro dirö'e göro göro Iesuare jöho majëhibe va'onövareje. ⁵ Ëhi majëhibe va'oromo iae Philip-ro Samaria rajo jabesi amo böromore va'adeje. Va'oromo majëhiromo uëvadeje: God-hu uavë'ëro böromë namiromo ajamuijaje aho iae

Iesu hōjo. ⁶ Ĕhi jiē'e jōho majēhi'ego Samaria raje ae aho'obēhe jaburo hesi jōhuremu avoho henōvareje. Hesi jōho heromo ganōvareje Philip-ro darugo'e muoho vae'amo'ego. ⁷ Vae'ego aru'aho sisēhuro jō'e dadovoromo a dēre jioromo suorovo va'onōvareje. Ōvo hōru'e vuovēhē'e hōru sisē'e Ĕhi jiē'e aribōvioho marē'amonōvadeje. ⁸ Ĕhi'o'ego Samaria aribōvioho nimorohēvo avohonōvadeje.

⁹ Nimorohamu ae gemuēro ē amore hijadeje. Ĕa hesi ihoho Simon jiadeje. Simon-ro iro oso'e vaebe rovamū Samaria sa'a raje ae aho'obēhe garomo jōe barējēvadeje. Jōe barē'ego huro uēnōvadeje: Na a bōrōme jevajējo. ¹⁰ Ĕhi uē'ego amo raje ae aho'obēhe ininore va'o masijore avoho heromo uvonōvareje: Nani Simon hu God-are vōrō rōjahuijaje ae hesi ihoho Vōrō'e A Bōrōmoho hōjo. ¹¹ Iro oso'e majae ēgobōvie vaebe rovē'ero ēhuni ē sa'a rajoho jōe barējēvo'ego hesi jōhuremu avoho henōvareje. ¹² Hesi jōhuremu hejē'ero hejareje Philip-ro jō maho majēhiromu uēvamu: God-hu bōrōme namiromo muebejavuaje majaho rovē'e hōjo. Iesu Keriso-are ihoho bōrōme hōjo. Ĕhi jiē'e jō maho Philip-ro majēhi'ego Samaria rajo a'o magonaho'o mae uehorovoromo bapataeto vaenōvareje. ¹³ Rōhu iae Simon hu'o mae uehorovadeje. Mae uehorovoromo bapataeto vaeromo Philip'o gemu mae juvonōvadeje. Juvoromo ganōvade Philip-ro bogo gavarue darugo'e mue gō gō vae'ego garomo tiōnōvadeje.

¹⁴ Ĕhi'amu apostle ōmo'ōme Jerusalem raromaruohuro hejare uvavamu: Samaria rajohuro God-are jōho ejaharuējamu hegorovo Peter'o John'o rēmō'ōjēvareje Samaria va'orōhego. ¹⁵⁻¹⁶ Rēmō'ōjēvamu Peter'o John'o va'aroho va'o Samaria hōrōjareje. Hōrōnugoromo gavare God-are Aru'ahoho Samaria rajo jabesi ōriroho bogo ruvebijē'e jabumē Bada Iesuare ihoro ma-bapataeto vaejē'e jiamu gagorovo God ēninamiromo uavareje Iesuare aribōviohuro Aru'ahoho baeruomōrōhego. ¹⁷ Ĕninamiromo simane ōve taemēhamu God-are Aru'ahoho baeruomadeje.

¹⁸ Simane ōve taemēho'ego Aru'ahoho baeruomamu gēgorovo Simon-ro ri'ōromo Peter'o John'o uēvadeje: Naro ijo baje bojēmi'ejōjo. ¹⁹ Ĕhuni jemēro daruge bojemego na'o bae'irōjo ēhuro ae rahuare rahuare simanore ōve bamego God-are Aru'ahoho baeruomō'irōhe hōjo.

²⁰ Ĕhi uēvamu Peter-ro uavadeje: Ja'o jasi moniohu'o vēnēro ravēvo'ajējo. Jero uvanuējo: Naro monie bojamiromo ēhuro Aru'aho ae gō bojēmi'irode darugoho bae'ejōjo. Rōhu Ĕhi jiē'e darugoho hesi God-are suvuore hōjo. ²¹ God-are nuniroho jasi dē vōvōbajo'o hō bogo maho jio'ego ja bogo no'oho havo'anuējo. ²² Ĕhuni sisē uehorovanuoho vuonugo'i Bada uavego mae jiē'oho jasi uehoro sisē uehorovoromo vuonugaho'irajo. ²³ Iae na gavajoho jero ganiganimoromo mu sisē uehorovo'i hi'ego ēhuro jasi dē vōvōbajo'o hō ma-sisēremu rarovavē'e hōjo. ²⁴ Ĕhi uavamu hegorovo Simon-ro Peter'o John'o uēvadeje: Jemēro Badare ōroro ēninamego huro ajemego jemēhu uevarije i'uoho bogo bae'irōjo.

²⁵ Ĕhi'amu Peter'o John'o Badahu mu rabe vaejamu gavare jōho majēhinugoromo vuonorō'ōromo Iesuare jō maho Samaria rajo jabesi amore amore majēhibe va'aroho va'o Jerusalem hōrōjareje.

Philip-hu Iesuare jō majahijamu Ethiopia sa'a rajehu heromo mae uehorovade jōhoje.

²⁶ Ĕhi'amu Badare anerahuro Philip uavadeje: De ri'ōromo va'irano hō arue Jerusalem jioromo anume Gaza abuejarue ōroro hōrōnējo. A rumo'e sa'are va'arue ōroho uavajējo. ²⁷ Ĕhi uavamu hegorovo ri'ōromo va'adeje. Va'ihō gavadeje Ethiopia sa'a raje aho ōrēro rova'amu. Ĕaho Ethiopia sa'are simano vaejaje magonaho Candace uvaruoho ē magonaho hesi mu vaejahaje a bōrōme jiadeje. Hesi mu vaejahaje a bōrōmēro jiē'ero huro ē magonaho hesi inōmo inōmoho aho'obēhe muebejahonōvadeje. Hesi muoho Ĕhi jiadeje. Urimē'i God rajahi'i Jerusalem va'ē'ero ²⁸ vuonorō'ōromo maratu dōre hiromo miohuro jaguvamu va'ē'i suri surire jōho adahobe va'adeje. Surire jōho ēho Isaiah God-are jō majēhinōvade aehu jajivade jōho jiadeje. ²⁹ Surire jōho adahobe va'amu gavē'i God-are Aru'ahohuro Philip uavadeje: Va'oromo arue maratuore hiromo va'aje aho bihoromo ajo hu'o hiromo va'onējo.

³⁰Hiromo va'onëjumu hegoroovo Philip-ro tutuvo va'oromo hejade rue Ethiopia rajohuro Isaiah-are surire jöho adahamu hegoro uavadeje: Ëjö adahanuoho na ja hejanuëjo o bogajo. ³¹Ruehuro uavadeje: Aehu bëhi bogo röjehijë'oho na diehi hejërajo. Rojomoromo na'ohijego va'arëjo. ³²Ëhi uavamu hegoroovo Philip-ro ajio hu'ohijadeje. Hiromo gavadeje Ethiopia rajohuro ave jöho adahamu.

Vaevë'oho sheep ano'i hu'irae va'aruëhi ëhi bava'are höjo.

Sheep harihu u tarivahego bogo uë'uëvë'e namijajëhi ëhi jörume namijade höjo.

³³Aëro hesi iho mu'uvahamu aho bogo ajamiromo hesi jö maho jövade höjo.

Raro hesi aboji harihu'o jabesi jöho majahui'ajëjo.

Aboji harihu'o rumo'e ave sa'are hijadoho iae barëjë'e höjo.

³⁴Ëjöho adahoromo rue Ethiopia rajo a börömhuro Philip uavadeje: Ave jöho na uevego hejëjo. Jö God-aro baeromo majëhinövade ahuro rahuare jöe jajivë'e höjo. Na hesi jöe o ae gö hesi jöe jajivade höjo. ³⁵Ëhi uavamu hegoroovo Philip-ro ë adahade jöho aevoromo lesuare jö maho majahijamu Ethiopia rajohuro hejadeje. ³⁶Heromo örëro va'ihö gavare jove jiamu gagorovo rue a börömhuro Philip uavadeje: Ëhuro gavëjo jove jiego. Naeu avevejë'e bapataeto vaejë'oho na mae höjo o sisë höjo. ³⁷[Mae o sisë höjumu Philip-ro uavadeje: Ja jasi dë vövöbajo'e aho'o mae uehorovë'ohuro bapataeto vaejë'oho iae mae höjo. Iae mae höjumu ruehuro uavadeje: Io'ajo. Iae na mae uehorovoromo uvajëjo: Iesu Keriso iae God-are Harihe höjo.] ³⁸Ëhi uanugoromo maratu jagu bava'ajoho ëhi namijöro uavadeje. Namijamu Philip'o ë a börömo'u'o jaburo niö'iro jovore abueromo Philip-ro ë aho bapataeto vaejadeje. ³⁹Bapataeto vaeromo jovore jioromo rojomareje. Rojomamu gavë'i Badare Aru'ahohuro Philip ma-majioho hu'irae baeromo va'adeje. Va'amu Ethiopia rajo a börömhuro ijoho hu bogo gavadeje. Bogo ga'irögoro maratuore ajio hiromo nimorohobe va'adeje. ⁴⁰Va'amu Philip-ro gavadeje mami'e Ashdod amore rovë'e jiamu. Ashdod rueromo amore amore höröbe jö maho majëhibe ruejuvo Caesarea amore höröromo ë hijadeje.

9

Saul-hu aevoromo Christian vaejade jöhoje.

¹Ëhi'amu Saul-ro bogo vuonugo'i Badare aribövioho muo'amo'i ma-vöröëremu jövonövadeje. Ma-vöröëremu jövë'ëro Jerusalem ajiomoromo va'oromo Jew rajo priest börö-moho uavadeje: ²Na negajëjo jero surire jajivoromo i'imemego na Damascus amore ujuoho va'oromo Jew rajehu God rajahijarue osare osare i'imemego jaburo garomo uvo'iröhego: Nörö priest börömo hesi ihorovë'e höjo. Jabuhu ëhi uvë'oho ue'iramu naro gë'irode ae o magonahe lesuare örire jijijamu gavë'oho naru guduamëvoromo Jerusalem amore vuonorö'ö ujuoho rue'ejöjo.

³Ëhi ë'lë'ëro iae va'adeje. Va'adoho va'o Damascus amore hörö'i gavade ajoho ma-majioho ö'idöre jioromo ruvebiromo hu ajivamu gavë'i 'sa'are behumorovoromo hejadeje ëhi uvavamu: Asë'e Saul ja rabëni sisë vaejevanue höjo.

⁵Sisë vaejevanue höjumu uavadeje: Bada ja rahuo javajëjo. Rahuo javajëjumu uavadeje: Jaehu sisë vaejevanue aho Iesu na jevajëjo. ⁶Röhu ri'öromo va'oromo rue Damascus amoro hinëjo. Hiromo he'a'anuëjo ae gemuëro ua'iramu: Jero ëhi ëhi ë'ëjo.

⁷Ëhi uavamu Saul'o va'are ariböviohuro aho bogo ga'i ma-huëhemu heromo ma-jörume riravareje. ⁸Ma-jörume riravamu Saul-ro sa'are raromadohuro ri'öromo nune dadovo'i röhu öri ari'oho bogo gavadeje. Öri ari'oho bogo gavamu gagorovo rueho jaburo övëro ma'eno bava'oromo Damascus amore suorovareje. ⁹Suorovonugoromo Saul-ro öri ari'oho bogo gavë'e ioho jovoho bogo ijë'e ma-hijuvo majae niö'i gemu barëjadeje.

¹⁰Majae niö'i gemu barëjumu lesuare ae gemu hesi ihe Ananias Damascus amore hiromo nia'ovo'iraeromo gavadeje Badaro rueromo uavamu: Ananias-ajo. Ëhi uavamu ruehuro uavadeje: Bada na aviae jevajëjo. ¹¹Na aviae jevajëjumu Badaro uavadeje: De ri'öromo öri ihe Ahorirehu Va'arue Öroro va'onëjo. Va'oromo Judas-are osaro höröromo uënjö:

Tarsus amo rajo a ihe Saul na ëho jiajêjo. Na hu ga'i rovode hõjo. Ëhi uënêjo. Iae hu parie vaejajêjo. ¹²Urimê'i huro nia'ovo'iraeromo gavade hõjo ae gemu Ananias-ro rueromo hesi õvoho sinore bamamu nunoho marêjõro. Ëhuni va'oromo gavêjo. ¹³Ëhi uavamu hegorovo Ananias-ro uavadeje; Bada iae mae hõjo rõhu na hejode hõjo ae aho'obêhe Saul-are jõ sisêsho uevamu hejode hõjo. Jaburo uevare hõjo: Huro Jerusalem amore hiromo jasi aribõvioho mu sisê bêhe vaejêvo'i hijade hõjo. ¹⁴Mu sisê vaejêvê'ëro Jerusalem priest masijo jabesi darugoho baeromo aviaie rovê'e hõjo ëhuro ae rahu ja uehorovavê'oho guduamo ujuoho va'o barêrõhëro. ¹⁵Ëhi uavamu Badaro uavadeje: O-ajo. Va'êjo. Ëhesi bêhoho naro ë iaho baejê'e jevajêjo huro nasi muoho vaerõhego. Huro nasi jõho bava'oromo sa'a ioro'ioro rajo aribõvioho jabesi a masijoho Israel rajo aribõvioho huruoho majêhibe juvego ae aho'obêhe heruomorõhego ëhuni na Saul baejode hõjo. ¹⁶Baejê'ëro naro hu rõjahi'ejõjo huro garõhego huhu nasi jõeni vi'ehe huê vavaene rabe bae'irõhoho diehi jiê'e jiego garõhego.

¹⁷Ëhi uavamu hegorovo Ananias-ro va'adoho osare rumo va'oromo õvoho Saul-are sinore bamoromo uavadeje: Õho Saul-ajo. Badaro remõ'õjamu rovode hõjo. Ja ave amore rue'irõgoro õrire gavane aho Iesuro remõ'õjade hõjo naro rueromo ajamego jasi nunoho marê'i God-are Aru'ahohuro jasi dê vövõbajo'ere abueromo rarovavo'irõhego. ¹⁸Ëhi uavamu gavê'i hiobaro ginioru nu ano'o va'ënoho Saul-are nunire jioromo sa'are rireromo rovamu nunoho marêjadeje. Marêjamu ri'õromo bapataeto vaejadeje. ¹⁹Bapataeto vaenugoromo ie inugoromo rõhu maõo biririvoromo mae hijadeje.

Saul-hu Damascus amore hiromo Iesuare jõ majêhijade jõhoje.

Mae hijê'ëro Iesuare aribõviohu'o Damascus hijamu majae ma-gemu niõ'i barêjadeje. ²⁰Hiromo ma-burëro aevoromo Jew rajehu God rajahijarue osare osare Iesuare jõho majêhibe juvadeje. Majêhiromo uënõvadeje: Iesu iae God-are Harihe hõjo.

²¹God-are Harihe hõ uëvamu heromo tiõromo uarovareje: Asê'e ë aho Saul na ae gemuoho hõjo o ae gõ hõjo. Ëhesi bêhoho Saul Jerusalem hiromo bogo ëhioho ë'onõvade hõjo. A'i Iesu uehorovarue aribõvioho muo'amonõvade hõjo. Muo'amê'ëro huhu ave rovade hesi bêhoho Iesuare aribõvioho guduamo ujuoho va'oromo Jew rajo priest masijoho i'imêmege baejêvo'irõhego ëhuni rovade hõjo. Ëhi jiê'oho hu diehi'oromo Iesuare jõho majahuijajêjo.

²²Ëhi uarovamu Saul-ro biririvo avohoromo jõho jõvobe va'oromo majêhiromo uënõvadeje: God-hu uavê'ëro bõrõme namiromo ajamuijaje aho Iesu hõjo. Ëhi uëromo ë jõ bêhoho avoho garomo hejê'ëro darugo'o majêhijamu hegorovo Jew raje Damascus amore raramaruoho jabuhu Saul-are jõ aho'irõhoho bogo eni jioruomadeje.

²³Bogo eni jioruomamu ëhi'ojuvo majae aho'obêhe barêjamu Jew rajohuro gagovoromo Saul ano'i atareje. ²⁴Ano'i atamu ë jõho heromo ae gõëro Saul majahijadeje. Rõhu jene võ'õe majae vahie Jew rajo aribõviohuro Damascus amo rejo ojore ojore atovo raromareje Saul hörõ rovego ano'iro. ²⁵Ëhi'obe va'ojuvo hujeji vahie gemu evare Saul-are aemo'aemohuro uavamu niomonio mo bojõ gagore abo hijadeje. Abo hijamu õ'ëro beromo ma-saginieri õ'ire ma'enê'i rejo sigagure õ'oho a'ohõ'õjê'i ma-u'emu ba'amamu je'onõ ruvebi sa'are ravo'amoromo va'adeje.

Saul-hu Jerusalem amore va'oromo ë'ade jõhoje.

²⁶Va'oromo Jerusalem hörõjadeje. Hörõromo Iesuare aribõviohu'o gemu mae juvo'i ë'oh gavadeje. Juvo'ia'amu gagorovo rue aribõviohuro uvareje: Nani Saul bogo Iesuare aehu jio'i ma-sareramuijajëromo juhuonamiruomadeje. ²⁷Juhuonamijamu gagorovo Iesuare ae gemu Barnabas-ro Saul ajamiromo hu'irae baeromo apostle jabesi õrire rovadeje. Rueromo uëvadeje: Saul urimo mu sisê vaenõvadêhioho bogo ëhioho vae'i a'i Damascus õrire va'ihõ gavade hõjo Badaro birohoromo jõe ëhi ëhi majahijamu. Jõe ëhi ëhi majahijamu hegorovo Damascus va'oromo darugo'o maëro Iesuare jõho majêhibe juvade hõjo. Ëhuni jaruvoho Saul hu a mae hõjo. ²⁸Ëhi'amu gagorovo Saul-ro Iesuare aribõviohu'o gemu mae hi juvadeje. Hi juvoromo biririvoromo Badare jõho Jerusalem ame bõvioho

majëhibe juvadeje. ²⁹ Majëhibe juvoromo Jew rajehu Greece huëhu atarue ariböviohu'o Iesuare jöho jövoromo jö aho'ahamirovareje. Jö aho'ahamirovoromo rueho jaburo Saul ano'irögoro ë'areje. ³⁰ Ano'ia'amu gagorovo Iesu uehorovarue ö mueno'ö ömo'ömhuro Saul hu'irae baeromo Caesarea amore abuejaroho abo nugö'öjamu hesi amëro Tarsus va'adeje.

³¹ Va'amu Judea sa'are Galilee sa'are Samaria sa'are jioruomaje ekaresia ariböviohuro huë vavaeni'e raromarohe barë'i mae raromareje. Mae raromamu God-are Aru'ahohuro ekaresiaho ajëmamü Bada mae uehorovoromo biririvobe va'amu ae aho'obëhe jëvobe va'adeje.

Peter-hu Lydda amore Joppa amore va'o hiromo ë'ade jöhoje.

³² Ëhi'ego Peter-ro amore amore juvonövadeje. Juvoromo iae God-are aribövioho gë'iro Lydda amore abueromo ë hijadeje. ³³ Hiromo gavadeje ae gemu hesi ihe Aeneas övo hörü'e vuovahë'ëro maratuoremu raromamu. Mami'e aevoromo raromobe rovadoho vadune aho'obëhe 8 barëj'e jiadeje. ³⁴ Raromamu gagorovo Peter-ro uavadeje: Aeneas Iesu Kerisoro jasi sinoho avohahajëjo ëhuro mae javojöro. Ëhuni ri'öromo jaehu raromanue maratuoho avoho bamëjo. Ëhi uavamu hejë'i ma-burëro ri'öjadeje. ³⁵ Ri'öromo juvamu Lydda amo rajohu'o Sharon sa'a rajohu'o ae aho'obëhe Aeneas garomo aevoromo Badare ijore ijore jijihadeje.

³⁶ Ëhi'amu Iesuare magonahe gemu hesi ihe Tabitha Joppa amore hijadeje. Hesi ihoho Greece huëhu uvaruoho Dorcas-je. Dorcas iho bëhoho mi ihe deer-je. Huro hiromo huë baejë'e muoho vaeromo ae ajëminövadeje. ³⁷ Ae ajëmiromo ijönö guomo guome baeromo guomadeje. Guomamu hesi sinoho u'oromo baeromo javu döre osare ajio bamareje. ³⁸ Bamamu Iesuare ariböviohuro hejareje uvavamu: Peter-ro Lydda amore hijajë uvamu hegoro öroho bogo ëgoho jië'ego ae niö'i uëvareje: Va'irarijoho Peter uavego ma-burëro rue'irajo. Rue'irajamu va'o majahijareje. ³⁹ Majahijamu hegorovo Peter-ro ri'öromo jabu'o rovamu hu'irae baeromo döre osare iojiomareje. Iojiomamu magonaho doru ömo'ömhuro nierusuburu'e bamë'i Peter-are bëhire ro ruë numë gagovo rova'o rojomoromo Dorcas-hu jabu'o hijë'i sigohi'amade niögoho Peter-ro gajöro röjahijareje. ⁴⁰ Röjahijamu huro jabumë aho'obëhe ë döre osare jëvamu rëmö'öjamu va'o barëjadeje. Va'amu Peter-ro ague aho hiromo God-are örire ëninamiromo huotorovoromo sinoho garomo uavadeje: Tabitha ri'öjëjo. Ri'öjëjamu Tabitha-ro nune dadovoromo Peter garomo ri'öromo döre hijadeje. ⁴¹ Hijamu gagorovo Peter-ro öve nugö'öromo ma'enoromo nigemamu namijadeje. Namijamu Peter-ro uvëvadeje magonaho doru ömo'ömhü'o Iesuare ae magonaho ioro'iorohu'o ruejöro. Rovamu Peter-ro uëvadeje: Ave magonahoho i'ovoromo mae hijaje gahëjo. ⁴² Ëhi'ade jöho Joppa amoho aho'o uarovo barëjadeje. Jöho uarovamu hegorovo ae aho'obëhe Bada aevoromo mae uehorovoruomadeje. ⁴³ Mae uehorovamu Peter-ro majae aho'obëhe Joppa amore baeromo mi sino mae avohaje a hesi osae gemuore hijadeje. A ihoho Simon jiadeje.

10

Peter-hu Jew raje jiadeje röhu sa'a gö raje Cornelius ga'i va'ade jöhoje.

¹ Peter-ro Simon'o gemuore hijamu iae ae gemuëro arue Caesarea amore hijë'e jiadeje. Hesi ihoho Cornelius jiadeje. Cornelius bogo Jew rajoho jio'i hu muorovo simano vaejaje aëro jië'ëro muorovo aribövi ioro'ioroho ma-gemuoro bu'öromo hijë'ëro ëhi muebejëvonövadeje. Ëmuorovo aribövi gemuore bu'öjare jabesi ihoho Italy muorovo aribövie jiadeje. ² Röhu Cornelius God mae uehorovaje ae jiadeje. Hu'o hesi agane aho'o jaburo God rajahinövareje. Huro Jew rajo aribövioho huë baejëvoromo ajëminövo God-are örire jöe jövonövadeje. Ëhi jië'e ae jiadeje.

³ Ëhi jië'e aëro jië'ëro iae majae sanuovamu gagoro Cornelius-ro nia'ovo'iraeromo ma-samaro gavadeje God-are anerae gemuëro rovamu. Rueromo uahijo: Cornelius-ajo. ⁴ Cornelius-ajamu hegorovo Cornelius-ro aneraho juhuonamiromo ërimahoromo

uavadeje: Ja diehi uehorovoromo rovanuëjo. Rovanuë'ego anerahuro uahijo: Jaehu God-are örire jö jövanuoho ae gö huë baejévanuoho ého God-ro ejahoromo ja mae uehorovavajëjo. ⁵Éhuni ae gö rëmö'öjego rue Joppa amore va'arëjo ae gemu Simon hesi iho göho Peter-ro rueröhe höjo. ⁶Simon Peter-ro Simon göhu'o mi sino mae avohaje a hesi osae gemuore ma-jahuri hijajëjo. Hesi javuoho sö jovo bëhire jiajëjo. ⁷Anerahuro éhi majahinugoromo va'amu gagorovo Cornelius-ro hesi osa muebejaharue ae niö'iro o muorovo ae gemuëro éhi ruejörö jöe nugö'öjadeje. Émuorovo aho God mae uehorovoromo Cornelius hu'o gemu mae juvoromo ajamijaje ae jiadeje. ⁸Éaho niö'i gemu rueruomamu Cornelius-ro diehi ë'amu gavade jöho majëhiromomo rëmö'öjamu Joppa amore va'areje.

⁹Nërö ë ariböviohuro örëro va'oromo Joppa suorovo'i rovaraje. Suorovo'i rovamu gavë'i majae ririre rabu'e jiamu gagorovo evare Peter-ro ruhëre javu döre ajiomoromo hitavë'ëro raramaruire ë hijadeje God-are örire jöe jövo'irovo. ¹⁰Hiromomo hömamu hegorovo ae uëvadeje: Ie avohoromo bojemirego na i'iröjo. I'irö uëvamu hegoro ioho avohahareje. Ioho avohahamu hu nune jioromo nia'ovo'iraejadeje. ¹¹Nia'ovo'iraeromo gavadeje ö'idöho arorovo'ego niögu va'ëne inömo bööröme veneguöruvë'oho hesi bëhire ruvebi raromamu. ¹²Raromamu gavë'i gavadeje sa'are jijihaje maje gö gö sigobe je'o uge rabe rabe niögu va'ëne inömo hesi döre jio'amamu. ¹³Jio'amamu gagorovo hejadeje uavavamu: Peter jero ri'öromomo muo'amoromo ijëjo. ¹⁴Ijëjamu hegorovo Peter-ro uavadeje: Bada bogajo. Jew rajo noehu bogo ijarue i sisëho bogo mae bogo ibe rovë'e jevajëjo jögore ahojööni. ¹⁵Peter-ro éhi uanugoromo hejadeje röhu maho uavavamu: O-ajo. God-hu sisë barëjë'e hö uvoromo jiovëhë'e mioho raboho ého nadi uvorëjo: Sisë höjo. ¹⁶Vae niö'i gemu éhi jië'e muoho Peter-ro ga'i hijuvo evare gavadeje ë inömhomo sionëro ö'idöre ba'ojiomamu.

¹⁷Ba'ojiomamu gagorovo Peter-ro hesi uehorovoromo uvadeje: Nia'ovo'iraeromo gavade hesi bëhoho rabe höjo. Hesi bëhoho rabe hö uvamu iae nume Cornelius-are ariböviohuro Simon-are osaho dinö'e jiaje jöho hejë'ëro ë osa hesi ojanore ro riravareje. ¹⁸Riravoromo ma-darugo'o uvareje: Na ae ihe Simon Peter ého jiajëjo.

¹⁹Éhi uvamu iae Peter-ro nia'ovo'iraeromo gavade mu hesi bëhoho uehorovë'e hijamu gavë'i God-are Aru'ahohuro hu uavadeje: Hejëjo. Ae niö'i gemu jaburo ja nahavaruëjo. ²⁰Ri'ö abue'i nadi uvonëjo: Sa'ae gö raje jëvo'ego bogo va'ejö uvo'i ma-va'onëjo. Naro rëmö'öjamu rovarë höjo. ²¹Éhi uavamu hegorovo Peter-ro abueromo nume rovarë aho uëvadeje: Jemë nahevarujoho na aviaje jevajëjo. Jemë rabe nëgamu rovarije höjo. ²²Rovarije höjamu uavareje: Muorovo simano vaejaje ae Cornelius-ro uövuamu rovarë höjo. Hu a mae God mae uehorovaje ae höjo. Éhuni Jew raje ae aho'obëhe jaburo hesi örire mae uehorovarue höjo. Éhi jië'ego God-are anerae gemuëro rueromo Cornelius uavade höjo: Jero uavego Peter rue'irajo jöe majahijego he'irane höjo. Éhuni rovarë höjo. ²³Éhuni rovarë höjamu hegorovo Peter-ro uëvadeje: Osaro ro raromoromo vahiromegomo momorö'örëjo.

Éhi ë'ë'ëro nëröho Peter-ro ri'öromomo jabu'o va'adeje. Röhu Joppa raje Iesuare ö mueno'o ioro'iorohuro hu'o va'areje. ²⁴⁻²⁷Va'aroho va'o nëröho Caesarea amore suorovareje. Amore suorovoromo Cornelius-are osare va'ia'amu Cornelius-ro Peter birohoro uvadeje: Peter God va'ëne höromomo hesi bëhire sa'are ague aho hiromomo Peter rajahijadeje. Rajahijamu gagorovo Peter-ro Cornelius banigojioromomo uvadeje: Nadi ëhioho ë'i maril'öromomo döro namijëjo. Na bogo God jevo'i ma-ae jevajëjo. Ma-ae jevajë uanugoromo hu'o Cornelius'o jöe jörovobe osare va'oromo Peter-ro gëvade Cornelius-are agane aemo'aeme ruejörö uëvadoho ae aho'obëhe gagovoromo gemuore raromoromo muebejamu. ²⁸Muebejamu gëgorovo uëvadeje: Iae jemë'o gavarujëjo Jew rajo noehu sa'a ioro'ioro rajo jemë'o gemu mae jijihö'iröhoho o jemesi osare va'iröhoho nosi öroho tugohahuë'e höjo. Éhi höjo röhu God-ro na röjehiromomo uevë'e höjo: Jero nadi uvonëjo: Sa'a ioro'ioro rajoho o rahuo rahuo sisëgo gorëvo'iröhe aribövioho jio'amajëjo. ²⁹Éhuni naro ruejörö jero jöe nugö'öjamu hegorovo na bogo uvode höjo: Ja sa'a gö raje javajëromomo nue gö gö uehorovo'i ma-burëro rovode höjo. Éhi jië'oho rabëni ruejörö uevane höjo.

³⁰ Uevane höjamu Cornelius-ro uavadeje: Naehu uavode hesi bēhoho urimo rirōhe majae sanuovamu jaruvo jiajēhi naro nasi osare hiromo God-are örire jōe jövode höjo. God-are örire jōe jövē'i gavode höjo ae gemuero niögu aji mabēhe ba'amē'e nasi örire rovamu. ³¹ Rueromo uevavohijajo: Cornelius jaehu God-are örire jō jövanuoho God-ro ejahoromo jaehu ae gö huē baejēvanuoho huro ēhu'o uehorovajējo. ³² Ēhuni ae rēmō'öjego Joppa va'arējo ae gemu Simon hesi iho göho Peter-ro ruerōhe höjo. Simon Peter-ro Simon göhu'o mi sino mae avohaje a hesi osae gemuore ma-jahuri hijajējo. Hesi javuoho sö jovo bēhire höjo. ³³ Ēhi uevamu hejē'i naro ma-burēro jōe nugō'öjode höjo jero ruejōro. Röhu ja rovanoho iae mabēhe ē'ane höjo. Ēhu'ero no ae aho'obēhe aviae God'o gemuoro raromoromo muebejaruējo he'i Badaro diehi diehi jōho bojamē'ero jero majahuijego.

Peter-hu Cornelius-mesi örire majahijade jōhoje.

³⁴ Ēhi uavamu hegorovo Peter-ro jōho majēhiromo uēvadeje: Iae na gavajoho God bogo Jew rajohemu nimo'i sa'a ioro'ioro rajoho bijönimo'i ³⁵ a'i ae aho'obēhe sa'ae dinō'e dinō'e raromoromo God uehorovoromo mu mae vaejaruoho no aho'o huro ēhi ma-gemu uehorovavuoromo ejahuaje höjo. ³⁶ Iae jemē'o gavarujējo God-ro Israel rajo nosi örire ave jō maho majahuirromo uövuade höjo: God na'o jemē'o hahagu hahagu javuadoho jaruvoho Iesu Kerisoro gagovavū'e höjo. Röhu huro bōrōme namiromo sa'ae dinō'e dinō'e muebejavuaje ae höjo. ³⁷ Jemē'o gavarujējo Iesuare mu bōrōmoho Judea sa'ae bövioho rumorovade höjo. Bapataeto vae'irōhe jōho John-ro majahuijamu evare ē mu bōrōmoho Galilee sa'are aevoromo Judea sa'ae bövioho rovide höjo. ³⁸ Nazareth rajo ae Iesu hesi jōho jemē'o iae hejaruje höjo. God-ro Iesu muro bamo'irōgoro hesi Aru'ahohu'o darugohu'o bojamiromo muro nugade höjo. Muro nugē'ero hu'o gemu mae juvo'ego Iesuro ae mae vaejēvobe Satan-are darugoro raromarue aribövioho aho'o ajēmibe ēhi ē'obe ē sa'ae bövioho juvonövade höjo. ³⁹ Juvoromo Jew rajo nosi sa'are o Jerusalem amore mu rabe rabe vaejadoho iae nosi nunēro gavē'e javuajējo. Aero hu korosire anamu guomade höjo. ⁴⁰ Guomamu majae niō'i gemu hesi uhure God-ro uavamu ri'öjē'ero hijamu gavare höjo. ⁴¹ Ae aho'obēhe Iesu bogo gavare höjo. Noehu hu garomo a majēhirōhego God-hu mami'e baejavuade aribövioho noremuēremu hu gavare höjo. Hu guomoromo ri'öjade hesi ijore hu'o i jovo ue'ahare aribövioho noremuēremu gavare höjo. ⁴² Noro hu gavamu Iesuro uövuade höjo noro hesi jōho ae majēhiromo uēnōvorōhego: God-ro Iesu gemu uavade höjo ae aho'obēhe vuovē'oho o bogo vuovē'oho hesi nunire riravego mevēvorōhego. Ēhi uēnōvorōhego Iesu majahuijade höjo. ⁴³ Röhu ē a hesi jōho jō God-aro baeromo majēhinövare ae aho'obēhe avoho majahuirromo jajivobe rovare höjo. Jajivoromo uövuare höjo: Ae rahu ē a mae uehorovē'oho God-ro hesi jōēni nosi sisēho uehorovoromo vuonugahu'ajējo.

Sa'a ioro'ioro rajehu aevoromo God-are Aru'aho baejare jōhoje.

⁴⁴ Peter-ro ēhi majēhijamu gavē'i God-are Aru'ahohuro ruvebiromo jō hejarue aribövie aho'o jabesi dē vövöbajo'ere abue'amadeje. ⁴⁵⁻⁴⁶ Abue'amamu gagoro Jew raje Iesu mae uehorovē'i Peter'o rovare ariböviohuro hejare ē sa'a ioro'ioro rajohuro bogo hejarue huē göēro göēro atoromo God bōrōme hō uvavamu hegorovo tiöjēvadeje. Tiöjēvamu uehorovoromo uvareje: Asē' God-ro hesi Aru'ahoho bogo Jew rajohemu bojamui'i sa'a ioro'ioro rajohu'o bojēmijade höjo. Bojēmijade höjumu Peter-ro ri'ōromo uēvadeje: ⁴⁷ Jew rajo noehu God-are Aru'aho baejarēhi ave sa'a ioro'ioro rajo ariböviohu'o God-are Aru'ahoho ēhi baejare höjo. Ēhi jiē'oho no rabēni ahēvo'iramu bogo bapataeto vae'a'aruējo. Bēhe bogohöjo. ⁴⁸ Ēhi uēnugoromo hesi aribövioho uēvadeje: Iesu Kerisore ioro bapataeto vaejēvohējo. Ēhi ē'ē'ero Cornelius-mēro Peter uavareje: Nadi ma-burēroho va'i majae ēgo'o no'o hiromo va'onējo. Ēhi uavamu jahu'o hijadeje.

11

Sa'a ioro'ioro rajehu bapataeto vaejare jō Peter-hu majēhijamu Jerusalem ekaesia ariböviehu hejare jōhoje.

¹Iae apostle ömo'ömo'u'o Keriso-are ö mueno'lo ioro'iorohu'lo Judea sa'are röhu ë sa'ae gemuore dirö'e göre göre raromaruohuro hejareje uvavamu: Bogo Jew rajoho gemu a'i sa'a gö rajohu'lo God-are jöho baejare höjo. ²Ëhi uvamu hegoro'ovo Jew rajo a ioro'iorohu Jew rajehu ë'aruëhi sa'a gö rajo jabesi sino tarivëhoröhëgo nimoruumaje ariböviohuro gavare Peter Jerusalem rovamu gagorovo birevoromo uavareje: ³Jew rajo nosi sino tarivahuaruëhioho aho jabesi sinoho bogo ëhioho tarivëhare höjo röhu jero jabesi osare va'oromo jabu'lo gemu mae hiromo ioho ijane höjo.

⁴Ëhi uavamu Peter-ro ri'öromo huhu sa'a gö rajohu'lo hiromo vaejade mu hesi bëhoho huruoho majëhi barëjadeje. ⁵Majëhiromo uëvadeje: Naehu vaejode mu hesi bëhoho na anumiae Joppa amore hijode höjo. Hiromo God-are örire jöe jövode höjo. Jöe jövë'i nia'ovo'iraeromo gavode höjo niögu va'ëne inömo böröme veneguöruvë'oho nasi bëhire ruvebi raromamu. ⁶Raromamu ga'i gavode höjo amo mae je'lo mae sigobe uge rabe ëhi ë inömo hesi döre jjo'amamu. ⁷Hejode höjo uevavamu: Peter ri'öromo muo'aromomo ijëjo. ⁸Ijëjamu hegoro naro uavode höjo: Bada bogajo. Jew rajo noehu bogo ijarue i sisëho bogo mae bogo ibe rovë'e javajëjo jögore ahojööni. ⁹Ëhi uanugoromo hejode höjo ö'idöre röhu maho uevavamu: O-ajo. God-hu sisë barëjë'e hö uvoromo jiovëhë'e miho raboho ëho nadi uvorëjo: Sisë höjo. ¹⁰Ëhi uevamu ëhi jië'e muoho vae niö'i gemu naro ga'i hijuvo evare gavode höjo ë inömo aho'ö sionëro ö'idöre ba'ojiomë'e jiamu. ¹¹Ëhi'amu gavë'i ae niö'i gemu naehu hijaje osare ö'are höjo Caesarea amore jitoromo rëmö'öj'ëro jië'ëro. ¹²Ö'amu God-are Aru'ahohuro uevade höjo: Nadi uvonëjo: Sa'a gö raje jëvo'ego nani na jabu'oho bogo va'ejö uvo'i ma-va'onëjo. Ëhi uevamu ave raromarue Iesuare ö ömo'ömo'ho övo gö mine övo göre gemu ëho jaburo na'ö gemu mae ri'öromo ë rovare ariböviohu'lo gemuore va'oromo Cornelius-arire suorovoromo hesi osare va'are höjo. ¹³Noro hesi osare va'amu Cornelius-ro uövuade höjo: Na gavode höjo anerae gemuëro rueromo uevavamu: Ae rëmö'öjego Joppa va'arëjo ae gemu Simon hesi iho göho Peter-ro rueröhë höjo. ¹⁴Huro rueromo jöe majëhi'ajëjo ja'lo jasi aganohu'lo heromo bogo sisëroho va'i maro raromo'irarijego. ¹⁵Cornelius-ro ëhi uövuamu hegoro'ovo naro aevoromo jöho majëhijamu gavë'i God-are Aru'ahohuro jabesi örire ruvebijade höjo. Urimë'i Jew rajo nosi örire ruvebijadëhi ëhi ë'ade höjo. ¹⁶Ruvebijamu gagorovo naro uehorovoromo uvode höjo: O Badaro mami'e uövuade höjo: Urimë'i John jövëro bapataeto vaejëvade höjo. U'emu God-ro hesi Aru'ahoho mëmiromo ëhuro jovoho bogo a'i Aru'ahohuro bapataeto vaejëvo'ajëjo. Iesuro ëhi uövuade höjo. ¹⁷Amo urimë'i noehu Bada Iesu Keriso mae uehorovamu God-hu hesi Aru'aho suvuoro mamuijadëhi ëhi sa'a gö ariböviohu'lo mëmade höjo. God-hu ëhi sa'a gö rajo ajëmijadoho ëhu'oho na rabëni God-are öroho tugohojörajo.

¹⁸Peter-ro ëhi uëvamu hegoro rue Jew rajohuro Peter birevaroho vuonugo'i God rajahiromo uavareje: Ëhi jië'oho God-ro sa'a ioro'ioro rajo jabesi öroho jiovëhë'e höjo ëhuro jabu'lo dë vövöbajö'e huotorovoromo mae raromo'iröhëgo.

Antioch amo rajehu aevoromo Keriso mae uehorovare jöhoje.

¹⁹Urimë'i Jew rajëro Stephen anonugoromo Iesu mae uehorovarue aribövioho sisë vaejëvamu gagorovo huruomoro'omo sa'are sa'are va'lo raromareje. Va'aroho ioro'iorohuro ma-bisemu dunoro va'lo raromö'i ioro'iorohuro öri ëgobövie va'oromo Phoenicia sa'are o Cyprus sa'are o Antioch amore ë va'lo raromoruomadeje. Raromoro'omo Jew rajohemu Iesuare jöho majëhinövareje. ²⁰Röhu Iesu mae uehorovarue a ioro'iorohu Cyprus sa'a rajohu'lo Cyrene amo rajohu'lo ëho jaburo Antioch amore va'lo raromareje. Raromoro'omo bogo Jew rajohemu a'i sa'a gö ariböviohu'lo Bada Iesuare jö maho aevoromo majëhijareje. ²¹Sa'a gö ariböviohu'lo jöho majëhijamu Bada God-ro daruge ajëmijamu Antioch amo raje ae aho'obëhe Bada Iesu mae uehorovoromo aevoromo hesi örire jijihareje.

²²Hesi örire jijihamu Jerusalem ekaresiahuro ë jöho hejareje. Heromo Barnabas nugö'öjamu Antioch rajoho gë'i va'adeje. ²³Va'oromo gavade God-ro mae ajëmijë'e jiamu gëgorovo nimorohoromo uëvadeje: Ae aho'obëhe jemëro birivoromo jemesi dë vövöbajö'e aho'lo Bada gemu uehorovorëjo. ²⁴Ëhi uëvade hesi bëhoho Barnabas hu a

mae jiadeje. God-are Aru'ahohuro hesi dē vövöbajo'oho aho'o rarovamu huro God mae uehorovo avohadeje. Ēhi'amu ae aho'obēhe aevoromo Badare örire jijihareje.

²⁵ Ae aho'obēhe Badare örire jijihamu gagorovo Barnabas-ro ri'öromo Tarsus amore va'adeje Saul naho'irovo. ²⁶ Nahoromo birohonoromo hu'irae baeromo sionero Antioch rovadeje. Rueromo Barnabas'o Saul'o jaburo niö'iro Antioch ekaresiahu'o gemu mae ariromo ae aho'obēhe rōjēhibe va'aroho vadune gemu barējadeje. Ēhi'amu Antioch amore ē dirö'ore aëro Keriso-are aribövioho gēromo aevoromo uvareje: Jabumē Christian aribövioho jēvajējo. Urimoho ēhi jiē'e ihoho bogojēvadeje.

²⁷ Röhu evare majare jö God-aro baeromo majēhijarue a ioro'iorohuro Jerusalem jioromo Antioch rovareje. ²⁸ Rueromo ae gemu hesi ihoho Agabus-ro jöe God-are Aru'aho hesiro baeromo ri'öromo uēvadeje: Ijonö i bogojio majaho sa'ae aho'obēhe rue'a'ajējo. Huhu uēvadēhi ijonö Claudius Rome a börömo jiadevare evare ē i bogojio majaho rovadeje. ²⁹ Amo Agabus-ro ē jöho majēhijamu hegoro Antioch amore raromarue Keriso-are ariböviohuro uvareje: No ae gemuero gemuero ga'iröhe no ijo bajo bövie baejē'e javuamu gavē'oho bövie tarioromo bise'e baejē'e javuamu gavē'oho bisemu tarioromo baro gemuoro bamoromo Christian agane Judea sa'are raromaruhuni nugö'öjēho-e-jarējo. ³⁰ Ēhi uvonoromo suvuoroho gagovoromo Barnabas'o Saul'o i'imēmijareje jaburo niö'iro ujuoho va'oromo Jerusalem ekaresia a duvaho jabesi övo döre bahijēhoröhego.

12

Peter savojire ba'amare jöhoje.

¹ Evare majaroho Judea sa'are börömo vaeromo hijaje a böröme Herod-ro ri'öromo jöe nugö'öjadeje aëro ekaresia a ioro'ioroho ijumēvoröhego. ² Huro ae uēvamu jaburo John-are öho James gudamoromo siravaëro anareje. ³ Anamu Herod-ro gavade Jew rajo ariböviohuro ēhi nimiruomamu gēgorovo ae uēvamu Peter'o guduamo bava'areje. I Dē Huaje Oso Rumo'e Jew rajehu Ue'aharue Maja börömo jiadevare evare ēhi ē'areje. ⁴ Peter guduamo bava'oromo savoji gagore ba'amareje. Ba'amamu muorovo aëro 4 aveo'ioho Peter muebejareje. Muebejamu muorovo ae 4 gö'o ro jabesi sionoho baejareje. Röhu ae 4 gö'o ro jabesi sionoho baejareje. Röhu ae 4 gö'o ro jabesi sionoho baejareje. Ēhi ē'onövareje. Urimoroho va'ego ae göëro ro sionoho baenövareje. Ēhi ē'ē'ero Herod-ro uvadeje hujeji God-hu Vörö Tugohade Söröho barējēgo evare Peter ae aho'obēhe jabesi nunire barueromo court vaeröhego. ⁵ Ēhi uvamu Peter-ro savoji gagore ēhi hijadeje. Hi'ego ekaresiaho jaburo biririvoromo God uanövareje hu ajamiröhego.

Aneraehu Peter ajamamu Peter-hu savoji gagore jioromo hörö va'ade jöhoje.

⁶ Ēhi'öjuvo nērö Herod-ro Peter ae aho'obēhe jabesi nunire bava'i uvē'iro röhu jaruvēhi a göhuro ruēhi hi'i göhuro viēhi hiromo Peter muebe'i Peter ririre ö'e niö'iro töv'ēro niavē'e jiadeje. Ae göëro savoji ojoho muebejareje. ⁷ Muebejamu iae Badare anerae gemuero ma-majioho rovamu savoji gagoho ajivadeje. Ajivamu gavē'i anerahuro Peter-are ionire anoromo ioromo uvadeje: Ma-burero ri'öjējo. Ēhi uavamu gavē'i övore muohahare ö'ohuro jiovo bu'öromo sa'are bejadeje. ⁸ Bejamu anerahuro uvadeje: Jasi götaho ruoho bibivo'i hörü guduoho io'amējo. Io'amējamu Peter-ro götaho ruoho bibivoromo hörü guduoho io'amadeje. Io'amamu uvadeje: Niögoho ba'amoromo nasi ijoro rovējo. ⁹ Nasi ijoro rovējamu savoji gagoroho höröromo hesi ijore va'adeje. Va'oromo uvadeje: Aneraehu ömajoho nani bogo maho ga'i na nia'ovo'iraejajē'i va'öjuvo ¹⁰ va'o urimo mueberomo riravaruire rova'oromo ijore mueberomo riravaruire rova'oromo suovororomo amo börömore va'arue biriri'e ojore ē rovareje. Rue'i gavare ojoho hesi ēma jiororovamu gagorovo va'orahonö va'oromo örire jirehareje. Jirehoromo anerahuro ma-majioho va'adeje.

¹¹ Va'amu gagorovo Peter-ro uehorovo avohoromo uvadeje: Avevejö'oho iae na garomo uvajējo: Iae mae-ējo. Badaro hesi aneraho nugö'öjamu Herod-are övore jevadoho

baeniahi baejevo rovë'e höjo. Baeniahi baejevo rovë'ëro Jew rajo ariböviohuro bövi bise'o vaejevo'i uvaroho ëhi ë'oröhoho bogo eni jëvo'ajëjo.

¹² Peter-ro ëhi uehorovonugoromo John Mark-are vëme Mary-arire va'adeje. Röhu Iesuae ae aho'obëhe Mary-are osare raromoromo ëninamijareje God-ro Peter ajamijëro.

¹³ Ëninamamu gavë'i Peter-ro rueromo oje jiovahojëro ano'anovadeje. Ano'anovamu hegoro magonaho aboride gemu hesi ihoho Rhoda-ro ojoho jiovahoi' rovadeje. ¹⁴Rueromo Peter-are huëho hegoro nimorohoromo ojoho bogo jiovo'i ma-burëro vuonorö'ö va'oromo osare aribövioho uëvadeje: Peter mami'e rovë'e aviae ojanore namijajëjo.

¹⁵ Namijajëjamu uvoruomadeje: Nani Peter savoji gagore hijajëromu magonahoho uavareje: Simane huotorovoromo ëma uövuanuëjo. Ëma uövuanuëjamu magonahohuro uëvadeje: O-ajo. Na mae uëvajëjo. Hu iae rovë'e höjo. Uavareje: Peter bogo ruel'i ma-hesi aru'ahohuremu rueromo namijajëjo.

¹⁶ Ëhi'amu gagorovo ojo jiovahojëro Peter-ro ojore ano'anovo'i hijadeje. Ano'anovo'i hijamu va'o ojoho jiovoromo Peter gavamu jöe barëjëvadeje. ¹⁷Jöe barëjëvamu Peter-ro övëro tugohëvoromo uëvadeje: Na savoji gagore jevamu Badaro ëhi ëhi ë'oromo hu'irae baejevo rovade höjo. Ëhi jië'e jöho majëhinugoromo uëvadeje: Jemëro va'oromo James'o agano ioro'iorohu'o nasi jöho majëhirego he'irarëjo. Ëhi uënuigoromo öre gö va'adeje.

¹⁸ Öre gö va'ë'ëro sisonuvamu savoji gago muebejarue ariböviohuro gavare Peter bogojiamu gagorovo tiöromu juhuonivoromo uehoroho bogojëvamu ma-jöe gö gö atoromo uvareje: Peter dinö'e va'ë'ëro bogojajëjo. ¹⁹ Bogojajëjamu Herod-ro uëvamu hesi ariböviohuro Peter nahemu nahojuvo gavareje bogojiamu. Bogojiamu gagorovo Herod-ro Peter atovarue aribövi jabesi jöho heromo jöe mevoromo hesi ariböviohuro atovarue aribövioho muo'amojëro uëvadeje. Ëhi'onugoromo Herod-ro Judea sa'are jioromo abuejadoho abo Caesarea amore ë hijadeje.

Herod guomade jöhoje.

²⁰ Caesarea hiromo Herod-ro Tyre o Sidon amo rajo jabesi örire sisë maro dë vöröni-madeje. Dë vörönimamu gagorovo rue amo rajohuro uvareje: Noehu ijarue iruno'oho Herod-hu muebejaje sa'are jioromo rovaje höjo. Ioro'ioeremu tugohojëni ëhuni Herod ga'i gemuore ruenugadeje. Rueromo Herod-are osa muebejaje aho Blastus jabesi jöho ajëmiromu Herod sanuamijëro dinamiromu jöe nug'ö'öromu Herod uavareje: Noni vavaenimoromo ajamuijego ja'o no'o huë baerovoromo raromo'irarëjo.

²¹ Ëhi'amu Herod-ro majaho bojëmadeje ë majare rueruomoröhego. Ëmajaho rovamu gagorovo Herod-ro hesi niögu ma-maho io'amadeje. Io'amoromo hu bövi namiromu hijaje röho mare hiromo ae aho'obëhe jöe majëhijadeje. ²² Jöe majëhijamu hejë'i rue ariböviohuro uvoruomadeje: Asë'e jö bö'röme höjo. Bogo ma-aehu jöho majahui'i a iosiramuiromu dö mare jië'e aru'ahohuro jöho majahuijajëjo. ²³ Ëhi uvoruomamu gavë'i Badare anerahuro Herod anamu huiniëro hesi uhoho ijahamu guomadeje. Anade hesi bëhoho hu God-are iho bogo nigemadohuni ëhuni anamu guomadeje.

²⁴ Röhu God-are jöho ejahoruomamu aro rumorovobe va'adeje.

²⁵ Ëhi'amu Barnabas'o Saul'o Jerusalem va'oromo monioho ekaesia jabesi a duvahoho i'imëmijë'ëro John hesi iho göho Mark hu'irae baeromo Antioch amore vuonorö'ö va'areje.

13

Barnabas'o Saul'o va'oromo God-are jö majëhibe jirehoröhego Antioch ekaesia ariböviehu baejëvoromo rëmö'öjare jöhoje.

¹Iae Antioch amore ekaesia a ioro'ioroho jö God-aro baeromo majëhijarue ariböviohu'o Iesuae öri röjëhijarue ariböviohu'o jëvadeje. Ëaribövi jabesi ihoho Barnabas o Simeon iho göho Niger o Cyrene amo raje Lucius o sa'a a bö'röme Herod'o gemu mae bövi raejade aho Manaen o Saul ëhi jio'amadeje. ² Ëhi jio'amamu ekaesiaho jaburo ioho bogo ijë'e God ma-rajahiemu rajahijamu gagorovo hesi Aru'ahohuro uëvadeje: Jemëro Barnabas'o Saul'o

baejëvoromo nani rëmhëjô jabuhu ë'ojôro baejëvode muoho vaenövorôhe höjô. ³Ëhi uëvamugo ekaresiaho jaburo ioho bogo ijë'e God-are ôrîre jôe atonugoromo Barnabas'o Saul'o jabesi simanore ôve bamëhoromo rëmô'ôjamu va'areje.

Barnabas'o Saul'o Cyprus sa'are va'oromo Keriso-are jô majëhijare jôhoje.

⁴ God-are Aru'ahohuro Barnabas'o Saul'o ëhi rëmô'ôjadeje God-are muohuremu vaerôhego. Rëmô'ôjamu abuejaroho abo Seleucia amore hörôjareje. Hörôromo boat-re ajiomoromo jovo dôre va'aroho Cyprus ruë numë sô jovemu jië'e sa'are ë va'o ravo'amareje. ⁵Cyprus sa'are ravo'amoromo Salamis amore hörôromo Jew rajehu God rajahijarue osare osare God-are jôho majëhibe jirehareje. Rôhu John Mark hu'irae baeromo hu'o jirehareje huro ajëmego jaburo muoho vaebe jirehorôhëro.

⁶Jirehoromo Salamis amoho nugo va'oromo Cyprus sa'aho jirehobe numëhi va'o viture juvô'ôromo Paphos amore hörôjareje. Hörôromo sareri sareri'e iro oso'e ae gemu birohareje. Hesi ihoho Bar-Iesu jiadeje. Hu Jew rajëro jië'ëro aribövioho sarerëmiromo uënövadeje: Na jô God-aro baeromo majëhijare ae javajëjo. ⁷Bar-Iesu ë sa'are a börômo hesi ae jiadeje. Èsa'are a börômo hesi ihoho Sergius Paulus jiadeje. Hu uehoro ma'e ae jiadeje. Uehoro ma'e aëro jië'ëro jôe nugô'ôromo Barnabas'o Saul'o uëvadeje: Rueromo God-are jôho majehirego na he'irôjo. ⁸Na he'irôjamu rueromo God-are jôho majahijamu hejë'i ë iro oso'e aho Bar-Iesu rôhu iho göho Greece jôehu uvaruoho Elymas-ro jabesi jôho aho'ahovadeje. Elymas-ro Barnabas'o Saul'o jabesi jôho aho'ahovoromo ë sa'are a börômohe nijio'irae gavadeje Iesuare jôho ejahojëni. ⁹Nijio'irae gavamu Saul hesi iho göho Paul-are dë vövöbajô'e aho'o God-are Aru'ahohuro rarovamu gagorovo Paul-ro Elymas gemu ërimahoromo ¹⁰uavadeje: Ja Satan-are ae javajëjo. Sareri sareri'e muohemu vaejanue mu maho bövi bise'o maho ijumanue ae javajëjo. Badare jô ma huotuhuotovo jövanuoho divare vuonugonëjo. ¹¹Ëhuni Badahu i'lu mana bojami'ië'ajoho gavëjo. Jasi nunoho sisërëjavô'ië'ajëjo. Sisërëjavô'iramu majaehu ajivajoho majae ëgo'o bogo uherihoromo ga'a'anuëjo.

Ëhi uavamu gavë'i hesi nunoho sisërëjamu ramoramoro hijadeje. Ramoramoro hîromô övëro morijovobe juvadeje aëro övëro ma'eno bava'ojôro. ¹²Ëhi'amu ë sa'are a börômhuro gavade Paul-ro jôe jövo'ego ë a hesi nunoho sisërëjamu gagorovo tiôromo uvadeje: Badare jô Paul-hu majahujajoho iae jô börôme hö uvoromo Iesuare ôrîre mae uehorovadeje.

Barnabas'o Paul'o Pisidia sa'are Antioch amore va'oromo God-are jô majëhijare jôhoje.

¹³Ëhi'amu Paul'o hesi ariböviohu'o ëho jaburo Paphos amore boat-re iojomoromo jovo dôre va'oromo Pamphylia sa'are Perga amore ë ravo'amareje. Ravo'amonugoromo John Mark-ro jabumë rëmoromo Jerusalem vuonorô'ô va'adeje. ¹⁴John va'irôgoro Barnabas'o Paul'o jaburo niô'iro Perga amore jioromo va'oromo Pisidia sa'are Antioch amore ro arijareje. Ariromo Jew rajo jabesi nuho majaho rovamu God rajahijarue osare va'o arijareje. ¹⁵Arijamu aëro Moses-hu bojëmade jôgoru surire jôho adaho jô God-aro baeromo majëhinövare ariböviehu jajivare surire jôho adahamu evare God rajahijarue osa muebejarue ariböviohuro Barnabas'o Paul'o jôe nugô'ôromo uëvareje: Jew rajo aganomë jemë jôgore jëvë'ôho majahuijego no heromo biririvoromo God mae uehorovo'irarëjo.

¹⁶Ëhi uëvamu hegorovo Paul-ro ri'ôromo jaburo hejôro övëro tugohëvoromo uëvadeje: Israel rajomë God mae uehorovarue a ioro'iorohumë na jô harihe majëhi'ië'ajëjo. Hehëjo. ¹⁷God Israel rajo aribövi muebejavuajohuro nosi hijo miono'oho hesi baejëvade höjô. Baejëvë'e jiamu jabumëro Egypt sa'are abueromo ma-jahuri raromamu God-ro ajëmijamu ae aho'obëhe jëvobe va'ade höjô. Aho'obëhe jëvobe va'amu God-ro hesi darugëro ajëmîromo Egypt sa'are jëvamu sôjëvo ujuoho rovide höjô. ¹⁸Sôjëvo ujuoho rovamu vadune aho'obëhe 40 a rumo'e sa'are mu sisë vaebe juvo'ego ma-nunëremu gë taemoromo ajëmînovade höjô. ¹⁹Ëhi'ojuvo jabumëro Canaan sa'are rueruomamu evare ë sa'a uhure ëne aho'obëhe 7 mamirovoromo raromonövare aribövioho God-ro muo barëromo jabesi sa'aho nosi Jew rajo hijo miono'oho mëmijade höjô jabesi sionoho baerôhego. ²⁰Rôhu

God-ro Israel rajo baejėvadoho aevoromo Egypt sa'are abo raromojuvo a rumo'e sa'are raromobe jijihujuvo ro Canaan sa'are raromaroho vadune aho'o 450 ėhi barėjade hōjo. Vadune 450 barėjamu gagoro God-ro a mevėvarue a masijoho bojėmibe rovade hōjo nosi hijo miono'oho muebejėvonōvorōhego. A mevėvarue a masijoho bojėmibe ruejuvo evare Samuel jō God-aro baeromo majėhijaje ahuro hijo miono'oho muebejėvade hōjo. ²¹ Samuel-ro muebejėvamū evare Israel rajo aribōviohuro ri'ōromo God ua gavare hōjo huro bōrōme namiromō muebejėvo'irōhe aho bojėmijōro. Ua gavamu God-ro jabesi ōrire Kish-are harihe Saul bojėmijade hōjo bōrōme namiromō muebejėvorōhego. Saul hu Benjamin rajo ae jiade hōjo. Saul bojėmijamu muebejėvojuvo vadune 40 barėjade hōjo. ²² Vadune 40 barėjamu God-ro Saul rori'o babu'ō'i David Saul-are sionore nugade hōjo bōrōme namiromō muebejėvorōhego. David nugoromo uėvade hōjo: Jesse-are harihe David iae na garomo nego avohajėjo. Huro naehu nimaje bōvioho bise'oho vae'a'ajėjo. David-are jōho ėhi uėvade hōjo. ²³ Ĕhi uėromō va'ujuvo majae ijonō David-are ujoho gemu Iesu God-hu Israel rajo uėvadėhi ėhi bojāmuade hōjo no Israel aribōvioho manō bamavuorōhego. ²⁴ Iesu rue'ia'amu John-ro Israel rajae ae aho'obėhe majahuiromō uōvuade hōjo: Uehoro sisėho vuonugo'i uehoro mae baeromo bapataeto vaerėjo. ²⁵ Ĕhi ji'e jōho majahuijuvo muoho barė'ia'amu uōvuade hōjo: Jemėro uvarujėjo: Na rahuo jevajėjo. Na bogo ro ajėmi'irode a muebejarujoho jevajėjo. Rōhu gahėjo. Ĕahuro nasi ijonō rue'ie'ajėjo. Na hesi mu bise'o vaejahoromo hōru sino jiovaho'ibejodoho o mu bise'o bise'e rabe vaejaho'ibejodoho rōhu hu bōrōme jio'i na ma-bise'e jevajėjo.

²⁶ Rōhu ağanomė Abraham-are ujo ōmō'ōmohumė o sa'a gō rajae God mae uehorovarujohumė God-hu ajamuiromō manō bamavuaje jōho ė jōho nosi jōėni rovė'e hōjo. ²⁷ Ĕhesi bėhoho Jerusalem raromarue aribōviohu'o jabesi a masijohu'o ėho jaburo Iesuare bėhoho bogo avoho garomo bogo uvare hōjo: Iesu iae ajamuiromō manō bamavuaje aho hōjo. Bogo avoho garomo rōhu Jew rajo nosi nuho majaho rue'ego henōvare jō God-aro baeromo majėhinōvare a jabesi surire jōho adahoromo uvo'ego: U'emu a bōrōmėro rueromō ajamui'ajė'ego dadivėvo'ego uvonōvare hōjo: Ĕa bōrōmoho bogo Iesuhu jio'i ae gō jio'a'ajėjo Iesuare bėhoho bogo avoho gavė'ėro. Bogo gavė'ėro aehu Iesuare ōrire vaeruomorōhego ė surire jajivarėhi Jerusalem raromarue aribōviohuro ėhi ė'oromo Iesu court vaeromō uaruomade hōjo: Sisė ae javė'ėro guomō'a'anuėjo. ²⁸ Guomō'a'anuė uanugoromō nahoromō gavare guomorōhe bėhoho bogojiamu gavė'i Pilate ėma uaruomade hōjo: Uėvego ano'irarėjo. ²⁹ Amo Iesuare ōrire bōvi bise'o sisė'i vaerōhego God-are surire jō jajivarėhi Jerusalem raromarue aribōviohuro ėhi vae barėnugoromō Iesu ijore jiamu baruvebiromō hure bamare hōjo. ³⁰ Hure bamamu God-ro ajamijamu ri'ōjade hōjo. ³¹ Ri'ōjamu Galilee sa'are jioromō Jerusalem Iesu'o gemu mae urimo rovare a jabesi nunire rue'i hijadoho majae aho'obėhe barėjade hōjo. Rue'i hijamu hu gavare aribōviohuro jaruvoho Israel rajo jabesi ōrire hesi jōho ma-mae majėhijarue hōjo. ³² Iae noro jō maho majėhiromō uėvaruėjo: God-hu nosi hijo miono'o uėvadėhi ³³ no jabesi ujėro javu'ė'ero ėhi ajamuijade hōjo. Ajamuiromō nosi jōėni Iesu ajamijamu guomoromō ri'ōjade hōjo. Ĕhesi bėhoho God-hu Iesu ajamego ri'ō'irōhe jōho God-are surire Psalm 2-re jajivoromō uvė'e hōjo:

Ja nasi Harihoho javajėjo.

Jaruvoho naro ja baejavė'e jevajėjo.

³⁴ O God-are surire jō gōho huhu ajamego Iesu ri'ōjego ijonō bogo guomoromō sino sagohori'irōhe jōho jajivoromō ėhi uvė'e hōjo: God naehu David uavodėhi iae ėhi ma-maemu ajėmi'ejōjo jemė mae jėvo'irōhego. ³⁵ O God-are surire jō gōho jajivoromō uvė'e hōjo: Jasi aėro jevė'ėro God jero ajemi'iramu nasi sinoho bogo sagohorijevo'ajėjo. ³⁶ Iae David-hu hijade majare God-hu nimade muoho vaebe juvojuvo guomade hōjo. Guomamu hesi hijo miono'o guavarire sionore guavamū hesi sinoho sagohorijade hōjo. Ĕhūni hesi sino bogo sagohori'irōhe jōho David-ro bogo jajivo'i ³⁷ a'i Iesuare jōho jajivade hōjo. Ĕhesi bėhoho God-ro ajamamu guomoromō ri'ōjė'ėro ėhu'ėro hesi sinoho bogo sagohorijade hōjo. ³⁸⁻³⁹ Ağanomė ėhu'e jiaje ave jō hesi bėhoho ga avohohėjo. Iesuare jōėni God-hu mu

sisē uehorovoromo vuonugo'irōhe ōroho jemesi ōrire majēhij'e hōjo. O ae rahu Iesu mae uehorov'oho mu sisē vaejarije hesi i'uocho iae barējaje hōjo. Moses-hu bojamuade jōgoru ejahē'oho bogo ēhuro mu sisē hesi i'uocho barē'i a'i Iesu mae uehorov'oho iae barējaje hōjo. ⁴⁰ Ēhuni avoho mueberovohējo ēhuro jō God-aro baeromo majahuinōvare a jabesi surire jajivare i'uocho bogo bae'irarije hōjo. ⁴¹ Ēhesi bēhoho God-are jōho jabesi surire jajivoromo uvē'e hōjo:

God-ro uēvajējo: Nasi jō ahoromo sivaruje aribōviohumē nasi muoho garomo tiōromo vuovorējo.

Ēhesi bēhoho jemē bogo vuovo'i raromaruje majare evare naro vōrō'e mu bōrōmoho vae'iē'ajējo.

I'u'e mu bōrōmēro jiē'ero aēro jemē sama'e rōjēhi'ibejarējo rōhu bogo avoho heromo mae uehorovo'ibejarijējo.

Ēhi uvē'e hōjo. Ēhuni avoho uehorovohējo.

⁴² Paul-ro ēhi uēnugoromo hu'o Barnabas'o hōrōjamu gēvē'i rue aribōviohuro uēvareje: Ruēre hura gō hesi nuho majaho rovego vuonorō'ō rueromo ēhi jiē'e jōho majahuirego no he'irarējo. ⁴³ Ēhi uēruomoromo suorovoromo Jew raje ae aho'obēhe o sa'a ioro'ioro rajehu jabesi mu vuonugo'i Jew rajo mu baeromo God mae uehorovarue aribōvioho aho'obēhe jaburo Paul'o Barnabas'o jabesi ijore va'areje. Ijore va'amū gēgorovo jaburo niō'iro jabesi ōrire jōgore mēmiromō uēvareje: Birivoromo uvorējo: Hesi God-ro huē baeromo ajamui'ajēromo muoho vaenōvorējo.

⁴⁴ Ēhi ē'l'ēro hura gō hesi nuho majaho rovamu amo raje ae aho'obēhe Badare jōho he'i ē osare gemu gagovoruomadeje. Ae gemu gemu bogo rovarēje. ⁴⁵ Amo raje ae aho'obēhe gagovamu gēgorovo Jew rajoho jaburo Paul'o Barnabas'o jabesi mu mahuni dē vōrōnēgo avohamu Paul-are jōho aho'ahovoromo jō sisē atareje.

⁴⁶ Jō sisē atamu hegorovo Paul'o Barnabas'o bogo juhuonivo'i ma-birivoromo jōho majēhiromō uēvareje: God-ro nimade hōjo Jew rajo jemēro hesi jōho urimo hejōro. Ēhi hōjo rōhu jemē ē jōho heromo bijōnimarujējo. Bijōnimoromo ēhuro jemēhu ioro'ioeremu maro raromo'irarije ōroho tugohē'e jēvajējo. Ēhuni no huotorovoromo sa'a ioro'ioro rajoho jōho majēhinōvo'ejarējo. ⁴⁷ Ēhesi bēhoho rabēni Badaro jōe bojamuiromō uōvuē'e hōjo:

Naro ja bamavode hōjo jero sa'a ioro'ioro rajoho ajivēvo'iranego.

Ajivēvego ae aho'obēhe majae beva'ajire majae hō'ōjajire maro raromo'irōhego.

⁴⁸ Ēhi uēvamu hegorovo sa'a ioro'ioro rajohuro nimorohoromo uvoruomadeje: Badare jōho iae mae hōjo. Ēhi uvoromo ioro'ioeremu raromo'irōhego God-hu uvade aribōviohuro Iesu mae uehorovoruomadeje.

⁴⁹ Mae uehorovamu Badare jōho ē sa'ae bōvioho uarovobe va'adeje. ⁵⁰ Uarovobe va'irōgorō a'i rue Jew rajoho jaburo God uehorovarue magonaho masijohu'o amore a masijohu'o ē aribōvi jabesi dēho iēhamu ri'ōromo Paul'o Barnabas'o sisē vaejēvoruomadeje. Sisē vaejēvoromo Antioch sa'anō jēvamu rēmō'ōjēvoruomadeje. ⁵¹ Rēmō'ōjēvamu gagorovo va'irōgorō hōru tohotoho'e jēvamu riremoromo va'areje amo rajohuro sisē vaejaruoho gajōro. Va'oromo Iconium amore hōrōjareje. ⁵² Amo Antioch raromarue Keriso-are aribōvi jabesi dē vōvōbajo'oho aho'o sasohēvoromo God-are Aru'ahohuro rarovēhadeje.

14

Paul'o Barnabas'o Iconium amore ariromo God-are jō majēhijare jōhoje.

¹ Paul'o Barnabas'o Iconium amore hōrōnugoromo urimo Antioch ē'arēhi ēhi Jew rajehu God rajahijarue osare va'oromo Iesuare jōho majēhijareje. Jōho majēhijamu ēhuro Jew raje ae aho'obēhe sa'a ioro'ioro raje ae aho'obēhe Iesu mae uehorovoruomadeje. ² Mae uehorovamu gēgorovo Jew raje jō bogo ma uehorovarue aribōviohuro sa'a ioro'ioro rajo jabesi ōrire uehoro sisēho bojēmiromō jabesi dē iēhamu jaburo Keriso-are aribōvioho nue huodēgoruomadeje. ³ Nue huodēgamu Paul'o Barnabas'o majae ēgobōvie ariromo bogo

juhuonivoli ma-biririvoromo Badare jöho majëhijareje. Majëhiromi Badaro ajëmamu ëhuro bogo gavarue darugo'e mue gö gö vae'amareje ae aho'obëhe garomo uvoröhego: lae mae-ëjo. God-hu huë baeromo ajamuijaje jöho mae hö uvoröhego. ⁴ Ëhi'amu amo rajo ariböviohuro jöe gö gö uehorovareje. A ioro'iorohuro Jew rajo jabesi dönö jio'i a ioro'iorohuro Paul'o Barnabas'o jabesi dönö jëvadeje. ⁵ Ëhi'oromo Jew rajohu'o sa'a ioro'iorohu'o ëho jaburo jabesi masijohu'o gemu mae ri'öromo Paul'o Barnabas'o ijumëvoromo munëro vajëmi'i atareje. ⁶ Munëro vajëmi'i atamu Paul'o Barnabas'o ë jöho heromo ju'lebiromo va'areje. Va'oromo Lycaonia sa'are Lystra amo Derbe amo jiajinö ë va'areje. ⁷ Va'oromo ë sa'are aribövioho Iesuare jö maho majëhibe jirehareje.

Paul'o Barnabas'o Lystra amore ariromo God-are jö majëhiromi huë vavaeni bihoromomi ju'lebiromo Derbe amore va'are jöhoje.

⁸ Jirehoromi Lystra amore ro arijareje. Röhu hörü sisë'e ae gemuëro ë hijë'e jiadeje. Urimë'i vëmehu rahadire aevoromi hörü sisë'e jioje rovë'ëro ëhu'ëro bogo mae bogo juvadeje. ⁹ Bogo juvë'ëro hejadeje Paul ae jöe majëhijamu. Paul-ro jöho majëhiromi gavade ë aho hu'o jöho hejumu gagorovo ma-hu gemu ërimahoromo gavade hu mae uehorovo'ego marë'iröhoho eni jiamu gagorovo ¹⁰ ma-darugo'o uavadeje: Döro ri'öromo avoho namijëjo. Namijëjumu hejë'i ma-burëro döro ri'öromo aevoromi juvadeje.

¹¹ Juvamu ae aho'obëhe gavare Paul-ro ë hörü sisë'e aho ëhi ajamumu gagorovo simane sisë'i uehorovoromi uvoruomadeje: Paul-hu ë hörü sisë'e aho ajamumu aevoromi juvade hesi bëhoho Paul'o Barnabas'o bogo ma-aehu jëvo'i a'i aru'aho bërömo niö'iro araeromi rueromi jabesi darugoho bërömëro jëvë'ëro ëhu'ëro Paul-ro ë iaho ajamade höjo. Simane ëhi sisë'i uehorovoromi ri'öromo jabesi Lycaonia jöëro ma-darugo'o uvoruomadeje: O aveho bogo ma-aehu rue'i a'i muebejavuarue aru'aho bërömo niö'iro araeromi nosi örire ruvebijë'e höjo. ¹² Aru'aho bërömo niö'i ruvebijë'e höromi Barnabas jabesi sareri'e god hesi ihe Zeus jumuvoromi Paul-are jöho sarerivoromi uvoruomadeje: Nani ë aho nosi god Hermes jö bajuvaje aru'ahoho höromi Paul Hermes jumuvoruomadeje Paul jögoru jövaje aego. ¹³ Zeus aru'aho bëröme höromi rajahijarue osaho ma bëhiro jië'ëro Zeus rajahijarue mu muebejaje ahu'o uvadeje: Nani iae mae-ëjo. Nosi aru'aho bëröme Zeus-më amore rovë'e höromi cow ano'oho ujuohoromi ijino inovaroho ujuohoromi amo bërömore rejo ojo bëhire rovadeje. Rueromi hu'o a ioro'iorohu'o ëho jaburo Paul'o Barnabas'o aru'aho bëröme jëvajëromi uvene aho röjëhiromi ë mioho muo'amoromi vëniro mueromi i'imëmi'irögöro ë'oruomadeje.

¹⁴ Ëhi ë'iröhe jöho henugoromi Barnabas'o Paul'o ë apostle-ho niö'iro uvareje: Ëhi jië'oho mu sisë bëhe höromi jabesi niögöho dadovo'amareje ae göëro garomo uvoröhego: Jaburo nosi muoho bijönimoromi ë'aruëjo. Niögöho dadovoromi ma-ba viëhi jiaroho rue ae aho'obëhe jabesi ririre rirarovoromi ma-darugo'o uvareje: ¹⁵ Asë'e jemë rabëni ëhioho ë'aruëjo. No bogo aru'aho bërömo javuo'i no ma-ae jemë va'ëne javuajëjo. No jö maho majëhi'i rovare höjo ëhuro ëhi jië'e darugo rumo'e inömo ëma rajëhijarujoho vuonugo'i darugo jië'e aho God uehorovo'irarijego. God-ro ö'idöe sa'ae jove bövie bise'e no bamavuade höjo. ¹⁶ Urimë'i sa'a göre göre raromarue aribövioho jemesi nimaruje nimaruje muoho vae'ego huro ma gë taemonövade höjo. ¹⁷ Iae ëhi jiade höjo röhu God-ro hesi muoho aho'o bogo gurih'i a'i jemë mae avohëvoromi hesi muoho röjëhibe rovade höjo jemëro garomi uvo'irarijego: Iae mae-ëjo. Hu ëhi jië'e a bëröme hö uvo'irarijego. Huro ëne nugö'öromi i majaho rovego uvaje höjo: Iëro tagavëjo. Ioho tagavego uëvaje höjo: Jemëro i avohego da'uëgo'irajo. Nimoronimorohego dë vövöbajo'e sasohëvo'irajo. Huro hesi muoho ëhi röjëhibe rovë'e höjo. ¹⁸ Biririvoromi ëhi jië'e jöho majëhiromi dë vövöbajo'e huotövëho'i ë'o gavaroho mi suvoro vëniro bueromi bamëho'i ë'aroho bogo vuonugo varijënoho jië'e ëma vuonugareje.

¹⁹ Vuonugamu iae Jew rajo a ioro'iorohuro Antioch amore Iconium amore jioromi rueruomadeje. Rueromi Lystra amo rajoho jabesinö jioruomajöro mu sisë jöho biririvoromi majëhijareje. Majëhijumu Lystra amo rajoho jaburo ejëhoromi ajëmiromi Paul

munëro vajamiruomadeje. Vajamiromo uvoruomadeje: Paul guomë'e höromo amoro jiamu rori'o ruho baeromo va'oruomadeje. ²⁰ Bava'amu Keriso-are ariböviohuro ro Paul-are bëhire gagovoromo riravo rova'areje. Riravo rova'amu Paul-ro ri'öromo rue amo böromore vuonorö'ö va'adeje. Va'oromo nëröho Barnabas-mu niö'iro ri'öromo va'aroho va'o Derbe amore höröjareje.

Paul'o Barnabas'o Syria sa'are Antioch amore vuonorö'ö va'are jöhoje.

²¹ Derbe höröromo Iesuare jö maho majëhijamu ae aho'obëhe aevoromo Iesuare ijore ijore jijiharue aribövie jioruomadeje. Èhi'amu gagorovo Paul'o Barnabas'o jaburo vuonorö'öromo Lystra Iconium Antioch amore ekaresiae ajëmibe va'areje. ²² Ajëmiromo jabesi dë vövöbajo'oho biririvëhoromo uënövareje: Biririvoromo Iesuare jöhemu mae uehorovonövorëjo. Èhesi bëhoho God-are aji öri ari'ere va'i nagu'öho no vavaene börome baebe va'ojuvo evare va'ëjarëjo. ²³ Èhi uëbe a duvahe ekaresia jabesi simano vaeröhoho nugo'amobe ie bogo ijë'e ma-pariemu vaeromo uëbe va'areje: Jemë Bada mae uehorovarue a hesi övo döre rëmaruëjo. Ekaresiaho èhi ajëmibe va'areje. ²⁴ Va'oromo Pisidia sa'aho jireho barënuoromo Pamphylia sa'are rovareje. ²⁵ Pamphylia rueromo Perga amore ariromo Iesuare jöho majëhinugoromo va'o Attalia amore abuejareje. ²⁶ Attalia amore abo ariromo boat-re ajiomoromo jovo döre va'aroho va'o sionëro Antioch amore rovareje. Urimoho Antioch ekaresiaho jaburo Paul'o Barnabas'o God-are övo döre rëmareje huro ajëmego mu mae vaebe jireho'iröhego. Jaruvoho è muoho barëj'ëro Paul'o Barnabas'o sionëro rovareje. ²⁷ Rueromo ekaresiaho uëvareje: Gagovohego jöe majëhirëjo. Majëhirëje uënuoromo gagovamu uëvareje: God-ro ajamujamu èhi jjië'e muoho vaeromo rovare höjo. Huro öroho sa'a ioro'ioro rajohuni jiovëhamu jaburo Iesu mae uehorovare höjo. Èhi'ade höjo. ²⁸ Èhi majëhiromo Keriso-are ariböviohu'o gemu mae majae ëgobövie è arijareje.

15

Ekaresia jabesi a masijehu Jerusalem gagovoromo Moses-hu bojëmade jögoru è hesi jö mevare jöhoje.

¹ Paul'o Barnabas'o Antioch amore arijamu iae ae göëro Judea sa'are jjië'ëro rueromo Keriso-are aribövioho majëhiromo uënövareje: God-arire mae va'i nëgë'iroho Moses-hu Jew rajo nosi jögoru jajivadëhi sa'a ioro'ioro rajoho jemë'o sinoho èhi tarivëhego God-are aribövie jëvo'irajo. Sino bogo tarivëhë'öho bogo maroho va'a'arujëjo. ² Bogo maroho va'a'arujëjumu hegorovo Paul'o Barnabas'o jaburo ri'öromo irovoromo darugo'o jö aho'ahëmiromo i'e rovare aribövioho uëvareje: Sa'a ioro'ioro rajoho nadi èhi jjië'e jöho majëhirëjo. Majëhirëjumu Antioch ekaresiaho jaburo Paul Barnabas Antioch amore ekaresia a ioro'ioroho èhi baejëvareje jaburo Jerusalem amore va'oromo apostle ömo'ömo'öhu'o Jerusalem ekaresia a duvaho ioro'iorohu'o sino tarivo'iröhe jöho mevo'iröhego.

³ Baejëvoromo rëmö'öjumu Paul'o Barnabas'o jaburo a ioro'iorohu'o gemu mae ae jöe majëhibe Phoenicia sa'are Samaria sa'are va'areje. Majëhiromo uënövareje: Sa'a ioro'ioro rajoho iae aevoromo God mae uehorovoruomohijajo. Èhi uë'ego Christian aganoho aho'obëhe è jöho heromo böromo bëhe nimorohonövareje. ⁴ Amo èhi jjië'e jöho majëhibe rueromo Jerusalem suorovareje. Suorovamu gëgorovo apostle ariböviohuro ekaresia a duvaho ömo'ömo'huro ekaresia a ioro'iorohuro èho jaburo jejëmiruomadeje. Jejëmijumu rueho jaburo jöho majëhiromo uëvareje: God-ro èhi ajamuamu muoho vaeromo rovare höjo. ⁵ Èhi majëhijumu Pharisee aribövie Iesu mae uehorovarue a ioro'iorohuro ri'öromo uëvareje: Iae èhi höjo röhu sa'a ioro'ioro rajo jabesi sinoho tarivëhoromo jöe majëhiromo uë'ëjarëjo: Moses-hu bojamuade jögoroho ejahonövorëjo. Èhuremu mae höjo.

⁶ Èhi uëvamu hegoro apostle ariböviohu'o Jerusalem ekaresia a duvaho ioro'iorohu'o è jöho mevo'i gagovareje. ⁷ Jöho mevojuvo Peter-ro ri'öromo uëvadeje: Aganomë jemë'o gavarujëjo urimë'i God-ro na jemesi ririre baejevade höjo naro hesi jö maho majëhijego sa'a ioro'ioro rajoho jaburo heromo Iesu mae uehorovoröhego. ⁸ Jaburo mae

uehorovamu God-hu hesi Aru'aho Jew rajo Keriso-are aribövi mamuadëhi sa'a ioro'ioro rajoho jabu'o ëhi mëmade höjo ëhuro noro garomo uvoröhego: God ae aho'o nosi dë vövöbajo'o gövuajohuro hesi Aru'ahoho sa'a ioro'ioro rajoho mëmijë'ëro ëhuni huro jabu'o mae uehorovëvájëjo. ⁹ God-ro Jew rajohu'o sa'a ioro'ioro rajohu'o bogo gö gö uehorovavuo'i ma-gemu uehorovavuade höjo. Èhesi bëhoho sa'a ioro'ioro rajohuro Keriso mae uehorovamu God-ro jabesi sisëho u'ovëho barëjade höjo. ¹⁰ Moses-hu bojamuade jögoroho i'u ma'ëro jië'ëro no'o nosi hijo miono'ohu'o vaeromo mare va'iröhoho bogo eni javuade höjo. Èhi jië'oho jemë rabëni nëgajëjo sa'a ioro'ioro rajohu'o ëhi jië'e i'u'e muoho bojëmi'iro. Jemë rabëni God-are dëho bijioho ga'i nëgajëjo. ¹¹ Bogajo. No mae uehorovoromo uvarue höjo: Bogo noehu mu vaejaruohuro a'i hesi Bada lesuhu huë baeromo ajamuijajohuro iae ëhuro Jew rajoho no maro raromole'ëjarëjo. Sa'a ioro'ioro rajo jabesi öri jiajëhi noehu maro raromole'iröhe öroho gemuoho höjo.

¹² Peter-ro ëhi majëhijamu Barnabas'o Paul'o ri'öromo uëvareje: God-ro ajamuamu noro darugo'e mu gö gö ëhi ëhi vaeromo sa'a ioro'ioro rajoho ajëmibe jirehare höjo. Èjöhö he'iro ae aho'obëhe jörumoraejareje. ¹³ Jörumoraejamu Barnabas'o Paul'o jöho majëhi barëjamu hegorovo James-ro ri'öromo uëvadeje: Aganomë nasi jöhu'o hehëjo. ¹⁴ God-hu sa'a ioro'ioro rajo aevoromo uehorovëvoromo a ioro'ioro hesi baejëvade jöho Simon-ro ë jöho majahuujamu no hejare höjo. ¹⁵ Èjöhö iae mae höjo. Èhesi bëhoho God-hu sa'a ioro'ioro rajo baejëvoröhe jöho urimë'i jö God-aro baeromo majëhinövare ariböviohuro jajivare höjo. Jabesi ae gemuëro David-are ujo gagovëvoröhe jöho uhu'e huotovoromo jajivoromo uvë'e höjo:

¹⁶ Badaro uvavohijajo: Èhesi ijonö naro vuonorö'ö rueromo David-are javu dadoravadoho evare avoho vae'ejöjo.

Sisërëjadoho naro avoho'iramu urimë'i namijadëhi ëhi nami'a'ajëjo.

¹⁷ Nami'iramu sa'a göëro göëro Bada na birohevo'i nahevo'aruëjo.

Nasi jö bogo henövare ariböviehu nasi iho baejarohuro ëhi ë'a'aruëjo.

Badaro ëhi uvajëjo. ¹⁸ Mami gö'e huro ë jöho aevoromo majëhadoho hebe rovë'e javuajëjo. Èhi jajivë'e höjo.

¹⁹ Èhuni na ëhi uehorovajëjo. Sa'a ioro'ioro rajehu huotorovoromo God mae uehorovë'oho no nosi i'u'e muoho jabesi öriroho bogo bojëmi'i ²⁰ a'i ma-suriro jöho nugö'öromo uë'ëjarëjo: Aehu sareri'e god göëni göëni bahijë'e mioho uvorëjo: Sisë höromo nadi ue'ahorëjo. Nadi önö'oho jijihorëjo. Mi hesi köho nadi ue'ahorëjo. Huë ahahë'e mioho kö'e jiaje nadi ue'ahorëjo. Èjöhemu jajivo'ëjarëjo. ²¹ Èhi jië'e jögoru jajivo'iröhe ë hesi bëhoho Moses-hu ëhi jië'e jö bamadoho mami'e ame aho'obëhe majëhibe rovë'e höjo. O hesi jöho Jew rajo nosi nuho majaho rovego noehu God rajahijarue osare osare Moses-are jöho adahego jaburo hejarue höjo. Èhuni ëhi jië'e mu gororovo'iröhe jöho sa'a ioro'ioro rajo jabesi örire nugö'ö'ëjarëjo.

Jerusalem ekaresia a masijehu suri suri jajivoromo sa'a ioro'ioro rajehu Keriso mae uehorovarue aribövi jabesi örire bamëhare jöhöje.

²² James-ro ëhi uëvamu hegoro apostle-ho jabu'o ekaresia a duvaho ömo'ömo'ohu'o ëho jaburo jöe mevoromo uvareje: È'ëgo no nosi a ioro'ioroho baejëvego jaburo Paul'o Barnabas'o gemu mae Antioch amore va'irarëjo. Èhi majëhijamu ekaresiae ae aho'obëhe uvareje: Èhi jië'oho iae mae höjo. Èhi uvoruomoromo Judas hesi iho göho Barsabas'o Silas'o jabumë niö'i baejëvareje ekaresiaho jaburo ë ae niö'i jabesi örire mae uehorovaruëro jië'ëro.

²³ Baejëvoromo suroho jajivoromo bava'ojöro bojëmijareje. Surire jajivare jöho ëhi uvë'e jiadeje: O asë'e Jew rajoho bogo a'i sa'a ioro'ioro rajoho Antioch amore Syria sa'a ioro'iore Cilicia sa'are raromaruje ariböviohumë apostle ariböviohu'o Jerusalem ekaresia a duvaho ömo'ömo'ohu'o jemesi ö mueno'ëro javuë'ëro noro jemesi örire jejëmaruëjo.

²⁴ Röhu no hejare höjo uvavamu: A ioro'iorohuro nosirire jioromo ö'are höjo. Ö'oromo jöe gö majëhiromo jemesi simanoho sisëvojëhamu uehore gö gö baejarije höjo. Röhu

ëho bogo noehu uëvamu ë'are höjo. ²⁵ Èhuni no ae aho'obëhe gemuoro gagovoromo jöe mevoromo uehore gemuoho baeromo uvare höjo: Noro ae gö baejëvo'ejarëjo jemesi örire rëmö'öjëvego jaburo nosi aemo'aeme Barnabas'o Paul'o gemu mae ö'irorëhego. ²⁶ Barnabas'o Paul'o vuovëvoröhe jöho bogo uehorovë'e ma-biririvoromo nosi Bada Iesu Keriso-are muohuremu uehorovë'e arijare höjo. ²⁷ Röhu Judas'o Silas'o jabu'o gemu mae rëmö'öjëvaruëjo jaburo ö'oromo noehu jajivarue jöe gemuoho majëhijego he'irarijego. ²⁸ God-are Aru'ahohu'o no'o jöe gemuoho uehorovoromo uvaruëjo: Jew rajo nosi i'u'e mue gö gö bogo bojëmi'i ave jögorohuremu bojëmi'ejarëjo. ²⁹ Aehu sareri'e god göëni göëni bahijë'e mioho nadi ue'ahorëjo. Mi hesi köho nadi ue'ahorëjo. Huë ahahë'e mioho kö'e jiaje nadi ue'ahorëjo. Nadi öno'oho jijihorëjo. Èhi jië'e mu gororovë'oho ëhuro mae jëvo'ajëjo. Ahia mino'ëjo. Surire jöho ëhi jajivoromo bojëmijareje bava'oröhego.

³⁰ Bojëmiromomo rëmö'öjëjumu Paul Barnabas Judas ëho jaburo va'aroho va'o Antioch amore suorovareje. Suorovonugoromo Christian aribövioho aho'obëhe gagovëvoromo suroho bojëmijareje. ³¹ Suroho bojëmamumu ekaresiae ae aho'obëhe hejare adahoromo uvavamu: Jew rajo nosi i'u'e muoho sa'a ioro'ioro rajoho bogo bojëmi'ejarëjumu hegorovo uvareje: Sasohë'e mu maho rovë'e höromomo nimorohoruomadeje. ³² Èhi'amu Judas'o Silas'o jö God-aro baeromo majëhijarue aëro jëvë'ëro majae ëgobövie jöe majëhiromomo Christian agano jabesi dë vövöbajo'oho biririvëhareje. ³³ Èhi'oromomo majae ëgo'o Antioch arijamumu evare ë Christian aganohuro rëmö'öjëvoromomo uëvareje: Huë mae baeromomo va'orëjumu jaburo Jerusalem jioromomo rëmö'öjëvamu rovare ë aribövi jabesirire sionëro va'areje. ³⁴ [A'i Silas-ro ëhi hi'i uvadeje.]

³⁵ Iae Paul'o Barnabas'o jaburo Antioch majae ëgo'o arijareje. Ariromomo jabu niö'i o a ioro'ioroho aho'obëhe ëho jaburo Badare jöho ekaresiae majëhiromomo bëhoho røjëhinö-vareje.

Paul'o Barnabas'o jö aho'ahamirovoromomo gemuore jireharoho vuonugo'i öre gö öre gö va'are jöhoje.

³⁶ Èhi'ojuvomo iae Paul-ro Barnabas uavadeje: No urimomo Badare jöho majëhibe amomo göre göre dinö'e dinö'e jireharire ë'ëgo no ë vuonorö'ö va'oromomo gëvarëjo Christian aganoho diehi diehi muoho vaeruomego. ³⁷ Èhi uavamumu hegoro Barnabas-ro uavadeje: Iae mae höjo röhu na negajëjo John Mark-ro no'o ö'ojöro. ³⁸ Èhi uavamumu Paul-ro uavadeje: Bogajo. John Mark-hu no'o ö'ë'oho bogo maehu höjo. Èhesi bëhoho urimë'i mue ajamuike juvoromomo Pamphylia sa'are ramuö'ö'i sionëro rovade höjo. Èhi jië'e a bava'ë'oho na bijönegajëjo. ³⁹ Bijönegajë uaromomo Paul'o Barnabas'o irorovoromomo göëro öre gö va'i göëro öre gö va'adeje. Va'iro Barnabas-ro Mark hu'irae baeromomo boat-re ajiomoromomo Cyprus sa'are va'adeje. ⁴⁰ Cyprus va'irögoro Paul-ro Silas uavadeje: Rovego ja'o na'o muoho vaebe jireho'irarëjo. Jireho'irarëjumu Silas-ro uavadeje: Iae ëhi'oejarëjumu Christian agano ömomo'ömhuro Paul'o Silas'o Badare övo döre rëmareje huro ajëmegomo mu mae vaebe jirehoröhego. Rëmamumu Paul-ro Silas hu'iraeromomo va'adeje. ⁴¹ Hu'iraeromomo va'adoho va'o Syria sa'are Cilicia sa'are ekaresia aribövioho jöe majëhiromomo ëhuro jabesi dë vövöbajo'oho biririvëhobe va'adeje.

16

Timothy-hu aevoromomo Paul'o Silas'o gemu mae juvade jöhoje.

¹ Va'oromomo Paul-ro va'adoho va'o Derbe amore ro hiromomo va'adoho Lystra amore rovadeje. Röhu Keriso uehorovaje ae gemuëro ë hijadeje. Hesi ihoho Timothy jiadeje. Hesi vëmohomo Jew raje Iesu mae uehorovaje magonahe jiadeje. A'i hesi vavuohomo Greece raje jiadeje. ² Christian agane Lystra amore Iconium amore raromaruohuro uvoruomadeje: Timothy hu mu mae vaejaje ae höjo. ³ Paul-ro nimadeje Timothy hu'irae va'ëgo hu'o juvoröhego. Hu ëhi nimoromomo röhu uvadeje: Jew raje ave sa'are röhu dirö'e göre göre raromaruohuro garomomo uvaruëjo: Timothy-are vavuohomo bogo Jew rajoho jië'ëro sinohomo bogo tariojahë'e höjo. Èhi uvoromomo Timothy-are sinohomo bogo tariojahego Jew rajëro

hesi jöho bogo ejahojöeni Paul-ro uëvadeje Jew rajehu ë'aruëhi Timothy-are sinoho tariojahojöro. Ëhi ë'l'ëro hu'irae baeromo va'adeje. ⁴ Va'oromo Paul'o Silas'o amore amore jöe majëhibe va'areje. Majëhiromomo Keriso-are aribövioho uënövareje: Apostleho jabu'o Jerusalem ekaresia a duvaho ömo'ömo'u'o ëhi jië'e jögoroho uehorovë'ëro bojëmijare höjo jemëro ejëhonövo'irarijago. Ëjöhö ejëhonövorëjo. ⁵ Ëhi jië'e jöho majëhibe va'ego ekaresia ariböviohuro biririvoromo Keriso mae uehorovobe va'areje. O majae ëhi ekaresiae aho'obëhe marohëvobe va'adeje.

Paul-hu Troas amore va'oromo nia'ovo'iraeromo gavade jöhoje.

⁶ Paul'o Silas'o jöho majëhibe va'amu gavë'i God-are Aru'ahohuro jabumë tugohëvadeje Asia sa'aroho jöho bogo majëhiröhego. Tugohëvë'ëgo Phrygia sa'a'o Galatia sa'a'o birohade ënire ë jireho va'areje. ⁷ Va'aroho va'o Mysia sa'a viture va'aroho Bithynia sa'are va'ia'amu Iesuare Aru'ahohuro uëvadeje: Nadi ë sa'aho va'ohëjo. ⁸ Ëhi uëvamu Bithynia sa'aroho bogo va'i Mysia sa'aremu rova'oromo abuejaroho abo Troas amore höröjareje. ⁹ Troas hörönugoromo vahiromamu Paul-ro nia'ovo'iraeromo gavadeje Macedonia raje ae gemuëro namiromo dinamiromo uavamu: Macedonia sa'aro rueromo ajamuinëjo. ¹⁰ Nia'ovo'iraeromo ëhi ganugoromo Paul-ro Silas-ro naro evare uvareje: God-ro uöromo ë'ajëjo: Macedonia sa'a rajoho Iesuare jö maho majëhihë uövuajë uvoromo ma-burëro va'iro bövioho bise'oho avohareje.

Paul'o hesi ariböviohu'o Philippi amore ro jö atamu hegorovo Lydia-hu mae uehorovade jöhoje.

¹¹ Ëhi'onugoromo Troas jioromo boat-re iojiomoromo ma-ahorirëro jovo döre va'aroho va'o Samothrace sa'are suorovë'ëro nëröho jovo döre va'aroho Neapolis amore suorovareje. ¹² Neapolis suorovonugoromo örëro va'aroho Philippi amore suorovareje. Ëamoho Macedonia sa'are jiadeje. Macedonia sa'a börömo röhu ë sa'aho taritarivë'e ihe gö gö jiadeje. Röhu sa'a dirö'e gemu börömo jiadeje. Ëdirö'ore sa'are Philippi amoho jiadeje. Rome amo rajohuro rueruomoro ë amoho aeo'i ioromo raromobe rovë'e jiareje. Amo noro ro Philippi amore suorovoromo majae gemu niö'i ë raromareje.

¹³ Raromoro iae Jew rajo nuho majaho rovamu noro uvareje: Nani Jew rajo ariböviohuro God-are örire jöe ato'i nume jovo riröre abo raromarue hörömo amore jioromo ë abuejareje. Abueromo ë raromoro gagovoromo raromarue magonaho ömo'ömo Iesuare jöho majëhiareje. ¹⁴ Jöe majëhiareje magonahe gemu hesi ihoho Lydia-ro ë hiromo hejadeje. Lydia hu Thyatira amo rajo magonahe jiadeje. Hu kavuë'e niögu maho imo'amaje magonahe jiadeje. Hu bogo Jew rajo magonahehu jiadeje röhu Jew rajo ariböviohu'o gemuore God rajahinövadeje. Röhu Badaro Lydia-are dë vövöbajo'oho jiovahë'ëro huro hejade Paul-ro Iesuare jöho majëhiareje hegorovo jöho ejahadeje. ¹⁵ Ejahoromo hu'o hesi osare raromarue ariböviohu'o bapataeto vaejareje. Vaenugoromo ë magonahohuro uövuadeje: Jemë uvarujoho: Iae mae-ëjo. Nöröro Bada mae uehorovajë uvarujoho jemëro rueromo nasi osaro raromohëjo. Ëhi uöromo dinamuijumu ejahareje.

Philippi amo rajo jabesi a masijehu Paul'o Silas'o savoji gagore ba'amëvare jöhoje.

¹⁶ Ëhi ë'l'ëro iae noro God-are örire jö ataruire va'i va'amu gavë'i magonaho aboride gemuëro örire birohavuadeje. Ëmagonahoho hesi ma-a masijo jabesi muemu vaejehaje magonahe jiadeje. Röhu Satan-are aru'aho sisë gemuëro hesi dë vövöbajo'ere abuejumu simanoho sisërejë'ëro ëhu'ëro rabe rabe ijönö jioröhe jöho iae hu ae huruoho majëhinövadeje. Majëhiromomo monie mana baenugoromo hesi a masijo ömo'ömo i'imëmi'ëgo rueho jaburo moni börömo mae baenövareje. ¹⁷ Amo ë magonahohuro simanoho sisërejë'ëro Paul'o no'o rihirimavuoromo darugo'o uvobe rovadeje: Ëaribövioho jabumë God dö mare hijaje hesi mu aribövie jëvajëjo. Jemëhu sisëroho bogo va'i maro va'irarije öroho röjëhijarie höjo. ¹⁸ Ëjöe gemuoho majae aho'o rihirimavuoromo uvobe ruenövadeje. Ëhi'ojuvo Paul-ro he'i hiromo vörönimamu hegorovo huotorovoromo magonaho hesi dëre aru'aho sisëho uavadeje: Iesu Keriso-are ihoro naro ja uavajëjo: Aruëre magonaho hesi dë vövöbajo'eroho hörö va'ëjo. Va'ëjumu gavë'i evare höröromo

va'adeje. ¹⁹ Höröromo va'amū ē magonaho hesi a masijohuro garomo uvareje: Aru'ahoho magonaho hesi dēre rarov'ōjahē'ēro jīē'ēro ē magonahoho rabe rabe ijōnō jiorōhe jōho bogo majēhiromo ēhuro monie gō'o bogo baeromo bojamui'iramu bae'ejārēromo Paul'o Silas'o guduamēvoromo amo ririre jagu baejēvo rovareje amore a masijo jabesi nunire rēmōrōhēro. ²⁰ Jagu baejēvo rueromo Rome rajehu court mevarue a jabesi nunire rēmonugoromo Paul'o Silas'o jabesi jō sisēho majēhiromo uēvareje: Ave aho Jew raje aēro jēvē'ēro nosi amore mu sisē barueromo ijumavuaruējo. ²¹ Ēhesi bēhoho Rome nosi jōgoroho ahoromo jabesi muoho rōjahuijaruējo. No Rome rajēro javuē'ēro jabuhu rōjahuijarue mu ejēhoromo vaejē'oho bogo maehu hōjo. ²² Bogo maehu hōjamu hegoro rue amo raje ae aho'obēhe gemuore gagovoromo ajēmiromo anēgo'ie'areje. Anēgo'ia'amugo amore a masijohuro Paul'o Silas'o jabesi niōgoho ma'eno dadovēhoromo jijōvēhoromo police uēvareje: Hisuebijēvohējo. ²³ Hisuebijēvohējamu hisuebijēvo'i arijuvo hisuebijēvonugoromo baejēvo va'o savoji gagore ba'amēvoromo savoji muebejaje aho uavareje: Ave ae niō'ioho avoho muebejēvonējo. Ju'ebi'aruējo. ²⁴ Ēhi uavamu hegoro vaejēvo va'oromo savoji osa ririro avoho ba'amo rēmōromō hōroho ijo dir'ōre bahijēhoromo evare i'u'e ijo ha'osi gōho baro havoromo muoho taemēvamu ēhi ariemu arijareje.

²⁵ Ariromo vahi riri'e jiamu Paul'o Silas'o God-are ōrire jōe majahiromo hu rajahiromo jōe iareje. Rajahiromo jōe iavavamu savojire a ioro'iorohuro heruomadeje. ²⁶ Ēhi'amū gavē'i sa'aho ma-majioho hijiohijiohamu savoji gagoho aho'obēhe ē javu vaejare munē sa'a uhure jio'amajohu'o sisē maro hijiohijiohvadeje. Hijiohijiohamu gavē'i evare oje aho'obēhe jiororovoromo ae aho'obēhe tōvēvare ō'oho jiororovo'amadeje. ²⁷ Jiororovo'amamu iae savoji muebejaje ahuro niavē'ēro ri'ōromo gavade ojoho aho'o jiororovo'amē'e jiamu gagorovo uvadeje: Huruomē'e hōromo kaejō ēgoho jijōromo hesi arijo'arije anorovo'ie'adeje. ²⁸ Hesi anorovo'ia'amū gavē'i Paul-ro ma-darugo'o uvadeje: Ēhi jīē'oho vuonugējo. No ae aho'obēhe aviae javuajējo.

²⁹ Aviae javuajējamu uvadeje: Iroho gae ujuoho ruehego gavōromo ma-burēro rovadeje. Rueromo juhuonivoromo butubutumoromo Paul'o Silas'o jabesi bēhire behumorovadeje. ³⁰ Behumorovē'ēro hu'irae ōmēvoromo amonō va'oromo uēvadeje: Na diehi ē'ejōjo ēhuro maja ijoho na sisēroho bogo va'i maro va'irode.

³¹ Diehi ē'ejōjamu uavareje: Bada Iesu mae uehorovonējo. Mae uehorovē'oho God-ro ja manō bamavo'iramu maro va'a'anuējo. Ja'o jasi osare raromaruohu'o ēhi jēvo'ajējo. ³² Ēhi'onugoromo Badare jōho majēhijamu rue savoji muebejaje ahu'o hesi osare raromaruohu'o jaburo hejareje. ³³ Henugoromo evare majaroho vahioromē'iro Paul'o Silas'o hu'irae ōmēvo va'oromo sinore nemo'amadoho u'ovēho'amoromo hu'o hesi osare raromaruohu'o ma-burēro bapataeto vaejareje. ³⁴ Bapataeto vaenugoromo Paul'o Silas'o hu'irae ōmēvoromo osare ajiomoromo ie i'imēmijadeje. Ie i'imēmiromo hu'o hesi osare raromaruohu'o God mae uehorovē'ēro nimoroho avohareje.

³⁵ Ēhi ē'ē'ēro sisonuvamu gagorovo Rome rajehu court mevarue a masijohuro police-oho jōe bojēmiromo rēmō'ōjamu va'oromo savoji muebejaje aho uavareje: Savoji gagore arijarue ae niō'ioho ojoho jiovēhego va'irarējo. ³⁶ Va'irarējamu hegoro vaejēvo savoji muebejaje ahuro Paul uavadeje: Court mevarue aribōviohuro jōe nugō'ōjē'e hōjo naro rēmō'ōjēgo Silas'o ja'o hōrōromo va'irarijēgo. Ēhuni hōrōromo mae va'orējo.

³⁷ Mae va'orējamu Paul-ro ri'ōromo police-oho uēvadeje: Rōhu nosi sisē bogo birohē'e a nuniro ēma hisuebijavuarue hōjo. Ēho bogo maehu hōjo no Rome rajēro javuē'ēro. Ēhi'oromo savoji gagore ba'amavuarue hōjo. Ēhi ē'are hōjo rōhu jaruoho jabumē diehi'oromo saginiēri ramuō'ō'ie'aruējo noro va'ojōro. Bogo ēhiho hōjo. Nadi'ego court mevarue aribōviohuro rueromo jabesi ōvēro baejavuego hōrōromo va'irarējo.

³⁸ Ēhi uēvamu hegoro vaejēvo police-ohuro jōho bava'oromo court mevarue aribōvioho majēhijareje. Majēhijamu hegoro vaejēvo Paul'o Silas'o Rome raje ae jēvamu hegoro vaejēvo juhuonivareje. ³⁹ Juhuonivoromo rueromo Paul'o Silas'o sanuēmiromo savoji gagore jēvamu hu'irae ōmēvo rueromo uēvareje: Jemēro nosi amoho vuonugo'i va'orējo.

⁴⁰ Va'orëjambu Paul'o Silas'o jaburo savoji gagore jioromo höröromo Lydia-are osare va'areje. Va'oromo Christian agano ömo'ömoho gëromo jögore mëmiromo va'areje.

17

Paul'o Silas'o Thessalonica amore va'oromo huë vavaeni baejare jöhoje.

¹ Va'oromo Paul'o Silas'o Amphipolis amore va'aroho Apollonia amore va'aroho va' Thessalonica amore höröjareje. Höröromo gavareje Jew rajehu God rajahijarue osaho ë jiamu. ² Jew rajehu God rajahijarue osaho jiamu gagorovo Paul-hu amore amore juvoromo God rajahijarue osare va'onövadëhi ëhi ë osare va'adeje. Va'oromo God-are surire jöho adahoromo ë jö hesi bëhoho Jew rajo ariböviohu'o gemu mae mevadeje jabesi simane huotovëho'i. Nuhu majae niö'i gemu rue'ego ëhi ë'onövadeje. ³ Bëhoho røjëhiromo uënövadeje: God-are surire jö urimë'i jajivare hesi bëhoho God-hu uavë'ëro bëröme namiromo ajamui'iröhe aehu rovë'iroho huro huë vavaene baeromo guomoromo i'ovoromo ri'ö'a'ajëjo. Surire jö hesi bëhoho ëhi höjo. Röhu naehu majëhijaje aho Iesu hu iae ë bëröme namiromo ajamuijaje aho höjo. ⁴ Ëhi jii'e jöho majëhijamu Jew rajo a ioro'iorohuro uvareje: Iae jö mae höjo. Jö mae hö uvoromo aevoromo Paul'o Silas'o gemu mae jijihareje. Greece rajehu God mae uehorovarue aho aho'obëhe magonaho masijoho aho'obëhe jabu'o Paul'o Silas'o gemu mae jijihoruomadeje.

⁵ Ae aho'obëhe Paul'o Silas'o gemu mae jijihamu gëgorovo Jew rajoho ëhuni dë vörönëgadeje. Dë vörönëgamu örire ëma jijiharue a sisëhu mu sisë vaejoro gemuoro gagovëvareje. Gemuoro gagovëvoromo muorovo jöho ma-darugo'o atamu amo raje ae aho'obëhe heromo muorovo'i ë'oruomadeje. Muorovo'i ë'oromo ri'öromo Jason-are amoho ro juhiromo osare va'oromo Paul'o Silas'o nahëvareje guduamëvoromo amonö baejëvo rueromo ae aho'o jabesi nunire rëmo'iro. ⁶ Jason-are osare va'oromo gavare Paul'o Silas'o bogojëvamu gagorovo jaburo Jason o Christian agane gö gö guduamoromo jagu ujuoho va'oromo amore a masijo jabesi nunire bamëvoromo ma-darugëremu uëvareje: Majae hö'öjajire nume beva'ajire huë sisë öri røjëhibe jijihaje aribövioho ave nosi amohu'o rovë'e höjo. ⁷ Nosi amohu'o rovamugo Jason-ro uëvade höjo: Ro nasi osaro arihëjo. Huro ëhi uëvamu hesi osare arijë'ëro Rome a bërömehu bojamuijade jöho ahoromo sareramuiromo uövuareje höjo: A ioro'ioro iosiramuiromo bëröme namijaje aho bogo Rome hiromo bëröme namiromo no muebejavuaje aho jio'i a'i hesi ae gö höjo. Hesi ihoho Iesu höjo. ⁸ Ëhi majëhijamu hegorovo amore ae aho'obëhe o jabesi masijoho aho'o vörö'iraeruomadeje. ⁹ Vörö'iraeromo amore a masijohuro Jason'o Christian a ioro'iorohu'o uëvamu monioho bojëmijamu ëhuro rëmö'öjamu va'areje.

Paul'o Silas'o Berea amore va'oromo ë'are jöhoje.

¹⁰ Ëhi'oromo vahiromamu gavë'i Christian aganohuro Paul'o Silas'o Thessalonica amore jëvamu rëmö'öjëvareje Berea amore va'iröhego. Rëmö'öjëvamu va'oromo Berea amore höröjareje. Höröromo Jew rajehu God rajahijarue osare va'oromo Iesuare jöho majëhijareje. ¹¹ Jöho majëhijamu Berea amo rajohuro Thessalonica amo rajoho iosirëmiromo simano mae uehorovë'e aribövie jioruomadeje. Simano mae uehorovë'ëro God-are jöho he'i nimo avohareje. Heromo God-are surire jöho adaho'i arijareje ga'iro Paul-hu majëhijade jöho jö mae o sareri jöe jiego. ¹² Mae o sareri jöe jiego ga'i adahonugoromo Jew raje ae aho'obëhe Iesu mae uehorovareje. Jew rajëro mae uehorovo'i Greece rajo magonaho masijohu'o Greece rajo ama'io ae bogo bise'o vadu'oho Iesu mae uehorovoruomadeje. ¹³ Ëhi'amu Jew raje rue Thessalonica amore raromaruoho jaburo hejare uvavamu: Paul-ro God-are jöho Berea amore majëhijë'e jiajëjumu hegoro Berea rueromo amo raje ae aho'obëhe jabesi dëho iëhareje jaburo vörö'iraeromo Paul'o muorovo'iröhego. ¹⁴ Ëhi'amu gavë'i Christian aganohuro Paul nugö'öjamu abuejadoho abo sö jovore höröjajadeje. Ëhi'o'irögoro Silas'o Timothy'o Berea amore ëhi arijareje. ¹⁵ Arijamu Paul namijaho va'are ariböviohuro hu'irae bava'oromo Athens amore suorovoromo ë nugareje. Paul

ë nugoromo Berea vuonorö'ö va'ia'amu gagorovo Paul-ro uëvadeje: Va'iririjoho Silas'o Timothy'o uërege ma-burëro rue'irarëjo. Ëhi uëvamu hegorovo va'areje.

Paul-hu Athens amore hiromo Iesuare jö majëhijade jöhoje.

¹⁶ Va'amu gagorovo iae Paul-ro Athens amore hiromo Silas'o Timothy'o muebejëvadeje. Hiromo muebejëvoromo gavade aru'aho'e höromo uvene aho röjahi'amarue inömo ho aho'obëhe amore jiorovamu gagorovo uvadeje: Amo rajoho God-are jöho bogo hejarue höromo ëhuni dë vövöbajo'e aho'o vavaenimadeje. ¹⁷ Vavaenimoromo Jew rajehu God rajahijarue osare va'oromo Jew rajohu'o sa'a ioro'ioro rajehu God mae uehorovarue ariböviohu'o Iesuare jöho mevoromo jabesi simane huotovëho'iro vae majae imo'amarue öri ari'ere va'o namiromo ganövade ae rue'ego jabu'o Iesuare jöho mevonövadeje jabesi simanohu'o huotovëho'iro. ¹⁸ Jöho mevo'ego Epicurus-are jö hesi ijore ijore jijiharue ariböviohu'o Stoic jö hesi ijore ijore jijiharue ariböviohu'o ëhi jië'e ariböviohuo God-are jöho bogo hejaruëro jië'ëro Paul-are örire rueromo jö aho'ahaminövareje. Jö aho'ahamiromo a ioro'iorohuro uarovonövareje: Simano bogojië'e aho rahuro rajahijöro jöho jövajëjo. Rabu jöe jövo'i ë'ajëjo. A ioro'iorohuro uarovonövareje: Nani sa'a gö rajehu bööröme hö uehorovarue aru'aho jabesi jöho huro majahuiromo ë'ajëjo. Jabuhu ëhi uarovare hesi bëhoho Paul-ro Iesuare jöhu'o aehu vuovoromo ri'öjarue jöhu'o majëhijamu hejë'ëro ëhuni uarovareje: Sa'a gö rajo aru'aho jabesi jöho majahuijajëjo. ¹⁹ Ëhi uarovoromo Paul uavareje: Rovego no Areopagus dahorure ajiomarëjo ëhuro ë gagovarue a masijo jabesi nunire jasi jöho jövego heröhe höjo. Ëhi uanugoromo hu'irae bava'oromo Areopagus a masijo jabesi nunire nugoromo uavareje: Jö i'e jaehu baeromo rovanuoho no he'i naguajëjo. ²⁰ Jaehu jövanue jöho bogo hejaruëro jië'ëro ëhuni no naguajëjo avoho he'iro. ²¹ Ëhi uavare hesi bëhoho Athens amo rajohu'o sa'a ioro'iorore jioromo ro Athens raromarue ariböviohu'o ëho jaburo jö i'e ëhemu atemu atoromo hemu henövareje. Ëhi jië'e muohemu uehorovonövareje.

²² Ëhi'amu Paul-ro ë a masijo jabesi nunire ri'ö namiromo uëvadeje: Athens amo rajomë na jö harihe majëhi'ië'ajëjo. Na gëvajoho jemë aru'ahe gö gö mae uehorovëvarue aribövie jëvajëjo. ²³ Ëhesi bëhoho na jemesi amore juvode höjo. Juvoromo jemëhu aru'aho rajëhijarue öri ari'oho gabe juvo'i gavode höjo munë maratue hitavoromo sehoromo jajivoromo uvë'e jiamu: Ave maratu hesi bëhoho hesi iho bogo hejarue aru'ahohuni ave maratuoho ëma hitavo nugaruëjo. Ëhi uvë'e jiamu gavë'ëro jemë hesi iho bogo hejë'e ëma rajahijarue aru'aho hesi jöho iae na röjëhi'irögoro ë'ajëjo. ²⁴ Ëaru'ahoho iae God höjo. God-hu sa'a bövi bise'o bamade aho höjo. Huro bööröme namiromo ö'idörohu'o sa'arohu'o muebejavuajë höjo. Ëhuni ma-aehu hu rajahi'i vae'amare osaroho hu bogo ëho hijaje höjo. ²⁵ Hu eni jië'e aego no bogo hunioho vavaenimoromo bövioho bise'oho avohoromo hu i'imami'ëjarëjo. Ëhesi bëhoho huro gemuëro no ae aho'o birire bojamuego nue ahoromo daruge bövie bise'e baeromo raromarue höjo. ²⁶ Huro ae gemu bamade höjo. Bamoromo ë aho baeromo ëhuro sa'ae aho'obëhe raje avohëvobe rovë'e höjo jaburo sa'ae dinö'e dinö'e va'oromo raromoröhego majae hö'öjajire beva'ajire. A bogo bamadevare evare huro uvade höjo: Aribövioho ë majare raromoi'ë majare rireromobe va'oromo ë sa'are ë sa'are raromobe va'a'ajëjo. ²⁷ Huhu bamëvade hesi bëhoho aëro God ga'i nahobe va'iröhego. Nahobe va'ojuvo nani bihororöhego. Röhu God bogo ëgoroho jio'i ae gemu gemu no'o hi huvaje höjo. ²⁸ Ëhesi bëhoho noro hesi darugoro raromo jijihole vaejarue höjo. Ëjöe gemuho jemesi gavë'e ariböviohuo jajivoromo uvë'e höjo: Iae no ae aho'obëhe hesi aboji harihu'e javuajëjo. Ëhi uvare höjo.

²⁹ No God-are aboji harihu'ëro javuë'ëro ëhuni no bogo uehorovoromo uvo'ëjarëjo: God hu aehu gold silver munë gö gö ujuohoromo övo sasohoromo simano sasohoromo sehoromo avoho'amare inömo ho va'ëne höjo. No bogo uvo'ëjarëjo: God hu ëhi höjo. ³⁰ Urimoho aehu God-are jö bogo hejare majare God-ro gëvade aëro ëhi jië'e inömo ho aru'aho'e höromo uvene aho röjëhi'ëgo gëromo ma-gë taemonövade höjo. A'i avevë-jö'oho ae aho'obëhe sa'ae dinö'e dinö'e raromarue aribövioho uëvajëjo: Uehoro sisëho

vuonugo'i nasi öroro ruehëjo. ³¹ Ëhi uëvaje hesi bëhoho huro majaho bamë'e höjo sa'are ae aho'obëhe hesi court-re riravo'iröhego. Riravo'iramu huhu uavade ahuro hesi ihore court vaejëvoromo ae aho'o jabesi jöho avoho mevoromo gë'a'ajëjo gë'i ae mae o sisë jëvego. Aëro ma-samaro uvoröhego: Ëahuro mevo gö'a'ajë uvoröhego ëhuni hu ajamamu guomoromo ri'öjade höjo.

³² Guomoromo ri'öjade jöho heruomoromo a ioro'iorohuro sivareje. A ioro'iorohuro uavareje: Jasi jöho röhu maho u'emu he'ejärëjo. ³³ Ëhi'amu Paul-ro gagovaruire jioromo va'adeje. ³⁴ Va'amu a ioro'iorohuro aevoromo hu'o gemu mae jijihö va'oromo Iesu mae uehorovareje. Areopagus dahorure gagovaje a böröme gemu hesi ihe Dionysius o magonahe gemu hesi ihe Damaris o ae gö gö ëho jaburo mae uehorovareje.

18

Paul-hu Corinth amore va'oromo ë'ade jöhoje.

¹ Ëhi'amu gagorovo Paul-ro Athens amore jioromo va'adoho va'o Corinth amore höröjadeje. ² Corinth höröromo Jew rajo a ihe Aquila birohadeje. Aquila hu Pontus amore rahade ae jiadeje. Rahë'ero ijonö va'o Italy sa'are hijadeje. Hiromö Rome a böröme Claudius-ro Jew rajo ariböviohuro Rome jëvamu va'o barëjëro uëvamu gagoro hu'o hesi vabore Priscilla'o Rome jioromo Corinth amore aviavejë'e rovareje. Corinth aviavejë'e rovamu Paul-ro jabumë gë'i va'adeje. ³ Va'oromo Paul o Aquila o Priscilla mue gemuoho vaeromo niögu javue vaejaruëro jië'ero Paul-ro jabu'o hiromö ë muoho gemu mae vaeromo ijo bajoho mana baenövareje. ⁴ Ëhi'oromo Jew rajo nuho majaho rue'ego Paul-ro Jew rajehu God rajahijarue osare va'oromo Jew rajohu'o Greece rajohu'o jabu'o jöe mevoromo jabesi dë vövöbajö'oho huotovëho'i ë'o ganövadeje jaburo aevoromo Iesuare örire jijihoröhego.

⁵ Ëhi'ojuvo Silas'o Timothy'o jaburo niö'iro Macedonia sa'are arijë'ero Corinth amore rovareje. Corinth amore rovamu gagorovo Paul-ro mue gö gö vuonugo'i Iesuare jöhuremu ae majëhijadeje. Majëhiromö Jew rajoho uënövadeje: God-hu uavë'ero böröme namiromö ajamuijaje aho iae Iesu höjo. ⁶ Ëhi majëhijamu hegorovo rue Jew rajo ariböviohuro jö aho'ahamiromö Paul-are jö sisëho atamu hegorovo huro niögure uono'uonoho jabesi nunire hijiovo röjëhijadeje jaburo garöhego hu jabesi muoho bijönimego. Röjëhiromö uëvadeje: Jemë i'ua bæjë'oho ëho jemesi mue höjo. Bogo nasi muehu höjo. Ijoho naro Jew rajoho jemë vuonugëvo'i va'oromo sa'a ioro'ioro rajoho jöho majëhinövo'ejöjo. ⁷ Ëhi uëngoromo Jew rajehu God rajahijarue osaho vuonugo'i va'oromo ruëre osa göre Titius Justus-are osare va'o hijadeje. Titius Justus bogo Jew rajo aho jiadeje röhu Jew rajoho jabu'o God rajahijaje ae jiadeje. ⁸ Ëhi'amu gagorovo Crispus Jew rajehu God rajahijarue osa muebejaje aho Crispus'o hesi osare raromarue aribövioho aho'obëhe jabu'o aevoromo Bada mae uehorovareje. Mae uehorovamu Corinth amo raje ae aho'obëhe Iesuare jöho heromo mae uehorovoromo bapataeto vaeruomadeje.

⁹ Ëhi'amu vahiromamu gagorovo Paul-ro nia'ovo'iraeromo gavadeje Badaro rueromo uavamü: Nadi juhuonivo'i jöho jövonövonëjo. Bogave vuonugo'iranëjo. ¹⁰ Ëhesi bëhoho na ja'o hi juvaje höjo. Aho bogo anago'aruëjo ave amore nasi aribövioho böröme mae jië'ero. ¹¹ Ëhi uavamü Paul-hu ë amore hiromö God-are öri röjëhibe va'adoho vadune gemu manaere 6 ëhi barëjadeje.

¹² Vadune gemu manaere 6 ëhi barëjamü Gallio-hu Greece sa'a Rome jabesi ihore muebejëvadevare evare Jew rajoho jaburo gagovoromo Paul guduumoromo court-ro bava'oruomadeje. ¹³ Paul court-ro bava'oromo ë a börömo Gallio uavareje: No ave a barovare hesi bëhoho huro aribövi jabesi dë vövöbajö'oho huotovëho'i ë'ajëjo jaburo God sisë'i sisë'i rajahiröhego. God ëhi rajahijë'oho jögoroho ahoruomö'ajëjo.

¹⁴ Ahoruomö'ajëjamü Paul-ro hesi jöho majahi'ia'amu gavë'i Gallio-ro uëvadeje: Jew rajomë ave aho vajiohu'e anano'e muoho vae'ibejajo naehu ma-taemorovoromo jemesi jö hejë'oho iae mae jio'ibejajo. ¹⁵ Röhu bogo ëhi jië'e jöho barovarije höjo. A'i jemesi jö

bēhi iho bēhi mu jōgoru bēhi rabe rabe Jew rajo jemēhu atoromo berohemu beroharujoho ēhi jī'e jōhemu court-ro barov'e jēvaje ēhuni jemēro jemesi gahējo. Ēhi jī'e mu ōri mev'ohō na bijōnegajējo. ¹⁶ Ēhi uēnugoromo hesi aribōvioho uēvamu sih'ōjēvareje. ¹⁷ Sih'ōjēvoromo ae aho'obēhe ri'ōromo Jew rajehu God rajahijarue osa muebejaje a hesi ihoho Sosthenes guduamoromo court a masijo jabesi nunire baro anoromo kōe bojamareje. Kōe bojamamu gēgorovo Gallio-ro ma-nunēremu gēvadeje.

Paul-hu Antioch amore vuonor'ō va'ade jōhoje.

¹⁸ Ēhi'amu Paul-ro Corinth amore Christian aganohu'o gemu mae hijamu majae ēgobōvie barējadeje. Majae ēgobōvie barējamu huro aribōvioho ē rēmo'i Cencreae amore abuejadeje. Abueromo hōrōromo mue vaerōhēni God-are nunire mae uanugoromo aēro simano uoho tarijahojōro uavadeje hujeji muoho barējēgo evare ijōnō aēro rōhu maho tarijahorōhego. Simanoho tarijahamu Paul-ro Priscilla'o Aquila'o gemu mae boat-re ajiomadeje Syria sa'are va'orōhēni. ¹⁹ Va'adoho va'o Ephesus amore hōrōjadeje Aquila'o Priscilla'o ē amore rēmo va'iē'ēro. Hōrōromo huro Jew rajehu God rajahijarue osare va'oromo Iesuare jōho Jew rajohu'o mevadeje jabesi simanoho huotovēho'i. ²⁰ Mevamu hegorovo rue aribōviohuro uavareje: Avehuro majae ēgo'o hiromo u'emu va'onējo. U'emu va'onējamu bogo ejēhadeje. ²¹ Bogo ejēhoromo va'irōgoro uēvadeje: God-hu nimē'ohuro na vuonor'ō rueromo gē'ejōjo. Ēhi uēnugoromo boat-re ajiomoromo Ephesus amoho vuonugo'i va'adeje. ²² Va'adoho Caesarea amore ravo'amoromo ajiomadoho ajio Jerusalem amore hōrōromo ekaresia aho magonahoho jejēminugoromo va'adoho va'o Antioch amore hōrōjadeje.

²³ Antioch majae ēgo'o hiromo va'adoho Galatia sa'a'o Phrygia sa'a'o birorohade ēnire Keriso-are aribōvioho aho'o jōe majēhiromo ēhuro jabesi dē vōvōbajo'oho biririvēhobe juvadeje.

Apollos-hu Ephesus amore ro hiromo va'oromo Corinth amore hiromo ē'ade jōhoje.

²⁴ Ēhi'amu iae Jew raje ae gemu hesi ihoho Apollos-ro Ephesus amore rovadeje. Hu Alexandria amore rahade ae jō'e sasohoromo jōe jōvaje ae God-are surire jōho ga avohē'e ae jiadeje. ²⁵ Ae gōēro Badare ōroho Apollos rōjahijamu hejē'ēro hesi dē vōvōbajo'e aho'o ri'ōromo Iesuare jōho majēhiromo ma-ahorirēro rōjēhinōvadeje. Ēhi jiadeje rōhu Iesuare ihore bapataeto vaerōhe jōho bogo he'i John-hu bapataeto vaejēvade jōhemu hejē'ēro jōho jōvonōvadeje. ²⁶ Amo Apollos-ro Ephesus amore rueromo Jew rajehu God rajahijarue osare va'oromo aevoromo God-are jōho biririvoromo majēhijadeje. Majēhijamu Priscilla'o Aquila'o hejare Apollos-ro God-are jō vituoho he'i vituoho bogo ma hejē'ēro jōho majēhijamu hegorovo jabesi osare hu'irae bava'oromo avoho rōjahiromo uavareje: God-are mu ōroho ēhi hōjo.

²⁷ Ēhi'amu Apollos-ro uvadeje: Na Greece sa'are va'ejōjo. Va'ejōjamu Ephesus amore Keriso-are aribōviohuro hu ajamiromo suroho jajivoromo bojamijareje huro bava'ego Greece sa'are raromarue Keriso-are aribōviohuro adahoromo hu rajahiromo baeruo-morōhego. Suroho bojamamu baeromo va'o Greece sa'are hōrōjadeje. Hōrōromo jōho majēhijadeje. Majēhiromo God-hu huē baējēvoromo jabesi simano huotovēhē'e Keriso mae uehorovarue aribōvioho ē aribōvioho Apollos-ro mabēhe ajēmijadeje. ²⁸ Ēhesi bēhoho huro biririvoromo Jew rajo jabesi jōho a nunire aho'ahēmiromo God-are surire jōho adahoromo avoho rōjēhijadeje jaburo garomo uvorōhego: Iae mae-ējo. God-hu uavē'ēro bōrōme namiromo ajamujaje aho iae Iesu hōjo.

19

Paul-hu Ephesus amore hiromo ē'ade jōhoje.

¹ Apollos-ro Corinth amore hijamu evare majae gemuore Paul-ro sa'a ririre va'adoho va'o Ephesus amore hōrōromo ē hijadeje. Hiromo Keriso-are aribōvi ioro'ioroho birohēvadeje. ² Birohēvoromo uēvadeje: Jemē Iesu mae uehorovarijevaroho na jemē God-are Aru'ahoho baearijaje hōjo o bogajo. O bogajamu uavareje: O-ajo. God-are Aru'aho hesi

jõho no bogo hejê'e javuajêjo. ³Bogo hejê'e javuajêjamu uêvadeje: God-are Aru'aho hesi jô bogo hejê'oho jemêhu bapataeto vaejarijoho bêhoho diehi jiade hõjo. Uavareje: John-hu bapataeto hesi bêhi majêhinôvadoho bêhe gemuoho jiade hõjo. ⁴Bêhe gemuoho jiade hõjamu Paul-ro uêvadeje: Iae mae hõjo rõhu John-hu a bapataeto vaejêvade hesi bêhoho aêro uvorôhego: Êaribôvioho uehoro sisêho vuonugo'i uehoro i'e baejê'êro êhu'êro ê'aruêjo. Rõhu bapataeto vaejêvoromo uênôvade hõjo: Nasi ijore ruerôhe aho rovego ê a hesi ôroro mae uehorovorêjo. Êhesi bêhoho Iesu mae uehorovo'irôhe jõho uêromo ê'ade hõjo. ⁵Êhi uêvamu hegoro ê Ephesus amo rajohuro Bada Iesuare ihoro bapataeto vaejareje. ⁶Bapataeto vaejamu Paul-ro ôve simane taemêhamu God-are Aru'ahohuro jabesi dê vövôbajo'ere ro abuejadeje. Aru'ahohuro abueromo jabesi simanore ajêmiromo huotovêho'ego jõho bogo hejarue huê gôero gôero atonôvo jõe God-aro baeromo huruoho majêhinôvareje. ⁷Ae aho'obêhe 12 rabu'e jaburo êhi jiê'e muoho vaejareje.

⁸Êhi'amu Paul-ro Jew rajehu God rajahijarue osare va'oromo biririvoromo ê aribôviohu'u'o jõe mevoromo jabesi uehoroho aho'o huotovêho'i ê'o gavadeje jaburo uvorôhego: Iae mae-êjo. God-ro bôrôme namiromo êhi muebejavuaje hõjo. Êhi'obe va'ojuvo manaere niô'i gemu barêjadeje. ⁹Manaere niô'i gemu barêjamu a ioro'iorohuro biriri'ôvoromo jõho bogo ejahoromo Badare mu ôri hesi jõho ae aho'o jabesi nunire sisê'i atareje. Jõho sisê'i atamugo Paul-ro ri'ôromo ê Jew rajehu God rajahijarue osare aribôvioho rêmo'i Keriso-are aribôvioho sô ujuohoromo va'adeje. Va'oromo Tyrannus-hu jô majêhijaje osa bôrômore va'oromo majae êhi Iesuare jõho jôvonôvadeje. ¹⁰Êhi'obe va'ojuvo vadune niô'i barêjamu Asia sa'are raromarue ae aho'obêhe Jew rajohu'o sa'a ioro'ioro rajohu'o êho jaburo Badare jõho hejareje.

Sceva-are harihu ômo'ômehu sareri sareri ê'are jõhoje.

¹¹Êhi'ê'ego God-ro Paul ajami'ego bogo gavarue darugo'e mu masijoho vaenôvadeje. ¹²Mu masijoho vae'ego Paul-are sinore rêho'amade niôgoho aêro ujuohoromo guomo guomo baejê'e aribôvi jabesi ôrire va'ego jabesi guomoho barênôvo Satan-are a sisê dêre jiê'oho suorovo va'onôvareje.

¹³Va'ego iae Jew rajo a ioro'iorêro sisê aribôvi dêre jioruomajoho suorovo va'ojôro uvobe jijihonôvareje. Jijihoromo ma-sarerivoromo Bada Iesuare ihoho uvo ganôvareje suovoromo va'ojôro. Uvo garomo aru'aho sisêho uênôvareje: Paul-hu majahuijêgo hejarue aho Iesu ê a hesi ihore uêvaruêjo: A dêre jiarujoho suovororomo va'ohêjo. ¹⁴Jew rajo priest bôrôme gemu Sceva-are harihe 7 êho jaburo êhi jiê'e sareri'e muoho vaejareje. ¹⁵Êhi jiê'e muoho vae'i ê ô ômo'ômo 7-ho jaburo aru'aho sisê hesi dêre abuejê'e ae gemu hesi osare va'areje. Va'oromo sarerivoromo Paul-are ihohu'o Iesuare ihohu'o êma jõho majahiromo aru'aho sisêho sarerami'i ê'o gavareje. Sarerami'i ê'o garomo uavareje: Paul-hu majahuego hejarue aho Iesu ê a hesi ihore noro uavaruêjo: Êa hesi dêre jianuoho hõrôromo valêjo. Hõrôromo valêjamu hejê'i rue aru'aho sisêhuro uêvadeje: Jemê Iesuare jõhu'o Paul-are jõhu'o majehijarujêjo. Iesu iae na gavaje hõjo o Paul-are jõho iae na hejê'ejevajêjo. Rõhu jemê rahumê jêvavêjo. ¹⁶Rahumê jêvavêjamu hejê'i aru'aho sisê dêre jiê'e ahuro ri'ôromo ê ô ômo'ôme 7-ho darugo'o muo'amoromo jabesi darugoho ruahô'ôjêhoromo jabesi niôgoho jaho'amoromo ruruhô'ôjêhamu dê'ahobatêremu makôemu jiê'e hesi osare jioromo huruomoromo va'areje.

¹⁷Huruomoromo va'amu Jew rajohu'o sa'a ioro'ioro rajohu'o Ephesus raromaruohuro ê jõho heruomadeje. Heromo ae aho'obêhe juhuonibijiohamu Bada Iesuare ihoho ma-dôro jiadeje. ¹⁸Ma-dôro jiamu Iesu mae uehorovarue ae aho'obêhe mu sisê gô gô gurihiromo vaejaroho sama'e huruoho majêhijareje. ¹⁹Majêhiromo rõhu ae gô gô urimo iro oso'e mu vaenôvarohuro uvoruomadeje: Nosi iro oso'e muoho sisê hõ uvoromo jabesi iro oso'e mu hesi suri surioho ujuoho rueromo gemuoro gagovoromo ae aho'o jabesi nunire vêniro huareje. Vêniro huoromo suri suri hesi manaho adahoromo gavareje ajivê'e ijo baje 50,000 êhi vênire ravê'e jiamu. ²⁰Êhu'êro jiê'êro ae aho'obêhe Badare jõho hebe mae uehorovobe va'areje.

Ephesus amo rajehu muorovo'irögoro vörö'iraerumade jöhoje.

²¹ Ëhi'amu Paul-ro uehorovoromo uvadeje: Macedonia sa'are Greece sa'are juvo va'onu-goromo evare ajiomoromo Jerusalem amore höröromo ë hi'ejöjo. Hiromo hujeji evare na Rome amoho va'o ga'ejöjo. ²² Ëhi uvonugoromo hu ajamijarue aho niö'i Timothy'o Erastus'lo rëmö'öjëvamu Macedonia sa'are va'areje. Va'irögorovo huro Ephesus amore Asia sa'are ëhi hijadeje.

²³ Hijamu evare äero Badare öroho bijönimoromo iro muorovo'oho Ephesus amore vaejareje. ²⁴ Ëhesi bëhoho ae gemu Demetrius-ro Ephesus hijadeje. Hu silver-ehu inömo avoho'amaje ae jiadeje. Silver-ehu inömo avoho'amaje äero jië'ëro Artemis rajahijarue javu börömo hesi nu ano'o va'ëne inömo ininoho silver-ëro avohoromo imo'amonövadeje. Ëhesi bëhoho ë amo raje ae aho'obëhe sarerivoromo uvonövareje: Artemis aru'aho magonahe hörömo rajahi'irögoro huni javu böröme vaejahareje. Vaejë'ëro ë javu hesi nu ano'o va'ënoho javu inino avohoromo imo'amarue muoho Demetrius-ro muebenövadeje. Muebe'ego hesi nu ajamarue aribövioho ijo bajo böröme baenövareje.

²⁵ Ëhu'ëro jië'ëro Demetrius-ro hu ajamijarue ariböviohu'o ëhi jië'e mu vaejarue aribövi ioro'iorohu'o ëho jabuni jöe nugö'öromo uëvadeje: Gagovorovego no jöe ato'irarëjo. Ëhi uëvamu gemuoro gagovareje. Gagovamu uëvadeje: Ae aho'obëhe nasi jöho hehëjo. Jemë'o uehorovarujëjo. Noehu Artemis-are javu va'ëne inino avohoromo imo'amaruohuro ëhuro no ijo bajo bövie baejarue höjo. ²⁶ Ijo bajo bövie baejarue höjo röhu ë a sisë Paul-hu diehi jië'e mu vaejajoho jemëro jemesi nunëro garomo jemesi hia'ëro hejaruje höjo. Huro uövuaje höjo: Äehu övehu avoho'amaje vörö'e inömo ho ëho vörö rumo'e jio'amajëjo. Ëhi uöromo Ephesus amo rajohu'Asia sa'a rajo ioro'iorohu'o jabesi simanoho huotovëhamu ae ma-vemino'e bogo e'i a'i ae aho'obëhe ëma sarerivoromo uvoruomë'e höjo: Paul jö mae jövajëjo. ²⁷ Ëhi uehorovoromo nani jaburo uvoruomo'ajëjo: Noehu Artemis-are javu inino avohoromo imo'amaruoho mu sisë vaejarue höjo. Röhu gö'o ae aho'o jaburo nani uvoruomo'ajëjo: Artemis nosi aru'aho magonaho börömo hu rajahijarue javu börömo ho rumo'e höjo. Äaru'aho magonahoho ae aho'obëhe Asia sa'are sa'ae dinö'e dinö'e rarumarue ariböviohuro hu gemu böröme bëhe rajahijarue höjo. Röhu jabumë Paul-are jö ejahë'ohuro ëhuro ijonöho ë magonahoho bogo börömo ho uehorovo'iramu hesi ihoho bogojio'ajëjo.

²⁸ Demetrius-ro ëhi uëvamu hegorovo ae aho'obëhe dë vörö'iraeromo ma-darugo'o uvo'i arijareje: Ephesus nosi aru'aho magonahoho Artemis hu böröme höjo. ²⁹ Ëhi uvo'i arijamu hegorovo ë amoho muorovo'i vörö'iraebe va'oruomadeje. Vörö'iraebe va'oromo ae aho'obëhe jaburo Macedonia raje ae niö'i Paul'o gemu mae jireharuoho jabesi ihoho Gaius'lo Aristarchus'lo ë ae niö'ioho guduamëvoromo hu'iraejëvoromo tutubijiohoromo jabuhu gagovarue öri ari'ere va'oromo gemuoro gagovorovareje. ³⁰ Gagovorovamu Paul-ro ë öri ari'ere va'oromo ae aho'obëhe jabesi nunire namiromo jöe jövo'i nimamu gagorovo Keriso-are ariböviohuro ahoromo uavareje: Vuonugëjo. ³¹ Vuonugëjamu Asia sa'are a masijo ioro'iorohuro Paul mae uehorovë'ëro jöe nugö'öromo uavareje: Nadi ë öri ari'eroho va'ego ae aho'obëhe ja ga'irarëjo. ³² Ëhi'amu jö ataroho sisërëjamu gagovare hesi bëhoho ae ma-gemu gemu ga'i ae aho'o bogo gagoro ae göëro göëro jöe gö gö ëma ma-darugo'o uvoruomadeje. ³³ Uvoruomoromo a ioro'iorohuro gavare Jew rajëro Alexander nuninö nugoruomamu gagorovo uvareje: Nani Alexander-are jöëni gagovare höjo. Gagovare höjamu Alexander-ro övëro tugohëvoromo hesi jöho hesi arijo'arije ajamirovoromo majëhi'i ë'o gavadeje. ³⁴ Majëhi'i ë'o gavamu rue ariböviohuro ae aho'obëhe gavare Alexander Artemis bogo ma uehorovaje aehu jio'i Jew raje jiamu gagorovo gemu mae uvemu uvareje: Ephesus nosi aru'aho magonahoho Artemis hu böröme höjo. Ëhi gemu uvo'i arijuvo 2 hours barëjadeje. ³⁵ 2 hours barëjamu amo rajo a böröme gemuëro ahëvo gabe va'oromo gavade jörumoraë barëjamu gagorovo uëvadeje: Ephesus rajomë jemëro nasi jöho hehëjo. Ae aho'obëhe iae gavarue höjo Ephesus rajoho no aru'aho magonaho böröme Artemis-are osa muebejarue aribövie javuego. O hesi vörö'e munë ö'idöre jioromo

beruvebijadoho muebejarue aribövie javuego. ³⁶ Aho ë jöho bogo aho'a'aruëjo. Èhi jii'e jiaje nadi uehoro rumo'e muoho vae'i ma-sanuovorëjo. ³⁷ Ave ae niö'i ma-baejëvo rovarijoho jabumë bogo nosi aru'aho jabesi javu masijoroho va'oromo vajiohoho ujuohare höjo. Nosi aru'aho magonaho hesi jöho bogo sisë'ioho atare höjo. ³⁸ Èhu'ëro jii'ëro Demetrius-hu o hesi mu ajamijarue aribövieuho ae gö jabesi jö sisë huruoho majëhi'i nimë'o'oho court vaejarue majae iae jiajëjo. Court vaejarue aribövie iae jioruomajëjo. Èhuni ë va'oruomoromo jö sisëho majahirovo'aruëjo. ³⁹ Röhu jemë jöe gö jëvë'o'oho amo rajo a masijehu gemuore gagovoromo atarue majaho rovego evaro jemesi jöho bu'öjogo jaburo heromo avoho mevëho'irarëjo. ⁴⁰ Naehu èhi uëvaje hesi bëhoho noehu jaruvo vaejarue mu hesi jö hejë'o'oho nani ave sa'are a masijohuro no uö'a'aruëjo: Jemëro rabëni muorovo sisëho barovarije höjo. Èhi uövuë'o'oho no rabu jöe mana majëhijöëni ma-hia'ëremu he'ëjarëjo. ⁴¹ Èhi uënuoromo uëvadeje: Iae barëjajëjo. Va'ohëjo.

20

Paul-hu Macedonia sa'are va'oromo jö majëhibe juvoromo Greece sa'are va'ade jöhoje.

¹ Iro muorovo'oho barëjamu gagorovo Paul-ro jöe nugö'öjadeje Keriso-are ariböviohuro gagovorovoröhego. Gagovorovamu ajëmiromomo jögoroho bojëmiromomo jejëmiromomo Macedonia sa'are va'adeje. ² Macedonia va'oromo Christian aribövioho ajëmiromomo jögoro aho'o bojëmibe va'adeje. Va'onugoromo Greece sa'are rovadeje. ³ Greece sa'are ro hijadoho manaere 3 barëjajadeje. Manaere 3 barëjamu gagorovo Syria sa'are jovo döro va'ie'iro evare hejade uvavamu: Jew rajo ariböviohuro ja anago'i saginiëri jöe ataruë uvamu hegorovo uvadeje: Èhi jii'o'oho na bogo jovo döroho va'i vuonorö'öromomo Macedonia örëro va'ëjjo. ⁴ Èhi uvamu Pyrrhus-are harihe Berea amo raje Sopater-ro Paul'o ë va'adeje. Röhu Thessalonica amo raje ae niö'i Aristarchus'o Secundus'o Derbe amo raje ae Gaius-ro Timothy-ro Asia sa'a raje ae niö'i Tychicus'o Trophimus'o ë aribövioho jaburo Paul'o gemu mae va'areje. ⁵ Va'aroho jabumëro urimo Troas amore va'oromo raromoromo muebejavuareje no ijore va'oröhego. ⁶ Muebejavuamu noro Philippi amore ariromomo Jew rajehu I Dë Huaje Oso Rumo'e I ijarue majaho barëjamu evare boat-ëro baejavuoromo va'adoho majae övo gö mine barëjamu Troas amore ravo'amoromo no muebejavuarue aribövioho birohëvareje. Birohëvoromo ë raromaroho hurae gemu barëjajadeje.

Paul-hu Troas amore hiromo ë'ade jöhoje.

⁷ Hurae gemu barëjamu hura bise'ore vahiromamu gagorovo no gagovorovareje ie gemuoro ue'aho'irovo. Gagovorovamu gagorovo Paul-ro ë amo rajo aribövioho jöe majëhibe va'adoho vahii riri'e jiajeje sisonuvego va'oröhëro. ⁸ Röhu ë javu döre osare noehu gagovarire ire aho'obëhe bue'amë'e jiajeje. ⁹ Bue'amë'e jiamu iae a i'e gemu hesi ihe Eutyclus-ro döre ahë'e ojo arëtoere hijadeje. Hijamu Paul-ro jöho ma-jövuemu jövobe va'amu gavë'i Eutyclus nunëhimobe va'ojuvo nunëhimamu niavamu döre jioromo amonö beva'adeje. Osa uhure ririre döre èhi jiohe ajiomë'e döre javu hesi osare jioromo amonö beva'adeje. Beva'amu ruhe döre ariböviohuro abueromo banigojomoromo gavareje mami'e guomë'e jiamu. ¹⁰ Guomë'e jiamugo Paul-ro abueromo Eutyclus bu'ö taemoromo huohudëromomo no uövuadeje: Nadi huë vavaenoho baehëjo. Hu bogo guomë'e iae hijajëjo. ¹¹ Èhi uönuoromo ajiomoromo ie ato'atovoromo iromomo ë aribövioho jöe majëhibe va'ojuvo va'o sisonuvadeje. Sisonuvamu gagorovo va'adeje. ¹² Röhu a i'oho bogo guomë'e hijamu gagorovo Keriso-are ariböviohuro hu bava'oromo huë mabëhe baejareje.

Paul-hu Troas jioromo Miletus amore va'ade jöhoje.

¹³ Èhi'amu iae Paul-ro uövuadeje: Jemëro urimo boat baeromo Assos amoro va'ego na ijore sa'aëro ö'iröjo jemë'o na'o ë jioromo boat-re gemu mae va'oröhe. Èhi uövuamugo boat-re va'areje. ¹⁴ Va'aroho Assos rueromo Paul hu'irae baeromo jovo döremu va'onövujuvo va'o Mitylene amoro rovareje. ¹⁵ Mitylene rovë'ëro nërö jovo döremu va'ojuvo Chios sa'a bëhire rovë'ëro nërö va'aroho Samos sa'are rovë'ëro nërö va'aroho Ephesus amoho iosirami va'oromo hujeji Miletus amore ë ro suorovareje. ¹⁶ Ephesus amo iosiramijare hesi

bēhoho Paul-ro ēhi iosirami'i nimadeje ēhuro bogo Asia sa'aroho ēgoho hi'i ma-burēro evare Jerusalem va'oromo eni jiē'oho Pentecost majaho rovego Jerusalem hōrōrōhēni.

Paul-hu Ephesus ekaresia muebejēvarue a duvaho jabesi ōrire jōgoru majēhijade jōhoje.

¹⁷ Miletus amore suorovoromo ē ravo'amoromo Paul-ro Ephesus amore jōe nugō'ō-jadeje ekaresia a duvahohuro ruvebiruomorōhego. ¹⁸ Ruvebiruomamu uēvadeje: Naehu urimo Asia sa'are rovodevare evare naehu diehi diehi mu vaebe rovodoho jemē iae uehorovarujējo. ¹⁹ Jew rajēro ijumevo'i ato'i ari'ego na huē vavaene baeromo nivē'i bogo dōroho bamorovo'i ma-taemo hiromu Badare muohuremu vaejahonōvode hōjo. ²⁰ Jemē ajēmī'i rode jōho na bogo subivēho'i ekaresiae ae aho'obēhe jemesi nunire ekaresiae ae gemu gemu jemesi osare osare jōho majēhi barēromo ōroho rōjēhi barēnōvode hōjo. ²¹ Jew rajohu'o sa'a ioro'ioro rajohu'o jemesi ōrire darugo'o majēhiromu uēnōvode hōjo: Jemēhu ōri sisēre jijiharujoho vuonugo'i God-are ōroho jijihoromo nosi Bada Iesu mae uehorovorējo.

²² Rōhu avehu'o hehējo. Avevejō'oho God-are Aru'ahohuro ue'ego na Jerusalem va'ajējo. Va'o hōrōjēgo diehi'evoruomorōhoho na bogo gavajējo. ²³ Na aviēhi jiē'e muohuremu gavajējo. Ame gōre gōre hibe rue'ego God-are Aru'ahohuro uebe ruehijajo: Ja Jerusalem hōrō'iramu savoji gagore ba'amavo'iramu huē vavaene gō gō bae'a'anujējo. ²⁴ Ēhi uevade hōjo rōhu na nasi sinohunioho bogo uehorovaje hōjo ēhuro Bada Iesuhu bojemade muoho aho'o vae barē'irodēni. Ēmu hesi bēhoho God-hu no huē baejavuoromo ajamuijaje jōho a majēhibe juvo'irodoho hōjo.

²⁵ God-hu bōrōme namiromu muebejavuaje jōho ae aho'o jemesirire jōvobe juvē'e jevajējo. Rōhu iae na gavajējo. Ijonōho ae gemu vadu'oho na bogo ge'a'arujējo. ²⁶ Ēhuni avevejō'oho naro darugo'o majēhiromu uēvajējo: Jemē ae gō gō sisēre va'ē'oho ēho bogo nasi sisēhu hōjo. ²⁷ Ēhesi bēhoho rabēni God-hu uvaje jōho na bogo subivēho'i na majēhi barējē'e jevajējo. ²⁸ Jemesi dē vōvōbajo'oho mueberovorējo. O God-are Aru'ahelu jemē bojēmijade aribōvioho aho'o muebejēvorējo. Ēaribōvioho God-are sheep-nō'e jio'amajējo. Hu hesi Harihu mae nugō'ōjamu guomadohuro ēhuro jabumē hesi baejēvade hōjo. Ēhuni hesi ekaresiaho sheep-nō'e mio'amoromo muebejēvorējo. ²⁹ Ēhesi bēhoho na gavajoho na va'iramu vōrō'e miehu rueromo sheep ijumo'amaruēhi a sisē gōēro gōēro jemesirire rueromo sareri sareri'e jōho majēhiromu ekaresia jemesi uehoroho ijumēho'aruējo. ³⁰ Rōhu gō'o jemesi a ioro'iorohuro ri'ōromo sareri sareri'e jōho ato'a'aruējo Keriso-are aribōvioho jemēro jabesinō va'irarijēgo. ³¹ Ēhuni gavē'i raromorējo. Uvorējo: Nōrōro muoho bogo vuonugo'i majae jene vahie vō'ōe sione huē vavaene baeromo nivē'i no ae gemu gemu rōjahuibe ruejuvo vadune aho'obēhe 3 barējade hōjo.

³² Rōhu jaruvoho na negajējo God-ro jemē muebejēvego huhu no huē baejavuoromo ajamuaje jōho jemēro uehorovego ma-mae jēvorōhego. Jemēhu hesi jō uehorovē'oho ēhuro jemēro biririvobe va'oromo God mae uehorovo'iramu God-hu hesi aribōvie aho'o mae avohavuajēhi jemē'o ēhi avohēvo'ajējo. ³³ Rōhu jemesi ijo bajēnioho niōgēnioho na bogo ganiganiegade hōjo. ³⁴ A'i jemē'o iae gavarujējo na'o nasi aribōviohu'o no huē vavaene javuadoho ave nasi ōvohuro muoho vaeromo hesi manaho baeromo ēhuro bōvioho bise'oho ujuohonōvode hōjo. ³⁵ Muoho ēhi vaeromo ēhuro naro jemē rōjēhi-jode hōjo jemēro garomu uvo'irarijēgo: Mu rabe rabe rovē'oho Paul-hu ē'adēhi no'o ēhi biririvoromo muoho vaeromo ēhuro darugo u'uhē'e aribōvioho ajēminōvo'ejarejo. Uehorovoromo uvorējo: Bada Iesuro huro hesi uōvuade hōjo: Suvuoro ma-baejē'oho ja ma-bisemu vuēvavo'ajējo. A'i suvuorēmijē'ohuro ēhuro vuēvavo avoho'ajējo.

³⁶ Paul-ro ēhi uēnugoromo a duvahoho aho'o jabu'o gemu mae ague aho hiromu God-are ōrire jōe jōvadeje. ³⁷ Jōe jōvamu jabumē aho'obēhe nierusuburu'e bamē'i Paul gudu-amoromo dudōhoromo jejamareje. ³⁸ Uvareje: Huē vavaeni jō gō hejaroho ma-jianovo'i a'i noehu ijonō hu bogo ga'irōhe jōho ēho bōrōmoho hōromo sisē maro vavaenimareje. Ēhi'oromo Paul boat-re hu'irae bava'areje.

21

Paul-hu Jerusalem va'ade jöhoje.

¹ Hu'irae bava'amu Paul'o no'o boat-re iojioromomo Ephesus aribövioho ë rëmo'i va'areje. Jovo döremu va'onövojuvo ahorirëro va'aroho va'o Cos sa'are rovareje. Rov'ëro nërö va'aroho Rhodes sa'are rova'aroho va'o Patara amore ë suorovareje. ² Patara amore suorovonugoromo gavare boat göho Phoenicia sa'are va'i ë namijamu gagorovo noehu rovare boat-oho vuonugo'i ë boat gagore iojioromomo va'areje. ³ Va'aroho gavare Cyprus sa'aho arue nosi övo adonö jiamu iosiramiromo viëhi rova'aroho Syria sa'are rueromo Tyre amore ravo'amareje jabumëro inömo inöme suovo bahi'iro. ⁴ Ravo'amoromo noro Keriso-are aribövioho nahëvojuvo birohëvoromo jabu'o raromamu hurae gemu barëjadeje. Jabu'o raromamu God-are Aru'ahohuro ë Keriso-are a jabesi örire uehore bojëmi'ego Paul uanövareje: Jerusalem bogave va'iranëjo. ⁵ Èhi uavamu noro jabu'o raromoro nomi majaho barëjumu ri'öromo va'areje. Va'ia'amugo rue Keriso-are aribövioho ae aho'obëhe jabesi vaborohu'o aboji harihu'ohu'o no sö ujuohavuoromo amore jioromo va'areje. Va'oromo sö jovo riröre jabu'o no'o ague aho raromoro God-are örire jöe atareje. ⁶ Atonugoromo göëro göho jejamirovonugoromo noro boat gagore iojioromo'i jaburo vuonorö'ö amëro va'areje.

⁷ Va'iro noro Tyre amoho vuonugo'i boat-re va'aroho va'o Ptolemais amore ro ravo'amareje. Ravo'amoromo Christian aganoho jejëmiromo jabu'o majae gemu raromareje. ⁸ Majae gemu raromë'ëro nërö noro ri'öromo va'aroho va'o Caesarea amore suorovareje. Suorovonugoromo Iesuare jö ma majëhijaje ae Philip-are osare va'oromo ë raromareje. Èaho Philip urimë'i Jerusalem ekaresiahuro hu'o a ioro'iorohu'o 6 ëhi baejëvareje ijo bajo a suvuorëmi'iröhe muoho muebenövo'iröhego. ⁹ Röhu Philip-are abojoho aho'o 4 jaburo bogo masuvë'ëro jöho God-aro baeromo ae huruoho majëhinövareje.

¹⁰ No majae gemu niö'i Philip'o gemu mae raromamu ae gemuëro Judea sa'are jioromo ruvebijadeje. Hesi ihoho Agabus jiadeje. Hu jö God-aro baeromo ae huruoho majëhijaje aëro jië'ëro ¹¹ ri'öromo Paul-are götaho jijövahonugoromo baeromo hesi övo höru'oho tövorovo'amadeje. Tövorovoromo Paul uavadeje: God-are Aru'ahohuro uvavohijajo: Ave göta arijo'ohuro Jerusalem ajiomo'iramu gagorovo Jew rajohuro ë aho ëhi tövonugoromo sa'a ioro'ioro rajo jabesi övore bojëmi'aruëjo.

¹² Agabus-ro jöho ëhi majahijamu hegorovo ë amore Christian ariböviohu'o no'o Paul dinamiro mo ua'i arijareje: Èhi jië'oho bogave Jerusalem ajiomo'iranëjo. ¹³ Bogave ajiomo'iranëjumu Paul-ro uövuadeje: Jemë rabëni nierusuburu'e bamoromo nasi uehoroho aheho'ego na huë vavaenoho baejajëjo. Èhi jië'oho vuonugohëjo. Naehu Jerusalem ajiomo'iramu Bada Iesuare jöhuni tövavo'aruë uevarujoho iae eni jiajëjo. O anegamu guomev'ëho ëhu'o iae eni jiajëjo. ¹⁴ Èhi uövuamu noro gavare bogo ejahuamu gagorovo dinamijaroho vuonugo'i uavareje: Èhi jië'oho no naguajëjo Badahu nimaje muoho jioröhego.

¹⁵ Èhi'amu gagorovo inömo inömo ho avohoromo Jerusalem amore iojioromo'iro ë'areje.

¹⁶ Iojioromo'irögoro Caesarea amo rajo Keriso-are a ioro'iorohuro söjavuo va'oromo a ihe Mnason-are osare rovareje noro hu'o raromo'iröhego. Röhu Mnason hu Cyprus sa'a raje jiadeje. Hu mami gö'e aevoromo Keriso mae uehorovadeje.

Paul-hu Jerusalem ajiomoromo ekaresia muebejëvaje ae James ga'i va'ade jöhoje.

¹⁷ Iojioromomo Jerusalem suorovamu nosi Christian ö mueno'ohuro jabesi dë vövöbajo'e aho'o jejamuijareje. ¹⁸ Jejamuijë'ëro nërö Paul-ro no'o gemu mae James ga'i va'adeje. Va'oromo gavadeje ekaresia a duvahoho aho'obëhe jaburo James'o gemuore raromoruomamu. ¹⁹ Raromamu gëgorovo Paul-ro jejëmijadeje. Jejëmiromo uëvadeje: Naehu Keriso-are jö majëhibe juvodohuro ëhuro God-ro sa'a ioro'ioro rajoho ëhi ëhi ajëmijade höjo. Èhi jië'e jöho Paul-ro majëhi barëjadeje.

²⁰ Majëhijamu hegorovo rueho jaburo God rajahijareje. Rajahiromo Paul uavareje: Öho röhu Jerusalem amoroho diehi jiego ja gavanue höjo. Èhesi bëhoho Jew raje ae

aho'obêhe Iesu mae uehorovarue hõjo. Mae uehorovoromo rõhu jabumë ae aho'o Moses-are jõgoroho nimo avoharue hõjo. ²¹ Moses-are jõgoru nimiruoho hejare hõjo sareri'e jõho uvavamu: Paul jero sa'a göre göre va'oromo Jew rajoho aho'obêhe jõe bojëmibe juvoromo uëvanue hõjo: Moses-are jõgoroho vuonugohõjo. Moses-are jõho vuonugoromo jemesi harihu jabesi sino tarivëharujoho vuonugoromo Jew rajo nosi mu ioro'iorohu'o vuonugohõjo. ²² Jaehu ëhi majëhijane sareri jõ ave raromarue aribövioho hejaroho he'a'aruëjo uvavo'iramu: Jero Jerusalem rovane hõjo. Ëhuni ja diehi'oromo Jew rajoho rõjëhi'iramu garomo uvoruomo'ajëjo: No sareri jõe hejare hõjo. Moses-are jõgoroho ja bogo vuonugë'e javajëjo. ²³ Jaehu diehi ë'irane jõho no ua'ie'aruëjo. Ae aho'o 4 jabu no'o raromaruëjo. Iae urimo ë ariböviohuro Jew rajo nosi muoho aevoromo vaeromo God uavare hõjo: God jasi nunëro jero gö'ego no muoho ëhi ëhi vae'ejarëjo. ²⁴ Jabumë ëhi jië'e Jew rajo muoho vaejë'e jioruomaje ëhuni jero jabumë sõjëvo va'oromo ajëmiromo jabu'o gemu mae bimuvoromo sisë barëjëho'irõhe muoho vaeromo eni jiego ë ae 4 jabesi jõëni monie bojëmego mie imoromo God-ni suvuore bahijahego ëhuro jabesi simano uoho tariojëho'irarëjo. Jaehu ëhi Jew rajo mu ajëmiromo vaejë'oho ëhuro Jew raje Christian ae aho'obêhe ja garomo uehorovoromo uvoruomo'ajëjo: Paul jaehu Moses-are jõgoru vuonugane jõ hejaroho ëho ma-sareri'e jõe hõjo. A'i Moses-hu uövuade jõho iae ja ejahë'e hijanue hõjo. Jabumëro ëhi uvoruomo'ajëjo. ²⁵ Iae Jew raje noro Moses-are jõho ëhi ma'eno'ejarëjo. Rõhu sa'a ioro'ioro raje Iesu mae uehorovarue ariböviohuni urimë'i noro jõe gö uehorovoromo jajivoromo nugõ'õromo uëvare hõjo: Aehu sareri'e god göëni göëni bahijë'e mioho nadi ue'ahorëjo. Mi hesi kõho nadi ue'ahorëjo. Huë ahahë'e mioho kõ'e jiaje nadi ue'ahorëjo. Nadi õnõ'oho jijihorëjo.

²⁶ Ëhi uvavamu hegorovo Paul-ro ejëhë'ëro nërõ ë Jew raje ae 4-ho sõjëvo va'oromo ajëmiromo jabu'o gemu mae Jew rajo muoho vaejadeje jabesi sisëho barë'irõhego. Ëhi'onugoromo Paul-ro God-are osa bõrõmore va'oromo priest aribövioho uëvadeje: Majae ëmino'e barë'iramu evare ë ae 4 jabesi o nasi sisëho barë'ajëjo. Barë'iramu evare ae gemu gemu nosi jõhuni God-ni mi suvuore bahi'ejarëjo.

Paul-hu God-are osa bõrõmore hijamu Jew rajehu guduamo bava'oruomade jõhoje.

²⁷ Paul-ro ëhi majëhijamu va'o huhu uëvade majae 7 barë'ië'adeje. Barë'ia'amu evare Asia sa'are jioromo rovare Jew rajo a ioro'iorohuro gavareje Paul God-are osa bõrõmore jiamu. Paul osa bõrõmore jiamu gagorovo ri'õromo iro muorovo'e vae'iro jõe darugo'o atamu ae aho'obêhe heromo uehoro sisë baeruomadeje. Uehoro sisë baeruomamu Asia jioromo rovare ariböviohuro Paul guduamareje. ²⁸ Guduamoromo ma-darugo'o uvareje: Israel rajoho jemëro ro ajamuihõjo. A sisëho aviae hõjo. Huro Jew rajo nosi ihoho Moses-are jõgoroho ave God-are amo bõrõmoho ë hesi jõho ijumo'amoromo ae aho'o jabesi õrire sisë'i rõjëhibe sa'ae dinõ'e dinõ'e juvaje hõjo. Jaruvoho huro sa'a gö rajo aho sõromo ave God-are osare rovamu ëhuro osa maho ijumë'e hõjo. Ëmu sisëhu'o ë'ë'e hõjo. ²⁹ Ëhi uvare hesi bëhoho urimo jaburo gavare Ephesus amo rajo ae Trophimus Paul'o gemu mae Jerusalem jiamu gavë'ëro uvareje: Nani Paul-ro God-are osare hu barovë'e hõromomo ëhuni darugo'o uvareje: Paul-ro sa'a gö rajo ae aviae barovë'e hõjo.

³⁰ Ëhi uvavamu hegorovo Jerusalem amo raje ae aho'obêhe ri'õromo võrõ'iraeromo tutubijohoromo gemuoro gagovoromo Paul God-are osare jiamu guduamo bava'areje. Bava'amu gavë'i God-are javuoho ojoho tugoho'amareje. ³¹ Tugoho'amamu ae aho'obêhe jaburo Paul guomojõro ano'ia'amu gavë'i aëro jõe bava'oromo Rome muorovo a bõrõmoho uavareje: Jerusalem muorovo'irõgoro ë'oruomajëjo. ³² Muorovo'irõgoro ë'aruëjamu hejë'i rue muorovo a bõrõmohuro hesi bëhire muorovo simano vaejarue ariböviohu'o muorovo a ioro'iorohu'o sõjëvoromo ma-burëro tutuvo ruvebijadeje muorovo'i ë'aruoho ahëvu'o. Ruvebijamu ae aho'obêhe gavare muorovo a bõrõmohu'o muorovo a ioro'iorohu'o rovamu gëgoro Paul anaroho vuonugareje. ³³ Vuonugamu muorovo a bõrõmohuro rueromo Paul guduamoromo ae uëvadeje: Õ'e niõ'i barueromo tõvohë uëvamu tõvareje. Tõvamu gagorovo muorovo a bõrõmohuro uëvadeje: Ave aho rahuo hõjo. Rabe ë'ego

ëhuni anarujëjo. ³⁴ Anarujëjamu ae aho'obëhe ri'öromo jöe gö gö mana ma-darugo'o uvoruomadeje. Amo ëhu'ëro jöjöje böröme jiamu a börömoho Paul-are jöho bogo avoho hejadeje. Bogo avoho hejë'ëro hesi aribövioho uëvadeje: Ave aho hu'iraeromo aruhe muorovo a nosi osaro iojiomohëjo. ³⁵⁻³⁶ Iojiomohëjamu hu'irae bava'oromo vuahure iojiomo'irögoro gavare ae aho'obëhe vörö'iraeromo gemuoro tatijiomobe Paul anojöro uvobe ijore jijihoruomamu gëgorovo Paul döro nigemo baeromo iojiomareje.

Paul-hu ae aho'obëhe jabesi nunire namiromo hesi arijo'arije ajamirovoromo jö majëhijade jöhoje.

³⁷ Iojiomoromo muorovo osare bava'ia'amu gagorovo Paul-ro a börömoho uavadeje: Naehu jasi örire jö majahijë'oho na mae höjo. Na mae höjamu rue a börömohuro uavadeje: O-ajo. Ja Greece a jabesi jöëro jövanuëjo. ³⁸ Naro uvode höjo: Ja Egypt sa'a rajo ae javajëjo. Na uehorovoromo uvode höjo: Jero urimë'i muorovo jöho barueromo vörö'e aribövioho 4,000 gagovoromo a rumo'e sa'are sö va'ane höjo Rome a masijohu'o muorovo'iro. Ja ë aho javajë uvode höjo röhu nani ja ae gö javajëjo. ³⁹ Javajëjamu Paul-ro uavadeje: Io'ajo. Na Jew raje jevajëjo. Cilicia sa'are Tarsus amore rahevade höjo. Nasi amo hesi ihoho böröme höjo. Röhu na negajëjo jero uevego na ae aho'obëhe jabesi örire jö harihe majëhi'iro. ⁴⁰ Èhi uavamu rue a börömohuro Paul uavadeje: Iae mae höjo. Jöho jövëjo. Jövëjamu hegorovo Paul-ro vuahure namiromo ae aho'obëhe övëro tugohëvadeje. Tugohëvoromo jörumoraejamu jabesi Hebrew jöëro majëhijadeje.

22

¹ Majëhiromo uëvadeje: Nasi a duvahohu'o ö mueno'o ioro'iorohu'o nasi jö harihu majëhi'ie'ajoho hehëjo. Na mu sisë rabe rabe bogo ömë'ëro i'uocho bogo bae'irodëro ë hesi jöho majëhi'ie'ajëjo. ² Majëhi'ie'ajëjamu ae aho'obëhe urimo jö vuonugaroho hejare Paul-ro jabesi Hebrew jöëro majëhijavamu hegorovo jörumorae barëjareje. Jörumorae barëjamu Paul-ro uëvadeje: ³ Na Jew rajo ae jevajëjo. Cilicia sa'are Tarsus amore rahevë'ëro Jerusalem rovode höjo. Rovamu Gamaliel-ro röjehijamu Jew rajo muoho hebe rovode höjo. Nosi hijo miono'ehu röjahuibe rovere jögorohuremu he avohoromo jemëhu God-are muemu uehorovarujëhi na'o ëhi gemuoho uehorovonövode höjo. ⁴ Èhi gemuoho uehorovoromo ganövode aëro Iesuare örire jijiholego gëgorovo huë sisë bojëminövode höjo. O aëro jabu muo'amego vuovëvojöro uënövode höjo. Aho magonahoho gudu-amo'amoromo savoji gagore jo'amonövode höjo. ⁵ Priest börömohu'o Jew rajo a masijo ioro'ioroho aho'o nasi muoho gavë'ëro jemë uë'a'aruëjo: Nöröro mae uëvajëjo. Èhesi bëhoho urimë'i ë a masijoho jaburo Christian a guduamo'amo'irode jö'e suri surioho i'imemijare höjo naro Damascus amore ujuoho va'oromo Jew rajo nosi ö ömo'ömocho i'imëmi'irodego. I'imemamu naro ujuohoromo ë va'ode höjo Christian aribövioho guduamoromo tövo ujuohoromo Jerusalem vuonorö'ö rovego i'ue baerumoröhego.

Paul-hu aevoromo Keriso mae uehorovade jö majëhijade jöhoje.

⁶ Örire va'ojuvo maja ririre jiamu Damascus amore hörö'i gavodeje aji börömoho ma-majioho ö'idöre jioromo ruvebiromo ajivevamu. ⁷ Ajivevamu gavë'i sa'are behu-morovoromo hejodeje uevavamu: Asë'e Saul ja rabëni na sisë vaejevanue höjo. ⁸ Sisë vaejevanue höjamu uavode höjo: Bada ja rahuo javajëjo. Rahuo javajëjamu uevade höjo: Na Nazareth rajoho Iesu jaehu sisë vaejevanue aho jevajëjo. ⁹ Èhi uevamu na'o jijihare ariböviohuro ajohemu ga'i huëho bogo hejare höjo. A'i naremuëremu huëho hejode höjo. ¹⁰ Heromo uavode höjo: Bada na diehi ë'ëjöjo. Diehi ë'ëjöjamu uevade höjo: Ri'öromo va'oromo rue Damascus amoro hinëjo. Hiromo jaehu vae'irane mu God-hu uvadoho aho'o he'a'anuëjo. ¹¹ Èhi uevamu aji börömoho gavë'ëro nasi nunoho sue'iraejehade höjo. Nunoho sue'iraejhamu nasi ariböviohuro övore ma'eno baejevo va'oromo Damascus amore suorovare höjo. ¹² Röhu ë amore ae gemu hesi ihe Ananias hijë'e jiade höjo. Hu Jew rajo nosi jögoroho avoho eromo God rajahijaje aëro jië'ëro Jew raje Damascus raromarue aho aho'obëhe jaburo hesi jöho mae uehorovare höjo. ¹³ Èaho Ananias-ro rueromo bëhire

namiromo uevade hōjo: Ōho Saul nunoho dadovahego rōhu maho avoho uherihējo. Uherihējamu gavē'i nunoho ma-burēro dadovehamu hu gavode hōjo. ¹⁴ Gavamu uevade hōjo: God nosi hijo miono'e muebejēvobe rovade ahuro ja baejavade hōjo jero huhu nimaje muoho baeromo hesi A Maho nunēro garomo A Ma hesi huēho he'iranego. ¹⁵ Ēhesi bēhoho hesi jō majēhijanue ae javo'ajējo jaehu garomo hejane jōho ma-maemu majēhijego ae aho'obēhe heruomo'irōhego. ¹⁶ Rōhu rabēni gō'oho muebenējo. Ri'ōromo bapataeto vaeromo Badare ihoho uvego jasi sisēho u'ovaho'irajo.

God-hu Paul uavamu Jew rajo jabesi sa'are bogo a'i sa'a ioro'ioro rajo jabesi sa'are va'oromo ajēmade jō Paul-hu majēhijadohoje.

¹⁷ Ēhi'amu naro vuonorō'ōromo Jerusalem rovode hōjo. Rueromo God-are osa bōrōmore va'oromo hesi ōrire jōe jōvoromo nia'ovonō'e gavode hōjo ¹⁸ Bada Iesuro ro uevamu: Ma-burēro Jerusalem amoho vuonugo'i va'ējo. Ēhesi bēhoho jaehu nasi jō majēhijē'oho ave amo rajoho bijōnēgo'ajējo. ¹⁹ Bijōnēgo'ajējamu uavode hōjo: Iae mae hōjo rōhu naehu diehi jī'e mu vaenōvodoho ave aribōviohuro iae mae gavarue hōjo. Naro Jew rajehu God rajahijarue osare va'oromo ja mae uehorovavarue aribōvioho guduamo ujuoho va'oromo savoji gagore io'amonōvo hisuebijēvonōvode hōjo. ²⁰ O aēro jasi jō majēhijaje ae Stephen anamu gagorovo na ē jevē'ēro uvode hōjo: Jabuhu Stephen anaruoho iae mae ē'aruēromo jabesi niōgu jōvo bahijaroho muebejēhode hōjo. Ējōho ave aribōviohuro iae mae gavarue hōjo. ²¹ Mae gavarue hōjamu Badaro uevade hōjo: O va'ējo. Naro ōre ēgobōviro ramō'ō'ejōjo jero sa'a ioro'ioro rajoho nasi jōho majēhi'iranego. ²² Paul-ro ēhi majēhijamu ae aho'obēhe hebe rueruomē'ēro hejare uēvavamu: Sa'a ioro'ioro rajoho majēhi'iranego ramō'ō'ejō uēvamu hegorovo hejaroho vuonugo'i vōrō'iraeromo ma-darugo'o uvo'i arijareje: Ēaho anohējo. Huhu ave sa'are hijajoho sisē hōjo. ²³ Ēhi ma-darugo'o uvoruomē'i niōgoho jōvoromo hijihijiovē'i tohotohoho dōro ruruhō'ō'i arijareje. ²⁴ Ruruhō'ō'i arijamu gagorovo rue muorovo a bōrōmohuro hesi aribōvioho uēvadeje: Jemēro ave iaho nosi osahuro hu'irae bava'oromo hesi dēho bijioho ga'i hisuebiromo uarējo: Rabēni anagojōro uvaruējo. ²⁵ Uvaruējamu Paul osare bava'oromo hisuebi'irōgorovo tōvamu Paul-ro gavade a bōrōmo ajamiromo mu simane vaejaje ae gemu aruēre namijamu gagorovo uavadeje: Na Rome raje jevājējo. Rōhu bogo court vaejevē'e ēma hisuebijevō'iro ē'arujējo. Rome rajo nosi jōgoroho bogo ēhioho hōjo. Ēhi jī'ē'oho jemē rabēni ēma hisuebijevō'iē'arujējo. ²⁶ Ēhi uavamu hejē'i rue simano vaejaje ahuro va'oromo muorovo a bōrōmoho uavadeje: Ja rabē'i ē'anuējo. Ēaho Rome raje hōjo. ²⁷ Ēhi uavamu hegorovo rue a bōrōmohuro rueromo Paul uavadeje: Uvego na hejōjo. Na ja Rome raje javājējo. Javājējamu Paul-ro uavadeje: Io'ajo. ²⁸ Io'ajamu a bōrōmohuro uavadeje: Naro moni bōrōme bu'ōjē'ēro ēhu'ēro na Rome raje jevājējo. Jevājējamu Paul-ro uavadeje: Rōhu na monioho bogo bojēmi'i a'i nasi vēmu vavu'ohuro baejevamu evare na Rome raje jevade hōjo. ²⁹ Ēhi uavamu hejē'i evare Paul hisuebijē'i ua ga'iē'are aribōviohuro huruomo va'o rori'o riravareje. Rori'o riravamu rue a bōrōmohuro uehorovoromo uvadeje: Rome raje tōvē'e jevājēromo juhuonivadeje.

Paul Jew rajo a masijo jabesi nunire namijade jōhoje.

³⁰ Muorovo a bōrōmohuro juhuonivē'ēro nērō uvadeje: Nume Jew rajo aribōviohuro Paul-are jōho rabu jō sisē majahu'iē'aruēromo ae gō uēvadeje: Paul tōvare ō'oho jiovahohē'i ae gō uēvadeje: Abueromo uēvego Jew rajo priest masijohu'o Jew rajo masijo ioro'iorohu'o gagovorego na jabesi jōho he'irōjo. Ēhi ē'ē'ēro Paul hu'irae ba'obueromo Jew rajo a masijo jabesi nunire nugadeje.

23

¹ Jew rajo a masijo jabesi nunire nugamu Paul-ro gē avohoromo uēvadeje: Aganomē God-are nunire na sa'are hiromo rabe rabe ē'obe rovodoho na nasi herovajoho na ma-mae jevājējo. ² Ma-mae jevājējamu hegorovo priest bōrōme Ananias-ro Paul-are bēhire riravare aribōvioho uēvadeje: Paul jō'oro anohējo. ³ Anohējamu hegorovo Paul-ro ri'ōromo priest

börömoho uavadeje: God-ro ja'lo anago'ajëjo döhemu ajivav'e aego. Ja aviae hijanuëjo mevoromo ga'iranëro na nosi jögoroho mae ejë'e jevego o bogo ejë'e jevego. Röhu jero ë jögoroho ahoromo uëvanuëjo: Paul anohëjo. ⁴Paul anohëjamu Paul-are bëhire riravare ariböviohuro Paul uavareje: Asë'e jero God-are priest börömoho aganuëjo. ⁵Aganuëjamu Paul-ro uëvadeje: Aganomë naro uvode höjo: Ëaho bogo priest börömehu höromo jövode höjo. Na uehorovo'ibejjo na bogo ëhioho jövo'ibejjo. Ëhesi bëhoho God-are surire jöho jajivoromo ëhi uövuë'e höjo: Jasi aribövi muebejëvaje aho nadi agonëjo.

⁶Ëhi uënuoromo Paul-ro gavade ë a masijo ioro'ioroho Sadducee aribövie jioruomola ioro'ioroho Pharisee aribövie jioruomamu gëgorovo ë a masijo jabesi nunire ma-darugo'lo uëvadeje: Aganomë na Pharisee ae jevajëjo. Nasi vëmu vavu'oho Pharisee aribövie jëvade höjo. Na court-re namijaje hesi bëhoho Pharisee aribövi noehu uehorovaruëhi naro ëhi uehorovoromo uvaje höjo: Vuovë'e ariböviohuro i'ovoromo röhu maho ri'oruoma'ahëjo.

⁷Ëhi uëvamu hejë'i Pharisee ariböviohu'lo Sadducee ariböviohu'lo irovoromo uehore gö gö baeruomadeje. ⁸Uehore gö gö baeruomade hesi bëhoho Sadducee ariböviohuro uvoruomajeje: Vuovë'e aribövioho bogo i'ovo'aruëjo. O anerahu'lo aru'aho ioro'iorohu'lo bogohöjo. A'i Pharisee ariböviohuro uvoruomajeje: Vuovë'e aribövioho iae i'ovo'aruëjo. Anerahu'lo aru'aho ioro'iorohu'lo iae jioruomajëjo. Iae ëhuni Sadducee ariböviohu'lo Pharisee ariböviohu'lo Paul-are jöho heromo irovareje. ⁹Irovoromo darugo'lo uvobe rueromo Jew rajo jabesi jögoru öri röjëhijarue ahuro Pharisee aëro jëvë'ëro ri'öromo ma-darugo'lo uëvareje: No gavaruoho ave aho sisë rumo'e ae höjo. Nani mae-ëjo. Nani aneraëro o aru'aho göëro hesi örire jöe majahijë'ëro jövajëjo. ¹⁰Ëhi uënuoromo irovoromo börömo bëhe vör'iraeruomamu gëgorovo rue muorovo a börömohuro juhuonivadeje Jew rajohuro Paul-are övore duruajore ruhamirovego tariorovojöëni. Juhuonivoromo va'lo hesi muorovo aribövioho uëvadeje: Abo nume ae aho'obëhe jiaruro ëhuro Paul baeniëhiromo hu'irae ba'ojiomoromo muorovo a nosi osaro nugarëjo.

¹¹Ëhi'amu vahiromamu gagorovo Badaro rueromo Paul-are bëhire namiromo uavadeje: Nadi juhuonivo'i ma-biririvoromo hinëjo. Ja nasi jö Jerusalem ma-mae majëhijanëhi Rome amoho ëhu'lo va'oromo nasi jöho ëhi ma-maemu majëhi'anuëjo.

Jew rajo ae göehu göehu Paul ano'i uvoruomade jöhoje.

¹²Ëhi uavë'ëro sisonuvamu gagorovo Jew rajo ariböviohuro gagovorovoromo jöe atoromo uarovareje: God-ro gö'ëgo no ioho jovoho bogo i'ëjarëjo hujeji Paul anogoro evare iröhëro. ¹³Ëhi uarovare aribövioho ae aho'obëhe 40 iosirëmiromo ruëhi jiadeje. ¹⁴Ëhi uarovoromo va'oromo priest masijohu'lo a duvaho ioro'iorohu'lo uëvareje: Noro darugo'e jöe atoromo uarovare höjo: God-ro gö'ëgo no ioho jovoho bogo i'ëjarëjo hujeji Paul anogoro evare iröhëro. ¹⁵Ëhuni ave muoho vaenëjo. Jemë'lo Jew rajo nosi a masijo ioro'iorohu'lo Rome muorovo a börömohuni jöho nugö'öromo sareramiro mo uarëjo: Paul röhu maho hu'irae baruvebijego jö mevarue ariböviohuro hesi jöho he avoho'irarëjo. Jöe nugö'öromo ëhi uarëjo. Röhu muorovo ariböviohuro jemesi jöho eromo Paul hu'irae barovamu gavë'loho noro örire atovoromo rue'iramu ano'ëjarëjo.

¹⁶Ëhi majëhijamu Paul-are ma'ino hesi harihohuro Paul anoröhe jöho hejadeje. Heromo ruhe muorovo aehu raramarue osare ajiomoromo Paul huruoho majahijadeje. ¹⁷Majahijamu hegorovo Paul-ro muorovo simano vaejaje ae gemuëni uvadeje: Rovego na jöe majahijöromo rovamu uavadeje: Ave a i'oho muorovo a börömo hesi öroro hu'irae va'ëgo hesi jöho majahi'irajo. ¹⁸Majahi'irajamu hu'irae bava'oromo muorovo a börömoho uavadeje: Ave a i'lo naehu barovode hesi bëhoho ë hisiehu tövë'e aho Paul-ro hesirire va'ojöro uvevonugoromo naro va'amu uevade höjo: Ave a i'oho bava'ëgo hesi jöho a börömoho majahi'irajo. Ëhuni barovode höjo. ¹⁹Barovode höjamu rue a börömohuro a i'oho övore ma'ëno bava'oromo va'lo rori'lo jabesi sivue ariromo uvadeje: Rabu jöe majehi'ie'anuëjo. ²⁰Majehi'ie'anuëjamu a i'ohuro uavadeje: Jew rajo ariböviohuro uarovare höjo: Nëri muorovo a börömoho sareramiro mo ua'ëjarëjo: Paul baruvebijego Jew rajo jö mevarue a masijohuro hesi jöho he avoho'irarëjo. ²¹Ëhi uarovë'e jiaje

ēhuni Jew rajehu nēri jō majahijē'oho nadi ejēhoromo Paul Jew rajo a masijo jabesi ōriroho hu'irae ba'obue'i ave osaro nugonējo. Ēhesi bēhoho Jew raje ae aho'obēhe 40 iosirēmiromomo ruēhi ėmino'e gurihirovoromo atovo'aruējo Paul rovego anorōhēni. Ēhesi bēhoho urimē'i uarovare hōjo: God-ro gō'ego no ioho jovoho bogo i'ejarējo hujeji Paul anogoro irōhēro. Ēhi uarovare hōjo. Rōhu jaruvo jabumē bövie bise'e avohē'ēro jiē'ēro raromo muebejaruējo hujeji nēri jasi jōho he'irōhēro. ²² Ēhi majahijamu hegorovo rue a bōrōmohuro a i'oho uavadeje: Jaehu majehanue jōho bogave aho majēhi'iranējo. Ēhi uanugoromo nugō'ōjamu va'adeje.

Muorovo a bōrōmehu Paul nugō'ōjamu Jerusalem jioromo Caesarea amore va'ade jōhoje.

²³ Va'amu gagorovo rue muorovo a bōrōmohuro hu ajamiromomo simano vaejarue aho niō'i uēvadeje: Ruehego na jōe majēhijōjo. Rovamu uēvadeje: Kaejō ēgehu muorovarue aribōvioho 200 o horse-re jijihoromo muorovarue aribōvioho 70 o bijehu muorovarue aribōvioho 200 ēho gagovēvego jaburo vahi'e 9 o'clock evare va'irarējo. ²⁴ O horse gō avoho'amego Paul-ro jabesi dōre hiromomo va'onōvo'irajo. Eni romoromo jiego evaro va'oromo Paul avoho hu'irae baeromo muebebe va'orego ēhuro bogo anego guomo'i sa'a muebejaje a bōrōme Felix-arire mae va'irajo. ²⁵ Ēhi uēnugoromo muorovo a bōrōmohuro jōho surire jajivoromo uavadeje: ²⁶ O asē'e Felix ja a bōrōme Claudius Lysias naro jasi ōrire jejamijajējo. ²⁷ Ave nugō'ōjaje aho Jew rajo aribōviohuro guduamoromo ano'iē'are hōjo. Ano'ia'amu naro hejode uvavamu: Hu Rome raje hō uvamu hegorovo naro nasi muorovo aribōviohu'o gemu mae va'oromo gēvode ano'ia'amu gēgoro baeniēhiromomo hu'iraeromo rovode hōjo. ²⁸ Rueromo he'i negade hōjo uevego: Ēhi ēhi ē'amu noro Paul ano'iro ē'are hōjo. Ano'iro ē'are jōho he'i negamu naro Paul hu'iraeromo Jew rajo jabesi jō mevarue a masijo jabesirire abuejode hōjo jō bēhoho he'iro. ²⁹ Hu'iraeromo abueromo bēhoho hejode hōjo. Ano'iē'are bēhoho Jew rajo aribōviohuro uevare hōjo: Paul-ro Jew rajo nosi jōgoroho ahade hōjo. Ēhi jiē'e jōhuni ano'iē'are hōjo. Rōhu na gavode hōjo mu sisē vaejogo mana anaruēhi jiē'e mu sisēho o mu sisē vaejogo savoji gagore ba'amaruēhi jiē'e mu sisēho ēhi jiē'e muoho Paul bogo vaejē'e jiamu. ³⁰ Ēhi gavē'ēro va'o ijonō hejode ae gōēro huruoho majehiromomo uevamu: Jew rajēro Paul ano'i ōrire atovo'aruē uevamu hejē'ēro na ma-burēro Paul Felix jasi ōrire nugō'ōjajējo. Hu jasi ōrire nugō'ōromomo Jew rajo aribōvioho uē'irōgoro ē'ajējo jaburo Felix jasi ōrire ō'oromo Paul-are jō sisēho majahego jero he'iranego. Ahia mino'ējo.

³¹ Ēhi jajivoromo vahiomamu gagorovo muorovo aribōviohuro jabesi a bōrōmoho ejahoromo Paul hu'irae va'oromo Antipatris amore ē suovareje. ³² Amore suorovoromo sisonuvamu gagoro muorovo a ioro'iorohuro jabesirēro va'irōgoro horse-re jijihoromo muorovarue aribōviohuro ri'ōromomo Paul hu'iraeromo va'areje. ³³ Va'aroho va'o Caesarea amore ē suovareje. Caesarea amore suorovoromo Paul barovare jō hesi suri surioho sa'a a bōrōmoho bojamiromomo uavareje: Aveho Paul hōjo. ³⁴ Aveho Paul hōjamu sa'a a bōrōmohuro suri surioho adahoromo Paul uavadeje: Ja di sa'aho raje javajējamu Paul-ro uavadeje: Cilicia sa'a raje jevajējo. ³⁵ Cilicia sa'a raje jevajējamu a bōrōmohuro uavadeje: Jasi jō sisē atarue aribōvioho rue'iramu evare na jasi jōho he'ejōjo. Ēhi uanugoromo hesi aribōvioho uēvadeje: Paul hu'irae va'oromo Herod-hu vaejode osa bōrōmoro nugego atovarue aribōviohuro ē muebe'irarējo.

24

Paul sa'a muebejaje a bōrōme Felix-are nunire namijamu Jew rajo a ōmo'ōmehu Paul-are jō sisē majahijare jōhoje.

¹ Paul osare nugamu majae ōvo gō mine barējamu gagorovo priest bōrōme Ananias-ro Jew rajo a duvaho ioro'iorohu'o jabesi court jō majēhijaje ae gemu Tertullus hu'o ē aribōvioho sōjjevōromomo Caesarea amore ē ruvebijadeje. Ruvebiromomo sa'a a bōrōme Felix hesi nunire riravoromo Paul-are jō sisēho huruoho majahijareje. ² Majahijamu Tertullus-ro jōho majahijōro Felix-ro uavamu hegoro Tertullus-ro ri'ōromomo Paul-are jō

sisêho majahiromo uavadeje: Na jö majahi'iê'ajoho henêjo. Ja a böröme javajêjo. Jero avoho muebejavuê'êro majae êgobövie no iro muorovo'oho bogo vae'i ma-mae raromobe rovê'e javuajêjo. O mue rabe rabe bogo eni javuobe rovê'oho jero ajamuego nosi sa'aho mu maêremu ri'ôjogo no huê mae raromarue hõjo. ³ Êhuni Felix jaehu vaejanue muoho dirö'e aho'o majae aho'o mae hõ uvoromo dë vövöbajo'e aho'o jasi ôrire rajahijarue hõjo. ⁴ Röhu na jasi mu majaho bogo anahoromo jö êgoho majahi'i ma-bunemu majahi'iê'ajêjo. Êhuni uavajêjo: Huê baejavuoromo nosi jö harihoho avoho henêjo.

⁵ No gavê'e javuajêjo ave aho Paul a sisê bëhe jiamu. Hu jö sisê jövobe sa'ae dinö'e dinö'e juvoromo Jew rajo jabesi dë iêhego muorovo'i vörö'iraeruomaje hõjo. Iesu Nazareth rajo a hesi sisê aribövi jabesi simano vaejarue aho Paul hu'oje. ⁶ Êhi jiê'e aëro jiê'êro huro God-are osa börömoho ijumo'iro ê'amu gagorovo noro guduamare hõjo. [Guduamo bava'oromo noro court vaeromo Jew rajo nosi jögoroho uehorovoromo hesi jö sisêho ga'irögoro ê'amu ⁷ muorovo a böröme Lysias-ro ô'oromo ma-darugo'o baeniahuiromo ruho bava'ade hõjo. ⁸ Bava'onugoromo huro Jew rajoho no uövuade hõjo noro Caesarea ruvebiromo Paul-are jö sisêho huruoho majêhijego Felix jero he'iranego.] Röhu jaehu Paul ua gavê'oho hesi jö sisê noehu majahijaruoho jasi hia'êro he barê'anuêjo. Ahia mino'êjo. ⁹ Êhi majahijamu hejê'i Jew raje ae aho'obêhe jaburo hu ajamiromo uavareje: Tertullus-ro jö mae jövajêjo. Paul hu êhi jiê'e ae hõjo.

Paul-hu Felix-are nunire namiromo hesi arijo'arije ajamirovoromo majahijade jõhoje.

¹⁰ Êhi majahiruomamu rue sa'a a börömohuro uvene aho røjahijadeje Paul-ro garomo evare hesi jõho jövojöro. Êhi'amu gagorovo evare Paul-ro majahiromo uavadeje: Iae na gavajêjo jaehu jö mevanue mu hesi ôri muebebe rovanoho vadune aho'obêhe barêjê'e javajêjo. Êhuro na dë mae jevo'êgo nasi jõho majahi'iê'ajêjo jero heromo uvovjõro: Paul mu sisêho bogo vaejê'e hõjo. ¹¹ Naehu majêhi'iê'aje jõho jasi nagê'oho ae uê henêjo mae o sarere jiego. Naehu God rajahi'i Jerusalem ajiomodoho maja êgoho bogo barê'i majae 12 êhuremu barêjê'e hõjo. ¹² Jerusalem hijodevaroho nasi jö sisê majahijarue aribövioho na mu sisê vadu'oho bogo vaejamu jabumê gevê'e hõjo. God-are amo börömore hiromo na ae gö'oho bogo jö aho'ahoho ê'ode hõjo. Jew rajehu God rajahijarue osare osaroho o Jerusalem uhure dinö'e dinö'e na bogo mu sisêho vaeromo jö sisêho majêhijode hõjo aëro iro muorovo'e vaejõro. Na êhi jiê'e mu sisêho bogo vaejamu jabumê gevê'e hõjo. ¹³ Bogo vaejamu gevê'êro jö bëhi ja majahijego heromo mae uehorovo'iranoho jabesi ôriroho bogohõjo. Bogojjê'e nasi ôrire êma nibejeharuêjo. ¹⁴ Ruêroho numêroho na bogo ömo'i ave ömaje jõhemu huruoho majêhi'irodoho jevajêjo. Na Iesuare ôri i'ore juvaje hõjo. Röhu ave Jew rajoho jaburo uevarue hõjo: Êöroho sisê ôriro juvanue hõjo. Êörire iae na ê juvoromo êhuro nosi hijo miono'o muebejêvobe rovade aho God rajahijaje hõjo. Iae na êhi ê'aje hõjo röhu Jew rajehu ê'aruêhi Moses-hu bojamuade surire jögorohu'o jö God-aro baeromo majahuinövere a jabesi surire jõhu'o na'o êhi mae uehorovo avohaje hõjo. ¹⁵ O ave Jew rajehu ê'aruêhi na'o êhi gemuoho God mae uehorovoromo uvaje hõjo: God-ro vuovê'e aribövioho a mahu'o a sisêhu'o i'ovavuo'iramu ri'ô'ejarêjo. ¹⁶ Êhi uehorovoromo God-are nunire o ae aho'o jabesi nunire mae namijego dë mae jevo'iröhohuni êhuni na ömo gavaje hõjo. Na êhi jiê'e ae jevajêjo.

¹⁷ Êhi jiê'e aëro jevê'êro öre gö hiromo vadune gö gö barêjamu evare ijo bajoho ujuohoromo Jerusalem rovode hõjo nasi aribövioho suvuorëmi'irodëro. O rovode hõjo Jew rajo muoho vaeromo bijuêmare mioho God-are ôrire suvuorami'irodëro. ¹⁸ Jerusalem ro hiromo êhi jiê'e muoho vaejamu evare Jew rajohuro ro gevare hõjo na God-are osare jevamu. Röhu na urimo Jew rajo muoho vaejamu sisêho barê'i ma-mae jevê'êro êhu'êro na God-are osare jevadoho iae mae jiade hõjo. Röhu göho jabuhu gevare majare ae aho'o na'oho bogojio'i iro muorovo'e jöjõje rabe rabe bogojade hõjo. ¹⁹ Na êhi mae hijamu jaburo gevare hõjo. Röhu Jew raje Asia sa'are jioromo rovarohuro ë osae gemuore jiare hõjo. A'i jabumê aveho bogo rovare hõjo. Êaribövioho jabumê nasi jö sisê jëvo'ibejajo rueromo jasi ôrire majahi'ibejarêjo iae mae jio'ibejajo. Röhu bogo rovê'e hõjo. ²⁰ O na Jew

rajo jö mevarue a masijo jabesi nunire namijodevare jabuhu nasi mu sisë rabe gavaroho nadi'lego ave ariböviohuro majahijego hejëjo. Röhu nasi sisëho bogo birohare höjo. ²¹ Ave jöhuremu hejare höjo. Na jabesi nunire namiromo ma-darugo'o uvode höjo: Jemëhu jaruvo court vaejevoro muvarujoho: Paul-are ihoho sisë hö uvaruje hesi bëhoho naro mae uehorovoromo uvaje höjo: Vuovë'e aribövioho i'ovoromo ri'ö'ejärëjo. Ejëhuremu hejare höjo. Ahia mino'ëjo.

²² Paul-ro ëhi majahijamu hegorovo Felix-ro Iesuare öri hesi jöho mae hejë'ëro uëvadeje: U'emu muorovo a böröme Lysias ruvebi'iramu evare na jemesi jöho gö'o heromo uë'ejöjo: Paul-are jöho mae höjo o bejë'e höjo. Ehi uëngoromo court-oho tugohadeje. ²³ Tugohoromo muorovo simano vaejaje aho uavadeje: Jero Paul muebejego bogo rori'oho va'i ë bëhiremu hi juvo'irajo. O hesi aganehu ö'oromo ajami'ië'iroho nadi nijio'iraejëvonejo.

Paul-hu Felix'o hesi vabore Drusilla'o jabesi nunire namiromo jö jövade jöhoje.

²⁴ Ehi'oromo majae gemu niö'i barëjamu Felix-ro hesi vaborohu'o gemu mae Paul ga'i va'adeje. Vaboro hesi ihoho Drusilla jiadeje. Hu Jew rajo magonahe jiadeje. Felix-ro va'oromo Paul-ro hesirire ruejöro jöe nugö'öjadeje. Jöe nugö'öjamu Paul-ro rueromo Iesu Keriso mae uehorovarue jöho majahijamu Felix-ro hejadeje. ²⁵ Hejamu Paul-ro mu maemu vaeröhe jöho ma-taemo raro'm'iröhe jöho u'emu God-are nunire riravoröhe jöho ëhi jië'e jöho jövobe va'amü Felix-ro heromo juhuonivadeje. Juhuonivoromo Paul uavadeje: Va'ëjo. Majae eni jevo'iramu jöe nugö'ö'ejöjo jero sionëro ruejöro. ²⁶ Ehi uaromo huro sarer'i'e muoho vae'i uehorovoromo uvadeje: Nani Paul-ro ue'a'ajëjo: E'ëgo na ja ijo bajo harihe saginiëri bojamego jero ëho bae'na na ëma jiovo remö'öjëjo. Felix-ro uehorovoromo uvadeje: Paul-ro ëhi ue'a'ajëromu ëhuni Paul-ni jöe nugö'ö'i hijadeje. Nugö'ö'i hiromo rue'ëgo huro Paul'o jöe jövonövadeje.

²⁷ Ehi'ojuvo vadune niö'i barëjamu Felix-ro sa'a muebejaje muoho vuonugo'i Jew rajo ariböviohuro hu mae uehorovojöro Paul savoji gagore ëhi nugoromo va'adeje. Va'amü Porcius Festus-ro rueromo hesi sionoho baejadeje.

25

Paul-hu Rome va'oromo a böröme Caesar-are nunire namiromo court avo'avoho vaeröhëro jöe jövade jöhoje.

¹ Hesi sionoho baeromo Festus-ro sa'aho muebe'i rovadeje. Rueromo majae niö'i gemu barëjamu Caesarea amore jioromo Jerusalem ajiomadeje. ² Ajjomamu Jew rajo priest masijohu'o Jew rajo a masijo ioro'iorohu'o ëho jaburo Paul-are jö sisëho huruoho majahijareje Festus-ro hejöro. Paul-are jö sisëho majahinugoromo Festus uavareje: ³ Jero huë baeromo ajamüromu va'o Paul nugö'öjego Jerusalem rojomo'irajo. Ehi ua gavare hesi bëhoho urimë'i Paul öri ahore ano'i saginiëri atë'ëro ëhuni uavareje: Nugö'öjego Jerusalem rojomo'irajo. ⁴ Rojomo'irajamu Festus-ro uëvadeje: O-ajo. Paul Caesarea amore savoji gagore jië'ëro rojomo'iröhoho bogo eni jiajëjo. Röhu na aviae vejë'e vejë'e Caesarea vuonorö'ö'ejöjo. ⁵ Ehuni jemesi masijohuro Caesarea amoro na'ö ö'oromo Paul-are jö sisë rabe rabe jië'öho court vaeromo majehijego na he'iröjo.

⁶ Ehi uëngoromo Festus-ro Jerusalem hiromo majae gö'o 8 o 10 rabu'e barëjamu Caesarea amore vuonorö'ö' abuejadeje. Abuejë'ëro nërö court vaeromo Paul hu'irae ruejöro uvadeje. ⁷ Paul hu'irae rovamu Jew raje mami'e Jerusalem jioromo ruvebijaroho jaburo Paul-are bëhire gagovo rova'oromo sarer'i'e jö masijoho aho'obëhe Festus majahiromo uavareje: Paul-ro ëhi jië'e ëhi jië'e mu sisëho vaejade höjo. Paul-are jö sisëho ëhi majahiromo röhu jö bëhi majahego mae uehorovo'iröhoho jabesi öriroho bogojiadeje. Bogojië'e ma-nibejahareje. ⁸ Ma-nibejahamu Paul-ro Festus uavadeje: Na sisëho bogo vaejë'e jevajëjo. Jew rajo nosi jögoroho God-are osa börömoho Rome a börömehu no muebejavuajoho na jabesi jöho bogo ahoromo jabesi muoho bogo ijumëhë'e jevajëjo. ⁹ Ehi majahijamu gavë'i Festus-ro Jew rajo ariböviohuro hu mae uehorovojöro nimamu Paul

uavadeje: Na ja nagajëjo Jerusalem ajiomoromo ë amore nasi nunire namiromomo jasi jö sisë jabuhu ataruoho mevo'iro. ¹⁰ Ëhi uavamu Paul-ro uavadeje: Bogajo. Na aviae Rome a börömo hesi court-re namijajëjo. Ëhuremu gemu iae maho höjo. Ja'o iae gavanuëjo Jew rajo aribövioho na bogo sisë vaejëvode höjo. ¹¹ Na mu sisë vaejë'ëro guomevoröhe bëhoho jio'ibejajo na bogo nijo'iraejëvego jabesi anegego guomevo'ibejajo. A'i ë Jew rajo ariböviehu nasi jö sisë ëma barueromo nibejehiromo uavaruoho: Paul-ro ëhi ë'ade hö uavaruoho aho Jew rajo jabesi övoroho bogo ëma bojëmi'arujëjo court vaejevorumo i'ue bojëmi'iröhego. Ëhuni na negajëjo Rome va'oromo muebejavuaje a börömo hesi nunire nami'iro. ¹² Ëhi uavamu Festus-ro hesi jö ajamiromomo mevarue aribövi jabesi jöho heromo Paul uavadeje: Jero uevanuëjo: Na negajëjo Rome va'oromo a börömo hesi nunire nami'iro. Ëhuni iae va'oromo hesi nunire nami'a'anuëjo.

Paul-hu a böröme Agrippa'o Bernice'o ma'ino'o ma'ino'o jabesi nunire namiromomo jövade jöhoje.

¹³ Ëhi'amu va'o ririvanovamu evare a böröme Agrippa'o Bernice'o jaburo niö'iro Festus jëjami'i rovareje. ¹⁴ Rueromomo majae bisemu ëge hu'o arijareje. Arijamu Festus-ro Paul-are jöho Agrippa majahiromomo uavadeje: Ae gemu aviae höjo mami'e Felix-ro savoji gagore ba'amoromo nugo va'ë'ëro. ¹⁵ Na Jerusalem ajio hijodevare evare Jew rajo jabesi priest masijohu'o a duvaho ömo'ömo'hu'o ëho jaburo hesi jö sisëho huruoho majehiromomo uevare höjo naro hu i'ue bojami'irodego. ¹⁶ Ëhi uevamu uëvode höjo: Rome aribövioho no ëhi jië'e muoho bogo vaejarue höjo. No bogo aho a jabesi övoroho ëma bojëmi'arue höjo i'ue bojëmi'iröhego. A'i urimo iho sisë'e ahu'o hesi jö sisë majahuijarue ariböviohu'o gemuore jio'iramu jaburo hesi jö sisëho majahui'iramu huro mana hesiroho majahui'ajëjo. Hujeji hesi jöe bejë'ohuro ëhuro i'uoho bojami'ëjarëjo. ¹⁷ Ëhi uëvode höjo. Röhu ë Jew rajo ariböviohuro Paul-are jö sisëho huruoho majehi'i ruvebijamu gëgorovo na bogo örisan-uovo'i nëröho nasi aribövioho uëvode höjo: Paul hu'irae ruehego court vaejëjo. ¹⁸ Ëhi uëvamu hu'irae rovamu Jew rajo ariböviohuro ri'öromomo Paul-are jö sisëho majahuijare höjo. Majahuijamu naro uvode höjo: Nani jaburo Paul-hu mu sisë bëhe vaejade jöho majahui'aruëjo. Röhu bogo ëhioho majahuijare höjo. ¹⁹ A'i Jew rajehu jabesi beroharue jöhuremu Paul'o jö aho'ahamirovare höjo. Jö aho'ahamirovoro jabesi sareri'e aru'aho hesi mu jöhu'o guomë'e a hesi ihe Iesu ë a hesi jöhu'o jö aho'ahamirovorumomo Paul-ro uëvade höjo: Ëaho Iesu bogo guomë'e iae hijajëjo. Ëhi jië'e jöhuremu court-re barovare höjo. ²⁰ Ëhi barovamu hegorovo naro uvode höjo: Ëhi jië'e jöho bogo avoho hejë'ëro na bogo mevo varijënoho jëvajëjo. Bogo mevo varijënoho jëvajëromomo ëhuni Paul uavode höjo: Na ja nagajëjo Jerusalem ajiomoromo Jew rajo jabesi nunire namijëgo jaburo ë jöho mevo'iröhego. ²¹ Ëhi uavamu Paul-ro uevade höjo: Na bogo ajiomö'ëjëjo. Na negajëjo jemëro na muebejevego hujeji na Rome amore va'ëgo muebejavuaje a börömo'ohuro nasi jöho mevo'iröhego. Ëhi uevamu naro nasi muorovo aribövioho uëvode höjo: Paul avoho muebejëgo bogo rori'oho va'irajo hujeji naro Paul nugö'öjëgo va'o Rome rajo a börömo hesi nunire nami'iröhe höjo. ²² Festus-ro jöho ëhi majahijamu hegorovo Agrippa-ro uavadeje: Paul-ro jöho jövego na'o nasi hia'ëro he'i negajëjo. He'i negajëjamu uavadeje: Jöho nëri jövo'iramu he'a'anuëjo.

²³ Ëhi uavë'ëro nërö Agrippa'o Bernice'o rovamu ae aho'obëhe jaburo ri'öromomo jabesi ihoho döro bamoromo rajëhijareje. Rajëhijamu gavë'i jaburo niö'iro muorovo a masijohu'o amo rajo a masijohu'o gemu mae gagovarue osa börömore rueruomadeje. Rovamu gagorovo Festus-ro ae uëvamu Paul hu'irae rovareje. ²⁴ Hu'irae rovamu Festus-ro jöe majëhiromomo uëvadeje: Agrippa a börömo'hajo. O a ioro'iove ave gemuore gagovarijohumë ave aho Paul aviae nami'ëgo gavarujëjo. Ëa hesi jö sisëho Jew raje ae aho'obëhe ave raromaruohu'o Jerusalem raromaruohu'o ëho jaburo nasi örire majehijareje höjo. Majehiromomo jö'e dadovoromo ma-darugo'o ueruomaje höjo: Ave sa'are ëgo'o ma-hijë'oho bogo maehu höjo. ²⁵ Jabuhu ëhi uevarue höjo röhu anego guomoröhe hesi bëhoho bogo birohë'e jëvajëjo. Röhu Paul-ro hesi uevade höjo: Remö'öjëgo naro Rome va'ëgo ë a börömo'ohuro nasi jöho mevo'irajo. Ëhi uevamu ëhuni uvode höjo: Naro Paul

nugö'ö'ejöjo Rome a börömo hesirire va'iröhego. ²⁶Iae na nugö'ö'ejöjo röhu Paul-are mu sisë jö jajivoromo a börömo hesi örيره nugö'ö'irodoho bogojevajëjo. Bogojev'ëgo ëhuni naro uëvode höjo Paul hu'irae rovego huro ae aho'obëhe jemesi nunire o Agrippa jasi nunire namijego noro hesi jöho heromo mevoromo bëhoho garomo eni jiego evare jöho jajivoromo nugö'ö'irodëro. ²⁷Ëhesi bëhoho naro uvode höjo: Töv'e a hesi jö sisë bogo jajivë'e ma-nugö'ö'jë'oho ëhi jië'oho bogo maehu höjo.

26

Paul-hu Agrippa-are nunire namiromo hesi arijo'arije ajamirovoromo majahijade jöhoje.

¹Ëhi uëvamu Agrippa-ro Paul uavadeje: Jasi jöho majahuego no hejarëjo. Hejarëjamu Paul-ro jöe jövo'irögoro öve nigemoromo uëvadeje: ²Agrippa a börömo hajo. Na jö harihe majahi'ie'ajëjo. Jew rajehu nasi jö sisë rabe rabe majëhiruomego naehu aho'i jaruvo jasi nunire namijajoho na uvajëjo: Iae huë mae baejë'e jevajëjo. ³Huë mae jevaje hesi bëhoho aveho börömo höjo. Jew rajehu mu diehi vaeromo jö rabe beroharuoho Agrippa jero mae gavanuego ëhuni Paul naehu jasi nunire namijajoho iae mae höjo. Ëhuni na negajëjo jero ma-taemorovoromo nasi jöhemu he'iranego.

⁴Na asisö'o jevadire aevoromo nasi sa'a rajohu'o gemuore hibe o ro Jerusalem amo rajohu'o gemuore naehu diehi hibe rovodoho Jew raje ae aho'obëhe mae gavë'e höjo. ⁵Jew rajëro mami'e gabe rovë'ëro jaburo iae mae geromo uvarue höjo: Pharisee aribövi jabeti jöho mami'e aevoromo ebe rovide höjo. Jew rajo ioro'ioroho Jew rajo nosi jögoru ejaruoho ma-jianovo'i a'i Pharisee ariböviohuro e avoharue höjo. Naehu ëhi eromo vabe rovodoho ave Jew rajohuro nimë'oho ua'a'aruëjo: Paul jö mae jövajëjo. ⁶Röhu avevejö'e naehu jasi nunire namijaje hesi bëhoho aveho höjo. Naro mae uehorovoromo uvaje höjo: Iae mae-ëjo. God-hu nosi hijo miono'o uëvadëhi huro ëhi ajamui'iramu ma-mabëhe raromo'ëjarëjo. ⁷Nosi Jew rajo anie aho'obëhe 12-ho jabumë ae aho'obëhe vae majae God rajahienu rajahiromo naehu uehorovajëhi jabu'o ëhi gemuoho uehorovoromo uvarue höjo: God-ro uövuadëhi ijönö nosi örيره ajamui'iramu mae raromo'ëjarëjo. Agrippa jabuhu uehorovaruëhi na'o ëhi gemuoho uehorovaje höjo röhu ë jöhuni Jew rajohuro nasi jö sisëho huruoho majëhi'ëgo naro jasi nunire namijajëjo. ⁸Röhu Iesu guomamu God-hu i'ovadoho jemë bogo maho uehorovarujëjo. Jemë rabëni uvarujëjo: God-hu vuovë'e aribövi i'ovo'amaje jö uehorovo'iröhoho no bogo eni javuajëjo.

⁹Urimë'i na'o uvonövide höjo: Naehu bövi bise'o vaeromo ëhuro Nazareth raje Iesuare iho ijumë'oho ëhi jië'oho ëho nasi mu maho höromo ¹⁰ëhuni Jerusalem hiromo hesi muoho ijumu'i ë'ode höjo. Ëhi'oromo naro priest masijo jabeti jöho baeromo God-are aribövioho aho'obëhe guduamo ujuoho va'oromo savoji gagore io'amonövode höjo. O Jew rajo a masijo ioro'iorohuro Iesuare aribövi jabeti jöho mevoromo vuovëvojöro uë'ëgo na'o ajëmiromo uënövode höjo: Iae mae uëvarujëjo. Jabumë vuovë'oho iae mae höjo. ¹¹Ëhi'oromo majae aho'obëhe Jew rajehu God rajahijarue osare osare va'oromo Iesuare aribövi jabeti örيره i'ue bojëmijöro uënövode höjo. I'ue bojëmijöro uëromo uënövode höjo: Uöhëjo: Noehu Iesu mae uehorovarohe avevejö'oho vuonugë'e javuajëjo. O naro jabumë muo'amëvo'i vörö'iraeromo ëhuni nasi sa'aho vuonugo'i sa'a göre göre amo göre göre va'onövode höjo sisë vae'amo'iro.

Paul-hu aevoromo Keriso mae uehorovade jö majahijadohoje.

¹²Iesuare aribövioho sisë vaejëvo'irögoro ëhuni jabumë guduamo ujuoho rue'irodego nosi Jew rajo priest masijehu jajivare jöho naro baeromo Damascus va'ode höjo. ¹³Röhu Agrippa naro örيره va'oromo majae ririre jiamu va'ihö gavode höjo ajoho ö'idöre jioromo ruvebiromo na'o na'o gemu mae ö'arue ariböviohu'o ajivavuamu. Maja nuni hesi ajoho ma-jianovo'i ëho aji bëhe jiamu gavode höjo. ¹⁴Ajivavuamu gagorovo no ae aho'obëhe sa'are behumorovoromo naro hejode höjo nasi Hebrew jöëro uevavamu: Asë'e Saul-ajo. Ja rabëni sisë vaejevanuëjo. Naro ja minö'e sihavamu jero na ijumevo'i höromo jasi ijumorovë'e javajëjo. ¹⁵Ëhi uëvamu naro uavode höjo: Bada ja rahuo javajëjamu

uevade höjo: Jaehu sisë vaejevanue aho Iesu na jevajëjo. ¹⁶ Röhu de jero ri'öromu jasi hörëro döro namijëjo. Naehu jasi nunire rovode ë hesi bëhoho naro ja nasi baejavego jero nasi muoho vaejehoromo jaehu na gevanue jöhu'o u'emu naehu röjahijego ga'irane jöhu'o ae majëhibe juvonövo'iranego ëhuni rovode höjo. ¹⁷ Majëhibe juvo'iramu naro ja ajami'iramu Jew rajohu'o sa'a ioro'ioro rajohu'o ja bogo anago'aruëjo. Iae na sa'a ioro'ioro rajo jabesi örire ramö'ö'ejöjo. ¹⁸ Ramö'ö'iramu jero va'oromo ajëmiromo jabesi nunoho dadovëho'iramu ramoramo'e muoho vuonugo'i ma-ajiro raromo'aruëjo. Satan-are vörö hesi uhure raromaruoho vuonugo'i God-are aharire raromo'aruëjo. God-are aharire raromoromo nasi örire mae uehorovevë'ëro God-ro jabesi sisëho uehorovoromo vuonugoromo jabesi röhoho bojëmi'iramu God-hu baejëvade aribövi ioro'iorohu'o gemu mae raromo'aruëjo.

Paul-hu Keriso-are mu vaebe rovade jö jövadohoje.

¹⁹ Röhu King Agrippa Iesuro ö'idöre hiromo ëhi ajoho röjehiromo jöho majehijamu garomo hejode höjo. Heromo na bogo bijönimode höjo. ²⁰ Bogo bijönimo'i a'i huhu uevadëhi ëhi vaeromo urimo Damascus amore ijonö Jerusalem amore Judea sa'ae bövioho sa'a ioro'ioro rajo jabesi sa'are ëhi Iesuare jöho majëhibe juvoromo uenövode höjo: Uehoro sisëho vuonugo'i God mae uehorovoromo mu maemu vaenövorëjo. Mu mae vaejë'oho ëhuro noro gëromo uvo'ëjarëjo: Iae mae-ëjo. Jemëro mu i'oho mabëhe baejë'e jëvajëjo. ²¹ Naro ëhi jië'e jöho majëhibe juvë'ego ëhuni Jew rajo ariböviohuro God-are osa böromore guduamevoromo anego'ië'are höjo. ²² Anego'ia'amu God-ro na ajemibe rovë'ëro ëhu'ëro jaruvoho iae na aviae jevajëjo. Aviae jevë'ëro naro namiromo nasi jö maho majëhi'ego jemë a ininore va'o a masijore ëhi hejarujëjo. Nasi jöho iae mae höjo. Èhesi bëhoho ijonö jioröhe mu jöho urimë'i jö God-aro baeromo majëhinövore aribövi jabesi surire o Moses-are surire jajivarëhi naro ëhi majëhijaje höjo. ²³ Jabuhu jajivarëhi naro ëhi majëhijaje höjo. Jaburo jajivoromo uvonövore höjo: Böröme namiromo ajamui'iröhe aho huë vavaene böromë baeromo guomo'a'ajëjo. Guomo'iramu a ioro'ioroho taemëvo'i huro urimo ri'ö'a'ajëjo. Ri'öromu hesi aji'e jöho majëhi'iramu Jew rajohu'o sa'a ioro'ioro rajohu'o heruomo'ajëjo.

²⁴ Paul-ro hesi jöho ëhi majëhijuvo evare Festus-ro ri'öromu ma-darugo'o uavadeje: Paul ja simane sisërëjavo'ego ëhi jië'e jöho jövanuëjo. Ja böromë gavë'e aëro javë'ëro ëhu'ëro jasi simanoho sisërëjahë'e höjo. ²⁵ Sisërëjahë'e höjamu Paul-ro uavadeje: Bogajo. Nasi simanoho bogo sisërëjahë'e höjo. Na simano maëro jevë'ëro jö maemu jövajëjo. ²⁶ Röhu naro Agrippa hesi örire jöho bogo subivaho'i ma-sama'e majahijajoho iae mae höjo. Iae hu bëhoho gavaje höjo. Iesuare örire mu diehi diehi rovadoho o huhu mu diehi diehi vaejadoho bogo gurihiroho vae'i ma-va'orahoro vaejë'ëro na uehorovajëjo iae Agrippa ë jöe aho'o garomo uehorovë'e höjo. ²⁷ Agrippa-jo. Jö God-aro baeromo majahuinövore ariböviehu jajivare jöho na ja mae uehorovanuëjo o bogajo. Iae na gavajoho ja mae uehorovanue höjo. ²⁸ Mae uehorovanue höjamu Agrippa-ro Paul uavadeje: Asë'e jero uvanuëjo: Naro Agrippa'o majae ma-bunemu jöe jövoromo dinami'iramu hu Christian vae'a'ajëjo. Röhu bogajo. ²⁹ Bogajamu Paul-ro uavadeje: Majae ma-bunemu o majae ëgo'o baeromo Christian vaejë'oho iae mae höjo. Röhu naro God-are örire uavajëjo huro ja ajamijego bogo ja gemu ae aho'obëhe nasi jö jaruvo hejarujoho ajëmego na jevajëhi jemë'o ëhi jëvoröhego. Röhu ö'ehu tövevarëhi jemë'o ëhi tövëvo'iröhoho na bogo ëho uëromo ë'ajëjo.

³⁰ Paul-ro ëhi majëhijamu hegorovo Agrippa Festus Bernice a ioro'ioroho ëho jaburo ri'öjareje. ³¹ Ri'öromu suorovoromo uarovareje: Èaho mu sisë vaejë'ëro guomoröhe o savoji gagore hi'iröhe hesi bëhoho bogohöjo. ³² Èhi uarovoromo Agrippa-ro Festus uavadeje: Èaho Rome va'oromo a böromë hesi nuniroho bogo nami'i uvo'ibejajo jaehu jiovo nugö'öjë'oho iae mae jio'ibejajo.

27

Paul-hu Rome amore va'iröhëro boat baeromo sö jovo döre va'ade jöhoje.

¹ Ëhi'amu a böröme Festus-ro uvadeje ë majare noro boat-re ajiomoromo Italy sa'are va'oröhego. Ëuvade majaho rovamu aëro Paul'o savoji'e a ioro'iorohu'o ujuohoromo ae gemu hesi örire bojamareje huro jabumë avoho muebejëvego boat-ohuro aegoromo va'oröhego. Ëmuebe'amoröhe a hesi ihoho Julius jiadeje. Hu Rome raje muorovo a ioro'ioro ma-gemuore bu'öromu muebejëvobe juvaje ae jiadeje. Gemuore bu'öjare muorovo aribövi jabesi ihoho Rome A Börömo Hesi Muorovo Aribövioho jiadeje. Julius-ro ë aribövioho muebejëvonövadeje. ² Julius-are örire Paul'o savoji'e aribövi ioro'iorohu'o bojamamu Julius Paul na a ioro'ioroho no ae aho'obëhe boat-re iojiomareje. Ëboat-oho Adramyttium amore jioromo rovë'ëro röhu vuonorö'öromu Asia sa'are jio'amaje amore amore höröbe va'irögoru'ë'adeje. Va'ia'amu noro ë boat-re iojiomareje. Ajiu raromamu evare boat-oho ri'öromu va'adeje. Röhu ae gö hesi ihe Aristarchus-ro no'o ö'adeje. Aristarchus hesi sa'a ihoho Macedonia jio'i amo ihoho Thessalonica jiadeje. ³ Boat-ëro aegavuoromo va'aroho nërö Sidon amore suorovareje. Suorovoromo Julius-ro Paul huë baeromo uavadeje: Ja nagë'oho va'oromo jasi aganoho gëvego rabe rabe bogo eni javajoho i'imamego ujuohoromo vuonorö'ö ruenëjo. ⁴ Ëhi'amu boat-ohuro aegavuoromo Sidon amore jioromo va'areje. Va'ihö gavare bure boat nuninö rovamu gagorovo Cyprus sa'aho viëhi nugo'i ruëhi va'areje sa'ahuro buroho urahego mae va'oröhëro. ⁵ Sö jovo döre va'aroho Cilicia sa'aho iosiramiromu va'aroho Pamphylia sa'aho iosiramiromu va'aroho va'o Lycia sa'are Myra amore ro suorovareje. ⁶ Suorovoromo ravo'amoromo Julius-ro gavade boat gö Alexandria amore jioromo rovë'ëro Italy sa'are va'i namijamu gagorovo söjavuoromo ë boat-re ajiomadeje. ⁷ Boat-re iojiomoromo va'amu burëro taemoromo unovamu ma-u'emu va'ojuvo majae gemu niö'i rabu'e ëhi barëjamu evare Cnidus amo bëhire boat-oho ro namijadeje. Namijamu gavare burëro darugo'o nuninö ro taemo'ego bogo va'o hesi javuamu huotorovoromo ruëhi dirö'o gönö va'areje. Va'aroho Crete sa'a vitu jovore ba'amade sa'a vösö hesi ihe Salmone iosiramiromu va'aroho Crete sa'aho viëhi nugo'i ruëhi sa'a bëhire va'areje sa'ahuro buroho urahego mae va'iröhëro. ⁸ Ioni bëhi mare va'adoho unamuibe va'ojuvo Lasea amo bëhire jiaje osore ro namijadeje. Oso hesi ihoho Boat Mae Riravaje Osoho jie.

⁹ Boat Mae Riravaje Osore namiromu majae ëgöbövie ë raromareje. Raromojuvu buru majae boat bogo jijiharue majaho dunovadeje Jew rajehu i bogo ijarue maja börömoho mami'e barëjë'ëro. Buru majaho dunovamu Paul-ro ri'öromu boat-re raromaru aribövioho jöe majëhiromu uëvadeje: ¹⁰ Aribövi jöe hehëjo. No boat-re röhu maho aevoromo va'ë'oho na gavajoho sisërëjavuo hesi höjo. Inömohu'o boat-ohu'o ijumo'amö'ajëjo. Röhu bogo ëhemuoho ijumo'i no ae gö vuovavuo hesi höjo. ¹¹ Vuovavuo hesi höjamu hegorovo Julius-ro Paul-are jöho bogo ejaho'i boat baeromo juvaje ahu'o boat arijo'ohu'o jabesi jöho ejëhoromo uvadeje: Ë'ego no ma-va'arëjo. ¹² Röhu göho buru maja rovë'iroho boat ë dirö'ore namiromu gurihi'iröhöho ë osoho bogo eni jio hesi jiamu gagorovo ae aho'obëhe uvareje: Ë'ego no ma-sivoho gabe va'oromo mae javuë'oho Phoenix osore suorovoromo buru maja jië'oho ë gurihi raromobe va'irarëjo. Ëhi uvareje. Röhu Phoenix ëho Crete sa'are osohoje. Maja beva'ajire röhu viënöho ruënöho bogo tugohë'e ma-va'orahoreje. Ëdirö'ore va'i nimoruomadeje.

Paul-mëhu sö jovo döre va'oromo buru börömehu rueromo boat anamu huë vavaeni baejare jöhoje.

¹³ Phoenix va'i nimoromo gavare buru burue aruëhi rovamu gagoro boat muebejarue ariböviohuo uvareje: Phoenix va'ë'oho iae no mae va'ejarëromu boat i'uhoromo nami-jöro be ba'amarue inömoho barojo dönö bamoromo evare va'areje. Va'oromo Crete sa'a bëhi mare va'areje. ¹⁴ Ma-bisemu va'anovamu gavë'i evare buru börömoho Crete sa'anö jioromo rovadeje. Ëburu hesi ihoho uvarueje: Maja Rojomajinö Röhu Bisemu Aruëhi Rovaje Buroho höjo. ¹⁵ Ëburuhuro rueromo boat simanonö darugo'o anamu

gagorovo buru rovajinö va'iröhoho bogo eni javuamu gagoro sivoho garomo vuonugo'i huotorovoromo burëro dirö'o göre bava'amu ëma va'areje. ¹⁶ Va'aroho va'o sa'a bise'o hesi ihoho Cauda ruëhi nugo'li viëhi va'ihö gavare ë sa'ahuro buroho urahë'ëro ma-bisemu u'uhamu gagorovo noro sivohojuvo nosi boat bise'o ruho bava'aruoho ma'eno titimareje. ¹⁷ Ma'eno titimoromo boat muebejarue ariböviohuro ë boat bise'oho io barojomoromo börömo hesi döre avoho bamareje. Bamonugoromo biriri'e ö'oho ujuohoromo boat börömo avoho tövo rova'o rojomareje bibivego jovoho bogo dadovoröhego. Avoho tövo rova'o rojomoromo uvareje: Boat baejavuoromo öri ëgoböviro Libya sa'a bëhire va'iramu sa'a hurihuro iorovoromo diruvavuo'ajëromu juhuonivoromo burehu namijaje niögoho muotohoromo baruvebiromo bamamu burohuro boat-ohu'o baejavuoromo ëma va'adeje. ¹⁸ Ëma va'oromo gavare buru böröme ma-darugo ma'o rovadoho bogo barëjumu gagorovo boat i'uhoromo diruvo'ajëromu boat-ehu ujuoho va'aje inömohe nërö aevoromo ujuohoromo jovore ruruhö'öjareje. ¹⁹ Ruruhö'öjë'ëro nërö boat mu vaejarue hesi inömohe ëhu'o jabesi övëro ujuohoromo jovore ruruhö'öjareje. ²⁰ Ruruhö'öromu va'aroho no majae bogo gavë'e jije bogo gavë'e ëhuro öroho dadivavuoromo ëma va'aroho buru börömo bëhe ruemu ruejuvo majae aho'obëhe barëjumu gagorovo uehorovoromo uvareje: Bogo i'ovo'li vuovavuo hesi höjo.

²¹ Vuovavuo hesi höjumu boat muebejarue aribövioho ioho bogo ue'ahë'e ma-muemu vaejuvo majae ëgobövie barëjumu gëgorovo Paul-ro ri'öromu uëvadeje: Aribövijaio. Mami'e nasi jöho ejeho'i Crete sa'aho bogo nugo rue'ibejarijëjo bövioho bise'oho bogo ëhioho sisërëjahuo'ibejajo. ²² Iae ëhi höjo röhu naro uëvajëjo: Biririvohëjo. Jemë ae gemu vadu'oho bogo guomëvo'ajëjo. Boat-ohemu dadorovo'li jemë mae raromo'arujëjo. ²³ Naehu ëhi uëvaje hesi bëhoho God-are aëro jevë'ëro naro hu rajahijaje höjo. Ëa hesi anerahuro jaru vahi'e ro nasi bëhire namiromo ²⁴ uevade höjo: Paul nadi juhuonivëjo. Ëhesi bëhoho jasi muëro jië'ëro ja va'oromo Rome a börömo hesi nunire nami'a'anuejo. Ëhuni bogo öriroho guomo'a'anuejo. Röhu ave jöhu'o hejëjo. God-ro jasi örire huë baejavë'ëro ëhi ajami'ajëjo. Huro jasi jöëni uehorovoromo ja'o boat-re jijiharue aribövioho aho'obëhe ajëmi'iramu bogo vuovëvo'ajëjo. ²⁵ Ëhi jië'e jö maho anerahuro uëvë'e jiaje ëhuni jemëro biririvohëjo. Ëhesi bëhoho naro God mae uehorovoromo uvajëjo: Aneraehu uevadëhi iae ëhi mae javuo'ajëjo. ²⁶ No mae javuo'li röhu burëro boat-oho baeromo va'iramu sa'a motumature iorovo'ajëjo.

²⁷ Paul-ro ëhi majëhijumu majae aho'o 13 barë'li vahie 14 vahiromadeje. Vahie 14 vahiromamu Mediterranean sö jovore ëma va'areje. Va'aroho vahi riri'e jiamu gagorovo boat muebejarue ariböviohuro uvareje: Nani no sa'a bëhiro rovaruëjo. ²⁸ Sa'a bëhiro rovaruëromu jovo vahuoho diehi jiego ga'irögoro vahuvo garomo gavareje jovo hesi ëgoho 40 metre ëmino'e jiamu. Vahuvo ganugoromo rori'o va'oromo röhu maho vahuvo garomo gavareje jovo hesi ëgoho 30 metre jiamu. ²⁹ 30 metre jiamu gagorovo uvareje: Nosi boat-oho va'o munë masijoro va'o titimo'ajëromu juhuonivareje. Juhuonivoromo boat i'uhoromo namijöro be io'amarue inömohe 4 ëhi boat dejonö jovore be io'amoromo vahie ëgobövie jiamu uvareje: Ma-burëro sisonuvego no öri ari'e gavarëjo. ³⁰ Ëhi'ojuvo boat muebejarue ariböviohuro boat bise'ore huruomo va'li nimoromo sareramuiromu uövuareje: Boat börömo avoho namijöro i'u'e inömohe boat nuninö be io'amo'li ëhuni boat bise'oho ba'obueromo jovo döre ba'amaruëjo ë raromoromo muoho vae'iro. Ëhuni ë'aruëromu boat bise'oho baba'amareje. ³¹ Baba'amë'ëro ë abueromo huruomo va'ia'amu gëgorovo Paul-ro muorovo a börömohe Julius'o hesi muorovo ariböviohu'o uëvadeje: Nume boat muebejarue aribövioho ave boat börömore bogo raromo'li huruomo va'ë'oho sa'are va'irarijoho bogo eni jëvo'ajëjo. Vuovëvo'ajëjo. ³² Ëhi majëhijumu hegorovo muorovo ariböviohuro boat muebejarue ariböviehu huruomo'iröhe öroho tugoho'li boat bise'o tövare ö'oho tariö'öjumu boat bise'ohuro a rumo'e ma-gagëremu va'adeje.

³³ Ma-gagëremu va'amu sisonuvo'ia'amu gagorovo Paul-ro ae aho'obëhe uëvadeje: Ie ihëjo. Jemë nurunuruëgamu ioho bogo ijë'e ma-dë gagëremu raromo jijiharijoho majae aho'o 14 barëjë'e jëvajëjo. ³⁴ Ëhuni uëvajëjo: Ie ihëjo ëhuro jemesi dajoho bogo

ma-ruhorovo'li biririvo'laririje hōjo. Ēhesi bēhoho jovoho raboho bogo anēgo'li jemesi sino haho'oho aho'o ma-mae jēvo'ajējo. ³⁵ Ēhi uēnugoromo ie baeromo ae aho'obēhe jabesi nunire God-are ōrire mae uaromo ioho atoromo ijadeje. ³⁶ Ijamu gagorovo ae aho'obēhe biririvoromo jabu'o ie ue'ahareje. ³⁷ Rōhu no ae aho'obēhe 276 ėmino'e boat-re raromareje. ³⁸ Ae aho'obēhe ie ue'ahoromo da'uēgamu hegorovo wheat iruno'oho suevoromo jovore ruruhō'ōjamu boat-oho sasohoromo ma-dōro hetebe va'adeje.

Burehu rueromo jovehu boat anamu dadorovade jōhoje.

³⁹ Hetebe va'ojuvo sisonuvamu boat muebejarue aribōviohuro sa'aho garomo uvareje: No ari rahu rovare hōjo. Ari rahu rovare hō'i uherihoromo gavareje osore nie'uahe jiamu gagorovo uvareje: No eni javuē'oho boat-oho baeromo ė nie'uahore va'ejarejo. ⁴⁰ Ēhi uvonugoromo boat i'uhoromo namijōro be io'amare inōmo ė hesi ō'oho tarivamu i'u inōmohu'o ō'ohu'o jovore rireromo va'amu boat-oho sasohadeje. Sasohamu boat hunuovarue ijo be nugare ō'oho jiovo nugareje ėhuro ijo damuoho ma'enoromo hunuovobe va'orōhēro. Jiovo nugoromo burehu ro namiromomo boat bava'aje niōgoho boat simanonōrire ijo namore ba'ojiomoromo be nugareje ėhuro boat-oho nuninō darugo'o va'orōhego. Boat-oho ėhi avohonugoromo eni jiamu gagorovo nie'uahore va'i va'areje. ⁴¹ Va'ihōromomo boat-oho nie'u hurihuri'ere iorovadeje. Iorovamu boat simanonōho nie'ure diruvē'ero unovamu da'irinōho jovo vōrōhuro ano dadovo'amadeje.

⁴² Dadovo'amamu gagorovo muorovo aribōvioho jaburo jōe mevoromo uarovareje: Ē'ego no savoji'e aribōvioho muo'amarējo. Sōvōe muoromo va'oruomo'ajējo. ⁴³ Ēhi uarovamu jabesi bōrōmohuro Paul bogo guomo'li ma-mae hijōro nimoromo ahēvadeje. Ahēvoromo no uōvuadeje: Ae rahu sōvō'e jēvē'oho urimo jovohuro revoromo sōvōe muoromo va'o ravojiomorējo. ⁴⁴ A ioro'ioroho jemēro ijo ha'ose o boat dadorovade ijo vitu vituho ujuohoromo jovo dōro va'oromo va'o ionoro ravojiomorējo. Ēhi uōvuadeje. Ēhi uōromomo no ae aho'obēhe ėhi'oromo va'o ari mare ravojiomomo barējareje.

28

Paul-hu Malta motumoture hijade jōhoje.

¹ Ari mare ravojiomonugoromo hejareje uvavamu: Ave motumotu hesi ihoho Malta hōjo. ² Ēhi hejamu ė sa'a arijo'e aribōviohuro huē mabēhe bojamuijareje. Huē mabēhe bojamuiromomo gavare ėne rueromo runone rovamu gagorovo vēne huoromo bōvie bise'e ajamuijareje. ³ Ajamuijamu Paul-ro ijo vēne gagovoromo huduamo va'oromo vēnoho huamu gavē'li sigobohuro vēni vōrōho juhuonamiromomo hōrōromomo Paul-are ōvore ja'iho titimadeje. ⁴ Sigobohuro hesi ōvore ja'iho titimoromo ėhi iromē'e jiamu ė sa'a rajohuro garomo uarovareje: Sigobehu ja'ihaje hesi bēhoho iae no gavaruējo. Hesi bēhoho ė ahuro ae anē'ero ė'ajējo. Ēahuro ae anade hōjo rōhu ė hesi manaho bogo baeromo sō jovoho iromomo guomade hōjo. Bogo mana guomadohuni ėhuni i'u bojamuaje aru'ahohuro ė sigoboho uavamu rueromo ja'ihade hōjo mana guomojōro. ⁵ Ēhi uarovamu gagoro Paul-ro ōvoho hijiohijiovamu sigobohuro Paul bogo ja'iho avohē'e ma-juvo bu'ōromomo vēnire ravorovadeje. ⁶ Vēnire ravorovamu gagorovo ė sa'a rajo aribōviohuro uvareje: Sigobēro ja'ihē'ero nani ė a hesi sinoho huo'a'ajējo. O ma-majioho sa'are beromo guomo'a'ajēromomo raromoromo muebejareje Paul guomorōhego o diehi ė'orōhego. Muebebe va'ojuvo gavare bogo ėhi ėhi'amu gagorovo uehore gō baeromo uvareje: Nani hu bogo ma-ae hu jio'li hu aru'aho bōrōme anō'e rovē'ero ėhu'ero hu mae hōjo.

⁷ Iae sa'are a bōrōmo hesi sa'aho no raromarue bēhire jiadeje. Ēa bōrōmo hesi ihoho Publius jiadeje. Publius-ro no uōvuadeje: Nasi osaro ro raromohējo. Raromohējamu va'areje. Va'amu huro huē mae bojamuiromomo ajamuibe va'ojuvo majae niō'li gemu barējadeje. ⁸ Huē mae ajamuamu ė a hesi vavuho guomo guome baeromo raromadeje. Guomo guome baeromo raromoromo hesi sinoho vōrō'iraeromo dē sirōvadeje. Ēhi jiamu gagorovo Paul-ro ė guomo guomo a hesi osare va'oromo God-are ōrire uanugoromo ōvoho

hesi sinore bamamu guomo guomoho barējadeje. ⁹ Barējamu gagorovo guomo guomo baejē'e a ioro'ioroho rueruomamu Paul-ro ajēmamu mae jēvadeje.

¹⁰ Mae jēvamu rajahuiromo suvuore aho'o i'imamuijareje. I'imamuijē'ero röhu ijonö noro va'iro ē'amu gagorovo inöme rabe rabe no bogojavujoho ujuohoromo noni boat-re bahijahuareje.

Paul-hu rueromo Rome amore hijade jöhoje.

¹¹ Manaere niö'i gemu barējamu boat göre iojomareje. Eboat hesi ihoho Huodi'e Rahē-vade Aru'aho Jabesi Boat jiadeje. Eboat-oho urimē'i Alexandria amore jioromo rueromo buru börömo hesi majaroho ē namijuvo buroho barējamu evare va'iro ē'adeje. Va'iro ē'amu evare no iojomoromo va'areje. ¹² Va'aroho va'o Syracuse amore suorovoromo ē raromoromo majae niö'i gemu barējadeje. ¹³ Majae niö'i gemu barējamu ē amoho vuonugo'i boat-re va'aroho va'o Rhegium amore suorovoromo ē raromareje. Raromoromo nērö gavare burohuro no va'iro ē'aruinö ē va'amu gagorovo noro ri'öromo boat-oho baeromo va'amu burohuro nosi dejonö boat-oho bijimobe ö'amu evare va'areje. Va'aroho nērö Puteoli amore rueromo sa'are ravo'amareje. ¹⁴ Puteoli amore ravo'amoromo va'oromo Christian aganoho birohēvareje. Birohēvoromo uövuamu jabesi osare va'o raromoromo hurae gemu baejareje. Hurae gemu baeromo Rome amore va'i va'areje. ¹⁵ Va'amu Rome raromarue Christian aganohuro noehu va'arue jöho hegoro nahavuo'i rovareje. Rueromo a ioro'iorohuro Appius örire bövi bise'o imo'amaruie ro birohavuo'i a ioro'iorohuro nuharue osae niö'i gemu jiajire ē ro birohavuareje. Birohavuamu gëgorovo Paul-ro God huē mae uavamu hesi dē vövöbajo'oho sasohadeje.

¹⁶ Dē vövöbajo'oho sasohamu noro va'oromo Rome amore suorovareje. Suorovamu gavamen a masijero osae bojamamu Paul-ro hesi sivue hijamu muorovo ae gemuero hu muebe hijadeje.

Paul-hu Rome amore hiromo Keriso-are jö majēhijadohoje.

¹⁷ Ehi'amu majae niö'i gemu barējamu Paul-ro Jew rajo a masije behire raramaruohuni jöe nugö'öromo uēvadeje: Ro gagovorego no jöe ato'irarējo. Jöe ato'irarējamu ro gemuoro gagovareje. Gagovamu gagorovo uēvadeje: Jew rajo ö ömo'ömomē nasi jöho hehëjo. Na nosi Jew rajo aganoho bogo sisē vaejēvode hōjo. Jew rajo nosi a mami muoho bogo ahēvode hōjo. Ehi hōjo röhu Jerusalem amore Jew rajo ariböviohuro ëma guduamevoromo Rome rajo jabesi övore bojēmare hōjo baejēvoromo court vaejēvorohëgo. ¹⁸ Bojēmamu Rome ariböviohuro baejēvoromo court vaejēvoromo gavare hōjo na mu sisē vaejē'ero guomo'irode bëhoho bogojiamu. Bogojiamu gagorovo jiovo remö'ö'irögoro ē'are hōjo. ¹⁹ Jiovo remö'ö'ia'amu Jew rajo ariböviohuro nijio'iraejēvoromo uēvare hōjo: Nadi ehi jiē'oho ē'ohëjo. Nadi ehi jiē'oho ē'ohëjamu naro gavode mae va'irode öri göho bogojiamu gagorovo uēvode hōjo: Iae na Rome va'oromo a börömo hesi nunire nami'ejöjo. Na ehi uēvode hōjo. Röhu na Jew rajo agano jabesi jö sisēho bogojēv'ero na bogo ehunioho Rome a börömo hesi nuniroho nami'i uvode hōjo. ²⁰ Ehi jiē'ero ehuni jemēni jöe nugö'öromo uēvode hōjo: Ruehego na gëromo jemē'o jöe jövöjo. Röhu ave ö'ehu tövevare hesi bëhoho aji mu börömo ruerohëgo Israel aribövi ioro'iorehu muebejarujēhi na ehi gemuoho muebejajero jiē'ero ehuni na ave ö'ohuro tövev'ele hōjo.

²¹ Paul-ro ehi uēvamu hegorovo rue Jew rajo ariböviohuro uavareje: Jew rajo Judea sa'are raromarue aribövioho jasi jöho bogo suriroho jajivoromo nugö'öjamu baejē'e javuajëjo. O nosi Jew rajo aganoho Judea sa'are jioromo rovarevaroho jasi jö sisē jöho o jaehu rabe rabe ē'ane jöho bogo majahuijare hōjo. ²² Röhu jasi uehoroho diehi jiajoho no he'i naguajëjo. Ehesi bëhoho ae aho'obëhe dinö'e dinö'e raramaruohuro uvoruomaje hōjo: Jaehu uehorovanuēhi ehi uehorovarie aribövi jabesi öroho sisē hōjo.

²³ Ehi uanugoromo majaho bojamiromo uavareje: No ē majare rue'ejarejo. Ehi uavē'ero ē bojamare majaho sisonuvamu Jew raje ae aho'obëhe Paul-are osare rovareje. Rovamu sisonu'e aevoromo Paul-ro jöe majēhiemu majēhibe va'ojuvo va'o vahiromadeje. Majēhiromo uēvadeje: God-hu böröme namiromo muebejavuajë hesi öroho ehi hōjo. Ehi

majëhiromo Moses-are jögoru surire jöhu'o God-are jö baeromo majëhinövare a ioro'ioro jabesi surire jöhu'o adahoromo bëhoho röjëhiromo ëhuro jabesi simanoho huotovëho gavadeje jaburo lesu mae uehorovo'iröhego. ²⁴ Ëhi'amu hegoro a ioro'ioroho mae uehorovo'i a ioro'ioroho bogo ma uehorovareje. ²⁵ Ëhi'oromo va'oromo Paul-hu jövamu hejare jöho berohemu berohoromo amonö suorovo va'oromo göëro mae uehorovareje göëro bogo. Röhu bogo va'oruomë'iro Paul-ro ave jöhuremu majëhiromo uëvadeje: God-are Aru'ahohuro jemesi jöho iae mae jövade höjo. Ëhesi bëhoho Isaiah jö God-aro baeromo majëhinövade a hesi simanore God-are Aru'ahohuro jöe bojamijade höjo huro jemesi hijo miono'oho uëröhego. ²⁶ Jöe bojamiromo uavade höjo:

Va'oromo ë aribövioho ëhi uënëjo:

Jemë hemu he'a'arujëjo röhu bëhoho bogo avoho he'a'arujëjo.

Jemë gaemu ga'a'arujëjo röhu bëhoho bogo avoho ga'a'arujëjo.

²⁷ Ëaribövi jabesi dë vövöbajo'oho i'uhëgaje höjo.

Hia'oho tugohëhë'e höjo.

Nunoho sigohijëhë'e höjo.

Bogo ëhioho jëvo'ibejajo nunëro ga'ibejarëjo.

Hia'ëro he'ibejarëjo.

Dë vövöbajo'oho sasohoromo jöho bae'ibejarëjo

ëhuro jabumë huotorovoromo rue'ibejarëjo naro avohëvego mae jëvo'ibejajo.

Ëjöhö God-are Aru'ahohuro iae mae jövade höjo.

²⁸ Ëhuni ave jöho majëhi'ie'ajëjo jemëro hejoro. God-hu maro ramuaje jö naehu majëhijajoho sa'a ioro'ioro rajo jabesi örire nugö'öjë'e höjo. Jemëhu ma-he taemarujoho jabumëro iae he'a'aruëjo. ²⁹ [Paul-ro ëhi uëvamu rue Jew rajoho jaburo darugo'o jö aho'ahamirovobe va'areje.]

³⁰ Ëhi'amu vadune nið'i hesi uhure Paul-ro osae gemu ma-jahuri hiromo monioho mana bojëmibe va'onövadeje. Ëosare hiromo gënövade aëro hu ga'i rue'ego huë mae bojëminövadeje. ³¹ Huë mae bojëmiromo God-hu böröme namiromo muebejavuaje jöho majëhibe Bada lesu Keriso-are öroho röjëhibe va'onövadeje. Röhu jö majëhinövadoho aho bogo ahonövareje. O hu'o bogo juhuonivë'e aho jöho ma-sama'e majëhinövadeje. Ahia mino'e.

ROMANS

Paul-hu apostle mu hesi bëhi jajivade jöhoje.

¹ Paul naro ave jöho jajivo'irögoro ë'e. Na Iesu Keriso-are mu vaemu vaejahaje ae jeve. Na apostle jeve ë hesi bëhoho God-ro uevë'ëro. Huro na baejevoromo bamevadeje huhu bojamuade jö mahuremu naro ae majëhinövo'irodego.

² Ëjö maho urimoroho huro hesi jö majëhijarue aribövioho bojëmi'ego jabumëro hesi surire jajivobe rueromo uvonövareje: God-ro iae ëhi ëhi ajamui'ajëjo. ³Röhu ë jö maho iae God-are Harihu hesi jöhoje. Hu araeromo a daje baejadire hu David-are uje jiadeje. ⁴Röhu guomamu God-ro hu i'ovoromo hesi Aru'aho Maho bojami avohë'ëro uavadeje: Jaruvo ja nasi Harihe darugo baejë'e ae javajëjo. Ëaho hu Iesu Keriso nosi Badaje. ⁵Ëaho God-ro uavamu huro Paul na huë baeromo ajemiromo apostle muoho bojemiromo uevadeje: Nasi jöho majëhijego sa'a ioro'ioro raje aho'obëhe mae uehorovoromo jöho ejeho'irarëjo ëhuro Keriso nasi ihoho döro jioröhe. Ëmuoho bojemamu naro baejë'ëro sa'a ioro'ioro rajoho ajëmijajeje. ⁶Röhu Rome aribövimë jemë'o iae ëhi jië'e aribövie jëvo'ego jemë'o ajëmi'irodoho jëve. God-ro jemë'o uëvë'ëro ëhu'ëro Iesu Keriso-are aribövie gemuoho jëve.

⁷Ëhuni Rome amo rajo God-hu rajëhiromo hesi baejëvade aribövimë naro jemesi örire jajive. Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

Paul-hu Rome va'oromo amo rajo gë'i nimade jöhoje.

⁸Urimoho naro Iesu Keriso-are ihore God mabëhe uave ae aho'obëhe jemesi jöëni. Ëhesi bëhoho ae aho'obëhe sa'ae dinö'e dinö'e hejarueje atoromo uvoruomavego: Rome aribövioho jaburo Keriso mae uehorovarue höjo. Ëhuni jemesi jöëni mabëhe uave. ⁹Iae ave jöho na jö mae jövo'ië'e God-are nuniro. God hu nasi böromohoje. Ëhuni God-are nuniro ave jöho jemë mae majëhi'ië'e. Na bogo vuonugo'i majae ëhi jemëni uehorovëvoromo ¹⁰parie vaejajeje. Urimë'i jemë bogo gënvë'ëro ëhuni God-are örire uavajeje huro hesi nimoromo nasi öroho avohehego naro ma-marö ö'oromo gë'irodëni. ¹¹Ëhesi bëhoho na jemë gë'i nego avohe ëhuro naro jemë ajëmijego God-are Aru'ahuhu bojamuijaje suvuoroho jemëro baeromo biririvo'irarijego. ¹²Na negajoho jemë'o na'o Keriso mae uehorovë'ëro ëhu'ëro ajamirovo'iramu mae javuo'ë'e. Na ëhi nege.

¹³Nasi ö mueno'e na nege ave jöho ga'irarijego. Na majae göro göro ö'ie'oromo muëro böviëro bise'ëro ma'enegro'i hijamu bogo ö'odeje. Na negadeje sa'a ioro'ioro rajo jabumë ajëmibe juvajëhi na jemesirire ö'oromo ëhi jemë'o ajëmiromo ae gö Keriso-arinö ujuohëvo rue'irodëro. ¹⁴Sa'ae aho'o Keriso-are jöho majëhibe juvo'ejo. Amore raromarue je'ore raromarue gavë'e bogo gavë'e ëhi jië'e aribövioho aho'o jöho majëhibe juvo'ejo God-ro muoho ëhi bojëmijë'ëro. ¹⁵Ëhuni na nego avohe Rome amore ö'oromo Keriso-are jö maho jemë'o majëhi'irodëni.

Keriso-are jö mae uehorovë'oho God-hu no i'ovavuae darugo röjahuiromo ajamuaje jöhoje.

¹⁶Ëjö ma hesi jöhuni röromo na javojoho bogojevo'i ma-mae jeve. Rabëni ë jö maho ae rahu heromo Keriso mae uehorovë'oho God-ro i'ovavuae öroho no röjahuiromo ajamuiromo öri sisëno javuajoho baejavuoromo öri manö ramuajeje. Urimo Jew rajoho ëhi ajëmiromo röhu sa'a ioro'ioro rajohu'o ajëmijego maro raromarueje. ¹⁷Ëjö uehorovoromo maro raromarue hesi bëhoho God-ro ë jöe gemuoho bojamuiromo ëhuro hesi muoho röjahuijego no garomo uvarueje: God-hu nosi sisë mu'uvahuo'iröhe öroho aviëhi höjo. Noehu Keriso mae uehorovë'ohuro iae ëhuro God-ro nosi sisë mu'uvahuogo hesi nunire mae riravarue höjo. Öre gö bogohöjo. Ëhi uvarueje. Röhu God-are surire jöho ëhi gemuoho uvë'eje: Ae rahu God mae uehorovoromo hesi nunire mae riravë'oho ë aribövioho iae maro raromo'aruëjo.

Ae aho'obêhe God-are i'u hesi uhure raromobe rovare jôhoje.

¹⁸ Rôhu God-ro ô'idôre hiromomo rôjahuego no garomo uvarueje: Hu sisê aribôvioho aho'obêhe jabesi jôeni dê vôrônimoromo i'ue mana bojêmaje hôjo. Êhi jiê'e aribôviohuro God bijônimoromo ae sisê vaejêvoruomajeje. Mu sisê vaeromo êhuro mu ma hesi ôroho subivêho'i ê'o garuomajeje. ¹⁹ God-hu diehi jiê'e ae jiajoho vituoho gavarueje vituoho bogo. Rôhu gavarue vituoho ê sisê aribôviohuro iae va'orahoro garuomajeje God-ro rôjêhijê'e jiego. ²⁰ No bogo nunoho gavarueje God diehi jiê'e jiego. Rôhu God-hu sa'a bôvi bise'o bamadevare evare aëro aevoromo gabe rovareje sa'ae jove bôvie bise'e God-hu bamadoho jio'amamu. Êhi jiamu gagorovo êhuro uvobe rueruomadeje: Bôvie bise'e aho'o bamê'ëro êhuni hu bogo ma-aehu jio'i hu gemu bôrôme jio'i hu gemu eni jiê'ëro êhi jiemu jiobe rovadoho êhi jiemu jiobe va'a'ajêjo. Êhi uvobe rueruomê'ëro jabumê God bogo mana uaruomo hesije: O no ja bogo gavê'ëro jiê'ëro êhuni mu sisêho vaejare hôjo. Êhi jiê'e jôho bogojio'ê'e. ²¹ Jabumê iae God jabesi simanëro gabe rueruomadeje. Rôhu bogo uvareje: God gemu bôrômoho hô uvoromo rajahijareje. Suvuoro gö gö bojêmadoho bogo huê mae uavê'e êma ujuohareje. Êhi'oromo God bogo uehorovo'i a'i sisê'i sisê'i uehorovobe nu ano'e ramoramovobe simane sisê maro sisêrërovobe rueruomadeje. ²² Uvobe rueruomadeje: No simano ma'e aribôvie javuajê'i simane sisêrêbe rueruomadeje. ²³ Simane sisêrërovê'ëro êhu'ëro bogo uvareje: God hu ioro'ioremu aji'e hijaje ae jio'i ave sa'are aribôvioho nomê ma-jahuri raromarue aribôvie javuajê' uvo'i a'i God ioro'ioremu jiaje aho bijônimo'i ma-jahuri raromarue aribôvi no va'ëne inômoho avohoromo êhi rajahi'amobe rovareje. A va'ëne ugo va'ëne majo va'ëne sigobu va'ëne êhi jiê'e inômoho avohoromo rajahi'amobe rovareje.

²⁴ Êhi jiê'e simano rumo'e muoho vaejê'ëro êhuni God-ro jabu ma-nunëremu gêromo rêmô'ôjadeje jabesi nimarue muoho vae'irôhego. Rêmô'ôjamu jabesi nimoromo ôëro jijihonoromo göëro göho mu gö gö vaeromo jabesi dajoho ijumorovobe rovareje. ²⁵ God hu diehi jiê'e a jiaje uehoro maho vuonugo'i sareri'e muohemu uehorovobe rovareje. God-hu avoho'amade bôvioho bise'oho God hôromo uvene aho rôjahi'amobe rovareje. Bôvi bise'o avohade ê aho bogo uehorovareje. Rôhu hesi ihoho ma-mabêhe jiemu jiobe va'ê'e. Iae mae.

²⁶ Jaburo God bogo uehorovê'ëgo huro ma-nunëremu gêromo rêmô'ôjamu ôëro jijihanovobe rovareje. Iae magonahohuro ama'i'o masurovarue muoho vuonugo'irôgoro magonahohuro jabesi arijo'arije sihamirovobe rovareje. ²⁷ O ama'ohuro êhi jiê'e mu sisê gemuoho vaeromo vaboro masêgarue muoho vuonugo'i dêre ri'ôromo ôëro jijihanovoromo a'o a'o sihamirovobe rovareje. Êhi jiê'e javoji'e mu sisêho vaerovê'ëro êhu'ëro i'ue mana baebe rovareje.

²⁸ Jabumê uvareje: God uehorovê'oho bêhi rumo'e hô uvoruomamu êhuni God-ro manunëremu gêromo rêmô'ôjamu jabesi uehoroho ihesi ma'e sisêrëromo bogo ê'o varijêne muoho vaebe rueruomadeje. ²⁹ Bogo mu maho vaejamu mu sisê göëro göëro jabesi dêho irijiomêhê'eje. Mu sisê uehorovarueje. Bôvie bise'e ma-bae taemarueje. Mu gö gö vaejarueje. Ae gö jabesi mu mahuni dê vôrônêgajeje. Ae muo'amarueje. Iro muorovo'e vaejarueje. Sareri sareri'e muoho vaejarueje. Nue huodêgarueje. Êhi jiê'e uehoro sisêshuro jabesi dê vövôbajo'ere irijiomêvê'eje. O ae gö jabesi jô sisêho saginiêri atarueje. ³⁰ A göëro gö hesi ihoho ijumarueje. God nue huodivarueje. A ioro'ioro jabesi ihoho ijumarueje. Dôro bamorovarueje. Nimoronimorohê'i atarueje. Mu gö gö barovarueje. Vêmu vavu'o jabesi jôho bogo ejêharueje. ³¹ Uehoro maho mu maho huê maho dê maho bôvi bise'o maho bogojêve. ³² Iae garomo uvarueje: Ae rahu êhi jiê'e mu sisê vaejê'oho vuovo hesi hôjo God-are jôgoroho êhi jiê'ëro. Iae êhi uvarueje rôhu jabumê êhi jiê'e muoho vaejarueje. Rôhu bogo jabesi êma vae'i a'i garôhe ae gö êhi jiê'e mu sisê vaejamu gavê'oho uëvarueje: Iae mu mae vaejarujêjo.

2

God-hu ae aho'obêhe avoho mevavuo'irôhe jôhoje.

¹ Nani jero dōro bamorovoromo uvo'a'anue: Ĕaribōvioho sisēgo sisēro va'ē'oho iae mae hōjo. Ja ēhi uvo'a'anue rōhu jabuhu vaejaruēhi ēhi jiē'e mu sisē gemuoho ja'o vaejanueje. Ĕhuni God-ro uvajeje: Jero uvanue hōjo: Ĕsisē aribōvioho sisēro va'a'aruē uvanuoho Ĕhuro ja'o i'ue gemuoho bae hesi javajējo. Ĕhu'ēro ja jō God mana ua'iranoho bogojavo'ē'e. ² Iae no garomo uvarueje: Ĕhi jiē'e mu sisē vaejarue aribōvioho God-hu i'u mana bojēmijē'oho iae mae hōjo. ³ Ae gō jabesi sisēho mevanueje rōhu ja'o iae ēhi jiē'e mu sisē gemuoho vaejanueje. Na ja uvanueje: God-hu bojamuijaje i'u'oho na bogo bae'ejōjo. ⁴ God-ro huē baejavuo avohoromo nosi sisēho garomo bogo burēroho i'uoho bojamui'i ma-gōromo hesi vōrōho nimo ēhi taemajeje. Iae ēhi jie rōhu na jero uehorovoromo uvanueje: Iae hesi hōjo. Rōhu huro jasi ōriroho bogo ĕma huē baejavo'i a'i huhu huē baejavaje hesi bēhoho hu nime jasi dē vōvōbajo'oho huotovahego jasi sisēho vuonugoromo hu mae uehorovo'iranego. Rōhu ĕho ja rabēni bogo avoho uehorovanueje. ⁵ Rōhu jero mu sisē vaejanuoho bogo vuonugo'i a'i hia'e biriri'ōvoromo ma-vaemu vaebe va'ego ĕhuro God-ro gō'o gō'o dōre dē vōrōnimobe va'ojuvo hujeji hesi maja bōrōmoho rue'iramu evare i'uoho sisē maro mana bojami'iramu bae'a'anue. Ĕmaja bōrōmoroho huro a nuniro namiromo jabesi sisēho avoho mevoromo ae aho'obēhe hesi dēre vōrōho baeromo evare i'ue bojēmi'ē'e. ⁶ Aehu diehi jiē'e mu vaejaruoho evare majare huro ēhi jiē'e manaho ae gemu gemu bojēmi'ē'e. ⁷ Ae gōēro biririvoromo mu mae vaeromo nimarueje hujeji God-ro hesi aji maho bojēmiromo jabesi ihoho mae uēvego ma-ioro'ioeromu God'o raromo'ē'ō. Ĕhi jiē'e aribōvioho God-ro ajēmi'iramu ma-ioro'ioeromu maro raromo'ē'ō. ⁸ O ae gōēro jabesi sinohemu uehorovoromo God-are jō maho bijōnimoromo ōri sisēro jijihoruomajeje. Ĕhi jiē'e aribōviohuni God-ro dē vōrōnimo'iramu i'ue sisē maro bojēmi'ē'e. ⁹ Mu sisē vaejē'oho ae aho'o vi'ehē huē vavaene bae'ē'ō. Jew rajohuro urimo bae'iramu rōhu sa'a ioro'ioro rajoho jabu'o gemuoho bae'ē'ō. ¹⁰ O mu mae vaejē'oho ēhi jiē'e ae aho'o God-ro aji maho bojēmiromo jabesi ihoho mae uēromo ajēmi'iramu huē mae raromo'ē'ō. Jew rajoho urimo ajēmiromo rōhu sa'a ioro'ioro rajoho jabu'o ēhi gemuoho ajēmi'ē'e. ¹¹ God-ro ae aho'obēhe ma-gemu gōromo sisē bojamuibe mae bojamuibe va'ajeje.

¹² Sa'a ioro'ioro rajohuro Moses-are jōgoroho bogo hejē'e mu sisēho ma-vaeruomajeje. Hesi jōho bogo hejē'e mu sisē ma-vaejaruēro jiē'ēro ĕhuni ijōnō God-ro Moses-are jōho bogo majēhijē'e ma-uē'ē'e: Sisē jēvaje sisēro va'ohējo. O Jew rajohuro Moses-are jōgoroho iae hejarueje. Heromo rōhu sisē vaeruomajeje. Heromo rōhu mu sisē vaejaruēro jiē'ēro ĕhuni ijōnō God-ro jabesi ōrire Moses-are jōho majēhiromo uē'ē'e: Jemēro hesi jōgoroho ahē'e jēvaje sisēro va'ohējo. ¹³ Ĕhesi bēhoho bogo jōgoru hejarue aribōvioho a'i jōgoru ejahoromo mu vaejarue aribōviohuro God-are nunire mae riravo'ē'ō. ¹⁴ Sa'a ioro'ioro rajoho Moses-are jōgoroho bogo hebe rovē'eje. Rōhu hesi jōgoru jiajēhi ēhi jiē'e muoho vae'ē'ō. Vaejē'oho ĕ hesi bēhoho God-are jōgoroho bogo he'i a'i jabesi uehororo jiē'ēro ĕ muoho vaejarueje. ¹⁵ Ĕhi vaejēgo noro garomo uvarueje: God-are jōgoru jiajēhi jiē'e mu vaerōhe hesi uehoroho huro jabesi dē vōvōbajo'ere ba'amēhē'e hōjo. Jabesi dēre herovarueje jabesi arijo'ēro mu mae o sisē vaejē'e jiavego. Jabesi uehore gō gō rovego uvarueje: No sisē vaejē'e javuajējo o nani majae gō uvarueje: Mae vaejē'e javuajējo. ¹⁶ Rōhu ĕho majaho rue'iramu iae ēhi jio'ē'e. Naehu Keriso-are jō mae majēhiromo ae uēvajēhi God-ro ēhi ē'oromo Iesu Keriso ua'iramu huro ae aho'o jabesi uehoro gurihī taemarohe mevo'ē'e ga'i mae o sisē jiego.

Mu vaerōhe jōgoru Moses-hu bojēmanu Jew rajehu bogo ejahare jōhoje.

¹⁷ Rōhu nani jero ae uēvanueje: Na Jew rajēro jevē'ēro iho mabēhe jevajējo. Jero uvanueje: Na Moses-are jōgoru ijore ijore juvaje aēro jevē'ēro ĕhu'ēro God-are nunire mae nami'ejōjo. Jero sivue dōro bamorovoromo ae uēvanueje: Na God-are a maēro jevē'ēro ĕhu'ēro ma-mabēhe jevajējo. ¹⁸ Iae maeje. God-hu rabe rabe nimajoho jero uehorovanueje. Moses-are jōgoroho hejē'ēro ĕhu'ēro jero gavanueje di muoho maho jiego. ¹⁹ Jero biririvo avohoromo uvanueje: Nuni tugorohē'e jabesi ōri rōjēhijaje aho na jevajējo. Ramoramo'ere raromarue aribōvi jabesi ojo jiovēhaje aho na jevajējo ajivēvo'irodoho. ²⁰ Simano bogojē'e

aribövi röjehijaje aho na jevajëjo. Asisö'lo röjehijanovaje aho na jevajëjo. Moses-are jögoroho hejë'ëro ëhu'ëro na nuni aji'e jö maho ga barë nahonahovë'e jevajëjo. Na ëhi jië'e ae jevajëjo. Nani jero ëhi uvanueje. ²¹Iae maeje. Jero a ioro'ioroho jöho röjëhanueje. Röhu ja rabëni jasi arijo'arjohoho bogo röjahirovanueje. Jero a ioro'ioroho majëhiromo uëvanueje: Nadi vajiohoho ë'orëjo. Iae mae uëvanueje röhu na ja vajiohoho ë'anueje. ²²O jero a ioro'ioroho uëvanueje: Nadi goho'amorëjo. Röhu na ja goho'amanueje. O jero uehorovoromo uvanueje: Sareri vörö'e inömo ho sisë bëhe jio'amajëjo. Röhu na ja ë inömo uehorovarue osaroho rumo va'ol'amoromo vajiohoho ujuohoromo ë inömo hesi sisëho baejanueje. ²³Jero uvanueje: Na God-are jögoroho hejë'ëro mae jevajëjo. Iae ëhi jie röhu na ja God-are jögoroho ahoromo hesi ihoho ijumlahueje. ²⁴God-are iho ijumlahue jöho iae hesi surire ëhi gemuoho uvë'eje: Jew raje jemëro sisë vaejejo ëhuni sa'a ioro'ioro rajohuro God-are ihoho sisë'i uvarue höjo.

²⁵Jew rajehu ë'aruëhi ëhi jasi sinoho tariojahë'eje. Ja God-are jögoru ejahamu sino ëhi tariojahë'oho ëhuro mae javo'ë'e. O God-are jögoru bogo ejahamu sino ëhi tariojahë'oho bogo ëhuro maho javo'ë'e. ²⁶Ave jöhu'o uehorovore. Sa'a ioro'ioro rajoho Jew rajo muoho bogo vaeromo sinoho bogo tarivo'amarueje. Röhu jabumë ae rahu God-are jögoru ejahë'oho ëhuro God-ro uvo'ë'e: Ëaribövioho sa'a gö raje jio'i röhu Jew rajo jabesi sino tariojëharuëhi jië'e aribövie jëvë'ëro ëhu'ëro jabu'lo nasi aribövi mae jio'amajëjo. ²⁷Sa'a ioro'ioro raje ae göëro göëro sinoho bogo tarivo'amë'e God-are jögoroho iae ejaharueje. God-ro jabesi mu maho garomo Jew rajoho ja ua'ë'e: Ja nasi surire jöho baejë'e javajëjo. Nasinö javojöro jasi sinoho tariojahë'e höjo. Röhu sa'a ioro'ioro rajehu ë'arëhioho ja rabëni jögoroho bogo ebe rovane höjo. ²⁸Ëhesi bëhoho ja Jew rajo iho javo'i Jew rajehu ë'aruëhi jasi sino tariojaho'i röhu God bogo uohu'o uehorovë'oho ja ma-döhemu Jew rajoho javë'ëro ëhu'ëro ja bogo God-are a maho javajeje. ²⁹Döremu Jew rajo javë'oho ëho bëhi rumo'e javo'i a'i Jew rajehu God uehorovaruëhi ëhi uhure uehorovë'oho ëho böromohoje. Ëhesi bëhoho bogo jasi sinoho tarioromo avohaho'i a'i jasi dë vövöbajo'oho avohahë'eje. Bogo ma-jajivë'e jögoru ejahoromo aehu jasi sinoho tariojaho'i a'i God-are Aru'ahohuro jasi dë vövöbajo'oho avohahë'eje. Dë vövöbajo'oho avohaho'iramu bogo aehu ja rajahi'i God-ro rajahi'ë'e.

3

¹Ëhi jië'oho na Jew rajo ariböviohuro sa'a ioro'ioro rajoho iosirëmiromo God-are mu maho baejë'ejö o bogo. O Jew rajo mu vaeromo sino tarivaruocho na ëhuro mae baejë'ejö o bogo. ²Io'lo mue aho'lo iae mae baejë'ejö. Aevo'i jöho aviëhije. God-ro Jew rajo jabesi övore hesi jögoroho bamadeje jaburo mueberöhego. ³Jabesi övore bamam röhu Jew rajo a ioro'iorohuro ë jögoroho bogo avoho ejaho'i vuonugajeje. Vuonugarohuni na ëhuni God-ro huhu uëvade muohu'o vuonugo'i jö göho uehorovo'ë'e o bogo. ⁴God bogo mae bogo ëhioho ë'ë'e. Ëhesi bëhoho God bogo sareri'oho jio'i hu ma-maëremuje. Ae aho'obëhe sareri sareri'e javuë'oho röhu God hu'o bogo ëhioho jio'i hu ma-maemu jio'ë'e. God-are surire jöhu'o ëhi gemuoho uvë'eje:

No gavarue höjo God jasi jöho ma-maemu majahuijejo.

Aëro uvoruomo'ajëjo: God jasi muoho sisë hö uvoruomo'ajëjo röhu iae ga'ëjarëjo jasi muoho mae jio'iramu.

⁵Röhu noehu mu sisë vaeromo God-are mu mahu'o gemuore havoromo gavë'oho ëhuro hesi mu maho ma-va'orahoro jio'ë'e. Ëhuni nani aëro ëho garomo sarerivoromo ave sa'are ariböviehu uvaruëhi ëma uvo'ë'ö: Noehu sisë vaejamu ëhuro God-are mu ma va'orahoro jië'oho noehu mu sisë vaejejo huhu i'u mana bojamui'iröhoho ëho sisë höjo. ⁶Röhu bogo ëhiohoje. God-hu a sisë i'u mana bojëmi'iröhoho sisë jio'ibejo hu diehi'oromo sa'a raje aho'obëhe göromo mevavuo'ibejo mae o sisë javuego. Röhu huro ae aho'obëhe iae mevavuo'ë'e. Ëhuni God-hu a sisë i'u mana bojëmi'iröhoho iae maeje.

⁷O nani aëro ëma uehorovoromo uvo'ë'e: Naehu jö sareri jövë'ohuro ëhuro God-are jö maho va'orahoro jio'a'ajëjo. Ëhi jië'ëro God-are ihoho döro jio'a'ajëjo. Nasi sisëhuni

hesi ihoho döre jï'oho God-hu na ue'iröhoho: Ja sisë javaje sisëro va'ë ue'iröhoho ëho sisë höjo. Röhu aehu ëhi jövë'oho ëho sisëje. ⁸ Ëhi jï'e jöho aviëhi jïanove. Ruehego no mu sisë vaejarëjo ëhuro God-are ihoho mae jio'iröhe höjo. Iae aëro Paul nasi ihoho ijumoromo ëma uëvarueje: Nöröro ëhi jï'e jö sisëho jövaje höjo. Ëhi ataruëro jï'ëro sisëre va'oruomë'oho iae maeje.

Ae aho'obëhe sisë javuaje jöhoje.

⁹ Röhu Jew raje noro God-are mu mabëhe baej'ë javue. Mu mabëhe baejaroho na ëhuro noro sa'a ioro'ioro rajoho mue aho'o iosirëmiromo mae javue o bogo. Bogo, Jew rajohu'o sa'a ioro'ioro rajohu'o no aho'o mu sisë darugo hesi uhuremu javue. Ëjöho na mami'e jajivodeje ga'irarijego. ¹⁰ God-are surire jöhu'o ëhi gemuoho uvë'eje:

Bogo mae bogo ae gemu vadu'oho maho höjo.

¹¹ Aho bogo simano maho uehorovoroumaje höjo.

God biroharue öroho bogo nahoruomaje höjo.

¹² Ae aho'obëhe öri maho nugö'ö'i je'oro va'oruomë'e höjo.

Ae aho'obëhe sisë mae sisërevö'e höjo.

Bogo mae bogo ae gemu vadu'oho mu maho vaejaje höjo.

¹³ Jö sisë ataruohuro ëhuro sisë bëhe jëvajëjo.

Ae guavoromo bogo duho'i ma-nugego usihövo rojomajëhi jabesi huë gagore ëhi rojomanovaje höjo.

Jö'ëro jö sareri sareri'e atoromo jövëro rovanovaje höjo.

Bitare vuodovë'ohuro bitaro gagore sigobu vörö va'ënoho rojomaje höjo.

¹⁴ Jö'ore ajuo'e rojomego nu huë'e jöemu atarue höjo.

¹⁵ Hörohuro tutuvo va'oromo ae muo'amarue höjo.

¹⁶ Dinö'e va'ë'iroho bövie bise'e ijumobe ae huë vavaene bojëmibe va'arue höjo.

¹⁷ Huë mae bae'iröhe öroho bogo gavë'e höjo.

¹⁸ Simanohuro God bogo uehorovë'e ma-jijiharue höjo.

God-are surire jögoroho ëhi uvë'eje.

¹⁹ Ëmu sisë vaejarue jöho iae no gavarueje. God-hu ë jö bojamuijade hesi bëhoho ëhuro Moses-are jögoru hesi uhure raromarue ariböviohuro heromo jabumë'o sa'a ioro'ioro rajohu'o ae aho'obëhe jö mana uaröhoho bogojavuego jö'e tugorohoromo hesi nunire gövögövövë'e riravo'iröhego ae aho'obëhe maja h'ö'ajaire beva'ajire. ²⁰ Gövögövövë'e riravo'iröhe hesi bëhoho aehu mu vaeröhe jögoru heromo ijore ijore va'ë'oho bogo ëhuro God-are nuniroho maho riravo'i a'i ma-uvarueje: Noro ë jögoroho bogo avoho ejaruëro javuë'ëro sisë javuajëjo.

Keriso mae uehorovaruohuro ëhuro God-are nunire mae riravarue jöhoje.

²¹ Iae ëhi sisë javue röhu jaruvoroho noehu hesi nunire mae riravo'iröhe öroho God-ro röjahuij'ëje. Moses-are jögoru surire o jö God-aro baeromo ae majëhinövare aribövi jabesi surire ë hesi öroho iae jajivë'eje. Röhu ë öroho bogo jögoru heromo mu vaeröhe örehu jio'i a'i öroho aviëhije. ²² Aehu Iesu Keriso mae uehorovë'ohuro ëhuro God-ro nosi sisëho uehorovoromo vuonugego hesi nunire mae riravarueje. Ae aho'obëhe mae ae rahu Keriso mae uehorovë'oho ëhi ajamuijajeje. God-ro gövuajeje no ae aho'obëhe bogo göho göho javuo'i ma-gemuoho javuego. ²³ No ae aho'obëhe sisë vaej'ëro God-are ajï'e muoho vae'iröhoho bogo eni javuego ma-raromarueje. ²⁴ Röhu God-ro hesi uehorovoromo no huë mae bojamuiromo Iesu Keriso noni guomöjoro sa'are nugö'öromo ëhuro sisë hesi darugore javuadoho baeniahijë'ëro no hesi nunire mae riravarueje. ²⁵ God-ro Keriso nugö'öjadeje hesi köho rueromo guomego noro ë muoho mae uehorovego God-ro nosi sisëho dejonö bu'öjego hesi dë vörönimadoho barë'iröhego. God-ro nosi sisëho ëhi ajamuijade hesi bëhoho röjahuijego noro garöhego hu maemu vaejaje ae jïego. Ëhesi bëhoho mami'oho aëro sisë vae'ëgo God-ro ma-taemorovoromo nunëremu gëbe ruenövadeje. ²⁶ Avevejö'oho nosi sisëho bogo ma-nunëremu gö'i a'i Keriso nosi sisëni nugö'öjahuadeje. Hu nimadeje röjahuijego noro garöhego hu maemu vaejaje ae

jiego. Noro garõhego hu mu maemu vaejajoho o Iesu mae uehorovarue aribõvi nosi sisë mu'uvahuego hesi nunire mae riravaruocho.

²⁷ Ëhi jië'oho no diehi nimorohë'i uvo'ejo: Nosi birirohuro God-are nunire mae javuajëjo. Ëhi jië'e jõho bogoje. Ëhesi bëhoho rabëni no bogo ëhioho uvo'ejo. Na nosi birirohuro mu vaerõhe jõgoroho baej'ëro ëhuni no bogo nimorohë'ioho atarueje. Bogo ëhiohoje. Nosi biriroho bogo a'i God-are birire mae uehorovo'irõhe jõgoroho baej'ëro ëhuni bogo ëhioho ato'ejo. ²⁸ Ëhesi bëhoho rabëni. Noro uehorovoromo uvarueje: Jew rajo mu vaerõhe jõgoru ijore ijore va'ë'oho bogo ëhuro God-are nuniroho maho riravarue hõ uvo'i a'i Keriso mae uehorovë'oho ëhuro God-are nunire mae riravarue hõjo. ²⁹ Jew rajo mu vaej'ëohuro ëhuro maro javuo'ibejo no uvo'ibejo: God hu ma-Jew rajohemu muebe'amaje hõjo. Röhu hu bogo jabumëremu muebejëvo'i a'i sa'ae aho'o muebe'amajeje. ³⁰ Iae God hu ma-gemuje. Huro Jew rajohu'o sa'a ioro'iorohu'o mae riravorõhe õre gemuoho rõjëhijajeje. Jew rajohu'o sa'a ioro'ioro rajohu'o jabumë Keriso mae uehorovë'ohuro ëhuro ajëmijego mae riravarueje. ³¹ Keriso mae uehorovo'irõhe jõho baej'ëohuro na no ëhuro God-are jõgoru mamioho aharueje. Bogo aho'i a'i ëho ma'eno titimarueje.

4

Abraham bogo aehu hesi sino tarijaharohuro bogo ëhuro God-are nunire mae nami'i a'i huhu God mae uehorovadohuro ëhuro God-are nunire mae namijade jõhoje.

¹ Bëhe vaeromo jiade Jew rajo nosi hijoho Abraham jie. Röhu Abraham-hu gavade God-hu diehi ajamamu gavade jõho no uehorovo'ejo. ² Nani aëro uvo'ë'õ: Abraham-hu God-are nunire mae nami'ië'adevaroho huro mu mae vaeromo ëhuro God-are nunire mae namijade hõjo. Ëhuni dõro bamorovoromo nimorohë'i uvo'ibejajo: Naro nasi birivoromo ëhuro God-are nunire mae namijaje hõ uvo'ibejajo ëho iae mae jio'ibejajo. Nani ëhi uvo'ë'õ. Röhu God-hu gavajoho Abraham-hu dõro bamorovo'irõhoho bëhoho bogoje. ³ God-are surire jõho ëhi uvë'eje: Abraham-ro God-are õrire mae uehorovoromo uvade hõjo: Hesi God-ro ajemi'ajëjo. Huro mae uehorovamu gagorovo God-ro huni vavaenimoromo uvade hõjo: Na gavajoho hesi sisëho barë'ego iae hu a mae hõjo. ⁴ Röhu gõehu gõ hesi mu vaejahamu ë hesi mana bojamamu gavë'oho uvarueje: Ëaho bogo ëma vavaenimoromo suvuoroho bojami'i a'i mu vaejadohuni hesi manaho bojamade hõjo. ⁵ O ae gõehu mu mae bogo vae'i ma-uvë'oho: Iae mae-ëjo. No a sisë javuë'ego God-ro nosi sisëho mu'uvahuego hesi nunire mae riravarue hõjo. Ëhuni hesi huro na'o ajemi'iramu mae jevo'ajë uvë'oho God-ro uvajeje: Ëahuro na mae uehorovevë'ëro ëhu'ëro na gavajoho hesi sisëho barë'ego iae hu a mae hõjo. ⁶ David-ro jõe gemuoho jajivadeje. Aehu bogo hesi birivoromo mu mae vae'i ma-God mae uehorovego God-hu vavaenimoromo ajamego hesi nunire mae namiromu huë mae baejaje jõho David-ro God-are surire jajivoromo ëhi uvë'eje:

⁷ O asë'e mabëhëjo.

Aehu God-are jõ ahamu huhu uehorovoromo vuonugahuë'oho mu sisë vaejamu u'ovahuë'oho no huë mae baejarue hõjo.

⁸ Noehu sisë vaejaroho Badahu bogo ijonõ jõ majahuijë'oho ëhuro no huë mae baejarue hõjo.

Ëhi uvë'eje.

⁹ Röhu ë huë ma baejarue aribõvioho rahumëje. Na ma-Jew rajo mu vaeromo sino tarivo'amarue aribõvohuremu God-are nuniroho maho riravoromo huë maho baejarueje. O na sa'a ioro'ioro rajohu'o ëhi gemuoho huë mae baejarueje. Bogo Jew rajohuremuoho a'i Jew rajo mu bogo vaeromo sino bogo tarivo'amarue aribõvioho jabu'o ë huë maho baejarueje. Ëhesi bëhoho urimë'i naro ave God-are surire jõho adahoromo jajivë'e jeve. Jajivoromo uëvë'e jeve: Abraham-ro God-are õrire mae uehorovoromo uvade hõjo: Hesi God-ro ajemi'ajëjo. Huro mae uehorovamu gagorovo God-ro huni vavaenimoromo uvade hõjo: Na gavajoho hesi sisëho barë'ego iae hu a mae hõjo. ¹⁰ Röhu rabu'e majare

God-ro uvadeje: Abraham hu mae höjo. Na hu sino tariojahare maja hesi urimo o ijono evare uvadeje. Sino tariojahare maja hesi urimo evare God-ro uvadeje: Abraham hu mae höjo. ¹¹ Abraham mae hö uvonugoromo ijono God-ro sino tarivoröhe muoho Abraham bojamadeje ae aho'o ëho garomo uvoröhego: Urimë'i sino bogo tariojahare majare Abraham-ro God mae uehorovoromo ëhuro hesi nunire mae namijade höjo. Èhu'ëro jii'ëro Abraham-hu ë'adëhi Jew rajo mu bogo vaeromo sino tarivo'amë'e ma-God mae uehorovoromo hesi nunire mae riravarue aribövioho ë aribövi jabesi bëhoho iae Abraham-je. ¹² Röhu Jew rajo mu vaeromo sino tarivare aribövie gö gö nosi bëhoho iae Abraham gemuje. Èhesi bëhoho Abraham ë'adëhi nosi sinohu'o tarivahu'ëje. Röhu ëho ma-jianovo'i a'i Abraham sino bogo tariojahë'e ma-hijade majare huhu God mae uehorovadëhi Jew raje ae rahu ëhi gemuoho God mae uehorovë'o ho ëhuro Abraham hu nosi bëhohoje.

Noehu jögoru ejaruohuro bogo ëhuro God-are huë maho nosiriroho rue'i a'i noehu God mae uehorovoromo hesi nunire mae riravaruohuro ëhuro God-are huë mahuro nosirire rovajeje. Èhesi jöhoje.

¹³ God-ro Abraham uavadeje: Ave jöho na mae uavajëjo. Naro ja'o jasi ujohu'o sa'ae aho'o bojëmi'iramu bae barë'arujëjo. Rabëni baeröhego God-ro uavadeje. Bogo Abraham-hu mu vaeröhe jögoru ejahadahunioho bogo ëhunioho God-ro mana uavadeje: Sa'ae aho'o bae barë'arujëjo. A'i Abraham-ro God mae uehorovoromo uvadeje: Hesi God-ro ajemi'ajë uvaduhuni ëhuni God-ro uvadeje: Na gavajoho Abraham-are sisëho bar'ëgo hu mae hö uvaduhuni ëhuni uavadeje: Sa'ae aho'o bae barë'arujëjo. ¹⁴ O God-ro uö'ibejo: Ave jöho na mae uëvajëjo. Jemëhu jemesi biririvoromo mu vae'irarije jö ejehë'ohuro ëhuro na sa'ae aho'o bojëmi'ejöjo. O bogo ejehë'ohu bogo bojëmi'ejö uö'ibejo no mae uehorovoromo uvaruoho: Hesi God-ro ajamui'iramu mae javuo'ajë uvaruoho ë hesi bëhe bogojio'ibejo. O nosi biriroho bogo eni javuë'ëro huhu bojamui'i uövuadoho bogo bae'ibejo. Röhu bogo ëhiohoje. Mu vaeröhe jögoru ejaharuohunioho God-ro bogo ëhunioho ajamui'i a'i noehu hesi örire mae uehorovaruohuni ëhuni ajamuajeje. ¹⁵ Mu vaeröhe jö God-hu bojamuadoho no bogo ejahego mae javuo'i a'i ahego God-ro no göromo dë vörönimego i'ue bojamuajeje. O mu vaeröhe jögoroho bogojio'ibejo bogo aho'ibejo.

¹⁶ Èhu'ëro jii'ëro God-hu no ajamui'i Abraham uavadoho ëho no bogo mu vaeröhe jöho ejahoromo bae'i a'i God mae uehorovoromo ëhuro baejarueje. Èhu'ëro God-ro bogo nosi muoho garomo huhu Abraham uavadëhi ëhi mana ajamui'i a'i hesi ëma nimoromo huhu Abraham uavadëhi iae hu ëhi ajamuego ëhuro Abraham-are ujoho no ae aho'obëhe iae baejarueje. Bogo Moses-are jögoru ejaharue aribövie gemuohemuoho bae'i a'i ae rahu Abraham-hu ë'adëhi God mae uehorovë'o ho iae bae'ëjo ë hesi bëhoho God mae uehorovarue aribövioho aho'obëhe nosi bëhoho Abraham jii'ëro. ¹⁷ Abraham nosi bëhi jio'iröhe jö God-hu Abraham uavadoho God-are surire jajivoromo ëhi uvë'eje: God naro ja ajami'iramu ëhuro sa'a gö gö raje aho'obëhe jabesi hijoho ja javo'ajëjo. Èhu'ëro jii'ëro noehu God mae uehorovarue aribövie aho'obëhe nosi bëhoho Abraham-je hu God-are nunire ëhi jii'ëro. God gemu Abraham-ro mae uehorovadeje. God hu uvovë'e aho ajamuijego i'ovavuaje ahoje. God-hu uvego urimo bogojio'amë'e bövi bise'o ëma jio'amaje ahoje. God hu ëhi jii'e a jiajoho Abraham-ro hu mae uehorovadeje. ¹⁸ Mae uehorovamu God-ro uavadeje: Sa'ae gö gö aho'obëhe jabesi hijoho ja javo'ajëjo. Èhi uavamu Abraham-ro uvadeje: Diehi'oromo bae'ejöjo. Öroho bogohöjo. Iae ëhi uvadeje röhu huro God mae uehorovoromo uvadeje: Iae hesi höjo. God-hu uevadëhi iae ëhi jio'a'ajë uvoromo hiromo muebejadeje. God ëhi mae uehorovoromo muebej'ëro ëhu'ëro Abraham sa'ae gö gö aho'obëhe nosi bëhoho jii'ëje. Nosi bëhi jioröhe jö God-hu Abraham uavadoho God-are surire ëhi uvë'eje: Abraham jasi ujoho aho'obëhe jiji val'ëne jiobe va'a'ajëjo. Surire jö jiadëhi iae ëhije. ¹⁹ Röhu Abraham vadune aho'obëhe 100 rabu'e bae'irögoru ë'ë'ëro ëhu'ëro hesi sino haho'e u'uhoromo guomanovë'e jiajeje. O hesi vaboroho Sarah dë

tioj'e magonahe jiadeje. Baruo'hu'o vaboro'hu'o ehi siserej'ev'e jiadeje. Röhu Abraham-ro uehorovoromo uvadeje: Iae ehi höjo röhu God-ro iae uje bojemi'iramu ehuro aho'obeh'e jieho'aj'ejo. Abraham-ro ehi biririvoromo God mae uehorovobe rovadeje. ²⁰ God mae uehorovadoho hu bogo vuonugoromo uvadeje: Na God-hu uevad'ehi ehi jio'a'aj'ejo o bogajo. Bogo ehioho uvo'i a'i biririvo avohoromo God mae uehorovobe rovadeje. Mae uehorovobe rueromo God-are örire rajahiromo ²¹ uvadeje: Iae mae-ejo. God-hu uevad'ehi ehi ajemi'iröhoho iae hu eni jiaj'ejo. ²² Ehi mae uehorovoromo uvamu gagorovo God-ro Abraham-ni uehorovoromo uvadeje: Ehu'ero na gavajoho hesi sis'eho bar'e'ego iae hu a mae höjo. ²³ Röhu e jöho bogo Abraham-nioho gemu jajivo'i ²⁴ ae aho'obeh'e nosi jöhu'o jajiv'e'je. God-hu no ae rahu mae javuaj' uvoromo baejavuade aribövi nosi jöhoje e hesi behoho no Iesu nosi Bada i'ovade ae God hesi örire mae uehorovuero jii'ero. ²⁵ Röhu God-ro Iesu a övore boj'madeje baeromo anego nosi sis'ehi guomoröhego. Guomamu God-ro hu ajamijamu i'ovoromo ri'öj'adeje ehuro noro God-are nunire mae riravo'iröhego.

5

God-are nunire mae riravaruero jii'ero hu'o hu'e mae baeromo nimoroharue jöhoje.

¹ Noro Keriso mae uehorovamu God-ro nosi sis'eho mu'uvahuamu hesi nunire mae rirav'e'ero javu'e'ero eh'u'ero God'o no'o gemuoro mae raromarueje nosi Bada Iesu Kerisoro buore vaejavu'e'ero. ² Buore vaejavuoromo ajamuij'ero ehuro no God-are hu'e maho bihoromo biririvoromo hesi nunire mae riravarueje e hesi behoho noro hesi örire mae uehorov'e'ero javu'e'ero. Hesi nunire mae riravoromo noro uvarueje: Noro God-are aji mare raromo'ejar'e uvoromo ehuni noro nimoroh'e'i muebejarueje. ³ Röhu göho no hu'e vavaeni bövi bise'o baej'iroho eh'u'o nimoroharueje. Rab'eni hesi behoho no uvarueje: Hu'e vavaeni baej'ohuro ehuro birire baeromo God mae uehorovobe va'arue höjo. ⁴ Biririvoromo God mae uehorovobe va'e'ohuro ehuro God-ro uvajeje: Jem'e ruahö'öj'e j'evaj'e uvajohuro ehuro no de ma-mab'eh'e jioromo muebejarueje ijönö huro ajamuego ma-mab'eh'e javuoröhego. ⁵ No mab'eh'e javuo'iröhego muebejaruoho ehö bogo sarerivoromo e'arueje. Ehesi behoho God-ro hesi Aru'ahoho no bojamuij'ero no de vövöbajo'ere herovarueje God-ro no mab'eh'e uehorovavuo avohego.

⁶ God-hu no uehorovavuae öroho aviehije. Urimoho nosi arijo'arije ajamirov'e'oho bogo eni javuadeje. Bogo eni javuobe rovamu God-hu nimade majaho rovamu evare Kerisoro guomadeje hu bijönimarue aribövioho ajamui'iro. ⁷ O noro garöhe ae gö mae jii'e hu emä vörö'ere hijamu gagorovo hu ajami'i vuovorov'e'oho ehö juhuoni'e muego nani no hu bogo ajami'ejo. O ga'iröhe ae gö hu'e bae avohaje a mab'eh'e jii'e hu emä vörö'ere hijamu gav'e'oho hesi nani'o. Nani no hu ajami'i biririvoromo vuovorov'ejo nani bogo. ⁸ A'i Kerisoro gavade no sis'e aribövie javuamu evare huro no ajamui'i guomorovadeje. No sis'e aribövie javuamu evare guom'e'ero jii'ero eh'u'ero God-ro no röjahuij'ej'e noro garomo uvoröhego: God-ro no uehorovavuo avohaje höjo. ⁹ No ae sis'e javuamu evare Kerisoro noni guom'e'ero eh'u'ero no God-are nunire mae riravarueje. Ehuo'ho i'u'e mae jiadeje. Ehuni no biririvo avohoromo uvo'ejo: Kerisoro mami'e ajamuij'ego majae ijönöho God-hu bojamui'iröhe i'uo'ho no bogo bae'ejar'ejo. ¹⁰ Hu'o no'o gororamirovarue aribövie javuamu evare hesi Hariho'ho noni guomamu ehuro hesinö ramuadeje. Ehuo'ho i'u'e mae jiadeje. Ehuni biririvo avohoromo uvo'ejo: God-ro mami'e hesinö ramu'e'ero jii'ero hesi Harihe biririvoromo hijajohuro ehuro God-ro baejavuoromo maro bamavuo'iramu mae javuo'aj'ejo. ¹¹ Iae u'emu mae javu'e'eh'e röhu avej'ö'ohu'o no God rajahiromo nimoroharueje nosi Bada Iesu Keriso-are jöeni e hesi behoho huro mami'e vöröho tugohahuoromo God-arinö ramu'e'ero.

Adam-hu mu sis'e vaejamu vuovarue muehu rue'i Kerisohu mu mae vaejamu i'ovarue muehu rovad'e jöhoje.

¹² Ehi jii'ero urimoho ae gemuero aevoromo mu sis'eho vaejadeje. Ae gemuero mu sis'eho vaejamu ehuro mu sis'eho sa'are rovadeje. Sis'eho rovamu ehuro aevoromo aho

vuovävadeje. Vuovävë'ëro ëhuro no ae aho'obëhe vuovavuobe rovajeje ae aho'obëhe mu sisë vaej'ëro. ¹³ Urimë'i Moses-hu God-are jögoru bogo barovadevare evare mu sisëho iae sa'are jobe rovadeje. Röhu Moses-are jögoroho bogojiamu aribövioho ëho bogo heromo ahë'ëro ëhuni God-ro mu sisëho gemu gemu garomo bogo adaho'i ma-nunëro gëbe rovadeje. ¹⁴ Mu sisëho bogo adaho'i ma-nunëremu gëbe rovamu röhu Adam-hu mu sisë vaejadevare evare ae aho'obëhe aevoromo vuovobe rovadoho röhu evare Moses rovadeje. Ëaribövioho Adam-hu God-are jö heromo ahadëhioho bogo ëhioho heromo ahobe rovë'e jabu'o vuovëvobe rovadeje.

Röhu Adam hu God-aro jioromo ijönö sa'are rovade aho Keriso va'ëne ëhi jianove. ¹⁵ Iae ëhi jie röhu Adam'o ijönö sa'are rovade ahu'o ae niö'i jabesi muoho bogo gemuoho jio'irögoro gö gö jiadeje. Gö gö jië'ëro God-are suvuorohuro Adam-hu sisë ë'adoho iosiramijë'eje. Ëhesi bëhoho Adam hu ma-gemu jiadeje. Huro God-are jöho ahamu ëhuro ae aho'o vuovëvobe rovë'eje. Iae ëhi jie röhu Iesu Keriso hu'o ma-gemuje. Röhu God-ro no huë baejavuoromo ë aho uavamu nosi sisëho ajamuijë'ëro ëhu'ëro ae aho'obëhe hesi huë maho bae avohobe maro raromobe rovë'e javue. ¹⁶ Ae gemuëro sisë vaej'ëro ëhu'ëro no'o sisë javue röhu God-are suvuorohuro ë muoho iosiramijë'eje. Ëhesi bëhoho huro mu sisë gemu vaej'ëro ëhu'ëro God-ro no uövuajeje: Jemë'o sisë'e aribövie jëvájëjo. A'i noehu mu sisë aho'obëhe vaejaruoho God-ro hesi nimoromo huë baejavuoromo uövuajeje: Jemesi sisëho iae mu'uvëhë'e höjo. ¹⁷ Ae gemuëro mu sisë vaej'ëro ëhu'ëro a vuovavuaje muoho bërömoreajë'eje ae gemuëro huro ëhi sisë ë'ë'ëro. Ëhuni no biririvo avohoromo uvo'ejo: Ae gemu Iesu Kerisoro ajamuijë'ëro ëhu'ëro ae rahu God-are suvuoro mabëhe baeromo aevoromo hesi nunire mae riravë'oho ëhi jië'e aribövioho noro bogo vuovo'i Keriso-are darugoho baeromo masije riravo'ejärëjo.

¹⁸ Ëhu'ëro jië'ëro mu sisë gemu jië'ëro ëhuro ae aho'o God-are nunire sisë'e javue. A'i ae gemuëro ma maho vaej'ëro ëhuro ae aho'obëhe nosi sisëho mu'uvahuë'ego no God-are nunire mae jioromo hu'o maro raromo'ejo. ¹⁹ Ëhesi bëhoho ae gemuëro God-are jöho ahamu ae aho'obëhe sisë'rëjavuadeje. A'i ae gemuëro hesi jöho ejahë'ëro ëhu'ëro ae aho'obëhe hesi nunire marëjavuo'ë'e.

²⁰ Moses-are jögorehu ijönö rovade hesi bëhoho aëro ëho heromo biriri'övoromo jöho ahobe va'ego mu sisë bërömo bëhe ma-va'orahoro jioröhego. Mu sisë bëröme jio'amadeje röhu God-ro hesi nimoromo huë baejavuoromo bogo bise'o vadu'oho ajamuiromu nosi sisëho iosirami'amoromo hesi mu bërömo röjahuijadeje. ²¹ Ëhu'ëro urimoho mu sisëho bërömo jiadeje. Mu sisë hesi uhure javuë'ëro vuovavuonövadeje. Jaruvoho God-hu huë baejavuade muoho bërömohe. God-are huë ma hesi uhure javuë'ëro hesi nunire mae riravarueje. Mae riravoromo ma-ioro'iore gemu maro raromo'ejo nosi Bada Iesu Kerisoro ajamuijë'ëro.

6

Noehu Keriso'o bimuvoromo hu'o vuovanovoromo uehoro mami vuonugo'i i'ovoromo uehoro i'e baejarue jöhoje.

¹ God-hu hesi nimoromo huë baejavuoromo nosi sisëho ajamuijë'oho no diehi uvo'ejo. Na no uvo'ejo: Ë'ego no ëhi ma-mu sisëmu vaebe va'ego nosi sisëho aho'o jiego God-ro no huë baejavuo avohoromo mu'u'amajo. ² Bogo mae bogo ëhioho uvo'ejo. Mu sisë uhure javuadoho no vuovaruëhi ëhi jianovoromo iae barëjahuë'eje. Ëhi jië'oho no diehi vuonorö'öromo mu sisë hesi uhuroho biririvoromo raromonövo'ejo. No bogo ëhioho ë'ëjo. ³ Ave jöho jemë'o uehorovo'ibejarije. Ae rahu bapataeto vaejamu Iesu Keriso'o gemuore bimuvavuë'oho ëhuro hu'o gemuore bimuvoromo vuovavuë'eje. ⁴ Ëhuni no bapataeto vaejamu ëhuro Keriso'o bimuvoromo vuovoromo hu'o gemuore sa'a gagore raromareje ëhuro Vavuehu hesi aji'e darugohuro ajamamu Kerisohu guomadoho i'ovoromo ri'öjadëhi ëhi no'o mu i'ore raromo jijihonövoröhego.

⁵ No Keriso'o gemu mae bimuvoromo hu guomadēhi no'o ēhi vuovarohuni ēhuni iae no Keriso'o gemu mae bimuvoromo hu i'ovadēhi no'o ēhi i'ovoromo mu i'e bae'ejo. ⁶ Ave jōho iae no gavarueje. No Keriso'o gemu mae bimuvoromo korosire ano taemavuoromo hu'o vuovavuade hesi bēhoho sisēhu nosi uehorore dajore biririvobe rovadoho barējahuego ēhuro mu sisē hesi darugore javuadoho ijonoḥo bogo vaenōvorōhego. Ēhuni no Keriso'o gemu mae vuovavuē'ėje. ⁷ Keriso'o gemu mae bimuvoromo vuovavuē'iroho sisē uhure javuadoho iae barējahuē'ėje. ⁸ No Keriso'o gemu mae bimuvoromo vuovavuē'ēro ēhuni no mae uehorovoromo uvarueje: Iae no i'ovoromo hu'o gemu mae raromonōvo'ejarējo. ⁹ No ēhi uehorovarue hesi bēhoho no gavaruoho God-ro ajamamu Keriso guomoromo ri'ōjē'ēro hiromu rōhu maho bogo guomo'ē'e hu guomorōhe hesi vōrōho ruahō'ōjē'ēro. ¹⁰ Keriso urimo guomadeje. Ēhesi bēhoho hu guomoromo ēhuro sisēho ioro'iore gemu taemadeje. O jaruvoho iae hu hije ē hesi bēhoho hu God'o gemu mae hijajēro jīē'ēro. ¹¹ Ēhuni jemēro uvore: No'o vuovavuamu ēhuro ma-ioro'ioiremu mu sisēho taemē'e javuajējo. Rōhu no i'ovoromo Iesu Keriso'o gemuore javuē'ēro iae God'o gemu mae raromaruējo.

¹² Ēhuni mu sisē uehoro sisē jemesi vuovēvorōhe sinehu nimajoho ēho nadi ejahorego ēhuro sisēho jemē bogo ruahō'ōjēvo'iro. ¹³ O jemesi ove hōre simane rabe sisē ōriroho nadi bojamirovoromo mu sisēho vaere. A'i uvore: No i'ovoromo mu i'e baejē'e aribōvie javuajē uvoromo jemesi dē vōvōbajo'e aho'o ma-God gemu bojamirovoromo jemesi ove hōre simane rabe ēhu'o hesi ōroro bojamirovoromo mu mae vaere. ¹⁴ Mu sisēho jemē bogo ruahō'ōjēvo'ē'e. Ēhesi bēhoho God-are jōgoru aharueje ē hesi i'uoho bogo bae hesi jēve. God-ro hesi nimoromo huē baejēvoromo jemesi sisēho uehorovoromo vuonugēhajeje. Jemē ēhi maro raromarujeje.

Mu ma hesi darugoremu raromaruje jōhoje.

¹⁵ Jōgoru aharue hesi i'uoho bogo bae'i God-are nimoro nosi sisē uehorovoromo vuonugahuē'oho na no ēhunioho mu sisēho vae'ejo. Bogo mae bogo ēhioho ē'ejo. ¹⁶ Jemē'o uehorovore. Jemē ae gō hesi jōhemu ejahoromo hesi muohemu vaejaho'i nēgamu jemesi arijo'arije bojamirovē'oho ēhuro jemē ē a hesi darugoremu raromaruje. Jemē mu sisēmu vae'i nēgamu bojamirovē'oho ēhuro jemē sisē hesi darugoremu raromoro vuovoromo sisēro va'o hesi jēve. O God-are jō ejahoromo hesi muemu vaejaho'i nēgamu bojamirovē'oho ēhuro hesi darugoremu raromoro hesi nunire mae jēvajeje. ¹⁷ Rōhu na God mabēhe uave. Ēhesi bēhoho urimoho jemē mu sisē hesi darugoremu raromonōvarijeje rōhu avevejō'oho jemē God-are jō diehi diehi rōjēhijamu hejarijoho ē jōho jemesi dē vōvōbajo'e aho'obēhe ejaharujeje. ¹⁸ Mu sisē hesi darugoremu raromarijoho God-ro jiovēhadeje. Ēhu'ēro ae gōehu gō hesi darugoremu hijajēhi ēhi jemēro mu ma hesi darugoremu raromarujeje. ¹⁹ Ae gōehu gō hesi darugoremu hijajēhi jemēhu mu ma hesi darugoremu raromarujeje jō naehu uēvaje hesi bēhoho nasi jōho sama'e huruohē'e jiorōhego jemesi uehoroho u'uhēvego bogo avoho hejōēni. Urimoho jemēro jemesi ove hōre simane rabe aho'o bojamirovarijeje ēhuro va'inumie mu o mu sisē gō gō hesi darugoremu raromoro ēhi jīē'e muohemu vaenōvo'irarijēro. O avevejō'oho ēhi jemesi ove hōre simane rabe aho'o bojamirovoromo mu ma hesi darugoremu raromoro God-are mu mahemu vaenōvore.

²⁰ Urimē'i jemē mu sisē hesi darugoremu raromarijevaroho evaroho mu ma hesi darugoroḥo bogo raromoi ma-raromarijeje. ²¹ Ma-raromoro mu sisē vaejarijoho uehorovoromo javojēge. Rōhu evare majare ēhi jīē'e mu sisē vaejarijoho ē hesi maho rabe baejarijeje. Bogojadeje. Ēhi jīē'e mu sisē vaejē'oho ēhuro ma-vuovoromo sisēro va'arujeje. ²² O avevejō'oho God-ro ajēmamu mu sisē hesi darugoremu raromarijoho vuonugo'i God-are darugoremu raromē'e jēve. Ēhu'ēro jemē God-are aribōvi mae jēvoromo ēhuro ma-ioro'ioiremu maro raromarujeje. ²³ Noro mu sisē vaejēgo ē hesi manaho baeromo vuovoromo sisēro va'arujeje. O God-ro hesi huē baejavuaje suvuoroḥo bojamuego ēhuro no ma-ioro'iore gemu maro raromarujeje Iesu Keriso nosi Badare ae gemuohuro javuē'ēro.

7

God-are jögöru ahoromo vavaeni'ere raromaro ho vuonugo'i Keriso-are aribövie javuaje jöhoje.

¹ Aganomë sa'a a masijo jabeti mu vae'irarije jögöru hesi öroho jemë gavarujëro jëvë'ëro ëhuni ave jöho iae ga'a'aruje. Ja sa'are hijë'oho sa'a hesi jögöru uhure hibe va'ojuvo guomavo'iramu jögöru uhuroho bogojavo'ë'e. ² Bëhoho ëhi jianove. Baru hijë'oho vaborohuro hu gemu gabe va'ë'e jögöru ëhi uövuë'ego. A'i baru guomë'oho magonahoho ë jögorehu nijio'iraejadoho iae barëjë'eje. ³ Ëhi jië'ëro baru hijamu sionoho ioro bamë'oho aëro uvo'ë'ö: Ëmagonahoho önö'e ma-juvë'e magonahe höjo. A'i baru guomë'oho jögorehu nijio'iraejadoho barëjë'ego hesi nimoro ae gö baeromo hu'o gemuoro hijë'oho bogo önö'e ma-juvë'e magonahe jio'ë'e. ⁴ Baru mamioho guomamu magonahohuro baru i'e baeromo gemu mae hijajëhi jemë'o ëhi jëvanove. Jemë Keriso-are sinohu'o gemuore bimuvorovoromo vuovëvë'ëro ëhu'ëro jögöru aharuje hesi i'uoho ma-ioro'iore gemu barëjëhë'eje ëhuro guomoromo ri'öjade ahu'o gemuoro jemëro raromoromo God-hu nimaje muoho vae avoho'irarijeko. ⁵ Röhu urimë'i nosirire jiaje sisëhemu uehorovarevare evare mu vaeröhe jögöroho no uehorovoromo dë iahu'ego mu sisëmu vae'i nimonö-vareje. Ëhi nimoromo sisëho dajo haho'ëro vaeromo ëhuro vuovoromo sisëro va'o hesi javuadeje. ⁶ Avejë'oho mu vaeröhe jögorehu no nijio'iraejavuadoho Keriso'o gemu mae vuovavuanovë'ëro ma-ioro'ioremu barëjahuë'eje. Ëhuro ë jögöru aharue hesi i'uoho bogo bae hesi javue. Ëhu'ëro ijönöho no öri mamioho bogo va'oromo ma-surire jajivë'e jögöroho adahobe God-are muoho ma-sivohe gabe va'i a'i öri i'ore va'oromo God-are Aru'aho hesi darugohuro hesi muoho vaejarueje.

Mu vaeröhe jögöru adahoromo ëhuro mu sisë hesi bëhi gavarue jöhoje.

⁷ Ësurire jajivë'e jögöru hesi uhure javuadoho iae barëjë'eje. Ëhuni no diehi uvo'ejo. Na no ëma uvo'ejo: Ëjögöroho sisë höjo. Bogo mae bogo ëhioho uvo'ejo. Ëjögöroho bogojio'ibejo Paul na bogo ga'ibejo mu sisë hesi öroho diehi jië'e jiego. Ëhesi bëhoho jögore gemu jajivoromo ëhi uvë'eje: Nadi ae gö hesi böviëni bise'ëniho ganiganimonëjo. Bogo ëhioho jajivo'ibejo naro uvo'ibejo: Ganigani muoho nani mae höjo. ⁸ Röhu ganigani hesi jögöroho iae jajivë'eje. Jajivë'ëro naro garomo uvodeje: Ëganigani muoho God-ro bijönimaje hö uvamu nasi dë iehamu sisëhuro böörömo mae rojomamu avare böviëni bise'ëni ganiganiego avohadeje. O surire jajivë'e jögöroho bogojio'ibejo uehoro sisëho bogo ëhioho rojomö'ibejo. ⁹ Urimoho ë jögöroho bogo hejë'e ëma hibe rueromo uvodeje: Nani na mae jevajëjo. A'i ganigani jögöroho hejumu mu sisëhuro baejevamu naro biriri'övoromo jögöroho ahoromo ¹⁰ uvodeje: Ëhu'ëro na guomo örire jevajëjo. Röhu mami'e God-hu ganigani jögöru bamade hesi bëhoho ëhuro no mae raromo'iröhego. Röhu ë ganigani jögöroho jië'ëro ëhu'ëro sisëhuro baejevamu na guomo örire jevadeje. ¹¹ Guomo örire jevade hesi bëhoho surire jajivë'e jögöroho na hejë'ëro ëhu'ëro ë mu sisëhuro sareremiromo dë iehamu naro jögöroho ahamu ëhuro guomo örire jevadeje.

¹² Röhu ë surire jajivë'e jögöroho aho'obëhe God-aro jioromo rovë'eje. Ëhesi jöe gö gö God-ro bamadeje noro mu mae vaejeko marëjavuoröhego. Ëhu'ëro ë jöho iae maeje.

¹³ Mae jië'oho na no ëma uvo'ejo: Jö mahuro ëhuro na ijumevamu guomo örire jevade höjo. Bogo ëhioho uvo'ejo. A'i uehoro sisëhuro ëhuro ë'adeje. Uehoro sisëhuro ë jö maho huotovoromo ijumevamu guomo örire jevadeje. Ëhesi bëhoho God-ro nimadeje no samaro garöhego sisë hesi bëhoho i'u'e mae jiego. Hu nimadeje jögöroho jioromo ëhuro mu sisëho böörömaeröhego.

Uehoro ma'o uehoro sisë'o umogirohaje ë hesi jöhoje.

¹⁴ Röhu no gavaruoho God-are jögöroho hesi Aru'ahohuro bojamuaje jöjeje. Röhu na bogo hesi Aru'aho ejahaje aho jevo'i sino hesi mu sisë eromo hesi darugoremu hijaje ae jeve. ¹⁵ Ëhuni na uvajeje: Naro diehi ë'ego ë'aje höjo. Mu mae negajoho bogo vae'i a'i mu sisë bijönegajoho ëma vaejajeje. ¹⁶ Röhu naehu mu sisë vaeromo God-are jögöru ahajoho bijönegajo ëhuro na uvajeje: God-hu bojamuade jögöroho iae maho höjo. ¹⁷ Ëhi jië'ëro

bogo naehu nimoromo sisêho vae'i a'i uehoro sisëro dëre rojomego êhuro vaejajeje. ¹⁸ Na gavajoho uehoro maho nasiriroho bogo mae bogoje. Êhesi bêhoho nasi dëre uehoro mami jiobe rovadoho êho sisêmuje. Na êhi gavaje hesi bêhoho na mu mae vae'i negajoho bogo vae hesi jeve. ¹⁹ Mu mae vae'i negajoho êho bogo vae'i a'i mu sisê bijönegajoho êho iae na vaejajeje. ²⁰ Na bijönegaje muoho êma vaejê'ëro êhuro bogo naehu nimoromo vae'irögoro uehoro sisêhuro nasi dëre rojomego êhuro vaejajeje.

²¹ Êhu'ëro na gavajeje aviêhi jiê'e muoho jiego. Na mu mae vae'i negê'iroho mu maho bogo rue'i mu sisêhuremu nasirire rovajeje. ²² Nasi dë vövöbajo'ere God-are jögoroho negajeje. ²³ Röhu na gavajoho uehoro göhuro nasi sino haho'e ruahö'öjevajeje. Ruahö'ö-jevoromo God-are jögoru simanehu nimajohu'o umogihorovajeje. Umogihorovoromo êhuro sino haho'ere jiaje sisêhuro na ruaho'amoniagegajeje. ²⁴ Asê'e vaevê'e jevaje. Sisêhu sino haho'e ruahö'öjevo'ego guomevo hesi jevajoho raro ajemi'iramu maho jevo'ê'e. ²⁵ Röhu na God mabêhe uave. Huro ua'iramu Iesu Keriso nosi Badaro ajemi'iramu mae jevo'ê'e.

Êhu'ëro jiê'ëro na êhi jeve. Naro nasi uehoroho bojamirovoromo God-are jögoroho ejahajeje. Röhu sisê nasirire jiobe rovadohuro mu sisê hesi jöhu'o ejahajeje.

8

God-are Aru'aho baeromo êhuro mae raromarue jöhoje.

¹ Röhu jaruvoho Iesu Keriso-are ae gemuoho javuê'oho mu sisê hesi i'uoho bogo bae hesi javue. ² Urimoho ja mu sisêmu vaeromo guomo öriremu juvonövanaeje. Jaruvoho ja Iesu Keriso-are ae gemuoho javê'ëro i'ovavuaeje Aru'ahohuro ja ajamirimo ê sisêhu ruahö'öjavadoho bishö'öjamu mae javê'eje. ³ God hu eni jiê'ëro hesi Harihu Maho nugö'öjadeje araeromo sino haho'e baeromo no a sisê javuajêhi hu êhi jioromo rueromo sisêni guomoröhego. Êhi'amu êhuro nosirire jiaje sisê hesi darugoho barêjahuadeje. Noehu mu vaeröhe jögorohuro bogo êhuro sisê hesi darugoho barêjahuadeje. Sisê nosirire jiê'ëro jögoru hesi biriroho bogojadeje. ⁴ Röhu God-hu sisê hesi darugo êhi tugohahuade hesi bêhoho hu nimadeje noro God-are jögoru hesi mu maho aho'obêhe vaeröhego sino hesi sisêhu nimajoho no bogo e'i God-are Aru'ahuhu nimajêhi êhi vaejaruëro javuê'ëro. ⁵ Sinehu nimaje sisê ejê'oho ê hesi muohuremu uehorovarueje. O God-are Aru'ahuhu nimajêhi vaejê'oho Aru'ahuhu uövuajohuremu uehorovarueje. ⁶ Nosirire jiaje sisêhuremu uehorovê'oho êhuro no vuovoromo sisëro va'arueje. A'i God-are Aru'ahuhu uövuajohuremu uehorovê'oho êhuro ma-ioro'iore gemu huê mae raromarueje. ⁷ Nosirire jiaje sisêhuremu uehorovego vuovavuaeje hesi bêhoho êhi jiê'e uehoro sisê baejê'oho God-are jögoroho bogo ejaharujeje. Ejaho'iröhoho bogo eni javuajeje. Êhuro God'o muorovarue aribövie javuajeje. ⁸ Nosirire jiaje sisêhuremu uehorovê'oho God-hu nimaje muoho bogo biroho hesi javuajeje.

⁹ Röhu jemê bogo êhiho ê'arujeje. Jemê sinehu nimaje sisêho bogo e'i a'i God-are Aru'ahuhu nimajêhi êhi vaejarujeje God-are Aru'ahoho jemesi dë vövöbajo'ere mami'e abo gemu mae hijê'ego. Ae rahu Keriso-are Aru'aho dë vövöbajo'ere bogojiê'oho hu bogo Keriso-are ahoje. Röhu hesi Aru'ahoho jemesirire jiê'ego êhuni huhu nimaje jöho iae ejaharujeje. ¹⁰ Keriso jemesi dë vövöbajo'ere jie. Êhu'ëro jemê sisê vaejarujohuro jemesi sino haho'oho iae vuovêho hesije röhu jemê God-are nunire mae riravarujohuro jemesi aru'ahoho biririvêhego raromarujeje. ¹¹ Röhu God-ro Iesu ajamamu guomoromo ri'öjadeje. Êhuni hesi Aru'ahoho jemesirire jiê'ëro God-hu Keriso ajamamu guomoromo i'ovadêhi jemesi vuovo sinohu'o êhi ajemi'iramu i'ovëvo'ê'e God-are Aru'ahohuro jemesi dëre abo hijê'ëro.

¹² Êhi jiê'ëro noehu mu vae'iröhoho iae jahue. Röhu nosi sinehu nimaje mu sisêho êho bogo nosi muehuje. ¹³ Êhi jiê'e sisê vaejê'ohuro êhuro jemê ioro'ioremu vuovëvo'ê'e. A'i God-are Aru'aho hesi birire baeromo jemesi sino hesi mu sisê mu'uromo bogo gavanovê'oho êhuro jemê ma-ioro'ioremu raromo'aruje. ¹⁴ Ae rahu God-are Aru'aho ejahobe

va'è'oho ë aribövioho God-are aboji harihu'e jio'ame. ¹⁵ God-are Aru'aho baejarijohuro jemë bogo tövo rëmo'ego röhu maho sisëroho raromoromo juhuonibijioho'irögoro a'i God-are Aru'ahohuro jemë ajëmiijë'ëro hesi aboji harihu'e jëve. Èhuni no God-are örire uavarueje: Asë'e Apajo. ¹⁶ Noehu ëhi uavarue hesi bëhoho God-are Aru'ahohuro nosi aru'ahoho ajamuiromo uövuaajeje: Jemë iae God-are aboji harihu'o mae jëvájëjo. ¹⁷ No hesi aboji harihu'ëro javuë'ëro no God nosi Vavu hesi maho bae hesi javue. Kerisohu baejajëhi no'o ëhi bae'ejo. No Keriso'o huë vavaene baejaruëro jië'ëro ëhuro hu'o gemuore aji maho bae'ejo.

U'emu God-are aji ma baeröhe jöhoje.

¹⁸ Na uve: Huë vavaene jaruvo baejaruoho ma-bise'e jio'ego bogo uehorovo'i a'i God-hu röjahuijego garöhe aji mabëhoho ëho börömo mae höjo. ¹⁹ Röhu vaevë'oho sa'ae mie bövie bise'e God-hu bamadoho bogo eni jiobe ruejuvo God-ro hesi aboji harihu'oho va'o-rahoro bamavuo'iramu ëho ma-marö jio'amo'ë'e. ²⁰ Èhesi bëhoho God-ro uvadeje: Sa'ae bövie bise'e sisërë'amo'ajëjo. Bogo hesi ëma sisërë'amobe rue'i God-ro hesi nimoromo sisërëjoro uvadeje hujeji avohego marë'amoröhego. ²¹ God-hu bamade bövioho bise'oho jaruvoho ëhi ma-sagohoriemu sagohoribe va'ajeje. U'emu God-ro avoho'amo'iramu ëhi jiobe va'ajoho iae barë'irögoro huro i'ovo'amo'iramu hesi aboji harihu'e ma-marö javuoröhëhi ëhi huhu bamade bövioho bise'oho marö jio'amo'ë'e. ²² Vaevë'oho iae no gavö God-hu bamade bövioho bise'oho sisërëbe rovë'e jio'ego ijönö mae jio'amo'ië'ëro. ²³ Sa'ae bövie bise'e bogo ëhemuoho sisërë'i röhu huhu hesi Aru'aho aevo'i suvuoramuoma baejare aribövioho no'o sisë'i huë vavaeni'e raromë'ëro hara'uë'i mueberomo raromö ijönö God-ro hesi aboji harihu'oho no avohavuoromo nosi sino haho'e aho'obëhe i'ovavuego ma-maemu javuoröhego. ²⁴ Èhi mae javuoröhoho ëho noro muebejoro God-ro ajamuiromo marö bamavuë'eje. Mue gö gö no avevejö'e nunehu ga'amaruoho ëho bogo ga'amo'i muebejarueje iae mami'e gavaruëro. ²⁵ A'i mae javuo'iröhoho nunoho bogo ga'i mararomoromo muebejaruëro jië'ëro ëhuni ga'irögoro birivoromo raromoromo muebebe va'arueje.

²⁶ Röhu no u'uhavuë'ego God-are Aru'ahohuro nosirire rueromo ajamuijajeje. Èhesi bëhoho God-are örire diehi avoho ato'iröhoho no dadivavue. Dadivavuego God-are Aru'ahohuro hesi ajamuiromo nosi jöëni huë vavaene börömo bëhe baeromo sisë marö hara'uoromo ëhuro God-are örire ëninamijajeje. Huhu hara'uoromo ëninamijaje jöho aho ë jöho bogo ato hesi javue. ²⁷ Röhu God-hu dë vövöbajo'ere bijioho gövuajohuro hesi Aru'aho hesi uehorohu'o iae gavajeje rabëni God-hu nimajëhi hesi Aru'ahohuro ëhi jië'e uehoroho baeromo hesi aribövi nosi jöëni ëninamijajego.

²⁸ No gavaruoho ae rahu God rajahijë'iroho mu mae mu sisë huë mae huë sisë jabesi örire rovego röhu God-ro jabumë ajëmiromo huë mahu'o huë sisëhu'o aho'obëhe avohëhajeje ëhuro ijönö jabumë mae jëvo'iröhego hesi nimadëhi rinëgade ariböviëro jëvë'ëro. ²⁹ Èaribövioho urimë'i God-ro söjëgo'irögoro uehorovëvadeje. Uehorovëvoromo hesi simanëro mevoromo uvadeje: Hujeji ë aribövioho narö tarioromo baejëvo'ejöjo ëhuro nasi Harihu ma va'ëne jëvoröhego. Èhi jië'oho jabumë ijoraje aho'obëhe jëvo'i nasi Harihoho murioho jio'a'ajëjo. Mevoromo ëhi uvadeje. ³⁰ Èaribövie gemuoho mevoromo röhu hesinö rinëgadeje. Rinëgoromo röhu jabesi jö sisëho uehorovoromo vuonugëhamu hesi nunire mae riravareje. Hesi nunire mae riravamu huro baejëvoromo aji mare rëmadeje.

God-hu dë vövöbajo'ere no uehorovavuae muoho ëho a göehu o mu göehu bogo aho'iröhe jöhoje.

³¹ God-hu ëhi ajamuijadoho no diehi uehorovo'ejo. Iae no ëhi uvo'ejo: God nosi dönö jiajoho raro no bisihö'öjavuo'ajëjo. ³² God bogo uvadeje: Nasi Harihoho maego bogo bojëmi'ejö uvoromo nijio'irae'i a'i Harihoho nugö'öjajedeje ae aho'obëhe nosi jöëni huë vavaene baeröhego. Hesi Harihoho ëhi bojamuijë'ëro ëhuni noro birivoromo uvarueje: Hesi suvuoro börömo mami'e bojamuijë'ëro ëhuni suvuoro ioro'iorohu'o iae bojamui

barë'ajëjo. ³³ God-hu baejavuade aribövi nosi jö sisëho raro jövo'ë'e. Jövoröhe aho bogoje. Rabëni God-ro nosi sisëho avohahuë'ëro uvajeje: Jemë mae jëvájëjo. ³⁴ O raro uö'ë'e: Sisë'e jëvaje sisëro va'ohëjo. Èhi uö'iröhe aho bogoje. Rabëni hesi bëhoho Iesu Kerisoro guomadeje. Guomoromo röhu ril'öromo ajiomë'ëro God-are övo manö hiromono nosi jöëni God-are örire jöe majahijajeje. ³⁵ Kerisoro no dë vövöbajole aho'o uehorovavuoromo ajamuijajeje. Uehorovavuoromo ajamuijaje öroho raro tugohahu'ë'e. Aho bogo. Huë vavaeni bövi bise'o rovë'oho ae göehu ijumavuë'oho ie o niögu suhi'e bogojavuë'oho vörö'ere va'ë'oho aehu bijuëmavuamu vuovë'oho bogo ëhuro tugohahu'ë'e. ³⁶ Iae ëhi jië'e mu sisëho nosi örire rovajeje. Èjöhö God-are surire ëhi uvë'eje:

God no jasi ariböviëro javuë'ëro ëhuni aëro vae majae muo'amavuol'ë'ego no vöröre mararumarue höjo.

Sheep rinovoromo bijuëmo'ië'aruëhi aëro nosi örire ëhi ë'aruë höjo.

³⁷ Iae no ëhi javue. Röhu rabe rabe rovë'iroho Kerisoro no uehorovavuoromo ajamuijajeje. ³⁸ Èhesi bëhoho na mae uehorovoromo uvajeje: Huhu dë vövöbajole aho'o uehorovavuoromo ajamuijaje öroho mu gö gö rovë'oho bogo tugohahu'ajëjo. Vuovavuë'oho o ave sa'are raromë'oho anerae maja aru'ahë vörö'e mue gö gö rovë'oho mu rabu rabu jaruvo o u'emu rovë'oho ³⁹ noehu dö mare ajiomë'oho o sa'a gago ëgöbövire abuejë'oho bövie bise'e dinö'e dinö'e jiajoho rovë'oho God-hu uehorovavuaje öri Iesu Keriso nosi Badarire röjahuijajoho ëho bogo tugohahu'ajëjo.

9

God-hu hesi nimoromo Israel rajo hesinö baejëvade jöhoje.

¹ Na Keriso-are ae gemuohuro jëvë'ëro jö mae majëhi'ie'e sareri'e jöho bogo. God-are Aru'ahohuro nasi dë vövöbajole'oho ajemiromo avoheho'ego herovoromo na jö mae majëhi'ie'e. ² Huë vavaene na bogo bise'o vadu'oho baeromo majae ëhi vavaenegajeje. ³ Nasi sa'a raje ö mueno'e gemuoho jëvanovo'ego jabesi jöëni vavaene baeje. Èhesi bëhoho jabumë Keriso bogo mae uehorovoruomajeje. Röhu jabesi aru'ahohuni na böröme uehorovevo'i nasi sinoho ma-bisemu uehorovajeje. Èhuni na uve: God-ro sisë bojemiromo Keriso-are bëhiroho rori'ö babu'öjevego nasi sa'a rajohuro aevoromo Keriso mae uehorovoruomo'ibejajo ëhuro iae mae jevo'ibejajo. Jabesi jöëni ëhi dë vövöbajole aho'o uehorovëvoromo vavaenimajeje. ⁴ Nasi sa'a rajoho Keriso bogo ma uehorovarueje röhu huë mabëhe God-are örire baeruomë'eje. Jabumë Israel rajo God-hu baejëvade aribövie jioruome. Huro jabumë hesi aboji harihu'e vaejëvadeje. Hesi aji maho röjëhijadeje. Hesi jögoru maho bojëmiromo uëvadeje: Iae na jemë muebejëvo'ejöjo. Mu vaeröhe jögoroho bojëmadeje. Osa börömore rueromo hu rajahi'iröhe öroho röjëhijadeje. Ijonö mae ajëmi'iröhe jöho bojëmadeje. ⁵ Jabesi hijo miono'oho God-are a masije jëvadeje. Böröme namiromo ajamuaje aho Keriso jabesi sa'a raje gemuoho jiadeje. Keriso hu bogo ma-aehu jio'i hu God jië'ëro sa'ae bövie bise'e muebejajejo ëhuni noro hesi örire rajahiemu rajahibe va'ejo.

⁶ Iae Israel-are ujo ömo'ömoho noro ëhi jië'e mu maho baejë'e javue. Röhu hesi ujoho ma-ae gemuëro gemuëro Keriso mae uehorovo'i a ioro'ioroho bogo ma uehorovarueje. Bogo ma uehorovarueje röhu Israel-are ujo muebejavuoröhëro God-hu uvade jöho bogo barëjë'eje. Èhesi bëhoho Israel-are siono baeromo mu ma bövi bise'o baejarue ariböviohuremu God-ro muebejavuo'i uvadeje. Röhu ëhi jië'e aribövioho bogo aho'oho jio'i ma-gemu gemu javue. God-hu Israel-are mu ma baejarue aribövi muebejavuo'i uvadëhi ëhi muebejavuajeje. Èhuni Israel-are ujo muebejavuoröhëro uvade jöho bogo barëjë'eje. ⁷ Göho Abraham-are ujoho aho'obëheje röhu ujo ioro'ioroho hesi mu maho bövioho bise'oho bogo baeruomë'eje. Èhesi jöho God-hu Abraham uavadoho God-are surire jajivoromo uvë'eje: Jasi harihe Isaac'o hesi ujohu'o ë ariböviohuremu jasi sionoho baeromo bövioho bise'oho baebe va'i jasi ujo ioro'ioroho bogajo. Èhi uvë'eje. ⁸ Èjö hesi bëhoho bogo Abraham hesi arijo'ëro ëma nimoromo baejade harihohu'o ë harihu

hesi ujohu'o God-are aboji harihu ömo'ömehu jio'i a'i God-hu Abraham bojami'i uavade ujo ömo'ömoho ëho jaburo Abraham-are sionoho baejarueje. ⁹ God-ro Abraham harihe bojami'i majahiro mo uavadeje: Evare majare na vuonorö'ö rue'iramu Sarah harihe raho'a'ajëjo. Ëhi uvë'eje.

¹⁰ Abraham-are harihu göhuremu Abraham-are sionoho bae'iröhego ëhi uvadeje röhu bogo ëhemu jio'i a'i ijönö Rebecca harihe niö'i huodi'e dëre jëvadeje. Harihu niö'i jabesi vavuoho gemu jiadeje. Hu nosi hijo miono'e Isaac jiadeje. ¹¹⁻¹² Röhu harihe niö'i bogo rëhëvë'e dëre jëvamu mu maho o mu sisëho bogo vaejë'iro evare majare God-ro jabesi vëmoho Rebecca uavadeje: Naro ijorajohemu ajami'iramu böröme jio'iramu muriohuro bise'e jioromo ijorajo hesi muoho vaejahonövo'ajëjo. Mu ma o mu sisë bogo vaejare majare harihe gemu ajami'i uvade hesi bëhoho ëhuro huhu nimadëhi ëhemu uehorovoromo ae baejëvoröhëni hu bogo aehu mu ma vaejaruoho gëromo rinëgo'i hesi nimoro ëma rinëgajëro jië'ëro. Iae ëhuni mu bogo vaejare majare harihe gemu ajami'i uvadeje. ¹³ God-hu ijoraje Jacob ajami'i murie Esau bogo ajamijade jöho God-are surire jajivoromo ëhi uvë'eje: Na Jacob nego'i Esau bijönegade höjo. God-ro ëhi uvë'eje.

¹⁴ Ëhi jië'oho no diehi uvo'ejo. Na no ëma uehorovoromo uvo'ejo: God-hu a sisëro jië'ëro sisë'i uehorovoromo ëhioho ë'ade höjo. Ëhi jië'oho jö sisëgo bogo ëhioho uvo'ejo. ¹⁵ Ëhesi bëhoho God-ro Moses uavadeje: Di aribövi sisë jëvajoho huë baejëvo'i negë'oho ë aribövioho huë baejëvo'ejöjo. O di ariböviohuni na vavaenimo'i negë'oho ë ariböviohuni vavaenimo'ejöjo. ¹⁶ Ëhu'ëro jië'ëro God-hu hesinö rinaguaje hesi bëhoho bogo noehu nimoromo biririvoromo muoho vae'i a'i huro noni vavaenimoromo rinaguajeje. ¹⁷ God-hu sisë a börömo Pharaoh-are örire jö majahijade jöho God-are surire jajivoromo ëhi uvë'eje: God naehu ja böröme vaejavoromo döro bamavode hesi bëhoho naro jasi sisë hesi i'uoho bojamiromo ëhuro nasi vöröho ae röjëhijego sa'ae göre göre raromarue aribövioho aho'obëhe nasi ihoho hebe va'oröhego. ¹⁸ Ëhu'ëro jië'ëro God hesi nimë'oho a ioro'ioro jabumëni vavaenimoromo hesinö javuöjoro gagovavuo'i a ioro'ioroho ma-rëmajeje jabesi nimoromo biriri'övoromo mu sisëhemu vaenövoröhego.

God-hu dë vörönimoromo i'u bojamuibe noni vavaenimobe va'aje jöhoje.

¹⁹ Ëhu'ëro jië'ëro nani jero ae gö jö sisë uehorovoromo nasi jöho ahoromo sarerivoromo ue'a'anue: God-ro hesi nimoromo ramuë'ëro ëhu'ëro noro biriri'övoromo mu sisëho vaejarue höjo. Noehu mu sisë vaejaruoho ëho bogo nosi sisëhu jio'i God-hu nimade muoho höjo. Hesi nimade muoho bogo aho varijënoho javuego ëhuni no mu sisëho vaejarue höjo. Ëhuni God-ro sarerivoromo ëma uövuaje höjo: Jemëhu mu sisë vaejarujoho jemesi sisë höjo. Ëho bogo nosi sisëho jio'i God-ro hesi nimoromo ramuë'ëro ëhu'ëro no mu sisëho vaejarue höjo. ²⁰ Jaehu ëhi jië'e sareri'e jö majehijë'oho naro ja uae'ajo: Ja ma-ae javajëjo. Ja ma-a javë'oho röhu ja rabëni biriri'övoromo God-are öriroho ëhi jië'e jö sisëho jövanuëjo. No sa'aehu rama avoharuëhi ëhi javuo'i God hu rama avoho'amaje aho va'ëne jië'ego ëhuni no bogo ri'öromo uae'jarëjo: Ja rabëni no ëhioho avohavuane höjo. Bogo ëhioho uae'jarëjo. ²¹ Ja'o uehorovone. Rama avoho'amarue ariböviehu sa'a mugöru baeromo jabesi nimoromo avohë'oho iae maeje. Nimë'oho sa'a mugöre gemu baeromo röhu ramae niö'i avohëvo'ë'e rama göho maego maja börömhuni runo'e bamo'irögoro göho sisëgo majae ëhi ë nemonövo'iröhëro.

²² Ëhu jö hesi bëhoho God no avohavuaje aeje. No avohavuaje aëro jië'ëro ëhu'ëro jië'ëro hu hesi nimoromo ë'ë'oho iae maeje. Hu nimadeje huhu a i'u bojëmi'iröhe vöröhu'o darugohu'o ae aho'obëhe röjëhi'iröhëni. Ëhuni huhu dë vörönimego sisërëröhe aribövi jabesi öriroho i'uoho bogo burëroho bojëmi'i ma-biririvoromo gë taemobe rovadeje ijönö i'uoho bojëmi'iröhëni. ²³ Ma-gë taemobe rovade hesi bëhoho hu nimadeje hesi aji mabëhe nosi örire röjahui avoho'iro rabëni hu noni vavaenimaje aribövie javuë'ego. Noehu hesi aji baeröhego huhu huë baeromo avohavuade aribövie javuë'ego. ²⁴ Jew rajo ioro'ioroho no hesinö javuöjoro rinaguade aribövie üeve. Röhu bogo Jew rajoho gemu rinaguö'i a'i sa'a gö

gö raje a ioro'iorohu'o rinëgë'eje. ²⁵ God-hu sa'a ioro'ioro rajo hesinö jëvojöro rinëgoröhe jöho urimë'i Hosea-ro God-are surire jajivoromo uvë'eje:

God-ro uvajëjo: Êaribövioho bogo nasi aribövie jëvajoho

ijonö naro uë'ejöjo: Êho nasi aribövie jioruomajëjo.

Êaribövioho bogo nasi huë baejëvaje agane jëvajoho

ijonö naro uë'ejöjo: Naehu huë baejëvaje agane jioruomajëjo.

²⁶ Di sa'are ariböviohuro henövare God-ro uë'ego: Jemë bogo nasi ariböviehu jëvajë'ego henövaroho

ë aribövioho naro uë'ejöjo: God darugo'o hijaje a nasi aboji harihu'e jëvajëjo.

²⁷ God-hu sa'a ioro'ioro rajo rinëgade hesi jöho ëhi jio'i röhu Israel rajo jabesi jö Isaiahu darugo'o uvade jöho God-are surire jajivoromo ëhi uvë'eje: Nani Israel rajoho nie'u va'ëne ae jëvo'ajëjo röhu ae ma-vemino'e i'uoho bogo bae'i mae jioruomajëjo. ²⁸ Êhesi bëhoho God-ro sa'ae aho'o jabesi sisëho ma-burëro mevoromo i'uoho ma-ioro'ioremu

bojëmi'ajëjo. ²⁹ O Isaiah-ro ave jöhu'o jajivoromo uvadeje:

Jögoru eni jië'e ae Bada God-ro noni a uje gemu gemu bogo vuonugahuo'ibejajo

Sodom amo barëjadëhi no'o ëhi barëjavuo'ibejajo.

Gomorraah amo sisërëjadëhi no'o ëhi sisërëjavuo'ibejajo.

Isaiah-hu urimo uvadëhi avevejö'oho Israel rajoho no ëhi ae ma-gemu gemu God-are aribövi mae javue.

Israel rajehu Keriso bogo ma uehorovarue jöhoje.

³⁰ Êhi jië'oho no diehi uvo'ejo. No ëhi uvo'ejo: Israel rajoho bogo a'i sa'a ioro'ioro rajoho bogo sivoho gabe rovare höjo God-are nunire mae riravoröhoho. Êhi höjo röhu jabumëro Keriso-are örire mae uehorovoromo ëhuro God-are nunire mae riravo'iröhe öroho iae baejë'e höjo. ³¹ Sa'a ioro'ioro rajohuro baejare höjo a'i Israel rajohuro uvare höjo: No God-are jögoru ejahë'oho ëhuro hesi nunire mae riravo'ëjarëromo God-are jöho ejaho'i sivoho gabe rovaroho mae riravo'iröhe öroho bogo baejare höjo. ³² Bogo baejare hesi bëhoho bogo uvareje: Kerisoro gemuëro ajamui'iramu mae javuo'ajë uvo'i a'i ömo gavareje ga'i avohorovë'ëro God-are nunire mae riravo hesi jëvego. Êhi jië'e öroho nahoromo bogo biroho'i God-are munë Iesu bijönimoromo hesirire munëro biberovanovareje. ³³ Keriso munë va'ëne jiaje jöho uhu'e jajivoromo ëhi uvë'eje:

Êhuro gahëjo. God naro munë va'ëne aho Zion bamajëjo.

Aëro hesirire ro biberovo'aruëjo.

Hesirire ro rireromo'aruëjo.

A'i ae rahu ë aho mae uehorovë'oho bogo javojimo ga'a'ajëjo.

10

¹ O asë'e aganomë nasi dë vövöbajo'oho aho'o nimo avohoromo God-are örire ëninamijajeje nasi Israel sa'a rajohuro God-are i'uoho bogo bae'i ma-marö va'iröhego. ² Êhesi bëhoho naro jabesi muoho garomo uëve: God-are muoho nimo avohoruomaje höjo. Röhu bogo ma garomo ë'oruomaje höjo. ³ God-hu nosi iho avohahuaje öroho bogo gavanovo'i sarerivoromo uvoruomë'eje: No mu mae vaejë'oho God-ro göromo nosi sisëho uehorovoromo vuonugo'iramu hesi nunire mae riravo'ëjarëromo jabesi birivoromo God-are jögoroho ejaho'i ë'o gavë'eje. Êhi'oromo God-hu nosi sisë avohahuëgo hesi nunire mae riravo'iröhe jöho bijönibijohë'eje. ⁴ Êhesi bëhoho aëro sarerivoromo uvoruomajeje: No God-are jögoru ejahoromo mu mae vaejë'oho ëhuro hesi nunire ma-mae riravo'ëjarëjo. Êhi uvoruomajeje. Röhu ae rahu Keriso mae uehorovë'oho ijonöho bogo ëhioho uvo'i a'i uvareje: Hesi Kerisoro ajamui'iramu God-are nunire riravo'ëjarëjo.

Israel rajohu'o sa'a ioro'ioro rajohu'o Keriso mae uehorovego God-hu baejavuoromo maro bamavuaje jöhoje.

⁵ Jögoru ejahoromo God-are nunire mae riravo'iröhe ë hesi jöho Moses-ro jajivoromo uvë'eje: Ae rahu jögoru e barëjë'oho ëhuro maro raromoruomajëjo. ⁶ Röhu God-are

jögoru ejahoromo hesi nunire mae riravo'iröhe ë hesi darugoho bogo nosirehu jio'i a'i Keriso mae uehorovoromo God-are nunire mae riravo'iröhe öroho iae nosirire jie. Ëhesi jöho God-are surire jajivoromo ëhi uvë'eje: Nadi jemesi simanoho uehorovoromo uvorëjo: No diehi'oromo ö'idöroho iojiomo'ejarejo. Ësurire jö hesi bëhoho uöromo ë'adeje: Nadi uvorëjo: No diehi'oromo iojiomo'ejarejo ëhuro Keriso hu'irae baeromo vuonorö'ö ruvebijego huro no ajamui'iröhego. ⁷ O jö göho nadi uvorëjo: No diehi'oromo vuovë'e ariböviehu raromaruioho abue'ejarejo. Ësurire jö hesi bëhoho uöromo ë'adeje: Nadi uvorëjo: No diehi'oromo vuovë'e ariböviehu raromaruioho abue'ejarejo ëhuro Keriso hu'irae barojomego ajamui'iröhego. ⁸ Keriso-are muoho bogo rori'ohoje. A'i God-are surire jöho ëhi uvë'eje:

God-are jöho iae jemesirire höjo.

Hesi jöho dë vövöbajo'ere jëvë'ëro jemesi jö'ehu ato'irarijoho höjo.

God-are jö hesi bëhoho Keriso mae uehorovoröhego noehu majëhijarue jöho uöromo ë'adeje. ⁹ Jaehu dë vövöbajo'ere mae uehorovoromo uvë'oho: God-ro Iesu ajamamu guomoromo ri'öjade hö uvoromo röhu mae uehorovanue jö jasi jö'ehu a huruoho majëhiromo uvë'oho: Iesu gemu Bada hö uvë'oho bogo sisëroho va'i maro hi'a'anue. ¹⁰ Dë vövöbajo'o o jö'o jabesi bëhoho dë vövöbajo'ere noro Iesu mae uehorovoromo ëhuro God-are nunire mae riravarueje. O jö'ëro no Iesuare jöho ae huruoho majëhiromo ëhuro bogo sisëroho va'i maro va'o hesi javue. ¹¹ Ëhi jië'e jöho God-are surire jajivoromo uvë'eje: Ae rahu ë aho mae uehorovë'oho bogo javojimo ga'a'ajëjo. ¹² Ësurire jöho sa'ae aho'obëhe aribövi nosi jöhoje. Jew rajo ariböviohu'o sa'a ioro'iorohu'o bogo göho göho javuo'i ma-gemuoho javue. Badaro gemuëro böröme namiromo ae aho'obëhe muebejavuoromo göröhe di ahuro huro ajamijöro ua gavamu gövuë'oho no ae aho'obëhe mabëhe ajamuijajeje. ¹³ God-are surire jöho ëhi gemuoho uvë'eje: Ae rahu Badaro ajamijöro ua gavë'oho ajëmi'iramu bogo sisëroho raromö'i maro raromo'aruëjo.

¹⁴ Ëhi jie röhu aehu Bada Iesu bogo ma uehorovë'oho ajamijöro diehi ua ga'ë'ö. Ua ga'iröhe öroho bogoje. O hesi jö bogo hejë'oho diehi mae uehorovo'ë'ö. Mae uehorovo'iröhe öroho bogoje. O aehu hesi jö bogo majëhijë'oho diehi he'ë'ö. He'iröhe öroho bogoje. ¹⁵ O God-hu a bogo rëmö'öjamu rovë'oho hesi jöho diehi majëhi'ë'ö. Majëhi'iröhe öroho bogoje. God-are surire jöho ëhi uvë'eje: Jö ma barovarue aribövioho mabëhe rovego gëvarue höjo. ¹⁶ Mabëhe rovego gëvarue hö jajivadeje röhu Jew raje ae aho'o bogo a'i ma-gemuëro gemuëro Iesuare jö maho ejahë'ëjö. Urimë'i Isaiah-ro jöe gemuoho jajivoromo uvë'eje: Bada rahuro nosi jöho mae uehorovë'e höjo. Ae vemino'ëro ejahu'e höjo. ¹⁷ Ëhu'ëro jië'ëro Keriso-are jöho majahuijego ëhuro no hejarueje. Heromo ëhuro no mae uehorovarueje.

¹⁸ Ëhi jie röhu naro uëve: Na Israel rajoho hejë'e höjo o bogajo. Iae jabumë hejareje. God-are jö hejaroho iae hesi surire jajivoromo ëhi uvë'eje:

Jabesi huëho sa'a viture viture he barëjë'e höjo.

Jabesi jöho maja rojomajire maja beva'ajire rërirae barëjë'e höjo.

¹⁹ Röhu ave jöhu'o uë gë'ejo. Na Israel rajoho God-are jö bëhoho gavare höjo o bogajo. Iae jabumë bëhoho gavareje röhu bogo ejareje. Urimo Moses-ro God-are surire jajivoromo uvë'eje:

Jabesi sivu sivue raromarue aribövioho God naro ajëmi'iramu

Jew rajoho jemëro gëromo dë vi'ehëgo'iramu uvo'a'arujëjo:

God-ro rabëni jabumë ajëmi'i no bogo ajamuijaje höjo.

O God na bogo avoho gevarue aribövioho naro ajëmi'iramu

Jew raje jemëro jabumë gëromo dë vörönimo'arujëjo.

Ëhesi bëhoho Israel rajohuro God-are jöho iae hejareje röhu bogo ejahareje. ²⁰ Ëhi jië'e jöe gemuoho Isaiah-ro ma-sama'e huruoho jajivoromo uvë'eje:

Bogo birohevo'i nahevare ariböviohuro God na birohevare höjo.

Nasi jöëni bogo uë gëvare aribövioho naro jabesi örire röjahirovamu gëvare höjo.

²¹ Sa'a ioro'ioro rajehu God biroho'iröhe jöho ähi jajivo'i a'i Israel rajo jabesi jöho jajivoromo ähi uvë'eje: Jaburo nasiro ruejoro na vae majae öve nugö'öbe rovë'e jevajëjo röhu jabumë jöe bogo e'i biriri'övoruomaje aribövie jioruomajëjo.

11

God-hu Israel raje ae aho'obëhe bogo vuonugëvo'i a vituohuni vavaenimoromo ajëmibe rovade jöhoje.

¹ Israel rajoho ähi jië'e hia'i biriri'övä'e aribövie jioruomë'ego Paul naro uëve: Na ëhuni God hesi aribövioho ioro'ioeremu vuonugëvä'e höjo. Bogo mae bogo vuonugëvä'eje. Paul na'o Israel raje jeve. Na Abraham-are uje jeve. Na Abraham-are uje Benjamin hesi uje gemuoho jeve. ²Urimë'i God sa'a bövi bise'o bogo bamadevare evare Israel aribövioho hesi baejavuo'i uvë'ëro ëhu'ëro ijonoöho bogo ramuö'öjë'eje. Elijah-hu ë'ade jöho jemë'o iae gavarujeje. Elijah-ro Israel rajo jabesi jö sisëho God majahiro mo uavade höjo: ³Bada jani suvoro vënire buejharue maratuho Israel rajohuro dadovo'amë'e höjo. Jö jasiro baeromo majëhijarue aribövi ioro'ioroho muo'amë'e höjo. Vaevä'e na gemu jevajëjo. Röhu na'o anego'i nimiruëjo. ⁴Elijah-ro God ähi uavade höjo. Ähi uavamu God-ro Elijah mana diehi uavade höjo. Huro ähi uavade höjo: Ja uvanuoho: Na gemu jevajë uvanuoho röhu na Israel raje ae aho'obëhe 7,000 avoho nugo'amë'e jevajëjo. Ähu'ëro jabu'o na bogo vuonugevo'i sareri'e god gö Baal ague aho raromoro rajahiruomë'e höjo. God-ro ähi uavade höjo. ⁵God-hu Israel rajo ioro'ioro avoho nugo'amadëhi avevejö'oho ähi gemuohoje. God-ro hesi nimoromo huë baejavuoromo Israel rajo a vituoho avohoromo maro ramuë'eje. ⁶Avoho ramuade hesi bëhoho noehu vaejarue muoho bogo uehorovë'e hesi ëma nimoromo huë baejavuoromo ajamuijajeje. O noro mu mae vaejejo huro ëho garomo avoho ramuö'ibejo ëho bogo hesi ëma nimoromo huë baejavuaje muoho jio'ibejo.

⁷Ähu'ëro jië'ëro Israel rajohuro God-are nunire mae riravoröhe öri nahobe rovaroho bogo birohareje. Ae ma-gemu gemu God-ro hesinö baejavuë'ëro ë öroho birohareje. Israel rajo a ioro'ioroho God-ro ma-rëmamu jabesi biriri'övoromo mu sisëho vaebe jijihadeje. ⁸God-are surire jöho ähi gemuoho jajivoromo uvë'eje: God-ro jabesi öroho tugohëhamu momorö'ö uro'amë'ëro God-are muoho jabesi nunoho bogo garomo hesi jöho jabesi hia'oho bogo hebe rovaroho jaruvohu'o ähi gemuoho höjo. ⁹Röhu Israel rajo jabesi jöho David hu'o God-are surire jajivoromo uvë'eje: God jero ähi'onego jabumëro uvo'irarëjo: No mae javuajëromo söroe ijanovego evare guaeväro jiomëvanoromo buorëro taemëvanovomo guaro rireromëvanovoromo ähi'oromo ëhuro jabesi i'uhoho mana baeruomoröhe. ¹⁰God jero jabesi nunoho tugohëhonego ramoramovëhego bövioho bise'oho bogo garuomoirajo. I'u börome bojëminego baeromo ma-ioro'iore gemu deje gurorovë'e jijihoirajo. David-ro ähi jajivë'eje.

God-hu sa'a ioro'ioro rajo baejavuoromo mare bamavuaje jöhoje.

¹¹Ähuni na uëve: Israel raje rireromëvadoho na ëhuro ioro'ioeremu sisërëjëvo hesi höjo. Bogo mae bogo. A'i Israel raje Keriso bijönimë'ego ëhuro sa'a ioro'ioro raje sisë'i jëvajoho God-ro baejëvoromo maro bamëvä'eje. Baejëvoromo maro bamëvade hesi bëhoho ëhuro Israel rajohuro dë vi'ehëgego uvoruomorohego: God-ro diehi'oromo sa'a ioro'ioro rajoho ajëmi'i no bogo ajamuijaje höjo. ¹²Israel rajohuro Keriso bijönimoromo God-hu ajëmaje muoho boremi'öjamu ëhuro sa'a ioro'ioro raje dinö'e dinö'e raramaruohuro Keriso-are mu maho baeruomë'eje. Ähuni jemë'o uehorovore. Israel raje aribövie aho'obëhe vuonorö'öromo God-are örire avo'avoho uehorovo'iramu ëhuro sa'a ioro'ioro rajohuro Keriso-are mu maho bae avohoruomö'ë'e.

¹³Röhu sa'a ioro'ioro rajomë naro jemesi örire ave jöho uë'ië'e. Kerisoro na remö'öjë'ëro na hesi jö baeromo sa'a ioro'ioro rajo jemesi örire majëhibe juvaje ae jeve. Naro uvajeje: Ämuoho börome hö uvoromo nimiröhë'i Keriso-are jöho jemesi örire majëhijajeje.

¹⁴Keriso-are jöho sa'a ioro'ioro rajo jemesi örire majëhiro mo na nime nasi sa'a rajohuro dë vi'ehëgego uvoruomorohego: Sa'a ioro'ioeremu mu ma baeruomajëhi rabëni no'o bogo

ëhioho baejare höjo. Jabuhu ëhi uvë'oho nani naehu ajëmi'irodoho eni jevo'ë'e. Ëhuro jabumë Keriso uehorovoromo bogo sisëroho va'i maro va'oruomo'ë'e. ¹⁵ God-ro Israel rajoho rori'o rëmö'öjë'ëro ëhu'ëro sa'ae aho'o jemë'o buore vaeromo hu'o jemë'o gemu mae raromarujeje. Ëhu'ëro jië'ëro God-ro Israel rajoho sionëro baejëvo'iramu ëhuro aji'e mu göëro urimore muoho iosiramiro mo böro mo bëhe rue'ë'e. Ëho vuovoromo i'ovanovë'e muoho jianovo'ë'e.

¹⁶ Röhu i mugöru vitu hariho urimo atoromo God bojamijë'iroho i mugöru vitu göhu'o ëhu'o hesije. O ijo dirume God bojamijë'iroho ijo mahu'o ëhu'o hesije. Ëhuu jö hesi bëhoho Israel rajo hijo miono'e God-are ariböviëro jëvë'ëro ëhu'ëro ijore jiobe rovaje hijo miono'ohu'o jabesi ujohu'o God-are aribövie javue. ¹⁷ Röhu uhu jö göho olive ije gö amore bivaroho gö je'ore ëma rijadohoje. Israel rajoho no amore bivare ijoho va'ëne javue. O sa'a ioro'ioro rajoho jemë je'ore ëma rijade ijoho va'ëne jëve. Röhu God-ro amore ijo hesi ade gö tarivo'amoromo rori'o bahi'i je'ore ijo hesi adoho ujuohoromo sionore bijioho nugo'amadeje. Ëhu'ëro jië'ëro je'ore ijo adohuro amore ijo hesi rihuoho baeromo sirihiro mo ma-mabëhe gemuoro iojiomë'eje. Ëhuu jö hesi bëhoho God-ro sa'a ioro'ioro raje jemë Israel rajohu'o gemuore bimuvëvamu jemë'o God-are mu maho baejarijeje. ¹⁸ Tarivoromo rori'o bahijade ijo adoho garomo nadi uvore: Noro jabumë iosirëmiromo ma-mabëhe javuoromo jabesi sionoho baejë'e javuajëjo. Jemë ëhi uvë'oho avo'avoho uehorovoromo uvore: No ma-ijo ado va'ëne javuajëjo. No jö bëhoho bogo rihuoho bojëmijarue höjo. A'i ijo bëhohuro no rihuoho bojamuijaje höjo. Ëhu'ëro no bogo masijoho javuajëjo.

¹⁹ Röhu nani jero ue'a'anue: Iae mae höjo röhu ë ijo adoho tarivë'e höjo ëhuro naro jabesi sionoho bae'irodego. Ëhu'ëro naro jabumë iosirëmiromo ma-mabëhe jëvajëjo. ²⁰ Iae mae uevanue röhu jabumëro Keriso-are jöho bogo ma uehorovamu ëhuni tarivë'eje. Röhu jero Keriso mae uehorovë'ëro ëhuro birivoromo sirihiro mo namijanue. Ëhuni nadi jasi sivuoho uehorovoromo uvone: Na böro me namijajëjo. Nadi ëhioho uvo'i a'i juhuonivone. ²¹ Israel rajo ijo ado ma va'ëne jëvadoho röhu God-ro jabesi sisëho bogo ma-nunëremuoho gë'i tarivoromo rori'o ruruhö'öjajëje. Ëhi jië'e jiaje ëhuni je'ore ijo adoho jero nadi uvone: Na sisë vaejë'oho hu ma-nunëro ge'a'ajë uvo'i a'i uvone: Na sisë vaejë'oho ë Israel aribövi i'ue bojëmadëhi God-ro ëhi jië'e i'uhoho na'o bojami'ajëjo. ²² Ëhuni ave jöhuremu uehorovone. God hu huë baejavuaje aeje. Röhu hu i'ue bojamuijaje aeje. Sa'are rireromare aribövi jabesi örire i'ue bojëmi'ajëje. O jasi örire huë baejavajeje. Huhu huë baejavaje muoho jaehu mae uehorovobe va'ë'oho iae huë baejavonövo'ë'e. O bogo mae uehorovë'oho huro ja'o tariö'öjavö'ë'e. ²³ O Israel rajoho Keriso bogo mae uehorovarueje. Röhu ë mu sisëho vuonugo'i Keriso mae uehorovë'oho God-ro ë aribövioho tariö'öjëvadoho ujuohoromo röhu maho sionore bimuvëvo'ë'e ëhi jië'e mu vae'iröhoho God hu eni jië'ëro. ²⁴ Ëhesi bëhoho sa'a gö rajo ae javajoho ja je'ore ijoho va'ëne javadeje. Ëhi javamu röhu God-ro ja je'ore ijo adoho va'ëne tariøjavoromo amore ijo gemuore bimuvavadeje. Ëhi jië'e anoji'e muoho vaejë'ëro ëhu'ëro noro biririvo avohoromo uvarueje: God-hu Israel rajo ë amore ijo ado tarivoromo rori'o bahijadoho ujuoho sionore bimuvëvanovë'oho ëho ma-samae jio'a'ajëjo.

God-hu ae aho'obëhe nosi jöëni vavaanimoromo maro bamavuo'iröhe jöhoje.

²⁵ Aganomë ave jöho urimë'i God-hu gurihijadoho avejë'ö'oho röjahuijë'eje. Ëjöho na nege jemëro avoho ga'irarijago jemëro jemesi sivue uehorovoromo uvöjöëni: Nosi simanoho mabëhëro javuë'ëro mae raromarue höjo. Ëjöho na majëhi'ie'e. Israel rajo a ioro'iorohuro hia'e biriri'övaroho bogo ioro'io remuoho ëhioho jëvobe va'i hujeji sa'a ioro'ioro raje ae aho'obëhe God-arinö rueruomo'iramu evare barë'ë'e. ²⁶ Sa'a ioro'ioro rajohuro rueruomo'iramu evare Israel rajoho ae aho'obëhe sisëre jëvajoho God-ro baejëvoromo maro bamëvo'ë'e. God-hu Israel rajo baejëvoromo mare bamëvo'iröhe jöho God-are surire ëhi gemuoho jajivoromo uvë'eje: Bada God-ro uvajëjo: Ajëmi'iröhe ahuro nasi dahorure Zion jioromo ruvebi'ajëjo.

Ruvebiromo God bijönimarue mue aho'o Jacob-are ujo ömo'ömehu vaejaruoho rori'o babu'ö barë'ajëjo.

²⁷ Jabesi sisë u'ovëho'irode majare evare ëhi jië'e ioro'ioemu jioröhe jögoroho naro bojëmi'ejëjo.

Israel rajo jabesi jöho ëhi jajivë'eje.

²⁸ Israel rajehu Keriso-are jö ma bijönimaruohuro ëhuro jabu rori'o tario rëmajë aribövie jëve ë hesi bëhoho God-ro sa'a ioro'io ro rajoho ajëmi'i nimë'ëro. A'i God-hu Israel rajo nimoromo baejëvaduhuro ëhuro jabumë God-hu huë baejëvaje aribövie jëve ë hesi bëhoho God-ro Israel rajo jabesi hijo miono'o jabesi ujoho ajëmi'i uvë'ëro jië'ëro. ²⁹ Èhesi bëhoho God-hu di aribövi hesinö jioruomoröhego uëromo hesi mu ma suvuoro bojëmijë'o huro bogo jö göho uehorovo'i ëhi gemuoho uehorovëvobe va'ë'e. Èhuni Israel rajoho bogo vuonugavuo'ë'e. ³⁰ Urimoroho sa'a ioro'io ro rajoho jemëro God-are jöho bogo ejahonövar-ijeje. Bogo ejahamu God-ro gavë'ëro röhu jaruvoho gavade Israel rajohuro hesi jöho bogo ejahamu gëgorovo huotorovoromo sa'a ioro'io ro rajo jemesi jöëni vavaenimë'eje. ³¹ God-ro sa'a ioro'io ro rajoho jemëni vavaenimoromo ajëmijë'ëro Jew rajehu avevejö'e God-are jö bogo ejaharuoho ijönö God-ro jabesi jöëni ëhu'o vavaenimo'iramu maro jëvo'ë'e. ³² God-ro ae aho'o jögoru aho'iröhe hesi darugo uhure ramuë'eje ëhuro ijönö ae aho'obëhe no huë baejavuo'iröhëro.

³³ Asë'e God-are huë maho bogo bise'o vadu'ohoje. Hesi simano maho nuni aji maho börömo maeje. Huhu uehoro mae baejaje hesi bëhoho rahuro biroho'ibejo. Huhu diehi ë'aje öroho rahuro ga'ibejo. ³⁴ God-are surire jöho ëhi gemuoho jajivoromo uvë'eje:

Rahuro Badare uehoroho gavë'e höjo.

Hesi öriroho rahuro jögoroho mami'ajëjo.

³⁵ Raro suvuoroho bojämijë'ëro ëhu'ëro

God-ro mana vuonorö'ö bojami'ajëjo.

³⁶ Èhesi bëhoho God-ro bövioho bise'o ho hesiremu javuoröhego avohavüë'ëro huro döre hiromo aho'obëhe muebejavuajëje. Èhuni hesi ihoho gemu rajahiemu rajahibe va'ejo. Iae mae.

12

Noehu God-are örire dë vövöbajo'e aho'o bojamiromo hesi mu vaenövoröhe jöhoje.

¹ Aganomë God-ro ëhi noni vavaenimë'ëro ëhuni na nege jemëro jemesi sino haho'e dë vövöbajo'e aho'o baeromo God-are örire gemu bojamirovo'irarijëgo. Èhi bojamirovë'o ho ëhuro Jew rajehu vuovë'e mi suvuoro God-ni bahijaruoho bogo ëhioho jio'i nune jië'e suvuore jio'ë'e. Èhi jië'e suvuoroho God-aremu jio'iramu ëhuro hu nimo avoho'ë'e. Jemesi arijo'arije God-are örire ëhi bojamirovë'o ho ëhuro jemë simano mae jioromo God avoho rajahi'aruje. ² O ave sa'arohemu uehorovarue ariböviehu nunire bahijarue mu sisëho nadi ejëhoromo vaenövore. A'i nugego God-ro jemesi uehore aho'o huotovëho'iro ëhuro jemesi dë vövöbajo'ere God-are aji mahemu baebe va'irarije. Èhi ë'ë'o ho God-hu diehi diehi jië'e mu nimajoho jemë ga'a'aruje. Ga'a'aruje diehi jië'e muoho sisëho bogojio'i God-are nunire ma-maemu jio'iramu.

³ Röhu God-ro hesi nimoromo huë baejavoromo apostle mu hesi darugoho bojëmijë'ëgo ëhuni ave jöhu'o majëhi'ejo jemë ae aho'obëhe he'irarijëgo. Nadi jemesi sivuoho uehorovoromo uvore: No a masije javuajëjo. A'i jemë ae gemu gemu avoho uehorovoromo uvore: Naro hesi örire mae uehorovoromo mu vaejöro God-hu ajemadëhi naro hesi örire ëhi mae uehorovoromo ëhi jië'e muoho vaenövo'ejöjo. ⁴ No sino haho'e gemu gemu javuo rove. Röhu öve höre nune ëhi jië'e inömo ho aho'obëhe javuë'ëro inöme göëro mue gö vaejarueje inöme göëro mue gö vaejarueje. ⁵ Èhesi bëhoho ekaresiaho no ae aho'obëhe javue. Èhi javue röhu Keriso-are ae gemuoho javuë'ëro ëhuro aho'o sino haho'e gemuoho javue. Èhi javuë'ëro no ae aho'obëhe gemuore bimuvorovë'e javue. Nosi sino haho'o bimuvorovarëhi ëhi gemuoho javue.

⁶ Röhu God-ro hesi nimoromo huë baejavuoromo ae gemu gemu suvuoro gö gö bojamuijamu baebe rovareje. Ëhuni suvuoro diehi baejare ëhi jïë'e muoho vaebe va'ejo. Jö God-aro baeromo a majëhi'iröhe suvuoro baej'ë'oho mae uehorovoromo uvo'ejo: God-are jöho ëhi röjahuij'ë'e hö uvaruëhi ëhi jïë'e jöhemu ae majëhibe va'ejo. ⁷O ae gö a ajëmi'iröhe suvuoro baej'ë'oho iae no ae ajëmime va'ejo. O God-are öri röjëhijarue ae javuë'oho iae no ae röjëhibe va'ejo. ⁸O jögoru bojëmijarue ae javuë'oho iae no jögore bojëmime va'ejo. O ae suvuorëmijarue ae javuë'oho iae no öve sasohavuo'iramu suvuorëmime va'ejo. O masijo riravoromo muebejëvarue ae javuë'oho ëhuremu uehorovoromo muebejëvobe va'ejo. O huë baejarue ae javuë'oho daje nimorohoromo huë baeromo ajëmime va'ejo.

⁹ Ae gö rajëhijë'iroho nadi ma-döhuremuoho rajëhi'i jemesi uhohu'o rajëhibe va'ore. Mu sisë rovajoho bijönimoromo nadi gavanovo'i mu maemu ma'enobe va'ore. ¹⁰Gööro göho Christian ö mueno'e hö uvoromo huë baerovore. A ioro'ioro jabesi ihoho döro bamoromo rajëhi avohore. ¹¹Muoho nadi bijönimo'i biririvoromo vaebe va'ore. Jasi dë vövöbajo'e aho'o Badare öroro gemu bojamirovoromo hesi muoho vaejahobe va'ore. ¹²Uvore: Ijonö God-ro mae ajamui'iramu aji maro raromo'ëjarëromo nimorohobe va'ore. Huë sisë rovë'iroho biririvoromo riravobe va'ore. Majae ëhi God-are öroro jöe atoromo ë muohuremu uehorovobe va'ore. ¹³God-are aribövie huë vavaene jëvë'oho suvuorëmiromo ajëminövore. Aehu vejö'e i'e rovë'oho nihudëgonövore.

¹⁴Aehu sisë vaejëvo'i arijë'oho jemëro God uavego huro jabumë huë mae bojëmi'iro. Nadi uavego huro sisëho bojëmi'i a'i uavego mae bojëmi'iro. ¹⁵Ae nimorohë'oho jemëro gemuoro bimuvoromo nimorohore. Ae vavaenimë'oho jemë'o gemuoro bimuvoromo vavaenimore. ¹⁶Jemë aho'obëhe ma-gemu uehorovoromo huë baerovore. Nadi uvore: No masijëro javuë'ëro mu ininoho bogo vae'ëjarë'i mu bööröme o bise'e ma-vaere. Nadi sivuoho uehorovoromo uvore: No simano ma'e ae javuajëjo. ¹⁷Ae göehu sisë vaejëvë'oho nadi mana sisë vaejëvore. Ae aho'obëhe uvaruoho: Ëmuoho mae hö uvaruoho ëhi jïë'e muoho vae'i ë'o gare. ¹⁸Huë mae hesi örohuremu uehorovoromo ë hesi muohuremu vaeromo ae aho'o jabu'o gemu mae raromo gare. ¹⁹Aganomë aehu sisë vaejëvë'oho nadi mana i'uocho bojëmi'i ma-ga taemorego hesi God-ro vörö'iraeromo i'uocho bojëmi'iro. Ëjöhö God-are surire uvë'eje: Badaro uövuajëjo: I'u bojëmi'irodoho nasi mue höjo. Naro mana bojëmi'ejöjo. ²⁰Ëhi uvë'e jiaje nadi mana bojëmi'i a'i God-are surire jöho uvë'e jiajëhi ëhi vaere. Ëjöhö ëhi uvë'eje: Ja'o muorovaje aho hömë'iroho ioho ma-bojaminëjo. O jovo i'i nimë'iroho jovoho ma-bojaminëjo. Ëhi ë'l'öho ruehuro ëho garomo tiöromo gövögövövoromo avo'avoho uehorovo'ajëjo. ²¹Mu sisë rovë'iroho nadi ejahorego jemë ruahö'öjëvego bejëvo'i a'i mu mae vaeromo ëhuro ë sisë rovajoho ruahö'öre.

13

Sa'are a masijehu bojamuajë mu noehu vaeröhe jöhöje.

¹ Ae gemu gemu aho'obëhe ave sa'are a masijo jabesi jöho ejëhore. Sa'ae dinö'e dinö'e raromoromo masijo vaejarue aribövi jabesi darugoho bogo ëma ri'ö'i God-ro darugoho bojëmiromo uëvadeje: Ëmuoho vaerëjo. ²Ëhuni ae rahu ave sa'are a masijo jabesi jö ahë'öho ëhuro God-hu bamade muohu'o mu'uvajeje. God-hu bamade mu mu'uvë'öho ëhuro i'uocho mana bae'ë'e. ³Sa'are a masijo jabesi mu bëhoho mu ma vaejarue ariböviohuro bogo juhuonivo'i a'i mu sisë vaejarue ariböviohuro juhuonivo'iröhego. Jabesi mu bëhoho ëhije. Ëhuni ja sa'are a böörömo bogo juhuonami'ië'öho mu mahemu vaene. Mu ma vaej'öho huro jasi ihoho mae ua'ë'e. ⁴Sa'are a böörömocho God ajamiromo mu vaejaje aeje ëhuro ja mae javo'iröhego. A'i jaehu sisë vaej'öho juhuonamine. Rabëni i'u bojamui'iröhe vöröho ave sa'are a böörömocho bogo ëma bae'i a'i God-are mue vaeromo mu sisë vaeruomaje aribövioho God-are vörö'e i'uocho mana bojëmijajeje. ⁵Ëhuni jero ave sa'are a masijo jabesi jöho ejëhone. Ejahë'öho ëhuro i'uocho bogo bae'a'anue. Röhu göho jasi dë vövöbajo'ere herovoromo uvo'a'anue: Na mu mae vaej'ë jevajëjo.

⁶ Iae êhuni ave muohu'o vaejarujeje. Jemëro jabumë tax-oho bojëmijarujeje rabëni ave sa'are a masijohuro God-are muoho vaeromo avoho muebejaruëro jië'ëro ë hesi bëhohuni. ⁷ A masijo jabesi ôrire diehi jië'e mu vae'irarijoho êhi vaere. Tax ihe gö gö bojëmi'irarijoho êhi bojëmië. Mae uehorovo'irarije aribövioho mae uehorovore. Rajëhi'irarije aribövioho rajëhire.

Göehu gö hesi ôrire diehi jië'e mu vaeröhe jöhoje.

⁸ Suvuore rabe a mana bojëmi'irarijoho ma-burëro mana bojëmiëregö ë muoho barë'iro. A'i ave muohuremu jiemu jiohe va'ë'e dë vövöbajo'e a bojëmi'irarije muohoje. Göehu gö dë vövöbajo'e aho'o bojamijë'oho êhuro God-hu bojamuade jögoroho e barë'aruje. ⁹ Rabëni hesi bëhoho God-hu bojamuade jögoroho êhi uvë'eje: Nadi goho'amonëjo. Nadi ae anonëjo. Nadi vajiöhe e'onëjo. Nadi ae gö hesi böviëni bise'ëniho ganiganimonëjo. Ejöhu'o jögoru ioro'iorohu'o ë hesi bëhoho êhi uvë'eje: Jasi arijo'arije rajahirovanuëhi jasi ae gemuoho êhi rajahinëjo. ¹⁰ Jasi ae gemuoho dë vövöbajo'ehu rajahijë'oho hesi ôriroho mu sisëho bogo vae'a'anue. Êhuni göehu gö rajahirovë'oho êhuro God-are jögoroho e barë'anue.

¹¹ Êhi jië'e muoho vaenövore rabëni hesi bëhoho jaruvoho diehi jië'e maja jiajoho jemë iae gavaruje. Momor'öjarujoho ri'ö'irarije majaho rovë'eje. Êhesi bëhoho aevo'i Keriso mae uehorovare majare evare noehu God'o maro raromo'iröhe majaho ëgo'o jiadeje. Jaruvoho ë majaho dunove. ¹² Vahioho barë'i Badahu rueröhe majaho sisonuvo'irögöro ë'e. Êhuni ramoramö'e muoho vuonugo'i muorovo'iröhe inömo inömo ujuohö'ejo ajijë majare muorovo'iröhëro. ¹³ Aehu majare avoho raromo jijiharüëhi noro êhi ë'ejo. O gemuore gagovoromo mahunö'e uruvoromo tiöromo jijihë'oho bogo. Jovo iromo simano sisërejë'oho bogo. Öehu jijihanovoromo mu gö gö vaejë'oho bogo. Ire muorove bogo. Ae gö jabesi mu mahuni dë vörönimë'oho bogo. ¹⁴ A'i jemëro Bada Iesu Keriso-are darugoho baeromo êhuro sinehu sisë nimajoho nadi eromo hesi muoho vaere.

14

Noehu bogo masije riravoromo uvo'iröhe: Christian ö mueno'oho sisë hö uvo'iröhe jöhoje.

¹ A ioro'iorohuro Keriso mae uehorovarueje. Röhu bogo avo'avoho uehorovo'i majuhuoni juhuonie mae uehorovarueje. Êhi jië'e ariböviehu ekaresiae jemë'o bimuvo'i nimamu gëvë'iroho jemesi baejëvore. Röhu nadi uvore: Jabumë rue'iramu noro jabesi jöho aho'ahovo'ëjarëromo baejëvore. ² Ae göëro biririvoromo Keriso avoho uehorovoromo uvo'ë'e: I mi bövi bise'o ijë'oho iae mae höjo. Ae göëro juhuoni juhuonie uehorovë'ëro mioho bogo i'i ma-iemu i'ë'e. ³ Röhu mi bövi bise'o ijanue ahoro nadi sivoromo uvone: Mi bövi bise'o juahovaje aho ma-asisö'o va'ënëro jië'ëro juahovaje höjo. Nadi êhioho uvone. O mi juahovanue ahoro nadi uvone: Bövi bise'o ijaje aho vajamirovajëjo. Nadi êhioho uvone. God-ro ë aho hesinö baejë'e höjo. ⁴ Ae gö hesi mu ajamaje aho jaehu garomo sisë hö ua'iranoho êho bogo jasi muehuje. God hesi böviahuremu ga'ë'e hesi mu ajamijaje aho mae nami'iramu o be'iramu. Röhu hu iae nami'ë'e. Rabëni hesi bëhoho. Hesi Bövioho ajami'iröhoho eni jië'ëro êhuro hu ajami'iramu biririvoromo mae nami'ë'e. ⁵ Ae göëro uvajeje: Êmajaho ë majaho börömëgo êhuni ë majaroho no God mae uehorovoromo raromo'ëjarëjo. O maja ioro'ioroho ma-mu majaemu höjo. Ae göëro uvajeje: O bogo êhioho jio'i a'i majae aho'obëhe God-are majae jië'ëro no God uehorovë'i muoho vae'ëjarëjo. Êhi jië'e uehoroho niö'i jëve. Röhu ae gemu gemu di uehoroho mae hö uvanuoho ë uehoroho gemu ma'enoromo hi juvone. ⁶ Ae rahu uvë'iroho: Êmajaho böröme hö uvë'iroho huro Bada mae uehorovoromo êhuni ë majaho uehorovajeje. O ae rahu mie rabe ijë'iroho huro uvajeje: God-ro suvuoro mae bojemijë'e höromo ijajeje. Êhu'ëro Bada mae uehorovoromo ijajeje. O ae rahu mie rabe juahovë'iroho Bada mae uehorovoromo êhuni juahovajeje. Juahovoromo röhu i rabe ijajohuni God huë mae uavajeje. ⁷ Êhesi bëhoho no ave sa'are raromë'iroho bogo nosi jöëniho gemu raromarueje. O vuovë'iroho bogo nosi jöëniho gemu uehorovoromo vuovo'i ⁸ a'i raromë'oho Badare

jöeni uehorovoromo raromarueje. O vuovë'oho Badare jöeni uehorovoromo vuovarueje. Èhu'ëro jjië'ëro raromë'oho o vuovë'oho no Badare javue. ⁹ Kerisohu guomoromo rõhu ri'öromu hijade hesi bëhoho vuovë'e ariböviohu'o ave sa'are raromarue ariböviohu'o nosi Bada jioromo muebejavuo'iröhëni. Èhu'ëro no Keriso-aremu javue. ¹⁰ Ja rabëni jasi öehu mu ë'ajoho garomo sisë höromo aganueje. O ja rabëni öho juhuoni'e ae höromo sivanueje. Hujeji God-are majaho rue'iramu no aho'obëhe hesi nunire riravo'ëjo hesi huro mevavuoröhego. ¹¹ Èhesi jöho God-are surire jajivoromo uvë'eje: Badaro ëhi uövujäjo: Na daruge jioromo hijajoho iae mae jio'ego ave jöhu'o mae majëhi'ie'ajëjo. Ae aho'obëhe God nasi jöeni gemu ague aho raromo'aruëjo. Ae aho'obëhe jö'ëro huruohoromo uvo'a'aruëjo: Nörö God höjo. ¹² Noehu God-are nunire gemu riravo'iröhe jöho ëhi jajivë'ëro ëhuni no ae aho'obëhe gemu gemu God-are nunire riravoromo mu vaebe rovare bëhoho huruoho majahi'ëjo huro heröhego.

No mue gö gö nosi Christian ö mueno'o jabesi nunire bogo vaejago jabuhu no göromo nosi döre bogo ö'oromo mu sisë vaejago rireromëvo'iröhe jöhoje.

¹³ Èhuni ë'ego no ijonöho bogo uvo'iro: Èaho mi ijajoho o ëhi jjië'e mu vaejajoho ëhuro mu sisëho vaejaje höjo. È'ego no bogo ëhioho uvo'i. A'i uvore: Noro mue gö gö agano jabesi nuniroho bogo vae'ëjarëjo jaburo no göromo nosi döre ö'oromo mu sisë vaejago rireromëvojöëni. ¹⁴ Na Bada Iesuare ae gemuohuro jevë'ëro ëhu'ëro na ma-mae garomo uvajeje: Ijarue ioho mioho bövioho bise'oho God bogo ahavuaje höjo. Iae ëhi jie rõhu aehu uvë'oho: God-ro ahavuade hö uvoromo ë uvade aehu ijë'oho sisëje. ¹⁵ Èhesi bëhoho mae höromo jaehu ie mie jasi Christian ae gö hesi nunire ijamu ë ahuro garomo uvë'oho: O God-hu ahavuade ioho ijane höjo. Èhuni na'o God-are jöho ahoromo i'ëjö uvë'oho jaehu hesi nunire ijanoho ëho bogo maho ë'aneje. Jero hesi örire bogo uehorovë'e ma-ijaneje. Èa hesi jöëni Kerisoro guomë'e jiaje ëhuni nadi ioho mioho ëma iromo ëhuro hu ijumone. ¹⁶ Jemëhu uvarujoho: Ie mie jove bövie bise'e ijë'oho mae hö uvarujoho gavë'i ue'ahore. Ae göëro gëromo jemesi mu ma hesi jöho sisë'i ato'ë'ö. ¹⁷ God-hu böröme namiromo muebejavuaje hesi bëhoho bogo ie jove ue'aharuoho jio'i a'i mu mae vaeromo huë baerovoromo God-are Aru'ahëhu dë vövöbajo'o sasohavuego raromaruohoje. ¹⁸ Èhi jjië'e mu ma vaeromo Keriso-are mu vaejahë'oho God-ro ëhi jjië'e aho nimo'iramu ae aho'obëhe uvoruomo'ë'e: Èahuro mu maho ömaje höjo.

¹⁹ Èhu'ëro jjië'ëro no ave muohemu ë'o ga'ëjo. Noro gemuoro avoho huë mae raro-moromo ajamirovo'ëjo ëhuro avoho biririvoromo riravo'iröhëni. ²⁰ Jemëro nadi iemuoho miemuoho uehorovoromo God-hu ae gö jabesi dë vövöbajo'ere mu vaejajoho ijumëhore. Ie aho'obëhe God bogo tugohë'eje. Rõhu jemëhu i ue'ahamu ae göehu gëromo jabu'o ue'ahoromo God-are jö ahë'oho ëhuro jemëhu ue'aharujoho sisë jio'ë'e. ²¹ A'i aveho mu mahoje. Jaehu mi ijamu wine jove ijamu o mu rabe vaejamu jasi Christian aganehu ja garomo döre ö'oromo rireromo'iröhe ëhi jjië'e muoho gorone. ²² Jaehu uvanuoho: Na ie mie bövie bise'e ijë'oho iae mae hö uvanuoho jero ine. Rõhu jasi sivue God-are nunuro ine. Jaehu uvë'oho: Ave muoho iae mae hö uvë'oho rõhu ë muoho vaeromo he'irane dë vövöbajo'oho mae jiavamu hejë'oho huë mae javajeje. ²³ A'i jaehu i i'ie'iroho uehore niö'i baeromo rõhu ë i ëma ijë'oho God-are nunire mu sisë vaejanueje ë hesi bëhoho ja bogo herovoromo uvaneje: Iae mae-ëjo. God-ro ëhi jjië'e muoho nimajë uvë'e ëma ijë'ëro. Jaehu bogo uvë'oho: Iae God-ro ë muoho nimajë uvë'e mu ëma vaejë'oho ëho mu sisë vaejanueje.

15

Nosi sino bogo uehorovo'i a ioro'ioro jabesi jöhu'o uehorovoromo mu vaeröhe jöhoje.

¹ No biririvoromo Keriso avoho uehorovarue ariböviohu noro aviëhi jjië'e muoho vae'ëjo. Noro garöhe ae göehu ma-juhuoni juhuonie uehorovamu gëvë'oho nosi sinehu nimajoho bogo uehorovë'e ma-u'emu sanuovoromo ajëminövo'ëjo. ² Nosi Christian aganehu uvaruoho: Èmuoho mae hö uvaruoho ëhi jjië'e muoho no ae gemu gemu

vaenövo'ejo ajëmego jaburo avoho biririvoromo Keriso mae uehorovo'iröhego. ³ Keriso'o hesi sinehu nimajoho bogo uehorovadeje. A'i huhu ë'ade jöho God-are surire jajivoromo ëhi uvë'eje: Aehu jö sisë rabe rabe God ja bojamaroho na'o ë i'uoho baejode höjo. ⁴ Röhu urimë'i God-are surire jö diehi diehi jajivo'amare hesi bëhoho ëhije röjahuego noro ë surire jöho adahoromo dë sanuovahuego biririvoromo ëhuro muebebe va'ego God-ro ajamuijego mae javuoröhego. ⁵ Röhu avevejö'oho God-ro ajamuijajeje ëhuro no dë sanuovahuego biririvobe va'oröhego. Ëhuni na nege huro jemë ajëmijego Iesu Kerisohu uehorovadëhi ëhi gemuoho uehorovoromo jemë aho'obëhe simane gemuoho uehorovo'irarijego. ⁶ Simane gemuoho uehorovë'oho ëhuro jöe gemuoho atoromo gemuore bimuvoromo God rajahi'aruje hesi ihoho böröme jioröhego God hu nosi Bada Iesu Keriso-are Börömoho o hesi Vavuoho jië'ëro.

God-hu bogo Jew rajemuoho a'i sa'a ioro'ioro rajohu'o ajamuaje jöhoje.

⁷ Ëhuni Kerisohu jemë rajëhiromo baejëvadëhi jemë'o göëro gö rajahivoromo baerovorego ëhuro God-are ihoho böröme jio'iro. ⁸ Ëhesi bëhoho majëhi'ie'e. Kerisoro Jew rajoho no ajamui'i rovadeje. Jew rajo no ajamui'i rovade hesi bëhoho God-ro nosi Jew rajo hijo miono'oho uëvadeje: Ijonö naro ëhi'oromo jemesi ujoho ajëmi'ejöjo. God-ro ëhi uëvë'ëro Kerisoro ijönö rueromo nimadeje God-hu Jew rajo jabesi ujo ajamui'i uëvadëhi Jew rajoho ëhi ajamui'iro ëhuro noro garöhego God hu jö maemu majahuijaje aho jiego. ⁹ O sa'a ioro'ioro rajohuro uvoröhego: God-ro noni vavaenimoromo no'o mabëhe ajamuij'e hõ uvoromo hesi ihoho döro bamo'iröhego. Ëhesi jöho God-are surire ëhi uvë'eje: Ëhuni naro sa'a ioro'ioro rajohu'o hiromo God jasi örire huë mae ua'ejöjo. Na jöe ioromo jasi ioho rajahi'ejöjo.

¹⁰ O God-are surire jö göho uvë'eje: Sa'a ioro'ioro rajoho jemëro God-are ariböviohu'o gemu mae nimorohorëjo. ¹¹ O surire jö göho ëhi uvë'eje:

Sa'a ioro'ioro rajoho jemëro ae aho'obëhe Bada mabëhe uarëjo.

Sa'ae dinö'e dinö'e raromarujoho ae aho'obëhe hesi öroro rajahirëjo.

¹² O Isaiah-ro Keriso-are mu diehi jioröhe öroho jajivoromo uvë'eje:

A mami ae Jesse bëhoho jiade höjo.

Röhu sahorijadoho hujeji bunohuro sirinohiromo ri'ö sionore nami'a'ajëjo.

Ëhi'oromo böröme namiromo sa'a ioro'ioroho muebejëvo'ajëjo.

Muebejëvo'iramu jaburo uvo'a'aruëjo: Iae ë ahuro ijönöho no ajamuinövo'ajëjo.

Ëhi uvë'eje.

¹³ Iae God-ro nosi dë vövöbajo'e avohahuego ëhuro no uvarueje: Ijonöho huro ajamui'iramu mae javuo'ajëjo. Ëhuni na nege huro ëhi ajëmijego jemëro hesi örire mae uehorovoromo ëhuro huë vavaenoho juhuonoho bogo bae'irögoro ma-nimorohoromo mae raromo'irarijego. Ëhi jië'oho God-are Aru'ahohuro hesi darugoho bojëmi'iramu jemëro ma-mabëhe biririvoromo muebebe va'a'aruje hesi aji maho bae'irarijëro. Ëhi jië'oho iae na nege.

Paul-hu rabëni Rome aribövieni biririvoromo jajivade hesi bëhohoje.

¹⁴ Aganomë iae na mae garomo uve: Jemesi muoho iae ma-maemu jiajëjo. Uehoro maho jemesi simanëro eni baejë'e jëvajëjo. Nuehu uehorovoromo röjahirovarujoho eni jëvajëjo. Iae na ëhi uve ¹⁵ röhu naehu jö jajivodoho na ma-bisemu biririvanovoromo majëhijodeje jemëro garomo avoho uehorovo'irarijego. Naehu ëhi jajivode hesi bëhoho God-ro huë baejëvoromo muoho bojemadëje ¹⁶ naro Iesu Keriso-are muoho vaejahoromo sa'a ioro'ioro rajoho jemë ajëmi'irodego. Ëhuni naro jemë ajëmiromo priest-ehu vaejarue ëhi jië'e muoho vaeromo God-are jö maho majëhijajeje ëhuro priest-ehu suvuoro ujuohoromo God-are örire bojamego nimorohajëhi naro sa'a ioro'ioro rajoho jemë ëhi ujuohëvoromo God-are örire suvuore bojämijego hesi Aru'ahohuro jemesi dë vövöbajo'oho avohëvego maemu jëvego God-ro baejëvoromo nimoroho'iröhego.

¹⁷ Ëhu'ëro jië'ëro na Iesu Keriso-are ae gemuhuro jevë'ëro God-are mu vaejahajohuro ëhuro na mae jeve. ¹⁸⁻¹⁹ Ave jöhuremu biririvoromo jövo'ejo jö göho bogo. Kerisoro

uev'ëro naro hesi jôho majëhibe hesi muoho vaebe darugo'e mu masijoho rjöhëhibe hesi Aru'aho hesi darugoro biririvobe juvamu ëhuro sa'a ioro'ioro rajohuro God-are jôho ejahë'eje. Ëjöhemu jövo'ejo. Naro Keriso-are jö maho baeromo ruhëhi Jerusalem amoho numëhi Illyricum sa'aho rôhu ë rirohu'o aho'o majëhibe juvë'e jeve. ²⁰Na negadeje Keriso-are jö bogo hejë'e ariböviohuremu majëhibe juvo'irodëni ae göëro mami'e vaejë'e naro maho dôre vaejëëni. ²¹Ëjôho God-are surire jajivoromo ëhi uvë'eje: God-are jö bogo majëhijamu hejare ariböviohuro iae garuomo'ajëjo. Bogo hejare ariböviohuro iae jö bëhoho baerumo'ajëjo. Ëhi jiorôhego negamu bogo heruomë'e aribövioho majëhibe juvë'e jeve.

Paul-hu Rome amore va'i uehorovade jôhoje.

²²Ëhi jië'e muoho vaebe juvoromo ëhuro na ô'i ë'ohijodoho bogo eni jevonövohijo. ²³Rôhu avevejô'oho ave sa'anörirre mu vae'irodoho iae barëje. Barëjë'ëro vadune aho'obëhe ô'i nimobe rovodohuni ²⁴ëhuni na uehorovoromo uve: Spain sa'are va'ië'iroho ô'oromo gë'ejôjo. Gëromo jemë'o ma-bisemu hiromo huë mae jevo'iramu evare jemëro ajemi'iramu ëhuro na Spain sa'are mae va'ejôjo. Na ëhi nege. ²⁵Rôhu avevejô'oho na Jerusalem amore va'ië'e God-are aribövioho ajëmiromo suvuoro harihe i'imëmi'irodëro. ²⁶Ëhesi bëhoho God-are ariböviehu Macedonia sa'are Greece sa'are raromaruohuro jabesi nimoromo uvareje: Ë'ego no suvuore gagovoromo Jerusalem raromarue ariböviohuni nugö'ôjëho'irarëjo God-are aribövi bövi bise'o rumo'oho jaburo ujuohorôhe hjo. ²⁷Jabesi nimoromo ëhi uvareje. Rôhu Jerusalem ekaresia ajëmi'irôhoho ëho jabesi mueje. Rabëni. Jew rajo ekaresiahuo sa'a ioro'ioro rajoho aru'aho muoho ajëmiromo Keriso-are jôho majëhijë'ëro ëhuni Jew rajo jabesi örire sino hesi muoho mana ajëmiromo ijo bajo nugö'ôjëhë'oho iae maeje. ²⁸Naro jabesi suvuoroho bava'oromo ekaresia jabesi övore bamëhoromo barë'iramu evare ô'oromo jemë gëromo Spain sa'are va'ejô. ²⁹Rôhu na gavajoho ô'ë'iroho Kerisohu ajamuijaje darugoho bövi mae baeromo ô'oromo ajëmi'ejo. ³⁰Rôhu na aveho nimo avohoromo uë'ië'e. Jemëro nosi Bada Iesu Keriso uehorovoromo God-are Aru'ahuhu dë vövöbajo'ere huë ma bojamuijajoho uehorovore. Ëho uehorovoromo na'o bimumovoromo biririvoromo nasi jöëni God-are öroro ua ganövore. ³¹Ua garomo uare: God jero Paul ajaminego huro Judea sa'are va'oromo Keriso bogo uehorovarue a jabesi övoroho bogo va'irajo. Bogo va'i Paul-hu Jerusalem amore hiromo bogo eni jëvaje aribövi ajëmijë'iroho jero hu ajaminego God-are ariböviohuro uvo'irarëjo: Paul-ro mabëhe ajamuijade hjo. ³²Ëhi ua gavë'oho God-ro hesi nimoromo ajemi'iramu naro nimorohë'i jemesi örire ô'oromo jemë'o hi'ejo. Hi'iramu daje sasohevo'ë'e. ³³Huë mae bojamuaje aho God-ro ae aho'o jemë'o hi'ë'e. Iae mae.

16

Paul-hu a jejëmijade jôhoje.

¹Rôhu ave magonahoho Phoebe nosi Christian ma'ineje. Hu Cenchreae amore ekaresia ajëmijaje magonaheje. Hu magonaho maeje. ²Ëhuni God-are ariböviehu a rajëhiromo bajejvaruëhi ëhi nosi Badare ihoro hu'o rajahiromo baere. O huë vavaene rabe jië'oho ajamire rabëni hu ae aho'obëhe ajëmiromo na'o ajemijë'e jiaje ëhuni.

³O Prisca'o Aquila'o jejëmijode höre jabu'o na'o havoromo Iesu Keriso-are mu vaejarue a magonaho'ego. ⁴Na bogo guomevorôhego jaburo niö'iro vörö'ere va'areje. Ëhuni naro jabesi örire huë mae jevajeje. Bogo naremuëremuoho a'i sa'a ioro'ioro rajo ekaresiae ae aho'obëhe jabu'o jabesi örire huë mae jioruomajeje. Ëhuni jejëmijode höre. ⁵O jabesi osare gagovarue ekaresiahu'o jejëmijode höre.

O nasi aemo'aeme Epauetus jejamijode höre Asia sa'aroho huro aeo'ioho Keriso mae uehorovë'ego. ⁶O Mary jejamijode höre mu böröme biririvoromo jemesirire vaejë'ego. ⁷O Andronicus'o Junias'o jejëmijode höre nasi Jew rajo aganego. Jaburo niö'iro na'o savoji gagore arijareje. Apostle jabumëro ë ae niö'i jabesi ihoho mae hebe rovarueje. Urimo ë ae niö'ioho jaburo Keriso'o gemuoro bimumamu naro jabesi ijore bimumodeje.

⁸ O Ampliatius jejamijode höre. Hu'o na'o Badare ae gemuohuro javuë'ëro ëhu'ëro naro hesi örire dë vövöbajo'e aho'o uehorovajeje. ⁹ O Urbanus no'o gemuore havoromo Keriso-are muoho vaejajego jejamijode höre. O Stachys naro hu dë vövöbajo'e aho'o uehorovajëro jevë'ëro jejamijode höre. ¹⁰ O Apelles hu biririvoromo Keriso gemu uehorovego no ae aho'obëhe gavaruëro jii'ëro jejamijode höre. O Aristobulus-are aganoho jejëmijode höre. ¹¹ O Herodion jejamijode höre nasi Jew rajo aganego. O Christian ö mueno'e Narcissus-are aganoho jejëmijode höre.

¹² O Tryphaena'o Tryphosa'o jabesi örire jejëmijode höre ë magonaho niö'iohuro Badare muoho biririvoromo vaejaruego. O magonaho göho Persis jejamijode höre. Naro hesi örire dë vövöbajo'e aho'o uehorovo'i huro Badare muoho biririvoromo bövi mae vaejajego. ¹³ O Rufus jejamijode höre hu Badare a ma-mabëhego. O Rufus-are vëmoho jejamijode höre nasi vëmu maehu ë'anovajohuni. ¹⁴ Röhu Asyncritus Phlegon Hermes Patrobas o Hermas ëhi jejëmijode höre. Jabu'o gemu mae raromarue Christian aganoho ëhu'o jejëmijode höre. ¹⁵ O Philologus'o Julia'o niö'i o Nereus'o hesi ma'inohu'o niö'i o Olympas o God-are aribövie aho'o jabu'o raromaruoho ëhi jejëmijode höre.

¹⁶ God-are ariböviehu jejamirovaruëhi jemë'o ëhi rajahirovoromo jejamirovore. Röhu Keriso-are ekareasia aho'obëhe jemesi örire jejëmiruomadeje.

Ijo tugohi'johoje.

¹⁷ Aganomë ave jöhuremu uehorovore. Gavë'i raromore Keriso-are jö majëhijamu hejarijoho nani aëro ö'oromo ahoromo jöe gö majëhi'ë'ö. Jöe gö majëhiromu jemesi mu maho ijumo'iramu jemëro jöe gemuoho bogo ato'i jöe gö gö ato'a'aruje. Èhi jii'e aribövi ö'amu gëvë'oho jabesi jöho nadi ejëhore. ¹⁸ Èhi jii'e aribövioho nosi Bada Keriso-are muoho bogo vaejaho'i jabesi sinehu nimaje muohemu vaejarueje. Jabesi sinehu nimaje muohemu vaeromo ae sanusanuëmiromu ma-döëremu jö mae majëhijego ae göëro mu sisë jöho bogo uehorovo'i ma-heromo uvarueje: Jö mae majahuijaruëromo ejëharueje. ¹⁹ A'i jemëro jabesi mu sisëho garomo nadi ejëhore. Naehu ëhi uëvaje hesi bëhoho jemëhu God-are jö mae ejaharuje jöho ae aho'obëhe hejë'ejö. Èhuni na nimorohe. Röhu na nege jemëro mu sisëho bogo uehorovo'i ma-mu mahemu uehorovo'irarijego. ²⁰ Majae dunovo'iramu huë mae bojamuaje aho God-ro Satan-are muoho ruahö'ö'iramu jemesi hörëro vijuvo taemo'aruje.

Nosi Bada Iesuro jemë huë baeromo ajëminövo'ë'e.

²¹ Röhu na'o havoromo mu vaejaje ae Timothy-ro jemesi örire jejëmije. O Lucius o Jason o Sosipater ëho jaburo jemesi örire jejëmijö jabumë nasi Jew rajo aganëro jioruomë'ëro.

²² Tertius naro Badare ihore jejëmije. Paul-ro ue'ego naro hu ajamiromu ave surire jöho jajivahe.

²³ Röhu Gaius-ro jemë jejëmije. Èa hesi osare Paul naro hijego huro muebejevajeje. O ekareasia ae aho'o hesi osare gagovoromo God rajahi'i raromarueje. Röhu ave amo hesi ijo bajo muebejaje aho Erastus'o nosi Christian agane Quartus'o ëho jaburo niö'iro jemë jejëmijö. ²⁴ [Nosi Bada Iesu Kerisoro jemë ae aho'o huë baeromo ajëminövo'ë'e. Iae mae.] ²⁵ Röhu God hu mabëhego rajahi'ëjo. Èhesi bëhoho hu eni jii'ëro ajëmi'iramu jemë biririvoromo naehu majëhijaje jö maho Kerisohu ajamuaje jöho mae uehorovo'aruje. Keriso-are jöho God-ro urimo subivahuobe rovadoho ²⁶ jaruvoho ma-sama'e huruohoromo röjahuijë'eje. Ijonö jioröhe jö God-are surire jajivare hesi bëhoho noro garomo ë subivahuade jöho baejarueje. Baeromo ioro'ioeremu hijaje aho God-ro uövuë'ëro noro ë jöho ae majëhibe jijiharueje sa'ae aho'obëhe raromarue ariböviohuro mae uehorovoromo ejahoruomoröhego.

²⁷ God hu gemu simano mae uehorovaje ahoje. Èhuni noro Iesu Keriso-are ihore hu rajahiemu rajahibe va'ëjo. Iae mae.

1 CORINTHIANS

Paul-hu Corinth amo rajo ekaresia jejëmiromo jabesi jöëni God mae uavade jöhoje.

^{1,2} O asë'e God-are ekaresiae Corinth amore raromarujohumë God-ro jemë uëvë'ëro ëhu'ëro jemë God-are aribövi mae jëve jemë Keriso-are ae gemuohuro jëvë'ëro. Jemë God-are aribövie jëve röhu ae aho'obëhe sa'ae dinö'e dinö'e raromoromo nosi Bada Iesu Keriso-are iho uvaruoho jabu'o jemë'o God-are aribövie gemuoho jëve Keriso hu jabesi o nosi börömhuro jië'ëro. Röhu Paul na Iesu Keriso-are apostle jeve God-ro nimë'ëro. Nosi öe Sosthenes-mu niö'iro jemesi örire jejëmö. ³ No nague God nosi Vavuohu'o Bada Iesu Keriso'o huë baeromo ajëmijego maro raromol'irarijego.

⁴ Naro majae ëhi jemëni uehorovoromo nasi Böröme God-are örire mabëhe uavajeje rabëni huro jemë huë mae bojëmiromo Iesu Keriso uavamu huro jemë ajëmijë'ego. ⁵ Jemë Keriso'o gemuoro jëvë'ëro ëhu'ëro mabëhe baejë'e jëve. Simano mae jö mae o ëhi jië'e suvuore gö gö aho'obëhe baejë'ëro ëhu'ëro jemë God-are jöho mabëhe uehorovoromo atarujeje. ⁶ O Keriso-are jö noehu majëhijaruoho ëho jemesi dë vövöbajö'ere ma-mae uehorovoromo biririvoromo ma'ënarujeje. ⁷ Èhu'ëro jtë'ëro mue gö gö vae'irarije suvuoro ho gö bogo vuonugo'i aho'obëhe bae barëjë'e jëve. Èhi jëvë'ëro muebejarujeje nosi Bada Iesu Kerisoro va'orahoro rovego ga'irarijëro. ⁸ Jemëhu hu muebejarujoho huro jemë ajëmi'iramu biririvobe va'ojuvo va'o ijo tugoho'i majare nosi Bada Iesu Kerisoro göromo mevavuo'iramu evare jemë hesi nunire ma-maemu riravo'aruje ⁹ ë hesi bëhoho God hu maëro jië'ëro. Huro uëvamu jemë aevoromo hesi Harihe Iesu Keriso nosi Bada'o bimuvë'ëro hu'o jemë'o gemuoro jëve. Èhi ajëmade aho God-ro iae jemë ajëmi'iramu biririvobe va'a'aruje.

Ekaresia ariböviehu bogo jöe gemuoho uehorovo'i jöe gö gö uehorovoruomade jöhoje.

¹⁰ Nasi ö mueno'ohumë ave jöho na Bada Iesu Keriso-are ihore majëhi'ie'e. Jemë ae aho'obëhe jöe gemuoho atore. Nadi sivu sivuoho jöe gö gö ato'i o uehore gö gö bae'i a'i uehore gemu baeromo raromore. ¹¹ Nasi ö mueno'e naehu ëhi jajivaje hesi bëhoho here. Chloe-are agano ioro'iorohuro rueromo jemesi jö sisëho huruoho majehiromo uevareje: Corinth rajo ariböviohuro jö aho'ahamirovarue höjo. Èhi majehijamu hejodeje. ¹² Èhi ë'arujoho na uë'ie'e. Jemë ae göëro göëro jöe gö gö atarujeje. Ae göëro uvanueje: Paul börömege na hesi ijore ijore juvaje ae jevajëjo. Ae göëro uvanueje: Paul bogajo. A'i Apollos börömege na hesi ijore ijore juvaje ae jevajëjo. Ae göëro uvanueje: Apollos bogajo. A'i Peter börömege na hesi ijore ijore juvaje ae jevajëjo. Ae göëro uvanueje: Keriso börömege na hesi ijore ijore juvaje ae jevajëjo. Jemë bogo ëhioho ë'aruje höjo. Jemëro ëhi atarujeje. ¹³ Nani sarerivoromo uvarujeje: Keriso-are sino haho'oho tariö'ö tariö'ö jië'e höjo. No ioro'ioroho Keriso-are javuo'i ioro'ioroho bogo Keriso-arohe javuajëjo. Èhioho bogojie'e jtaje nadi ëhioho uvore. Keriso gemu börömhoro jio'i apostle aribövioho no bogo masijehu javue. Jemesi jöënioho bogo Paul naro guomodeje. Jemë bogo Paul nasi ihoroho bapataeto vaejëvareje. Èhu'ëro na bogo börömehu jeve.

¹⁴ Na bogo nasi övoho jemë bapataeto vaejëvonövodeje. Crispus'o Gaius'o ëhenu bapataeto vaejëvo'i a ioro'ioroho jemë bogo bapataeto vaejëvodeje. Èhuni na God huë mae uave. ¹⁵ Na nasi övoho jemë bogo bapataeto vaejëvë'ëro ëhuni bogo uvo'a'aruje: Paul-ro bapataeto vaejavuamu noro hesi ihoro bapataeto vaejë'ëro ëhu'ëro hesi aribövie javuajëjo. Jemë bogo ëhioho uvo'a'aruje. Èhuni naehu bapataeto bogo vaejëvodoho na mae jeve. ¹⁶ O iae na uehorovajoho jemesi ae Stephanus-are aganohe jabu'o naro bapataeto vaejëvodeje. Röhu na uehorovoromo uve: Na na jemesi aribövie ioro'ioroho bapataeto vaejëvode höjo o bogajo. Nani bogajo. ¹⁷ Röhu na ae ma-vemino'e bapataeto vaejëvode hesi bëhoho ëhije. Kerisoro remö'öromo na bogo uevadeje: Bapataeto vaejëvobe va'onëjo. A'i remö'öromo uevadeje: Nasi jö maho majëhibe va'onëjo. Kerisoro nimadeje ave sa'are

ariböviehu simano ma'e jõe höromo ataruëhioho na bogo ëhioho jövoromo hesi jöho aho majëhi'irodego ae aho'obëhe ëhi jië'e jöho heromo ëhuro Kerisohu korosire guomade jöho bogo avoho heromo dë vövöbaj'o'oho bogo marëjëvo'jöëni. Ëhi jio'ibejo ë jöho daruge bogojio'ibejo.

God-are uehoro darugo röjahuijaje ae Keriso-are jöhoje.

¹⁸ Kerisohu korosire guomade jöho sisëre va'arue ariböviohuro heromo uvarueje: Ëho simano rumo'e jõe höjo. O God-hu ajamuego mare va'arue aribövioho noro ë jöho heromo uvarueje: Keriso guomadohuro ëhuro God-hu no ajamuijaje öroho jiovahuë'e höjo. Ëhuro God-hu no ajamujaje darugoho iae no gavarue höjo. ¹⁹ God-are surire jajivoromo ëhi uvë'eje:

Aëro ave sa'a hesi uehorohemu baeromo ëho simano ma'e jõe hö uvoruomaje höjo.

Röhu God naro ë jöho mu'u'ejöjo.

Noro nuni aji'e jöho baejë'e javuajë uvoruomaje höjo.

Röhu naro ëho rori'o babu'ö'ejöjo.

²⁰ Ëhi jië'oho ave sa'arohemu uehorovarue aribövioho simano ma'e aribövi jabesi uehoroho diaje. Nuni aji'e aribövi jabesi uehoroho diaje. Jö'e sasohoromo darugo'e majëhijarue aribövi jabesi uehoroho diaje. God-ro röjahuijë'eje jabesi uehore aho'o bogojiajoho noro garöhego. ²¹ Ëhesi bëhoho God-ro hesi simanoho maëro jië'ëro uvadeje: Aëro sa'arohemu uehorovoromo uvoruomaje höjo: Nosi simanoho mae höjo. Ëhi uvarue höjo röhu bogo jabesi simanoho uehorovoromo God na ge'a'aruëjo. A'i jaburo uvoruomaje höjo: Kerisohu guomade jöho Paul-mëhu majahuijaruoho ëho simano rumo'e jõe höjo. Ëhi uvoruomaje höjo röhu ë jöho ae rahu mae uehorovë'oho God naro baejëvoromo maro bamëvo'ejöjo. God-ro ëhi uvadeje. ²² Jew rajo ariböviohuro uvoruomajeje: Darugo'e muoho röjahuijego garomo uvo'irarëjo: God-are muoho rovë'e höjo. O Greece rajo ariböviohuro uvoruomajeje: Ave sa'a hesi simano ma'e jöhuremu he'i naguajëjo. ²³ Röhu no bogo ëhi jië'e muoho jöho röjëhi'i a'i noro ave jöhuremu ae majëhiromo uëvarueje: Kerisoro noni korosire guomade höjo. Ëhi majëhijarueje röhu Jew rajo ariböviohuro ë jöho bijönimarueje. O sa'a ioro'oro rajohuro uvarueje: Ëjöho simano rumo'e jõe höjo. ²⁴ Jaburo ëhi uvo'i a'i God-hu uövüë'ëro hesi aribövie javuajoho Jew rajohu'o sa'a ioro'iorohu'o noro uvarueje: Keriso guomadohuro ëhuro God-ro hesi darugohu'o hesi simano mahu'o röjahuijë'e höjo. ²⁵ Ëhesi bëhoho aëro sa'arohemu uehorovoromo God-hu Keriso sa'are nugö'öjamu rueromo korosire guomade jöho heromo uvoruomajeje: Ëho God-ro simano rumo'e darugo rumo'e muoho vaejade höjo. Röhu a nosi simano maho ëho ma-jianovo'i God-hu vaejaje mu jabuhu uvarue simano rumo'e mue hö uvaruoho ëho börömo mahoje. A nosi darugoho ëho ma-jianovo'i God-hu vaejaje mu jabuhu uvarue darugo rumo'e mue hö uvaruoho ëho börömo mahoje. ²⁶ Nasi ö mueno'e God-hu jemë uëvamu aevoromo hesi aribövi jëvadevare jemë diehi jië'e aribövi jëvadoho ëhuremu uehorovore. Ave sa'a hesi simano ma'e aribövioho jemë ae ma-gemu gemu jëvadeje. O darugo ma'e aribövioho o iho döre jië'e aribövioho ëho ae ma-gemu gemu jëvadeje. Ëhi jië'e aribövioho ma-gemu gemu God-ro baejëvadeje. ²⁷ Röhu God-ro uvadeje: Aehu ma-sa'arohemu uehorovoromo uvarue simano rumo'e darugo rumo'e ae jioruomajë uvaruoho röhu ëhi jië'e aribövioho God naro baejëvo'ejöjo. Ëhi jië'e aribövioho baejëvo'iramu ëhuro sa'are simano ma'e ariböviohu'o sa'are darugo ma'e ariböviohu'o ëhi jië'e ariböviohuro uvoruomo'ajëjo: Noro uvare höjo: No simano ma'e darugo ma'e aribövie javuajëjo. Ëhi uvare höjo. Röhu God-ro no bogo baejavuo'i simano rumo'e darugo rumo'e aribövioho baejëvade höjo. Ëhu'ëro no gavaruoho nosi uehoroho bogo maehu jioromo nosi darugoho bogo eni jië'e höjo. Ëhi uvoruomo'ajëjo. ²⁸ Aehu ma-sa'arohemu uehorovoromo uvarue a inine iho rumo'e bëhi rumo'e jioruomajë uvarue aribövioho ëhi uëvarue aribövioho God naro baejëvo'ejöjo. Baejëvo'iramu ëhuro ae aho'obëhe ga'a'aruëjo sa'are mu hesi bëhoho bogojio'iramu. ²⁹ Ëhi jië'e aribövioho God-ro baejëvë'ëro jië'ëro ëhu'ëro aho God-are nuniroho bogo riravoromo nimorohë'i uvoruomo'ë'e: No a masije javuë'ego ëhuni God-ro no baejavuë'e

höjo. Bogo ëhioho uvo'l'ë'ö. ³⁰Röhu jemë bogo jemesi arijo'arijoho ajamirovo'i a'i God-ro jemë ajëmiromo baejëv'ë'ëro ëhu'ëro Iesu Keriso'o gemuoro jëve. God-ro ëhi bamë'ëro ëhu'ëro Kerisoro sisëhu tövavuadoho jiovahuoromo uehoro maho nosirire barueromo nosi ihoho God-are nunire avohahuoromo mu mahuremu röjahuijajeje. ³¹Ëhu'ëro jië'ëro God-are surire jajivoromo uvë'eje: Nimoronimorohë'i ato'ië'iroho Badahu ë'ade jöho ëhuremu nimorohë'i atorëjo.

2

Kerisohu korosire guomade jöhoje.

¹Nasi ö mueno'e naehu jemesi örire ö'oromo God-are jö urimo gurihijahuadoho huruoho majëhijodevaroho na bogo sine nimorohoromo ave sa'a hesi simano ma'e jöho bö'oromo bitare sasohoromo ave sa'a hesi vuëvo'e jöho majëhijodeje. ²Ëhesi bëhoho naro nasi nuëro uehorovoromo uvodeje: Naro jemë'o hiro mo jö ioro'ioroho vuonugo'i Iesu Kerisohu korosire guomade jöho bö'römego ëhuni hesi jöhuremu uehorovoromo majëhinövo'ejöjo. ³Naro ëhi uvoromo ö'oromo jemë'o hiro mo na daruge bogojevoromo juhuoninegoromo butubutuego avohadeje. ⁴Naehu majëhijode jöho o naehu jö majëhijode ë hesi öroho na bogo sine nimorohoromo sanusanuëmiromo ave sa'a hesi simano ma'e jöho jövoromo ëhuro jemesi simanoho jaguvëho ga'i a'i God-are Aru'aho hesi darugoho jemë röjëhiromo Keriso-are jöho majëhijodeje ⁵ëhuro jemëro bogo ave sa'a hesi simano ma'e jöho heromo Keriso mae uehorovo'i a'i God-are darugoho baeromo ëhuro Keriso mae uehorovo'irarijejo.

God-are Aru'ahuhu hesi uehoro ma röjahuijaje jöhoje.

⁶Iae ëhi jie röhu simano ma'e jöho iae no majëhijarueje God-are jö heromo mae biririvë'e ariböviohuro heruomoröhego. Simano ma'e jöho iae majëhijarueje röhu ë jöho göje o ave sa'a hesi jöho göje. Aehu ave sa'arohemu uehorovoromo ë jöho simano ma'e höromo ataruëhioho no bogo ëhioho majëhijarueje. O ave sa'a hesi muohemu muebejarue a masijehu jö mae höromo jö ataruëhioho nosi jöho bogo ëhiohoje ë a masijoho rireromo barë'ië'ego. ⁷Ëhi jië'e aribövi jabesi simano ma'e jöho no bogo ato'i a'i God-are simano ma'e jöho urimo gurihijahuë'e jiadoho ëho huruoho majëhijarueje. Urimë'i sa'a bövi bise'o bogo bamadevare God-ro uvadeje noro ë jöho heromo aji maho baeröhego. ⁸Noehu aji baeröhe jöho ave sa'a hesi muohemu muebejarue a masijoho jabu bogo mae bogo garuomadeje. Jabumë garuomo'ibejo Bada hesi iho döre jië'e aho uehorovoromo korosiroho bogo ano taemoruomo'ibejo. ⁹Röhu jabumë bogo gavareje. Bogo gavare hesi jöho God-are surire jajivoromo ëhi uövü'eje:

Nunehu bogo garomo hia'ehu bogo heromo

aehu nosi dë vövöbajo'ere bogo uehorovaroho ëhi jië'e ajoho God-ro avohahuade höjo hu rajahijarue aribövioho noro baeröhego.

Ëhi uvë'eje. ¹⁰Ëaji baeröhe jöho sa'a hesi muohemu muebejarue aribövioho bogo garuomadeje. Röhu God-ro uavamu hesi Aru'ahohuro ë jöho nosi örire röjahuijë'eje. Aru'ahuhu röjahuijade hesi bëhoho huro aho'obëhe ga barëromo God-hu hesi dë vövöbajo'ere uehorovajoho ëhu'o iae ga barëjajeje. ¹¹No ae gemu gemu diehi uehorovaruoho ae göho bogo ga'i nosi aru'ahohuremu sivue gavajeje. God-are Aru'ahoho ëhi gemuohoje. God-are Aru'ahohuremu God-are uehoroho gavajeje. No bogo gavarujeje. ¹²Aji baeröhe jö God-are Aru'ahuhu no röjahuijaje hesi bëhoho no bogo ave sa'a hesi jö uehorovaje aru'ahoho bae'i a'i God-hu nugö'öjade Aru'ahoho baejë'e javue ëhuro God-hu bojamuade suvuore bövie bise'e aho'obëhe huro röjahuijago garöhëro.

¹³Ëhu'ëro jië'ëro aehu ave sa'arohemu uehorovoromo jö röjëhijaruëhioho no bogo ëhioho jöho röjëhi'i a'i God-are Aru'ahuhu röjahuijajëhi ëhi majëhijarueje. Majëhiromo God-are Aru'aho hesi jö bëhoho huruoho majëhijarueje Aru'aho baejë'e ariböviohuro

heruomoröhego. ¹⁴Röhu God-are Aru'aho bogo baej'e ariböviohuro uvoruomajeje: God-are Aru'aho hesi jöho simano rumo'e jöe höromo bogo eruomajeje. Jö bëhoho bogo garuomajeje. Bogo garuomaje hesi bëhoho ëhi jië'e jöho God-are Aru'ahohuremu ajamuego avoho mevoromo gavarueje mae jiego. Röhu God-are Aru'ahoho jabumë bogojëv'ëro ëhu'ëro God-are Aru'ahoho jö bëhoho bogo röjêhijego ëhuro bogo garuomajeje. ¹⁵A'i God-are Aru'aho baej'e aribövioho noro jöe aho'obêhe garomo mevarueje. Röhu noehu God-are Aru'aho baejaroho a ioro'ioroho bogo avoho mevavuarueje gö'i mae o sisë javuego. ¹⁶Bogo mevavuarue hesi bëhoho Kerisohu diehi uehorovajoho God-are Aru'aho rumo'e ariböviehu mevo'iröhoho bogo eni jëve. Èhesi jöho God-are surire jajivoromo uv'eje: Rahuro Badare uehoroho gav'e höjo. Hesi öriroho rahuro jögoroho mami'ajëjo.

Ëhi uv'eje. Èhu'ëro God-are Aru'aho rumo'e aribövioho Keriso-are uehoroho bogo garuomajeje. Röhu huhu uehorovajëhi no'o uehorovaruëro jië'ëro ëhu'ëro God-are Aru'aho rumo'e aribövioho nosi uehorohu'o bogo garomo bogo avoho mevavuoruomajeje.

3

God-are mu vaeromo ekaresia ajëmarue aribövioho bogo masijehu jio'amo'i God gemu böröme jitaje jöhoje.

¹Nasi ö mueno'e urimë'i naro gavodeje jemë God-are Aru'aho hesi jöho bogo avoho uehorovo'i ave sa'arohemu uehorovamu. Jemë ave sa'arohemu uehorovamu gëgorovo Christian jö aevoromo röjêhijarue ëhi jië'e jöhemu röjêhijodeje. ²Asis'ö o i mi bogo mëmi'i ma-amu rihu mëmijaruëhi na God-are jöho amu rihun'öe bojëmibe rovodeje. Èhesi bëhoho Keriso-are jö aevoromo sama'e röjêhijaruohuremu ëhuremu jemesi örire röjêhijodeje. Ijore röjêhijarue jö börömo bogo röjêhijodeje. Èhesi bëhoho ijore röjêhijarue jö hej'öho jemë bogo eni jëvadeje. Jemë bogo eni jëvobe rovadoho röhu jaruvohu'o bogo eni jëve. ³Èhesi bëhoho ave sa'arohemu uehorovarijoho ëho bogo vuonugë'e jëve. Bogo vuonugö'i a'i jemë göëro gö hesi muoho garomo dë vörönimoromo iro muorovo'e vaejarujeje. Jemë ëhi ë'arujohuro ëhuro ave sa'arohemu uehorovaruje aribövie jëve. God rumo'e aribövi jabesi muoho baeromo ëhi raromo jijiharujeje. ⁴Èhesi bëhoho jemë ae göëro uvanueje: Na Paul-are ae jevajëjo. Ae göëro uvanueje: Na Apollos-are ae jevajëjo. Èhi jië'e jö gö gö atarujohuro ëhuro jemë God rumo'e aribövioho va'ëne jëve.

⁵Röhu Apollos-are muoho diehi jio'i Paul nasi muoho diehije. No bogo a masijehu javuo'i no God-hu bojamuade muohemu vaejarue ae javue. Hesi muoho vaeromo jöho majêhijamu jemëro aevoromo Keriso mae uehorovarijeje. No ëhi jië'e ae javue. Badahu ae gö gö mue gö gö bojamuibe rovadoho ëho no vaejarueje. ⁶Mue gö gö vaeromo naro ujane bivëvanovodeje jemë aevoromo Keriso-are aribövie jëvoröhego. O Apollos-oro ijore ö'oromo ujanore jove otehanovadeje sanuovëvego marë'irarijego. Noro ëhi jië'e muoho vae'i God-ro hesi sivue avohëvamu marëromo ri'öjarijeje. ⁷Ujon'öe bivëvaje ahu'o jovehu sanuovëvaje ahu'o no ma-bise'e javuo'i God avohëvego ri'öjaruje aho hu börömojohje. ⁸O ujon'öe bivëvaje ahu'o jovehu sanuovëvaje ahu'o no bogo göho böröme göho bise'e javuo'i ma-gemuoho javue. No diehi jië'e mu vaej'ë'öho God-ro manaho ëhi bojamui'ë'e. ⁹Iae no God'o gemu mae mu vaejarue ae javue. Jemë God-are i'o mu'o va'ëne jëve. Röhu uhu'e jöe göho. Jemë God-are javu va'ëne jëvanove. Èjöhu'o uehorovo'ëjo. ¹⁰God-ro na huë baejivoromo muoho bojemamu ëhuro aehu javu ma vaejaruëhi naro aevoromo jemë vaejëvoromo sa'a uhure umoromo biriri'öho bamëhodeje ëhuro jemëro döre javu va'ëne ëhi biririvoromo mae riravo'irarijego. Èhi vaejëv'ëro ae göëro javue döre vaeruome. Javue döre vaejaruoho ae gemu gemu gavë'i javuoho ma-avoho vae'iro. ¹¹Èhesi bëhoho God-ro aevoromo Iesu Keriso bamë'eje munë'öe bibivoromo namiromo jemë nigemëvego riravo'irarijego. Javu uhure gö gö bogojio'i Iesu Keriso gemuje. Aho munë göho bogo bamo'ë'ö javuoho biririvoröhego. ¹²⁻¹³Javu uhure Iesu Keriso jio'i döre

aëro javue vaejarueje. Javu döre vaejaruoho ae gemu gemu diehi diehi vaejaruoho ijönö va'orahoro jio'ë'e. Munë ma-mabêhe gold silver oho inajo'e ujuohoromo munë mae gö gö oho inajo'e ujuohoromo avoho vae'i o ma-jahuri javu vaejarue inömo ijo ð'e sare oho inajo'e ujuohoromo sisë'i vaejaruoho êho va'orahoro jio'ë'e. God-are maja rovë'iroho vëni bërömëro rueromo ë javuoho ravo ga'ë'e. Vënero ravo'iramu no ga'ejo di ahuro biriri'oho vae'i di ahuro sisë'ioho vaejë'e jio'iramu. ¹⁴ Mami'e vaejare muoho vënehu ravamu biririvoromo namijë'oho ë javu vaejare aribövioho suvuore mana baeruomo'ë'e. ¹⁵ O mu mami'e vaejaroho ravo barëjë'oho êhuro ë javu vaejare aribövioho suvuoroho bogo baeruomo'ë'e. Röhu jabumë bogo sisëroho va'i iae mae raromoruomo'ë'e. Raromoromo röhu uvoruomo'ë'e: Ravavuo'ië'ajëromu huruomare höjo. Röhu vaevë'e nosi muoho ravo barëjahuoromo sisërëjahuë'e höjo. Êhuni ae aho'obêhe gavë'i javuoho ma-avoho vaeruomo'iro.

¹⁶ Jemë iae gavaruje ekaresiaho jemë God-hu hijaje javuoho va'ëne jëvë'ego God-are Aru'ahëhu jemesirire hijajoho. ¹⁷ Jemë God-hu hijaje javuoho va'ëne jëvë'ëro êhu'ëro God-are javu hesiremu jiajêhi jemë êhi hesi ariböviumu jëve. Jemë hesi ariböviumu jëvë'ëro ae rahuhu mu sisë jemë röjêhiromo ijumëvë'oho êhi jië'e aribövioho God-ro mana ijumëvo'ë'e. ¹⁸ Nadi jasi arijo'arijoho sareramirovone. Ja ae rahuaro nimorohoromo uvë'oho: Ave sa'arohemu uehorovarue a jabesi nunire na simano ma'e ae jevajë uvë'oho êhi jië'e uehoroho vuonugone. Vuonugo'i uvone: Ave sa'arohemu uehorovarue a jabesi nunire na simano rumo'e ae jëvë'oho iae mae höjo. Ja êhi uvë'oho God-are nunire ja simano ma'e ae javo'ajëjo. ¹⁹ Êhesi bëhoho ave sa'arohemu uehorovarue simano ma'e jöho êho God-hu gavajoho simano rumo'e jöjeje. Êhesi jöho God-are surire jajivoromo uvë'eje: Ave sa'arohemu uehorovarue ariböviohuro sareri sarerie ë'oromo uvoruomaje höjo: No simano mae baeromo jijiharuejêgo evare aevenëro mie jiomëvanovaje höjo. ²⁰ O jöe gö'o jajivoromo uvë'eje: Badaro gavaje höjo simano ma'e a jabesi uehoroho bogo maehu jiego. ²¹ Êhu'e jiaje a nosi ihoho nadi döroho bamoromo nimoronimorohë'ioho atoromo uvorëjo: Paul o ae gö bërömëgo no jabesi ijore ijore jijiharue aribövie javuajëjo. Êhesi bëhoho ae inöme bövie bise'e God-hu bamavuadoho êho noehu ajëmi'iröhoho javue. ²² Paul na Apollos Peter êho no jemë ajëmi'iröhe aho javue. Sa'ae bövie bise'e êhu'o jemë ajëmi'iröhoho jio'ame. Jemë biririvoromo raromë'oho o vuovëvë'oho ë bövioho bise'oho êhu'o jemë ajëmi'iröhoho jio'ame. Rabe rabe avevejö'e jio'amajoho ijönö jio'amo'iröhoho êhu'o jemë ajëmi'iröhoho jio'ame. ²³ Êho aho'obêhe jemesi javue. Röhu jemë Keriso-are jëve. O Keriso hu God-areje. Êhuni nadi a nosi ihoho döroho bamoromo nimoronimorohë'ioho atore.

4

Corinth ariböviehu apostle ömo'ömo bogo gö nimo'i gö bijönimo'iröhe jöhoje.

¹ Êhu'e jiaje êhuni uvore: Paul-më êhi jië'e aribövie jëvajëjo. Jabumë Keriso-are mu vaejarue aribövie jëvajëjo. God-are jö mami'e subivahuade hesi mu muebejharue aribövie jëvajëjo. Êhi uvore. ² Ae rahu ae gö hesi mu muebejahë'oho biririvoromo muoho avoho ma'enobe va'arueje. Êhuremu maeje. Êhu'ëro no'o êhi ë'ëjo. ³ Naro uvajeje: Jemë o ae gö ave sa'a hesi uehore baeromo nasi mu mae o sisë jiego mevo gavarujoho êho ma-bise'e höjo. Iae na'o nasi arijo'arijoho bogo mevorovajeje ga'i na mae o sisë jivego. ⁴ Êhesi bëhoho naehu mu sisë vaejode jöho na bogo uehorovoromo dëroho juhuoninege. Iae êhi jie röhu bogo êhuro na God-are nuniroho maho namije. A'i Badaro gemuëro na gevajeje nasi muoho mae o sisë jiego. ⁵ Êhuni nadi sarerivoromo masijoho riravoromo ae gö nosi muoho mevo gavahuore ga'i no mae o sisë javuego. Mevo gö'iröhe majaho bogo rovë'eje. Hujëji Badaro rueromo nosi mue rabe rabe gurihijë'e bogo gavaruoho o noehu uhure ma-uehorovo taemaruoho va'orahoro bamoromo evare mevo gö'ë'e. Mevo göromo evare God-ro ae gemu gemu nosi mu diehi vaejare atoro huë maho êhi ajiomë'e o abuejë'e mamui'ë'e.

⁶ Nasì ö mueno'e ë jöho naro jemë majëhiromò ae gö jabesi jöhu'o majëhiromò Apollos-mu nosi ihore jajivodeje röjëhijego jemëro garomò ave jögoru hesi bëhohò avohò uehorovò'irarijego. Jögorohò ëhi uvë'eje: Nadi aruëroho anumëroho jijihò'i God-are surire jöhuremu ëhuremu uehorovobe jijihorëjò. Ëjögòru hesi bëhohò avohò uehorovoromò nadi jemësi sivuohò uehorovoromò dörohò bamorovoromò nimorohë'ioho uvore: Ëa masijohò ëhò nego'i ëhò bijönegajëjò. ⁷ Raro uë'legò masijohò riravö. Inömohò rabohò na ëma bæjarijeje. Bogo. Hesi God-ro bojëmàdeje. Ëhi jië'ohò jemë rabëni uvarujeje: Bövie bise'e nosi biririvoromò bæjare höromò nimorohë'i atarujeje.

⁸ Sàreri aribövie jëve. Nani jemë uvarujeje: Mami'e God-are jöho no da'uaguë'e höjò. Mami'e hesi ajohò bæ barëj'e javuajëjò. No masije riravoromò bövie bise'e muebe'amarue höjò. Apostle-hò no bogo ëhioho masijohò javuë'e jemëro jemësi sivue uehorovoromò ëma uvarujeje: Noremüëremu masije javuajëjò. Ëhi uvarujeje röhu jemë bogo ëhioho jëve. Jemë mae masije riravò'ibearije ëhuro na nimorohevo'ibejò. Ëhesi bëhohò jemë mae masije riravò'ibearije ëhuro no'ò jemë'o gemuoro masije riravò'ibejò. Ëhi jië'ohò mae jio'ibejò. ⁹ A'i avevej'ò'ohò na uehorovoromò uve: God-ro apostle nosi ihohò sa'aro bamë'e höjò. Aehu i'u bæromò a nuniro guomò'ië'legò hesi iho sa'are jiajëhi nosi ihohò ëhi sa'aro jiego ae anerae aru'ahe dinö'e dinö'e raromaruohuro apostle nosirire ë gemu nunohò bamoromò ërimahuarue höjò. Na ëhi uehorove. ¹⁰ Nosi ihohò sa'aro jië'ëro aëro nosi jöho uehorovoromò ëma uvoruomajeje: Paul-mëro Kerisò mae uehorovò'egò ëhuro simano rumò'e aribövie jëvájëjò. Röhu jemëro jemësi jöho ëma uvarujeje: Kerisò'o gemuore javuë'ëro Corinth rajohò nomë simano mabëhe javuajëjò. Aëro apostle nosi jöho ëma uvoruomajeje: Paul-mësi muohò darugò rumò'e höjò. Röhu jemëro jemësi jöho ëma uvarujeje: Corinth rajò nosi muohò darugò ma'e höjò. Jemëro uvarujeje: Nosi ihohò dö mare höjò. Röhu apostle nosi ihohò sa'aròje. ¹¹ Io'ò apostle no iëni jövëni vuovavuobe rovadoho jaruvohu'ò iae ëhi javue. Niögu sisëmu io'amarueje. Aëro anaguò'i arijarueje. Amo ari'e bogojavuë'ëro ëma jijiharueje. ¹² Nosi övëro biririvoromò i'u'e muohò vaeromò iohò ë ijarueje. Aehu nosi örire agavuë'iroho no ma-jö maemu mana majëharueje. Aehu nosi örire huë vavaeni bojamuij'ë'ohò no ma-biririvoromò raromarueje. ¹³ Aehu nosi iho ijumoromò jö sisë atë'ohò no ma-u'emu jöe sanu'e mana majëhijarueje. Sa'ae dinö'e dinö'e raromarue aribövì jabesi nuniroho no sisë javuego musisinö'e bu'öjavuarue aribövìe javue. Sa'osa'ëro ruhijanöv'e aribövìe javue. Nosi ihohò ëhi jiobe rovadoho jaruvohu'ò ëhi gemuohòje.

¹⁴ Ëjò naehu jajivaje hesi bëhohò bogo jemëro adahoromò javòje bæ'irarijego ëhuniho jajive. A'i naro uve: Jemë nasi aboji harihu'ò mae jëvájëromò örohò röjëhiromò jajive. ¹⁵ Nani Kerisò-are mu röjëhijarue aribövìe marohë'e mae jëve. Röhu jemësi vavuohò na gemu jeve. Ëhesi bëhohò jemë'ò na'ò Kerisò-are aëro javuë'ëro ëhu'ëro jemësi vavuohò na jeve rabëni naro aevoromò Kerisò-are jö mahò majëhijë'ëro. ¹⁶ Jemësi vavue jevë'legò ëhuni uëve: Na negajëjò naehu mu vaejajëhi jemë'ò ëhi ë'irarijego. ¹⁷ Ëhi nego'egò Timothy jemësi örire nugö'ò'ië'e. Hu nasi huë bæjaje harihu maeje. Hu Badare muemu uehorovaje ajeje. Ëaho nugö'ò'iramù huro ö'oromò uë'ë'e: Nöröro ëhi jië'e jöho ejahoromò Iesu Kerisò-arire juvoromò hijaje höjò. O ë jöe gemuohò ekaresiäe ahò'obëhe dinö'e dinö'e jioruomajohò röjëhibe juvaje höjò. Ëhi jië'e jöho huro majëhi'iramù jemë röhu mahò uehorovò'aruje.

¹⁸ Röhu jemë a ioro'iorëro uvarujeje: Nörö nosiriroho bogo rue'a'ajëromò jemëro jemësi ihohò döro bamoröv'e jëve. ¹⁹ Röhu God-hu nimë'ohuro iae na ma-burëro ö'ejo. Ö'oromò nasi ga'ejo simano bövì'e aribövìohò diehi jëvo'iramù. Na bogo jabesi jö huhu jöhemu he'i ö'i a'i ö'ejo ga'i jabumë God-are darugohò bæjë'e jioruomego o bogo. ²⁰ Ëhesi bëhohò God-hu böröme namiromò no muebejavuajohò ëhò bogo ma-jö ataruohò jio'i a'i darugò'e muohòje. ²¹ Röhu jemë di muohò nimö. Na na ha'ite bö'oromò hisuebijëvo'ejo o huë bæjëvoromò jö sanu'e majëhi'ejo.

5

Masubarue jögoru ahade a hesi jöhoje.

¹ Röhu jemesi jö sisêho na hejë'e jeve. Aëro atoromo uvoruomohijo: Corinth rajo ekaresia jebesirire ðehu jijihanovarue muoho jiajëjo. Ae gemuëro vavu hesi vaboroho vajiohëro baeromo niö'iro gemu mae arijarue höjo. Èhi jië'e muoho sisë bëheje. God-are jö bogo hejë'e aribövioho jabu bogo èhi jië'e muoho vaeruomajeje. A'i jemesi aëro èhi jië'e muoho vaejajeje. ²Èhi jëvë'eje röhu jemëro jemesi ihoho èma döro bamorovarueje. Nadi èhioho è'ibejarije. A'i huë vavaene böröme baeromo èhi jië'e mu vaejaje aho jemesirire jiajoho nugö'ö'ibejarije iae mae jio'ibejo. Röhu bogo nugö'ö'jarijeje. ³Nasi sino haho'oho bogo jemë'oho jie. A'i nasi uehoroho aho'o jemesirire jie. Èhuro na jemë'o jevanove. Jemë'o jevanovoromo hesi sisêho mevoromo nosi Bada Iesuare ihore uvë'e jeve: Hu mu sisë bëhe vaejajëro i'ue bae'a'ajëjo. ⁴Èhuni jemëro gemuoro gagovorovoromo nasi uehorohu'o nosi Bada Iesuare vöröhu'o jemë'o jiego ⁵ë iaho rori'o nugoromo Satan-are öröro bojamego èhuro hesi sinore jiaje mu sisêho barë'iro èhuro Badare majaho rovego ë ia hesi aru'ahoho bogo sisëroho va'i mae hiröheje.

⁶Röhu jemëhu jemesi mu uehorovoromo iho döre bamorovarujoho èho sisëje. Ave uhu'e ataruoho jemë'o iae uehorovarue. I dë huaje oso biseharihoho èhuro ie aho'obëhe rumorovego dë huaje höjo. ⁷Èdë huaje oso jemesirire jiajoho bu'öjego ma-i mahemu jëvo'i. Èhesi bëhoho ë mu sisë jemesirire jiajoho ahego bogo rumorovo'i a'i barë'iro èhuro jemë i ma va'ëne aribövie jëvo'iröhe. Röhu jemë iae i ma va'ëne aribövie jëve. Rabëni hesi bëhoho naro majëhi'ie'e. God-hu Vörö Tugohade Söröho Israel rajehu ue'ahë'iroho dë huaje oso rumo'e iohemu ue'aharueje. Ue'ahoromo röhu ave muohu'o vaejarueje. God-are jöëni sheep harihoho bijuëmarueje. Röhu Keriso sheep harihu va'ëne anamu guomë'eje èhuro God-ro nosi sisêho uehorovoromo vuonugo'iröhego. God-ro jemesi sisêho uehorovoromo vuonugë'ëro èhuro jemë i ma va'ëne jëve. ⁸Nosi sisêho uehorovoromo vuonugë'ëro jïë'ëro èhuni Jew rajehu i dë huaje osoho sisë höromo vuonugoromo evaré God-hu Vörö Tugohade Sörö ijaruëhi no èhi jië'e muoho vaeromo nu huohue mu sisë gö gö vuonugo'i God-hu vörö tugohahuade muoho uehorovoromo maemu rarom'ejo.

⁹Röhu urimë'i naro jöho jajivoromo majëhiromo uëvodeje: Öehu jijihanovarue ariböviohu'o nadi gemuoroho raromo jijihorëjo. ¹⁰Èjö jajivodoho na bogo uëromo è'odeje: God-are jö bogo hejë'e ariböviohu'oho nadi gemuoroho jijihorëjo. Na bogo uëromo è'odeje: Ga'irarije God-are jö bogo hejë'e aho önö'e mahunö'e mu vaebe vajiohu'e mu vaebe jijihamu God dejonö bamo'i bövi bise'o nuninö bahibe jijihamu gëvë'iroho èhi jië'e ariböviohu'oho nadi gemuoroho raromo jijihorëjo. Naehu uëvode jö hesi bëhoho bogo èhioho jiadeje. Nasi bëhoho èhi jio'ibejo jemëro ejeho'ibejarije God-are jö bogo hejë'e aribövioho bogo gë vadë'ibejarije. Èhuni God-are jö bogo hejë'e ariböviohu èhi jië'e mu sisë vaejamu jemëhu jabu'o gemu mae raromo jijihë'oho iae maeje. ¹¹Röhu jajivode hesi bëhoho aviëhije. He'irarije aëro jemë'o raromoromo uëvamu: No Christian ae javuajë uëvamu hejë'iroho röhu ga'irarije jabumë önö'e mahunö'e jijihamu gëvë'iroho God dejonö bamo'i bövi bise'o nuninö bahijamu gëvë'iroho ae gö jabesi jö sisë atobe jijihamu hejë'iroho jovo ue'ahoromo simano sisërëbe bövi bise'o ujuohoniëhibe jijihamu gëvë'iroho èhi jië'e ariböviohu'oho nadi gemuoroho ioho ue'ahore o raboho raboho è'ore.

¹²Naro rabëni God-are jö bogo hejarue aribövi jabesi muoho garomo mevojöro. Èho bogo nasi muehuje. A'i Christian agano jabesi muoho èho garomo mevore. ¹³God-are jö bogo hejarue aribövi jabesi muoho hesi God-ro sivue garomo mevo'ë'e. No bogo mevarueje. A'i God-are jö hejarue aribövi jabesi mu jemëhu garomo mevo'irarije jöho God-are surire jajivoromo uvë'eje: A sisë jemesirire jiajoho nugö'öregö va'irajo. Èhi uvë'e jiaje ë a sisêho nugö'öregö va'iro.

6

Corinth ekaresiaehu Christian agano bogo court-re sö va'ego God-are jö bogo hejë'e ariböviehu mevoröhe jöhoje.

¹ Röhu aviëhi jië'e muoho jemë rabëni biriri'övoromo ë'arujeje. Ja'o Christian a göhu'o jemë nið'i jö sisë jëvë'o ho jemë God-are jö bogo hejë'e aribövi jabesi nunire va'o rirarovoromo jemesi jö sisëho majëhjarujeje jaburo mevëhojoro. Bogo ëhioho ë'i a'i God-are aribövi jabesi nunire rirarovoromo jöho ato'ibejarije iae mae jio'ibejo. ²Jemë diehi'oromo bogo uehorovoromo uvö: God-are majaho rue'iramu God-are aribövioho noro sa'ae aho'obëhe jabesi muoho garomo mevo'ejärëjo. Èhi uvo'ibejarije iae mae jio'ibejo. Röhu jemë majae ijönö mu börome vaeromo ae aho'obëhe jabesi muoho garomo mevo'ië'ëro jëvë'ëro ëhu'ëro avevejö'e jö bise'o bise'o mevë'o ho jemë iae eni jëve. ³Jemë'o iae gavaruje Keriso-are aribövioho no majae ijönö anera gëromu jabesi mu masijo mevëho hesi jëvajoho. Iae ëhuni uvore: Ave sa'are mu ininoho garomo mevë'o ho iae no eni javuajëjo. ⁴Ave sa'a hesi jö inino mevo'irarijoho jëvë'o ho jemë diehi'oromo ë jöho bava'oromo God-are jö bogo hejarue aribövi jabesi nuniroho rirarovoromo majëhjarujeje mevëhoröhego. Jabesi ihoho Keriso-are ekaresia jemesiroho bogojjë'e jiae jemesi jö sisëho jebesiroho nadi bava'ore. ⁵Jemesi arijo'arije javojimorovohe. Christian agano jemesi jöehu umogihago mevo'irarijoho na jemesiroho simano ma'e aho bogojjë'ëgo ëhuni dirö'e göro va'oromo jemesi jöho majëhjarujeje God-are jö bogo hejë'e ariböviohuro mevëhoröhego. Röhu simano ma'e aribövioho jemesirire iae jio'ame. ⁶Röhu Christian agane göero göho dirö'e göro bava'oromo jemesi jöho majëhjarujeje God-are jö bogo hejë'e ariböviohuro mevëho'iröhego.

⁷Röhu jemë göero göhu'o iro muorovo'e vaeromo court-re va'arujoho ëhuro jemesi Christian muoho mami'e bejë'eje. Jemë court-roho bogo va'i uvo'ibejarije: Sisë vaejevadoho o vajiohehu baejehadoho iae hesi hö uvo'ibejarije iae mae jio'ibejo. ⁸Röhu jemë bogo ëhioho uvo'i jemëro ri'öromu göero gö hesi örire sisë vaejarujeje. O vajiohëro baejeharujeje. Bogo God-are jö bogo hejë'e a jabesi örire gemu ë mu sisëho vae'i a'i jemesi Christian aganoho jabu'o ëhi'ëvarujeje. ⁹Jemë iae gavarujeje sisë aribövie God-are aji'e öri ari'ere bogo va'o hesi jioruomajoho. Nadi sareramirovore. Önö'e jijiharue aribövioho God-are öri ari'eroho bogo va'ë'ö. God dejonö bamo'i bövi bise'o nuninö bahijarue aribövioho bogo va'ë'ö. Goho'amarue aribövioho mu gö gö barueromo a'o a'o sihorovarue aribövioho bogo va'ë'ö. ¹⁰Vajiohu ë'arue aribövioho mahunö'e ë'arue aribövioho jovo iromo simano sisëjarue aribövioho ae gö jabesi jö sisë atarue aribövioho bövi bise'o ae gö ujuohoniëhjarue aribövioho ëhi jië'e aribövioho God-are öri ari'eroho bogo va'ë'ö. ¹¹Urimoho jemë a ioro'ioroho ëhi jië'e sisë aribövie jëvadeje. Jaruvoho jemesi sisëho u'ovëhë'eje. Jemë God-are aribövie jëve. Jemë God-are nunire mae riravaruje. Èhesi bëhoho God-ro Bada Iesu Keriso-are ihore hesi Aru'ahoho nugö'öjamu jemëni rueromo dë vövöbajo'oho avohëhë'ëro ëhu'ëro mae jëve. Èhuni mu sisëho vuonugö'i ma-raromore.

Sino haho'ehu mu maemu vaejago God-are iho dö mare jioröhe jöhoje.

¹²Jemë ae göero uvarujeje: Noehu mue aho'obëhe vaejë'o ho iae mae höjo. Èhi uvarujeje. Iae ëhi jie röhu mu ioro'ioro vaejë'o ho bogo ëhuro marëjavuo'ë'e. Nani noehu mue aho'obëhe vaejë'o ho iae maeje röhu mu göehu göehu ruahö'öjevo'iröhoho na bijönego'ëgo ëhuni ëhi jië'e muoho na bogo vae'ëjo. ¹³Röhu jemëro uvarujeje: I hesi bëhoho dëre abuejajëjo. Dë hesi bëhoho ioho baejajëjo. Iae ëhi jie röhu God-ro uvo'iramu iohu'o dëhu'o barë'ë'e. Dë hesi bëhoho ioho baeje röhu nadi uvore: Nosi sino haho'o hesi bëhoho öero ë'anovajëjo. A'i uvore: Nosi sino haho'o hesi bëhoho Badare örire bojamijaruëjo. O Badare bëhoho nosi sino haho'oho mubejajëjo. ¹⁴Iohu'o dëhu'o barë'ë'e. Röhu Bada guomoromo bogo barë'i God-ro daruge bojamamu ri'öjadeje. Ri'öjë'ëro no'o ëhi daruge bojamui'iramu vuovoromo ri'öjavuo'ë'e. Èhuni nosi sino haho'oho ma-Badaremuje.

¹⁵ Jemě'lo uehorovore. Jemesi sino haho'oho Keriso-are övo duruajo'e jëve. Ĕhi jiě'oho na no öero jijihanovoromo Keriso-are övo duruajo'oho baeromo ö va'ëne magonaho sisěhu'o gemuoroho havoromo momorö'ö'ejo. Bogo mae bogo ĕhioho ĕ'ejo. ¹⁶ Ae rahu magonaho sisěhu'o gemuore havoromo momorö'öjě'ohuro ĕhuro sine dë vövöbajo'e gemuoho javuo'ë'e. Ĕhuremu uehorovore. Ĕjöhö God-are surire ĕhi gemuoho jajivoromo uvě'eje: Jabumě niö'i jěvadoho röhu gemu jio'a'ajějo. ¹⁷ Jabumě gemu jiajeje röhu Bada'ö bimuvě'ohuro ĕhuro Iesu'ö no'ö Aru'ahe gemuoho javue. Ĕhuni magonaho sisěhu'o bogo gemuoroho momorö'ö'ejo.

¹⁸ Önö'e muoho gorore. Mu sisě ioro'iorohuro ĕhuro sinoho dë vövöbajo'oho bogo sisě vaerovo'i a'i ĕehu jijihanově'ohuro ĕhuro sinoho dë vövöbajo'oho sisě vaerovarueje. ¹⁹ Ave jöhu'ö avo'avoho uehorovore. Jemesi sinoho dë vövöbajo'oho God-are Aru'aho hesi osa maho jěvanove. Ĕhesi bėhoho God-are Aru'ahohuro God-are örire jioromo jemesi sinore dë vövöbajo'ere rově'ero jemesi uhure ĕ hijajeje. Jemesi sinoho dë vövöbajo'oho aho'obėhe bogo jemesirehu jio'i God-areje. ²⁰ God-ro jemě bogo ĕma baejěvo'i a'i hesi Harihoho nugö'öromo huě vavaene sisě maro baejě'ero ĕhu'ero jemě hesi baejěvadeje. Ĕhuni jemesi sino haho'oho mu maemu vaerego hesi ihoho dö maro jio'iro.

7

Masuarue mu hesi jöhoje.

¹ Röhu jeměhu jajivoromo ue gevarije jöho na majěhi'irögoro ĕ'e.

Aehu magonaho bogo masuvě'oho iae maeje. ² Röhu ae aho'obėhe önö'e jijiharue jiaje ĕhuni ae gemu gemu magonahe masure o magonahe gemu gemu ae masure. ³ Baruaharo jasi vaborehu ja'ö niavo'i uavě'oho ejahone. O vaboroharo jasi baruohu ja'ö niavo'i uavě'oho ejahone. ⁴ Ĕhesi bėhoho vaboroho jasi sino haho'oho bogo jasirehu jio'i jasi baru hesije. O baruoho jasi sino haho'oho bogo jasirehu jio'i jasi vaboro hesije. ⁵ Ĕhuni vaboroharo nadi baruoho juahami'i baruoharo nadi vaboroho juahami'i ma-ėjahorovore. Röhu nani jemě gemu mae jöe jörovoromo uarovo'aruje: Ĕ'ego no gemuore niavarue muoho majae ma-bisemu vuonugo'i God-are örire jöe jövojuvo va'ö majae eni jiego vuonugo'irarějo. Ĕhi jiě'oho iae maeje. Röhu ĕhi ĕ'ě'oho God-are örire jö jövo'irarije majaho barějego ijönö röhu maho sioněro gemuoro niavore. Bogo ĕhi ĕ'ě'oho nani jeměro bogo avo'avoho biririvö'iramu Satan-ro bijěho gě'ě'e.

⁶ Röhu jeměhu masurovo'irarije jö jajivajoho na bogo uěromo ĕ'e: Jeměhu bogo masurově'oho sisě hö uě'i a'i na uěromo ĕ'e: Jemě nėgě'oho ĕhi'orějo. ⁷ Röhu naehu vaboro bogo masuvě'e ma-hijajěhi ae magonahe aho'obėhe ĕhi jěvo'ibejo ĕhuro Paul na mae jevo'ibejo. Röhu bogo ĕhioho jio'ě'e. A'i ae magonahe gö gö diehi jiě'e mu vaeröhe suvoroho mami'e God-ro bojamuibe rově'eje. Ae göero suvore gö ae göero suvore gö ĕhi baebe rově'e javue. Ĕhi jiě'ero ae magonahe gö gö masurovo'i göero bogo masurovo'amě'eje.

⁸ Röhu magonaho doruohu'ö bogo masuvě'e aribövi ioro'iorohu'ö ave jöho na jemesi örire majěhi'iě'e. Naehu ĕ'ajěhi jemě vabore o barue bogo masuvě'oho iae maeje. ⁹ Röhu biririvoromo avoho taemo raromo'irarijoho bogo eni jěvamu masurovo'amě'oho iae maeje. Ĕhesi bėhoho jemesi dë vövöbajo'ere simanore uehoro gö gö baejě'oho ĕho sisěje. Ĕhuni masurovo'amore.

¹⁰ Röhu masurově'e aribövioho jemě na ave jöho bojěmi'iě'e. Bogo naehu uehorovoromo majěhi'i a'i Badaro bojamuijě'e jio'ego na majěhi'iě'e. Vaboroharo baruoho nadi nugö'öromo va'ö rori'oho hine. ¹¹ O nugö'öromo va'ö rori'ö hijě'oho nadi ae göho masu'i ma-hine. O vuonorö'ö rueromo jasi baruohumu huě baerovoromo avoho arire. Röhu baruoharo ja'ö vaboroho nadi nugö'öne.

Vaboro'ö baru'ö göehu Keriso mae uehorovo'i göehu bogo ma uehorově'oho ĕhuro ĕhi ĕ'iröhe jöhoje.

¹² Röhu a ioro'ioro jemesi örire ave jöho majëhi'ië'e. Bogo Badaro ave jöho jövo'i a'i naro nasi uehorovoromo jajive. Baruocharo ja bogo Keriso uehorovanevare jaehu Keriso bogo ma uehorovaje magonaho masuromo hiromo evare ijönö Keriso mae uehorovo'i jasi vaborehu bogo ma uehorovoromo ja uavë'oho; Iae na ja'o hinövo'ejö uavë'oho nadi nugó'öne. ¹³ O vaboroharo Keriso bogo uehorovanevare jaehu Keriso bogo ma uehorovaje a masuromo hiromo evare ijönö Keriso mae uehorovo'i jasi baruehu bogo ma uehorovoromo uavë'oho; Iae na ja'o hinövo'ejö uavë'oho nadi nugó'öne. ¹⁴ Èhesi bëhoho Keriso bogo uehorovaje aho Christian vaborohu'o niö'iro gemuoro arijë'ëro ëhuro iae hu God-are aeje. O Keriso bogo uehorovaje magonahoho Christian baruohu'o niö'iro gemuoro arijë'ëro ëhuro iae hu God-are magonaheje. Bogo ëhioho jio'ibejo jemesi aboji harihu'oho God rumo'e aboji harihu'e jioruomo'ibejo. Röhu bogo ëhioho jio'i jabumë iae God-are aribövie jioruome. ¹⁵ Röhu ga'irane Keriso bogo ma uehorovaje jasi baruëro o jasi vaborëro ramö'öromo va'o rori'o hi'ia'amu gavë'oho nadi uehorovoromo uvore: No mami'e mae masurovë'ego hu va'ë'oho God-ro bijönimo'ajëromo nijio'irae'i ma-uane: Va'i nagego va'ëjo. O nijio'iraeromo gemuore arijë'oho huë vavaene baejë'e ari'a'aruje. Röhu God bogo ëhioho nimo'i a'i uëvadeje jemë hesi aribövie jioromo huë baerovoromo gemuoro raromo'irarijego. ¹⁶ Röhu Christian vaboroho ja bogo gavanue. Nani jero baruoho ajami'iramu hu Keriso mae uehorovoromo bogo sisëroho va'i Keriso'o maro hi'ë'e. O Christian baruoho ja bogo gavanue. Nani jero vaboroho ajami'iramu hu Keriso mae uehorovoromo bogo sisëroho va'i Keriso'o maro hi'ë'e.

God-hu ae gemu gemu mu bojëmibe va'ego mu vaeröhe jöhoje.

¹⁷ Röhu Badahu ae gemu gemu mevoromo mure bamobe rovade muoho o jemëhu mu diehi vaebe rovamu evare God-hu hesinö rinëgadoho ëhi jië'e muohemu vaere. Naro ekaresiae aho'obëhe ë jögore gemuohemu bojëmibe va'ajeje. ¹⁸ Ae gö urimë'i Jew rajehu ë'aruëhi hesi sino tariojahamu hu hijuvo röhu God-hu hesinö rinovë'oho nadi sino tariojare muoho mu'ure. O ae gö Jew rajehu ë'aruëhioho hesi öriroho bogo ëhioho ë'amu hu hijamu röhu God-hu hesinö rinovë'oho nadi uarego Jew rajo jabesi muoho vaeromo hesi sinoho tariojaho'iro. ¹⁹ Jew rajehu ë'aruëhi jemesi sino tarivëhë'oho o bogo tarivëhë'oho iae hesije. A'i God-are jöe gö gö ejahë'oho ëho böromohoje. ²⁰ Röhu ae gemu gemu jemëhu diehi jië'e mu vaebe rovamu evare God-hu hesinö rinëgadoho ëhi jië'e muoho vaenövore. ²¹ Nani ja a böromo hesi darugore javë'ëro hesi muohuremu vaejahë'iro evare God-ro ja hesinö rinagadeje. Nadi ëhunioho nurunurumo'i ë muohuremu vaenövone. Röhu jaehu ë a hesi darugore hijanuoho vunuog'i va'oromo jasi nimanue mu öri birohë'ohuro va'o ë muoho vaene. ²² Röhu jaehu ae gö hesi darugoremu hiromo bogo nurunurumo'irane ë hesi bëhoho a böromo gö hesi muohuremu vaejahamu evare Badahu hesinö rinagë'oho ja döho jasi böromo hesi darugoremu hi'i jasi uhoho jasi nimoromo Badare mu vaejanue ae jave. O ja jasi nimanue muohemu vaejamu evare Badahu hesinö rinagë'oho ja Keriso-are darugoremu hiromo hesi muohemu vaejanue ae jave. ²³ God-ro jemë bogo ëma baejëvo'i a'i hesi Harihoho nugó'öromo huë vavaene sisë maro baejë'ëro ëhu'ëro jemë hesi baejëvadeje. Èhuni nadi ae gö jabesi darugoremuoho raromoromo ma-muemu vae'i uehorovo'i a'i God-are muoho uehorovore. ²⁴ Nasi ö mueno'e ja ae gemu gemu diehi jië'e mu vaebe rovamu God-hu hesinö rinagadoho ë aho jero God-are nunoro juvoromo ëhi jië'e muohuremu vaenövone.

Bogo masurovë'e o ma-doru raromarue aribövi jabesi jöhoje.

²⁵ Röhu bogo masurovë'e aribövioho jemesi jöho na majëhi'ië'e. Ave jöho bogo Badaro uövuë'ëro majëhi'i a'i naehu uehorovaje jöho majëhi'ië'e. Iae naehu uehorovaje jöho na majëhi'ië'e röhu Badaro huë vavaene baeromo uehoroho bojemijë'ëro ëhu'ëro nasi jöho heromo uvo'a'aruje; Iae jö mae höjo.

²⁶ Na uehorovoromo uve; Jaruvoho huë vavaeni majaho nosi örire rovë'ego ëhuni aehu raromaruëhi ëhi raromë'oho ëho iae maho höjo. ²⁷ Èhesi bëhoho nani jemë vabore masuvë'e raromarujeje. Èhi jië'oho nadi nugó'ö'i uehorovore. O nani jemë bogo masuvë'e

ma-raromarujeje. Ĕhi jiē'oho vaboroho nadi nahore. ²⁸ Rōhu a juvije hu o magonaho aboridehu masuvē'oho bogo sisē'ioho ē'arujeje. Rōhu masuvē'ohuro ēhuro nurunurue uehore gō gō bae'a'aruje. Rōhu na bijōnege ēhi jiē'e huē vavaenehu jemesi ōrire ruerōhoho. Ĕhuni uēve: Vaboroho nadi nahorējo.

²⁹ Nasi ō mueno'e nasi bēhoho ēhije. God-ro majae ma-bunemu bamē'eje hesi majaho ruerōhego. Ĕhi jiē'e jiaje ave majare aevoromo raromobe va'ē'iroho masuvē'e aribōvioharo masuvarije muoho barē'iē'e jiaje nadi masuvarije muohemuoho uehorovo'i God-are muohu'o uehorovore. ³⁰ O huē vavaeni baejē'e aribōvioharo ave sa'a hesi huē vavaeni muoho barē'iē'e jiaje nadi huē vavaeni baejarujoho ēhemuoho uehorovo'i God-are muohu'o uehorovore. O nimorohē'e aribōvioharo ave sa'a hesi nimorohē'e muoho barē'iē'e jiaje nadi nimoroharujoho ēhemuoho uehorovo'i God-are muohu'o uehorovore. O inōme rabe rabe imo'amaruje aribōvioharo inōme bōvie bise'e barē'iē'e jiaje uvore: Noehu imaroho bogo nosirehu jio'i hesi God-are hōjo. ³¹ Ave sa'are bōvie bise'e jiego gavaruoho barē'iē'e jiaje ēhuni ave sa'a hesi mue bōvie bise'e vaejē'iroho nadi ēhuremuoho uehorovoromo vae'i God uehorovē'i muoho vaere.

³² Rōhu na nege jemē bogo ave sa'a hesi muohuni uehorovoromo nurunurumo'irarijejo. Bogo masuvē'e aribōvioharo Badare muohemu uehorovarueje ēhuro Bada dē mae jiorōhego. ³³ A'iro vaboro masuvē'e aribōvioharo ave sa'a hesi muoho bōrōme uehorovarueje ēhuro jabesi vaboroho dē mae jioruomorōhego. ³⁴ Ĕhu'ēro Badare muohu'o ave sa'a hesi muohu'o gemuoro havoromo vaejego anoji'e jiajeje. Rōhu magonaho aboridohu'o bogo masuvē'e magonaho ioro'iorohu'o jaburo Badare muohemu uehorovarueje jabesi sino haho'ohu'o aru'ahohu'o God-are ōrire gemu bojamirovorōhēro. A'i baru masuvē'e magonahohuro ave sa'a hesi muoho uehorovarueje jabesi baruoho dē mae jioruomorōhego.

³⁵ Na jō majēhijaje hesi bēhoho ēho bogo jemēhu masurovo'irarije ōroho tugohēho'i a'i jemē ajēmijego mae jēvorōhego majēhije. Avo'avoho raromoromo Badare muohuremu uehorovo'irarijejo ēhuni vabore o barue bogo naho'irarije jōho majēhije.

³⁶ Rōhu a juvijo'o magonaho aborido'o aemo'aemo'o jēvoromo rōhu uvē'oho: No bogo masurovo'ejare uvoromo ēhi uehorovobe va'ojuvo rōhu aehu magonaho masu'iro nimo avohoromo ēhuni uvē'oho: Naro nasi magonaho hesi ōriroho muoho bogo maho vaegoro masu'iē'ajē uvoromo masuvē'oho iae maeje. Hesi nimoromo masurovoromo gemuore ari'ē'ō. Ĕhi jiē'oho bogo sisēhu jio'i maeje. ³⁷ O aehu biririvoromo hesi dē vōvōbajo'ere mae uehorovoromo uvē'oho: Ĕmagonahohu'o na'o no aemo'aemēro javuē'ero bogo masurovo'i ma-aemo'aeme vaejē'ero bogo niavo'i ma-aribe jireho'ejare uvoromo hesi dē vōvōbajo'ere nimajoho bogo uehorovo'i hesi nimajoho taemorovoromo bogo masuvē'oho hu mae ē'ajeje mami'e biririvoromo uehorovē'ero jiē'ero. ³⁸ Ĕhu'ero jiē'ero aehu hesi aemo'aemo masuvē'oho iae maeje. O bogo masuvē'oho ēho ma-mabēheje.

³⁹ Rōhu masuvē'e magonahoho baru hijē'iroho baru'o gemu mae hi'ē'e. God-are jōho ēhije. O baru guomē'iroho magonahohuro di a nimē'oho ēho bae'ē'e. Rōhu Bada mae uehorovaje ahuremu masu'ē'e ae gō bogo. ⁴⁰ Rōhu hu baru bogo bae'i ma-doru hijē'oho iae hu huē mabēhe hi'ē'e. O baru i'o baejē'oho ma-bisemu bogo ēhioho huē maho hi'ē'e. Nasi uehoroho ēhije. Rōhu nasi uehoroho bogo sisēhuje. Ĕhesi bēhoho naro uvajeje: God-are Aru'ahohuro bogo ae gō jabesi simanoho gemu huotovēho'i Paul nasi simanohu'o huotovehego ēhuro na uehoro mae baeromo jajivaje hōjo.

8

Aehu inōmo sisēni bahijare mi hesi vitu Christian aribōviehu i'irōhe o bogo i'irōhe jō Corinth aribōviehu ua gavamu Paul-hu mana jajivade jōhoje.

¹ Rōhu jō gōho na jajivo'iē'e. Ōvehu avohoromo uvene aho rōjahjarue inōmohuni mie anoromo aho'o bamēhoruomajeje sisēhuro baerōhego. Sisēni bamēhē'e mi vituoho na jemē ma-dajumo ue'ahore o uvore: Aru'aho sisēni bahijehē'ego juahovo'ejarejo. Ĕmioho i'irarije o juahovo'irarije di muoho mae jiajoho ēho no uehorovo'ejo. Jemēhu ē'arujēhi

aehu uvé'oho: Aru'aho mue bövie bise'e eni ga barëjé'e jevajé uvé'oho ehuro hesi iohemu döro bamorovajeje. O aehu ae gö jabesi örire uehorovëvé'oho ehuro hu ekaresia muoho nigemajeje. ²Ja uvé'oho: Na mue eni ga barëjé'e jevajé uvé'iroho ma-dóhemu ga'i bogo avoho gavanueje. ³O jaehu God uehorové'oho huro ja mae gavajeje.

⁴Röhu naehu urimo uevode jöho inómo sisë hesi mi i'irarije o juahovo'irarije jöho na majëhi'ié'e. Iae no garomo uvarueje: Èhi jié'e inómoho bëhi rumo'e höjo. God gemu jio'i gö bogohöjo. ⁵Iae God-are jö bogo hejë'e ariböviohuro sarerivoromo uvoruomajeje: Ö'idöre jio sa'are jié'e aribövi noehu bogo gëvaruoho uvene aho röjëhi'iröhoho höjo. Iae èhi jie. Aëro uvarueje: God gö gö aho'obëhe no bogo gavarue darugo'e a masijoho aho'obëhe jio'amajëjo. ⁶Röhu Christian aribövioho no bogo èhioho uehorovo'i God gemu Vavuho mae uehorovuarueje. Huro sa'ae bövie bise'e bamavuë'ëro noro hesi jöhemu uehorovoromo raromo jijiharueje. O Darugo'e A Böröme Keriso gemu Iesu Keriso mae uehorovuarueje. God-ro uavamu Kerisoro bövie bise'e bamavuadeje. Bamavuoromo ajamuamu no vuovo öroho vuonugo'i darugoho baejë'ëro mae raromarueje.

⁷Iae no garomo uvarueje: God gemu A Böröme Keriso gemu èhi jëvájëjo. Röhu Keriso-are aribövi ioro'ioroho bogo èhioho gavarueje. A'i urimë'i God-are jö bogo hejare majare uvonövareje: Inöme gö aru'aho'e höromo èho rajëhinövareje. Majae egobövie èhi è'obe rovë'ëro èhu'ëro jabumë inómëni bamëhare mi vitu i'ie'iroho uvoruomajeje: Èmioho iae aru'aho sisë hesi mie höjo. Èhi uvoromo ëma ijë'ohuro ehuro herovoromo uvarueje: Nani no sisë ijaruëromo juhuonivarueje mu öroho bogo avo'avoho gavë'ëro. ⁸Jabumë uvarueje: No sisë ijaruëromo juhuonivarueje röhu i ijë'oho bogo ehuro God-are bëhiroho va'ejo. I juahové'oho God-are nuniroho bogo sisëho javuo'é'e. O ijë'oho God-are nuniroho bogo maho javuo'é'e. ⁹Jemë i ijë'oho o juahové'oho God-ro uvajeje: Èho jemesi mue höjo. Röhu gavé'i è mioho ue'ahore. Nani bogo avoho biririvé'e Christian aribövioho jaburo jemë gëromo sisëro rireromo'ë'ö. ¹⁰Èhesi bëhoho ja iae garomo uvanueje: I ijë'oho o juahové'oho hesi höjo. Röhu è jöho Keriso-are ae göëro bogo avoho uehorové'ëro jié'ëro juhuonivoromo uvo'é'e: Sisë ariböviohuni bahijare mioho naehu ijë'oho sisë höjo. Nani è ahuro garöhe jero inómo sisë rajëhijarue osare hiromo ie i'iramu gagorovo uvo'é'e: Èaru'aho sisë hesi mi vitu aehu ijë'oho èho God bijönimajë uvoromo röhu ja gavé'i hu'o ëma i'é'e. ¹¹I'iramu è biriri rumo'e a hesi aru'ahoho sisër'é'e. Jasi öhuni Kerisoro uehorovoromo guomadeje. Röhu jero uvaneje: Mi hesi öroho na ga barëjé'e jevajëromo è a hesi nunire mioho ijamu huro ja gavé'i iromo sisërëjadeje. ¹²Èhi jié'e mu vaejë'oho jemëro jemesi Christian agano jabesi dë vövöbajo'oho biriri rumo'ëro jié'ëro ijumëhoromo jabesi örire sisë vaejëvarujohuro ehuro Keriso'o sisë vae'a'aruje. ¹³Èhi jié'ego naehu mi ijamu nasi aganehu geromo nasi döre rueromo sisërërovo'ia'amu gavé'oho naro mi ijajoho ioro'iore gemu vuonugo'ejo nasi aganoho sisërëjöëni.

9

Paul-hu bogo apostle jevajé uvoromo bövi bise'o maho hesi nijio'irae'i a'i a gö jabesi jöëni uehorovoromo vuonugonövade jöhoje.

¹Jemë'o uehorovore Paul na bogo a jabesi darugoremuoho hi'i nasi nimoromo hijajeje. Na apostle ae jeve. Na nosi Bada Iesu nunëro gavé'e jeve. Naehu Badare mu vaejodohuro iae ehuro jemë hesi aribövie jëve. ²Èhuni ame göehu göehu na bijönegoromo uvé'oho: Nörö bogo apostle-hu hö uvé'oho hesije röhu jemë bogo èhioho uvo'i uvo'a'aruje: Paul iae apostle höjo hesi örire noro Keriso-are muoho baejë'ëro.

³Röhu naehu vaejaje mu aehu garomo uevé'oho: Paul ja rabëni èhi jié'e muoho vaejanue hö uevé'oho na ave jöho mana majëhijajeje. ⁴No God-are jö majëhiromo ie jove mana i'ibejo na mae o sisë jio'ibejo. Iae mae jio'ibejo. ⁵O Peter'o apostle ioro'iorohu'o Bada lesuare ö ömo'ömohu'o è'aruëhi no'o vabore masuromo sö ujuoho jireho'ibejo na mae o sisë jio'ibejo. Iae mae jio'ibejo. ⁶O nani jemëro ëma uvarueje: Nosi ekaresia ajamuijarue a ioro'iorohuro God-are muoho vaeromo ekaresia no ajamuiromo è muohuremu vae'iramu no mana bojëmi'ëjarëjo. Röhu Paul'o Barnabas'o jabumëremu bogo èhioho mana bae'i

God-are muoho vaeromo no ajamuiromo jabesi övëro mue gö ionire vaeromo manaho baenövo'aruëjo. ⁷Jemë nani ëhi uehorovaruje röhu muorovo aribövioho na jabumë jabesi övëro mu gö ionire vaeromo mana baeromo ioho ue'aharueje. Bogo. Jabumë muorovo muohemu vaeromo baejarueje. O iruno'e ba'amo bivo'e vaejarue aribövioho na jabumë ë iruno'oho ue'aharueje o bogo. Iae ue'aharueje. O mi muebejarue aribövioho na jabumë ë mi hesi amo rihuoho ue'aharueje o bogo. Iae ue'aharueje.

⁸Aehu mu vaeromo mana baejarue jöho jajivë'e jeve jemëro heromo uvo'irarijego: God-are ekaresia muebejavuoromo mana baejë'oho iae mae höjo. Röhu God-are jöho ëhi gemuoho jajivë'eje. ⁹Moses-hu jajivade jögoru surire ëhi uvë'eje: Jasi mu vaejahaje miëhu jasi mu vaejahoromo i hörehu sa'ijovobe juvë'oho hesi jö'oho nadi tugohahego hu juvoromo hesi manaho baeromo huhu hörehu sa'ijovaje i vitu vituoho ibe juvo'irajo. Èhi jjë'oho miohuro ëho hesi manae bae'a'ajëjo. God-are jöho ëhije. Röhu God bogo miohemuoho uehorovoromo ë jöho bojamui'¹⁰a'i nosi jöho uehorovoromo bojamuadeje. Èhesi bëhoho iruno'o mu muebejë'iroho sa'a ato'atovarue ariböviohu'o i sa'ijovarue ariböviohu'o jabesi muoho vaejë'i uehorovoromo uvoruomajeje: No i mu vaejaruohuni ëhuni u'emu ë ioho ue'aho'ëjarëjo. Èhi uvë'oho iae maeje. ¹¹Röhu no iruno'o bivarue aribövioho va'ëne javue. Noro God-are jöho jemesi örire majëhijë'e javue ëhuro God-are jö majëhijaroho muro iruno'e bivanovë'e javue. No ëhi jjë'e aru'äho muoho jemëni vaejëhë'ëro ëhuni ave sa'a hesi inöme ie rune mana baejë'oho bogo sisëhu jio'i maeje. ¹²Jemesi ekaresia muebejëvarue a ioro'iorehu jemesi örire mana bae'i uehorovë'oho maeje jabumëro jemë bisemu ajëmijë'ego. Röhu no jemë börome ajëmijë'e javuë'ëro ëhuni no biririvoromo uvo'ejo: No mana baejë'oho iae mae höjo.

Röhu nosi nimoromo manaho bogo bae'i a'i no biririvoromo huë vavaene bövie bise'e baejë'e javue aëro uvojëni: Paul-mëro nosi monioho bae'i nimoromo ekaresiaho muebejavuaje höromo Keriso-are jö maho bogo eruomiojëni. ¹³Jew rajehu God-are amo böromo hesi mu vaejë'oho God-are amore bahijare ioho jabesi manaego ujuohoromo ue'aharueje. O God-are maratuore mi bamoromo vënehu bue'öjarue ariböviohuro ë mi vituoho jabesi manaego ue'aharueje. Èho na jemë uehorovö o bogo. ¹⁴O Keriso-are mu vaejarue aribövioho ëhi gemuoho ë'arueje. Badaro uövuë'eje hesi jö majëhijarue aribövioho noro mana baeromo raromo jijihonövoröhego.

¹⁵Èhi uövuë'eje röhu na manaho bogo baejë'e jeve. O naehu avevejö'e jajivaje jö hesi bëhoho bogo ëhuro jemëro bojemi'irarijego. Naehu guomë'oho iae hesije. A'i naehu Keriso-are jö ma majëhiromo ëhuni mana baejë'oho ëho bogo maehuje. Na bijönege ae göëro mana bojemiromo ëhuro naehu nimorohë'i jövaje jö hesi bëhoho tugoho'iröhoho. ¹⁶Naehu Keriso-are jö ma a majëhijë'oho nimorohë'i jövo'irode bëhoho bogoje God-ro ë muoho bojemi'ego. Hesi jö bogo majëhijë'oho na i'ue bae'ejo. ¹⁷Naehu nasi nimoromo Keriso-are jö majëhijë'oho suvuore mana baejajeje. A'i na bogo negë'e Keriso-are jö ëma majëhijë'oho God-hu bojemade muoho ma-vaejajeje. ¹⁸Röhu naehu baejaje suvuoroho rabeje. Keriso-are jö majëhijë'oho na ave sa'a hesi mana baejë'oho maeje. Röhu ëho bogo uehorovoromo manaho bogo baejë'e hesi jö ëma majëhijajoho ëhuro dë vuëvavejeje. Èho nasi suvuoreje.

¹⁹Na bogo ae gö jabesi darugoremuoho hiromo jabesi muohemu vaejëhaje aehu jevo'i a'i naro nasi mueberovoromo nasi nimoro muoho vaebe juvajeje. Röhu na bogo nasi nimaje muoho vae'i a'i ae aho'obëhe jabuhu diehi nimaruooho ëho vaejajeje ëhuro ae aho'obëhe baejëvoromo Keriso-arire rëmo'irodëro. ²⁰Jew rajo jabu'o gemuore hiromo God-are jö majëhijë'iroho Jew rajehu raromaruëhi na'o ëhi hibe juvajeje ëhuro Jew rajoho baejëvoromo Keriso-arire rëmo'irodëro. O Moses-are jögoruremu raromarue ariböviohu'o hiromo God-are jö majëhijë'oho jabuhu Moses-are jö ejarahuëhi na'o ëhi ejahajeje ëhuro Moses-are jögoruremu raromarue aribövioho baejëvoromo Keriso-arire rëmo'irodëro. Moses-are jögoroho iae na ejahajeje röhu bogo hesi jögoruremuoho hijajeje. ²¹O Jew rajo jögoru bogo hejë'e ariböviohu'o hiromo God-are jö majëhijë'iroho jabuhu Jew rajo jögoru bogo ejarahuëhi na'o ëhi ë'ajeje ëhuro Jew rajo jögoru bogo hejë'e aribövioho baejëvoromo

Keriso-arire rëmo'irodëro. Iae na Jew rajo jögoroho bogo ejahajeje röhu na God-are jögoroho bogo vuonugo'i Keriso-are jögoruremu hiromo God-are jöho ejahajeje. ²² O juhuoni juhuoni mu vaejarue ariböviohu'o gemuore hiromo God-are jö majëhijë'iroho jabuhu raromaruëhi na'o ëhi hijajeje ëhuro ë aribövioho baejëvo'irodëro. Èhu'ëro di ariböviohu'o hijë'oho jabuhu mu vaejaruëhi na'o ëhi hibe juvoromo öre aho'obëhe ë'o gavajeje ëhuro a ioro'ioroho maro va'iröhego.

²³ Èhi jië'e mu vaejaje hesi bëhoho aëro Keriso-are jö maho heromo jabu'o na'o huë mae baeröhëro ëhuni ë'ajeje. ²⁴ Jemë'o iae gavaruje tutuvoromo ae göehu gö iosirëmi'ie'iroho ae aho'obëhe biririvoromo tutubijioharueje röhu ae gemuëro iosirëmiromo urimo ma-burëro tutuvoromo suvuoro baejajoho. Jabuhu ë'aruëhi jemë'o ëhi jemesi uehoroho darugoho aho'o bojamiromo Keriso-are muohuremu biririvoromo vaere hujeji jemesi suvuoroho bae'irarije. ²⁵ Röhu tutuvoromo aehu a ioro'ioro iosirëmi'ie'iroho urimë'i biririvoromo dajoho avoho mueberovobe va'oruomajeje ëhuro darugo ma'ëro tutuvoromo suvuoroho baeröhëni. Èsuvuoroho ijino inovoromo simanore didi'aharuoho jië'ëro ëhu'ëro ma-burëro sisërë hesi jiajeje. Röhu ë sisërërohe suvuoroho baeröhëro ëhuni ë ariböviohuro biririvoruomajeje. Röhu Christian aribövioho no bogo ëhi jië'e suvuoroho bae'i a'i ioro'ioyemu jioröhe suvuoroho baeröhëni ëhuni Keriso-are muoho vaejaruje. ²⁶ O Paul naro ioro'ioyemu jioröhe suvuoroho bae'irodëni ëhuni aehu övo mugö mugöehu ano'irögöro övo aruëre anumëre ma-bu'öjaruëhioho na bogo ëhioho Keriso-are muoho sisë'i sisë'ioho vaejajeje. A'i aehu ma-ahorirehu biririvoromo tutuvaruëhi na ëhi Keriso-are muoho ma-ahorirëro biririvoromo vaejajeje. ²⁷ Keriso-are muoho vaeromo nasi dajehu nimajoho ma-taemorovajeje ëhuro biririvevoröhego. Èhi'oromo nasi dajoho nasi mueberovoromo ahorrirëro va'ajeje naro ae gö jabesi örire jögore majëhijajëro röhu Kerisoro uejöëni: Paul jasi muoho bogo eni jio'ego jasi suvuoroho bogo bae'a'anuë uejöëni.

10

Aehu övehu avohare inömo bogo uehorovo'iröhe jöhoje.

¹ Nasi ö mueno'e na nege jemëro ave jöho uehorovo'irarijego nosi Jew rajo hijo miono'ehu ë'are jöho. Nosi Jew rajo hijo miono'oho aho'obëhe God-are suehuro rigëgoromo öroho röjëhi'ego ë örire jijilho va'onövareje. Jabumë ae aho'obëhe jovo ihe Kavü'e Jovoho beromo mae iojiohareje. ² Jovo beruomamu suehu aegëhadoho ëho noehu bapataeto vaeromo Keriso'o bimuvaruëhi jabu'o ëhi bisemu gemuoho vaejanovareje. Èhesi bëhoho jovo beruomamu suehu aegahadoho ëho Moses'o bimuvorohöje. ³ Röhu jabumë ae aho'obëhe ie gemuoho ue'ahareje. Ue'ahoromo ëhuro God-are Aru'aho hesi darugoho baejareje. ⁴ Jabumë ae aho'obëhe jove gemuoho ue'ahareje. Èjovoho munë gagore jovo mae surovajoho ue'ahareje. Röhu ë jovoho bogo jovo maemuoho jiadeje. Èhesi bëhoho munënö'e aehu jabu'o gemuore va'onövadoho ë ahuro aru'aho'e jovohu'o bojëmamu jaburo jovo maho iromo ëhuro aru'aho hesi birirohu'o baejareje. Èmunënö'e aho ëho Keriso jiadeje. ⁵ Jew rajo hijo miono'e ae aho'obëhe ëhi jië'e huë maho baeruomamu röhu ae ma-gemu niö'i jabesi muoho God-ro garomo nimorohadeje. A ioro'iorohunioho bogo nimorohö'i jabesi örire bijönimadeje. Bijönimamu a rumo'e sa'are vuovo momorö'öbe va'adeje.

⁶ Mu sisë ëhi vaeromo vuovare jöho ëho God-are suriroho bogo ëma jajivo'i a'i noni jajivë'eje noro garomo adahoromo avo'avoho uehorovo'iröhego. Èhi jië'oho jabuhu mu sisë nimarëhioho no bogo ëhioho nimo'ejo. ⁷ O jabumë a ioro'ioyehu inömo aru'aho'e höromo rajahi'amarëhioho no bogo ëhioho ë'ejo. Jabuhu ë inömo sisë aru'aho'e höromo rajahi'amo'irögöro nimorohare jöho God-are surire jajivoromo ëhi uövü'eje: Ariböviohuro sa'aro raromoromo jovoho ioho mahunö'e ue'ahoromo ri'öromo mu sisë'o vaemarumijë'i ajajovare höjo. ⁸ Röhu jabumë a ioro'ioyehu öehu ë'anovarëhioho no bogo ëhioho ë'ejo. Öëro ë'anovë'ëro ae aho'obëhe 23,000 majae gemuore rireromoromo vuovëvadeje. ⁹ Röhu jabumë a ioro'iorohuro mu sisë vaebe va'oromo ëhuro Badare dëho

bijjoho garuomadeje ga'iro hu ma-nunëremu gëbe muebejëvobe va'ego o bogo. No ëhi jië'e muoho bogo vae'ejo. Röhu jabumë ëhi ë'ë'ego sigobëro umijëvamu vuovëvadeje. ¹⁰ Röhu jabumë a ioro'iorohuro huë sisë barueromo nurunuruëgamu God-are örire jöe sisë'i atoromadeje. Ëhi jië'oho no bogo ë'ejo. Jabumë ëhi ë'ë'ego a muo'amego vuovuvuaje anerahuro rueromo muo'amamu vuovëvadeje.

¹¹ Ëhi jië'e i'uoho aho'obëhe nosi hijo miono'o jabesi örire rovadeje ëhuro no ae aho'obëhe uehorov'iröhego. Jabuhu mu sisë vaeromo i'u mana baejare jöho iae God-are surire jajivë'eje noro garomo adahoromo avo'avoho raromo'iröhego jaruvore maja barë'iröhoho mami'e dunovo'ego.

¹² Ëhu'e jiaje ja ae rahuaro uvë'oho: Na bibivoromo namijajë uvë'oho gavë'i va'one. Bejavo'ë'e. ¹³ Röhu uehoro sisë gö gö jemesi örire rovajeje. Iae ëhi jie röhu diehi jië'e uehoro sisëhu rueromo jemesi dëre bijëhë'oho ëhi jië'e uehoro sisëho bogo jemesiriroho gemu ruel'i ae aho'obëhe nosi dëre ro bijahuajeje. Röhu God-hu no ajamui'i uövüadëhi iae hu ëhi ajamuijajëro jië'ëro ëhu'ëro huro garöhe biriri bogo no uehoro sisëhu jemesi örire rue'ia'amu jemë nijjo'iraerovo'irarijoho bogo eni jëvamu gavë'iroho hu bogo manunëremuoho gë'ë'e. A'i uehoro sisë jemesi örire bijëho'i rovë'iroho huro öroho röjëhi'ë'e jemëro ë jijjhoromo uehoro sisëho vuonugo'i biririvoromo maro va'irarijejo.

¹⁴ Nasi ö mueno'e ëhi jië'e jiaje ëhuni inömo'ho god höromo rajëhijarue muoho gororomo rori'o va'ore. ¹⁵ Röhu jemëro jemesi simanoho avo'avoho uehorovarujego ëhuni ave jöho majëhi'ie'e. Mevoromo gare jö hesi bëho'ho diehi jiego. ¹⁶ Jemë'ö uehorovore. Enatuore wine jovohuni God huë mae uaromo hesi suvuro baeromo ijë'iroho ëhuro no Keriso-are köho gemu mae baejarueje. O i ato'atorovomo ijë'iroho ëhuro no Keriso-are sinoho gemu mae baejarueje. ¹⁷ No ae aho'obëhe ie gemuoho ma-gemuoro ijë'ëro ëhu'ëro no ae aho'obëhe javue röhu ae gemuoho javue ie gemuoho ijë'ëro.

¹⁸ Röhu Israel rajo jabesi muohu'o uehorovore. Jaburo mioho tarioromo vituoho God-ni hesi maratuore bahi'i vituoho ijarueje. Iromo ëhuro ë mure bimubarueje. O inömo sisë hesi öroho gemuohoje. Noehu inömo sisë hesi i vitu ijë'ohuro ë mure bimubarueje. ¹⁹ Nani ë jöho adahoromo uvo'a'aruje: Paul-ro uöromo ë'ajëjo: God-are jö bogo hejë'e ariböviehu rajëhijarue inömo'ho darugo'e jio'amajëjo. O inömo sisë bojëmijë'e mioho bëhi'e höjo. Nani ëhi uvo'a'aruje röhu na bogo ëhiöho uëve. ²⁰ A'i na uëromo ë'e: God-are jö bogo hejë'e ariböviehu inömo'huni i bamëhë'oho bogo God-ni bahijaho'i Satan-are aru'aho sisëho jabuni bahijëharue höjo. Ëhuro aru'aho sisë jabesi mure bimubarue höjo. Röhu jemëhu Satan-are aru'aho sisëhu'o gemuore bimuvë'oho na bijönegajëjo. ²¹ Jemëhu Badare enatuore jovohu'o Satan-are aru'aho sisë jabesi enatuore jovohu'o gemuore havoromo ijë'oho bogo maehuje. O Badare maratuore iohu'o aru'aho sisë jabesi maratuore iohu'o gemuore havoromo ijë'oho bogo maehuje. ²² O noehu biriri'övoromo Satan-are aru'aho sisë jabesi i jovo iromo jabu'o bimuvë'oho God-ro uvo'ë'e: Jemë bogo na gemu rajehijarujëromo ëhuni dë vörönimo'ë'e. Ëhi jië'oho na no aru'aho sisëhu'o bimuvu'ejo. Bogo. O ëhi jië'e mu vaejë'oho nani no sisë'i uehorovoromo uvarueje: God-are darugoho bise'e höjo nosiroho böröme höjo. Ëhu'ëro no hesi i'uoho bogo bae'ëjarëjo. Ëhi uehorovë'oho sisëje. No aru'aho sisë'o bimuvë'oho iae no i'ue bae'ëjo.

Ave jö masijoho uehorovoromo inömo sisëni bahijare mi gororovo'iröhe ë hesi jö vituohoje.

²³ Jemë ae göëro uvarueje: Mue aho'obëhe vaejë'oho iae mae höjo. Iae ëhi jie röhu mu ioro'ioro vaejë'ohuro bogo ëhuro marëjavuo'ë'e. Nani mue aho'obëhe vaejë'oho iae maeje röhu mu ioro'ioro vaejë'ohuro bogo ëhuro ajamirovarueje avoho biririvoromo Keriso mae uehorovobe va'iröhëro. ²⁴ No bogo nosi sinohemuoho uehorovo'i ae gö jabesi sinohu'o uehorovo'ejo.

²⁵ Market-re imarije mioho aho'o ma-dajumo ue'ahore. Nadi juhuonivoromo uvore: Na ave mioho aru'aho sisëni bamëhare mioho höjo o gö hö uvo'i ma-ue'ahore. ²⁶ Ëhesi bëho'ho God-are surire jajivoromo uvë'eje: Sa'ae iruno'e bövie bise'e aho'obëhe Badare höjo.

²⁷ O God bogo ma uehorovarue aehu jemë uëvë'oho: Ruerego no i harihe gemuoro i'irarë uëvamu jabu'o ie i'i nëgë'oho va'oromo ga'irarije ie rabe rabe i'imëmamumu gavë'oho madajumo ue'ahore. Nadi dë vövöbajo'eroho uehorovoromo uvore: Na ave mi ue'ahë'oho mae o sisë höromo mi hesi jöho uë gë'i ma-ue'ahore. ²⁸ Röhu ae göehu jemë uëvë'oho: Ave mioho aru'aho'e inömëni bamahë'e mie hõ uëvë'oho nadi ue'ahore. Uvore: No ue'ahë'oho ë jö majahuijade ahuro garöhe noehu ue'ahamu gavë'oho uvo'a'ajëjo: Èho God bijönimajëromo juhuonivo'ajëjo. Èhuni no'o vuonugo'ejarëjo. Èhi uvore. ²⁹ Na uëve: Jemë ë mi juahovo'irarije hesi bëhoho ë jö majëhijade ahuro juhuonivoromo uvojjöeni: Èmi ue'aharujoho sisë hõ uvojjöeni uëve. Na bogo uëve jemëro juhuonivoromo uvojjöro: Sisë höromo juahovo'irarijejo. Nani jemëro na ue'a'aruje: Röhu God-ro uövü'e höjo: Ie rabe rabe i'i nëgë'oho irëjo. Èhi jië'oho no rabëni juhuoni'e a hesi jöho uehorovoromo ë mioho juahovo'ejarëjo. ³⁰ O no God-are örire huë mae uaromi mi ue'ahë'iroho rabëni ae göho uö'a'aruëjo: Jemë sisë ue'aharujëjo. Röhu ë miohuni no mami'e God mae uaromo ue'ahare höjo. Nani èhi ue'a'aruje.

³¹ Iae èhi jie röhu ie jove ue'ahë'oho o mue bövie bise'le vaejë'oho God uehorovoromo vaenövore hesi ihoho döro jioröhe. ³² Jew rajoho o sa'a ioro'ioro rajoho o ekaresia aribövioho èho jabesi jöëni jemëro uehorovoromo nadi mue gö gö vaejejo jaburo èho gavego jabesi aru'ahoho sisërëjëho'iro. ³³ Röhu na'o mu rabe rabe vaejë'iroho avo'avoho vaejajeje ae aho'obëhe na gevego mae jëvoröhego. Nasi sinoho bogo uehorovo'i ae aho'obëhe jabesi sinoho uehorovoromo muoho vaejajeje jaburo maro va'oruomoröhego.

11

¹ Naehu Keriso-are mu garomo vaejajëhi jemë'o nasi muoho garomo èhi vaenövore.

Magonahehu God rajahiruomo'ie'iroho simano nomorovo'amoröhe jöhoje.

² Röhu naro jemesi örire rajëhije. Èhesi bëhoho jemë majae èhi nasi örire uehorovevoromo naehu jöe rabe hejë'ëro bojëmijodoho ejeharujeje. Èhuni naro jemesi örire rajëhije. ³ Röhu na nege jemëro garomo uvo'irarijejo: A nosi simanoho Keriso höjo. No hesi uhure javuajëjo. Vaboro hesi simanoho baruoho höjo. Vaboroho baru hesi uhure höjo. Keriso-are simanoho God höjo. Èhi uvore. ⁴ Èhi jië'ëro God rajahi'i gemuore gagovë'iroho ama'e o asë rahu simano nomorovoromo pari vaejë'oho o God-are jö a majëhijë'oho èhuro no Keriso bogo avoho uehorovarueje ë hesi bëhoho Keriso nosi simanoho jië'ëro. ⁵ O magonahe rahu simano bogo nomorovë'e pari vaejë'oho o God-are jö a majëhijë'oho baruoho bogo avoho uehorovarueje ë hesi bëhoho baruoho jabesi simanoho jëvë'ëro. Simano bogo nomorovë'oho u seho barëjë'e magonahoho gemuoho jëvanove. ⁶ Magonahehu simano bogo nomorovë'oho simano uoho tario'ibejo iae mue gemuoho jio'ibejo. Röhu magonahehu simano u tariojë'oho o simano u seho barëjë'oho èho javoji'e muohoje. Èhuni magonahehu simano nomorovë'oho iae maeje. ⁷ God-ro aho bamavuoromo hesi aru'ahoho ajoho bojamuijë'ëro God jiajëhi aho èhi javue. Èhuni simano nomorovë'oho bogo ama'i nosirehuje. O God-ro a ijo'ahe baeromo magonahoho avohoromo a nosi ajoho magonahoho bojëmijadeje. Èhuni magonahehu simano nomorovë'oho iae maeje. ⁸ Aevo'ioho God bogo magonahoho baeromo èhuro ama'oho avoho'i a'i ama'e baeromo èhuro magonahoho avohadeje. ⁹ O God bogo ama'oho magonaho jöënioho avoho'i a'i magonahoho ama'i jöëni avohadeje. ¹⁰ Èhu'ëro jië'ëro magonaho jabuhu simano nomorovë'oho iae maeje èhuro aneraho jaburo gëromo uvoröhego: Èmagonahoho jaburo baru jabesi aharire raromarue höjo. ¹¹ Iae èhi jie röhu a'o magonaho'o Bada'o gemuoro javuë'ëro èhu'ëro magonahoho bogo a rumo'oho riravo'i ama'oho bogo magonaho rumo'oho riravo'ë'ö. ¹² Ae jië'ëro èhuro God-hu magonaho avohadëhi èhi magonahe jio'amë'ëro jië'ëro èhuro aho rahavuajeje. Röhu God-ro aho'obëhe bamavuë'ëro èhuro aho magonahoho bövioho bise'oho javue.

¹³ Röhu jemesi uehorovore. Magonahehu ekaresiae aho'obëhe jabesi gemuore raro-romomo simano bogo nomorovë'e ma-pari vaejë'oho na mae o sisëje. Èho sisëje. ¹⁴ No ae

magonahe aho'obêhe dinö'e dinö'e raromaruoho uehorovoromo uvarueje: A nosi simano u êgo jîé'oho sisê hôjo. ¹⁵Röhu magonaho jabesi simano u êgo jîé'oho iae ma-mabêhe hôjo. Êhesi bêhoho God-ro magonahoho simano u êgobövioho bojëmijadeje êhuro simanoho riogivoröhego. ¹⁶Ae göehu nasi jö aho'ahovo'ié'iroho röhu God-are ekaresiae dinö'e dinö'e raromaruohu'o no'o êhi jîé'e muohuremu vaejarueje.

Badare i jovo avoho ue'aho'iröhe jöhoje.

¹⁷Röhu na bogo jemê rajêhiromo ave jöho majêhi'irögorö ë'e. Jemesi ekaresia gagové'iroho êhuro jemê bogo marojëvo'i a'i sisêrêjévajeje. ¹⁸Êhesi bêhoho aevo'ioho na hejodeje uevamu: Corinth rajo ekaresia jabumê gemuore gagovorové'iroho Christian ariböviohuro uehoroho bogo gemuoho bae'i ae göëro uehore gö ae göëro uehore gö baejarue hôjo. Êhi jîé'e jöho hejê'ëro na uehorovoromo uve: Êjöhö nani bogo sareroho jio'i ma-bisemu jö mae jîé'ëro Corinth ekaresiaho jemëro nani êhi jîé'e mu sisêho vaejaruje hôjo. ¹⁹Röhu jemêhu hahagu hahagu uehorové'oho êho a jabesi mueje. Öre göho bogoje. Hahagu hahagu uehorové'ëro êhuro uhohu'o mae uehorovarue aribövioho va'orahoro jio'amo'ë'e. ²⁰Amo jemêhu gemuore gagovorové'iroho jemê bogo uvarueje: Noehu i'iröhe ioho wine-oho êho Badare hö uvo'i ma-ue'aharujeje. ²¹Êhesi bêhoho ë i jovo ue'ahé'iroho jemê a ioro'ioroho bogo uehorové'e sivu sivue jemesi ioho jovoho ëma ue'aharujeje. Ioho jovoho ëma ue'ahoromo a ioro'ioroho hömëvo'i a ioro'ioroho vörö'e jovo börröme iromo simane sisêrêjarueje. ²²Na jemê osaho bogojëve ë raromoromo iruno'e jove i'irarijoho êhuni gemuoro gagovoromo Badare ioho jovoho sisê'i ijarueje. O na jemê God-are ekaresiaho bijönimoromo êhuni iruno'lo rumo'le aribövi jabesi örire javoje bojëmiromo ioho jabesi nunire ëma ue'aharujeje. Jemê êhi ë'arujoho na diehi jîé'e jöho jövo'ejo. Na na jemesi muohuni rajêhi'ejo. Na bogo rajêhiromo jövo'ejo.

²³Röhu ave jöho Badaro bojëmijê'ëro naro jemê bojëmodeje. Bada Iesu a sisê bojëmi'iröhe vahire evare huro ioho baejade hôjo. ²⁴Ioho baeromo God mae uanugoromo ato'atorovomo hesi aribövioho uëvade hôjo: Aveho nasi sine hôjo. Na nasi sinoho bojamirovo'ié'ajëjo jemê mae jëvoröhego. Aviêhi jîé'e muoho vaenövorëjo êhuro na uehorovevo'irarije hôjo. ²⁵Ioho inugoromo röhu i baejadêhi êhi enatuore jovoho baeromo uëvade hôjo: Ave enatuore jovo hesi bêhoho hehëjo. Na köe rovevoromo guomevo'ié'ajëjo. Guomevo'iramu êhuro God-hu jemê muebejëvoröhe jögoru i'oho ioro'ioeremu maré'ajëjo. Êhuni jemê jovo ijê'iroho irëjo êhuro na uehorovevo'irarije hôjo. ²⁶Bada Iesuhu êhi jövade jö hesi bêhoho ë i o ë enatuore jovo ijê'iroho êhuro huhu guomade jöho röjêhibe va'ujuvo va'o hu rue'ë'e.

²⁷Êhu'ëro jîé'ëro aehu Badare i o enatuore jovo bogo mae uehorové'le ma-ijé'oho Badare sinoho köho ijumê'ëro êhuro sisê jëve. ²⁸Êhuni ae aho'obêhe gemu gemu jasi dë vövöbajo'oho mevo avohoromo gare diehi diehi uehorovëvego. Êhi ga avohoromo evaro ioho jovoho inövore. ²⁹Badare sino bogo uehorové'le ma-iemu jovemu ijé'oho ë ioho jovoho iromo êhuro i'ue mana bae'a'aruje. ³⁰I'ue baeromo jemesi a ioro'ioroho aho'obêhe sine u'uhëvoromo guomo guome gö gö baejê'ejö. A ioro'ioroho vuovëvê'eje. ³¹Röhu nosi dë vövöbajo'oho urimo mevo avohoromo ga'ibejo êhi jîé'e i'uocho bogo bae'ibejo. ³²O Badahu i'uo bojamuijê'oho êho röjahuiromo bojamuijajeje êhuro noro avoho uehorovoromo sisê ariböviohu'lo gemuoroho sisëroho bogo va'iröhego.

³³Nasi ö mueno'le Badare i jovo i'i gagové'iroho göëro göho mueberovoromo gemu mae ire. ³⁴Röhu hömëvê'oho jemesi osaro osaro raromoromo ire. Êhi jîé'oho gagovoromo God-are i'uocho bogo bae'a'aruje. Röhu jö ioro'ioroho naehu ö'ë'iroho avohêho'ejo.

12

Mu vaeröhe suvuore gö gö God-are Aru'ahehu bojamuaje jöhoje.

¹Nasi ö mueno'le God-are Aru'ahehu suvuoro bojamuijaje jöho na majêhi'ie'e. Êhesi bêhoho na nege jemëro ë jöho avoho ga'irarijogo. ²Iae jemê'o gavarueje jemê God bogo ma uehorovarije majaroho aëro jemê sarerëmi'ego jö mae höromo ejêhoromo ëma

jijihonövarijeje. Jijihoromo ehuro jöromo'e momorö'öj'e inömo inömoho vörö'e hörömo ëma uvene aho röjahnövarijeje. ³ Ehuni ave jöho uehorovore. God-are Aru'ahehu jö bojëmë'oho aho bogo uë'ë'ö: Iesu sisëgo sisëro va'ajëjo. God-are Aru'ahoho bogo ëhi jië'e jöho bojamuijajeje. A'i hesi God-are Aru'ahohuremu uehoroho bojamuijago uvarueje: Iesu böröme namijë'ëro iae Bada höjo. O God-are Aru'ahehu uehoro bogo bojamuijë'oho nosi sivuoho ëhi jië'e jöho bogo vaerovo hesi javue.

⁴ Mu vaeröhe suvuroho gö gö jiorove. Röhu Aru'ahe gemuëro ë suvuroho bojamuibe va'ajeje. ⁵ Christian muoho gö gö jiorove. Röhu Badare muoho gemu noro vaejharueje. ⁶ Mue gö gö vaejë'oho eni javue. Röhu God-ro gemuëro darugoho bojamuego no ae aho'obëhe ë muoho vaebe va'arueje. ⁷ No ae gemu gemu God-are Aru'ahëro suvuore bojamuijago ehuro hesi muoho röjahirovarueje ekaresiae ae aho'obëhe marëjavuoröhego. ⁸ Ae gö God-are Aru'ahëro hesi suvuore bojamuijago uehoro mae jië'e jöho atarueje. Ae gö Aru'ahe gemuohuro aj'i'e jöho bojamuijago ae röjëhijarueje. ⁹ Ae gö Aru'ahe gemuohuro ajamuijago no biririvoromo God mae uehorovoromo ehuro mu bövi mae vaejarueje. Ae gö Aru'ahe gemuohuro ajamuijago guomo guomo'e a jabesi sinoho avohëharueje. ¹⁰ Ae göëro darugo'e muoho vae'amarueje. Ae göëro jö God-aro baeromo ae huruoho majëhijarueje. Ae göëro gavarueje di muoho God-are Aru'ahëro vaejë'e jiego di muoho bogo. Ae göëro bogo hejarue huë göëro göëro ëma atarueje. Ema atego ae göëro ëhi jië'e jöho huotovoromo nosi jöëro majëhijarueje aëro hejëro. ¹¹ Eh'i jië'e muoho aho'obëhe bogo aru'aho göho göho vae'amo'i ma-gemuëro vae'amajeje. God-are Aru'ahehu diehi nimë'oho ae gö gö hesi suvuore gö gö bojamuibe va'ajeje.

No Keriso-are sine gemuoho javue röhu no hesi öve duruaje gö gö javuo'amaje jöhoje.

¹² Röhu no ae gemu gemu sino haho'oho ma-gemu javue röhu öve höre nune hia'e bövie bise'e aho'o javue. Iae öve nune höre gö gö aho'o javuo'ame röhu sino haho'oho ma-gemu javue. Sino haho'o jiajëhi ëhi Keriso-are aribövioho no aho'o sinoho ma-gemu javue. ¹³ No ae aho'obëhe Jew rajoho sa'a ioro'ioro rajoho a jabesi darugoremu raromarue aribövioho nosi nimoro mu vaejarue aribövioho God-are Aru'ahe gemuohuro japataeto vaejavuoromo sine gemu bamavuë'ëje. Ae aho'obëhe Aru'ahe gemuoho jovonö'e bojamuamu ijë'e javue.

¹⁴ Röhu sino haho'oho hesi öve höre nune bövie bise'e bogo gemuoho jio'i aho'obëhe javuo'ame. ¹⁵ Röhu hörohuro jöë jövoromo uvo'ibejo: Na bogo övoho jevajëjo. Na bogo övoho jevë'ëro ehuni sino haho'oho hahagu jevajëjo. Iae ëhi uvo'ibejo röhu ëho hesi jio'ibejo bogo ehuro höroho sino haho'oho hahagu jio'i sino haho'e gemuoho jio'ibejo. ¹⁶ O hia'ohuro jöë jövoromo uvo'ibejo: Na bogo nunoho jevë'ëro ehuni na sino haho'oho hahagu jevajëjo. Iae ëhi uvo'ibejo röhu bogo ehuro hia'oho sino haho'oho hahagu jio'i sino haho'e gemuoho jio'ibejo. ¹⁷ Sino haho'oho ma-nuni'emu javuo'ibejo no diehi he'ibejo. O sino haho'oho ma-hia'emu javuo'ibejo no diehi ridamui'ibejo. ¹⁸ Röhu bogo ehiohoje. God-ro diehi nimadëhi öve duruaje nune gö gö baeromo havo'amoromo ehuro sino haho'e gemu bamavuadeje. ¹⁹ Öve duruaje nune gö gö bogojavuo'ibejo ehuro sino haho'e bogojavuo'ibejo. ²⁰ Röhu öve duruaje nune gö gö aho'obëhe javuo'i röhu sino haho'oho ma-gemu javue.

²¹ Eh'i jië'ëro nunuhuro jöë jövoromo övo hesi örire ua'ibejo: Ja bëhi rumo'e javo'ego na ja bogo negajë ua'ibejo ëho sisë jio'ibejo. O simanohuro jöë jövoromo höroho uë'ibejo: Jemë bëhi rumo'e jëvo'ego na jemë bogo negajë uë'ibejo ëho sisë jio'ibejo. ²² Röhu sino haho'ere inöme gö gö jio'amajoho ga'amoromo uvarueje: Jabesi darugoho u'uhë'e höjo. Eh'i uvo'ejo röhu ëho bogojio'amo'ibejo bogo eni javuo'ibejo. ²³ O sino haho'ere inöme gö gö jio'amajoho ga'amoromo uvarueje: Ma-inine jio'amajëjo. Röhu ëho bogo sisëho hö uvo'i mueberovo avoharueje. Sino haho'ere inöme gö gö jio'amajoho ga'amoromo uvarueje: Eh'o javoji'e inömoho höjo. Röhu ëho bogo sisëho hö uvo'i ma-mabëhe avoho riogivorvarueje. ²⁴ O javoji rumo'e inömo no ma-mae ga'amaruoho ëho no bogo ehioho avoho riogivorvarueje. Röhu God-ro nosi sino haho'oho havo'amoromo gemuoro

avohahuadeje ehuro noro garöhogo di inömo ho javoji'oho jiego o darugo rumo'oho jiego ehö avo'avoho muebe'amoröhogo. ²⁵ Ehu'ero jii'ero nosi sino haho'oho gemuoho javu'e'ego ehö hesi inömo göhuro göho bogo sisë vae'i a'i uvo'ejo: Gemuoho javuajëromo huë baerovoromo ma-ajamirovo'ejo. ²⁶ Sino haho'o hesi inöme gö vi'ehimë'oho sino haho'e aho'o ehö vi'ehoho herovajeje. O sino haho'o hesi inöme gö hesi iho döre jii'oho sino haho'e aho'obëhe gemuoro nimorohajeje.

²⁷ Röhu jemë ae aho'obëhe Keriso-are sino haho'e jëve. Jemë ae gemu gemu sino haho'ere höre nune bövie bise'e jëve. ²⁸ God-ro hesi ekaresiaho aho'obëhe gemuoro havoromo avoho bamavuadeje. A ioro'ioroho apostle bamavuadeje rue nuni maroho javuoröhogo. Ehesi bëhire jö God-aro baeromo a majëhijarue aribövioho bamavuadeje. Ehesi bëhire Keriso-are öri röjëhijarue aribövioho bamavuadeje. Ehesi bëhire darugo'e mu vaejarue aribövioho bamavuadeje. Ehesi bëhire darugo baeromo guomo guomo'e a jabesi sino avohëharue aribövioho bamavuadeje. O a ajëmarue aribövioho ekaresia muebejëvarue aribövioho o no bogo hejarue jö göehu göehu atarue aribövioho ëhi bamavuadeje. ²⁹ Na no ae aho'obëhe apostle javue. Bogo. Na no ae aho'obëhe jö God-aro baeromo majëhijarue aribövie javue. Bogo. Na no ae aho'obëhe Keriso-are öri röjëhijarue aribövie javue. Bogo. Na no ae aho'obëhe darugo'e muoho vaejarueje. Bogo. ³⁰ O na no ae aho'obëhe daruge baeromo guomo guomo'e aribövi jabesi sinoho avohëharueje. Bogo. Na no ae aho'obëhe God-are Aru'aho suvuoroho baeromo jö göëro göëro atarueje. Bogo. Na no ae aho'obëhe God-are Aru'aho suvuoroho baeromo huë göehu majëhijarue jöho huotovoromo sama'e majëhijarueje. Bogo. ³¹ Jemëro uvarujeje: Aru'aho suvuoro mabëhe bae'ie'ajëromo bae gavarujeje. Röhu öri maho naro röjëhi'ejo göehu gö uehorovëvo'irarije öroho.

13

Göehu gö dë vövöbajo'ere uehorovo'iröhe jöhoje.

¹ Noehu bogo hejarue huë göehu göehu naehu jövo'irodoho eni jevë'oho o anera jabesi huëhu ehu'o jövo'irodoho eni jevo'i röhu a dë vövöbajo'ehu bogo uehorovëvë'oho na bitare garaegaraevanovoromo jöho ëma jövo'ejo. ² O naehu suvuoro God-aro baeromo hesi jö ma-mae majëhijë'oho o huhu subivahuade jöho aho'o nuni aji'e jöho aho'o ga barëjë'oho o biririvo avohoromo hesi örire mae uehorovoromo ehuro dahoru ujuohoromo rori'o bahijanovobe va'i röhu a dë vövöbajo'ehu bogo uehorovëvë'oho na bëhi rumo'e ae jeve. ³ O naehu a ajëmi'irögoro nasi bövi bise'o bojëmi barëjë'oho o nasi sinohu'o bue'öjevojöro bojamirovo'i röhu a dë vövöbajo'ehu bogo uehorovëvë'e ma-sino döhrefu ëhi ajëmijë'oho ehuro bogo maroho jevo'ë'e.

⁴ Jaehu a dë vövöbajo'ehu uehorovëvë'oho ehuro biririvoromo ma-ga taemo'anue. Ae huë baejëvo'anue. A dë vövöbajo'ehu uehorovëvë'oho ehuro ae gö hesi mu mahunioho bogo dë vörönago'ë'e. Bogo nimoronimorohë'ioho jövo'anue. Bogo sivuoho uehorovoromo döroho bamorovo'anue. ⁵ Bogo ma-mahu urejonö'oho juvo'a'anue. Bogo jasi sinohemu uehorovo'anue. Bogo uehore gö gö baeromo vörönimo'anue. Bogo ae gö jabesi sisëho uehorovemu uehorovo'anue. ⁶ Mu sisë garomo bogo ehunioho nimoroho'anue. Jö maemu heromo ehuro nimoroho'anue. ⁷ A dë vövöbajo'ehu uehorovëvë'oho ehuro huë vavaene rovë'oho ma-gavë'i hinövo'anue. Mae uehorovonövo'anue. Mae jio'a'ajë uvoromo muebenövo'anue. Biririvoromo naminövo'anue.

⁸ A dë vövöbajo'ehu uehorovëvarue muoho bogo barë'i ëhi ma-jiemu jiajeje. Jöe gö gö God-aro baeromo majëhijarue suvuoroho iae barë'ë'e. Noehu bogo hejarue huë göehu göehu atarue suvuoroho iae bogojio'ë'e. A ioro'ioro iosirëmiromo God-are jö mae gavarue suvuoroho iae barë'ë'e. ⁹ Ehesi bëhoho jaruvoho God-are mu vituoho gavarueje. Vituoho bogo. Jö vituoho God-aro baeromo majëhijarueje. Vituoho bogo. ¹⁰ Hujëji aji ma-mabëhe rue'iramu evare jöe mue gö ga'i gö bogo gavarue ehö muoho iae barë'ë'e.

¹¹ Ehesi jöho uhu'e uë'i'ë'e. Na asisö'e jevade majaroho asisö'ehu ataruëhi ëhi jövonövodeje. Asisö'ehu nimiruëhi ëhi nimonövodeje. Asisö'ehu uehorovaruëhi ëhi

uehorovonövodeje. A'i ma'e jevade majare evare asisö'ö uehoroho vuonugo'i ma-mae uehorovodeje. ¹² Èhesi bëhoho jaruvoho no sisë'i sisë'i aririro gavanovarueje. Majae ijönöho avoho ga'ejo. Jaruvoho jö vituoho naro gave. Jö vituoho bogo gave. A'i evare majaroho God-hu na gevajëhi na'ö ãhi muoho ga barë'ejo. ¹³ Èhu'ëro ave muoho ma-jiemu jio'amobe va'ë'e. Göho God mae uehorovarue muohoje. Göho na uvarue: God-ro ajamui'iramu mae javuobe va'a'ajë uvarue muohoje. Göho a dë vövöbajo'ehu uehorovëvarue muohoje. Èhi jië'e muoho niö'i gemu ãhi jiemu jiobe va'ë'e röhu a uehorovëvarue muoho èho böviohoje.

14

God-are Aru'aho hesiro baejarue suvuore niö'i God-are jö ae huruoho majëhijarue suvuorohu'o bogo hejarue huë göehu atarue suvuorohu'o ë suvuoro jabesi jöhoje.

¹ Èhuni göehu gö dë vövöbajo'ehu uehorovëvo'irarije muoho vae'i èhuremu ömo gare. Röhu aru'aho suvuore gö gö bae'i nimore. Jö God-aro baeromo a huruoho majëhi'irarije suvuoroho èho böromö bëhe nimore. ² Aehu aru'aho suvuoro baeromo bogo hejarue huëhu jövë'oho èho bogo aho he'i ma-God-remu hejörö jövajeje. Huë göehu jövë'oho suvuore Aru'aho hesiroho baeromo gurihijë'e jöho jövego aho bogo hejarueje. ³ A'i jö God-aro baeromo a huruoho majëhijë'oho aëro hejörö jövajeje heromo birire baeromo muoho avoho ma'enoröhego o huë vavaeni jëvadoho mae jëvoröhego. ⁴ O bogo hejarue huëhu jövë'oho hesi dë vövöbajo'ohemu ajamirovajeje. A'i God-are jö huruoho majëhijë'oho ekaresiaho ajëmajeje. ⁵ Jemë ae aho'obëhe huë göehu atë'oho iae na nego'ibejo. A'i jemë jö God-aro baeromo huruoho majëhi'irarijoho èho iae na nego avoho'ibejo. Jö God-aro baeromo a majëhijë'oho èho mu böromëje. O huë göehu atë'oho ë muoho ma-bisemu bise'eje. Röhu huë göehu atamu ae göehu jö huotovë'oho ekaresia ae aho'obëhe he'iramu mae jëvo'ë'e. Èhi jië'oho mu böromëje.

⁶ Nasi ö mueno'e na ö'oromo subivëhë'e jö bogo huruoho majëhi'i nuni aji'e jö bogo majëhi'i bogo jö God-aro baeromo majëhi'i mu öri bogo röjëhi'i a'i bogo hejarue huë göëremu naehu jövë'oho jemë heromo bogo marëjëvo'ë'e. ⁷ O hesi ëma momorö'øjaje inömo inömohe viriköe o gita ãhi jië'e inömohe uehorovore. Aruëre anumëre ëma huë'oho o bejë'oho èhuro huëho bogo avoho hejarueje rabu jö huajoho o bejajoho. ⁸ O muorovo jöhu'o uehorovore. Hëgö sisë'i huë'oho bogo avoho heromo avoho raromo'ë'ö muorovo'iröhëni. ⁹ Èjö hesi bëhoho no bogo hejarue huë göehu jemëhu atoromo sisë'i majahuijë'oho no bogo avoho he'ejo. Jemë jöho ma-bu'ö'a'aruje. ¹⁰ Sa'ae aho'obëhe huë gö gö atoruomajeje. Röhu huë aho'obëhe bëhi'oje. ¹¹ Röhu na ave huë bogo baejë'oho jö jövaje ahuro uvo'ë'e: Nörö huë gö ae höjo. O naro uvo'ejo: Hu huë gö ae höjo. ¹² Huë göehu atë'oho jemë ãhi jëvo'ë'e. Huë göehu ato'irarijoho nadi èhemu nimo'i a'i jemë suvuore God-are Aru'aho hesiro bae'i nëgë'e jiaje èhuni ekaresia ajëmi'irarije suvuoroho baeromo ë hesi muoho avoho vae'i nimore.

¹³ Èhuni ja huë göehu jövë'oho God uavego ajami'iro èhuro jöho huruoho majëhi'irane. ¹⁴ Naehu bogo hejaje huë göehu pari vaejë'oho nasi aru'ahoho parie vae'i simanoho uehore bogojio'ë'e. ¹⁵ Èhi jië'oho na diehi ë'ejo. Nasi aru'ahohuro parie vae'ero röhu nasi simanohu'o uehorovoromo parie vae'ejo. Nasi aru'ahohuro èhuro jöho io'ejo. Röhu nasi simanohu'o uehorovoromo jöho io'ejo. ¹⁶ Jemë'ö uehorovore. Jemesi simanoho bogo uehorovë'e bogo hejarue huë göehu ma-aru'ahohuremu atoromo God mae uavë'iroho suvuoro bogo baejë'e ahuro jemesi gemuore rueromo jöho heromo bëhoho bogo he'ë'e. Bogo heromo dadivo'iramu bogo uvo'ë'e: Iae mae-ëjo. ¹⁷ Ja God mae uavene jöho nani mae jövaneje. Röhu ë ahuro bogo avoho hejë'ëro èhu'ëro dë vövöbajo'oho bogo maho jio'ë'e.

¹⁸ Röhu Paul naro suvuore God-are Aru'aho hesirire baeromo jemë iosirëmiromo majae aho'ö huë göëro göëro jövajeje. Èhuni na God mae uave. ¹⁹ Èhi jie röhu na uehorovoromo uve: Ekaresia gemuore jevë'oho jö ëgöbövie huë göehu jövë'oho ma-jianovo'i aëro God-are jöho avoho heruomöjörö jö biseharihe ma-sama'e jövë'oho èho böromöhoje.

²⁰ Nasi ö mueno'e asisö'lo ininehu mu sisë bogo uehorovaruëhi jemë'o ëhi gemuoho uehorovore. Röhu mu ioro'ioro asisö'ehu uehorovaruëhioho nadi ëhioho uehorovo'i a'i a duvahëro uehorovanovore. ²¹ God-are surire jöho ëhi uvë'ëje: Badaro uvajëjo:

Naehu ave aribövi jö majëhi'ie'iroho

huë göehu atarue aribövioho uë'iramu nasi jöho bava'oromo bojëmi'aruëjo.

Sa'a gö rajoho röjëhi'iramu nasi jöho bava'oromo majëhi'aruëjo.

Röhu bogo ëhuro ave aribövioho ejeho'aruëjo.

²² Èhuni suvuore Aru'aho hesiro baeromo huë göehu atarue muoho ëho God bogo ma uehorovarue ariböviohuremu heromo uehore baeröhego. O jö God-aro baeromo huruoho majëhijarue muoho ëho God mae uehorovarue ariböviohuremu heromo huë mae jëvoröhego.

²³ Jemë'o uehorovore. God-are ekaresiae ae aho'obëhe gemuore gagovoromo ae aho'obëhe bogo hejarue huë göehu göehu atamu ekaresia ma bogo gavë'e ariböviehu o Keriso bogo ma uehorovarue ariböviehu rovë'iroho jaburo heröhe bogo hejarue huë göehu ëhi atamu hejë'oho uehorovoromo uvo'ë'ö: Èkaresia ariböviohuro simane sisërëromomo ëhuro jöjövuvoromajëjo. Jemëhu huë göehu atë'oho ëhi jio'i ²⁴ a'i ekaresiae ae aho'obëhe jö God-aro baeromo huruoho majëhijamu Keriso bogo ma uehorovaje aehu o ekaresia mu bogo gavë'e aehu rovë'iroho huro heröhe jemëro God-are jöho majëhi'iramu hegorovo uehorovoromo uvo'ë'e: Nasi jö sisëho iae ataruëjo. Na sisë vejavëjo. Èhi uvo'ë'e. ²⁵ Èa hesi uehoro sisë gurihijadoho jaburo ato'iramu va'orahoro jio'ë'e. Va'orahoro jio'iramu sa'are ague aho hiromomo God rajahiromomo uë'ë'e: God jemë'o jiajëjo.

Gagovoromo God rajahijë'oho ma-avoho rajahi'iröhe jöhoje.

²⁶ Nasi ö mueno'e naehu jajivaje jö hesi bëhoho uehorovore. Ekaresia gagovë'iroho ae göëro uë'ë'e: È'ego no ave jöho iarëjo. Ae göëro Keriso-are öroho röjëhi'ë'e. Ae göëro gurihijë'e jöho huruoho majëhi'ë'e. Ae göëro bogo hejarue huë göëro jövo'ë'e. Ae göëro ë jö hesi bëhoho huotovoromo majëhi'ë'e. Röhu ë muoho aho'obëhe avoho vaerego ëhuro ekaresiae aho'o birire baeromomi. ²⁷ Röhu bogo hejarue huë göehu ato'ie'iroho ae niö'iro o ae niö'i gemuëro ato'i a ioro'ioroho nadi atore. Röhu bogo majae gemuoroho ae aho'o ato'i ae gemuëro gemuëro jövobe va'ore. Jövobe va'ego ae gemuëro ë jöho huotovoromo aho majëhine. ²⁸ O jö huotovoiröhe a bogojie'oho huë göehu jövaje ahuro ekaresia gemuore jörume hiromomo hesi arijo'arije majahirovë'i God-are örire jöe jövo'ë'e. ²⁹ O jö God-aro baeromo majëhi'ie'iroho ae niö'iro o niö'i gemuëro jöho majëhire. Majëhijego a ioro'ioroho jemëro jöho heromo mevo gare jöho mae o sisë jiego. ³⁰ O ae göehu jö majëhijamu röhu ae göehu sa'are hiromomo hejë'iroho God-are jöehi hesi dë vövöbajo'ere rovamu hegorovo jö jövo'ie'iroho urimo jövane ahuro vuonugonego ijore ahuro jöho jövo'iro. ³¹ Èhi'o'iramu jemë ae aho'obëhe röhu ae gemuëro gemuëro God-hu bojëmijaje jöho majëhibe va'a'aruje ëhuro ae aho'obëhe jöho he avohoromo birire baeromoröhego. ³² Nadi ma-majioho majëhi'i a'i ma-taemorovoromo majae eni jiego evaro majëhinövore. ³³ Èhesi bëhoho God bogo uövuaaje noro garatöhuritövë'e raromomi ma-avoho taemo raromojöro uövuaaje.

Röhu God-are aribövi ioro'iohehu gagovoromo vaejaruëhi jemë'o ëhi gemuoho vaere.

³⁴ Ekaresia jemëhu gemuore gagovë'iroho jemesi magonahohuro jörume raromomi. Jabumë jöho nadi majëhi'iro. God-are surire jiajëhi ëhi magonahohuro nadi masijohoriravo'i ma-jöemu ejëhobe jjiho'iro. ³⁵ Jabumë God-are jö avoho he'i nimoromë'oho jabesi osaro raromoromo baruoho uë gë'iro rabëni ekaresiae gemuore raromoromo jöe atë'oho bogo maehu jië'e jiaje.

³⁶ Röhu nani jemë sarerivoromomo uvarujeje: Corinth rajo aribövioho noro aevoromomo God-are jöho majëhibe va'are höjo. O nani uvarujeje: God-are jöho bogo sa'a göroho va'i manosiriremu rovë'e höromomo ëhuni jemë gemuore gagovë'oho jemesi sivue uehorovoromomo magonahoho jabu'o God-are jöho atoromajeje. ³⁷ A'i jemë ae rahu uvë'oho: No jö God-aro baeromo majëhijarue ae javuajë uvë'oho o no God-are Aru'ahelu uehoro ma bojamuego jö

atarue ae javuajë uvë'oho ovore: Paul bogo ma-jajivo'i a'i Badaro jöho bojamamu jajivade höjo. ³⁸ Ae rahu nosi jö bogo uehorovë'oho nadi jabesi öriroho uehorovore.

³⁹ Nasi ö mueno'e ëhu'e jiaje jöe God-aro baeromo huruoho majëhi'i nimo avohore. O suvuoro God-are Aru'aho hesiro baeromo bogo hejarue huë göehu ataruoho ëhi jië'e muoho nadi ahore. ⁴⁰ Röhu ekaresiae gemuore gagovoromo vaejaruje muoho aho'obëhe ma-avoho vaere.

15

Kerisohu guomoromo ri'öjade jöhoje.

¹ Nasi ö mueno'e Keriso-are jö maho na majëhi'ejo jemë röhu maho uehorovo'irarijego. Ëjöho naro mami'e majëhijamu jemëro heromo ejë'ëro ëhuro mae biririvoromo riravarujeje. ² Na majëhamu hejarije ë jöho biririvoromo ma'enë'ohuro ëhuro maro raromarujeje. O ma-döhuremu uehorovë'oho bogo ëhioho maho jëvajeje.

³ Jö börömo böröme hejë'ëro jemesi örire majëhijodoho röhu maho majëhi'ie'e. Kerisohu guomo'iröhe jöho God-are surire jajivarëhi ëhi huro nosi sisëni guomade höjo. ⁴ Guomoromo guavamu raromoromo majae niö'i gemu hesi uhure God-ro i'ovamu ri'öjade höjo. Ëhi jië'e mu vaeröhe jöho God-are surire jajivo'amare höjo. ⁵ Röhu Kerisoro ri'önugoromo Peter-are nunire rueromo evare apostle aho'obëhe jabesi nunire rovadeje. ⁶ Ijonö hesi ijorajo ömo'ömoho 500 iosirëmiromo ruëhi jië'e majae gemuore jabesi nunire rovadeje. Jaruvoho ë aribövioho ma-gemu gemu vuovëvo'i röhu aho'obëhe biririvoromo raromoruome. ⁷ Ëhi jië'ëro James-are nunire ruenugoromo apostle ae aho'obëhe jabesi nunire rovadeje.

⁸ Rueromo ijo tugoho'i nasi örire rovamu na'o nasi nunëro gavodeje. Apostle ioro'iorehu Keriso aevoromo uehorovarëhioho na bogo ëhioho aevoromo hu mae uehorovo'i a'i mu sisë bëhe vaeromo ma-majioho mae uehorovodeje. Ëhu'ëro jië'ëro vëmehu sisë'i rahego harihehu ma-majioho rovajëhi na ëhi jevanove. Na urimo ramoramo'ere hiromo mamajioho Keriso-are ajire rovodeje. ⁹ Apostle a ioro'iorohuro na iosiremiromo a masije jio'i na ma-bise'e jeve. Urimë'i naro God-are ekaresiae huë sisë bojëmi'i hijë'ëro ëhu'ëro apostle iho baejodoho na bogo maho jeve. ¹⁰ Ëhi jie röhu God-ro hesi nimoromo huë baeromo ajemijë'ëro ëhuro na mae jeve. Huro ajemijë'ëro na bogo ëma hi'i a'i naro apostle ioro'ioroho iosirëmiromo muoho darugo'o vaejë'e jeve. Röhu bogo nasi biriroho baeromo ëhuro muoho vae'i hesi God-ro nimoromo huë baeromo ajemijë'ëro vaejodeje. ¹¹ Ëhu'ëro jië'ëro Keriso-are jö naehu majëhijë'oho o apostle ioro'iorehu majëhijë'oho Kerisohu guomoromo ri'öjade jöe gemuoho no majëhijarueje. Röhu ë jöho jemë iae mae uehorovarijeje.

Noehu vuovoromo ri'ö'iröhe jöhoje.

¹² Kerisohu guomoromo ri'öjade jöho noro majëhibe jijiharueje. Ëjö majëhibe jijihë'oho jemë a ioro'ioroho diehi'oromo atoromo uvarujeje: Aho vuovoromo röhu bogo maho ri'ö'ejarëjo. Nadi ëhioho atore. ¹³ Aho vuovoromo bogo ri'ö hesi javuo'ibejo Keriso hu'o bogo ri'ö'ibejo. ¹⁴ Keriso bogo ri'ö'ibejo no ma-imo jöho majëhijego jemëro ma-imo mae uehorovo'ibearije. ¹⁵ Röhu aviëhi jië'e mu sisë gö'o döre jio'ibejo. No bogo ri'ö hesi javuo'ibejo God-hu Keriso ajamamu ri'öjade jö noehu majëhijaruoho sareri'e jöe jio'ibejo ëhuro nomë God-are jöho a nuniro sareri'e majëhi'ibejo. ¹⁶ Vuovë'e aribövioho bogo ri'ö hesi javuo'ibejo ëhuro Keriso hu'o bogo ri'ö'ibejo. ¹⁷ Röhu Keriso bogo ri'ö'ibejo jemëro Keriso-are örire ma-imo uehorovo'ibearije God jemesi sisëho bogo uehorovoromo vuonugo'ibejo ëhuro sisë jëvadoho avevejö'ohu'o ëhi gemuoho jëvo'ibejo. ¹⁸ O Keriso mae uehorovoromo vuovë'e aribövioho sisëro va'oruomo'ibejo. ¹⁹ No vuovoromo sisëro va'o hesi javuo'ibejo no uvo'ibejo: Kerisoro ajamui'iramu ave sa'arohemu maroho raromo'ejarëjo. Ijonöho bogo maroho javuo'ajë uvo'ibejo ëhuro a ioro'ioro jabesi vavaenoho bise'e jio'i Keriso-are aribövi nosiroho börömo mae jio'ibejo.

²⁰ Rõhu bogo ëhioho jio'i a'i Keriso guomoromo iae ri'õjè'eje. Ri'õjè'ëro ma-ioro'ioeremu hijajeje. Èhu'ëro no garomo uvarueje: Vuovavuaje aribõvi ioro'ioroho no'o ri'õ'ëjarëjo. ²¹ Ave sa'are hijade ae gemuëro aevoromo mu sisë vaeromo guomë'ëro ëhuro vuovavuobe rovajeje. Rõhu ave sa'are hijade a göho aevoromo ri'õjè'ëro ëhu'ëro vuovoromo ri'õ'ëjo. ²² Èhesi bëhoho ae aho'obëhe Adam-are ae gemuohuro javuë'ëro ëhu'ëro vuovavuajeje. Rõhu ae aho'obëhe Keriso-are ae gemuohuro javuë'ëro ri'õromo raromo'ëjo. ²³ Ae gö gö aho'obëhe jabesi majaho rovego ri'õjarueje. Urimë'i Kerisoro ri'õjadeje. Ijonõ Keriso rue'iramu evare hesi aribõvioho no'o ri'õ'ëjo. ²⁴ Ri'õ'iramu evare jaruvore majaho iae barë'ë'e. Jaruvore majaho barë'iramu evare Kerisoro vör'ë sisë aribõvie gö gö ruahõ'õjëvo barëromo öri ari'e aho'obëhe God Vavu hesi övore bojami'ë'e huro mueberõhego. ²⁵ O avevejõ'oho God-ro nimo'ego Kerisoro bõrõme namiromo öri ari'e aho'o muebejuvo hujeji ijonõ God-ro a sisëho mu sisëho ruahõ'õ'amo barë'ë'e Kerisoro hõrëro vijuvo taemego barë'irõhego. ²⁶ Huro mu sisë ioro'ioroho urimo ruahõ'õ barënuogoromo a vuovavuaje öroho ijo tugoho'i ruahõ'õ'iramu barë'ë'e. ²⁷ Èhesi jõho God-are surire jajivoromo uv'ejeje: God-ro ae mue bövie bise'e aho'obëhe bahijahamu huro hõrëro taemë'e höjo. Kerisohu ë'aje jõho ëhi jajivë'eje. Èhuni no uvarueje: Vuovavuaje örohu'o huro hõrëro taemo'iramu iae barë'ajëjo. Rõhu aho'obëhe Keriso-are aharinõ jiaje hesi bëhoho God bogo a'i a ioro'ioroho aharinõ jioruomajeje. Èho samaeje. Rabëni God-ro bövie bise'e Keriso-are aharinõ bahijadeje huro mueberõhego. Èhuni God bogo Keriso-are aharinõho jio'ë'e. ²⁸ Rõhu bövie bise'e Keriso-are aharinõ bahi barë'iramu evare God-are Harihohuro God bõrõmo mae jiaje hesi aharire va'o hi'ë'e God-ro aho'obëhe Keriso-are aharinõ bahijahë'ëro jië'ëro. Èhu'ëro jië'ëro God-ro gemuëro bõrõme namiromo bövie bise'e aho'o muebejavuo barë'ë'e.

²⁹ Rõhu jemë'o uehorovore. A ioro'ioroho bapataeto vaejëvarueje mami'e vuovë'e aribõvioho ajëmi'irõhego. Rõhu vuovavuë'e aribõvioho bogo ri'õ hesi javuo'ibejo bëhoho rabëni vuovë'e aribõvi jabesi jõëni bapataeto vaejëvarueje. ³⁰ Rõhu no diehi javuaje jõhu'o uehorovore. Noro Keriso-are jõho majëhijego aëro bijõnimoruomoromo huë sisë bojamuego ëhuro majae ëhi vör'ëre raromarueje. Vuovoromo bogo ri'õ hesi javuo'ibejo vör'ëre raromaruoho bëhi rumo'e jio'ibejo. ³¹ Nasi ö mueno'e Paul na majae ëhi vör'ëre jevë'ëro guomevo'ië'ajaje. Na mae uëve. Jemë'o na'o nosi Bada Iesu Keriso-are ae gemuohuro javuë'ëro naro jemesi jõho uehorovoromo nimorohajeje. Èjõho iae maeje. Rõhu guomevo'ië'ajaje hõ uëvaje jõho ëhu'o iae jö maeje. ³² Na Ephesus hiromo ave sa'a hesi suvuorohemu uehorovo'ibejo na Keriso-are jõënioho vör'ë miroho bogo va'oromo jabu'oho muorovanovoromo vavaenoho bae'ibejo. A'i vuovë'e aribõvioho bogo ri'õ hesi javuo'ibejo aehu atarue jõho ejëhoromo uvo'ibejo: Ioho jovoho ma-ue'ahë'e raromo'ëjarëjo ruëroho no ma-vuovo va'ië'ëro.

³³ Ae gö jabesi sareri sareri'e jö uehorovarujoho vuonugore. Vuonugoromo ave a mami jõgoroho uehorovore. Sisë aribõviohu'o gemuore buarohë'oho ëhuro nosi mu maho ijumahuaje höjo. ³⁴ Mu sisëho vuonugo'i avo'avoho uehorovore. Jemë ae gö gö God bogo mae bogo gavarujeje. Jemë javoje baejõro ëhuni uëve.

Noehu vuovoromo ri'õjego nosi sino haho'oho nu ano'e gö javuorõhe jõhoje.

³⁵ Ae göëro ue'a'anue: Rõhu vuovë'e aribõvioho diehi'avuo'iramu ri'õ'ëjarëjo. O diehi jië'e sino haho'e jioromo rue'ëjarëjo. ³⁶ Ja simane garaejë'ëro ëhi jië'e jõho majehi'anue. Ja ujo öjè'iroho bogo ëma ri'õ'ë'e. Su'oho sagohori'iramu rõhu i'e rëdijiomoromo ri'õ'ë'e. ³⁷ O ja iruno'e ö'ië'iroho ahohu'o hanohu'o u'emu jiorõhoho bogo ö'i a'i ma-ujohemu ö'a'anue. Nani wheat uje o rabe ö'a'anue. ³⁸ Ö'iramu i'e rëdijiomomoromo God-hu nimadëhi ëhi nu ano'e gö gö jiobe va'ë'e.

³⁹ Rõhu göho amore je'ore jovore raromarue aho majoho bövioho bise'oho nosi sino haho'oho bogo gemuoho javuo'i nu ano'e gö gö javue. A nosi nu ano'oho gö javuo'i sa'are majo hesi nu ano'oho gö jio'i ugo hesi nu ano'oho gö jio'i jovo majo hesi nu ano'oho göje.

⁴⁰ Rõhu õ'idõ inõmoho sa'a inõmoho iae jiorove. Rõhu õ'idõ inõmoho nu ano'e mabêheje rõhu gö jio'amo'i sa'a inõmoho nu ano'e mabêheje rõhu gö jio'ame. ⁴¹ Maja hesi nu ano'oho mabêhe rõhu göje. Manaero hesi nu ano'oho mabêhe rõhu göje. Jiji mujõru'o jabesi nu ano'oho mabêhe rõhu gö jio'ame. Jiji mujõru'o jabesi nu ano'oho mabêhe rõhu gö jiorove.

⁴² Ëjö uhu'e majêhjode hesi bêhoho êhije. Sa'are inõme õ'idõre inõme bõvie bise'e gö gö jio'amajêhi êhi sa'are guavarue sinohu'o ri'õ'irõhe sinohu'o gö gö jio'amajeje. Sa'are guavarue sinoho sagohori'irõhe sine jio'i ri'õ'irõhe sinoho bogo sagohori'irõhe sinohoje.

⁴³ Sa'are guavarue sinoho nu ano'e bogo maehu jio'i ri'õ'irõhe sinoho nu ano'o ma-mabêhe ri'õ'ê'e. Sa'are guavarue sinoho darugo rumo'e jio'i ri'õ'irõhe sinoho darugo ma'e ri'õ'ê'e.

⁴⁴ Sa'are guavarue sinoho sa'are raromoromo mu vaejarue sinoho jio'i ri'õ'irõhe sinoho God-arire raromoromo aru'oho mu vaerõhe sinoho javuo'ê'e. Sa'are mu vaejarue sino haho'e javu'ëro êhu'ëro uvarueje: Aru'aho muemu vaerõhe sino haho'e iae jiaje hõjo.

⁴⁵ Êhesi jõho God-are surire jajiv'êje. Nosi urimore aevo'i jiade bêhoho Adam-are jõhoje. Jajivoromo uv'êje: Êahuro aevoromo darugoho baeromo ave sa'are hijade hõjo. Êhi jajiv'êje. Rõhu nosi ijore aevo'i jiade bêhoho Keriso-are jõho uvarueje: Hu ijore rovade Adam jianovajêjo. Êahuro aevoromo aru'aho'e muoho vaeromo nosi aru'ahoho darugoho bojamuadeje.

⁴⁶ Aru'aho hesi darugoho bogo urimoho baeromo raromo jijihõ'i a'i ave sa'a hesi darugoho urimo baeromo raromo jijiharueje. Evare ijõnõ aru'aho hesi darugoho baeromo raromo jijiharueje. ⁴⁷ Rõhu urimore jiade aho sa'aëro avoh'ëro sa'a sine jiadeje. Ijore jiade aho õ'idõre ji'ëro ruvebijadeje.

⁴⁸ Sa'a sino a jiadêhi no'o sa'a sino javuobe rovajeje. Õ'idõre jioromo rovade a jiajêhi u'emu õ'idõ aribõvioho no'o êhi javuobe va'ê'e. ⁴⁹ Rõhu sa'a sino a hesi nu ano'o baebe rovaruêhi u'emu õ'idõ a hesi nu ano'oho êhi baeruomo'êjo.

⁵⁰ Nasi õ mueno'e naehu jajivaje jõ hesi bêhoho ave sa'a hesi sinoho no bogo êhu'o baeromo va'o God-are õri ari'eroho raromo'êjo. O sagohori'irõhe sinoho bogo ioro'iore-muoho javuo'ê'e.

⁵¹ Gurihij'ê'e jõho na huruoho majêhi'i'ê'e here. A ioro'ioroho bogo vuovavuo'ê'e. Rõhu ae aho'obêhe nosi sinoho gorosovoromo ajoho bae'êjo. ⁵² Ijo tugohõ'i majare hêgõe huõ'iramu baderivanovo'iramu evare ga'êjo sinoho mami'e gorosovavu'ê'e jio'iramu. Hêgõe huõ'iramu vuov'ê'e aribõvioho ri'õruomo'ê'e ijõnõho bogo vuovo'i ma-ioro'ioeremu raromorõhëro. Ri'õruomo'irõhoho no aho'obêhe gorosovavuo'ê'e.

⁵³ Êhesi bêhoho God-ro nim'ëro ave sagohori'irõhe sinoho gorosovoromo êhuro bogo sagohori'i ma-jiemu jiohe va'orõhe sinoho javuo'ê'e. Vuovo'irõhe sinoho gorosovoromo êhuro bogo vuovo'i ma-jiemu jiohe va'orõhe sinoho javuo'ê'e. ⁵⁴ No êhi gorosovo'iramu evare ave God-are surire jõ jajivarêhi êhi jio'ê'e. Jajivoromo uv'êje: Vuovavuae õroho God-ro ruahõ'õromo mu'u barêj'ê'e hõjo.

⁵⁵ Vuovavuae õri hesi darugoho dinõ'e hõjo.

Guomavuae õri hesi võrõho diae hõjo.

⁵⁶ Vuovavuae võrõ hesi bêhoho no mu sisë vaejõ vuovavuaeje. O mu sisêhu ruahõ'õjavuae hesi bêhoho God-are jõho aharueje. ⁵⁷ Iae êhi jie rõhu God-are õrيره mabêhe ua'êjo. Huro nosi Bada Iesu Keriso uav'ëro huro vuovavuae õrohu'o mu sisë ioro'iorohu'o ruahõ'õ'amajeje êhuro no mae javuorõhego.

⁵⁸ Nasi õ mueno'e vuovavuae õroho bar'ê'i'ê'e jiaje êhuni nami bibivoromo God-are muohuremu avoho vaenõvore. Êhesi bêhoho jemë garomo uvarueje: I'u'e mu Badare ihore vaejaruoho êho no bogo ma-imo'i vaejarue hõjo.

16

Jerusalem ekaresia qjêmi'i Corinth rajo aribõviehu ijo bajo gagovo'irõhe jõhoje.

¹ Rõhu God-are aribõvi Judea sa'are bogo eni jëvajahuni jemêhu ijo bajo gagovo'irarije jõho na majêhi'i'ê'e. Naehu Galatia sa'are God-are ekaresia mu bojêmibe juvodêhi jemëro êhi ji'ê'e muoho vaere. ² Hura bõrõmo ji'ë'iroho jemë ae gemuëro gemuëro ga'irarije ijo baje

bövie baejê'e jêvego bövie tario bamore. O bise'e baejê'e jêvego bisemu tario bamore. Ëhi jîê'oho na ô'iramu jemê ijo bajoho bogo naho'i ma-burêro baeromo bojemi'aruje. ³Rôhu ô'ê'iroho naro suri surire jajivoromo Jerusalem ekaresia a masijoho uê'ejo: Ave aribövi jabesi muoho êhi hôjo. Ëhi jajivonugoromo ë suri suriohu'o jemesi suvuorohu'o jemêhu baejêvarije aribövi jabesi ôrîre i'imêmiromo rêmô'ô'ejo ujuohoromo Jerusalem amore va'orôhego. ⁴O na'lo Jerusalem va'irodoho mae hõ uvê'oho jabumê na'lo gemu mae ô'ê'ô.

Paul-mêhu diehi ê'i uehorovare jôhoje.

⁵ Rôhu Macedonia sa'are va'lo juvoromo evare ô'ejo Macedonia sa'are juvo'iê'ëro jenvê'ëro. ⁶ Ô'oromo nani majae bisemu êgo'lo jemê'lo hi'ê'jo. Hesi nani'lo nani buru majaho hi va'oromo barê'iramu na din'ö'e va'irodire va'iramu jemêro ajemi'iramu mabêhe va'ê'jo. ⁷ Avevej'ö'e ô'oromo ma-burêro gêromo va'ê'oho na bijônêge. A'i na nege Badahu nimê'ohuro êhuro na majae êgobövîe jemê'lo gemu mae hi'irodêro.

⁸ Rôhu avevej'ô'oho ave Ephesus amoremu hibe va'ê'jo Pentecost majaho ruerôhego. ⁹ Êhesi bêhoho nasi ôroho jiovehê'êje naro aviae hiromo i'lo mu'e vae'irodego. Rôhu ae aho'obêhe nasi muoho aho'iê'ô. Êhuni hiromo muebe'ê'jo.

¹⁰ Rôhu jö göho Timothy ô'ê'iroho avoho muebereggo hu bogo juhuonivo'i jemê'lo gemuoro mae hi'iro. Êhesi bêhoho naehu Badare mu vaejajêhi hu'lo êhi jîê'e muoho vaejajêgo êhuni uêve. ¹¹ Nadi uvore: Hu ma-asis'ö'e hôromo nue huodivo'i a'i ajamiromo nugô'ôreggo nasi ôrîre mae vuonorô'ô rue'iro. Rabêni na hiromo muebeje Christian ô ômo'ômo rue'irôhire hu'lo ë ruerôhego.

¹² Rôhu nosi öe Apollos-are jôho gare. Na Apollos dinamiromo uavodeje: Christian ô ômo'ômo ioro'iorehu Corinth amore va'ê'iroho ja'lo va'onêjo. Ëhi uavodeje rôhu avevej'ö'e jemesirîre ô'irôhoho hu bogo mae bogo nimadeje. Rôhu garôhe majaho eni jio'iramu gagorovo evare ô'ê'e.

Paul-are ijo tugoh'ô'i jôhoje.

¹³ Rôhu nadi momorô'ô'i ôre uherihê'i raromoromo biririvoromo Keriso mae uehorovore. Nadi juhuonivo'i a duvahon'ö'e daruge baeromo riravore. ¹⁴ Mu bövi bise'lo vaejê'iroho ae dë vövöbajo'ëro uehorovëvoromo muoho vaere.

¹⁵ Nasi ö mueno'e na negaje jö göhu'lo uê'iê'e. Stephanus'lo hesi aganohu'lo jabesi jôho jemê iae gavaruje. Greece sa'a rajoho jabumêro aevo'ioho Keriso-are jôho mae uehorovareje. Mae uehorovê'ëro jaburo God-are aribövi jabesi ôrîre dë vövöbajo'e aho'lo uehorovëvoromo ajêmijarueje. ¹⁶ Êhuni êhi jîê'e aribövi jabesi jôho ejêhoromo ae rahu nue gemuoho ajêmiromo biririvoromo vaejê'oho jabesi jôhu'lo ejêhore.

¹⁷ Jemê rueromo na'lo jio'irarîjoho bogo eni jêvamu Stephanus Fortunatus Achaicus êho jabuhu jemê'lo rôromo rovarohuro êhuro na nimoroheve. ¹⁸ Êaribövîohuro jemesi dë vövöbajo'oho sasohêhoromo nasirohu'lo sasohêhê'ejö. Êhuni êhi jîê'e aribövi jabesi ôroro mae uehorovëvore.

¹⁹ Rôhu God-are ekaresiae aho'obêhe Asia sa'are raromaruoho jaburo jemesi ôrîre jejêmiijö. O Aquila'lo Priscilla'lo Badare ihore dë vövöbajo'e aho'lo jejêmiijö. Jabesi osare gagovarue ekaresiaho jabu'lo êhi gemuoho ê'ô. ²⁰ Christian ô mueno'e aho'obêhe jemesi ôrîre jejêmiijö. God-are aribövîehu jejamirovaruêhi êhi rajahirovoromo jejamirovore.

²¹ Ave jôho naro nasi övêro jajivo'iê'e. Paul naro jemesi ôrîre jejêmiije.

²² Ae rahumê Bada bogo ma uehorovê'oho sisêro va'ê'ô. Bada jero ma-burêro ruene.

²³ Bada Iesuro huê baeromo jemê ajêminövo'lê'e.

²⁴ Jemê'lo na'lo Iesu Keriso-are agane gemuohuro javuê'ëro naro nasi dë vövöbajo'e aho'lo jemesi ôrîre bojêmiije. Ahia mino'e.

2 CORINTHIANS

Paul-hu Corinth ekaresia jejëmijade jöhoje.

¹ O asë'e God-are ekaresiae Corinth amore raromarujoho God-ro nimamu Iesu Keriso-are apostle jevë'ëro Paul na'o nosi ðe Timothy'o noro niö'iro jemë jejëmiromo God-are aribövi Greece sa'la ioro'iorore raromarujoho jemë'o jejëmijö.

² No nague God nosi Vavuohu'o Bada Iesu Keriso'o huë baeromo ajëmijego maro raromo'irarijego.

Paul-hu huë vavaeni baeromo barëj'ëro God rajahijade jöhoje.

³ Asë'e God hu mabëheje. Hu nosi Bada Iesu Keriso-are Börömeje o göho hesi Vavueje. Ëaho God Vavuoho hu mabëheje. Ëhesi bëhoho hu noni vavaenimo avohaje Vavuohoje. Hu sanuamuiromo ajamui avohaje A Börömohoje. ⁴ Huro gövuaje no huë vavaeni bövi bise'o baej'e aribövioho no'o sanuëmijë'oho eni javuoröhego. Sanuëmego jabu'o birire baeröhego. Huhu no sanuamuijadëhi no'o ëhi ë'oromo a ioro'ioroho sanuëmego mae jëvoröhego. ⁵ Kerisohu baejade ëhi jië'e huë vavaeni jovehu ruomanovoromo nosi örire rovajëhi ëhi Kerisohu nosi örire bojumuaje biriroho jovëro ruomanovajeje. ⁶ Noehu huë vavaeni baejarue ë hesi bëhoho jemesi jöëni baejarueje ëhuro jemë biririvëvego maro va'irarijego. O God-hu sanuamuego biriri baejarue ë hesi bëhoho gemuohoje. Jemesi jöëni baejarueje noehu baejarue ëhi jië'e huë vavaeni baej'ëiroho ëhuro biririvëvego baberumi riravo'irarijego. ⁷ Röhu noro uvarueje: Noehu huë vavaeni baejarue gemuoho jemë'o baejarujëhi ëhi noehu biriri baejarue gemuoho jemë'o baejaruje hö uvoromo ëhuni uvarueje: Iae mae-ëjo. Jemë iae biririvo'arujëjo.

⁸ Röhu nasi ö mueno'e noehu Asia sa'are raromoromo huë vavaeni baejare jöho no nague jemëro avoho ga'irarijego. Huë gage marijamuiromo ijo'aho rumorëjavuoromo uehoroho barëjavuamu uvareje: Noehu vuovavuo hesi höjo. ⁹ Nosi herovoromo uvareje: Vuovavuo'iröhe jöho court-re majahuijamu hejanovë'e javuajëjo. Ëhi herovareje. Röhu ëhi herovare hesi bëhoho God-ro nimadeje noro uehorovoromo uvoröhego: Nosi sivuoho bogo eni javuo'i God-ro vuovë'e aribövioho ajëmego ri'ö'amajëro jië'ëro ëhu'ëro hesi huro ajamui'ajëjo. ¹⁰ Sisë döro vuovavuo'i höjadoho God-ro ujuohavuoromo maro ramuadeje. God-hu mare ramuadoho u'emu sisëro javuë'o ho maro ramuo'ë'e. No hesi örire mae uehorovoromo uvareje: U'emu sisëro javuo'iramu röhu maho maro ramuo'ajëjo. ¹¹ Jemëro ajamuiromo nosi jöëni God ua'iramu huro iae ëhi ajamui'ë'e. Ae aho'obëhe ëninami'iramu nosi örire huë baejavuoromo ajamui'ë'e. Ëhuni ae aho'obëhe nosi jöëni hesi örire mabëhe uaruomo'ë'e.

Paul-hu Corinth amore va'i uëromo röhu bogo va'ade ë hesi jö bëhi Paul-hu majëhijadohoje.

¹² Ave jöho no uehorovoromo nimoroharueje. Herovoromo uvarueje: Iae mae-ëjo. God-ro ajamuego no bogo ma-döëremuoho muoho vae'i nosi dë vövöbajo'lo uhohu'o ma-va'orahoro a jabesi örire röhu jemesi örirohu'o vaejëvarue höjo. Bogo aehu ëma uvaruoho: Simano ma'e uehore hö uvaruoho bae'i a'i God-hu huë baejavuoromo bojumuaje darugoho ëho no baeromo muoho vaejarue höjo. ¹³ Ëhesi bëhoho jemëhu sama'e adahoromo mae hejaruje jöhemu no jajivarueje. ¹⁴ Jemëro nosi bëhoho ma-bisemu hejaruje röhu na nege jemë he avohoromo uvo'irarijego: Bada lesuare majaho rue'iramu Paul-mëhu nosi jöëni nimorohë'i uehorovo'iröhëhi noehu Paul-mesi jöëni ëhi nimorohë'i uehorovë'o ho iae mae jio'a'ajëjo.

¹⁵ Iae na mae uehorovoromo uvodeje: No ëhi mae garorovarue hö uvodohuni ëhuni uvodeje: Naro jemesi örire urimo ö'ejöjo ëhuro vae niö'i ö'ego huë mae bae'irarijego.

¹⁶ Urimo ö'oromo jemesirire hiromo Macedonia sa'are va'ejöjo. Macedonia va'oromo vuono bu'öromo jemesi örire röhu maho ö'ejöjo. Ö'iramu jemëro bövie bise'e ajemiromo

remö'ö'iramu na mae va'oromo Judea sa'are hi'ejöjo. ¹⁷ Na ähi ä'iro uehorovodeje röhu bogo ö'odeje. Ähuni nani jemë äma uvaruje: Nörö sareri'e äero jüë'ero bogo rovade höjo. Nani ähi uvaruje röhu na bogo ähi jüë'e aho jeve. O naehu ähi ähi ä'irode muoho uehorovë'oho bogo nasi sinohemu uehorovoromo jöho huotuhuotovoromo uëvajeje: Io'ajo. Iae na ä'ejö uëvë'i uëvajeje: Bogajo. Na bogo ä'ejöjo. Na bogo ähioho jöho huotuhuotovoromo jövajeje. ¹⁸ God-hu bogo uehore gö gö bae'i ma-gemu uehorovajëhi no'o jemë jö majëhijaruoho bogo uëvarujeje: Io'a uëvë'i boga uëvarujeje. ¹⁹ Ähesi bëhoho God-are Harihe Iesu Keriso-are jöho noro baeromo jemë majëhijareje naro Silas-ro Timothy-ro. Noehu jö majëhijare aho Keriso hu bogo uvë'eje: Io'a uvë'i uvë'eje: Bogajo. Keriso bogo ähioho uvë'eje. A'i Kerisohu diehi ajamuiröhego God-hu uavadëhi huro io'a gemu uvoromo ähi ähi ajamuibe rovë'eje. ²⁰ Keriso bogo rovade majare God-ro mae uvobe rovadeje: Naro nasi aribövioho ähi ähi mae vaejëvo'ejöjo. Mae vaejëvo'ejö uvë'ego Kerisoro uvadeje: Io'a uvoromo God-hu uvade mu maho vae barëjë'eje. Ähuni Keriso-are ihoro noro God-are örire uavarujeje: Jaehu mu vaejahuo'i mae uvanëhi Kerisohu ähi vaejahuadoho iae mae-ëjo. Iae mae-ë uavaruohuro ehuro God-are ihoho böörmeje. ²¹ Röhu no jemë'o gemu mae baejavuoromo Keriso'o gemuore ioro'ioyemu bimuvavuoromo hesi mure bamavuade aho iae God-je. ²² Huro no hesinö ioro'ioyemu baejavuoromo hesi Aru'ahoho nosi dë vövöbajo'ere bojamuijë'eje noro uvoröhego: Hu aevoromo hesi Aru'ahoho suvuore bojamuijë'ero ehul'ero hesi suvuoro vituohu'o ijönö iae bojamui'ajëjo. God-ro ähi ioro'ioyemu ajamuijë'eje. Ähi jüë'ero na'o bogo jöho huotuhuotovoromo jövajeje. Amo bogo ehunioho ö'i uëvodoho vuonugo'i hijodeje.

²³ A'i ave jöho God-ro ge'ego na mae jöve. Naehu Corinth amore ö'ie'oromo vuonugode hesi bëhoho naro ö'oromo i'ue bojëmego baejöëni ehuni bogo ö'odeje. ²⁴ Iae na i'u bojëmi'irode jöho uëve röhu nosi mu hesi bëhoho bogo masijoho riravoromo jemesi öriroho darugo'e jöhuremu bojëmiromu uë'iröhëro: Ähi ähi God mae uehorovohëjo. A'i no jemë'o havoromo ajëmiarue ae javue jemë dë sasohëvonövoröhego ä hesi bëhoho jemë iae eni birivoromo God mae uehorovarujego.

2

¹ Amo ö'ie'oromo vuonugo'i hijode hesi bëhoho naro nasi uvodeje: Na bogo röhu maho ö'oromo i'uhoho huë vavaenoho bojëmi'ejöjo. ² Na jemesi örire i'u huë vavaeni bojëmi'ejö'oho rahumëro na huë maho bojëmi'ë'ö. Jemëremu huë maho bojëmi'ibejarijoho röhu huë vavaene jëvo'ibejo aho bogo huë maho bojëmi'ibejarije. ³ Na bogo vejö'oho ö'irögöro a'i urimo jemëhu avo'avoho uehorovo'irarije jögoru jajivoromo nugö'öjode hesi bëhoho na bijönegadeje ö'oromo jemesi mu sisë garomo huë vavaeni bae'irodoho. Jemesi jöëni huë maemu baejë'oho iae maeje. Ähuni huë vavaeni jemesi jöëni baejë'oho na bijönegamu suri surioho jajivodeje. Ähesi bëhoho naro jemë ae aho'obëhe mae uehorovëvoromo uvodeje: Jemë'o na'o mu mae gemuoho nimo avohoromo ehuro huë mae baejarue höjo. ⁴ Röhu na jajivodevare huë vavaene böörme baejë'i nurunurumë'i sisë maro nivë'i jemesi örire jajivodeje bogo ehuro jemë huë vavaenoho bae'i a'i ga'irarijego naro jemesi örire uehorovëvo avohaje jevego. Iae ehuni jajivodeje.

Mu sisë vaejade a hesi sisë Corinth ariböviehu uehorovoromo vuonugo'iröhego Paul-hu uëvade jöhoje.

⁵ Röhu huë vavaene nasi örire barovade aho hu bogo nasi öriroho ä'i a'i ekaresiae ae aho'o jemesi örire ma-bisemu huë vavaene barovanovadeje. I'u jö uë'irodoho na bijönegë. ⁶ Jemë ae aho'o ä a i'u bojamarijoho iae eni jüë'eje. ⁷ I'uhoho mino'e bojami'i hesi sisë uehorovoromo vuonugoromo ma-ajamiromu biririvo'iröhe jö ma-sanu'oho majahire. Jemë bogo ähi ä'ë'oho nani hu huë vavaene böörme bae'iramu jovëro ruomoromo taemanovo'ë'e. ⁸ Ähuni na nege jemëhu hu huë baejarujoho röjahi avohëgo hu garöhego. ⁹ Rabëni na urimo jöho ave hesi bëhohuni jajivodeje gë'irodëro jemë nasi jöho aho'o ejuhë'e jëvego o bogo. ¹⁰ Ae rahuare sisë jemëhu uehorovoromo vuonugë'oho na'o gemuoho

ë'ajeje. Mu sisë rabe na uehorovoromo vuonugodoho mu sisë uehorovoromo vuonugo'irode jië'o'ho Keriso-are nuniro namiromo jemesi jöëni na uehorovoromo vuonugë'e jeve ¹¹ Satan-ro sareramuiromo baejavuujöëni iae no hesi sareri sareri'e muoho mami'e gavaruëro jië'ëro.

Paul-hu Troas amore hiromo nurunurumade jöhoje.

¹² Röhu naro Troas amore va'odeje Keriso-are jö maho majëhi'irodëni. Va'oromo gavodeje Badaro nasi mu öroho mabëhe jiovehë'e jiamu. ¹³ Ëhi jiamu ga'irögoro röhu gavode nasi öho Titus jemesirire ö'adoho bogo rovë'e jiamu gagorovo uehore böröme baejodeje. Uehore böröme baeromo amo rajoho jejëmiromo rëmo va'odeje Macedonia sa'are va'ië'ëro.

No Keriso-are gemuore javuë'ëro mu sisë huë vavaene ruahö'öjarue jöhoje.

¹⁴ Röhu no God mabëhe ua'ejo. Rabëni Kerisoro mu sisë'o no'o ruahö'öjavuë'ëro jië'ëro ëhu'ëro God-ro uvajeje no Keriso'o gemu mae javuajë uvoromo söjavuo ujuoho va'ego nimorohë'i jijiharueje. Ëhi'oromo huro Keriso-are jöho no bojamuijë'ëro noro ae majëhibe va'ego ridi mabëhëro rumorovanovobe va'ajeje. Rumorovanovobe va'ego aëro heruomajeje God ëhi jië'e ae jiajoho. ¹⁵ Noro Keriso-are jöho ëhi baeromo jijihego God-ro uvajeje: Ëho Kerisoro nasi örire ridi'e suvuore bojemijanovajë uvoromo vuëvajeje. Vuëvego no Keriso-are jöho ridi manö'e baeromo va'ego mare va'iröhe o sisëre va'iröhe ariböviohuro heruomajeje. ¹⁶ Sisëre va'iröhe ariböviohuro Keriso-are jöho bogo ejahego ë jöhuro ridi sisënö'e ridëmego sisërejëvo hesije. A'i mare va'iröhe ariböviohuro heromo ejahego jöhuro ridi maëro i'ovëvanovego ëhuro maro raromo hesi jëve. Asë'e ëhi jië'e mu börömo vae'iröhoho rahuo eni javue. ¹⁷ Ae göehu göehu aho'obëhe ë'aruëhioho no bogo ëhioho sarerëmiromo uëvarueje: No eni javuajëjo. Ëhi jië'e ariböviohuro ijo bajemu uehorovoromo God-are jöho sareri sareri'o'ho majëhibe jijiharueje. Iae ëhuni uvarueje: No eni javuajëjo. Röhu no bogo ëhioho ë'i a'i uhohu'o maemu javuego God-ro uövuë'ëro Kerisohu nimaje muohemu vaeromo God-are nuniro atarueje.

3

Paul-mëhu God-are jögoru i'o hesi mu vaejarue jöhoje.

¹ Ëjöho garomo nani jemëro ëma uvo'a'arujë: Paul-ro hesi arijo'ëro hesi ihohu'o hesi aribövi jabesi ihohu'o mami'e nigemadoho röhu maho ëma nigemoromo ë'ajëjo noro uvoröhego: Paul-më God-are mu vae'iröhoho eni jëvajëjo. O ëma uvo'a'arujë: A ioro'torehu nimiruëhi Paul-mëro nimiruëjo jabesi mu eni jiaje jöho ae göëro jajivego no suroho garomo uvoröhego: Paul-më eni jëvajëjo. O noro Paul-mesi jöho jajivego a ioro'iorohuro suroho garomo uvoruomoröhego: Paul-më eni jëvajëjo. Nani ëhi uvo'a'arujë röhu nomë bogo ëhi jië'e suri surioho nimö. ² Ëhi jië'e suri suriohu'o röromo iae jemë jëve. Kerisoro jemesi ihoho nosi dë vövöbajo'ere jajivahuë'ëro ëhu'ëro no jemesi örire börömo mae uehorovëvarueje. Börömo mae uehorovëvaruëro javuë'ëro ëhuni uvarueje: Nosi mu eni jiaje jö jajivë'e suroho bogo naguajëjo aëro adaho garomo uvoröhego: Paul-më mu mae vaejarue höjo. Ae aho'o suroho bogo adaho ga'i a'i jemesi muohuremu garomo uvoruomo'ë'e: Corinth ariböviohu mu mae vaejarue hesi bëhoho Paul-mëro eni ajëmijë'ëro ëhu'ëro ë'aruëjo. Ëhuni Paul-mesi muoho iae eni jiajëjo. ³ Iae ae aho'obëhe gavö jemë Kerisohu jajivade suri surire jöho va'ëne jëvo'ego. Ëjöho noro bö'areje. Röhu Keriso jöho bogo barigoho jajivo'i a'i God darugo bojamuajë a hesi Aru'ahohuro ëhuro jajivë'eje. O Moses-hu God-are jögoru munë hitahi döre jajivadëhioho bogo ëhioho rori'o'ho munë döroho jajivo'i a'i jemesi dë vövöbajo'ere jajivë'eje.

⁴ Noro ëhi ajëmijë'ëro Keriso-are mu jemesirire jiajohuni ëhuni God-are nunire riravoromo Keriso-are jöëni biririvoromo uehorovoromo uvarueje: Jemë noehu mu vaejarue suri ma va'ëne jëvajëjo. ⁵ Bogo nosi simanohuro darugohuro God-are mu vae'iröhoho no eni javuo'i a'i hesi God-ro avohavuë'ëro ëhuro eni javue. ⁶ Huro no avohavuë'ëro ëhu'ëro no hesi jögoru i'o hesi öroho avoho röjëhi'iröhoho no eni javue. Ëjögoru i'o'ho bogo jajivë'e

jögoroho jio'i a'i God-are Aru'ahehu bojamuaje jögorohoje. Jajivë'e jögoroho ahoromo vuovarueje. A'i Aru'ahohuro i'ovavuaeje.

⁷ Munë hitahire sehoromo jajivë'e jögoru ë hesi muoho rovego aëro ë jöho ahoromo vuovajeje röhu ë jögoru barovade majare evare God-are aji böröme a nunire rovadeje. Rueromo vuorövole va'adeje röhu Israel rajoho Moses-are nu ano'o hesi ajoho bogo ga avoho'i ma-ga burutimoromadaje. ⁸ Èhuni birivoromo uvo'a'anue: God-are Aru'aho hesi muoho rovë'ëro ëhu'ëro ë mu hesi ajohuro aji mamioho iosiramiromo bogo bise'o vadu'oho ruenövo'ajëjo. ⁹ Jögoru mami hesi muoho rovego aëro heromo ë jöho ahoromo jö sisë God-are nunire baejarueje. Röhu ë hesi muoho aji'e jiadeje. Èhuni birivoromo uvo'a'anue: Jögoru i'o hesi muoho rovego aëro ë jöho ejego jabesi jö sisëho barëjähajëro jië'ëro ë mu hesi ajohuro mu mami hesi ajoho iosiramiromo bövi mae höjo. ¹⁰ Aji mamioho böröme ajivadoho jaruvoho bogojianove aji i'ohuro rueromo böröme mae ajivoromo ruahö'öjë'ëro. ¹¹ Vuorövole va'oröhe muoho iae aji'e jiadeje. Èhuni birivoromo uvo'a'anue: Ioro'ioremu jioröhe mu hesi ajoho böröme mae höjo.

¹² Mu i'ehu ioro'iore gemu jioröhego dë sasohoromo uvaruohuni ëhuni no biririvo avohoromo jöho ma-samae majëhijarueje. ¹³ Samae majëhiromo Moses-hu hesi aji gurihijadëhioho no bogo ëhioho nosi aji'e jöho gurihijarueje. Èhesi bëhoho Moses-ro hesi nu ano'oho niögëro riogivorovoromo gurihijadeje Israel rajoho jaburo muebe'öromo garöhego ajoho vuorövo va'oromo barëjego. ¹⁴ Röhu Israel rajoho hia'i biririro jabesi simanoho sisërejëhadeje. Jaruvohu'o ëhi gemuohoje. Jögoru mami adahamu hejë'iroho Moses-hu hesi nu ano'o hesi aji riogivorovadëhi jabesi uehoroho ëhi riogivorovobe rovë'ejë. Èhesi bëhoho jabumë Keriso bogo ma uehorovarueje röhu huro gemuëro riogivahuajoho jiovaluajeje. ¹⁵ Io'o. Jaruvohu'o Moses-are jögoru adahë'iroho jabesi uehoroho riogivë'e maeje. ¹⁶ Röhu jabumë ae rahu huotorovoromo Bada mae uehorovë'iroho evare uehoro riogivëhadoho iae jiovëho'ë'e. ¹⁷ Röhu Bada hesi bëhoho God-are Aru'ahoho uave. Badare Aru'ahehu dinö'e dinö'e jië'iroho öri mare jijihö'iröhoho iae jiovaluë'eje. ¹⁸ Èhu'ëro jië'ëro no Christian ae aho'obëhe nosi nu ano'oho bogo riogivahuë'ëro majaehu aririre bijiohego gavaruëhi ëhi Badare ajoho aririro gavanovoromo ëho uehorovo avohoromo gorosovoromo hu jiajëhi ëhi javuobe hesi ajoho gö'o gö'o baebe va'arueje. Badaro ëhi ajivavuaeje. Bada hesi bëhoho God-are Aru'ahoho uaromo ë'e.

4

Aji mu mabëhe baejë'ëro ëhuni Paul-mëhu birivoromo mu vaejare jöhoje.

¹ Èhi jië'e aji'e muoho God-ro noni vavaenimoromo bojamuijë'eje. Èhuni bogo u'uhoromo vuonugo hesi javue. ² Gurihijë'e javoji'e mu sisëho bijönahego bogo vaejarueje. Sarerie muoho bogo vaeromo God-are jöho huotohuotovoromo majëhijarueje. A'i God-are jö maho sama'e huruoho majëhiromo hesi nunire riravoromo mue vaeromo nosi arijo'arije ae aho'obëhe röjahirovarueje jabesi uhure uehorovoromo uvöjoro: No ma-mae javuajëjo. ³ Keriso-are jö maho noro iae sama'e majëhijarueje röhu ë jö hesi bëhi tugohëhë'oho sisëre va'iröhe aribövi jabesi örohemu tugohëhë'eje. ⁴ Èhesi bëhoho Keriso bogo ma uehorovarue aribövioho ave sa'a hesi börömhuro jabesi uehoroho tugohëhë'eje jö ma hesi ajohuro ajivëvego Keriso-are ajoho garuomöjëni Keriso hu God jiajëhi ëhi jië'ego. ⁵ Bogo nosi jöho majëhi'i a'i ae majëhiromo uëvarueje: Iesu Keriso hu Bada höjo. Nomë Iesuare jöëni jemesi mu vaejëharue aribövie javuajëjo. ⁶ Keriso-are jö majëhijarue hesi bëhoho ni'livadiroho God-ro uvade höjo: Ramoramoho ajivëjo. Èhi uvade ahuro nosi dë vövöbajo'oho ajivavuaeje noro hesi aji mahemu Keriso-are nu ano'ere garuomörohego.

Paul-mesi sino haho'e u'uhëvadeje. Huë vavaene baejareje röhu God mae uehorovë'ëro birivoromo mue vaejareje. Èhesi jöhoje.

⁷ ÈGod-are aji maho nosirire u'uhë'e rama gagore jianovajeje ëhuro noro garöhego daruge aho'o bogo nosirehu jio'i hesi God-are örire jioromo rovego. ⁸ Majae ëhi huë

vavaene böröme bae'i arijarueje. Röhu bogo ijumavuo barëjê'eje. Öre nahoromo uehore gö gö bae'i arijarueje. Röhu öroho iae biroharueje. ⁹Ae aho'obêhe sisê vaejavuoruomajeje. Röhu God bogo vuororamuijê'eje. Aëro anaguo'i arijarueje. Röhu bogo ma anaguê'eje. ¹⁰Iesuhu vi'ehi baeromo guomadêhi majae êhi no'o sa'a sinore êhi vi'ehi baeromo vuovo'iê'obe va'arueje God-ro nimê'ëro noro garôhego Iesuare darugoho nosi sinore jiego. ¹¹Majae êhi ave sa'are raromaruevare evare Iesuare jöëni vuovo'irôhëro raromarueje God-ro nimê'ëro noro garôhego Iesuare darugoho nosi sa'a sinore jiego. ¹²Ëhu'ëro jiê'ëro noehu Keriso-are jö majêhijaruoho vuovo öriro muoho vae'i a'i jemê ë jôho heromo i'ovo örire jêvajeje.

¹³Röhu God-are surire jajivoromo uövuê'eje: Na mae uehorovode höjo. Ëhuni jôho jövide höjo. Ëaehu jajivadêhi no'o êhi gemuoho mae uehorovê'e raromarueje. Mae uehorovoromo êhuni jôho atarueje. ¹⁴Atarue hesi bêhoho no garomo uvarueje: Bada Iesu ajamamu ri'ôjade aho God-ro no'o êhi ajamui'iramu ri'ô'ëjarêjo Iesu'o gemu mae javuê'ëro. Ri'ô'iramu jemê'o gemu mae hesirire sôjavuo va'a'ajêjo. ¹⁵Ëmuoho aho'obêhe nosirire rovaje hesi bêhoho êhuro God-ro ae aho'o huê baeromo ajëmiromo dë vövöbajo'e huotövohobe va'ego ae aho'o hu rajahi avohogo hesi ihoho dö maro jiorôhego.

¹⁶Ëhuni no bogo u'uhoromo muoho vuonugo hesi javue. Nosi sino haho'oho sisêrê-javuobe va'irôgoro a'i nosi aru'ahoho majae êhi i'ovavuobe va'ajeje. ¹⁷Nosi huê vavaenoho ma-bisemu baeromo ma-burêro barê'irôhoho jio'i röhu ë huê vavaenoho êhuro ijonö aji ma-mabêhe ioro'ioremu bae'ejo. Huê vavaenoho ma-bisê'ego bogo uehorovo'ejo. A'i ajoho börömo mae jio'ê'e. ¹⁸Nunehu ga'amaruoho bogo nuroho vae'i a'i nunehu bogo ga'amaruoho nuro vaejê'e raromarueje rabêni hesi bêhoho nunehu ga'amaruoho êho majae ma-bunemu jioromo barê'i a'i bogo ga'amaruoho êho jiemu jio hesi jiê'ego.

5

Vuovavuê'oho no maro raromo'irôhe jôhoje.

¹Iae no garomo uvarueje: Nosi sa'a sinoho ma-jahuri raromarue javu va'ënoho êho sisêrê barëjê'oho God-hu nugahuade javu maho nosi jio'a'ajêjo. Bogo aho övoho avoho'i hesi God-ro bamahuê'e höjo noro êho baeromo ô'idöre ioro'ioremu raromo'irôhego. ²Avejê'oho vavaenivoromo hara'uê'i muebejarueje ô'idöre jiaje javuoho baeromo êhuro niögunö'e aegorovê'irôhëni. ³Niögunö'e aegorovê'oho bogo niögu rumo'oho ëma raromo jijihanovo'ejo. ⁴Sa'are ma-jahuri raromarue nosi javuore raromaruevare evare vavaenimo avohoromo hara'uarueje. No vavaenaguaje hesi bêhoho bogo niögu mamioho boremi'ô'i nagujohunioho bogo êhunioho vavaenimo'i a'i God-hu bojamui'irôhe niögu i'ohuro döre aegorovego êhuro raromemu raromo'irôhe muohuro sisêrêjavuobe va'aje muoho ruahó'ôjogo barê'i i'e javuorôhego. Ëhuni vavaenimarueje. ⁵Röhu hesi God-ro no avohavuadeje noro êhi i'e baerôhego. Avohavutoromo hesi Aru'aho maho suvuore bojamuijê'eje noro uvorôhego: Iae mae-êjo. Hesi Aru'aho bojamuijadêhi suvuoro vituoho êhi bojamui'iramu ma-mabêhe bae'ëjarêjo.

⁶Ëhuni majae êhi no dë sasohoromo biririvarueje. Rabêni no gavaruoho nosi sino haho'ere raromaruoho êhuro Bada'o gemuoroho bogo raromarueje. ⁷Bada mae uehorovoromo raromo jijiharuooho bogo hu garomo êhioho ê'arueje. ⁸Amo noro dë sasohoromo biririvarueje. Dë sasohoromo biririvê'i uvarueje: Nosi sinoroho bogo raromo'i Bada'o gemu mae raromê'oho êho iae maho höjo. ⁹Röhu no sinore raromê'oho o bogo raromê'oho êho bogo uehorovo'i a'i nosi uehoroho ë gemu bamarueje noro muoho avoho vaejêgo Badaro göromo nimorohorôhego. ¹⁰Huhu nimorohorôhego vaejarue hesi bêhoho no ae aho'obêhe Keriso-are nunire riravo'ejo no ae gemu gemu sinehu raromoromo mu mae o sisê vaejarue êhi jiê'e manaha baeve va'irôhëni.

Kerisohu no buore vaejavuoromo God-are gemuore bamavuade jö Paul-mêhu a majêhinövare jôhoje.

¹¹ Hesi nunire riravo'iröhohuni ehuni Bada juhuonamiromo a jabesi simanoho huotovêho gavarueje jaburo hu mae uehorovorohêgo. No êhi mae ê'aruoho God-ro no gö barêjê'eje. Röhu na uehorovoromo uve: Nani jemê'o jemesi dê vövöbajo'ëro mava'orahoro gövuaruje höjo. Êhi jiê'oho iae na nege. ¹² Noehu mae ê'ëgo God-hu gövuaie jöho uêve röhu nadi uvore: Paul hesi arijo'ëro hesi ihohu'o hesi aribövi jabesi ihohu'o mami'e nigemadoho röhu maho ëma nigemoromo ê'ajêjo noro uvorohêgo: God-are mu vae'iröhoho eni jêvâjêjo. A'i ê jöho jajivode hesi bêhoho êhuro jemê nosi jöëni nimorohol'irarijêgo. Nimorohoromo he'irarije aehu nosi jö sisê atoruumamu hejê'oho jö mana uê'irarijoho jemesi örîre jiorohêgo. Nosi jö sisê atoruumaje aribövioho dê vövöbajo'oho bogo nimorohê'e ato'i a'i ma-sinoremu nimorohê'i atoromo nosi jö sisêho atoruumajeje. ¹³ Aehu uvaruoho: Paul-mêro simane sisêrêromo muoho vaejarue hö uvaruoho no God-ni êhi jiê'e muoho vaejarueje. O simano mae javuego mu vaejaruoho êho jemesi jöëni êhioho vaejarueje. ¹⁴ Êhesi bêhoho Kerisoro no dê vövöbajo'e aho'o uehorovavuaieje. Êhuremu no uehorovoromo bogo nosi jöënioho a'i God-are o aribövi jemesi jöëni uehorovoromo muoho vaejarueje. Iae no uehorovoromo uvarueje: Ae gemuêro ae aho'obêhêni guomade höjo. Urîmo ae aho'obêhe no mu sisêmu uehorovaroho röhu Kerisohu guomadohuro êhuro ae aho'obêhe no'o êhi vuovavuanovamu nosi mu sisêho barêjahue'e höjo. ¹⁵ Kerisohu ae aho'obêhêni guomade hesi bêhoho no ave sa'are rarumarue ariböviohuro ijônôho bogo nosi sinemuoho uehorovoromo raromo jijihol'ironi guomoromo ri'ôjade aho uehorovoromo raromo jijihol'iröhêgo. Iae êhuni hu guomade höjo.

¹⁶ Êhi jiê'ëro aehu uehorovaruêhioho no ijônôho bogo êhioho uehorovoromo uvo'ejo: Êaho mae o sisê höjo. Urîmoho aehu jabesi ma-uehorovaruêhi no'o êhi uehorovoromo uvonovareje: Iae Keriso êhi êhi jiê'e ae höjo. Röhu jaruvoho no bogo êhioho uehorovaruêje. ¹⁷ Êhu'ëro jiê'ëro ae rahu Keriso-are ae gemuoho javuê'oho no i'e javuaieje. Mu mamioho barêjahuo'i mu i'e rovê'eje. ¹⁸ Êmuoho aho'obêhe hesi God-ro avohahuadeje. Huro Keriso nugô'ôromo êhuro buore vaejavuoromo hu'o no'o aevoromo maro raromareje. O mue bojamuadeje buore vaejavuade jöho majêhijêgo aëro heromo ejahoruomorohêgo. ¹⁹ Jöho aviêhije. God-ro Keriso-are dê vövöbajo'o uhure jioromo mue ajamiromo êhuro ae aho'obêhe nosi sisê hesi i'uocho bogo uehorovahuo'i buore vaejavuade höjo. Buore vaejavuoromo buore vaejavuade jöho bojamuade höjo noro majêhibe jijihorohêgo. ²⁰ Êhu'ëro jiê'ëro no Keriso'o rôromo jö majêhijarue aribövîe javuê'ëgo God-ro jöho bojamuoromo uövuego no ae dinêmarueje. Keriso-are jöëni ae uêvarueje: Buore vaejavuade jöho eromo God'o gemuoro huê mae raromohêjo. ²¹ Keriso hu mu sisêho bogojadeje. Röhu God-ro nosi sisêho hesi örîre bojamamu baejadeje êhuro no Keriso-are ae gemuohuro javuê'ëro God-ro nosi ihoho avohavuego hesi nunire ma-mae riravorohêgo.

6

¹ No God'o gemu mae mue vaejaruêro javuê'ëro no nagueje jöho jemesi örîre majêhil'iröhogoro ê'ö jemêro êhi ê'irarijêgo. God-hu huê baeromo bojêmade jö maho mu maho nadi ëma baeromo boremi'ô'i ma-avoho ma'enore. ² God-are surire jöho jajivoromo êhi uve'eje: God-naehu huê baejêvo'irode majaho rovamu evare na jemesi jöho ejêhode höjo. Jemê maro bamêvo'irode majaho rovamu evare na ajêmijode höjo.

God-ro êhi majahuijâdeje. Röhu ê hesi bêhoho gare. God-hu huê baejêvo'i uvade majaho jaruvoje. Maro bamêvo'i uvade majaho jaruvoje.

³ Paul na'o nasi ariböviohu'o noehu God-are mu vaejaruoho ê muoho iho sisê hö uvê'oho no bijönague. Êhuni nosi muoho bogo sisê'ioho vaejarueje aëro êho garomo sisê'i uehorovoromo rireromojöëni. ⁴ A'i God-are mu vaejarue aribövîehu ê'aruêhi êhi mue aho'o a nunire avoho vaejarueje. Huê vavaene mu sisê gö gö rovê'oho biririvo avohoromo riravarueje. ⁵ Aehu hisuebijavuê'oho savoji gagore io'amavuê'oho muorovamui'i juhijavuê'oho ma-biririvarueje. Noehu i'u'e mu vaejê'oho röho dere

bogo momorö'öjê'oho i bogo ue'ahê'oho ma-birivaruaeje. ⁶Birivoromo mu mahemu uehorovoromo Keriso-are jôho mae garomo a jabesi mu sisêho ma-ga taemoromo ae huê baejêvoromo God-are Aru'ahoho baeromo ae dê vövöbajo'e aho'o uehorovêvoromo ⁷God-are jô maho majêhiromo hesi darugoho røjêhijaruaeje. Êhi'oromo God-are mu vaejarue ariböviehu ê'aruêhi no êhi a nunire mae vaejaruaeje. Mu mae vaeromo êhuro Satan-hu no'o muorovê'oho ôvo göhuro tugohê'i ôvo göhuro mana muorovamijaruaeje. ⁸Aêro rajahuinövo sivaguonövaruaeje. Nosi ihoho ba'obuenövo ba'ojiomonövaruaeje. Aêro ma-uaruaeje: Paul-mê sareri'e aribövie jêvâjêjo rôhu ma-jö maemu ataruaeje. ⁹Aêro uvaruaeje: Paul-mê iho rumo'e aribövie jêvâjêjo rôhu ae aho'obêhe nosi ihoho iae heruomajeje. Aêro uvaruaeje: Vuovêvo'ie'ajêjo rôhu bogo vuovo'i iae birivoromo raromaruaeje. Aêro uvaruaeje: Sisêni i'uoho baejarue hõjo rôhu bogo vuovavuaeje. ¹⁰Aêro uvaruaeje: Huê vavaene baejarue hõjo rôhu majae êhi nimoroharuaeje. Aêro uvaruaeje: Bõvi bise'o rumo'e jêvâjêjo rôhu noro ae aho'o ajêmijego Keriso-are bõvi bise'o maho baejaruaeje. Aêro uvaruaeje: Rabe rabe bogojêvâjêjo rôhu bõvie bise'e aho'o nosi ôrيره eni jîê'eje.

¹¹ Corinth amo rajomê nosi simanore dê vövöbajo'ere jôho ma-sama'e huruoho majêhijê'e javue. Nosi dê vövöbajo'e aho'o jemesi ôrيره bojêmijê'e javue. ¹²No jemesi ôriroho bogo uehorovêvoromo vuonugê'e jemêro nosi ôrيره uehorovavuoromo vuonugavuanovê'e jêve. ¹³Vavuehu aboji harihu'e jô majêhijaruêhi êhi naro jemê uêve: Jemêro mana êhi dê vövöbajo'e aho'o nosi ôroro bojamuirêjo.

Christian ariböviehu God rumo'e aribövi jabesi uehoro bogo baeromo jabu'o bimuvorovo'irêhe jôhoje.

¹⁴ God bogo ma uehorovarue ariböviohu'o gemuoroho nadi bimuvoromo uehore gemuoho baere. Jabesiroho hahagu jio'i jemesiroho hahaguje. Na mu mahu'o mu sisêhu'o mu gemuohoje o hahagu hahaguje. Hesi hahagu hahaguje. Na ajohu'o ramoramohu'o gemuohoje o hahagu hahaguje. Hesi hahagu hahaguje. ¹⁵Na Keriso'o Satan'o jõe gemuoho uehorovaruaeje o hahagu hahaguje. Hesi hahagu hahaguje. Hesi hahagu hahagu uehorovaruaeje. Na God mae uehorovarue ariböviohu'o God bogo ma uehorovarue ariböviohu'o jõe gemuoho uehorovaruaeje o hahagu hahagu uehorovaruaeje. Hesi hahagu hahagu uehorovaruaeje. ¹⁶Na God-are osa bôrômohu'o sareri'e vörö'e inômohu'o gemuohoje o hahagu hahaguje. Hesi hahagu hahaguje. Rôhu no God darugo'o hijaje a hesi osa bôrômoho va'êne javue. Êhesi bêhoho God-are surire jôho êhi uvê'eje:

God naro jabesirire hiromo jabu'o juvo'ejôjo.

Na jabesi Bôrômoho jevo'i jabumê nasi aribövie jioruom'o'ajêjo.

¹⁷ Êhuni Badaro uvajêjo: Jemêro jabumê gorêvoromo jemesi hahagu raromohêjo. Sisêho nadi gavanovohêjo.

Êhi ê'ê'oho naro jemê rajêhiromo baejêvo'ejôjo.

¹⁸ Baejêvo'iramu na jemesi Vavue jevo'i jemê nasi aboji harihu'e jêvo'ajêjo.

Bada mu bõvi bise'o eni jîê'e ahuro êhi uêvâjêjo.

7

¹ Nasi ô mueno'e God-hu êhi mae vaejavuoröhêni uövuadohuni êhuni mu sisê aho'obêhe vae'amego êhuro sino haho'o dê vövöbajo'o sisêrêjavuajoho ê'ego no êho goro'i God gemu bôrômoho hõ uehorovoromo mu mae gemu vaeromo avoho raromo'iro.

Corinth ekaresiaehu mu mae vaejamu Paul-hu heromo nimorohade jôhoje.

² Jemesi dê vövöbajo'e aho'o nosi ôroro bojamuire. Nomê aho bogo sisê'ioho vaejêvê'e javue. Aho bogo ijumêvê'e javue. Jemesi bövioho bise'oho bogo sarerisareriêmiromo ujohêhê'e javue. ³ Êjôho na bogo uêromo ê'e: Jemê a sisê jêvâjêjo. Na mami'e uêvedeje: Jemê nosi dê vövöbajo'ere jêvâjêjo êhuro no birivoromo raromê'oho o vuovavue'oho jemê'o no'o gemuoro javuoröhego. ⁴ Na jemesi ôrيره mae uehorovêvo avohajeje. Jemesi jôeni sisê maro nimoroheve. Iae no huê vavaene aho'o javue rôhu na herove nasi dê vövöbajo'ere huê sanue rue avohoromo sasöhevo'ego.

⁵ Iae no Macedonia sa'are rueromo uvareje: Nosi dē vövöbajo'oho sanuovavuo'ajëjo röhu bogo. A'i huë vavaene aho'o nosi örire ruenövohijo. Gahijo anaguo biraguo'e vae'i ari'ego. Nosi uhure juhuone rojomohijo. ⁶ Röhu God-hu huë vavaeni sanuamuijaje ahuro jjië'ero Titus nugö'ojamu rovadohuro ëhuro no sanuamuamu biririvavuadeje. ⁷ Röhu bogo huhu rueromo sanuamuijadohuremu jio'i a'i Titus-hu jemesi örire huë sanu baejade jöho no hejamo ëhuro God-ro nosi dëho sanuamuijajeje. Huro rueromo uövuaejeje: Corinth ariböviohuro nöörö ga'i nimohijajo. Jabesi sisëni vavaenimohijajo. Nöruare örire ajami'i nimohijajo. Iae ehuni avevejö'oho na nimorohevo avohe.

⁸ Naro urimë'i uru'ö jöho jajivoromo nugö'ojamu jemëro garomo huë vavaene baejarijeje. Iae ëhi ë'odeje röhu na bogo uehore gö baeromo uvajeje: Uru'ö jöho rabëni jajivode höjo. Röhu urimo na uvodeje: Na rabëni jajivode höjo. Na gavajoho jemë huë vavaeni baejarijoho ëho majae ma-bisemu baeromo barëjadeje. Èhi jie röhu iae baejarijeje. ⁹ A'i jaruvo na jö jajivodoho dë mae jeve bogo vavaeni bojëmijodohuni a'i jemëhu vavaeni baeromo ehuni huotorovoromo avoho uehorovarijohuni. God-hu nimaje ëhi jjië'e vavaenoho baejarijeje. No bogo ehuro jemë sisë vaejëvareje. ¹⁰ Ae rahu God-hu nimaje ëhi jjië'e vavaeni baejë'ohuro ehuro ja huotorovoromo avoho uehorovoromo maro hi'a'anue. Avoho uehorovoromo avoho hijë'oho bogo ë hesi jöëniho vavaenimo'anue. A'i sinemu uehorovoromo vavaeni baejë'ohuro ehuro ma-guom'a'anue. ¹¹ Röhu gare. God-hu nimaje ëhi jjië'e vavaeni baejarijohuro ehuro ave mu maho rovadeje. Jemesirire jjade mu sisë ma-nunëremu gavarijoho vuonugoromo aho'i uehorovarijeje. Övo uno'e ma-maemu jëvajoho röjehi'i nimarijeje. Mu sisëhuni dë vörönëgadeje. Èhesi i'uohuni juhuonivarijeje. Nasi jöëni vavaenimarijeje. Muoho avoho'i nimarijeje. Sisë vaejade aho i'ue mana bojami'i nimarijeje. Iae no gavö jemë ë mu sisë avoharjoho ma-mabëhe jio'ego.

¹² Èhu'ero jjië'ero iae na uru'ö jöho jemëni jajivodeje röhu na mu sisë vaejade aho bogo uehorovoromo sisë baejade aho bogo uehorovoromo jajivo'i a'i naehu jajivode hesi bëhoho jemëro God-are nunire riravoromo garomo uvo'irarijogo: Iae no Paul-mesi jöëni uehorovo avoharue höjo. ¹³ Jemëhu nosi jöëni uehorovarujohuro ehuro no sanuamuijamo birire baejë'e javue.

Birire baeromo gavare Titus nimorohamu gagorovo no'o nimorohe avohareje ë hesi bëhoho jemë ae aho'o hu ajamamu hesi dë sasohahadohuni. ¹⁴ Èhesi bëhoho urimë'i naro jemesi jöëni nimorohë'i jöe bisemu Titus-are örire majahiromo uavodeje: Corinth aribövioho mu mae vaejarue höjo. Èhi uavamu hegorovo Titus-ro ö'oromo gavade jemë mu mae vaejamu gagorovo vuonorö'ö rueromo uevadeje: Paul ja Corinth amo rajo jabesi jöho mae uevane höjo. Jaehu uevanëhi Corinth aribövioho ëhi jjië'e mu maho vaejamu gëvode höjo. Èhi uevamu hegorovo na javojoho bogo bae'i mae jevadeje. Noehu Corinth amo rajo jemesi örire jöe aho'o ma-maemu majëhinövarëhi ëhi Titus-are örire jö mae majahijareje. ¹⁵ O Titus-ro jemesi örire dë vövöbajo'e aho'o uehorovëvajeje. Èhesi bëhoho hu jemë gëromo simanoro vaejë'ero uvajeje: Naro Corinth amore va'amu amo rajohuro juhuonivoromo butubutumoromo jejemiromo ae aho'obëhe nasi jöho gemu ejehare höjo. ¹⁶ Èhu'ero jjië'ero na uvajeje: Naehu nimaje muoho ae aho'obëhe jemëro majae ëhi vaejarue hö uvoromo nimoroheve.

8

Corinth ekaresiahu rabëni öve sasohoromo bövie bise'e a bojëmi'iröhe hesi jö bëhi Paul-hu jajivadohoje.

¹ Röhu nosi ö mueno'e no nague Macedonia sa'a rajo ekaresia jabesi jöho jemëro ga'irarijogo. Macedonia sa'are ekaresia God-hu huë baeromo ajëmamaju buhu ë'are jöho no majëhi'ie'ö. ² Macedonia ekaresiaho jabumë huë vavaene böörömo bööröme baeromo sisë'i raromareje. Iae sisë'i raromareje röhu evare majare nimorohe avohareje. Nimorohehoro ehuro bövie bise'e biseharihe jëvadoho röhu öve sasohëvamu suvuore bogo bise'ö vadu'oho God-are örire i'imamijareje. ³ Jaburo rabe rabe jëvajoho i'imamiromo röhu gö'o

döre mamareje. Ëhi'amu gëvë'ëro na ë jöho jemë majëhije. Jabesi nimoromo ri'öromo⁴ dinamuiromo uövuareje: Uövuero no jemë'o bimuvoromo God-are aribövie Judea raromaruoho ajëmi'irarëjo. Ëhi uövuë'oho huë mae javuo'ajëjo. ⁵Noro uehorovoromo uvareje: Jabumë ma-moniemu i'imamui'ajëjo. Ëhi uvareje röhu bogo ëhemuoho ë'areje. A'i urimo jabesi dë vövöbajo'oho Badare örire bojamirovoromo evare God-hu nimajëhi nosi örire bojamirovareje. ⁶Ëhi'amu gagorovo noro Titus uavareje huhu jemë'o hiromo mu aevadëhi huro röhu maho ö'oromo ëhi ajëmego jemëro ë huë baejarije mu mabëhoho röhu maho vaeromo barë'irarijego. ⁷Röhu jemë mue aho'obëhe vae avoharujeje. Jemë God mae uehorovo avoharujeje. Jöho mae ato avoharujeje. Simanëro mae ga avoharujeje. Mue bövie bise'e ajamui'i nimo avoharujeje. Nosi örire uehorovavuo avoharujeje. Ëhuni no nague jemëro ë huë bae'irarije muoho ëhu'o vae avoho'irarijego.

⁸Na bogo darugo'e jögoroho jemesi öriroho bojëmi'i a'i aribövi ioro'iorehu ajëmi'i nimo avohare jöho naro majëhiromo jajivodeje ga'irodëni jemë ma-döhemu ae uehorovëvego o uhohu'o uehorovëvoromo huë baeromo ajëmijego. ⁹Nosi Bada Iesu Kerisohu huë baeromo ajamuade jöho iae jemë'o uehorovarujeje. Hesi örire börömo mae jiadeje röhu jemesi jöëni vuonugoromo rueromo bövi bise'o rumo'e hijadeje ëhuro hu bövi bise'o rumo'ëro jië'ëro ëhu'ëro jemëro aru'aho'e mue bövie bise'e bae avoho'irarijego.

¹⁰Nasi uehoroho jemë diehi ë'ego marëjëvo'iröhe öroho aviëhije. Vaduni göho jemëro urimo ë suvoro muoho aevoromo vaejamu a ioro'iorohuro ijonö aevareje. Jemëro urimo ë muoho vae'i nimamu a ioro'iorohuro ijonö nimareje. ¹¹Jaruvoho ë mu vituoho vae barëre. Jemëhu mu aevo'i börömo bëhi nimarijëhi ëhi vae barë'i nimo avohore. Nimoromo jemë rabe övore jëvajoho ëho bojamire. ¹²Jemë bojami'i nimoromo övore jëvamu bojamijë'oho God-ro uvajeje: Ëho suvoro mae höjo. Övore bogojëvë'oho God bogo uëvajeje: Bojemihëjo.

¹³Na bogo uve jemëro bövi mae bojëmiromo ëhuro bogo eni jëvego huë vavaeni'e raromego a ioro'iorohuro ma-samae baeromo nimorohoröhego. Na bogo ëhioho nego'irögoro na nege ae aho'obëhe ma-gemuoho jëvoröhego. ¹⁴Avejëj'oho jemë moni böröme jëvo'i jabumë bogojëvë'ëro jemëro jabumë ajëmi'aruje. Ëhi jië'oho ijonöho jabumë moni böröme jëvo'i jemë bogojëvë'iroho jabumëro jemë ajëmi'ë'ö. Ëhi jië'oho jemë'o jabu'o gemuoho jëvo'ë'e.

¹⁵God-are surire jöho ëhi gemuoho jajivoromo uvë'eje: Bövie gagovade aho i vituoho bogo rune vaejade höjo. Bisemu gagovade aho hu ie eni jiade höjo.

Titus o ae gö niö'i Corinth amore va'oromo ajëmiromo suvoro gagovo'iröhe jöhoje.

¹⁶No God-are örire huë mae uavö. Rabëni hesi bëhoho huro Titus-are dë vövöbajo'oho huotovahë'ëro noehu jemë ajëmi'i nimarüehi Titus'o ëhi ajëmi'i nimajeje. ¹⁷Nimë'ëro huro jemë ajëmijöro noro ua gavamu hegorovo ejahuadeje. Ejahuoromo röhu ajëmi'i nimo avohamu ëhuni hesi uvadeje jemesirire ö'iröhëni. ¹⁸Röhu Titus'o gemu mae va'iröhego nosi ö göho nugö'öjö. Ëahuro God-are jö maho ma-mae majëhibe juvajeje. Ëhuni ekaresiae dinö'e dinö'e jio'amajohuro hesi örire rajahiruomajeje. ¹⁹Röhu gö'o ekaresia aribövhohuro ë aho baerumadeje bövi bise'o bogojë'e aribövi jabesi suvorocho noro baejëhoromo va'ego evare huro no'o gemu mae ö'oröhego. Ësuvoro mu hesi bëhoho Badare ihoho ma-mabëhe jio'i o ae aho'obëhe göröhego nomë huë baejëvo'i naguego. ²⁰Huhu Titus'o va'iröhego noehu nugö'öjarue hesi bëhoho aëro uvojäni: Moni böröme sisë'i muebejarujëjo. ²¹Iae no nague muoho Badare nuniro avoho vaeromo röhu ëhi a nuniro avoho vae'iröhego.

²²Titus'o ë ö göhu'o rëmö'öromo ö göhu'o nugö'öjö ë ae niö'iohu'o gemu mae ö'oröhego. Urimë'i ë ahuro Keriso-are muoho ajëmi'i nimo'ego no gabe ruenövareje. Röhu jaruvoho hu börömo bëhe ave muohu'o jemë ajëmi'i nimajeje jemesi örire mae uehorovëvë'ëro jië'ëro. ²³Titus hu na'o bimuvoromo jemëni mu vaejaje aeje. O nosi ö niö'ioho jabumë ekaresiaehu rëmö'öjare aho jëve. A maëro jëvë'ëro Keriso-are ihoho dö maro ajio jië'eje.

²⁴ Ĕhuni ě ariböviohuro ö'lego jemĕro mae rajĕhijego jaburo uvo'li: Corinth aribövioho huĕ baejĕ'e aribövie jioruomajĕjo. Ĕhu'ĕro Paul-mĕro jabesi jöho mae nimoronimorohĕ'i majahuijare höjo. Jabumĕ ĕhi uehorovĕ'oho ekaresiae aho'obĕhe jemesi jöho heromo uvoruomo'ĕ'ö: Paul-mĕro Corinth aribövi jabesi jöho mae atare höjo.

9

Christian ioro'ioro jabesi örire huĕ baejĕvoromo moni bojĕmi'iröhe jöhoje.

¹ God-are aribövi ajĕmi'irarije muoho iae jemĕ gavarujeje röhu na diehi jiĕ'e jöho jajivoromo majĕhijego gare. ² Na gĕvajeje jemĕro ajĕmi'i nimego. Ĕhuni bogo jajivo'ejo. Jemĕ nimarujoho naro Macedonia sa'a rajo jabesi örire nimorohĕ'i jövoromo uĕbe rovĕ'e jeve: Greece sa'a rajoho jaburo mami'e vaduni göre aavoromo bövi bise'o avoharoho ĕhi jĕvobe rovĕ'e höjo. Jemesi jöho ĕhi uĕvamu hegorovo Macedonia sa'a raje ae aho'obĕhe uvareje: Corinth ariböviohuro ajĕmi'i nimaruĕ uvoromo jabu'o ri'öromo ajĕmi'i nimareje. Ĕhuni ajĕmi'irarije jöho na bogo jajivoromo majĕhi'ejo. ³ A'i naro ö mueno'oho rĕmö'öje jaburo ö'oromo ajĕmego naehu Macedonia rajo uĕvodĕhi ĕhi bövie bise'e eni avoho'irarijego noehu jemesi jö nimorohĕ'i majĕhijaroho bĕhi rumo'e jianovojöĕni. ⁴ Na juhuoninege ijönö Macedonia sa'a rajehu na'o ö'ĕ'oho ö'oromo gĕvego monioho bogo gagovĕ'ĕro ĕhu'ĕro ajĕmi'irarijoho jemĕ bogo eni avohĕ'e jĕvego na javoje baejĕĕni rabĕni monioho gagovo'aruĕ uvoromo mae uehorovĕvĕ'ĕro. Jemesi javoji jöho bogo majĕhi'ejo. ⁵ Ĕhuni na uvodeje: Nasi muoho ĕhi höromo ö mueno'oho uĕvodeje: Corinth amoro urimo va'irarijoho jabuhu bojĕmi'i uövuare suvuoroho avohorego naro ijönö ö'oromo ga'iröjo suvuoroho gagovĕ'e jiego. Ĕhesi bĕhoho suvuoro urimo ajĕmiromo gagovamu eni jiĕ'oho na ö'oromo jemesi öriroho bogo dinĕmi'iramu jemĕro bogo övoho i'uhö'i dĕ vövöbajo'ere nimo avohoromo öve sasohoromo suvuoroho bojamui'aruje.

⁶ Bĕhoho aviĕhije. Öve i'uhoromo suvuore ma-bisemu bamĕ'oho i uje bisemu öjĕ'ĕro bisemu gagovaruĕhi suvuoro manaho ĕhi bisemu bae'a'anue. O öve sasohoromo suvuoro bööröme bamĕ'oho i ujo bööröme öromo i bööröme gagovaruĕhi suvuoro manaho ĕhi bööröme bae'a'anue. ⁷ Ĕhu'e jiaje jemĕ ae gemuĕro gemuĕro bojĕmi'i dĕ vövöbajo'ere uehorovarijĕhi ĕmino'e ĕhi bojĕmire. Suvuoro muoho nadi uvore: I'u'e höromo bijöni bijönioho vaere. Aehu nimorohoromo huĕ baeromo bojĕmijĕ'oho ĕhi jiĕ'e aribövioho God-ro nimajeje. ⁸ Huhu bövi mae ajĕmi'iröhoho iae eni jiĕ'eje. Ajĕmego ĕhuro majae ĕhi jemĕ bövie bise'e eni jĕvego huĕ bae'irarije muoho aho'o vae avoho'irarijego. ⁹ Ĕhi jiĕ'oho suvuoro'e aribövi jioruomajĕhi jemĕ ĕhi jĕvo'ĕ'e. Suvuoro'e aribövi jabesi jöho God-are surire ĕhi uvĕ'eje:

Huro suvuoroho öve sasohoromo bövi rumo'e a jabesi örire i'imĕmibe va'aje höjo.

Huhu mu ma vaejaje jöho ĕhi jiemu jiobe va'a'ajĕjo.

Jemĕ ĕhi jĕvo'ĕ'e.

¹⁰ Iruno'o ujo ö'iĕ'iroho God-ro suvuoramuijego öjarueje. Iruno'o ue'aho'iĕ'iroho God-ro suvuoramuijego gagovoromo ue'aharueje. Iruno'o ujohu'o iruno'ohu'o suvuoramuijaje aho God-ro jemĕ'o aru'aho muoho bövioho bise'oho suvuorĕmi'iramu rae avohĕvo'iramu jemesi mu maho bövi mae jiĕho'ĕ'e. Huro ĕhi ajĕmi'ĕ'e. ¹¹ Ajĕmiromo mae sisĕ rabe rabe suvuorĕminövo'ĕ'e ĕhuro ae huĕ vavaeni jĕvamu gĕvĕ'oho jemĕro öve sasohoromo i'imĕmi'irarijego. Ĕhi jiĕ'oho jemĕro suvuoroho nosi örire i'imamui'iramu noro ujuoho va'oromo suvuorĕmi'iramu ae aho'obĕhe ujuohoromo God-are örire huĕ mae uaruomo'ĕ'e. ¹² Iae jemĕhu ajĕmiromo mae sisĕ i'imĕmijĕ'oho ĕhuro ĕ God-are ariböviohuro rabe rabe bogo eni jĕvajoho eni ujuohoruomo'ĕ'e. Ujuohoromo röhu ĕhuro ae aho'obĕhe God mabĕhe hö ua avohoruomo'ĕ'e. ¹³ Jemĕro ĕhi ajĕmi'iramu jaburo jemesi suvuoroho ujuohoromo ga'ĕ'ö jemĕ uhohu'o mae jĕvo'iramu. Ĕhi gĕromo uvoruomo'ĕ'e: O Corinth amo rajohuro Keriso-are jö maho bogo ma-jö'ĕremuoho ejaho'i dĕ vövöbajo'o uhohu'o ejaharue höjo. Ejahoromo huĕ baeromo öve sasohoromo suvuoroho nosi örire i'imamuiromo ae aho'o jabesi örire i'imĕmijarue höjo. Jemesi jöho ĕhi uvoromo God-are ihoho

döro bamoruomo'ë'e. ¹⁴ God-are ihoho döro bamoromo uvoruomo'ë'e: God-ro Corinth aribövioho huë mae bojëmi avohoromo dë vövöbajo'oho huotovëhamu öve sasohoromo ajamuiruomade höjo. Ëhi uvoromo jemesi jöëni vavaenimoromo God uaruomo'ë'e huro jemë ajëmiröhego. ¹⁵ Asë'e God hu mabëheje rabëni huro huë baejavuoromo hesi Hariho nosi örire suvuore börömo bëhe bomuij'ëro jië'ëro. Suvuoro börömo bëhe jië'ego no ë hesi jöho bogo ato varijënoho javue.

10

A göëro sarerivoromo uvareje: Paul hu ma-u'uhoromo Keriso-are muoho vaejaje höjo. O hesi sinohemu uehorovoromo vaejaje hö uvamu Paul-hu jabesi jö mana ahëhoromo jajivade jöhoje.

¹ Röhu Paul nari jöho uë'ië'e. Jemëro avo'avoho here. Keriso ma-taemorovoromo sanu'e mu vaenövade a hesi ihobe jöho majëhi'ië'e. Aëro jemesi amore rarororomo nari jö sisë sareri'e atoromo uvoruomajeje: Nöröro rueromo Corinth hijë'oho juhuoni juhuonie hi'i öre gö hijë'oho Corinth aribövi jemesi örire biriri'övoromo darugo'e jöho surire nugö'öjaje höjo. Nörö ëhi jië'e ae höjo. ² Ëhi jië'e ae jiajë uvoruomaje aho nari jemesi örire ave jöho uëve. Avo'avoho uehorovego na ö'oromo Corinth hijë'iroho bogo biriri'övoromo darugo'e jöho majëhi'iro. Darugo'e jö majëhi'irodoho na bijönego'i röhu majëhi'irodoho iae na eni jeve. Ae rahumë nasi jö sarerivoromo uëv'öho: O Paul-më ma-sa'a hesi muohuremu uehorovoromo muoho vaejarue hö uëv'öho ëhi jië'e aribövi jabesi örire nari biririvoromo darugo'e jöho majëhi'irodëro uehorove. ³ Jabumëro uëvarueje: Paul-më ma-sa'a hesi muohuremu uehorovoromo muoho vaejarue höjo. Iae mae. Iae no sa'are raromo jijiharueje röhu sa'a hesi muoho bogo uehorovë'e Satan'o muorovarueje. ⁴ No muorovë'öho bogo ave sa'a hesi bijo bunö'oho ujuohoromo muorovarueje. A'i God-are jöëni bijo bunonö'e hesi darugoho baeromo Satan-are rejoho dadovo'amarueje. Hesi sareri'e jöho mu'uvaharueje. ⁵ Uehore rabe rabe simanore rovego ëhuro döre bamorovoromo God bogo avoho gavarue ëhi jië'e uehoro aehu baro bu'öj'öho noro aho'amarueje. Ahoromo vöröe aho'o bojamiromo a ioro'ioro jabesi simanoho huotovëharueje Keriso-are jöhemu ejaho'iröhego. Ëhi'oromo Satan'o muorovarueje. ⁶ O jemëro Keriso-are jöho ejaho barë'iramu evare ae rahu jemesirire rarororomo Keriso-are jö bogo ejahoruomaje ëhi jië'e aribövioho noehu i'u bojëmi'iröhoho eni javu'ë'e.

⁷ Bogo gurihijë'e jemesi nunire jiajoho avo'avoho gare. Aehu hesi uehorovoromo uvajoho: Na Keriso-are mu ajamijaje ae jevajë uvajoho ë'ego ëhi jië'e ahuro uehorovo avohoromo uvo'iro: Na bogo nari sivuoho Keriso-are mu ajamijaje aho jevö'i a'i na Keriso-are ae jevajëhi Paul-më jabu'o ëhi jëvajëjo. ⁸ No Keriso-are aribövie javue röhu göho Badaro darugoho bojamuij'ëje hesi muoho vaeröhego. Darugo hesi bëhoho bogo jemë ijumëvo'i a'i ajëmejo jemëro avoho biririvoromo mae uehorovobe va'irarijëgo. Ëhuni ë mu hesi darugo hesi jöhu'o naehu nimorohë'i jövë'öho ëhu'o jö mäëro jië'ëro ijönöho bogo javojëgo'ë'e. ⁹ Röhu nasi darugo hesi jöho na bogo uë'ëjo jemëro uehorovoromo uvöj'öni: Juhuoninaguojöro jero ëma jajivane höjo. ¹⁰ Ëhesi bëhoho aëro sarerivoromo uvoruomajeje: Paul-hu jö jajivoromo majahuij'ë'iroho darugo ma'o majahuijaje höjo. O rueromo no'o hijë'öho hu ma-u'uhë'e aëro jië'ëro bëhi rumo'e jöho jövego hejarue höjo. ¹¹ Ëhi sarerivoromo uvoruomaruohe nadi'ëgo jabumë avoho uehorovoromo uvo'iro: Paul-mëhu öre gö raroromomo darugo'e jö jajivaruëhi jaburo rueromo no'o raroromomo muoho ëhi darugo'o vae'iramu gë'ëjarëjo.

¹² Röhu aëro sarerivoromo uvoruomajeje: Paul-më juhuoni'e aribövie jëvajëjo. Iae mae. Iae no juhuoni'e ae javue. Juhuoni'e aëro javuë'ëro bogo biriri'övoromo uë'ëjo: Jabesi sivu uehorovoromo jabesi iho nigemarue ariböviohu'o no jabu'o masije gemuoho javuajëjo. No bogo ëhioho uë'ëjo. Ëho jaburo göëro gö hesi muoho garomo jabesi arijo'arije mevorovorouomajeje ga'i mae o sisë jëvego. Ëhi jië'öho simane sisë'i uehorovorouomajeje. ¹³ Röhu no bogo ëhioho ë'ëjo. Nosi mu maho no bogo iosiramiromo ruëroho numëroho ëma nimoronimorohë'ioho ato'ëjo. No bogo sarerivoromo uvo'ëjo: Ëho God-hu bojamuade muoho höromo nimoronimorohë'ioho ato'irögöro a'i huhu no bojamuade

ë muohuremu nimorohë'i ato'ejo. Röhu ë muoho bogo öri göremuoho jio'i jemë'o ö'o baejêv'e javue. ¹⁴No jemë bogo baejêv'e javuo'ibejo noehu jemë ajëmijaruohuni nimoroharuoho God-hu bamahuade ënoho iosirami'ibejo. Röhu bogo iosiramijë'e javue. Èhesi bëhoho Keriso-are jöho noro aev'o'ioho ö'oromo majëhijareje. Èhuni no nimoroharuoho iae maeje. ¹⁵Ae göehu mu vaejaroho garomo no bogo uvarueje: Noro vaejare höromo nimoronimorohë'i atarueje bogo noehu vaejare muoho jìë'ego. Röhu no uvö: Jemëro avoho birivoromo Keriso mae uehorovo'iramu evare God-hu bamahuade ëni jiajëhi ëhi nosi muoho jemesirire tutuvoromo börömo bëhe ri'ö'a'ajëjo. ¹⁶Ri'ö'iramu noro va'o jemesi dejonörire sa'a ioro'ioro rajohu'o Keriso-are jö maho majëhibe jijih'o'ejarejo. Majëhibe jijihë'iroho God-hu ae gö mu bojëmamu vaejare öri ari'eroho no bogo va'oromo jabuhu mu börömo vaejaroho garomo uvö'ejo: Noro vaejare höromo nimoronimorohë'ioho ato'ejo. A ioro'iohehu nimoronimorohë'i ataruëhioho no bogo ëhioho ë'eje.

¹⁷A'i God-are surire jöho ëhi uvë'eje: Nimorohë'i ato'ië'iroho Badare jöhëmu nimorohë'i atorëjo. ¹⁸Èhesi bëhoho ae rahu jabesi sivu uehorovoromo ae uëv'öho: No eni javuajë uëv'öho bogo ëhuro God-are nuniroho maho jioruomö'ë'e. A'i ae rahu Badahu uëv'öho: Jabumë eni jëvajë uëv'öhuo ë ariböviohuremu God-are nuniroho maho jioruomajeje.

11

Corinth ekaresiaëro sarerivoromo uvaruje: Nani Paul hu bogo apostle maho jio'i ae gö ö'lo rovaroho ëho apostle maho jio'amajë uvoruomamu Paul-hu jabesi uehoro ahëhoromo jajivade jöhoje.

¹Na bisemu simano rumo'e jöho jajivanovo'ië'e. Röhu na nege jemëro nasi jöho bogo bijönimo'i ma-taemorovoromo he'irarijigo. Ma-taemorovoromo here. ²Jemëhu he'irarije hesi bëhoho sisëhu jemë baejëvojöëni God-hu avoho muebejëvajëhi naro ëhi jemë muebejëvajeje. Èhesi bëhoho naro vavunö'e jemë muebejëvajeje. Ae gemuehu masuröhego uaromo vavuehu aboji muebejajëhi naro ëhi ë'ajeje jemë Keriso-are övore bojëmego hesi aribövi mae jioromo hu gemu mae uehorovo'irarijigo. ³Keriso gemu mae uehorovo'irarijigo muebejëve röhu na juhuoninege jemë Keriso gemu uohohu'o uehorovarijoho vunugo'i sarer'i'e jöho ejëhoromo simane sisërejëvego rori'o va'ojöëni. Urimë'i sigobehu rueromo Eve sarer'i'e jö majahijamu mae höromo ejahadëhi jemesi simanoho ëhi sisërejëvego Keriso vunugojöëni uëve. ⁴Naehu ëhi juhuonivaje hesi bëhoho ae göehu ö'oromo Iesuarë jö noehu majëhijaroho huotohuotovoromo majëhijigo jemë bogo bijönimo'i ëho mabëhe ö'oromo ejarujeje. O God-are Aru'aho baejarijëhioho bogo ëhioho rue'i hesi aru'aho göëro ö'ego bogo bijönimarujeje. O jemë jö mae hejarijëhioho ae göëro bogo ëhioho majëhi'i hesi jöe gö majëhijigo jemë ëhu'o bogo bijönimo'i ëho mabëhe ö'oromo ejarujeje. Jabesi sarer'i'e jö ejëharujohuni ëhuni nasi jöhu'o nadi bijönimo'i a'i ma-taemorovoromo here.

⁵Èhesi bëhoho jemëro sarerivoromo uvarujeje: Èi'o rovare aribövioho apostle masije masije jioruomö'i nöruare ihoho bogohöjo. Èhi uvarujeje röhu na uehorovoromo uve: Jabesi ihohuro nasiroho bogo iosiramiromo taemehë'e höjo. ⁶Jemë uvarujeje: Nörö ave sa'a hesi vuëvo'e jöe gö gö jövo'iröhoho hu dadivaje höjo. Nani na bogo ëhi jìë'e jö jövaje aho jeve röhu na nuni aji'e jöho baejë'e ae jeve. Ènuni aji'e jöho aho'o noro röjëhi'ego jemë ma-samabëhe ganövarijeje.

⁷O nani aveho uvarujeje sisë höjo. Naro manaho bogo baejë'e God-are jö maho jemesi örire ëma majëhiromo ëhuro nasi ihoho ba'obuejë'e jeve ëhuro jemesi ihoho nigemë'e jioröhego. ⁸Ekaresiaë gö gö jabesi ijo bajoho ujuohëhoromo ëhuro hinövodeje jemë ajëmi'irodëni. ⁹Na jemë'o hiroho gavë'öho nasi mae sisë rabe rabe bogo eni jëvamu gavë'öho na bogo jemesi öriroho huë vavaenoho bojëmiromo uë gënövodeje. Rabëni hesi bëhoho rabe rabe bogo eni jëvajoho Christian ö muenö'ëro Macedonia sa'are jioromo ujuohehoromo jemesi amore rueromo ajeminövareje. Èhi jìë'ëro na jemesirire jiaje maho sisëho bogo ëninëmi'i avo'avoho mueberovonövodeje huë vavaene bojëmijöëni. Èhi gemuoho ë'onövo'ejo. ¹⁰Keriso-are jö maho nasi dëreje. Èhu'ëro na aveho jö mae uëve.

Naehu jemesi maho sisêho bogo ujuohêhê'ëro naehu nimorohê'i jövajoho Greece sa'are raromaruje aribövioho ae gemu vadu'oho bogo ahevo'anue. ¹¹ Na rabêni êhi jîê'e jôho uêve. Na na jemê bogo uehorovëvoromo êhuni jöve. Röhu God-hu gevajoho iae naro jemesi ôrire uehorovëvajeje.

¹² Jemê ajëmijajohuni na manaho bogo ujuohajëro ijönöhu'o bogo ujuohêho'ejo. Êhesi bêhoho i'o ô'are ariböviohuro nimö a ioro'iorohuro êma uvoröhego: Jabuhu nimorohê'i atarue jôho iae mae hÿjo. Jabu'o Paul-mê'o masije gemuoho jëvajújo. Êhuni i'o ô'are aribövieu jemesi bövi bise'o ujuohêharuêhioho na bogo êhioho ê'ejo a ioro'iorohuro uvoröhego: Êariböviohu'o Paul-mê'o hahagu hahagu jëvajújo. ¹³ Êaribövioho bogo apostle maho jioruomo'i ma-sarer'i'e apostle jioruome. Sarer'i'e mu vaejarue aribövie jioruome. Huotorovoromo ma-döhemu mu mae vaejarueje aëro gëromo uvoröhego: Iae Keriso-are apostle jëvajújo. ¹⁴ Êhi jîê'e sareri'e mu vaejaruoho gëromo no bogo majiohavue. Êhesi bêhoho Satan'o huotorovoromo ma-döhemu mu mae vaejejo aëro uvoruomajeje: Aji'e aneraëro ê'ajëjo. ¹⁵ Êhuni Satan-are mu vaejarueje ariböviohu'o huotorovoromo ma-döhemu mu mae vaejaruoho êho bogo bÿrömehuje. Jabumê ë sisê vaejaruêhi êhi sisëro va'o hesi jioruome.

Paul apostle jioromo huê vavaeni baebe juvaje jö huhu nimorohê'i jajivade jöhoje.

¹⁶ Röhu urimê'i jajivodêhi iae na êhi gemuoho majêhi'iê'e. Nadi ae gemu vadu'oho uvore: Paul simano rumo'e ae hÿjo. Röhu jemêhu uvê'oho: Nörö êhi jîê'e ae hÿ uvê'oho iae hesije. Simano rumo'e ae hÿromo ma-baejevego na'o ma-bisemu rajahirovê'i jajivo'iro. ¹⁷ Na avevejö'e jajivo'iê'aje jôho bogo Badahu nimajêhi jîê'e jôho jajivo'i a'i simano rumo'e aehu ataruêhi êhi jajivo'iê'e rajahirovo'irode bêhoho na javajê uvê'ëro jevê'ëro. ¹⁸ Ae aho'obêhe sine rajahirovê'i ataruohuni êhuni na'o êhi gemuoho jajivo'ejo.

¹⁹ Röhu jemê uvê'oho: Nörö simano rumo'e ae hÿ uvê'oho nasi jôho ma-baere. Êhesi bêhoho jemê uvarujeje: No simano ma'e javuajëromo ë i'o ô'are simano rumo'e aribövioho mae hÿromo iae rajêhijê'i baejëvarujeje. ²⁰ Jemêhu jabesi darugore raromajöro rêmaruoho jemesi mae sisê ijêharuoho sarerisareriëmiromo jemê baejëvaruoho jemê taemëvaruoho nu ano'ere hirumijëvaruoho êhi jîê'e aribövioho jemëro baejëvarujeje. ²¹ Iae mae nomê darugo rumo'ëro javuê'ëro jabuhu ê'aruêhioho no bogo êhioho ê'arujeje. Êhuni na javojego'ego uêve.

Jabuhu biriri'övoromo rajahirovê'i ataruêhi na'o biriri'övoromo ê'ejo. Na simano rumo'e aëro jôho jövevanove. ²² Jemëro jabumê rajêhijöro uëvarujeje: Nomê Hebrew sa'a raje javuajëjo. Röhu na diho raje jeve. O uëvarujeje: Nomê Israel raje javuajëjo. Röhu na diho raje jeve. O uëvarujeje: No Abraham-are ujo ömo'öme javuajëjo. Röhu iae na'o êho raje jeve. ²³ Jemëro jabumê rajêhijöro uëvarujeje: Nomê Keriso-are mu vaejarueje. Simano sisêrêjê'e ahuro jövevanove. Jabumê iosirëmiromo mu bövie vaejê'e jeve. Iosirëmiromo Keriso-are jöëni savoji gagore hi'i hijê'e jeve. Majae aho'o hisuebijevoe rovê'ejö. Röhu jabumê bogo êhioho hisuebijëvê'ejö. Iosirëmiromo vör'ere va'amu guomevo'i höjê'ejö. ²⁴ Jew rajehu vae aho'obêhe 39 hisuebijevo'i arijaroho êho majae övo gö mine êhi'obe rovê'ejö. ²⁵ Majae niö'i gemu Rome rajëro na hisuebijevo'i arijê'ejö. Majae gemu munëro vajemijê'ejö. Majae niö'i gemu boat-re hiromo va'amu dadorovo'amadeje. Boat dadorovamu na majae gemu vahie gemu jovo ririre ijo ha'osi döre hetejodeje. ²⁶ Majae aho'o öre göre göre juvodevare evare jovëro baejevo'i höjê'ejö. Vajiohu'e aëro ijumevo'i höjê'ejö. Nasi sa'a rajëro ijumevo'i höjê'ejö. Sa'a ioro'ioro rajëro ijumevo'i höjê'ejö. Amore hijamu ijumevo'i höjê'ejö. Örire juvamu ijumevo'i höjê'ejö. Sö jovore juvamu ijumevo'i höjê'ejö. Ma-döëremu agane vaejaruohuro ijumevo'i höjê'ejö. ²⁷ Mue vaeromo u'ue baenövodeje. Röhu deroho bogo avoho niavonövodeje. I rumo'e jovo rumo'e ma-hinövodeje. Ioho bogo uehorovê'i hinövodeje. Javu rumo'e niögu rumo'e ma-hinövodeje. ²⁸ Êhi jîê'e huê vavaeni ioro'ioroho bogo uê'i ave jöhemu uê'ejo. Majae êhi ekaresiae dinö'e dinö'e jioruomajohuni na uehorovëvoromo nurunuruego avohe. ²⁹ Ae gö

dë dövöbajo'e u'uhë'iroho na'o gemuoho herovajeje. Ae göehu gö hesi dëre bijiohamu sisëre beva'ë'iroho huë vavaene sisë maro jevajeje.

Paul-ro Damascus jioromo ju'ebijadeje. Ĕjõho Paul-ro jajivadeje noro uvorõhego: Hu darugo rumo'e jiade højo. Ĕhesi jõhoje.

³⁰ Ĕre gö bogojevë'ego nasi jõho ëma nimorohë'i jõvo'ejo. Röhu rabu muehu nasi õrire rovadoho aehu heromo uvaruoho: Paul darugo rumo'e hø uvaruoho ëhi jië'e jõhemu nimorohë'i jajivo'ejo. ³¹ Naehu jõ jajivo'ië'ajoho Bada Iesuare Börõmoho o göho hesi Vavue God-ro geve na bogo sarerëmi'ego. Hesi ihoho ma-mabëhe jiemu jiobe va'ë'e. ³² Na Damascus amore hijodevare ë sa'a muebejaje ae Aretas-are uhure bamare ahuro ë amo börõmo rejo hesi ojore ojore ae nugo'amadeje na va'ego guduamevoruomorõhego. ³³ Ĕhi'amu niomonimo bojõre arivodeje. Arivomamu õ'ëro beromo ma-saginiëri õ'ire ma'enë'i amo rejo sigagure õ'oho a'ohõ'õjë'i ma-u'emu ba'amevamumu je'onõ ruvebi sa'are ravo'amoromo ju'ebidëgodeje.

12

God-hu mu mabëhe röjahi'ego Paul-hu nia'ovo'iraeromo ganõvade jõhu'o huë vavaeni'e hijade jõhu'oje.

¹ Röhu õre gö bogojevë'ego gö'o nimoronimorohë'i jajivo'ejo. Nimoronimorohë'i jajivë'ohõ bogo ëhuro marëjevo'ë'e. Ĕhi jie röhu Badahu ajemi'ego nia'ovo'iraeromo ga'amonõvode jõho mu masije gö gö röjehi'ego nia'ovonõ'e ga'amonõvode jõho ëhi jië'e jõho iae na jajivo'ië'e. ² Na Christian ae gö gavë'e jeve. Ĕaho God-hu baejamu aruhe õ'idõ mare ajiomadeje. Ajiomoromo vuonorõ'õ ruvebijadõho vadune aho'obëhe 14 barëj'ëje. Nani hu sinohu'o ajiomadeje o nani sine diboromo ajiomadeje. Na'o bogo gave. Hesi God-ro gemuëro gave. ³ Naehu gavajõho ë aho God-ro baejamu Paradise-re ajiomadeje. Röhu maho uë'ëjo. Nani sinohu'o ajiomadeje o nani sine diboromo ajiomadeje. Na'o bogo gave. Hesi God-ro gemuëro gave. ⁴ Hu ajiomoromo hejadeje jõ mabëhe hesi jõho bogo ato'irõhe jõho uvavamu. Hejade jõ ma-aehu atë'ohõ sisëje. ⁵ Ĕhi jië'e a hesi jõho nimoronimorohë'i jõvo'ejo. Röhu nasi jõho bogo jõvo'ejo. Majae göro göro na bogo eni jevaje ë jõhemu nimorohë'i jõvo'ejo. ⁶ Röhu nasi jõho nimoronimorohë'i jõvo'ibejo ëho bogo simano rumo'e jõho jio'i ma-jõ mae jio'ibejo. Röhu bogo nimorohë'ioho jõvo'ejo jemëro ma-nasi jõhemu heromo uvõjõëni: Paul a börõme højo. Ĕhi jië'ohõ sisëje. O nasi mu jemesi nunehu garomo nasi jõ jemesi hia'ehu heromo nõrõ mae hø uehorovë'ohõ ëhemu iae maeje.

⁷ Röhu ae gö õ'idõre ajiomoromo Paradise garomo ruvebijade ë hesi jõ majëhijode hesi bëhõho nasi jõho majëhiromõ ë'odeje. Röhu ëhi jië'e mu masijo masijõho God-ro röjehijamu ga'amë'ëro na sisë'i uehorovoromo dõre bamorovõjõëni ëhuni huro huë vavaeni'ere bamevë'ëro huë vavaene gemuëro nasi sino uhure bibëro namijevanovajeje. Ĕbibëho Satan-hu nug'õ'jadõhoje na sisë vaejevonõvorõhego. Röhu ë vavaeni rovide hesi bëhõho naro bogo sisë'ioho uehorovoromo dõroho bamorovõ'irodego. ⁸ Bibëro nami-jevanovamumu hegoro vae niõ'i gemu Bada ëninami'i hijodeje rori'o babu'õjehorõhego. ⁹ Ĕninami'i hijamumu uevadeje: Bogo e'ëjõjo. Naehu huë baejavoromõ darugo bojamaõohuro ëhuro ja eni javajëjo. Ĕhesi bëhõho ae u'uhëvë'ohõ nasi darugõhuro ëhuro biririvëvo avohaje højo. Ĕhi uevë'ëro ëhuni rabe rabe bogo eni jevë'ohõ ëhi jië'e jõhuremu na nimoronimorohë'i jõvo'ejo. Ĕho nimoronimorohë'i jövë'ohõ nasi dë dövöbajo'o uhure ma-mabëhe jevo'ë'e ëhuro Keriso-are birirohuro na aegehõrõhego. ¹⁰ Ĕhu'ëro jië'ëro Keriso-are jõëni u'uhevë'ohõ o aehu sivegë'ohõ o naehu vörõ'ere va'ë'ohõ o aehu sisë vaejevë'ohõ o huë vavaeni bövi bise'o baejevë'ohõ iae na huë mae jevajeje. Ĕhesi bëhõho u'uhevë'ohõ iae evare na daruge baeromõ biririvevajeje.

Paul-hu Corinth aribõvi jabesi jõëni börõmo bëhe uehorovoromõ ëhuni jajivade jõhoje.

¹¹ Nasi arijo'ëro nasi jôho nimoronomorohë'i jövoromo êhuro na simano rumo'e aëro jajivanovë'e jeve. Jemëro na bogo ajemijë'ëro êhu'ëro na öre gö bogojevadeje. Bogo naehu a'i jemëro uvo'ibejarije: Paul mu mae vaejaje hõ uvo'ibejarije iae mae jio'ibejo. Röhu jemë bogo êhioho uvarijeje. Êhuro öre gö bogojevadeje. Êhesi bëhoho jemëro uvarujeje: Êi'o rovare aribövioho apostle masijo masije jioruomoli nõruare ihoho bogohõjo. Êhi uvarujeje. Iae na bise'e jeve röhu jabesi ihohuro nasi ihoho bogo iosiramiromo masijoho jioruomë'eje. ¹²Na jemë'o hijodevare evare apostle-ehu vaeruomaje êhi jië'e mu masijoho bogo gavarue darugo'e mue gö gö u'urume vaenövodeje jemëro garomo uvo'irarijigo: Nörö apostle hõjo. ¹³Naro jemesi öriroho diehi sisë'i ajëmijë'ëro jemë uvarujeje: Paul ekaresia ioro'iorohuremu ajëmi'i no bogo ajamujade hõjo. Jemë nani ëma uvarujeje: Paul-hu nosi mana bogo baeromo huë vavaeni bogo bojamuinövadoho êho sisë hõjo. Êhi jië'oho nasi sisëho uehorovoromo vuonugore.

¹⁴Röhu aveho gare. Urimë'i vae niö'i ö'oromo hijodoho iae na röhu maho ö'ie'e. Ö'ë'oho bogo huë vavaenoho bojëmiromo jemesiroho mu hesi manaho bae'ejo. Êhesi bëhoho na jemesi maho sisëho bogo uehorovo'irögoro jemë uehorovëve. Jemë nasi aboji harihu'o va'ëne jëvanove. Aboji harihu'oho bogo vëmu vavu'o jabesi jënioho maho sisëho gagovoromo bahijëhoruomoli a'i vëmu vavu'ohuro aboji harihu'ohuni gagovoromo bahijëhoruomajeje. ¹⁵Naehu jemë ajëmi'irodëni nasi mae sisë bojëmi barëromo nasi arijo'arije êhu'o bojamirovë'oho na mae jeve. Naro jemesi örire dë vövöbajo'e aho'o uehorovëvajeje. Na êhuni jemëro na bogo börömoho uehorovevarujeje.

¹⁶Nani jemë uvarujeje: Ja jö mae jövanuëjo. Jasi arijo'ëro nosiroho mu hesi manaho bogo baeromo huë vavaenoho bogo bojamujane hõjo. Iae mae-ëjo röhu ja sareri sareri'e aëro javë'ëro sareramuiromo nosi ijo bajoho ujuohahuane hõjo. ¹⁷Êhi uvarujoho na jemëro uvö: Paul-ro sarerivoromo hu'o röromo ae gö nugö'öjade hõjo huro ö'oromo nosi maho sisëho vajiohuvodaguojöro. ¹⁸Röhu na Titus sisë maro uvodeje: Corinth amoro va'onëromo Christian ö göho nugö'öjodeje Titus'o gemu mae ö'oröhego. Êhi ë'odeje. Titus-ro ö'oromo na huro sarerëmiromo jemesi inömoho vajiohëro ujuohëhadeje. Bogo. Jemë'o uehorovore. Hu'o na'o uehore gemuoho mue gemuoho baeromo jireharujeje.

¹⁹Ave noehu jajivarue jôho nani jemëro adahobe va'oromo uvonövö'aruje: O Paul-mëhu jajivare hesi bëhoho jabumëro jabesi ihoho nosi nunire avohoröhëni êhuni jôho jajivare hõjo. Röhu no bogo jemesi nuniroho riravoromo jajivo'i Keriso-are aëro javuë'ëro God-are nunire riravoromo jôho jajivë'e javue. Nosi ö mueno'e noehu jö jajivëhë'oho o mu rabe vaejêhë'oho ë hesi bëhoho bogo nosi ihoho avohorovoli a'i jemë ajëmego biririvëvoröhego ë'arujeje. ²⁰Na juhuoninege naro ö'oromo gëjööni jemë êhi mae jëvojöro negajoho gö jëvego o jemëro na gejëni jemë na sanu'e ae jëvojöro nëgajoho gö jevego. Na juhuoninege gëjööni jemë iro muorovo'e vaejigo o a jabesi mu mahuni dë vörönëgego o vörö'iraeromo muorovego o jemë sivu sivue uehorovego o jemëro ae göëro gö sivego o ae göëro gö hesi sisëho saginiëri atego o sivue döro bamorovego o jemesi nimarujohemu ëma vaejigo. Êhi jië'e mu sisëho jemëro vaejigo gëjööni êhuni juhuoninege. ²¹Na juhuoninege röhu maho ö'ego nasi Börömoho God-ro javoje bojemego jemesi nunire baejööni. Êhesi bëhoho na gëjööni ae aho'obëhe jemesirire mami'e mu sisë vaejaroho bogo vuonugë'e jioruomego. Biriri'övoromo öehu jijihanovoromo bövi bise'o ëma vaejaroho bogo vuonugë'e jioruomego. Êhi garomo huë vavaene böröme baejööni êhuni juhuoninego'ego jôho jajive ajëmi'irodëro.

13

Corinth rajehu avoho raromoröhego Paul-hu majëhiromo jögoru mëmade jöhoje.

¹Urimo vae niö'i ö'odoho röhu maho ö'ëjo. Êhi jië'oho vae niö'i gemu ö'ë'e jevo'ë'e. God-are surire jôho êhi uvë'eje: Ae rahumëhu ae gö hesi sisë court-re majëhijë'oho ae niö'i o niö'i gemu mu sisë gavarijohuro jöe gemuoho ajamirovoromo huruoho majëhi'iramu hesi jö sisëho jio'a'ajëjo. God-are surire jôho êhi uvë'eje. Êhuni jemë bogo avoho

raromë'oho naro ö'oromo jemesi jö sisëho majae niö'i gavodoho röhu maho gavëho'iramu jemesi sisëho va'orahore huruohëhë'e jio'ë'e. ²Urimë'i na ö'oromo rueromo röhu maho ö'ode majare evare jögore bojëmiromo uëvodeje: Mu sisë urimo vaejarije ariböviohu'o a ioro'iorohu'o naehu röhu maho rovë'oho bogo vuororëmi'i i'ue bojëmi'ejöjo. Jemë'o hiromo ëhi uëvodoho öre ëgo'o hiromo röhu maho ëhi gemuoho uëve. ³Naehu jemë i'u bojëmi'irode hesi bëhoho jemë uvarujeje: Ë'ego no ga'irarëjo Kerisoro Paul jöe bojamego o bogo bojamego huhu no majahuijajoho. Iae naro Keriso-are darugoho baeromo ö'oromo i'ue bojëmi'iramu ga'a'aruje Kerisohu na jö bojemajoho. Kerisoro bogo ma-u'uhoromo jemesi öriroho muoho vae'i a'i darugo ma'o vaejajeje. ⁴Iae Keriso-are sino u'uhamu korosire anamu guomadeje röhu avevejö'oho hu God-are darugoho baeromo birivoromo hijajeje. Keriso-are aribövie gemuohuro javuë'ëro no'o ëhi u'uhavuaajeje. Röhu God-are darugoho baeromo Keriso'o gemu mae raromoromo birivoromo jemesi örire ajëmi'ejö. ⁵Nasi öriroho nadi bijeho ge'i a'i jemesi arijo'arije garorovoromo gare jemë Keriso uhohu'o mae uehorovëvego o ma-döëremu mae uehorovëvego. Jemë iae garomo uvarujeje: Iesu Keriso Corinth rajo nosi dë vövöbajö'ere hijaje höjo. O na jemë madöëremu muoho vaejarujeje. ⁶Röhu naro uve: Jemëro garomo uvo'a'arujëjo: Paul-më bogo ma-döhemuoho muoho vaejarue höjo. Na nege jemëro ëhi uvo'irarijego. ⁷Noro God-are örire uavarueje huro ajëmege jemë bogo rireromëvo'iröhego. Ëhesi bëhoho bogo ae aho'obëhe uvo'irarijego: Paul-mesi darugoho ruahö'öjé'e hö uvo'irarijego bogo ëhunioho no uavarueje. A'i no uavarue hesi bëhoho jemëro mu maemu vae'irarijego ëhuni God uavarueje. Röhu jemë mu mae vaejamu noehu i'u bojëmi'iröhe darugo bogo röjëhijamu aehu uvë'oho: Paul-mesi darugoho bogohö uvë'oho iae hesije. ⁸God-are jö ma aho'iröhoho no bogo eni javu'o'i ma-nigemo'iröhoho eni javue. Ëhuni jemëhu mu mahemu ejamu gëvë'oho no i'u bojëmi'iröhe darugoho bogo röjëhi'ejö. ⁹Jemëhu Keriso-are darugo baeromo birivivë'oho o noehu Keriso-are darugo jemë bogo röjëhiromo i'u bogo bojëmamü a nunire u'uhavuvë'oho iae nimoroharueje. Jemëro avo'avoho uehorovo'irarijego ëhuni noro God-are örire ua gavarueje. ¹⁰Ëhu'ego na öre ëgo'o hiromo ave jö jajivaje hesi bëhoho na ö'oromo jemë'o hiromo nasi darugoho bogo baeromo vörö'e i'uhoho bojëmi'irodëni. Ëdarugoho Badaro bojemadeje bogo jemë ijumëvo'i a'i ajëmege avoho birivoromo mae uehorovobe va'irarijego.

Paul-hu ijo tugoho'i jejëmijade jöhoje.

¹¹Nasi ö mueno'e ijo tugoho'i jöho uë'ië'e. Mae raromere. Avo'avoho uehorovoromo nasi jöho ejehore. Uehore gemu baeromo huë mae baerovore. Ëhi ë'ë'oho God huë ma o sanu'e jö bojamuijaje ahuro jemë'o hi'ë'e.

¹²Christian ö mueno'ehu jejamirovaruëhi ëhi jejamirovore.

God-are aribövie aho'obëhe jemesi örire jejëmijö.

¹³⁻¹⁴Bada Iesu Kerisoro huë baejëvoromo jemë aho'o ajëminövo'i God-ro jemë aho'o uehorovëvonövo'i God-are Aru'aho Mahuro ae aho'o jemë'o gemu mae hi juvo'ë'e. Ahia mino'e.

GALATIANS

Paul-hu Galatia aribövi jejëmade jöhoje.

¹ O asë'e Galatia ekaresiaho Paul naro jemesi örire jajive. Na apostle jeve. Èhesi bëhoho bogo ma-aehu hesi uehorovoromo uevamu apostle muoho bae'i bogo God-ro ae uavamu ë ahuro rueromo uevamu apostle muoho bae'irögoro a'i Iesu Keriso'o God Vavuohu'o jaburo uevamu apostle muoho baejodeje. Iesu Keriso'o God Vavuehu Iesu ajamamu ri'öjade ë ahu'o ëho jaburo niö'iro uevamu muoho baejë'ëro ëhu'ëro na apostle jeve. Èhuni naehu majëhi'i'ë'aje jöho avo'avoho here. ²Röhu na'o gemuore arijarue Christian aganoho aho'obëhe na'o gemuore havoromo jemë jejëmijö ekaresiae aho'obëhe Galatia sa'are dinö'e dinö'e jëvajoho. ³Na nege God nosi Vavuohu'o Bada Iesu Keriso'o huë baeromo ajëmiwego maro raromo'irariwego. ⁴Kerisoro God nosi Vavu hesi jöho ejahoromo nosi sisëni guomorovadeje ëhuro avevejö'e jiaje mu sisë hesi darugore javuajoho baeniahiwego maro javuoröhego. ⁵Èhuni God-are ihoho noro mabëhe uabe va'onörovo'ejo. lae mae.

God-are jö mae ma-gemu jio'i gö gö bogojiaje jöhoje.

⁶Röhu jemë diehi diehi sisë'i ë'arujoho na heromo jöe barëjeve. Èhesi bëhoho God-ro Keriso-are huë mae röjëhiromo ëhuro hesinö rinëgadeje. God-hu ëhi ë'adoho jemë rabëni ma-burëroho hu vuonugo'i jö göho God-are jö maho höromo ejëhoromo baejö. ⁷Èjöho bogo God-are jö maehue Keriso-are jö maho gemu jio'i gö gö bogojie'ëgo. A'i aëro jemesi simanoho sisë vaejëhoromo Keriso-are jö maho huotohuotovo majëhi'i nimö. ⁸Noro urimë'i God-are jö maho majëhijareje. Noehu majëhijare jöho ae rahu vuonugo'i sarerëmiromo jöe gö majëhiromo jemë ëma uëvë'oho: Aveho God-are jö mae hö uëvë'oho God-are i'u börömoho baerumo'ë'e. Naehu ëhi sareri sareri ë'ë'oho o aneraehu ö'idöre jioromo ruvebiromo ëhi sareri sareri ë'ë'oho o ae rahu ëhi ë'ë'oho no God-are i'u börömoho bae hesi javue. ⁹No mami'e jemë'o ariromo ëhi jii'e darugo'e jö majëhijaroho röhu jaruvo na jöe gemuoho majëhi'ëjo. Jemëhu baejarije jö maho ae rahu vuonugo'i jemë sarerëmiromo uëvaruoho: Ave jö göho God-are jö mae hö uëvaruoho God-are i'u börömoho bae hesi jioruome.

¹⁰Naehu avevejö'e jajivaje jöho na na ma-aëro mae uehorovevojöro ë'e o na na God-ro mae uehorovevojöro ëhuni jajive. Na na ma-aëro rajehijöro jajive. Naehu ë'odëhi na ma-aëro rajehijöro jöho majëhi'ibejo ëhuro na bogo Keriso-are mu ajamijaje aho jevo'ibejo.

Paul-hu a majëhijaje jö maho ë jöho bogo aroho bae'i Iesuaro baejade jöhoje.

¹¹Röhu nasi ö mueno'e na nege jemëro ave jöho avo'avoho he'irariwego. Keriso-are jö ma naehu majëhijamu hejarijoho bogo ma-aehu jabesi ma-uehorovoromo na majehare jöhoje. ¹²Bogo aehu aevoromo jöho majehiromo bëhoho huruoho majehi'irögoro a'i Iesu Kerisoro huro jöho majehijamu baejodeje.

¹³Iesu Kerisoro majehi'i bogo Keriso-are ariböviehu majehijamu hejodeje. Jemë'o uehorovore. Naehu bogo Christian vaejë'e Jew rajo a mami mu vaeromo God rajahinövode majare evare naehu diehi diehi hi juvonövode jöho mami'e hejarijeje. Evare majare naro birivoromomo God-are ekaresiae aho'obëhe sisë vaejëvobe mu'u'amo'i ë'lo gabe rovodeje. Èhuni Keriso-are jöho bogo jabesi öriroho hejodeje. ¹⁴A'i vadune gemuore jioruomade ë aribövioho nasi Jew raje gemuoho aho'o naro iosirëmiromo Jew rajo nosi hijo miono'o jabesi jögoroho nimoromo nosi Jew rajo muoho bae avohodeje.

¹⁵Èhi jii'e ae jevadoho röhu urimo mamo na bogo rahevë'e ma-dëre jevamu evare God-ro hesi jevojöro nijio'iraejevë'ëro ijönö huë baejevoromo hesinö ringadeje. ¹⁶Rinegoromo huhu nimadëhi hesi Harihoho röjëhijadeje naro garomo Jew rajo nosi sa'aroho bogo a'i sa'a ioro'ioro rajo jemesirire Keriso-are jö maho majëhibe juvonövö'irodego. Röhu God-ro hesi Harihu röjëhijadevaroho evaroho na bogo ë amoroho hiromo a jö'oroho baeromo ¹⁷bogo Jerusalem amo börömoroho ajiomoromo urimo riravare apostle ömo'ömohu'oho

jõho atoromo jö maho ë bae'irögoro a'i na ma-burëro öre gö va'oromo Arabia sa'are hijodeje. Hijë'ëro Damascus amore vuonorö'öromo rovodeje. ¹⁸ Amo röhu God-hu na hesi Harihu röjehjadoho vadune aho'obëhe niö'i gemu barëjamu evare na Peter'o jöe jörovo'i Jerusalem amore ajimodeje. Röhu majae ma-bisemu hurae niö'i rabu'e ëhi hu'o hiromo va'odeje. ¹⁹ Peter iae naro garomo röhu Bada Iesuare öho James hu'o gavodeje. Röhu apostle ioro'ioroho bogo gëvë'e ma-va'odeje.

²⁰ Naehu jemesi örire jajivaje jöho God-hu gevajoho na bogo sarerëmije.

²¹ Apostle ioro'ioroho bogo gëvë'e ma-va'odeje. Jerusalem amoho Judea sa'aho nugo'i va'odoho va'o Syria sa'are Cilicia sa'are hibe juvodeje. ²² Röhu Keriso-are ekaresiae gö gö Judea sa'are raromaruoho ëho jabu nasi nu ano'oho bogo gavareje. ²³ Nasi nu ano'oho bogo ga'i ma-hejareje aëro uvavamu: Urimoho nöörö Christian aribövi nosi örire sisë'i vaejavuobe juvade höjo. Sisë'i vaejavuobe juvoromo Keriso mae uehorovarue mu mu'lu'i ë'o gabe juvadoho röhu avevejö'oho Keriso mae uehorovo'iröhe jöho nöörö majëhibe juvaje höjo. ²⁴ Ëhi uvamu hejë'ëro jië'ëro nasi jöëni God mabëhe uavareje.

2

Paul-hu a majëhijaje jöho Jerusalem ekaresia a masijohuro heromo uvareje: Ëho jö mae höjo. Ëhesi jöhoje.

¹ Ëhi'oromo vadune aho'obëhe 14 barëjamu gagorovo naro Barnabas'o gemu mae Jerusalem amo böörömore vuonorö'ö ajimodeje. Röhu Titus hu'o hu'irae baeromo ajimodeje. ² Ajimode hesi bëhoho God-ro uevë'ego ajimodeje. Ajimoromo ekaresia a masijoho jaburemu na'o nosi hahagu gagovororomo jöho atareje. Atoromo naehu sa'a ioro'ioro rajo diehi jië'e jö majëhibe juvode jöho naro huruoho majëhijodeje ë ekaresia a masijohuro avoho heruomoröhego rabëni naehu mami'e vaebe rovode muoho jabumëro ahego bejööni. Iae ëhuni avoho majëhijodeje. ³ Röhu nasi muoho bogo ahehareje. Bogo ahehoromo uevareje: Sa'a gö rajoho Jew rajo jögoroho röjëhi'ibejanëjo. O na'o rovade aho Titus bogo Jew rajehu jio'i sa'a gö raje a jiajoho röhu jabumë bogo uövuareje: Titus baeromo Jew rajo muoho vaeromo sinoho tariojahego hu God-are nunire mae nami'irajo. Ëa masijoho bogo ëhi jië'e jöho uö'i a'i ⁴ hesi ae göëro nimareje Jew rajehu ë'aruëhi ëhi ë'oromo Titus-are sinoho tariojahojöro. Röhu jabumë ma-döëremu Christian aribövie jëvë'ëro ë'areje. Ma-döëremu Christian aribövie jioromo sisë'i uehorovoromo saginiëri rueromo nosi gemuore gagovareje ga'i no lesu Keriso-are ae gemuohuro javuë'ëro no diehi jië'e sasohë'e muoho baejë'e javuego. Ëhesi bëhoho jaburo nimareje Jew rajo nosi i'u'e muoho noro röhu maho vaemu vaeröhego. Ëhuni nimareje Titus-are sinoho tariojahojöro. ⁵ Ëhi nëgamu röhu jabesi jöho no bogo mae bogo ejëhareje ëhuro noro Keriso-are jö maho avo'avoho muebejogo jemëro ë jöhemu he'irarijogo.

⁶ Röhu ekaresiaehu uvoruomaje a masije hö uvoruomaje aribövioho jabumë a masijoho o ininoho naro uehorovoromo uvareje: Iae hesi höjo. Ëhesi bëhoho God-ro gövuareje a masijoho o ininoho bogo göho göho javuo'i ma-gemuoho javuego. Röhu ë ekaresia a masijohuro naehu majëhibe juvaje jöho heromo röhu jö gö'oho bogo döroho bojemijareje ëhu'o majëhijöro. ⁷ A'iro jabumëde iae mae garomo uvareje: God-hu Peter mu bojami-jadëhi ëhi nöörö muoho bojamijade höjo noro Keriso-are jö maho baeromo Peter-ro Jew rajo örire majëhibe juvo'i naro sa'a ioro'ioro rajo örire ëhi majëhibe juvo'irodego. ⁸ Ëhesi bëhoho God-ro Peter darugoho bojamijadeje huro apostle muoho baeromo Jew rajoho ajëmi'iröhego. God-hu Peter darugo bojamijadëhi na'o ëhi bojemijadeje naro apostle muoho baeromo sa'a ioro'ioro rajoho ajëmi'irodego. ⁹ Ëhuni ekaresiaehu uvoruomaje masije hö uvoruomaje aribövioho James Peter John ëho jaburo garomo uvareje: God-ro huë baeromo nöörö muoho bojamade höromo na'o Barnabas'o öve ma'enguoromo uövuareje: Jemë'o no'o uehore gemuoho javuajëjo. Noro Jew rajo nosi sa'are jöho majëhibe jijiho'i jemëro sa'a ioro'ioro rajo jabesi sa'aro va'o jöho majëhibe jirehonövorëjo.

¹⁰ Sa'a ioro'ioro rajo jabesi sa'aro va'o majëhibe jirehorëjo röhu nosi aribövi inömo

bogojävajoho êho uehorovëvonövorëjo. Ekaresia a masijohuro êhi uövuareje. Röhu êhi jië'e huë baejë'e muoho iae naro vae'i nimobe rovë'e jeve.

Antioch amore Peter-hu mu sisë vaejamu Paul-hu jögoru bojamade jöhoje.

¹¹ Röhu Peter Antioch amore rovamu naro hesi nuniro hu jö aho'ahamijodeje hu mu sisë vaejë'ego. ¹² Naehu êhi uavode hesi bëhoho urimoho Peter-hu aevoromo Antioch rovadevare evare uvadeje: Jew rajo mu vaeromo sino tarivarue Christian aribövioho no'o Jew rajo mu bogo vaeromo sino bogo tarivarue Christian aribövioho jabu'o gemuoho javuajë uvoromo sa'a ioro'ioro rajo Christian ö mueno'ohu'o gemuoro hiromo ioho inövadeje. Gemuore hiromo i ibe rovadoho gavade Jew rajohuro James-arire jioromo ro Antioch raromamu gëgorovo uvadeje: Êsino tarivojööro nimarue ariböviehu gevë'oho na Jew rajo mu bogo vaejarue ariböviohu'o gemuore hijamu gevë'oho bijönimoruomo'a-jëromo juhuonivoromo sa'a ioro'ioro rajohu'o i ijadoho vuonugo'i rori'o va'o hijadeje. ¹³ Peter-ro juhuonivoromo êhi jië'e sareri sareri'e muoho vaejamu gagorovo Jew rajo ioro'ioroho jaburo sa'a ioro'ioro rajohu'o gemuore raromoromo i ue'aharoho vuonugo'i jabu'o ëma sarere rori'o raromareje. Rori'o raromamu gëgorovo Barnabas-ro hu'o ëma sarere va'o rori'o hijadeje. ¹⁴ Jabumëro êhi'amu gëgorovo Paul naro mae gëromomo uvodeje: Jabumë God-are jö maho bogo avo'avoho uehorovoromo ahoriroho va'aruëromo êhuni ri'öromo Christian ae aho'obëhe jabesi nuniro namiromo Peter-are örire uvodeje: Ja Jew rajo ae javajëjo röhu Jew rajo muoho bogo uehorovo'i sa'a ioro'iorehu raromaruëhi êhi hibe rovë'e javajëjo. Êhi jië'oho ja rabëni sa'a ioro'ioro rajoho gorëvanuëjo. Jabu gorëvanuohuni dadibijohoromo Jew rajo muoho baejë'oro.

God-are nunire mae riravo'iröhe hesi öroho ma-gemu jie. Iesu mae uehorovoromo êhuro mae riravo'ejo. Êhesi jöhoje.

¹⁵ Röhu no Jew rajo mae javue nosi hijo miono'oho Jew raje jiobe rovë'ëro. No bogo God-are jögoru rumo'e sa'a ioro'ioro rajoho javuo'i no Jew raje javue. ¹⁶ Röhu noro garomo uvarueje: Ae rahu rahu God-are nunire mae nami'i nimë'oho hu bogo Jew rajo nosi jögoroho ejego God-ro garomo hesi sisëho u'ovahëgo hesi nuniroho maho namijaje höjo. Öroho bogo êhioho höjo. A'i Iesu Keriso mae uehorovego God-ro hesi sisëho u'ovahëgo hesi nunire mae namijaje höjo. Mae nami'iröhe hesi öroho iae êhi höjo. Noro êhi gavë'ëro êhuni Jew rajo Christian aribövioho no'o Iesu Keriso mae uehorovë'e javue noro hu mae uehorovoromo êhuro God-are nunire mae riravo'iröhëni. No bijönague mu vaeröhe jögoru e'i ë'o garomo êhuro hesi nunire mae riravo'i ë'o ga'iröhoho. Êhesi bëhoho bogo ae gemu vadu'oho noehu mu vaeröhe jögoroho ejego God-ro göromomo nosi sisëho u'ovahëgo hesi nuniroho maho riravarueje. ¹⁷ Jew rajo Christian aribövioho no God-are nunire mae riravo'i naguajoho no bogo Jew rajo nosi jögoroho uehorovo'i a'i no nimarueje God-ro no Keriso'o gemu mae ramuego êhuro God-are nunire mae riravoröhëni. Êhi nimoromo no'o Jew rajo jögoru rumo'e aribövie sa'a ioro'ioro rajoho va'ëne javuanovajeje. Êhi jië'oho na no ëma uehorovoromo uvo'ejo: God-hu Jew rajo bojamuade jögoroho Kerisoro ajamuego ahoromo mu sisë vaejarue höjo. Bogo mae bogo êhioho uvo'ejo. ¹⁸ Naro mami'e uëbe rovodeje: God-are nunire mae riravo'ie'iroho bogo Jew rajo jögoroho ejego êhuro God-ro nosi sisëho u'ovahëgo hesi nuniroho maho riravarue höjo. God-are nunire mae riravo'iröhe öroho bogo êhioho höjo. Röhu naehu êhi majëhinövode jöho ahoromo uë'ibejo: Jew rajo jögoroho ejego God-ro göromomo nosi sisëho u'ovahëgo hesi nunire mae riravarue hö uë'ibejo naro sisë'i majëhiromo êhuro God-are jögoroho aho'ibejo. Röhu bogo êhioho majëhi'ejo. ¹⁹ Naro mami'e uehorovoromo uvodeje: Jew rajo jögoru ejë'oho êhuro na God-are nunire mae nami'ejöromomo Jew rajo jögoroho e'i sivoho gajuvo gavode bogo eni jevamu gagorovo uvodeje: Noehu God-are nunire mae riravo'iröhe öroho bogo êhioho höromomo êhi uehorovodoho vuonugodeje. Na êhi jië'e uehoroho ioro'iore gemu vuonugë'e jeve. Aehu vuovoromo ioro'iore gemu va'aruëhi na êhi ioro'iore gemu ë öroho vuonugë'e jeve êhuro na i'ovoromo hiromo God-are muohuremu vaebe juvo'irodëni. Keriso korosire guomadevare evare na hu'o korosire

ano taemevamu guomevanovadeje. ²⁰ Guomevë'ëro ëhu'ëro na bogo nasi darugoroho o nasi uehororoho hi'irögoro a'i Kerisoro nasi dë vövöbajore ere hiromo darugoho uehoroho bojemego hijajeje. Sa'are hijajoho God-are Harihoho mae uehorovoromo ëhuro ave sa'aroho hijajeje huro na uehorovevoromo nasi jöëni guomorovë'ëro jië'ëro. ²¹ God-hu huë mae baejavuoromo hesi Harihoho suvuoroho bojamuijadeje. Èsuvuoroho na bogo mae bogo juahamiromo uvo'ejo: Na bogo Keriso gemu uehorovo'i a'i Jew rajo nosi jögoroho e ga'ejöjo God-ro geromo nasi sisëho u'ovehego hesi nunire mae nami'irodëni. Na bogo ëhioho uvo'ejo. Noro Jew rajo jögoroho ejego God-ro göromo nosi sisëho u'ovahuego hesi nunire mae riravo'ibejo Keriso nosi sisënioho ma-imo guomë'e jio'ibejo. Röhu bogo ëhiohoje. Èhuni Keriso-are suvuoroho bogo juahovoromo Jew rajo jögoroho röhu maho uehorovo'ejo.

3

God-hu nosi aru'aho ajamuaje hesi bëhoho bogo noehu mu vaeröhe jögoru ejahego God-hu göromo ajamui'a'i noehu hu mae uehorovego ajamuijaje jöhoje.

¹ Vaevë'e Galatia sa'a rajohumë sareri simano rumo'e aribövie jëve. Diehi'amu simanoho sisërëjähë'ëro sisë'ioho uehorovarujeje. Nadi ëhioho uehorovo'ibejarije. Èhesi bëhoho Iesu Kerisohu korosire guomade jöho naro ma-sama'e majëhijamu jemë ae aho'obëhe hejarijeje. Èhi hejarijoho röhu diehi'oromo sisë'ioho uehorovarujeje. ² Ave jöhuremu majehirego na he'iro. God-are Aru'aho baejarije hesi öroho diehi jiadeje. Na jemë Jew rajo jögoroho eromo ëhuro Aru'ahoho mana baejarijeje. O na jemë Keriso-are jöho heromo mae uehorovoromo Aru'ahoho baejarijeje. Iae mae uehorovoromo Aru'ahoho baejarijeje. ³ Röhu jemë diehi'oromo sisë'ioho uehorovarujeje. Aevoromo Keriso-are örire jijiharijevare evare God-are Aru'aho hesi darugoho baeromo jijihonövarijeje. Èhi jië'ohu diehi'oromo öri vituoho jemesi darugohuremu jijihö'i nëge. ⁴ Asë'e jemë Keriso-are mu öri bae avohobe rovarijoho na ë muoho ëma sisërë'l'ë'e. Bogo. ⁵ Iae God-ro hesi Aru'ahoho ma-mabëhe bojëmiromo darugo'e mu masijoho jemesirire vae'amajeje. Rabëni ëhi jië'e darugoho bojëmijajeje. Na jemë Jew rajo jögoroho ejë'ego ëhuni ë hesi manaho darugoho bojëmijajeje. Bogo. A'i jemëro Keriso-are jöho heromo mae uehorovë'ego ëhuni ë'ajeje.

⁶ Röhu Jew rajo nosi bëhoho Abraham ëhi gemuoho jiadeje. Hu'o God mae uehorovoromo ëhuro huë maho baejadeje. Èhesi jöho God-are surire jajivoromo uvë'eje: Abraham-ro God mae uehorovamu huro ëho garomo uvade höjo: Èhuro iae hu nasi nunire mae namijajëjo. ⁷ Èhuni jemë ga'a'aruje Abraham-are ujo ömo'ömo maho ëho God mae uehorovarue aribövie jio'amö'iramu. ⁸ Iae God-ro uvadeje: Ijonö bogo Jew rajoho gemu a'i sa'a ioro'ioro rajohu'o nasi örire mae uehorovë'öuhuro ëhuro naro jabesi sisëho u'ovëho'iramu nasi nunire mae riravoruomö'ajë uvoromo ë jö mabëhoho Abraham-are örire majahijadeje. Huhu majahijade jöho God-are surire jajivoromo uvë'eje: God naro ja ajami'iramu ëhuro sa'ae dinö'e dinö'e aho'obëhe nasi huë maho baebe va'oruomö'ajëjo. ⁹ Èhesi bëhoho Abraham-ro God mae uehorovamu God-ro hesi örire mamabëhe ajamijë'ëro ëhuni ae rahu God mae uehorovë'öho God-hu Abraham ajamijadëhi ëhi ma-mabëhe ajamuijajeje.

¹⁰ O ae rahu uvë'öho: No God-hu bojamuade Jew rajo jögoru ejaho'i ë'ë'öho ëhuro hesi nunire mae riravo'ëjarë uvë'öho ëhi jië'e aribövioho God-ro i'ue bojëmego bae hesi jëve ë jöho bogo e barëjë'ëgo. God-are surire jöho ëhi uvë'eje: Mu vaeröhe jögoru surire jajivo'amadoho ae rahu ë jögoru bogo e barëjë'öho God-are i'uoho bae hesi jëvavëjo.

¹¹ Aehu hesi darugehu Jew rajo jögoru e'i ë'ë'öuhuro bogo ëhuro God-are nuniroho maho riravarujeje. Èjöho iae ma-va'orahoroje. Èhesi bëhoho God-are surire jöho ëhi uvë'eje: Ae rahu God mae uehorovoromo ëhuro hesi nunire mae riravë'öho ë ariböviohuremu maroho raromoruomö'ajëjo. ¹² Aehu hesi biriri baeromo Jew rajo jögoru e'iröhoho ëho mue gö jio'i mae uehorovoromo uvë'öho: Hesi God-ro ajamui'ajë uvë'öho ëho göje. God-are surire jöho ëhi uvë'eje: Ae rahu Moses-are jögoru e barëjë'öuhuro ëhuro maro

raromoruomo'ajëjo. Èho bogo God mae uehorovego God-hu mae ajamui'ajë uvo'iröhe jöho jio'i nosi biririvoromo mu vae'iröhe jöhoje.

¹³ Röhu noro ë jögoroho ahë'ëro ëhu'ëro i'u börömo mana bae hesi javue. Èi'u börömo bae'iröhoho Kerisoro no'o röromo ë i'uoho baeromo ëhuro noehu bae'ibejarohe tugohahuadeje. Èhesi jöho God-are surire jajivoromo uvë'eje: A ijo döre iromë'oho ë hesi bëhoho ë aho God-are i'u börömo baej'ëro jië'ëro ëhuni ijoroho iromaje höjo. Èhi jajivë'eje. Röhu Kerisoro ijo döre ëhi iromoromo ëhuro nosi jöëni i'u börömo God-aro baeromo ëhuro noehu bae'ibejare i'uoho tugohahuadeje. ¹⁴ Kerisohu nosi i'u ëhi tugohahuade hesi bëhoho iae naro majëhi'ie'e. Urimë'i God-ro Abraham mae uavadeje: U'emu naro jemë mabëhe ajëmi'iramu maro raromo'arujëjo. Röhu Iesu Kerisoro noehu bae'ibejare i'uoho tugohahuadeje ëhuro God-hu Abraham-më ajëmi'iröhëni uavadëhi sa'a ioro'oro rajoho jemë ëhi ajëmijego maro raromo'irarjiego. Noehu hu mae uehorovaruo-huro ëhuro God-hu hesi Aru'aho bojamui'i uövuadëhi ëhi bojamuijego noro bae'iröhego. Iae ëhuni Kerisoro noehu bae'ibejare i'uoho tugohahuadeje.

Urimo God-hu hesi aribövi ajëmi'iröhe jögoroho Abraham majahiromo ijönö mu vaeröhe jögoroho Israel rajo bojëmijade ë jögoru niö'i jabesi jöhoje.

¹⁵ Nasi ö mueno'e noehu ataruëhi jië'e jöho jövo'irögoro ë'e jemëro ëho uehorovego jö bëhoho juvo bu'ö'iröhego. Ae niö'iehu jö gemuore uehorovoromo mae uarovë'oho: Noehu jörovarue jöho iae ëhi jiemu jio'a'ajë uarovë'oho aho jö göho bogo baro nosi jö gemuoroho havo'ë'ö o aho'ë'ö. ¹⁶ Èhesi bëhoho God-ro Abraham'oho hesi ujohu'o mae uëbe rovadeje: Naro jemë ajëmi'ejöjo. Röhu God-are surire jajivare jöho bogo uvë'eje: Jasi ujoho aho'obëhe ajëmi'ejö uvo'i a'i uvë'eje: Jasi ujoho ajami'ejöjo. Èhesi bëhoho a uje gemu ajami'iröhëni uavadeje. Ujoho iae Keriso jiadeje. ¹⁷ Èhesi bëhoho naro majëhi'irögoro ë'e. Urimë'i God-ro Abraham-are örire jögoroho bojamiromo jöho majahi barëromo röhu uavadeje: Na jövode jöho bogo vuonugo'i iae na ajëmi'ejöjo. Èhi uavë'ëro va'o va'o va'o vadune aho'obëhe 430 ëmino'e barëjamu ijönö mu vaenövo'iröhe jögoroho bojëmijadeje. Bojëmamu röhu bogo ëhuro God-hu ajëmi'iröhe jögoru Abraham bojamijadohe tugoho'i a'i God-hu ajëmi'iröhëni mae jövade jöho ëhi jiemu jio'be rovadeje. ¹⁸ Noehu mu vaenövoröhe jögoroho ejahoromo ëhuro God-are suvuoroho mana bae'ibejo no uvo'ibejo: God-ro no ajamui'i Abraham mae uavë'ëro bogo ëhunioho hesi maho bojamui'i a'i huro gavade noro mu mae vaejamu gagorovo iae ëhuni hesi suvuoroho mana bojamuade höjo. Röhu bogo ëhiohoje. God bogo Abraham-are mu maho garomo hesi suvuoroho manaho bojami'i a'i God-ro no ajamui'i Abraham uavë'ëro ëhuni hesi suvuoroho Abraham bojamadeje.

¹⁹ Noehu mu vaenövoröhe jögoru ejahamu God-hu hesi suvuoro bogo mana bojamui-jë'oho hu rabëni mu vaenövoröhe jögoroho bojamuadeje. God-ro ajamui'iröhe jöho urimo bojamuij'ëro ijönö noehu mu vaenövoröhe jögoroho bojamuijadeje noro garomo uvoröhego: No God-are jögoru aharue aribövie javuajëjo. Noehu mu vaenövoröhe jögoroho bojamuijadeje ma-jahuri hebe uehorovobe va'öjuvo God-hu ajami'iröhëni uavade aho Abraham-are uje gemu Kerisoro rovego evare noehu mu vaenövoröhe jögoroho barë'iröhego. Röhu noehu mu vaeröhe jögoru God-hu bojamui'ie'adevaroho evaroho bogo ahoriroho nosi öriroho bojamui'i a'i ë jöho anerae bojëmamu jabumëro rueromo God'o no'o jiarue ririre namiromo nosi öri avohahuonövade aho Moses bojamamu huro ë jöho baeromo no bojamuijadeje. Èhi'adeje. ²⁰ Röhu ae göehu göehu jö mevë'oho ae göëro rueromo öroho avohëhego jöho juvo bu'öjajeje. O ae gemuehu jö bojamuij'ëro a göho bogo rueromo jö bojamui'iröhe öroho avohahuo'ë'e. Èhesi bëhoho God-hu no ajamui'iröhe jö Abraham bojamadevaroho huro sivue ë jöho Abraham bojamadeje.

Noehu mu vaeröhe jögoru God-hu bëhoho rabëni bojamuade jöhoje.

²¹ Ajamui'iröhëro God-ro Abraham jöe gö gö majahijë'ëro röhu ijönö noehu mu vaeröhe jögoroho bojamuadeje. Èhi ë'adohuro na ëhuro urimo uavade ajamui'iröhe jögoru öroho ahadeje. Bogo mae bogo. Èhesi bëhoho mu vaeröhe jögoroho God-ro bojamuego

noro ejahoromo ehuro daruge baeromo maro raromo'ibejo noehu mu vaeröhe jögoru ejaruohuro ehuro God-are nunire mae riravo'ibejo. ²² Röhu God-are surire ehi uv'eje: Ae aho'obéhe dinö'e dinö'e raromaruoho siséro ruahö'öjavu'e höjo. Ehi jajiv'eje. Ehu'ero jii'ero mu sisé vuonugo'i God-are suvuoro bae'ie'iroho e hesi öroho ma-gemu jie. Eöroho Iesu mae uehorovo'iröhohoje. Ae rahu Iesu Keriso mae uehorov'ohuro ehuro iae God-are suvuoro maho baejarueje Keriso mae uehorovarue aribövioho no God-ro ajamui'i uövu'e'ero jii'ero.

²³ Noehu Keriso mae uehorov'oho God-ro ma-marö ramuajeje. Ehesi majaho jaruvoje. Röhu urimoho e maja bogo rovadevare no tövavu'e'ero jii'ero bogo rueroho numeroho va'i ma-Jew rajehu mu vaeröhe jögoru hesi ahariremu raromobe rovareje. Ehi'obe rovaroho ijönö Keriso mae uehorovo'iröhe öroho hurorohadeje. ²⁴ Aehu asisö'o söromo avo'avoho muebejövobe va'ego asisö'ehu ma-aharirehu va'aruéhi Jew rajehu mu vaeröhe jögoroho ehi jiadeje. No Jew rajo jögoru ahariremu asisö'onö'e raromobe rovamu Kerisoro sa'are rovadeje. Jögoru hesi aharire raromare hesi bëhoho öre röjahuijego noro Keriso mae uehorovoromo ehuro God-are nunire mae riravo'iröhego. ²⁵ Röhu jaruvoho noehu Keriso mae uehorovo'iröhe majaho rov'eje. Emajaho rov'ego no bogo e mu vaeröhe jögoru hesi ahariroho raromarueje.

²⁶ Jemé ae aho'obéhe Keriso mae uehorovoromo Keriso'o gemuore bimuv'e'ero ehü'ero jemé God-are aboji harihu'e jëve. ²⁷ Ehesi bëhoho bapataeto vaejarijohuro ehuro Keriso'o gemuoro bimuvoromo jeméro Keriso-are muoho niögu i'o va'ëne ehi jemesi sinore io'amé'e jëve. ²⁸ Ehuni Jew rajohu'o sa'a ioro'oro rajohu'o jemé bogo hahagu hahaguoho jëvo'i Keriso'o gemuoro hav'e jëve. A jabesi muemu vaejého'i arijaruje ahü'o a uno'ohu'o bogo hahagu hahaguoho jëvo'i Keriso'o gemuoro hav'e jëve. A'o magonaho'o bogo hahagu hahaguoho jëvo'i Iesu Keriso'o gemuoro hav'e jëve. Jemé ae aho'obéhe Iesu Keriso'o gemuoro jëve. ²⁹ Keriso-are ariböviero jëv'e'ero ehü'ero jemé Abraham-are uje jëve. Ehuni mami'e God-ro Abraham'o hesi ujohu'o diehi ajamui'iröhëni Abraham-are uavadëhi iae jemé ehi ajëmi'iramu mae jëvo'ë'e.

4

Iesuro sa'are rueromo ajamuij'e'ero ehü'ero no bogo ma-muemu vaemu vaejarue aribövioho va'ëne javuo'i God-are aboji harihu'e javue. Ehesi jöhöje.

¹ Röhu ave uhu jöhu'o ué'ie'e. Harihoho bise'eje röhu ijönö vavu hesi sionoho bae'ie'ero ehü'ero e vavuehu muebe'amaje inömoho hesi harihu hesi ihoro jio'ame. Ehi jie röhu a bise'ego mu vaemu vaejarue ahuni aehu e'aruéhi harihu hesi örire ehi e'arueje. ² Aëro hu jögoroho bojamibe hesi maho sisého muebejahobe va'arueje hujeji hesi vavuehu uvade majaho rueröhego. ³ No ehi javuadeje. Urimoho no asisö'o va'ëne javuadeje. Noro uvareje: Aru'ahe gö mue gö masijoho höromo ëma imo ehëmu uehorovoromo muoho vaejëhemu vaejëhonövareje. ⁴ Ehi'obe rovaroho röhu majae eni jiamu gagorovo God-ro hesi Harihoho nugö'öjamu sa'are rovadeje. Rovamu ma-magonahëro hu rahadeje. Rahamu hu Jew rajo nosi jögoru aharire jöbobe rovadeje ⁵ ehuro Jew rajo jögoru aharire sisé'i raromarocho ajamuego no mae javuoromo God-are aboji harihu'e javuo'iröhego. ⁶ Jemé hesi aboji harihu'e jëv'e'ego God-ro hesi Harihu hesi Aru'ahoho nugö'öjamu nosi dë vövöbajö'ere abo hijj'e'ero uvareje: Apajo. ⁷ Ehu'ero jii'ero jemé ae gemu gemu bogo ma-mu vaemu vaejarue aribövioho jëvo'i a'i God-are aboji harihu'e jëve. Hesi aboji harihu'ero jëv'e'ero God-ro hesi darugoho bövioho bise'oho jemé i'imëmi'iramu ujuoho'arueje.

Paul-hu Galatia ekaresia jabesi jöëni nurunurumade jöhöje.

⁸ Röhu urimoho God-are jöho bogo henövareje. God-are jö bogo hejarijevare evare ëma sarerivoromo uvonövareje: Aru'ahoho bövioho bise'oho masije höromo ehëmu uehorovoromo sisé'i raromonövareje. ⁹ O jaruvoho jemé iae God biroh'e jëve e hesi bëhoho God-ro jemé birohëv'e'ero. Röhu jemé mami'e asisö'o majëhijanovarue jögorohëmu ejëhoromo aru'ahe gö gö masije hö uehorovarijëhi ehi asisö'o majëhijanovarue jögoru

gõho ejëharujeje. Asisõ'o majëhijanovarue jögoroho ejëhoromo sarerivoromo uvarujeje: No Jew rajo mu vaerõhe jöguru ejëhë'oho ëhuro God-are nunire mae riravo'ejarëje. Rõhu ejëhë'oho bogo ëhuro maho riravo'aruje ë jõho bogo eni jië'ëro. ¹⁰Ëjögoroho ejëhoromo gavarujoho majaro huraro manaeroro vaduniro rovego gagorovo uvarujeje: Ëmajaha maja masijo rue'amaje majaho hõjo. Ëmajaho avo'avoho uehorovë'oho God-ro göromo rajahui'ajëjo. Rõhu ëhi jië'oho sisë'i uehorovarujeje. ¹¹Na jemesi jõëni juhuoninegavave naehu jemëni vaebe rovode muoho sisë'rëjõëni.

¹²O asë'e nasi õ mueno'e na jemesi jõëni vavaenego'ego uëve. Naehu majëhi'ië'aje jõho nadi bijõnimore. Jemë bogo Jew rajoho jëvë'ëro Jew rajo mu vaerõhe jögoroho bogo uehorovonõvarijeje. Na Jew raje jeve rõhu Jew rajo mu vaerõhe jögorohemu uehorovodoho vuonugë'ëro jemë val'ëne jeve. Ëhuni naehu God-are nunire mae nami'irodëro Jew rajo jöguru bogo uehorovo'i Keriso gemu mae uehorovajëhi jemë'o ëhi ë'ore. Urimoho jemë na bogo sisë'ioho vaejevonõvarijeje. ¹³Jemë'o uehorovore. Naehu jemë'o aevo'i hiromo Keriso-are jö ma majëhijode hesi bëhoho na guomo guome baegoro jemë'o aevo'i hiromo jõho majëhijodeje. ¹⁴Nasi guomo guomohuro jemë esi'esiemánovodeje. Rõhu jemë na bogo bijõnegoromo nuni juhuoninioho baejarijeje. A'i ma-mabëhe rajehijarijeje. God-are aneraëro o Iesu Kerisoro jemesi õrire õ'ego mabëhe rajahi'ibejarijëhi ëhi gemuoho jemëro na rajehijarijeje. ¹⁵Rajehiromo evare majare nasi jõëni nimoroho avoharijeje. O jaruvoho bogo ëhioho nimoroharujeje. Ëhesi bëhoho rabënivo bogo nasi jõënioho nimoroharujeje. O urimoho jemë eni jëvo'ibejo ri'õromo jemesi nuni baje jahoromo bojemi'ibejarije o bövie bise'e bojemi'ibejarije. Ajemiromo ëhi'o'ibejarije. Iae na mae uëve. ¹⁶Jemë ëhi rajehijarijeje. O jaruvo naehu jemë God-are jö maemu majëhijodoho na jemë ëhuni uvõ: Nõrõro nue huodaguoromo ë'ajëjo.

¹⁷O Jew raje sareri jö røjëhijarue aribõvioho ëho jaburo jemë sanuëmiromo rajëhijaruje jemëro jabesi ijore ijore jijihõ'irarijego. Rõhu sisë'i uehorovoromo ëma döëremu ë'arujeje. Ëhesi bëhoho jaburo nimõ jemëro Paul na uehorovevarujoho vuonugo'i jabumë gemu rajëhi'irarijego. ¹⁸Rõhu jemëro mu maemu uehorovo'irarijego aehu jemë rajëhijë'oho ëho bogo sisëhuje. Naehu jemë'o hiromo jemë rajëhijë'oho o na jemë'oho bogojevamu ae göëhu jemë rajëhijë'oho iae maeje. ¹⁹O asë'e nasi aboji harihu'ohumë vaevë'e jëve. Magonahehu raho'i hara'uoromo huë vavaene bõrõmo baeromo harihu baegoro evare huë ma baejaruëhi na'o ëhi jeve. Na'o jemesi jõëni huë vavaene bogo bise'oho baje hujeji Kerisohu uehorovajëhi jemë'o ëhi uehorovo'irarijego. ²⁰O asë'e avevejõ'oho naro jemë'o hi'ibejo na dë mae jevo'ibejo. Jemë'o hiromo naehu uru'õ jö jajivajoho vuonugo'i jõho ma-u'emu majëhi'ibejo. Rõhu na jemesi jõëni uehorovajoho bogo eni jevoromo ëhuro nurunurueje.

Magonahe niõ'i jabesi ihoho Hagar'o Sarah'o jabesi uhu jõhoje.

²¹Jemë ae göëro sarerivoromo uvarujeje: Jew rajo mu vaerõhe jöguru noehu biririvoromo ejahë'oho ëhuro God-are nunire mae riravo'ejarëromo ë jögorohemu uehorovarujeje. Jemë ë jögoroho iae uehorovarujeje rõhu hesi jõho bogo avoho hejarujeje. ²²Ëjemëhu bogo avoho hejaruje jõho naro majëhi'ië'e. Urimoho Abraham harihe niõ'i jëvade hõjo. Harihu göho hesi muemu vaejahaje magonaho ihe Hagar-ro rahade hõjo. Harihu göho hesi ihoho Isaac hesi ma-hiromo baruohu'o juvaje magonahohuro rahade hõjo. ²³Rõhu harihu göho muemu vaejahaje magonahohuro nosi magonahehu ë'aruëhi ëhi'oromo dë'iraeromo hesi harihoho rahade hõjo. A'i harihu göho Isaac God-ro Abraham ajami'i uavadohuro ëhuro vaboro mae dë tiojë'ohuro rahade hõjo. Ëhi'are hõjo. ²⁴⁻²⁵Rõhu ëho bisemu uhu jöe jianove. Magonahe niõ'i jabesi bëhoho iae God-hu hesi aribõvi muebejavuo'irõhe jögore niõ'i he'irõhoho jëve. Abraham-are muemu vaejaje magonahe Hagar-are bëhoho ëho God-hu Jew rajo mu vaerõhe jöguru bojamamu Moses-hu Arabia sa'are Sinai dahorure hiromo baeromo bojamuadeje. Ëhesi bëhoho Hagar-hu avare muemu vaeromo sisë'i hijadëhi Moses-hu bojamuade jö hesi ijore ijore jijiharue aribõviohuro sarerivoromo uvarujeje: Noehu nosi biririvoromo ë jö ejahë'ohuro ëhuro God-are nunire

mae riravo'ejarëromo ë muohemu vae'i sivoho gavarueje. Èhu'ëro Hagar-hu avare muemu vaeromo sisë'i hijadëhi ë ariböviohuro ëhi sisë'i raromarueje. Jaruvo jiaje Jerusalem amo rajohu'o Jew rajo ioro'iorohu'o ëhi jië'e muohuremu vaeromo sisë'i raromarueje. ²⁶ A'i Jerusalem amo göho bogo sa'aroho jio'i ö'idöre jiaje amore jioruomaje ariböviohuro uvarueje: Bogo nosi biriroho baeromo God-are nuniroho maho riravo'i a'i Kerisoro ajamuego God-are nuniroho maho riravarue hö uvoromo bogo muoho sivohoromo sisë'ioho raromo'i mae raromarueje. Röhu ë amo hesi ado sirino'oho Keriso-are aribövioe no javue. ²⁷ Èhesi jöho God-are surire uhu'e uvë'eje:

Dë tiojë'e magonahoho jero sine sasohonëjo.

Bogo rahoromo vi'ehi baejanue magonahoho jö'e dadovoromo nimorohonëjo.

Uvonëjo: Baru'o hijaje magonahoho ado sirino'oho ma-jianovo'i

baruehu remo va'ade magonahoho ijönöho ado sirino'e marohë'e mae jevo'ajëjo.

²⁸ Nasi ö mueno'e God-hu Abraham ajami'iröhe jö bojamijaduhuro ëhuro hesi vaboro mahuro Isaac rahadeje. God-hu ajami'iröhe jö Abraham bojamijaduhuro ëhuro Isaac baejadëhi ëhi God-hu no ajamui'iröhëro Abraham mae uavaduhuro ëhuro jemë God-are aboji harihu'e jëve. ²⁹ Röhu göho sa'are magonahehu ë'aruëhi ëhi'oromo hesi marahade harihohuro ri'öromo God-are Aru'ahehu vëmu ajamamu rahade harihe Isaac huë vavaene bojaminövade höjo. Jaruvoho iae ëhi gemuohoje. Sa'are ma-raromarue ëhi jië'e ariböviohuro ri'öromo God-are Aru'ahehu ajamuijego i'ovoromo raromarue aribövioho huë vavaene bojamuiruomajeje. ³⁰ Röhu huë vavaeni bojamuijarue aribövi jabesi jöho God-are surire ëhi uvë'eje: Muemu vaejaje magonaho hesi harihohuro mae hijaje magonaho hesi harihohu'o gemuoroho bogo namiromo vavu jasi sionoho baeromo bövioho bise'oho bae'a'ajëjo. Èhuni muemu vaejahaje vëmohu'o harihohu'o babu'öjëvego rori'o va'irarëjo.

³¹ Nasi ö mueno'e Keriso-are aribövioho no bogo avare muemu vaeromo sisë'i hijade magonaho hesi aboji harihu'ehu javuanovo'i a'i vaboro maehu Abraham'o mae hiromo juvaje magonaho hesi aboji harihu'o va'ëne javuanove.

5

Röhu maho bogo sisë'ioho raromo'i birivoromo mae raromo'iröhe jöhoje.

¹ No bogo Jew rajo mu vaeröhe hesi darugoroho raromo'i mae raromo'iröhego ëhuni Kerisoro no maroho ramuadeje. Èhu'e jiaje nadi röhu maho ëhi jië'e mu hesi darugoroho va'o raromo'i a'i biririvo riravoromo maro raromoro.

² Röhu ave jöhuremu here. Paul naro majëhi'ie'e. Aehu jemë sarerëmiromo uëvaruoho: Jew rajehu ë'aruëhi jemë'o ae uëvego jaburo jemesi sinoho tarivëho'irarëjo ëhuro jemë God-are nunire mae riravo'irarije ëhi uëvaruoho nadi ejëhore. Ejëhë'oho jemë bogo Keriso gemu mae uehorovo'i Jew rajo jabesi muohu'o uehorovo'aruje ëhuro God-are nunire mae riravo'irarijëro. Jemëhu ëhi uehorovë'oho Kerisoro diehi ajëmi'ie'e God-are nunire mae riravo'irarijego. Bogo ajëmi'ie'e. ³ Röhu ave jö röhu maho majëhi'ie'ajoho jemesi ëhuremu here. Ae rahu Jew rajo jögoru eromo uëvë'oho: Nosi sinoho tarivahuohego no God-are nunire mae riravo'irarë uëvë'oho Jew rajo jögoru vituohu'o aho'obëhe e barë'iröhoho ëhi jië'e i'u'e muoho baeromoe'ie. ⁴ O jemë ae göëro Jew rajo jögoru hesi ijore ijore jijiharujeje ëhuro God-are nunire mae riravo'irarijëro. Èhi ë'arujohuro ëhuro Keriso boremi'öjë'e jëve. Keriso boremi'öromo ëhuro God-hu huë baeromo jemë ajëmi'iröhe mu öroho tugohë'e jëve. ⁵ A'i no God-are Aru'ahohuro ajamuijë'ëro ëhuro Keriso mae uehorovoromo uvarueje: O mabëhe höjo. U'emu God-are nunire mae riravo'ejarëromo ëhuni huë mae raromoromo muebejë ëhi javuoröhego. ⁶ No Iesu Keriso'o gemuore javuë'iroho Jew rajehu ë'aruëhi nosi sino tarivahuë'oho o bogo tarivahuë'oho iae hesije. Keriso mae uehorovoromo a huë baejëvë'oho ehemu böromohojë.

⁷ Urimoho jemë mu mabëhe vaebe rovarijeje. Röhu God-are jö ma ejahobe rovarijoho raro ahëvamu vuonugarijeje. ⁸ Bogo God-hu dinëmijadeje jemëro Keriso-are jöho vuonugojöro ë hesi bëhoho huro jemë hesinö rinëgajëro jië'ëro. ⁹ Aëro ave uhu jöho atoromo uvoruomajeje: Dë huaje osoho ma-bisemu jioromo rumorovoromo ioho böromo mae dë

huaje hōjo. Ĕhesi bēhoho mu sisēro rumorovoromo bōrōmorijajeje. Sareri jō rōjēhijarue aribōvioho nadi ejēhore. Jabesi jō sisēhuro jemē rumorovēvo'ē'e. ¹⁰ Ĕhi jie rōhu jemē'o na'o Badare gemuore javuē'ego naro jemesi ōrire mae uehorovoromo uvajeje: Jemē jō maho bogo vuonugoromo jō gōho uehorovo'arujējo. O jō gōho naro uvajeje: Jemesi simano ijumēhaje aho nani a bōrōme o nani a bise'e hōjo. Iae hesi hōjo. Rōhu ē ahuro God-are i'uocho iae bae'a'ajējo. Na ēhi uehorove.

¹¹ Nasi ō mueno'e naro urimo ae uēnōvodeje: Jemē God-are nunire mae riravo'iē'iroho Jew rajo nosi jōgoroho eromo jemesi sinoho tarivorējo. Sino tarivē'oho ēhuro God-are nunire mae riravo'arujējo. Ĕhi jiē'e jō majēhinōvodoho vuonugē'e jeve. Rōhu aēro sareri'e atoromo uvarujeje: Nōrō ē jōho bogo vuonugē'e hōjo. Rōhu ēhi jiē'e jōho majēhi'ibejo aho nasi ōriroho bogo bijōnimoruomo'ibejo. A'i Jew rajo jōgoru ejaho'irōhe jōho na bogo majēhijajeje. Ĕhuni aēro Kerisohu korosire guomade jō naehu majēhijajoho bijōnimoruomajeje. ¹² O jemesi simano huotovēharue aribōvioho sareri aribōvie jioruome. Jabumē sino tarivo'i nimē'oho rabēni sinoho bogo tarivo barē naho nahovoromo ruruhō'ōjarujeje.

¹³ Nasi ō mueno'e God-hu hesinō rinēgade hesi bēhoho jemēro bogo Jew rajo mu vaerōhe jō hesi darugoroho raromo'i a'i mae raromo'irarijego. Ĕhi jie rōhu nadi uvore: Ĕmu vaerōhe jō hesi darugoroho bogo raromo'i mae raromaruēromo jemesi sinehu nimaje mu sisēho vae'i a'i gōēro gōho huē baerovoromo muoho ajamirovore. ¹⁴ God-hu Jew rajo bojamuijade jōgoru hesi bēhoho ma-gemuje. Jaehu jasi arijo'arije rajahirovanuēhi jasi ae gemuoho ēhi rajahinējo. ¹⁵ Rōhu jemē mahehu ōhu muorovanovoromo hutitimobe jijihē'oho gavē'i ēhi jiē'oho ē'ore. Ĕhuro ijumorovo barē'aruje.

Sinhuremu nimoromo vaejarue muohu'o God-are Aru'ahuhu nosi dē vōvōbajo'ohuotovahuego vaejarue muohu'o ē mu niō'i jabesi jōhoje.

¹⁶ A'i ave jōho na uēve. Ua'i arirego God-are Aru'ahuhuro jemesi dē vōvōbajo'ohuotovēho'iro maro raromo jijihonōvo'irarije. Ĕhi ē'ē'oho jemesi sinehu nimaje mu sisēho bogo enōvo'aruje. ¹⁷ Sinehu nimajohuro God-are Aru'ahuhu nimajoho nijio'irae'i God-are Aru'ahuhu nimajohuro sinehu nimajoho nijio'iraejajeje. Ĕmu niō'iohuro ēhi umogihorovajeje. Ĕhu'ēro jiē'ēro jemē mu rabe vae'i nēgē'oho bogo eni jēve. ¹⁸ Rōhu God-are Aru'aho hesi ijore ijore jijiharujoho ēhuro bogo uvo'a'aruje: Nosi biriroho baeromo mu vaerōhe jōgoroho ejahoromo ēhuro God-are nunire mae riravo'ejarēromo ē jōgoroho bogo uehorovo'anue. ¹⁹ Rōhu sinehu nimaje mu sisēho diehi jio'amajoho iae va'orahoro jie. Ĕhi jiē'e mu vaejē'iroho ōēro jijihanovarujeje. Val'numi'e muoho vaejarujeje. Biriri'ōvoromo bōvie bise'e ēma ē'arujeje. ²⁰ Aehu avohare inōmo sisēho masije hōromo uvene aho rōjahijarujeje. Iro oso'e vaejarujeje. Nue huodamirovarujeje. Muorovarujeje. Ae gō jabesi mu mahuni dē vōrōnimarujeje. Vōrō'iraejarujeje. Ae gō iosirami'irōhohuremu uehorovarujeje. Bogo agane gemuoho vaerovo'i adovorovoromo uehore gō gō baejarujeje. ²¹ Ae gō jabesi bōviēni bise'ēni ganiganimarujeje. Jove iromo simane huotorovarujeje. Jove iromo simane sisērēromo bōvie bise'e ē'arujeje. Ĕhi jiē'e mue gō gō ē'arujeje. Naehu uēvodēhi rōhu maho uē'ejo: Ĕhi jiē'e mu vaejē'oho God-hu muebejaje ōri ari'eroho bogo va'oromo maroho raromoruomo'ajējo. Sinehu nimaje mu sisē hesi bēhoho ēhije. ²² A'i God-are Aru'ahuhu dē vōvōbajo'ohuotovahue'ohuro ēhuro ae gō uehorovēvarujeje. Nimoroharujeje. Huē mae raromarujeje. Ma-taemorovoromo sisēho uehorovoromo vuonugarujeje. Huē baeromo ajēmijarujeje. Mu mae vaejarujeje. Birivarujeje. ²³ Bogo dōroho bamorovo'i ma-avoho raromarujeje. Taemo raromarujeje. Ĕhi jiē'e muoho mu vaerōhe jōgorohuro bogo ahajeje. ²⁴ Ae rahu Iesu Keriso-are aribōvi javuē'oho Kerisohu korosire ijumorovadēhi ēhi nosi uehoro sisēho o nosi sinehu bōvi bise'o nimajoho ēho no ioro'ioeremu ijumē'e javue. ²⁵ God-are Aru'ahuhuro gemuēro darugoho bojamuijē'ēro ēhu'ēro maro raromarujeje. Ĕhuni hesi Aru'ahuhu diehi jiē'e mu nimē'oho ēhuremu vaebe jijihonōvo'ejo. ²⁶ No bogo nosi sivuoho uehorovoromo dōroho

bamorovoromo bogo ri'öromo göëro gö hesi dëho iahoromo jö göho göho ato'ejo. O ae gö hesi mu maho garomo bogo dëho vörönimo'ejo.

6

Ae göehu gö ajamirovoromo i'u'e mu nigemahorovo'iröhe jöhoje.

¹ Nasi ö mueno'e ga'irarije ae gemu mu sisë vaejamu gavë'oho God-are Aru'aho ejaharuje aribövioho jemëro ëhi jië'e aho ma-u'emu ajamirego hu mu sisëho vuonugo'i röhu maho avo'avoho juvo'irovo. Röhu jemesi arijo'arije avoho garorovoromo ajamire. Sisëhuro jemesi dë vövöbajo'ere bijëhego jemë'o ëhi jië'e mu sisëho vaejejo rirerömëvöjööni uëve. ² Uehoro sisë huë vavaene rabe rovë'oho ajamirovoromo nigemahorovo. Ëhi ë'ë'oho Kerisohu bojamuade jögoroho ejaho'aruje. ³ O ae gö jabesi sivue uehorovoromo uvë'oho: No a masijëro javuë'ëro aho bogo ajëmi'ëjarë uvë'oho ëma sareramirovarueje. ⁴ Ae gemu gemu jemesi muoho sivu sivue mevorovoromo gare mae o sisë vaejë'e jëvego. Mae vaejë'e jëvamu gavë'oho jemesi muohuremu garomo nimorohë'i jijih'o'aruje. Bogo ae gö jabesi muohu'o jemesirohu'o gemuoroho havoromo garomo uvo'a'aruje: Nosi muohuro jabesiroho iosiramijajëromo nimoronimorohë'i jijih'o'aruje. ⁵ Ëhesi bëhoho ae gemu gemu mu diehi diehi vaejaroho ë hesi manaho ëhi baeruomo'ë'e God-ro ëhi bamë'ëro.

⁶ Aehu Keriso-are jö bëhi röjëhijamu jemëhu hebe va'ë'oho bövie bise'e mana ajëmire. Ëhi jië'oho iae maeje.

⁷ Nadi sareramirovore. A vadu'oho God bogo sarerami hesi jëve. Diehi jië'e ijo bajo öjë'oho iae ëhi jië'e nu ano'e gemuoho ri'amo'iramu gagovo'amo'anue. ⁸ Ëhu jö hesi bëhoho ëhi jie. Ja ae rahu sinehu nimajohemu ömë'oho ëhuro ijönö sisë mana baeromo guomo'a'anue. A'i Aru'aho hesi mu vaejë'oho ëhuro ijönö ma-ioro'ioremu maro hi'a'anue. ⁹ Ëhuni mu ma vaejaruoho bogo u'uvo'ejo. Bogo u'uvoromo dë vövöbajo'o sisërërorovoro mu vuonugë'oho ëho majaho rue'iramu evare mana mabëhe gagovo'ejo. ¹⁰ Ëhu'ëro jië'ëro maja baejaruire ae aho'obëhe ajëmi'ejo röhu nosi Christian aganoho avo'avoho ajëminövö'ejo.

Ave surire jajivade ijo tugoho'i jöhoje.

¹¹ Nasi övëhu masijo jajivo'amajoho gare. ¹² Ma-sino hesi muohuni nimoronimorohë'i jijih'o'i nëgaje ariböviohuro biririvoromo jemesi örire uëruomajeje: Jew rajo noehu sino tarivaruëhi ëhi jemë'o jemesi sinoho tarivorëjo ëhuro God-are aribövie jëvo'iröhe. Rabëni ëhioho uëruomajeje. Jabumë uehorovoromo uvarueje: Kerisohu korosire guomade jö noehu mae uehorovaruhuni ëhuni nosi sa'ae gemuoho Jew rajëro huë vavaene bojamuiruomajëjo. Röhu noehu sa'a ioro'ioro rajo uvë'ë'oho: Jemë'o Jew rajo nosi muoho vaeromo sine tarivorë uvë'ë'oho ëhuro nosi sa'a rajohuro huë vavaenoho bogo bojamui'ajëjo. Huë vavaenoho bogo bojamui'ajëromo ëhuni sa'a ioro'ioro jemesi örire uëvarueje: Jemesi sinoho tarivorego God-are aribövie jëvo'irajo. ¹³ Röhu Jew rajo mu vaeromo sino tarivoruomaje ariböviohuro Jew rajo jögoroho bogo avoho ejëhoruomajeje. Röhu jabumë nimö jemëro sinoho tarivego jaburo nimorohë'i uvoruomo'i: Mabëhëjo. Noro ë aribövioho dinëmijamu Jew rajo nosi muoho baejë'e höjo. ¹⁴ Röhu Paul naro nosi Bada Iesu Kerisohu korosire guomade jöho ëhemu uehorovoromo nimorohë'i juvo'ejo. Mu ioro'iorohunioho bogo. Rabëni Iesu Kerisohu korosire guomade jöho na ëhuremu uehorovajeje. Ëhuremu uehorovoromo naro uvajeje: Ave sa'a hesi mu sisëho korosiro ano taemë'e höjo. O sa'arohemu uehorovarue ariböviohuro uvoruomajeje: Nörö korosiro ano taemë'e höjo. ¹⁵ Noehu Jew rajo mu vaeromo sino tarivë'oho o bogo vaeromo sino bogo tarivë'oho ëho iae hesije. A'i God-hu nosi dë vövöbajo'o i'ovahuë'oho ëhemu bërömohejo. ¹⁶ Ae rahu naehu uvodëhi ëhi uvoromo ijore ijore jijihë'oho God-ro vavaenimoromo ajëmi'iramu maro raromo'aruje. O God-are aribövi ioro'iorohu'o aho'obëhe ajëmi'iramu mae raromo'ë'ö. Na nege God-ro ëhi ajëmjöro.

¹⁷ Rõhu naehu Iesuare mu vaejamu aehu anegare batatoho sino haho'ere jevo'ame. Ëhuro ae aho'o garuomajeje na hesi muemu vaejaje ae jevego. Ëhuni aho nadi ijoho uehoro bõrõmoho bojemirëjo.

¹⁸ Rõhu nasi õ mueno'e nosi Bada Iesu Kerisoro jemesi aru'ahohu'o jioromo huë baeromo ajëminõvo'ë'e. Ahia mino'e.

EPHESIANS

Paul-hu Ephesus ekaresia jejëmijade jöhoje.

¹ O asë'e God-are aribövi Ephesus amore raromarujoho ae rahu Iesu Keriso'o gemuore jëvego hu gemu uehorovarujohumë God-ro nimamu Iesu Keriso-are apostle jevë'ëro Paul naro jemesi örire jejëmiije.

² Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

God-hu nosi aru'aho mae ajamui'irögoro Keriso-are jöëni huë mabêhe bojamuijade jöhoje.

³ Asë'e God hu mabêheje. Hu nosi Bada Iesu Keriso-are Börömeje o göho hesi Vavueje. Èaho God Vavuoho hu mabêheje. Èhesi bêhoho no Keriso-are ae gemuohuro javuë'ëro Vavuohuro ö'idöre jio'amaje bövioho bise'oho suvuoramui barëj'eje êhuro nosi aru'ahoho mabêhe jiahuoröhego. ⁴ Ni'i'ivadire sa'a bövi bise'o bogo bamadevare evare uvadeje no Keriso'o gemuoro javuë'ëro baejavuego no jö sisë bövie bise'e bogojavuo'i hesi nunire ma-maemu javuoröhego.

Nosi örire dë vövöbajo'e aho'o uehorovavuë'ëro ⁵ uvadeje: Ijonö Iesu Kerisoro jabumë ajëmi'iramu êhuro naro gagovëvo'ejöjo nasi aboji harihu'e jioruomoröhego. Hesi simanore nimamu êhi uvadeje. ⁶ Èhi jië'e huë mabêhe bojamuijadohuni êhuni no hesi ihoho rajahi'ejo ë hesi bêhoho no hesi Harihu Mabêhi hesi agane gemuoho javuamu hu bogo nijio'irae'i ma-ajamuij'e'ego. ⁷ Ajamui'irögoro hesi Harihoho nugö'öjamu köho rueromo guomadeje. Guomoromo no sisêhu tövavuadoho jiovahuroromo uehorovoromo vuonugahuë'ëro mae javue. Mae javuë'ëro no garomo uvarueje: God hu bogo bise'o vadu'oho ajamui'i börömo mae ajamuij'e' höjo. ⁸ Börömo mae ajamuiromo hesi simanoho eni jiego bövie bise'e ga barëjajëro jië'ëro ⁹ huhu röjahui'i uvadëhi êhi röjahuij'eje noro garöhego. Èhesi bêhoho urimë'i God-ro uvadeje: Na muoho êhi êhi vae'ejö uvoromo subivahuobe rovadoho röhu iae röjahuij'eje no garöhego hu êhi jië'e muoho vae'i nimë'e jiego. Èmu hesi jöho huro urimë'i uehorovoromo uvadeje: Naehu nimaje mu vaejë'iroho naro Keriso ua'ejöjo ajemi'iröhego. ¹⁰ Muebejuvo majae eni jio'iramu evare ë muoho avoho barë'ejöjo. Èmuoho avohoromo bövie bise'e ö'idöre sa'are jio'amajoho Keriso-are uhunö gemuoro bamo'ejöjo huro simanoho jioromo muebe'amoröhego.

¹¹ O no Keriso-are ae gemuohuro javuë'ëro Vavuohuro baejavuadeje hesi javuoröhego. Hu muoho bövioho bise'oho bogo ëma vae'i a'i hesi simanëro nimego muoho vaejajeje. Èhuni baejavuo'iröhëro mami'e simanore uehorovoromo uvadëhi êhi baejavuadeje.

¹² Èhuni Jew rajoho no aevoromo Keriso uehorovare aribövioho javuë'ëgo Vavu hesi iho börömohego uehorovoromo rajahi'ejo.

¹³ Röhu sa'a gö rajoho jemë'o mue gemuoho baejarijeje. Jemëro God-are jö maho hejarijeje uëvavamu: Jemë sisëro jëvego God-ro baejëvoromo manö bamëvaje höjo. Manö bamëvaje hö uëvamu hegorovo Keriso mae uehorovarijeje. Mae uehorovamu God-ro Keriso-are gemuore havëvoromo hesi Aru'aho Ma bojamui'i uövuadëhi êhi bojëmijadeje jemëro ë Aru'ahoho baejë'ëro no ae aho'o êho garomo uvoröhego: Iae jemë God-are aribövie jëvajëjo. ¹⁴ Hesi Aru'aho Maho suvuore bojamuij'e'ëro uvarueje: Iae mae-ëjo. Maja viture Vavuohuro hesi aboji harihu'o nosi suvuoro vituohu'o iae bojamui'ajëjo. Suvuoro vituoho bojamuiromo êhuro mu sisêhu rabehu i'uhaguajoho jiovahuo'iramu hesi aribövioho no ma-marö raromo'ejarëjo. Èhi uvarueje. Èhuni hesi iho börömohego uehorovoromo rajahi'ejo.

God-hu Ephesus ekaresia ajëmi'iröhego Paul-hu ëninamade jöhoje.

¹⁵ Èhu'ëro jië'ëro na hejodeje aëro uvavamu: Jemëro Bada Iesu mae uehorovoromo God-are aribövioho aho'obêhe huë baejëvaruje höjo. ¹⁶ Èhi ë'aruje hö uvamu hegorovo naehu jemesi jöëni God mae uabe rovodoho bogo vuonugë'e jeve. Èhi'oromo Vavu hesi örire

jemëni ëninamijajeje. ¹⁷ Vavuoho ma-aje gemu hijë'ego nosi Bada Iesu Kerisoro uvajeje: Hu nasi Bõrõmoho hõjo. Vavuoho ëhi jië'e ae jië'ego naro hesi õrيره ëninamijajeje huro jemë ajëmi'irõhego. Ajëmiromo uehoro mae bojëmiromo hesi arijo'arije rõjahirovego jemëro hu mae ga'irarijego. ¹⁸ O jemesi simanoho jiovëhego garomo uvo'irarijego: Vavuohuro no hesinõ javuujõro uõvuë'ëro ëhu'ëro ijonõ aji maro raromõ'ëjarëjo. O uvo'irarijego: Vavuohuro hesi aboji harihu'oho aji'e suvuore bogo bise'o vadu'oho bõrõmo bëhe bojamui'irõhëni uvajëjo. ¹⁹ O uvo'irarijego: Hu daruge bogo bise'o vadu'oho jië'ëro ëhu'ëro hu ma uehorovarue aribõvioho ajamuijaje hõjo. ²⁰ Keriso guomamu i'ovade ëhi jië'e daruge gemuohuro no'o ajamuijajeje. Ëdarugohuro Keriso ajamamu ri'õromõ õ'idõre ajiomë'ëro hesi õvo manõ hiromo ²¹ simano vaeruomaje võrõ'e aru'ahoho rabe rabe je'ore sa'are õ'idõre dinõ'e jioruomajoho iosirëmiromo iho masijo jio'amë'oho iosirëmiromo jaruvo majaho rõhu ruëre maja i'o jiorõhoho ëho ihe gõ gõ masijo jiorovajoho taemëvo'i hu gemu dõroho jië'eje. ²² Kerisoro ëhi bõrõme hijamu God-ro bõvioho bise'oho hesi uhunõ bamaho barëj'ëjeje huro gemuëro bõrõme namiromo muebe'amorõhego. Ëhi bamahoromo uavadeje huro gemuëro simane vaeromo ekaresia nosi muoho aho'obëhe muebe barë'irõhego. ²³ Keriso hu simanoho jio'i ekaresiae no õvo hõru'oho javue. Õvo hõru'oho javuë'ëro ëhuro simanoho romoromeje. Rõhu ë simanohuro ëhuro bõvie bise'e õ'idõroho sa'aroho romoromoroje.

2

Nosi aru'aho vuovahuamu God-hu ajamuiromo i'ovahuade jõhoje.

¹ Rõhu urimoho jemesi aru'ahoho vuovëhë'e ëma raromo jijihonõvarijeje God-are jõgoroho ahoromo mu sisë vaej'ëro jië'ëro. ² Mu sisë vaeromo ave sa'are õri sisëre jijihonõvarijeje. Jijihoromo God dõre jio'i aruëre ahore raromarue aru'aho sisë o dinõ'e raromarue aru'aho sisë jabesi simano vaejaje ë a hesi ijore ijore jijihonõvarijeje. Ëahuro God-are jõ bogo eruomaje aribõvi jabesi dë võvõbajo'oho huotovëhego mu sisëho vaeruomajeje. Ëa hesi ijore ijore jijihonõvarijeje. ³ God-are jõ bogo eruomaje aehu raromo jijiharuhëi ae aho'obëhe no'o urimë'i sinehu nimego simanehu uehorovaje muohuremu vaebe nosi dajehu nimajire biriri'õvoromo ëhi jijihonõvareje. Ëhi ë'obe rovë'ëro ëhu'ëro a ioro'iorehu God-are i'u mana baerõhëhi no'o ëhi bae hesi javuadeje.

⁴ No ëhi javuadeje rõhu God-ro noni vavaenimo avohoromo dë võvõbajo'e aho'o uehorovavüë'ëro ⁵ ëhu'ëro gõvuade no hesi jõho ahamu nosi aru'ahoho vuovahuë'e jiamu gõromo bogo vuoramui'i Keriso'o gemuore havavuuamu nosi aru'ahoho i'ovahuadeje. Hu hesi ma-huë baejëvoromo jemesi õrيره ëhi ajëmiromo maro babamëvadeje. ⁶ Rõhu God-ro Keriso'o gemuore havavuoromo no ajamuamu vuovoromo ri'õj'ëro aru'ahoho i'ovahuë'eje. I'ovahuë'ëro Iesu Keriso'o gemuore havavuoromo ajamuamu no ajiomë'ëro hu'o rõhe gemuore raromoromo sa'are mu sisëho ruahõ'õjarueje. ⁷ Vavuehu ëhi ajamuijade hesi bëhoho maja ijonõho rovego huro rõjahuijego no'o a ioro'iorohu'o garomo uvobe va'irõhego: O Iesu Keriso'o gemuoro havavuoromo huë mae bojamuiromo ajamuij'ëro ëhu'ëro huhu huë baejavuajoho bõrõmo mae hõjo. ⁸ Ëhesi bëhoho huhu ma-huë baejëvoromo uehoro mae bojëmijaduhuro iae ëhuro jemë mae uehorovamu gagorovo maro bamëvadeje. Bogo jemesi biriroho baeromo ajamirovo'i a'i hesi God-ro suvuoroho bojëmij'ëro jemë mae jëve. ⁹ Hu bogo uvadeje: Jemë mu ma vaej'ëro huro bamëvo'ejõjo. O bogo vaej'ëro bogajo. Hu ëhi uvo'ibejo aëro nimoronimorohë'i jijihoromo uvuromo'ibejo: Noro nosi ajamirovoromo manõ bamorovare hõjo. ¹⁰ A'i hesi God-ro no mae avohavuadeje. Huro Iesu Keriso'o gemuore havavuoromo bamavuadeje ëhuro noehu vae'irõhe mu ma huhu uehorovadoho ëho vaebe va'irõhego.

Kerisohu sa'a ioro'oro rajohu'o Jew rajo aribõviohu'o gemuore gagovavuade jõhoje.

¹¹ Ëhuni jemë urimë'i sisë'i raromarijoho uehorovore. Jemë bogo Israel rajo aribõviehu jëvo'i sa'a gõ raje jëve. Israel rajohuro jabesi õvëro dõre muoho vaeromo sinoho tarivë'ëro uëruomajeje: No sine tarivahuë'e aribõviëro javuë'ëro God-are aribõvie javu'o'i jemë sine

bogo tarivëhë'e ariböviero jëvë'ëro bogo God-are aribövioho jëvajëjo. Jemë ëhi jië'e sine bogo tarivëhë'e aribövie jëvaje urimo diehi raromarijoho uehorovore. ¹² Evare majare jemë bogo Keriso'o gemuoroho jëvo'i Israel rajo God-hu muebejavuajiroho jemë bogo nosi gemuoroho jëvo'i jemesi hahagu raromonövarijeje. God-hu hesi aribövi ajamui'iröhëro mae uövuade jöho jemë bogo hejë'e ma-raromonövarijeje. God-hu ajamuego ijonö ma rarom'iröhe jöho bogo hejë'e God rumo'e jioromo sa'are ëma raromonövarijeje. ¹³ Urimoroho jemë God jiaje gemuoroho bogojëvo'i rori'o numori'o jëvadeje. Jaruvoho Iesu Keriso-are ae gemuoho jëvë'ëro Keriso-are köho rueromo guomamu ëhuro jemë ro God-are bëhire jëvë'eje. ¹⁴ Keriso hu noni sanu'e mu barovaje ahoje Israel rajohu'o sa'a ioro'ioro rajohu'o gemuoro gagovavüë'ëro. Ëhesi bëhoho Israel rajohu'o sa'a ioro'ioro rajohu'o noni buorunö'e iromo tugohë'ëro gororamirovönövareje. Gororamirovamu Kerisoro araeromo guomoromo ëhuro buore dadovanovadeje. ¹⁵ Huro guomoromo Israel rajo nosi jögoroho tugohahuadeje. Mami'e ë jögoroho Israel rajohuro gabe rovareje jajivoromo uvë'e jiamu: Ëhi ëhi ë'iro ëho ma-garëjo. Ëjöhö tugohahuadeje. Tugohahuade hesi bëhoho urimë'i Israel rajoho noro nosi jögoroho e'i sa'a ioro'ioro rajohuro bogo eruomë'ëro ëhu'ëro hahagu hahagu javuajoho Kerisoro nimadeje baeromo hesinö gemu bu'öjogo gemuoro raromego ma-i'e gemu javuöjoro. Ëhuro Jew rajohu'o sa'a ioro'ioro rajohu'o huë baerovoromo maro rarom'iröhëgo. ¹⁶ Hu nimadeje korosire guomoromo nu huohuoho tugohahuo'i sino haho'o'oho hesi gemuore havavüë'ëro God'o no'o gemuoro huë mae rarom'iröhëro. ¹⁷ Huë mae rarom'iröhëro Kerisoro rueromo ë huë ma jöhö majahujamu rori'o raromarije ariböviohu'o God-are bëhire raromare ariböviohu'o noro ëho hejareje. ¹⁸ Kerisoro söjavüë'ëro ëhuro Israel rajohu'o sa'a ioro'ioro rajohu'o noro Aru'ahë gemu baeromo Vavu hesi bëhire va'arueje.

¹⁹ Ëhu'ëro jië'ëro urimo jemë rori'o raje aruëre anumëre ëma jijihonövarijoho jaruvoho bogo ëhioho ë'arujeje. Bogo ëhi'o'irögoro God-are aribövi nosi gemuoro jëvoromo hesi aboji harihu'e jëve. ²⁰ God-are aboji harihu'o'oho javu va'ëne javue röhu jemë'o gemuoho jëve. Ëjavu hesi uhunö apostle o jö God-aro baeromo majëhjarue ariböviohuro javuoho banigojiomego Iesu Kerisoro huro munënö'e bönoho namijego ëhuro bibivajeje. ²¹ Huro javuoho aho'obëhe ëhi ma'eno titimë'ëro javuoho marëbe va'ajeje God-are osa böörömo jiajëhi no ëhi javuoröhëgo Bada'o gemuoro javuë'ëro. ²² Röhu jemë'o Keriso'o gemuoro jëvë'ëro God-ro jemë'o hesi javunö'e gemuoro bimuvëvego gemuoro riravarujeje hesi Aru'ahohuro jemë'o jië'ëro.

3

Sa'a ioro'ioro rajo ajëmiromo jabesi örire Keriso-are jö huruoho majëhi'iröhe mu Paul-hu bæjade jöhoje.

¹ God-ro jemesi örire ëhi mae vaejëvë'ëgo ëhuni Paul naro jemëni uehorovoromo God-are örire jöe jövajeje. Jew rajo iho bogo bæjarije sa'a ioro'ioro rajo jemesi jöëni naehu uehorövëvoromo Iesu Keriso-are jö majëhijajohuni ëhuni aëro savoji gagore ba'amevë'ëro hije. ² Iae jemë hejarijeje God-ro huë mae bæjevoromo ave muoho bojemadeje jemëhu mare rarom'irarijohuni. ³ God-hu diehi jië'e mu vaeröhëni hesi uhure uehorovadoho huro röjehijamu bæjodeje. Ëjöhö ma-bisemu jajivë'e jeve. ⁴ Naehu jajivodoho jemë adahë'ohuro ëhuro garomo uvo'a'aruje: God-hu Keriso bojami'i uhure uehorovade muoho iae nöörö mae gavë'e höjo. ⁵ Ëmuoho urimoho subivahuobe rovadoho avevejö'oho God-ro hesi Aru'ahoho uavamu huro hesi apostle ömo'ömo'ohu'o jö hesirire baeromo majëhjarue ariböviohu'o nosi örire röjahujamu bæjë'e javue. ⁶ God-hu uhure uehorovade mu hesi bëhoho avëhije. Sa'a ioro'ioro rajoho jemëro Jew rajo no'o gemu mae God-are mu maho baeromo nosi sino haho'o'oho ma-gemu favorovoromo God-hu Jew rajo huë mae bojamui'iröhëni uvadëhi ëhi Iesu Keriso-are ihoro jemë'o bojëmijego bæjarujeje Kerisohu ë'ade jö maho jemesiro rovë'ëro.

⁷ Ĕjō ma hesi muoho God-ro darugo'ero jiē'ero na huē baejavoromo suvuore bojemadeje naro ē jō hesi muoho vaenōvo'irodego. ⁸ God-are ae magonahe ioro'ioroho masije jio'amo'i na bise'e jeve. Na ēhi jeve rōhu God-ro huē baejavoromo ē muoho bojemijadeje ēhuro Kerisohu huē mae bōrōmo bēhe bojamuaje jō maho sa'a ioro'ioro rajoho majēhibe juvo'irodego. Rōhu ē jō hesi bēhoho bogo ga barē hesi javue. Ĕjōho huro uevadeje naro ēho majēhiromo ⁹ rōjēhijego ae aho'obēhe garōhego God-hu hesi uhure uehorovade mu ēhi ēhi a nunire vaejajoho. Ĕhuni ē muoho bojemadeje. Bōvi bise'o bamade aho God-ro urimo ē muoho hesi simanore uehorovobe subivahuobe rovadeje. ¹⁰ Subivahuobe rovade hesi bēhoho ēhuro avevejō'oho anera masijohu'o daruge jiē'ero ō'idōre raromarue aribōvi ioro'iorohu'o ēho jaburo ekaresiae no gōromo uvoruomorohego: Ojo'e God uehoro mabēhe gō gō hesi ōrire jiē'ero ēhu'ero hesi aribōvioho ajēmibe rovē'e hōjo. ¹¹ Mami gō'e ēhi'o'i uvadoho Iesu Keriso nosi Bada uavamu huhu nimade muoho vaejahoromo sa'a ioro'ioro rajoho jemē Jew rajo nosi gemuore gagovēvadeje. ¹² Gagovēv'ero no hu'o gemuoho javuego noro hu mae uehorovaruero jiē'ero ēhu'ero bogo juhuonivo'i uvarueje: lae hu ajamui'ajē uvoromo God-are bēhire va'oromo nosi jōho majahijaruaje. ¹³ Ĕhuni naro jemē uēve: Naehu jemesi jōēni vi'ehi bōrōmo baejajoho nadi ēho uehorovoromo nasi jōēnioho vavaenimoromo u'uhore. Na vi'ehe baeje ēhuro jemē maro raromo'irarijego.

Kerisohu bōrōmo bēhe uehorovavuaje jōhoje.

¹⁴ Rōhu God-ro sa'a ioro'ioro rajoho jemē ajēmi'i uōvuē'ego ēhuni naro ague aho hiromo Vavu hesi ōrire jōe jōvajeje huro jemē ajēmi'irōhego. ¹⁵ Agane aho'obēhe ō'idōre raromarue sa'are raromarue bamavuade a hesi ōrire naro jemesi jōēni ēninamiromo uavajeje ¹⁶ hesi ajoho bōrōmo bēhōro jiē'ero huro uavego hesi Aru'ahohuro hesi darugo maho bojēmego jemesi dē vōvōbajo'oho biririvōvorōhego. ¹⁷ Naro hu uavajeje jemēro Keriso mae uehorovego huro jemesi dē vōvōbajo'ere ioro'ioeremo hi'irōhego. Huro jemē ajēmego ijehu ō'ehu sa'a gagore dirume abue'amē'ero biririvajēhi o javue sa'a uhure vae abuejē'ero biririvajēhi ēhi jemēro ae dē vōvōbajo'e aho'o uehorovēvoromo ēhuro biririvoromo muoho mae vaebe va'irarijego. ¹⁸ O jemēro God-are aribōvi ioro'iorohu'o gemuoro avoho garomo uvo'irarijego: Kerisoro bogo bise'o vadu'oho uehorovavuo'i bōrōmo bēhe uehorovavuo avohaje hōjo. ¹⁹ Rōhu Kerisohu diehi uehorovavujoho noehu ga barē'irōhoho bogo eni javue. Iae ēhi jie rōhu na nege jemēro uvo'irarijego huro ēhi uehorovavuaje hō uvego ēhuro God-are uehoro mahuro mu mahuro jō mahuro bōvi bise'o mahuro jemesi dē vōvōbajo'oho rarovēvo'irōhego. Na ēhi negego God-are ōrire jōe jōvajeje.

²⁰ Rōhu God-are ihoho mabēhe ua'ejo. Ĕhesi bēhoho huro hesi darugoho nosi dē vōvōbajo'ere bamahuē'ero ēhu'ero huhu ajamuiromo mu masijo vaerōhoho hu eni jie ē hesi bēhoho noehu hu ua gavaruoho o nosi dē vōvōbajo'ere uehorovaruoho ēho majianovo'i God-hu no iosiramuiromo mu bōrōmo vaeromo bōvie bise'e aho'o nosi ōrire ajamui'irōhoho hu eni jiajēro jiē'ero. ²¹ God-ro Iesu Keriso ajamiromo hesi ekaresiahu'o ajamuijē'ego ēhuni hesi ihoho mabēhe ua'ejo ēhi gemu jiemu jiobe va'irōhego.

4

Keriso-are aribōvie no hesi sino haho'e gemuoho javuaje jōhoje.

¹ God-ro ēhi jemē ajēmijē'ero jiē'ero ave jōho majēhi'i'e'e. Naehu Badare jōēni savoji gagore hijajohuni ave jōho ejehore. God-hu jemē hesi aribōvi mae jēvojōro uēvadēhi ēhi mu mae vaejē'i raromo jijihore. ² Nadi dōroho bamorovo'i ma-sanuovoromo ae gō jabesi sisēho ga taemoromo huē baerovore. ³ O God-are Aru'ahohuro jemē aho'o uehore gemuoho bojēmijaje ē uehoroho ma'enoromo dē vōvōbajo'e gemu bamoromo agane vaerovo gare. ⁴ Jemē sino haho'e gemuoho jēve. God-are Aru'ahe gemuoho baejē'e jēve. Aji'e mu bōrōmoho gemu bae'irarijego ēhuni God-ro hesinō jēvojōro uēvadōho muebejarujeje. ⁵ Bada gemu uehore gemu bapataeto gemu jēve. ⁶ God gemu ae aho'obēhe

nosi Vavueje. Huro gemuëro böröme namiromomo bövie bise'e aho'o muebejavuoromo ma'enaguo titimoromo nosi dë vövöbajo'ere hijajeje.

⁷Röhu Kerisohu no ae gemu gemu suvuoro bojamuibe rovadëhi ëhi baebe rovë'e javue ae ajëmi'iröhëro. ⁸Ëhesi jöho God-are surire jajivoromo uvë'eje: Badahu ajiomadevare evare a sisëho ruahö'öjävë'ëro tövëvoromo sö ujuohoromo dö mare ajiomade höjo. Ajiomoromo suvuoroho ae suvuorëmijade höjo. Ëhi jajivë'eje. ⁹Ëjö adaharoho ëhi uvë'eje: Badaru ajiomade höjo. Ëhesi bëhoho bogo ëma ajiomo'i a'i urimo hu sa'are ruvebiromomo sa'a uhu mare abuejajeje. ¹⁰Ruvebiromomo abuejajeje ae gemuohuro ajiomadoho ajio ö'idöho iosiramiromomo dö mare ajiomadeje ëhuro ö'idöho sa'aho aho'o huro rarovalo barë'iröhëni. ¹¹Ëhuro aviëhi jï'e suvuore gö gö bojamuibe va'ë'eje ëhuro noro hesi muoho vaeröhego. A ioro'ioroho apostle mu vaeröhe suvuoroho bojamuijajeje. A ioro'ioroho jö God-aro baeromo majëhi'iröhe suvuoroho bojamuijajeje. A ioro'ioroho Keriso-are jö ma majëhibe jijihö'iröhe suvuoroho bojamuijajeje. A ioro'ioroho hesi aribövi muebejëvoromo öri röjëhi'iröhe suvuoroho bojamuijajeje. ¹²Suvuoro ëhi bojamuijajeje hesi bëhoho God-are aribövioho aho'obëhe noro ë suvuoroho baeromo eni javuego göëro göho ajamirovoromo ëhuro Keriso-are sino haho'e gemuohuro javuë'ëro no uehoro mae baebe birire baebe va'ojuvo ¹³hujeji no ae aho'obëhe uehore gemu baeromo God-are Harihoho garomo gemuoro javuoröhego. Ëhi gemuoro javuo'iramu Keriso-are darugohuro böviëro bise'ëro rarovavuo'iramu ëhuro a duvahonö avoho raromo'ejo. ¹⁴A duvahonö avoho raromo'iramu evare ijönöho bogo asisö'ö va'ënoho javuo'ë'e. Bogo asisö'ö va'ënoho javuo'iramu aehu sareri sareri'e jö barueromo jö huotohuotovoromo bövi bise'ö ëma ömoromo jö sisë majahuijë'öho ijönöho bogo ejëho'ejo. Bogo ejëhoromo burehu jovo döre rueromo jovo hasajego vanagiëhu huotorohuotorovobe va'ajëhioho no bogo ëhioho ë'i ma-birivoromo ahorirëro va'ejo. ¹⁵Ma-ahorirëro va'oromo göëro göho rajahirovoromo jö mahemu majahirovo'ejo sareri'e jöho bogo. Jö mahemu majahirovobe huhu nimaje muohuremu avoho vaebe va'ejo ëhuro Keriso nosi simanoho va'ëne jiahuoröhego. ¹⁶Hu nosi simanoho jïë'ëro ruahö'öjavuego gemuore hesi uhure raromarueje hesi övo duruajo'ëro javuë'ëro. Hesi uhure raromoromo nosi sino haho'e bimuvavuadëhi ae aho'obëhe ëhi bimuvorovoromo ëhuro hesi darugoho baeromo no ae göëro göëro huhu bojamuade mue gö gö avoho vaeromo göëro gö rajahirovoromo ëhuro a duvahonö'e biririvobe va'arueje.

Keriso-are ae gemuoho javuë'ëgo mu i'ö baeröhe jöhoje.

¹⁷Röhu naro ave jögoroho Badare ihoro darugo'ö majëhi'ie'e. God bogo ma uehorovarue ariböviohu jö sareri sareri uehorovë'i raromo jijiharüehioho ijoho nadi ëhioho raromo jijihore. ¹⁸Ëhesi bëhoho ëho jaburo simanoho ramoramövëhë'ëro uehoroho bogojioromo biriri'övoromo God bijönimoromo ëhuro hesi biriroho bogo baejamu jabesi aru'ahoho vuovëhë'eje. ¹⁹Jabumë mu sisëni javojëgadoho vuonugo'i jabesi dë vövöbajo'e aho'o sisëro gemu bojamirovoromo ö mahunö'e va'inumi'e muoho bövioho bise'öho ëma ömarueje. ²⁰Röhu jemë Keriso-are jöho bogo ëhioho röjëhamu hejarijeje. ²¹Hesi jöho iae mae hejarijeje. Hesi aribövioho jëvë'ëro Iesuhu ëhi ëhi ë'oromo hibe juvade jö maho iae röjëhijamu hejarijeje. ²²Aviëhi jïë'e jöho hejarijeje. Mami'e öri sisëre jijiharije ë hesi uehoro mamioho boremi'öre. Ëuehoro mamioho ejahoromo ëhuro mu sisë naguego sareramirovoromo ë muoho vaejege sisëjëjavuobe va'ajeje. ²³Uehoro mamioho boremi'ö'i God uarego huro jemesi dë vövöbajo'ö uhoho avohëho barë'iro. ²⁴Ëhi uaromo uehoro i'e baere. Ëuehoro i'öho God-ro avohadeje noro hu va'ëne jioromo ma-taemo raromoromo mu maemu vaenövoröhego.

²⁵Ëhuni no sino haho'e gemuoho javuë'ë jiaje ëhuni sareri sareri'e jöho vuonugo'i göëro gö hesi öriroho ma-jö maemu majahirovore.

²⁶O vörönëgë'iroho nadi ri'öromomo mu sisëho vaere. Nadi dë vörönimemu vörönimobe va'ëgo majaho beva'oromo vahiromëvo'iro. ²⁷A'i vöröho vuonugego Satan bogo ijumëvo'iro.

²⁸ O ae rahu vajiohu'e mu vaejaje aho uavego ijoho nadi ěhi ji'e'oho ě'i hesi övëro biririvoromo i'o mu'oho ma-avoho vae'i ěhuro mae sisë eni jiego bövi bise'o rumo'e aribövi jabesi örire suvuorovo'iröhe.

²⁹ O jö atë'iroho jö sisëho nadi ato'i ma-jö maemu atonövore. ěhi ji'e' jö atë'ohuro jemë ae ajëmi'iramu jabumë huë vavaene rabe jëvë'oho jemesi jöho heromo biririvëvo'iramu dë vövöbajo'e mae jëvo'ë'e.

³⁰ O God-are Aru'aho Maho nadi vavaenoho bojamire. Hu jemesirire jië'ëro ěhu'ëro uvarueje: Jemë God-are aribövie jëvobe va'ojuvo hujeji ěho majaho rue'iramu sisëhu tövëvajoho God-ro jiovëho'iramu aho'obëhe ma-mae gemu jëvo'ajëjo.

³¹ Röhu ijoho a jabesi jö sisëho nadi uehorovo'i arire. Nadi a jabesi jöënioho vörönimemu vörönimore. Nadi ano'i vörö'iraenövore. Nadi jö sisëho uëromo giagamëhore. Nadi agëvore. Jö sisë gö gö nadi uehorovoromo ěhi ji'e' muoho vae'i ³² a'i göëro göhuni vavaenimorovoromo huë baerovë'i göëro gö hesi mu sisëho uehorovoromo vuonugore. God-hu jemesi sisë Keriso-are jöëni uehorovoromo vuonugadëhi jemë'o ěhi ě'ore.

5

Aji'ere raromo jijihö'iröhe jöhoje.

¹ God-ro hesi dë vövöbajo'e aho'o uehorovëvego jemë hesi aboji harihu'e jëvaje ěhuni huhu ě'ajëhi jemë'o ěhi ě'onövore. ² ěhi'oromo ae uehorovëvë'i raromo jijihonövore. ěhesi bëhoho Kerisoro no uehorovavuoromo nosi jöëni God-are örire suvuore bojamirovoromo guomorovadeje. Guomorovamu God-ro uvadeje: Huro mabëhe ě'ë'ëro ěhuro iae na huë mae jevajëjo. Kerisohu uehorovauadëhi ěhi ae uehorovëvë'i raromo jijihonövore.

³ O jemë God-are aribövie jëvaje ěhuni önö'e mahunö'e muoho nadi vaeromo ae gö jabesi bövioho bise'oho nadi ujuohëho'i ě'orego ěhuro ěhi ji'e' mu sisë hesi jöho jemesiriroho bogojio'i. ⁴ O mu sisë jöho simano rumo'e jöho ijo ijo'e atarue jö sisëho nadi atore. Atë'oho bogo maehuje. A'i huë ma jöhemu God-are öroro atore. ⁵ Ave jö gavarujoho iae maeje. Ae rahu önö'e mahunö'e jijihë'oho o ae gö jabesi bövi bise'o ujuohëho'i ě'ë'oho Keriso'o God'o muebejarue öri ari'eroho bogo va'oruomo'ë'e. Ae gö jabesi bövi bise'o ujuohëho'i ě'arue hesi bëhoho God dejonö bamo'i inömo sisë nuninö bamarue mueje.

⁶ ěhi ji'e' mu sisëho God-are jö bijönimarue ariböviohuro vaejaruëro jië'ëro ěhu'ëro God-are i'ue mana bae hesijö. ⁷ Ae göëhu sarer'e jö atoromo uëvë'oho: Bogo ěhioho jio'a'ajë uëvë'oho nadi ejëhore. ⁸ ěhuni ěhi ji'e' ariböviohu'oho gemuoroho nadi jijihore.

⁹ Urimoroho jemë'o ramoramo'ere raromonövarijeje. Jaruvoho jemë Badare aji'ere raromaruje. ěhuni aji'ere raromaruje ariböviehu raromo jijiharüëhi ěhi raromo jijihore.

¹⁰ Rabëni. Aji rovë'ohuro ěhuro mu maemu vaeromo jö maemu atoromo bövie bise'e avoho vaejarueje. ěhuni aji'ero raromore. ¹¹ Avoho uehorovoromo gare Badahu nimaje muoho diho jiego. ¹² O ramoramo'e mu aehu ma-imo vaejaruoho ěhi ji'e' muoho nadi gavanovo'i mu mae vaejejo jaburo ěho garomo uvoruomo'iro: Nosi muoho sisë höjo. ¹³ Iae ěhi ji'e' muoho jabesi saginiëri vae'amaruoho javoje vëmunajoho jië'ego bogo atarue jöhoje. ¹⁴ Jabesi sisë aho'o gurihiro jiadoho aji va'orahoro jië'oho jabesi mu diehi jiajoho ě garuomo'ë'e. ¹⁵ Mu rabe va'orahore jië'oho iae aji'eje. ěhuni noro God uehorovoromo jöë toromo uvarueje:

Niavanuoho ri'öjëjo.

Guomanuoho i'ovëjo.

ěhi'o'iramu Kerisoro ja ajivavo'ajëjo.

¹⁶ ěhuni jemë diehi ji'e' mu vaeromo raromo jijiharujoho ěho avo'avoho vaere. Simano rumo'e muoho bogo a'i simano ma'e muohemu vaere. ¹⁷ Mu mae rovajoho nadi vuonugo'i hesi muoho avoho vaere jaruvoho mu sisë vaeruomaje majae jiaje. ¹⁸ ěhuni nadi sisë'ioho uehorovo'i a'i jemëhu diehi mu vaejoro Badahu nimajoho ěho avoho garomo baere.

¹⁸ Nadi vörö'e jovoho ue'ahago simanoho huotorovëvo'i. Ëhuro sisërëjëvo'ë'e. A'i nadi'ego God-are Aru'ahohuro rarovëvego ëhuro simano mae jëvo'i. ¹⁹ Psalms surire jajivare jöho God rajahi'iröhe jöho Aru'ahuhu bojëmaje jöe gö gö iaruhohu majahirovore. Dë vövöbajo'e aho'o God rajahiromo ëhi jië'e jöho ionövore. ²⁰ Vae majae huë mae o huë sisë rovë'ohoho nosi Bada Iesu Keriso-are ihoro God Vavuohohu mae uanövore.

Masurovë'e ariböviehu diehi avoho raromo'iröhe jöhoje.

²¹ Röhu Keriso mae uehorovaruje jëvaje ëhuni göëro gö hesi jöho ejahorovore.

²² Vaboroharo Badare jöëni jemesi baruohohu ejëhore ²³ rabëni hesi bëhohohu baruohohu vaboro jemesi simane jio'amë'e jiaje. Keriso ekaresia nosi simanohohu jio'i no hesi sino hahohu gemuohohu javuë'ërohuro no maro bamavuë'eje. Röhu hu ekaresia nosi simanohu jiajëhi ëhi baruohohu vaboro jemesi simanohohu jio'ame. ²⁴ Ëhuni ekaresiaehu Keriso-are jö ejaharuëhi ëhi vaboro ömo'ömhohu jemëro baru jabesi jöho ejëho barëre.

²⁵ O baruohohu jemesi vaborohohu dë vövöbajo'e aho'obëhe uehorovëvore. Ëhesi bëhohohu Kerisohu ekaresiahu uehorovavuorohohu hesi arijo'arije bojamirovorohohu guomovadeje ²⁶ ëhuro ekaresiahu jövëro u'ovahuorohohu hesi jöho majahuiromohu ma-maemu avohavuoröhëni. ²⁷ Ma-maemu avohavuego ekaresiahu aji mabëhe javuoröhëgo. I'ohu masu'iröhe magonahohu va'inumi rumohu sino hahohu bogo abuejë'e sisë rabe rabe bogojio'i ma-maemu jiajëhi ekaresiahu no ëhi ma-maemu gemu javuego huro no hesi baejavuoröhëni. Ëhuni ekaresiahu no uehorovavuorohohu ajamuijadeje. ²⁸ Iae Kerisohu ekaresiahu uehorovavuadëhi ëhi baru ömo'ömhohu jemëro jemesi vaborohohu uehorovëvore. Uehorovëvorohohu jemesi sino rajahirovarujëhi jemesi vaborohohu ëhi rajëhire. Jemëhu jemesi vaboro rajëhijë'ohuro ëhuro jemesi sinohu'ohu rajahirovarujeje. ²⁹⁻³⁰ Aho jabesi sinohohu bogo bijönimorovohu a'i Kerisohu ekaresiahu no hesi sino hahohu gemuohohu javuajëromohu muebejavuajëhi aëro jabesi sinohohu ëhi avo'avohohu mueberovarueje. ³¹ Vaborohohu baru'ohu jabesi jöho God-are surire jajivorohohu uvë'eje: Ëhu'ëro jië'ëro aëro vëmu vavu'ohohu rëmö'ö'i vaborohohu'ohu gemu mae hi'a'ajëjo. Hu'ohu hi'irahumu jabumë ni'ö'i jëvadohohu röhu gemu jio'a'ajëjo. ³² Ëhi uvë'eje. Röhu ë jö hesi bëhohohu uhurohohu jö börömo börömeje. Ëjöhohu hesi bëhohohu naru üve Kerisohu'ohu hesi ekaresia'ohu no gemuohohu javuajë jöhoje. ³³ Röhu jemesi jöhu'ohu. Ae gemu gemu jemesi arijo'arije rajahirovarujëhi jemesi vaborohohu ëhi rajëhire. O vaboro ömo'ömhohu jemëro baruohohu masijohohu hë uehorovore.

6

Aboji harihu'ohu vëmu vavu'ohu diehi avoho raromo'iröhe jöhoje.

¹ O aboji harihu'ohohu Badare jöëni vëmu vavu'ohu jabesi jöho ejëhore. Ëhi ë'ë'ohohu iae maeje. ² Ëhi jië'e jögorohohu God-are surire jajivorohohu uvë'eje: Jasi vëmhohu vavuohohu mae uehorovëvonëjo. Ëjöhohu börömo maego God-ro ë hesi viture uvadeje: Jaehohu ë jö ejë'ohohu naru mae ajami'ejöjo. ³ Ëhesi bëhohohu uvë'eje: Vëmu vavu'ohu mae uehorovëvë'ohohu ëhuro mahohu javu'irahumu sa'are majae ëgo'ohu hi'a'anuëjo.

⁴ Röhu vëmu vavu'ohohu jemesi aboji harihu'ohohu nadi sisë'iohohu avohëvego dë vörönëgo'iro. Nadi ëhiohohu ë'i a'i avohohu muebejëvorohohu Badare jöho röjëhirego heromohu avohohu raromohu va'oruhohu'iro.

Avare mu vaejëharue ariböviohu'ohu jabesi simanohu vaejarue ariböviohu'ohu diehi avoho raromo'iröhe jöhoje.

⁵ O ae gö jabesi muemu vaejëharuje aribövioharohu jemesi a masijohu jabesi mu vaejë'irohohu uvore: No Keriso-are mue vaejaruëromohu jabesi jöho avohohu uehorovorohohu jemesi dë vövöbajo'ohu uohohu'ohu ejëhonövore. ⁶ Nadi ma-dëmuohohu ejëhorego jemesi masijohuro gëromohu uvo'iro: Mu mae vaejarujëjo. A'i uvore: No Keriso-are mue vaejaruëromohu nadi bijönimohu dë vövöbajo'e aho'ohu mu örrohohu bojamiromohu God-hu nimaje muohohu vaenövore. ⁷ Uvore: No bogohu ma-a jabesi muohohu vaejëho'i Badare mue vaejaruëromohu dë sasohorohohu muohohu vaere. ⁸ Uvore: Ae gemu gemu mu mae vaejë'ohohu Badarohu suvuorohohu

mana bojamui'ajëjo. No avare muemu vaejëhë'oho o nosi nimoro mu vaejë'oho iae hesi hõjo. Ae gemu gemu mana bojamui'ajëjo.

⁹ O simano vaejaruje aribövioharo ëhi mu mae vaenövore. Jemesi mu aribövi jö sisë uëromo giagamëharujoho vuonugore. A'i uvore: Nosi mu vaejahuarue aribövi jabesi o nosi Bövioho iae ae gemu ò'idöre hijajëjo. Huro mu ariböviohu'o no'lo ma-gemuoho uehorovauaje hõjo.

Keriso-are ariböviehu ajamirovoromo niögu biriri'oho io'amoromo bijo buno baeromo Satan'o muorovo'irõhe uhu jõhoje.

¹⁰ Röhu aveho ijo tugoho'i jõho majëhi'ie'e. Bada'o gemu mae jioromo hesi darugo maho baeromo biririvore. ¹¹ God-hu bojamuaje muorovo inõmoho aho'o ujuohore Satan-ro sarerëmijego ëhuro biririvoromo riravo'irarije. ¹² No bogo ma-a'oho muorovo'i a'i a iosiramuijë'e sisë aribövi masijohu'o muorovarueje. Sa'ae aho'obëhe ramoram'o'e mu muebejarue ariböviohu'o dõre raromarue sisë ariböviohu'o vörö'e sisë aribövi ioro'ioro-hu'o ëho jabu'o no muorovarueje. ¹³ Èhuni God-hu bojamuaje muorovo inõmoho aho'o ujuohore maja sisë rovego Satan-ro jemë'o muorovego biririvo'irarije. Èhi muorovojuvo majae barë'iramu biririvoromo ëhi baberumi riravo'aruje.

¹⁴ Èhuni avoho riravore. Röhu a'o muorovo'ie'iroho götaho dë'ahore muoho titimo'iramu dë'ahoho bibivoromo ëhuro eni javo'ë'e. Èhesi bëhoho mu sisë'o muorovo'ie'iroho God-are uehoro mahemu ma'eno titimorego ëhuro eni jëvo'iro.

O a'o muorovo'ie'iroho biriri'e niögogo vinebire ba'amo'iramu ëhuro eni javo'ë'e. Èhesi bëhoho mu maemu baeromo maemu òmorego ëhuro eni jëvo'iro.

¹⁵ O a'o muorovo'ie'iroho hõru gudu ba'amë'ohuro ëhuro mae nami juvo'a'anue. Èhesi bëhoho Kerisohu huë mae bojamuaje jö maho simanoro bamore avoho bibivo riravo'irarije.

¹⁶ O vëni ravë'e bijo vösö huotavaho'ie'iroho ejoho ma'enoromo nami'iramu siroho ro ë ejore riravoromo sugigivoromo vënoho duoroho'amo'ë'e. Èhesi bëhoho God-ro no ajamuijaje hõ uvoromo hu mae uehorovonövore. Èhi uehorovë'ohuro Satan-ro hesi vörö'e bijohuro bijëho'iramu bogo ejaho'aruje.

¹⁷ O a'o muorovo'ie'iroho biriri'e simano bosõho didi'oromo simanoho tugohorovo'anue ëhuro bogo nemavo'i mae javorõhego. Èhesi bëhoho simanëro uehorovoromo uvore: God-ro no maro ramuë'e hõjo. Èhi uehorovë'ohuro ëhuro Satan-are sisëho tugoho'iramu jemë bogo baejëvo'ë'e.

O a'o muorovo'ie'iroho kaejõ ëgogo övëro ma'enoromo muorovo'anue. Èhesi bëhoho God-are jö hesi Aru'ahuhu bojamuijajoho ëhi ma'enoromo Satan'o muorovore.

¹⁸ Èhi jië'e muoho vaejë'i majae ëhi God-are Aru'aho hesi uehoroho baeromo parie gö gö vaeromo jõe gö gö ëninaminövore. Èhi ë'irarije nune jioromo majae ëhi biririvore. Biririvoromo God-are aribövie aho'o jabesi jöëni uehorovore. ¹⁹ O nasi jõho ëhu'o uehorovore. Uarego naehu hesi jö a majëhi'ie'iroho huro jö maho bojemego naro bogo juhuonivë'e ma-sama'e majëhinövö'iro ëhuro jabumë hesi gurihijë'e jö ma hesi bëhoho mae garomo heruomorõhe. ²⁰ Èjõ maho ae majëhi'irodego ëhuni na God-are ihoro jö majëhijaje ae jeve. Röhu na savoji gagore hije. Èhuni God uarego na birire bojemego huhu bojemade muoho vaeromo bogo juhuonivo'i ë jõho ma-sama'e majëhinövö'iro.

Ave surire jajivade ijo tugoho'i jõhoje.

²¹ Röhu na diehi jevajoho o mu rabe vaejajoho ë jõho jemë'o he'irarijego ëhuni Tychicus- ro ò'oromo majëhi'iramu he barë'aruje. Tychicus hu nosi huë baerovarue öeje. Hu Badare muoho biririvoromo vaejajeje. ²² Èaho naehu nugö'ò'ie'aje hesi bëhoho huro ò'oromo jõho majëhijego noehu diehi raromarue jõho jemëro hejogo dë vövöbajo'oho mae jëvorõhego ëhuni nugö'ò'ie'e.

²³ Röhu na nege God Vavuuhu'o Bada Iesu Keriso'o jaburo nasi ö mueno'oho jemë ajëmijego jemëro God mae uehorovoromo huë mae raromoromo rajahirovo'irarijego.

²⁴Nosi Bada Iesu Keriso rajahiemu rajahijaruje aribövioho aho'obêhe God-ro huê baeromo ajëminövo'ê'e. Ahia mino'e.

PHILIPPIANS

Paul-hu Philippi ekaresia jejëmade jöhoje.

¹ O asë'e Iesu Keriso'o gemuore jëvoromo God-are ariböviëro jëvë'ëro Philippi amore raromarujo Paul na'o Timothy'o Iesu Keriso-are mu vaejaharue ae niö'i noro jemesi örire jejëmijö gare. O ekaresia muebejëvaruje ariböviohu'o ekaresia ajëmijaruje ariböviohu'o jemesi örire jejëmijö.

² Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

Paul-hu Philippi ekaresia uehorovoromo God'o jö jövonövade jöhoje.

³ Naehu jemë uehorovëvë'iroho jemëni God nasi Börömo huë mae uavajeje. ⁴ O jemëni God-are örire jö jövä'iroho nimorohë'i jöho majahijajeje. ⁵ Rabëni hesi bëhoho mami'e jemëhu aevo'i na'o bimumovoromo Keriso-are jö ma hesi mu ajëmijarijoho ëhi ajemibe ruejuvo jaruvohu'o ëhi gemuoho ajëmijarujeje. ⁶ Èhuni na mae uehorovoromo uvajeje: God-ro mabëhe aevoromo jemesi dë vövöbajo'o avohëvadoho iae ëhi avohëvobe va'ojuvo hujeji Iesu Keriso-are majaho rue'iramu avohëvo barë'ajëjo. ⁷ God-hu jemë ëhi avohëvobe va'a'ajë uvajoho ëho iae maeje ë hesi bëhoho jemë nasi dë vövöbajo'ere jëvë'ëgo. Jemë na'o gemuore mu mabëhe baejë'e jëve. God-ro mu mae bojemamu urimoho na savoji gagoroho bogo hijë'iro hesi jö ma hesi jöhuni biririvoromo majëhibe rovodoho jaruvoho na savoji gagore hijë'i ëhi gemuoho majëhijajeje. Jemëro ëhi jië'e mu mabëhe na'o bimumovoromo ajemibe rovë'e jëve. ⁸ Röhu Iesu Keriso'o nasi dëre rumorovevego na jemëni sisë maro vavaenegajeje. God-ro ge'ëgo na mae uëve.

⁹ Röhu ave jöho na jemëni ëninamijajeje. Naro uavajeje huro jemë ajëmijego jemë simane mae jioromo mue bövie bise'e garomo ae rajahuijarujoho gö'o gö'o döre ëhi'obe va'oromo ¹⁰ ëhuro rabe rabe maho jiego ga'irarijego. Èhi jië'oho Keriso-are majaho rue'iramu jemë jö sisëho bogojëvo'i uhohu'o ma-maemu jëvo'ë'e. ¹¹ O Iesu Kerisohu ajamuego vaejarue mu mahuro jemë'o rumorovëvo'ë'e ëhuro God-are ihoho dö maro ajiomoröhego.

Paul-hu hi juvonövade hesi bëhoho Keriso uehorovoromo juvonövade jöhoje.

¹² Röhu nasi ö mueno'e na nege jemëro ave jöho ga'irarijego. Na ave savoji gagore hijamu mu rabehu rabehu nasi örire rovadohuro ëhuro Keriso-are jö ma hesi muoho bogo sisërë'i marëjë'eje. ¹³ Marëjë'ëro ëhu'ëro sa'a a börömo hesi javu atovarue ariböviohu'o a ioro'iore aho'obëhe jabu'o mae garomo uvoruomajeje: Nörö Keriso-are aëro jië'ëro savoji gagore hijajëjo. ¹⁴ O Christian ö mueno'e marohë'e maëro gevarue na savoji gagore hiromo mae biririvego geromo jabu'o daruge baeromo ëhuro bogo juhuonivë'e mabëhe biririvoromo God-are jöho majëhijarujeje.

¹⁵ Èaribövioho a ioro'iorohuro iae nasi mu mahuni dë vörönimoromo na iosirem'i'rögoro Keriso-are jöho majëhijarujeje röhu a ioro'iorohuro huë mae bojemi'i ë'arujeje. ¹⁶ Jabumë uvarujeje: God-ro nörö aviae bamade höjo ëhuro aëro God-are jö maho sareri'e atego nöröro aho'iröhego. Èhuni jabumëro na mae uehorovevoromo Keriso-are jö maho majëhijarujeje. ¹⁷ O ë aribövi ioro'iorehu Keriso-are jö majëhijaruoho bogo maho uehorovoromo ë'i a'i jabesi ihohemu uehorovoromo Keriso-are jöho majëhijarujeje. Jabulo uvarujeje: Noehu Keriso-are jö ae majëhijë'ohuro ëhuro a masijohuro heromo Paul savoji gagore hijajoho röhu gö'o döre i'ue bojami'aruëromo ëhuni Keriso-are jöho majëhijarujeje.

¹⁸ Röhu ëho hesije. Aehu ma-döhemu uehorovo'i o uhohu'o uehorovo'i o diehi uehorovoromo Keriso-are jö majëhijaruoho röhu aëro Keriso-are jöho iae majëhijarujeje. Na ëho uehorovoromo nimorohajeje. Röhu bogo vuonugo'i ëhi gemuoho nimorohonövo'ejo.

¹⁹ Ĕhesi bëhoho naro garomo uvajeje: Naehu ĕhi sisë'i hijajoho jemëro nasi jöëni ĕni-nami'iramu Iesu Keriso-are Aru'ahohuro ajemi'iramu ĕhuro na mae hi'ejöjo. ²⁰ Ĕhuni naehu ave uehorovajohuremu nego avohe na bogo mae bogo javojoho baeromo muoho vuonugo'i a'i majae aho'o röhu avevejö'ohu'o biririvo avohoromo nasi arijo'arije aho'o bojamirovego Keriso-are ihoho dö maro jioröhego. Na ave sa'are hijë'oho o guomevë'oho ĕhi gemu jiojöro nege. ²¹ Na ave sa'are hijë'oho Keriso gemu uehorovë'i hibe juvajeje. O guomevë'oho jaruvo sisë'i hijanovajoho ijonö mabëhe hi'ejo. ²² Na ave sa'are ĕgo'o hijë'oho ĕhuro i'o mu'e birohönövo'ejo. Hesi nani'o diehi ĕ'ejo. ²³ Na uehore niö'i jevo'ego ĕho uehorovë'e hije. Iae na nege guomoromo sa'aho vuonugo'i va'o Keriso'o gemu mae hi'irodëni. Hu'o hijë'oho ĕho mahoje. ²⁴ Röhu naehu biririvoromo sa'are hijë'oho ĕho böromohoje jemë ajëmi'irodohuni. ²⁵ Ĕho na eni gavë'e jeve. Ĕhuni na garomo uve: Naro biririvoromo jemë'o hi'ejöjo ĕhuro ajëmege Keriso mae uehorovobe nimorohobe va'irarijejo. ²⁶ Ĕhi jiië'oho naro röhu maho ö'iramu jemëro na geromo Iesu Keriso-are örire mabëhe rajahi'aruje.

²⁷ Röhu na diehi jevë'oho jemëro Keriso-are jö maho eromo raromo jijihore. Ĕhuremu böromohoje. Ĕhi ĕ'ë'oho ĕhuro naehu ö'oromo gëvë'oho o öre ĕgo'o hiromomo ma-jemesi jöhemu hejë'oho na garomo uvo'ejo: Jemëro gemuoro riravoromo uehore gemu baeromo mue gemu nimoromo jö ma hesi muohuremu biririvoromo nigemarujëjo. ²⁸ Biririvoromo nigemoromo jemesi jö bijönimoruomaje aribövioho bogo juhuonëmijarujëjo. Bogo juhuonëmijamu gëvë'ohuro ĕhuro God-ro röjëhijajeje jabumëro garöhego maja ijonöho jabumë sisë'ëjëvo'i jemë marojëvo'iröhoho jëvego. Iae God-ro jemë ajëmi'iramu marojëvo'ë'e. ²⁹ Jemë Keriso-are mu böromoho niö'i baej'e jeve. Göho Keriso-are örire mae uehorovo'irarijoho göho hesi jöëni vi'ehe bae'irarijoho. ³⁰ Urimo jemë iae gavarijeje na sivohoromo Keriso-are muoho nigemamu. O jaruvoho jemë hejarujeje aëro uvoruomego: Nöröho ĕhi gemuoho ĕ'aje höjo. Röhu ĕ mue gemuoho jemëro na'o bimuvoromo ĕhi sivohoromo ömo'aruje.

2

No bogo nosi nimaruohe mu uehorovo'i göehu gö huë baerovo'iröhe jöhoje.

¹ Jemë aho'o Keriso-are ae gemuoho jëvájoho na jemë ĕhuro hejarujeje biririvëvego. Kerisohu jemë huë baejëvájoho na jemë ĕhuro hejarujeje jemesi dë vövöbajo'oho gio-govëvego. Na jemë God-are Aru'ahohu'o gemuoro jëve. Na jemë göëro göhuni vavaen-omoromo dë vövöbajo'e aho'o uehorovëvarujeje. ² Ĕhi jëvë'e jiaje ĕhuni ma-gemuoro jioromo uehore gemu baeromo huë baerovë'e muoho gemu vaerego na heromo nimoroho avoho'iro. ³ Nadi jemesi sinohemuoho uehorovoromo a ioro'ioroho ĕma iosirëmiromomo ihoho döroho bamorovo'i uehorovoromo muoho vae'irögoro a'i ma-u'emu uehorovoromo a ioro'ioroho masije hö uvoromo jabesi ihoho döro bamore. ⁴ A ioro'ioro jabesi ihoho döro bamoromo röhu nadi jemesi jöhemuoho uehorovo'i a'i a ioro'ioro jabesi jöhu'o uehorovore.

Kerisohu hesi nimajoho bogo uehorovo'i sa'are rueromo God-are jöhemu ejahadëhi noehu ĕhi ĕ'iröhe jöhoje.

⁵ Iesu Kerisohu uehorovadëhi ĕhi uehorovore. ⁶ Hu God jiajëhi ĕhi jiië'ero röhu bogo uvadeje: Naro biririvoromo God-hu hijajëhi ĕhi hi'ejöjo. ⁷ Hu bogo ĕhioho uvo'i bövie bise'e nugö'ö'amoromo mu vaejahuaje a jiajëhi ĕhi jiadeje. Ma-a javuajëhi ĕhi jiadeje. A nu ano'o va'ëne jioromo ae aho'obëhe nosi nunire rovadeje. ⁸ Rueromo hesi iho böromoho uehorovoromo vuonugo'i ma-God-are jöhemu ejahobe juvoromo ĕhuro guomadeje. Korosire anamu guomadeje. ⁹ Ĕhi ĕ'ë'ego ĕhuni God-ro ajamamu huro dö maro ajio namijamu hesi ihohuro iho ioro'ioroho iosiramuiromomo böromö bëhe jiië'eje ¹⁰ ĕhu'ego ae aho'obëhe ö'idöre raromarue sa'are raromarue sa'a uhure raromarue aribövioho noro Iesuare ihoho böromö höromomo hu rajahiro mogo aho raromoromo ¹¹ ae aho'obëhe noro huruohoromo

uvoruumoröhego: Iesu Keriso iae Bada hö uvoröhego. Ĕhi uvo'iramu God Vavu hesi ihoho börömo bëhe jio'ë'e.

Ramoramo'ere raromarue ariböviohu'o ave sa'are raromoromo noro iron'ö'e ajivëvo'iröhe jöheje.

¹²Nasi ö mueno'e naehu jemë'o gemu mae hijamu jemëhu nasi jö ejehonövarijoho röhu jaruvo na öri ëgobövire hijajohu'o nasi jöho ejehonövore. Ĕho börömoheje. Juhuoni'o butubutu'o muoho avo'avoho vaerego jemë ma-mae jëvo'iro. ¹³Ĕhesi bëhoho God-ro jemesi dë vövöbajo'oho huotovëhajeje ëhuro huhu nimaje ëhi jië'e muoho vae'i nimoromo vae'irarijego. Ĕhuni ëhi jië'e muoho vaere.

¹⁴Mu rabe vaej'öho nadi muoho bijönimoromo jö sisëho atoromo o jöho aho'ahëmi'irögoro a'i muoho ma-vaere. ¹⁵⁻¹⁶Ĕhi ë'ë'öho jemë jö sisëho bogojëvo'i uhohu'o ma-mae jëvo'ë'e. Sareri sareri'e aribövi sisëhu'o gemuore raromo'aruje röhu jemë God-are aboji harihu'e maemu jëvo'ë'e. A i'ovavuo'iröhe jöho røjëhiromomo ëhuro jiji mujöru'ehu ramoramore ajivo'amajëhi ramoramore raromarue ariböviohu'o ëhi ajivëvore. Jemë ëhi ë'ë'öho Keriso-are majaho rue'iramu naro uvo'ejo: O mabëhëjo. Jemë nasi jöho mabëhe ejeharije höjo. Na sa'are hiromo jöho majëhiromomo muoho bogo ëma sivohoromo darugoho boremi'öjode höromo jemesi jöëni nimoronimorohë'i jöho jövo'ejo.

¹⁷Röhu hesi nani'o nani aëro anego'iramu guomevo'ë'e. Ĕhi'o'iramu nasi köho rue'iramu God-ro uvo'ë'e: Ĕho na suvuore bojemijajëjo. Röhu jemëhu hesi örire mae uehorovoromo mu vaejarujoho ëhu'o God bojamijaruje suvuoreje. Röhu nasi suvuorohu'o jemesi suvuorohu'o gemuoro jio'iramu God-ro garomo uvo'ë'e: Iae eni jiajëjo. Ĕhuni aehu na ëhi anegego guomevo'iröhoho na huë mae jeve. Huë mae jevoromo jemë'o gemu mae nimoroheve. ¹⁸Naehu ë'ajëhi jemëro huë mae jioromo na'o gemu mae nimorohore.

Paul-hu Timothy'o Epaphroditus'o rëm'öjogo Philippi amore ö'iröhe jöheje.

¹⁹Iae na uehorovoromo uve: Bada Iesuhu nimë'ohuro ëhuro na ma-burëro Timothy nugö'ö'iramu jemesi örire ö'a'ajëjo. Ĕhi ë'irodëro nege. Ĕhesi bëhoho ö'oromo jemëhu diehi rarumaruje jöho huro vuonorö'ö barovego na heromo huë mae jevoröhego. ²⁰Timothy-ro gemuëro na'o gemuoro uehorovoromo bogo döhemuoho a'i uhohu'o jemesi jöho uehorovajeje. Ĕhi jië'e a göho bogojeve. ²¹A ioro'iorohuro bogo Iesu Keriso-are jöho uehorovo'i jabesi muohemu uehorovarueje. ²²Röhu jemë gavarujoho iae hu a maeje. Harihehu vavu ajëmijaruëhi huro na ëhi ajemiromomo Keriso-are jö ma hesi muoho vaebe rovë'eje. ²³Ĕhuni na uehorovoromo uve: Ga'irode nasi muoho diehi jiamu gavë'iroho hu nugö'ö'ejöjo ö'iröhego. Na ëhi nege. ²⁴Röhu naro uve: Badahu nimë'öho majae ma-bisemu barë'iramu na'o ö'ejöjo.

²⁵Röhu naro uvodeje: Nosi Christian öho Epaphroditus nugö'ö'ejöjo ö'öjoro. Ĕhuremu iae mae höjo. Röhu avejëj'öho hu na'o bimuvoromo Satan'o muorovoromo mu vaejaje aeje. Mami'e jemëro nugö'ö'jarijeje huro rueromo jemesi ihore nasi vavaenoho ajeminövo'iröhego. Röhu naro hu sionëro nugö'ö'je. ²⁶Naehu hu nugö'ö'irode hesi bëhoho huro ae aho'obëhe jemëni vavaenime. Vavaenimoromo nurunurume jemesi jöhuni. Ĕhesi bëhoho jemë hejarijeje uvavamu: Hu guomo guome baegade hö uvamu hejarijohuni ëhuni. ²⁷Iae mae. Hu guomo guomo böröme baeromo guomo hesi jiadeje. Röhu God-ro hesi jöëni vavaenimoromo ajamijadeje. Bogo hesi jöënioho gemu vavaenimo'i a'i nani vavaenimadeje hu guomego naro huë vavaene gö'o döre baejöëni. ²⁸Ĕhuni na nego avohe nugö'ö'jogo ö'öjoro ëhuro hu ö'ego jemëro röhu maho garomo nimoroho'irarijego o ëhuro nasi nurunuruoho barëjanovoröhego. ²⁹⁻³⁰Ĕhu'e jiaje hu ö'ego Badare ihoro börömo mae nimorohoromo rajahire. Ĕhesi bëhoho hu uvadeje: Philippo amo rajoho ame ëgoböviro raromoromo Paul ajamijë'öho bogo eni jiajëjo. Ĕhuni naro jabu'o röromo ë muoho vae'ejö uvoromo ëhuni hu ave sa'are hi'iröhe jöho bogo uehorovoromo guomo hesi jiadeje. Ĕhuni ö'ego rajahire. O huhu ë'adëhi ae rahu jabesi sino bogo uehorovo'i Keriso-are muohuremu uehorovë'öho ëhi jië'e ariböviohu'o aho'obëhe rajëhinövore.

3

Noehu God-are nunire mae riravo'iröhe öroho êho Keriso mae uehorovo'iröhe jöhoje.

¹Nasi ö mueno'e ijo tugoho'i jöho majêhi'iê'e. Badare öroro uehorovoromo nimorohore. Röhu ave majêhi'irode jöho mami'e uëvodoho röhu maho majêhijë'oho bogo u'uvevo'ê'e. O jemê röhu maho hejë'oho êhuro avo'avoho raromo'aruje. ²Ö sisêho va'êne aribövioho gëvê'i raromore. Jaburo God-are muoho sisê'i røjêhijarueje. Êhuni gëvê'i raromore. Jaburo uëvarueje: Jemëro Jew rajo muoho vaeromo jemesi sinoho tarivorëjo êhuro God-are nunire mae riravo'irarije. Röhu jabuhu røjêhijarue muoho bogo mu maehu jio'i êho sino taritarivo'iröhe muoho jianove. Êhuni gavê'i raromore. Êhi jiê'e ariböviohuro sarerêmi'ê'ö. ³Jaburo sarerivoromo uvoruomajeje: No sine tarivo'amê'ëro êhu'ëro no God-are aribövie javuajëjo. Röhu jabumê ma-döhemu God-are aribövie jioruomoi' a'i no uhohu'o God-are aribövie javue. Êhesi bëhoho noro God-are Aru'aho hesi darugoho baeromo hu rajahiromo Iesu Keriso uehorovoromo nimorohê'i atarueje. No bogo uvarueje: Nosi muohu'o ihohu'o ave sa'are mae jiahuê'oho êhuro God-are nunire mae riravo'ëjarëjo. ⁴Röhu nosi muohu'o nosi ihohu'o mae jiahuê'ego êhuro God-are nunire mae javuo'ibejo Paul nasi muohu'o ihohu'o mae jiehe'ëro jiê'ëro uvo'ibejo: Na hesi nunire mae jevajëjo. ⁵A ioro'iorehu uvaruoho: No Jew rajo mäero javuê'ëro Jew rajo muoho avo'avoho vae'ego God-are nunire mae javuajë uvaruoho Paul naro êhi uvo'ibejo iae mae jio'ibejo rabëni naro jabumê iosirëmiromo Jew rajo maho na jevê'ëgo. ⁶Rahevamu hurae gemu barëjamu Jew rajo muoho vaejevoromo nasi sinoho tariøjehareje. Nasi vëmu vavu'oho Israel rajëro jëvê'ëro êhu'ëro na'o Israel raje jeve. Benjamin-are uje gemuoho jeve. Nasi hijo mino'ehu Hebrew huêhu atobe Hebrew mu vaebe rovarêhi na'o êhi gemuoho ömajeje. O mu vaeröhe jögoru ejaje ae jevadeje. Pharisee ariböviehu jögoru e avohojöro uövuaruêhi na êhi'obe rovodeje. ⁷O God-are mu nimode ae jevadeje. Naro uvodeje: Jew rajo muoho God-are mue höromo ekaresia aribövioho sisê vaejëvo'i hijodeje. Jew rajo nosi jögoru ejaruohuro êhuro mae javuo'ibejo ja uvo'ibejane: Nörö mabêhi mae höjo. ⁸Êhi jiê'e mu mae iho mae jevamu iae marëjevajë uvodoho jaruvoho Keriso-are jöho uehorovoromo uvajeje: Êhuro sisërëjevê'e höjo. ⁹Naro uvajeje: God-are nunire mae nami'iorögoru naehu Jew rajo mu vaejë'ohuro mu ioro'iorohu'o noehu vaejego God-are nunire mae javuoröhe êhi jiê'e mue aho'obêhe naehu uehorovê'oho êhuro sisërëjevo'ajëjo. Iesu Keriso nasi Börömo ga'irodoho êhemu börömooho höjo. Hesi jöëni mu ioro'ioroho musisi va'êne höromo boremi'öjê'e jeve êhuro naro Keriso bae'irodëro. ¹⁰Keriso baeromo hu'o gemuoro bimuvo'irodëro. Jaruvoho bogo nasi ëma biririvoromo Moses-are jögoroho eromo uvajeje: God-are nunire mae jevajëjo. Bogo. A'i na Keriso mae uehorovoromo êhuro hesi nunire mae jeve. Êhesi bëhoho God-ro ajamuego no mae uehorovoromo hesi nunire mae riravarueje. ¹¹Na nege nasi simanohuro dë vövöbajo'ohuro Keriso ga'iro hu ri'öjê'ëro hesi darugohuro ajemijego marëjevojöro. Huhu huê vavaeni vi'ehi baejadêhi na'o êhi gemuoho baebe va'iro. Huhu mu sisê mu'uvahuo'i guomadêhi na'o êhi mu sisê garomo hörëro taemobe va'irodëni. ¹²Sisêho hörëro taemobe va'oromo êhuro ijönö Iesuhu guomoromo ri'öjadêhi nani na'o eni jevê'ohuro nasi sino haho'ohu'o guomoromo êhi ri'ö'irodëro. Êhuremu nege.

Paul-hu daruge aho'o bojamiromo Keriso-are mu vaejadêhi no'o êhi ê'iröhe jöhoje.

¹²Na bogo uehorovoromo uvajeje: Mami'e Keriso-are muoho baejë'ëro mu sisê bo-gejojevi bövie bise'e eni jevajëjo. Bogo êhiho uvo'i a'i Iesu Kerisoro hesi baejevê'ëgo êhuni hesi muoho bae'i biririvoromo muoho vaejajeje. ¹³Nasi ö mueno'e na bogo uvajeje: Naro Keriso-are muoho bae barëjê'e jevajëjo. Röhu ave muoho gemu uehorovajeje. Mue urimo vaebe rovodoho na bogo uehorovo'i ijönö jioröhe muohuremu bae'i sivohoromo ê'ö gavajeje. ¹⁴Naehu vaejëro Kerisohu nimajoho êhemu nunire bamoromo ë ahorirëro vae'i biririvoromo ê'ö gavajeje êhuro ruahö'öromo suvuoroho bae'irodëro. Êsuvuoro hesi bëhoho God-hu uevego na Iesu Keriso'o gemuoro jevê'ëro hesirire ajiomoi'irodohoje.

¹⁵ Ae rahu a duvahanö'e uehorovarue aribövi javuë'oho naehu uëvodëhi ëhi uehorovonövo'ejo. O jemëhu jö gö uehorovë'iroho God-ro ëho röjëhi'iramu ga'a'aruje jemë bogo eni jëvo'iramu. ¹⁶ Ëhi jië'ego Keriso-are jö ejahobe rovaroho ëhi ejahobe va'ejo. Ëhi jië'oho iae maeje.

¹⁷ Nasi ö mueno'e jemë gemuoro bimumoromo naehu ë'ajëhi ëhi ë'onövore. Noehu öri mare jijiharuëhi ëhi jijiharue aribövioho gë avohoromo jemë'o ëhi ë'ore. ¹⁸ Röhu ave jöho majae aho'o majëhi'i hijodoho huë vavaene bogo bise'o vadu'oho baeromo röhu maho majëhi'irögorö ë'e. Ae aho'obëhe mu sisë vaebe jijihoromo ëhuro Kerisohu korosire guomade jöho ahanovoruomajeje. ¹⁹ Ahanovoromo röhu noehu God börömo ho hë uehorovaruëhi ëhi jabumëro jabesë sinohuremu nimajoho börömo ho hë uehorovoruomajeje. Javoji'e muoho vaeromo mae höromo nimoronimorohë'i jijihoruomajeje. Ave sa'a hesi muohemu uehorovoruomajeje. Ëhu'ëro jië'ëro vëni'e örire va'o hesi jioruome. ²⁰ Jabumë ëhi jië'e aribövie jioruome röhu nosi öri ari'oho bogo aveho jio'i ö'idöre jie. Ö'idöre jië'ego no raromoromo muebejarueje Bada Iesu Keriso no maro bamavuae ahuro ö'idöre jioromo rueröhëgo. ²¹ Rueromo mue bövie bise'e ruahö'ö'amoröhe darugoho baeromo nosi sino haho'e u'uhavuaioho avohahuo'iramu gorosovoromo hesi sino haho'o mabëhe jiajëhi ëhi mabëhe javuo'amo'ë'e.

4

Noehu uehore gemu baeromo nimorohoromo mu maemu uehorovo'iröhe jöhoje.

¹ Ëhuni nasi ö mueno'e Badare öroro ëhi uehorovoromo biririvoromo riravore. Na jemesi örire dë vövöbajo'e aho'o uehorovëvego jemesi jöëni vavaenegajeje. Na jemesi jöho uehorovoromo huë mabëhe jevë'ëro nimoroho avohajeje. Ëhuni na jemesi örire uëve: Nasi ö mueno'e biririvoromo riravorëjo.

² Naro Euodia jasi örire uave. Syntyche jasi örire uave. Badare magonahe gemuoho jëvaje ëhuni uehore gemu baere. ³ Röhu ja na'o mue gemuoho mae vaejanue ae javë'ego naro ave jöho jasi örire uave. Ëmagonaho niö'ioho ajëmijego gemuoro avoho ari'iro. Ëhesi bëhoho ë magonahoho jaburo na'o gemu mae bimumoromo God-are jö ma hesi muoho biririvoromo vaejareje. Jaburo Clement'o na'o mu vaejarue aribövi ioro'iorohu'o ëhi ë'areje. Jabesë ihoho mae raromemu raromo'iröhe ö'idöre jiaje surire ë jajivo'amë'eje. Ëhuni ë magonaho niö'ioho ajëmine.

⁴ Röhu jemë ae aho'o Badare ae gemuoho jëvaje majae ëhi nimorohonövore. Röhu maho uëve: Nimorohorëjo.

⁵ Ma-sanuovoromo ae aho'obëhe jabesë öroro huë mae baejëvore. Badahu rueröhe majaho dunove. ⁶ Bövi bise'o rovë'iroho nadi nurunurumo'irögorö a'i God-hu ajëmijajohö huë mae uavë'i ëninamiromo jemesi huë vavaenoho hesi öroro majahinövore. ⁷ Jemëhu ëhi ë'ë'ohö God-are sanu'e mahuro noehu uehorovarue sanu iosiramijajohuro ëhuro jemesi uehoroho dë vövöbajo'ohö duohëho'iramu sanuovëho'ë'e Iesu Keriso'o gemuoro jëvë'ëro.

⁸ Nasi ö mueno'e ijo tugohö'i jöho uë'ië'e. Aviëhi jië'e muohemu uehorovore. Jö mae ataruohuremu a duvahanö'e vaejarue muemu ahörirëro vaejarue muemu ajiro raromarue muemu dë vuëvo'e muemu aji ma'e muemu huë baejë'e muemu mu rabe rabe ma-maemu jiajohö rabe rabe noehu mae uehorovaruoho ë muohuremu uehorovonövore. ⁹ Naehu rabe rabe röjëhijamu o vaejamu jemëhu garomo heromo baejarijohö ëhi jië'e muohuremu vaenövore. Ëhi ë'ë'ohö God jö sanu'e bojamuijaje ahuro jemë'o hi'ë'e.

Philippi ekaresiaehu huë baeromo Paul-are örire suvuoro bamahamu Paul-hu mabëhe uëvade jöhoje.

¹⁰ Bada'o gemuoro jevë'ego na nimorohevo avohe ë hesi bëhoho jemë majae bisemu ëgo'o bogo ajëmijarijohö avevejö'e röhu maho uehorovevoromo huë baejevajarijohuni. Iae jemë na uehorovevobe rovारीjeje röhu huë baejevo'irarije öroho bogo biroharijeje. ¹¹ Na bogo uve: Jemë nasi huë vavaenoho bogo gevanovarije höromo bogo ëhunioho jajive. A'i

huë mae o huë sisë rovë'oho na uvajeje: Na rabe rabe jevajoho iae eni höjo. Ëhi jië'e uehoroho iae na avoho baejë'e jeve. ¹² Bövi bise'o bogo eni jevajoho o marohë'e mae jevajoho iae na gavë'e jeve. Eni da'uegë'oho o hõmevë'oho bövi bise'o marohë'e mae jevë'oho o inõmo rumo'e jevë'oho o diehi jevë'oho naro uehorovoromo uvajeje: Na iae eni jevajëjo. Ëhi jië'e uehoro hesi bëhoho birohë'e jeve. ¹³ Keriso biriri bojemaje ahuro ajemijë'ëro ëhuro mae o sisë rovë'oho na biririvoromo nami'irodoho eni jeve.

¹⁴ Röhu nasi huë vavaeni ajemijarijoho ëho iae mae ë'arijeje. ¹⁵ Röhu Philippi amo rajohumë jemë'o iae gavarijeje. Na urimë'i aevoromo Keriso-are jö ma majëhibe juvodevare evare naro jemesi sa'aho Macedonia vuonugo'i va'amu ekaresia ioro'ioroho bogo ajemi'i jemëremu ijo bajo suvuoroho bojemiromo huë maho mana baejarijeje. ¹⁶ Röhu jemesi sa'aho bogo vuonugo'i a'i Thessalonica amore va'o hijamu evare na bogo eni jevo'ego jemëro suvuore nasi örire nugö'ö'i arinövariijeje. ¹⁷ Na bogo suvuoroho nahoromo ëhunioho uë'i a'i na nege jemëro suvuore bojemego ëhuro ijonö God-hu suvuoro mana jemesi örire bojëmi'iröhoho bövi mae jiëhoröhego. ¹⁸ Epaphroditus-ro jemesi suvuoroho nasi örire barovadeje. Ëhuni uëve: Jemesi suvuoroho iae na baejë'e jevajëjo. Iae eni höjo. Marohë'e mae höjo. Jew rajehu mi God-are örire suvuoro bojami'i anoromo vënire buejaho'ego God-hu ridi heromo vuëvonövadëhi jemesi suvuoroho ëhi jie. God-ro garomo suvuoroho nioromo huë mae jiajeje. ¹⁹ Röhu jemë rabe rabe bogo eni jëvamu gëvë'oho jemë Iesu Keriso-are ae gemuoho jëvë'ego nasi Vavuohuro iae ajëmi'ë'e hu daruge aje bövie bise'e bogo bise'o vadu'oho jië'ëro. ²⁰ Röhu na nege God nosi Vavu hesi ihoho ioro'iore gemu dö maro jiobe va'oröhego. Iae mae.

Paul-mëhu ijo tugoho'i jejemijare jöhoje.

²¹ Röhu God-are aribövie Iesu Keriso-are aganoho aho'obëhe jejemijajë uëre. Christian ö mueno'e na'o gemu mae arijaruohuro jemesi örire jejemijö. ²² God-are aribövie aho'obëhe jemë jejemijö. Röhu Rome a börömo hesi osare raromarue God-are aganoho jaburo bövi maho jejemijö.

²³ Bada Iesu Kerisoro jemesi aru'ahohu'o jioromo huë baeromo ajëminövo'ë'e. Ahia mino'e.

COLOSSIANS

Paul-hu Colossae ekaresia jejëmijade jöhoje.

^{1,2} O asë'e God-are aribövi Colossae amore raromarujuhümë biririvoromo Keriso uehorovaruje ö mueno'e jëve hu'o gemuore bimuvorovë'ëro. God-ro nimamu Iesu Keriso-are apostle jevë'ëro Paul na'o nosi öho Timothy'o noro jemesi örire jejëmijö. No nague God nosi Vavuohuro huë baeromo ajëmijego maro raro'mo'irarijego.

Paul-hu Colossae ekaresia jabesi jöëni uehorovoromo God rajahiro mo ëninamade jöhoje.

³ Jemëni uehorovoromo pari vaejë'iroho noro God nosi Bada Iesu Keriso-are Vavu hesi örire huë mae uavaruje. ⁴ Rabëni hesi bëhoho iae no hejareje uvavamu: Colossae aribövioho jemëro Iesu Keriso mae uehorovë'i God-are aribövie aho'obëhe huë baejë-varuje höjo. ⁵ Jemë ëhi ë'aruje hesi bëhoho jemëro uvarujeje: Huë mae bae'iröhe ajoho ö'idöre rune vaejahuë'e höromo raromoro muebejarujeje ijonö biroho'irarijëro. Ehi mae biroho'irarije jöho mami'e aehu Keriso-are jö ma hesi bëhi mae majëhijarevare evare jemë hejarijeje. ⁶ Jemesirire jiajëhi ëhi sa'ae aho'obëhe maja rojomajire beva'ajire ë jö maho majëhijego ae aho'obëhe ejahuobe marëbe va'ajeje. Ehi jii'e mu maho jemesirirohu'o rumorovë'ëje. Jemëhu jö heromo God-are huë ma baeromo hesi bëhi avoho hejarije majare evare aevadeje. ⁷ Epaphras-ro ë jö maho aevo'i jemë majëhijadeje. Epaphras noro uehorovarue aëro jii'ëro no'o bimuvoromo Badare muoho vaejahajeje. Huro no'o röromo jemesirire muoho biririvoromo ajëmijajeje. ⁸ Huro uövuadeje: God-are Aru'ahëro jemesi dë vövöbajo'oho huotovëhë'ëro ae huë baejëvo avoharuje höjo. Jemesi jöho ëhi majahujamu hejareje.

⁹ Iae ëhuni jemesi jö hejarevare evare no aevoromo jemëni God-are örire uehorovobe rovaroho jaruvoho ëhi gemuoho ë'obe va'arujeje. Ehi ë'obe va'oromo noro God uavaruje huro jemë avohëvego hesi Aru'ahëhu simano ma bojamuijaje ëhi jii'e simanoho jemë'o mabëhe baeromo mue aho'obëhe avoho garomo ëhuro ga barë'irarijego God-hu diehi nimajoho. ¹⁰ Ehuo huhu nimajëhi jemëro ëhi vaejego Badaro jemë gëromo vuëvo avoho'iröhego. O jemë mu mae bövie bise'e vaeromo God bisemu gavarujo gabe va'ajuvo ijonö ga avoho'irarijego. ¹¹ Röhu God-hu aji mare hiromo bojamuijaje biriroho ëho jemëro bövi mae bae avohoromo ëhuro huë mae huë sisë rabe rovego nimorohë'i biririvoromo mae riravo'irarijego. ¹² Mae riravoromo Vavuoho huë mae ua'irarijego rabëni huro jemë avohëvamu hesi ariböviehu aji'e öri ari'ere va'o raromoro mae baejaruëhi ëho jemë'o bae'irarijoho eni jëvë'ëro jii'ëro. Iae ëhuni no God ua gavarujeje.

Keriso aho'obëhe iosiramui'amaje a hesi aharire javuaje jöhoje.

¹³ Iae mae. God-ro no ajamuiromo ramoramo hesi vöröre raramaroho jiovahuoromo rinaguoromo hesi Harihu mabëhi hesi aharire ramuë'ëje. ¹⁴ Ramuë'ëgo hesi Harihohuro i'u'e mu sisëho tugohahu'o'i hesi sasohë'e mu maho jiovahuoromo sisëho mu'uvahuadeje.

¹⁵ Sisë mu'uvahuade aho Keriso God bogo gavaruë a jiajëhi hu ëhi jii'ëro no hu garomo uvarujeje: God ëhi höjo. Hu Muriho jii'ëro God-hu bamade bövioho bise'o'ho iosiramui'amoromo hu simanohoje. ¹⁶ Ehesi bëhoho God-ro Keriso uavamu huro bövioho bise'o'ho avoho'amadeje. Ö'idöre jiajohu'o sa'are jiajohu'o nunehu ga'amaruohu'o bogo ga'amaruohu'o simano vaeruomaje aru'aho masijohu'o vörö baeruomaje aru'aho masijohu'o aho'obëhe God-ro uavamu avoho'amo barëjadeje hesi muebe'amoröhëni. ¹⁷ Bövi bise'o bogo bamadevaroho Keriso hu urimo jiadeje. Huro aho'obëhe mueberomo ma'eno titimajeje. ¹⁸ Hu ekaresia nosi simanohoje no ma-hesi övo duruajo'e javuë'ëro. Hu ekaresia nosi bëhohoje. Hu aevo'i guomoromo ri'öjadeje ëhuro aho'obëhe iosiramui'amoromo huro urimo nuniroho jioröhëni. ¹⁹ God-ro nimamu Kerisoro hesiro daruge uehore bövie bise'e bae barëjë'ëje. ²⁰ God-ro ëhi nimë'ëro uvadeje: Na negajëjo Kerisoro aho'obëhe nasinö sö rovego na'o huë mae jioruomoröhego. Kerisoro korosire iromoromo köe

rueromo guomego ehuro God naro buore vaeromo bövie bise'e sa'are o ö'idöre jio'ama-joho avoho'amego na'o huë mae garorové'i raromoröhego. Na ehi negajëjo.

²¹ Röhu urimoho jemëro sisë'i uehorovoromo sisë vaejamu mue gö jëvë'ëro God-ariroho hahagu tariö'örovë'e jëvanovoromo God nu huodivaruje aribövie jëvadeje. ²² Jaruvoho bogo God nu huodivaruje aribövioho jëvo'i a'i God-ro hesi Harihoho nugö'öjamu sino haho'e jioromo guomamu ehuro God-ro jemë buore vaejëvoromo agane vaejëvadeje ehuro jemë övövo rumo'e jö sisë rumo'e jëvo'i ma-maemu jëvego va'o hesi nunire mae riravo'irarijigo. ²³ Hesi nunire ehi mae riravo'i nëgë'oho mae uehorovaruje jöho ehuremu birivoromo uehorovore. Urimo ë jö maho heromo uvarijeje: U'emu God'o gemu mae raromo'ëjarëjamu huë mae jëvobe rovadeje. Ehi uehorovobe rovarijoho nadi vuonugore. Ejö maho sa'ae aho'obëhe maja rojomajire beva'ajire aëro majëhibe jijihö barëj'ëjö. Röhu ë jö hesi muoho naro vaejajeje.

Paul-hu ekaresia ajëminövade jöhoje.

²⁴ Naro jemë ajëmi'irodëni vi'ehi huë vavaeni bövi bise'o baebe rovodoho huë mae jeve. Noehu Keriso'o röromo bae'iröhe vi'ehoho ehö naro ajamiromo nasi sinore bae'i hirohajeje hesi sino haho'ohö naehu uëvaje hesi bëhoho hesi ekaresiaho mae jëvoröhego.

²⁵ Ekaresiaie jemë mae jëvoröhego God-ro ekaresia ajëmi'irode muoho nasi örire bojemi-jë'eje. Bojemiromo uevë'eje naro hesi jöho majëhi barë'irodego. ²⁶ Majëhi'irode jöho urimo God-ro ae aho'obëhe subivëhobe rovodoho jaruvoho hesi aribövioho röjahuij'ë'eje garöhego. ²⁷ Ejö urimo subivahuadoho God-ro hesi aribövioho röjahui'i nimadeje noro garomo uvoröhego: Ejöho aji mabëhe jië'ëro sa'a gö gö raje aho'obëhe hebe va'oromo ma-mabëhe raromoruomo'ajëjo. Ejö hesi bëhoho Keriso jemë'o jie. Keriso jemë'o jië'ëro ehui'ëro uvarujeje: U'emu hesi aji mare ajio raromo'ëjarëjo. Jöho ehije. ²⁸ Ehui'ëro jië'ëro Keriso-are jöho ae aho'o majëhijarueje. Majëhiromo simane ma-mae uehorovoromo ae aho'obëhe röjëhibe jijiharueje jö bëhoho heromo avo'avoho uehorovoruomoröhego. Avo'avoho uehorovobe va'oromo ehuro ae gemu gemu aho'obëhe Keriso-are ae gemuoho jioromo a duvahanö'e God-are nunire riravoröhego. ²⁹ Ehi mae riravoröhego ehuni naro Keriso-are darugo bövi maho baeromo birivoromo mu börömo böröme vaemu vaeromo hesi jöho röjëhijajeje.

2

Sarerie jö bogo ejëho'i Keriso-are jöhemu mae uehorovo'iröhe jöhoje.

¹ Röhu na nege jemëro ave jöho gal'irarijigo. Na muoho bogo bise'o vadu'ohö vaejajeje ehuro jemë'o Laodicea amo rajohu'o nasi nu ano'o bogo gevarue a ioro'iorohu'o ajëmi'irodëni. ² Naehu mu vaejaje hesi bëhoho na nege jemesi dë vövöbajo'ohu'o jabesirohu'o birivëho'iröhego. Jemë'o jabu'o huë baerovoromo rajahirovo'irarijigo. Jöho avoho heromo ehuro mae uehorovoromo uvo'irarijigo: Jöho bogo sareri'ehu jio'i ma-mae gemu höjo. Ehuro God-hu urimo subivëhade jö hesi bëhoho Keriso-are jöho gal'irarijigo. ³ Ae rahu Keriso-are bëhi gavë'ohö ehuro God-are nuni ajie uehoro maho börömo mae biroho'anue. Ehuremu jio'i biroho'irane öre gö bogoje.

⁴ Na Keriso-are jö ehi uëvaje hesi bëhoho ae göëro jemë sarerëmiromo vuëvo'e jöho majëhijigo mae höromo ejëhojööni uëve. ⁵ Röhu na rori'o hi'i röhu nasi uehoroho aho'o jemesirire jie. Ehuro na jemë'o jevanove. Jemë'o hijanovoromo gavaje jemë birivoromo gemuore riravoromo Keriso mae uehorovego géromo nimorohajeje.

Keriso-are ae gemuohuro javuë'ëro ehui'ëro bövi bise'o eni javuego mae raromarue jöhoje.

⁶ Röhu jemë aevoromo mae uehorovoromo uvarijeje: Iesu Keriso iae nosi börömo ho höjo. Aevoromo hu mae uehorovarijëhi ehi uehorovoromo hu'o gemu mae raromo jijihore. ⁷ Ije ö'e dirumu'ëro bibivajëhi o javu öbehu bibivo'amajëhi ehi Keriso-are jöro dirumunö'e io'amoromo bibivo riravore. Ehi'oromo röjëhijamu hejarije jöho birivivoro-mo mae uehorovobe hesi öroro mabëhe uabe va'ore.

⁸ Rõhu aehu ëma sarerëmiromo uëvaruoho: Aveho nuni aji'e jö böröme hö uëvaruoho nadi ejëhoromo guaroho rireromanovore. Jabuhu atarue jöho ma-aëro jabesi uehorëro avohobe rovë'eje. Ave sa'a hesi jöhemu jië'ëro ëhuro Keriso-are jöho ahajeje. ⁹ Èhuni jabesi jöho nadi ejëhore. Èhesi bëhoho God-hu diehi jiajoho iae Kerisoro hesi sino haho'ere bae barëj'eje. ¹⁰ O aru'aho mue gö gö jemëhu baejõro God-hu nimajoho iae eni bae barëj'eje jëve Keriso-are ae gemuohuro jëvë'ëro Kerisoro simano vaeruomaje darugo'e aru'ahë gö gö aho'o taemëvo'i huro gemuëro dö maroho jië'ëro.

¹¹ Jemë Keriso-are ae gemuohuro jëvë'ëro ëhu'ëro jemesi sino sisëho tarivëhanovë'eje. Èhesi bëhoho bogo ma aehu Jew rajo muoho vaeromo sinoho tarivëhamu ëhuro God-are aribövie jëvo'i a'i Kerisoro jemesi sino hesi mu sisëho tarivëhë'eje God-are aribövie jëvorõhego. ¹² Jemë bapataeto vaejarijevare evare Keriso guomamu hure bamarohuro ëhuro jemesi uehoro mamioho hu'o gemu mae guavëhë'eje ioro'ioeremu barëjëho'irõhego. Rõhu God-ro darugoho bojamamu Keriso guomoromo ri'õjadeje. Èdarugoho jemëro mae uehorovoromo ëhuro Keriso'o gemu mae ri'õromo uehoro i'oho baejarijeje. Bapataeto vaejarijevare ëhi jëvadeje. ¹³ Urimoho jemë mu sisëhemu uehorovonõvarijeje. Mu sisëhemu uehorovoromo bogo Jew rajehu jëvo'i sa'a gö rajëro jëvë'ëro God-are jögoroho bogo baejë'ëro ëhu'ëro jemesi dë vövõbajo'oho vuovëvanovadeje. Jaruvoho God-ro jemë Keriso'o gemu mae ajëmamu i'ovoromo ri'õromo uehoro i'e baejë'e jëve. Rõhu God-ro nosi sisëho aho'o uehorovoromo vuonugahuë'eje. ¹⁴ Urimo huro hesi jögoroho bojamuromo uövüadeje: Èhi ëhi ë'orëjo. Bogo ë'ë'oho i'ue bae'a'arujëjo. Èhi uõromo gavade noro ë jögoroho ahamu gagorovo nosi ihoho jajivoromo uvadeje: Jabumë mu sisë ëhi ëhi vaejë'ëro i'ue bae hesi jioruomajëjo. Èhi ë'ë'ëro Keriso korosire guomadevare God-ro nosi sisëho uehorovoromo vuonugoromo nosi mu sisë jö surire jiajoho Keriso'o korosire ano taemoromo mu'tuvahuadeje ëhuro mae javuorõhego. ¹⁵ Rõhu majae gemuore Keriso korosire guomamu ëhuro aru'aho sisë ihe gö gö sa'a bövi bise'o muebe'amarue jabesi darugoho God-ro ruahõ'õ'amoromo rori'o ujuoho ruruhõ'õjadeje. Ruruhõ'õromo ë sisë aribövioho sõromo a nunire rovadeje ae aho'obëhe garõhego God-ro jabumë ruahõ'õjëvë'e jiego.

¹⁶ Vörõ'e aru'aho sisëhu ave sa'are muebejëvoruomadoho ruahõ'õjëvë'e jiaje ëhuni aehu ave sa'a hesi jögorohuremu uehorovoromo uëvaruoho: Èioho jovoho bogave i'irarijëjo. Èjew rajo maja börõmoho vadune göro göro manaere göro göro hurae göro göro ëhi rovego ëhi ëhi vaenõvorëjo. Nosi jögoru bogo ejahuë'õho sisë'rëjëvo'ajë uëvaruoho nadi ejëhore. ¹⁷ Èhi jië'e jögorohuro ëhuro God-are mu maehu rue'irõhoho ëho no masisë'i sisë'i maja aru'ahonõ'e gavarueje. A'i Keriso gavë'ohuro ëhuro ë mu ma hesi bëhoho gavarueje. ¹⁸ Èhuni aehu sarerëmiromo uëvaruoho: No nia'ovo'iraeromo mu masijo masije gavë'ëro ëhu'ëro a masije javuajëjo. Èhuni uëvaruëjo: Jemesi arijo'arije taemorovorëjo. Aneraho uvene aho röjëhinõvorëjo. Nosi jö bogo ejahurujuhuni sisëro va'a'arujë uëvaruoho nadi ejëhore. Èhi jië'e ariböviohuro sinehu nimaju mu sisëho uehorovoromo ma-dõhemu nimoronimorohë'i jijihoruomajeje. ¹⁹ Bogo biririvoromo Keriso mae uehorovoruomajeje. Rõhu Keriso hu simanoho jio'i no hesi õvo hörü'oho javue. Hu simanoho jië'ëro muebejavuego õvo hörü'oho jarõmi umuogëro darugoho baerovoromo gemuoro bimumovororomo God-hu ëhi ë'õjõro nimadëhi ëhi vaeromo böviraëbe va'arueje. Èhi jië'ëro Keriso nosi simanohoje rõhu ë sisë aribövioho bogo biririvoromo simanoho Keriso'o gemuoroho bimumovororuomajeje.

Keriso'o gemu mae vuovanovoromo mu mamì vuonugo'i hu'o gemu mae ri'õromo mu i'o baejare jõhoje.

²⁰ Rõhu jemë Keriso'o gemu mae bimumovoromo vuovëvamu ave sa'a hesi mu jöho barëjëhadeje. Sa'a mu jö barëjëhadoho rõhu jemë rabëni ave sa'a hesi mu uehorovar-iyoho bogo vuonugë'e ëhi gemuoho raromo jijiharujeje. Jemë rabëni aviëhi jië'e jöho ejëharujeje: ²¹ Aveho nadi ma'enorëjo. Èho nadi irëjo. Aruëroho nadi rëhorëjo. ²² Èhi jië'e jögoroho ma-i hesi jögore o inõmo hesi jögoreje. I ijë'õho barëjajeje. O inõmo baeromo mu

vaejē'oho ehuro ma-sisērē'amajeje. Ēhi sisērē'amorōhe inōmo bövi bise'lo hesi jögoroho ma-aëro bojēmiromom röjēhiruomajeje. ²³ Rōjahi'iramu uvo'a'anue: Jabesi jōho nani simano ma'e jōe hōjo. Ēhesi bēhoho jaburo uvarueje: Uehore aho'o bojamiromom aru'aho masijoho uvene aho röjēhinōvorējo. Arijō'arije taemorovonōvorējo. Sino haho'oho ijumorovonōvorējo. Rōhu jabesi jōho ma-dōemu maeje. Ejēhē'oho bogo ehuro sinehu nimaje mu sisēho aharueje.

3

¹ Rōhu Keriso guomoromom ri'ōjadohu'lo gemu mae ri'ōjē'e jēvaje ēhuni Kerisohu God-are övo manö böörōme hijajire dōre jiaje muoho bövioho bise'lo ehemu uehorovore. ² Nadi ave sa'a hesi mu sisēho uehorovo'i dōre jiajohemu ehemu uehorovore. ³ Jemesi mu sisē hesi darugoho ioro'ioremu barējēhē'eje. Ēhuro vuovēvanovē'eje. Jemē vuovēvanomamu Keriso'lo bimuvorovē'ero jemesi darugo i'oho God-arire gurihijē'eje. ⁴ Ēhi'obe va'ojuvo hujeji Keriso darugo bojēmijaje aho va'orahoro rue'ē'e. Rue'iramu evare jemēro hu'lo va'orahoro riravoromom hesi ajoho gemu mae bae'a'aruje.

Mu mami vuonugo'i mu i'lo vaenövo'irōhe jōhoje.

⁵ Ēhuni sinehu nimaje mu sisēho mu'ure. Öehu jijihanovarujoho va'inumi'e mu vaejarujoho jemesi dēre uehorom sisē ri'ōjogo nimarujoho ēhi jii'e muoho mu'u'amore. Rōhu avare inōmemu nimaruje muoho mu'ure. Avare inōmemu nimarue mu hesi bēhoho God dejonö bamo'i inōmo sisē nuninö bamarue muohoje. ⁶ God-are jō bogo eruomaje ariböviohuro ēhi jii'e mu sisēho vaeruomajego ēhuni God-are vörōhuro jabumēni rue'ē'e. ⁷ Urimohom jemē'ö ēhi jii'e ariböviohu'lo gemuore jijihoromom ēhi jii'e mu sisēho vaenövarijeje.

⁸ Rōhu avevejō'oho aviēhi jii'e mu sisēho aho'obēhe vuonugore. Dē vörönimarujoho vörö'iraejarujoho uehorom sisē baejarujoho ēhi ē'arujoho vuonugore. Ae gö jabesi iho ijumarujoho javoji'e jō sisē atarujoho bogave jemesi jō'orohom suorovo'i. ⁹ Nadi göero göhō sareramirovore rabēni hesi bēhoho uehorom mami jēvo'ego mu sisē vaenövarijohom vuonugo'i ¹⁰ uehorom i'e baejē'e jēvaje. Ēuehorom i'ohom God-ro aevoromom bojēmadeje. Bojēmijē'ero ē uehorohom huro avohēhobe va'ajeje huhu uehorovajēhi ēhi uehorovojōro ēhuro jemēro hu avohom ga'irarijego. ¹¹ Uehorom i'ero jēvē'ero jemē bogo aho adovoromom uvo'a'aruje: Jew rajohom gö javuo'i sa'a ioro'iorom rajohom gö javuajējo. Jew rajo mu vaeromom sino tarivahuē'e aribövioho gö javuo'i sino bogo tarivahuē'e aribövioho gö javuajējo. Huē gö aribövioho o rori'ere aribövioho gö javuajējo. O ae gö jabesi muemu vaejēharue aribövioho gö javuo'i nosi nimorom mu vaejarue aribövioho gö javuajējo. Ēhi jii'e muohom iae barē'i jemē ae aho'obēhe Keriso-are aribövie gemuohom jēve. Hu ae aho'obēhe jemesirijeje.

¹² God-ro jemē hesi baejēvē'ero jemē hesi aribövi maemu jēvego huro jemē dē vövöbajō'e aho'om uehorovēvajeje. Ēhuni huē baeromom a ajēmi'irarije muohom baere. Nadi sivuohom uehorovoromom bövioho riravo'i ma-sanuovoromom muohom vaere. Ae göehum huē sisē bojēmijē'ohom biririvoromom ma-nunēremu ga taemore. ¹³ Göero göhō garomom nadi nuohom huodivorovo'i javuo'om ma-raromore. O uvē'irohō: Ae göero mu sisē vaejade hō uvē'irohō göero gö hesi sisēho uehorovoromom vuonugore. Badahum jemesi sisē uehorovoromom vuonugadēhi jemē'ö ēhi ē'ore. ¹⁴ Ēhi jii'e muohom vaejē'i rōhum ave muohuremu avohom ma'enore. Göero göhō dē vövöbajō'e aho'om uehorovore. Dē vövöbajō'e aho'om uehorovē'ohom mu mae aho'obēhe avo'avohom vaenövo'aruje. ¹⁵ Rōhum Kerisom ajamuijego nosi dē vövöbajō'e mae javuego gemuorom mae raromarueje. Jemēro ēhi gemuorom mae raromom'irarijego ēhuni God-ro gagovēvadeje sino haho'e gemuohom jēvojōro. Ēhuni ē muohuremu nunorom bamoromom uvore: No muohom ēhi ēhi vae'ejarējo. O God-hum suvuorom gö gö bojēmijajohom nadi ēma nunēremuohom ga'i uvore: God-ro suvuorom mabēhe bojamuijē'e hō uvore. ¹⁶ Rōhum Keriso-are jōhō mabēhe jiaje ē jōhuremu uehorovore. Ējōhō uehorovoromom simanom mae bae avohoromom örohō röjahirovoromom jögore mamirovore. Ēhi'oromom uvore: God-ro mae vaejavuajē uvē'i Psalms surire jajivare jōhō God rajahi'irōhe jōhō Aru'ahemom bojēmadeje jōe

gö gö iore. ¹⁷Jemë jö atë'oho mu vaejë'oho o rabe rabe ë'ë'oho God Vavuoho Bada Iesuare ihore huë mae uavë'i mue aho'o Bada Iesuare ihoro vaenövore.

Aehu diehi avo'avoho garorovo'iröhe jöhoje.

¹⁸Röhu vaboroharo jemesi baru jabesi jöho ejëhonövore. Jö ejëh'oho iae maeje jemë Badare magonahëro jëvë'ëro.

¹⁹O baruoharo jemesi vaboroho rajëhire. Rajëhiromo nadi sisë'ioho vaejëvore.

²⁰O aboji harihu'oharo jemesi vëmu vavu'o jabesi jöho aho'o ejëhonövore ëhi ë'ë'oho Badaro nimaje jiaje.

²¹O vëmu vavu'oharo aboji harihu'oho nadi huë sisëho bojëminövore. Huë sisë bojëmibe va'ë'oho jabesi uehoroho u'uhëho'ë'e.

²²Ae gö jabesi muemu vaejëharuje aribövioharo jemesi masijoho ejëhonövore. Nadi ma-döemuoho ejëhorego jemesi masijohuro jemë gëromo mae uehorovëvo'irögororo a'i Bada uehorovoromo jabesi öroro uhohu'o mae ejëhonövore. ²³Ejëhoromo mu rabe rabe vaejë'oho uvore: Bogo ma-a jabesi muoho vae'i na Badare mue vaejajëromo dë vövöbajo'e aho'o avoho uehorovoromo muoho vaere. ²⁴Mu ma vaejë'oho Badare aribövieuho bae'iröhe suvuoroho huro jemë'o mana bojëmi'ë'e. Èhuremu uehorovore. Èhesi bëhoho ae gö jabesi mu vaejë'oho ëhuro Keriso jemesi bövi hesi muohu'o vaejarujeje. ²⁵O mu sisë vaejë'oho ë mu sisë hesi manaho bae'a'aruje. God-ro bogo gö nimo'i gö bijönimo'i a'i ma-gemu uehorovauajeje.

4

¹O simano vaejaruje aribövioharo jemesi muemu vaejëhoruomaje aribövi jabesi öroro avo'avoho vaejëvore. Uvore: Bogo jabumëremu a'i no'o Simano Vaejavuaje Ae iae ö'idöre jiajëjo.

Birivoromo God-are örire jö jövoromo mu avo'avoho vaenövo'iröhe jöhoje.

²Röhu God-are örire jö atë'iroho nadi u'uvo'i a'i birivoromo nune jioromo hesi öroro mabëhe uaromo jöho atore. ³God-are öroro jöho atoromo röhu nosi jöëni ëninamirego huro nosi öroho jiovahuo'iro no Keriso-are jö subivahuadoho ae huruoho majëhi'iröhe. Èjö majëhijajohuni ëhuni aëro savoji gagore ba'amevë'ëro hijajeje. ⁴Ëninamirego na ë jö hesi bëhoho avo'avoho huruoho majëhi'iro aëro ma-mae heruomoröhe. Naehu ëhi ë'ë'oho iae maeje.

⁵O Keriso-are jö bogo heruomaje ariböviohu'o gemuore raromë'iroho simanoho avoho uehorovoromo jabu'oho raromo jijihore. Jabu'o raromoro röhu majae eni jiamu gavë'iroho nadi ëma raromo'i a'i birivoromo jabesi öroro avoho ajëmirë. ⁶Röhu jemëhu jabu'o jö atë'oho jemëro vuëvo'e jö mahemu atore. Èhi jü'e jö atë'oho ëhuro he'irarije aëro Keriso-are jö bëhoho he'i uë gëvamu hejë'oho ae gemu gemu avoho majëhibe va'a'aruje.

Ijo tugoho'i jejëmijare jöhoje.

⁷Tychicus-ro ö'oromo naehu rabe rabe ë'aje jöho majëhi'iramu he'a'aruje. Hu nosi huë baerovarue öeje. Hu no'o bimuvoromo Badare muohemu vaejahajeje. ⁸Ëa naehu nugö'ö'ië'aje hesi bëhoho huro ö'oromo jöho majëhijego noehu diehi rarumarue jöho jemëro hejego dë vövöbajo'oho mae jëvoröhego ëhuni nugö'ö'ië'e. ⁹Röhu Onesimus-ro Tychicus'o gemu mae ö'ë'e. Onesimus nosi huë baerovarue öhuro jüë'ëro birivoromo Keriso mae uehorovajeje. Hu jemesi ae gemuhoje. Tychicus'o Onesimus'o niö'iro noehu rabe ë'aruoho majëhi barë'iramu he'a'aruje.

¹⁰Röhu na'o savoji gagore hijaje aho Aristarchus-ro jemesi örire jejëmije. O Mark Barnabas-are muenohuro jejëmije. Röhu Mark ö'ë'oho jejamiromo uare: Nosi osaro ro hijëjo. Èjöho na mami'e bojëmamü gavarijeje. ¹¹Röhu Joshua iho göho Justus hu'o jemesi örire jejëmije. Aristarchus o Mark o Joshua ë Jew rajoho niö'i gemu jaburo sivue na'o bimuvoromo God-hu muebejaje öri ari'o hesi muoho vaejarujeje. Vaeromo ma-mabëhe ajemijë'ejö. Jew rajo ioro'ioroho bogo ajemijarujeje.

¹² O Epaphras jemesi ae gemuoho Iesu Keriso-are mu vaejahaje ahuro jemesi örire jejëmiye. Huro jemesi jöëni börömo mae biririvoromo God-are örire ëninamijajeje huro ajëmege jemëro a duvahonö'e biririvoromo riravoromo hesi jöho uhohu'o ma-mae hö uehorovoromo huhu rabe rabe nimajëhi ëhi ejaho barë'irarijego. ¹³ Ëhi ëninamiromo mu börömo böröme vaejajeje jemë'o Laodicea amo rajohu'o Hierapolis amo rajohu'o ajëmi'iröhëni. Mu böröme vaejamu gavë'ëro naro majëhiye. ¹⁴ Röhu oso muebejaje ae nosi huë baerovaruoho Luke o Demas jabu niö'iro jemesi örire jejëmiyö.

¹⁵ O Laodicea raromarue Christian ö mueno'ohu'o jejëmiyode höre. O Nympha nasi Christian ma'ine o hesi osare ro gagovoruomaje ekaresiahu'o jejëmiyode höre. ¹⁶ Röhu ave surire jö baeromo adahë'iroho suroho nugö'öromo Laodicea amo rajoho uëregö jabu'o adaho'irovo. O naehu Laodicea amore nugö'öjode suroho jabuhu jemëni nugö'öjë'iroho jemë'o ëho adahore. ¹⁷ Röhu Archippus uare: Badahu bojamade muoho avo'avoho uehorovoromo vae barënëjo. Ëhi uane.

¹⁸ Röhu ave jöho naro nasi övëro jajive gare. Paul naro jemesi örire jejëmiye. Na savoji gagore hijaje jöho nadi rumonimore.

God-ro jemë huë baeromo ajëminövo'ë'e. Ahia mino'e.

1 THESSALONIANS

Paul'o hesi ariböviohu'o jabuhu Thessalonica amore raromarue ekaresia jabesi örire jejëmijare jöhoje.

¹ O asê'e Thessalonica ekaresiaho Paul naro Silvanus-ro Timothy-ro ave jöho bamêhö. Jemê God Vavu hesi o Bada Iesu Keriso-are ekaresiaëro jëvê'ëro Thessalonica amore raromarujoho noro jemesi örire jejëmijö. No nague God-ro huê baeromo ajëmijego maro raromo'irarijego.

Thessalonica ekaresia ariböviehu biririvoromo God mae uehorovoromo raromare jöhoje.

² No God-are örire jö atê'iroho no jemê ae aho'obêhe uehorovoromo jemesi jöëni majae êhi God huê mae uavarueje. ³ Nosi Vavue God-are örire êninamijê'iroho noro ave jöho uehorovarueje. Jemêro Keriso mae uehorovoromo êhuro mu maho vaejarujeje. O ae gö huê baejëvoromo êhuro i'u'e muoho vaejarujeje. O biririvoromo nosi Bada Iesu Keriso ga'i muebemu muebejarujeje. ⁴ Nasi ö mueno'e noro garomo uvarueje: God-ro hesi dê vövöbajo'o uhohu'o jemê rajêhijaje höjo. Rajêhijajoho hesinö jëvoröhego uve'ëro êhu'ëro huro jemê baejëvade höjo. ⁵ Noehu êhi uvarue hesi bêhoho urimê'i noehu Keriso-are jö ma majêhijarevare evare no bogo ma-jö'ëremuoho ë jö maho majêhijareje. A'i no God-are darugohu'o Aru'ahohu'o baejê'ëro êhu'ëro biririvavuamu jöho majêhijamu ma-burêro ejahuarijeje. Noehu jemesirire raromoromo jemesi jöëni diehi jiê'e mu vaejaroho iae jemê gavarujeje. ⁶ Röhu no'o Bada'o noehu raromo jijiharêhi jemê'o êhi gemuoho raromo jijihonövarijeje. O noehu Keriso-are jö majêhijarevare jemê gavarijeje huê vavaene jemesi örire rovamu. Röhu God-are Aru'ahohuro jemesi dê vövöbajo'oho avohêhamu jemêro nimorohoromo jöho biririvoromo ejahuarijeje. ⁷ Nimorohoromo jöho mae ejahuamu Macedonia sa'are Achaia sa'are raromarue Christian aribövie aho'obêhe jemesi mu ma hesi jöho heromo uvoruomê'eje: Ê'ego no'o êhi jiê'e muoho vaejarêjo. ⁸ Êhesi bêhoho jemêro mu mae vaejê'ëro êhu'ëro Badare jöho jemesirire jioromo jemesi sa'ae Macedonia rumorovoromo sa'a göho Achaia rumorovobe va'ê'eje. Röhu gö'o jemêhu God mae uehorovaruje jöho sa'ae dinö'e dinö'e rumorovobe va'ê'eje. Rumorovobe va'amu ae he barêjê'ego no bogo röhu maho aho majêhiromo uê'ejo: Thessalonica amo rajohuro God mae uehorovoromuomaje höjo. No bogo êhioho uê'ejo. ⁹ Êhesi bêhoho jaburo mami'e hejê'ëro jabesi ri'öromo nosi jöho ae majêhiromo uëruomajeje: Paul-mêhu Thessalonica amore aevoromo va'arevare ë amo rajohuro jabesi örire mabêhe rajêhiromo baejëvare höjo. Baejëvoromo sareri'e darugo rumo'e inömo masije höromo êhemu uehorovoromadoho vuonugo'i God darugo'e hijaje a ma hesi muoho aevoromo vaeruomade höjo. ¹⁰ Aevoromo God-are muoho vaeromo hesi Harihoho muebejare höjo huro ö'idöre jioromo rueröhego. Harihoho iae Iesuoje. Guomamu God-ro ajamamu ri'öjadeje. Ri'öjê'ëro huro no ajamujajeje êhuro vörö'e maja rovê'oho God bogo dêho vörönimoromo i'uoho mana bojamujiego bae'i a'i mae raromo'iröhego.

2

Paul-hu Thessalonica hiromo diehi mu vaejade jöhoje.

¹ Röhu nasi ö mueno'e jemê'o gavaruje bogo noro ö'oromo Keriso-are jöho majêhijamu ë muoho sisêrêjadeje. ² Urimê'i noehu jemesirire bogo ö'i Philipp'i amore raromarevare evare ë amo rajohuro huê vavaene bojamuïromo mu sisê vaejavuareje. Êhi ê'aroho jemê iae hejê'e jëve. Êhi'amu noro jemesirire ö'amu jemesi amo rajohuro nosi jöho bijönimoromo ri'öromo no'o muorovo'iê'areje. Muorovo'ia'amu röhu nosi Böröme God-ro ajamujiamu no bogo vuonugo'i biririvoromo hesi jö maho jemê majêhijareje. ³ Êhesi bêhoho aehu simano huotorovojöro mu jö majêhijê'oho no bogo simanoho garaeromo sareri'e jöho mae höromo jöho majêhijarueje. No bogo uehoro sisêho baeromo jöho

majëhijarueje. No bogo aho sarerëmi'i nimoromo jöho majëhijarueje. ⁴A'i God-are jöho mae majëhijarueje. Èhesi bëhoho God-ro no göromo uvadeje: No eni javuajë uvoromo hesi jö maho nosi örire bojamuadeje noro majëhiröhego. Hesi jöho bojamuij'ëro èhuni noro jöho avoho majëhijarueje bogo aho heromo nimoroho'i a'i God nosi dë vövöbajo'o gövuajohuro nimorohojöro. ⁵Noehu jemë bogo mae bogo sanusanuëmiromono sareri sareri'e jö majëhijaroho jemë iae gavarueje. No bogo nosi sinohemuoho uehorovoromo bövioho bise'oho bojamuijöro nimoromo jöho majëhijareje. God-ro gö'ego no jö mae uëvö. ⁶No bogo ma-aëro rajahuijöro bogo èhunioho jemë jöho majëhijareje bogo jemëro o a ioro'iorëro rajahuijöro. ⁷No Keriso-are apostle ömo'ömhuro javuë'ëro hesi darugoho baej'e javue. Hesi darugoho baej'e javuë'ëro èhu'ëro no masije riravoromo i'u'e muoho jemë bojëmi'ibejo iae mae jio'ibejo. Röhu no bogo èhioho ë'i a'i noro jemë'o raromoromo ma-sanu'e jöhemu majëhijareje. Vëmehu aboji harihu'o sanuëmiromono muebejaruëhi noro èhi jemesi örire ma-sanu'e jöhemu majëhiromono muebejëvareje. ⁸No jemëni vavaenaguo avohë'ëro èhuni no uvareje: No bogo ma-God-are jö mahemu bojëmi'i nosi dë vövöbajo'o uhu'o bojëmi'ëjarëjo rabëni noro jemesi örire dë vövöbajo'e aho'o rajëhijë'ëro javuë'ëro. ⁹Nasi ö mueno'e noehu jemë'o raromoromo i'u'e mu bogo bise'o vadu'o vaejaroho iae jemë'o uehorovarueje. Noehu God-are jö ma majëhijarevaroho no bogo èhemuoho ë'i sisono vahie majae nosi övëro biririvoromo i'u'e mue vaemu vaebe va'oromo èhuro nosi manaho birohoro iruno'oho bövioho bise'oho imonövareje. No God-are jö ma majëhiromono böviëni bise'ëni mana èninëmijë'oho no bijönaguadeje jemë anojëmijöëni. Èhuni èhi ë'areje.

¹⁰Jemë'o God'o iae gavë'e jëve Keriso mae uehorovarueje aribövi jemesi örire noro diehi jji'e muoho vaejëvamu. Noro God-are jöhemu uehorovoromo mu maemu vaejëvamu èhuro jö sisëho bogojio'i jö maemu jiadeje. ¹¹Vavuehu hesi aboji harihu'o mu öri röjëhijajëhi noehu jemë ae gemu gemu èhi röjëhijaroho èhu'o gavarueje. ¹²Noro jemë sanuëmijë'i jögore mëmijë'i jemesi uehoroho biririvëhojöro uënövareje God-hu nimajëhi jemëro èhi raromo jijih'o'irarijego. Èhi uënövareje. Èhesi bëhoho God-ro uëvajeje jemëro hesi öri ari'ere iojioromono hesi aji mare raromo'irarijego. Èhuni ë'areje.

¹³Röhu noro ave jöhu'o uehorovoromo vae majae God-are örire rajahijarueje. Noehu God-are jö bö'oromo majëhijamu hejarijevare jemë heromo uvarijeje: Èjöhö bogo ma-a jöhu jio'i God-are jöe hö uvoromo ejaharijeje. Iae mae uvarijeje. Iae God-are jöjeje. Hesi jöhuro jemë biririvëvego èhuro hesi örire mae uehorovarueje aribövioho mae jëvajeje. ¹⁴Nasi ö mueno'e God-are ekaresiaie Iesu Keriso-are aribövieuho Judea raromoromo vavaeni baejarëhi jemë'o èhi huë vavaene baej'e jëve. Jew rajehu jabesi örire ë'arëhi jemesi sa'a rajohuro èhi sisë vaejëvo'i arijë'ëjö. ¹⁵Jew rajohuro èhi jabesi sa'a rajo ekaresiaho sisë vaejëvareje röhu ë hesi urimo jabesi hijo miono'ohuro jö God-aro baeromo majëhinövare aribövioho muo'amobe ruejuvo evare ë Jew rajo ariböviohuro Bada Iesu'o anareje. Bada Iesu anoromo no rarovö'öjavuareje. Jaburo God-are örire huë sisë bojamiromono nu huë'e muoho ae aho'obëhe nosi örire vaejarueje. ¹⁶Nu huë'e muoho vaeromo nosi öroho tugohoi'ë'areje èhuro no bogo sa'a ioro'ioro rajoho Keriso-are jöho majëhijego bogo ejahoromo maroho va'oruomoröhego. Èhi jji'e mu sisëmu vaebe rovaroho jaruvohö böromö bëhe jio'ego iae barë'i God-ro dë vörönimë'ëro i'u'e mana bojëmi'ie'e.

Paul-hu Thessalonica ekaresia röhu maho va'o gë'i nimade jöhoje.

¹⁷Nasi ö mueno'e röhu vaevë'e no jemë'o raromoromo dirö'o göre rovaroho vëmu vavu'o rumo'e va'ëne majae bunemu hesi uhure èhi javuanovadeje. Iae nosi uehoroho jemë'o jiadeje röhu no jemesi nu ano'oho bogo gëvareje. Bogo gëvë'ëro jemëni sisë maro vavaenaguamu öre nahareje ö'oromo jemesi nu ano'oho gë'irovo. Èhuremu uehorovarueje. ¹⁸No ö'i naguamu Paul naro öre naho'i hi'ego Satan-ro nosi öroho tugohahuo'ego ö'oröhoho bogo eni javuonövadeje. ¹⁹Nosi Bada Iesu rovamu hesi nunire riravë'öho no rahumesi jöho uehorovoromo dë sasohoromo nimorohë'i uvo'ejo: No ë aribövioho mae ajëmiromono ruahö'öjë'e javuajëjo. No bogo a ioro'ioro jabesi jöhemuoho uehorovo'i jemesi

jöhuni ëhu'o nimoroho'ejo. ²⁰ Iae maeje. Jemë mae jëvo'iramu gëgorovo jemesi jöëni nosi ihoho döro ri'ó'iramu nimorohoromo God mabëhe ua'ejo. Iae ëhuni ö'oromo gë'i naguadeje.

3

¹ Ö'oromo gë'i naguamu bogo jemë'oho gemuoroho raromöjuvo bogo eni javuamu noro Silas-mu niö'iro uvareje: É'ego nosi sivue Athens amore ari'i ² Timothy nugö'öjogo huro va'oromo Thessalonica amo rajoho gëromo jöho heromo ro majahuego heröhe höjo. Timothy hu nosi Christian öëro jië'ëro no'o bimuovoromo God-are muoho vaeromo Keriso-are jö maho majëhibe juvaje jië'ego ëhuni noro Timothy nugö'öjareje ö'oromo jemë ajëmego jemëro biririvoromo Keriso avo'avoho uehorovo'irarijego. ³ Jemëhu Keriso uehorovarujohuni jemesi örire huë vavaene rovego mae uehorovarujoho vuonugöjööni ëhuni Timothy nugö'öjareje. Röhu Christian aribövi noehu huë vavaeni bae'iröhoho God-ro bamahuadeje. Jemë ë jöho iae gavarujeje. ⁴ Èhesi bëhoho urimë'i noehu jemë'o raromarevare noro uëvareje: Aëro sisë vaejavuo'iramu huë vavaene bae'ejarëjo. Noehu uëvarëhi iae ëhi jië'e huë vavaenoho rovamu gavë'e jëve. ⁵ Röhu jemesi jöho bogo hej'ë'e ëma hibe rovodoho hejode bogo eni jëvamu hegorovo ëhuni Timothy jemesirire nugö'öjodeje jemëhu diehi diehi Keriso mae uehorovaruje jöho he'iro. Èhesi bëhoho na juhuonivoromo uvodeje: Nani evaho Satan-ro jemesi dëho bijioho gëvamu rireromëvë'e höjo. Èhu'ëro noehu vaejare muoho aho'o sisërë'amo'ajëjo. O diehi jio'amo'ajëjo. Èhuni Timothy nugö'öjamu jemesiriroho ö'adeje.

⁶ Timothy nugö'öjamu ö'ë'ëro röhu aviavejö'e jemesi jö maho baeromo vuonorö'ö rueromo uövuadeje: Iae jemë Keriso mae uehorovoromo huë baerovaruje höjo. O jemëro no uehorovavutoromo noehu jemë gë'i vavaenimaruëhi jemë'o ëhi no gö'i vavaenimaruje höjo. ⁷ Nasi ö mueno'e no huë vavaene uehore gö gö hesi uhure raromamu u'uvavuë'iro hejare jemëhu Keriso mae uehorovaruje jöho Timothy-ro barovamu heromo jemesi jöëni nosi dë vövöbajo'oho biririvahuadeje. ⁸ Èhesi bëhoho avevejö'oho jemëhu biririvoromo Bada'o gemuore raromarujohuro ëhuro no ma-mae rarumarueje. ⁹ Iae no nosi Böröme God-are nuniro javuoromo jemesi jöëni sisë maro nimorohavue. Èhi jië'oho no rabu jöe majahiromo hesi öriroho rajahi'ejo. ¹⁰ Vahie majae jene noro hesi örire biririvoromo ua'i arijarueje huro ajamuijogo ö'oromo jemesi nu ano'oho garomo jemëhu Keriso mae uehorovarujoho bisemu bogo eni jëvego ajëmi'iröhëni.

¹¹ Röhu no nague nosi Vavue God'o nosi Bada Iesu'o nosi öroho avohahuego maro ö'iröhëni. ¹² No nague Badaro ajëmego jemë ae göëro gö avoho rajahirovobe a ioro'iorohu'o avoho rajahuibe va'oromo ijonö ma-mabëhe jëvoröhego. Noehu dë vövöbajo'e aho'o jemë rajëhijaruëhi jemë'o ëhi ë'irarijego. ¹³ Èhi ë'ë'oho Badaro ajëmi'iramu jemë biririvobe va'öjuvo hujeji nosi Bada Iesuro hesi aribövie aho'obëhe nosi gemuore rue'iramu evare jemëro nosi Vavue God-are nunire ma-mae riravo'aruje. Mae riravo'iramu jö sisë bogöjëvo'i hesi aribövi maemu jëvo'ë'e.

4

God-hu nimaje mu hesi jöhoje.

¹ Nasi ö mueno'e röhu jö göho Bada Iesuare ihore jajivo'ejo. Avo'avoho raromo jijijho'irarije jöhoje. Jöho bogo bise'o vadu'ohoje. Jemë ëho garomo avo'avoho uehorovore. Mami'e jemë hejarijeje noro uëvavamu: Èhi ëhi avoho raromo jijihorego God-ro gëromo nimoroho'irajo. Èhi jië'e jöho hej'ë'ëro jemë iae ejahuarujeje. Röhu no nague jemë gö'o gö'o döre avoho ejahuobe va'irarijego. ² Noehu jögore rabe rabe Bada Iesuare ihore majëhijamu hejarijoho jemë iae eni gavarujeje. ³ God hu aviëhi jië'e muoho nime. Hu nime jemë öehu jijihanovo'irarije muoho bogo vae'i mu maemu vaenövo'irarijego. ⁴ Jemë ae gemu gemu aho'obëhe magonaho masu'ie'iroho mu maemu uehorovoromo dë vövöbajo'ohu'o rajahiromo masuromo ëhi gemuoro raromore. Èhi jië'e muoho avo'avoho gare. ⁵ Nadi Christian rumo'e God bogo gavarue ariböviehu ë'aruëhioho ë'anovoromo

ma-sino hesi ganiganiohuniho magonahoho masure. ⁶ O jasi öho nadi sareramiro mo vajiohuvoromo hesi vaboroho baene. Ëhi jië'e mu vaejarue aribövioho Badaro i'ue mana bojëmi'ë'e. Ëjöho mami'e darugo'o majëhijamu hejarijeje. ⁷ God-ro no hesinö rinaguadeje bogo ëhuro no öero jijihanovo'i a'i mu mahemu vaenövo'iröhego. ⁸ Ëhuni ae rahu ëhi jië'e jögoru dejonö bu'öromo öehu jijihanovë'oho ëhi jië'e aribövioho jabu bogo aho no bijönaguo'i a'i God bijönimoruomajeje. Röhu God-ro hesi Aru'ahehu mu maemu barovajoho suvuoramuijajeje. Aru'ahehu mu maemu barovajoho suvuoramuijë'ero ëhuni no ëhi gemuoho mu maemu vaebe jijihoejo.

⁹ Röhu jemesi Christian ö mueno'o rajahirovo'irarije muoho God-hu mami'e röjëhi-jadoho no rabëni röhu maho sionoho röjëhi'ejo. ¹⁰ Christian ö mueno'e aho'obëhe Macedonia jemesi sa'a börömore raromaruoho jabesi örire jemëro iae huë baejëvoromo rajëhijarujeje. Röhu nasi ö mueno'e noro uëvö jemëro ëhi jië'e muoho gö'o gö'o döre avoho vaebe va'irarijejo.

¹¹ Röhu jemesi ma-jörume raromoro jemesi muohuremu vaere. Noehu uëvarëhi jemëro ëhi'oromo jemesi övëro biririvoromo bövioho bise'oho baere. Ëhi jië'e muohuremu avoho uehorovore. ¹² Ëhi ë'ë'oho ëhuro God bogo ma uehorovarue ariböviohuro jemë gëromo mae uehorovëvo'i jemë bövie bise'e eni jëvo'ë'e.

Iesuhu sa'are vuonorö'ö rueröhe jö noehu uehorovego huë vavaeni u'uhahuoröhe jöhoje.

¹³ Röhu nasi ö mueno'e jö göho no nague vuovë'e aribövioho diehi jioruomajoho jemë ga'irarijejo ëhuro bogo vavaenëgoröhego. Hesi a ioro'iorohuro uehorovarue maruueje: No vuovoromo bogo ri'ö'i ma-ioro'ioeremu vuovo'eværëromo sisë maro vavaenimaruueje. Jabuhu vavaenimaruëhioho jemë bogo ëhioho vavaenëgoröhego ëhuni ave jöho jajivo'ië'ö. ¹⁴ Noro mae uehorovoromo uvarueje: Iesu guomoromo röhu i'ovoromo ri'ö'jade höjo. Ëhi uvaruohuni ëhuni uvo'ejo: Iesu mae uehorovoromo vuovë'e aribövioho jabu'o God-ro i'ovëvoromo Iesu'o gemu mae söjëvo rue'a'ajëjo.

¹⁵ Ëhesi bëhoho ave jöho Badahu röjahuijade jöho no jajivo'ië'ö. Bada sa'are rovë'iroho ave sa'are raromaruue aribövioho noro vuovë'e aribövioho bogo iosirëmiromo maroho jio'i a'i jabumëro urimo ri'öruomo'ë'e. ¹⁶ Ëhesi bëhoho aëro heruomo'ë'e jöe bojëmiromo darugo'o uvavo'iramu anera börömhuro uvavo'iramu God-are hëgöho huavo'iramu. Ëho he'iramu gavë'i evare Badaro ö'idöre jioromo ruvebi'ë'e. Ruvebi'iramu Keriso-are aribövie vuovëvadoho urimo ri'öruomo'ë'e. ¹⁷ Ri'ö'iramu röhu ijönö bogo vuovë'e ave sa'are raromaruoho God-ro no jabu'o gemu mae suehu'o ma-burëro baejavuo ajiomoromo gagovavuo'ë'e noro Bada birohojöö. Ëhi'onugoromo ioro'ioere gemu Bada'o gemu mae raromo'ejo. ¹⁸ Ëhi javuo'ië'e jiaje ëhuni ë jöho majahirovorego jemesi dë vövöbajö'oho mae jëvo'iro.

5

Badahu rueröhego noehu avoho mueberovo'iröhe jöhoje.

¹² Röhu nasi ö mueno'e Bada Iesu divare rovego mu masije gö gö divare rue'iröhe ë hesi jöho no bogo jajivo'ejo jemë mami'e hejë'ego. Mami'e hejë'ëro ëhu'ëro iae garomo uvaruueje: Badare majaho vajiohu'e aehu vahi'e rovajëhi ëhi ma-majioho rue'a'ajëjo. ³ Keriso bogo ma uehorovarue ariböviohuro uvoruomo'iramu: Jaruvoho muorovoho bövioho bise'oho bogojio'i ma-mae raromaruë uvo'iramu evare God-are i'uohuro ma-majioho rueromo ë aribövioho ijumëvo'ë'e. Dë'e magonahehu ma-majioho hara'uaruëhi ë aribövioho ëhi ma-majioho ijumëvo'iramu aho bogo huruomo'ë'ö. ⁴ Röhu nasi ö mueno'e jemë bogo ëhioho jëve. Jemë bogo ramoramoro raromarujeje. Ramoramoro raromolibejarije jemë ga'ibejarije ë majaho vajiohunö'e ma-majioho rovego tiö'ibejarije. Röhu jemë bogo ëhioho jëve. ⁵ A'i jemë ae aho'obëhe aji'e majare raromaruje aribövioho jëve. No bogo vahi'e ramoramore raromaruue aribövioho javue. ⁶ Ëhuni a ioro'ioerehu ma-momorö'öjaruëhioho no bogo ëhioho ma-momorö'ö'i a'i nune jioromo simanoho avoho uehorovo'ejo. ⁷ Aehu momorö'öjë'iroho vahi'e momorö'öruomajeje.

Vörö'e jovo ue'ahamu simano sisërëjäv'öho ëhi jïë'öho vahi'e ë'oruomajeje. ⁸Vahi'e ëhi ë'oruomajeje röhu no maja'ere raromarue aribövïe javuë'ego ëhuni nosi simanoho avoho uehorovoromo muoho avoho vaeromo ëhuro biririvoromo riravo'ejo. Muorovo majare biririvoromo riravo'ië'iroho biriri'e niögoho vinebinö io'amoruomajeje bijo vösöho ë namiro mo sugigivego biririvoromo riravo'iröhëro. Keriso-are aribövïehu ëhi biririvoromo riravo'ië'iroho noro Keriso mae uehorovoromo a ioro'ioroho dë vövöbajo'ëro rajëhi'ejo ëhuro biririvoromo riravo'iröhëro. O muorovo majare aehu biriri'e bosö simanore io'amoromo biririvaruëhi noehu ëhi biririvo'ië'iroho uvo'ejo: Ijonö God-ro baejavuoromo no maro bamavuo'ajë uvë'e raromo'ejo ëhuro biririvavuoröhego. ⁹God-ro hesinö baejavuadeje bogo nosi sisëhuni i'ue bojamui'iröhëro. Hu bogo ëhunioho baejavuadeje. A'i huro no baejavuadeje nosi Bada Iesu Kerisoro nosi sisëho ajamuij'ëro maro bamavuo'iröhëro. ¹⁰Huro nosi sisëho ajamui'i noni guomadeje ëhuro ave sa'are biririvoromo raromë'öho o vuovavuë'öho no hu'o gemuoro raromo'iröhëgo. ¹¹Ëhuni ajamirovoromo jö mae majahirovarujëhi ëhi ë'orego ëhuro avoho biririvëvoromo mae jëvobe va'iro.

Paul-hu ijo tugoho'i jajivade jöhoje.

¹²Röhu nasi ö mueno'e jö göho majëhi'ië'ö. Ëjöho bogo nu huë'e jöho jio'i ma-sanu'e jöemuje. Aehu jemesirire mu böörömo vaeromo Badare ihore jemë muebejëvoromo jögoru majëhijarue ë aribövïoho jemëro mae uehorovëvore. ¹³Mae uehorovëvoromo jabesi muoho uehorovoromo rajëhi avohore. Röhu iro muorovo'öho nadi vae'i ma-raromore.

¹⁴Röhu nasi ö mueno'e ave muohu'o vaere. Mu bijöni'e aribövïoho uëvego mue vaejë'e raromo'i. O juhuoni'e aribövïoho ajëmego dë vövöbajo'öho mae jëvo'iro. O darugo u'uhëvë'e aribövïoho ajëmego biririvëvo'i. Ae aho'obëhe jabesi öröro ma-sanu'e jöhemu majëhire. ¹⁵Avoho mueberovore. Aehu mu sisë vaejëv'öho nadi mana mu sisëho vaere. A'i ae göëro göho huë baerovo'i o a ioro'iorohu'o huë baejëvo'i ë'o gare.

¹⁶O vae majae nimorohonövore. ¹⁷God-are öröro jöe majahiemu majahinövore. ¹⁸Mu diehi rovë'öho hesi öröro huë mae uanövore rabëni Iesu Keriso-are aribövïoho jemëro muoho ëhi vaejöro God-ro nimë'e jiaje.

¹⁹God-are Aru'ahoho vëninö'e ravajoho nadi duohore. ²⁰He'irarije aëro uëvego: God-are Aru'ahëro jöho bojemi'ego majëhijajë uëvamu hejë'öho nadi bijönimore. ²¹Nadi bijönimo'i a'i jöho jemesi simanëro mevoromo gare diho mae jiego diho sisë jiego. O mue aho'ö ëhi mevo gare. Mae jiamu gavë'iroho avoho ma'enore. ²²Sisë jiamu gavë'iroho aho'o vuonugore.

²³Röhu God hu ajamuego huë mae raromarue ahoje. Ëhuni na nege huro ajëmego jemëro uehore aho'obëhe ma-maëremu hesi örire gemu bojami'irarijiego. Göho na nege God-ro jemesi aru'ahë dë vövöbajo'e sino haho'e aho'obëhe muebejëvobe va'ojöro ëhuro nosi Bada Iesu Keriso rovë'iroho jemë jö sisëho bogojëvo'i ma-maemu jëvo'iröhëgo. ²⁴Iae huro ëhi ajëmi'e'e rabëni jemë hesinö rinëgade aho God hu nue gemu uehorovaje aëro jïë'ëro.

²⁵Nasi ö mueno'e jemëro nosi jöëni ëhu'o parie vaenövore.

²⁶Christian aganehu jejamirovaruëhi aho'obëhe ëhi jejamirovore. ²⁷Röhu Paul naro Badare ihore ave jöho darugo'o majëhiromo uëve. Ave naehu jajivode jöho adahego Christian aganoho aho'o heruomo'i.

²⁸Nosi Bada Iesu Kerisoro huë baeromo jemë ajëminövö'e'e. Ahia mino'e.

2 THESSALONIANS

Paul'o hesi ariböviohu'o jabuhu Thessalonica amore raromarue ekaresia jabesi örire jejëmjijare jöhoje.

¹ O asë'e Thessalonica ekaresiaho Paul naro Silas-ro Timothy-ro ëhi noro jemesi örire jejëmjijö jemë God nosi Vavu hesi o Bada Iesu Keriso-are ekaresiae jëvë'ego.

² No nague God Vavuuhu'o Bada Iesu Keriso'o huë baeromo ajëmjijego maro raromo'i-rarijego.

Bada Iesu sa'are rovego evare nosi mu mae o sisë jiego God-hu mevo garöhe jöhoje.

³ Nasi ö mueno'e noro jemesi jöëni God mae uanövo'ejo. Ëhi jië'oho iae maeje. Rabëni. Jemë God mae uehorovobe va'ojuvo va'o ijönö böörömo mae uehorovobe va'arujeje. O jemë ae gemu gemu aho'obëhe rajahirovobe va'ojuvo va'o ijönö böörömo mae rajahirovobe va'arujeje. ⁴ Ëhuni jemëhu mu ma vaejaruje jöho noro baeromo God-are ekaresiae gö gö nimorohë'i majëhibe jijiharueje. Majëhiromo uëvarueje: Aëro Thessalonica ekaresiaho sisë vaejëvego huë vavaene böörömo mae baerumaje höjo. Ëhi'oromo bogo u'uhlo'i biririvoromo Keriso mae uehorovoruomaje höjo. No jemesi jöho ëhi atobe jijiharueje.

⁵ Jemë huë vavaene baeromo röhu biririvoromo Keriso mae uehorovego noro ëho garomo uvarueje: God-ro nosi muoho avoho mevo göromo diehi jië'e mu vaejarëhi manaho ëhi gemuoho bojamui'ajëjo. Iae huro jemë uë'a'ajëjo: Jemë mae jëvaje naehu böörömo namiromo muebejaje öri ari'oro rojo raromohëjo. Ëhesi bëhoho avevej'öle God-are öri ari'o hesi mu ri'öröhego jemëhu nimoromo vavaeni baejarujohuni na ëhuni uëve.

⁶ God-ro mu maemu vaeromo jemesi örire huë vavaeni bojëmarue aribövioho mana huë vavaene bojëmi'i huë vavaeni baejaruje aribövi jemesi örire mana huë sanue bojëmiromo no'o ëhi bojamui'ë'e. Bada Iesuhu nosi nunire rueröhe majaho rue'iramu evare God-ro ëhi jië'e muoho vae'ë'e. Bada Iesuro hesi darugo'e anera ömo'ömohu'o gemu mae ö'idöre jioromo ⁸ vëni hödu'o rueromo God bogo uehorovoromo nosi Bada Iesuarue jö ma bogo ejaharue aribövioho i'ue mana bojëmi'ë'e. ⁹ I'ue mana bojëmi'iramu jabumë Badahu jiajiroho bogo raromo'i hesi aji'eroho darugo'eroho bogo raromo'i rori'o va'oromo ioro'toremu sisëre va'ë'ö. ¹⁰ Badahu rueröhe majare evare ëhioho jio'ë'e. Iae hu rue'ë'e hesi aribövie aho'obëhe noro hesi ihoho döro bamoröhego hu mae uehorovarue aribövioho noro hu rajahiruomoröhego. Jemë'o ëhi ë'a'aruje ë hesi bëhoho noehu majëhijare jöho jemëro mae uehorovë'ëro jëvë'ëro.

¹¹ Badare ihoho ëhi döro jioröhego ëhuni noro vae majae jemesi jöëni nosi Bööröme God ëninamiromo uavarueje: God jero Thessalonica aribövioho uëvane höjo jabumë jasi aribövie jioromo mae jëvojöro. Ëhuni ajëmego jaehu uëvane ëhi jië'e aribövie jioruomo'irajo. Jasi darugohuro ajëmego jabuhu mu ma vae'i nimaruocho aho'obëhe vaeromo Keriso mae uehorovoromo vaejarue muoho aho'o vae barë'irarëjo. Noro ëhi God ua gavarueje. ¹² Jemëhu ëhi jië'e mu vaejë'oho ëhuro nosi Bööröme God'o Bada Iesu Keriso'o huë baejëvoromo jemë ëhi ajëmi'iramu ëhuro nosi Bada Iesuarue ihoho bööröme jio'i jemëro hesiro ajoho bae'a'aruje.

2

Mu ma ijumaje aehu ma-va'orahoro rueröhe jöhoje.

¹ Nasi ö mueno'e nosi Bada Iesu Kerisohu rueromo uövuogo noehu hu jiajire gagovoromo gemuore raromo'iröhe jöho noro majëhi'ie'ö avoho uehorovo'irarijego. ² Aehu sarerëmiromo uëvaruoho: Badare majaho mami'e rovë'e hö uëvaruoho ëho heromo nadi ma-burëroho tiöromo uehore gö gö baere. Ëhi jië'e jö rovade hesi bëhoho nani aëro sarerivoromo uëvareje: Ëjöho God-are Aru'aho hesiro baeromo majëhijaruëjo. O nani aëro jabesi ëma uehorovoromo majëhijareje. O nani aëro sarerivoromo uvareje: Paul

naro ēhi jīē'e jōho jajivoromo bamēhode hōjo. Nani ēhuni uvarujeje: Badare majaho mami'e rov'e'e hōjo. ³ Ae gōehu ēhi jīē'e jō atoromo sarerēmi'i ē'o gavaruoho bogave ejēho'irarije. Badare majaho bogo ēma rue'i a'i ē hesi urimo ae aho'obēhe dē vōvōbajo'e aho'o huotorovoromo God bijōnimoromo hu'o muorovo'iē'iramu God-are mu ijumaje ahuro va'orahoro rueromo bōvie nami'ē'e ijōnō sisērē va'irōhēro. ⁴ Bōvie namiromo jōe majahuromo uō'ē'e: Jemēhu bōvie bise'e aho'o God hōromo rajēhijarujoho vuonugo'i na gemu bōrōmoho hō uehorovevorējo. Ēhi uōromo God-are osa bōrōmore va'o hiromo majahuromo uō'ē'e: Aviae na God jevajējo. Ēhi ē'iramu ē hesi ijōnō Badare majaho rue'ē'e.

⁵ Jemē'o uehorovore. Naro jemē'o hiromo ē hesi jōho uē'ego henōvarijeje. ⁶ God-are mu ijumaje aho'u'emu rue'ē'e. Avevejō'oho ē ia hesi mu sisēho ahē'eje. Diehi'oromo ahajoho iae jemē gavarujeje. Ēmu sisēho ahobe va'ojuvo majae eni jio'iramu God-are mu ijumaje ahuro va'orahoro rue'ē'e. ⁷ Rōhu avevejō'oho hesi mu sisēho Satan-ro gurihoromo ae uēvego vaejarujeje. Vaejego mu sisē ahaje ahuro ahobe va'ojuvo rori'o bava'iramu evaroho sisēho bogo aho'ē'e. ⁸ Sisēho bogo aho'iramu evare God-are mu ijumaje ahuro va'orahoro ro nami'ē'e. Va'orahoro ro nami'iramu Bada Iesuro rueromo jō'o ōgēro hadivoromo ajoho rōjahi'iramu sisērē barē'ē'e. ⁹ Rōhu urimo Bada bogo rue'irōhevare evare God-are mu ijumaje ahuro Satan-are darugoho barueromo ae sarerēmiromo darugo'e muoho rōjēhi'ē'e aēro ēho garomo tiōromo sisē'i uehorovoromo uvorōhego: God-are mu ijumaje aho mae hōjo. ¹⁰ Darugo'e muoho rōjēhiromo sareri'e mue bōvie bise'e vaenōvo'ē'e sisēre va'irōhe aribōviohuro garōhego. Jabuhu sisēre va'orōhe hesi bēhoho urimē'i Keriso-are jō maho bogo e'i bijōnimoromadeje. Jō maho ejaho'ibejo ēhuro iae maro va'oruomo'ibejo. Rōhu bogo ejarohuro ēhuro sisēro va'o hesi jioruome. ¹¹ Jō maho bogo ejahogo ēhuni God-ro sareri'e jōho jabesi dē vōvōbajo'e bojēmijajeje jaburo ē jōho mae uehorovoruomorōhego. ¹² God-are jōho bogo ma uehorovo'i ma-mu sisēmu nimē'ēro ēhu'ēro jabumē aho'obēhe God-are nunire riravo'iramu huro uē'ē'e: Mu sisē vaejē'e aribōvie jēvajējo.

Birivoromo riravo'irōhe jōhoje.

¹³ Rōhu nasi ō mueno'e jemē Badahu rajēhijaje aribōvioho jēvo'ego noro jemesi jōēni God mabēhe uanōvo'ejo. Ēhesi bēhoho urimē'i sa'a bōvi bise'o bogo bamadevare evare God-ro jemesi jōēni uehorovoromo uvadeje: Naro baejēvoromo maro bamēvo'ejōjo. Nasi Aru'ahohuro jabesi dē vōvōbajo'oho mae avohēho'iramu jaburo Keriso-are jōho mae uehorovo'iramu ēhuro ēhi ē'ejōjo. ¹⁴ God-ro ēhi uvē'ēro noro Keriso-are jō maho jemē majēhijamu God-ro uēvadeje: Ējōho jemēro mae uehorovorego naro baejēvoromo maro bamēvo'irōjo ēhuro jemesi Bada Iesu Keriso-are aji maho baejego ma-mabēhe jēvo'irōhe hōjo. ¹⁵ Nasi ō mueno'e ēhuni birivoromo riravore. Biririvo riravoromo noehu jō'ehu majēhiromo rōhu ijōnō surire jajivoromo rōjēhijare jōho ēhuremu ma'enoromo uehorovore.

¹⁶ Jemēro ēhi ē'irarijego no nague nosi Bada Iesu Keriso'o God nosi Vavuohu'o jaburo niō'iro ajēmijōro. Ēhesi bēhoho urimē'i God-ro no uehorovavuromo huē baejavuoromo no ioro'ioremu birire bojamuiromo ajamuijē'eje noro nimorohē'i uvorōhego: Maro javuo'ajējo. ¹⁷ Ēhuni no nague jabumēro jemesi dē vōvōbajo'oho biririvēhego jemēro bogo juhuonivo'i mae riravoromo mu maemu vaeromo jō maemu atonōvo'irarijego.

3

Thessalonica ekaresiaehu Paul-mesi jōēni God-are ōrire ēninami'irōhego Paul-hu jajivade jōhoje.

¹ Nasi ō mueno'e nasi ijo tugoho'i jōho jajivo'iē'ajoho gare. Jemēro nosi jōēni God ua garego ajamuego Badare jō noehu majēhibe jijiharuocho ma-burēro rumorovo va'ego ae aho'obēhe heromo uvoruomo'i: Jō mabēhe hōjo. Ēhuro jemesirire jajēhi ēhi jioje va'iro.

² O ua garego God-ro ajamuego biriri'övarue aribövi sisêho no bogo baejavuoromo sisê vaejavuo'iro ë hesi bêhoho ae göëro göëro Keriso-are jôho bogo ma uehorovarue jiaje.

³ Röhu Bada hu bogo sareri'oho jio'i maëro jiê'ëro huro jemê birire bojëmiromomo avoho muebejëvo'ë'e A Sisêho bogo baejëvo'irôhego. ⁴ Röhu huro no uehoro maho bojamuego jemesi jôho mae uehorovoromo uvarueje: Jemê nosi jö ejahuarujoho iae êhi ejahuobe va'a'arujêjo.

⁵ Röhu no nague Badaro ajëmijego jemesi dë vövöbajore herovoromo uvo'irarijego: God-ro mabêhe uehorovauaje hö uvoromo Kerisohu vavaeni baeromo biririvadêhi êhi biririvo'irarijego.

Övehu biririvoromo bövi bise'o baeröhe jôhoje.

⁶ Nasi ö mueno'e noro Bada Iesu Keriso-are ihore ave jö böëromoho majêhi'ïê'ö. Ga'irarije Christian aganoho rahuro noehu bojëmijamu hejarije jôho bogo ejahuo'i mue bijönimoromo ëma raromamu gëvê'iroho gorëvore. ⁷ Iae jemê'o gavaruje. Noehu ë'arêhi jemê'o êhi ë'ibejarije iae mae jio'ibejo. Noehu jemê'o raromarevaroho muoho bogo bijönimareje.

⁸ No jemesi ioho bövioho bise'oho bogo ëma ujuoho'i imoromo ujuohonövareje. Sisone vahie majae nosi övëro biririvoromo i'u'e mu böëromoho vaemu vaebe va'oromo nosi manaho birohoromo iruno'oho bövioho bise'oho imonövareje huë vavaene jemesi örire bojëmijöëni. ⁹ Noro uë'ibejo: No God-are mue vaejarue javuaje bövie bise'e ma-suvuore bojamuihë uë'ibejo iae mae jio'ibejo. Röhu noehu bogo êhi ë'are hesi bêhoho no nagueadeje jemëro ga'irarijego noehu nosi övehu biririvoromo iruno'e bövie bise'e mana baejaruoho garomo êhi gemuoho ë'irarijego. ¹⁰ Noehu jemê'o raromarevare evare ave jögoroho majêhiromomo uëvareje: Ae rahu bijönimoromo mu bogo vaejë'oho ioho nadi i'imamirêjo.

¹¹ Noehu êhi jajivarue hesi bêhoho no hejarueje uövüego: Jemesi a ioro'iorohuro muoho bijönimoromo ëma raromoromo ae gö jabesi muoho ëma ahobe jijiharue höjo. ¹² Èhuni noro ave jôho bojëmiromomo Bada Iesu Keriso-are ihoro majêhijö. Èhi jiê'e aribövioho uëregö ma-u'emu taemo raromoromo jabesi övëro biririvoromo bövioho bise'oho bae'iro.

¹³ Röhu nasi ö mueno'e jemêhu mu ma vaejarujoho nadi u'uhore. ¹⁴ Ae rahu ave nosi surire jö bogo ejahuë'oho êhi jiê'e ahemu ga avohoromo nadi gavanovorego javoje bae'iro. ¹⁵ Röhu nadi uvore: Hu no'o muorovaje ae höromö nue huodivo'i a'i uvore: Nosi öe höromö jögore majahijego avoho hi'iro.

Ijo tugoho'i jajivade jôhoje.

¹⁶ Bada huë mae bojamuaje ae jiê'ëgo no nague jemê mae o sisê raromê'oho huro majae êhi huë mae bojëmi'irôhego. Huro ae aho'obêhe jemê'o jio'ë'e.

¹⁷ Paul naro nasi övëro jajivoromo jemesi örire jejëmiromomo bame. Na surire jö jajivë'iroho nasi övo jajohö êhi jajivajeje jemëro garomo uvo'irarijego: Paul-ro bamahuë'e höjo. Naehu jajivaje hesi nu ano'oho êhije.

¹⁸ Nosi Bada Iesu Kerisoro huë baeromo jemê ae aho'o ajëminövo'ë'e. Ahia mino'e.

1 TIMOTHY

Paul-hu Timothy jejamade jöhoje.

¹ O asé'e Timothy Paul naro ave jöho jasi örire jajive. Na Iesu Keriso-are apostle jeve ë hesi bëhoho baejavuoromo mare bamavuaje aho God'o noehu ga'i muebejarue aho Iesu Keriso'o ëho jaburo ë muoho bojemë'ëro ëhu'ëro.

² Naro Timothy jasi örire jejamije. Naehu Keriso mae uehorovajëhi jero nasi ijore ijore juvoromo Keriso ëhi mae uehorovanuëro javë'ëro ëhu'ëro ja nasi harihu mae jave. Na nege God Vavuohu'o nosi Bada Iesu Keriso'o ëho jaburo jabesi vavaenimoromo ajamijego maro hi'iranego.

Timothy-hu sareri'e jö ahoröhe jöhoje.

³ Naehu ja'o hiromo Macedonia sa'are rue'irögoru jasi örire jö bojamijode ë jöe gemuoho majahi'irögoru ë'e. Ephesus amoro ëhi hiromo a ioro'ioroho darugo'o majëhiromo uëne: Sareri sareri'e jö röjëhijarujoho vuonugohëjo. ⁴ Hijo miono'o jabesi vavu gö gö jabesi ihe gö gö mevobe va'emü va'arujoho a mami jöe gö gö ëma uehorovoromo atarujoho ëhi jië'e jöemu uehorovarujoho vuonugohëjo. Ëhi uëne. Ëhi jië'e jöemu uehorovë'ohuro ëhuro aëro jöho ma-berohemu beroho'i God-are muoho bogo avoho baejarueje ë hesi bëhoho God-are jöhuremu mae uehorovoromo ëhuro ë muoho baejaruëro jië'ëro. ⁵ Jabuhu ëhi jië'e mu vuonugojöro jaehu majëhi'iranego uavode hesi bëhoho na negadeje jasi ariböviohuro bogo ma-döëremuoho aho uehorovëvo'i a'i mu maemu vae'i nimoromo dë maemu jëvego herovoromo uhohu'o Keriso-are jöho mae uehorovoromo ëhuro aho avoho huë baejëvoröhego. ⁶ A ioro'iorohuro ëhi jië'e mu ma hesi öroho garaeromo aruëre anumëre ëma jijihoromo jabesi jögoroho ëma berohemu beroharueje. ⁷ Jöho ëhi berohoromo nimoruomajeje mu vaeröhe jögoru hesi öri röjëhijarue ae jioruomo'iröhëro. Ëhi nimoruomajeje röhu jabumë mu vaeröhe jögoru jö atarue ë hesi bëhoho bogo avoho gavarueje. Bëhoho bogo gavë'e ëma biririvoromo jöho majëhijarueje.

⁸ Iae no gavaruoho mu vaeröhe jögoru hesi bëhi aehu avoho röjëhijë'oho ë jögorohuro ëhuro marëjavuo'ë'e. ⁹ No ave jöhemu uehorovo'ejo. Mu vaeröhe jögoru bamade hesi bëhoho bogo aribövi mahunioho bamë'eje. A'i jögoru ahoruomajohuni hia'i biriri'övoromo jö bogo eroharuohuni o God bijönimoruomajohuni mu sisë vaejaruohuni o God-are mu ijumoruomajohuni sa'are mu sisëhemu uehorovoruomajohuni o vavu muo'amaruohuni vëmu muo'amaruohuni o a ioro'ioro muo'amaruohuni ¹⁰ o a'o magonah'o öehu jijihanvaruohuni o a'o a'o sihamirovaruohuni o ae gö vajiohehu guduamo ujuoho va'aruohuni o sareri sareri'e jö ataruohuni o court-re riravoromo sareri jö majëhijaruohuni o mu sisë rabe rabe vaeromo God-are mu ma aharuohuni ëhi jië'e ariböviohuni jögoroho bamë'eje. ¹¹ Ëmu ma jö hesi bëhoho God huë mabëhe hijaje a hesi aji röjahujaje jöhoje. Ëj jö hesi muoho huro na bojemadeje.

God-hu Paul-ni vavaenimoromo ajamamu Paul-hu huë mae baejade jöhoje.

¹² Naro Iesu Keriso nosi Badare örire huë mae uave rabëni huhu nasi muohuni darugo bojemadohuni o huhu na mae uehorovevoromo hesi mure bamevadohuni. ¹³ Urimo naro Keriso-are jöho agoromo hesi aribövioho sisë vaejëvoromo biriri'övoromo hesi muoho ijumo'i ë'o gabe rovodeje röhu huro hesi muoho iae bojemadeje. Huhu nasi jöëni ëhi vavaenimade hesi bëhoho naro hu bogo mae uehorovoromo nasi mu sisë hesi bëhoho bogo gavë'ego ëhuni ë'adeje. ¹⁴ Vavaenimoromo nosi Badaro huë baejëvoromo börömo bëhe ajemiromo uehoro maho huë maho bojemijadeje ë hesi bëhoho no Iesu Keriso'o gemuro bimuvë'ëro javuë'ëro ëhi jië'e uehoro maho huë maho baejaruëro jië'ëro. ¹⁵ Iesu Kerisoro sa'are rovadeje sisë aribövioho no baejavuoromo maro ramuo'iröhëni. Ëho jö maego ae aho'obëhe mae uehorovë'oho iae maeje. Sisë aribövi baejavuo'i rovadoho a ioro'ioroho ma-bisemu jëvanovo'i na gemu sisë maho jevë'eje. ¹⁶ Sisë mae

jevamu röhu Iesu Kerisoro nani vavaenimadeje. Nani vavaenimade hesi bëhoho ijönö hu mae uehorovoromo ioro'ioemu mae raromo'iröhe aribövioho aho'obëhe jaburo uvoruomoröhego: Urimë'i Paul-ro mu sisë bëhe vae'i hijade höjo röhu Iesu Kerisoro hesi sisëho garomo huni vavaenimoromo hesi vöröho ma-taemorovobe rovade höjo. Èhu'ëro no garomo uvarue höjo: Kerisoro nosi sisëhu'o garomo noni èhi vavaenimoromo hesi vöröho ma-taemorovaje höjo. Èhi uvoruomoröhego èhuni huro nani vavaenimadeje. ¹⁷ Èhu'ëro God hu mabëheje. Hu böröme namiromo bövie bise'e muebebe rovadoho èhi muebe'amobe va'ë'e. Hu bogo guomo'i ioro'ioemu jio'ë'e. Hesi nu ano'oho no bogo gavarueje. Hu gemu börömohoje. Hu èhi jië'e aëro jië'ëro iho maho aji maho hesirohemu jitemu jioje va'ë'e. Iae mae.

¹⁸ Nasi harihe Timothy na ave jöho bojamiye. Urimë'i aëro jöe God-aro baeromo jasi mu jögoroho majahuijama ja'o na'o hejareje. Èjöe gemuoho naro ja uave èhuro jabuhu majahuijare jöhemu uehorovoromo biririvoromo Satan'o muorovoromo jö sisëho ahonövo'iranego. ¹⁹ Satan'o muorovoromo jö sisë ahë'iroho Keriso mae uehorovoromo dë maemu jioromo èhuro biririvoromo èhi jië'e muoho vaene. A ioro'iorohuro bogo èhioho dë maho jio'i a'i dëre herovoromo uehorovoromo uvareje: Èmuoho sisë hö uvë'i röhu èma ömareje. Èma ömë'ëro èhu'ëro Keriso mae uehorovare muoho ma-ioro'iore gemu ijumoromo boremi'ö barëjareje. ²⁰ A ioro'iorohu'o röhu Hymenaeus'o Alexander'o èhi jië'e mu sisëho vaejë'ejö. Èhi'amu naro Satan-are övore bojamiyodeje huro baejëvego jaburo a'ororomo God-are ihoho bogo ijumoröhego.

2

Ekaresiaehu diehi'oromo God uvene aho röjahiröhe jöhoje.

¹ Röhu jö göho. Jö majëhi'irodoho ave jöho urimo majëhi'ie'e. Ja'o jasi ariböviohu'o jemëro ae aho'o jabesi jöëni uehorovoromo èninamijë'i böviëni bise'ëni ua gavë'i huë mae uavë'i God-are öroro jöe atonövore. ² Ua gavego ave sa'are a masijohu'o jabesi bëhire riravoromo ave sa'are mu muebejarue ariböviohu'o huro ajëmege jaburo no avoho muebejavuego iro muorovo'oho bövioho bise'oho nosi öriroho bogo rovego no huë mae raromoromo God gemu uehorovoromo mu maemu vae'iro. ³ Èhi ua gavë'oho mae jiego God-ro nimajeje è hesi bëhoho hu baejavuoromo mare ramuaje ahuro jië'ëro. ⁴ Hu nime sa'ae dinö'e dinö'e raromarue ariböviohuro Keriso-are jö maho avoho uehorovoromo èhuro ijönöho i'uoho bogo bae'i maro va'oruomoröhego. ⁵ Ae aho'obëhe èhi mare javuoröhego God-hu nimaje hesi bëhoho huro gemüero sa'ae dinö'e dinö'e raromarue aribövioho muebejavuajeje. Ae gemu Iesu Kerisoro God'o nosi ririre öroho avohahua-jeje. ⁶ Öroho avohahuajëro jië'ëro ae aho'obëhe noni guomrovadeje èhuro no sisëhu tövavuadoho jiovahuego no ae aho'obëhe mae raromo'iröhego. Majae eni jiamu noni guomade hesi bëhoho noro èho garomo mae uvoröhego: God-ro no ae aho'obëhe maro ramuo'i nimajëjo. ⁷ Èjöho naro ae majëhi'irodego èhuni God-ro apostle bamevadeje. Na bogo sarerami'i jö mae majahije. Huro apostle bamevadeje naro sa'a ioro'ioro rajoho röjëhiromo uë'irodego: Ave jöho mae jiaje mae uehorovorëjo.

⁸ Èhuni na nege dinö'e dinö'e gagovoromo God rajahijë'iroho ama'oho jaburo nu huë'e iro muorovo'e jöho bogo uehorovo'i uehoro maemu baeromo God-are örire jöe atonövoröhego. ⁹ O na nege magonahoho jaburo simane mae uehorovoromo niögoho avoho ruhoruomo'iröhego. Avoho ruhoromo bogo sinoho nimorohoromo moni börömoho bu'öromomo niögoho nieniaho bövioho bise'oho aho'obëhe imo'amoromo io'amoromo sinoho simano uoho avohorovo'i a'i uehorovo avohoromo niögoho io'amoromo ¹⁰ mu mae vaeröhego nege. Magonahehu majëhiromo uëruomë'oho: No God rajahijarue magonahe javuajë uvë'oho jabuhu èhi jië'e mu vae'iröhoho iae maeje. ¹¹ Gemuore gagovoromo God-are jö hejë'oho magonaho ömo'ömhuro jörume ma-taemo raromoromo ma-jöhuremu heruomo'i. ¹² O magonahehu simano vaeromo ama'i jabesi örire church-re jö röjëhijë'oho èhi jië'e muoho Paul naro ahajeje. Jörume

raromë'oho iae maeje. ¹³ Ëhesi bëhoho urimoho God-ro aev'o'ioho Adam bamoromo evare ijönö Eve bamadeje. ¹⁴ Satan-ro bogo Adam sarerami'i a'i magonahoho sareramamu huro uvadeje: Mae höromomo God-are jöho ahahadeje. ¹⁵ Iae ëhi jiadeje rõhu magonaho ömo'ömehu God-are örire mae uehorovoromo ae huë baejëvoromo God-hu nimaje muohemu vaeromo ma-taemo raroromomo ëhi jië'e mu ma biririvoromo vaejë'oho God-ro ajëmi'ë'e. Ajëmiromomo gëröhe jabuhu aboji harihu'ou rahamu gëvë'iroho ëhi jië'e mu ma vaejarue magonahoho baejëvoromo maro bamëvo'ë'e.

3

Ekaresia muebejëvarue aribövi jabesi jöhoje.

¹ Aëro uvarueje: Aehu ekaresia muebejëvo'i nimë'oho mu mae bae'i nimoruomaje höjo. Ëhi atoruomaje jöho iae maeje. ² Rõhu ekaresia muebe'amo'ië'iroho ëhi ë'ië'e a hesi ihoho ma-maemu jio'iro. Magonahe ma-gemu masu'iro. Simane sasohoromo mae uehorovoromo taemo hi'iro. Ae osare söjëvo va'oromo nihudëgaje ae jio'iro. Jöe avoho rõjëhijaje ae jio'iro. ³ Nadi vörö'e jovoho iromomo simanoho sisërë'iro. Nadi vörö'irae'i ma-u'emu jö sanu'e majëhiromomo muoho vae'iro. Nadi iro muorovo'oho vae'iro. Nadi moniemuoho uehorovo'iro. ⁴ Hesi osare raromarue aganoho avoho muebejëvo'iro. Avoho muebejëvoromo aboji harihu'oho avoho rõjëhijego jaburo hesi jöho ejahoromo mu maemu vaeruumo'iro. ⁵ O hesi osare raromarue agano bogo avoho muebejëvë'oho hu diehi'oromomo God-are ekaresiaho muebejëvo'ë'e. Bogo eni jio'ë'e. ⁶ O i'e aevoromomo Keriso mae uehorovade aho ekaresiaho nadi muebejëvo'iro. I'e aevoromomo mae uehorovade aehu ekaresia muebejëvë'oho nani hu hesi sivue uehorovoromomo uvo'ë'e: Na a böröme jev'ëgo ekaresia muebejëvaje mure bamevare höromomo Satan-are guare beva'ë'e. ⁷ A'i God-are jö bogo hejë'e aribövieuho mu bae'iröhe a mae uehorovë'oho ëhi jië'e ahuro ekaresiaho muebejëvo'iro. O hesi örire bogo ma uehorovë'e ekaresia ëma muebejëvë'oho hesi ihoho sisërë'iramu Satan-are guare be'ë'e. Ekaresia muebejëvarue aribövi jabesi jöho ëhije.

Ekaresia ajëmarue aribövi jabesi jöhoje.

⁸ Rõhu ekaresia ajëmijarue aribövi jabesi jöho ëhi gemuohoje. Taemo raromomo'iro. O nadi jöho huotohuotovo majëhi'i. Nadi vörö'e jovo bövioho ue'aho'i. Nadi moniemuoho uehorovo'iro. ⁹ God-hu rõjahuijade jöho uhohu'o mae uehorovo'iro. ¹⁰ Mure bamëvo'ië'iroho urimo jabesi muoho diehi jiajoho gëre. Eni jëvamu gëvë'oho evare muoho aevoromomo vae'iro. ¹¹ O jabesi magonahoho ëhi gemuoho ma-taemo raromomo'iro. Nadi ae gö jabesi jö sisëho atemu ato'irögoro a'i simane sasohoromomo mue aho'o avoho muoberuumo'iro. ¹² O ekaresia ajëmijarue aëro magonahe ma-gemu masuromomo aboji harihu'ohu'o jabesi osare raromarue agano ioro'iorohu'o avoho muebejëvo'iro. ¹³ Ekaresia mae ajëmijë'oho jabesi ihoho mae jëvo'iramu ëhuro biririvoromomo Iesu Keriso mae uehorovarue jöho ae ma-sama'e majëhinövo'ë'ö.

Paul-hu jögoru Timothy-are örire jajivade hesi bëhohoje.

¹⁴ Na nege ma-burëro ö'irovo. Rõhu naehu jajivaje hesi bëhoho ¹⁵ naehu örisanuovoromomo bogo vejö'oho ö'amu gevë'oho jero ë jöho adahoromomo uehorovoromomo uvo'iranego: Noro ëhi'oromomo God-are agano ömo'ömohu'o gemu mae raroromomo muoho avoho vaejarue höjo. Iae God-are aganoho no daruge jië'e ae God-are ekaresiae javue. God-are ekaresiae javuë'ëro dioho'o bönu'o javuo ma'enegro bibivajëhi noro God-are jö maho ëhi ma'eno titimoromomo avoho muebejego ëhi jiemu jiajeje. ¹⁶ God-hu rõjahuijë'ëro noehu mae uehorovarue jö hesi bëhoho börömo maeje. Ae aho'o iae no ëhi uehorovarueje. Ejö hesi bëhoho aviajeje.

Hu a sine jioromomo a nuniro rovade höjo.

Hu mae jiaje jöho God-are Aru'ahohuro hu ajamiromomo no rõjahuijade höjo.

Hesi nu ano'oho aneraëro gavare höjo.

Hesi jöho sa'ae göro göro aëro aevoromomo hejare höjo.

Hesi jöho ave sa'are ariböviohuro mae uehorovare höjo.

Ö'idöre ajiomoromo hesi ajoho baejade höjo.

4

Ijonö aehu Iesuare jö ma vuonugo'i sareri'e jö majëhi'iröhe jöhoje.

¹ Röhu God-are Aru'ahohuro sama'e uövuë'eje: Majae ijonö aëro God-are jö mae uehorovaruoho vuonugo'irögoro Satan-are aru'aho ömo'ömohuro sarerëmi'iramu mae höromo jabesi jö sisëho ejëhoruomo'ajëjo. ² Satan-are aru'aho sisëhuro jabesi sareri'e jöho bojëmi'iramu sareri sareri'e ariböviohuro jöho baeromo sisë diehi diehi vaejaroho jabesi dë vövöbajo'o uhuroho bogo herovo'i ae ma-sarerëmiromo majëhiruomo'ajëjo. ³ Majëhiromo uëruomo'ajëjo: Nadi magonahoho masu'amorëjo. Ie gö gö nadi ue'ahorëjo. Èhi uëruomo'ajëjo röhu ë iohu'o God-ro bamadeje ëhuro Keriso mae uehorovoromo hesi jö ma gavarue aribövioho noro hesi örire huë mae uaromo ë ioho ue'aho'iröhego. ⁴ Èhesi bëhoho God-hu iruno'o bövi bise'o bamadoho iae mae jio'ame. Èhuni no bogo uvo'ejo: Sisë höromo juahovo'ejo. A'i noehu i ujuohoromo God mae uaromo ë i ijë'oho maeje. ⁵ Èhesi bëhoho no God-are jö adahoromo gavaruohuro uvarueje: God-ro bövioho bise'oho bamade höjo. Èhi uvoromo hesi örire jö atoromo ijë'oho ëhuro uvarueje: God-ro bamahuë'ëro ijaruoho iae mae höjo.

Timothy-hu Keriso-are mu avoho vaeröhe jöhoje.

⁶ Jëjöho Christian aganoho majëhijego heruomo'iro. Ja ëhi ë'ë'oho Iesu Keriso-are mu vaejanue a mae javo'ë'e. Èhuro no ga'ejo noehu mae uehorovarue jö ma jaehu ebe rovanoho ja ëho uehorovoromo birire baejë'e javo'iramu. ⁷ O simano sisërëromo God bogo uehorovë'e ëma atarue jöho nadi ejëhone. Nadi ejëho'irögoro biririvoromo God-hu nimaje muoho sivohe mu sivohe va'one. ⁸ Noro sino haho'o hesi muoho sivohe avohë'i ë'o gabe va'arueje ëhuro nosi sinoho biririvavuo'iröhego. Èhi ë'ë'oho ëhuro no ma-bisemu mae javuo'ë'e. A'iro God-hu nimaje mu sivohe avoho'i ë'o gabe va'ë'oho ëhuro mabëhe javuo'ë'e. Èhuro jaruvoho mae raromaruëro ijonöhu'o ëhi gemuoho raromo'ejo. ⁹ Èho jö maego ae aho'obëhe mae uehorovë'oho iae maeje. ¹⁰ Noro ëhi mae rarom'iröhëni ëhuni no biririvoromo sivohoromo God-hu nimaje muoho vaejarueje ë hesi bëhoho God darugo'e aëro jië'ëro no ajamuijëro mae uehorovaruohuni. Hu sa'ae aho'obëhe ajamuaje aeje. Mae uehorovarue aribövioho no mare bamavuae aeje. ¹¹ Èhi jië'e jöho ae bojëmiromo ë hesi öroho röjëhinövone. ¹² Ja a i'e jave röhu nadi simano sisërëjë'e muoho vaejego aho uvoruomo'iro: Timothy asisö'ëro jië'ëro hu muoho bogo avo'avoho vaejaje höjo. A'i jero jö mae jövoromo mu mae vaeromo ae huë baejëvoromo God mae uehorovoromo avoho taemo hijego aëro jasi muoho garomo uvo'iro: No'o ëhi ë'ëjarëjo. ¹³ Jero ëhi'oromo God-are jöho aëni adahoromo jögore mëmiromo öroho röjëhiromo ëhi ë'i hijego evare na ö'iro. ¹⁴ Mu vae'irane suvuoro God-hu bojamadoho nadi u'uhu'o'i ma-biririvoromo muoho vaene. Èhesi bëhoho urimë'i ekaresia muebejëvarue a duvahohuro övoho simanore bamahamu evare aëro jöho God-aro baeromo mu vae'irane jöho majahijamu ëhuro ë suvuoro baejaneje. Èhuni ëho avo'avoho mueberomo muoho vaene. ¹⁵ Èhi jië'e muohuremu uehorovoromo biririvoromo vaenövone. Èhi ë'ë'oho ëhuro ae aho'obëhe ga'ë'ö jero muoho avoho vaebe rue'iramu. ¹⁶ Jasi arijo'arije avo'avoho mueberovoromo God-are jöho avo'avoho röjëhine. Èhemu vaenövone. Èhi ë'ë'oho ëhuro maro javoromo jasi jö hejarue ariböviohu'o maro jëvo'ë'e.

5

Timothy-hu ekaresia ae magonahe diehi jögoru mëmi'iröhe jöhoje.

¹ Röhu ga'irane a duvahelu mu sisë'i vaejumu jaehu jögoru majëhijë'oho nadi jö giagia'oho majëhi'i ma-sanu'e vavu majaharuëhi ëhi majëhine. O a i'o jögoru mëmë'oho ö majëhijaruëhi ëhi mëmine. ² O magonaho duvaho jögoru majëhijë'oho vëmu majëhijaruëhi ëhi majëhine. O magonaho i'o jögoru mëmë'oho ma'ino majëhijaruëhi ëhi jië'e jö mahemu mëmi'i jöe gö gö nadi uehorovoromo majëhine.

Magonaho doru jabesi jöhoje.

³ Röhu magonaho doru jabesi jöho. Magonaho doru agano rumo'ëro jië'ëro huë ma baeröhe öri bogojië'oho ëhi jië'e magonaho doruoho jero rajëhiromomo ajëminövone. ⁴ A'i magonaho dorue aboji harihu'e o hijo ömo'öme jëvë'oho ë ariböviohuro ave muoho avo'avoho uehorovo'iro. Jabesi agano maho urimo avoho muebejëvoromo ëhuro jabesi vëmu vavuehu hijo ömo'ömehu ajëmarëhi ëhi jaburo mana ajëmi'iro. Jabesi mu ioro'ioroho ijönö jio'iro. Ëhi jië'e muoho God hu nime. ⁵ A'i magonaho dorue agano rumo'ëro jië'ëro jabesi sivu mueberovë'iroho ëhi jië'e magonahohuro uvoruomajeje: Hesi God-ro ajemi'ajë uvoromo ëhuni vahie majae jene God-are örire jöe jövoromo ua'i hijajeje: God jero ajemego na mae jevajo. ⁶ O magonaho doruehu jabesi sinohemu uehorovë'oho ëma jijiharuëro ije jahosi'e jiajëhi ëhi jëve. ⁷ Ëhi jië'e jöho majëhijego ejahego jö sisëho bogojio'iro. ⁸ Ae rahu hesi ö mueno'o bogo ajëmijë'oho o hesi agano mahu'o ëhu'o bogo ajëmijë'oho ëhuro God mae uehorovarue jöho vunugoromo God-are jö bogo hejë'e aribövioho iosirëmiromomo hu sisë bëheje.

⁹ Ekaresia ariböviehu magonaho doru muebejëvo'i jabesi iho jajivo'ië'iroho vadune aho'o öo bæjë'e jabesi ihohemu jajivo'amo'iro. O barue ma-gemu masuvë'oho ëhi jië'e magonaho doru jabesi ihohemu jajivo'amo'iro. ¹⁰ O magonaho dorue mu mae vaejamu ëhuro jabesi iho mae jië'oho ëhuremu ihoho jajivo'amo'iro. Aboji harihu'e avoho muebe'amobe rovë'e jiego ae i'e rovamu ajëmiromomo nihudëgo'i arijë'e jiego Keriso-are aribövioho huë bæjë'e jiego huë vavaeni'e aribövioho ajëmijë'e jiego mu mae bövie bise'e vaeruomë'e jiego ëhi jië'e magonaho doru jabesi ihohuremu jajivo'amo'iro.

¹¹ A'i magonaho i'e doru jioruomë'oho nadi ëhi jië'e magonaho jabesi ihoho jajivoromo muebejëvone. Ëhesi bëhoho magonaho i'ohuro dëre uehorovoromo ri'öromomo Keriso vunugo'irögoro sionoho iore bamo'i nimarueje. ¹² Ëhi nimoromo ëhuro urimë'i Keriso mae uavare jöho ahego ëhuro jabesi ihoho sisërëjajeje. ¹³ Röhu göho magonaho doru i'ohuro mue bijönibijiohoromo osare osare ma-raromobe jijihajeje. Röhu bogo ëhemuoho ömo'i mu sisë gö'o dëre vaejarueje. A jöho ëma atobe a muoho ëma ahobe jijihajeje. No bogo atarue jöho ë magonahoho jaburo atoruumajeje. ¹⁴ Ëhi jië'ohuni na nege magonaho doru i'ohuro röhu maho sionoho barue masu'amoromo aboji harihu'e vaeromo osaho avoho muebenövöröhego. Ëhi ë'ë'oho ekaresia bijönimarue ariböviehu jö sisë ato'iröhoho bogojio'ë'e. ¹⁵ Na ëhi uavaje hesi bëhoho magonaho doru i'o ioro'iorohuro Keriso-are jöho vunugo'i Satan-are örire va'ëgo ëhuni uave. ¹⁶ O Christian magonahe rahu hesirire magonaho doru jië'oho huro ajami'iro. Ajamijë'oho ëhuro ekaresia aribövioho bogo madomadëgo'iramu agano rumo'e magonaho doru ajëmi'iröhoho eni jëvo'ë'e. Magonaho doru jabesi jöho ëhije.

Ekaresia muebejarue a duvaho jabesi jöhoje.

¹⁷ Röhu a duvahehu ekaresia muebejëvarue jöho jajivo'ië'e. A duvahehu ekaresia avoho muebejëvamu ekaresia jabuhu mabëhe rajëhiromomo suvuoro bisemu bövie mana bojëmijë'oho iae maeje. O a duvahehu birivoromo ekaresia avoho muebejëvoromo röhu göho God-are jö majëhiromomo bëhi röjëhijarue ëhi jië'e aribövioho böromomo mae uehorovëvoromo mana bojëmijë'oho iae maeje. ¹⁸ Suvuoro bojëmi'iröhe hesi bëhoho ë hesi jöho God-are surire uhu'e uvë'eje: Jasi mu vaejahaje mielu jasi mu vaejahoromo i hörehu sa'ijovobe juvë'oho hesi jö'oho nadi tugohahego hu juvoromo hesi manaho baeromo huhu hörehu sa'ijovaje i vitu vituoho ibe juvo'irajo. Ëhi jië'oho miohuro ëho hesi manae bæ'a'ajëjo. O God-are surire jö göho ëhi uvë'eje: Ae rahu mu vaeromo mana bæjë'oho iae mae höjo. ¹⁹ O aehu ekaresia muebejëvaje a duvaho hesi jö sisë ja majahijë'iroho ae gemuehu majahamu hejë'oho nadi ejahone. A'i ae niö'i o ae niö'i gemu jabuhu a duvaho hesi mu sisë jabesi hia'ehu heromomo nunehu gav'ëro jasi örire majahijamu hejë'oho ëhuremu ejëhone. ²⁰ Hu sisë jjië'oho ekaresia aribövi jabesi nunoro jögore bojamego avoho uehorovo'i ëhuro a ioro'iorohuro ëho garomomo juhuonivoromo bogo ëhioho ë'iröhe.

²¹ Ĕjōho bōrōmeje. God-are nunire Iesu Keriso-are nunire God-are anera jabesi nunire naro ja uave ejeho'irane. Ejehanuevaro mevo ga'irane a duvaho jabesi jōho diho mae diho sisē jiamu gavē'iroho nadi ma-urimoho uvone: Iaho mae hōjo o iaho sisē hōjo. O nadi a duvahe jasi aemo'aemoho sanu'e jōho majēhi'a a duvaho ioro'ioroho darugo'e jōho majēhi'i a'i ma-uehore gemu baeromo a duvahe aho'obēhe majēhinōvone. ²² O ae gōehu ekaresiaēni mu bōrōmo vaerōhego ōvo simanore bamahoi'ē'iroho nadi ma-majioho ōvoho simanoroho bamahone. Ĕiahuro mu sisē vaejego ae niō'i jemesi ihoho sisērējēhōjōēni uave. Nadi ēhioho ē'irōgoro ma-avoho mueberovego sisēho bogojavo'iro.

²³ Rōhu dēre guomo guomo baejavo'i hijajohuni nadi jovemuho i'i wine jovohu'o mabisemu ijego ēhuro dēho mae javo'iro.

²⁴ Amo jaehu ekaresia jabesi mure bamēvo'iē'iroho jabesi muoho avoho garomo evaro bamēvone. Ĕhesi bēhoho a ioro'iorohuro ma-va'orahoro mu sisē vaejaruēro jiē'ero jabesi mu mevo'irane ē hesi urimo ga'a'anue jabesi sisēho ma-va'orahoro jio'iramu muroho bogo bamēvo'anue. O a ioro'ioro jabesi sisēho subirō'ōjē'ero jero jabesi muoho mevo garomo evare ijonō ga'a'anue sisē jioruomo'iramu muroho bogo bamēvo'anue. ²⁵ O mu sisē urimo gō subirō'ō'i gō va'orahoro jiē'ero ijonō aho'o ma-va'orahoro jiajēhi mu maho ēhi gemuhoje. A ioro'iorohuro mu maho ma-va'orahoro vaejarueje. O mu ma ioro'ioroho subirō'ōjē'eje rōhu ijonōho bogo subirō'ō varijēnoho jio'ē'e.

6

A jabesi muemu vaejarue aribōvi jabesi jōhoje.

¹ Rōhu jō gōho a masijo jabesi darugoremu raromoromo jabesi muemu vaejēharue aribōvi jabesi jōhoje. Ĕhi jiē'e aribōviohuro a masijoho mae uehorovēvo avohoromo muoho vaejēhego God-are ihohu'o Keriso-are jōhu'o aho bogo sisē'ioho ato'iro. ² O jabesi a masijoho Keriso mae uehorovarue aribōvie jēvē'oho mu aribōviohuro nadi uvo'iro: Nosi a masijoho ma-Christian ō mueno'ero jēvē'ero bogo masijoho hō uvoromo muoho ēma sisē'i sisē'i ōmo'iro. A'i uvoruomo'i: Nosi masijoho jabumē Keriso mae uehorovarue aribōvie noehu rajēhijaruoho jēvajējo. No ēhi jiē'e aribōvioho ajēmijarue hō uvoromo jabesi muoho avo'avoho vaejēhoruomo'iro.

Keriso-are jō vuonugo'i sa'a hesi jōemu berohemu beroharue mu sisēhu'o ave sa'a hesi inōmo bae'i ēhemu uehorovarue mu sisēhu'o ē mu sisē niō'i hesi jōhoje.

Ĕhi jiē'e jōho jero ae rōjēhiromo uē'i hijego muoho avoho vaeruomo'iro. ³ Aehu jōe gō rōjēhijē'oho sisēje. Jōe gō rōjēhiromo nosi Bada Iesu Keriso-are jō mahu'o God-are mu diehi avoho vaejarue jōhu'o bogo ejē'oho ⁴ hu simanoho bogo uehorovē'e ēma uvajeje: Na a bōrōme jevajējo. Simane sisērēromo nimajeje bēhi rumo'e jōe gō gō ēma nahoromo jō aho'ahēmi'i. Rōhu ēhi jiē'e jō berohemu berohamu hejē'oho ēhuro aēro sarivoromo uvoruomajeje: Nuni aji'e jōho jabumē diehi'oromo bae'i no bogo baejare hōromo jabesi ōrire dē vōrōnimoruomajeje. Dē vōrōnimoromo iro muorovo'e vaeromo ae gōēro gō hesi ōrire agoromo ae gōēro gō hesi ōrire sisē uehorovoruomajeje. ⁵ O uehoro sisē baeromo God-are jō maho vuonugo'i irovoruomajeje. Irovoromo sarivoromo uvoruomajeje: Noehu God-are muemu uehorovo'irōhe hesi bēhoho aviēhi hōjo. Noro inōmoho bōvioho bise'oho ujuohoromo ēhuro maro raromo'ejarējo.

⁶ Iae mae. God-are muemu uehorovē'oho iae maro raromarueje. Ĕhesi bēhoho God-are muemu uehorovoromo rōhu bogo gō'o gō'oho bae'i uehorovo'i a'i uvē'oho: No eni javuajē uvē'ohuro ēhuro maroho raromarueje. ⁷ Vēmehu rahavuare majaroho evaroho inōmo rumo'e ma-ōvemu rovareje. O vuovorōhe majaroho ēhu'o ma-ōvemu va'ejo. ⁸ Rōhu iruno'e o niōgu suhi'e javuē'oho ēhuro uehorovoromo uvo'ejo: No eni javuajē uvoromo bogo gō'oho bae'i ēhemu uehorovo'ejo. ⁹ A'i a ioro'iorohuro inōme bōvie bise'e marohē'e mae bae'i ēhuremu uehorovoruomajeje. Ĕhi jiē'e aribōvioho Satan-ro dinēmijego buororo rumo va'anovego buorēro taemēvanovego dē vōvōbajo'ere ri'ōromo simane sisē'i uehorovoromo mue gō gō nimoromo sisērērovo barējarueje. ¹⁰ Moniemu

gemu uehorov'oho ehuro mu sisë aho'obêhe baejarueje. Ae göero moniemu nimo avohoromo ehuro Keriso-are jôho rumonimobe va'ojuvo va'o vuonugo'i huë vavaene gö gö baeruomë'eje.

Timothy-hu mue gö gö vaerôhe jôgoru Paul-hu jajivadohoje.

¹¹ Rôhu ja God-are ae jave. Ehuni êhi jië'e mu sisêho nadi gavanovone. Nadi gavanovo'i ma-mu maemu vaeromo God-are muoho nimoromo hesi ôroro mae uehorovoromo ae gö huë baejêvoromo biririvoromo muoho vaeromo sanu'e jôho majêhinövone. Êhi jië'e muohuremu vae'i nimonövone. ¹² Aehu ajajovoromo göehu gö iosirëmi'i biririvaje êhi jië'e mu maho baejê'e jave. Ehuni God mae uehorovoromo jasi daruge aho'o bojamiromo biririvoromo mu maho vaenövone. Muoho vaejê'i ijonö ioro'ioeremu maro hi'irane ôroho ehuremu uehorovone. Urimë'i jaehu mae uehorovanue jö ae aho'o jabesi nunire huruoho majêhijanevare evare God-ro ja uavadeje êhi maro hi'iranego. Êjöhuremu uehorovone. ¹³ Rôhu naro God-are nunire Iesu Keriso-are nunire ave jôho majahi'ië'e. God ae aho'obêhe darugo bojamuego rarumarue ahoje. Iesu Keriso Pontius Pilate-are nunire namiromo hesi jö ma-maemu huruoho majahijade ahoje. Êae niö'i jabesi nunire ave jôho majahi'ië'e. ¹⁴ Jôgoru hejanoho avo'avoho ejego aho jasi jö sisêho bogo ato'iro. Êhi ebe va'one ijonö nosi Bada Iesu Keriso rovego garôhe. ¹⁵ Iae hu rue'iramu no ga'ejo A Bôröme God-hu nimaje majare. God hu ma-maro hiromo huro gemuëro bôrömo mae namijê'ëro masijo vaeruomaje ae aho'o iosirëmiromo hu gemu dôrohoje. ¹⁶ God gemu hu bogo guomo hesije. Hu aji bôrömorô hijê'ëro hesi bêhiroho no bogo va'o hesi javue. Aho hu bogo ganövê'ëro êhi bogo ganövo'ejo. Hesi iho bôrömorô darugoho ma-êhi jiemu jiobe va'ê'e. Iae mae.

¹⁷ Rôhu ave sa'a hesi bövi bise'o marohê'e mae jêvê'e aribövioho uêne: Nadi jemesi inömoho bövioho bise'oho uehorovoromo dôroho bamorovorêne. Nadi uvorêne: Na inömo marohê'e jevajohuro ehuro mae jevo'ajêjo ë hesi bêhoho inömoho ma-jahuri jiaje inöme jiaje. A'i uvorêne: Hesi God-ro ajemi'iramu mae jevo'ajêjo. Êhesi bêhoho huro bövie bise'e suvuoramui avohajeje huë mae javuorôhego. ¹⁸ O uênego jaburo mu mae vaeruomoi. Huë baerovarue mu hesi ôroho marohê'e mae jêvo'iro. Ôve sasohoromo suvuore ë'iro. ¹⁹ Êhi ë'lê'oho suvuoro maho ô'idöre rune vae'ê'ö ehuro maja viture mamaro raromoi'irôhohuni. Ehuro ruaho'amoromo bogo ma-döemuoho mae raromoi' dë vövöbajo'ohohu'o maro raromonövö'ê'ö.

²⁰ Rôhu Timothy God-ro hesi jôho bojamadeje jero muebe'iranego. Ehuni ë jôhemu avoho uehorovoromo ae majêhinövone. A'i God rumo'e sareri sareri'e jôho nadi gavanovone. O aehu God-are jö ahoromo jö i'o barueromo sarerëmiromo uëvê'oho: Aveho nuni aji'e jöe hë uëvê'oho nadi gavanovone. ²¹ Êhesi bêhoho ae göero êhi jië'e jö i'oho uehorovoromo God-are jôho vuonugê'ego ehuni uave.

God-ro jemë huë baeromo ajëminövö'ê'e. Ahia mino'e.

2 TIMOTHY

Paul-hu Timothy jejamade jöhoje.

¹ O asé'e Timothy Paul naro ave jöho jajivo'ié'e. God-ro hesi nimé'ero éhu'ero na Iesu Keriso-are apostle jevé'eje naro ae majéhiromo uénövo'irodego: God-hu nosi aru'ahohi ovahuo'i uövuadéhi iae huro éhi Iesu Keriso'o gemuore ramuo'iramu i'ovavuo'ajé ué'irodego. Éhu'ero na éhi jié'e ae jeve.

² Naro nasi harihe Timothy jasi örire dé vövöbajo'e aho'o jejamije. Na nege God Vavuohu'o nosi Bada Iesu Keriso'o jabesi vavaenimoromo ajamijego jero maro hi'iranego.

Timothy-hu Keriso mae uehorovadohuni éhuni Paul-hu God mae uavade jöhoje.

³ Naro God-are örire mabéhe uave. God nasi hijo miono'ehu uehorovobe rovaréhi na'o dé mae jevego herovoromo hesi muoho vaejajeje. Vahie majae jene naro jasi jöho hesi örire jövoromo hu mabéhe ua'i hijajeje. ⁴ Jasi jöéni God mabéhe uaromo naro uehorovoromo uvajeje: Jero nani vavaenimoromo nivane hö uvoromo éhuni naro ja ga'i nego avohajeje ja garomo nasi dé vövöbajo'e nimorohevoröhego. ⁵ Na uehorovajoho ja bogo döéremuoho God mae uehorovo'i uhohu'o mae uehorovanueje. Urimé'i jasi hije magonaho ihe Lois'o jasi véme Eunice'o jaburo uhohu'o éhi God mae uehorovonö-vareje. Röhu na uehorovajoho jabuhu uehorovonövaréhi ja'o éhi gemuoho God mae uehorovanueje.

Timothy-hu vi'ehé hué vavaene baeromo birivoromo Keriso-are muemu vaeröhe jöhoje.

⁶ Éhuni naro ave jöho ua'ié'e uehorovo'iranego. Urimé'i naro nasi övohuro jasi simanoho taemahamu evare God-ro ja darugoho bojamijadeje jero hesi aribövioho muebejévo'iranego. Éhuni é darugoho véninö'e avoho muebejego bogo duoroho'iro. ⁷ Éhesi bëhoho God-ro hesi Aru'ahoho bojamuamu baejé'ero éhu'ero bogo juhuonivo'i a'i daruge baeromo ae gö hué baejévoromo avoho taemo raromarueje.

⁸ Éhuni nosi Badare jö majéhijanuoho nadi éhunioho javojimone o na savoji gagore hijajohuni éhu'o nadi javojimone. Nadi javojimo'i God-are darugoho uehorovoromo naehu hué vavaeni baejajéhi Keriso-are jö ma hesi jöéni hué vavaeni rov'ohohi ja'o baene. ⁹ Éhesi bëhoho no sisé javuamu God-ro no baejavuoromo maro bamavuoromo hesi ariböviohu javuojöro uövuadeje. Éhi ajamuade hesi bëhoho hu bogo uvadeje no mu mae vaejé'e javuajé uvoromo éhunioho hesi aribövioho javuojöro uövuadeje. A'i hesi nimé'ero noni vavaenimoromo é'adeje. Urime sa'a bövi bise'o bogo bamadevare evare God-ro noni vavaenimamu uvadeje ijönö Iesu Kerisoro no ajamui'iröhego. ¹⁰ Éhi uvadoho jaruvohohi mare ramuaje aho Iesu Kerisoro nosi örire rov'é'ero éhu'ero God-hu no hué baejavuaje muoho va'orahoroje. Éhesi bëhoho Iesu Kerisoro nosi örire rueromo vuovo'iröhe öroho ahahuadeje. Ahoromo hesi jö maho röjahuijé'ero éhu'ero no é jöho garomo uvarueje: No ioro'ioere gemu maro raromemu rarome'jaréjo. Kerisohu ajamuade jö maho éhijé.

¹¹ Éjö maho naro majéhi'irodego God-ro bamevadeje. Éhu'ero na apostle o Keriso-are jö röjéhihaje ae jeve. ¹² Éhi jié'e muoho vaebe juvé'ero éhuro na vi'ehohi hué vavaenohohi vaejajeje. Iae éhi jeve röhu na bogo javojeje. Rabéni. Naro God mae uehorovoromo gavajeje hu mae jiego. Éhi gavajéro jié'ero uvajeje: Iae mae höjo. God-ro eni jié'ero éhu'ero hesi mu nasi övo döre bamehadohi huro avoho muebebe va'iramu evare é maja böörömohe rue'a'ajéjo. Éhuni javojoho bogojéve. ¹³ Röhu naehu jö ma röjahibe rovamu hejanohi ja'o éhi jié'e jö mahuremu ma'enone. Iesu Keriso-are uehoro maho baeromo God mae uehorové'e ae gö hué baejévé'e hiromo é jöhuremu ma'enone. ¹⁴ God-hu hesi jö ma jasi övo döre bamadohi avoho muebenego aho bogo jö göho jövo'iro. God-are Aru'ahoho nosi dé vövöbajo'ere hijé'e jiaje hesi darugoho baeromo éhuro éhi é'one.

¹⁵ Iae ja'o gavanue Asia sa'a raje ae aho'obéhe Phygelos'o Hermogenes'o jabu'o nasi jöho bogo uehorovo'i remo va'oruomé'eje. ¹⁶ Röhu na nege Badaro Onesiphorus-are

aganohuni vavaenimoromo ajëmi'iröhego. Èhesi bëhoho urimë'i naro huë vavaene bae'ego Onesiphorus-ro ajemi'ego dëho sasohevonövadeje. O na savoji gagore hijamu hegorovo Onesiphorus-ro nasi jöëniho bogo javojimo'i ¹⁷ Rome amore ruenugoromo nahevemu nahevobe juvojuvo birohevadeje. ¹⁸ Èhuni na nege Badare majaho rovego huro Onesiphorus-are jöëni vavaenimoromo ajamijego mae jioröhego. Na ëhi nege. Röhu urimë'i Onesiphorus-ro Ephesus amore hiromo muoho bövioho bise'oho ajeminövadeje. Ja'o iae gavanueje.

2

¹ Röhu nasi harihe no Iesu Keriso'o gemuoro bimuvavuë'ego God-ro hesi nimoromo huë baejavuoromo biriroho bojamuijë'e jiaje jero ë biriroho baeromo muoho vaenövone. ² Na diehi jië'e jö ae aho'obëhe majëhijajoho iae ja henövaneje. Èhenövane jöho baeromo a ma jabesi öroro röjëhijego jaburo jöho bava'oromo a ioro'ioroho jabu'o röjëhi'iro.

³ Muoho ëhi vaeromo huë vavaeni rovë'oho nadi vuonugo'i a'i uvone: Iesu Keriso-are muorovo ariböviehu biririvoromo Satan'o muorovoromo huë vavaeni baejaruëhi na'o ëhi ë'ejö uvoromo ja'o ëhi jië'e huë vavaenoho baeromo biririvoromo Satan'o muorovone. ⁴ Röhu ë hesi uhu jö jajivo'ië'ajoho gane. Bijo bunoe baeromo sisë ariböviohu'o muorovë'iroho mu göho göho bogo gemuoroho havoromo muorovo'i m-muorovo muohemu vaejarueje jabesi muorovo a böromohuro gëromo nimorohoröhego.

⁵ O uhu jö göho. Ajajovoromo tutuvoromo ae göehu gö iosirëmi'ië'iroho diehi ajajovarue jögoroho ejëhoromo evare tutuvarueje bogo ejahë'oho suvorohoho bogo baejööni. ⁶ O uhu jö göho. Dë mu ravë'iroho biririvoromo mu vaejarue ariböviohuro urimoho ë ioho ue'aho'ë'ö. ⁷ Naehu jajivaje jöho uehorovo avohone. Jöe aho'o Badaro ajami'iramu bëhoho bae'a'anue. ⁸ Röhu Iesu Keriso uehorovonövone. Keriso hu Israel sa'a muebenövade ae David-are ujeje. Huro guomoromo i'ovoromo ri'öjë'eje. Èhi jië'e jö maho naro majëhibe juvajeje. ⁹ Èhi jië'e jö maho naro majëhijë'ëro ëhuni Keriso bijönimarue ariböviohuro uvoruomajeje: Nörö Keriso-are jö majahuajohuro ëhuro hu a sisë höjo. Èhi uvoromo savoji gagore ba'amevë'ëro na huë vavaene baeje. Jabumëro na savoji gagore ba'amevoromo taemevareje röhu God-are jöho bogo taemë'ëro ae aho'obëhe hebe va'oruomajeje. ¹⁰ Ae aho'obëhe God-are jö hebe va'aruohuni ëhuni God-hu baejövade ariböviohuni naro uehorovëvoromo biririvoromo huë vavaene bövie bise'e baejajeje. Èhesi bëhoho na nege ë aribövioho jabu'o Iesu Keriso-are ae gemuohuro jëvë'ëro bogo sisëroho va'i maro va'oromo ioro'iore gemu hesi ajire raromemu raromoröhego. Èhuni naehu biririvoromo mu vaejajëhi ja'o ëhi biririvoromo muoho vaene. ¹¹ Röhu noehu ato'i arijarue jöho iae jö maeje. Atoromo ëhi uvarueje:

Nosi uehoro mamioho Iesu guomadëhi vuovahuë'oho hu'o gemu mae raromo'ëjarëjo. ¹² No bogo u'uho'i ma-biririvë'oho hu'o masije riravoromo hesi öri ari'oho muebe'ëjarëjo. Noehu hesinö deju bu'öjë'oho huro nosinö deje bu'ö'a'ajëjo. ¹³ Noehu God mae uavare jö ahë'oho röhu God-ro mae uövuae jöho bogo aho'a'ajëjo huhu uvaje jö vuonugo'iröhoho bogo eni jië'ego.

Timothy-hu mu mae God-are nunire vaeröhe jöhoje.

¹⁴ Èhi jië'e jöho majëhijego Christian ariböviohuro heromo avoho uehorovoruomo'iro. Èhi majëhiromo röhu God-are nutoro jögoroho darugo'o majëhiromo uëne: Bëhi rumo'e jöe gö gö nadi ma-jö aho'ahamirovorëne. Èhi uëne. Èhi jië'e jö aho'ahamirovë'oho aho heromo bogo marë'i sisëërövarueje. ¹⁵ Röhu jero muoho biririvoromo ömo gavego God-ro garomo uvo'iro: Ja eni javajëjo. God-are jö maho ma-ahorirëro majëhine. Jaehu ëhi ë'ë'oho jaehu vaejanue muoho God-hu gavë'oho ja bogo javojago'ë'e. ¹⁶ Röhu God bogo uehorovë'e ëma atarue jöho nadi enövone. Èhi jië'e jö atë'oho aëro God rumonimobe va'oruomo'ë'e. ¹⁷ Èhi jië'e jö sisëho iae sagoho va'ëne jio'ë'e. Sagohehu sino döre ibe va'ego rumorovoromo sino sisëjëjëvobe va'ajëhi jabesi jö sisëhuro ëhi rumorovo'iramu aëro sisërebe va'oruomo'ë'e. A ioro'iorohuro ëhi ë'arueje röhu Hymenaeus'o Philetus'o jaburo niö'iro ëhi jië'e jöho majëhijarueje. ¹⁸ Majëhiromo God-are jö maho vuonugoromo

ae sarerëmiromu uëvarueje: No ae aho'obëhe mami'e vuovoromo i'ovoromo ri'öj'ëro javuë'ëro ë hesi majaho mami'e barëj'e höjo. Jö sisëho ëhi jörovamu hej'ëro Christian ae göëro göëro Keriso avoho uehorovaroho vuonugë'ëj. ¹⁹ Ëaribövi ioro'iorehu God-are jö vuonugaroho röhu God-are aribövi maho jabumëro öbunö'e bibivoromo riravarueje. Jabumë God-are javu hesi öbu va'ëne jioruome. God-are javu hesi öbu va'ëne jioruome röhu God-are javu öbu hesi ahore ave jö niö'ioho jajiv'ëje. Göho uvë'ëje: Badaro gëvaje höjo di aribövioho hesiroho jioruomego. O göho uvë'ëje: Ae rahu uvë'oho: Na Bada mae uehorovaje ae jevajë uvë'oho ë ahuro mu sisëho vuonugo'irajo. Ëjöhö jajivo'amë'ëje.

²⁰ Röhu ekaresia jabesi uhu jö göho uehorovone. Osa börmöre va'ë'oho ga'a'anue hevöe ramae nu ano'e gö gö jio'amö'iramu. Ioro'ioroho inömo ma-mabëhöro avoho'amë'ëje. Ioro'ioroho ma-ijëro o sa'aëro sisë'i sisë'i avoho'amë'ëje. Röhu jabesi muoho gö gö jiorove. Hevö ioro'ioroho maego majä börmöhuni runo'e bahi'i hevö ioro'ioroho sisëgo majae ëhi mue vaejarueje. ²¹ Ëhesi bëhoho ae rahu naehu jajivaje uehoro sisë göhö'öj'ë'oho ë aho hevö maho va'ëne jio'ë'e. Ëhi jië'e aho mae nug'ë'ero hesi Börmö hesi muoho mabëhe ajami'ë'e. Mu mae rabe rabe rovamü vaej'ë'oho eni jio'ë'e. ²² Röhu a i'ehu sisë ömo'i nimaruoho gorö'i a'i aviëhi jië'oho sivoho gane. Bada dë vövöbajo'o uhure uehorovoromo huhu ajëmijöro ua gavarue ariböviohu'o gemuoro hibe juvoromo mu mae vae'i God mae uehorovo'i a ioro'ioroho jasi dë vövöbajo'ëro rajëhi'i ë'o gane. Ëhi jië'e muoho nuninö bamone. ²³ Röhu nuni ramoramovë'ëro simano sisë'rëromo jö aho'ahamirovarue jöhö nadi ëjehone. Ja'o iae gavanue. Ëhi jië'e jö aho'ahamirovë'iroho ëhuro iro muorovo'e vaejarueje. ²⁴ Röhu Badare mu vaejaje ahuro bogo iro muorovo'oho vae'i a'i ae aho'o jabesi örire huë baej'ëvonö'ë'e. Ma-taemorovoromo jöhö avoho röj'ëhinö'ë'e. ²⁵ Ae göehu hesi jö ahë'iroho huro sanu'e jögoroho juv'ö majëhinö'ë'e. Juv'ö majëhij'ë'oho hesi nani'o nani God-ro jabesi simanoho huotovëho'iramu jabumë uehoro sisëho vuonugo'i jö maho avoho ga'ë'ö. ²⁶ Urimë'i ëhi jië'e ariböviohuro Satan-are guare rirëromo va'oromo Satan-hu nimaje muohemu vaenö'ëje. Röhu jabumë jö ma avoho gavë'ohuro ëhuro avo'avoho uehorovoromo Satan-are guare jëvajojo suorovoromo maro va'ë'ö.

3

Maja viture sisë ariböviehu huë vavaeni barue'iröhoho ëhi jië'e aribövi Timothy-hu gorëvo'iröhe jöhöje.

¹ Röhu ave jöhu'o avo'avoho uehorovone. Sa'a bövi bise'o barë'iröhe majaho dunovë'iroho huë vavaene börmöe rue'ë'e. ² Ëhesi bëhoho ae aho'obëhe jabesi sino-huremu rajahirovo'ë'ö. Bövie bise'e gö'ö gö'ö döre baebe va'i nimo'ë'ö. Jö huhe ë'oromo jöe gö gö ëma ato'ë'ö. Jabesi simanëro ëma uehorovoromo uvo'ë'ö: No a ioro'ioroho iosirëmiromu masijoho javuajëjo. Jö sisë ato'ë'ö. Vëmu vavu'o jabesi jöhö aho'ë'ö. Suvuro bojëmamu baej'ë'oho huë ma jöhö bogo uehorovo'i ma-bae'ë'ö. God-are mu maho ijumo'ë'ö. ³ Jabesi aganoho bogo huë baej'ëvo'ë'ö. Nue huo'i sanuëm'ë'oho bogo e'ë'ö. Ae gö jabesi jö sisëho sarerëmiromu ato'ë'ö. Mue bövie bise'e nimaruoho ëma ömo'ë'ö. A umijaje ö sisëho va'ëne jëvo'ë'e. Mu maho bijönimo avoho'ë'ö. ⁴ Aganoho sarerëmiromu sisë vaej'ëvo'ë'ö. Bogo avo'avoho uehorovë'e mu sisëho ëma vae'ë'ö. Simano bövie vaeromo uvo'ë'ö: No eni javuajëjo. God bogo nimo'irögoro sino sasohë'e nimorohë'e muohemu ëhemu nimo'ë'ö. ⁵ Ma-döëremu God uehorovoromo hesi muoho vae'i uhoho God-are darugoho bogo herovarueje. Ëhi jië'e aribövioho gorëvo'iranego uave. ⁶ Ëhesi bëhoho ëhi jië'e aribövi ioro'iorohuro sarerisareriëmiromu sanuëmime osare osare va'oromo nu gö gö uehorovarue magonahoho sarerëmjego jabisinö va'arueje. Ëhesi bëhoho ë magonahoho mu sisë vaebe rovë'ëro ëhu'ëro dë juhuoninëgajeje. Dë juhuoninëgego mue gö gö nimarueje. ⁷ Mue gö gö nimoromo majae ëhi jöe gö gö hebe va'arueje röhu jö ma bae'iröhoho bogo eni jëvo hesije. Ëhi jië'e magonaho ömo'ömo sarerëmijarueje. ⁸ Sarerëmiromu God-are jö maho aharueje. Urimë'i a ihe Jannes'o Jambres'o Moses-are jö aharëhi ë sareri'e ariböviohuro ëhi God-are jö maho aharueje. Jabesi simanoho sisë'rëj'ëvë'ëro uehoroho bogojëve. God mae uehorovaroho

rineromëv'eje. ⁹ Rõhu ë aribõvi jabesi muoho bogo marë'i urimë'i Jannes'o Jambres'o jabesi mu simano rumo'e jiamu aehu gavarëhi ëhi ae aho'obëhe garuomo'ë'e ë aribõvi jabesi muohu'o simano rumo'e jië'e jio'iramu.

Paul-hu hesi majae barë'ia'amu Timothy jõgoru bõrõmo bojamade jõhoje.

¹⁰ Rõhu ja bogo ëhi jië'e aho jave. Na diehi diehi røjëhibe rovodoho iae ja gavë'e jave. Na diehi hibe rovode õroho iae ja gavë'e jave. Bëhoho rabëni mu vaebe rovodoho iae ja gavë'e jave. Na God diehi mae uehorovobe rovodoho iae ja gavë'e jave. Naehu bogo nu huodëgo'i ma-sanuovoromo mu vaebe rovodoho iae ja gavë'e jave. Naehu a nasi dë vövõbajo'ere uehorovëvobe rovodoho iae ja gavë'e jave. Naehu dë vövõbajo'o bogo u'uh'o'i ma-biririvobe rovodoho iae ja gavë'e jave. ¹¹ Aehu sisë vaejevo'i arijamu huë vavaene gö gö rue'i hijamu Antioch amore Iconium amore Lystra amore sisë vaejevo'i arijamu huë vavaeni diehi baebe rovodoho iae ja gavë'e jave. Ëhi jië'e huë vavaenoho baejumu rõhu God-ro ajemamu mae jevobe rovadeje. ¹² Rõhu na bogo gemuoho huë vavaenoho bae'i ae rahu Iesu Keriso'o gemuore bimuvoromo God-are jõhemu ejahobe va'i nëgë'oho a ioro'iorohuro ëho garomo bijõnimoromo jabesi õrيره sisë vaejevo'i ari'iramu huë vavaene baenõvo'ë'õ. ¹³ Aribõvi mahuro huë vavaene bae'i rõhu sisë aribõviohu'o sarer'i'e jõ majëhijarue aribõviohu'o avevejõ'e mu sisë vaejaruoho jaburo ijõnõ gö'o dõre sisë bõrõmo mae vaebe va'ë'õ. Sisë vaebe va'oromo ae gö sarerëminõvo'ë'õ o jabu'o ae gö jabesi sarer'i'e jõho heromo mae hõromo ejëhonõvo'ë'õ. ¹⁴ Jabumë ëhi sisërejëvo'ë'e. A'i jero heromo biririvoromo mae uehorovane jõhuremu ma'eno titimoromo uehorovobe va'one. Ëhesi bëhoho ë jõ røjahijare aribõvioho ja iae gövuanueje. ¹⁵ Iae ja'o gavanue ja bise'o javade majare jero aevoromo God-are surire jõho hebe rovaneje. Ësurire jõ gavë'ohuro ëhuro jasi simanoho ajivavo'iramu garomo uvo'a'anue: Naro ëhi'oromo Iesu Keriso mae uehorovoromo ëhuro bogo sisëroho va'i maro va'ejõjo. ¹⁶ Rõhu God-are surire jõho aho'obëhe ëho God-hu bojëmamu jajivare jõhoje. Ëjõ adahë'ohuro ëhuro God-hu nimego noehu vaejarue muoho marëjajeje. Ëhuro God-are muoho huruoho majëhijarueje. Mu sisëho aharueje. Juvõ'õ majëhijarueje. Mu ma hesi õroho røjëhijarueje. ¹⁷ Noehu God-are surire jõ adahoromo ëhi jië'e mu vaejë'oho ëhuro God-are aribõvioho no uehoro mae darugo mae bövie bise'e eni javuë'ëro ëhu'ëro mu mae aho'o vaejë'oho eni javuõ'ë'e.

4

¹ Rõhu God-are nunire Iesu Keriso-are nunire jõgore bogo bise'o vadu'oho majahi'ejõ. Uvone: Iesu Kerisoro sa'are raromarue aribõviohu'o vuovavuë'e aribõviohu'o no aho'obëhe göromo mevavuo'ajëjo. Huro nosi nunire rueromo bõrõme namiromo aho'obëhe muebejavuo'ajëjo. Ëjõho uehorovoromo uvone: Paul-hu Iesu Keriso-are nunire jõgoru majehi'ie'ajoho bõrõme hõ uvoromo avoho ejehone. ² God-are jõho darugo'o majëhine. Ae nimë'oho o bogo nimë'oho biririvoromo majëhine. Jõe majëhijego avoho uehorovorouomo'iro. Mu sisë vaejë'oho ahëvone. Darugo'e jõ maho majëhijego heromo biririvoromo mu ma-maemu vaeruomo'iro. Nadi u'uh'o'i biririvoromo jõho røjëhinõvone. ³ Ëhesi bëhoho rabëni. Majae ijõnõho aëro God-are jõ maho bijõnimoruomo'ë'e. Jõ maho bijõnimo'i sarer'i'e jõe gö gö he'i hia'e avohoruomo'ë'e. Hia'e avohoromo ëhuni sarer'i'e ae gö gö sõ rueruomo'ë'e ëhuro he'i nimarue jõ bëhoho røjëhijego heruomorõhëro. ⁴ Ëhi jië'e aribõvioho sõ rueromo jõ maho vuonugo'i sarer'i'e jõhuremu uehorovorouomo'ë'e. ⁵ A'i jero rabe rabe rovë'iroho avo'avoho uehorovõvone. Huë vavaene rovë'oho nadi u'uh'o'i biririvone. Keriso-are jõ maho majëhinõvone. Ëmuoho ma'enone. Jasi muoho aho'obëhe avoho ma'eno titimone.

⁶ Ëhesi bëhoho nasi majaho barë'irõgoro ë'e. Jew rajehu God rajahiromo jovo otehoromo God bojamiaruëhi ëhi nasi sino haho'oho God-are õrيره suvuore bojamiromo guomo'ie'e. Majae dunovo'iramu na ave sa'aho vuonugo'ejõ. ⁷ Mu ma baejedoho naro nasi uehoro darugoho aho'o bojamiromo biririvoromo vaejë'ëro ëhu'ëro ruahõ'oromo vae barëjë'e jeve. Noehu mae uehorovarue jõho ma'enë'e jeve. ⁸ Ëhu'ëro avevejõ'e mu mae vaeromo ruahõ'õjode hesi suvuoroho õ'idõre nugehë'eje. Badare majaho rue'iramu huro no avoho

mevavuoromo gövuajëro jië'ëro ë suvuoroho bojemi'ë'e. Röhu bogo na gemuoho bojemi'i a'i ae rahu hu rovego ga'i nimarue ariböviohu'o ëhi jië'e suvuoroho bojemi'ë'e.

Paul-hu hesi jö bise'o bise'o jajivade jöhoje.

⁹ Röhu ma-burëro nasi öroro rue'i ë'lo gane ¹⁰ rabëni hesi bëhoho Demas-ro sa'are muohemu nimoromo na remo'i Thessalonica amore va'irögoro Crescens-ro Galatia sa'are va'irögoro Titus-ro Dalmatia sa'are va'ë'e jiaje. ¹¹ Luke-ro gemuëro bogo va'ë'ëro huro rueromo gevajeje. O Mark mae ajamuijaje ae jiaje ëhuni hu'irae rovego huro muoho ajemi'iro. ¹² Röhu naro Tychicus nugö'öjamu Ephesus amore va'adeje. ¹³ Röhu urimë'i na Troas amore hijodevare nasi runoni niögoho Carpus-are osare nugo rovë'e jeve. Ëhuni ja rovë'iroho baejeho ruene. O biriri'e suri suriohemu uehorovo avohoromo ujuoheho ruene suri suri ioro'iorohu'o ëhu'o.

¹⁴ Röhu copper inömo avoh'o amaje ae Alexander-ro nasi örire mu sisë bëhe vaejevadeje. Ëhuni hu sisë vaejevadëhi Badaro i'ue ëhi mana bojami'ë'e. ¹⁵ Röhu jero gavë'i muoho vaene. Iahuro ja'o sisë vaejavo'ë'e. Ëhesi bëhoho huro nosi jöho aho avohë'ego uave.

¹⁶ Röhu urimë'i na court vaejevarevaroho aho bogo na'oho riravoromo nasi jöho ajemiromu majëhijareje. Ae aho'obëhe na vuororemijareje. Ëhi jië'e muoho sisëgo na nege God-ro jabesi sisëho uehorovoromo vuonugojöro. ¹⁷ Ae aho'obëhe vuororemi'i a'i Badaro na'o namiromo biriroho bojemadeje ëhuro naro hesi muoho vae barëromo hesi jöho majëhijego sa'a ioro'ioro raje ae aho'obëhe heruomoröhego. Ëhi'oromo na vörö'e mi hesi jö'ore jevanovamu Badaro ajemiromu baejevamu ëhuro sisëho bogo birohodeje. ¹⁸ Na sisë'i jevamu Badahu baejevadëhi na sisë birohevobe va'ë'oho huro ëhi baejevoromo avoho muebejevonövo'ë'e ëhuro naro ö'idöre va'oromo huhu böröme namiromo muebejavuaje öri ari'ere ë hi'irodego. Hesi ihoho ma-mae jiemu jiohe va'ë'e. Iae mae.

Paul o Christian ae gö gö jabuhu Timothy'o a ioro'iorohu'o jejemijare jöhoje.

¹⁹ Röhu Prisca'o Aquila'o jejemiromu Onesiphorus-are aganohu'o jejemijode höne. ²⁰ Röhu Erastus Corinth amore hijadoho iae ëhi hije. O Trophimus guomo guome baejamu Miletus amore nugo rovodeje. ²¹ Ëhuni jero ma-burëro ruene. Buru börömo majaho rueromo ja rue'irane öroho tarijojëni uave.

Eubulus Pudens Linus Claudia ö mueno'o ioro'ioroho ëho jaburo jasi örire jejamijö.

²² Badaro jasi aru'ahohu'o jioromo jemë ae aho'obëhe huë baeromo ajëminövë'e. Ahia mino'e.

TITUS

Paul-hu Titus jejamade jöhoje.

¹ O asë'e Titus Paul naro ave jöho jasi örire jajive. Na God-are mu vaejaje ae jevoromo Iesu Keriso-are apostle jeve.

Èhesi bëhoho God-hu baejövade aho magonahoho naro ajëmijajeje jaburo God mae uehorovobe hesi jö maho garomo ejahobe va'iröhego. ² Ejahobe va'oromo muebejë'i uvoruomorohego: Ioro'io remu maro raromo'ejarëjo. Èhi maro raromo'iröhego mami'e sa'a bövi bise'o bogo bamade majare God-ro mae uvadeje: Iae èhi jio'a'ajëjo God hu sareri'e jöho bogo jövajëro jïë'ëro. ³ Maro raromo'iröhe jöho èhi uvë'ëro gavade majaho eni jiamu gagorovo huhu uvade jöho hesi aribövioho sama'e majëhijadeje jaburo ae majëhiröhego. Röhu ë jöho na'o bojemiromo uevadeje: Naehu uvode ma raromo'irarije jöho ae majëhinëjo. God baejavuoromo manö bamavuaje ahuro ë muoho bojëmijë'ëro èhu'ëro hesi mu vaejaje ae jevoromo Iesu Keriso-are apostle jeve.

⁴ Röhu naro Titus jasi örire jejamije. Naehu God uehorovajëhi ja'o èhi gemuoho uehorovanuëro javë'ëro èhu'ëro ja nasi harihu mae jave.

Na nege God Vavuohu'o Iesu Keriso manö bamavuaje ahuro èho jaburo huë baeromo ajamijego maro hi'iranego.

Titus-hu Crete hiromo mu vaeröhe jöhoje.

⁵ Röhu Crete sa'are naehu ja ramoromo rovode hesi bëhoho èhuro Keriso-are ekaresia jabesi mue rabe bogo eni jëvajoho jero avohëhego mae jio'amoröhego. O naehu uvadëhi ekaresia muebe'amo'iröhe a duvahoho jero amore amore èhi bahibe juvo'iranego. ⁶ Ekaresia muebe'amo'iröhe a duvahoho èhi jio'amo'iro. Èhi jïë'e a duvaho hesi ihoho ma-maemu jio'iro. Hu magonahe ma-gemu masu'iro. Hesi aboji harihu'ohuro nadi hia'e biriri'övoromo aruëre anumëre ëma jijihio'iro. Èhiho bogojio'i a'i ma-mae uehorovarue aribövie jëvo'iro. ⁷ Iae ekaresia muebejaje aho bogo a muoho a'i God-are muoho muebejaje jiaje èhuni hesi ihoho ma-mae jio'iro. Nadi jö giagia'e aho nadi burëro vörönimaje aho nadi vörö'e jovo iromo simano sisë'rëjë'e aho nadi vörö ë'aje aho nadi moniemu uehorovaje aho jio'iro. ⁸ A'i osare sÿjëvo va'oromo nihudëgaje mu maemu nimaje taemorovaje jögore baeromo mueberovaje God avoho uehorovaje gororovaje èhi jïë'e ae jio'iro. ⁹ Noehu majëhibe rovare èhi jïë'e jö maho biririvoromo mae uehorovo'iro èhuro eni jioromo jö mae avoho rÿjëhiromo mu ma vaeruomaje a jabesi uehoroho birire bojëmi'i o göho jö aho'ahovarue aribövioho jio'je.

¹⁰ Jö aho'ahovarue aribövioho aho'oje. Jöho bogo e'i bëhi rumo'e sareri'e jöho rÿjëhijarueje. A ioro'iorohu'o röhu Jew rajo Christian aribövioho jaburo èhi ë'arueje. ¹¹ Èaribövi jabesi jöho ahëhore. Èhesi bëhoho jabumë sisë uehorovë'i moniemu nioromo jabesi sareri'e jöho rÿjëhijego agane gö gö uvarueje: Nani mae hÿromo rireromarueje. ¹² Jabesi Crete sa'a rajo jö majëhijaje a bÿröme gemuëro uvadeje: Crete rajoho sareri'e muoho javube vörö'e mi va'ëne javuobe mu bijöni'e iemu mahëro ue'ahanovobe rovë'e javuajëjo. ¹³ Huhu uvade jöho iae maeje. Èhi jïë'e jiaje èhuni jöho darugo'o majëhijego jaburo Keriso-are jöhemu avoho uehorovo'i ¹⁴ a'i Jew rajehu jabesi uehorö jö ëma sarerëmiromo majëhijaruoho vuonugo'i. O aehu öri ma bijönioromo jöe gö ëma bojëmijarue jö mae uehorovaruoho vuonugo'iro. ¹⁵ Ae rahu dë vövöbajo'e ma-maemu jïë'oho garomo uvarueje: Inöme aho'o sisë sisë bogojio'i ma-maemu jio'amajëjo. O ae rahu dë vövöbajo'o sisë jioromo Keriso bogo ma uehorovë'oho ëma uvarueje: Bövioho bise'oho sisë jio'amajëjo. Röhu jabesi uehorohu'o dë vövöbajo'ohu'o sisë'rëjëvë'eje. ¹⁶ Jö'ëro uëvarueje: No God gavarue höjo. Röhu mu sisëmu vaejaruohuro èhuro rÿjahirovego no gavarueje jabuhu èhi atarue jöho sarere jiego. Jabumë sisë bëhe jioruome. Jöho bogo eruome. Mu maho bogo vae hesi jioruome.

2

Ekaresiaehu God-are jö avoho uehorovoromo mu avoho vae'iröhego Titus-hu röjêhi'iröhe jöhoje.

¹ Jabumë êhi jië'e mu sisë vaejarueje röhu jero God-are jö ma jiaje êhi jië'e muohemu röjêhijego jasi ariböviohuro êhi vae'iro. ² Ama'i mavojoho uëne: Jemesi simanoho sasohoromo mu maemu uehorovoromo taemo raromorëne. God avoho uehorovoromo ae avoho huë baejëvoromo avoho biririvorëne. A mavojoho êhi uëne. ³ O magonaho mavojoho êhi jië'e jöe gemuoho majêhiromu uëne: God gemu uehorovobe jijihonövorëne. Ae gö jabesi jö sisêho nadi atemu atorëne. Nadi vörö'e jovohemu iemu irëne. Mu maemu röjêhijego magonaho i'ohu he'irarëne. ⁴ Magonaho mavojoho êhi uëne. Jaburo mu mae röjêhijego magonaho i'ohuro heromo baruohu'o asisö'ohu'o rajêhi'iro. ⁵ Taemo raromo'iro. Aho bogo sihëvo'iro. Amoho avoho muebe'iro. Baru jabesi jöho ejêho'iro. Christian magonaho i'ohuro êhi ë'iramu gëgorovo aho God-are jöho bogo agoruomo'ë'e.

⁶ O a i'ohu êhi jië'e jöe gemuoho majêhine. Uënego ma-taemo raromo'iro. ⁷ Röhu jero mu maemu vaejego ae aho'obêhe ja garomo uehorovoromo uvoruomo'iro: Ê'ego no'o êhi jië'e muoho vae'irarëjo. Nadi uehore gö gö bae'i ma-taemo hiromu jöho röjêhine. ⁸ Jö maemu jövnego aho jasi jöho heromo bogo sisë'ioho atoruomo'iro. Êhi jië'ohu nosi jö bijönimoruomaje ariböviohuro Christian aribövi nosi jö sisë ato'iröhoho bogo eni jëvo'iramu javoje baeromo ma-raromo'ë'ö.

⁹ O ae gö jabesi muemu vaejëharue aribövioho uëne: Jemesi a masijo jabesi jöho aho'obêhe ejêhego jaburo gëromo nimoroho'irarëne. A masijo jabesi jöho nadi aho majêhirëne. ¹⁰ Jabumë nadi vajiohuvodëgorëne. A'i mu maemu vaejego ae göëro gëromo uvoruomo'irajo: God-are jöho iae mae hōjo. God no manö bamavuade a hesi jöho uave. Mu aribövioho ë jöho majêhine.

¹¹ Êhi jië'e jögoru röjêhi'irane hesi bëhoho God-hu huë baejavuaje muoho ae aho'o nosi nunire rovë'eje êhuro baejavuogo maro va'iröhego. ¹² Êmuoho rovë'ëro êhuro God-ro röjahuijajeje noro God bogo uehorovarue muoho sinehu nimarue mu sisêho dejonö bul'ö'i ma-taemorovë'i mu mahuremu uehorovë'i God rajahijë'i ave sa'are raromo jijihojöro. ¹³ Êhi ë'ë'i muebejarueje ë nimoroho'iröhe maja rue'iröhire nosi A Böröme God no maro bamavuaje aho Iesu Kerisoro aji'o rovego ga'i. ¹⁴ Iesu Kerisoro nosi jöëni guomorovadeje sisëhu ruahö'öjavuadoho ahego noro maro raromoröhego. O nosi dë vövöbajo'ohu u'ovahuogo no hesi aribövi maemu jioromo mu maemu vae'i nimoröhego.

¹⁵ Êhi jië'e mu öroho röjêhinövone. Jögore mëmiromu mu sisêho ahonövone. Daruge baejë'e javaje jöho darugo'o majêhijego aho jasi jöho bogo mana aho majahi'i.

3

Christian aribövi no diehi mu vae'iröhe jöhoje.

¹ Jasi ekaresiaho uëne: Jemesi sa'are simano vaeruomaje ariböviohu'o jemesi a masijo ioro'iorohu'o nadi biriri'övoromo juahëmi'i jabesi jöho ejêhorëne. Mu mae bövie bise'e ömo varijëne jiorëne. ² Nadi ae gö jabesi ihoho ijumorëne. Nadi irovorëne. A'i ma-u'emur raromoro a mahu'o a sisêhu'o jabesi örire ma-jö sanu'e majêhiromu huë baejëvonövorëne. Êhi uëne. ³ Êhesi bëhoho no'o uehore bogojië'e aribövie javuonövadeje. Jöe bogo e'i aruëre anumëre ëma jijihonövareje. Sinehu nimaje mue gö gö êhuremu uehorovonövareje. A jabesi mu mahuni o böviëni bise'ëni dë vörönimoromo bijönaguonövadeje. Sisë javuo'ego aëro bijönaguonövareje. No'o göëro göho nue huodamirovonövareje. ⁴ A'i avejëj'ohu God manö bamavuaje ahuro huë baeromo ajamuijamu no gavë'e javue. ⁵ Ajamuiromu baejavuoromo manö bamavuë'eje. Bogo noehu mu ma vaejarohunioho bogo êhunioho êhioho ë'i a'i huro noni vavaenimoromo êhuni manö bamavuadeje. Êhesi öroho aviêhije. Huhu nosi sisë u'ovahuadoghuro hesi Aru'ahuhu i'ö baejavuadoghuro êhuro i'orëjavuadeje. ⁶ ÊAru'ahoho God-ro jovonö'e otehodaguadeje Iesu Keriso no mare bamavuaje a hesi ihore. ⁷ Hu êhi ë'ade hesi bëhoho huro huë

baeromo ajamuiromo nosi sisēho mu'uvahuē'ēro noro muebejē'i uvorōhego: No hesi aboji harihu'ēro javuē'ēro Vavu hesi bōvioho bise'oho baeromo ēhuro ma-ioro'ioemu maro raromo'ejarējo. ⁸ Ējōho iae mae.

Na nege jero ē jōho darugo'o majēhijego ēhuro God uehorovoromaje aribōviohuro ma-mu maemu avoho uehorovoromo vaeruomorōhego. Ēhi jiē'e mu vaejē'oho iae maeje. Ēhuro ae aho'obēhe marējēvo'ē'e. ⁹ A'i simano rumo'e jō berohemu beroharuoho bogave ejēho'irane. Hijo miono'o jabesi iho jōemu atemu ataruoho bogave ejēho'irane. O Jew rajo nosi jōgoru hesi bēhohuni jō aho'ahamirovoromo irovaruoho bogave ejēho'irane. Ēhi jiē'e jōho ēho ma-jōeje. No ēho uehorovē'oho ēhuro bogo maho javuo'ē'e. ¹⁰⁻¹¹ Ae gōehu jō sisē majēhiromo ekaresia adovēvaje ēhi jiē'e aho jōgore majahiromo bogo ejahamu gavē'oho rōhu maho majahinōvone. Bogo ejahamu gavē'oho uvone: Ēhi jiē'e a hesi simanoho sisē bēhe hōne. Hesi sisēro jiē'ēro i'ue bae'a'ajēne. Ēhi uvoromo ē a hesinō dejoho bu'ōne.

Ijo tugoho'i jōhoje.

¹² Rōhu naro Artemas o nani Tychicus jasi ōrire nugō'ō'ejo. Nugō'ōjego ō'ego evaro Titus jero ma-burēro Nicopolis amoro rueromo birohevone buru majare na Nicopolis hi'i uvē'e jevaje ēhuni. ¹³ Zenas jōgoru gavaje ahu'o Apollos'o avoho gēromo ie bōvie bise'e ajēmijego huē mae va'iro. ¹⁴ Na nege nosi ekaresia aribōviohuro mu maho avo'avoho vaeromo bogo eni jēvē'e aribōvioho ajēminōvorōhego. Ajēmijē'ohuro ēhuro jabumē bogo ēma raromo'i i'o mu'e vaejarue aribōvie jēvo'ē'e.

¹⁵ Ave na'o raromarue aribōvioho aho'obēhe jaburo Titus jasi ōrire jejamijō. O no'o gemuore Iesu mae uehorovarue aganoho naro jejēmijode hōne.

God-ro jemē ae aho'obēhe huē baeromo ajēminōvo'ē'e. Ahia mino'e.

PHILEMON

Paul-hu Philemon jejamijade jöhoje.

¹ O asë'e Philemon nosi aemo'aeme no'o bimuvoromo mu vaejanue aho na Iesu Keriso-are jöëni savoji gagore hijaje aho Paul na'o nosi öe Timothy'o noro niö'iro jasi örire jejamijö.

² O Apphia nosi ma'inoho o no'o gemu mae Satan'o muorovaje aho Archippus o Philemon jasi osare gagovarue ekaresia aribövioho ëhu'o jejemijö.

³ Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

Philemon-hu Iesu mae uehorovoromo God-are aribövi huë baejëvonövade jöhoje.

⁴ Philemon Paul naehu God-are örire jö jövë'iroho naro jasi jöhu'o jövoromo nasi God hesi örire huë mae uavajeje. ⁵ Èhesi bëhoho naro hejajeje aëro jasi jöho atoromo uvoruomego: Jero God-are aribövioho aho'obëhe huë baejëvoromo Bada Iesuare örire mae uehorovanue höjo. Èhi heromo ëhuni God mae uaromo ⁶ ëninamiromo uavajeje: God jero ajaminego Philemon no'o gemuore mae uehorovavajohuro ëhuro hesi simanoho jiororovoromo Kerisohu bojamuijaje huë maho bövioho bise'oho ga avoho'irajo. ⁷ Öho jaehu God-are aribövie aho'obëhe huë baejëvanohuro ëhuro jabesi dë vövöbajo'oho sanuovëhë'e jave. Èhuro na dë mae jevego nimoroho avohajeje.

Onesimus Philemon'o hiromo ju'ebijë'ëro sionëro ö'ego Philemon-hu hesi sisë uehorovoromo vuonogoromo röhu maho baeröhe jöhoje.

⁸ Ja ëhi jië'e huë baejë'e ae javë'ego ëhuni ave jöho ua'ië'e. Na nego'ibejo na Keriso-are ihore darugo'e jöho bojamiromo ua'ibejo: Jasi muoho vaejëjo. ⁹ Röhu bogo ëhioho ë'ëjo. A'i ja huë baejë'e ae javë'ego ëhuni naehu nimaje jöho ma-sanu'e majahi'ëjo. Paul na Iesu Keriso-are jö majëhijaje ae jevo'i aviavejö'e na hesi jöëni savoji gagore hijaje aëro jevë'ëro ¹⁰ ëhuni naehu huë baejaje harihu hesi jöëni naro jasi örire ave jöho uave. Naro savoji gagore hiromo ajamamu huro Keriso baejajeje. Èhuro hu nasi harihe jianove. Na Onesimus-are jöho uave. ¹¹ Onesimus-are iho hesi bëhoho ajamuijaje ahoje. Röhu hu urimo ja'o hiromo jasi muemu vaejahadevaroho evaroho jasi öriroho bogo avo'avoho ajaminövadeje. Röhu avevejö'oho Keriso baejë'ëro ja'o na'o ajamuijaje aeje.

¹² Iae na nugö'ö'irögoro ë'e vuonorö'ö ö'oromo jasi muemu vaejaho'iröhego. Röhu hu ö'iramu nasi dë vövöbajo'e aho'o hu'o jio'ë'e. ¹³ Naro Onesimus ma'eno'ibejo ëhuro iae na mae jevo'ibejo. Keriso-are jö ma hesi jöëni na savoji gagore hijaje Onesimus-ro na'o gemu mae hiromo ja'o röromo ajemi'iröhego ëhuni ma'eno'ibejodoho röhu bogo ma'eno'ëjo. ¹⁴ Ja bogo uevë'e naehu Onesimus ëma ma'enë'oho na bijönege hu jasi muemu vaejahaje aego. Èhesi bëhoho Onesimus-ro ja'o röromo ajemi'iröhego naremuëremu nimoromo hu ma'enë'oho sisë jio'i a'i jaehu nimoromo Onesimus-hu na ajemijöro uavë'oho iae maeje. Röhu jasi jöho bogo baejë'ëro jevë'ëro ëhuni na bogo ma'eno'i jani nugö'ö'ëjo.

¹⁵ Onesimus ja'oho bogo hi'i dirö'o göro majae ma-bisemu hijadeje. Èhesi bëhoho nani hu vuonorö'ö ö'ego jero ma-ioro'ioremu bae'iranejo. ¹⁶ Avevejö'oho hu bogo ma-jasi muemu vaejahaje aho jio'i a'i jasi huë baejanue ö maeje. Iae na hesi örire börömo bëhe uehorovajeje. Röhu jero na iosiremiromo börömo mae hu uehorovo avoho'anue ë hesi bëhoho hu jasi mu vaejahaje ae jioromo ja'o hu'o Badare ae gemuoho jëvë'ëgo.

¹⁷ Èhuni jaehu uvë'oho: Paul Philemon na'o havaje ae hö uvë'oho ëhuro jaehu na rajehiromo baejevo'ibejanëhi Onesimus ö'ëgo ëhi rajahiromo baene. ¹⁸ Huhu mami'e mu sisë vaejavadoho o jasi mae sisë'e bojami'iröhoho bogo bojamijadoho uvego naro hu'o röromo jasi örire mana bojami'iro. ¹⁹ Paul naro ave jöho nasi övëro jajivoromo uave: Iae naro manaho bojami'ëjöjo. Röhu jaehu mana ajemi'irane jöho na bogo ua'ëjo. Èhesi bëhoho naro ja ajamijamu jero Keriso baejë'ëro ëhu'ëro bogo sisëroho va'i maro va'o hesi

jave. Röhu ë jöho bogo ua'ejo. ²⁰ Io'o öho naehu nimaje jöho Badare jöëni ejehego mae jevo'i. Ejehoromo ëhuro Keriso-are ihoro nasi dë vövöbajo'oho sanuovehone.

²¹ Röhu na uehorovoromo uve: Naehu nimaje jöho ejeho'anuëromo ave surire jöho jajive. Iae na garomo uve: Naehu uavaje jöho jero eromo röhu gö'o döre vae avoho'anuëjo.

²² Röhu naehu hi'irode röhhohu'o avohehone. Èhesi bëhoho na uehorovoromo uve: Jemëhu nasi jöëni ëninamijarujohuro ëhuro God-ro ajemi'iramu na savoji gagore jioromo höröromo jemesi örire ö'ejöjo.

Christian ae göehu göehu Philemon jejamijare jöhoje.

²³ Röhu Iesu Keriso-are jöëni na'o savoji gagore hijaje aho Epaphras-ro jasi örire jejamije.

²⁴ O Mark Aristarchus Demas Luke ëhi na'o gemu mae Keriso-are mu vaejarue aribövioho jabu'o jasi örire jejamijö.

²⁵ Bada Iesu Kerisoro jemesi aru'ahohu'o jioromo huë baeromo ajëminövo'ë'e. Ahia mino'e.

HEBREWS

God-hu uavamu hesi Harihehu jö majahuijade jöhoje.

¹ Urimoho God-ro mue gö gö majae göro göro vaebe rueromo ehuro hesi jöho röjehi'ego jö hesirire baeromo majëhinövare ariböviohuro baeromo nosi hijo miono'oho majëhinövareje. ² Èhi'obe rovadoho avevejö'e ijo tugoho'i jioröhe majaho dunovamu God-ro uavamu hesi Harihohuro jöho majahuijé'eje. ÈHarihoho God-ro uavé'ëro sa'ae bövie bise'e bamadoho èho ijönö hesi bae baré'iröhohoje. ³ Iae hu God-are aji maho baeromo ehuro no ajjavuajeje. God jiajèhi hu èhije. Hesi darugo'e jöho jövoromo ehuro sa'aho bövioho bise'oho aho'o ma'eno titimajeje. Huro nosi sisèho u'ovahuonugoromo dö mare ajiomoromo God börömo jiaje a hesi övo manö hijadeje. ⁴ Èhu'ëro jié'ëro anerae aho'obèhe iosirëmiromomo huro dö mare hijajeje. Göho hu God-are Harihëro jié'ëro hu iho bövi maho baejamu hesi ihohuro anera jabesiroho iosirëmijé'eje.

God-are Harihehu anera ömo'ömo iosirëmijaje jöhoje.

⁵ God-are Harihehu anera jabesi iho iosirëmiromomo iho börömo baejade jöho God-are surire jajivadoho gavarueje. God-ro anerae bogo gemu vadu'oho ave jöho ua'i ma-hesi Harihoho gemu uavadeje:

Ja nasi Harihoho javajëjo.

Jaruvoho naro ja baejavë'e jevajëjo.

O God anerae bogo gemu vadu'o hesi jöho jövoromo ae ué'i ma-hesi Harihu hesi jöhemu uëvadeje:

Na hesi Vavuoho jevo'i

hu nasi Harihoho jio'a'ajëjo.

⁶ Jö göho God-hu hesi Harihu Muri sa'are nugö'öjadedvare evare uvadeje:

Na negajëjo God nasi aneraho aho'obèhe jaburo è aho gemu rajahiruomoröhego.

⁷ O anera bogo iho masijo jio'amaje jöho huro uvé'eje:

God naro nasi aneraho avohëvego bururæ'amaje höjo.

Nasi mu ajemijarue aru'ahoho avohëvego vëni höduræ'amaje höjo.

⁸ Anera jabesi jöho èhi uvo'i Harihu hesi jöho èhi uvé'eje:

God ja böröme namijanuoho èhi namiemu namibe va'a'anuejo.

Böröme namiromomo jero jasi öri ari'oho avoho muebejanue höjo.

⁹ Ja mu maho nimo'i mu sisèho bijönimanue höjo.

Èhuni God jasi A Börömoho naro ja baejavoromo hué mabèhe bojamijamu

jero jasi aribövioho iosirëmijé'ëro ja börömoho javajëjo.

¹⁰ Röhu God-are Harihu hesi örire jö göho èhi uvé'eje:

Bada ni'i'ivadiroho jero sa'aho bamane höjo.

Ö'idöhu'o jasi övëro avohane höjo.

¹¹ Sa'ahu'o ö'idöhu'o baré'i a'i jero biririvoromo hiemu hi'a'anuejo.

Sa'ahu'o ö'idöhu'o niögëro buraerovanovo'ajëjo.

¹² Aehu niögu suhi'o muotoho bahijaruèhi èhi ö'idöho sa'aho rori'o bahi'anuejo.

Aehu niögu jijö boremi'ö'i i'o io'amaruèhi ö'idö mamioho sa'a mamioho èhi mu'u'i i'e avoho'anuejo.

A'i ja vadune manaere aho'o èhi ma-jiemu jio'be va'a'anuejo.

¹³ God-ro anerae bogo gemu vadu'oho ua'i ma-hesi Harihohemu uavadeje:

Nasi övo manö ro hijego

ja'o muorovarue aribövioho naro ruahö'öjëvego

hö'rëro vijuvo taemo'amö'irane höjo.

¹⁴ Harihoho èhi böröme jio'i a'i anerae aho'o jabumë ma-God-are mu vaejharue aru'ahe jio'ame. Èhi jio'amé'ëro God-ro rëmö'öjego jaburo rueromo God-hu ijönö mare

ramuo'iröhe aribövioho no ajamuijarueje. Èhu'ëro jië'ëro God-are Harihohuro aneraho iosirëmiromo hu börömo mahoje.

2

God-hu baejavuoromo mare ramuaje jö noehu avoho uehorovo'iröhe jöhoje.

¹ God-are Harihohuro aneraho iosirëmiromo hu böröme jië'ëgo èhuni noehu God-are jö hejaroho bogo rumonimo'i biririvoromo ma'eno'ejo jöho nugo'i öre gö va'ojöëni. ² Urimoho aneraëro Jew rajo hijo miono'oho God-are jöho bojëmareje. Èaneraho bogo masijehu jëvadeje röhu jabesi jöho bogo sareri'ehu jio'i iae mae jiadeje. Iae mae jië'ëro ae rahu jö bogo ejëho'i mu gö gö vaejë'oho i'ue mana baenövareje. ³ A'i jaruvoho God-hu nosi aru'aho mare ramuaje jö bojamuijadoho èho jö börömeje. Ae rahu è jö vuonugë'oho i'ue baejööni gororomo huruomoromo dinö'e va'ejo. Huruomo'iröhe öroho bogoje. Èhesi bëhoho bogo aneraho uö'i Badaro aevoromo hesi jö'ëro majahuijamu jö hejare aribövioho jaburo è jöe gemuoho majahuiromo uövuareje: Iae mae-ëjo. 'Röhu bogo jabesi sivuoho ëma majahui'i a'i God-ro jabesi jöho ajëmiromo bogo gavarue darugo'e mue gö gö vaenövadeje noro garomo jöho mae uehorovoröhego. Darugo'e muoho vaeromo huhu nimadëhi hesi Aru'ahoho ua'ego noehu mu mae vaeröhe suvuore gö gö èhi bojamuinövadeje noro èhu'o garomo jöho mae uehorovoröhego.

Iesu hu baejavuoromo manö ramuade a böröme jiaje jöhoje.

⁵ Röhu èhi jië'e mu masijoho èho u'emu jioröhe öri ari'o i'ho hesi muohoje. Na è hesi jöho jajive. God-ro è öri ari'o i'ho bamo'i uehorovadevaroho bogo uvadeje: Aneraëro masije riravoromo è öri ari'oho mueberuoma'ajëjo. ⁶ Bogo aneraho jaburo mueberöhego uvo'i a'i jöe gö God-are surire uvë'eje:

God-ajo. Sa'are aribövioho ma-bise'e javuajëjo.

Röhu jero nosi jöëni uehorovanue höjo.

Nosi ihoho bogojavuanovajëjo.

Röhu jero no muebejavuanue höjo.

⁷ Anera masijo jio'amaje jabesi bëhire sa'are aribövioho no bamavuane höjo.

Ajohu'o iho mabëhohu'o bojamuane höjo.

⁸ Noro hörëro taemoromo muebe'amoröhego bövie bise'e nosi hörü uhunö bahijahuane höjo.

Èhi jajivë'eje. Bövi bise'o nosi hörü uhunö bahijade jö hesi bëhoho aho noro aho'obëhe ruahö'ö'amoromo muebe barë hesi javue. Röhu avevejö'oho bövioho bise'oho nosi hörü uhuroho bogojavue'ëro èhu'ëro aho no bogo aho'obëhe taemoromo muebe'amarueje. Èhi jië'e muoho nosi nunoho bogo gavarueje u'emu garöhëro. ⁹ A'i noro ae gemu Iesu iae gavö. Iesu hu döre jiadoho God-ro hesi nimoro huë baejavuoromo hu uavamu ruvebiromo anera jabesi bëhire hijadeje ae aho'obëhe noni guomoröhego. Hiromo vavaene baeromo guomamu èhuni God-ro hu döro bamoromo ajohu'o iho mabëhohu'o bojamamu baejadeje. Èho iae no gavö. ¹⁰ God-ro aboji harihu'e aho'obëhe ajì'ere söjavuo ujuoho va'i nimamu èhuni baejavuoromo mare ramuo'iröhe a börömo Iesu uavadeje huro vi'ehe baejoro èhuro mue aho'obëhe ruahö'amoromo eni romoromemu jiego no baejavuoromo maro ramuo'iröhego. God-hu bövi bise'o avohoromo muebe'amajohuni èhuni huhu Iesu èhi uavadoho mae jiadeje.

¹¹ Röhu nosi sisë u'ovahuaje aho Iesuoje. Sisë javuego u'ovahuaje aribövioho iae no javue. Röhu hesi Vavuohu'o nosi Vavuohu'o gemuohoje. Vavue gemuoho javuë'ëro Iesuro bogo javojimo'i ma-uvajeje: No ö mueno'e gemuoho javuajëjo. ¹² Iesuhu uvaje no ö mueno'e gemuoho javuajë uvaje jöho God-are surire jajivoromo èhi uvë'eje: God jasi jöho naro majëhi'iramu nasi ö mueno'ohuro heruoma'ajëjo.

Naro jasi ariböviohu'o gemuore hiromo jasi örire rajahiromo jöho io'ejöjo.

¹³ Röhu Iesu ae aho'o no'ö gemuore jiaje jöho gö'o jajivoromo uvë'eje: Naro uvonövo'ejöjo: Hesi God-ro gemuëro ajemi'ajëjo. Röhu jöe gö'o uvë'eje: Na aviae jevajëjo. Na God-hu

bojemade aboji harihu'ohu'o gemu mae hijajëjo. Iesu'o no'o gemu mae javuaje jöho ëhi jajivë'eje.

¹⁴ God-are aboji harihu'e javuajë uvadeje. Röhu aboji harihu'oho no sino haho'e biroge köe javuë'ëro ëhuni Kerisoro araromo hu'o sino haho'e biroge köe ëhi gemuoho baejadeje ëhuro guomoröhëro. Guomego vuovo'iröhe öri hesi vörö baejaje aho Satan hesi darugoho mu'uvaho barë'iröhego. ¹⁵ Satan-are darugoho mu'uvahago no vuovavuoröhe ë hesi juhuonoho barëjahuo'iröhego. Ëhesi bëhoho urimë'i vuovavuo'iröhoho uehorovoromo juhuonivobe rovaraje. Juhuoni juhuoni raromarohe diehi'oromo vonu-gojöëni ëhuni sisë'i raromareje. Ëhi jïë'e juhuonoho barëjahuo'iröhego ëhuni guomadeje. ¹⁶ Aveho iae mae. Iesuro bogo aneraho ajëmi'i a'i Abraham-are ujoho no ajamuijajeje. ¹⁷ Ëhu'ëro jïë'ëro huro araromo hesi ijoraje nomë va'ëne jiadeje. Ëöre gemu jiadeje ëhuro hu God-are muoho vaeromo priest böröme mabëhe jioröhëro. Ëhi jïë'e priest jioromo noni vavaenimoromo muoho avoho vaeromo a nosi sisëho u'ovahuoröhëro. Ëhuni no va'ëne jiadeje. ¹⁸ Sisëhuro Iesuare dëre bijiohamu vavaene baejë'ëro ëhu'ëro huro garöhe sisëhu nosi dëre bijioho gövuego huhu ajamui'iröhoho iae hu eni jie.

3

Iesuhu Moses iosiramiromo böröme jiaje jöhoje.

¹ Christian aganomë God-ro uëvadeje jemë'o hesinö jëvojöro. Ëhuni Iesu uehorovo avohore. Iesuro God-are ihore jöe majahuijajeje. Hu nosi priest börömoheje. Ëhu'ëro noro hu mae uehorovoromo hesi jöho huruoho majëhijarajeje. ² Huro God-are örire muoho baeromo ë muoho avoho vaenövadeje. Urimë'i Moses-hu God-are mu avoho vaejahoromo God-are aribövie aho'o muebejëvonövadëhi Iesuro ëhi gemuoho ë'adeje. ³ Röhu Iesuro Moses iosiramiromo iho börömoheje baejë'eje. Ëhesi bëhoho Moses hu ma-God-are agane gemuoho jio'i Iesu hu God-are agano gagovade aeje. Ëaganoho gagovë'ëro ëhu'ëro Iesuare ihohuro Moses-are ihoho iosiramijë'eje. ⁴ Agane gö gö bogo ëma jio'i aëro gagovoromo gemuoro nugo'amë'eje. Agano gagovoromo bövi bise'o avoho'amade aho God-je. ⁵ Moses God-are mue vaejahaje aëro jïë'ëro God-are agano ioro'iorohu'o hiromo hesi muoho avoho vaenövadeje. God-are muoho avoho vaeromo God-hu ijönö majahui'iröhe jö jïajëhi jïë'e jöho huro urimo ae majëhinövadeje. ⁶ A'i Keriso bogo ma-mu vaejahaje aehu jio'i hu God-are Harihe jiadeje. Hu God-are Harihëro jïë'ëro God-are aganoho avoho muebe'amajeje. No'o God-are agane javue. God-hu maro ramuoröhe jöho bogo vuonugo'i biririvoromo nimorohë'i uehorovobe va'ë'ohuro ëhuro no ëhi javue.

God-are ariböviehu nuho'iröhe jöhoje.

⁷ Ëhuni God-are Aru'aho hesi jöho avoho ejahore. Hesi surire jöho ëhi uvë'eje: Ave jaruvore majaroho God-hu majëhijaje jö hejë'iroho

⁸ nadi hia'oho biriri'övorëjo.

Jemesi hijo miono'ehu hia'i biriri'övoromo God na'o muorovarëhioho nadi ëhioho ë'orëjo.

Jabuhu a rumo'e sa'are raromorohe God nasi dë bijioho gavarëhioho nadi ëhioho ömorëjo.

⁹ Jemesi hijo miono'ohuro nasi mu masijo gabe rovaroho ëho bogo uehorovo'i nasi dë bijioho gebe rovaroho vadune 40 barëjade höjo.

¹⁰ Ëhuni God naro ë aribövi jabesi örire bijönimoromo uvode höjo:

Majae ëhi jabumë dë vövöbajo'ere sisë'i uehorovo'i nasi mu hesi öroho bogo avoho baeruumë'e höjo.

¹¹ Ëhi uvoromo naro dë vörönegamu jöe darugo'o jövoromo uvode höjo:

Jabumë bogo na'oho ro raromorohe nuhuruomo'ajëjo. Bogo mae bogajo.

¹² Agonomë ëhi jajivë'e jiaje ëhuni gavë'i raromorohe. Jemë a ioro'iorohuro God bogo ma uehorovarue uehoro sisëho baeromo ëhuro darugo'e aho God vuonugo'aruje. ¹³ A'i göëro göho jögore mamirovore. God-are surire mami'e adahare jöho uövüë'eje: Ave jaruvore

majaroho nadi hia'oho biriri'övorëjo. Ëuövuade jaruvore majaho bogo barëj'e jie evaro majae ëhi göëro göho jögore mamirovore ëhuro jemë a ioro'iorohuro sisëho garomo bogo simane huotorovoromo ëhioho hia'oho biriri'övo'irarije. ¹⁴Jögoru mamirovo'irarije hesi bëhoho noehu aeo'i biririvoromo mae uehorovarëhi jië'e uehore gemuoho ma'eno titimobe va'ojuvo majae barëjamu bogo vuonugë'ohuro ëhuro no Keriso'o gemu mae javuajeje.

¹⁵God-are surire mami'e adahare jöho uövuë'eje:

Ave jaruvore majaroho God-hu majëhijaje jö hejë'iroho nadi hia'oho biriri'övorëjo.

Jemesi hijo miono'ehu hia'i biriri'övoromo God na'o muorovarëhioho nadi ëhioho ë'orëjo.

¹⁶Röhu rahumëro jöho heromo ri'öromo God'oho muorovareje. Moses-hu Egypt sa'are jioromo söjëvo rovade aribövioho ae aho'o jaburo huotorovoromo God'o muorovareje. ¹⁷O God-ro rahumesi öriroho bijönimobe rovadoho vadune 40-ho barëjadeje. God-ro mu sisë vaeruomaje aribövioho bijönimadeje. Ëaribövioho sisë vaeruomë'ëro ëhu'ëro a rumo'e sa'are vuovo momorö'öbe va'oruomadeje. ¹⁸O God-ro jöe darugo'o uvadeje: Jabumë bogo na'oho ro raromoromo nuhoruomajëjo. Bogo mae bogajo. Ëho rahumesi jöho jövadeje. Jö bogo ejahare aribövi jabesi jöho jövadeje. ¹⁹Ëhu'ëro jië'ëro no garomo uvö: Nosi hijo miono'ehu bogo ma uehorovarohuro ëhuro jabesi sa'are va'o nuho'iröhoho bogo eni jëvade höjo.

4

¹God-ro mae uövuë'eje noro va'oromo hu'o raromoromo nuhoröhego. Ëhuhu uövuade jöho bogo barëj'e jie e ëhuni juhuonivoromo gavë'i raromore. Ijonö God-ro a ioro'ioro jemesi muoho garomo uvojöëni: Rueromo na'o nuho'irarijoho jemë bogo eni jëväjë uvojöëni uëve. ²No God-are jö maho hejë'e javue. Urimë'i a rumo'e sa'are jijihoruomade ë aribövioho jabu'o ë jö maho hejareje. Hejareje röhu bogo marëjëvadeje ë hesi bëhoho hejare jöho bogo ma uehorovë'ëro. ³A'i no Iesu mae uehorovarue ariböviohuro iae va'o God'o gemu mae raromoromo nuharueje. Ënuho'iröhe jö God-are surire adahare jöho ëhi uövuë'eje:

Naro dë vörönegamu jöe darugo'o jövoromo uvode höjo:

Jabumë bogo na'oho ro raromoromo nuhoruomajëjo. Bogo mae bogajo.

Ëhi jajivë'eje röhu ë hesi urimo God-ro sa'ae bövie bise'e bamamu evare hesi muoho barëj'ëro jaruvoho bogoje. ⁴God-hu mu barëjade jö God-are surire jajivaroho majae 6-ho barë'i 7 jiade jö jajivarire ë gavarueje. Ëjöho ëhi uvë'eje: Majae aho'obëhe 6-ho barë'i röhu 7 jiamu gavë'i God-ro hesi muoho aho'obëhe vuonugo'i nuhade höjo. ⁵Röhu ave God-are surire jöhu'o jajivoromo uövuë'eje: Jabumë bogo na'oho ro raromoromo nuhoruomajëjo. Bogo mae bogajo. ⁶Ëhu'ëro jië'ëro urimë'i God-are jö ma heruomade ariböviohuro hesi jöho bogo ejahoromo ëhuro bogo va'o hu'o gemuoroho raromoromo nuhareje. O ae göëhu göëhu va'oromo God'o raromoromo nuho'iröhe jöho bogo barë'i iae ëhi gemuohoje. ⁷Ëhuni God-ro majae gö bamoromo uvë'eje: Ave jaruvore majahajo. Ëhesi bëhoho urimë'i hia'i biriri'övere aribövioho vuovëvadoho va'ojuvo majae ëgo'o barëjamu evare God-ro uavamu David-ro noehu adahare jöho jajivoromo uvadeje:

Ave jaruvore majaroho God-hu majëhijaje jö hejë'iroho

nadi hia'oho biriri'övorëjo.

⁸Urimë'i Joshua-hu Israel aribövi jabesi sa'are söjëvo va'adevare ë ariböviohuro God'o raromoromo nuhoruomajëjo majae göre nuho'iröhe jöho God bogo bamo'ibejo. Röhu jabumë bogo God'oho raromoromo nuhareje. ⁹Bogo nuhë'ëro ëhu'ëro God-are aribövioho nuho'iröhe jöho bogo barë'i iae ëhije. Urimë'i majae aho'obëhe 6-ho barë'i majae 7 jiamu God-hu aevoromo nuhade ëhi jië'e nuho majaho God-ro noni bamahuë'eje. ¹⁰Ëhesi bëhoho God-hu hesi mu vuonugo'i nuhadëhi ae rahu va'o God'o raromoromo nuhë'oho i'u'e muoho ëhi vuonugo'i nuhoruomajeje. ¹¹Ëhuni no va'o God'o raromoromo nuho'iröhoho

avoho vae ga'lejo ëhuro ë hijo miono'ehu God-are jö bijönimoromo sa'are rireromarëhioho no bogo ëhioho ë'iröhëro.

¹² God-are jöho darugo ma-ma'eje. Darugo ma-ma'ëro jië'ëro ë jöho kaejö va'ëneje. Hesi kaejö anio ruë jio vië jië'ohuro nosi dëre nure aho'obëhe ro bijioho gövuajeje. Röhu nosi kaejöhö anio rumo'e jio'amo'i God-are kaejöhö anio ma-ma'eje. Èhuni no diehi diehi nosi uhure uehorovoromo nimaruocho God-ro nosi dë vövöbajo'ere göromo hesi jöho ma-darugo'o ahorirëro majahuijajeje. ¹³ Iae ae bövie bise'e God-hu bamavuadoho hesi nuniroho bogo gurihiroho javuo'i a'i aho'obëhe God-hu gövuajoho ma-va'orahoro gemu javue. God nosi börömege noro hesi nunire riravoromo ua'ejo: iae no ëhi ëhi vaejë'e javuajëjo. Èahuro no gö barëjë'eje.

Iesu hu priest börömo ma jiaje jöhoje.

¹⁴ Röhu no priest börömo maho javue. Huro ö'idöre God-hu jiaje mare ë ajiomadeje. Hesi ihoho lesuoje. Hu God-are Hariheje. Èhuni noro mae uehorovoromo huruohö majëhijarue jöho ma'eno titimo'ejo. ¹⁵ Nosi priest börömhuro gövuaje nosi uehorohö darugohö u'uhoromo mu sisë vae hesi javuegö göromo hu bogo ma-nunëremuohö gövuajeje. Nosi dëre mu sisëhu rabehu rabehu bijahuo'i hijajëhi sisëhuro nosi priest börömo hesi örire ëhi gemuohö vaejadeje. Èhi gemuohö vaejumu bogo ejadeje. ¹⁶ Èhuni ë'ego no birivoromo God-hu börömo namiromo hijajire ë va'oromo nosi jöho majahinövo'iro God-hu hesi nimoro ajamuijajohuni. Noehu va'oromo jö majahijë'ohö huë vavaene baejavuo'iramu evare huro noni vavaenimoromo huë baejavuoromo ajamui'iramu mae javuo'ë'e.

5

¹ Ave sa'are raromarue priest masijo jabesi muohö aviëhije. Ae gemu ae aho'obëhe jabesirire jiego God-ro baeromo muro bamajeje huro God-are muohö ë aribövi jabesi jöëni vaeröhego. Muro bamë'ëro priest börömhuro ë aribövi jabesi jöëni muohö vaeromo mi suvurohu'o suvuro ioro'iorohu'o God-are örire bojamijajeje huro jabesi sisëhö uehorovoromo vuonugëhoröhego. ² Ave sa'are hijaje priest börömhuro garöhe ae gö simane garaejanovamu o öre sisë'i sisë'i jijihamu gëvë'ohö uvo'ë'e: Priest-ohö na'o u'uhevë'ëro ëhi jië'e mu sisëhuro baejevaje höromo jögorohö ma-u'emu avohö majëhi'ë'e. ³ Ave sa'are priest börömo u'uhë'ëro mu sisë vaejajeje. Mu sisë vaejajëro jië'ëro bogo a ioro'ioro jabesi sisëniöhö gemu a'i hesi sisëhuni mi suvurohö God bojami'ë'e huro hesi sisëhu'o uehorovoromo vuonugahoröhego. Bogo bojamijë'ohö sisëje. ⁴ O aevoromo priest börömo mu vae'ië'irohö aho bogo sivuohö uehorovoromo dörohö bamorovoromo priest börömo muohö bae'i a'i God-hu uavë'ohuro ëhuro priest muohö baejajeje. Priest börömo aevö'i jiade hesi ihohö Aaron God-hu uavamu priest mu baejadëhi God-hu uavë'ohuro priest muohö ëhi baejajeje.

⁵ God-hu uavego priest mu baejaruëhi ëhi Kerisoro hu'o bogo hesi sivuohö uehorovoromo dörohö bamorovoromo priest börömo muohö bae'i a'i God-ro priest muro bamoromo Keriso uavadeje:

Ja nasi Harihohö javajëjo.

Jaruvohö naro ja baejavë'e javajëjo.

⁶ O God-hu priest mu bojamade jö göhö jajivoromo ëhi uvë'eje:

Melchizedek priest jiadëhi

ja ëhi priest jianuohö ëhi jiemu javo'ajëjo.

⁷ Iae lesuro ave sa'are hijadevare evare uvadeje: God ajemegö bogo guomevo'iröhohö iae eni hö uvoromo darugo'o uvë'i nivë'i ëninamiromo ua gavadeje ajamijëro. Iesuro God-hu nimajohö ma-u'emu ejahonövë'ëro ëhuni God-ro hesi jöho ejahadeje. ⁸ Hu God-are Harihe jiadëje röhu vi'ehe baeromo ëhuro God-are jö ejahö'iröhe örohö gavadeje. ⁹ God ejahö'iröhe örohö ganugoromo eni romorome jiamu evare örohö jiovahuadeje ëhuro ae rahu hesi jö ejahë'ohö ma-ioro'ioremu maro raromoröhego. ¹⁰ O God-ro jöe majahiromo Iesu uavadeje: Ja priest börömo javajëjo. Melchizedek priest jiadëhi ja ëhi javanovajëjo.

Noehu Iesu uehorovaruoho bogo vuonugo'iröhe jöhoje.

¹¹ Melchizedek-are jöho aho'obêhe majêhi'irodoho jeve. Röhu jemesi simanoho i'u'eje. Na diehi diehi jöho røjêhi'ejo. ¹² Jemê Christian vaejarijoho majae êgobövie baejê'e jêve. Êhuni jemêro ae gö jö røjêhi'irarijoho eni jêvo'ibejo iae mae jio'ibejo. Röhu jöho bogo avoho baejê'ëro jemê nimarujeje God-are jö aevo'i røjêhijamu hejarijoho aëro röhu maho røjêhijöro. Jemê amure asisö'oho va'êne jêvanove. Biriri'e i ma bogo ue'aharuje aribövie jêve. ¹³ Amemu ue'ahê'e Christian aribövioho ma-asisö'oho va'ênëro jêvê'ëro mu ma hesi jöho bogo ömo gavê'ejö. ¹⁴ A'i biriri'e i maho hesi a ma'ëremu ue'ahoruomajeje. Êhi jiê'e Christian ariböviohuro mami'e muoho ömo garomo simanoho avoho uehorovobe rovê'ëro êhu'ëro gavarujeje di muoho mae jiego di muoho sisê jiego.

6

¹ Asisö'ehu uehorovaruêhi êhi uehorovaruje jêvaje êhuni ê'ego no Keriso-are jö samaho samaho urimo hejaroho bogo êhemuoho uehorovo'i a'i hesi jöho i'e gö'o gö'o döre uehorovobe va'i êhuro a duvahuje uehorovaruêhi êhi uehorovo'iröhe. Christian mu vae'iröhe jö aevoromo ae røjêhijaruoho bogo êhemuoho jemesi öriroho røjêhi'i ari'ejo. Mu sisê vaeromo sisêrëjaruoho vuonugo'iröhe jö hesi bêhoho God ma uehorovarue jö hesi bêhoho ² sisê jovehu u'ovarue jö hesi bêhoho övo simano taemarue jö hesi bêhoho ijönö vuovoromo ri'ö'iröhe jö hesi bêhoho mana mae o sisê God-aro ioro'ioremu bae'iröhe jö hesi bêhoho êhi jiê'e jö urimo røjêhijaruoho bogo ê jöe gemuohemu røjêhi'i ari'ejo. ³ A'i God-hu nimê'oho jö i'e gö gö uehorovobe va'ejo a duvaho va'êne javuojöro.

⁴ O aehu urimo God-are nuni aji'e jö baeromo ö'idö hesi suvuoro garomo God-are Aru'aho no'lo gemu mae baeromo ⁵ hesi jö ma heromo vuêvëvamu ijönö bae'iröhe darugoho gö avevejê'e baebe va'ojuvo ⁶ röhu huotorovoromo Keriso uehorovaruoho vuonugo barêjê'oho êhi jiê'oho no diehi'oromo ajêmi'ejo jabumê röhu maho sisêho vuonugo'i huotorovoromo mae uehorovo'iröhego. Öre bogoje. Rabêni êhi jiê'e aribövioho jabesi dê vövöbajo'ere sisê'i uehorovaruohuro êhuro God-are Harihoho korosire röhu maho ano taemanovoruomajeje. Ano taemanovoromo êhuro Iesuare ihoho a nuniro ijumoruomajeje.

⁷ God-are huê mae baebe va'ojuvo Keriso vuonugo'iröhe jöho naro uhunö'e i'ö mu'ero bamo'ejo. Ênëro mure rue'i hiromu sa'ae sanuovego êhuro iruno'e bövie bise'e ri'amego mu arijo'oho jaburo mabêhe gagovo bahuromajeje. Êhi jiê'e i'ö mu'oho God-ro avoho muebe'iramu ma-mabêhe jio'ê'e. ⁸ Ö ênehu mure rue'i hijamu röhu mure ma-bibê'e resu resu sisêhuremu ri'amê'oho uvarujeje: Êi'ö mu'oho sisê höjo. Êhi'ego God-ro i'ö mu'oho ma-sisê'i avoho hesije vëniro bue'öromo ijumo barê nahonahovo'iröhëro.

⁹ Nasi aganomê iae na êhi jiê'e jögoroho uhu'e majêhijê'e jeve. Röhu na uehoro mae baeromo uve: Jemê bogo êhioho jêvajejo. Iae aji maho baejê'ëro God'ö maro raromo hesi jêvajejo. ¹⁰ God bogo sisê'ioho uehorovajeje. Jemêhu mu ma vaejarijoho hu bogo rumonimo'ê'e. Ö jemêhu hesi örire uehorovoromo hesi aribövi ajêmijarijoho röhu jaruvohu'ö êhi gemuoho ajêmijaruoho êhu'ö bogo rumonimo'ê'e. ¹¹ Röhu na negajoho jemê ae gemu gemu jemêhu God-are muemu nimo avoharujêhi êhi gemuoho nimo avohobe va'ojuvo hujeji maja viture jemê nimoromo muebejarujoho bae'a'aruje. ¹² Ö jemêhu God-are jö uehorovarujo u'uhêvo'iröhoho na bijönege. A'i na nege a ioro'iorehu biririvoromo God mae uehorovoromo êhuro huhu ajêmi'i uêvadoho biroharuêhi jemê'ö jabesi muoho gavê'i êhi ê'irarijeho.

God-hu ajamui'iröhëro mae uövuade jö noehu biririvoromo mae uehorovo'iröhe jöhoje.

¹³ Iae God-ro Abraham ajami'i uavadeje. Röhu bogo ma-ua'i a'i darugo'e jöho majahiromo êhi mae uavadeje. Ae gö God iosiramiromo börömo jiê'oho bogojiadeje God-hu ê a hesi iho uvoromo darugo'e jö majahi'iröhoho. Êhu'ëro jiê'ëro hesi ihoho uvoromo êhuro hesi darugo'e jöho majahiromo ¹⁴ Abraham uavadeje: Iae naro jasi örire mae vaejavoromo a uje aho'obêhe bojamibe va'ejöjo. ¹⁵ Bojamibe va'ejöjamu Abraham-ro heromo biririvoromo uvo'i hinövdajeje: Na iae bae'ejö uvoromo God-hu uavade ujoho

iae birohadeje. ¹⁶ Sa'are aribövi noehu darugo'e jö majëhijë'oho ae gö hesi ihehu nosi iho iosiramuiromo hu börömo jiaje ë a hesi ihoho uvoromo darugo'e jöho majëhiromo ëhuro mae uëvarueje. Èhi ë'ë'oho aho bogo ijönöho ë jöho aho uó'ë'ö. ¹⁷ O God-ro nimadeje hu ajamui'i uövuade aribövioho røjahujjego noro garomo uvoröhego: Iae mae-ëjo. God-ro ajamui'i nimadoho bogo vuonugo'ajë uvoröhego. God-ro ëhi nimoromo hesi iho uvadohuro ëhuro darugo'e jöho Abraham majahijadeje. ¹⁸ Èhu'ëro jii'ëro God-hu ajami'i uvade jöhu'o hesi iho uvoromo darugo'o uvade jöhu'o ë jöe nió'ioho bogo sisëre'ë'e. Èjöho God bogo sareramui'ë'e. Èhuni nomëro mami'e huruomoromo God-are burure va'ë'ëro uvo'ejo: God jö maemu jövajëromomo ëhuro uehoromae bae avohoromo birivoromo uvo'ejo: Iae huro uövuadëhi iae ëhi maro ramuo'ajëjo. ¹⁹ Hisiehu munë beromo e'u derire ba'amego vanagi ma'eneho namijajëhi huhu maro ramuo'iröhe jöho noro uehorovoromo nosi dë vövöbajo'oho birivoromo riravarueje. Iae uvarueje: God'o nosi ririre urahadoho Iesuro niögunö'e babu'öromomo God-hu jiajire nosi sisë'ë avohahuo'i va'o hijë'ëro jii'ëro iae ëhuni huro ijönö maro bamavuo'ajë uvoromo ëhuro bibivoromo riravarueje. ²⁰ Iae God-hu jiajire Iesuro nosi jöëni urimo va'ë'eje. Hu priest böröme vaejë'eje. Priest böröme vaejë'ëro Melchizedek priest jiadëhi hu ëhi priest jiajoho ëhi jiemu jio'ë'e.

7

Priest hesi ihe Melchizedek-are jöhoje.

¹ Melchizedek hu Salem amore böröme naminövade ae jiadeje. O göho hu God dö mare hijaje hesi priest böröme jiadeje. Abraham-ro a masijohu'o muorovoromo muo'amonugoromo rovamü gagorovo Melchizedek-ro hu birohoro muë mae hi'iröhe jöho bojamadeje. ² Bojamamu Abraham-ro ujuoho rovade inömo inömo aho'obëhe mevoromo hue aho'o 10 bahiromo 9-ho hesi bahi'i gemu God-are suvuoro maho Melchizedek mamadeje. Röhu Melchizedek-are iho huotövë'oho ëho aji'e mu ma muebejaje a börömo hoje. O hesi amo ihe Salem hu ë amo hesi a börömo hoje. Salem amo hesi a börömo jiade ë jö hesi bëhi huotövë'oho huë baerovarue mu muebejaje a börömo hoje. Melchizedek ëhi jii'ë a böröme jiadeje. ³ Hesi vëmu vavu'e hijo miono'e jabesi jöho bogoje. Hu rahade guomade maja hesi jöho bogoje. Èhu'ëro God-are Harihe hu ioro'ioyemu priest jiemu jiajëhi Melchizedek ëhi jianove.

⁴ Jemë'o uehorovore. Melchizedek hu a böröme jiadeje. Èhesi bëhoho Abraham hu Israel rajo nosi ni'i'ivade bëhoho jiadeje röhu muorovoromo ujuoho rovade inömo hoje mevoromo hue 10 bahiromo God-are suvuoro maho gemu Melchizedek-are örire mamadeje. Abraham-ro God-are suvuoro maho Melchizedek mamijë'ëro ëhu'ëro no garomo uvarueje: Melchizedek-ro Abraham iosiramioromo börömo mae jiade höjo. ⁵ O Abraham-are uje gemu Levi jiadeje. Levi-are ado sirino'e jiohe rovaje priest-oho jaburo God-are jögoroho ejahoromo Israel rajo aribövi ioro'ioy jabesi örire God-are suvuoro maho ujuoharueje. Priest-ehu suvuoro ujuoho'ia'amu gavë'iroho Israel rajo ioro'ioyhuro jabesi inömo inöme mevoromo hue aho'o 10 bahi'amego priest-ohuro God-are suvuoro maho gemu baeruomajeje. Levi rajo priest-ohuro jabesi sa'a rajo jabesi örire suvoroho ëhi baeruomajeje. Jabesi sa'a rajoho jabu'o Abraham-are agane gemuho jioruome röhu jabesi örire ëhi jii'ë suvoroho baeruomajeje. ⁶ A'i Melchizedek bogo Levi rajo aganoho jiadeje röhu huro Abraham-are örire God-are suvuoro maho baejadeje. Baeromo huë mae hi'iröhe jöho Abraham majahijadeje. Abraham hu God-ro ajami'iröhe jöho majahijamu hejë'ëro ëhu'ëro iae hu huë mabëhe birohë'e jiadeje röhu Melchizedek-ro Abraham-are örire huë mae hi'iröhe jöho majahijadeje. ⁷ Röhu huë mae raromo'iröhe jö heruomaje aribövioho ma-jianovo'i a'i ëhi jii'ë huë mae jö majëhijarue aribövioho masije jio'amajeje. Èhi jiajoho iae no ae aho'obëhe gavarueje. Èhuni Melchizedek-ro Abraham-hu huë mae hi'iröhe jöho majahijë'ëro ëhu'ëro no gavö Melchizedek-ro Abraham iosiramioromo börömo hoje jii'ë jio'ëgo. ⁸ O Levi rajo priest ömo'öme God-are suvuoro ujuoharuo ho jabumë vuovarueje. A'i Melchizedek suvuoro ujuohadoho ë a hesi jöho God-are surire uvë'eje:

Hu iae hijajëjo. ⁹ Iae Levi-are ujo ömo'ömhuro God-are suvuoro maho ujuoharueje röhu Abraham-hu Melchizedek God-are suvuoro bojamadevare Levi hu'o ë suvuoroho Melchizedek bojamanovadeje. ¹⁰ Èhesi bëhoho Levi hu bogo rahë'e hesi hije Abraham-are visëro jië'iro evare majare Melchizedek-ro Abraham birohadeje.

¹¹ Röhu Levi rajo ae Aaron'o hesi ujohu'o Jew rajo jabesi jögoroho muebenövareje. Muebejaroho jabesi muohuro ioro'iore gemu ae ajëmi'ibejo priest göho bogo rue'ibejo. Röhu jemë'o uehorovore. Jabesi muoho bogo eni jië'ëro ëhuni God-ro priest i'e gö baejadeje. Bogo Aaron-are ujo va'ëne priest-oho bae'i a'i Melchizedek jiade ëhi jië'e priest-oho baejadeje. ¹² Levi rajo priest-oho vuonugo'amo'i priest i'e gö baejë'ëro ëhu'ëro jabuhu muebejare jögoroho ëhu'o vuonugo'i jögoru i'e rovë'eje. ¹³ Röhu nosi Bada Melchizedek va'ëne priest jioröhe hesi jö God-are surire jajivaroho ë aho bogo Levi rajo aehu jio'i hesi ae gö jiadeje hesi aganoho priest muoho bogo vaeromo God-are suvuoro bahijarue maratuocho bogo muebenövä'ëro. ¹⁴ No ae aho'o gavarueje nosi Badare agano ihoho Judah rajemu jio'amego. Röhu Moses-hu priest mu jö jövadiroho hu bogo uvadeje: Judah rajëro ë muoho vae'a'aruëjo.

Iesu Melchizedek va'ëne priest jiaje jöhoje.

¹⁵ Röhu priest gö Iesu Melchizedek priest jiadëhi jië'e priest-oho iae rovë'eje. Èhu'ëro iae no ma-samae gavarueje priest mamiohu'o jögoru mamiohu'o barë'i i'e rovë'e jiego. ¹⁶ Èi'o rovide priest-oho hu bogo vavuehu mu vaejade siono harihehu baeröhe ë hesi jögoroho ejë'ëro bogo ëhuro priest muoho bae'i a'i ioro'ioemu hi'iröhe darugoho baejë'ëro ëhu'ëro priest muoho baejadeje. ¹⁷ Èioro'ioemu hi'iröhe jöho God-are surire jajivoromo uövuë'eje: Melchizedek priest jiadëhi ja ëhi priest jianuoho ëhi jiemu javo'ajëjo. ¹⁸ Urimore jionövade jögoroho u'uhë'ëro jië'ëro ëhu'ëro bogo maho ajamuinövadeje. Èhuni God-ro ë jögoru hesi öroho tugohadeje. ¹⁹ Èhesi bëhoho ë jögoroho bogo ae gemu vadu'oho ajamui'ego ioro'ioemu maroho javuonövadeje. A'i God-ro öri i'e jiovahuë'eje. Èöri i'ohuro öri mamioho iosiramiromo ma-mabëhe jië'eje. Èöri i'o hesi bëhoho no nimorohë'i uvarueje: Iae God-ro ajamui'iramu maro raromo'ejarëjo. Èuehoro mabëhoho javuë'ëro God-are bëhire va'arueje.

²⁰ Röhu God-ro Iesu priest muroho bogo ëma bamo'i a'i darugo'e jöho uvoromo bamadeje. Urimoho Levi rajo priest mu bojëmi'ie'iroho aho bogo ëhi jië'e darugo'e jöho uvoromo muoho bojëminövareje. ²¹ A'i Iesuro priest muoho bae'ia'amu God-ro darugo'e jöho uvoromo bamadeje. Èjöho God-are surire jajivoromo uvë'eje:

God Badaro ave jöho darugo'o uvë'ëro
bogo vuonugo hesi höjo:

Ja priest jianuoho ëhi jiemu javo'ajëjo.

²² Iesuro priest mamioho iosirëmi'jë'ëro ëhu'ëro God-hu muebejavuoröhe jögoru Iesuhu ma'enaje ë jögorohuro jögoru mamioho iosiramiromo ma-mabëheje.

²³ Röhu göho Levi rajo priest-oho aho'obëhe jio'amobe rovë'eje rabëni hesi bëhoho vuovëvobe rue'ego muoho bogo ma-biririvoromo vaemu vaenövë'ëro. ²⁴ A'i Iesuro ma-ioro'ioemu biririvoromo hijajëro jië'ëro ëhu'ëro a göho hesi sionoho bogo bae'i huro priest muoho ma-vaemu vaebe va'o hesije. ²⁵ Iesu priest muoho ma-vaemu vaebe va'o hesirëro jië'ëro ëhu'ëro ae rahu hesi ihore God-are bëhire va'ë'oho Iesuhu baejavuoromo ma-ioro'ioemu mare ramu'iröhoho hu eni jie rabëni hu bogo guomo'i majae ëhi biririvoromo hiromo nosi jöëni God-are örire jöe majahijajëro jië'ëro.

²⁶ Èhi jië'e priest börömhuro iae mae ajamuajeje. Hu sisë rumo'ëro jië'ëro hu a ma-maeje. Aribövi sisëho öre gö jio'amo'i hu öre göje. Huro ajiomoromo sa'ae ö'idöe iosirami'amoromo ajio dö maro hijë'eje. ²⁷ Levi rajo priest masijehu ë'onövarëhioho Iesuhu ëhi ë'iröhoho bogoje. Majae ëhi Levi rajo priest-oho jaburo God-are örire mi suvuoroho i'imami'i arinövareje. Urimoho jabesi sisëhuni i'imaminugoromo ijoroho God-are aribövi ioro'ioro jabesi sisëhuni mi suvuoroho i'imami'i arinövareje. Iesu bogo ëhioho ë'i a'i hesi arjo'arje God-are örire bojamirovoromo guomorövë'ëro ëhu'ëro hesi

suvuoroho majae gemu ma-ioro'iolemu bojamirovadeje. ²⁸ Moses-hu bojëmade jögoru hesi uhuroho ma-u'uhë'e aemu priest masije bamobe rovë'eje. A'i ë jögoru hesi ijono God-ro darugo'e jöho uvoromo hesi Hariho bamadeje priest börome jioröhego. ÈHariho bogo u'uhë'oho jio'i mue aho'o romoromoro ma-ioro'iole gemu bae barëjë'eje.

8

Iesu hu nosi priest böromo jiaje jöhoje.

¹ Na jajivobe rovode jö hesi bëhoho aviëhije. Naehu jajivode ëhi jië'e priest böromoho javue. Hu ö'idöre ajiomoromo God eni jië'e aehu börome namijaje a hesi övo manö hijë'eje.

² God-hu jiajire osa hesi muoho vaejajeje. Èhesi bëhoho huro God-are javu hesi priest muoho vaejajeje. Èjavuoho bogo maja aru'aho va'ëne amoho jianovo'i a'i God-are javu maeje. Bogo ma-aehu avoho'i Badaro avohë'eje. Èosa hesi muoho nosi priest böromohuro vaejajeje.

³ Amo priest masije aho'o muro bahijarue hesi bëhoho jaburo mi suvuore övo suvuore gö gö God bojami'iröhego. Èhuni priest muro bahijarueje. Jabesi muoho ëhi jië'ëro nosi priest böromohu'o övo suvuore jio'ë'e God bojami'iröhego. ⁴Röhu Iesu sa'are hi'ibejo bogo priest-oho jio'ibejo ë hesi bëhoho hesi Levi rajo priest-ëremu ë muoho vaeromo Jew rajo jögorure jajivare suvuoroho God-are örire bojamijaruëro jië'ëro. ⁵ O Levi rajo priest mu vaejaruoho ëho ö'idöre jiaje muoho va'ëneje. Èmuoho ma-aruhonö'e jio'i bogo mahoje. Aviëhi jianove. Moses-ro God-are niögu javuoho avoho'ia'amu evare God-ro uvadeje: Gavë'iajo. Ja'o na'o dahorure ariromo naehu röjahijamu hejanëhi bövie bise'e ëhi vaenëjo. Amo priest ömo'ömhuro ëhi ö'idöre jiaje mu va'ëne vaejarueje. ⁶ A'i Iesuhu baejade priest muohuro Levi rajo priest jabesi muoho iosiramiromo böromohoje. Èhesi bëhoho Iesuro priest böromëro jië'ëro God'o no ae aho'obëhe nosi ririre namiromo öroho avohahuoromo God-hu muebejavuoröhe jögoroho avohahuajeje. Èjögöru Iesuhu avohahuajohuro Levi rajo priest jabesi jögoroho iosiramiromo mahoje. Èhesi bëhoho Levi rajehu muebejarue jögoru God-hu Jew rajo aevo'i bojëmadevare evare ma-bisemu ajëmi'i uvadeje. A'i Iesuhu avohahuaje jögoru God-hu aevo'i bojamuadevare evare börome ajamui'i uvadeje. Èhu'ëro Iesuare jögorohuro Levi rajo jabesi jögoroho iosiramijë'eje.

⁷ Levi rajo priest-ehu muebejare jögoru urimo bojamuijadoho eni jio'ibejo God jögoru göho bogo bamo'i uehorovo'ibejo ajamui'iröhëni. Bëhoho bogojio'ibejo. ⁸ Röhu God-hu jövade jö hesi aribövi bogo eni jioruomaje jöho hesi surire jajivoromo ëhi uvë'eje:

Badaro ëhi uvajëjo: Iae majae ijonoho nasi aribövi muebejëvo'irode jögoru i'oho avohoromo

Israel rajohu'o Judah rajohu'o mëmi'ejöjo.

⁹ Mami'e jabesi hijo miono'o muebejëvo'irode jögoru mëmodëhioho bogo ëhi jië'e jögoroho mëmi'ejöjo.

Jabesi hijo miono'e Egypt sa'are jëvamu naehu söjëgo rovodevare evare majare jögoroho mëmode höjo.

Mëmamu jaburo jögoroho bogo birivoromo ejeho'i vuonugare höjo.

Èhuni naro jabumë bogo gëvanovode höjo. Badaro ëhi uvajëjo.

¹⁰ Röhu Badaro uvajëjo: Èmajaho barë'iramu aviëhi jië'e jögoroho Israel rajoho mëmi'ejöjo. Naehu nimaje ëhi ëhi ë'onövo'iröhe jöho jabesi simanore ba'amëho'iramu uehorovoruo-mo'ajëjo.

Jabesi dë vövöbajore jajivëho'iramu ejehoruomo'ajëjo.

Èhi'o'iramu jabumë muebejëvo'irode böromoho jevo'ajëjo.

Jabumë nasi aribövi mae jioruomo'ajëjo.

¹¹ Amo rajëro göëro göho bogo röjahirovoromo

aganëro göëro göho bogo majahirovoromo uarovo'aruëjo: Bada avoho gahëjo.

A ininore ëhi va'o a masijore aho'obëhe na ge'a'aruëjo.

¹² Jabuhu sisë vaejaruoho naro jabumëni vavaenimoromo

jabesi sisêho ma-ioro'ioeremu uehorovoromo vuonugêho'ejôjo.

¹³ Ëjôgoroho i'e hõ uvade hesi bêhoho urimore bojamuade jôgoroho iae mamiraejê'eje. Rôhu jõe rabe mamiraeromo sisêrêbe va'ajoho êho ma-burêro barê'iê'e.

9

Jew rajo a mami priest masijehu God-are ôrîre mi kõ suvuoro bojaminôvare jôhoje.

¹ Ëurimore jôgoru hesi uhuroho God rajahi'irôhe ôri hesi jôho jîadeje. O sa'are vaejare javuoho jîadeje God ê rajahi'irôhoho. ² Ëjavuoho niôgêro vaejareje. Ëosa gagoho rîrîro iromo tariojamu osae niô'li jêvadeje. Viênôrîre osaroho iro bahijarue gîjoho maratuoho maratu dôre bahijare God-are ioho êhi jîo'amonôvadeje. Ëosa hesi ihoho God-are osa maho jîadeje. ³ Niôgêhu iromo tugohê'e ê hesi ruênôrîre osa gô hesi ihoho God-hu jîaje osaho jîadeje. ⁴ Ëosa'eroho ridi'e oso buejarue maratue gold-ehu avoharoho o God-are jôgoru bamare mauaho ê inômo niô'ioho ê dirô'ore jêvadeje. Ëmauaho hesi sinoroho gold-êro ruê numê havo rova'oromo taemo titimê'e jîadeje. Ëmaua gagoroho gold'e ramaho God-hu i'imêmade ie gô hesi ihoho manna aegê'oho ê jîadeje. Gôho Aaron-are ijaho sirinohijadoho maua gagore jîadeje. Gôho munê ha'osire God-are jôgoru jajivo'amadoho maua gagore jîadeje. Ëinômoho niô'li gemu maua gagore jîo'amadeje. ⁵ O maua dönôho vivoju'e majo va'êne aehu avoharohuro rîrarovareje. Ëinôme niô'li jabesi bêhoho uvoromo ê'areje: God-are ajoho aviae hõjo. Rôhu nume maua dôho God-hu sisê mu'unôvadoho jîadeje. Ëdirô'oho majo va'êne jabesi vivojohuro aegahareje. Ëinômo jabesi jôho naro mabîsemu jôvê'êro vituoho vuonuge.

⁶ Ëinômoho aho'obêhe ê avoho bahijê'ego evare priest arîbôvîohuro viênôrîre osare aevoromo majae êhi va'oromo God-are muoho vae'li arinôvareje. ⁷ A'li ruênôrîre osaroho hesi ma-priest bôrômohuremu vadune gemu hesi uhure majae gemu rumo va'onôvadeje. Rumo va'iê'iroho bogo ôvemuoho va'li a'li mi kõho baeromo ê osare rumo va'oromo God-are ôrîre bojaminôvadeje. Hesi sisê hesi jôhuni bojamiromo a ioro'ioro jabesi sisêhu'o rôromo êhuni bojaminôvadeje. ⁸ Hesi ma-priest bôrômohuremu ruênôrîre God-hu jîaje osare va'ê'êro jîê'êro êhu'êro God-are Aru'ahohuro ma-sama'e rôjahuijajeje noro garomo uvorôhego: Viênônîre osa hesi mu jîadevaroho evaroho God-hu jîajîre va'orôhe ojoho bogo jiovahuê'e jîade hõjo u'emu jiovahuorôhêro. ⁹ God-hu ê niôgu javuohu'o ê javu hesi muohu'o bamade hesi bêhoho jaruvo noehu God uehorovarue mu maho êho maja aru'ahonô'e rôjahui'iro êhuni bamadeje. Ëosaroho mi suvuore o suvuore gô gô God i'imaminôvareje. God-ni êhi vaenôvareje rôhu bogo êhuro herovonôvareje jabesi dê vövôbajo'ere sisêho barêjêho'ego. ¹⁰ Êhi jîê'e suorovo hesi bêhoho ma-i ijaruvoho jovo ijaruvoho jovo eguaruvoho inômo u'o'amaruvoho êhi jîê'e jôhuremu jionôvadeje. Ma-dajo hesi jôhemu God-ro ma-jahuri bamadeje êhuro êhi jîobe va'ojuvo hujeji hesi mu ôri mami tugohô'li Keriso-are mu i'lo jiovahuo'irôhe majaho ruerôhego.

Iesuhu hesi kõ God-are ôrîre suvuoro bojamade jôhoje.

¹¹ Jaruvoho Keriso rovê'eje. Hu priest bôrômohuro jîê'êro avejê'ê'e hesi mu maho vaejajeje. Urîmoho ma-aehu niôgu javu bôrômo vaejarîre priest masîjohuro ê rumo va'oromo muoho vaenôvareje. Avejê'ê'oho Keriso bogo êhi jîê'e javuoroho rumo va'ê'êro muoho vae'li a'li javu ma-mabêhire rumo va'ê'êro muoho vaejajeje. Ëjavu mabêhoho bogo aho vaejê'êro êhu'êro God-hu bôvi bîse'o bamade noehu ga'amaruvoho gô jîo'amo'li ê javuoho hesi ahe gôje. Êhu'êro ê javuohuro javu mamîoho iosiramîromo bôrômo mahoje. ¹² Kerîsoro ê javu bôrômoro va'oromo muoho vae'irôgoro bogo goat hesi kõho o cow harihu hesi kõho baeromo ê osaroho va'adeje God-ni bamahorôhêro. A'li hesi kõ maho baeromo osare va'oromo evare God jîajîre ma-ioro'iore gemu va'oromo no baejavuoromo ma-ioro'ioeremu maro ramuadeje. ¹³ Rôhu Jew rajehu jabesi sinore sisê baeromo êhuro God bogo avoho rajahi'iê'iroho priest-êro goat hesi kõho o ano'e cow hesi kõho baeromo hijîiovodêgonôvareje. O cow harihu hesi muomôho jovohu'o buarohoromo baeromo hijîiovodêgonôvareje. Hijîiovodêgo'ego jabesi dajore jîaje sisêho barê'ego êhuro God-are

örire rajahijë'oho iae mae jëvonövadeje. ¹⁴Mi köehu rabehu hijiovodëgo'ego dajore jiaje sisë u'o'amonövaroho ma-jianovo'i a'i Keriso-are kö rovadoho ëho mu börömo mahoje. Ëmu hesi bëhoho Kerisoro ioro'ioeremu jiaje Aru'aho hesi darugohuro biririvoromo hesi dajoho God-are örire bojamirovoromo guomorovadeje. Hu mu sisëho bogo vaejë'ëro ëhu'ëro huro suvuoro mabëhe vaeromo hesi arijo'arije bojamirovadeje. Bojamirovamu köho rovë'ëro ëhu'ëro mu sisë vaeromo nosi dë vövöbajo'o ijumorovaruoho u'ovahuo'iramu herovo'ejo sisëho barëjahuo'iramu. Sisëho barëjahuo'iramu ëhuro God mae hijaje a hesi muoho noro avoho vaenövo'ejo.

Iesu kö rueromo guomë'ëro ëhuro God-hu muebejavuo'iröhe jögoru i'o marëjade jöhoje.

¹⁵Ëhuni Kerisoro God'o nosi ririre jioromo God-hu hesi aribövi muebejavuo'iröhe jögoru i'o hesi öroho avohahuajeje. Jögoru i'o hesi öri avohahuaje hesi bëhoho ëhuro God-hu hesinö uövuade aribövioho noro ioro'ioeremu jioröhe mu mae gö gö Vavu hesi örire bae'amoröhego huro bojamui'i uövuë'ëro ëhuni avohahuajeje. Mu mae baeröhe hesi öroho aviëhije. Keriso guomadeje. Guomamu ëhuro noehu jögoru mami hesi uhure raromoromo mu sisë vaebe rovare ë hesi jö sisëho iae u'ovahuo barëjë'eje. Sisëho u'ovahuo barëjë'ëro ëhu'ëro Vavuehu bojamui'i uövuade mu maho no baejarueje.

¹⁶Keriso guomë'ëro noehu mu ma baejarue jöho uhunö'e bamo'ejo ga'irarijego. Ave sa'are vavu ömo'ömhuro vuovego rahuhu inömo ujuoho'iröhe jöho surire jajivoruomajeje. A'i jabesi aboji harihu'ehu bövi bise'o ujuoho'ie'iroho ae aho'obëhe garöhe vavuohe vuovo'iramu bövioho bise'oho evare ujuoho'ë'ö. O bogo vuovë'iroho bogo ujuoho'ë'ö. ¹⁷Vavu bogo vuovo'i raromë'oho jabuhu jajivare jögoroho ëhi ma-momorö'öjajeje. A'i vuovëvego evare vavuehu uvoruomadëhi ëhi ujuoharueje. ¹⁸Ëhesi bëhoho God-hu Jew rajo muebejëvonövo'iröhe urimore jögoroho bogo ëma jio'i urimo mioho bijuëmamu vuovoromo köho rovamu evare God-ro aevoromo Jew rajo aribövioho avoho muebejëvadeje. O mioho bogo muo'amego ëhuro köho bogo rue'ibejo ë jögoroho bogojio'ibejo. Jew rajo aribövioho God-are ahariroho bogo raromo'ibejo. ¹⁹A'i God-hu Jew rajo muebejëvo'iröhe jö hesi muoho Moses-ro avoho'irögoro jögoru jöho ae aho'obëhe majëhi barënugoromo evare cow harihu jabesi köho baeromo jovohu'u'o buarohoromo sheep hesi u kavuë'e avoharoho ujuohoromo hyssop ahore huhohoromo ë kö'o jovo'o buaroharire sheep uoho ë i'o'amadeje rumorovoröhego. Rumorovamu ioromo jögoru jajivo'amade suri suriohu'o ë ariböviohu'o kö'e jovohuro hijiovodëgadeje. ²⁰Hijiovodëgoromo uëvadeje: Ave hijiovodëgaje köhuro ëhuro God-hu bojëmë'ëro ejaho'irarije jögoroho marëjajëjo. ²¹Ëhi majëhiromo God-are javu börömo niögehu vaejarohu'o God rajahi'amarue inömo inö-mohu'o aho'obëhe ë köhuro hijiovodivo'amadeje. Ëhi'adeje. ²²Iae Moses-are jögoru hesi uhuroho aëro köho baeromo bövie bise'e u'o'amo'ego ëhuro ë inömo hesi sisëho barënvadeje. Inöme ma-gemu gemu bogo ëhioho ë'onövareje. O aehu mu sisë vaejë'iroho mi muo'amamu kö rovë'ohuro ëhuro God-ro mu sisëho uehorovoromo vuonugonövadeje. O mi bogo muo'amamu kö bogo rovë'oho jabesi sisëho bogo barëjëhonövadeje.

Iesu kö rueromo guomë'ëro ëhuro nosi sisë u'ovahuaje jöhoje.

²³ËGod rajahijarue inömo inömo ho ma-maja aru'ahemu sa'are jio'amadöho ëho jabesi sisëho mi köëremu u'o'amonövareje. Öre gö bogojideje. Röhu ë inömo inömo ho ö'idöre inömo ma röjahuijajoho jianovadeje. O ö'idöre inömo maho ma-mi köëremu u'o'iröhoho bogo eni jie. Mi kö God-are örire suvuoro bojami'iröhoho bogo eni jio'i a'i suvuoro göehu ë mi suvuoro iosiramiroho ma-mabëhe jië'oho ëhuro ö'idöre inömo ma jabesi sisëho u'o'iröhoho eni jie. ²⁴Ësuvuoro mabëhi hesi bëhoho ö'idöre God-hu jiaje öri ari'va va'ëne ma-aehu vaejare osaroho Keriso ëho bogo rumo va'i a'i God-hu jiaje ö'idö mare va'adeje. Ö'idöre va'ë'ëro God-are nunire hiromo nosi muoho avohahuajeje. ²⁵Röhu Jew rajo priest börömhuro bogo hesi köho bae'i mi köe baeromo God-hu jiaje osare vadune göro göro va'i hinövadeje. Röhu Keriso bogo ëhioho ë'adeje. Ö'idöre va'adevaroho majae gö gö God-are öriroho suvuoroho bogo bojamirovoromo guomorovo'i hiröhëro bogo ëhunioho va'adeje. ²⁶God-are örire suvuore bojami'i hi'ibejo sa'a bövi bise'o bamadevare aevoromo

vi'ehe baebe ruel'ibejo. Röhu bogo ëhioho vi'ehoho baebe ruel'i a'i sa'ae bövie bise'e barë'i dunovamu gavë'i Kerisoro a nunire ioro'iore gemu rovë'eje God-are örire bojamirovoromo guomorovoromo nosi sisëho u'ovahuoröhëro. ²⁷ God-ro bamë'ëro no ae aho'obëhe ma-vae gemu vuovavuo'iröhohoje ijönö hesi nunire riravoröhëgo. ²⁸ Ae aho'obëhe ma-vae gemu vuovavuajëhi Keriso ëhi ma-vae gemu guomadeje. Hu ma-vae gemu suvuore bojamirovoromo guomorovadeje ae aho'obëhe nosi sisëho u'ovahuoröhëro. Ijönö röhu maho a nuniro vuonorö'ö rue'ë'e bogo mu sisëho avohahuo'i a'i hu rueröhëgo muebejarue aribövioho no baejavuoromo maro bamavuoröhëro.

10

Jew rajo a mami priest-hu mi bijuëmoromo God suvuoro bojami'ego ë suvuoro hesi darugoho bogo eni jië'ëro dë vövöbajo'ere sisë bogo u'ovëhonövade jöhoje.

¹ Röhu Jew rajo jögoru urimo jiadoho ëhuro God-are mu maho bövioho bise'oho no bogo avoho ga'i God-are mu maehu ijönö rovadoho ëho no ma-sisë'i sisë'i maja aru'ahonö'e gavarueje. Ehesi bëhoho aëro Jew rajo jögoroho ejëhoromo mioho vadune göro göro bijuëmoromo God-are örire ëhi jië'e suvuore gemuho i'imamiemu i'imamibe rovarueje. Röhu ëhi jië'e suvuoro ujuohoromo God-are bëhire va'i arijaruoho jabesi uhoho bogo mae bogo marëjëho'ë'e. ² EGod rajahijarue aribövi jabesi uhoho marëjëho'ibejo ëhuro jabumë herovo'ibejo jabesi dë vövöbajo'oho mae jëvavego mi bijuëmoromo God-are örire suvuoro i'imami'i arijaruoho vuonugo'ibejo. ³ Röhu bogo ëhioho jio'i a'i vadune göro göro mi bijuëmoromo God i'imamijaruohuro ëhuro jabesi sisëho vadune göro göro ëhi gemuho uehorovobe va'arueje ⁴ ë hesi bëhoho cow ano'o hesi köhu'o goat köhu'o mu sisë u'oröhoho bogo eni jië'ëro.

⁵ Mi köho bogo eni jië'ëgo ëhuni Kerisoro sa'are rue'irögoro God uavadeje: Mi bijuëmoromo jasi örire i'imamijë'oho ja bogo nimanue höjo.

A'i jero na sino haho'e avohevane höjo.

⁶ Mi bijuëmoromo jani vënire aho'o huo barëjë'oho o mu sisë u'o'iranego mi bijuëmoromo jasi örire suvuoro i'imamijë'oho ja bogo maho uehorovanue höjo.

⁷ Evare na uavode höjo: God na aviae jevajëjo.

Nasi jö jasi jögoru surire jajivarëhi

jaehu nimanue muoho ëhi vae'i abuejajëjo.

⁸ Ejö hesi bëhoho no uehorovo'ëjo. Urimo Kerisoro God uavade höjo: Mi bijuëmoromo suvuoro i'imami'i o mi jani vënire huo barë'i o mu sisë u'o'iranego mi bijuëmoromo jasi örire suvuoro i'imamijë'oho ëhi jië'oho ja bogo nimoromo bogo maho uehorovanue höjo. Bogo maho uehorovanue hö uavadoho Moses-hu bojëmijade jögoroho ejahoromo Jew rajoho jaburo ëhi jië'e mi suvuoroho God-are örire bojaminövareje. Röhu Kerisoro uavadeje: Ehi jië'e suvuoroho ja bogo nimanue höjo. ⁹ Röhu evare ijönö Kerisoro God uavade höjo: Na aviae jevajëjo. Jaehu nimanue muoho vae'i abuejajëjo. Ejö hesi bëhoho mi bijuëmoromo God-are örire i'imami'i arijare muoho God-ro aho'i Kerisohu bojamirovoromo guomorovo'iröhe muoho bamadeje. ¹⁰ God-ro ëhi jië'e muoho bamamu ëhuni Iesu Kerisoro God-are jöho ejahoromo hesi sino haho'oho ioro'iore gemu suvuore bojamirovoromo guomorovadeje. EGod-hu nimade muoho vaejë'ëro ëhu'ëro nosi sisëho u'ovahuë'eje.

Iesu kö rueromo guomamu ë suvuoro hesi darugoho eni jië'ëro sisë u'ovahuaje jöhoje.

¹¹ Ehi jie röhu Jew rajo priest-oho aho'o jaburo majae ëhi riravoromo God-are muoho vaejarueje. Mioho bijuëmoromo ëhi jië'e suvuore gemuho God-are örire i'imamibe va'arueje. Ehi ë'arueje röhu ëhi ë'i arijaruoho ëhuro mu sisë u'o'iröhoho bogo mae bogo eni jëve. ¹² A'i Kerisoro vae gemu God-are örire suvuore bojamirovoromo guomorovadeje mu sisëho ioro'iore gemu u'ovahuoröhëro. Ehi'onugoromo ajiomoromo God-are övo manö hijadeje. ¹³ Hijë'ëro avevej'öho hiromo muebeje hu'o muorovarue aribövioho

God-ro hesi hörü uhunö bahijego vijuvo taemo'amö'iröhëro. ¹⁴ Èhesi bëhoho huro vae gemu God-are örire suvuore bojamirovoromo guomorovë'ëro êhu'ëro sisë u'ovahuë'e aribövioho no ioro'ioire gemu ma-maemu raromemu rarom'ëjo.

¹⁵ Noehu mae raromemu rarom'iröhe jöho God-are Aru'ahohu'o êhi gemuoho majahuiromo God-are surire uvë'eje:

¹⁶ Röhu Badaro uvajëjo: Êmajaho barë'iramu aviëhi jië'e jögoroho Israel aribövioho mëmi'ejöjo.

Naehu nimaje êhi êhi ë'onövo'iröhe jöho jabesi dë vövöbajo'ere ba'amëho'iramu ejehoruomo'ajëjo.

Jabesi simanore jajivëho'iramu uehorovoroomo'ajëjo.

¹⁷ Röhu ë jö hesi vituoho God-are Aru'ahohuro êhi uvë'eje: Jabuhu nasi jö ahoromo mu sisë vaejaruoho na ma-ioro'ioiremu uehorovoromo vuonugëho'ejöjo. ¹⁸ Èhi majahuiromo mu sisëho uehorovoromo vuonugë'ego êhu'ego ijönöho no suvuoroho God-are öriroho bogo bojami'ëjo huro mu sisëho u'ovahuoröhego.

Noehu God mae uehorovoromo hesi bëhire va'iröhe jöhoje.

¹⁹ Aganomë Iesuare köho rovë'ego no bogo juhuonivo'i biririvoromo God-hu jiajire va'arueje. ²⁰ Èhesi bëhoho Iesuro noni öri i'oho iogorahuë'eje huro bogo guomo'i hiromo ë söjavuo va'ego noro God-hu jiajire va'iröhego. Urimë'ioho God-hu jiaje osare rumo va'arue ojoho niögëro urahonövareje. Jaruvoho Iesuare sinoho ijumahamu guomamu niögu va'ëne urahade ojoho dadovoromo jiovahuë'ëro noro God-hu jiajire ë va'arueje. ²¹ Röhu göho nosi örire priest böröme jie. Huro God-are aganoho no muebejavuajeje. ²² Èhuni ë'ego no God-are bëhire va'oromo nosi jöho majahi'iro. Nosi dë vövöbajo'oho sisërëjavuoromo i'uhaguamu Keriso-are köhuro u'ovahuo'i nosi sino haho'oho ajivo barëj'e jovohuro u'ovahuë'e jiaje êhuni ë'ego no biririvoromo nosi dë vövöbajo'oho uhohu'o mae uehorovoromo God-are bëhire va'oromo jöho majahi'iro. ²³ O no ae huruoho majëhiromo uvarueje: Majae ijönö God-ro ajamui'ajëjo. È'ego no biririvoromo ë jöhuremu mae uehorovobe va'iro rabëni hesi bëhoho hu ajamui'i uövüadëhi iae hu êhi ë'ie'e jiaje. ²⁴ O ë'ego noro göëro göhuni uehorovoromo dë iahorovoromo êhuro ae huë bæjëvoromo mu mae vaenövo'iro. ²⁵ O ae göëhu göëhu God rajahi'i gemuore gagovoromo vuonugaruëhioho ë'ego no bogo êhioho ë'i a'i no ajamirovoromo jögore mamirovo'iro êhuro biririvo'iröhe. Èhesi bëhoho jemë'o gavarujeje Badare majaho rue hesi jiego gavarujohuni êhuni ë muoho avoho uehorovo'ëjo.

Noehu God-are Harihu bogo dejonö bamoröhe jöhoje.

²⁶ Noehu êhi ajamirovo'iröhe hesi bëhoho noehu Keriso-are jö ma baeromo röhu ijönö nosi nioromo biriri'övoromo mu sisëmu vaejë'iroho nosi sisë u'ovahuo'iröhe suvuore gö bogojio'i ²⁷ ma-i'u sisëhemu muebe'iröhohoje. God-ro a sisëho mevëvo'iramu hu'o muorovarue aribövioho vëni vöröro ravëvo'ë'e. ²⁸ Urimoho Moses-hu bojëmade jögoroho ae rahu ahoromo musisinö'e bu'öjamu ae niö'iehu o ae niö'i gemuehu ë a hesi sisë garomo huruoho majëhijë'oho hesi öriroho bogo vavaenimë'e ma-anonövareje. ²⁹ Moses-are jögoroho ahoromo êhi jië'e i'uhoho baenövareje. Èhuni ae rahu God-are Harihu sivë'oho ë iaho diehi jio'ë'e. O Harihu hesi köhuro êhuro God-are jögoru i'oho marëjadeje. Èhuro ë ia hesi sisë u'ovahadoho röhu huhu huutorovoromo uvë'oho: Èköho bëhi rumo'e hö uvë'oho ë iaho hu diehi jio'ë'e. O God-are Aru'ahuhu huë bæjavuaje hesi örire sisë vaejë'oho ë iaho diehi jio'ë'e. Moses-are jögoru ahare ariböviehu i'u börömo baeruomadoho êho majjanovo'i a'i êhi jië'e aho i'uhoho bogo bise'o vadu'oho bae'ë'e. Èhi jië'oho iae maeje. ³⁰ Ave jöho God-are surire jajivoromo uvë'eje: I'u bojëmi'irodoho êho nasi mue höjo. Naro i'ue mana bojëmi'ejöjo. Èjö jövade aho iae no gavö. O ave jöho jajivoromo uvë'eje: Badaro hesi aribövioho gëromo mevëvo'ajëjo. ³¹ Iae God darugo'e aëro jië'ëro huhu i'u bojamuamu bæjë'oho ë muoho juhuoni ma'ëje.

Noehu biririvoromo God mae uehorovo'iröhe jöhoje.

³² Röhu urimore majare jemëhu diehi ë'arijoho uehorovore. Keriso-are ajehu jemë aevoromo ajivëvadevare evare jemë huë vavaene bööröme baeromo sivohojuvo biririvarijeje. ³³ Majae göro jemë Keriso nimë'ëro aëro a nuniro jö sisë bu'ö'ego henövari-jeje. Mu sisë vaejëvo'ego ganövarijeje. Majae göro Christian a ioro'iorohuro ëhi jië'e huë vavaenoho bae'ego garomo jemëro jabu'o havoromo rabe rabe ajëminövarijeje. ³⁴ Christian ariböviehu savoji gagore raromarue jabesi örire huë vavaene baenövarijeje. O aehu jemesi mae sisë vajiohehu ujuohëho va'aroho jemë nimorohë'i uvonövarijeje: Èho iae mae höjo. Nosi inömo maho ö'idöre höjo ma-ioro'ioeremu bae'iröhoho. Èvajiohehu baejare inömo iosiramiro mo böörömo mae höjo. ³⁵ Èhuni Iesuare jö birivoromo mae uehorovarujoho nadi vuonugore. Biririvë'ohuro èhuro manaho ma-mabëhe bae'a'aruje. ³⁶ Jemëro u'urume vaenövore èhuro God-hu nimaje muoho vaeromo huhu bojëmi'i uëvade suvuoroho bae'irarije. ³⁷ Iae God-are surire jöho jajivoromo uvë'eje: Majae ma-bunemu barë'iramu evare rue'iröhe aho iae rue'a'ajëjo. Bogo örisanuovo'ajëjo.

³⁸ Röhu God nasi aribövi mahuro na mae uehorovevoromo èhuro birivoromo raromoruo-mo'ajëjo.

A'i ae rahu juhuonivo'i nasi öri vuonugë'oho na jabesi jöënioho bogo nimoroho vadë'ejëjo.

³⁹ Röhu nomë bogo juhuonivoromo Keriso-are mu vuonugo'i sisëre va'arue ariböviehu javuo'i a'i no God mae uehorovoromo maro va'arue aribövie javue.

11

Noehu God mae uehorovo'iröhe ë hesi bëhi hesi jöhoje.

¹ Mae uehorovarue hesi bëhoho aviëhije. Noehu mae uehorovë'iroho èhuro no birivoromo uvarueje: No ijönö maro raromo'iröhe jöho èho mae höjo. Rabe rabe jio'amaje noehu nunehu bogo ga'amaruoho iae jio'amajë uvarueje. ² Nosi a mamiehu God mae uehorovarohuro èhuro jabesi ihoho God-are nunire mae jëvadeje.

³ Noehu God-are jö mae uehorovaruhuro èhuro garomo uvarueje: God-ro jö'ëro jövamu èhuro ö'idörohu'o sa'arohu'o jiade höjo. Noehu nunehu bogo ga'amarue inömo God-ro ujuohoromo èhuro ga'amarue inömo inömo avoho'amade höjo.

A mami ae Abel Enoch Noah èho jabuhu God mae uehorovare jöhoje.

⁴ Iae Abel-ro God mae uehorovë'ëro èhu'ëro hu God-are örire suvuoro maho bojamadeje. Èsuvuorohuro Cain-hu God bojamadoho iosiramijadeje. Mae uehorovamu gagorovo God-ro Abel-are suvuoroho mae hö uvoromo baejadeje. Baeromo röjëhijë'eje aëro uvoröhego: Abel hu a mae höjo. Amo Abel-hu God mae uehorovadohuro èhuro jaruvoho hu guomë'eje röhu hu jöe jövajeje.

⁵ O Enoch-ro God mae uehorovë'ëro èhu'ëro bogo guomë'e God-ro ma-ba'ojiomoromo hesirire nugadeje. Aëro hu nahareje röhu bogo birohareje God-ro hu mami'e ba'ojiomë'ëro. God-hu Enoch bogo ba'ojiomade majare evare God-ro hu garomo nimorohade höjo. Èjöho God-are surire èhi jajivë'eje. ⁶ Röhu God-ro nomë bogo ëma göromo nimoroho'i a'i garöhe noehu hesi örire mae uehorovamu gavë'oho nimorohajeje. Èhesi bëhoho noehu God-are bëhire va'oromo jö majahi'ie'iroho mae uehorovoromo uvo'ejo: God iae jiajëjo. Ae rahu hu biroho'i nahë'oho ajamui'ajëjo. Bogo èhi uehorovë'oho hesi bëhiroho bogo va'ejo.

⁷ O Noah-ro God mae uehorovadeje. Mae uehorovë'ëro hejade God-ro uvamu: Èhi jië'e i'uoho sa'are ö'a'ajë uvamu hegorovo huro ë i'uoho bogo gavë'e God ma-ejahadeje. Ejahoromo boat böörömo avohadeje èhuro hu'o hesi aganohu'o jovoho bogo baejëvego va'o maro raromoröhëro. Mae uehorovoromo boat-oho avohë'ëro èhu'ëro no garomo

uvarueje: Noah-mëremu maho jëvo'i a ioro'ioroho aho'o sisë ë'ë'ëro i'u baeromo vuovë-vadoho mae hõjo. A'i Noah-ro God mae uehorovamu God-ro garomo uvadeje: Hu nasi õrيره mae uehorovajohuro ëhuro hu mae hõjo.

Abraham-hu God mae uehorovade jõhoje.

⁸ O Abraham-ro God mae uehorovadeje. Mae uehorovoromo huro dirõ'o göro va'ojõro God-ro uavamu iae ejahadeje. Ejahoromo dinõ'e va'irõhoho bogo gavë'e hesi sa'aho nugo'i ëma va'adeje God-hu u'emu bae'irõhego uavade sa'are hõrõ'irõhëro. ⁹ God mae uehorovadohuni ëhuni God-hu bojami'i uavade sa'are va'o ë hijadeje. Ëhijadeje rõhu ae gö jabesi sa'aro ma-jahuri hijanovadeje. Hiromo bogo javu maho vae'i ma-niõgu javuoremu hibe juvonõvadeje. Ijonõ hesi uje Isaac'o Jacob'o God-hu Abraham uavade sa'ae gemuoho bae'irõhoho jëvadeje rõhu jabu'o ë sa'aroho niõgu javuoremu raromobe jijihonõvareje. Jabuhu ë'arëhi Abraham-ro urimoho ëhi ë'onõvadeje. ¹⁰ Ëhesi bëhoho Abraham-ro uehorovë'e hijadeje ioro'ioeremu jiorõhe amo bõrõmo God-hu uehoro baeromo avohadire ë va'o hi'irõhëro.

¹¹ Rõhu Abraham-ro God mae uehorovoromo ëhuro a ujo jiorõhe darugoho baejadeje. Vaboroho Sarah dë tjojë'e jio'i baruoho Abraham mami'e mavojiraeromo harihu bae'irõhe darugo barëjahë'e jjadeje rõhu hu uvadeje: God-hu harihu bojemi'i uevadëhi iae bojemi'a-jëjo. Ëhi uehorovoromo harihu bae'irõhe darugoho iae baejadeje. ¹² Abraham hu ma-ae gemu jio'i urimo hesi darugo barëromo u'uhanovadeje rõhu a ujo jiorõhe darugoho rõhu maho baejamu hu bëhoho jioromo hesi ado sirino'oho jiji mujõru'o va'ëne aho'obëhe jio'amobe sõ jovo rirõre jio'amaje nie'u va'ëne ëhi bogo adaho varijënoho jio'amobe rovadeje.

¹³ Abraham Isaac Jacob jabumë God-are õrيره mae uehorovë'e raromobe ruejuvo vuovë-vadeje. God-hu ajëmi'i uëvadëhioho bogo ëhioho bae'irõgoro mae bae'irõhoho ma-ëgo'o riravoromo gavanovoromo uvareje: O ë muoho mabëhe rue'a'ajëromo ëhuni va'orahoro a nuniro uvareje: Noehu ave sa'are raromaruoho ae göehu ave sa'are ma-jahuri raromaruë aribõvioho javuanovajëjo. ¹⁴ Ëhi jië'e jõ uvaroho ëho no garomo uvarueje: Jabuhu uvarëhi ëhi uvarue aribõviohuro ioro'ioeremu rarom'irõhe sa'a maho nëgego ëhuni ëhi uvoruomaje hõjo. ¹⁵ Rõhu jabesi sa'a mare jioromo rovaroho ëho bogo uehorovareje. Ëho uehorovo'ibejo ë vuonorõ'õ va'irõhe õroho jiëho'ibejo. ¹⁶ Rõhu jabesi sa'a mare jioromo rovaroho bogo uehorovo'i a'i sa'a gö sa'a ma-mabëhe õ'idõre jiajoho ëho nimareje. Ëho nimë'ëro God-ro ëho garomo jabesi jõënioho bogo javojimo'i ma-samae uvareje: Iae na jabesi A Bõrõmoho God jevajëjo. Iae God-ro amo bõrõmoho avohëhë'eje jaburo ë va'o rarom'irõhego.

¹⁷⁻¹⁸ Rõhu Abraham-ro God mae uehorovadohuni ëhuni hejade God-ro hesi dëre bi-jiho gavamu hegoro God-are jõho ejahoromo Isaac baeromo God-ni ano'irõgoro hesi maratuore bamahadeje. Urimë'i God-ro Abraham jõ mae majahiromo uavadeje: Na bogo a göho ajami'i ma-Isaac gemu ajami'iramu ëhuro jasi ihoho jiobe va'a'ajëjo. Iae God-ro ëhi mae uavamu hejadeje rõhu Abraham-ro hesi harihu gemu'oho Isaac God-are õrيره bojami'irõgoro ë'adeje. ¹⁹ Ëhesi bëhoho Abraham-ro uehorovoromo uvadeje: A vuovamu ri'õjõro ajëmijë'oho God hu eni hõjo. Rõhu iae ëhi jianovadeje. Abraham-ro uvadeje: Isaac guomo'ie'ajëjo rõhu gavade God-ro ajami'ego bogo guomamu sionëro baejadeje.

Isaac Jacob Joseph ëho jabuhu God mae uehorovare jõhoje.

²⁰ O Isaac-ro God mae uehorovadohuni ëhuni hesi harihe niõ'i Jacob'o Esau'o ijonõ huë mae ari'irõhe jõho majëhijadeje.

²¹ O Jacob-ro God mae uehorovadohuni ëhuni guomo'irõgoro Joseph-are harihe gemu gemu huë mae ari'irõhe jõho majëhijadeje. Majëhiromo gududohuro bëdumo hiromo God-are õrيره rajahijadeje.

²² O Joseph-ro God mae uehorovadeje. Mae uehorovë'ëro ëhu'ëro guomo'irõgoro evare ae uëvadeje: Ijonõho Israel rajo ujo õmo'õmohuro ave Egypt sa'are jioromo

va'oruomo'ajėje. Va'irōgoro nasi ijo'ahoho ujuoho va'oromo ē va'o raromo'irōhe sa'are guavo'aruėje.

Moses-hu God mae uehorovade jōhoje.

²³ O Moses-are vėmu vavu'ohuro God mae uehorovareje. Mae uehorovė'ėro ēhuni Moses rahunogoromo gavare hu a harihu ma-mabėhe jiamu gagorovo sa'a a bōrōmo hesi jōgoru sisė aho'irōhoho bogo juhuonivareje. Bogo juhuonivo'i Moses baeromo gurihı bamo nugaroho manaere niō'i gemu barėjadeje.

²⁴ Ĕhi ē'ė'ėro Moses-ro bōviraeromo hu'o God mae uehorovadeje. Mae uehorovė'ėro iae Egypt sa'a a bōrōmo hesi abojohuro Moses hesi muohoromo uvadeje: Nasi harihe hōjo rōhu Moses-ro ae uėnōvadeje: Nadi uvorėje: Nōrō Egypt sa'are a bōrōmo hesi aboji hesi harihe hōjo. ²⁵ Ĕhesi bėhoho huro uvadeje: Na mu sisė vaeromo ēhuro huė ma ma-jahuri baejė'oho ēho bogo maho jio'i a'i na God-are aribōvioho jabu'o gemuore bimuvoromo huė sisė baejė'oho ēho iae maho hōjo. ²⁶ Huro uvadeje: Egypt sa'are jio'amaje inōmo inōme marohė'e mae naehu ujuohė'oho ēho ma-jianovo'i a'i bōrōme namiromo ajamu'irōhe a hesi mu naehu vaejama aehu sivegė'oho iae mae hōjo. Ĕhesi bėhoho hahu u'emu bae'irōhe suvuorohemu uehorovė'e hijadeje.

²⁷ Rōhu Moses-ro God mae uehorovadohuni ēhuni Egypt sa'a a bōrōmo hesi vōrōho bogo juhuonivo'i huhu hijade sa'aho ma-vuonugo'i va'adeje. Va'oromo God noehu bogo gavare aho hu gemu uehorovajėro jiė'ėro biririvadoho bogo vuonugadeje. ²⁸ Rōhu Moses-ro God mae uehorovadohuni ēhuni Israel rajo aribōvioho aevo'i uėvadeje: God-hu Vōrō Tugoho'irōhe Sōrōho irėje. O mi kōe javu ojoro hijiovodivo'amorėje ēhuro a muo'amo'irōhe anerahuro ēho garomo jemesi harihu murioho bogo bijuėmo'i vuonugo va'irōhe hōjo.

Jew rajo ae gōehu gōehu God mae uehorovare jōhoje.

²⁹ O Israel rajoho jaburo God mae uehorovareje. Mae uehorovoromo gavare Kavue'e Sō Jovoho jovo ihoho Kavue'e tarioromo ruhėhi va'o numėhi va'oromo riroho sinihoromo ma-sa'aemu jiamu gagorovo va'oromo ioro'ioro gōnō jėvamu iojioromuomadeje. Io-jiomamu gavė'i Egypt sa'a rajoho jaburo siho baejėvo va'oromo iojio'io'ia'amu gavė'i jovohuro ro dōe garaejėvamu vuovėvadeje.

³⁰ Rōhu Israel rajohuro God mae uehorovoromo ēhuro Jericho amoho bae'irōgoro rueromo gavare amoho munė rejo ēgobōviėro iromo rova'ė'e jiamu gagorovo God-are jōho mae uehorovoromo amoho majae gemu vae gemu rova'o rojomonōvareje. Ĕhi'obe va'ojuvo majae aho'obėhe 7 barėjamu rejoho aho'obėhe ahoromo sa'are ruvebijamu amoho baejareje. Amo ē aribōviohuro God mae uehorovamu ēhuro amo rejoho ahoromo ruvebijadeje. ³¹ O Rahab ae ma-gė'amaje magonahohuro God mae uehorovareje. Mae uehorovoromo gavade sa'a bae'irōhėni mōe rueruomaje Israel rajoho rovamu gėgorovo huė baeromo ajėmadeje. Ajėmijė'ėro ijonōho God-are jō bogo eruomade aribōviohu'oho i'uoho bogo gemu maho baeromo guomo'i mae hijadeje.

³² Na rabėni jōe gō'oho majėhi'ėjo. Gideon-hu ē'ade jōho o Barak-hu Samson-hu Jephthah-hu ē'obe rueruomade jōho o David-hu Samuel-hu o jō God-aro baeromo majėhinōvare aribōvi ioro'io'urehu ē'obe rueruomade jōho na jajivo'ibejo majaho barė'ibejo. ³³ Ĕaribōviohuro God mae uehorovoromo ēhuro sa'a ioro'ioroho ruahō'ō'amareje. Mu maho nigemareje. God-hu bojėmi'i mae uėvadoho baejareje. Vōrō'e mi jabesi jō'oho tugohėho'amareje. ³⁴ Vōrō'e vėnoho duohareje. Kaejō ēgehu muo'amėvo'i hōjaroho mae rovareje. U'uhėvadoho daruge baejareje. Muorovoromo biririvareje. Biririvoromo sa'a gōėro jabu'o muorovamu gagorovo sihō'jėvareje. ³⁵ Vėmu ōmo'ōmohuro God mae uehorovoromo gavare jabesi aganoho vuovoromo ri'ōjamu sionėro ujuohareje. Iae ēhi jiadeje.

A'i God mae uehorovarue a ioro'ioroho aėro jabumė vi'ehi bōrōme bojėmamu hara'uoromo vuovėvadeje. Jabumė God-are jōho vuonugo'ibejo vi'ehoho bogo bae'irōgoro va'oromo jabesi nimoro raromo jijihō'ibejo. Rōhu ēhi ē'orōhoho bijōnimareje ēhuro

ijonö i'ovoromo ma-mabêhe raromo'iröhëro. ³⁶O God mae uehorovarue a ioro'ioroho aëro sivëgoromo hisuebijëvamu huë vavaene bôröme baeruomadeje. Röhu göho a ioro'ioroho aëro tövo'amoromo savoji gagore io'amareje. ³⁷O God mae uehorovarue a ioro'ioroho aëro munëro vajëmijamu a ioro'ioroho aëro huruvo'amamu a ioro'ioroho kaejö ëgohuro bijjo'umamu vuovo'amadeje. God mae uehorovarue a ioro'iorohuro mi sino niögu sisëho io'amoromo iruno'o rumo'e bövi bise'o rumo'e raromonövareje. Aëro anëgo birëgo'ego ëma jijihonövareje. ³⁸Röhu jabesi sa'a rajo sisë aribövie jio'i jabumë a maemu jëvadohuni ëhuni a sisë jabu'o gemuore raromë'oho ëho bogo maehu jiadeje. A rumo'e sa'are sa'are dahorure dahorure munë gagore sa'a gagore ëma raromobe jijihonövareje.

³⁹Ëho jaburo ae aho'obêhe God mae uehorovobe rovä'ëro ëhu'ëro iho ma-mabëhoho God-are örire baeruomë'eje. Iae ëhi jie röhu God-hu bojëmi'i uëvadoho bogo baeruomadeje. ⁴⁰Bogo baeruomade hesi bëhoho God-ro noni uehorovoromo uehoro ma-mabêhe baeromo uvadeje jabumë bogo urimoho maho jëvo'i hujeji ijonö jabu'o no'o gemu mae ma-mae javuoröhego.

12

Noehu Iesu gemu uehorovoromo biririvo'iröhe jöhoje.

¹Ëhi jië'e ae aho'o siri va'ënehu God mae uehorovoromo mae jiamu gabe rovaroho ëho jabesi jöho gavarujeje. Ëhuni jabesi jöho uehorovoromo mu göehu göehu hutitit-mavuajoho ëho rori'o babu'öromo uehoro sisëhu simanore badirohavuajoho ëho dibo bu'ö'irögoro God-hu bojamuade muohuremu biririvoromo vaenövo'ejo. ²Iesuaro nunoho bamë'i muoho ëhi vaebe vae'ejo ë hesi bëhoho huro God mae uehorovarue öroho aevoromo röjahuiromo va'o ijo tugoho'i mae uehorovo'iröhe öroho röjahuijë'ego. Sa'are hiromo uvadeje: Vi'ehe baenugoromo huë mabêhe biroho'ejö uvoromo javoji vëmunajo baeröhoho bogo uehorovë'e biririvoromo korosire guomadeje. Ëhi ë'ë'ëro jaruvoho God bôröme namijaje hesi övo manö hije.

God-hu öri ma röjahui'iröhëro i'u bojamuaje jöhoje.

³Röhu jemëro Iesu uehorovore. A sisëho jaburo nue huodivoromo hesi muoho aho'i-a'amu huro biririvadeje. Ëaho uehorovoromo nadi dë vövöbajo'oho u'uhobe va'oromo muoho vuonugore. ⁴Jemë mu sisë aho gabe rovarujoho bogo ëhuro köho rueromo vuovëvë'eje. ⁵God-ro jemë hesi aboji harihu'e jëvajëromo hesi jögoroho majëhijë'eje jemesi dë vövöbajo'ere avoho biririvo'irarijeho. Na jemë ë jöho rumonëgë'eje o diehi jëve. Ëjöhö God-are surire jajivoromo ëhi uëvë'eje: Nasi harihohajo. Jaehu avoho hijöro Badahu röjahiromo i'u bojamamu gavë'oho nadi juahovonëjo.

O jögoru darugo'o majahijë'oho nadi u'uhonëjo.

⁶Badahu ae rahu uehorovavü'e'oho ë ariböviohuro avoho raromöjoro i'ue bojamuijaje höjo. Ae rahu hesi harihe javuöjoro baevavü'e'oho ë aribövioho hisuebijavuaje höjo.

⁷Huë vavaeni rovamü baejë'iroho uvore: God-ro no röjahuijajëromo biririvore. Ëhesi bëhoho God-ro jemë hesi aboji harihu'e jëvajëromo ëhi'ëvajeje. Röhu di aboji harihu'oho vavuoho jaburo bogo i'uoho bojëmë'ejö. Ae aho'obêhe iae baejarueje. ⁸No ae aho'obêhe i'u baejaruëhi jemë'o i'u bogo baejë'oho bogo God-are aboji harihu'o maho jëvo'i a'i öbie jëve. ⁹Ave sa'are vavu ömo'ömo'huro i'ue bojamui'ego noro mae uehorovëvonövareje. Ëho ma-jianovo'i a'i aru'aho muebejavuaje Vavue God-hu i'u jö röjahuijajoho ëho avoho ejahoromo maro raromö'ejo. ¹⁰Ave sa'are vavu ömo'ömo'huro jabesi simanehu ëma diehi diehi maho hö uvaroho ëhi majae ma-bisemu röjahuibe ruenövareje. Ëho ma-jianovo'i a'i God-hu röjahuijaje hesi bëhoho nosi jöënije hu mae jiajëhi no'o ëhi gemuoho javuoröhego. ¹¹O God-hu no röjahuiromo i'u bojamuajevare evare no uvarueje: Ëmuoho bogo huë ma'oho jio'i huë sisë baejarue muoho höjo. Röhu God-ro röjahuijeho no i'ue baebe va'ojuvo eni jiego evare noro God-are mu maho avoho vaejeho dë sasohavuajeje.

Noehu avoho biririvoromo darugo'o riravo'iröhe jöhoje.

¹² Ëhuni övo hörü'e u'uhëvë'oho avoho biririvore. ¹³ Öroho ahorirëro iogororomo ëhuro maro jijihore hörü sisërëjêvadoho bogo rireromoromo hurönivëho'i marëjêvo'iröhe.

¹⁴ Ae aho'o jabu'o ma-gemuoro huë mae raromo'i ë'o gare. Mu mahuremu vaebe jijih'o'i ëhu'o ë'o gare. Aehu bogo ëhi ë'ë'oho Bada'oho bogo mae bogo raromo'ë'ö. ¹⁵ Avoho mueberovore. Aëro God-hu huë baejêvaje öroho vuonugojöëni uëve. O aëro oso sisë bojëmego ae gö jemesi dë vövöbajo'oho ijumëvego ae aho'obëhe sisërojêvojöëni uëve. ¹⁶ O aëro önö'e muoho vaejöëni uëve. O Esau-hu ë'adëhi aëro ëhi ë'ojöëni uëve. Esau-ro God rumonimoromo ave sa'are bövie bise'ohuremu uehorovadeje. Hu harihu murioho jiadeje röhu bogo ëho uehorovoromo muri hesi suvuoroho bae'i a'i majae ma-gemu hesi iohuni hesi suvuoro maho ioro'ioyremu vuonugadeje. ¹⁷ Iae jemë'o gavaruje. Ijonö hu vuonugade suvuoroho vuonorö'ö bae'irögoro nivë'i nahadoho bogo eni jiadeje.

Noehu huë mae baejarue jöhoje.

¹⁸ Israel rajo a mamiehu rovarëhiohio jemë bogo ëhioho rovë'e jëve. Ëho jaburo garomo heromo rêharue dahuru ihe Sinai ë rovareje. Rueromo gavare vëni böörme ravoromo ramoramovoromo sue baduno'e jioromo buru böörme rovamu gavë'i ¹⁹⁻²⁰ hejareje hëgöe huo'ego jöho ma-darugo'o uvavavamu. Uvamu hegorovo hejare uëvamu: Bogo aho gemu a'i miehu rabehu ave dahuru ro rêhë'oho munëro vajamirego guomo'ira uëvamu ë jöho heromo bogo eni jëvamu hegorovo dinamioromo Moses uavareje: God uavego nadi gö'oho uvego no he'irarëjo. ²¹ Iae ëhi jië'e juhuoni'e muoho garomo Moses-ro uvadeje: Asë'e na butubutuegoromo juhuoninegavajëjo.

²² Jemë bogo ëhi jië'e dahoruroho rueromo ga'i a'i Zion dahorure rovë'e jëve. God darugo'e jië'e a hesi amo böörmore ö'idöre jiaje ame Jerusalem ë rovë'e jëve. Anerae aho'obëhe raromoruomajire ë rovë'e jëve. ²³ God-are aribövi jabesi iho ö'idöre jajivo'amë'e God-are harihu muri ömo'ömehu gagovoromo nimoro nimoro bamaruire ë rovë'e jëve. God ae aho'obëhe mae o sisë javuego gövuaje a hesi örire rovë'e jëve. Mu mae vaenövere aribövie God-hu avohëvamu ma-mabëhe ruahö'öjêvë'e ëho jabesi aru'aho ömo'ömo jabesi örire rovë'e jëve. ²⁴ Iesuare örire rovë'e jëve. Hu God-hu muebejavuaje jögoru avohahuade ahoje. Sisë u'ovahuoröhego Iesuhu kö hijiovö'öjadire rovë'e jëve. Ëkö hesi jö bëhohuro Abel-are kö hesi bëhoho iosiramiromo maeje. Abel anamu kö rueromo guomade hesi bëhoho God-hu ae gö i'u mana bojami'iröhoho jio'i a'i Iesu anamu kö rueromo guomade hesi bëhoho God-hu huë baejavuoromo sisë u'ovahuo'iröhohoje. Iae Iesuhu kö hijiovö'öjadire ë rovë'e jëve. Iae mabëhe rovë'e jëve.

Noehu avoho mueberovo'iröhe jöhoje.

²⁵ Ëhuni avoho mueberovore. God-hu jö bojamuijajoho nadi bijönimore. Sa'are hijade aehu God-are jö majëhijadoho Israel ariböviohuro heromo bijönimë'ëro i'uoho bogo huotovahareje. Ëho ma-jianovo'i a'i ö'idöre hijaje aehu majahuijaje jö nomë heromo vuonugë'oho diehi diehi huruomö'ejö. ²⁶ Urimë'i God-ro Sinai dahorure jöe jövamu ëhuro sa'aho hijiohijiovadeje. Avevejö'oho huro mae majahuiromo uövuë'eje: Majae gemu röhu maho na sa'aho hijiovo'ejöjo. Röhu bogo sa'ahuremu hijiovo'i ö'idöhu'o sa'ahu'o hijiohijiovo'ejöjo. ²⁷ Majae gemu röhu maho hijiovo'ejö uövuade hesi bëhoho huhu avoho'amade bövioho bise'oho hijiohijiovoromo ujuoho va'iramu bogojio'amo'ë'e. Ëhi jio'iramu bogo hijiohijiovoröhoho ma-ioro'ioyremu gemu bibivoromo nami'ë'e.

²⁸ God-hu böörme namiromo muebejaje öri ari'oho bogo hijiohijiovo varijënohoje. Ëho nosije. Ëhuni God-are örire huë mae ua'ejö. Mae uaromo huhu nimajëhi noro hesi iho ho bövie hë uehorovoromo avoho rajahi'ejö ²⁹ ë hesi bëhoho nosi Böörme God sisë vënehu bue'öjanovaje aho jië'ego.

13

God-hu nimorohoröhego noehu vae'iröhe mu hesi jöhoje.

¹ Röhu Christian ö mueno'e göehu gö huë baerovaruje muoho ëho avoho ma'enore. ² Ëhi'oromo ga'irarije ae gö jemesi amore i'e ö'amü gavë'iroho uëñövore: Nosi osaro ro

raromohëjo. Urimoroho a mamiohuro gavare ae i'e rovamu uvareje: Ma-a maëremu rovaruëromo ajëmjareje. Röhu bogo aehu rueruomamu ajëmi'i aneraëro rueruomamu ajëmjareje. Èhuni ae i'e ð'ego ajëmi'irarije muoho nadi rumonimore. ³Iesuare jöëni savoji gagore raromarue ariböviohuni uehorovore. Uvore: Jabuhu savoji gagore raromaruoho no'o gemu mae raromaruëromo èhi huë vavaene baere. O vi'ehi baeruomaje ariböviohuni uehorovore. Uvore: Jabuhu sino vi'ehi baejaruoho no'o gemu mae baejaruëromo jabesi jöëni huë vavaene baere.

⁴Röhu masurovarue muoho ae aho'obëhe mae uehorovore. Baruohu'o vaborohu'o jemesi arijo'ëremu garorovore. Önö'e jijihë'o'oho o goho'amë'o'oho èhuro God-ro i'ue mana bojëmi'ë'e.

⁵O nadi moniohemu bae'i uehorovo'i a'i uvore: Noehu bövi bise'o baejaruoho iae eni höjo. Rabëni God-ro no uövuë'eje: Na bogo mae bogo ja vuororamiromo ramo va'ejöjo. ⁶Èhuni no biririvoromo uvo'ejo:

Badaro na ajemijaje höjo.

Ajemijajego na bogo juhuonivo'ejöjo.

Aho diehi'oromo na ijumevo'aruëjo.

⁷Jemesi ekaresia a masijoho uehorovore God-are jö aevo'i majëhijaroho. Jabuhu avoho raromo jijihöjuvo ma-mae vuovëvade jöho uehorovoromo jabuhu God mae uehorovarëhi jemë'o èhi gemuoho God mae uehorovore. ⁸Èhesi bëhoho Iesu Keriso hu urimo jiadoho jaruvohu'o ijonöhu'o èhi ma-gemuohemu jiemu jio'ë'e. ⁹Èhuni aehu sareri'e jöe gö gö barueromo röjëhijë'iroho nadi èho uehorovoromo öri mare va'arujoho vuonugo'i ione aho bu'öromo öri göroho va'ore. Noehu uvë'o'oho: God-ro hesi nimoromo ajamu'iramu nosi aru'ahoho biririvahuo'ajë uvë'o'oho èho mahoje. A'i noehu uvë'o'oho: I i'iröhe jögoru rihioromë'ohuro èhuro nosi aru'ahoho biririvahuo'ajë uvë'o'oho èho bogo maehuje. I ijarue jögoru ejarue aribövioho bogo èhuro marëjëvajeje.

¹⁰Nosi sisë mu'uvahuoröhego suvoro maho God-are örire bojamijë'eje. Sisë mu'uröhe suvorocho Jew rajo priesti niögu javu hesi mu vaejaruoho bogo i'ë'ö. ¹¹Jew rajo priesti börömhuro mi köho baeromo God-hu jiaje osare è rumo va'oromo hesi örire suvuore bojaminövadeje sisëho mu'u'amoröhego. A'i mi maho bogo amoroho nugo'i a'i amore jioromo ujuoho va'o rori'o vëniro huonövadeje. ¹²Rori'o huonövadëhi aëro èhi Iesu bogo amoroho nugo'i a'i amo börömore jiamu rori'o bava'areje. Bava'amu vi'ehe baeromo guomadeje èhuro hesi kö maho rovego hesi aribövi nosi sisëho u'ovahuoröhego. ¹³Iesu amore jiamu rori'o bava'amu guomë'ego èhuni no'o amo rajehu sisë'i uehorovarue bogo jabesi gemuoroho uehorovo'i a'i Iesuare jöëni i'ue baeromo hu'o gemuore riravo'ejo. ¹⁴Rabëni ave sa'aroho noehu ioro'ioremu raromo'iröhe amoho bogojavue. A'i ijonö jioröhe amohemu èhuremu uehorovö. Èhuni amo rajehu sisë'i uehorovarue jabesi gemuoroho no bogo uehorovo'i Iesu'o riravo'ejo. ¹⁵Hu'o riravoromo mi suvorocho bogo a'i Iesuare ihore God rajahiromo èhuro suvorocho hu bojaminövö'ejo. Èsuvoro hesi bëhoho noehu hesi iho a huruoho majëhijë'o'oho èho noro jö'o öge i va'ëne èhi God-are örire suvuore bojamarueje. ¹⁶O huë baerovoromo ajamirovarujoho nadi rumonimore. Èhi jii'ë'e mu vaejë'o'oho God-ro uvajeje: Jabumë èhi è'aruoho èho mi suvoro mabëhe bojamaruëjo.

¹⁷Röhu ekaresia muebejëvarue aribövioho jabuhu jö bojëmijaruoho nadi aho'i ma-ejëhore. Rabëni jabumë jemesi dë vövöbajo'oho muebejëharueje ijonö God-are örire majahiromo uaruomoröhëni: Iae no jasi aribövioho èhi èhi muebejëhare höjo. Jemëhu jabesi jö ejëhë'ohuro èhuro jabumë bogo huë vavaenoho baeromo èma muebejëvo'i jabesi dëho sasohëvo'iramu muebejëvo'ë'ö. O bogo ejëhë'o'oho jabu huë vavaene bae'ë'ö röhu èma muebejëvo'ë'ö. Èhuro jemë bogo marëjëvo'ë'e.

¹⁸Röhu jemëro nosi jöëni parie vaenövore. Èhesi bëhoho noehu uehorovaruocho majae èhi mu maemu vae'i naguoromo èhuro no dë sasohavue. Èhuni parie vaenövore. ¹⁹Na nego avohe jemëro èhi è'öjoro èhuro God-ro remö'öjogo na jemesi örire ma-burëro ö'iro.

²⁰ Röhu na nege huë mae bojamuaje aho God-ro jemë ajëmego mae jëvojöro. Èhesi bëhoho sheep muebejavuaje a böröme Bada Iesu God-ro ajamijamu guomoromo ri'ö-jadeje. God-hu Iesu ajamade hesi bëhoho Iesu köe rueromo guomamu èhuro God-hu no ioro'ioyemu muebejavuo'iröhe jögoroho jiadeje. Èhuni Iesu ajamamu ri'öjadeje. ²¹ Amo na nege God-ro jemë inömo maho mu maho aho'o ajëmego huhu nimaje muoho vae avoho'irarijego o huro nosi dë vövöbajo'oho mae avohahuego noro mu mae vaejego huro göromo dë mae jioröhego. Huro Iesu Keriso-are jöëni èhi ajamuijöro nege. Keriso-are ihoho ma-dö maro jiemu jio'ë'e. Iae mae.

Ijo tugoho'i jöhoje.

²² Aganomë naro ave jö harihoho jajivoromo bamëhe jemëro adahoromo dë vövöbajo'oho biririvo'irarijego. Jemëro nadi u'uvo'i ma-here. Jöho bogo ègehujë. ²³ Röhu ave jöho uë'ië'e jemëro he'irarijego. Nosi öho Timothy savoji gagore hijadoho jiovo nugö'öjé'eje. Hu burëro rovamu gavé'oho èhuro na hu'o gemu mae ö'oromo gë'eje. O hu bogo burëro rovë'iroho naro sivue ö'eje.

²⁴ Jemesi ekaresia a masijohu'o God-are aribövi ioro'iorohu'o jejëmijode höre. Italy sa'a rajo ekaresiaho jaburo jemesi örire jejëmijö.

²⁵ God-ro ae aho'obëhe jemë huë baeromo ajëminövo'ë'e. Ahia mino'e.

JAMES

James-hu God-are aribövi jejëmjade jöhoje.

¹ God-are mu vaejahaje o Bada Iesu Keriso-are mu vaejahaje aho na James jeve. God-are ariböviehu jemesi sa'a vuonugo'i sa'a göre göre va'o raromarujo naro jemesi örire jejëmjaje.

Birivoromo God mae uehorovo'iröhe o hesi örire uehoro mae bae'iröhe jöhoje.

² Nasi ö mueno'e huë vavaenehu böviehu bise'ehu burunö'e rueromo anëgë'oho uvore: Ma-nimoroho'iröhe muoho rovë'e höjo. ³ Iae jemë'o gavaruje burunö'e rueromo anëgamu God mae uehorovoromo riravë'oho ehuro u'urume vaejë'i biririvobe va'arujeje. ⁴ Röhu u'urume vaejë'i biririvoromo va'onövore ehuro ruahö'ö'irarije. Ehi ë'ë'oho ehuro a duvahonö'e raromö'iramu ma-ëhi gemu jëvobe va'ë'e. ⁵ Röhu ja rahuardo uehoro bogojavë'oho God uavego uehoro mae bojami'iro. Ua gavë'oho God-ro iae ejaho'ë'e hu bogo nijio'irae'i ma-huë mae bojamuijaje aëro jïë'ëro. ⁶ Röhu ua gavë'iroho nadi uehore niö'i bae'i ma-God gemu mae uehorovoromo ua gane. Bogo ma uehorovë'oho buru buruehu anego jovehu hasaromo ajiomobe abuebe va'ajëhi jasi uehoroho ehi ruëre numëre jioje va'ë'e. ⁷⁻⁸ Ehi javë'oho uehore niö'i baeromo öroho dadivoromo ëma juvo'a'anue. Ehi jïë'e uehoro baejë'oho nadi uvone: Badaro bojemi'iramu bae'ejöjo. Hu bogo mae bogo bojami'ë'e.

Bövi bise'o rumo'e ariböviohu'o bövi bise'o marohë'e ariböviohu'o ehi jïë'e aribövi jabesi jöhoje.

⁹ Röhu Christian öe bövi bise'o rumo'e javë'oharo ga'irane jasi ihe sa'are jiajoho God-ro nigemahamu gavë'oho nimoronimorohë'i juvone. ¹⁰ O Christian öe bövi bise'o marohavë'oharo ga'irane jasi iho döre jiajoho sa'are bejahamu gavë'oho ja'o nimorohë'i juvone. Ehesi bëhoho resu inehu sahorijajëhi bövi bise'o marohëvë'e aribövioho ehi sisërë'amo'ë'e. ¹¹ Majaëro rojomoromo birebire'e bamoromo resu ahore ravego rudoho sahojajeje. Inoho rireromajeje. Mabëhe gavaruoho sahorijego iae barëjajeje. Sahori barëjajëhi bövi bise'o marohëvë'e ariböviohuro mue vaebe va'ojuvo röhu maja ahë'o sisërë'amo'ë'e.

Huë vavaene rueromo nosi dëre bijahuaje jöhoje.

¹² Röhu huë vavaeni bövi bise'o rueromo dëre bijaho gavamu jaehu birivoromo hijë'iroho huë mae javajeje. Birivoromo ruahö'öjë'iroho maro hi'irane röhoho iae bae'a'anue. Eërohoho God-ro uövuadeje: Na uehorovevaruje aribövioho bojemi'ejöjo. ¹³ Röhu sisëhu ro dëre bijëho gëvë'oho nadi uvore: God-ro sisëho nugö'ö'ego bijahuajëjo. Nadi ehioho uvore. Rabëni hesi bëhoho God-are dëroho sisëho bogo bijiohajeje. O God bogo sisëho nugö'öjego nosi dëroho bijahuajeje. ¹⁴ Bogo ehioho jie. A'i ae gemu gemu dëre bijahuaje hesi bëhoho nosi sinohuro mu sisëho nimoromo jagu barovego ehuro sisëhuro ro bijahuajeje. ¹⁵ Mu sisë vae'i nimobe va'ojuvo evare mu sisëho vaejarujeje. Mu sisëho vaebe va'ojuvo ijönö bejavuo'iramu evare iae barëjavuo'ë'e.

¹⁶ Nasi ö mueno'e ehuni nadi jemesi arijo'arjoho sareramivoromo uvore: God-ro sisëho nugö'öjego dëre bijahuaje höjo. Hu bogo ehioho ë'ajeje. ¹⁷ A'i suvuro mabëhe aho'o hesi örire gemu jioromo rovajeje. God hu bövie bise'e jiji mujöru'e manaere majae nosi örire ajivavuo'iröhego avohade ahuro aji mahuremu iae bojamuijajeje. God bogo gorosovo'i bogo ramoramovo'i ma-ëhi gemuohemu ajivavuobe va'ajeje. ¹⁸ Huro hesi nimoromo hesi jö maho nugö'öjadeje nosi örire rovego noro heromo nosi aru'ahoho i'ovahuego hesi aboji harihu'e javuoröhego. Hesi aboji harihu'e javuego ehuro inömo inömo bövi bise'o avoho'amadoho noro iosirëmiromo hesi nunire aribövioho javuoröhego.

God-are jö bogo ma-hia'ëremu he'i a'i avo'avoho ejahoromo mu vaeröhe jöhoje.

¹⁹ Nasi ö mueno'e avehuremu uehorovore. Ae aho'obëhe jemëro jöho ma-burëro hi-a'ëremu henövore. Nadi ma-burëroho jöho majëhiromo ma-burëroho vörö'iraere. ²⁰ Aehu

vörö'iraejé'oho bogo ehuro God-hu nimaje mu maho ri'ö'ë'e. ²¹ Èhuni va'inumi'e mu sisë aho'o vae'i arijarujoho uehorovoromo vuonugo'i God-hu dë vövöbajo'ere baméhaje jöho ma-u'emu sanuovoromo ejahore. Ejahé'oho jöho darugo'éro jié'ëro ehuro jemesi dë vövöbajo'oho i'ovëvo'iramu mae jëvo'ë'e.

²² Nadi sareramirovoromo God-are jöho ma-hia'ëremuoho here. A'i jöho ejahoromo huhu uëvajéhi muoho éhi vaere. ²³ God-are jö bogo e'i ma-hia'ëremu hejé'oho aririre garomo ²⁴ vuonugo'i va'oromo nu ano'o bogo avohorovo'i rumonimaruéhi ma-hia'ëremu hejarue aribövioho éhi jëvo'ë'e. ²⁵ A'i ae göehu aririre nu ano'o ga avoharuéhi éhi God-are jögoru ga avohoromo uvé'oho: Ma-maëro jié'ëro ejaruohuro bogo tövavuë'e maro raromo jijiharue höromo biririvoromo ma'enoromo bogo ma-hia'ëremuoho heromo rumonimo'i a'i ejahoromo mu vaejé'oho ého iae mae jio'ë'e. Èhuro rabe rabe ë'ë'oho God-ro ë aribövioho ajëmiromo huë mae bojëminövo'ë'e.

²⁶ Röhu ae göëro göëro uvarueje: No God mae uehorovoromo hesi muoho ma'enarue hö uvo'i röhu bitaroho bogo taem'éle atarueje. Èhi ë'aruoho jabumë ma-sareramirovoromo uvarueje: No mu mae vaejarue hö uvoromo ma-döhemu God uehorovoromo hesi muoho vaejarueje. ²⁷ A'i God Vavuohuro uvajeje: Aviéhi jié'e muoho bogo ma-döëremu na uehorovevarue muoho jio'i dë vövöbajo'o uhohu'o vaejarue mue höjo. Öbi asisö'ohu'o magonaho doruohu'o huë vavaeni baejaruoho noro jabumë ajëmiromo avoho muebejëvo'ëjo. O no ave sa'a hesi mu sisëho bogo gavanovo'i ma-mu maemu vae'ëjo.

2

Noehu ae aho'obéhe ma-gemuoho hö uehorovo'iröhe jöhoje.

¹ Nasi ö mueno'e nosi Bada Iesu Keriso hesi aji'e hijajoho mae uehorovarue jëvaje nadi ma-dajemuoho garomo aribövioho adovoromo ioro'ioroho rajéhi'i ioro'ioroho bijönimore. ² Èhesi bëhoho jeméhu God rajahi'i ro gagovarue osare ae niö'iro rovö. Göhuro inömo'e aëro jié'ëro maho io'amoromo rue'i göhuro inömo rumo'e aëro jié'ëro sino sine io'amoromo rove. ³ Èhi'oromo rovamu gavé'oho niögu mae io'amé'e aho jemëro garomo rajahiromo ua'a'aruje: Isi ro röho maro hijéjo. A'i niögu sisé'e aho garomo bijönimoromo ua'a'aruje: Janioho röhe bogojié'e jiaje éhi ma-namijéjo. O ua'a'aruje: Janioho aréte bogojié'e jiaje ave sa'aro nasi höru bëhohuro ro hijéjo. ⁴ Èhi uëvé'oho jemesi aribövioho adovoromo inömo rumo'e jié'oho ruéhi nugo'i inömo börömo jié'oho viéhi nugarueje. Èhi'oromo sisé'i uehorovoromo mevarueje.

⁵ Röhu nasi ö mueno'e ave jöhuremu here. Ave sa'are ariböviehu garuomajoho inömo rumo'e ariböviero jëvé'ëro sisé'i rarumarueje. Sa'are sisé'i raromaruoho ë aribövioho jabumë God-ro baejévadeje jaburo bogo sisé'ioho uehorovo'i avo'avoho hesi örire ma-avo'avoho uehorovo'iröshëgo. Mae uehorovoromo hesi öri ari'ere va'ego muebejëvo'iröhëni. Èhesi bëhoho mami'e God-ro uëvadeje: Ae rahu na uehorovevé'oho naro ajëmi'ëjéjo nasi öri ari'ere rovego muebejëvo'irodëni. Èhuni iae ë inömo rumo'e aribövioho éhi ajëmi'ë'e. ⁶ God-ro inömo rumo'e aribövioho éhi ajëmijajeje röhu jemëro jabesi ihoho ijumëharueje. Èhi ë'arujoho röhu rahumëro jemë iosirëmiromo i'u'e muoho bojëmiruomajeje. Inömo ma'e ariböviohuro ë'arueje inömo rumo'oho bogo. O rahumëro gudamëvoromo court-roho va'o bahijëvoruomajeje. Inömo ma'e ariböviohuro éhi ë'arueje inömo rumo'oho bogo. ⁷ Jemë Keriso-are iho baejarijeje röhu ë inömo ma'e ariböviohuro Keriso-are ihoho ijumoruomajeje. Èhuni nadi inömo ma'e aribövioho rajéhi'i inömo rumo'e aribövioho bijönimore.

⁸ Röhu jögoru börömo börömoho God-are surire jajivoromo uövüë'ëje: Jaehu jasi arijo'arije rajahirovanuéhi jasi ae gemuoho éhi rajéhinéjo. Jeméhu ë jögoru ejahé'oho iae maeje. ⁹ Röhu jemë dajohemu garomo ioro'ioroho rajéhi'i ioro'ioroho bogo rajéhijé'oho ého jemëro sisé ë'oromo jögoroho ahé'ëro i'ue bae hesi jëve. ¹⁰ God-are jögoru ejahobe va'oromo röhu jögore gemu ahé'oho ehuro hesi jögoroho aho'obéhe sisé vae'iramu övövo'e ae javo'ë'e. ¹¹ Èhesi bëhoho God-ro uövüadeje: Nadi goho'amonéjo. Röhu ë

ae gemuohuro jö göhu'o uövuaedeje: Nadi ae gö anonego guomo'irajo. Ëhuni ja bogo goho'amo'i röhu ae gö anë'oho God-are jö ahanue ae javo'ë'e. ¹² Ëhuni uvonövore: God-are jögoru ejahë'oho ehuro mu sisëhu tövavuadoho jiovahuego maro raromarue höjo. Ëjögorocho God-ro ijönö garomo nosi muoho mevo ga'a'ajëjo no ejahë'e o bogo ejahë'e muoho vaejë'e javuo'iramu. God-ro hesi jögorochi garomo ëhi mevo gö'a'ajë uvoromo jemëro ëho uehorovë'i jöho atobe muoho vaebe jijihore. ¹³ God-ro mevavuo'ajë uvo'irarije ë hesi bëhoho God-hu mevavue'iroho gö'iröhe huë bogo baejëvare aho hesi nunire ro riravamu gövuë'oho bogo huëho baejavuo'i mana i'ue bojamui'ë'e. O huë baejëvare aho hesi nunire ro riravamu gövuë'oho God-ro i'ue bojamui'i ë'oromo vuonugo'i huë baejavuo'ë'e.

No bogo ma-döhuremu God mae uehorovo'i uhohu'o God mae uehorovoromo hesi jö ejahoromo mu vaeröhe jöhoje.

¹⁴ Nasi ö mueno'e aehu uvë'oho: Iae na God mae uehorovaje hö uvoromo röhu God-hu nimaje mu bogo vaejë'oho ëhi jië'e aho God ma-simanëremu mae uehorovajeje. I'o mu bogo vae'i God uehorovoromo ëma hijë'oho God-ro bogo maroho bamo'ë'e. ¹⁵ Ëhesi bëhoho jasi Christian ö ma'ino'e iruno'e niögu suhi'e bogo eni jëvamu gëromo ¹⁶ röhu bogo mae bogo ajëmi'i ma-jöemu uëvë'oho: Maro va'onëjo. Va'oromo niögu mae ujuohoromo io'amoromo i mae ujuohoromo iromo hinëjo. Röhu jabesi sinehu nimiruoho bogo ajëmë'e ma-majëhijë'oho na ëho eni jio'ë'e o bogo. Ëho bogo eni jio'ë'e. ¹⁷ Ma-jöemu majëhijë'oho bogo eni jiajëhi ëhi God-hu nimaje muoho bogo vae'i God ma-dajëremu uehorovë'oho ëho ma-bëhi rumo'e muohoje.

¹⁸ Röhu aëro ue'ë'e: Ae göëro God mae uehorovaje höjo. Ae göëro mu mae vaejaje höjo. Ëhi ue'iramu naro ua'ejo: Röhu aho diehi'oromo God mae uehorovoromo muoho bogo vaejaje höjo. Röhu naro mue vaeromo ehuro ja röjahi'iramu ge'a'anuëjo na God mae uehorovaje ae jevo'iramu. ¹⁹ Röhu ja simanëremu uehorovoromo uvanueje: God gemu jiajëjo. Mabëhe. Satan ajamijarue aru'ahoho jabu'o uvoruomajeje: God gemu höjo. Ëhi uehorovoromo ma-juhuonibijiohoromo butubutumoruomajeje. Ëhuni ma-simanëremu God uehorovë'oho bogo eni jie. ²⁰ Uehoro bogojië'e ae jave. God-hu nimaje muoho bogo vae'i ma-God uehorovë'oho ëho bëhi rumo'eje. Ëhi jië'e jöho na ja nage naro röjëhijego ga'iro. Aveho hene. ²¹ Nosi hijo miono'e Abraham diehi'amu hesi ihoho God-are nuniroho maho jiadeje. God-hu nimade muoho huro vaeromo hesi harihoho Isaac baeromo God-ni suvoro buejarue maratu döre God-ni bamadeje. Ëhi'amu ehuro hesi ihoho God-are nunire maho jiadeje. ²² Ja'o gane. Abraham-ro God mae uehorovoromo o God-hu nimade muoho vaeromo mue niö'i havëvoromo vaejajeje. God-hu nimade muoho vaejë'ëro ëhu'ëro God uehorovadoho iae eni jiadeje. ²³ Ëhi jië'ëro God-are surire jö uövuaëhi iae ëhi jiadeje. Jöho jajivoromo uövüë'eje: Abraham-ro God mae uehorovamu gavë'ëro God-ro uvade höjo: Abraham-are ihoho iae mae höjo. Ëhi'amu aëro uvoruomadeje: Abraham God-are aemo'aeme höjo. ²⁴ Ëhu'ëro jië'ëro jemëhu gavarujocho God-are ihohemu ëma uehorovë'oho bogo ehuremu nosi ihoho God-are nuniroho maho javuajeje. A'i God uehorovoromo röhu hu nimaje mu vaejë'ohuro ehuro nosi ihoho God-are nunire mae javuajeje.

²⁵ Röhu jö göho naro ua'ejo bëhoho avoho ga'iranego magonahehu mu ma vaejamu ehuro hesi iho God-are nunire ma jiade jöho. Magonahe gemu hesi ihoho Rahab-ro iae hijade höjo. Hu ae siho'amaje magonahe jiade höjo. Röhu hesi ihoho God-are nunire mae jiade höjo. Diehi'oromo ëhiho jiade höjo. God-hu nimade muoho huro vaejamu ehuro ëhi jiade höjo. Huro gëvade Jew rajëro God-are ihore rovamu gëgorovo ajëmiromo osare hu'irae baejëvo rueromo röhu öri göro rëmö'öjade höjo mae va'iröhego. Ëhi ë'amu hesi ihoho God-are nunire mae jahade höjo.

²⁶ Ëhi jië'ëro ave uhu jöho majëhije. Nosi sino haho'ere aru'aho bogojië'oho nosi sinoho ëma imo javuo'ë'e. Ëhesi bëhoho no God uehorovo'i röhu huhu nimaje mu bogo vaejë'oho no ëma imo sinohuremu God uehorovarueje.

3

Jö maemu ato'iröhe jöhoje.

¹ Nasi ö mueno'e God-are jö röjêhijarue muoho majêhi'ie'e. Nadi ae aho'obêhe God-are jö röjêhi'irarije muoho ëma baere. Rabëni hesi bêhoho jemë'o iae gavarujeje Christian a ioro'ioroho God-ro iae mevëvo'i rôhu hesi jö ae röjêhijarue aribövi nosi muoho God-ro ga avohoromo darugo'o mevavuo'ë'e. ² No ae aho'obêhe mue aho'obêhe garaejarueje. Rôhu ae rahu bogo bitaro garae'i jö maemu atë'oho êhi jië'e aribövioho ma-maemu jioruomajeje. Jabesi bitaro jö'o taemë'oho êhuro jabesi sino haho'e aho'obêhe taemorovoromo mu maemu vaeruomajeje. ³ Êhesi bêhoho horse jö'oho uehorovore. Horse jö'ore ö'oho ruaharueje êhuro ö'i vitunö vitunö jaguvego jaguvaruinö ë va'iröhego. Horse jö'ore ruahë'ëro êhu'ëro horse dajo haho'e aho'obêhe ri'öjego no naguajinö ë va'ajeje. Êhi nosi jö'oho taemë'oho nosi sino haho'e aho'obêhe taemorovoromo mu maemu vaejarueje. ⁴ O boat jöho uehorovore. Boat-oho bôrömeje. Buru bôrömëro hesi niögu ba'uorimarire namiromo biduoho baeromo va'ajeje. Boat bôröme jio'i buru bôröme jio'i rôhu damu bise'oho ma'enoromo hunuovego dinö'e va'i nimë'iroho ë va'ajeje. ⁵ O nosi bitaroho iae gemuohoje. Boat damu bise'o jiajêhi nosi bitaroho iae êhi inömo bise'eje. Inömo bise'o jiajohö rôhu damuehu boat bôrömo hunuovajêhi êhi nosi bitarohuro mu bôrömo hesi jöho ëma jö huhe atarueje.

Rôhu aveho uehorovore. Vëni hödu biseharihohuro êhuro je'o bôrömo ravo barë'ë'e. ⁶ Bitarehu jö sisë ataruoho êho vëni sisêho va'ëneje. Sisë bövie bise'e uehorovaruoho vaejaruoho bitarëro atarueje. Bitaroho nosi sino haho'ere jië'ëro êhuro nosi uhoho aho'obêhe sisërëromo rumorovobe va'ajeje. Jö sisë atë'iroho mue aho'obêhe ijumaje vënohuro ravanovajeje. Êhesi bêhoho Satan-are öri ari'ere jioromo ro nosi muoho aho'obêhe ijumo'amajeje. ⁷ Uge sigobe je'o maje jovo maje ihe gö gö aruëre anumëre jijjioruomajohö rôhu aëro ahego êhi ë'aruoho vuonugo'i ma-jabesi rôhoremu raromarueje. Êhi ë'iröhoho aho no eni javuajeje. Êhi ë'ë'e javue. ⁸ Rôhu jö aruëre anumëre ataruoho ahovorovoro êhi ë'aruoho vuonugo'i ahorirëremu ato'iröhoho a vadu'oho bogo eni javuo hesije. Nosi bitaroho sisë vörö'e sigobu jabesi bitaro va'ënëro jië'ëro ae gö êhi jö sisë bojëmëgo sisërërovarueje. ⁹ Bitarohuro êhuro nosi Vavuoho Bada mae uavarueje. Rôhu ë God mae uavarue bitarohuro êhuro God va'ëne avoho'amade a jabesi örire jö sisë uëvarueje. ¹⁰ Jö'e gemuore jioromo rôhu jö mahu'o jö sisêhu'o jovonö'e rovajeje. Nasi ö mueno'e êhi jië'oho sisêje. ¹¹ Jovo mahu'o sisêhu'o sa'a gage gemuoroho bogo suorovajeje. ¹² Nasi ö mueno'e ijo bajo ihe gö gö bogo gemuoroho rae'i ö'i bajoho bogo ijo bajohu'o gemuoroho rae'ë'e rabëni köe gö gö jië'ëro. Sö jovohu'o jovo mahu'o bogo gemuoroho vuo'a'anue. Êhu'ëro jö mahu'o jö sisêhu'o bogo vaerovo'ejo.

Uehoro mae niö'i göho ave sa'a hesi uehoroho ma-döhemu mae jio'i göho God-hu bojamaueje uehoroho uhohu'o mae jiaje jöhoje.

¹³ Rôhu romorome uehorovë'e a o nuni aji'e a jemesirire jëvë'oho êhi jië'e ahuro hu diehi ë'ë'e. Hu avo'avoho hibe juvoromo mu maemu vaeromo ma-u'emu taemo hiromo simano mae uehorovë'ë'e. Êhi ë'ë'oho no garomo uvo'ejo: Êaho simano mae gavë'e ae höjo. ¹⁴ Rôhu jemë ae gö jabesi mu mahuni dë vörönimoromo nu huodivo'i jemesi iohemu döre bamorovo'i nimë'oho nadi nimoronimorohoro jö huhe ë'oromo o jö sareroho atoromo God-are jö maho ijumore. ¹⁵ Jemë êhi jië'e uehoro baejê'oho nani jemë uvarujeje: Êhi jië'oho simano ma'e uehore höjo. Rôhu êho bogo ö'idöroho jioromo ruvebi'i a'i ave sa'a hesi uehoroho jio'i ma-nosi sinemu uehorovaruoho jio'i Satan-are ariböviehu uehorovaruohoje. ¹⁶ Dinö'e dinö'e ae göehu gö hesi mu mahuni dë vörönimoromo jabesi sinemu uehorovoromo döre bamorovë'oho êhi jië'ire aëro iro muorovo'e vaeromo bövie bise'e gö gö vaejarueje. ¹⁷ Sa'a hesi uehoroho êhije. A'i ö'idöre jioromo ruvebijaje uehoroho göje. Êhi jië'e uehoro ma baejê'oho mu ma-mae uehorovaruueje. Mu mae uehorovoromo gemuoro mae raromoromo muoho ma-u'emu vaeromo ma-sanuovoromo jöho ejahorovaruueje. Jöho ejahorovoromo huë baerovoromo muoho avoho vaejarueje. No

bogo ruéroho numéroho uehorovo'i ma-jöe gemu uehorovarueje. Bogo ma-döemuoho mu maho vae'i a'i avoho uehorovoromo dë vövöbajo'o uhohu'o vaejarueje. ¹⁸ God-hu nimaje mu rueröhego nimë'oho urimo ma-u'emu sanuovoromo huë baerovo'iramu evare ëhi jïë'e muoho böörömae'ë'e.

4

Ave sa'a hesi mu sisë bogo uehorovo'i God gemu uehorovo'iröhe jöhoje.

¹ Röhu jemë ae göehu göehu iro muorovo'e vaejaruje hesi bëhoho rabeje. Sinohemu nimarujëro jïë'ëro ëhu'ëro ë'arujeje. Ae göëro göëro jemesi sivu sivue sinohuni bae'i nimoromo uehore göëro göëro gemuore umogihoromo ëhuro ë'arujeje. ² Ëhesi bëhoho jemë bövie bise'e bae'i nimoromo röhu bogo baejarujeje. Bogo baeromo ae muo'amo'irögöro ë'arujeje. Muo'amo'irögöro röhu ganiganimoromo bae'irarije öroho bogo biröhogoro iro muorovo'e vaejarujeje. God bogo ua gavarujohuro ëhuro bogo baejarujeje. ³ O God ua gavë'oho ëhu'o bogo baejarujeje. Rabëni hesi bëhoho jemë sisë'i uehorovoromo mae sisë ëma ua gavarujeje ëhuro baeromo jemesi sinehu nimarujohuni bu'ö'irarijëni. Ëhuni bogo baejarujeje. ⁴ Sareri aribövie jëve. Magonahehu bogo baru uehorovoromo taemo hi'i ma-juvajëhi jëvanove. Ëhesi bëhoho jemë bogo God gemu uehorovoromo taemo raromo'i ave sa'are mu sisëhu'o uehorovarueje. Jemë diehi'oromo bogo garomo uvarujeje: Ave sa'are mu sisëho bööröme hö uehorovë'oho ëhuro God bijönimarue höjo. Ëhuni ae rahu ave sa'arohemu uehorovo'i nimë'oho hu God bijönimaje aejë. ⁵ Iae God-are surire jöho uvë'eje: God-ro bojamuade aru'ahohuni vavaenimoromo uehorovavuae höjo noro hu gemu uehorovo'iröhego. God-are jöho ëhije. Röhu nani jemëro uvarujeje: Ëho ma-jöe höjo. ⁶ Röhu iae hu nime noro hu gemu uehorovo'iröhego. Röhu God-ro hesi nimoromo huë baejavuoromo ajamui avohajeje noro ëhi ë'iröhego. Ëhi ajamuijaje jöho God-are surire jajivoromo uövü'eje:

Biriri'övoromo masije javuajë uvarue aribövioho God-ro ahëvaje höjo.

Ma-u'emu taemo raromarue aribövioho God-ro hesi nimoromo huë baejëvoromo ajëmi-jaje höjo.

⁷ Ëhuni God-are jöho ejahore. Satan rovë'oho ahore. Satan ahë'oho jemesirire jiajoho ju'ebiro mo va'ë'e. ⁸ God-are bëhoro va'ore. Hesi bëhire va'ë'oho huro jemesi bëhire rue'ë'e. Jemë sisë'e aribövie jëvaje övoho u'orovore. Vaji vaji'e aribövie jëvaje dë vövöbajo'oho avohorovore. ⁹ Huë vavaene böörömo ho baere. Jemë ma-ijo'ijovoromo nimoronimoroharujoho vuonugo'i ma-nierusuburu'e bamoromo raromore. ¹⁰ God-are nunoro uvore: Nasi ihoho abuejë'e höjo. Ëhi uvë'oho God-ro jemesi ihoho döro bamëho'ë'e.

Noehu bogo masijo riravoromo ae gö jabesi jö sisë ato'iröhe jöhoje.

¹¹ Nasi ö mueno'e nadi göëro gö hesi jö sisëho atore. Ö mueno'o jabesi jö sisë jövë'oho o döre bamorovoromo uvë'oho: Ö mueno'oho sisë hö uvë'oho ë hesi bëhoho God-are jögöroho sisë'i jövoromo döro bamorovoromo uvo'a'anue: A jabesi sisë bogo ato'iröhe jögöro God-hu bojamuadoho iae hesi höjo. God-are jögöroho iae hesi hö uvë'ohuro ëhuro ja hesi jögöroho bogo eja'ho'i a'i hesi jögöroho iosiramiromo mevo ga'a'anue ga'i God-hu bojamuade jöho diho mae jiego diho sisë jiego. ¹² Jögöro bamade aho gemuje. Nosi sisë mevahuaje aho gemuje. Ëaehu mare bamavuë'oho o sisëre bamavuë'oho hu eni jie. Ëhuni diehi'oromo uvanueje: Na bööröme jevo'i God bise'e höromo ëhuni döro bamorovoromo jasi a hesi jö sisë mevanueje.

Bogo nosi sivuoho eni javuajë uvoromo ma-döhemu nimoronimorohë'i ato'iröhe jöhoje.

¹³ Röhu ave jöho majëhi'ie'e here. Jemë a ioro'iorohuro uvarujeje: Jaruvo ë amore iae no va'ëjarëjo. O uvarujeje: Nëri ë amore iae no va'ëjarëjo. Va'iröhoho va'o vadune gemu hesi uhure ë raromoromo mue vaeromo moni bövie bae'ëjarëjo. ¹⁴ Ëhi uvarujoho röhu nëri diehi jëvo'iröhoho dadivëve. Ëhuni vadune gemu ëhi jëvo'iröhoho ëhu'o dadivëvajeje. Ëhesi bëhoho jemë sue va'ëne jëve. Sueho majae bisemu numoromo evare

dadovo va'oromo barëjajëhi ëhi jëvo'ë'e. ¹⁵ Èhuni nadi uvo'ibejarije: Èhi ë'ëjarëjo. A'i uvo'ibejarije: Hesi Badahu nimë'ohuro no biririvoromo raromoromo ëhi ëhi ë'ëjarëjo. Èhi uvo'ibejarije iae mae jio'ibejo. ¹⁶ A'i jemëro uvarujeje: Èhi ëhi ë'iröhohoho nosi sivuoho iae eni javuajëromo ma-döhemu nimoronimorohë'i atarujeje. Èhi jië'ohoho bogo maehuje.

¹⁷ Èhu'ëro jië'ëro ae rahu mu ma vae'iröhohoho garomo röhu bogo vaejë'ohoho ëho mu sisë vaeruomajeje.

5

Bövi bise'o marohë'e mae ariböviehu avo'avoho uehorovo'iröhe jöhoje.

¹ Röhu inömo marohë'e mae jië'e ariböviohumë aveho here. Nierusuburu'e bamo avohore huë vavaene börömo böröme jemesi örire rue'ie'e jiaje. ² Bövi bise'o börömo bëhi jëvajocho sagohoriro mo muduhi'amo barë hesije. Giresasaëro jemesi niögohoho tarivo'amo hesije. ³ Jemesi mae sisë'o maho maho dë'irae'amo hesije. Dë'irae'amo'iramu ëhuro jemesi nigoji öroho va'orahoro jio'i jemë vënëro ravëvanovo'ë'e. Ave maja barë'ië'aje majare jemë inömo inömo bövi mae bahi avohë'e jëve. ⁴ Aveho gahe. Jemesi mu ariböviohuro jemesi mure va'oromo iruno'ohoho tarivoromo gagovëhë'ejö. Jemesi muoho ëhi vaejëhamu jemëro bogo manaho i'imëmi'i jemesi vajiohëro bahijë'e jëve. Vajiohëro bahijë'ëro ëhuni jaburo darugo'o uvoruomajeje: Nosi a masijohoho rabëni nosi manaho bogo i'imamuarue höjo. Èhi atarue jöho God bövi bise'o muebe'amaje aho hu iae hejajeje. ⁵ Jemë ave sa'are raromoromo mahunö'e raromobe sinehu nimaje muohemu uehorovobe rovë'e jëve. Mahehu i ue'ahoromo masijorijaruëhi ëhi ë'obe rovarijohoho mahunö'e muo'amëvego vuovo'irarije majaho rovë'eje. ⁶ Mu sisë rumo'e aribövioho jemëro sarerisareriëmiromomo court vaejëvoromo uëvariijeje: Sisë'e jëvaje öri sisëro va'ohëjo. Èhi'oromo muo'amëvariijeje. Röhu jabumë vörö rumo'ëro jëvë'ëro jemë bogo ahëvarujeje.

Badahu rueröhego biririvoromo taemo raromoromo muebe'iröhe o God-are örire ëninami'iröhe jöhoje.

⁷ Röhu ö mueno'e biririvoromo ma-taemo raromoromo muebejeho Bada rue'iro. Jemë'o uehorovore. Nimarue iruno'o gagovo'ie'iroho öjë'ëro iruno'ohoho bogo burëroho gagovo'amarueje. Urimo biririvoromo muebejuvo urimore niohijohoho majahoho rovego muebejuvo ijo tugohohoho niohijohoho majahoho rovego biririvoromo muebejuvo ijonö iruno'e mabëhe rijego evare gagovo'amarueje. ⁸ Iruno'o riröhego biririvoromo muebejaruëhi jemëro ëhi dë vövöbajohoho biririvoromo muebere Bada vuonorö'ö rue'ie'e jiaje.

⁹ Nasi ö mueno'e huë vavaene rovego baejarujohoho nadi göëro göënioho dë vi'ehimoromo ëma nibejahivoromomo uarovore: Jero ë'ane höjo. Èhi'amu gavë'ohoho God-ro mevëvoromo i'ue mana bojëmi'ë'e. Gare. No mevavuo'iröhe a hesi majahoho dunove. ¹⁰ Nasi ö mueno'e a mamioho uehorovore. Badare ihore jö majëhinövare aribövioho uëve. Jabumë huë vavaene baeromo röhu ma-biririvoruomajeje. Jabuhu biririvarëhi jemë'o ëhi biririvore. ¹¹ Ae gö gö huë vavaeni baeromo röhu biririvarohuni ëhuni no uvarujeje: God-hu mabëhe ajëmijadohoho jioruomajëjo. Èhuremu uehorovore. Röhu a mami ae Job-hu huë vavaeni baeromo röhu biririvade jöho iae jemë'o hejarijeje. Job-hu biririvobe rovamuhoho ijonö Badahu mabëhe ajämijade jöho ëhu'o gavarujeje. Iae Badaro bogo bise'o vaduhohoho vavaenimoromo huë baejavuaje ahuro jië'ëro ëhu'ëro Job ajämijadeje. Èhuni jemë huë vavaene baeromo biririvë'ohoho God-ro jemë'o ajëmi'ë'e.

¹² Nasi ö mueno'e ave jögoru börömo börömo here. Jemëhu jö atë'iroho nadi ö'idö ihorohoho o sa'a ihorohoho o bövi bise'o ihorohoho atorego darugo'e jöho jio'iro. Nadi ëhioho ë'i a ejahohoho ma-uvore: Io'ajo. O bogo ejahohoho ma-uvore: Bogajo. Èhemu uvore. Èhemu uvë'ohoho ëhuro God-ro bogo mevëvoromo i'uohoho mana bojëmi'ë'e.

¹³ Röhu jemë ae gö huë vavaeni baejë'ohoho ë ahuro God-are örire ëninami'iro. Ae gö dë sasohë'ohoho huro jöe ioromo God-are örire rajahi'iro. ¹⁴ Ae gö guomo guomo baejë'ohoho huro ekaresia muebejarue a duvahohuni jöe nugö'öjeho rue'iro. Rueromomo jaburo God-are örire ëninamiromomo Badare ihore ijo bajohoho jovohoho otehahohoho. ¹⁵ God mae uehorovoromo

ëninamijë'oho ëhuro Badaro guomo guomo'e aho ajami'iramu marëromu i'ovo'ë'e. O mu sisë rabe rabe vaejë'oho God-ro uehorovoromo vuonugaho'ë'e. ¹⁶Ëhuni mu sisë vaejë'oho ae göëro gö huruoho majahirovonövore. Ëhi'oromo göëro göho uehorovoromo God-are öroro ëninamirego guomo guome o sisë rabe rabe jëvajo marëjëvo'iro. A maehu ëninamijë'oho God-ro börömo mae ajëmi'ë'e. ¹⁷Ëhesi bëhoho jö God-aro baeromo a majëhinövade ae Elijah no va'ëne ae jadeje. Röhu God-are örire birivoromo ëninamijadeje ënoho barëjöro. Ëninamijamu ëni sa'are bogo rovadoho vadune aho'obëhe niö'i gemu röhu manaere aho'obëhe 6 ëhi barëjadeje. ¹⁸Barëjamu röhu maho God-are örire uavamu huro ënoho nugö'öjamu rovamumu sa'are iruno'oho marë'amadeje.

¹⁹Nasi ö mueno'e jemë ae göehu God-are öri ma vuonugo'i aruëre anumëre ma-va'amu gagoro ae göehu ajamijamu öri mare sionehu rovamumu gavë'oho ²⁰jemëro uvore: Ae öri sisëre juvajo ae rahuhu ahoromo mu mae röjahijë'oho ëhuro ë a hesi aru'ahoho ajami'iramu bogo guomo öriroho va'a'ajëjo. O ëhuro God-ro mu sisë aho'obëhe mu'u'amo'ajëjo. Ahia mino'e.

1 PETER

Peter-hu God-are aribövi jejmäde jöhoje.

¹ Iesu Keriso-are apostle Peter naro jemesi örire jejmije. God-hu hesinö baejävade aribövioho jemë jemesi sa'aho vuonugo'i Pontus Galatia Cappadocia Asia Bithynia ë sa'are ma-jahuri raromobe va'aruje aribövie jëve. ² God Vavuohuro hesi nimë'ëro jemë baejävamu hesi Aru'ahohuro jemë avohëvadeje ëhuro jemëro hesi aribövi maemu jioromo Iesu Keriso-are jöho ejaho'irarijigo o hesi köhuro jemë u'ovëvo'iröhego.

Na nege God-ro huë baejëvoromo ajëmi avohego maro raromonövo'irarijigo.

Mae javuoröhego noehu biririvoromo muebejarue jöhoje.

³ Asë'e God hu mabëheje. Hu nosi Bada Iesu Keriso-are Börömeje o göho hesi Vavueje. Ëaho God Vavuoho hu mabëheje. Ëhesi bëhoho huro nosi jöëni börömo mae vavaenimë'ëro Iesu Keriso ajamamu guomoromo ri'öjadohuro ëhuro no'o ajamuamu i'ovoromo mu i'oho baej'ëro nune jioromo biririvoromo muebejarueje mae javuoröhego. ⁴ Noro muebejarueje Vavuehu hesi aribövi no bojamu'iröhe suvuoro mae gö gö baeröhëni. Ësuvuoroho ö'idöre jemëni nugëhë'eje u'emu bae'irarijigo. Ëö'idöre jiaje suvuoroho bogo sagohori'i bogo sisërë'i ma-maemu jiobe va'ë'e. ⁵ Iae jemëhu God ma uehorovarujohuro ëhuro God-ro hesi darugohuro burunö'e aegëhobe va'ajeje ijo tugoho'i majaho rovego evare maro bamëvo'iröhe öroho mami'e avohëhë'ëro evare röjëhijigo ga'irarijigo.

⁶ Huhu maro bamëvo'iröhe öroho uehorovoromo nimoroho avoharujeje. Iae jaruoho God-hu nimë'oho jemëro huë vavaene bövie bise'e baeromo ëhuro majae ma-bunemu vavaenimë'e raromarujeje. Ëhi jie röhu iae nimoroharujeje. ⁷ Huë vavaeni baejaruje hesi bëhoho jemë'o no'o ga'iröhëni jemesi uhohu'o biririvoromo God mae uehorovego. Ëhesi jöho na uhu'e uë'i'e. Gold mae avohö'iröho vëniro buejarueje. Vëniro buejigo ravoromo va'inumoho si'urë barë'i ma-aji mae jiajeje. Röhu gold-ho bogo ioro'ioremu jio'irögoro jemëhu God mae uehorovaruje muoho ma-jiemu jiobe va'ë'e. Ëhi jië'ëro God uehorovaruje muohuro gold-ho iosiramiro mo ma-mabëheje. Röhu vënehu gold buejigo ravajëhi huë vavaenohuro jemesi örire ëhi vëninö'e ravëvajeje. Röhu gold vëniro buejigo ravoromo sisë si'urë barë'i aho'o ma-maemu jiego gavaruëhi jemë ëhi huë vavaenoho baejarujeje ëhuro jemëhu God uehorovarujoho biririvego jemë'o no'o garomo uvoröhëni: Jemë huë vavaene baeromo biririvoromo God mae uehorovobe rovë'ëro ëhu'ëro jemesi uhohu'o God maemu uehorovaruje höjo. Ëhi uvego Iesu Kerisoro a nuniro rovego evare God-ro jemesi ihoho döro bamëhoromo rajëhiromo mabëhe uë'röhego. Ëhu'ëro jemë huë vavaenoho baejarujeje. ⁸ Amo Iesu Keriso rue'iramu jemesi ihoho ëhi ma-maemu jiëho'ë'e. Avevejö'oho jemë hu bogo gavë'e jemesi dë vövöbajo'o uhure hesi örire uehorovarujeje. Jemë hu bogo nunoho gavarujeje röhu hu mae uehorovoromo nimoroho avoharujeje. Nimoroharuje jöho börömo bëhe jië'ëgo ë hesi jöho bogo ato varijënoho jëve. ⁹ Jemëro uehorovoromo uvarujeje: Noehu Keriso mae uehorovarue hesi bëhoho ijönö God-ro nosi dë vövöbajo'oho maro bamahu'iramu iae mae javuo'ajë uvoromo huë mabëhe jëvego nimoroharujeje.

¹⁰ Urimo Keriso bogo rovadevare evare God-hu jemë mare bamëvoröhe jöho jö hesirire baeromo majëhinövare a mamiohuro majëhinövareje. Majëhiromo röhu ë jö hesi bëhoho avo'avoho nahareje ga'i ë muoho diehi jiego. ¹¹ Kerisohu vi'ehi baeromo guomoromo ijönö aji bae'iröhe jöho Keriso-are Aru'ahohuro jabumë röjëhijamu simanore baeromo bëhoho nahoromo uvoromadeje: Ëhi jië'e muoho divare diehi jio'a'ajëjo. ¹² Bëhoho nahamu God-ro röjëhijamu garomo uvareje: Noehu jajivarue mu mabëhoho jaruvo ave sa'are raromaruoho no bogo ga'i ijönö raromoruomöhe ariböviohuro garuomö'ajëjo. Ëjöhö God-ro röjëhijamu baejareje. Röhu avevejö'oho ë muoho jemë iae hejë'e jëve. God-hu ö'idöre jiamu noni nugö'öjade Aru'aho hesi uehoroho baeromo aëro ë mu ma hesi jöho

huruoho majëhijamu hejarijeje. Ĕmu ma hesi bëhoho aneraho jahu'o he'i nimoruome rôhu bogo eni jëve.

Noehu mu sisë bogo gavanovo'i mu maemu vaeröhego God-hu uövuađe jöhoje.

¹³ Ĕhuni nune jioromo mue vae'i avo'avoho uehorovore. Iesu Keriso a nuniro rue'iramu God-are aji maho bae'a'aruje. Ĕjöhuremu avo'avoho uehorovë'e raromore. ¹⁴ Ĕhi uehorovë'e raromoromo God-are jöhuremu ejahonövore. Mami'e God-are jö bogo hejarije majare jemesi sinehu nimajohemu vaejarijoho Ĕhi jië'e mu öriroho nadi jijihore. ¹⁵ Nadi Ĕhioho jijihoi'a'i mue bövie bise'e vaejë'iroho dë vövöbajo'o uhohu'o ma-mae jioromo raromo jijihonövore. God-hu jemë hesinö jëvojöro uëvade aho hu ma-maemu jiajëhi Ĕhi jioire. ¹⁶ Ĕhesi bëhoho God-are surire jöho uvë'eje: God na ma-maemu jevë'e jiaje Ĕhuni jemë'o ma-maemu jiorëjo. Ĕhuni Ĕhi ë'onörovore.

¹⁷ God-ro bogo nue gö gö uehorovoromo gö'i a'i ma-gemu göromo nosi muoho diehi jiego garomo mae o sisë uövuađeje. Ĕhi jië'e aho jemë Vavuoho hö uavarujeje. Ĕhuni ave sa'are ma-jahuri raramarujoro God böromoho hö uehorovë'i raromore. ¹⁸ Ĕhesi bëhoho jemesi hijo miono'ohuro Keriso bogo uehorovë'ëro bëhi rumo'e muoho röjëhibe rovamu jemëro Ĕhemu ejëhoromo sisë hesi darugoremu raromonövarijeje. Ĕhi jëvë'ëro God-hu nimaje muoho bogo vae varijënoho jëvadeje. Ĕhi jëvamu God-ro ajëmijë'ëro mae jëve. Röhu jemë'o iae gavarujeje. God-ro jemë ajëmi'irögororo ijo bajoho o bövi bise'o maho bogo Ĕho bu'öromo Ĕhuro ajëmijadeje Ĕhi jië'e inömo ho ma-jahuri inöme jië'ëgo. ¹⁹ A'i Keriso-are kö maho bamoromo Ĕhuro mae ajëmijadeje. Ĕhesi bëhoho urimoroho Jew rajëro God-ni suvuoro bamaho'ië'iroho sheep harihe ma-mahuremu muo'amoromo suvuoroho bamahonövarijeje. Keriso Ĕhi jië'e suvuoro maemu jadeje. Ĕhi jiamu God-ro hu bamadeje jemëni guomoröhego. ²⁰ Jemëni guomoröhego sa'ae bövie bise'e bogo bamadevare God-ro hu baejadeje. Amo ave ijo tugohoi' majare jemesi jöëni God-ro hu nugö'öjamu a nuniro rovadeje. ²¹ Rueromo jemë ajëmijë'ëro Ĕhu'ëro jemëro God mae uehorovarujeje. God-ro Keriso ajamamu ri'öromo aji maho baejë'ëro Ĕhu'ëro jemëro God gemu uehorovoromo uvarujeje: Iae huro no'o ajamui'ajëjo.

²² Röhu God-are jö maho ejahoromo Ĕhuro mu sisë uehorovarijoho vuonugë'e jëve. Vuonugo'irögororo Christian ö mueno'oho bogo ma-döemuoho a'i dë vövöbajo'o uhohu'o uehorovëvë'e jëve. Ĕhuni göëro göho dë vövöbajo'e aho'o uehorovëvo avohore ²³ Ĕ hesi bëhoho jemë Christian vaeromo Ĕhuro harihu abojile i'e rahëvanovamu i'oro aevoromo biririvë'e jëvaje. I'o rahëvade hesi bëhoho vuovëvo'iröhe vëmu vavu'o jabesi ujoho bogo bamëvo'i a'i God ioro'ioyemu hijaje a hesi ujoho bamëvadeje. God-are ujo hesi bëhoho iae God-are jöjeje. Hesi jöho darugo bojëmijaje ioro'ioyemu jioröhe jöhoje. ²⁴ God-are surire jöho Ĕhi gemuoho uvë'eje:

Ae aho'obëhe garasi va'ëne jio'amajëjo.

Inöme bövie bise'e mabëhe hö uehorovaruoho Ĕho resu resu ino va'ëne höjo.

Röhu garasioho sahori'amaje höjo.

Resu inoho rireromaje höjo.

²⁵ A'i Badare jöho Ĕhi jiemu jiobe va'aje höjo.

Ĕjöhö iae Keriso-are jö ma aehu majëhijamu hejarijohoje.

2

Bada Iesu hu munë va'ëne jiaje jöhoje.

¹ Jemë i'e rahëvanovë'e aribövie jëvë'e jiaje Ĕhuni mu sisëho aho'obëhe vuonugore. Sareri sareri'e muoho döëremu mae vaejaruje muoho vuonugore. A jabesi mu mahuni dë vöronëgajoho vuonugore. Jö sisëho vuonugore. ^{2,3} A'i jemëro mami'e herovarijeje Badaro jemë huë baejëvamu. Huë baejëvamu herovë'e jëvaje Ĕhuni i'e rahëvë'e asisö'ëhu amu rihu ue'aho'i nimoruomajëhi Ĕhi dë vövöbajo'o hesi amu maho ue'aho'i nimonörovore. Ĕhi jië'e amu ue'ahë'oho jemesi aru'ahoho biririvobe va'öjuvo ijönö a duvaho va'ëne jioromo maro raromaruje. ⁴ Röhu jemëro Bada Iesuarinö ruere. Hu hesi darugoremu

hiromo darugo bojamuijaje ahoje. Hu munë va'ëneje. Ëmunëho aëro sisë hö uvoromo vuonugamu God-ro maego hesi baejadeje. ⁵Röhu jemëro Iesuare darugoho baejë'e jëvaje hesi öroro rovego God-ro jemë munë gagovëvanovoromo hu'o havëvoromo javu böröme vaejëvanovo'iro jemë gemuoro jëvego hesi Aru'ahohuro ë va'o hi'iröhe. Ëosa börömore jemë ë rumo va'oromo priest muoho vaenövo'aruje. Jew rajo priest-ehu God-are osa börömore rumo va'oromo God-ni suvuoro bahijaharëhi jemëro ëhi priest muoho vaeromo jemesi dë vövöbajo'o suvuoroho Iesu Keriso-are jöëni God-are örire bojaminövo'aruje. Ëhi jië'e suvuoro bojamijë'o ho God-ro garomo nimajeje. ⁶Ëhesi jöho God-are surire jajivoromo uvë'eje:

Ëhuro gahëjo. God naro munë va'ëne aho Zion bamajëjo
huro munë'nö'e biriri'e bönu mabëhëro namijego ëhuro javuoho bibivoröhego.
Ae rahu ë aho mae uehorovë'o ho bogo javojimo ga'a'ajëjo.

⁷Mae uehorovarue aribövioho jemëro uvarujeje: Ëmunëho iae mabëhe höjo. A'i bogo ma uehorovarue aribövi jabesi jöho God-are surire jajivoromo uvë'eje:

Munë javue vae'irögoro munë gemu bijönimoromo vuonugare höjo.

Vuonugaroho jaruvoho ë munëhuro javuoho nigemo'ego bibivoromo mae namijajëjo.

⁸Röhu jabesi jö göho jajivoromo ëhi uvë'eje:

Aëro ë munë va'ëne are ro biberovo'aruëjo.

Hesirire ro rirerom'aruëjo.

Biberovarue hesi bëhoho God-are jöho juahobijioharueje God-ro ëhi jië'e i'luoho bamëhë'ëro.

No God-are aribövie javuaje jöhoje.

⁹A'i jemë God-ro baejëvë'e aribövie jëve. Hu'o masije riravaruje priest ömo'öme jëve. Ma-maemu jëvë'e aribövie jëve. Hesiremu jëvaje hesi bëhoho jemëro hesi mu mabëhi hesi jöho ae majëhi'irarijego rabëni jemë ramoramore raromamu huhu baejëvoromo hesi aji mare bamëvadohuni ëhuni ae majëhi'irarijego. ¹⁰Urimoho jemë iho rumo'e aribövie jëvadeje. Jaruvoho God-are aribövie jëve. Urimoho God-are huë maho bogo baejarijeje. Jaruvoho hesi huë maho baejë'e jëve.

No God-are muemu vaejarue aribövie javuaje jöhoje.

¹¹Aganomë na jögore bojëmi'irögoro ë'e. Jemë ave sa'are raromarujoho sa'a göre ma-jahuri raromarue aribövioho va'ëne jëvanove. Ëhuni uëve jemesi sinehu mu gö gö nimoromo aru'ahohu'o umogihajoho nadi gavanovore. ¹²A'iro God bogo uehorovarue ariböviohu'o raromoromo mu maemu vaebe va'ore. Ëhi ë'ë'oho jabumëro jö sisë bu'öromo jemë sisë vaejaruje hö uëvaruoho röhu gë'iröhe jemë mu mae vae'iramu gëgorovo va'o ëho majaho rue'iramu God-are ihoho mae ua'ë'o.

¹³Röhu Badare jöho uehorovoromo aehu masijo bahi'amare aribövioho aho'obëhe jabesi jöho ejëhore. Aehu böröme namiromo nosi sa'ae aho'obëhe muebejavuajoho ejahore. ¹⁴A börömo hesi bëhire raromoromo sa'are mu muebejëvaruoho ejëhore. Ësa'are a börömo huro jabumë rëmö'öj'ëje mu sisë'e aribövioho i'ue bojëmi'i mu ma'e aribövioho mae uëröhego. ¹⁵Jemëhu a masijo ejëho'irarije hesi bëhoho God hu nime jemëro mu mae vaejego sisë'i uehorovarue ariböviohuro ëho garomo simano rumo'e jöho vuonugoröhego. ¹⁶Röhu aehu a gö jabesi darugoremu raromoromo jabesi muemu vaejaruëhioho nadi ëhioho raromo'i mae raromo jijihore. Ëhi'ore röhu nadi uvore: No bogo a darugoremuoho raromo'i iae no nosi mae raromo jijiharuëromo ëhuni ri'öromo mu sisëho vaere. A'iro uvore: No God-are darugoremu raromoromo hesi muemu vaejarue aribövie javuajëromo mae raromo jijihore. ¹⁷Ëhi'oromo ae aho'obëhe rajëhire. Christian ö mueno'oho dë vövöbajo'e aho'o uehorovëvore. God böröme hö uehorovore. Sa'are böröme namiromo muebejavuajoho rajahire.

Kerisohu huë vavaeni baejadëhi no'o ëhi huë vavaeni baeröhe jöhoje.

¹⁸O ae gö jabesi darugoremu raromoromo mu vaejëharuje aribövioharo jemesi mu simano vaejarue aribövioho masije hö uehorovoromo jöho ejëhonövore. Jemesi a

masijehu a mae jioromo sanu'e jöemu majëhijë'oho ejëho'i röhu vörö'e aribövioho jabu'o ejëhonövore. ¹⁹ Èhi jië'e sisë aribövi ejëho'irarije hesi bëhoho jaehu God-are jö uehorovanuohuni aehu huë vavaeni ëma bojamamu ma-herovë'i taemorovoromo hijë'oho God-are huë maho bae'a'anue. ²⁰ O jemë mu sisë vaejamu aehu muo'amëvamu jemëhu ma-taemorovë'oho no rabëni uvo'ejo: Jemë taemorovarujohuro jemesi ihoho ajiomë'e höjo. A'i jemë mu mae vaejë'iro huë vavaeni bojëmamumu ma-taemorovë'oho ëhuro God-hu gavajoho maeje. ²¹ Rabëni hesi bëhoho God-ro ëhi jië'e huë vavaeni'e muoho jemesi örيره bojëmijë'eje. Keriso hu'o jemesi jöëni huë vavaene baejadeje. Huë vavaene baeromo ëhuro jemëhu diehi ë'irarije muoho röjëhijadeje huhu ë'adëhi jemë'o ëhi ë'irarijeho. ²² Hu mu sisëho bogo vaejadeje. Sareri'e jöho bogo jövadeje. ²³ Aehu sivohijaroho bogo mana sivëgonövohijo. Aehu vi'ehi bojamihijaroho hu bogo jö darugo'oho mana majëhinövohijo. A'i hesi arijo'arije God-are övo döre bamorovadeje hu mae mevoromo gavaje aego. ²⁴ Èhi'oromo huro nosi sisë hesi i'uoho hesi sino haho'ere baeromo korosire guomadeje ëhuro no vuovanovoromo öri sisëho ioro'iore gemu vuonugo'i i'ovoromo öri maremu jijihoröhego. Huhu vi'ehi baejadohuro ëhuro jemë sisë'i raromarijoho marëjëvë'eje. ²⁵ Sheep-ehu sidövanovoromo jijiharijoho jaruvoho sheep o jemesi aru'aho muebe'amaje a hesiro vuonorö'ö rovë'e jëve.

3

Vaboro'o baru'o diehi ë'iröhe jöhoje.

^{1,2} Röhu vaboroharo jemesi baru jabesi jöho ëhi ejëhore. Ejëhorego baruehu God-are jö bogo ma uehorovë'oho vaboro jemesi Christian jöho bogo hejë'e jemesi muohemu garomo ga'iro jemëro God böröme hö uehorovoromo mu ma-maemu vaejeho gëromo huotorovoromo Keriso mae uehorovoruomo'iro. ³ Röhu jemë mae jëvego baruehu gëjöro nimë'oho nadi sinemuoho rajahirovoromo ijo bajo börömo bu'öromo ëhuro simano uoho avohorovoro nieniaho niögoho bövioho bise'oho imoromo io'amego mae jëvego gë'iro. ⁴ Nadi sinemuoho uehorovo'i a'i dë vövöbajo'o uhuhu'o avohorovego gë'iro jemesi muoho mae jiego. Sino avohorovë'oho mavojirojëvo'iramu sisë'rëjëvo'ë'e. O dë vövöbajo'o avohorovë'oho gë'ë'ö mae jëvemu jëvobe va'iramu. Dë vövöbajo'o avohorovo'irarije hesi bëhoho ma-u'emu taemo raromo'irarije jöhoje. Jemë ma-u'emu taemo raromë'oho God-ro gëvajeje jemë ma-mabëhe jëvego. ⁵ Urimore God gemu uehorovonövare magonaho ömo'ömehu jabesi dë vövöbajo'o avohorovarëhi jemë'o ëhi avohorove. Jabu ëhi ma-u'emu taemo raromoro avohorovoromo jabesi baruoho ejëhonövareje. ⁶ Èhi jië'e magonahe gemu Sarah-ro hesi barue Abraham-are jöho ëhi ejahoromo hesi örيره uanövadeje: Nasi böviohajo. Jemë bogo nurunurumoromo juhuonivo'i a'i mu mae vaemu vaejë'oho ëhuro jemë Sarah-are aboji ömo'ömo ho va'ëne jëvanovo'ë'e.

⁷ Röhu baruoharo jemesi vaborohu'o gemuore raromarujevaro ëhi avo'avoho uehorovoromo raromore. Uvore: Ama'i nosirire jiaje darugoho ëhi jië'e darugoho magonaho jabesiriroho bogohöjo röhu jabu'o no'o God-are harihu aboji'ëro javuë'ëro huro no ajamui'iramu ioro'ioiremu hu'o maro raromolejarëromo vaboroho rajëhire. Vaboro rajëhijë'oho ëhuro jemëhu God-are örيره jö ataruje muoho bogo sisë'rë'ë'e.

Noehu mu ma vaejeho aehu bijönimoromo huë vavaeni bojamuijarue jöhoje.

⁸ Röhu jöe gemu ijo tugoho'ioho majëhi'iramu iae barë'ë'e. Jemë ae aho'obëhe jöe gemu uehore gemu baeromo ö mueno'ehu rajahirovaruëhi ëhi huë baeromo rajahirovoromo ma-taemo raromore. ⁹ O ae göehu sisë vaejëvë'iroho nadi mana jabesi öriroho sisë vaejëvore. O jö sisë uëvë'iroho nadi mana jabesi öriroho jö sisëho uë'i a'i jemëro God uavego huro jabumë mae vaejëvo'iro. Èhesi bëhoho God-ro jemë hesinö jëvojöro uëvadeje ëhuro jemë mae vaejëvego maro raromo'irarijeho. Èhuni jemëro hu uavego a ioro'iorohu'o mae vaejëvo'iro. ¹⁰ Jemëhu ëhi ömo'irarijoho God-are surire uvë'eje:

Ae rahu mae hi'ie'iroho
sine sasohoromo juvo'ie'iroho

bitare taemoromo jö sisêho nadi bu'önêjo.
Jö'e tugohoromo nadi jöho ruêroho numêroho ma-jövonêjo.

¹¹ Mu sisê vaejanuoho gororomo mu maemu vaenêjo.

A'o mae avoho hi'i sivoho avohonêjo

¹² rabêni hesi bêhoho Badare nunoho ma aribövi jabesiroho bogo ahoro'i
ëninamijaruoho hejêho'i

sisê aribövioho deje bojêmaje jiaje.

¹³ Jemê mu mae vae'i êhemu uehorovê'oho rahuro jemesi ôriroho sisê vaejêvo'ê'e.
Aho bogo sisê vaejêvo'ê'ö. ¹⁴ Röhu jemêhu mu mae vaejamu aehu bijönimoromo huê
sisê bojêmamumu baejê'ohuro êhuro jemê maroho jêvo'ê'e. Nadi aho juhuonêmiromo
nurunurumo'i ¹⁵ dê vövöbajo'ohuro uhoro uvore: Keriso bôrömêro jiê'êro Bada hõ uvoromo
hu gemu mae uehorovore. Hu gemu mae uehorovoromo he'irarije God-are jö bogo
heruomê'e ariböviehu jemê uêvamumu: Mu maehu rueröhego uehorovaruje hesi bêhoho
majahuihego hejarê uêvamumu hejê'ohu simane sasohoromo bêhoho røjêhire. ¹⁶ Röhu ma-
u'emu sanu'e jöhemu røjêhiromo mu maemu vaerego êhuro jemesi dê vövöbajo'oho
marêjêvo'i êhuro jemêhu Keriso-are ijore ijore jijihoromo mu mae vaejarujoho êho
aehu sivêgê'ohu jaburo jemesi muoho garomo javoje bae'iröhe. ¹⁷ Mu sisê vaeromo
vi'ehi baejê'ohu sisê jio'i a'i mu ma vaeromo God-hu nimamu vi'ehi baejê'ohu êho
iae maeje. ¹⁸ Keriso hu'o a maêro jiê'êro sisê'e ariböviohuni uehorovoromo ma-gemu
guomadohuro êhuro jemesi sisêho ma-ioro'ioerumu mu'uvêhadeje êhuro jemê God-are
ôrire sôjêvo va'oröhêni. Hesi sino haho'ohu guomo'i rôhu hesi aru'ahoho i'ovadeje. ¹⁹ Hesi
aru'ahohuro i'ovoromo va'o aru'aho ioro'ioerehu savoji gago val'ênire sisê'i raromaruire
ê va'oromo jöho majêhijamu herumadeje. ²⁰ Röhu ê hesi urimo Noah-hu hijadevaroho
evaroho ê aribövioho bogo vuovê'e sa'are raromareje. Sa'are raromoromo God-are jöho
bogo ejahonövereje. Jöho bogo ejaho'ego Noah-ro boat bôrômoho vae'ego God-ro êhi ma-
hiromo muebejêvonövereje ê ariböviohuro avoho uehorovoruomojöro. Muebejêvamumu
jöho bogo ejahareje. Bogo ejahamu ae ma-vemino'e ae aho'obêhe 8 boat-re rumo va'amumu
jovo dôre jêvoromo êhuro mae jêvadeje. ²¹ Êjovehu uhu'e ê'adoho jovehu bapataeto
vaejaruêhi êhi jianove. Êhesi bêhoho jemê bapataeto vaejê'ohu sisê'i raromego God-ro
jemê baejêvoromo maro rêmege mae jêvaveje. Bapataeto hesi bêhoho bogo sinore jiaje
va'inumoho dibojöro bogo êhunioho jovoho eguo'i a'i bapataeto hesi bêhoho bapataeto
vaeromo jemê God uavarujeje: Nosi dê vövöbajo'ohu avohahuego no uvo'irarêjo: Nosi
sisêho iae u'ovahu'e hõjo. Röhu bapataeto vaeromo jemê bogo sisêroho va'i mae
raromarujeje rabêni Iesu Kerisoro guomoromo ri'ôjê'êro êhu'êro. ²² Iae Iesu Kerisoro
ri'ônugoromo ô'idöre ajiomê'êro God-are övo manö bôröme namiromo anera'o ô'idöre
raromoromo darugo baejê'e aru'aho ioro'iorohu'o jabesi ôrire huro jöho bojêmege hu
gemu ejahoruomajeje.

4

Sinehu nimaje mu vaejaruoho vuonugo'i God-hu nimaje mu vaeröhe jöhoje.

¹ Kerisoro hesi sino haho'ere vi'ehi baejadeje. Vi'ehi baeromo mae uehorovadêhi jemê'o
êhi gemuoho uehorovoromo êhuro avoho biririvore. Ae rahu jabesi sino bogo uehorovo'i
Keriso-are jöêni vi'ehi jabesi sino haho'ere baejê'ohu êhi jiê'e aribövioho mu sisêmu vae'i
nimaroho vuonugê'ejö ² êhuro sa'are raromo'iröhe maja vituroho sinehu nimajohemuoho
bogo uehorovo'i a'i God-hu nimajohemu uehorovê'e raromo'iröhêro. ³ God-are jö bogo
heruomaje ariböviehu ömo'i nimoruomajêhi jemêhu urimo êhi ömonövarijoho iae eni
jiê'eje. Urimoho jemêro öero ê'anovoromo dêre ri'ôjêvego bövie bise'e êma ömonövar-
ijeje. Jovo sisê iromo simane sisêrênövarijeje. Mahêro gemuoro uruvanovo'amonövar-
ijeje. Söröro romanovoromo vörö'e jovemu ue'ahonövarijeje. Uehore sisê'i baeromo
uvonövarijeje: Inöme gö gö aru'aho'e hõromo uvene aho røjêhinövarijeje. ⁴ O jaruvoho
jemê God rumo'e ariböviohu'oho bogo gemuoroho sisêho vaeromo bövioho bise'ohu
êma ê'oromo ruêroho numêroho êma jijiharujeje. Jemê bogo êhioho ê'ego gêromo ê

ariböviohuro uvarueje: Noehu ë'aruëhioho jabumë rabëni bogo ëhioho ë'arue höromo tiöjarueje. Tiöromo jemesi ihoho ijumëharueje. ⁵ Ijumëharuoho ijönö mu sisë rabe rabe ë'aruoho God-are örire huruoho majëhi'ë'ö huro ave sa'are raromarue ariböviohu'o mami'e vuovade ariböviohu'o mevavuo gö'iröhëro muebejavuoromo hijajego. ⁶ Èhuni vuovë'e aribövi jabesi örire Keriso-are jö majëhijamu hejare hesi bëhoho ëhuro ma-aehu sisë hesi mana nosi sino haho'ere baeromo vuovaruëhi jabu'o ëhi sisë hesi mana sino haho'ere baeromo vuovëvadoho God-hu biririvoromo hijajëhi jabesi aru'ahoho ëhi mae raromoröhego.

Mu vaeröhe suvuoro God-hu bojamuijajoho avoho mueberöhe jöhoje.

⁷ Bövi bise'o barë'iröhe majaho dunove. Èhuni taemorovoromo avoho mueberovë'i parie vaenövore. ⁸ Röhu avehö böromöho jiaje ëhuremu uehorovore. Göëro göho dë vövöbajo'e aho'o uehorovo avohore rabëni huë baerovaruohuro mu sisë aho'o mu'u-vahuaje jiaje. ⁹ Röhu ga'irarije Christian ö mueno'e vejë'e i'e rovamu gavë'iroho uëre: Nosi osaro ro raromöhëre. Nadi i'uhö'i dë vövöbajo'e sasohoromo ëhi jië'e muoho vaere. ¹⁰ Röhu God-ro hesi nimoromo suvuore gö gö ae gö gö bojamuibe va'aje jiaje ëhuni God-hu diehi jië'e suvuoro bojëmamu bæjarijoho avoho muebejahoromo ë suvuorohuro göëro göho ajamirovore. ¹¹ Jö majëhi'irarije suvuoro baeromo God-are aribövi majëhi'ie'iroho God-are jöhemu majëhire. A ajëmi'ie'iroho God-hu bojëmaje darugoho baeromo ë muoho vaere. Mue bövie bise'e avo'avoho vaejego aëro gëromo uvö'iro: Jemë Iesu Keriso-are aribövüero jëvë'ëro ë'arujë uvoromo God-are ihoho dö maro bamoruomo'iro. Aji maho darugo maho hesiremu ioro'ioyemu jiemu jiobe va'ë'e. Iae mae.

Keriso'o bimuvoromo huë vavaeni baeröhe jöhoje.

¹² Aganomë huë vavaenoho jövëro ruomanovajeje God-ro gërohëgo jemë biririvego o bogo. Huë vavaeni bæjarujoho nadi uvore: Diehi'ego ë'ajëromo tiö'i ¹³ ma-uvore: Kerisohu huë vavaeni bæjadëhi no'o ëhi gemuoho bæjaruëromo nimorohore. Èhi jië'oho ijönö Kerisoro hesi ajoho röjëhi'iramu garomo jemë nimoroho avoho'aruje. ¹⁴ Aehu Keriso-are jöëni jemë sivëgë'oho huë mae jëvajeje rabëni God-are aji'e Aru'ahohuro jemë aegëhë'ëro. ¹⁵ Röhu jemëhu a anamu guomë'oho o vajohehu bæjë'oho o mu sisë gö gö vaejë'oho o ae gö jabetesi mu ëma ahobe jijihë'oho ëho sisëje. Nadi ëhi jië'e muoho vaeromo ëhuro huë vavaenoho mana baere. ¹⁶ O Christian jëvamu aehu bijönëgoromo huë vavaeni bojëmamu bæjë'oho nadi javojoho bæ'i Keriso-are ihoho bæjë'e jëvaje ëhuni God-are öroro huë mae uare.

¹⁷ Noehu vi'ehi bæjarue hesi bëhoho God-hu mevavuo'iröhe majaho mami'e aevë'eje. Iae hesi aribövire bëhe vaeromo mevavue. No rabe gavaruoho ma-i'e aevajoho röhu va'öjuvo ijönöho God-are jö ma bijönimarue aribövioho diehi jëvo'ë'e. ¹⁸ God-are surire jöho ëhi gemuoho jajivoromo uvë'eje:

Mu mae vaejarue aribövioho bogo ëma maroho va'i huë vavaenëro anojamuijuvo ë hesi ijönö evare maroho va'o hesi javuajëjo.

Èhuni God dejo bojamiromu mu sisëmu vaejarue aribövioho diehi jëvo'ajëjo.

¹⁹ Èhuni God-hu nimajëhi huë vavaeni bæjë'oho uvore: No ave sa'are bamavuade ahuro ajamu'i uvadëhi ëhi ajamuijajëromo mu mae vaeromo jemesi arijo'arije hesi övo döro bamorovore.

5

A duvahuhe God-are ö mahu'o avoho muebe'amo'iröhe jöhoje.

¹ O God-are ekaresia muebejëvaruje a duvahoharo nasi jögoru harihoho gare. Na'o ekaresia muebejëvaje a duvahe jeve. Naro gavodeje Kerisoro huë vavaene bæjamu. Röhu u'emü Kerisohu hesi aji ma röjahuijë'iroho huro nasi örire bojemi'iramu na'o hu'o gemu mae ajoho bæ'ejo. Na ëhi jië'e aëro jëvë'ëro ëhuni ave jöho majëhi'ie'e. ² God-ro hesi sheep-oho bojëmiijadeje jemëro muebejaho'irarijego. Èhuni jemëhu hesi sheep muebejëvë'iroho nadi ë muoho bijönimë'i muebejëvo'i a'i God-hu nimajëhi ëhi muoho

nimoromo hesi sheep-oho muebejövore. Nadi moniemuoho uehorovoromo muebejövö'i a'i muoho dë vövöbajo'e aho'o nimo avohoromo God-are aribövioho muebejövore. ³God-hu jemesi övore bamëvade aribövioho nadi masije jëvajë uvoromo i'ue gö gö bojëmi'i a'i mu mae vaeromo öroho röjëhirego jaburo gëromö ëhi ë'irovo. Ëhi muebejövore. ⁴Ëhi ë'ë'öho Sheep Muebejavuaje A Börömehu rovë'iroho ioro'ioeremu jioröhe aji'e suvuoroho bae'a'aruje.

⁵O a i'oharo a duvaho jabesi jöho ejëhore. Röhu ekaresiae aho'obëhe jemëro ma-u'emu taemorovoromo huë baerovoromo ajamirovore. God-are surire jöho ëhi gemuoho uvë'eje: Biriri'övoromo masije javuajë uvarue aribövioho God-ro ahëvaje höjo.

Ma-u'emu taemo raromarue aribövioho God-ro hesi nimoromo huë baejëvoromo ajëmaje höjo.

⁶Ëhuni uvarujoho: No masije javuajë uvarujoho vuonugo'i uvore: God-ro gemuëro darugo'ëro jië'ëro böröme namiromö no muebejavuaje höjo. Ëhi uvë'öho majae eni jio'iramu huro ajëmi'iramu jemesi ihoho döro ajiomö'e'e. ⁷Röhu nurunuruëgajoho aho'o God-are öroro bojamire hu jemesi jöëni uehorovaje jiaje.

⁸Röhu nune jioromö gavë'i raromö. Satan hu jemë'o muorovaje aeje. Vörö'e miehu darugo'o uvobe mi ja'ihö'i nahobe juvajëhi Satan-ro jemesi örire ëhi ë'ajeje. ⁹Satan-hu ëhi ë'ë'öho biririvoromö God mae uehorovoromö ëhuro ahore. Ahoromö uvore: Nosi Christian ö mueno'e aho'obëhe sa'ae dinö'e dinö'e raromoruomajoho ëhi jië'e huë vaenoho baeruomaje höre. ¹⁰Jemë majae ma-bisemu huë vavaene baebe va'oromö majae ijönö God-ro ajëmiromö jemesi dë vövöbajo'oho avohëhoromö daruge bojëmi'iramu ëhuro ma-mae jioromö munënö'e biririvoromö riravo'aruje. God-ro huë baejavuoromö bövive bisë'e ajamuajeje. Huro uëvadeje jemëro Keriso'o gemu mae jioromö hesirire ioro'ioeremu jiaje ajoho bae'irarijego. Ëhuni iae ajëmi'ë'e mae jëvoröhego. ¹¹Hesi daruge jiajoho ëhi gemuoho jiemu jiobe va'ë'e. Iae mae.

Peter-hu ijo tugoho'i jajivoromö jejëmijade jöhoje.

¹²Silas-ro na ajëmiromö ave surire jö harihoho jajivë'e javue. Na uehorovoromö uvajeje: Hu Christian ö mae höjo. Röhu na jajivode hesi bëhoho jemëro adahego dë vövöbajo'e mae jëvoröhego. O göho naro gavë'ëro ëhuro majëhiromö uë'irodëni: God-are huë ma'e öroho ëhi höjo. Ëöroho bogo sareri'ehu jio'i iae mae höjo. Biririvoromö ë örohuremu jijihorëjo. Ëjöho majëhi'i negamu ave suroho jajivë'e jeve.

¹³Babylon amore raromarue ekaresiahuro jemesi örire jejëmijareje God-ro jemë'o jabumë'o baejëvamu hesi aribövive jëvë'ego. O nasi Christian harihe Mark-ro jemë jejëmijadeje. ¹⁴Keriso-are aganehu rajahirovaruëhi ëhi jejamirovore.

Keriso-are aribövive aho'obëhe jemëro God-are huë maho baeromö raromö. Ahia mino'e.

2 PETER

Peter-hu Keriso-are aribövi jejmijade jöhoje.

¹ Simon Peter na Iesu Keriso-are muemu vaejahaje ae jevoromo hesi apostle jeve. Keriso mae uehorovaruje aribövioho naro jemesi örire jajive. Noehu Keriso mae uehorovoromo aji'e mu ma baejaréhi jemé'o mae uehorovoromo aji'e mu ma gemuoho baejarijeje. Éhesi bëhoho gemu börömëro jié'ëro namiromomuebejavuoromomare bamavuaaje aho Iesu Kerisoro avoho uehorovoromomjemé'o no'o gemuoho gövuajëro jié'ëro éhuni no mu ma bojamuijadéhi jemesi örire éhi bojëmamu baejarijeje. Éhuni naro jemesi örire jejmijaje.

² Na nege jeméhu God'o Iesu nosi Bada ma gëvarujohuro ého jaburo hué baejëvo avohoromomajëmego jemé maro raromonövo'irarijego.

No muoho avoho vaenövo'ejö éhuro uvoröhëni: Iae God-ro no baejavuaade höjo. Éhesi jöhoje.

³ God-are darugoho hesiro jié'ëro Kerisoro mue aho'o ajamuijë'eje éhuro hesi örire avoho jijihö'iröhëgo. Éhesi bëhoho God-ro urimé'i no uövuaajeje noro hesi aji'e mu maho baeröhëgo. Éhi uövuaamu noro hu mae gavareje. Gavé'ëro éhu'ëro huro ajamuijë'eje noro huhu nimaje muoho vaeromomöri mare jijihoröhëgo. ⁴ Éhi ajamuiromoméhuro mu börömo börömohoröhajuijë'eje noro uehorovoromomuvoröhëgo: Iae mae höjo. Ijonö mue gö gö ma-mabëhe ajamui'ajëjo. Ijonö mae ajamui'iröhë jö hesi bëhohomjemëro ého uehorovoromomsa'arohemumuehorovarumeariböviehujabesimanehu nimaruohomöromom sisëjëjaruéhioho jemé bogoméhioho öromom sisëjërovom'irögomom a'i God-are muohom baejëgom hu jiajëhi éhi jëvo'iröhëgo. ⁵ Éhuni aviéhi jié'e muohom avo'avohom vae'i é'o gare. Jeméhu Keriso mae uehorovarujohom mu mae barueromom Keriso uehorovarujemuohu'om gemuorom havore. Mu ma vaejë'ohom God-are öromom avohom garomom mu ma vaejarujemuohu'om gemuorom havore. ⁶ God-are öromom gavé'ohom taemom raromomom God-are öromom gavaruje muohu'om gemuorom havore. Taemom raromé'ohom biririvoromom riravoromom taemom raromaruje muohu'om gemuorom havore. Biririvoromom riravé'ohom God-hum nimajemuohemum uehorovoromom biririvoromom riravarujemuohu'om gemuorom havore. ⁷ God-hum nimajemu uehorové'ohom hué baerovoromom God-hum nimajemu uehorovarujemuohu'om gemuorom havore. Hué baerové'ohom ae gö jabesim öromom dé vövöbajom aho'om uehorovëvoromom hué baerovarujemuohu'om gemuorom havore. Éhi jié'e muohuremum uehorovomom. ⁸ Jeméhu éhim jié'e mu vae avohé'ohom éhuro bogom éma imom nosi Bada Iesu Kerisom garomom muohom vae'i a'i hum garomom muohom vaeromom rae avohom'aruje. ⁹ A'i aehum éhim jié'e mu bogom vaejë'ohom nunesisëjëjëvegom öromom égorohom bogom uherihom'irögomom ma-sa'a hesim muohemum garuomajaje. Mum sisë mamim'e vaejamum God-hum u'ovëhadomom éhom rumonëgë'eje.

¹⁰ Aganomé éhum'e jiaje avohom biririvoromom God-hum nimajemuohom vaenövomom éhuro uvo'irarije: Iae mae-ëjom. God-ro hesinö javuöjöröm nimoromom uövü'e höjo. Éhi jié'e mu vaejë'ohom sa'arohom bogom mae bogom rireromom'aruje. ¹¹ Bogom rireromom'irögomom a'i nosi Bada Iesu Kerisohum no mare bamavuaaje aehum iorom'ioremum muebejaje öromom ari'ere jemërom mabëhe va'iramum huro jemé rajëhim avohom'ë'e.

¹² Éhu'ërom jiajërom éhim jié'e jöhom iae na majëhim'i hinövom'ejom jemé rumonëgöjööëni. Iae jemé é jöhom mamim'e hejë'ërom God-are jö mahom enim baeromom biririvoromom ma'enom titimarujeje. Röhum mahom majëhinövom'ejom jemërom heromom uehorovonövom'irarijego. ¹³ Bogom guomevom'i naehum ave sa'are hibe va'ajevare éhim jié'e jöhom majëhiromom jemesim uehorohom avohëhonövom'ejom. Na uehorovoromom uve: Éhim jié'ohom éhom nasi mue höjom. ¹⁴ Éhesi bëhohom na gavajohom ave sa'arohom bogom égohom hi'i guomom hesim jeve nosi Bada Iesu Kerisorom éhim ma-va'orahomom röjehijë'ërom. ¹⁵ Na jöhom ma-avo'avohom jajivom'ejom na guomevegom jemërom adahoromom uehorovonövom'irarijego.

Peter-mëhu Keriso-are aji nunehum gavare jöhoje.

¹⁶Nosi Bada Iesu Keriso darugo'e a jiaje jöhu'o huhu rueröhe jöhu'o noehu jemë majëhi-jarevare bogo aho ëma uehorovoromo sareri sareri jöho mae avohoromo majahuijamu heromo mae höromo jemë majëhi'i a'i nosi nunëro hesi aji börömohe gavë'ëro jöho majëhihareje. ¹⁷Kerisoro God Vavu hesi örire iho börömohe'ö aji börömohe'ö baejadire noro hu'o riravareje. Riravamu aji börömohe'ö jiajire ë a huëro lesuni uvavohijo: Ave aho nasi Harihu mabëhe höjo. Na hu garomo nimorohevajëjo. ¹⁸Ëhuëho ö'idöre uvamu noro nosi hial'ëro hejareje hu'o gemuore maemu jiaje dahorure riravare majare.

¹⁹Ëhi jië'e jöho hial'ëro heromo muoho nunëro gavë'ëro ëhu'ëro jö God-aro baeromo majëhinövare a jabesi jö surire jajivaroho jemë'o no'o adahoromo mae uehorovo avoharueje. Ëhuni jabuhu God-are jö jajivaroho jemëhu avo'avoho ejëhë'o ho iae mae jëvo'ë'e. Uvore: Surire jöho ramoramovego irehu öri röjahuijigo ë va'aruëhi ë surire jöho ëhi höromo ejahobe va'ëjarëjo hujeji Bada Iesuare majaho rue'i dunovego evare nosi dë vövöbajore garöhëni sisonuvo'ië'ego mujörehu rojomoromo ajivavuajoho. Ëhi ë'ë'oho jemë iae mae jëvo'ë'e. ²⁰God-are surire jöho ejahoromo avehu'o uehorovo avohore: Jö God-aro baeromo majëhiromo jajivare jö hesi bëhi he'i naguë'oho bogo nosi sivu sivuoho jö bëhoho ëma morijovo ga'ëjo. ²¹Rabëni hesi bëhoho bogo aho jabesi ëma nimoromo jöho God-aro baeromo majëhiromo jajivo'i a'i God-are Aru'ahëro jabesi simanoho huotovëho'ego God-hu bojëmaje jöho majëhinövareje.

2

Keriso-are jö huotohuotovoromo majëhijarue aribövi jabesi jöhoje.

¹God-hu bojëmade jöho mae majëhinövareje röhu ae göëro göëro ëma sarerëmiromo uënövareje: No jö God-aro baeromo majëhijarue ae javuajëromomo sareri sareri'e jöho majëhinövareje. Jabesirire jionövadëhi jemesirire ëhi jië'e sareri'e aribövioho jioruomö'ë'e. Jioruomoromo ma-döëremu jö mae atanovoromo Iesuare jöho huotohuotovo majëhinövö'ë'ö. Majëhijamu mae höromo ejëhë'oho sisërëjövö'ë'e. Bada Iesuro hesi köëro imëvoromo jabumë baejëvadeje hesi darugoro raromöjoro. Ëhi ë'adeje röhu jaburo hu deje bojamiruomajeje. Ëhu'ëro jië'ëro sisë hesi manaho ma-majioho baeromo sisërëruomö'ë'e. ²Bogo ë'arue javoji'e mu sisëho vae'iramu ae aho'obëhe jabesi ijore ijore jijihonövö'ë'e. Ëhi'o'iramu God-are öri ma hesi ihoho sisërë'ë'e. ³Monie jabesiremu bae'i nimoromo sareri sareri'e jöho jabesi sivue ëma uehorovoromo majëhiruomö'ë'e jemëro heromo mae höromo ijo bajoho mana bojëmi'irarijigo. Ëaribövioho God-ro mevëvoromo sisëre rëmö'ö'iröhoho mami gö'e aevoromo uehorovobe rovë'ëje. Hu nune jiajëro i'uocho iae bojëmi'ë'e.

⁴Rabëni anera ioro'iorehu mu sisë vaejaroho God-ro bogo ma-nunëremuoho gë'i a'i tövo'amoromo sisëro nugö'ö'amadeje jabumë ë ramoramö'ere va'o raromego huhu mevo gë'iröhe majaho rueröhego. ⁵O mami gö'e sa'are raromo jijihonövare aribövi jabesi sisëho God-ro bogo ma-nunëremuoho gë'i a'i hu bijönimoruomamu gëgorovo jovoho nugö'öjamu börömo bëhe rojomoromo ae aho'o baeniagëgadeje. A'i a ihe Noah mu ma hesi jö majëhinövade ahu'o röhu a ioro'ioroho aho'obëhe 7 ë ariböviohemu i'uocho bogo bojëmi'i avoho muebejëvadeje. ⁶O Sodom'o Gomorra'h'o amo masije niö'i God-ro i'ue bojëmiromo vënëro bue'öjëvamu ravoromo ma-muomöe jëvadeje. Ëhi ë'ade hesi bëhoho God bijönimoruomaje ariböviohuro uvoruomö'öhego: Ëhi jië'e i'uocho God-ro no'o bojamui'ajëjo. Iae ëhuni ëhi jië'e i'uocho bojëmi'ajëje. ⁷Ëamo rajo a ioro'ioroho i'uocho ëhi bojëmi'i a'i a maho Lot ajamamu hu Sodom amore jioromo mae rovadeje. Ëhesi bëhoho urimo Lot-ro amore hiromo ganövadeje amo rajoho jögoroho bogo e'irögoro mabiriri'övoromo öëro ë'anovoruomö'ego gë'i hiromo bijönimo avohonövadeje. ⁸Ëaho a maëro jië'ëro ë amo rajohu'o gemuore hiromo majae ëhi heromo gëromo jabumëro mu sisë vae'ëgo bijönimoromo dë vövöbajore sisërëjövadeje hu a maëro jië'ëro. Ëhi'amu God-ro amoho ijumö'irögoro Lot ajamamu mae rovadeje. ⁹God-ro sisë aribövioho ëhi ijumëvo'i a maho ëhi ajamijë'ëro ëhu'ëro hu uehorovarue aribövioho vavaeni'ere rireromavuo'ië'ëgo

ajamui'iröhoho hu eni jie. A'i sisë'e aribövi taemëvo'iröhoho eni jie i'uoho baemu baejuvo hujeji mevëvoromo i'uo ioro'ioeremu bojëmi'iröhe majaho rueröhego. ¹⁰ Sisë'e aribövioho aho'obëhe jabesi örire ëhi ë'ë'e röhu garöhe aehu jabesi sinehu sisë nimajoho ömoromo öehu jijihanovoromo va'inumi'e mu vaeromo jögoru masijo bijönimamu gëvë'oho huro ë ariböviohu' taemëvoromo i'ue bojëmijajeje.

Ëhi jië'e jö sareri røjëhijarue aribövie jemë'o raramaruohuro biriri'övoromo uvarueje: Noremüeremu masije javuajëjo. Masije javuajëromo bogo juhuonivo'i aji'e aribövie ö'idöre raromarue jabesi jöho sisë'i atarueje. ¹¹ Ëhi ë'arueje röhu anera ma jabesi darugohuro jö sareri røjëhijarue aribövi jabesi darugoho iosiramiromo börömo bëheje. Ëhi jie röhu ë aneraho bogo Badare nuniroho riravoromo anera sisëho agëvoromo jabesi jö sisëho majahijarueje. ¹² Bogo ëhioho ë'irögoro a'i ë jö sareri røjëhijarue aribövioho mahu urejo va'ëne jioruome. Urejoho bogo uehorovanovë'e jabesi ëma jijihago aëro rinovoromo muo'amoromo ujuoho va'arueje. Ëjö sareri røjëhijarue aribövioho ëhi jio'ame. Jabu'o bogo uehorovë'e jabesi ëma jijihoromo bogo ma hejarue gavarue jöho sisë'i atarueje ijönö mahu urejönö'e sisë'ë' amoröhëro. ¹³ Mu sisë vaejarohuni ëhuni i'ue mana bae'ë'ö. Jabumë uvarueje: Dë vövöbajo'o vuëvavuaje hesi bëhoho maja'e a nunire mahehu uruvanovë'oho ëhuro vuëvavuo'ajëromo ëhi ë'arueje. Mahëro uruvanovoromo jabesi sareri sareri'e muoho nimo avohoromo jemesi gemuore ö'oromo ioho ue'ahago evare niögu suhi'ere va'inumi jiajëhi jabesi aru'alaho ëhi va'inumi'e jëvajeje. ¹⁴ Mu sisë vae'i öëro ë'anovoromo magonahoho majae ëhi ërimëharueje. Ëhi jië'e mu sisë vuonugoi'ie'oho bogo eni jëve. O mu göho ë sisë ariböviohuro garöhe bogo biririvoromo mae uehorovarue aribövioho raromamu gëvë'oho jaburo jö sisë røjëhiromo rinëgoromo sö ujuoho va'ego guaro rireromanovajeje. Bövie bise'e ma-bae taemo'i nimoromo vajiohu mu biririvoromo ë'o gabe rovaroho jaruvoho ë muohuro ruaho'amëvë'eje. Ëaribövioho God-ro sisë bojëmi'ë'e. ¹⁵ Öri ahoreihu jijiharoho vuonugoi' aruëre anumëre ëma jijihë'ejö. Ëma jijihoromo a ihe Balaam Bosor-are hariiho Balaam-hu juvade öri sisëre va'ë'ejö. Ëhesi bëhoho Balaam jö God-aro baeromo majëhinövade ae jiadeje röhu hu mu sisë hesi manaho ijo baje bae'i nimadeje. ¹⁶ Ëhi nimamu God-ro ë a hesi uehoro sisëho ahahadeje. God-hu Balaam-are uehoro sisë ahahade hesi jöho aviëhije. Balaam-ro mu sisë vae'irögoro mi ihe donkey döro hiromo örire va'adeje. Va'amu God-ro ë donkey-oho uehoro maho bojamamu ë jö bogo jövajohuro ri'öromo a huëñö'e jöe jövamu hegorovo ë jö God-aro baeromo majëhijaje ahuro simano rumo'e muoho vae'ie'oromo vuonugadeje. God-ro Balaam-are uehoro sisëho ëhi ahahadeje. Balaam-hu öri ma vuonugadëhi ë jö sareri'e røjëhijarue ariböviohuro ëhi ë'oromo mu sisë vaeromo ijo baje bae'i nimarueje.

¹⁷ Röhu ë sisë aribövioho jovehu sa'a gagore rojomoromo sinihajëhi jabumë muoho ëhi sisë'i sisë'i ömarueje. O buru börömehu rueromo sue huosihego arue anume va'oromo öri ari'e tugohego bogo gavaruëhi jaburo mu maho ëhi tugohahuego bogo gavarueje. Jabumë ëhi jëvë'ego ëhuni God-ro röhe nugëhë'eje jaburo ramoramo sisë ma jië'ire ë va'o raromoröhego. ¹⁸ Jö huhe ë'oromo simano rumo'e jöho ëma atarueje. Ëma atoromo öëro jijihanovoromo mu sisë ae røjëhiromo rinovo'amego ëhuro biriri rumo'e ariböviohuro sisë aribövi ioro'ioro jabesi öri avejë'le vuonugaroho uvarueje: Jö mae höromo ejëhoromo röhu maho vuonorö'ö va'oromo ëhuro rireromarueje. ¹⁹ Jemë'o raromarue sisë ariböviohuro ae sarerëmiromo uëvarueje: Noro jemë ajëmi'iramu jemë bogo tövanovë'e aribövioho jëvanovo'i a'i jemë rabe rabe ömo'i nëgë'oho ëma ömonövo'arujëjo. Ëhi uëvarueje röhu jabumë tövëvanovë'eje. I'ue mu hesi darugore jëvë'ëro mu sisëmu vaemu vaejarueje. Ëhesi bëhoho di mu sisëhu ruahö'öjavuë'ohuro ëhuro tövavuanovë'eje. ²⁰ Ëhi tövëvanovoromo sisë bëhe jëvajeje. Ëhesi bëhoho nosi Bada Iesu Keriso no mare bamavuae aho ae rahuhu mae garomo ëhuro sa'a hesi mu sisëmu vaejaroho vuonugoi' mae va'öjuvo röhu huotorovoromo sareri'e jöho mae höromo miehu viöre aeganovoromo sisërejëvë'oho ëhi jië'e aribövioho urimo sisë jëvadoho majae ijönö rireromoromo sisë'ë'amo barë'ë'e. ²¹ Jabumë mu ma hesi öroho bogo ga'ibejo jabumë sisë jio'i röhu

bisemu ma'e jëvanovo'ibejo. Röhu mu ma hesi öroho iae garomo God-are jögöroho bojëmamu vuonugë'ëro ëhu'ëro sisë mae jëvë'eje. ²² Simano ma'e jöe niö'i urimë'i uhunö'e jajivaroho huotovë'oho ëho ëhi jië'e aribövi jabesi jöeje. Jöho ëhi uvë'eje: Öhuro ëgubijiohadire vuonorö'ö rovaje höjo. O jö göho jovo eguahë'e mahohuro vuonorö'ö va'oromo sa'osa'oho muomorovaje höjo. Ëaribövi jabesi muoho ëhije.

3

Bada Iesuhu sa'are vuonorö'ö rue'iröhe jöho bogo sarerehu jio'i iae mae jiaje jöhoje.

¹ Aganomë urimo na surire jö jajivoromo jemëni nugö'öjodoho röhu maho jöe nugö'öje. Ëjö niö'i jabesi bëhoho urimo hejarije jöho röhu maho majëhiromo jemesi simanoho avohëhe jemëro bogo rumonimo'i ma-maemu uehorovo'irarijeko. ² Iesu bogo rovadevare jö God-aro baeromo majëhinövore a maehu God-are surire jajivë'e jiamu gavarije jöho o Bada Iesu mare bamavuae aehu jemesi apostle aribövie no bojamuamu noehu jemë majëhijamu hejarije jöho ë jöho jemëro avo'avoho uehorovo'irarijeko ëhuni jajive. ³ Röhu ave jöhuremu avo'avoho uehorovore. Ijo tugoho'i jioröhe majaho dunovo'iramu evare aëro rueromo jabesi sinehu sisë nimajohemu ëma ömobe jijihoromo jemë sivëgo'ë'ö. ⁴ Sivëgoromo uë'ë'ö: lahuro uëvade höjo: Naro va'oromo vuonorö'ö rue'ejöjo. Hu rue jö uvarujoho hu diae rovë'e höjo. Hu va'adoho bogo rovë'e nosi hijo mionö'oho vuovëvobe rovë'e höjo. Urimë'i ni'i'ivadiire aevoromo bövi bise'o jioibe rovadoho bogo barë'i ëhi ma-gemuohemu jio'amajëjo. ⁵ Ëhi uëvarueje röhu ave jöho jabesi nimoromo bogo gavanovarueje. Ni'i'ivadiire God-ro jöe jövamu ëhuro ö'idöho sa'aho ëma jio'amadeje. Sa'aho jovore jioromo rojomamu jovoho ruë numë jio'i sa'aho ririre jio'amadeje. ⁶ Ëhi jiadeje röhu ijönö jovohuro rojomoromo sa'ae aho'obëhe baeniagivamu evare majare ë sa'are jiade bövioho bise'oho ijumo barëjadeje. ⁷ Amo God-ro jöho röhu maho jövë'ëro ëhu'ëro jaruvo jiaje ö'idöho sa'aho ëhi nugo'amë'eje u'emu vënëro buejeko ravo'amoröhego. Ö'idöho sa'aho nugo'amajëje God bogo uehorovarue ariböviohuro hesi nunire riravoromo jabesi jö sisëho heromo i'ue baeromo sisëro va'oruomego evare aho'o vënëro ravo barë'iröhego.

⁸ Röhu aganomë ave jöho gemu avo'avoho uehorovore. Kerisohu uövuade muoho iae rue'ë'e. Sa'are raromarue ariböviohuro uvarueje: Vadune aho'o barëjë'e höjo röhu Keriso bogo rovë'e hö uvaruëhioho Bada bogo ëhioho uvajeje. Hu bogo uvajeje: Majae vadune ëmine ëmine jioromo barëjaje hö uvo'i a'i uvajeje: Majae gemu ëho vadune aho'obëhe mae jianovo'i vadune aho'obëhe mae ëho majae gemu jianovajëjo. Ëhuni bogave uvo'irarije: Majae ëge barëjë'ëro rue'i uvadoho bogo rovë'ëro ëhuni bogo rue'ajëjo. ⁹ Hesi aëro Badare jöho sareri'e uehorovoromo uvoruomajëje: O hu ëhi ëhi ömo'i uövuajoho ëma hiromo örisanuovaje höjo. Röhu Bada bogo ëma örisanuovo'irögöro a'i huro jemesi jöëni uehorovoromo ëhuni ma-taemorovoromo hije. Aehu sisëre va'ë'oho hu bijönimo'i a'i hu nime ae aho'obëhe sisëho vuonugoröhego. Ëhuni muebeje.

¹⁰ Röhu Badare majaho iae ma-majioho vajiohu'e aëro rovanovo'ë'e. Ma-majioho rue'iramu evare ö'idöho darugo'o tögömoromo ëma bogojio va'oromo ë inömohe majaho manaeroho jiji mujöru'oho ravo barëromo sa'aho sa'a hesi i'o mu'oho sisëre barë nahonahovo'ë'e. ¹¹ Bövi bise'o ëhi sisëre barë'iröhohuni ëhuni avevejö'oho jemë diehi jië'e mu vaejaruje aribövie jiore. Jemë God gemu uehorovoromo ma-maemu raromo jijihö'irarije aribövie jiore. ¹² Ëhi jië'e aribövie jioromo mueberomo raromego God-are majaho rue'iro. Ëhi ë'ë'i muoho biririvoromo avo'avoho vaejeko ë majaho ma-burëro rue'iro. God-are maja rovë'iroho ö'idöho ravo barëromo ö'idöre jio'amajë inömohe ravoromo disoruvo barë'ë'e. ¹³ Ëhi'o'iramu God-ro uövuadëhi ëhi ö'idö i'oho sa'a i'oho bamö'ë'e. Ö'idö i'oho sa'a i'oho bamö'iramu ma-mu mahuremu ë jio'amo'ë'e. Ëhi jio'iröhego no raromoromo muebejarueje.

¹⁴ Aganomë ëhi jioröhego muebejarujoho biririvoromo God'o gemuoro huë mae raromoromo hesi nunoro mu ma-maemu vae'i ë'o gare. ¹⁵ Nosi Badahu bogo burëro i'u bojëmi'i

ma-taemorovoromo hiromo muebejëvajo ho ëho avo'avoho uehorovoromo uvore: Hu ma-taemorovoromo hiromo muebejavuajohuro ëhuro majaho bogo barëjë'e iae jiahua je hõjo noehu hu ua gavego mare bamavuo'irõhoho. Ëhi jië'e jõho nosi õ mae Paul hu'o simano maho God-are õrire baeromo jemesi õrire jajivadeje. ¹⁶Ëhi jië'e jõ suri göre göre aho'obëhe jajivoromo majëhi'i nimë'o ho hu'o jõe gemuho jajivajeje. Röhu Paul-are surire jõho jõe gö gö anoji'eje. Jõ anoji'e jiamu gavë'o ho simano rumo'ehu bogo birivoromo riravarue ariböviohuro God-are surire jõ ioro'oro sisë'i huotovaruëhi ëhi Paul-are jõhu'o sisë'i sisë'i huotovoromo ëhuro ijono ho sisërëjëvo'ë'e.

¹⁷Aganomë ëhi jiorõhe jõho jemë iae hejë'e jëve. Ëhuni avo'avoho mueberovore. Jõgoru ahoruomaje a sisë jabesi ijore ijore jijih'o aruje. Amo ëhuro birivoromo riravarujohu vuonugo'i baradore rireromëvo va'ë'e. ¹⁸Avo'avoho mueberovoromo nosi Bada Iesu Keriso mare bamavua je a hesi huë maho avo'avoho baëbe hesi mu maho avo'avoho ga'amobe va'ore. Jaruvohu hesi ihoho mabëhe uaromo ëhi ioro'io remu mabëhe uabe va'ejo. Iae mae. Ahia mino'e.

1 JOHN

God-are Jö jumuvë'e ahuro daruge bojamuiromo i'ovavuaaje. Röhu ë aehu sino haho'o baeromo sa'are rovamu John-mëhu gavare jöhoje.

¹ Ni'i'ivadiroho ae gemu jië'e jiadeje. Jiadoho iae ëhi ma-jiemu jiobe rovë'eje. Noro ë a hesi jöho heromo hu nosi nunëro garomo muebe'i ariromo hesi dajoho nosi övëro rëhë'ëro javuë'ëro ë a hesi jöho javivo'ië'o. Hu God-are Jö jumuvë'e i'ovavuaaje daruge bojamuijaje aeje. ² Ei'ovavuaaje darugoho va'orahoro huruohamu noro gavë'ëro ëhu'ëro jemë mae majëhiromo uëvarueje: Ëahuro darugoho ioro'ioeremu bojamuijaje höjo. Huro Vavuohu'o gemu mae hijë'ëro nosirire rueromo ë darugoho iae röjahuijade höjo. ³ Noehu garomo hejare a hesi jöho majëhijö jemëro heromo jemë'o no'o agane vaerovo'iröhëro. Noehu Vavuohu'o hesi Harihe Iesu Keriso'o agano vaerovaruehi jemë'o no'o ëhi agane vaerovo'iröhëro. ⁴ Jemë'o no'o ë'oromo ëhuro no nimoroho avoho'iröhëro ëhuni jajivö.

Noehu mu sisë vaejaruoho vuonugoromo ëhuro God-are ajire raromo'iröhe jöhoje.

⁵ Ave jöho God-are Harirohuro majahuijamu hejë'ëro noro jemë majëhijö. God hu majemu höjo. Ramoramoho hesiriroho bogohöjo. ⁶ God hu ma-aji'emu jië'ëro ëhu'ëro no uvë'o: No God'o agane vaerovarue hö uvoromo röhu ramoramore raromo jijihë'o ho ëho no sareri sareri jöe atoromo sareri sareri mue vaejarueje. ⁷ A'i God-hu aji'ere hijajëhi noehu ëhi aji'ere raromo jijihë'o ho ëhuro no göëro göhu'o iae agane vaerovarueje. Agane vaerovego hesi Harihe Iesu hesi köhuro nosi sisëho u'ovahuo barëjajeje.

⁸ No uvë'o: No sisë bogojavujä uvë'o ho simane garaejejo God-are jö maho dë vövöbajo'eroho bogojavuaajeje. ⁹ A'i noehu nosi sisë God-are örire huruoho majahijamu hejë'o ho huro biririvoromo ma-maemu uehorovoromo muoho ma-maemu vaejajëro jië'ëro ëhu'ëro nosi sisëho uehorovoromo vuonugoromo u'ovahuo barëjajeje. ¹⁰ O no uvë'o: No bogo sisëho vaejë'e javujä uvë'o ho noro uvoromo ë'arueje: God-hu uövuajoho: Jemë mu sisë vaejarue hö uövuajoho hu ma-sareramuiromo ë jöho jövaje höjo. No ëhi uvë'o God-are jöho nosi dë vövöbajo'eroho bogojajajeje.

2

¹ Nasi aboji harihu'e ave jö naehu jemesi örire jajivaje hesi bëhoho jemë mu sisëho bogo vae'irarijejo ëhuni jajive. Röhu mu sisë vaejë'o ho Iesu Keriso a maëro jië'ëro nosi sisëho ajamuijajeje. Ajamuiromo Vavu hesi örire jöe majahijajeje. ² Hu guomadohuro ëhuro nosi sisëho mu'uvaluoromo God-are vöröho sanuamijego God-ro nosi sisëho uehorovoromo vuonugajeje. Röhu bogo nosi sisëniho gemu guomo'i sa'ae aho'obëhe din'ë din'ë raromarue aribövi jabsesi sisëni guomadeje.

God-hu bojamuade jögore aho'o röhu ö mueno'e uehorovë'o'iröhe jöguru ejahoromo ëhuro ajire raromo'iröhe jöhoje.

³ Röhu ave jöho uehorovoromo ëhuro uvarueje: No God gavaruë höjo. No huhu bojamuade jöguru ejahë'ohuro ëhuro iae no hu gavaruëje. ⁴ Ae rahu uvë'o: Iae na God gavaje hö uvo'i röhu God-are jöguru bogo ejahë'oho ho hu ma-sarerivoromo ëhioho uvajeje. God-are jö maho hesi dë vövöbajo'eroho bogoje. ⁵ O God-are jö ejahë'oho ëhuro hu God-are örire hesi dë vövöbajo'e aho'o uehorovo avohajeje. Röhu ave jöho uehorovoromo ëhuro uvarueje: No God'o gemuoro javujäjo. ⁶ Ae rahu uvë'o: Na God'o gemuoro jevajë uvë'o ho Iesuhu hibe juvadëhi ëhi hi'ë'e.

⁷ Aganomë na jemesi öriroho bogo jöguru i'oho javivo'i a'i jöguru mamioho jajivo'ië'e. Aevoromo Keriso-are jöho heromo ave jögorohe hebe rovarijeje. Ëjöguru mamioho ho noehu majëhijamu hejarije jöhoje. ⁸ Naehu jajivo'irode jögorohe mamieje röhu i'eje. Ëjö hesi muoho Kerisohu vaejadoho jemë'o vaejarueje. Noro ë muoho garomo uvarueje:

Ējōho iae mae hōjo. Ēhesi bēhoho ramoramole muoho rori'lo va'anovo'i aji mahuro aevoromo ajivavuē'ego ēhuni uvarujeje: Ējōho iae mae hōjo.

⁹ Ae rahu uvē'oho: Na God-are aji'ero hijaje hō uvo'i rōhu hesi Christian ō mueno'lo nu huodēgē'oho ramoramole hibe rovadoho jaruvohu'lo ēhi gemuoho hijajeje. ¹⁰ O hesi Christian ō mueno'lo hesi dē vōvōbajo'ere uehorovēv'oho God-are aji'ero hiromo uehore ma-maemu jiē'ero ae gō bogo iēmi varijēnoho jiajeje. ¹¹ O hu hesi Christian ō mueno'lo nu huodēgē'oho ramoramole hiromo ramoramole muoho vaebe juvajeje. Ēhi'ego ramoramēro nunoho ramoramovahē'ero ōroho sidōvajeje.

Ave sa'a hesi mu sisē bogo uehorovo'irōhe jōhoje.

¹² Nasi aboji harihu'e God-ro Keriso-are jōēni uehorovoromo jemesi sisēho uehorovoromo vuonugē'ego ēhuni na jemesi ōrire jajive. ¹³ A duvahohumē jemē aevo'i jiobe rovide aho gavē'e jēvo'ego ēhuni na jemesi ōrire jajive. A i'ohumē jemēro A Sisēho ruahō'ōjē'e jēvo'ego ēhuni na jemesi ōrire jajive.

¹⁴ Nasi aboji harihu'e jemē Vavuoho gavē'e jēvo'ego ēhuni na jemesi ōrire jajive. A duvahohumē jemē aevo'i jiobe rovide aho gavē'e jēvo'ego ēhuni na jemesi ōrire jajive. A i'ohumē jemē birivoromo God-are jōhuremu jemesi dē vōvōbajo'ere uehorovoromo A Sisēho ruahō'ōjē'e jēvo'ego ēhuni na jemesi ōrire jajive.

¹⁵ Ave sa'a hesi mu sisēho bōvioho bise'oho nadi uehorovore. Ave sa'a hesi mu sisē uehorovē'oho jemesi dē vōvōbojo'eroho Vavuoho bogo uehorovo'aruje. ¹⁶ Sisē rabe rabe nosi sinehu nimaruohe rabe rabe nosi nunehu garomo nimaruohe o noehu ave sa'are raromoromo rabe rabe uehorovoromo dōre bamorovaruoho ēho ave sa'a hesi mu sisēje. Ēhi jiē'e muoho aho'o bogo Vavu hesirire jioromo rovide muoho jio'i a'i ave sa'a hesi mueje. ¹⁷ Sa'a hesi mu sisēho sa'are nimarue bōvioho bise'oho barē hesi jio'i a'i ae rahu God-hu nimaje mu vaejē'oho bogo barē'i ma-ioro'ioeremu raromarueje.

Keriso'lo muorovarue aribōvi jabesi mu sisē avoho goro'irōhe jōhoje.

¹⁸ Nasi aboji harihu'e sa'a bōvi bise'o barē'irōhe majaho dunove. Ēhesi bēhoho jemē hejarijeje uēvamu: Bōvi bise'o barē'irōhe majaho dunovo'iramu Keriso'lo muorovaje aho rue'a'ajējo. Rōhu avevejō'oho Keriso'lo muorovarue aribōvioho aho'obēhe rueruomē'eje. Ēhu'ero jiē'ero no garomo uvarujeje: Bōvi bise'o barē'irōhe majaho dunovajējo. ¹⁹ ĒKeriso'lo muorovarue aribōviohuro nosi ekaresiaho ramuo va'areje. Rōhu urimo jahu no'lo raromonōvadevaroho jabumē bogo nosi aribōvi maehu jioruomadeje. Jabumē nosi aribōvi mae jioruomō'ibejo jabumē no'lo ēhi raromoruomō'ibejo. Rōhu jabuhu va'arohuro ēhuro no garomo uvarujeje: Jabumē bogo ae gemu vadu'oho nosi aho jiē'ero ēhu'ero va'oruomade hōjo.

²⁰ A'i jemē Keriso-are Aru'ahoho baejē'ero ēhu'ero jemē ae aho'obēhe God-are jō maho gavarujeje. ²¹ God-are jō maho gavarujego ēhuni na bogo uve: Jemē jō maho dadivēvajēromo ēhunioho rōjēhiromo jajive. A'i naehu jajivaje hesi bēhoho jemē jō maho iae gavarujeje. Garomo uvarujeje: Sareri'e jōho bogo God-are jō ma hesi gemuoroho jioromo rovaje hōjo. Iae ēhuni jajive.

²² Sareri sareri ma'e aribōvioho rahumēje. Ae rahu jō majahuiromo uōvuē'oho: Iesu hu bogo bōvie namiromo ajamuaje aho hō uōvuē'oho ēhi uōvuarue aribōvioho Keriso'lo muorovarue aribōvie jioruome Vavu'lo Harihu'lo bijōnēgaruēro jiē'ero. ²³ Ae rahu Harihu bijōnimē'oho Vavuohu'lo bijōnimoruomajeje. O ae rahu Harihu ejahē'oho Vavuohu'lo ejahoruomajeje.

²⁴ Keriso-are jō aevo'i hebe rovarije jōho uehorovoromo ma'eno titimore. Ēhi ē'ē'oho Harihu'lo Vavu'lo jabesi gemuore raromo'aruje. ²⁵ Rōhu Kerisoro ave suvuoroho bojami'i mae uōvuadeje. Huro uōvuadeje: Naro ajēmi'iramu jemē ioro'ioere gemu maro raromo'arujējo.

²⁶ Jemē sarerēmi'i ē'lo gavarue aribōvi jabesi jōho naro jemesi ōrire jajive. ²⁷ A'i jemē Kerisoro hesi Aru'ahoho bojēmamu jemesi dē vōvōbajo'ere abuejē'ero jemē'lo hijajeje. Hijē'oho a gōho rabēni jemē ōroho rōjēhi'ē'ō. Bēhe bogoje. God-are Aru'ahohuro hesi

muoho bövioho bise'oho jemë røjëhijajeje. Røjëhiromo bogo sareri'e jöho røjëhi'i jö mae røjëhijajeje. Èhu'e jiaje jemëro hesi Aru'aho hesi jöho ejahoromo Keriso'o gemuoro raromore.

²⁸ Io'o nasi aboji harihu'ohumë hu'o gemuoro raromore. Èhi ë'ë'oho hu rue'iramu no bogo javojimo'i birivoromo hesi nunire mae riravo'ejo. ²⁹ Jemëro garomo uvarujeje: Keriso iae a mae höjo. Èhuni uvo'a'aruje: Ae rahu mu mae vaejë'oho God-are aboji harihu'e javuajëjo.

3

Noehu mu sisë vaejaruoho vuonugoromo èhuro God-are aboji harihu'ehu raromaruëhi èhi raromo jijih'o'iröhe jöhoje.

¹ Asë'e Vavuohuro no mabëhe rajahuijë'eje. Èhi rajahuromo huro no aboji harihu'e uövuë'eje. Hesi aboji harihu'e uövuadoho iae no javue. God-are aboji harihu'e javuajoho ave sa'are mu sisëhemu uehorovarue ariböviohuro God bogo avoho gavë'ëro èhu'ëro no'o bogo avoho göruomajeje. ² Aganomë avevejö'oho no iae God-are aboji harihu'e javue. Ijonö èhi javuoröhoho bogo røjahuijë'ëro no bogo avoho gavö. Röhu no iae garomo uvarujeje: No èhi javuoröhoho røjahu'iramu gatorovo Keriso hu diehi jiajoho iae no ga'ejarëjo. Garomo èhuro hu jiajëhi no'o èhi javuo'ajëjo. ³ Ae rahu uvë'oho: Kerisoro no ajamui'iramu hu jiajëhi no'o èhi javuo'ajë uvë'oho èhuro Keriso ma-maemu jiajëhi èhi jio'i ë'ö gavajeje.

⁴ Ae rahu mu sisë vaejë'oho èho God bijönimoromo hesi jöho ahajeje. Mu sisë hesi bëhoho èho God bijönimoromo hesi jö ahaje muohoje. ⁵ Röhu jemë'o iae gavarujoho Keriso rovade hesi bëhoho nosi sisëho rori'o bava'ego bogojioröhego èhuni rovadeje. Röhu hesiroho sisëho bogoje. ⁶ Èhu'ëro jië'ëro ae rahu Keriso'o gemuore jië'oho bogo birivoromo mu sisëho vaejajeje. Birivoromo mu sisë vaejë'oho hu Keriso bogo ga vadë'ë'eje.

⁷ Nasi aboji harihu'ohumë ae göehu sarerëmijë'oho nadi ejëhore. Ae rahu mu mae vaejë'oho Keriso mae jiajëhi èhi jiajeje. ⁸ O mu sisë birivoromo vaejë'oho èho Satan-are aeje Satan-ro aevo'i sisë vaebe rovë'ëro. Sisë vaebe rue'i God-are Harihehu rovade hesi bëhoho Satan-are muoho mu'u'iröhëro èhuni rovadeje.

⁹ Ae rahu God-are aboji harihu'e jëvë'oho Vavu örëro jëvë'ëro èhu'ëro jabumë bogo mu sisëmuoho vaejarujeje. God-are aboji harihu'ëro jëvë'ëro mu sisëmu vae'iröhoho jabumë bogo eni jëve. ¹⁰ No ave muoho garomo uvarujeje: Èaho God-are harihe o aboje höjo. Èaho Satan-are harihe o aboje höjo. Ae rahu bogo mu ma vaejë'oho o ö mueno'o bogo dë vövöbajo'ere uehorovëvë'oho èho bogo God-are aboji harihu'oho jioruome.

God-hu bojamuade jögore aho'o röhu ö mueno'e uehorovëvo'iröhe jöguru ejahoromo èhuro hesi aboji harihu'ehu raromaruëhi èhi raromo'iröhe jöhoje.

¹¹ Ave jöho jemëhu aevo'i hebe rovarije jöhoje. Noro göëro göho dë vövöbajo'e aho'o uehorovëvo'ejo. ¹² Cain-hu ë'adëhioho no bogo èhioho ë'ejo. Hu A Sisë hesi aëro jië'ëro hesi öho ano bamadeje. Rabëni èhioho ë'adeje. Hu mu sisëmu vae'i hesi öho mu maemu vaejajego èhuni ë'adeje.

¹³ Aganomë ave sa'are mu sisëmu uehorovarue ariböviohu jemë göromo bijönëgaruoho nadi tiöromo uvore: Diehi'oromo ë'aruëjo. ¹⁴ No ave jöho uehorovoromo èhuro garomo uvarujeje: No vuovo öroho vuonugë'ëro i'ovo örire mu javuajëjo ë hesi bëhoho noro Christian ö mueno'oho dë vövöbajo'e aho'o uehorovëvaruëro jië'ëro. A'i ae rahu a bogo uehorovëvë'oho vuovo örire jijihadoho èhi jijihajeje. ¹⁵ Ae rahu ö mueno'e göromo bijönimë'oho a muo'amarue a jabesi dë vövöbajo'o val'ëne jëvanovajeje. Jemë'o iae garomo uvarujeje: A muo'amaje aho bogo i'ovo öriroho jië'ëro bogo ioro'ioremuoho maho hi hesi höjo. ¹⁶ No ave jöho uehorovoromo èhuro uvarujeje: Göehu gö dë vövöbajo'e aho'o uehorovarue hesi bëhoho èhi höjo. Kerisoro hesi dë vövöbajo'ere börömo bëhe uehorovavuoromo sinoho bogo juhuonivo'i ajamui' guomade höjo. Èhuni no'o Christian ö mueno'ëro göëro göho uehorovëvoromo sinoho bogo juhuonivo'i ajëmi'i vuovo'ejo o

diehi'o'ejo. Ĕhi jiē'oho iae maeje. ¹⁷ Ae rahu inōme marohē'e jio'i ga'irōhe hesi Christian ō mueno'o bōvie bise'e bogojēvamu gatorovo ma-nunēremu gēv'oho hu diehi'oromo uvo'ē'e: Na God nasi dē vōvōbajo'ere uehorovaje hōjo. ¹⁸ Nasi aboji harihu'ohumē ē'lego no bogo ma-jō'ēremuoho aho sarerēmiromo uē'iro: Naro jasi ōrire dē vōvōbajo'e aho'o uehorovavaje hōjo. A'i ē'lego no ae uehorovēvoromo huē baejēvoromo ajēmi'iro.

¹⁹ Gōehu gō dē vōvōbajo'e aho'o uehorovēv'oho ēhuro no garomo uvo'ejo: No jō ma ejarue aribōvie javuajējo. Ĕhi uvoromo God-are nunire riravoromo juhuonivo'i nosi dē vōvōbajo'oho sanuamirovo'ejo. ²⁰ Jō sisē javuē'ero dē vōvōbajo'ere juhuoniv'oho no uvarueje: Nosi arijo'arije ma-bisemu garorovo'i God-ro no iosiramuiromo aho'obēhe gō barējaje hōjo. ²¹ Aganomē nosi jō sisēhuni nosi dē vōvōbajo'ere bogo juhuoniv'oho God-are nūiro javuoromo biririvoromo mae riravarueje. ²² Mae riravoromo rabe rabe ua gavē'oho iae hesirire baejarueje rabēni hesi bēhoho hu bojamuade jōho ejahoromo huhu nimaje muoho vaejaruēro jiē'ero. ²³ Huhu bojamuade jōho aviēhije. Huro uōvuadeje noro hesi Harihe Iesu Keriso-are ihoho mae uehorovoromo huhu uōvuadēhi ēhi gōero gōho dē vōvōbajo'e aho'o uehorovo'irōhego. ²⁴ Ae rahu God-are jōe gō gō ejahē'oho God'o gemuoro jio'i God-ro hesi dē vōvōbajo'ere hijajeje. Ave jōho uehorovoromo ēhuro uvarueje: God-ro nosi dē vōvōbajo'ere hijaje hōjo hesi Aru'ahoho bojamuijē'ero ēhu'ero.

4

Keriso'o muorvarue aribōvi jabesi mu sisēhu'o ave sa'a hesi mu sisēhu'o avoho gorō'irōhe jōhoje.

¹ Aganomē ae gōero gōero sarerivoromo sa'ae dinō'e dinō'e majēhibe jijihoromo uvoruomajeje: No God-are Aru'ahohuro jōho bojamuego majēhjarue hōjo. Ĕhuni ae gōehu ēhi uēv'oho avoho gēromo gare jabumē mae God-are Aru'ahē baejē'ero uēvego o hesi aru'ahē gō baejē'e jioruomego. ² Ave muoho garomo uvo'a'aruje: God-are Aru'ahēro jōho bojēmejo majahuijarue hōjo. Ae rahu ae huruoho majēhiromo uēv'oho: Iesu Keriso a nosi sino jiajēhi ēhi rov'e hō uēv'oho God-hu bojamuaje Aru'ahoho baerumē'eje. ³ O ae rahu Iesuare jō bogo ēhi huruoho majēhijē'oho ēho bogo God-are Aru'ahoho baeromo majēhi' a'i Keriso'o muorovaje a hesi aru'ahoho baeromo majēhjarueje. Jemē mami'e hejarijeje uēvamu: Keriso'o muorovaje ahuro rue'a'ajējo. Rōhu avevejō'oho ē a hesi sareri sareri'e muoho ave sa'are vaeruomajeje.

⁴ Hesi sareri sareri'e muoho vaeromo Keriso-are jōho sisē'i majēhjarueje. Iae ēhi ē'arujeje rōhu nasi aboji harihu'e jemē God-are aribōviēro jēv'ero Keriso-are jō sisē'i majēhjarue aribōvi jabesi muoho ruahō'ōjē'e jēve. Ĕhesi bēhoho jemēro God-are Aru'ahoho bae'i sa'a hesi mu sisē uehorovarue aribōviohuro Satan-are darugoho baerumē'eje. Rōhu God-are Aru'ahō hesi daruge jemesirire jiajohuro Satan-are daruge jebesirire jiajoho iosiramijē'eje. Ĕhu'ero jiē'ero jemēro Keriso-are jō sisē'i majēhjarue aribōvi jabesi muoho ruahō'ōjē'e jēve. ⁵ Ĕaribōvioho jabu ave sa'a hesi mu sisē uehorovarue aribōviohuro ejēhoruomajeje. ⁶ A'i no ma-God-are aribōviemu javue. Ĕhi javuē'ero ae rahu God gavē'ohuro ēhuro nosi jōho ejahuarueje. Ae rahu bogo God-are aribōvi jēv'oho nosi jōho bogo ejahuarueje. No garōhe di aribōviohuro God-are jō ejahuamu o ave sa'a hesi jō sisē ejēhamu gavē'oho ēhuro uvarueje: Ĕho God-are Aru'ahēro jōho bojēmejo majahui' ēho sareri'e aru'ahō sisēhuro bojēmejo majahuijarue hōjo.

No gōehu gō dē vōvōbajo'e aho'o uehorovo'irōhe jōhoje.

⁷ Aganomē ē'lego no gōero gō dē vōvōbajo'e aho'o uehorovo'iro. Noehu gōehu gō ēhi uehorov'oho ēho God-ro hesi uehoro maho nosi dē vōvōbajo'ere bojamuego ē'arujeje. God-are aboji harihu'ero javuē'ero God mae gavarujeje. ⁸ O ae rahu ae gō dē vōvōbajo'ere bogo uehorov'oho God bogo ma gavarujeje rabēni God-ro dē vōvōbajo'e aho'o uehorovemu uehorovavuaje aēro jiē'ero. ⁹ Huhu uehorovavuaje muoho aviēhi rōjahuijadeje. Harihe gemu'oho sa'are nugō'ōjadeje huro i'ovavuego mae raro'irōhego. ¹⁰ Gōehu gō dē

vövöbajo'e aho'o uehorovarue mu hesi bëhoho diehije. Noehu God dë vövöbajo'ere uehorovarohe ëho ma-bise'eje. Èhuni göehu gö uehorovarue mu hesi bëhoho bogo ëhiohoje. A'i God-ro hesi dë vövöbajo'e aho'o no uehorovavuoromo hesi Harihoho nugö'öjajede guomego nosi sisëho uehorovoromo vuonugo'iröhëni. Èho böviohoje. Èhuni God-hu ëhi no uehorovavuadoho ëho göehu gö uehorovarue mu hesi bëhohoje.

¹¹ Aganomë God-ro börömo bëhe uehorovavuoromo ëhi ajamuijajede. Èhuni no göëro göho ëhi uehorovo'ejo. ¹² Ae gö nosi nunoho God bogo gavë'e javue. Röhu göehu gö dë vövöbajo'ere uehorovë'oho God-ro nosi dë vövöbajo'ere hiromu hesi uehoro maho bojamuego nosi dë vövöbajo'oho rarovavajaje.

¹³ Ave jöho uehorovoromo èhuro garomu uvarueje: No God'o gemuoro javu'o'i hu nosi dë vövöbajo'ere hijaje höjo. Huro hesi Aru'ahoho bojamuij'ëro èhu'ëro. ¹⁴ No God-are Harihoho iae nosi nunëro gavë'e javue. Gavë'ëro noro mae majëhiromu ae uëvarueje: Vavuohuro hesi Harihoho nugö'öjajede höjo sa'ae dinö'e raromarue aribövioho baejëvoromo maro bamëvo'iröhëgo. ¹⁵ Ae rahu huruoho majëhiromu uëvë'oho: Iesu iae God-are Harihe hö uëvë'oho ëhi jië'e aribövi jabesi dë vövöbajo'ere God hi'i jabumë God'o gemuoro jëvajeje. ¹⁶ Röhu iae no'o garomu mae uehorovoromo uvë'e javue: God-ro no mabëhe uehorovavajaje höjo.

God hu dë vövöbajo'e aho'o no uehorovavajaje ahoje. Èhuni ae rahu ae gö dë vövöbajo'ere uehorovo'i hijë'oho God'o gemuoro jio'i God-ro hesi dë vövöbajo'ere hijajeje. ¹⁷ God-hu hesi uehoro ma nosi dë vövöbajo'ere bojamuego rarovavajaje hesi bëhoho hujeji Kerisohu nosi mu mevo gövuamu no hesi nunire riravë'oho no bogo juhuonivo'i a'i uvoröhëgo: Keriso jiajëhi no'o sa'are raromoromo ëhi jiobe rovë'e javuajë uvoromo èhuni avoho biririvoröhëgo. Èhuni God-ro hesi uehoro maho bojamuego nosi dë vövöbajo'ere rarovavajajeje. ¹⁸ No herovoromo uvë'oho: God-ro hesi dë vövöbajo'e aho'o uehorovavajaje hö uvë'oho no bogo hesi öriroho juhuonamijarueje. No herovë'oho God-are uehoro maehu rueromo nosi dë vövöbajo'ere rarovavamu hejë'oho God juhuonamijaruoho vuonugo'i mae uehorovarueje. Èhesi bëhoho no God juhuonamijë'oho no uvarueje: God-ro i'ue bojamui hesi höjo. Ae rahu hu juhuonamijë'oho ëhi jië'e aribövioho God-are uehoro maho jabesi dë vövöbajo'eroho bogo rarovëvajeje.

¹⁹ God-hu urimo nosi örire dë vövöbajo'ere uehorovavuadohuro èhuro no hu'o ae gö'o dë vövöbajo'ere uehorovëvarueje. ²⁰ Ae rahu uvë'oho: Iae na God-are örire dë vövöbajo'ere uehorovaje hö uvo'i röhu hesi ö mueno'ohu'ëro bijnëgë'oho èho hu ëma sarere uvajeje: Na God uehorovaje höjo. Hesi ö mueno'e nunehu gëvajojo bogo uehorovëvë'oho èhuro God uehorovo'iröhohoho bogo eni jie hu God bogo nunoho gavajëro jjë'ëro. ²¹ Èhu'ëro God-ro ave jöho bojamuiromu uövuë'eje: God nasi örire uehorovëvë'oho jemesi ö mueno'ohu'o dë vövöbajo'oro uehorovëvorëjo.

5

God-are Harihu mae uehorovo'iröhe jöhoje.

¹ Ae rahu mae uehorovoromo uvë'oho: Iesu hu böröme namiromu ajamujaje ae hö uvë'oho ëhi jië'e aribövioho God-are aboji harihu'e jioruome. Ae rahu vavu dë vövöbajo'ere uehorovë'oho ë vavu hesi aboji harihu'ohu'o dë vövöbajo'ere uehorovëvo'anue. ² Èhuni no ave jöho uehorovoromo èhuro iae garomu uvarueje: No God-are aboji harihu'ohu'o dë vövöbajo'ere uehorovëvarue höjo. No God dë vövöbajo'ere uehorovoromo hesi jögoru ejahë'ohuro èhuro no garomu uvarueje: Hesi aboji harihu'ohu'o uehorovëvarue höjo. ³ God dë vövöbajo'ere uehorovë'oho èhuro iae no God-are jögoroho ejaharueje. God-are jögoru ejahë'oho èho bogo i'u'ehuje. ⁴ God-are aboji harihu'e aho'obëhe sa'are mu sisëho biririvoromo ruahö'öjarueje. Ruahö'ö'iröhe hesi öroho no Iesu mae uehorovaruhuro èhuro ruahö'öjarueje. ⁵ Diehi jië'e ariböviohuro sa'are mu sisëho ruahö'öjarueje. Ae rahu uvë'oho: Iesu hu God-are Harihe hö uvë'ohuro ëhi jië'e ariböviohuremu sa'are mu sisëho ruahö'öjarueje.

God-hu jö mae majahuijigo no heromo êhuro Keriso mae uehorovarue jöhoje.

⁶ Rôhu sa'are rovade aho iae Iesu Keriso jiadeje. Êahuro rueromo jovo maëro bapataeto vaejamu köho rueromo guomadeje. Bogo rueromo ma-bapataeto vaejadohemuje. A'i hu jovo maëro bapataeto vaejamu ijönö hesi köho rueromo guomadeje. Huhu êhi ê'ade jöho God-are Aru'ahohuro iae mae majahuijajeje ë Aru'ahoho sareroho bogojio'i ma-maemu jië'ëro. ⁷ Jöe niö'i gemu no heromo Keriso mae uehorovarueje ⁸ Aru'ahuhu majahuijaje jöho jovehu bapataeto vaejade jöho kö rovade jöho. Êjöho niö'i gemu bëhe gemuhoje. Êho heromo mae uehorovarueje. ⁹ Ma-aëremu jö ma majahuijamu hejë'oho noro êho mae uehorovarueje. Rôhu a jabesi jöho ma-bise'e jio'i God-hu jö mae majahuijajoho êho börömoheje. Rôhu God-ro hesi Harihu hesi jöho êhi ma-mae majahuijê'eje. ¹⁰ Ae rahu God-are Harihu mae uehorovë'oho êhuro dë vövöbajo'ere uehorovoromo uvarueje: God-hu hesi Harihu hesi jö majahuijadoho iae mae höjo. O ae rahu God-hu majahuijade jö bogo ma uehorovë'ohuro êhuro uvoruomajeje: God hu jö sarere jövaje ae höjo. Êhesi bëhoho God-hu hesi Harihu hesi jö majahuijadoho jaburo bogo ma uehorovaruëro jië'ëro êhioho uvoruomajeje. ¹¹ God-hu hesi Harihu hesi jö mae majahuijade hesi bëhoho aviêhije. God-ro darugoho bojamuijê'eje noro baeromo nosi aru'ahoho i'ovoromo ioro'ioremu mae raromo'iröhëgo. Êdarugoho God-are Harihu hesirire jie. ¹² Êhu'ëro ae rahu Harihohu'o gemuore bimuvë'oho ë darugoho baeromo hu'o gemuore mae hijajeje. O bogo God-are Harihohu'o gemuore jië'oho bogo êhioho maho hijajeje.

Ioro'ioremu mae raromo'iröhëro gavarue jöhoje.

¹³ Naehu jemesi örire jajivaje hesi bëhoho jemëro garomo uvo'irarijigo: Iae no maro raromaruoho êhi ioro'ioere gemu raromobe va'ëjarë uvo'irarijigo. God-are Harihu mae uehorovarueje aribövioho jemë uëve. ¹⁴ Ave jöho uehorovoromo êhuro no biririvoromo hesi nunire riravoromo jöho majahijarueje. God-hu rabe rabe bojamui'i nimajoho noehu ua gavë'oho iae hu ejahuajeje. ¹⁵ Noehu ua gavë'oho iae ejahuaje hö uvaruëro jië'ëro êhu'ëro no uvarueje: No ua gavë'oho bojamuego baejarue höjo.

¹⁶ Ae rahuaro ga'irane Christian ö mueno'ehu mu sisë vaeromo bogo sisëroho va'o hesi jioruomamu gëvë'oho jero God ua ganego huro jabesi sisëho ajëmiromo daruge bojëmëgo maro raromo'iro. Na uaromo ë'e mu sisë vaeromo bogo sisëre va'o hesi jio'amaje ariböviohuni God ua ganëjo. A'i mu sisë gö vaejë'oho sisëro va'o hesi javue. Na bogo uave: Jero êhi jië'e ariböviohuni God ua ganëjo. ¹⁷ God-hu bijönimaje muoho aho'obëhe vaejë'oho êho sisëje. Rôhu mu sisë gö vaejë'oho no bogo êhuro sisëroho va'o hesi javue.

¹⁸ No garomo uvarueje: Ae rahu God-are aboji harihu'e javuë'oho mu sisëho bogo vaemu vaejarue höjo. God-are Harihohuro tugohahuego A Sisëho nosi öriroho bogo ijumavuaajeje.

¹⁹ No garomo uvarueje: No God-are aboji harihu'e javuo'i sa'are mu sisë uehorovarueje aribövie aho'o jabumë A Sisë hesi darugoro raromarue höjo.

²⁰ O no garomo uvarueje: God-are Harihohuro rueromo uehoro maho bojamuijê'e höjo êhuro noro God garöhëgo God gemu hu mae jiajoho. No hu'o gemuoro javuoromo hesi Harihe Iesu Keriso'o gemuoro javue. Êaho gemu God mahoje. Huro ajamuego no ioro'ioere gemu mae raromarueje.

²¹ Nasi aboji harihu'e avoho mueberovore. Nadi uvore: Inöme bövie bise'e masije höromo nuninöho bamo'i God dejönöho bamore. Ahia mino'e.

2 JOHN

Aëro uvoruumajeje: Jö jabesi örire jajivade ekaresiaehu ame gemuore raromarue jöho John-ro huotovoromo uhu'e magonahehu aboji harihu'e söromo gemuore raromaruëhi ëhi jajivade höjo. O verse 13-re John-hu hijade amore ekaresia jabesi jöho huotovoromo uhu'e uvade magonaho hesi ö hesi aboji harihu'o jönö'e ëhi jajivade höjo.

¹⁻² O asë'e aboji harihu'e gagovoromo gemuore raromaruje magonahoho God-ro hesinö javojöro baejavë'e magonahe jave. Ekaresia jabesi a duvahoho naro jemesi örire jejëmiye. Jemë'o no'o God-are jö maho uehorovoromo ëhi gemu uehorovobe va'ejo. Èhuni na bogo ma-döëremuoho uehorovëvo'i dë vövöbajo'e aho'o uehorovëvajeje. Bogo na gemuoho a'i God-are jö ma gavarue aribövioho aho'obëhe jabu'o ëhi gemuoho uehorovëvarueje.

³ Noro God-are jö maho ejahoromo göëro gö dë vövöbajo'e aho'o uehorovëvo'iramu God Vavuohu'o hesi Harihe Iesu Keriso'o noni vavaenimoromo ajamuiromo huë mae bojamui'ë'e.

God-are jö mahemu ejahoromo dë vövöbajo'e aho'o uehorovo'iröhe jöhoje.

⁴ Na hejodeje uevamu: Vavuehu uövuadëhi jasi aboji harihu'o ioro'iorohuro God-are jö mahemu ëhi ejaharue höjo. Èhi hegoro nimoroho avohodeje. ⁵ Ma'ino röhu ave jögoru jajivo'ië'ajoho bogo i'ehu jio'i mami'e aevo'i hebe rovere jögorohoje. Naro uëve: È'ego no ae aho'obëhe göëro göho dë vövöbajo'ere uehorovo'irarëjo. ⁶ Göehu gö dë vövöbajo'ere uehorovo'iröhe hesi bëhoho ëho God-are jögoroho ejahë'e raromo'ejo. O God-are jögoru hesi bëhoho ëho mami'e aevo'i hebe rovarijëhi ëhi jemë göehu gö uehorovë'i raromo'irarijohoje.

⁷ Röhu a sarerëmiarue aribövie aho'obëhe sa'ae dinö'e dinö'e sareri jöho majëhibe jijihoromo uëvarueje: Iesu Keriso bogo a maho rue'i aru'ahëro rovade höjo. Èhi majëhjarue aribövioho Keriso'o muorovoromo ae sarerëmiarue aribövie jioruome. ⁸ Èhuni avo'avoho mueberovore. Sareri'e jö bogo ejëhë'oho ëhuro mu vaebe rovarije suvoroho bogo boremi'ö'i bae barë'aruje.

⁹ Ae rahu Keriso-are jö bogo ma'eno titimo'i aruëre anumëre ëma jijihë'oho ëhi jië'oho God rumo'e aribövie jioruome. O ae rahu Keriso-are jö ma'eno titimë'oho God Vavuohu'o Harihohu'o jaburo niö'iro ëhi jië'e ariböviohu'o gemuore jiarueje. ¹⁰ Ae göehu jemesirire ö'oromo Keriso-are jö jiajëhi bogo ëhi majëhijë'oho nadi uëre: Ruehëjo. O nadi jejëmiye. ¹¹ Ae rahu jejëmiyë'oho ëhuro iae jemë jabu'o bimuvoromo jabesi mu sisëho vae'a'aruje.

Ijo tugoho'i jöhoje.

¹² Na jöe aho'obëhe jajivo'irodoho röhu bogo jajivo'ejo. Na nege ö'oromo jemë'o na'o jöho majahirovoröhëni. Èhi jië'ohuro ëhuro jemë'o na'o sisë maro nimoroho'ejo.

¹³ God-hu baejade magonahe jasi öe hesi aboji harihu'oho jaburo jasi örire jejamijö. Ahia mino'e.

3 JOHN

¹ O asë'e nasi isio Gaius God-are ekaresia jabesi a duvahoho naro jasi örire jejamije. Na bogo ma-döëremuoho uehorovavo'i nasi dë vövöbajo'e aho'o uehorovavajeje.

² Isio na nege jasi sino haho'ohu'o muohu'o ma-mabêhe javojöro. Iae na gave jasi dë vövöbajo'oho avevejö'oho mae javo'ego. ³ Èhesi bēhoho Christian ö mueno'ëro rueromo uevareje: Gaius hu God-are jö mahemu ejahaje hö uevamu heromo nimoroho avohodeje. Èho iae maeje. Majae èhi ja God-are jö maho ejahë'e raromanueje. ⁴ Mu göëni göënioho na ma-bisemu nimoroho'i aehu uevë'oho: John jasi Christian aboji harihu'ohuro God-are jö maho ejahë'e raromaruë uevamu hejë'oho na nimoroho avohajeje.

Gaius-hu mu mae vaejamu John-hu rajahijade jöhoje.

⁵ Isio jero mabêhe biririvoromo Christian ö mueno'oho ajëmijanueje. Öre gö jioromo rovare Christian ariböviohu'o huë mae bojëmijanueje. ⁶ Èariböviohuro rueromo ekaresiae aho'o uövuareje: Gaius-ro nosi örire huë mabêhe bojamuijade höjo. Röhu God-hu nimajëhi jaehu bövi bise'o jabumë ajëmiromom rëmö'öjamu örire va'ë'oho èho iae mae jio'ë'e. ⁷ Èhesi bēhoho God bogo ma uehorovarue aribövi jabesiriroho suvuoroho bogo ujuohë'e èma ri'öromom va'ë'ejö Keriso-are jöho baeromom jijihö'iro. ⁸ Èhuni Christian aribövioho noro jabumë ajëmi'ejo èhuro no jabu'o bimuvoromom jö ma majëhijarue hesi muoho vaeröhëni.

Diotrephes'o Demetrius'o ë ae niö'i jabesi jöhoje.

⁹ Naro jasi ekaresia jabesi örire jö harihe jajivodeje. Jajivodoho Diotrephes hu böröme vae'i nimë'ëro nosi jöho bogo ejahuajeje. ¹⁰ Èhu'ëro jië'ëro na ö'ë'oho huhu vaejaje mu sisëho huruoho majëhi'ejo ekaresiae aho'o heromom uehorovoromom öhëgo. Huro nosi jöho huotovoromom uevajeje: John-mëro èhi jië'e mu sisëho vaejarue höjo. Hu bogo èhemuoho è'i Christian ö mueno'ehum ö'ë'oho bogo rajëhiromom baejëvajeje. O ae göëhu ajëmi'i nimë'oho huro ahëvoromom uevajeje: Jemë ë aribövioho ajëmi'i'ë'e jëvaje rori'o va'ohëjo. Va'oromom nadi ijohom Keriso rajahijarue osarohom ruerëjo.

¹¹ Isio aehum mu sisë vaejaruëhihohom nadi èhihohom vae'i a'i mu ma vaejaruëhi èhi vaenem. Aehum mu mae vaejë'ohom èho God-are aribövie jioruomem. O aehum mu sisë vaejë'ohom jabu God bogo gavë'ejö.

¹² Röhum aehom obêhem uvoruomajeje: Demetrius hum a mae höjom. Iahum hum mae vaejaje aeje. Aehom hu garomom èhi uvarueje. Iahum no'om uvarueje: Hum a mae höjom. Röhum ja'om gavanueje no jö maemum majëhijegom. Èhum'ërom Demetrius-are jö majëhijaruohom èhum'om iahem maeje.

Ijo tugohom i jöhoje.

¹³ Na jöë aho'obêhem jajivo'irodohom röhum bogo jajivo'ejom. ¹⁴ Na nege ma-burërom ö'oromom ja garomom ja'om na'om jöho majahirovoröhëni.

¹⁵ Huë mae hinem. Ja huë baejaruarue aganohom jaburum jasi örire jejamijö. O nasi aganohom aho'om gemum gemum jejemijodem hönem. Ahia minom'e.

JUDE

¹ Iesu Keriso-are mu vaejahaje aho James-are öe Jude naro jemesi örire jejëmiije. God Vavuuhuro jemë hesinö jëvojöro uëvë'ëro jemë dë vövöbajo'e aho'o uehorovëvoromo Iesu Keriso-are burure rëmë'eje.

² Na nege God-hu jemëni vavaenimoromo huë mae bojëmiromo rajëhijaje muoho jemë herovo avoho'irarijego.

Sareri'e jö rjöhijarue aribövi jabesi jöhoje.

³ Aganomë God-hu mare bamavuade jöho jemë'o na'o gemuoho uehorovarueje. Èhesi jöho na jajivo'i nego avohadeje. Èhi negamu röhu uvodeje: Èjöho vuonugo'i jögoru gö jajivë'oho iae mae höjo öre gö bogojevë'ego. Èhesi bëhoho God-ro hesi aribövioho jöho rjohuijadeje noro ioro'ioemu mae uehorovo'iröhëgo. Röhu ë jöho a ioro'iorëro huotuhuotovoromo rjöhijjö. God-are jö huotuhuotovoromo rjöhijjaruohuni èhuni jabesi sareri'e jöho biririvoromo aho'irarijego jajivo'irögoru uvodeje. ⁴ Èhesi bëhoho aëro jabesi mu sisëho gurih'i ekareasia jemesi gemuore ro buarohoruomë'eje. Jemë'o buarohoruomë'ëro God bogo ma uehorovo'i a'i sareri'e jöho majëhiromo uëvarueje: Jemë öehu jijilhanovë'oho iae mae höjo God huë baejëvaje ae jië'ego. Èhi uëromo Iesu nosi Bada hu gemuehu bëröme vaejavuaje ë aho jabumëro bijönimoruomajeje. Èhi jië'e aribövioho i'ue baeromo sisëro va'oruomoröhëgo God-are surire jöho èhi uvë'eje.

⁵ Ave jö naehu jajivo'ia'ajoho jemëro he barëjë'e jëve. Röhu na maho uë'i nege jemëro avoho uehorovo'irarijego. Israel aribövioho Egypt sa'are sisë'i raromamu Badaro ajëmiromo mare sö ujuoho rovade höjo. Èhi ë'ade höjo röhu ijönöho ae rahu bogo ma uehorovaroho huro i'ue mana bojëmamu sisërëjëvade höjo. ⁶ O anera jabesi jöhu'o uehorovore. God-hu bojëmade muoho anera ioro'iorohuro bogo biririvoromo muebe'irögoru jabumë raromo'iröhe röho vuonugo'i jabesi mue gö baejare höjo. Èhi'amu God-ro ioro'ioemu tövëvoromo ramoramo'ere taemëvo rëmë'e höjo maja bërömohto rovego uëröhëro: Sisë jëvaje sisëro va'ohëjo. ⁷ O Sodom amohu'o Gomorrah amohu'o jabesi bëhire jiaje amo ioro'iorohu'o èho jabesi jöhu'o uehorovore. Jabu'o mu sisë bëhe vaeruomade höjo. Mu sisë vaeromo öëro jijilhanovoromo a'o a'o sihorovoromo mue gö gö vaeruomade höjo. Èhi'amu God-ro i'ue mana bojëmiromo vënoho nugö'öjamu ioro'ioemu ravo'amade höjo aëro garomo uvoröhëgo: God-ro èhi jië'e i'uocho sisë'e aribövioho bojamui'ajëjo.

⁸ Èhi jie röhu jemë'o gagovarue ariböviohuro èhi jië'e mu sisë gemuoho vaejarueje. Jabumëro uvarueje: Nia'ovo'iraeromo gavaruëhi èhi ömë'oho mae höromo va'inumi'e muoho vaeromo jabesi sino haho'oho ijumorovarueje. Jögoru masijoho bijönimarujeje. Aji'e aribövioho ö'idöre raromarue jabesi jöho sisë'i atarujeje. ⁹ Jabu èhi sisë'i atarujeje röhu urimo Michael anerae bërömo namijajoho bogo èhioho sisë'ioho jövadeje. Èhesi bëhoho Moses guomamu Michael'o Satan'o èhi di aehu Moses-are sino bae'iröhe jöho aho'ahamirovareje. Jöho aho'ahamirovoromo Michael bogo biriri'övoromo jö sisëho majahiromo nibejahi'irögoru ma-uvadeje: Na jöho bogo ua'ejöjo. Jaehu sisë ë'anue jöho hesi Badaro majahi'ajëjo. ¹⁰ Èhi jië'e sanu'e jö jövadoho röhu jemë'o gagovarue ariböviohuro bogo èhioho ato'i a'i bogo ma hejarue gavarue jöho ëma sisë'i atarujeje. Sisë'i atoromo simano rumo'e mahu urejehu jijiharuehi jabumëro èhi bogo uehorovë'e jabesi nimarue muoho ëma vaebe jijihoromo èhuro sisërërovarueje. ¹¹ Jabuhu i'u bae'iröhe majaho iae rue'ë'e. Jabumë a mamie niö'i gemu urimo raromaroho va'ëne jëve. A mami ae Cain-hu hesi nimoromo ëma ë'adëhi jaburo öre gemuore jijiharueje. O Balaam-hu moniemu uehorovoromo sareri'e mu a rjöhijadëhi jaburo èhi jië'e muohuremu vaejarueje. O Korah-hu biriri'övoromo God-are jö ahamu guomadëhi jaburo God-are jöho èhi aharueje u'emu vuovëvoröhëgo. ¹² Jemëhu huë baerovo'i gemuore gagovoromo i ue'ahë'iroho ë aribövioho jabu'o rovarueje. Rueromo bogo juhuonivo'i ma-biriri'övoromo

nimorohë'i ioho jovocho mahunö'e ue'aharueje. Èhi jië'e sisëho ë'ego ëhuro niögu suhi'ere va'inumi jiajëhi jabesi aru'ahoho ëhi va'inumi'e jëvego huë sisë baejarueje. Jabumë ae gö bogo ajëmi'i jabesi sivue ajamirovarueje. Jabumë ëni rumo'e sue burehu bava'ego sa'a bogo rihu bojamajoho va'ëne jëve. Jabumë ijo saho va'ëne jëve. Ijo sahoho jabesi bajo rae maja rové'iroho bogo raejarueje. Bogo raejago aëro umoromo dirumohu'o jahego ioro'ioremu sisë'ëjajeje. Jemë'o gagovarue aribövioho ëhi jëve. ¹³ O jovehu va'inumi gatogato hasaromo ionire a nunire bu'öjajëhi jabesi sisëho ëhi a nuniro ma-va'orahoro vaejarueje. O ara'ehu vëni ioromo bio baeromo va'ajëhi jabumë ëhi jëvanove. God-hu nugëhadë ramoramo sisë mare jië'ire ë rireromoromo ioro'ioremu raromo'ë'ö.

¹⁴ Jemë'o gagovarue ëhi jië'e a sisë jabesi jöho Enoch-ro ae majëhijadeje. Adam-are ujehu jiobe rovadoho ro iae Enoch hu number 6-ho jiadeje. Enoch-ro sisë aribövi ijönö diehi jëvoröhe jöho urimo ae majëhiromo uëvadeje: Jemë'o garëjo. Badaro hesi anera maho aho'obëhe mae jabu'o gemuore rue'a'ajëjo ¹⁵ ae aho'obëhe mevavuo'iröhëni gö'i mae o sisë javuego. Mevavuoromo God bijönimoruomaje ae aho'obëhe uëröhëni: God nasi örire bijönegoromo ëhi jië'e mu sisëho vaejëvarije höjo. Na bijönegoromo nasi jöho sisë'i bëhe atarije höjo. Èhuro jemë sisë'e aribövie jëvaje sisëro va'ohëjo. Èhi mevëvo'iröhëni Bada rue'a'ajëjo.

¹⁶ Röhu jemë'o gagovarue ariböviohuro nibejëhiromo a jöho aruëre anumëre ëma vaerovarueje. Jabesi sinehu nimajëhi ëhi jijiharueje. Jabesi sivue uehorovoromo dö mare bamorovoromo jö huhe atarueje. Ae gö sanusanuëmijarueje ëhuro jabuhu nimaruehi ëhi ë'oruomojöro. Èaribövioho ëhi jië'e aribövie jëvë'eje.

Avo'avoho birivoromo raromo'iröhe jöhoje.

¹⁷ Röhu aganomë jemëro ave jöho uehorovore. Nosi Bada Iesu Keriso-are apostle ariböviohu mami'e majëhinövare jöho uëve. ¹⁸ Majëhiromo uëvareje: Ijo tugoho'i jioröhe majaho dunovo'iramu aëro rueromo God-are jöho sivoromo hu bogo uehorovë'e jabesi sinehu nimajohemu vaebe jijihoruomo'ajëjo. ¹⁹ Èjabuhu uëvare ëhi jië'e ariböviohuro ëhi'oromo jemesi ekaresialho adovëvarueje hahagu hahagu jëvojöro. God-are Aru'ahoho bogojëvë'ëro jabesi sinehu nimarue muohemu uehorovarueje. ²⁰ A'i aganomë jemëro God-are jö mahuremu uehorovarujoho birivoromo gö'o gö'o mae uehorovobe va'oromo God-are Aru'aho hesi uehoroho baeromo God-are öroro jöe atonövore. ²¹ Hu jemesi örire huë baejëvaje jiaje ëhuni nadi vuonugo'i hu'o gemu mae raromore. Raromoro muebere nosi Bada Iesu Kerisoro jemesi jöëni vavaenimoromo ajëmëgo ëhuro ioro'ioremu maro raromo'irarije.

²² Ae göëro uvoruomajeje: Na Keriso-are jöho mae höjo o ëma jöe höjo. Èhi jië'e ariböviohuni vavaenimoromo ajëmire. ²³ Sisëre va'arue örire ae göehu jijihoromo vënire ravorovanovamu gëvë'oho ma-burëro baejëvorego mae jëvo'i. Ae göehu mu sisë vaejamu gëvë'iroho vavaenimoromo ajëmirego jabesi sisëho vuonugoruomo'iro. Röhu ëhi ajëmijë'oho gavë'i ajëmiromo jabesi sisëho goro avohore. Jabuhu ömarue muoho iëmijego jemë'o ëhi ömojöëni uëve.

God mabëhe rajahijarue jöhoje.

²⁴ Iae God eni jië'e aego mabëhe ua'ejo. Jemë guare bejëvo va'ojöëni ma'enëgoromo söjëvo va'oromo huhu hijaje aji mare rëmëgo nimoroho avohë'i ma-maemu riravo'irarijoho hu eni jie. ²⁵ Hu A Börömocho God gemuje. Hu no maro bamavuae aeje. Èhuni no Iesu Keriso nosi Badare jöëni rajahiroho hesi örire ua'ejo: Jasi ihoho dö maro höjo. Daruge eni javë'e ae javajëjo. Böröme namiroromo jasi darugëro bövie bise'e aho'o mae muebe'amanue höjo. Èhi jiemu jiobe rovanoho jaruvo ëhi javajoho ëhi jiemu jiobe va'a'anuejo. Iae mae. Ahia mino'e.

REVELATION

Aevo'i jajivare jöhoje.

¹ Aveho urimo subivahuadoho Iesu Kerisohu huruohoromo röjahuijade jöhoje. Ērö-jahuijade jöho God-ro Iesu bojamadeje huro hesi mu vaejaharue aribövioho röjahuijago noro garomo uvoröhego: God-ro nimo'ego majae ijonö ähi ähi jii'e muohuro nosi örire rue'ie'ajëjo. Ēijonö rueröhe mu hesi jöho Kerisoro nosi örire röjahui'i nimoromo hesi aneraho uavamu huro barueromo John God-are mu vaejahaje aho röjahijadeje. ² God-hu jövade jö Iesu Kerisohu mae röjahijamu John-hu gavadoho aho'o huhu mae jajivo barëjadoho aviajeje. ³ Ae rahu ave surire jö adahë'oho o ave God-are örire jioromo rovade jö heromo rabe rabe jajivadoho äho ejahë'oho iae huë mae bae'a'anue maja börömohe dunovë'ero.

John-hu God-are ekaresiae amo göre göre raromaruoho jejëmijade jöhoje.

⁴ O asë'e ekaresiae aho'obëhe 7 Asia sa'a hesi uhure amo göre göre raromobe rovaru-johumë John naro jemesi örire jejëmi. Na nege God mami'e ähi jii'ero hiemu hibe rovë'ero jaruvohu'o ähi hijaje röhu ijonö ähi gemu hiemu hibe va'iröhe ä ahuro jemë huë baeromo ajëmiwego maro raromo'irarijago. O na nege God-hu döre hijaje röho hesi nuninö raromarue Aru'ahë aho'obëhe 7 äho jabu'o ähi gemuho jemesi örire ajëmi'iröhego. ⁵ O na nege Iesu Kerisoro Vavu hesi jöhuremu ma-mae majahuibe rovë'ero guomoromo huro aevo'ioho ri'öromo hijë'ero a masijo ioro'ioro ave sa'a muebejaruoho iosirëmiromo böröme namiromo muebejëvaje ä aho hu'o ähi gemuho ajëmi'iröhego.

Keriso hu mabëheje. Huro nosi örire uehorovauajëro jii'ero hesi köho otehoromo guomorovoromo ehuro nosi sisëho u'ovahuadeje. ⁶ U'ovahuoromo ajamuiromo nosi ihoho döro bamahuamu ehuro no masije riravoromo priest muoho baejë'e javue noro Keriso-are Böröme o Vavue God-are muoho vaenövoröhëni. Ähi ajamuijë'ego ehuni uvo'ejo: Hesi ihoho gemu börömohe höjo. Daruge aho'o hesiriremu höjo. Ae aho'obëhe no ähi uvemu uvobe va'ejarëjo. Iae mae.

⁷ Gare. Iae hu suehu'o gemu mae ruvebi'ie'e. Ruvebi'iramu ae aho'obëhe röhu hu anare aribövioho jabu'o nunëro garuomole'e. Garomo sa'ae aho'obëhe nierusuburu'e bamuruomole'e. Ējöho iae mae. Iae ähi jio'ë'e.

⁸ Bada God-ro uëve: Na urimo ni'ivevadoho röhu ijo tugoho'ioho ähi gemuoho jevo'ajëjo. Mami'e jiove rovadoho röhu avevejö'oho ähi jioromo röhu ijonöhu'o ähi jiove va'iröhe aho daruge aho'o jii'e aho God-ro ähi uëve.

John-hu nia'ovo'iraeromo Keriso gavade jöhoje.

⁹ Röhu John na jemesi agane gemuoho jeve. Jemë'o na'o Iesuare ae gemuohuro javuë'ero na jemë'o havoromo huë vavaene baeromo God-are aharire jiajëro hesi ajoho baeromo baberumi namijajeje. Na motumotu hesi ihe Patmos ä remë'ejö rabëni God-hu jövade jö Iesuhu ma röjahuijadoho naehu majëhijajohuni. ¹⁰ Naro Patmos sa'are hiromo hura börömohe Bada uehorovarue majaho rovanu iae God-are Aru'ahohuro rumorovevoromo uehore bojemamu hi'i hejodeje nasi dejonö jö'o ögohuro hëgö va'ëne ma-darugo'o rovavamu. ¹¹ Jö'o ögohuro ma-darugo'o rueromo uevavohijo: Mue gö gö ga'amanuoho suri surioro jajivonëjo. Jajivoromo ekaresiae aho'obëhe 7 jabesi öroro nugö'önego adahego hebe va'irarëjo. Ephesus amo rajo ekaresiae Smyrna amo raje Pergamum amo raje Thyatira amo raje Sardis amo raje Philadelphia amo raje Laodicea amo raje äho jabumëro adahobe hebe va'irarëjo.

¹² Ähi jövamu hejë'i hunuorovodeje rahuhu na'o jöe jövajoho ga'i. Ä'i gavodeje iro bahijarue gije aho'obëhe 7 gold-ehu avoho'amë'oho ä momorö'öjamu ¹³ o iro bahijarue gije riravaje ririre a ma va'ëne aho niögu ägobövi ba'amamu hörohu'o utahë'e gold-ehu avohë'e hisioho vinebire muoho taemë'e ähi namijamu. ¹⁴ Äa hesi simanohu'o simano

uohu'o ajivoromo sa buse jahanovë'e jiohijo. Hesi nunoho vënëro höduvanovohijo. ¹⁵Hesi höroho ajanie vënëro ravoromo ajivanovohijo. Huhu jö jövajoho jovëro ruomanovoromo ma-darugo'o uvavohijo. ¹⁶Hesi övo mare jije aho'obëhe 7 jio'amohijo. Hesi jö'ore kaejö ëge anie ruë jio vië jië'e anio ma-ma'e jiohijo. Hesi nu ano'oho majaeu höröromo ajivego gavaruëhi ëhi ajivë'e jiohijo. ¹⁷Ajivë'e jiamu gavë'i juhuonivoromo hesi höru'ere bejevoromo hesi bëhire ae guomë'ohuro raromanovodeje. Raromamu hesi övo mahuro nasi sinore bamehoromo uevadeje: Nadi juhuonivëjio. Na aevo'i jevadoho röhu ijo tugoho'i jevo'ajëjo. ¹⁸Na birivoromo hijaje ae jevajëjo. Urimo na guomevade höjo. Röhu gevëjo. Na ioro'ioremu hiemu hijajëjo. Ioro'ioremu hiromo darugoho baejë'ëro ëhu'ëro naehu uëvë'ohuro aëro vuovoromo vuovë'e ariböviehu va'o raromaruire ë va'o rarumarue höjo. O bogo uëvë'oho bogajo. Na ëhi jië'e eni jevë'e ae jevajëjo. ¹⁹Ëhuni jaruvo jiaje muohu'o ijönö rueröhe muohu'o jaehu ga'amanuoho ëho jajivo'amonëjo. ²⁰Röhu jije aho'obëhe 7 nasi övo mare jio'amamu gavane hesi jö subvahadoho o gold-ehu avoho'amë'e iro gije aho'obëhe 7 ga'amane ë hesi jö subvahadoho ë jöe niö'i jabesi bëhoho ma-sama'e huruoho majahi'ië'ajëjo. Jije aho'obëhe 7 jabesi bëhoho ekaresiae 7 jabumë muebejëvobe va'arue anerae jio'amajëjo. O iro gije 7 jabesi bëhoho ë ekaresia 7-ho jioje va'ajëjo.

2

Iesuhu Ephesus amore raromarue ekaresia jabesi örire nugö'öjade jöhoje.

¹Röhu Ephesus amore raromarue ekaresia jabu'o hiromo muebejëvaje anera hesi öroro ave jöho jajivonego ekaresiae aho'o he'irarëjo. Jajivoromo uënëjo: Nörö börome namiro mo jije 7 övo mare ma'eno'amë'e iro gije 7 jabesi ririre hi juvaje aho nöröro jöe majëhi'irögoro ë'ajëjo. Uënëjo: Nöröro uvajëjo: ²Jemesi muoho iae na gëvajëjo. I'u'e mu masijoho u'urume vae'ego gëvajëjo. O sisë aribövioho jemëro bogo ma-nunëremuoho gë'i ahëvo'ego gëvajëjo. Aëro jemë sarerëmiromo uëvare höjo: No apostle javuajë uëvaroho jemëro jabesi muoho mevoromo gëvarije höjo jabumë bogo apostle maehu jëvamu. ³U'urume vaejë'e jëvajëjo. Nasi jöëni vavaeni börome baejë'e jëvajëjo röhu bogo u'uvëvë'e höjo. ⁴Ëhi jëvohijajo röhu avehuremu gë'ihöromo na bijönegajëjo. Rabëni jemë aevo'i rajehi avoho'ego gënövödëhioho avevejö'oho bogo ëhioho ë'ego gëvajëjo. ⁵Urimo dë vövöbajo'e aho'o rajehinövarijoho avevejö'oho u'uhëhanovajoho ëho uehorovoromo sisëho vuonugo'i huotorovoromo urimo ë'onövarijëhi ëhi ë'onövorëjo. Bogo ëhi ë'e'oho naro ö'oromo jemesi iro gijoho rori'o bava'ejöjo. Bogo huotorovoromo avoho rajehijë'oho iae na ëhi ë'ejöjo. ⁶Iae ëhi höjo röhu aviëhi ë'arujoho iae mae höjo. Nicolaus-are ijore ijore jijiharue aribövi jabesi mu sisë naehu bijönimajëhi jemë'o ëhi gemuoho bijönimaruje höjo.

⁷Ae rahu ja God-are jö hejanue ae javë'oho nasi Aru'ahëhu ekaresia majëhibe rovaje jöho heromo avoho uehorovonëjo.

Ae rahu birivoromo mu sisë ruahö'öjamu gavë'oho Iesu naro ja ua'ejöjo a i'ovëvo'iröhe ije God-are mure namijaje hesi bajoho i'iranego. Ahia mino'ëjo.

Iesuhu Smyrna amore raromarue ekaresia jabesi örire nugö'öjade jöhoje.

⁸O Smyrna amore raromarue ekaresia jabu'o hiromo muebejëvaje anera hesi öroro ave jöho jajivonego ekaresiae aho'o he'irarëjo. Jajivoromo uënëjo: Aevo'i jiadoho ijo tugoho'i jioröhe aho guomadoho röhu maho i'ovade aho nöröro jöe majëhi'irögoro ë'ajëjo. Nöröro uvajëjo: ⁹Jemesi huë vavaenoho iae na gëvajëjo. Jemë ave sa'a hesi mae sisë bogojëvajohu'o gëvajëjo. Röhu dë vövöbajo'o uhure bövi mae baejë'e jëvajëjo. Amo jemë agëvarue aribövi jabesi jö sisëho ëhu'o gavajëjo. Jaburo uvarue höjo: No Jew raje javuajëjo röhu Jew rajehu God-are aribövi jiaruëhioho jabumë bogo ëhioho jio'i Satan-are aribövie jioruomajëjo. ¹⁰Jemë vi'ehe huë vavaene bae'ië'arujoho nadi juhuonivorëjo. Gahëjo. Iae Satan-ro ae uë'a'ajëjo jaburo jemë ae gö gö savoji gagore ba'amëvego huro jemesi dëho bijioho gërhëro. Ëhi'o'iramu huë vavaene baebe va'öjuvo majae ma-bisemu barë'iramu

barëjêho'ajëjo. Röhu biririvemu biririvamu vuovëvë'iroho ioro'ioyemu raromo'irarije suvuoroho naro bojëmi'ejëjo ruahö'öjarijohuni.

¹¹ Ae rahu ja God-are jö hejanue ae javë'oho nasi Aru'ahëhu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjë'oho sinoho guomavo'iramu ijonöho aru'ahoho bogo guomavoromo sisëroho va'i maro hi'a'anuëjo. Ahia mino'ëjo.

Iesuhu Pergamum amore raromarue ekaresia jabesi örire nugö'öjade jöhoje.

¹² O Pergamum amore raromarue ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Jajivoromo uënëjo: Kaejë ëge anie ruë jto vië jië'e anio ma-ma'e jö'ore jië'e aho nöröro jöe majëhi'ie'ajëjo. ¹³ Vaevë'e diehi jië'e amore raromarujoho iae na gëvajëjo. Satan hu ë amore a böröme vaeromo muebejëvaje höjo. Èhi höjo röhu nasi ekaresia aribövioho jemëro biririvoromo nasi ihoho ma'ënaruje höjo. Urimë'i Antipas-ro nasi jöho mae majëhijamu hegorofo ë Satan-hu hijajire raromarue amo rajohuro hu anamu guomade höjo. Guomamu röhu jemëhu nasi örire mae uehorovevarijoho bogo vuonugarije höjo. ¹⁴ Èhi höjo röhu avehuremu bogo maehu jio'i sisë höjo. Jasi ekaresia aribövie göëro göëro Balaam-hu mu sisë vaejadëhi ëhi gemuoho vaejarue höjo. Èhesi bëhoho urimë'i Balaam-ro a börömo hesi ihe Balak röjahiromo uavade höjo: Jero ëhi'oromo Israel rajoho sarerëminego sisëro revo'irajo. Balaam-ro jö sisëho ëhi röjahijamu hegorofo rue a börömohuro ejahoromo Israel rajoho dinëmijamu jaburo God-are jöho ahoromo uvare höjo: Inöme gö gö aru'aho'e höromo rajahiromo mioho ë inömo inömhuni bahijëhoromo vituoho ue'ahoromo öëro jijihanovoromadë höjo. Balaam-ro ëhi jië'e mu sisëho röjahade höjo. ¹⁵ Balaam-hu mu sisë urimo röjëhijadëhi jaruvoho ëhi jië'e mu sisëho Nicolaus-ro röjëhijego ae gö jemesirire raromaruohuro hesi ijore ijore jijihoromo mu sisë vaejarue höjo. Mu sisë vaejego jemëro ma-raromoromo nunëremu gëvaruje höjo. ¹⁶ Èhi jië'e mu sisë ma-nunëremu gëvarujoho vuonugo'i ë mu sisëho ahëvohëjo. Bogo ahëvë'oho naro ma-burëro ö'ejëjo. Ö'oromo nasi jö'ore jiaje kaejëho baeromo ë sisë ariböviohu'o muorovo'ejëjo.

¹⁷ Ae rahu ja God-are jö hejanue ae javë'oho nasi Aru'ahëhu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjamu gavë'oho naro suvuore bojami'ejëjo. Suvuoro hesi bëhoho urimë'i God-are aribövieuho a rumo'e sa'are jijihamu God-hu muebejëvoromo ö'idöre jiaje i i'imëmijadëhi naro ja ëhi muebejëvoromo gurihijë'e ö'idöre jiaje ioho i'imami'ejëjo i'iranego. Ö'idöre jiaje ioho i'imamiromo ajivë'e munëho bojami'ejëjo. Èmunë hesi döre iho i'e jajivë'e jio'a'ajëjo. Èihoho jasi sivue ga'a'anuëjo. A göho bogajo. Ahia mino'ëjo.

Iesuhu Thyatira amore raromarue ekaresia jabesi örire nugö'öjade jöhoje.

¹⁸ O Thyatira amore raromarue ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Jajivoromo uënëjo: God-are Harihe nunire vënehu höduvanovoromo hörure ajani vënehu ravoromo ajivanovaje aho nöröro jöe majëhi'ie'ajëjo. ¹⁹ Iae na gavajoho jemë mu mae vaejaruje höjo. Jemë na'o a ioro'iorohu'o rajahuiromo na mae uehorovevoromo nasi muoho vaejehoromo muoho u'urume vaejë'i biririvaruje höjo. Urimoho mu mae ma-bisemu vaejarijoho jaruvoho börömo bëhe vaejaruje höjo. ²⁰ Iae ëhi gavajëjo röhu avehuremu gë'ihöromo na bijönegajëjo. Magonahe gemu Jezebel-hu urimë'i hiromo mu sisë barovadëhi magonahe gemuëro jemë'o hiromo mu sisëho ëhi gemuoho barovaje höjo. Mu sisëho barovego jemëro bogo aho'i ma-nunëremu gavaruje höjo. Ma-nunëremu gavego ë magonahohuro jemë'o hiromo sarerëmiromo uëvaje höjo: Na jö God-aro baeromo majëhijaje magonahejevajëromo Iesu nasi mu vaejeharue aribövioho sareri sareri'e jöho röjëhiromo uëvaje höjo: A'o magonaho'o ëma sihamirovë'oho iae mae höjo. O inöme gö gö aru'aho'e jio'amajëromo jabumëni bahijëhare mi ue'ahë'oho iae mae höjo. Èhi jië'e sareri'e jöho majëhijego nasi aribövi ioro'iorohuro uvarue höjo: Hesi jöho mae höromo ejaruarue höjo. ²¹ Èhi ë'ë'e höjo röhu Iesu

naro bogo burëroho i'uoho bojami'i ma-muebejë'e jevajëjo huro uehoro sisëho vuonugo'i uehoro mae baeröhego. Röhu önö'e mu sisë röjëhijajoho vuonugo'iröhoho bijönimajëjo. ²² Bijönimë'ego ëhuni iae Iesu naro i'ue mana bojami'iramu guomo guome baeromo röhoremu raromo'ajëjo. Raromo'iramu ë magonahoho'u önö'e jijihaje aribövioho jabu'o ëhi vi'ehe böröme bae'a'aruëjo. Jabumë ë magonaho hesi jö ejaho'i bogo vuonugë'oho ëhi jië'e vi'ehi börömo hojëmi'ejöjo. ²³ O ë magonaho hesi ijore ijore jijiharue aboji harihu'oho Iesu naro muo'amo'iramu vuovëvo'ajëjo. Vuovëvo'iramu gagorovo ekaresiae aho'obëhe amo göre göre uvobe va'oruomo'ajëjo: Nöröro ae aho'obëhe nosi simanoho dë vövöbajo'oho mevavuo barëjaje höjo gö'i mae o sisë javuego. Mevavuo göromo nosi mu diehi vaejarue hesi manaho ëhi bojamui'ajëjo. Ekaresiaëro ëhi uehorovoruomo'ajëjo.

²⁴ Röhu Thyatira amo rajo a ioro'ioroho jemëro ë magonaho hesi jö sisëho bogo ejaharuje höjo. O hesi ariböviehu uëvaruoho: Satan-are uhu jö hesi bëhoho no baejaroho jemë'o baerë uëvaruoho jemë bogo ejëharuje höjo. Bogo ejëharujohuni ëhuni Iesu naro jemesi örire ave jöho uë'ië'ajëjo. Jemë mu böröme baejë'ego ë hesi döroho muoho bogo gö'oho bojëmi'ejöjo. ²⁵ Röhu ë mu baejarijoho biririvoromo ma'enegro Iesu na ö'iröjo. ²⁶ Ae rahu mu sisë ruahö'öromo biririvoromo nasi mu ma'enobe va'ojuvo jasi maja barëjë'oho naro ja daruge bojami'iramu sa'ae aho'o muebejëvo'anuejo. ²⁷ Sa'ae gö gö muebejëvoromo aehu rama anoromo hahovaruëhi jero ëhi ha'itoho baeromo vörö'o muebejëvo'anuejo. Naehu ëhi'oromo sa'ae gö gö muebejëvo'irodego nasi Vavuehu uevadëhi naro ja ëhi ua'ejöjo sa'ae gö gö vörö'o muebejëvo'iranego. ²⁸ Naro ëhi uaromo sisonu'e gavarue mujöru hesi ajoho bojami'ejöjo.

²⁹ Ae rahu ja God-are jö hejanue ae javë'oho nasi Aru'ahehu ekaresia majëhibe rovaje jöho heromo avoho uehorovonëjo. Ahia mino'ëjo.

3

Iesuhu Sardis amore raromaru ekaresia jabesi örire nugö'öjade jöhoje.

¹ O Sardis amore raromaru ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Böröme namiromo God-are Aru'ahe aho'obëhe 7 o jije aho'obëhe 7 baejë'e aho nöröro jöe majëhi'ië'ajëjo. Jemëhu mu vaejarujoho iae na gavajëjo. Na gavajoho ae aho'obëhe uvoruomaje höjo: Sardis ekaresiaho jemëro God-are daruge baeromo mae raromaruje höjo. Jemesi jöho ëhi atarue höjo. Röhu jemë bogo ëhioho jëvo'i jemesi aru'ahoho God-are darugo rumo'ero jiëhë'ero vuovëhë'e höjo. ² Èhuni ri'ö nune dadovohëjo. Vëni duoroho'ië'ajoho mueberomo huego avoho ravo'irajo. Duoroho barëjëho'ajëjo. Na gavajoho nasi A Börömo God-ro uvaje höjo: Jemesi muoho bogo maehu höjo. ³ Èhuni Christian jö rabe majëhijamu hejarijoho avo'avoho uehorovoromo eromo uehoro sisëho vuonugohëjo. Bogo ri'ö nuni dadovoromo avoho uehorovë'oho naro vajiohëro ö'ejöjo. Naehu ö'irode majaho bogo mae bogo ga'a'aruëjo. ⁴ Jemë ëhi jëvajëjo röhu jemesi Sardis amo raje ae gemu gemu jabesi niögoho avo'avoho muebejë'ëro va'inumoho bogojiehajëjo. Èaribövioho maëro jëvë'ëro ëhuni ajivë'e niögoho io'amoromo na'o gemu mae jijihö'aruëjo. ⁵ Ae rahu biririvoromo mu sisë ruahö'öjë'oho ajivë'e niögoho ëhi ba'amo'anuejo. O jasi ihoho mae raromemu raromo'iröhe aribövi jabesi surire jajivodoho na bogo mu'uvaho'ejöjo. Bogo mu'uvaho'i a'i naro nasi Vavu hesi nunire o anera jabesi nunire namiromo jasi ihoho ma-samae majëhiromo uë'ejöjo: Ave aho nasi a maho höjo.

⁶ Ae rahu ja God-are jö hejanue ae javë'oho nasi Aru'ahehu ekaresia majëhibe rovaje jöho heromo avoho uehorovonëjo. Ahia mino'ëjo.

Iesuhu Philadelphia amore raromaru ekaresia jabesi örire nugö'öjade jöhoje.

⁷ O Philadelphia amore raromaru ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Jajivoromo uënëjo: Bogo sisëho bogo sareri'oho jio'i ma-maëremu jiaje aho nöröro jöe majëhi'ië'ajëjo. David-hu böröme namiromo God-are öri ari'ere va'iröhe öroho muebejadëhi naro ëhi muebejaje höjo. Naehu öri jiovë'iroho ae

göehu tugoho'iröhoho bogo eni höjo. O naehu tugohë'iroho ae göehu jiovo'iröhoho bogo eni höjo. Èhi jië'e a börömoho Iesu naro jöe majëhi'ie'ajëjo. ⁸ Jemëhu mu vaejarujoho iae na gëvájëjo. Hehëjo. Naro mu öroho jemëni jiovehë'e jevájëjo. Jiovehë'ëro ae göehu tugohëho'iröhoho bogo eni höjo. Iae na gavajoho jemesi darugoho bogo bövioho jië'e jemëro nasi jöho ejehoromo nasi ihoho ae aho'o jabesi nunire huruoho majëhiromo uëvë'e jëvájëjo: Iae no Iesuare aribövie javuajëjo. ⁹ Iae Satan-are ariböviohuro jemesi amore raromoromo uvoruomaje höjo: No Jew raje javuajëjo. Röhu Jew rajehu God-are aribövi jiaruëhioho jabumë bogo ëhioho God-are aribövioho jio'i Satan-are aribövie jioruomajëjo. Röhu hehëjo. Naro jabumë ruahö'öjëvo'iramu jaburo ö'oromo jemesi hörunö ague aho raromoromo gëromo uvoruomo'ajëjo: Jemë Iesuhu rajëhaje aribövie jëvájëjo. ¹⁰ Nasi örohuni jemë u'urume vaejë'i biririvonövo'irarijago uëvode höjo. Èjöhö jemëro ma'enë'e jëvo'ego ëhuni naro jemë ma'enëgo'ejëjo. Ma'enëgo'iramu huë vavaene sa'ae dinö'e dinö'e rueromo ae aho'o jemesi dëre bijiohë'iroho jemë mae riravo'arujëjo. ¹¹ Naehu rue'irode majaho dunovájëjo. Èhuni jemëhu baejarije mu maho nadi vuonugo'i ma-avoho mueberëjo ëhuro aho bogo iosirëmiromo jemesi suvuoroho baejëho'iröhe höjo. ¹² Ae rahu biririvoromo mu sisë ruahö'öjë'oho naro baejavoromo nasi A Böröme God-are osare bamavo'iramu bönunö'e bibivoromo namijanovo'anuejo bogo ijoho rori'o va'iranëro. O nasi A Böröme God-are ihoho jasi sinore jajivaho'ejëjo ja hesiremu javoröhego. O nasi A Böröme God-are amo hesi ihoho sinore jajivaho'ejëjo. ÈJerusalem amo i'oho nasi A Böröme God-hu hijajire ö'idöre jioromo ruvebi'iröhoho ë amo hesi ihoho uavájëjo. O nasi iho i'ohu'o jasi sinore jajivaho'ejëjo.

¹³ Ae rahu ja God-are jö hejanue ae javë'oho nasi Aru'ahëhu ekaresia majëhibe rovaje jöho heromo avoho uehorovonëjo. Ahia mino'ëjo.

Iesuhu Laodicea amore raromarue ekaresia jabesi örire nugö'öjade jöhöje.

¹⁴ O Laodicea amore raromarue ekaresia jabu'o hiromo muebejëvaje anera hesi öroho jajivonego ekaresiae aho'o he'irarëjo. Jajivoromo uënëjo: Mae jövaje aho na jevë'ego God-are jöhö maro maro huruoho majëhijaje aho na jevájëjo. God-hu bövi bise'o bamadoho uevamu avoho'amode aho Iesu naro jöe majëhi'ie'ajëjo. ¹⁵ Jemesi muoho iae na gëvájëjo. Jemë naniho bogo nëgo avohaje höjo bogo bijönëgo avohaje höjo. Nëgo avoho'ibejajo o bijönëgo avoho'ibejajo na mae jevo'ibejajo. ¹⁶ Röhu bogo nëgo avoho'i bogo bijönëgo avoho'i uehore ma-ririre jëvajahuni ëhuni sabonö'e ijuhö'öjëvo'ejëjo. ¹⁷ Jemëro uvaruje höjo: Nosi sivue bövie bise'e eni javuajëjo. Marohë'e mae javuajëjo. Böviëni bise'ënioho bogo vavaenoho baejarue höjo. Èhi ataruje höjo. Röhu jemesi uhuroho bogo ëhioho jëvájëjo. Jemë vaevë'e huë vavaeni'e bövi bise'o rumo'e nuni sisë'e ma-sinëremu raromarujëjo. Èhi jëvájëjo ëho bogo gavaruajëjo. ¹⁸ Èhuni ave öri avoho röjëhi'ie'ajoho avoho herëjo. Nasi gold ma-mabëhe ajivë'oho nasiromo jemesi ujohorego marohë'e mae jëvo'irajo. Ajivë'e niögho nasiromo io'amego sinëremu raromoromo a nunire javoji'e mu vaejarujoho tugohëgo mae jëvo'irajo. Nuni hesi osoho imoromo rue jemesi nuni maro buerovego jemesi simanoho ajivëvego avoho uehorovo'irarijaje höjo. ¹⁹ Röhu naehu huë baejëvaje aribövioho i'ue bojëmiromo avo'avoho röjëhijaje höjo sisëho vuonugo'i ma-avoho jijio'irarijago. Èhuni jemëro nimo avohoromo huotorovoromo uehoro maemu baerëjo. ²⁰ Hehëjo. Naro osare ö'irögoro amonö namiromo jemesi ojore ano'anovájëjo. Ae rahu nasi huë heromo ojo jiovehë'oho naro rumo ö'oromo ja'o hiromo gemuoro ioho i'ejarëjo. ²¹ Ae rahu biririvoromo mu sisë ruahö'öjë'oho urimo naehu biririvoromo sisë ruahö'öromo ajiomoromo nasi Vavu hesi röho mare hu'o gemu mae hijë'ëro bövi bise'o muebejëvájëhi naro ëhi ja ua'iramu nasi röho mare ö'oromo na'o gemu mae hiromo na ajemiromo bövioho bise'oho muebe'amo'anuejo.

²² Ae rahu ja God-are jö hejanue ae javë'oho nasi Aru'ahëhu ekaresia majëhibe rovaje jöho heromo avoho uehorovonëjo. Ahia mino'ëjo.

4

Ö'idöre raromoromo God rajahiruomaje jöhoje.

¹ Ëhi'amu naro ga'i gavodeje ö'idöre va'arue ojoho jiovo nugë'e jiamu. Jiovo nugë'e jiamu gagorovo hejode hëgöehu uvanovaje urimo jö majehijade ahuro röhu maho mardarugo'o jöe majehiromo uevavamu: Avehuro rojomego ijönö mu diehi diehi jio'iröhoho na röjahijöjo. ² Ëhi uevamu hejë'i God-are Aru'ahohuro na avohevoromo simanoho huotoveho barëjamu gavë'i naro ö'idöre muoho garomo gavodeje a börömehu hijaje röho ö'idöre jiamu. Ëhi jio'ego ae gemu ë hihijo. ³ Hi'ego munë mabëhe gö gö kavuë'e ajivë'e jio'amoromo jinojino'irae'amajëhi hesi nu ano'oho ëhi jinojino'irae'hijo. Röhu nuogëro röho numohijo. Munëhu mabëhe rövajëhi nuogohuro nomoromo ëhi rövhijo. ⁴ Èröho maho ririre jio'i a duvahe aho'obëhe 24 ruë numë gemu gemu röho mare raromo rova'oruomohijo. Ajivë'e niögoho io'amoruomë'e a masijehu didi'aruëhi jië'e bosöe gold-ehu avoho'amaroho simanore didi'oruomë'e ëhi raromohijo. ⁵ Röhu ririre röhore baderivo'ego varuru vajeri'e vae'i hijavohijo. O ë röho ma hesi nuninö iro buno'irae'amadoho aho'obëhe 7 kavuo'amohijo. Èiro jabesi bëhoho God-are Aru'ahoe aho'obëhe 7-hoje. ⁶ O röho ma hesi nuninöho jovo e'u deri va'ëne ajivo avohë'e böröme böröme jiohijo.

O röho ririre jio'i God rajahijarue maje 4-ho ioni göre ioni göre dejonö nuninö ëhi riravo rova'oruomohijo. Nu ano'e ruë numë ma-nunemu jioruehijo. ⁷ Ëmajoho göho lion va'ëne jio'i göho cow ano'e harihu va'ëne jio'i göho ma-a nu ano'o va'ëne jio'i göho buruhehu hetejogo gavaruëhi hesi nu ano'oho ëhi jiohijo. ⁸ God rajahijarue maje 4-ho gemu gemu vivoje aho'obëhe 6 6 jio'amohijo. Jabesi vivoju uho'u'o dönöhu'o sino haho'oho aho'o ma-nunemu jio'amohijo. Röhu majae vahie sisone bogo vuonugë'e majöe iemu ioromo uvarueje:

Bada God maemu maemu maemu jio'i daruge aho'obëhe hesirohemu höjo.

Mami'e jiobe rovadoho jaruvo jiajoho röhu ijönö jio'iröhoho höjo.

⁹ God rajahijarue majohuro God ëhi ma-mabëhe rajahiromo jöho iarueje röho mare hiromo ioro'ioeremu hibe va'aje a hesi ihoho dö maro jioröhego. ¹⁰ Ëmaje 4-ehu ëhi rajahiromo jö ië'iroho rue a duvahoho aho'obëhe 24 jaburo röho mare hijaje a hesi nuninö ague aho raromoromo hesi örire rajahijarueje hu ioro'ioeremu hibe va'aje jië'ego. Rajahiromo jabesi a masijehu simanore didi'arue bosöho God-hu hijaje nuninö rideho bahijarueje. Bahiromo uavarueje:

¹¹ Nosi Bada God jero bövie bise'e bamane höjo.

Jero nimoromo avohë'ëro jio'amajëjo.

Ëhuro ja mae javë'ego iho böröme aje aho'o daruge aho'o jasi gemu höjo.

5

Huhohë'e sure God-are Sheep Harihe Iesu gemuehu jiovo varijëne jöhoje.

¹ Ëhi'amu gavodeje röho mare hiromo muebejavuaje aho God-ro hesi övo mahuro huhohë'e suroho ma'enë'e jiamu. Èsuroho ruë jajivo vië jajivoromo huhohoromo sivaëro aho'o 7 ëminö'e suroho badihi taemo'amë'e jiohijo. ² O gavodeje darugo'e anerahuro mardarugo'o uvamu: Rahu a böröme javë'oho badihi taemo'amade sivaho goho'amoromo suri jiovo'iranoho eni javajëjo. ³ Ëhi uvamu röhu ö'idöre sa'are sa'a uhure ëhi jië'e a börömo nadoromo bogo mae bogo birohareje huhu ë suri jiovoromo adaho'iröhoho. ⁴ Ëhi jië'e aho bogo birohamu ëhuni na sisë maro nivodeje. ⁵ Nivamu a duvahe gemuëro uevadeje: Nadi nivo'i ave jöho hejëjo. A böröme gemu iae eni jiajëjo. Lion-hu mi ioro'ioeremiroromo darugo'e jiajëhi huro Judah rajo ioro'ioeroho ëhi iosirëmiromo darugo ma'e höjo. David urimo hinövade a hesi ujo böröme höjo. Ëahuro sisëho ruahö'öjë'ëro sivaë 7 goho'amoromo suri jiové'oho hu eni höjo.

⁶ Eni höjamu hejë'i gavodeje Sheep Harihoho namijamu. Mami'e aëro anamu guomë'ëro sinore batato'e jië'e ëhi namijamu. A duvahoho ruë numë riravo rova'ego God rajahijarue

maje 4-ho ruë numë riravo rova'ego ë Sheep Harihoho riri mare God-are röho ma hesi ririre namihijo. ËSheep-oho dane aho'obëhe 7 o nune aho'obëhe 7 ëhi jio'amohijo. Ënune aho'obëhe 7 jabesi bëhoho God-are Aru'ahe 7 sa'ae dinö'e dinö'e rëmö'öjadohoje. ⁷Amo ë Sheep Harihohuro rueromo röho mare hijaje aho God hesi övo mare jiaje suroho baehijo. ⁸Suroho bae'ego God rajahjarue maje 4-ho a duvahe aho'obëhe 24-ho jaburo Sheep Harihu hesi nuninö sa'are ague aho raromohijo. Jabumë gemu gemu gita övore ujuohë'e gold'e ramare ridi'e buejarue vëni u'oho ujuohë'e jiohijo. Ridi'e buejarue vëni u'i hesi bëhoho God-are ariböviehu hesi örire atarue jö'o ögohoje. Gita'o ramare vëni u'ohu'o ujuohë'e ague aho raromoromo ⁹jö i'oho ioromo uaruomohijo:

Ja maëremu javë'ëro ëhuni suri baeromo siva goho'amë'oho eni javajëjo.

Aëro anagamu jasi köho otehoromo guomane höjo. Guomoromo ëhuro ae ajëmijane höjo.

Agane gö gö huë gö gö sine gö gö sa'ae dinö'e dinö'e sisë'i raromaroho jero guomoromo ëhuro imëvoromo baejëvoromo God-arinö rëmane höjo.

¹⁰God-arinö rëmoromo jabesi ihoho döro bamëhamu ëhuro jabumë masije riravoromo priest muoho baejare höjo

nosi A Böröme God hesi muoho vaenövoröhëni.

Priest muoho baejë'ëro ijönö masije vaeromo sa'are ae muebejëvoruomo'ajëjo.

¹¹Ëhi uaruomamu naro garomo hejodeje anerae aho'obëhe mae bogo adaho varijënoho uvoruomamu. God-are röho maho o God rajahjarue majoho o a duvahoho ëho ririro jio'amo'i ë aneraho aho'obëhe ruë numë raro mo rova'oruomohijo. ¹²Raromo rova'oromo ma-darugo'o uvoruomohijo:

Anamu guomade Sheep-oho mae höjo.

Ëhu'ëro darugo maho inömo inöme aho'o uehoro maho vörö maho iho maho aji maho ma-hesiro gemu höjo.

Noro hu gemu rajahi'ëjarëjo.

¹³Ëhi uvoruomamu hegorovo hejodeje God-hu bamade bövie bise'e ö'idöre sa'are sa'a uhure jovo gagore raromaruoho ëho jaburo aho'obëhe uvoruomavamu:

God röho mare hijaje ahu'o Sheep Harihohu'o

iho maho aji maho darugo maho ma-jabesiro gemu höjo.

Ëhi jiemu jiobe va'ie'ego jabumë gemu rajëhiemu rajëhinövo'ëjarëjo.

¹⁴Ëhi uvoruomamu hegorovo rue God rajahjarue maje 4-ho jaburo uvoruomohijo: Ëjöho iae mae-ëjo. O a duvahoho jaburo sa'are ague aho raromoromo God'o Sheep Harihohu'o rajëhiruomohijo. jöhoje.

6

Suri badihi taemë'e siva dadovobe va'ade

¹Ëhi'oruomamu gagorovo gavodeje surire sivae 7 badihijaroho gemu Sheep Harihohuro aevoromo gohamu. Gohamu evare hejodeje God rajahjarue maje 4-ho röhu gemuëro varurehu anajëhi ëhi uvavamu: Rovëjo. ²Rovëjamu hegorovo ga'i gavodeje sino ajivë'e horse jiamu. Röhu ë horse hesi döre hijade aho pevae ma'enohijo. Mami'e muorovoromo ruahö'öjë'ego bosö mabëhoho hesi simanore didi'ahohijo. Didi'aho'ego va'ohijo muorovoromo huro muorove aho'o ruahö'ö'amo'iröhëni.

³Ëhi'ego Sheep Harihehu urimo surire sivae gemu gohadoho röhu number 2-oho gohohijo. Jiovamu evare hejodeje God rajahijaje majo göhuro uvavamu: Rovëjo. ⁴Rovë'ego ae sino kavuo avohë'e horse-re ruehijo. Rueromo vöröe bojami'ego baehijo ëhuro sa'ae gö gö huë mae baerovarue muoho ijumëhego ae göëro göho muo'amo'iröhego. Ëhi ë'iröhego muorovarue kaejö ëgoho hesi örire bojamihijo.

⁵Ëhi'ego Sheep Harihehu urimo surire sivae niö'i gohadoho röhu number 3-oho gohohijo. Gohamu evare hejodeje God rajahijaje majo göhuro uvavamu: Rovëjo. Rovëjamu naro ga'i gavodeje ae rövë'e horse-re hiromo i'u gavarue inömohe baejë'e

rovamu sa'a hesi iruno'oho ga'iröhëro i'ue dimino'e jiego. ⁶ Ae rövë'e horse-re hiromo i'ua gavarue inômoho baejë'e rovamu gagoro hejodeje God rajahijarue majo jabesi ririre jioromo aëro jövanovoromo sino rövë'e horse-re rovade a hesi örire uavavamu: Jero sa'a iruno'e ijumo'anuejo. Ijumo'iramu iruno'oho sisërëromo bogojianovo'ajëjo. Ioho bogojianovo'iramu ëhuro hesi manaho ajiomo'ajëjo. Ajiomo'iramu aehu i imo'ië'iroho majae gemu hesi mu vaejare manaho bu'ö barëromo ëhuro majae gemu hesi iruno'o maho o majae niö'i gemu hesi iruno'o sisëho ujuoh'o'arujo. Suvuoroho ëmino'e ajiomo'ajëjo. Röhu jaehu iruno'o ijumë'oho olive ijo bajohu'o grape ö'i bajohu'o bogave ijumo'iranëjo.

⁷ Èhi'ego Sheep Harihehu urimo surire sivae niö'i gemu gohadoho röhu number 4-ho gohohijo. Gohamu evare hejodeje God rajahijaje majo göhuro uvavamu: Rövëjo. ⁸ Rövëjame hegorovo ga'i gavodeje ae sino jio'ajivë'e horse-re rovamu. Jio'ajivë'e horse-re rovade a hesi ihohe A Vuovëvo'iröhe Aho jiadeje. O ae gö hise ijore ruehijo. Hesi ihoho Vuovë'e Aribövi Raromarue Öri ari'oho jiadeje. Jabu niö'i vöröe bojëmi'ego baehijo sa'ae aho'obëhe tariojogo ëhi niö'i ëhi niö'i jiego jaburo gemu baeröhëni. Gemu baeromo ijumëvego göëro göhu'o muorovoromo vuovoröhego. Ie barëromo vuovoröhego. Guomo guomo sisë baeromo vuovoröhego. Je'o miëro umijego vuovoröhego.

⁹ Èhi'ego Sheep Harihohuro urimo surire sivae 4 gohadoho röhu number 5-ho gohohijo. Gohamu evare gavodeje vuovëvë'e a jabesi aru'ahoho God-ni suvuoro bahijarue maratu bëhire sa'are raromamu. Èraromare hesi bëhoho urimoho ë ariböviohuro God-are jöho uehorovoromo biririvoromo majëhinövareje. God-are jöho biririvoromo majëhijamu gagorovo aëro muo'amamu vuovëvadeje. Muo'amamu vuovëvë'ëro ëhu'ëro jabesi aru'ahoho ë raromohijo. ¹⁰ Raromoromo ma-darugo'o uvoruomohijo: O asë'e Bada ja darugo eni jië'e ae javajëjo. Ja mu sisëho bogo vaejanue o sareri'e jöho bogo jövanue a ma-maemu javajëjo. Röhu ë sa'are raromarue ariböviohuro no bijuëmavuare höjo. Èhuni ja majae dimino'e ma-nunëremuoho gëbe va'oromo evare ë jabesi mu sisëho mevo gëromo i'uohe mana bojëminëjo. ¹¹ I'uohe mana bojëminëjumu ajivë'e niögu ëgoho ë aribövioho suvuorëmi'ego ujuohoruomohijo. Ujuohoromo hejareje uëvavamu: Majae ma-bisemu ëgo'o nuhanovorëjo hujëji jemë muo'amëvarëhi jemë'o nasi mu vaejarue ö mueno'o aehu muo'amego vuovoröhe aribövi ioro'ioroho rue barëjogo evare i'uohe mana bojëmi'irode höjo.

¹² Èhi'ego Sheep Harihehu urimo surire sivae övo gö mine gohadoho röhu number 6-ho gohohijo. Gohamu evare gavodeje sa'aho börömo böröme hijiohijiovamu. Sa'aho hijiohijiovo'ego niögu sisë rövë'e jiajëhi maja nunohuro ëhi rövo'ego manaerohuro kö va'ëne kavuohijo. ¹³ Manaerohuro kavuo'ego buru börömëhu rueromo meso hijiovego meso böso i'ehu rireromo ruvebijajëhi jiji mujöru'ohuro ëhi sa'are rireromo ruvebihijo. ¹⁴ Rireromo ruvebi'ego aehu suri huhohëgo bogo gavaruëhi ö'idöhuro ëhi arorovoromo sisërë va'ohijo. Dahore aho'obëhe o sa'a dirö dirö'e jovore jio'amajoho aho'obëhe arua anumiaie va'ohijo. ¹⁵ Arua anumiaie va'ego sa'are a masijo masijoho a duvaho ioro'ioroho muorovo a masijoho inömo marohë'e aribövioho darugo'e aribövioho a jabesi muemu vaejarue aribövioho jabesi nimoro mu vaejarue aribövioho ëhi ae aho'o huruomo va'oromo juju gagore dahorure munë burure gurihirovo barëhijo. ¹⁶ Gurihirovo barëromo uvoruomohijo: Dahoroho munëho jemëro ahoromo urahahuego ëhuro röho mare börömo hijaje ae God bogo gö'irajo. O Sheep Harihu hesi vöröho no bogo baejavuo'irajo. ¹⁷ Èhesi bëhoho vörö majaho rovë'e höjo. Raro ë vöröho uraho nami'a'ajëjo.

7

God-hu hesi aribövie 144,000 avoho muebejëvade jöhoje.

¹ Èhi'amu gavodeje anerae 4 riravamu. Sa'ae aho'o dinö'e dinö'e jiajoho ririre jio'i jabumë aruhiaie anumiaie aruae aviaie riravo rova'ohijo. Riravo rova'oromo anerae gemuëro gemuëro burehu rovajoho gemu gemu tugohohijo buroho bogo rueromo sa'aho jovoho ijoho huosihoröhego. ² Buroho ëhi tugohamu gagorovo na gavodeje anerae

göëro aruhe maja rojomajire jioromo rojomamu. Rojomoromo God darugo'ehu hijaje hesi jajivarue inömoho hesi övëro baejë'e rühijö ehuro God-are aribövi jabesi sinore taemëhego jaji'e jio'amo'iröhego. Rueromo ma-darugo'o uvohijö rue anerae 4-ho jaburo hejëro mami'e sa'a'o sö jovo'o ijumo'iröhe vöröho God-aro baeruomë'ëro. ³ Uvoromo uvohijö: Jemëro sa'aho jovoho ijoho nadi vejö'oho ijumo'amohëjö. Hujeji God-are mu vaejarue aribövi jabesi varijore God-are soroho jajivëhego evare jemëro ë jajoho garomo uvo'irarijeygo: God-ro tugohë'e höromo jemëro jabumë bogo ijumëvo'i öri ari'ohemu ijumo'irarije höjö. ⁴ Ëhi uvavamu hejë'i hejodeje aëro uevamu: God-are soru varijore baejare aho 144,000 ëmino'e höjö. Israel hesi agane 12 aho'obëhe baebe va'ë'e höjö. ⁵ Judah'o hesi ujoho 12,000. Reuben hesiroho 12,000. Gad hesiroho 12,000. ⁶ Asher hesiroho 12,000. Naphtali hesiroho 12,000. Manasse hesiroho 12,000. ⁷ Simeon hesiroho 12,000. Levi hesiroho 12,000. Issachar hesiroho 12,000. ⁸ Zebulun hesiroho 12,000. Joseph hesiroho 12,000. Benjamin hesiroho 12,000. Ëaribövioho 144,000 jaburo God-are soroho baeruomade höjö.

God-are aribövie ae aho'obëhe riravoruomade jöhoje.

⁹ Ëhi'amu naro ga'i gavodeje ae aho'obëhe mae riravamu. Bogo adaho varijënoho jiohijö. Sa'ae dinö'e dinö'e agane gö gö sine gö gö huë gö gö aribövioho ajivë'e niögu ëgoho io'amë'e juva hanoho ujuohë'e God-are röho ma hesi nuninö Sheep Harihu hesi nuninö riravohijö. ¹⁰ Riravoromo ma-darugo'o uvoruomohijö: God röho mare hiromo muebejavuajohu'o Sheep Harihohu'o jaburo niö'iro mabëhe ajamüromo manö babamavuë'e höjö. ¹¹ Ëhi uvoruomamu God-are röho maho riri mare jio'i God rajahijarue maje 4-ho ruë numë riravo rova'i röhu majo jabesi dejonö a duvahoho ruë numë raromo rova'i röhu a duvaho jabesi dejonö ë aneraho aho'obëhe ruë numë riravo rova'ohijö. Ëhi riravoromo röho ma hesi riröre ague aho raromoromo God rajahiruomohijö. ¹² Rajahiromo uvoruomohijö: Aveho iae mae-ëjö. Aji maho uehoro maho iho maho darugo maho vörö maho nosi Böröme God-aremu jiajoho ëhi ma-jiemu jiohe va'ajëjö. Ma-jiemu jiohe va'ie'ego noro hu gemu rajahiromo huë mabëhe uanövo'ejarëjö. Iae mae-ëjö.

¹³ A duvae 24-ho röhu gemüero ri'öromo na uehijö: Ëajivë'e niögu ëgo io'amë'e aribövioho rahumë jioruomajëjö. Dinö'e jioromo rueruomade höjö. ¹⁴ Rueruomade höjamu naro uavodeje: Na bogo gavajëjö. Jasi jero gavanuëjö. Jasi jero gavanuë'ego rue a duvahohuro uehijö: Ëajivë'e niögu io'amë'e aribövioho ëho bogo vuovëvë'e sa'are raromamu evare Iesu bijönimarue ariböviohuro jabesi örire huë vavaene börömo bëhe bojëmamu baeruomade höjö. Baeromo röhu iae mae rueruomade höjö. Jabumëro God-are Sheep Harihu hesi köhuro jabesi niögoho u'oruomamu jabesi sisëho barëjähë'ëro niögoho ma-ajemu jiehö'amajëjö. ¹⁵ Ëhu'ëro jiehë'ëro jabumë God-hu hijaje röho ma ë hesi nuninö riravoromo hesi osare vahie majae ma-hesi muohemu vaemu vaejahoruomaje höjö. Vaejaho'iramu röho mare hijaje ahuro jabu'o gemu mae hiromo mu sisëho raboho tugohëho'iramu munë bururo raromanovoruomo'ajëjö. ¹⁶ Munë bururo raromanovoruomo'iramu ijonöho vadunoho bogo hömëvonövo'ajëjö. Huëho bogo girihëvonövo'ajëjö. Majaho bövioho bise'oho bogo ravëvo'iramu sinoroho vörö'iraeromo birebirëgonövo'ajëjö. ¹⁷ Rabëni hesi bëhoho God-are Sheep Harihe röho ma hesi ririre hijaje ahuro ë aribövioho hesi Sheep ömo'ömeago gagovëvoromo muebejëvonövo'ajëjö. Muebejëvoromo sö ujuohoromo a i'ovëvo'iröhe jovore ë va'onövo'ajëjö. Ëhi'o'iramu God-ro jabesi nuni jovoho miorëho'iramu jabesi huë vavaenoho aho'obëhe barë'ajëjö.

8

Suri badihi taemö'amare sivae 6 gohobe rovadoho ijo tugoho'i number 7-ho gohade jöhoje.

¹ Ëhi'ego Sheep Harihehu urimo surire sivae övo gö mine övo göre gemu gohadoho röhu ijo tugoho'i number 7-ho gohohijö. Goho'ego evare ö'idöho jöromoraebe va'öjuvo half hour rabu'e barëjadeje. ² Ëhi'amu evare anerae 7 God-are nuninö riravaruoho naro gëvodeje. Riravoromo hëgöe aho'obëhe 7 bojëmi'ego gemu gemu ujuohohijö.

³ Ujuoho'ego anerae göëro gold'e hevöho baeromo ruehijo ose ë bamoromo vënëro buejego ridi'e vëni u'ohuro God-ni ajiomoröhego. Hevöho baeromo God-ni suvuoro vënehu buejarue maratue gold-ehu avohare ë hesi bëhire rueromo ë namihijo. Nami'ego aëro ose aho'obëhe bojami'hijo huro God-hu hijajire nuninörire maratuore ë bamoromo buejego God-are ariböviohuro ëninamijego ëninamaruohu'o ridohu'o gemuoro havoromo God-arire ajiomoröhego. ⁴ Osoho bojami'ego anerahuro övëro ma'eno'ego God-are ariböviehu ëninamaruohu'o ridohu'o gemuoro havoromo God-arire ajiomohijo. ⁵ Ëhi'ego anerahuro ridi'e hevöho baeromo God-ni suvuoro vënehu buejarue maratu döre ravë'e vënoho aëgoromo irijiomö'ego vënoho suovoromo io'amo'ego sa'are rireromo abuehijo. Rireromo abue'ego baderivoromo vajeri varuru'e vaeromo sa'aho hijiohijiovohijo.

Aneraehu hëgö huobe rovare jöhoje.

⁶ Ëhi'ego rue anerae aho'obëhe 7-ho hëgöe gemu gemu ujuohë'ëro huo'i jö'ore bamohijo.

⁷ Jö'ore bamoromo anerae number 1-ohuro hëgöho huohijo. Hëgöho huo'ego ënëro direjohijë'e masijohu'o vëni'o kö'o buarohë'oho otehö'ö'ego ö'idöre jioromo sa'are rireromo abuehijo. Rireromo abue'ego sa'ae aho'o ije aho'o niö'i gemu tarijaroho gemu ö'idöre jioromo rireromo abuejade vënohuro ravo barëhijo. O garasi rude rövé'e ma-maho aho'obëhe ravo barëhijo.

⁸⁻⁹ Ëhi'ego anerae gemuehu hëgö huadoho röhu number 2-ohuro hëgöho huohijo. Hëgöho huo'ego evare dahoru bö'röme vënehu ravanovë'ohuro ahoromo sö jovo e'ure abuehijo. Abue'ego sö jove aho'o jovo mie aho'o boat aho'o niö'i gemu tarijaroho jovëro dirö'e gemu köraehijo jovo mie ë dirö'e gemuore vuovohijo boat ë dirö'e gemuore dadorovo'amohijo. Röhu dirö'e niö'i bogo.

¹⁰ Ëhi'ego anerae niö'iehu hëgö huaroho röhu number 3-ohuro hëgöho huohijo. Hëgöho huo'ego jiji bö'röme ö'idöre jioromo vënëro ravanovë'e be'abuehijo. Be'abueromo rova'o'amë'e jove aho'obëhe sa'a gagore rojomo'amaje jove aho'obëhe niö'i gemu tarijaroho dirö'e gemu taemohijo. ¹¹ Taemamu jovoho ajuovadeje jiji hesi ihohe Ajuo'ëro jii'ëro. Ajuovo'ego ae aho'obëhe ë jovoho ue'ahoromo ajuomo'amoromo vuovohijo.

¹² Ëhi'ego anerae aho'obëhe niö'i gemuehu hëgö huaroho röhu number 4-huro hëgöho huohijo. Hëgöho huo'ego majae manaere jiji mujöru'e ha'ose aho'obëhe niö'i gemu tarijaroho gemu sisërëhijo. Sisërëromo ramoramovohijo. Ramoramovë'ëro ëhu'ëro majaeahu sisonu'e jeni'e maja'e ajivo'iröhe majae bamo'iröho niö'i gemu tarijaroho gemu bogo ajivo'i ramoramovohijo. O manaerehu jiji mujöru'ehu vahi'e ajivo'iröhe majae niö'i gemu tarijaroho gemu bogo ajivo'i ramoramovohijo.

¹³ Ëhi'amu naro ga'irögoro ë'amu gavë'i evare hejodeje buruhohuro döre biojë'i uvavamu: O vaevë'e vaevë'ëjo. Sa'are raromaruje aribövioho anera ioro'ioroho niö'i gemu jaburo hëgöho huobe va'iramu jemë sisërëjëvo'ajëjo.

9

¹ Ëhi'ego anerae ëhi niö'i ëhi niö'iehu hëgö huaroho röhu number 5-huro huohijo. Huamu gavode jijoho ö'idöre jioromo sa'are be'abuejë'e jiamu gagorovo gavodeje gua gago ëgobövi ma ë hesi ojo jiovarue key-oho aëro jiji hesi örire bojami'ego baejamu. ² Gua hesi ojo jiovarue key-oho baenugoromo gago ëgobövi hesi ojoho jiovohijo. Jiovo'ego vëni bö'römo bö'röme gua gagore jioromo u'ivoromo rojomohijo. Rojomoromo majaho tugoho'ego öri ari'oho aho'obëhe ramoramovohijo. ³ Ramoramovo'ego guaeaviguaeviëro vëni u'ire jioromo sa'are ruvebiruomohijo. Ruvebiromo ë guaeaviguaeviohuro niani'ö hesi vörö va'ënoho baejareje ae ijumo'amoröhëni. ⁴ Vöröho baeromo röhu heruomadeje uëvavamu: Garasie ije ö'e iruno'e resu resue rabe rabe sa'are jiajoho bogave ijumo'irarijëjo. God-are soru varijore bogojie'ohemu ijumëvorëjo. ⁵ Ijumëvë'oho jabumë nadi muo'amëvo'irögoro niani'öehu umijego vi'ehëgaje ëhi jii'e vi'ehoho manaere övo gö mine bojëmibe va'orëjo. Ëhi uëhijo. ⁶ Ëhi uëvadëhi ë manaere övo gö mine hesi uhure ë ijumëvë'e aribövioho vuovo'i nëgo'ë'e. Vuovo'i nëgo'iramu vuovo'i öroho bogo biroho'ë'ö.

⁷ Rõhu ë guaeviguaeivi jabesi sino haho'oho muorovo'irõgoro avohëhare horse-oho va'ëne jio'amohijo. O jabesi simanore gold'e bosõ va'ënoho didi'ëho'amë'e jiohijo. O jabesi nu ano'oho a nosi nu ano'o va'ëne jio'amohijo. ⁸ O jabesi simano uoho magonahe simano rudu'e jabesi u jiajëhi ëhi jiohijo. O jabesi anoho vös'o'e lion jabesi ano va'ëne jiohijo. ⁹ Rõhu aehu muorovo'irõgoro biriri'e niõgehu vinebi tugohoromo io'amarue ëhi jië'e biriri'e niõgoho vinebire io'amë'e jiohijo. O vivojehu diohodiohovoromo huosihë'oho ëho muorovo'i va'i horse-ehu maratu jagu ujuohoromo darugo'o va'ego garahör'ole baejeko hejaruëhi ëhi jiaovahijo. ¹⁰ Rõhu jabumë uho'e jio'amohijo. Jabesi uhoho vör'ole niani'õ uho va'ëne jio'amohijo. Vörõho uhore jië'ëro ë uhohuro manaere övo gö mine umibe va'ë'ö. ¹¹ Rõhu ë guaeviguaeivi jabesi börõmo vaeromo muebejëvaje aho gua gago ëgöbövi muebejaje anera sisëhoje. Ëanera hesi ihoho Hebrew jöëro uvarueje: Abaddon-ajo. O Greece jöëro uvarueje: Apollyon-ajo. Ëiho hesi bëhoho bövi bise'o ijumo'amajohoje.

¹² Guaeviguaeivi rueruomade vavaeni'e muoho iae barë'i rõhu buruhehu uvade vavaeni'e muoho niõ'i gö'o rue'ë'e.

¹³ Iae anerae övo gö minehu hëgõ huaroho rõhu number 6-huro hëgõho huohijo. Hëgõho huamu hejodeje God-are nuninõ namijaje gold'e maratu osore osore jioromo uvavamu. ¹⁴ Uvoromo ë vejõ'e hëgõ huaje aneraho uavavohijo: Nume anerae ëhi niõ'i ëhi niõ'i Euphrates jovo börõmore tövëvaroho jiovo nugõ'õ'amëjo. ¹⁵ Jiovo nugõ'õ'amëjamu rue hëgõ huade anerahuro ë anerae ëhi niõ'i ëhi niõ'i tövëvaroho jiovo nugõ'õ'amohijo ae aho'obëhe sa'are raramaruoho niõ'i gemu tarioromo niõ'i nugõ'i gemu muo'amo'irõhego ë aneraho ëhi niõ'i ëhi niõ'i God-ro tövëvoromo bamëv'ëro ë majaho ë manaeroho ë vadunoho rovego jiovo nugõ'õ'amego ë sa'are aribövioho muo'amëvörõhego. ¹⁶ Rõhu ë anerae 4 jabesi horse-re va'arue muorovo aribövioho iae 200 million jiadeje. Ëjõho iae na hejodeje. ¹⁷ Rõhu ë muorovo'irõhe horse jabesi o horse va'arue muorovo aribövi jabesi nu ano'oho nia'ovoro gavodeje. Jabesi vineboho biriri'e niõgohuro tugohoromo io'amë'e jiohijo. Rõhu biriri'e niõgu jabesi nu ano'oho kavuë'e vëni hödu va'ëne röv'e vëni u'i va'ëne o höv'e'e munë ravoromo hödu höv'e'e jiajëhi ëhi jio'amohijo. Rõhu horse jabesi simanoho lion jabesi simano va'ëne jio'amohijo. Rõhu vëni höde vëni u'e o höv'e'e munë ravoromo hödu höv'e'e jiajëhi jië'oho ëho jabesi jö'ore jioromo suorovohijo. ¹⁸ Horse jabesi jö'ore jioromo suorovoromo vëni hödoho o u'oho o höv'e'e munë höv'e'e jiajëhi jië'oho ë mu sisëhuro ae aho'obëhe sa'are raramaruoho niõ'i gemu tarijaroho niõ'i rëmo'i gemu ravëvo barëjadeje. ¹⁹ Rõhu ë horse jabesi vörõho jabesi jö'ore o jabesi uhore jiohijo. Jabesi uhoho simano'e jiohijo ëhuro ae ijumo'amo'irõhëni. Jabesi uhoho simano'e jië'ëro ëhu'ëro ë uho jabesi nu ano'oho sigobu sisë jabesi nu ano' va'ëne jiohijo.

²⁰ Ëmu sisëhuro ëhi rueromo ijumëvo'ego a ioro'ioroho vuovëvo'i ioro'ioroho bogo vuovëvohijo. Bogo vuovëvadeje rõhu inõmo sisë jabesi övehu avohoromo uehorovaruoho bogo uehorovoromo vuonugo'i a'i inõmo sisë gold-ehu o silver-ehu o copper-ehu o munë göehu göehu o ijehu avoho'amaroho sarerivoromo uvoruomohijo: Ëho aru'aho'e höromo uehorovemu uehorovoruomohijo. Rõhu ëhi jië'e inõmoho bogo uheriharueje. Bogo hejarueje. Bogo jijiharueje. Ma-momorõ'õjarueje. Ëhi jië'e inõmohu'o aru'aho sisëhu'o uehorovaruoho bogo vuonugo'i ëhi ma-uehorovoromuohijo. ²¹ Ëhi ma-uehorovoromo a muo'amarue muoho bogo vuonugoromo iro oso'e muoho bogo vuonugoromo önö'e muoho bogo vuonugoromo vajiohu'e muoho bogo vuonugo'i ma-vaemu vaeruomohijo.

10

Aneraehu suri bise'o John bojamamu ijade jöhoje.

¹ Ëhi'amu gavodeje anera göho hesi darugoho bövi maho jië'ëro suëro numë'e simano dõre nuoge ba'amë'e sa'are ruvebijamu. O hesi nu ano'oho maja va'ëne ajivë'e jio'i hesi höroho vëni hödu ëgöbövi va'ëne jiohijo. ² Rõhu huhoharue suri bise'oho jiovë'e ë anerahuro övëro ma'ënohijo. O hesi höru maho sö jovo dõre bamo'i hesi höru adoho sa'a dõre bamoromo ëhi namihijo. ³ Ëhi namiromu lion-ehu uvaruëhi ëhi ma-vörõëremu

uvohijo. Uvo'ego vajeroho aho'obêhe övo gö mine övo göre niö'i ano'amoromo dirö'e göre göre êhi uvobe va'ohijo. ⁴Vajeroho anoromo uvobe va'amu hejë'i ë vajerehu uvare jöho naro jajivo'irögororo ë'odeje. Jajivo'i ë'irögororo hejodeje jöe ö'idöre uevavamu: Vajere övo gö mine övo göre niö'i uvaroho nadi jajivo'i subivêhonêjo.

⁵Röhu hörü gö sö jovore bamo'i hörü gö sa'are bamë'e namijamu gavode anerahuro övo maho ö'idöre nugojiomohijo. ⁶Nugojiomoromo God-are ihore darugo'e jöho majêhiromo uvohijo: Ioro'ioyemu hijaje aho God ö'idö sa'a jovo bövi bise'o avoho'amade ahuro ge'ego na ave jöho majêhi'irögororo ë'ajêjo. Ijonöho bogo muebe'irögororo ⁷a'i anera göhuro hêgöho huo'iramu evare God-hu mami'e subivahuade mu jioröhe jö God-hu hesi mu vaeromo jö majêhjarue aribövi uëvadoho ë muoho iae jio barë'ajêjo.

⁸Êhi uvamu röhu urimo ö'idöre uevavamu hejode ahuro jöe gö majehiromo uevavohijo: Rue anera hörü gö jovore bamo'i hörü gö sa'are bamo namiromo jiov'e suri övehu ma'enajoho ë suroho jero va'oromo baejêjo. ⁹Êhi uevamu hegorovo naro va'oromo aneraho uavodeje: Suri bise'oho bojemiñjêjo. Suri bise'oho bojemiñjêjamu uevadeje: Më suroho baeromo ijêjo. Baeromo i'iramu jö'ore vuomëro rihuamanovo'i röhu dë vi'ehago'ajêjo. ¹⁰Vi'ehago'ajêjamu naro baeromo ijamu vuomëro rihuemanovoromo hejodeje dë vi'ehëgavamu.

¹¹Vi'ehëgamu aëro uevareje: Röhu maho ri'öromo sa'ae dinö'e dinö'e sine gö gö huë gö gö sa'are a masije gö gö êho jabesi jö God-hu jövajoho jero majêhinego ae aho'obêhe he'irarêjo. Jasi muoho êhi höjo.

11

God-are jö majêhijare ae niö'i jabesi jöhoje.

¹Êhi ue'ego aëro guduodo va'ëne vahu baejarue ijahe memiromo uevavohijo: Ri'ö va'oromo God-are javu böromö hesi vahuoho o God-ni mi suvuoro buejarue maratu hesi vahuoho baeromo ganêjo dimino'e jiego. O osare raromoromo God rajahijarue aribövioho adahoromo ganêjo dimino'e jiego. ²Röhu God-are javu hesi vahu baejê'oho rirönöho nadi baenêjo. Êhesi bëhoho javu riröho Jew rajoho bogo a'i sa'a gö raje God-are jö bogo heruomaje aribövi jabesi örire bojemiñjê'e höjo. Jabesi örire bojemiñjê'ëro jabumëro rueruomoromo God-are amo böromoho Jerusalem manaere 42 hesi uhure hörü duruajo'ëro vaeruumo'ajêjo. ³Höru duruajo'ëro vae'i ë'iramu evare nasi jö majêhjarue ae niö'i naro uë'iramu jabumëro niögu sisêho io'amoromo nasi jöho majêhibe va'iröhoho ë manaere 42-ho barë'ajêjo. Êhi uevavohijo.

⁴Ëae niö'ioho êho sa'a muebejaje a God-are nunire rirarovarue olive ije niö'ioho va'ëne o hesi nunire rirarovarue iro niö'ioho va'ëne jëve. Êhesi bëhoho ë olive ijo niö'i jabesi jovo baeromo buejogo ajivajêhi o ë ire niö'i buejêvego ajivajêhi ë ae niö'iohuro êhi God-are darugoho baeromo ajoho barue'ë'ö. ⁵Röhu aehu ë ae niö'i jabesi örire ijumëvo'ie'iroho vënëro ë ae niö'i jabesi jö'ore jioromo rueromo nu huodëgarue aribövioho ravëvo barë'ë'e. Ae rahu jabumë ijumëvo'ie'oho iae êhi vuovëvo'ie'e. ⁶Röhu ë ae niö'ioho jaburo vöröho bae'ë'ö êhuro God-are jö majêhjarue majaho rovego evare ênoho tugohego bogo ruejuvo jöho majêhi barêjogo evare rueröhego. O vöröho bae'ë'ö êhuro jabesi divare nêgë'iroho jove gö gö ijumo'amego kö'irae'amoröhego o uego sa'are aribövioho guomo guomo sisë gö gö bae'amoröhego.

⁷Amo jabesi jöho majêhibe va'ojuvo barë'iramu vörö'e majo sisêhuro gua ëgobövire jioromo rojomoromo ae niö'iohu'o muorovo'ë'e. Jabu'o muorovoromo ruahö'öjêvoromo anëgo'iramu vuovëvo'ie'e. ⁸Vuovëvo'iramu jabesi sinoho amo böromö hesi öri böromore êhi raromëvo'ë'e. Êamoho sisëgo êhuni uvarueje: Êamoho Sodom o Egypt höjo. Röhu urimë'i ë ae niö'i jabesi A Böromoho aëro guduamoromo ë ame gemuore korosire anareje. Amo ë ame gemuore jabesi sinoho raromëvo'ë'e. ⁹Raromëvo'iramu sine gö gö agane gö gö huë gö gö sa'ae dinö'e dinö'e aribövioho êho jaburo rueromo ë ae niö'i jabesi sinoho êrimêhoromo uarovonövo'ë'ö: Bogo guavëvo'ëjarêjo. ¹⁰Êhi uarovoromo sa'are

raromarue ariböviohuro uvoruomo'ë'e: Ëae niö'iohuro huë vavaene aho'obëhe nosi örire bojamuinövore höjo. Röhu vejö'oho vuovëvë'e höromo nimoronimorohoromo suvuoramirovo'ë'ö. Ëhi'ojuvo majae niö'i gemu röhu ma-bisemu hesi ijore barë'ë'e. ¹¹ Ëmajaho barë'iramu God-ro jö'o ögëro jabesi nu gagore huosihëho'iramu vuovëvadoho i'ovoromo ri'öromo döro rirarovo'ë'ö. Döro rirarovo'iramu ae aho'obëhe jabumë gëromo juhuonivo avoho'ë'ö. ¹² Juhuonivo'iramu ë ae niö'iohuro he'ë'ö ö'idöre jöe uvo'iramu: Avehuro rojomohëjo. Avehuro rojomohë'iramu evare jabumë nu huodëgarue ariböviohuro ga'ë'ö ë ae niö'ioho ö'idöre suëro numëvobe ajiomo'iramu. ¹³ Ö'idöre ajiomo'iramu evare sa'aho hijiohijiovo'ë'e. Sa'aho hijiohijiovo'iramu amo taritarivaroho dirö'e 10 jië'ëro dirö'e 9 mae jio'i dirö'e gemu ijumo barë'ë'e. Dirö'e gemu barë'iramu ae aho'obëhe 7,000 vuovëvo'ë'e. Vuovëvo'iramu a ioro'iorohuro juhuonivoromo uvo'ë'ö: Asë'e ö'idöre hijaje ae God hesi ihoiho börome höjo. Ëhi jioröhoho naro nia'ovoro gavodeje.

¹⁴ Vavaeni'e mue niö'i buruhehu uvadoho iae barë'i röhu number 3-oho ma-burëro rue'ë'e.

Aneraehu hëgöe 6 huobe rovaroho ijo tugoho'i number 7-ehu huade jöhoje.

¹⁵ Iae anerae övo gö mine övo göre gemuehu hëgö huaroho röhu ijo tugoho'i anerae number 7-huro hëgöho huohijo. Hëgöho huö'ego ö'idöre darugo'o uvoromo uvoruomavohijo: Jaruvoho nosi Bada God'o God-hu uavë'ëro börome namiromo ajamuijaje aho Keriso'o jabu niö'iro darugoho baejë'e höjo bövie rirarovoromo sa'ae aho'obëhe muebe'amoröhëni. Darugoho baejë'ëro God-ro börome namiromo muebemu muebebe va'onövo'ajëjo. ¹⁶ Ëhi uvavamu hegorovo a duvahe aho'obëhe 24 a masijehu raromarue röho mare God-are bëhire raromaruohuro ri'öromo ague aho raromoromo God rajahiruomohijo. ¹⁷ Rajahiromo uvoruomavohijo:

O asë'e Bada God daruge aho'o baejë'e ae javajëjo.

Urimë'i jioibe rovanoho jaruvohu'o ëhi gemuho hiemu hijanue ae javajëjo.

Jasi darugo böromoho baeromo dö mare hiromo aevoromo aho'obëhe muebejavuë'ëgo ëhuni rajahijaruëjo.

¹⁸ Urimoho sa'ae dinö'e dinö'e raromarue ariböviohuro vörö'iraejë'e raromonövore höjo. Jaruvoho jero jabesi örire vörö'iraejanuëjo.

Majaho rovë'e höjo vuovëvë'e aribövi mevëvoromo gë'iranoho mae o sisë jëvego.

Gëromo jasi mu vaejahoromo jö baeromo majëhijarue aribövi jabesi mana bojëmi'iranoho jasi aribövi ma jabesi mana bojëmi'iranoho

jasi iho mae uehorovarue aribövioho ininore va'o masijore jabesi mana bojëmi'irane ë hesi majahu'o

sa'are bövi bise'o ijumaruoho mana ijumëvo'irane ë hesi majahu'o rovë'e höjo.

¹⁹ Ëhi uvo'ëgo God-are osae ö'idöre jiajoho jiovohijo. Jiovo'ëgo God-are jögoru jiaje maua va'orahoro jiohijo. Va'orahoro jio'ëgo baderivoromo vajeri varuru'e vaeromo sa'aho hijiohijiovoromo ënëro direjohijë'e masije darugo'o ruvebihijo.

12

Sigobu böromehu magonaho sihade jöhoje.

¹ Ëhi'amu gavodeje bogo gavaruëhi jië'e mu börome gö ö'idöre jiamu. Ëmu hesi bëhoho magonahe gemu jiohijo. Majae niögu va'ëne ba'amë'e jiohijo. O höroho manaerore bamë'e jiohijo. O hesi simanore jije aho'obëhe 12 inovoromo bosö va'ëne didi'ahë'e jiohijo. ² Röhu hu dë'ëro jië'ëro raho'irögoro vi'ehe börome baeromo hara'uoromo darugo'o jö'e dadovavohijo.

³ Ëhi'ëgo bogo gavarue mu börome gö'o ö'idöre ruehijo. Ëmu hesi bëhoho kavuë'e sigobu böromo börome jiohijo. Vörö'e mae jiohijo. Hesi simanoho aho'o övo gö mine övo göre niö'i jio'amohijo. O hesi danoho aho'obëhe övo gö mine övo gö mine jio'amohijo. O sigobu simanoho gemu gemu a masijehu io'amaruëhi jië'e bosöhuuro didi'o'amë'e jio'amohijo. ⁴ Röhu jije aho'obëhe ö'idöre jio'amajoho niö'i gemu tariojaro

dirö'e gönö niö'i nugo'i dirö'e gönö gemu sigobu hesi uhohuro sa'are ujuoho io'amohijo. Ujuoho io'amoromo ë harihu raho'ie'aje magonaho hesi nuninö raromoromo muebehijo rahego harihoho i'iro. ⁵Raromoromo muebe'ego rue magonahohuro harihoho rahohijo huro ijönö hujejo ha'itoho baeromo sa'ae dinö'e dinö'e raromarue aribövioho vörö'o muebejëvego jaburo hu gemu ejahoröhego. Amo harihoho raho'ego ë aho ma-majioho ba'ojio God-hu röho mare hijajire ë nugohijo. ⁶Evare vëmhuro ju'ebiro mo arue a rumo'e sa'are va'ohijo God-hu avohahade öri ari'ere ë hijego God-ro ajamiromo muebebe va'ego majae aho'o 1260 barë'iröhego.

⁷Ëhi'ego ö'idöre muorovohijo. Anera böröme Michael'o huhu muebejëvaje anerahu'o ëho jaburo ri'öromo sigobohu'o muorovoruumohijo. Muorovo'ego sigobohu'o sigobu hesi anera ömo'ömo'u'o mana muorovëmihijo. ⁸Muorovëmi'ego rueho jaburo sigobohu'o hesi ariböviohu'o taemëvohijo. Taemëvoromo uëhijo: Ave ö'idöho ioro'ioemu vuonugo'i va'ohëjo. ⁹Ëhi uënugoromo ë sigobu böröme ö'idöre jiajoho baba'amohijo. Ësigoboho ni'i'ivadire jiohe rovadoho hesi ihoho Devil o Satan jiohijo. Sa'ae dinö'e dinö'e raromarue aribövi sareramuike juvaje ahoje. Hu'o hesi anera sisë ömo'ömo'u'o sa'are baba'amëvohijo.

¹⁰Baba'amëvamu hejedeje ö'idöre darugo'o uvavamu: Jaruvoho nosi Börömo God-ro hesi darugoho röjahuiromo bövi mae namiromo sisëho noni ruahö'öjahuë'e höjo. O jaruvoho God-hu uavë'ëro böröme namiromo ajamuaje aho Kerisoro no muebejavuaje darugoho röjahuij'e höjo. Ëhesi bëhoho jö sisë majahijaje aho baba'amë'e höjo. Huro God nosi A Börömo hesi nunire namiromo vae majae nosi ö mueno'o jabesi jö sisëho sareramiromo majahinövade höjo. Röhu jaruvoho baba'amë'e höjo. ¹¹Nosi Christian ö mueno'ohuro uvare höjo: God-are Sheep Harihoho köe rueromo guomë'ëro mae javuajë uvoromo hesi jöho ae sama'e majëhiromo ëhuro sisëho ruahö'öruomade höjo. Jabesi sinoho bogo uehorovo'i uvare höjo: No Keriso-are jöëni vuovë'oho iae hesi höjo. ¹²Ëhuni ö'idöho mabëhe höjo. Ö'idöre jiaruje aribövioho mabëhe jëvaje nimorohohëjo. A'i sa'ahu'o jovohu'o vaevë'e höjo ë hesi bëhoho Satan hu ë abuejë'ego. Abuejë'ëro garomo uvaje höjo: Nasi majaho barë'irögoro ë'ajëromo vörö'iraëjë'e höjo. Ëhi uvoruomohijo.

¹³Ëhi'ego rue sigobohuro gavade baba'amë'ëro sa'are jiamu gagorovo aharihu rahade magonahoho ijumo'i siho baeromo va'ohijo. ¹⁴Siho baeromo va'ego buruhi börömo hesi vivojoho niö'i magonahohuro God-aro baehijo ëhuro bioromo a rumo'e sa'are va'oromo hesi röhere hiröhëni. Hijego God-ro muebejë sigoboho ë magonahuhu hijaje öri ari'eroho bogo va'ego vadune aho'obëhe niö'i gemu röhu ma-bisemu hesi ijore barëröhego. ¹⁵Ëhi'ego sigobohuro jovo böröme hesi jö'ore otehö'öhijo ë jovohuro ruomoromo ë magonahuhu jiajire va'oromo ë magonahoho bava'ojöro. ¹⁶Jovoho otehö'ö'ego jovohuro magonahoho bae'i rue'ego sa'ahuro magonahoho ajamiromo tögöromö'ego jovohuro ë gagore va'o barëhijo. ¹⁷Va'o barë'ego ë sigobohuro magonaho hesi örire vörö'iraeromo va'oromo magonaho hesi aboji harihu'o ioro'iorohu'o muorovo'i va'ohijo. Röhu ë aboji harihu'o jabesi bëhoho God-are jögoru ejahoromo Iesuare jö birivoromo mae uehorovarue aribövioho jioruome. Ëariböviohu'o sigobohuro muorovo'i va'ohijo. ¹⁸Ëhi'oromo ë sigobohuro va'oromo sö jovo riröre raromohijo.

13

Vörö'e mi niö'iehu rueromo mu sisë vaejare jöhoje.

¹Sigobohuro sö jovo riröre raromamu naro gavodeje vörö'e mi sisë sö jovore jioromo rojomamu. Hesi simanoho aho'obëhe övo gö mine övo göre niö'i jiohijo. O hesi danoho aho'obëhe övo gö mine övo gö mine jiohijo. O a masijeho didi'aruëhi jië'e bosöho dane gemu gemu jio'amobe va'ohijo. O simane gemu gemu God agarue iho sisëho gemuohemu jajivo'amë'e jiohijo. ²Röhu ë vörö'e mi sisë hesi nu ano'oho leopard nu ano'o va'ëne jiohijo. O hesi höroho bear höru va'ëne jiohijo. Hesi jö'oho lion jö'o va'ëne jiohijo. Röhu rue sigobohuro darugo börömëro jië'ëro ë darugoho vörö'e mi sisëho bojamiromo

uahijo: Na'o rōromo rōho maro ajio hiromo nasi ōri ari'oho aho'o muebejehonējo. ³Rōhu ē mi sisēho hesi simanoho gemu aēro anamu guomoromo i'ovē'ēro batato'e jiohijo. Guomoromo i'ovē'ēro batato'e jiamu ae aho'obēhe ēho garomo tiōtiōvoromo simane sisē'i uehorovoromo uvareje: Ēho mae hōromo hesi ijore ijore jijihoruumohijo. ⁴Hesi ijore ijore jijihoromo uvoruomohijo: Sigobohuro vōrō'e mioho hesi darugoho mabēhe bojamijade hōromo ēhuni sigoboho rajahiruumohijo. Sigoboho rajahiromo vōrō'e miohu'o rajahiruumohijo. Rajahiromo uvoruomohijo: Ēvōrō'e mioho darugo ma'e hōjo. Rahuaro ēhi jiē'e darugoho hōjo. Rahuaro ē vōrō miohu'o muorovo'ajējo. Ēhi uvoruomohijo.

⁵Ēhi'ego God-ro ē vōrō'e mi hesi ōroho bogo tugohahohijo huro nimoronimorohē'i jō sisē jōvoromo hesi nimoromo bōvie bise'e muebebe va'ojuvo manaere aho'obēhe 42 barē'irōhego. ⁶Ōroho bogo tugohahē'ēro vōrō'e mi sisēhuro ri'ōromo God agoromo hesi ihohe ijumoromo God-hu hijaje ōri ari'oho sivoromo God'o gemu mae ō'idōre raromarue aribōvi jabesi sisēho sarerivoromo ēma jōvohijo. ⁷Jō sisēho ēhi jōvo'ego God-ro ē vōrō'e mi hesi ōroho bogo tugohahohijo huro God-are aribōviohu'o muorovoromo ruahō'ōjēvo'irōhego. Ruahō'ōjēvoromo vōrōho baeromo agane gō gō sa'ae dinō'e dinō'e huē gō gō sine gō gō aho'obēhe muebejēvo'irōhego. ⁸Ae aho'o sa'ae dinō'e dinō'e raromaruoho jaburo ē vōrō'e mi sisēho iae uvene aho rōjahiruomo'ē'e. Uvene aho rōjahi'irōhe hesi bēhohe urimo God-hu ō'idō sa'a bogo bamadevare evare God-ro a ioro'ioro jabesi ihohe hesi Sheep Harihu anego guomorōhe hesi surire jajivo'amadeje hu'o maro raromemu raromo'irōhego. A ioro'ioro jabesi ihohe suriroho bogo jajivo'amadeje bogo ēhioho marohe raromo'irōhego. Rōhu iho bogo jajivo'amē'e sa'are raromarue aribōviohuro vōrō'e mi sisēho rajahiruumo'ē'e.

⁹God-are jō hejaruje aribōvioho ave jōho hehējo. ¹⁰Aehu jemē gudumēvoromo savoji gagore ba'amēvo'iē'oho iae savoji gagoro ba'amēvo'ē'ō. O aehu muo'amēvamu vuovēvo'iē'oho iae vuovēvo'ē'e. Ēhi jiē'e mu sisē rue'irōhohuni ēhuni God-are aribōvioho jemēro birivoromo God gemu uehorovobe va'ore.

¹¹Ēhi'amu gavodeje vōrō'e mi sisē gō'o sa'a gagore jioromo rojomamu. Ēmi hesi danoho niō'i sheep harihu hesi dano jiajēhi ēhi jēvohijo. A'i huhu jō jōvajoho ē sigobu bōrōmehu jōvajēhi ēhi ma-darugo'o jōvohijo. ¹²Ijore rovade vōrō'e mi sisēhuro urimore rovade mi sisē hesi vōrōe gemuoho bae barēromo huni rōromo muoho vaejijo. Urimore rovade mi hesi muoho vaeromo sa'are raromarue aribōvioho uēhijo jabumēro urimore rovade mi sisēho uvene aho rōjahi'irōhego. Aehu hesi simanoho gemu anahamu guomoromo i'ovade ē hesi batato'e simano jiē'e mioho rajahi'irōhego muoho vaejijo. ¹³Ijore rovade miohuro urimore rovade mi hesi muoho vaeromo no bogo gavaruē vōrō'e mu masijoho vaejijo. Mu masije gō gō vaeromo rōhu ae aho'obēhe jabesi nunire namiromo uvo'ego vēnohuro ō'idōre jioromo sa'are ruvebihijo. Ēhu'o ē'ohijo. ¹⁴God-ro hesi ōroho bogo tugohahē'ēro ēhu'ēro ijore rovade miohuro urimore rovade miohuni rōromo ēhi jiē'e vōrō'e muoho vaeromo ēhuro sa'are raromarue aribōvioho sarerēmihijo. Sarerēmioromo uēhijo jabumēro urimore rovade mioho rajahi'i munē o rabe sehoromo inōme hesi nu ano'o va'ēne avohorōhego. Hesi simanoho gemu anahamu guomoromo i'ovade ē hesi batato'e jiē'e mi hesi nu ano'o va'ēne avohorōhego. ¹⁵Urimore rovade mi hesi nu ano'o va'ēne inōmoho avoho'ego God-ro ōroho bogo tugohahē'ēro ēhu'ēro ijore rovade miohuro ē mi nu ano'o va'ēne inōmo hesi nu gagore jō'o ōgēro huosihohijo mi nu ano'o va'ēnohuro daruge baeromo jōe jōvoromo garōhe ae rahu hesi ōriroho bogo uvene aho rōjahijego muo'amo'irōhego. ¹⁶Ēhi'oromo ē ijore rovade miohuro a masijoho a ininoho inōmo marohē'e aribōvioho inōmo rumo'e aribōvioho a jabesi muemu vaejarue aribōvioho jabesi nimōro mu vaejarue aribōvioho ae aho'obēhe mae jōe bojēmioromo uēhijo: Ē'ego no jemesi ōvo manō o varijore jajivēharējo. Jajivēharējamu ejēho'ego jajivēhohijo. ¹⁷Bogo ejēho'ibejo mi sisēhuro ōroho tugohēhego iruno'oho bōvioho bise'oho bogo imo'ibejo. Ējajivēharohe mi hesi iheje.

¹⁸ Ĕhesi bëhoho avoho uehorovore. Ae rahu simano ma'e jëvë'oho ë mi hesi iho hesi bëhoho nahoromo birohore. Hesi ihoho 666-je. Ĕihoho avoho adahë'oho a ihe biroho'anue.

14

God-are aribövie 144,000 jabuhu jö i'o ioruomade jöhoje.

¹ Röhu naro ga'i gavodeje God-are Sheep Harihoho Zion dahorure nami'ego ae aho'obëhe 144,000 Sheep Harihu hesi ihohu'o hesi Vavu hesi ihohu'o varijore jajivo'amë'e hu'o riravamu. ² Röhu hejodeje ruhe ö'idöre uvavamu. Jovehu ruomoromo uvego hejaruëhi o vajerehu anego hejaruëhi o aehu gita bejego heromo vuëvavuajëhi jöho ëhi jiavavamu. ³ Ĕhi uvoromo God-hu hijaje röho ma hesi nuninö hu rajahijarue maje 4 jabesi nuninö a duvaho jabesi nuninö riravoromo jabesinö nu ano'oho nugoromo jö i'oho ioruomohijo. Ae aho'obëhe sa'are sisë'i raromaruoho röhu ae 144,000 ëmino'e God-hu baejëvadoho ë ariböviohuremu ë jö i'o io'iröhoho eni jëvadeje. A ioro'ioroho bogo. ⁴ Ĕaribövioho magonaho'oho mu sisëho bogo vae'i ma-mae raromarueje. God-are Sheep Harihehu dinö'e dinö'e va'ë'iroho jabu'o hesi ijore ijore jijiharueje. A ioro'iore aho'obëhe jio'amajoho röhu God-ro i'u'e muoho baeromo ëhuro ë ariböviohuremu hesi baejëvadeje. Ĕaribövioho God'o hesi Sheep Harihohu'o jabuhu aevo'i ma-mabëhe baejëvaroho jëve. ⁵ Jabumë bogo sareri jöho atamu aho he'irögoro jabumë ma-maemu jëve.

Anerae niö'i gemu jabuhu uvare jöhoje.

⁶ Ĕhi'amu gavodeje anerae gö döre bioromo va'amu. Ĕanerahuro God-are jö maho baejë'ëro sa'are raromarue aribövioho majëhiromo uë'irögoro ë'ohijo: Ioro'ioeremu jioröhe muoho ëhi ëhi höjo. Ĕjö maho sa'are raromarue aribövie aho'obëhe sine gö gö agane gö gö huë gö gö sa'ae dinö'e dinö'e raromaruoho majëhi'i va'ohijo. ⁷ Va'oromo jöho ma-darugo'o majëhiromo uëhijo: Jöe hehëjo. God-are öroro avo'avoho uehorovoromo uvohëjo: Hu gemu börömocho höjo. Huhu ae aho'o mevëvo'iröhe majaho rovë'e höjo. Ĕhuni ö'idö sa'a sö jovo sa'a gagore suorovaje jovo bamade aho God hesi öroro uvene aho röjahihëjo.

⁸ Ĕhi uvo'ego anerae number 2-ohuro ijore rueromo uëvavohijo: Jöe hehëjo. Iae amoho bejë'e höjo. Iho'e amo böröme Babylon vejö'oho barëjë'e höjo. Ĕhesi bëhoho urimë'i Babylon amo rajohuro mu sisë röjëhinövareje. Magonahehu ae mu sisë röjëhiromo vörö'e jovo i'imëmege ue'ahoromo simano sisërëromo önö'e jijiharuehi ëhi Babylon amo rajohuro sa'ae dinö'e dinö'e raromarue aribövioho mu sisëho röjëhijamu simane sisërëromo mu sisë sisë vaeruomë'e höjo. Ĕhu'ëro Babylon rajohuro God-are i'uocho baeruomë'e höjo.

⁹ Ĕhi uvo'ego anerae niö'i rueromo jö majëhijaroho röhu number 3-ohuro jabesi ijore rueromo uëhijo: Jöe hehëjo. Ae rahu mi sisë o hesi nu ano'o va'ëne avoharoho uvene aho röjëhiromo hesi iho varijore o övore baejë'oho ¹⁰ ë ariböviohuro God-are i'uocho baeruomajëjo. Aehu vörö'e jovo bogo sanuovë'e ma-ue'ahoromo hara'uarue ëhi jië'e i'uocho God-ro vörö'iraeromo bojëm'iramu baeruomajëjo. Baeromo God-are anera jabesi nunire God-are Sheep Harihu hesi nunire raromoromo vënohu'o vënehu ravoromo giosijiomë'e munëhu'o ravëvo'iramu hara'uoruumajëjo. ¹¹ Hara'uo'iramu ë aribövi ravëvaje vënoho bogo duoroho'i ma-u'ivemu u'ivonövo'ajëjo. U'ivo'iramu ae rahu mi sisë o mi hesi nu ano'o va'ëne avoharoho uvene aho röjëhijë'oho o mi hesi iho sinore baejë'oho ëhi jië'e aribövioho jabesi vi'ehoho bogo u'uhö'i vae majae ma-jiemu jiobe va'a'ajëjo. Anerahuro ëhi uvavohijo.

¹² Ĕhi jië'e huë vavaeni rue'iröhohuni ëhuni God-are ariböviehu hesi jögoru ejahoromo Iesu gemu uehorovarujoho jemëro birivoromo ëhi gemu vaebe va'orëjo.

¹³ Ĕhi'amu hejodeje ö'idöre uëvavamu: Jajivoromo uvonëjo: Badare muohuni avevejö'e o jionö vuovëvë'oho jabumë huë mae baebe va'a'aruëjo. God-are Aru'ahohuro jöe gemuoho

jövoromo uvajëjo: Io'ajo. Iae huë mae baeromo mu masijehu u'uvëvadoho vuonugo'i nuho'aruëjo. Nuhë'i ga'a'aruëjo jabuhu vaejarëhi ëhi mae jio'iramu.

Anerae göehu aribövi ma gagovoromo avoho bahi'i anerae göehu sisë aribövi gagovoromo i'u bojëmade uhu jöhoje.

¹⁴ Röhu naro ga'i gavodeje a ma va'ëne aho ajivë'e sue döre hijamu. A masijehu didi'aruëhi jië'e gold'e bosöho simanore didi'ë'e jiohijo. O anio ma'e siravaho övore jiohijo. ¹⁵ Röhu anera göhuro God-are osa börömore jioromo höröromo ruehijo. Rueromo suere hijaje a hesi örire ma-darugo'o uahijo: Iruno'o gemuore bahijarue majaho rovë'e höjo. Jasi siravahuro tarivoromo avoho bahijëjo. Sa'are jiaje iruno'oho mami'e mavoromo eni jië'e höjo. ¹⁶ Ëhi uvavamu hegorovo sue döre hijaje ahuro ë siravahuro sa'are jiaje iruno'o maho tarivoromo avoho bahihijo.

¹⁷ Ëhi'ego röhu anera göhuro God-are osa böröme ö'idöre ë jioromo anio ma'e siravaho baejë'e höröromo ruehijo.

¹⁸ Ëhi'ego anerae gö vëni muebejaje anerahuro God-ni suvuoro vënehu buejharue maratu bëhire jioromo ruehijo. Rueromo anio ma'e sirava ma'enaje anera hesi örire ma-darugo'o uahijo: Sa'are jiaje grape ö'i bajoho mavë'e jiaje jasi siravahuro tarivoromo ujuohëjo. ¹⁹ Ëhi uvo'ego rue anerahuro hesi siravahuro sa'are jiaje ö'i bajoho tarivoromo munë guorötore ujuoho bahihijo sa'ijosa'ijovoröhëni. Sa'ijosa'ijovo'iröhe hesi bëhoho God-hu vörö'iraeromo a i'u bojëmi'iröhohoje. ²⁰ Munë guorötore ujuoho bahijaroho bogo amo börömoroho jio'i hesi rori'o jiohijo. Röhu ë ö'i bajoho sa'ijosa'ijovohijo. Sa'ijovo'ego ëhuro ë kavuë'e ijo bajo jovohuro kö va'ëne sa'are oterohoromo e'u va'ëne ruhibe rojomojuvo a buno gëvaruëhi ë jovo hesi ëgoho ëmino'e jiohijo. O hesi börömo 300 kilometre jiohijo.

15

Ijo tugohoi majare God-are i'u sa'a rajo bojëmi'iröhëro anerae 7 jabuhu rama ujuohare jöhoje.

¹ Ëhi'amu gavodeje noehu bogo gavaruëhi jië'e mu börömo böröme ö'idöre jiamu. Ja'o ga'ibejane tiö'ibejane. Ëhesi bëhoho anerae aho'obëhe 7 jaburo a bövi bise'o ijumo'amo'iröhe inömo sisëho ujuoho ruehijo. Ëinömo sisëho rue'iramu ëhuro God dë vörönimobe rovadoho barë'ë'e. Ëhuni ë inömo sisëho ijo tugohoi a bövi bise'o ijumo'amo'iröhe inömo jiohijo.

² Ëhi jio'i röhu gavodeje jovo e'u deri va'ëne börömo böröme jiamu. Ëe'u va'ënire vënero ravanovoromo kavuohijo. O ë e'u va'ëne hesi riröre ae riravohijo. Urimoho ë ariböviohuro birivoromo mi sisëhu'o hesi nu ano'o va'ëne inömo'u'öho ëho jabeti muoho jöho bogo ejëhoromo mi sisë hesi ihoho sinoroho bogo bae'i ruahö'öjareje. Ëariböviohuro God-hu i'imëmade gitaho ujuohë'e e'u va'ëne ë hesi riröre riravohijo. ³ Gitaho ujuohë'e riravoromo God-are mu vaejahaje ae Moses-are jöho ioromo God-are Sheep Harihu hesi jöhu'o ioromo uvoruomohijo:

Bada God ja daruge aho'o baejë'e ae javajëjo.

Jasi muoho masije ma-mabëhe höjo.

Ja böröme namiromo sa'ae aho'o muebejavuanue ae javajëjo.

Jasi muoho bogo sareri'ehu jio'i ma-maemu jio'amajëjo.

⁴ Bada raro ja bogo böröme hö uehorovo'ajëjo.

Raro jasi ihoho bogo döroho bamo'ajëjo.

Ja gemu ma-maemu javajëjo.

Sa'ae aho'obëhe rueromo jasi örire rajahiruomo'ajëjo

jasi mu ma va'orahoro jio'amajohuni.

⁵ Ëhi'amu gavodeje ö'idöre God-hu jiajire niögu javu maho jiovë'e jiamu. ⁶ Jiovë'e jiamu gagorovo naehu avevejë'e uëvode aneraho 7 ë osare jië'ëro ma-mabëhe ajivë'e sanu'e niögoho io'amë'e vinebire gold-ëro muoho taemo'amë'e suorovoromo ruehijo.

⁷ Rue'ego God rajahjarue maje 4-ho röhu gemuëro anerae 7 jabeti örire gold'e hevöho

7 ĕhi anerae gemu gemu bojĕmibe va'ohijo. Ĕhevĕ gagoho God-hu a i'u bojĕmi'irĕhe vĕrĕhuro irijio'ma'ĕ'e jiohijo God ioro'io'remu hijaje a hesi vĕrĕhuro. ⁸Rĕhu God-are ajohu'o darugohu'o ĕ hesi u'ohuro God-are osa mare u'ivoromo rumorovohijo. Ae gĕ ĕ God-are osa maroho bogo rumo va'o varijĕnoho jiohijo. Hujeji anerae 7-ho jaburo a bĕvi bise'o ijumo'amo'irĕhe mue 7-ho vae barĕ'iramu evare va'oruomo'ĕ'e.

16

Anerae 7-ehu God-are vĕrĕe ramare jio'amajoho otehĕ'ĕjamo sa'are raromarue aribĕviehu huĕ vavaeni sisĕ baebe rovamu John-hu gavade jĕhoje.

¹Ĕhi'amu hejodeje God-are osa mare anerae aho'o 7 jabesi ĕrre ma-darugo'o uĕvavamu: Va'oromo God-are vĕrĕe ramae 7-re jiajoho sa'aro otehĕ'ĕhĕjo.

²Ĕhi uvo'ego anerae 1-ohuro va'oromo hesi ĕvore ramare vĕrĕho sa'are otehĕ'ĕhijo. Otehĕ'ĕ'ego mi sisĕ hesi iho sinore jajivĕhoromo mi sisĕ hesi nu ano'o va'ĕne inĕmo rajaharue aribĕvioho vi'ehi'e sagoho sagoho sisĕho baeruomohijo.

³Sagoho sagohoho baeruomamu urimo anerae gemuehu ramare vĕrĕ otehĕ'ĕjadoho rĕhu number 2-ohuro ramare vĕrĕho sĕ jovore otehĕ'ĕhijo. Otehĕ'ĕ'ego sĕ jovoho vuovĕ'e a jabesi kĕ va'ĕne jio'amohijo. Jovoho kĕ va'ĕne jio'ego jovore jijiharue majoho aho'o vuovo barĕhijo.

⁴Vuovo'ego urimo anerae niĕ'iehu vĕrĕ otehĕ'ĕjaroho rĕhu number 3-ohuro ramare vĕrĕho otehĕ'ĕhijo. Otehĕ'ĕ'ego rova'o'amĕ'e jovohu'o sa'a gagore rojomaje jovohu'o kĕrae'amohijo. ⁵Ĕhi'amu naro hejodeje jovo muebejaje anerahuro uavavamu: O asĕ'e God urimĕ'i jio'be rovanoho avevejĕ'oho ĕhi javajĕjo. Ja a maemu javajĕjo. Jaehu a gĕromo ĕhi jiĕ'e i'u mana bojĕmijanuoho iae mae hĕjo. ⁶Nume aribĕvi sisĕhuro jasi jĕ baeromo majĕhijarue aribĕviohu'o jasi aribĕvi ma ioro'iorohu'o muo'amamu jabesi kĕho rovade hĕjo. Jabumĕro jasi aribĕvioho muo'amamu kĕho rovĕ'ego ĕhuni jero jabesi ĕrre kĕe mana bojĕmijane hĕjo ue'aho'irĕhego. Jabumĕ sisĕ'i ĕ'arohuni ĕhuni ĕhi jiĕ'oho iae mae hĕjo. ⁷Ĕhi ua'ego God-ni suvuoro vĕnehu buejoharue maratuore uavavohijo: Io'ajo. Bada God ja daruge aho'o baejĕ'e ae javajĕjo. Jaehu a gĕromo i'u mana bojĕmijanuoho ĕho bogo mu sisĕho vae'iro iae mu mae vaejanue hĕjo.

⁸Ĕhi uvo'ego urimo anerae niĕ'i gemuehu vĕrĕ otehĕ'ĕjaroho rĕhu number 4-huro ramare vĕrĕho maja nunire otehĕ'ĕhijo. Otehĕ'ĕ'ego God-ro maja nuni hesi ĕroho bogo tugohohijo majaĕro vĕrĕ'iraeromo ae aho'o jabesi sino haho'oho vĕnĕro ravĕvanovorĕhego. ⁹God-ro maja nuni hesi ĕroho bogo tugohĕ'ĕro majaĕro sisĕ maro nijĕmiromo vĕnĕro ravĕvanovo'ego ĕ i'u nugĕ'ĕjade aho God agoruomohijo. Jabumĕ jabesi mu sisĕho bogo vuonugoromo bogo uvoruomohijo: God-are ihoho bĕrĕme hĕjo.

¹⁰Ĕhi'ego urimo anerae ĕhi niĕ'i ĕhi niĕ'iehu vĕrĕ otehĕ'ĕjaroho rĕhu number 5-huro mi sisĕhu bĕrĕmo vaeromo hijaje hesi dĕre ĕ ramare vĕrĕho otehĕ'ĕhijo. Otehĕ'ĕ'ego ĕ mi sisĕhu muebejaje ĕri ari'oho ramoramovohijo. Ramoramovo'ego ae aho'obĕhe hara'uoromo anĕro bitaroho ja'ihorovo'amohijo. ¹¹Anĕro bitaroho ja'ihorovo'amĕ'ĕro jabesi vi'ehohu'o sagoho sagohohu'o uehorovoromo ĕ'idĕre hijaje aho God hesi ĕrre agoruomohijo. Jabumĕ mu sisĕ vaeruomadoho bogo uehorovoromo vuonugoruomohijo.

¹²Ĕhi'ego urimo anerae ĕvo gĕ minehu vĕrĕ otehĕ'ĕjaroho rĕhu number 6-huro ramare vĕrĕho rova'ĕ'e jovo bĕrĕme Euphrates-are dĕre otehĕ'ĕhijo. Otehĕ'ĕ'ego jovoho sinihohijo ĕhuro ruhe maja rojomajinĕ jioromo ruerĕhe a masijo jabesi ĕroho jiovĕhego maro rueromo muorovoruomorĕhego. ¹³Ĕhi'amu naro gavodeje aru'aho sisĕ niĕ'i gemu vahuno va'ĕnoho gĕhuro sigobu bĕrĕmo hesi jĕ'ore jioromo gĕhuro mi sisĕ hesi jĕ'ore jioromo gĕhuro sareri'e aru'aho'e jĕ majĕhijaje a hesi jĕ'ore jioromo suorovoromo rueruomamu. ¹⁴Ĕaru'aho sisĕho jabumĕ Satan-are anera sisĕro jioruomĕ'ĕro bogo gavaru darugo'e muoho vaeruomajeje. Darugo'e muoho vaeromo sa'ae dinĕ'e dinĕ'e va'arueje sa'are masijo vaejarue aribĕvioho aho'obĕhe gagovĕvego daruge aho'o baejĕ'e aho God-are maja bĕrĕmoho rovego muorovoruomorĕhego.

¹⁵ Rõhu Iesuro uve: Jõe hehëjo. Naro vajiohu'e aëro ö'anovo'ie'ajëjo. Èhuni ae rahu nune jioromo niõgu avo'avoho mueberovë'oho iae mae jioruomo'ajëjo. Èhi jië'oho bogo ma-sinëremuoho a nuniroho jijihoromo javojoho baeruomo'ajëjo. Iesuro èhi uve.

¹⁶ Amo ë aru'aho sisë niõ'i gemu jaburo sa'a muebejarue a masijoho sõ ujuohëvo rueromo öri ari'o ihe Hebrew jöehu uvaruoho Armageddon ë gagovëvohijo.

¹⁷ Gagovëvo'ego urimo anerae övo gö mine övo göre gemuehu vörö otehö'öjarohe rõhu number 7-huro ijo tugoho'i ramare vöröho sa'anö otehö'öhijo. Sa'anö otehö'ö'ego God-are osa börömore jiaje rõho mare uvavohijo: lae barëjë'e höjo. ¹⁸ lae barëjë'e hö uvo'ego baderivoromo vajeri varuru'e vaeromo sa'aho sisë maro hijiohijiovohijo. Aevoromo aehu sa'are raromobe rovaroho sa'aho bogo èhioho darugo'e maho hijiohijiovo'i ma-bisemu jiobe rovadeje. ¹⁹ Sa'aho hijiohijiovo'ego amo börömohe niõ'i gemu tariorovobe va'ohijo. Tariorovobe va'ego ame gö gö sa'ae dinö'e dinö'e jio'amajoho sisërë'amohijo. Rõhu God-ro amo böröme Babylon hesi sisëho bogo rumonimo'i vörö'iraeromo i'uocho amo rajoho bojëmihijo èhuro aehu vörö'e jovo ue'ahoromo hara'uaruëhi ë i'uocho baeromo èhi hara'uoruomoröhego. ²⁰ Èi'uocho bojëmi'ego sa'a dirö dirö'e jio'amajoho dahore aho'obëhe sisërëromo èhi va'o barë'amohijo. ²¹ Rõhu ènëro direjohi'amë'e masijo masije ruvebihijo. Èhesi i'uocho gemu gemu 50 kilo rabu'e jio'amë'ëro èhuro ruvebiromo ae taemo'amoromo ijumëvohijo. Sisë maro ijumëvo'ego jaburo God agoruumohijo.

17

Önö'e juvaje magonaho börömo hesi jöhoje.

¹ Èhi'ego anerae aho'obëhe 7 rama ujuoharoho rõhu gemuëro rueromo uehijo: Rovego na rõjahego önö'e juvaje magonaho börömehu i'u baeajoho gavëjo. Èmagonahoho ruë numë jovemu jië'e öri ari'ere hijaje höjo. ² Urimë'i a masije aho'obëhe sa'ae dinö'e dinö'e muebejaruoho èho jaburo ë magonahoho sihonövere höjo. O ae aho'obëhe sa'ae dinö'e dinö'e raramaruoho èho jaburo hesi jöho ejahoromo hesi vörö'e jovoho ue'ahoromo simane sisërëromo hu'o mu sisëho vaenövere höjo. Èhuni rovego na rõjahego huro i'u baeajoho gavëjo.

³ Èhi uenugoromo God-are Aru'ahohuro nasi simanoho huotovehamu ë anerahuro na baejevoromo a rumo'e sa'are ruehijo. Baejevoromo rovamu naro gavodeje magonahoho sino kavuë'e mi sisë hesi döre hijamu. Rõhu mi sisë hesi sinore iho sisë God agaruoho jajivo'amë'e jiohijo. Hesi simanoho aho'obëhe 7 jio'amohijo. Hesi danoho aho'obëhe 10 jio'amohijo. ⁴ Rõhu ë magonahohuro kavuë'e niöge nu ano'e gö gö jië'oho ruahë'e gold mabëhëro aji'e munë mabëhëro nieniae gö gö mabëhëro èhuro gurasijiomoromo avohorovë'e hihijo. Hiromo gold'e enatuoho övero ma'enhijo. Èenatu gagoho ë magonahuhu va'inum'i'e mu gö gö vaejaje ë hesi va'inumohuro irijiomë'e usihö'e sisë bëhe jiohijo. ⁵ O magonaho hesi ihoho hesi varijore uhu'e jajivoromo uvë'e jiohijo: Ave magonaho hesi bëhoho amo börömohe Babylon höjo. Önö'e jijiharue mu gö gö vaejarue sa'ae dinö'e dinö'e raramarue aribövi jabesi vëmoho höjo. ⁶ Rõhu na gavodeje ë magonaho hesi simanoho huotorovoromo sisërëjë'e jiamu ë hesi bëhoho huro God-are ariböviehu Iesuale jö biririvoromo majëhijaroho muo'amoromo jabesi köho ibe rovë'ëro. Èhu'ëro jië'ëro simanoho sisërëjë'e jiohijo.

Simane sisërëjë'e jiamu gagorovo na tiötioëvadeje. ⁷ Tiötioëvamu gedorovo rue anerahuro uehijo: Ja rabëni tiöjanuëjo. Èmagonaho hesi uhu jöho o magonahuhu döre hijaje mi sisë simane 7 o dane 10 jiajoho ë mi hesi uhu jöho huruoho majahi'ie'ajëjo. ⁸ Jaehu gavane mioho urimo namijade höjo. Rõhu avevejö'oho bogohöjo. Rõhu u'emu gua ègobövi sa'a gagore jio rojomo'ie'ajëjo ijönö sisëro va'iröhëro. Rojomo'iramu sa'are raramarue ariböviohuro tiöromo jöe barëjëvo'ajëjo. Urimë'i ö'idö sa'a bogo bamadevare evare God-ro maro raromemu raromo'iröhe surire a ioro'ioro jabesi ihoho jajivo'i a ioro'ioro jabesi ihoho bogo jajivo'amade höjo. Jabesi iho bogo jajivo'amade ariböviohuro

ë mi sisêho garomo tiôruomo'ajêjo. Êhesi bêhoho ë mioho urimo namijadoho avevejô'oho bogojiajoho rôhu ijônô rôhu maho jio'a'ajêjo. Iae êhuni tiôruomo'ajêjo.

⁹Rôhu ae rahu ave jôho avo'avohoho uehorovoromo simano mae baeromo bêhi nahê'ohoho ave nasi uhu jô hesi bêhoho biroho'arujêjo. Êjövode mi sisê hesi simane 7 êho jabesi bêhoho dahore aho'obêhe 7 hesi jôho hêjo. Êmagonahohore ë dahore aho'o 7 jiê'e hesi dôre hijanovaje hêjo. Rôhu simane 7 jabesi bêhoho gô sa'are masijo vaejarue ae 7 jabesi jôho hêjo. ¹⁰Ôvo gô mine rireromadoho gemu avevejô'ohoho daruge jioromo hi'i rôhu gemu gô'o bogo rovê'e hêjo. Rovê'iroho iae majae ma-bisemu hi'a'ajêjo. ¹¹Rôhu mi sisê urimo namijê'ëro jaruvo bogojiaje hesi bêhoho a masije 7 jabesi jô uavode rôhu ë hesi ijore number 8-ehu ruerêhe hesi jôho hêjo. Rôhu êho urimo riravobe rovarue a masije 7 jabesi ae gemuho jio'a'ajêjo. Rôhu hu sisêro va'a'ajêjo.

¹²Rôhu mi hesi dane 10 gavanoho ë hesi bêhoho sa'a muebejarue a masije 10 jabesi jôho hêjo. Rôhu avevejô'ohoho mueberuomo'irêhe ôri ari'ohoho bogo baeruomê'e hêjo. U'emu bae'a'aruêjo. Jabesi muebe'irêhe ôri ari'o baejê'iroho evare a muebejêvo'irêhe darugohoho bae'a'aruêjo mi sisêhu'ohoho gemu mae masije riravoromo ae muebejêvego majae ma-bisemu jioromo evare ë darugohoho barêjêhorêhego. ¹³Ëa masije aho'obêhe 10 êho jaburo uehore gemu bae'a'aruêjo. Uehore gemu baeromo jabesi darugohoho aho'o mi sisê hesi ôrire gemu bojamiromohoho ajaminôvo'aruêjo. ¹⁴Mi sisêho ajamiromohoho ri'ôromohoho God-are Sheep Harihohu'ohoho muorovo'aruêjo. Muorovo'iramu Sheep Harihohu mana muorovêmiromohoho jabumê ruahô'ôjêvo'ajêjo ë hesi bêhohohoho huro masijo vaeruomaje ae aho'ohoho iosirêmiromohoho hu gemu dôrohohoho jiê'ëro. O huhu baejêvo'i uehorovêvoromohoho hesi baejêvade aribôviehu hu gemu biririvoromohoho uehorovarue ë aribôviohoho jaburo Sheep Harihohu'ohoho gemuorohoho bimuvoromohoho muorovoromohoho sisêho ruahô'ôjêvoruomohoho'ajêjo.

¹⁵Anerahuro êhi ueromohoho uehijohoho: Ônô'e juvaje magonahohoho ruê numê jovemuhohoho jiê'ire hijamuhohoho gavane jovo hesi bêhohohoho ae aho'obêhe sine gô gô huê gô sa'ae dinô'e dinô'e rarumarue aribôvi jabesi jôho hêjo. ¹⁶Rôhu mi sisêhu'ohoho hesi dane aho'obêhe 10 ga'amanohohoho êhu'ohoho jaburo huotorovoromohoho ë ônô'e juvaje magonahohoho nue huodivoromohoho ijumohohoho'aruêjo. Ijumoromohoho niôgu siri'ohoho jahahohoho'amo'iramu dê'ahobatêremuhohoho jio'iramu êhi nugoromohoho'ajêjo. Dê'ahobatêremuhohoho nugonugoromohoho hesi sino iorohohoho'iorohohoho ue'ahohoho'iorohohohoho vênirohohoho'huoromohoho'ajêjo. ¹⁷Ëhi ê'irêhe hesi bêhohohoho God-ro uehore ë danohohoho simanore bojêmijadi hêjo êhuro huhu nimaje muohoho vaejatoruomohoho'êhego. Huhuhohoho nimaje muohoho jabumêro vaejatoromohoho simane gemuohoho uehorovoromohoho mi sisêho jabesi darugohohoho aho'ohoho bojamiromohoho ajamijehohoho ë mi sisêhuro bôvie namiromohoho ôri ari'ohoho muebebe va'ego evare God-hu rabe rabe uêvadêhi êhi jiorêhego.

¹⁸O jaehuhohoho gavane magonahohoho hesi bêhohohoho iho'e amohohoho bôrômohohoho hêjo. Êamohuro sa'ae dinô'e dinô'e muebejarue a iorohohoho'iorohohohoho muebe'amarue hêjo.

18

Amo sisê Babylon ma-iorohohoho'ioromohohoho sisêrê barê'irêhe jôhoje.

¹Ëhi'amu gagorovohohoho gavodeje anerae gô ô'idêre jioromohohoho ruvebijamuhohoho. Huhohoho darugo bôrômehohohoho baejê'ëro ruvebi'egohohoho hesi ajohuro sa'ae aho'obêhe ajivo'amohijohoho. ²Sa'ae aho'obêhe ajivo'amohohoho'ego ma-darugohohoho'ohohoho: Amohohoho barêjê'e hêjo. Iho'e amohohoho bôrômohohoho Babylon vejô'ohoho barêjê'e hêjo. Avevejô'ohoho ë amohohoho Satan-are anera jabesi ame hêjo. Aru'ahohoho sisê jabesi ôri ari'e hêjo. Va'inumihohoho'ue ugo sisê ihe gôêro gôêro ë raromohohoho jijiharue hêjo. ³Ëhesi bêhohohoho êhi hêjo. Aehuhohoho magonahohoho hesi vôrô'e jovohohoho iromohohoho simane sisêrêromohohoho hu'ohoho ônô'e vaejarue êhi jiê'e mue gemuohohoho ë amohohoho rajohohoho jaburo sa'ae aho'obêhe røjêhijare hêjo. Aehuhohoho magonahohoho'ohoho ônô'e mu vaejaruêhi sa'are a masijohohoho ômohohoho'ômhuro ë amohohoho gemuore bimuvoromohohoho javojê'e mue gô gô vaejare hêjo. O Babylon amohohoho rajohuro mahunô'e raromoromohohoho bôvie bise'e imohohoho'ni nimare hêjo. Ëhi nimê'ërohohoho inômohohoho imohohoho'amarue aribôviohuro sa'ae gôrohohoho gôrohohoho jioromohohoho rueromohohoho ë amore jabesi inômohohoho imoromohohoho êhuro moni ma'e jêvade hêjo.

⁴ Ĕhi uvavamu hejĕ'i hejedeje ö'idöre huĕ gö uvavamu:
Nasi aribövioho ĕ amore raromarujoho vuonugo'i ruehĕjo
ĕhuro ĕ amo rajo jabesi gemuoroho bogo bimumvoromo mu sisĕho vae'irarije hĕjo.
O jabuhu i'u baeruomajoho jemĕ bogo bae'irarije hĕjo.

⁵ Ĕamo rajehu mu sisĕ börömo bĕhe vaebe rovaroho
God iae uehorovajĕjo i'ue bojĕmi'iro.

⁶ Amo rajehu mu sisĕ vaeruomadĕhi
jemĕro i'uoho mana ĕhi bojĕmiromomo
röhu gö'o döro börömo bĕhe bojĕmirĕjo.

Jabuhu a ioro'ioro vörö'e jovo bojĕmanovamu ue'ahoromo ijumorovarĕhi
jemĕro ĕhi mana bojĕmirĕjo.

Röhu vörö ma-ma'e jovoho bojĕmego ue'ahoromo ijumorovo avoho'irarĕjo.

⁷ Urimo amo rajehu nimoronimorohĕ'i jijihoromo mahunö'e raromarĕhi
i'uoho mana ĕhi bojĕmego hara'uoromo huĕ vavaene baeruomo'irajo.

Magonahehu sarerivoromo uvajĕhi: Na magonaho börömĕro jevĕ'ĕro dö maro hijaje hĕjo.
Na bogo doruoho hijaje hĕjo.

Bogo mae bogo huĕ vavaenoho bae hesi jevajĕ uvajĕhi

ĕ amo rajohuro ĕhi gemuoho sarerivoromo uehorovoromo uvoruomaje hĕjo:
No masije javuajĕjo.

⁸ Ĕhuni majae gemuore jabesi i'uoho aho'obĕhe ma-majioho rue barĕ'iramu sisĕrĕjĕvo'a-
jĕjo.

Ae guomo guomo sisĕ baeromo vuovĕvo'ajĕjo.

Huĕ vavaene böröme jabesi örire rue'a'ajĕjo.

Hömo majae rue'a'ajĕjo.

Vĕnĕro ravĕvo barĕ'ajĕjo

ĕ hesi bĕhoho jabumĕ mevo gĕromomo i'u bojĕmaje aho Bada God-are darugoho börömĕro
jiĕ'ĕro.

⁹ Röhu sa'a gö gö a masijohuro ĕ amo rajohu'o bimumvoromo javoji'e muoho vaeromo
hesi inöme marohĕ'e mae ujuohoromo mahunö'e raromĕ'ĕro garöhe amoho vĕnĕro ra-
voromo u'ivo ajiomoiramu garuomoromo amo hesi jöĕni vavaenimoromo nierusuburu'e
bamoruomo'ĕ'e. ¹⁰ Nierusuburu'e bamoromo ĕ amore huĕ vavaeni börömo baejaruoho
garomo juhuonivoromo rori'o ĕgoböviro riravo'ĕ'ö. Riravoromo uvoruomo'ĕ'e:

Babylon vaevĕ'e amo börömo'hajo.

E-e vaevĕ'e biriri'e amohajo.

Jemesi i'uoho ma-majioho baejĕ'e jĕvavĕjo.

¹¹ Ĕhi uvoruomo'iramu sa'ae dinö'e dinö'e raromoromo inömo imoromo moni mana
ujuoharue ariböviohuro ĕ amo hesi jöĕni vavaenimoromo nierusuburu'e bamoruomo'ĕ'e.
Ĕhesi bĕhoho urimĕ'i ĕ amo rajehu imo'amarue a jabesi inömo imo'amoromo moni
bojĕminövaroho ĕ i'u baeröhe majare evare iae barĕ'ĕ'e. Barĕ'iramu ae bogojiĕ'ĕro
jabumĕ inömo'ho bogo imo'amoromo monioho bae'ĕ'ö. ¹² Jabesi gold silver munĕ gö
gö maho nienia maho bogo imo'amoromo monioho bae'ĕ'ö. Sanuovĕ'e niöge kavuĕ'e
nu ano'e gö gö ĕhu'o bogo imo'amoromo monioho bae'ĕ'ö. Ridi'e ije nu ano'e gö gö
ĕhu'o bogo imo'amoromo monioho bae'ĕ'ö. Inömo inömo mi danehu avoho'amaroho
ijo maehu avoho'amaroho rövĕ'e munĕ maehu ajaniehu munĕ nu ano'o göehu göehu
avoho'amaroho ĕhu'o bogo imo'amoromo monioho bae'ĕ'ö. ¹³ Rihu'e i maho ridi'e oso ihe
gö gö vĕniro buejego ridivajoho o sino avohorovaruoho o mu rabe rabe vaejaruoho ĕhu'o
bogo imo'amoromo monioho bae'ĕ'ö. Wine jovoho olive ijo bajo jovoho flour-ho wheat-ho
cow-ho sheep-oho horse-oho ĕhu'o bogo imo'amoromo monioho bae'ĕ'ö. Maratu mabĕhe
horse-ehu jagu bava'aruoho ĕhu'o bogo imo'amoromo monioho bae'ĕ'ö. Ae magonahe
aru'aho'e jtoruomajeje röhu mahu mi'o ĕ'aruĕhi ĕhi guduamo'amoromo imo'amarueje
ae gö jabesi muemu vaeröhego. Ae magonahe mi va'ĕne imo'amaruĕhioho ĕhioho bogo
imo'ĕ'ö. Ijonöho aho bogo imo'amo'iramu ĕhuni imo'amarue ariböviohuro nierusuburu'e

bamoruomo'ë'e. ¹⁴ Nierusuburu'e bamoromo uvoruomo'ë'e: Vaevë'e amoho ijo baje gö gö i'li ganiganiëgajoho iae barëjëhë'e höjo. Jemë inöme marohë'e mae o bövie bise'e ajivë'e ma-mabëhe jëvadoho sisërëjëhë'e höjo. Dinö'e röhu maho bihorohëjo. ¹⁵ Iae ë inömo amo rajo jabesi örire imo'amoromo mana marohë'e ma ujuoharohuro ë amo rajehu huë vavaeni vi'ehi börömo baejaruoho gëromo juhuonivë'ëro rori'o ëgoböviro riravo'ë'e. Ëgoböviro riravoromo huë vavaene baeromo nierusuburu'e bamoruomo'ë'e. ¹⁶ Nierusuburu'e bamoromo uvoruomo'ë'e:

E-e vaevë'e vaevë'e amo börömhajo.

Sanuovë'e niögu mabëhe kavuë'e ma-mabëhe io'amonövarije höjo.

Nieniae gold-ehu inömo göehu göehu avoho'amaroho gurasijiomoromo avohorovonövar-ije höjo.

¹⁷ Jaruvoho jemesi inömo marohë'o'oho ma-majioho ijumëhë'e höjo.

Boat muebe'amarue aribövioho boat ma'enarue aribövioho boat-re raromoromo mu vaeromo moni baejarue aribövioho boat-re va'arue a ioro'ioroho ëho jaburo rori'o ëgoböviro riravoromo ¹⁸ garöhe Babylon amoho vënëro ravoromo u'ivo ajiomo'iramu garuomoromo ma-darugo'o uvoruomo'ë'e: Sareri amo börömo böröme jiade höjo. Ëhi jië'e amoho urimoho bogojade höjo. ¹⁹ Ëhi uvoruomoromo vavaenimorovoromo tohotohoho jabesi simanore bu'ödivorovoromo nierusuburu'e bamoromo uvoruomo'ë'e:

E-e vaevë'e vaevë'e amo börömhajo.

Boat baeromo sö jovore va'arue ae aho'o noro ë amo rajore nosi inömo imëvoromo

manaho marohë'e mae ujuohë'e javuajëjo.

Jaruvoho ma-majioho sisërëjë'e höjo.

Ëhi uvoruomo'ë'e.

²⁰ Röhu ö'idö rajoho apostle ömo'ömo'ho jö God-aro baeromo majëhijarue aribövioho God-are aribövi ioro'ioroho jemëro nimorohore. Ëamo rajehu jemesi örire sisë'i vaejvaroho God-ro ëho gëromo ë hesi i'uoho mana bojëmijë'eje.

²¹ Röhu darugo'e anerae gemuëro munë ha'osi börömo börömo banigojiomoromo sö jovore bu'ö'ego jovo gagore be'abuehijo. Jovo gagore be'abue'ego anerahuro uvavohijo: Ëmunëhu e'ure be'abuejë'ëro ijonö bogo gavaruëhi amo börömo böröme Babylon i'ue baeromo ëhi ma-ioro'ioremu beva'oromo sisërë'iramu ijonöho bogo ga'a'anuëjo. ²² Gita bejaruoho jö iaruo'ho virikö huosiharuoho hëgö huaruoho ë hesi huëho ë amoroho ijonöho bogo he'a'anuëjo. Inömo javuo bövi bise'o avoho'amarue aribövioho ë amoroho ijonöho bogo birohëvo'anuëjo. I sa'ijovaje munë hunuohunuovo'ego garahörö'e baejajoho ë amoroho ijonöho bogo he'a'anuëjo. ²³ Iro bunö'irae'ego ajivajoho ë amoroho ijonöho bogo ga'a'anuëjo. A'o magonaho'o masurovoromo nimoronimoroharuoho ë amoroho ijonöho bogo he'a'anuëjo. Röhu amo rajomë urimo jemesi moni mu vaejarue ariböviohuro sa'a ioro'ioroho iosirëmiromo masije jëvade höjo. Jemëro sareri sareri'e muoho vaeromo sa'ae aho'o jabesi uehoroho ijumëharije höjo.

²⁴ Röhu jö God-aro baeromo majëhijarue ariböviohu'o God-are aribövi ioro'iorohu'o ë amore o dinö'e dinö'e raromaruoho muo'amamu vuovëvë'o'oho ë amo rajo jabesi sisë höjo. Iae ëhuni ë amoho sisërë'ajëjo. Anehuro ëhi uvohijo.

19

¹ Ëhi'amu hejodeje ae aho'o ö'idöre ma-darugo'o uvoruomavamu: God mabëhëjo. Huro gemuëro maroho bamavujaje höjo. Iho börömo'ho darugo maho nosi God hesiriremu höjo. ² God-ro ae mae o sisë jëvego gë'i avoho mevëvaje höjo. Ëhesi bëhoho ë önö'e juvaje magonaho böröme'ho sa'ae aho'o javoji'e mu röjëhiro'ho ijumëvadohuni ëhuni huro mevoromo uvade höjo: Sisë javo'ego sisëro va'a'anuëjo. Ëmagonahëhu God-are mu vaejarue aribövi muo'amëvadohuni ëhuni i'ue mana bojamijë'e höjo. ³ Ëhi uvoruomoromo röhu maho uvoruomohijo: God mabëhëjo. Ëamo börömo'ho vënehu ravaje u'oho ëhi ma-ajiomemu ajiomo'ajëjo. ⁴ Ëhi uvoruomo'ego rue a duvahe aho'obëhe 24-ho o God

rajahijarue maje 4-ho jaburo sa'are ague aho raromoromo God-hu röho mare hijajoho rajahiromo uaruomohijo: Ĕjöho iae mae-ėjo. God mabéhėjo.

Masu'iröhe söró God-are Sheep Harihehu bae'iröhe jöhoje.

⁵ Ĕhi uvoruomo'ego God-are röho mare uvavohijo: Nosi Börömo God mabéhe uarėjo. Hesi mu vaejharuje hu uehorovarue aribövi masijohu'o ininohu'o aho'o hesi öroro hué mae uarėjo. ⁶ Ĕhi uvoruomamu hejë'i naro hejodeje ae aho'obéhe uvorovuêhi jovehu ruomoromo uvajêhi varurehu anego hejaruêhi êhi uvoromo uvavamu: God mabéhėjo. Bada nosi God daruge aho'o baejë'e ahuro böröme namijajėjo. ⁷ Ĕhuni ë'ego no hué mae baeromo nimoroharėjo. Hesi ihoho mabéhe uavarėjo. Ĕhesi bëhoho God-are Sheep Harihehu masu'iröhe majaho rovë'e höjo. Huhu masu'iröhe magonahuro avohorovë'e höjo. ⁸ God-ro sanuovë'e ajivo avohë'e niögoho bojamamu ba'amë'e höjo. Ĕhi uvoruomavohijo. Röhu sanuovë'e niögu hesi bëhoho God-are ariböviehu mu ma vaejarue hesi jöhoje.

⁹ Ĕhi'ego ë anerahuro uehijo: Ave jöho jajivoromo uvonėjo: Ae rahu hejë'oho uëvamu: God-are Sheep Harihehu masu'iröhe söróho ro ihë uëvamu hejë'oho hué mabéhe jioruomo'ajėjo. Ĕhi uenugoromo uehijo: Ave jö hejanuoho God-are jö maho höjo. ¹⁰ Anerahuro êhi uevamu hejë'i naro hu uvene aho röjahi'irögoro hesi hör'u'ere ague aho hijodeje. Hiromo rajahi'irögoro ë'amu gegorovo uehijo: Bogave êhioho ë'iranėjo. Jaehu God-are mu vaejanue êhi jië'e mu vaejaje ae jevajėjo. O jasi ö mueno'ohu'o Iesuare jö mae uehorovoromo majêhijaruoho jabuhu Badare mu vaejaruêhi na'o êhi ë'aje ae jevajėjo. Ĕhuni nadi na rajehi'i God gemu rajahijėjo. Ĕhesi bëhoho Aru'aho gemuohuro jöe bojëmë'ego aëro ijönö jioröhe jöho majêhinövare höjo o avevej'oho Iesuare jöho majêhijarue höjo.

Mu Ma Uehorovaje Aehu sino ajivë'e horse-re hiromo va'oromo sisë ariböviohu'o muorovade jöhoje.

¹¹ Ĕhi uevamu gavodeje ö'idöho jiovë'e jiamu. Jiovë'e jiamu gagorovo gavodeje ae sino ajivë'e horse-re hijamu. Ĕa hesi ihoho Biririvoromo Mu Ma Uehorovaje Ahoje. Hu mevoromo gövuaje a mae o sisë javuego gövuajoho êho huro mae uehorovoromo ë'ajaje. O muorovajoho êhu'o huro mae uehorovoromo ë'ajaje. ¹² Röhu hesi nunoho vënëro höduvanovohijo. O hesi simanore a masijehu didi'aruêhi jië'e bosöho aho'obéhe didi'o'amë'e jiohijo. Röhu hesi sinore ihe jajivë'e jiohijo. Ae gö ë iho hesi bëhoho bogo ga'i hesi huro sivue gavajeje. ¹³ Hu köëremu jië'e niögoho ba'amë'e jiohijo. Röhu hesi ihoho God-are Jö jumuvë'ohoje. ¹⁴ Röhu ö'idöre jioruomaje muorovo ariböviohuro aji buse jië'e sanuovë'e niögoho io'amoruomë'e sino ajivo'amë'e horse-re raromoruomohijo. Raromoromo ë a börömo hesi ijore ijore jijihoruomohijo. ¹⁵ Röhu ë a hesi jö'ore anio ma'e kaejöho jiohijo êhuro God bogo uehorovarue aribövi sa'ae dinö'e dinö'e raramaruoho ruahö'öjêvoröhëro. Ruahö'öjêvoromo hujeju ha'itoho baeromo vörö'o muebejëvo'ë'e jaburo hu gemu ejahoruomoröhego. Muebejëvoromo aehu kavuë'e ö'i bajo munë guorötre hörehu taemotaemovoromo sa'ijovo'amaruêhi huro sisë aribövioho êhi hörëro taemotaemovo'amo'ë'e. Ĕhesi bëhoho daruge aho'o baejë'e aho God-hu dë vörönimego vörö röjëhiromo i'u bojëmijaje jöhoje. ¹⁶ Röhu hesi ahihonö niögu döre ihoho jajivoromo uvë'e jiohijo: Masijo vaeruomaje ae aho'o iosirëmiromo hu gemu döroho höjo. Ĕhi jajivë'e jiohijo.

¹⁷ Ĕhi'amu gavodeje anerae gemu maja nunire namijamu. Namiromo döre bioromo va'arue ugoho aho'obéhe ma-darugo'o uêhijo: God söró böröme bamajėjo. Rueromo gemuro gagovohėjo ¹⁸ êhuro sa'are masijo vaejarue a jabesi birogoho iromo muorovo a masijo jabesi birogoho darugo'e a jabesi birogoho horse jabesi birogoho horse-re va'arue aribövi jabesi birogoho mae o sisë'i rarumarue aribövi jabesi birogoho a masijo o a inino jabesi birogoho êho i'amo'irarije höjo. Ĕhi uêhijo.

¹⁹ Rõhu gavodeje urimo gavode mi sisëho o sa'ae dinö'e dinö'e masijo vaeruomaje aribövioho o jabesi muorovo aribövioho êho jaburo ë sino ajivë'e horse-re hijaje a börö-mohu'o hesi muorovo ariböviohu'o muorovo'i gemuoro gagovë'e jiamu. ²⁰ Muorovo'ego horse-re hijaje a börö-mohu'o hesi muorovo ariböviohu'o êho jaburo mi sisëhu'o mi sisë hesi sareri'e aru'aho jö majëhijaje ahu'o êhi guduamo baejëvo va'ohijo. Urimë'i ë jö sareri'e majëhijaje ahuro mi sisë hesi jöho ae sarerëmiromo darugo'o majëhiromo mi sisëhuni rôromo noehu bogo gavarue darugo'e muoho vaenövadeje. Darugo'e muoho vaeromo êhuro aho sarerëmi'ego ae rahu mi sisë hesi iho sinore baeromo hesi nu ano'o va'ëne inömo avoharoho uvene aho rôjahijë'oho guaro rireromo va'onövareje. Amo ë sareri'e aru'aho jö majëhijaje ahu'o mi sisëhu'o guduamëvoromo bogo anëgo'i ma-babu'öjëvo'ego vënehu munë ravoromo girosijiomoromo e'u börömo va'ëne jiajire ë bejëvo va'ohijo. ²¹ Bejëvo va'ego jabesi muorovo aribövi sisëho horse-re hijaje a börömo hesi jö'ore jioromo höröjade kaejöhuro muo'amohijo. Muo'amo'ego uge aho'obëhe ë aribövi jabesi birogoho ue'ahë'ëro dë bajo'e jio'amohijo.

20

Satan gua gagore vadune ëgobövie hi'iröhego tövoromo gua gago ëgobövire ba'amamu John-hu gavade jöhoje.

¹ Naro gavodeje aneraho ö'idöre jioromo gua ëgobövi hesi ojo jiovarue key'o biriri'e ö'ohu'o övëro ömëvë'e ruvebijamu. ² Ruvebiromo ë anerahuro ni'i'ivadire jiobe rovade sigobu börömo hesi ihoho Devil o Satan ë sigoboho guduamoromo tövohijo êhi jiobe va'ojuvo vadune aho'o 1,000 barë'iröhego. ³ Tövoromo ë gua ëgobövire ba'amo'ego beva'ohijo. Beva'ego ojoho tugohoniagivoromo sivaëro badilhi taemohijo êhuro hu bogo höröromo urimo ë'adëhioho sa'ae dinö'e dinö'e raromarue aribövioho sarerëmibe va'ego vadune aho'o 1,000 barë'iröhego. Rõhu vadune aho'obëhe 1,000 barë'iramu evare ojoho jiovah'iramu iae höröromo hibe juvoromo majae ma-bisemu barë'iramu evare barë'ë'e. Êhi jio'ë'e.

⁴ Êhi'amu gavodeje a masijoho rôho mare raromamu. God-ro urimo uëvamu darugoho baeruomadeje ae mevëvoromo gëröhëni mae o sisë jëvego. Êaribövioho rôho mare raromoruomohijo. O gavodeje a ioro'ioro jabesi aru'ahoho jio'amamu. Urimë'i ë ariböviohuro sa'are raromoromo God-are jö Iesuhu majëhijadoho ae majëhibe jijihamu gagorovo aëro ë mu maho bijönimoromo sönöe tarivëhamu vuovëvadeje. Vuovëvë'ëro ë aribövi jabesi aru'ahoho gëvodeje. Urimë'i ë aribövioho jaburo mi sisëho o ë mi hesi nu ano'o va'ëne avohare inömo bogo uvene aho rôjëhijareje. Êmi sisë hesi ihoho varijore o övore jajivëho'iröhoho bijönëgamu bogo baejareje. Bogo baejë'ëro vuovoromo i'ovë'ëro Keriso'o gemu mae masije vaejuvo vadune aho'obëhe 1,000 barë'hijo. ⁵ A ioro'ioroho bogo i'ovo'i ma-vuovo momorö'öjuvo vadune aho'obëhe 1,000 barë hesije. A'i naehu gëvode aribövioho i'ovoromo ri'öjë'e raromoruomohijo. Jabuhu i'ovoromo ri'öjare hesi bëhoho urimo ri'ö'iröhe majahoje. ⁶ Urimo i'ovoromo ri'ö'iröhe aribövioho huë mae jëvo'ë'e. God-are aribövi maho jëvo'ë'e. Urimo vuovëvadoho rôhu maho bogo vuovoromo sisëroho va'i a'i God-are o Keriso-are priest muoho vaeromo Keriso'o gemu mae masije vae'iramu vadune aho'obëhe 1,000 barë'ë'e.

Satan ruahö'öromo vëni ravajire ë bu'ö'iröhe jöhoje.

⁷ Vadune aho'obëhe 1,000 barë'iramu Satan jiovo nugö'ö'iramu höröromo va'ë'e. ⁸ Hörö va'oromo Gog sa'are Magog sa'are sa'ae dinö'e dinö'e ae sarerëmibe muorovojöro gagovëvobe va'ë'e. Sarerëmibe gagovëvobe va'iramu ae aho'obëhe muorovo'i gagovo'iramu nie'u va'ëne jio'ë'e. ⁹ Nie'u va'ëne jië'ëro sa'ae bövioho ruë numë tagavoromo God-are aribövie hesi amo börömore riravaruocho muorovëmi'i numëvo'ë'e. Numëvo'iramu vënëro ö'idöre jioromo ruvebiromo ravëvo barë'ë'e. ¹⁰ Ravëvo barë'iramu Satan ë aribövi sarerëmiromo gagovëvade aho babu'ö'iramu vënehu munë ravoromo girosijiomoromo e'u börömo va'ëne jiajire be'abue'ë'e. Urimo mi sisëhu'o hesi sareri'e jö majëhijaje ahu'o

ba'amëvego abo rireromo'iröhire ë be'abue'ë'e. Be'abueromo mi sisëho o sareri'e jö majëhijaje aho o Satan ëho jaburo vae majae hara'uemu hara'uobe va'ë'ö.

Ae aho'obëhe God-are nurire riravego jabesi muoho mae o sisë jiego God-hu ma-ioro'ioeremu mevoröhe jöhoje.

¹¹ Ëhi ë'ë'ö. Röhu gavodeje a masijehu raromarue ëhi jië'e ajivë'e röho bërömore ae gemu hijamu. Hi'ego aehu huruomo va'aruëhi sa'ahu'o ö'idöhu'o ëhi arua anumiae va'ego röhu ijoho bogojiohijo. ¹² Ëhi'amu gavodeje vuovëvë'e ariböviohu inore va'o masijore ë röho ma hesi nunire riravamu. Riravo'ego suri surioho jiovo'amohijo. Röhu suri suri göho ëho maro raromemu raromo'iröhe aribövi jabesi iho jajivo'amë'e suroho jiovhijo. O suri suri ioro'ioroho ëho ae aho'o mu vaebe rovere jöho jajivo'amë'e jiohijo. Ëröho mare hijaje ahuro suri surioho adahohijo ga'i di ahuro mu maho vaejë'e jiego di ahuro mu sisëho vaejë'e jiego. Ëho garomo uehijo: Mu mae vaejë'e javaje manö va'ëjo. Mu sisë vaejë'e javaje sisënö va'ëjo. ¹³ Vuovare aribövi ioro'iorohuro sö jove iromo vuovo momorö'öjë'ëro jië'ëro rojomoromo ioro'iorohuro vuovë'e ariböviohu raromaruire ë jioromo ri'öromo rueruomohijo. Rue'ego röho mare hijaje ahuro ae gemu gemu mevo garomo mu mae vaejadoho o mu sisë vaejadoho manaho ëhi bojami'ego baebe va'ohijo. ¹⁴ Röhu vuovarue vöröhu'o a vuovego bahijarue öri ari'ohu'o ëhu'o ma-ioro'ioeremu bu'ö'ego vënehu ravoromo e'u bërömo va'ëne jiajire ë abue'ego ijönöho vuovarue öroho bogojiohijo. Röhu vënehu ravoromo e'u bërömo va'ëne jiaje hesi bëhoho ae rahu sisë vaejë'ëro vuovoromo ri'öjë'ëro röhu maho vuovoromo ë e'u va'ënire abueröhe jöhoje. ¹⁵ Ae rahu mae raromemu raromo'iröhe surire hesi iho bogojie'öho ëhi jië'e ariböviohu ujuohe ruruhö'ö'ego e'u va'ëne vënehu ravajire ë rireromohijo.

21

God-hu ö'idö sa'a bövi bise'o i'o avoho'iröhe jöhoje.

¹ Ëhi'amu gavodeje ö'idö i'ohu'o sa'a i'ohu'o jiamu ö'idö mamiohu'o sa'a mamiohu'o sisërë barëjë'ëro. Sö jove urimo jiadoho bogojiohijo. ² Ëhi garomo gavodeje God-are amo bëröme hesi ihoho Jerusalem amo i'e ö'idöre God-hu hijajire jioromo ruvebijamu. Magonahehu masu'irögoro baruohuro gajöro sino avohorovaruëhi ë amo i'oho ëhi avohë'e jiohijo. ³ Ëhi jiamu gagorovo hejodeje röho mare ma-darugo'o uvavamu: Jöe hehëjo. Avevej'öho God-are javu maho a ririro jië'ëro huro a'o gemu mae hinövo'ajëjo. Jabumë hesi aribövie jëvo'i huro jabu'o gemu mae hiromo muebejëvonövo'ajëjo jabesi Bërömöro jië'ëro. ⁴ Muebejëvoromo nuni jovoho miorëho'ajëjo. Ijönöho aho bogo vuovëvo'i bogo nivö'i huë vavaenoho vi'ehoho bogo baeruomo'ajëjo mu mamioho mami'e barëjë'ëro jië'ëro.

⁵ Ëhi uvo'ego röho mare hijaje ahuro uvavohijo: Jöe hehëjo. Naro bövie bise'e i'ëremu bamajëjo. I'ëremu bamajë uvonugoromo uehijo: Ejöho bogo sareroho jio'i iae jö mae höjo. Ëhuni suroro jajivonëjo. ⁶ Ëhi ueromo uehijo: Muoho iae barëjajëjo. Na urimo ni'i'ivevadoho röhu ijo tugoho'ioho ëhi gemuoho jevo'ajëjo. Mue aho'o aevodoho ëhi vae barë'irodoho jevajëjo. Ae rahu huë girihëvë'öho naro sa'a gagore rojmaje jovoho vuoromo suvuore bojëmi'ejöjo ue'ahëgo i'ovëvo'iröhego. ⁷ Ae rahu mu sisë ruahö'öjë'öho aviëhi jië'e huë maho nasi örire bae'a'ajëjo. Na hesi Bërömöho God jevo'i hu nasi harihe jio'a'ajëjo. ⁸ A'i juhuonivoromo mu vuonugarue aribövioho sareri sareri'e aribövioho mu sisë gö gö vaejarue aribövioho a muo'amarue aribövioho önö'e jijiharue aribövioho iro oso'e vaejarue aribövioho inömo sisë aru'aho'e höromo uvene aho röjahi'amarue aribövioho jö sareri'e atarue aribövioho aho'obëhe ëhi jië'e aribövi jabesi öri ari'oho e'u bërömo va'ëne munë vënehu ravoromo girosijiomajire ë jio'a'ajëjo. Ëhesi bëhoho ë aribövioho mami'e vuovëvadoho röhu maho vuovoromo ë va'o raromoruomo'ajëjo.

Jerusalem amo i'o hesi jöhoje.

⁹ Röhu urimo anerae 7 ramare vöröho 7 otehö'öjamu evare bövie bise'e ijo tugoho'i sisërë'amadeje. Mami'e ëhi ë'are anerae aho'obëhe 7 röhu gemuëro rueromo uehijo:

Rovego na rōjahijego Sheep Harihu hesi vaboro i'e masuvajoho gavējo. ¹⁰ Ēhi uenugoromo God-are Aru'ahohuro nasi simanoho huotoveho'ego ē anerahuro baejevoromo dō mare ajiomoromo dahoru bōrōmo ēgobōvire ē ruehijo. Baejevo rueromo rōjehijamu gavodeje God-are Amo Bōrōme hesi ihoho Jerusalem ō'idōre God-hu hijajire jioromo ruvebijamu. ¹¹ Ēamohuro God-are ajoho baejē'ero ēhu'ero ajivohijo. Ajivoromo ma-mabēhe ajivo barējē'e jiohijo. Munē mabēhe hesi ihe jasper ajivajēhi ēhi ajivohijo. ¹² Rōhu ē amo hesi rejoho ēgo ēgobōvi mae jiohijo. Rejo hesi ojoho aho'obēhe 12 jio rova'ohijo. Anerae aho'obēhe 12 oje gemu gemu riravo rova'ohijo. Israel rajo jabesi agane 12 jabesi ihoho gemu gemu ojo ahore jajivo'amo va'ē'e jiohijo. ¹³ Maja hōrōjajinōho oje aho'o niō'i gemu jiohijo. Maja beva'ajjinōho oje niō'i gemu jiohijo. Ruēnōho niō'i gemu viēnōho niō'i gemu ēhi jiohijo. ¹⁴ Ēamo rejo hesi uhuroho munē aho'obēhe 12 ruh'ē'e jīē'ero ēhu'ero rejoho bibivoromo namihijo. Ēmunē ruho va'are ahore God-are Sheep Harihu hesi apostle ōmo'ōme 12 jabesi ihe gemu gemu jajivo'amo va'ē'e jiohijo.

¹⁵ Rōhu na'o jō jōvaje anerahuro gold-ehu avohare vahu baejaruoho ōvoro baejē'e jiohijo amo bōvi hesi vahuoho o amo rejohu'o ojohu'o ēho jabesi vahuoho bae'irōhēro. ¹⁶ Rōhu ē amo bōrōmoho ioni gōho ioni gōho ruhēnōho numēnōho vahuvojadoho hesi vahuoho magemuoho jiohijo. Anerahuro gold ahoho bava'oromo amo bōrōmo hesi vahuoho vahuovo garomo gavadeje amo hesi ēgoho 2,400 kilometre jio'i hesi bunohu'o dōre ajiomadohu'o jabesi vahuoho gemuoho jiamu. ¹⁷ O anerahuro amo hesi rejo vahuoho vahuovo garomo gavadeje rejo dōre ajiomadoho 60 metre jiamu. Jabuhu vahuovo gavaruēhi ēhi gavadeje. ¹⁸ Rōhu amo rejoho munē nu ano'o mabēhēro vaejē'e jiohijo. Munē hesi ihoho jasper-je. O amo bōvioho ma-gold-ēremu avohē'ero ma-ajēro jīē'ero ruēnōrire ōri ari'ohu'o ga'a'anue. ¹⁹ Rōhu amo rejo bibivo'irōhego rejo uhure bahijare munēho munē mabēhe nu ano'e gō gō avohoromo bahijē'e jiohijo. Munē number 1 hesi ihoho jasper ajivē'e ma-mabēhe jiohijo. Munē number 2 hesi ihoho saphire nuogu'e ma-mabēhe jiohijo. Munē number 3 hesi ihoho agate mahu guho'e jiohijo. Munē number 4 hesi ihoho emerald rōv'ē'e ijo hano va'ēne jiohijo. ²⁰ Munē number 5 hesi ihoho onyx hesi nu ano'e gō gō kavuē'e jionōvo ajivē'e jionōvihijo. Munē number 6 hesi ihoho carnelian kavuē'e jiohijo. Munē number 7 hesi ihoho quartz hōv'ē'e jiohijo. Munē number 8 hesi ihoho beryl ijo hano va'ēne jiohijo. Munē number 9 hesi ihoho topaz hōvo avohē'e jiohijo. Munē number 10 hesi ihoho chalcedony rōvoromo hōvanov'ē'e jiohijo. Munē number 11 hesi ihoho turquoise nuogu'e jiohijo. Munē number 12 hesi ihoho amethyst rōvoromo kavuanov'ē'e jiohijo. Munē aho'obēhe 12 jabesi nu ano'e gō gō ēhi jio'amohijo. ²¹ Rōhu rejo oje aho'obēhe 12 jabesi tugoharuoho ēho nienia ha'ose aho'obēhe 12 jiohijo. Oje gemu gemu nienia ha'ose gemu gemu ēhi jio'be va'ohijo. Rōhu amo hesi ōri bōrōmoho ma-gold-ēremu avohē'ero ma-ajēro jīē'ero ruēnōrire ōri ari'ohu'o ga'a'anue.

²² Rōhu gavodeje God rajahijarie javu bōrōmoho bogojiamu. Bada God daruge aho'o baejē'e ahu'o hesi Sheep Harihohu'o ēho jabu bēhi maro jēv'ēgo ēhuni bogo osaremuoho rajēhi'i dinō'e dinō'e God'o hesi Sheep Harihohu'o ē rajēhiruomohijo. ²³ O bēhoho rabēni majahu'o manaerohu'o ē amoroho bamoromo ajivojōro. God-are ajohuro amoho ajivoromo God-are Sheep Harihohuro iro va'ēne amoho ajivajeje. ²⁴ Ajivo'iramu sa'ae dinō'e dinō'e rarumarue aribōvioho ē amo hesi ajire jijihonōvo'ē'ō. Sa'are masije riravarue aribōviohuro jabesi bōvie bise'e nu ano'o mabēhe gavaruoho ē amore ujuoho rue'ē'ō. ²⁵ Ēamoroho vahioho bogojio'ē'e. Majae vahie bogojio'i ma-majae jiemu jio'iramu amo rejo ojoho bogo tugohonōvo jiovonōvo'i ma-ēhi jiovo nugo'ē'ō. ²⁶ Sa'ae dinō'e dinō'e rarumarue aribōviohuro jabesi mu maho inōmo maho ē amore ujuoho rueruomo'ē'e. ²⁷ Va'inumi'e muoho bogo mae bogo barueruomo'ē'e. Mu sisē gō gō vaejarue aribōvioho o sarerie'jō atarue aribōvioho bogo ē amoroho rueruomo'i a'i mae raroremu raromo'irōhe aribōvi jabesi iho Sheep Harihu hesi surire jajivo'amade ē aribōviohuremu ē amoroho rueruomo'ē'e.

22

¹ Ĕhi'amu iae ě anerahuro rĕjehijamu gavodeje a i'ovĕvorĕhe jovoho ajivo barĕjĕ'e rova'amu. Jovoho God'o hesi Sheep Harihohu'o jabuhu arijarue rĕho mare jioromo ruehijo. ² Rĕho mare jioromo rueromo amore ĕri bĕrĕmo hesi ririre rova'ohijo. Jovoho ririre rova'i a i'ovĕvo'irĕhe ijoho ionire ionire riravobe va'ohijo. Vadune gemu gemu rĕho vae 12 12 bajoho ĕhi raejajeje manaere gemu gemu. Ĕjjo hano hesi bĕhoho sa'ae dinĕ'e dinĕ'e raromarue aribĕvi marĕjĕvo'irĕhoho jiohijo. ³ A'i God-hu bijĕnimaje bĕvioho bise'oho ijonĕho ě dirĕ'oho bogojio'ĕ'e.

God'o hesi Sheep Harihohu'o jabuhu masijo vaeromo arijarue rĕho maho ě jio'ĕ'e. God-are mu vaejharue aribĕviohuro hu ě rajahinĕvo'ĕ'ĕ. ⁴ Rajahiromo hesi nu ano'oho ganĕvo'ĕ'ĕ. Hesi ihoho jabesi varijore jajivo'amĕ'e jio'ĕ'e. ⁵ Rĕhu vahioho ijonĕho bogojio'ĕ'e. Iro hesi ajohu'o maja hesi ajohu'o ajivĕvo'irĕhe bĕhoho bogojio'ĕ'e. A'i Bada God-are ajohuro ajivĕvonĕvo'ĕ'e. Ajivĕvo'iramu jabumĕro ioro'ioyemu masije riravoromo ĕri ari'oho muebebe va'oruomo'ĕ'e.

Iesu ruerĕhe jĕhoje.

⁶ Rĕhu ě anerahuro uehijo: Ave jĕe aho'o hejanuoho iae mae-ĕjo. Bogo sareroho hĕjo. Bada God hesi Aru'aho a jabesi simanore bamĕhego ae jĕ majĕhijarue aho God-ro hesi aneraho na remĕ'ĕjade hĕjo naro rueromo rĕjĕhijego hesi mu vaejharue aribĕviohuro garomo uvo'irarijego: God-ro nimo'ego majae ijonĕho ĕhi ĕhi jiĕ'e muohuro nosi ĕrire rue'ie'ajĕjo. Ĕhi uehijo.

⁷ Rĕhu Iesuro uve: Jĕe hehĕjo. Na ma-burĕro ĕ'ie'ajĕjo. God-are jĕ bĕrĕmoho ave surire jajivĕ'e hĕjo. Ĕhuni ae rahu eĕ'oho huĕ mabĕhe jioruomo'ajĕjo. Ĕhi uve.

⁸ Rĕhu naehu jajivode jĕ hesi muoho aho'obĕhe John naro heromo gavĕ'e jeve. Heromo ganugoromo ě mu rĕjehijade aneraho naro uvene aho rĕjahi'irĕgoro hesi hĕru'ere ague aho hijodeje. ⁹ Ĕhi'o'ego uehijo: Bogave ĕhioho ĕ'iranĕjo. Jaehu God-are mu vaejanue ĕhi jiĕ'e muoho vaejaje ae gemuoho jevajĕjo. O jasi ĕ mueno'ohu'o jĕ God-aro baeromo majĕhijaruoho o jaehu jajivanue surire jĕ ejaho'irĕhe aribĕvioho jabuhu God-are mu vaejaruĕhi na'o ĕhi ĕ'aje ae gemuoho jevajĕjo. Ĕhuni nadi na rajahi'i God gemu rajahijĕjo. ¹⁰ Ĕhi uenugoromo uehijo: Ijonĕ jiorĕhe mu hesi jĕ ave suri surire jajivanuoho nadi subivĕhonĕjo ě hesi majaho dunovĕ'e jiaje. ¹¹ Ae rahu mu sisĕ vaejaruoho ĕhi vaemu vaebe va'oruomo'ajĕjo. Ae rahu va'inum'i'e mu uehorovaruoho ĕhi uehorovemu uehorovobe va'oruomo'ajĕjo. Ae rahu mu ma vaejaruoho ĕhi vaemu vaebe va'oruomo'ajĕjo. Ae rahu God gemu uehorovaruoho ĕhi uehorovemu uehorovobe va'oruomo'ajĕjo.

¹² Rĕhu Iesuro uve: Jĕe hehĕjo. Na ma-burĕro ĕ'ie'ajĕjo. Jemesi mu hesi suvuoro ujuohoromo ĕ'ejĕjo mu diehi diehi mae o bisemu sisĕ'i sisĕ'i vaejarijĕhi ae gĕ gĕ suvuoro ĕhi bĕvie o bise'e bojĕmi'irodĕni. ¹³ Na urimo ni'i'ivevadoho rĕhu ijo tugoho'ioho ĕhi gemuoho jevo'ajĕjo. Na aevo'i jevadoho rĕhu ijonĕ jevo'ajĕjo. Mue aho'o aevodoho ĕhi vae barĕ'irodoho jevajĕjo.

¹⁴ Ae rahu niĕgu u'o'amaruoho huĕ mabĕhe jioruomajĕjo. Ĕhi jiĕ'e aribĕvioho naro uĕ'iramu a i'ovĕvo'irĕhe ijo hesi bajoho iromo amo rejo hesi ojoho ruahoromo amo bĕrĕmore rueruomo'ajĕjo. ¹⁵ A'i mu sisĕ gĕ gĕ vaejarue aribĕvioho iro oso'e vaejarue aribĕvioho ĕnĕ'e jijiharue aribĕvioho a muo'amarue aribĕvioho inĕmo sisĕ aru'aho'e hĕromo uvene aho rĕjahi'amarue aribĕvioho sareri'e mu nimoromo vaejarue aribĕvioho ĕhi jiĕ'e aribĕvioho ave amoroho bogo rueruomo'i ma-rori'o jioruomo'ajĕjo.

¹⁶ Iesu naro nasi aneraho nugĕ'ĕjĕ'e jevajĕjo ě jĕho huruoho majĕhijego ekasesiae gĕ gĕ he'irarijego. Na a bĕrĕme David-are ujoho jevajĕjo. Sisonuvego ajivaje mujĕroho va'ĕne jevajĕjo. Iesuro ĕhi uve.

¹⁷ Rĕhu God-are Aru'ahohu'o Sheep Harihehu i'e masuvade magonahohu'o jaburo niĕ'iro uvĕ: Ruehĕjo. O ave jĕ he'irarije aribĕvioho jemĕ'o uvore: Ruehĕjo. O ae rahu huĕ girihĕvĕ'oho jemĕro ruehe. Nimĕ'oho rueromo a i'ovĕvo'irĕhe jovoho ma-ire. Manaho bogojio'ĕ'e.

Ijo tugoho'i jöhoje.

¹⁸ Röhu John naro God-are jö börömoaho ave surire jajiv'e jeve. Ëhuni naehu jajivode jö he'irarije ariböviohumë ave jö majëhi'ië'ajoho avoho here. Naehu jajivode jöho ae rahu gö'o döre ëma jajivë'oho ave surire jajivode i'uoho God-ro ë aho bojami'ë'e. ¹⁹ O ae rahu uvë'oho: John-hu jajivade jö ë hesi vituoho sisë höromo dodure bu'öjë'oho God-ro uvo'ë'e: Ëhi jië'e aho sisë höromo dodure bu'ö'ë'e. Dodure bu'ö'iramu ave surire jajivode a i'ovëvo'iröhe ijo bajoho bogo i'ë'e. O ave surire jajivode God-are amo börömoroho bogo va'ë'e.

²⁰ John naehu jajivode jö mae hö uvaje Ahuro uve: Iae na ma-burëro ö'ië'ajëjo. Bada Iesu iae mae uvanue. De je rove.

²¹ Bada Iesuro jemë aho'o huë baeromo ajëminövo'ë'e. Ahia mino'e.